


Quiarinio pueyaso rupaa pa jiyaniija

Jesucristojiniji pueyano rupaajinia



New Testament in Arabela (PE:arl:Arabela)

Quiarinio pueyaso rupaa pa jiyanijia Jesucristojiniji pueyano rupaajinia

New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 25 Nov 2022 from source files dated 29 Jan 2022

90034700-94c6-5f48-ae9c-2383843fed68

Contents

MATEO	1
MARCO	86
LUCAS	138
JUAN	225
MIISHANO	289
ROMA	375
1 CORINTO	414
2 CORINTO	456
GÁLATA	482
ÉFESO	498
FILIPO	512
COLOSA	522
1 TESALÓNICA	530
1 TESALÓNICA	538
1 TIMOTEO	542
2 TIMOTEO	553
TITO	561
FILEMÓN	566
HEBREO	568
SANTIAGO	600
1 PEDRO	610
2 PEDRO	621
1 JUAN	628
2 JUAN	637
3 JUAN	639
JUDAS	641
NIQUISHANO	644

MATEO NAAJIOTASANO JESUCRISTOJINIJI

Jesucristo supuetanaajiniji pohuatasano

(*Lc 3.23-38*)

¹ Jesucristoori supuetana Abraham jiuahuacuajinio supueno quiquiaari, supuetana David niquiohuacuajinionio. Nioori Jesucristo supuetanaa sesaca. Naa quiquiaaritij:

² Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaca quejuhuaj. ³ Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niquiocua. Faresri Esrom que quiquiaari. Esromri Aram que quiquiaari. ⁴ Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. ⁵ Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isaí que quiquiaari. ⁶ Isaiiri David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Urías niquiocua.

⁷ Salomónri Roboam que quiquiaari. Roboamri Abías que quiquiaari. Abíasri Asa que quiquiaari. ⁸ Asaari Josafat que quiquiaari. Josafatri Joram que quiquiaari. Joramri Uzías que quiquiaari. ⁹ Uzíasri Jotam que quiquiaari. Jotamri Acaz que quiquiaari. Acazri Ezequías que quiquiaari. ¹⁰ Ezequíasri Manasés que quiquiaari. Manasésri Amón que quiquiaari. Amónri Josías que quiquiaari. ¹¹ Josíasri Jeconías que quiquiaari, tapueyocuaca quejuhuaj. Jiyacaritij, Israel pueyapueeri quoosaaquiaari Babilonia jiyajiniara. ¹² Babilonia jiyajinia, Jeconíasri tii mueratequiaari Salatiel. Salatielri Zorobabel que quiquiaari. ¹³ Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. ¹⁴ Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. ¹⁵ Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. ¹⁶ Jacoboori José que quiquiaari. Joseeri María niyaca quiquiaari. Cuno Mariari Jesu nucua quiquiaari. Jesu sesa tarajanuri quiquiaari Cristo. Nioori pueyano rupaajinia sequeya “Pueyaso jiayarosano Jiyaniijiarano”.

¹⁷ Naacuajitij, Abrahamjiniji, catorce supuetanaari quiquiaari Davidta. David nuhuaji, socua catorce supuetanaari quiquiaari. Jiyacaritij, Israel pueyapueeri quoosaaquiaari Babilonia jiyajiniara. Babilonia jiyajiniara nojori quoosaaanu nuhuaji, socua catorce supuetanaari quiquiaari Cristo jaara rasaaquiaari.

Jesucristo rasacari pohuatasano

(*Lc 2.1-7*)

¹⁸ Naa quiquiaariti Jesucristo rasacari: na nucuarano Mariari tari Joseeta camiriquiano quiquiaari. José numuetuqueyaqueishacarijia María, Mariari tariucua manajaraca quiriquiaa. Pueyaso Sohuanucuaaria na manajetequiaari. ¹⁹ Neyacarano José jaara niishiquiaari necorano tariucua manajaraca quiya, nojuajaari jiyahohua niishirioriquiaa na cartenura jiyasohuaja. Nojuajaari jiyaniquiaari tamonu

jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niquiara. ²⁰ Naa José niishiriojosacari na cartenura juucuatej, Pueyaso seruuri nocua mue-taquiaari na maquenujinia. José sequereeri:

—Supuetana jiyaniijia David niquiohuacuajinio supueno Joseenaa, María quia camiri naajaa. Maja quia puerenu. Pueyaso Sohuanu-cuajaari na manajorucuaa. ²¹ Maríari neyanu ranutaniya. Quiocua na sesojore “Jesu”. Sesa na pueya muijiosano tuujunutaniya nojori jiuujiainijiiri. Naaratej, na sesaari quiniutianiya “Jesu”.

²² Jesu rasaanuuri naa quiquiaaritij, tariucuacaanu pueyara Pueyaso sequencesano caminiujiunia pohuatasano tohuateenura. Pueyasoori naa na pohuataniquiaari jiyanolua tarijkeej:

²³ “Nia tojiri. Niyacoori manajenutaniya. Neyanu ranutaniyari. Na sesojonutaniyari ‘Emanuel’ ”.

Nioori pueyano rupaajinlia sequeya “Pueyaso pata quiyani”.

²⁴ José niucuasacari, nojuajaari naa miquiaaritij taa Pueyaso seru sequequiaari nojuacuajani. María riquiaariiri na tiajinaria necocuara.

²⁵ Nojoriiri maja na quiniu quiquiaari juhua seetanujuanaa camitioono, María jaara raquiaari neyanujuatijia. Jaara na raquiaari, na sesojoreeri “Jesu”.

2

Niishijiaca tiuquijiosacari conajaacua

¹ Jesuuri rasaaqviaari Belén tiacajinlia, Judea jiyajinlia. Cuno quishacari, Herodesri jiyaniijia quiquiaari Judea jiyajinlia. Jesu rasaanu nuhuaji, niishijiacaari tiuquijioquiaari Jerusalén tiacajinlia. Nojoriiri Jesu niquinuria tiuquijioquiaari jiya pajamaji. ² Nojori tiuquijiosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaarucuaani? Canaari niishiyani nojuajaari tari rasaarucuaa. Canaari na rijia niquiquianu jiya pajamajini, canaa jiyajinlia canaa quishacarijia. Canaari nocua niyareeni canaa shuquiritianura nojuaja, jiyaniijiarano na quiniuucua.

³ Jiyaniijia Herodes tojishacari naa niishijiaca sequencesanotej, jiyanolua tacaaquiaariiri. Puetunu Jerusalén tiacajinlia quiniaajanaari tacaaquiaarijuhuaj. ⁴ Nocuaji, Herodesri Judiocuacaacuara secojonaa sequequiaari nocua nojori nijionura, Moisés Rootasanojiniji niishitijonaanio. Nojori tiuquijiosacari nocua, Herodesri naa nequesoreetaquiaari nojori:

—¿Tee Cristo rasaanutaniyani, Judiocuaca jiyaniijiaranotej?

⁵ Nojoriiri na riucuaquiaari:

—Belén tiacajinlia rasaanutaniyano, niya Judea jiyajiniani. Naa naajiotasano quiyacuajaari Pueyaso sequencesano caminiujiunia sequencesano. Cuno tariucuacaanu naajiotasanocuajaari naa sequeyatej:

⁶ “Belén tiacajinlia quiniaanaa, nia tiacaari maja najuhuana shiitianiy-
ojua tiaca Judea jiyajinlia. Cuno nia tiacajiniani, Jiyaniijajanaa
cutaraari supuenutaniya. Nojuajaari socua cutara Jiyaniijajanaa
quiniutianiya tamasaca jiyaniijiacajiniji Judea jiyajinjinio.
Cunoori maninia jiitianutaniya cua pueya, Israel pueya”.

⁷ Naa pueya sequencesano na tojiniu nuhuajitij, Herodesri cuno jiya pajamaji nijiono niishijiaca nequesoreetaquiaari jiyasohuaja:

—¿Taacari rijia niquishaacanu seetanujuanaani?

⁸ Nojori riucuanu nuhuaji, Herodesri na sapojonuta nojori sequiaari:

—Nia quiaare Belén tiacajinia. Niocua jacaria nequesoreetasee cuno mueyajiniji. Niaa jaara na riuriatare, niocua cua numootecuhuaja. Janiyacua nocua quiaarejaaniuhuaj cua shuquiritianura nojuaja.

⁹ Niishijiaca tojiniu nuhuaji naa jiyajinija Herodes sequencesanotej, nojoriiri quiojiyareecuhuaj. Jiya pajamaji na niquitiushano rijia niquitiiri nojori puetaano. Rijiaari pootia tiuushii tia caco, tee mueya quiriquiaacuajani. ¹⁰ Nojori niquishacari rijia, niishijiacaari jiyahua timitiuquiaari. ¹¹ Tiaco tiuquitiaseeri. Conaaja niquitiushii na nucua Maríataari. Conaajaacuara mojoquetacoquiaarii. Na shuquiritiatureeri. Na nuhuaji, niishijiacaari na patootasano casaa riataquequiaari, nareya na niquitiosocoriquiano conaaja. Nojoriiri na niquitioquiaari oro, shanohua jaanutaja catijiasocoriquianojuhuaj, tamaatiucua shanohua jaanutajanio. Na sesaari tahue rupaajinia “mirra”. ¹² Na nuhuaji, Pueyaso cuno niishijiaca sequequiaari na maquenujinia, maja Herodescua nojori tacatenuhuara Herodes nojori pohutanuhuara conaajajiniji. Naacuajitij, niishijiacaari tamonu nucuacohua tacatequiaariuhua na jiyajiniohuara.

Egipto jiyajinira Jesu mashitiasaanujiniji pohuatasano

¹³ Niishijiaca jaara quiaquiaariuhua, Pueyaso seruuri Joseecua metaquiaari na maquenujinia. José sequereeri:

—¡Quia sanere! ¡Conaaja quia mashitiare na nucuata Egipto jiyajinira! Quiniqui nia quishii, janiya cuaara sequerohua quiajaniyajati-jia. Herodesri Belén tiacajinia na pueya pajetenutaniya conaaja, na motesocoriquiano.

¹⁴ Joseeri sanequiaari. Cuno niucuaja, conaaja mashitiaree na nucuatajaari Egipto jiyajinira. ¹⁵ Nojori tiuquishacari Egipto jiyajinia, tii quishiquiaarii, Herodes cuaara cusoorajaatijia. Nojoriiri naa Egipto jiyajinia quiquiaaritij, tariucuacaanu Pueyaso sequencesano tohuatenura maninia, Herodes cusionu nuhuaji. Pueyaso nuaa pohuatequiaari na sequenu panishano caminiuijuniacuaja:

“Cua niyanu piiriinijia, Egipto jiyajiniji na tacatenuhuara”.

Herodes puecootesacari muerasu

¹⁶ Jiyajinija Herodes jaara niishiquiaari cuno niishijiacaari na ruretaquiaari saaja, Herodesri jiyahua juaaquaari. Na pueya ji-yaroquiaari puetunu naatujoori canuuniyojuajanaa nojori puecoonura Belén tiacajinia, na shocuaqueya tiacajinia quiniaa muerasunio. Naa miiquiaarii Jesu na monura juucua. Herodesri na pueya seququiaari cuaara puecoosaaria puetunu shusha roosanojuanaa, mariyata canapuete caapiqui marijia shocoteo quiquiarijiani. Herodesri nuaa sequequiaari niishijiaca pohuatanuucua nojuaja, Jesu rijiaari tar-ijia niquisha aquiaari. Juhuanojuajaari maja caapiqui marijia shoco-jonu quiquiaari rijia niquishaanujiniji. ¹⁷ Naacuajitij, tariucuacaanu Pueyaso sequencesano caminiuijuni Jeremías sequencesanoori tohuateequiaari. Jeremías sequencesanoori nuaa naajiotasa aquiaaritij:

18 “Sapuenuuri tojishiya Ramá tiacajinia. Jiyanoqua taraatia. Raquelri necohuacua sariyacojiya. Majaari na paniniu na cumanijiasaanura. Necohuari tari puecoosaarucuaa”.

19 Na nuhuaji, Herodes jaara cusoquiaari, Pueyaso seruuri Joseecua muetaquiaariuhua na maquenujinia, Egipto jiyajinia nojori quishacarijia. 20 Na sequereeri:

—Quia sanere. Mueya quia tacaretaarohua Israel jiyajiniohua na nucuataja. Mueya monu panijiacaari tari cusionuurucuaa.

21 Joseeri sanequiaari. Mueya tacaretaquiaariuhua Israel jiyajiniohuara na nucuatajaari. 22 Israel jiyajinia na tiuquishacari, Joseeri numootesa aquiaari Herodes niyanu Arquelaori jiyaniijia quiriquiaa jiyacari, na que niti Judea jiyajinia. Nocuaji, Joseeri puerequiaari quiniqui na quiniuria. Jiyacarijuhuaj, Pueyasoori na niishitioquiaari na maquenujinia, tamocora na quianura. Naaratej, Joseeri mueya nucua pacuquiaari Galilea jiyajiniara. 23 Galilea jiyajinia nojori tiuquijiosacari, Nazaret tiacajinia quishiiri. Naacuajitij, tariucuacaanu Pueyaso sequencesano caminiujuunia sequencesanoori tohuateequiaari nojori jaara naa naajioaquiaaritij:

“Jiyaniquishaanutaniyari Nazaret tiacajinijino pueyano”.

3

Tiuquinijiona Juan pohuatasacari cariiquia jiyajinia

(*Mr 1.1-8; Lc 3.1-9, 15-17; Jn 1.19-28*)

¹ Na nuhuaji, tamonu pueyanoori cariiquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niquiara. ² Naa pohuataquiaaritij:

—¡Nioojia nia tacatore sesa nia miiniujinij! Pueyasoori tari nia jiyanooni paniya, na muerasu nia quiniuria seetanujuanaa.

³ Jiyanoqua tarijia, Pueyasoori na pueyano Isaías pohuataniquiaari miriqui na sequenu panishano pueyara. Isaásri naa na pohuataquiaaritij:

“Pueyano rupaari tojishaaree cariiquia jiyajinia. Naa nacajoriquiaari:
‘Nia jeecanamitiri Jiyaniijia nuu, maja mojoquetunu na quiniuria’”.

Tiuquinijiona Juanjanaacujaari nio tariucuacaanu pohuatasano tohuateequiaari, pueya na niishitiosacari nojori jeenucuanura nojori jiuujia Jesuucuaji.

⁴ Cuno Juan toqueeri camello cajacajiniji shitiasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariiquia jiyajinia na riuriasano sequeru, samiyatunio. ⁵ Pueyari Juancua quiojoquiaari na tojitianura. Queraatia pueyari nocua quiojoquiaari Jerusalén tiacajinijino, Judea jiyajinijinojuhuaj, puetunu Jordán moo shocuaqueyajinijinojuanaanio. ⁶ Pueya jaara pohuataquiaari Juan niquiara sesa nojori muijiosano, Juanri nojori tiuquinijioquiaari Jordán moojinia, Pueyaso tojijiara nojori quiniu panishacari.

⁷ Na tiuuquinijiosacari pueya, Juanri queraatia Fariseocuaca niquiquiaari nocua nijiyano, Saduceocuacanio. (Nojoriiri Moisés

Rootasanojiniji niishitiojonaa quiquaari.) Tiuquinijiona Juanri nojori sequequiaari:

—¡Niaaquiri sesa pueya, juhua sacocua! ¿Cante nia numooteree nia mashiniuria Pueyaso saniitionuucuaji niajaniyani? Nio pa quishacarini, quera Pueyaso saniitosacari jiyano hua na ruuretajaca pueya. ⁸ Niaa jaara seetanujuanaa nioojia tacatore sesa nia miiniujiniji, ¡saaja maninia nia miiri, maja sesa! ⁹ Majaari nia jiyani nia Pueyaso muerasu, Abraham niquiohuacuajinio supueno nia quiniuucua. Cua tojiri, Pueyaso jaara paniri, nojuajaari na naata Abraham niquiohuara shipininiu nio sajinijijiuhuaj. ¹⁰ Nio miriqui sequencesano nia tojirijiuhuaj pueyanaa. Naana jaara maninia jajau muetuyaquiri, na camaruuri na nuya na catijiasocoriquiano. Naajuhuaj, Pueyasoori quera saniitionutaniya niajaniya, na tojiyashijiaca nia quiniuucua.

Tiuquinijiona Juanri pueya sequequiaari socua:

¹¹ —Janiyari moojinia nia tiuquinijiyani, nioojia nia tacatosacari sesa nia miishanojiniji. Cua nuhuaji, tamonuuri niriquiano cutara. Nojuajaari jiyano hua socua jiyani jiajanaa janiyajiniji. Janiya maara jiyano hua shuquiriaatia quirini, nojuaja jaara cua sequere na seru cua quiniuria quenaaja na sapatu cua jocuanura nera. ¡Nojuajaari jiyani jiajanaa cutara! Nojuajaari Pueyaso Sohuanu tiuquinijionutaniya nioojajinaria, cumaacaraca nia quiniuria, seetanu Pueyaso muerasujuanaa nia quiniuria. Nia jeequenutaniyayaariuhua juhua manitia, sesa nia miishanojiniji. ¹² Nia tojitiare miriqui cua sequencesano. Trigo jaara rapijiosaare maninia, na camaruuri na queyaroojua, jiyocuacaanuji na totinijiasocoriquiano. Naa miquiaari paratu cuaara paara na cocua, na sucuanio, na jajau na racatanura tiajiniaaco. Naajuhuaj, cua nuhuaji niniaari tariucua pueca, na tojitanaa na rijionura na quiquojiniri, saniniuujia na tojiyashijiaca na quejoonura manijinia na saniitionura, tee mani maquesaaquiyacuajani.

Jesu tiuquinishacari moojinia

(Mr 1.9-11; Lc 3.21-22)

¹³ Na nuhuaji, Jesuuri tiuquiquiaari Galilea jiyajiniji Tiuquinijiona Juancua, Jordán moojinia. Tiuquinijiona Juan sequeseeri:

—Cua tiuquinirija.

¹⁴ Juanri saaja na sequeree:

—Maja Jiyani jianaa. ¡Quiaa cutaraari maninia pueyano! ¿Casaara cucua quia nimiaa cua tiuquininiuria quiajaniya moojiniani? ¡Cua tiuquiniri juhuari cutara!

¹⁵ Jesuuri saa sequereejaa:

—Quiarijia quia miiri cua parishano. Cua tiuquiniri naajaa. Maninia aari pa miiniuria puetunu Pueyaso parishanojuanaa.

Naacuajitij, Juanri na tiuquiniquiaari. ¹⁶ Jesu jaara tiuquinisha aquiaari, nojuajaari ritia tacaquiaari moojiniji. ¡Jiyacaritij, jiyacajiniocuaari riatequee! Jesuuri Pueyaso Sohuanu niquiquiaari nocua rosezano juhua mococo onu niquishano. Nocua tiuushiiri. ¹⁷ Jiyacaritij, jiyocuacaanuji Pueyaso rupaari tojishaaree naa sequeyano:

—Nioori cua Nyanuniyo jua. ¡Na shuquiritia jiyano huanijia!

4

Samaruhua jiyanijia saniniujushacari Jesu

(Mr 1.12-13; Lc 4.1-13)

¹ Na nuhuaji, Pueyaso Sohuanuuri Jesu jiyataquiaari cariiquia jiyanjiniara, Sesaaca saniniujushocoriquiano cuniqui.

² Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueyaquishacari. Na nuhuaji miajequiaarii. ³ Sesaacaari jiyacari nocua niquiaari na saniniujuniuria. Jesu sequeseeri:

—Quiaa jaara seetanujuanaa Pueyaso Niyanu quiri, nio sai quia jataniri panra. Quiocua na sarohua.

⁴ Jesuuri saaja na riucuaree:

—Maja. Pueyaso Rupaajinacuajaari naa naajiotasano quiyatej: “Pueyanoori maja na naatanu saa miaquesanoocuaja. Seetanujuanaa saminio quiya cutaraari na tojishacari puetunu Pueyaso Rupaa-janaa”.

⁵ Na nuhuaji, Sesaacaari Jesu jiyataquiaari Jerusalén tiacajinia. Na nujuatequiaari jiyocuacaanuuri, Pueyaso Secojojua tia cacojiria. ⁶ Na sequereeri:

—Quiaa jaara seetanujuanaa Pueyaso Niyanu quiri, niiquiji quia jaataare jiyocua. Pueyaso Rupaajinacuajaari naa naajiotasano quiya: “Pueyasoori na seja sequenutaniya na cojuanura quiajaniya. Nojoriiri quia quianutaniya, maja quenaaja saajiacua quia jiriataaquini-uucuaji”.

⁷ Jesuuri na riucuaree:

—¡Maja! Pueyaso Rupaajinaria, naa naajiotasanoori quiyajuhuaj: “Maja quia saniniujuniu quia Jiyaniijia Pueyaso”.

⁸ Na nuhuaji, Sesaacaari Jesu tacaniquiaari socua jiyanohua jiyanconaja tuhuananuucua. Cuniquiji na niquitirii puetunu jiya jiyaniijiacajanaari. Jiyanohua cumaacaraca quijiaca. Jiyanohua queraatia casamiriaca quijiacajuhuaj. Jiyanohua maninia niquishano. ⁹ Jesu sequereeri:

—Janiyacua quia jiyatere jiyaniijajanaara nojori nitini, quiaa jaara cua cariquimiaji mojoquetare quia shuquiritianura janiya, quia jiyaniijia cua quiniuria.

¹⁰ Jesuuri na sequeree:

—¡Niiquiji quia quiaare Satanásnaal! Naa naajiotasano quiyacuajaari Pueyaso Rupaajinaria:

“Saaja quia Jiyaniijia Pueyaso quia shuquiritiare cutara. Saaja nojuaja quia tojiri”.

¹¹ Na nuhuaji, Sesaacaari na tarinitiaquiaari. Jiyacaritij, Pueyaso seyari Jesuucua niquiaari na mianuutenura.

Jesu coteesacari poonijionu Galilea jiyajinaria

(Mr 1.14-15; Lc 4.14-15)

¹² Jesu niishishacari Tiuquinijiona Juan nujuatesaarucuua nujuatejo-juajinia, nojuajaari Galilea jiyajinaria quiaquiaariuhua. ¹³ Jesuuri Nazaret tiacajiniji pacuquiaari Capernaum tiacajinia na quiniuria, caminia shuriucua. Cuno jiya quiquiaari Zabulón niquiohuacuajinio supueno pueya jiya, Neftalí niquiohuacuajinio supueno pueya jiyonio. Zabulón, Neftalínio, nojoriiri supuetana Jacobo niquiohua quiquiaari. ¹⁴ Jesu

quishacari cuno jiyajinia, naa tohuateequaariiri taa tariucuacaanu Pueyaso sequencesano caminiujiunia Isaías pohuataquiaari cuno jiyajinijicuajani. Nojuajaari naa pohuataquiaari Pueyaso niishitiosano nojuaja taa na nuhuaji na sequencesano tohuateenutaniyani:

15 “Zabulón pueya jiya, Neftalí pueya jiyanio, cunoori caminia shuriuquiumia neteja nucuama quiya, mariyata Jordán moo tamajiria. Cunoori mariyata Galilea jiya, tee taucuaca quiyacuajani.

16 Cuno jiyajinia quiniaari ninishiqui quiijiaca quiquiaari. Quiarijija saniniujuria, nojoriiri jiuujia Cuhuatana niquiriucuaa. Nojoriiri cusionu pueretujuaca quiquiaari tarijia. Quiarijija cutara nojoriiri cuhuatasaaree nojori puereyaquiniuucuajii”.

17 Jiyacaritij, Jesuuri Pueyaso rupaa pohuatanu coteequiaari. Naa sequequiaariiri:

—Nioojia nia tacatore sesa nia miiniujiniji. Pueyasoori nia paniya na pueya nia quiniuria.

Jesu saquiriojosacari sapitiaaja ritiana

(*Mr 1.16-20; Lc 5.1-11*)

18 Jesuuri Galilea caminia shuriuquioco rucuanejoriquiaa. Jiyacaritij, Pedro niquiriiri, tarajanu Andrésnio. Pedro sesa quiquiaarijuhuaj Simón. Nojoriiri sapitiaaja ritiana quiquiaari shiyaruta. Nojoriiri jiyacari shiyaru jaqueroottariquiaa. 19 Jesuuri nojori sequeree:

—¡Miji! Cua tarajare. Cua pueyara nia quiri. Janiyacula nia jiyatere pueya quioojuara saniniunjia, juhua sapitiaaja quioonaa.

20 Nojoriiri na shiyaru tiujiaquiaari ritia. Jesuta quiojiyareeri.

21 Jesuuri shiitianijoju socua rucuanequiaari na taccoji. Socua caapiqui pueya riuriataseeri. Nojoriiri quiquiaari Santiago, tarajanu Juannio. Cuno pojori queeri quiquiaari Zebedeo. Nojoriiri na queta quiriquiaa botejinia. Na shiyaru cushipirijionuuriquiaari. Jesuuri Santiago sequeree Juannio, na pueyara nojori quiniuriajuhuaj. 22 Nojoriiri ritia bote tiujiaquiaari na queta, Jesuta na quiononura.

Jesu niishitiojosacari queraatia pueya

(*Lc 6.17-19*)

23 Jesuuri puetunu Galilea jiyajinajanaa rucuanejoquiaari na saquiriojosano pueyata. Pueyaso secojojua tiacajiniqueya niishitiojoriquiaari. Pueyaso rupaa pohuatariquiaari taa Pueyaso jiitianu paniya maninia na pueyani. Puetunu tamaatia cusionuunuijitiacojuajanaa naatanijioquiaariiri. Puetunu nootunejaca pueyajanaa shaataquiaariajuhuaj. 24 Naa maninia na miishanoori poojotasaaquiaari puetunu Siria jiyajinajanaa. Naaratej, pueyari Jesuucua patootaquiaari puetunu cusosuhuajanaa, puetunu tamaatia cusionu jijitajacajanaanio, cumatacuruhuana cusosuhuajuhuaj, nootunejacanio. Nocua jiyatasaaquiaarijuhuaj samaruhuaraca quiijiaca, canashiyaquiji cusojonuujuacanio. Jesuuri nojori naatanijioquiaari puetunujuanaa. 25 Jiyanoehua queraatia pueyari Jesu nuhuajiquiaari Galilea jiyajiniji, Decápolis tiacajinijinio. Na nuhuajiquiaarijuhuaj Jerusalén tiacajinijinio, Judea jiyajinijiniojuhuaj, mariyata Jordán moo taquijiria jiyajinijinionio.

5

*Jesu pohuatasacari Pueyaso rupaa tuhuananujiniji
(Lc 6.20-23)*

¹ Jesu niquishacari jiyanohua queraatia pueya nocua niyano, nojua-jaari tuhuananuucua tacaquiaari tiji na cajiniuria. Na saquiriojosano pueyari nocua catecanoquiaari. ² Jesuuri nojori niishitiojonu cotee-quiaari. Naa na pueya sequereeri:

³ —Shuquiriaatia quijiaca cutaraari noo pojori, canapuete niishiyani noojia sesa quiya. Nojoriiri Pueyaso pueyara quiriquiano, pueyara-caanu na jitianura nojori.

⁴ 'Shuquiriaatia quijiaca cutaraari noo pojori canapuete taraatia quiyani sesa na miiniuucua. Pueyasoori nojori cumanijianutaniya.

⁵ 'Shuquiriaatia quijiaca cutaraari noo pojori, canapuete maja tama nerajaaja niishirijojuacani. Nojoriiri nio jiya camaruhua quiniutianiya, taa Pueyaso sequequiaaricuajani.

⁶ 'Shuquiriaatia quijiaca cutaraari noo pojori, canapuete maninia quiniuucua jiaatiaa jiyanohuani, taa pa jiaatiaacuaa miaquenuucuani. Pueyasoori maninia quijiacara nojori jiyatenutaniya.

⁷ 'Shuquiriaatia quijiaca cutaraari noo pojori, canapuete naquiya miishanocua taraajejani. Pueyasoori nojoriicua taraajenutaniya-jaacuhuaj.

⁸ 'Shuquiriaatia quijiaca cutaraari noo pojori canapuete maninia jiu-ujiaracani. Nojoriiri Pueyaso niquinutaniya cutara.

⁹ 'Shuquiriaatia quijiaca cutaraari noo pojori, canapuete pueya jiyanootiootejani. Nojoricuajaari Pueyaso muerasu quiniutaniya.

¹⁰ 'Shuquiriaatia quijiaca cutaraari noo pojori, canapuete naquiya miishanoni, Pueyaso panishano nojori miiniuucua. Pueyasoori nojori jitianutaniya pueyaracaanu shuquiriaatia, na muerasu nojori quishacari.

¹¹ 'Shuquiriaatia quijiaca niajaniya, tamasaca jaara nia macaatiri cua tojitiajaca nia quishacari, naajuhuaj, nojori jaara miya naquiya niajaniya. Naajuhuaj, niaari shuquiriaatia quijiaca, nojori jaara saquiri-ojotare niaacuara na sapojonuta, maninia nia tojiniuucua janiya. ¹² Niaa jaara naa miishaaretej, jiyanohua nia timiquiore. ¡Shuquiriaatia nia quirijiuuhuaj! Pueyasoori cunora jiyanohua maninia nia miiniutaniya jiyocuacaanu nia quishacari nata. Tariucuacaanu Pueyaso seque-sano caminiujiuniaacuajaari naa naquiya miishaaquiaarijiuhuaj, nia supueyaquishaacarijiyojua.

Pueyaso muerasuuri juhua shoni quiya mijiria, juhua ninishi qui cuhu-atanaajuhuaj

(Mr 9.50; Lc 14.34-35)

¹³ 'Mijiria, niaari juhua shoni quiya, mijiria quinia mariqui socua seseyareeri. Shoni jaara na tiquiriiquia jatama, ¿maatucua taa tiquiri-iquia quiriohuani? Maja na naata. Shoni jaara naa quiritij, najuhuana quiyari, shaaca. Jiyano shoni cuaara jatasaria nuujinia, pueya rapi-jiosocoriquiano.

¹⁴ 'Naajuhuaj, niaari juhua ninishi qui cuhuatana mijiria quiniaara. Tiaca jaara tuhuananuucua quiri, majaari na naata na jamaaniu.

¹⁵ Naajuhuaj, pueya jaara samaritiu noshitiri, jiyocuacaanu moro-tashiyari, tiaco na cuhuatanura maninia, pueya niquinuria maninia

nocuaji. Majaari samaritiu niatasaaanu conatu cariquiaco.¹⁶ Naajuhuaj, niajaniya cuaara maninia miiria pueya niquiara. Maninia nia mishacari, niaari pueya cuhuataa juhua samaritiu. Naa maninia miijia nia quishacaritij, pueyari Jiyocuacaanu Quijia nia Que Pueyaso maniniuhuaqueetanutaniya.

Jesu niishitiojosanoori tariucuacaanu Moisés Rootasanojiniji

¹⁷ 'Majaari nia jiyaniyu janiyari niquiaarini Moisés Rootasano cua tarinitiniuria niajaniya, Pueyaso sequencesano caminiuiuniaa rootasanonio. Maja. Niquiaari cutaranijia puetunu cuno rootasanojuanaa cua tojiniuria, cua tohuateenurajuhuaj.¹⁸ Pueyanaa, seetanujuanaa nia sequenceyanija. Nio jiya quishacarijia, jiya cajiniocuanio, majaari quenaaja niquiriyatu naashanoniyojua Pueyaso Rupaajiniji shaajetesaaanu quiniutianiya. Majaari na shaajetesaaanu quiniutianiya puetunu Pueyaso naajiotesanouanaa cuaara tohuateerejaatija.¹⁹ Naaratej, tamonu pueyano jaara jiyaniyu tamonu rootasano tariucuacaanu Pueyaso Rupaajiniji najuhuana sequencesano, nojuajaari cocuaatia miya. Nojuaja jaara cuno tariucuacaanu rootasano tojiyaquiri, cuno pueyanoori socua rerequetesano quiniutianiya narta Pueyaso muerasujinjinio. Naajuhuaj, nojuaja jaara pueya niishitijoore nojori tojiyaquinuriuria cuno rootasano, cuno pueyanoori socua rerequetesano quiniutianiya puetunu narta Pueyaso muerasujinjjianaa. Saniniuuja, cante tariucuacaanu Pueyaso rootasano tojiquiaanijia, na niishitijoquiaa tamasacajaariuhuaj, cuno pueyanoori socua tojishano pueyano quiniutianiya Pueyaso shuriucua jiyocuacaanu.²⁰ Nia numooteyanijia, niaa jaara quiyaquiri socua maninia quijac Fariseocuacajiniji, Moisés Rootasano niishitijonaaajinjinio, majaari Pueyaso muerasu nia quiniu quiniutianiya.

Jesu niishitiojosano maja pa juaaniuria

(Lc 12.57-59)

²¹ 'Niaacuajaari tojiquiaari taa pa supuetanaa sequencesaaquiaaricuajani: "Maja monu. Cante pueyano monani, nojuajaari nequesoreesaanutaniya".²² Janiyari saniniuuja nia niishitijoijani, cante narta pueyanota juaajani, cunoori nequesoreesaanutaniya. Naajuhuaj, cante narta pueyano saariliojuani, cunoori nequesoreesaanutaniya jiyaniijianucua niquiara. Naajuhuaj, cante narta pueyano sesacareni, cunoori quera jatashiya mani quiqiojinia, pueyaracaanu saniitiosocoriquiano.

²³ 'Naacuajitij, nia niquitionu panishacari Pueyasora nia casaa, niaa jaara jiyacari niishiquii, quiaari quiarta pueyano juaatiriucuaa quiocuara, ritia quia tiujiare cuniqui quia niquitosocoriquiano Pueyasora, catijaja shuriucuani.²⁴ Quiarta pueyanota quia jiyanoootioocoocuara coteenu. Na nuhuaji cutara quia naata niquitionu quia casaa Pueyasora.

²⁵ 'Tamonu jaara quia jiyataa nequesoreenaacua, sesa quia miiniuucua nojuaja, maninia quia pohuatare ritia nojuaja, taa quia miiniutianiyan na jiyanooniuria quiajaniya. Ritia nia jeecatoore nucuaco nia quiasacarijia, quiaa mariqui nequesoreena niquitosaa-reeri. Nequesoreena naasucuaari quia niquitionutaniya nujuatejo-jua camarnu saniniuuja. Nojuajaari quia nujuatenutaniya nujuatejo-

juajinjia. ²⁶ Seetanujuanaa nia sequeyanijia, majaari quia tohuatanu quiniutianiya, quiaa cuaara niquitiorejaatija puetunu na sequesano cumaneecajanaa quia cumaneecajinji.

Jesu niishitiojosano, maja pa camishoo maajiicua pa jiaatiaquiniuria

²⁷ 'Niaacuajaari tari tojiquiaari nio tariucuacaanu rootasano: "Maja tamonu niquipocua numuetucunu". ²⁸ Janiya cutaraari nia sequeyan, pueyano jaara na camishoo maaji niquiri nocua na jiaatianuta, cunoori juhua na numuetucuree tari noojiajinia.

²⁹ Na nuhuaji, Jesuuri nio miriqui sequesano sequequiaari pueyara, jiyano hua na niishitiojonura nojori:

—Naaratej, quia miaquetajara quia namijia jaara sesa miitiri quiajanjia, quia namijia quia jiatere. Tamocora quia jatare. Quiajanjaya socua maninia cutaraari namijiji quia quiniuria, maja quia jatasaanura mani quiqojojinia puetunu quia cuaqueyatajanaa. ³⁰ Naajuhuaj, quia miaquetajara quia numatu jaara quia miitiri sesa, quia jiyatarenos. Tucuacaanu quia jatare. Socua maninia cutaraari quiara quia jiyatnura quia numatu, maja puetunu quia cuaqueyatajanaa quia jatasaanura manijinia, pueyaracaanu quia miiniuria naquiyia tii.

Naa na pohuatasacaritij, Jesuuri pa niishitiojiya maja pa tojiniuria poojia panishano, sesa na miitiniuria pa cuaqueya.

Jesu niishitiojosano maja pueya cartenura necocua

(Mt 19.9; Mr 10.11-12; Lc 16.18)

³¹ Jesuuri naa niishitiojoquiaarijuhuaj:

—Pa supuetanaari naa rootasaaquiaarijuhuaj: "Pueyano jaara necocua cartere, maaji cuaara niquitiosaaria naajionee, pueya niishinuria neyacaqui na carteree". ³² Janiyari saniniujia nia sequeyanijia, pueyano jaara necocua cartere, sesa miya Pueyaso niquiaari. Naacuajitij, na cartesano maajiiri tamonuta quiniutianiya na nuhuaji. Cunoori sesa Pueyaso niquia. Pueyano jaara niishiri necocuaari tamonu caya numuetucujutequia, saa cunoraja cutara na naata na cartenu. Pueyanori sesa miyajuhuaj, jaara cartesano maaji camiri.

Jesu niishitiojosano maja pa sapojonura

³³ 'Niaari taridja tojitiaquiaari taa pa supuetanaa rootasaaquiaarini. Naa rootasaaquiaari: "Majaari nia jatanu nia sequesano, niaa jaara sequere: 'Seetanujuanaari cua sequesano. Pueyasocuajaari niishiya majaari cua sapojonu' ". ³⁴ Janiya cutaraari nia sequeyan, nia sequesano jaara seetanujuanaa sequesano quiri, saaja nia sequere "jaa". Jaara seetanujuanaa quiyaquiri nia sequesano, saaja nia sequere "maja". Majaari nia sequesano nia maatenu najuhuana naatej: "¿Janiyate sapojuani? Cua rupaari juhua jiya cajiniocua. Maja na jatanu quiniutianiya". Majaari naa sequenutej pueyanaa. ¿Majateeri nia niishiniu, jiya cajiniocuaari Pueyaso quiqio? ³⁵ Naajuhuaj, ¿casaara nia sequeria najuhuanani: "Cua sequesanoori juhua pa jiya? Majaari na shaajenu quiniutianiya". Maja naa sequenutej. Pa jiya, cunoori Pueyaso niaja na niohuaca. Naajuhuaj, ¿casaara nia sequeria: "Cua sequesanoori juhua Jerusalén tiaca? Pueyaracaanu quiniutianiyari". Maja naa sequenutej. Jerusalén tiacaari pa Jiyaniijia Pueyaso tiaca. ³⁶ Naajuhuaj, ¿casaara nia sequeria nia najuhuanani: "Quia naataari cua sequesanoocua tiuuniu, cua naca quishacaricia"? Majaari naa sequenutej

pueyanaa. Niaa jaara naa sequeretej, nia niishiri, majaari nia naata quenaaja niquimi nia muesujinjinio nia jiyatenu taariuria, muerumuecaranio.³⁷ Naaratej, pueyaracaanu saaja seetanujuanaa nia sequere "jaa", "maja". Cante na seqesano maatejani, cunoori Sesaaca niishitiosano niajaniya.

*Jesu niishitiosano majaa pa naminuria
(Lc 6.29-30)*

³⁸ 'Niaacujaari tari rootasaaquiaari: "Pueyano jaara tamonu pueyano namijia cocuartare, na namijia cuaara cocuartasaariajuhauj, pueya nequesoreenaa niquiara. Naajuhuaj, pueyano jaara tamonu pueyano quiaja shaatare na pishacari, na quiaja cuaara shaatasaariajuhauj".³⁹ Janiyari saniniujia nia sequeyani, pueyano jaara quia miiniu paniri sesa, quia cuaqueya quia tarinitiare nera. Majaari na nujuatanu. Naacuajitij, pueyano jaara quia maseca piri, majaari juaaniu. Quia jiyanoori. Nojuaja jaara socua quia piriohua, quia jiyanoori. Majaari na naminiu.⁴⁰ Pueyano jaara quia toque jaariutianu paniri, nera quia tarinitiare. Cuaara na paara. Mariyata quia cushishano shiniquiaacuaji quia niquitiore nareja. Majaari jamueja quia quiniu.⁴¹ Tamonu camarnu jaara quia sequere na naacutanura na casami quia jatanura nuu cajiniocua, majaari na tarijionu. Saniniujia, shuquiriaatia quia naacutare na casami jatanura socua tucuacaanu na seqesanojiniji.⁴² Tamonu pueyano jaara quia casami masenu paniya nera, quia niquitiore nareja. Naajuhuaj, tamonu pueyano jaara quia casaa panu paniya nareja rupaquijiara, quia niquitiore. Majaari na ruuretanu. Capora quia quiri.

*Jesu niishitiosano pa paraca pa paniniuria
(Lc 6.27-28, 32-36)*

⁴³ 'Niaacujaari nio tariucuacaanu seqesano tojitiaquiaarijuhauj: "Quia shuriucua quinia quia paniri. Saniniujia, majaari quia paraca quia niquinii".⁴⁴ Janiya cutaraari nia sequeyani, nia paraa nia paniri. Nia sesacaja pueya nia maniniuhuaqueetare pueya niquiara. Pueyano jaara niaacuara saquieriojotare na sapojonuta, nocuara nia secojore Pueyaso. Sesa nia miniaacuara nia secojorejuhauj.⁴⁵ Naa maninia nia miishacaritij, niaari seetanujuanaa jiyocuacaanu Quijia nia Que Pueyaso muerasu quiniutianiya. Nia niishiri, Pueyasoori pananu muetaniquiaa sesa pueyara na janura, maninia pueyara na janurajuhuaj. Pueyasoori maru nitiquiaa maninia miijiaca pueyara, sesa miijiacarajuhuaj, maninia nojori nataacuaca moritianura.⁴⁶ Niaa jaara saaja nia panijiaca pueya panijia quiriquia, ¿Pueyasoteeri cunora nia shuquiritanutaniya, socua na casaajiniji na niquitionura niajaniya? Maja. Sesa miijiaca pueyani, noo pojori canapuete cumaneeca masejoquiaa na sapojonutani, nojoriiri maninia miiquiaa na panishano pueyajuhuaj.⁴⁷ Niaa jaara saaja nia panishano pueya saruhuataquiaa, ¿niaateeri cunora maninia miijiaca quiya Pueyaso niquiara? Maja. Pueyaso niishiyashijiaca pueyari naa maninia miiquiaa na panishano pueyajuhuaj.⁴⁸ Naaratej, maninia miijiaca nia quiri juhua jiyocuacaanu Quijia nia Que Pueyaso. Nojuajaari seetanujuanaa maninia mijia. Rimiajata miyashija cutara.

6

Jesu niishitiojosano saaja maninia pa miiniuria Pueyaso niquiara

¹ 'Tama nia cuaqueyajaaja nia cojuare maja maninia nia miiniuria saaja pueya niquiara, pueya maniniuhuaqueetanura niajaniya. Pueya jaara nia maniniuhuaqueetare maninia nia miiniuucua, nia Que Pueyasoori maja na niquitionu quiniutianiya niajaniya socua, maninia nia miiniuucua. ² Naaratej, niaa jaara casamijiuniucua pueya niquitionu paniri nareja nia casamijiniji, majaari juhua sesa jiuujiaraca pueya nia miiniu. Cuno pojoriiri pueya numootequiaa na niquitionu panishacari na casaa, puetunu pueyajanaa shootianura nojori. Cuno pojoriiri naa miiquiaaqui Pueyaso secojojua tiacajin, tiacaacacojuhuaj, pueya maniniuhuaqueetanura nojori. Seetanujuanaa nia sequeyanijia, cuno pojoriiri tari maseree narta pueya maniniuhuaqueetanu. Majaari nojori masenu quiniutianiya socua Pueyasojiniji naa maninia nojori miiniuucua. ³ Saniniuujia, niaa jaara nia cassajiniji casamijiuniucua niquitionu paniri nareja, quia mueneca cuaara niishiyaquiiria quia niqutiosano quia miaquetatata. ⁴ Naa miriqui sequeree niajaniyanija cua niishitiojonura niajaniya, jiyyasohuaja nia miiniuria puetunu maninia nia miiniu panishanojuanaa. Naacuajitij, saaja nia Que Pueyasoori jiyyasohuaja maninia nia miishano niishiniutianiya. Naaratej, nojuacuajaari nia niquitionutaniya na casamijiniji, na shuquiritiasacari niajaniya.

Jesu niishitiojosano naa pa secojonura Pueyaso

(Lc 11.2-4)

⁵ 'Nia secojosacari Pueyaso, majaari juhua sesa jiuujiaraca pueya nia miiniu. Cuno pojoriiri Pueyaso secojonu maniniucuaquiaa na nujuanuta pueya niquiara, saaja pueya shootianura nojori. Nojoriiri naa secojonuuquiaa Pueyaso secojojua tiacajiniatej, tiaca nuucuajinajuhuaj, tee queraatia pueya quiyacuajani. Seetanujuanaa nia sequeyanijia, cuno pojoriiri tari maniniuhuaqueetasaareecuaja. Jiyyano pueyatej, majaari nojori masenu quiniutianiya socua Pueyasojiniji. ⁶ Niajaniya saniniuujia, nia secojosacari Pueyaso, nia sohuacamara nia tiuquiri. Nia tiotu nia tiore. Na nuhuaji, cuniqui nia Que Pueyaso nia secojore jiyyasohuaja tamajaaja. Nia Que Pueyaso niquishacari naa jiyyasohuaja nia miishanotej, nojuaja cutaraari nia niquitionutaniya na casamijiniji, na shuquiritiasacari niajaniya.

⁷ 'Nia secojosacari Pueyaso, majaari nia sequenceso pacutejojua nia quiniu puera, juhua Pueyaso niishiyashijiaca. Cuno pojoriiri jiyanija Pueyasoori nojori tojiniutianiya pueyaracaanu na pacutejosacari taricua na sequenceso. ⁸ Majaari juhua nojori nia miiniu. Pa secojiyyaquishaacarijiyojua, pa Que Pueyasocuajaari tari niishiya casaa pa paniyani. ⁹ Naaratej, naate nia secojore:

"Canaa Quenaa, quiaa cutaraari jiyyocuacaanu Quijia. Pueya cuaara niishiiria quiaari saaja maninia quijia. ¹⁰ Quia quiri canaa Jiyaniijia, canaa quia jiitianura. Quia panishano cuaara miishaaria mijiria, taa jiyyocuacaanu na miishaquiaacuaani. ¹¹ Canaa quia niquitiore canaa miaquesocoriquiano quiarijiani. ¹² Canaa quia jiyanoori sesa canaa miishanojiniji, taa canaa jiyanooquiaa tamasacaculaani, sesa nojori miishacari canaa. ¹³ Majaari canaa quia shanacunu canaa saniniujushaanura sesa canaa miiniuria.

Saaja canaa quia cojuare cutara Sesaacaacuaji. Saaja quiajanjia cutaraari seetanujuanaa Jiyaniijajanaa. Quiaa cutaraari puetunu cumaacaracajanaa. Quiaari shanohua shacantuua qui-jia cutara. Quiaari naa quijia pueyaracaanutej. Tariucuaja”.

¹⁴Naatej, niaa jaara jiyanoori tamasaca, sesa na miishacari niajaniya, nia Que Pueyasoori nia jiyanooniutiani yahuaj. ¹⁵ Saniniuu{jia}, niaa jaara tamasaca jiyanooyaquiri, nia Que Pueyasoori maja na jiyanooni quiniutiani ya niajaniyahuaj sesa nia miishanojiniji.

Jesu niishitiojosano taate pa naata miaqueyaquiniuni Pueyaso pa sec-ojonura

¹⁶ 'Niaa jaara miaqueyaquiya Pueyaso nia secojonura, majaari macuhuajeconu pueya niquia, taa sesa jiuujiaraca pueya miiquiaacuaani. Nojoriiri nia miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujuanaa nia sequeya cutaranijia, narta pueyari tari nojori maninieuha que- etareecuaja. Majaari Pueyasojiniji nojori masenu quiniutiani ya socua. ¹⁷ Niajaniya saniniuu{jia}, nia miaqueyaquishacari Pueyaso nia secojonura, nia jiquioco nia jeequere. Nia canuure nia muesu, taa nia miiquiaa pueyaracaanucuajani. ¹⁸ Naa nia miiri Pueyaso nia secojosacari, maja pueya niishiniuria cunoqui miaajeya. Saaja pa Que Pueyaso cutara cuaara niishiiria nia miishano. Naacuajitij, nojuajaari nia niquitionutaniya na casamijiniji na shuquiritianuu{cua niajaniya.

*Pa casami pa racatare jiyocuacaanu Pueyaso shuriucua
(Lc 12.33-34)*

¹⁹ Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari na miaquenutaniya. Tiayarashiniutiani yajaariuhuaj. Nohuasenuuu{jia caari nocua tiuquinutaniya na nohuasenura. ²⁰ Nia racatare cutara nia casami Pueyaso shuriucua jiyocuacaanu. Tii cutaraari shaqua qui surequeya, shaqua tiyara. Naajuhuaj, nohuasejojuaari maja na naata nocua tiuquinu tii, jiyocuacaanuji nia casami na nohuasenura. ²¹ Nia jaara nia casami racatare mijiria, niaari nocua niishirionutaniya pueyaracaanu. Nia casami jaara racatasano quiri Pueyaso shuriucua saniniuu{jia, niaari Pueyasocua niishirionutaniya. Majaari nia tacaa-niu quiniutaniya mijiria casaacua tari.

*Pa cuaqueyajinie cuhuatanajiniji pohuatasano
(Lc 11.34-36)*

²² 'Pa namijaari juhua poo{jia cuhuatana. Naacuajitij, paa jaara sesa casaacua jiaatiaashijia quirini, poo{jiaari juhua cuhuashiqui quiya maninia. ²³ Niaa jaara sesa casaacua jiaatiajaca quiri saniniuu{jia, nioojiaari juhua ninishi quiya. Nioojia jaara sesa casaacua jiaatiajaca quiri, nioojiaari socua ninishi quiya cariyojuaru pueyanojiniji.

*Pueyaso panijia pa quiri, maja cumaneeca panijia
(Lc 16.13)*

²⁴ 'Maja nia naata poonijionu maninia caapiqui camarnura. Niaa jaara caapiqui camarnuraca quiri, niaari tamonu paniniutiani ya, niaari saniniuu{jia tamonu niquinu paniyaquiniutiani yacu{jua. Naacuajitij, niaari shuquiriaatia poonijionutaniya nia panishano camarnura. Niaari tamonu soojotanutaniyacu{jua. Naajuhuaj pueyanaa, majaari nia

naata Pueyasora poonijionu maninia, cumaneecaacua nia jiaatiasacar-
ijuhuaj.

Pueyaso na muerasu cojuaja

(Lc 12.22-31)

²⁵ 'Naaratej, nia sequeyanijia, maja puera nia niishiriojonu casaa nia miaquenutaniyani, casaa nia ratunutaniyani, casaa nia cushiniutaniyani. Pueyaso jaara pa shipiniquiaari pueyano pa quiniuria, ¿majateeri na niquitionu quiniutianiya pa miaquenu panishano, pa cushiniu panishanonio, maninia pa rishiniuria? Taaquiriirinij. ²⁶ Jiyocuacaanu jaacuatujuaca nia niquiricuua. Nojoriiri maja na natantu. Majaari na senoonu. Majaari nojori mishinijionu tiaco na miajajaura. Naajaa, pa Que Pueyasoori nojori niquitioquiaa na panishano. Nia niishiri. Niaa cutaraari socua Pueyaso panishano cuno jiyocuacaanu jaacuatujuacajiniji. ²⁷ ¿Nia naataate socua jiyaconajara maashiniu, jiyanolhua nia tacaaniutia? Maja.

²⁸ 'Naajuhuaj, ¿casaara nia tacaaquiaarini nia niishiriojosacari casaa nia cushiniutaniyani? Naana shuucuaca nia niquiriquiacuua. Nojoriiri maja na niishiniu poonijionu. Majaari na niishiniu na maniniushitiajara shitianujuhuaj. ²⁹ Seetanujuanaa nia sequeyanijia, pa supuetanaa jiyaniijia Salomónri jiyanolhua shanohua toqueya cushijia quiquiaari. Naajaa, na toqueeri maja socua shanohua niquishano quiquiaari cuno naana shuucuacajiniji. ³⁰ Naana shuuri saaja rupaquijia shanohua niquishano. Jaara sorere, namitiashiyari catijiascoriquiano. Pueyasoori naana shuu shipiniquiaari saaja rupaquijia shanohua niquishocoriquiano, na nuhuaji catijiascoriquianonio. Nojuaja jaara naa shanohua naana shuucuaca shipiniquiaari, ¿majateeri socua maninia na miiniu quiniutianiya niaara? ¿Casaara nia tiuyaquiya nia Que Pueyasooocuarini? ³¹ Naaratej pueyanaa, maja nia tacaaniu. Majaari nia sequenu: ¿casaa pa miaquenutaniyani?, ¿casaa pa ratunutaniyani?, ¿casaa pa cushiniutaniyani? ³² Pueyaso niishiyashijiacaari naa sequejacatej, puera nojori tacaashacari puetunu na panishano casaacuajanaa. Niaa cutaraari jiyocuacaanu quiija Queraca. Nojuacuajaari tari niishiya puetunu nia panishanojuanaa. ³³ Naaratej, coteenu nia niishiriojore Pueyaso tojijiara nia quiniuria cutara. Pueyasocua nia niquitiore puetunu nia panishanojuanaa. ³⁴ Naajuhuaj, majaari tariquiria nia tacaaniu. Saaja nia niishiriojore cutara, taa nia miiniutianiya maninia quiarijiani. Tariqui cutara niocua niishiriojore taa nia miiniutianiya maniniani. Tariucuaja quiarijia nia niishiriojosano nio juucara. Majaari socua tariquiria nia tacaaniu. Saaja nia Que Pueyasooocua nia tiuuri, juhuajaniya nia quiniuria.

7

Majaari quiarta pueyanoocuara soqueto nia quiniu
(Lc 6.37-38, 41-42)

¹ Maja niarta pueyano nia soquenu najuhuanaj, Pueyaso mariqui nia jiyanoaquirijaarijuhuaj. ² Taa nia sesacaquiaa tamasacacuaani, niaari naa sesacasaanutaniyajuhuaj. Naatej, taa nia miiquiaa tamasacacuaani, Pueyasoori mariyata naa miiniutianiya niajaniyajuhuaj. ³ Nio miriqui cua sequesano nia tojiri. ¿Casaara nia niquiya rucucua nia tarajanu

namijiajiniani, niaa jaara puereetuua maca jiitiae tama nia namiji-ajinijaaja cutara? ⁴ Maca nia jiitiasacari tama nia namijiajinijaaja, ¿casaara nia sequeya niarta pueyanoni: “Cuno rucucua pa taquiri quia namijiajiniji”? ⁵ Sesa jiuujiaracanaa, coteenu nia pare cuno maca nia namijiajiniji cutara. Na nuhuaji niocua maninia niquiri cutara, nia tarajanu rucucua nia taquiniuria na namijiajiniji. Nio miriqui cuá sequesanoorio sequeya: nioojia seque nia jeecare coteenu, na nuhuaji cutara niocua maninia nacasure niarta pueyano.

⁶ 'Majaari Pueyaso ruuretajaca nia niishitiojonu Pueyaso rupaa na-juuanaj. Cuno tojiyashijiacaari nia tojiyaquiniutianiya, naatej taa tamonu pueyano sare tojiyaquiquiaa niajaniyacuaani. Majaari Pueyaso soojeaca nia pohuatanu Pueyaso miishano shanohua niajaniyara. No-joriiri saaja rerequetenutaniya Pueyasojiniji nia pohuatasano, naatej taa cushiya rapijioquiaa marajinia juhuajaniya na niishishoo maninia casaacuaani.

Pueyaso pa secojorej

(Lc 11.9-13; 6.31)

⁷ 'Pueyaso nia secojore. Nojuajaari nia niquisitionutaniya nia masesano. Niaa jaara pajere, niaari nia pajesano riuriatanutaniya. Tohuateyaji nia piquiri, niaacuajiiri riatasanutaniya. ⁸ Cante Pueyaso maseya na panishanoni, seetanujuanaa na masenutaniyari. Naajuhuaj, cante pajejani, na panishano riuriatanutaniyari. Cante tohuateyaji piquijiani, nocuajiiri riatasanutaniyajuhuaj.

⁹ 'Mueya jaara na que nenecojore neecaruura, ¿na queteeri na niq-uitionutaniya saajia? ¡Maja! ¹⁰ Mueya jaara na que nenecojore sapiti-aajara, ¿na queteeri na niquisitionutaniya soconu? ¡Maja! ¹¹ Niajaniyari sesa miiniu niishijiaca. Naajaa, niaacuajaari maninia casaa niquisitionu niishijia, nia mueya jaara nia nenecojore. Nia Que Pueyaso cutaraari jiyanolua socua maninia niquisitionu niishijia, na muerasu secojosacari nojuaja.

¹² 'Pueyaracaanu maninia nia miiri tamasaca, taa nia paniquiaa pueya miiniuria niajaniyacuajani. Niaa jaara maninia miiriquia nio cuá se-quesano, niaari tari tojitiae maninia puetunu tariucuacaanu Moisés Rootasanojuanaa, tariucuacaanu Pueyaso sequesano caminiuijuniaa rootasanonio.

Pueyasoooca nuuri secanuniyojua

(Lc 13.24)

¹³ 'Pueyasoooca neteja nuu nia pajere, shiitianijojua nuuri tuneya. Saniniuuja, puereetuua nuuri neteya mani quiquipojiniara. Puereetuua na tuneja. Puereetuuaari neteya, cariyanujuhuaj. Naaratej, quer-aaatia pueyari juhuajaniya cuno nucuaco quiojija saniitiosocoriquiano. ¹⁴ Saniniuuja, shiitianijojua nuuri maninia cutara. Cuno nucuaco quiojonaari pueyaracaanu quiniutianiya Pueyasota cutara. Jiyanolua shiitianijojuaari cuno nuu tuneja. Secaja pueyari na riuriataa, cami na quionura.

Naanaari niishishano na jajaujiniji

(Lc 6.43-44)

¹⁵ 'Tama nia cuaqueyajaaja nia cojuare sapojonuujuacaacuaji, noo pojoriicuaji canapuete najuhuana sequejacuajani: “Pueyaso Rupaa po-huatananija”. Nojoriiri sapuenu juhua maninia pueya niquishano,

nojori sapojonura niajaniya. Nojoriiri sapuenu juhua borregoniyojua niquishano, seetanujuanaa juhua puereeta sare nojori quishacari, sayoru. ¹⁶ Niocua nojori niishiri, sesa nojori miiniuucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuuniateeri na naata muetunu cohuajaru? Maja. Naajuhuaj, cuno sesa jiuujiaraca pueyari maja na naata maninia miiniu. ¹⁷ Maninia naanaari, maninia jajau muetujua cutara. Saniniuujia, sesa naanaari, sesa jajau muetujuaaja. ¹⁸ Maninia naanaari maja na naata sesa jajau muetunu. Naajuhuaj, sesa naanaari maja na naata maninia jajau muetunu. ¹⁹ Naana jaara sesa jajau muetujua quiri, nushiyari, manijinias catijasocoriquiano. ²⁰ Naacuajitij, niocua cuno sapojonuujuaca pueya niishiri nojori miishanojiniji sesa.

*Saaja noojiaqueya pueyari Pueyaso muerasura quiniutianiya
(Lc 13.25-27)*

²¹ 'Cuno pojori canapuete cua sequejacani: "Cua Jiyaniijianaa, cua Jiyaniijianaa", noojiaqueya nojorijinjiniori maja nojori tiuquitianu quiniutianiya cua Que Pueyaso quiquiojinia. Saaja seetanujuanaa cua Que tojitiajaca cutaraari nocua tiuquitianutaniya. ²² Cua nequesoreesacari pueya nio jiya puequesacari, queraatia pueyari cua sequenutaniya: "Cua Jiyaniijianaa, cua Jiyaniijianaa, canaacuajaari quia rupaa pohuataquiaari pueya niquierani. Canaa sequsesacari quia sesa, canaari samaruhua tohuatanijioquiaari quia cumaacatani. Naajuhuaj, canaari cusosuhua naatanijioquiaarini quia sesa canaa jiyaniquishacari". ²³ Janiyari saniniuujia naa sequejaca riucuantaniyani: "Maja cua niishiniu niajaniya. ¡Nia quiojorohua! Niaari saaja sesa miijiaca quiquiaari".

*Jesu tojitiajaca miishanoori pueyaracaanu rishiniutianiya cutara
(Mr 1.22; Lc 6.47-49)*

²⁴ 'Naacuajitij, cante cua sequsesano tojijiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinie. ²⁵ Na nuhuaji, maruuri jiyanolua niquiaari. Moori pajaashiquiaari. Paratuuri jiyanolua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinie na nujuatasacari. ²⁶ Cante cua sequsesano tojiyashijia saniniunijia, cunoori moseeca. Cua sequsesano ruuretajaari taraatia quiniutianiya juhua moseeca pueyano. Moseeca pueyanoori jaaquijinie tiaquiaari. ²⁷ Maruuri jiyanolua niquiaari. Moori pajaashiquiaari. Paratuuri jiyanolua piyarojoquiaari cuno tiaacuara. Cuno pueyano tiaari pojotaquiaari. Na camaruuri jiyanolua taraatia quiquiaari na tia pojotasacari.

²⁸ Jesu jaara niishitiojonu puecaquiaari, pueyari jiyanolua jiuujiatieriquiaa na niishitiosano nojori tojishacari. ²⁹ Pueyari naa jiuujiatequiaari seetanu cumaacatajanaa Jesu niishitiosacari juhua jiyaniijianaa, maja juhua Moisés Rootasanojiniji niishitijonaa. Cuno pojoriiri nareja tariucuacaanu rootasano caminiujuquiaari pueyaracaanu.

¹ Jesu jaara tuhuananujiniji rosequiaariuhua na cojiniaata, jiyanohua queraatia pueyari na nuhuajiriquiaa. ² Tamonu pueyano cusosuuri jiyacari Jesuucua catecanoquiaari. Jiyanohua sesa cusionu jiitiaquiaarii. Tahue rupaajinia, cuno cusionu sesaari quiquiaari “lepra”. Pueyano shuuri juhua miaquesano quijia na cuaqueyajinia cuno cusionu na jiitiasacari. Cusosuuri Jesu cariquimiaji mojoquetaquiaari Jesu na sequenura na panishano. Naa na sequereeri:

—Jiyaniijiana, quia jaara paniri, niishiyacuajanija quia naata cua cusionu cushiriitiniu.

³ Jesuuri nocua taraajequiaari. Nocua niaree na juaashiquiaari. Na sequereeri:

—Jaa, paniyanijia. Cuaara cushiriiria quia cusionu.

—Jiyacaritij, ritia cushiriiquiiri! Jeequerohuari. ⁴ Na nuhuaji, Jesuuri naa na rootaquiaari:

—Cua tojiri. Maja tamasaca niquiara quia pohuatanu cua miishano quiajaniya. Saaja Pueyaso secojonaa jiyaniijia quia cuaqueya quia niquitiri, na cartenura quiajaniya, pueya tajinia quia rucuanejonuhuara juhuajaniya. Na nuhuaji, ritia quia niquitiore quia seru Pueyasoocuara catijiasocoriquiano. Naa quia miiritij taa Moisés niishitiojoquiaari tarijiacuajani, juhua jeequesano quia quiniuria Pueyasora. Naacujitij, pueyari niishiniutiani quiaari tari jeequerohua quia cusionujiniji.

Jesu naatanishacari Romano capitán seru

(Lc 7.1-10)

⁵ Jesu jaara tiuquiquiaariuhua na pueyata Capernaum tiacajiniohua, Romano soldadohua jiyaniijiaari Jesuucua niquiaari na secojonura Jesu.

⁶ Naa na sequequiaarii:

—Jiyaniijiana, cua seruuri cusosu mataa maquetujinia. Majaari na naata pooniniu quenaaja. Jiyanohua naquia miya na noonutaari.

⁷ Jesuuri na sequequiaari:

—Janiyacuajaari nocua quianutaniyani na cusionu cua shaatanura.

⁸ Soldadohua jiyaniijiaari na riucuaree:

—¡Maja jiyaniijiana! Janiyari maja pueyano maniniuni, cua tiajinia quia tiuquiniuria. Nareja quia sequere, cua seru cusionu cuaara shaateera tamajaaja. Niishiyacuajanija, quiaari na shaatanutaniya saa quia rupaataja. ⁹ Janiyari jiyaniijiaracajaniuhuaj. Na tojiquianija. Naajuhuaj, cua soldadohuari cua tojitaquiaajuhuaj cua sequesacari nojori. Naacujitij, janiya jaara tamonu sequereni: “Quia quiaare”, cunoori ritia quiaquia. Naajuhuaj, janiya jaara tamonu sequereni cuaara niiria, cunoori ritia niya cucua. Janiya jaara cua pataaco seru sequereni cuaara miiria cua panishano, na miiquiaari. Cua sequesano jaara naa tojishaquiaacuaa, quia sequesano cutaraari tojishaanutaniya.

¹⁰ Jesu jaara tojiquiaari naa cuno tahue sequestanotej, jiuujiatequiaari-iri. Na cojiniaa sequereeri:

—¡Seetanujuanaa nia sequeyanijia, majaari quenaaja parta Israel pueyajinjinio cua niquiniu quiquiaa Pueyasoocua tiuujia cutara, juhua nio tahue! ¹¹ Seetanujuanaa nia sequeyanijia, queraatia taucuacaari Pueyasoocua tiuujiacu quiniutaniya juhua nio tahue. Nojoriiri tu-cuacaanuji nijionutaniya pananu muetasamaji, pananu tiuquishocojijiuhuaj. Nojoriiri pa supuetanaata cajitiuniutaniya na miaquenuunura Pueyaso shuriucua. Tii quiniutaniya shuquiriaatiaari pa supuetanaata:

Abrahamta, Isaactajuhuaj, Jacobotanio. ¹² Parta Israel pueya, canapuete Abraham jinianuucuajinio supuenoni, nojoriiri saniniujia tamocora quejoosaanutaniya ninishiqui, nojori tojitiaaqiniuucua Pueyaso. Nojoriiri tii sariyocuatunutaniya naquiya na miishacari. Na quiaca mi-aquenuunutaniyari na noonuta. Nojoriiri juucua saquiriojosaquaaria Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jinianuucuajinio nojori quishacari.

¹³ Na nuhuaji, Jesuuri cuno soldadohua camarnu sequequiaari:

—Quia tiajinia quia quiaarohuaqui. Cuaara quiiriaqui taa quia se-quereecuajani.

Jiyacaritij, na seruuri ritia naataquiaariuhua.

Jesu naatanishacari Pedro reyarucua

(*Mr 1.29-31; Lc 4.38-39*)

¹⁴ Jesuuri quiaaree Pedro tiajinia. Tii Pedro reyarucua niquishiiri cusosu mataano na maquetujinia. Naseeca matariquiaari. ¹⁵ Jesuuri na juaashiquia quiassee. Na naseeca cusionuuri ritia na tajiquiaari. Ritia sanequiaariiri Jesu na mianuutenura.

Jesu naatanijiosacari queraatia pueya

(*Mr 1.32-34; Lc 4.40-41*)

¹⁶ Shusha ninishacari cuno juucaja, cuno tiacajinjinio pueyari quer-aa-tia samaruhuaraca pueya jaatucunuquiaari Jesuucua. Jesuuri cuno samaruhua tohuatanijioquiaari saa na rupaataja. Puetunu cusosuhua-janaa naatanijioreejaariuhuaj. ¹⁷ Naa tohuateequiaariti supuetana Isaiás naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cuso-yareeri puetunu pa cusionujuanaa na jatanura”.

Tamasaca pueya quiniu panishacari Jesu pueyara juucua

(*Lc 9.57-62*)

¹⁸ Jesu jaara jiyahua queraatia pueya niquiquiaari na shocua maano, na pueya sequereeri:

—Caminia taquijiria pa niuutiaare.

¹⁹ Jiyacaritij, Moisés Rootasanojiniji niishitijona pueyanoori Jesu sequeree:

—Niishitijonanaa, janiyari quia quianu paniyani. Janiyacua quia tarajareni puetunu tiquiyocuajanaa quia rucuanejosacari.

²⁰ Jesuuri na riucuaree:

—Quioojuapue cutaraari na raa jiitaa. Shuhuari na jesuhua jiiti-ajuhuaj. Saniniujia, pueyano cua quishacari mijiria, majaaari cua maquejara cua jiitianu quenaaja, taa cuno casami jiitiaacuua na maque-tujuaran.

²¹ Tamonu Jesu pueyajinjinioori Jesu sequeree:

—Cua jiyaniijiana, cua tarinitiare, cua que niquirijiaara. Janiya jaara na shaajareni, janiyacua quia tarajare cutarani.

²² Jesuuri na riucuaree:

—Naajaa, cuata quia quiaare cutara. Quia tarinitiare nojuaja. Ma-cunucua cuaara jamoora tama narta macujuaja. Naatej, cante Pueyaso tojitiaashijiacani, nojoriiri tariucua juhua macunucua quiya Pueyasora.

Jesu suraajasacari paratu, mohuacanio

(*Mr 4.35-41; Lc 8.22-25*)

²³ Na nuhuaji, Jesuuri botejinia tacaquiaari. Na saquiriojosano pueyari nata quiojoquiaari. ²⁴ Paratuuri senota piyarojonu coteequiaari nojori niutiasacari. Jiyanohua piyarojoriquiaari. Caminiaari jiyanohua queyocuariquiaa paratu piyarojosacari. Mohuacaari bote jiniacuma mishiriquiaa. Jesuuri jiyacari maqueriquiaa. ²⁵ Na pueyari cunora na niucuajasee. Jesu sequetureeri:

—¡Jiyaniijianaa, canaa quia naacutare! ¡Paa tari tiuquitiaareeni!

²⁶ Nojori riucuareeri:

—¿Casaara nia pueretiuyani? ¿Majateeri nia niishiniu Pueyasooocua tiuuniu?

Jesuuri saneree. Paratu sequereeri, mohuacanio:

—¡Niaaj, nia suraajere!

Paratu, mohuacaari ritia suraajequaari. ²⁷ Jesu pueyari jiuujiatequee. Tama nojorijiaarijia sequequiaari:

—¡Juhuej! ¿Taamueca pueyanotucuaanojoni? ¡Paratuuri na tojiya, mohuacajuhuaj!

Jesu tohuatanishacari samaruhua, caapiqui pueyajiniji Gadara jiyajinija

(*Mr 5.1-20; Lc 8.26-39*)

²⁸ Jesuuri na saquiriojosano pueyata tiuquijijoquiaari caminia taquijiria Gadara jiyajinija. Jiyacaritij, caapiqui pueyanoori Jesuucua tohuareetaquiaari raacajiniji, macunucua nucuhua paaquiosaquiji. Nojoriiri samaruhuaraca quiquiaari. ¡Jiyanohua pueya pueresano! Cuno nuccuaco, majaari pueya rucuanenu quijia, cuno pojori na puerenuucua. ²⁹ Samaruhuaraca caapiqui pueyanoori Jesuucua nacaturee:

—¿Casaacua miji quia niyani, Pueyasoo Nyanunaa? ¿Quiaate juhuacarijia niyaree canaa quia saniitionura Jesunaa?

³⁰ Jiyacaritij, cushiyari cateca naataja miaquenuriquiaa. Jiyanohua queraatia cushiyari quiquiaari. ³¹ Samaruhuari cuno caapiqui pueya pocuatequiaari. Naa Jesu secojoreeri:

—¡Quiaja jaara canaa tohuatanijiore nio caapiqui pueyajiniji, canaa quia jiyarore cuno cushiyacua canaa tiuquitianura!

³² Jesuuri cuno samaruhua sequeree:

—¡Nia quiaare!

Samaruhuari cuno caapiqui pueyajiniji tohuareetaquiaari. Cushiyacua tiuquitiaeeri. ¡Cushiyari cocuatequee! Saaja caminiajinia totesee tacojinijiiri. Cushiyari tii shushiniuushii.

³³ Cushiya cojuanaari netecuatuquiaariuhua na shiriliquinutiua na tiacajiniara. Nojori tiuquijiosacariuhua, pueya niquiaara pohuatatuquiaari cushiyajinijiiri, samaruhuaraca pueyajinijinio.

³⁴ Naaratej puetunu pueyajanaari cuno tiacajiniji njioquiaari Jesuucua. Nojori niquishacari Jesu, na sequetureeri nojori jiyajiniji na quianura tamaqui.

¹ Na nuhuaji, Jesuuri botejinia rosetaquiaari na saquiriojosano pueyata. Caminia taquijiria niuutiaquiaariuhuari tama na tiacajiniara-jaaja. ² Tii nojori tiuquijiosacari, Jesuucua patasaquiaarii cumat-acuruuhuana cusosu pueyano. Patasaquiaarii na matujinia. Jesu niquishacari taa na patanaa tiuuquiaari jiyanohua nocuani, cusosu sequereeri:

—¡Quia shuquiriri sanajanaa! Quiacuajaari tari jiyanoshaaree sesa quia miishanojiniji.

³ Noojaqueya Moisés Rootasanojiniji niishitiojonaari Jesu sequencesano tojitiariquiaa. Nojoriiri tama noojiajinajaaja niishiriojonuuquiaari: “¡Nio pueyanoori tama na cuaqueyajaaja jiyateya juhua Pueyaso na quiniuria naa na sequencesacari! ¡Cunoori jiyanohua sacuaraatia!”. ⁴ Jesuuri cuno pueya niishiriojosano niishiquiaari. Nojori sequereeri:

—¿Casaara sesa nia niishiriojiyani? ⁵ Seetanujuanaa, pueyano maja na naata jiyanoniu pueya miishano sesa. Naajuhuaj, majaari na naata tamajaaja pueya na naataninu. ⁶ Naajaa, janiyari nia niishitiniutianiyanjaniyari mijiria jiayrosaaquiaarini cua jiyanooniuria pueya, sesa nojori miishanojiniji.

Jiyacaritij, Jesuuri cusosu sequequiaari cuno pueya niquiara:

—¡Quia sanere! Quia matu quia pataarohua quia tiajinia.

⁷ Cusosuuri sanequiaari. Na tiajinia quiaarohuari. ⁸ Na niqui-tiushacari Jesu miishano, puetunu pueyajanaari shiriiquitiuquiaari. Nojoriiri Pueyaso maniniuhuaqueetaquiaari pueya na niquitionuucua na cumaaca, naa Jesu miiniuriatej.

Jesu sequencesacari Mateo na pueyano na quiniuria

(Mr 2.13-17; Lc 5.27-32)

⁹ Jesu quiasacari cuno tiacajiniji, tamonu pueyano niquiquiaari ca-jianoori cumaneeca masejojuajin Romano jiyanijiara. Na sesa quiquiaari Mateo. Nojuacuajaari janiya; nio naajionani. Jesuuri cua sequequiaari:

—Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

¹⁰ Na nuhuaji, janiyari Jesu masuuquiaarini cua tiajinia na miaque-nura, na pueyajuhuaj. Naacuajitij Jesuuri cua tiajinia tiuquitiaciaari miaquenura. Queraatia cuarta cumaneeca masejonaari canaa co-jiriquiajuhuaj, queraatia noo pojorijuhuaj, Fariseocuaca jiyaniqui-tiushano sesoriquia pueyatatej. Puetunu canaaajanaari Jesuta miaque-nuuriquiaani. ¹¹ Fariseocuaca jaara Jesu niquiquiaari miaqueyano canaata, nojori soosano pueyani, nojoriiri naa Jesu saquiriojosano pueya nequésotaree:

—¿Casaara nia niishitiojona miaqueya cuno sacuaraatia cumaneeca masejonaatani, sesoriquia pueyatani?

¹² Jesuuri naa nojori sequencesano tojirii. Nojori sequeree miriquiiri:

—Cante na cuaqueya jiyaniyani maja cusosu na quiniu, nojuajaari maja naarajona na paniniu. Cusosuhua cutaraari naarajona panijia. Naajuhuaj, sesa miijiaca pueyari cua paniya nojori cua jiyanooniuria sesa nojori mijiosanojiniji. ¹³ Niaa cuaara niishitiosuhuara socua, maninia nia niishiniuria casaa taricuacaanu Pueyaso sequencesano niishitiojiyani naa na sequencesacaritij:

“Niaacuajaari nia seja catijiaquiaa cucuara. Maninia juhuari nia taraajenura tamasacaacua. Cuno cutaraari cua shuquiritiasano”.

Naara niquiaarinija nia sequesano sesa mijjiaca cua jiyanooniuria sesa nojori miishanojiniji. Maja cutaraari mijiria cua niniu quiquiaari maninia pueyacua.

Pueya nequesotasano casaara Jesu pueya tarinitiaaquiquiaa quenaaja miaquenuni

(*Mr 2.18-22; Lc 5.33-39*)

¹⁴ Tiuquinijiona Juan pueyari Jesuucua niquiaari naa na nequesotanura:

—¿Casaara quia pueya tarinitiaaquiquiaa quenaaja miaquenuni, nojori secojonura Pueyasoni? Canaacuajaari miaquenu cartequiaani Pueyaso canaa secojonura taa Fariseocuaca miquiaacuaani.

¹⁵ Jesuuri nojori riucuaree miriqui:

—Pueyano camishacari, ¿na masuusano pueyatucua taraatia quiriiri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu quiniutaniya, janiya jaara nojori tajiniji rishaareni.

¹⁶ 'Socua cua tojitiare pueyanaa. Pueyano jaara cushipirijionu paniri na toque mocua, maja na naata quiarinio toquerau ruposaanu toque mocua cuhuocojinia, jeequesoojua na quishacari. Quiarinio toquerau jaara ruposaare toque mocua cuhuocojinia, na jeequesacari, posequenutaniyi. Cunota, toque mocua cuhuocoori socua sutenutaniya.

¹⁷ Naajuhuaj, majaari pa naata uva caaca racatanu shoque tariucuacojinia. Uva quiariniacu jaara racatasaree juucua shoque tariucuacojinia, jaara jerema vinora na quiniuria, shoque tariucuaco surtanutaniyi. Vinoori niitasaanutaniya najuhuanaj. Shoque tariucuacoori maja na naata tooniu, uva caaca jaara jerema. Naaratej, uva caaca nia shuujiore shoque quiariquojinia, maja najuhuana nia niitianura uva caaca. Naajuhuaj, majaari na naata cua niishitiosano cojitishaanu tariucuacaanu niishitiosanota. Cua niishitiosano nia tojitiare cutara.

Caapiqui maajipohua naatanijiosacari

(*Mr 5.21-43; Lc 8.40-56*)

¹⁸ Jesu pocuasacarrijia, nocua niquiaariiри Pueyaso secojojua tia camarnu. Jesu cariquimiaji mojoquetaquiaariiри. Na sequereeri:

—¡Quiyatuuri shusha cusoquee! Naajaa, miji, cuata quia quiaare. Niishiyanjia quia jaara niare nocua quia juaashiquia, samiitianutaniuhuari.

¹⁹ Jesuuri saneree. Nata quiaareeri. Canaa, Jesu saquiriojosano pueyani, canaari nata quiaareejuhuaj. ²⁰⁻²¹ Canaa quiasacari, tamonu maaji cusosuuri Jesuucua catecanoquiaari jiyasohuaja na paramaji. Cuno maajiri pueyaracaanu naatequaari. Doce marijiaari tari na shoconujuquiaari pueyaracaanu na naatesacari. Tama niishirioriquiaajaarijia: “Janiya jaara Jesu toque quaireni, cua nanacaari curetanutaniya”. Cunora, maajiri Jesu toque casaca quiaeet jiyasohuaja.

²² Jesuuri na nijiniara tacatequee. Cuno maaji niquiriiri. Na sequereeri:

—Shuquiriaatia quia quiri, sanaunaa. Cucua quia tiuushacari, quia nanacaari tari curetaquee.

Jiyacaritij, cuno maaji jiniacumaari ritia sacuantaquee.

²³ Jesuta canaa tiuquishacari Pueyaso secojojua tia camarnu tiajinia, canaari pueya niquishiini macura naajua joneneniuyano taraatia, sapiyoniyanonio. ²⁴ Jesuuri cuno pojori sequeree:

—¡Niiquipi nia tohuareetare! Nio maaji samiriuuri maja macu. Nareja maqueyano.

Pueyari Jesu saroojotaree saaja, naa na sequencesacaritij. ²⁵ Jesuuri cuno pojori tohuatanijioree saaja. Na nuhuaji, sohuacamara tiuquimiaari macuucua. Na juaashiquajiniji na quiaseeri. ¡Maaji samiriuuri sane-maa! ²⁶ Naa Jesu miishanojinijiiri pohuatasaquaari puetunu cuno jiyajinajanaa.

Jesu jeecasacari caapiqui cariyojuaru namijaa

²⁷ Canaa jaara tohuareetaquiaari cuno tiajinijini, caapiqui cariyojuaruuri Jesu nuhuajiquiaari. Canaa nuhuaji nacariquiaari nojori niishishacari Jesuuri seetanujuanaa Pueyaso Jiyarosano. Naaratej, Jesu sequeturiquiaari:

—¡Supetana David niquiohuacuajinio supueno pueyanonaa, canaacua quia taraajere quenaaja!

²⁸ Canaa tiuquishacariuhua canaa quijia tiajinia, cariyojuarujuriiri Jesuucua catecanoquiaari. Jesuuri nojori nequesotaree:

—¿Niaate cucua tiuya nia namijaa cua jeechanura?

Jesu riucuatureeri:

—Jaa, jiyaniijanaa. ¡Quia naatacuaaquinateejaj!

²⁹ Jesuuri na juaashiquia niaree nojori namijiaacua. Jesuuri cariyojuarujuri sequeree:

—Cucua nia tiuuniuucua, cuaara quiiria taa nia sequereecuajani,

³⁰ Cuno pojori namijiaari maniniujiaacara quiquiaariuhua. Jesuuri jiyanoehua nojori rootaree:

—¡Majaari tamasa niquiara nia pohuatanu cua miishano!

³¹ Na tohuareetasacari, cuno cariyojuarujuriiri ritia pohuatanu coteequiaari Jesu miishanojiniji. Naacuajitij, Jesujiniji niishishaquaariiri puetunu cuno jiyajinajanaa.

Jesu pocuatesacari tiquia pueyano

³² Cariyojuarujuri tohuareetanu nuhuaji, tamasa pueyari Jesuucua jaatucuquiaari samaruraca pueyano. Cuno pueyanoori maja na naata pocuanu quijia. Tiquiatuhuaj. ³³ Jesuuri samaru tohuatanirii cuno pueyanojiniji. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jiyanoehua jiuujiatequiaari. Sequetureeri:

—¡Naa miishanoori maja na niquishaanu quiquiaari Israel jiyajinia!

³⁴ Fariseocuacaari saaja Jesu macaatiquiaari pueya niquiara. Naa sequetureeri:

—Cuno Jesuni, nojuajaari samaruhua jiyaniijia cumAACaraca. Naacuajitij, na naata samaruhua tohuatanijionu.

Jesu tarajesacari pueyacua

³⁵ Jesuuri puetunu tiacajinajanaa rucuanejoquiaari Pueyaso rupaa na pohuatanura, puereetuca tiacajinia, shiitianiyojua tiacajinianio. Maninia rupaa pohuataquiaarii Pueyaso secojojua tiacajinialecta, pueya niishiniuria taa Pueyaso jiyanooni paniya nojorini. Naajuhuaj,

nojuajaari queraatia tamaatia cusionu naatanijioquiaari puetunujuanaa, nootunejacanio.

³⁶ Jesu shootiasacari pueya, nojoriicua taraajequaari jiyano huari. Pueyari taraatia niquishano quiquiaari, juhua tashuquioono pueya. Nojoriiri taraatia quijiaca quiquiaari juhua cojuasoo borregohua. Shaaqui na camaru. ³⁷ Cunora, Jesuuri canaa na saquiriosano pueya sequequiaari:

—¡Nia niquiri! Jiyano huia queraatia pueya. Cuno pojoriiri juhua puereetuua sucohua. Saniniujia, secajaari na senoona. ³⁸ Nocuaji nia sequeyanija, na Camaru nia secojore, nojuaja cuaara jiyaroora queraatia poonijionaa na senooriquiano nera.

10

*Jesu saquiriosacari doce pueya na jiyaramiquishocoriquiano
(Mr 3.13-19; Lc 6.12-16)*

¹ Jesuuri canaa na doce saquiriosano pueya sequequiaari na rootasano canaa tojiniuria, canaa na jiyaramiquyaquishacaricia. Jesuuri canaa niquitioquiaari na cumaaca, samaruhua canaa tohuatanijionura, cusosuhua canaa naatanijionura, puetunu noonujuanaa canaa shaatanurajuhuaj.

² Nioori canaa sesaca, na jiyaramiquishocoriquiano pueya sesacani: coteenuuri quiquiaari Simón. Pedroori na sesa quiquiaarijuhuaj. Pedro tarajanu Andrésri quiquiaarijuhuaj. Quiriquiaajaariuhua Santiago, tarajanu Juannio. Cuno pojoriiri Zebedeo niquiohua quiquiaari. ³ Felipeeri quiriquiaajuhuaj, Bartolomé, Tomásrio. Quiriquiaajaariuhua janiya Mateoni. Janiyari tarijia quiquiaarini cumaneeca masejojua Romano jiyaniijiara. Quiriquiaajaariuhua socua tamonu Santiago. Cuno Santiagoori Alfeo niyanu quiquiaari. Quiriquiaajaariuhua Lebeo. Na sesa tarajanuuri quiquiaari Tadeo. ⁴ Quiriquiaajaariuhua Simón. Nojuajaari Cananeo pueya maanujinjinio quiquiaari. Judas Iscarioteeri quiriquiaajuhuaj. Nojuajaari Jesu quiateriquiano quiquiaari mosocoriquiano.

*Jesu rootasano na pueya na jiyaramiquyaquishacaricia
(Mr 6.7-13; Lc 9.1-6)*

⁵ Jesuuri nio na doce pueya jiyaramiquiaari Pueyaso rupaa canaa pohuatanura. Coteenu, canaa rootaquiaariiri, canaa na jiyaramiquyaquishacaricia. Naa canaa sequequiaariiri:

—Majaari taucuacaacua nia quionou. Naajuhuaj, majaari nia tiuquiniu Samaria pueya tiacajinia. ⁶ Saaja parta Israel pueyacua nia quiaare cutara. Nojoriiri juhua borregohua tashuquioono quiya. ⁷ Nojori niquiara nia pohuatare puetunu tiacajinajanaa. Nojori nia sequare: “Pueyasoori quiarijia nia jiitianu paniya, niaa jaara na rupaa tojitiajacara quiri”. ⁸ Cusosuhua nia naatanijiore. Macunucua nia samitianijiore. Canapuete lepra cusionu jiitiaani, cuno cusionu nia shaajare pueya cuaqueyajiniji. Samaruhua nia tohuatanijiore pueyajiniji. Niaacuajaari nio cumaaca maseree nareja. Naaratej, nareja nia naatanijiorejuhuaj. Majaari cua cumaaca nia jamueno.

⁹ Majaari cumaneeca nia panu. ¹⁰ Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia

quiaare. Majaari nia panu nia miojotu. Nia naacutasano pueya cuaara niquitioora saniniuuja nia parishano.

¹¹ 'Nia rucuanejosacari, niaa jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tajinlia nia jijojetare, niaa cuaara cuniquiji quiaarejaatija. ¹² Niaa jaara tamonu tajinlia tiuquishiiquia, pueya nia sequere naatej: "Pueyaso cuaara nioojia cajitiiria". ¹³ Cuno tajinlia quiniae jaara maninia pueya quiri, juhuajaniya quiniutianiyari taa nia sequereecuajani. Nojori jaara Pueyaso tojiyashijiaca quiri saniniuuja, nojori jiuujiacaari cajitiyaquishaanutaniya. ¹⁴ Tamonu tia camaru jaara nia tiuquinitianu paniyaquiri na tajinlia, Pueyaso Rupaa ruuretajaca nojori quiniuccua, nojori niquiara nia niohuacaacuaji nia rapijotare jiya joocua. Naacuajitij, cuno pueyari niishiniutaniya Pueyasoori nojori jiyano aquiniutaniya, nojori maseyaquiniuucua na rupaa pohuatanaa. Naa nia miirijiuhuaj cuno tiaca pueya niquiara, cuno pojori jaara Pueyaso rupaa tojinii paniyaquiri nia pohuatasacari. ¹⁵ Seetanujuanaa nia sequeyanijia, jiya puequesacari, cua nequesoreesacari pueya, cuno pueyari jiyano hua saniitiosaanutaniya socua Sodoma tiaca pueyajiniji, Gomorra tiaca pueyajinijinio.

Pueyaso rupaa pohuatanaari naquiya miishaanutaniya

¹⁶ 'Socua cua tojitiare. Janiyari nia jiyaroya Pueyaso tojitiaashijiaca niquiara nia pohuatanura cua rupaani. Niaari nojori tajinlia puereeta quiniutaniya, naatej, taa borregohua quiya sayoru tajiniacuaani. Nojoriiri sesa miiniutaniya niajaniya. Nocuaji jiyano hua niishijiaca nia quiri, tama nia cuaqueyajaja nia cojuanura. Naajaa, majaari nojori naminiu. Saaja maninia nia quiri juhua noseja, pueyano porocua. ¹⁷ Tama nia cuaqueyajaja nia cojuare tamasaca pueyacuaji. Cuno pojoriiri nia jiyatanutaniya tiaca jiyaniijianucuaacua nia saniitiosaanura, nojori tojinii paniyaquishacari cua rupaa. Niaari Pueyaso secojojua tiacajinia piquishaanutaniya. ¹⁸ Cua rupaa nia pohuatanuucua, niaari quioosaanutaniya tiaca jiyaniijianucuaacuara, nojori nequesoreenura niajaniya. Niaari jiyaca jiyaniijianucua niquitiosaanutaniyajuhuaj. Naajaa, naacuajitij, niaari nojori niquiara pohuatanutaniya janiyajiniji, taucuaca jiyaniijianucua niquiaranio. ¹⁹ Niaa jaara jiyaniijianucua tacoji nujuatesaare nequesoreesocoriquiano, majaari nia niishirionon taa nia riucuanutaniyani. Nia riucuanu parishacari, niaari jiyacari niishitiosaanutaniyacuaja maninia nia riucuanura. ²⁰ Naacuajitij, nia riucuasanoori maja tama niajaniyajinijiaaja quiniutaniya. Pueyaso Sohuanu cutaraari nia pohuatenutaniya jiyaniijianucua niquiara.

²¹ 'Pueyari tama tarajanuujaaja niquitionutaniya mosocoriquiano, tarajanu tiuushacari cucua. Pueyanoori neyanu niquitionutaniya mosocoriquiano, cucua neyanu tiuuniuucua. Mueraasapueeri tama na queya tacartanutaniyajacuaja na motenura, na queya tiuushacari cucua. ²² Puetunu pueyajanaari nia niquinii paniyaquiniutaniya, cucua nia tiuushacari. Naajaa, cante seetanujuanaa cucua tiuujia quiya pueyara caanuni, nojuaja cutaraari jatanishaanutaniya pueyaracaanu shacantuca quijia na quiniuria. ²³ Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanura. Seetanujuanaa nia sequeyanijia, juhuanojuaja nia tucuataaquishacarijia pohuatanu Pueyaso rupaa

puetunu Israel pueya tiacajinajanaa, janiyari jiyocuacaanuji tacatenu-taniuhuani.

²⁴ 'Nio nia niishirijiujuaj. Pueyanoori maja socua tojishano na niishitiojonajiniji. Naajuhuaj, seruuri maja socua tojishano na camarnujiniji.

²⁵ Pueyano jaara maninia tojiriquia na niishitiojona, maniniacuajaari nojuaja jaara na nuhuaji juhua na niishitiojonara quirijiujuaj. Manini-acuajaari, seru jaara juhua na camarnura quirijiujuaj. Naaratej, nia Jiyaniijia jaara jiyaniquishiyacuaa "Sesaacata", ¿taariquitija socua na muerasu sesacasaanutaniyatej?

Cante socua pa pueresanoni

(Lc 12.2-7)

²⁶ 'Naaratej, majaari nia puerenu niarta pueya. Puetunu jiyasohuaja pueya miishanojuanaari niishishano quiniutianiya. Puetunu pueya see-tasanojuanaari niishishaanutaniyajuhuaj. ²⁷ Jiyasohuaja cua niishitiosano niajaniyani, cuno nia pohuatare puetunu pueya niquiarajanaa. Cua sasacojosano nia numaa pajamani, cuno nia nacatare puetunu pueya niquiarajanaa. ²⁸ Majaari nia puerenu pa puecojuaca. Nojoriiri maja na naata pa sohuanu monu. Saaja nia puerere cutara nooj, cante cumaacaracacuajani mani quiqojinia nia sohuanu na quejoonura, nia cuaqueyanio.

²⁹ 'Pa naata saaja niquiriyatu cumaneenijojuata caapiqui shiyojuaniyoja masenu pa miaquesocoriquiano. Naajaa, pa Que Pueyasoori puetunu cuno shuhua niishiyajanaa. Naacuajitij, majaari quenaaja niquiriyatujua shiyojua cusionu Pueyaso paniyaquishacari. ³⁰ Naajuhuaj, Pueyasoori puetunu nia naca cajasu niishiyajanaa. Puetunujuanaari na serojosano quiya. ³¹ Naacuajitij, maja nia puerenu. Niaari jiyanolua socua Pueyaso panishano queraatia shuhuajiniji.

Maja cumaati Jesucristojiniji pa caririquiniiu

(Lc 12.8-9)

³² 'Niaa jaara tamasaca pueya niquiara sequere niaari cucua tiuujiaca cutara, janiyacua jiyocuacaanu quiija cua Que niquiara sequere-janiuhuaj, niaari cua muerasu. ³³ Cante saniniuujia cucuaji seetaja tamasaca niquiarani, janiyari cua Que niquiara na tamacanutaniya-jaacuhuaj.

Jesuucua tiuujia pueyari narta pueya juashano

(Lc 12.51-53; 14.26-27)

³⁴ 'Majaari nia jiyaniiniu janiya mijiria niquiaarini pueya quiniuria juhuajaniya. Maja. Mijiria cua niniuucua, pueyari juayonuujutanutaniya. ³⁵ Niquiaari cutaranijia pueya tiuuniuria cucua. Naacuajitij, pueya tiuushacari cucua, cucua tiuyashijiaca pueyari nojori niquinu paniyaquiniutianiya. Naacuajitij, pueyanoori na que paracaaniutianiya, cucua tiuujia na que quiniuucua. Maajiiri na nucua paracaaniutianiyyajuhuaj, na nucua tiuuniuucua cucua. Pueyano niquiocuaari na reyarucua paracaaniutianiyyajuhuaj, cucua tiuuujia na reyarucua quiniuucua. ³⁶ Naacuajitij, tama pueya panishano pueyajaajaari na paracara quiniutianiya, cucua nojori tiuuniuucua.

³⁷ 'Cante na queya panijia socua janiyajinijini, jiyano pueyanoori maja maninia cua pueyano na quiniuria. Cante necohua panijia socua

janiyajinijini, jiyano pueyanoori maja maninia cua pueyano na quiniuriajuhuaj.³⁸ Cante tama na cuaqueyajaaja panitiaaquijia na tojiniuria janiyani, cunoori maja maninia quiria.³⁹ Cante saaja tama na cuaqueyajaaja cojuanu paniya shuquiriaatia na quiniuria mijiriani, jiyano pueyanotej, nojuaja cutaraari shaajasaanutaniya, pueyaracaanu taraatia na miitiasaanura. Saniniuuja, cante tama na cuaqueyajaaja panitiaa naquija na miishaanura cua tojjia na quiniuucuani, nojuaja cutaraari rishijiara jatanishaanutaniya. Seetanujuanaa cuata shuquiriaatia quiniutianiya pueyaracaanuuri.

*Pueyasoori maninia mijiaca niquitionutaniya na jiitiasanojiniji
(Mr 9.41)*

⁴⁰ Cante na tiaco nia tiuquininitiaja cua rupaajiniji nia pohuatasano na tojiniuriani, cuno pueyanoori cua tojijajuhuaj. Cuno, cante cua tojijiani, nojuajaari cua Jiyarona tojijajuhuaj.⁴¹ Naajuhuaj, cante Pueyaso rupaa pohuatana tiuquininitiaja na tiaconi, Pueyaso rupaa pohuatana na quiniuucuani, Pueyasoori cuno pueyano niquitionutaniya maninia na casaajiniji. Nojuajaari niquitosaaanutaniya mariyata taa Pueyaso rupaa pohuatana niquitosaaanutaniyacuaani, Pueyasojiniji na pohuatana sami. Cante maninia mijiia pueyano tiuquininitiaja na tiaconi, maninia pueyano na quiniuucua, na tiaco tiuquininitiaja pueyanoori maninia casaa niquitosaaanutaniya mariyata taa maninia mijiia pueyano niquitosaaanutaniyacuaani.⁴² Naajuhuaj, cante quenaaja shiniitiuniacu mo-huaca raateya tamonuni, cua mueyanijojua na quiniuucua, Pueyasoori seetanujuanaa na jiitiasanojiniji na niquitionutaniya na raatenu sami.

11

*Tiuquinijiona Juanri na pueya jiyaroquiaari Jesu nequesotanura
(Lc 7.18-35)*

¹ Jesu jaara canaa na doce saquiriojosano pueya rootanu tucuataquiaari tii, nojuajaari tiji quiaquiaari cuno jiya tiacajinia quiniaa na niishitijonura Pueyaso rupaa.

² Tiuquinijiona Juan quishacari nujuatejojuajin, nojuajaari jiyacari niishiquiaari Jesucristo miishanojiniji. Cunora, nojuajaari na pueya jiyaroquiaari Jesuucua naa na nequesotanura:

³ —¿Quiaate seetanujuanaa Cristo, tariucuacaanu Pueyaso sequesano canaacua niriquianotej? ¿Canaate tamonu sashiya soj?

⁴ Jesuuri nojori riucuaree:

—Nia quiaarohua. Tiuquinijiona Juan nia pohuatasuhua puetunu cua miishanojuanaa nia niqusishano, nia tojishanojuhuaj.⁵ Naa nia pohuatasuhua: “Cariyojuarujuriiri tari niquitarohua. Shipiiniquiu-niuijacaari maninia rucoorohua. Shu miaqueja cusonu jiitajacaari tari jeequerohua. Numueejunucuaari tari tojitarohua maninia. Macunucuaari samiitiacorohua. Casamijiuniucua pueyari Pueyaso rupaa pohuatasaree, Pueyaso muerasura nojori quiniuria”.⁶ Shuquiriaatia quijia cutaraari noo pueyano, cante cucuaji taacanuyaquijiani.

⁷ Tiuquinijiona Juan pueya jaara quiojoquiaariuhua Juancua, Jesuuri Tiuquinijiona Juanjiniji naa pohuatana coteequiaari pueya niquiaratej:

—¿Casaa niquiniuucua nia quiojocanu cariiquia jiyajiniani? ¿Niaateeri paratu piyarojosano naajua niquiniuucua quiacanu? Maja. ¿Tiuquinijona Juanteeri noojia niquijoteja? Maja.⁸ Cua sequeture, ¿casaa niquiniuucua nia quiojocanuni? ¿Niaateeri pueyano niquiquianu maniniuqui toque cushiyano? Maja. Cuno pojori cante maniniuqui toque cushijani, nojoriiri jiyaniijianucua tiajinia quijiaca cutara, maja cariiquia jiyajinia.⁹ ¿Taateerinitioj? ¿Casaacua nia quiojocanuurini? ¿Pueyaso sequenu panishano caminiujiunia niquiniuucuatee? Jaa. Seetanujuanaa nia sequeyanijia, Tiuquinijona Juanri jiyahohua socua cutara pueyano tamasaca Pueyaso sequencesano caminiujiuniajiniji.¹⁰ Cuno Juanjinijicuajaari tariucuacaanu Pueyaso Rupaajinia pohuatasaquaiaari. Naa naajiotasaaquiaari miriquiiri Pueyaso sequencesano janiya nojuajiniji: “Janiyari cua pueyano jiyaronutaniya quiocuajini. Nojuajaari quia puetanutaniya, quia nuu jeecariquiano quiocuaji”.

Juanri naa maninia miiquiaari cucuaji, pueya tojiniuria janiya cua tiuquishacari.

¹¹ Seetanujuanaa nia sequeyanijia. Majaari tamonu pueyano quiniu quiquiaari socua cutara pueyano Tiuquinijona Juanjiniji. Naajaa, cante Pueyaso muerasunijoja quiya cucua na tiuushacarini, cunoori socua cutara pueyano Tiuquinijona Juanjiniji.

¹² Tiuquinijona Juan jaara coteequiaari Pueyaso rupaa pohuatantu, pueyari jiyahohua saniniujiuriquiaa Pueyaso muerasu nojori quiniuria. Pueyari naa saniniujiya quiarijajuhuaj. Cante jiyahohua saniniujiya Pueyaso muerasu na quiniuriani, naa quiniutianiyyari.¹³ Supuetana Moisés, mariyata puetunu Pueyaso sequencesano caminiujiuniaajanaari tariucuacaanu pohuataquiaari taa Pueyaso jiitianutaniya pueyani. Naa poojotasaquaiaarii Tiuquinijona Juan jaara tiuquiquiaariajatija. Quiarijiani, Tiuquinijona Juanta, nojori pohuatasonoori tari tohuateenu coteya.¹⁴ Niaa jaara nio cua pohuatasonoocua tiuuniu paniri, nia tojiri nio: Tiuquinijona Juancuajaari tariucuacaanu pueyara Pueyaso sequencesano caminiujiunia Elíascuaja. Elíascuajaari sequencesaaquiaari niriquiano.¹⁵ Cante numaaracani, cuaara tojiria cua sequencesano.

¹⁶ Nia pohuatareera taamuecate nio pa quishacari pueyani, quiarijiani paa na quiyani. Nio pueyari juhua naatujoori, canapuete cariijiniacuma tacuarishijionu paniya juucuani. Nojoriiri narta naatujooricua nacaa, nojori tacuarishijionu panishacari juucua.¹⁷ Naa nacaari: “Canaari juucua naajua jonenejiyani. Majaari nia nianujunu paniniu. Canaa jaaquequejosacari taraatia saniniuujia, majaari nia sapuenu”.¹⁸ Naajuhuaj pueyanaa, Tiuquinijona Juan quishacari, nojua-jaari mashaca ratuyashijia quiquiaari, sumatuu miaqueyashijiajuhuaj. Pueyari saaja na sequequiaari samaruraca pueyanota.¹⁹ Na nuhuaji, janiyari tiuquiquiaarini. Janiya cutaraari sumatuucuaca miaquejani, mashaca ratujuajuhuaj. Pueyari cua sequequia: “Miaquejoru cuno, ratunu porocuanio. Sesa pueya cojijia, pa soosano Romano jiyaniijia seya cojijia sacuaraatijuhuaj”. Naa nia soosacari janiya, Tiuquinijiona Juannio, niaari puetunu Pueyaso niishitiosanojuanaa ruureetaa. Naa-jaa, pueyari na naata niishiniu maninia canaa miishanojiniji, janiya, Tiuquinijona Juannio, canaari mariyata Pueyaso jiyaramiquishano cu-tarani.

*Jesu piriyojosacari tojiyashijianucua pueya
(Lc 10.13-15)*

²⁰ Corazín tiacajinia, mariyata Betsaida tiacajinia, Jesuuri tii socua pueya naatanijioquiaari tamasaca tiacajiniji. Jiyajeneta casaa miiquiaari tii Pueyaso cumaacataari. Pueyari saaja nocua tiuyaquiquiaari. Nojoriiri maja noojia na tacatonu quiquiaari sesa nojori miiniujiniji. Cunora, Jesuuri nojori piriyojoquiaari. Naa sequequiaari nio caapiqui tiacajinia quiniae pueyari:

²¹ —¡Niaari taraatia saniitiosaanutaniya, noojia nia tacatoyaquiniuu-cua sesa nia miishanojiniji! Janiya jaara Pueyaso cumaacata miiquiaari Tiro tiacajiniani, mariyata Sidón tiacajinianio, taa cua miiquiaari nia tia-cajiniacuaani, cuno taucuaca maara Pueyasoo-cua tari noojia tacatocanu cutara. Nojori maara ritia cocuaque toqueya cushiyonuuquiaari nojori tacaani niishishaanura sesa nojori miishanojiniji. Naajuhuaj, nojori maara juaca quejooquiaari na nacaacua, noojia nojori tacatosacari Pueyasoo-cua, sesa nojori miiniucua. ²² Naaratej, janiyari nia nu-mooteyaní: jiya puequesacari, niaari socua jiyanohua saniitiosaanu-taniya Tiro tiacajinia quiniae pueyajiniji, Sidón tiaca pueyajinijinio. ²³ Capernaum tiacajinia quiniaanaa, ¿nraateeri jiyanaya niaari tamasaca tiaca shocotanutaniya nia jiyanishacari niaari socua maninia cutara? ¡Maja! Niaari mani quiqoquinia quejooosaanutaniya. Janiya jaara cua cumaacata cutara casaa miiquiaari Sodoma pueya tiacajiniani, taa cua miiquianu nia tajiniacuaani, Sodoma tiaca maara quiriquajaj. ²⁴ Nocuaji nia sequeya cutaranijia: jiya puequesacari, niaari socua jiyanohua saniitiosaanutaniya Sodoma tiaca pueyajiniji.

*Jesuucua tiuuniaari samaateriquiano cutara
(Lc 10.21-22)*

²⁵ Jiyacaritij, Jesuuri na Que Pueyaso sequequiaari:

—Quia shuquiritiaanijia cua Quenaa. Quiaari jiya camarnu, jiy-ocuacaanu camarnunio. ¡Quiaari maninia! Quiaari niishiyashijiaca pueya maninia casaa niishitirii, niishijiaca pueyacuaji quia jamosanoni.

²⁶ Niishijiaca pueyari saaja tama nojori niishishanoocuaajaajia tiuuijaca.

²⁷ Naacuajitij cua Quenaa, quiaari maninia niishitirii niishiyashijiaca pueya, taa quia paniquiaaricuajani.

²⁸ Cua tojitiare pueyanaa, cua Queeri cua niquitioquiaari puetunu casaajanaa cua jiitisocoriquiano. Majaari seetanujuanaa tamasaca niishiniu janiya. Saa cua Queja cutaraniaari cua niishiya. Naajuhuaj, majaari seetanujuanaa tamasaca niishiniu cua Que. Saaja janiya, Neyanuni, na niishiya cutaranijia, naajuhuaj canapue cua niishitiniu paniya cua Quecuajani. ²⁹ Cucua nia nijiore, puetunu niajaniyajanaa, canapuete tacaaquioyani, canapuete puera niishirionuujuacani. Niaa jaara cu-cua nimia, janiyari nia samaraatanutaniyani. ³⁰ Cua niishitiosano nia tojiri. Janiyajiniji nia niishiri taamuecatucuaa janiyani. Janiyari ritia juayashijiani. Janiyari pueya shocoteyaquijiani. Naacuajitij, nioo-jiaari maja na tacaani quiniutianiya nia rupuesacari janiya. ³¹ Nia tojishacari janiya, nioojiaari juhuajaniya quiniutianiya. Cua pooniti-jiosacari niajaniya, majaari jiyajeneta na quiniu quiniutianiya niaara, cua cumaquishacari niajaniya.

12

*Jesu pueya carojotasacari trigo samaatenu juuca
(Mr 2.23-28; Lc 6.1-5)*

¹ Jiyacaritij, Jesuuri canaa na saquiriojosano pueyata cuhuariquia jiuujiacia tajiriquiaa samaatenu juuca. Canaari jiyacari miaajeriquiaani canaa quiasacari nucuaco. Canaari secaja trigo jajau carojotanu coteequiaarini. Canaari na miojonuuriquiaani. ² Fariseocuaca jaara canaa niquipuiaari naa miyanotej, Jesu sequetureeri:

—¡Quia niquiri! ¡Quia pueya trigo shuniitia! ¡Na shuquiuquiojoniuyari! ¡Naa nojori mishacaritij, poonijioniuyari! Cuno maja panishano samaatenu juuca miiniuria. ¡Pa supuetana Moisescuaajaari naa pa rootaquiaaritij!

³ Jesuuri cuno pojori riucuaree:

—¿Majateeri nia serojonu quiquiaari Pueyaso Rupaajinia taa pa supuetana David miquiaari na miaajesacarini, na pueyanio? ⁴ Nojoriiri Pueyaso Secojojua tiajinia tiuquitiaquiaari. Pueyasora niquitiojosano pan satureeri. Cuno panri saaja pueyacuara secojonaa sasocoriquiano quiquiaari, maja socua tamonu pueyano sasocoriquiano. Naajaa, Davidri na saquiaari. Na miishanoori maninia quiquiaari Pueyaso niquiaira. ⁵ Naajuhuaj, ¿majateeri nia serojonu quiquiaari tariucuacaanu Moisés naajiosanojinia, taa pueyacuara secojonaa pueyaracaanu poonijioquiaa Pueyaso Secojojua tiajiniani? Nojoriiri naa poonijionuuquiaa samaatenu juucajuhuaj. Naa nojori poonijiosacari Pueyaso Secojojua tiajinia samaatenu juucatej, cunoori maja sesa. ⁶ Moisescuaajaari pa rootaquiaari maja pa poonijionura samaatenu juuca. Naajaa, cuno rootasanoori seetanujuanaa maja na quiniu Pueyaso Niyanura, jaara Pueyaso Secojojua tiajinia poonijionaara quiyaquirijuhuaj. ⁷ Maja naasucuari nia niishiniu quiquiaari casaa nio tariucuacaanu naajotasano niishitiojija niajaniya juucuani. Naa sequeyari: “Janiya cutaraari socua nia panitiaani niarta pueyacua nia taraajenura, maja saaja nia niquitiojonura nia seja cucuara catijasocoriquiano”. Niaa jaara nio naajotasano niishijia quiriquia, niaa maara sesa miyashijia pueyacuara tonujyaquiriquiaj. ⁸ Cua tojitiare quiarijia. Janiyacuajaari Pueyaso Niyanuni. Naacuajitij, mijiria cua quishacari cua naata sequenu casaate samaatenu juuca miishiyani.

*Jesu jeecasacari pueyano juaashiquia cuseetucojuara joojequetano
(Mr 3.1-6; Lc 6.6-11)*

⁹ Na nuhuaji, canaari Jesuta quiojoquiaari quiniquijini. Canaari Pueyaso Secojojua tiajinia tiuquishiini. ¹⁰ Pueyanoori tii quiriquiaa cuseetucojuara joojequetano na juaashiquia. Taa canaa Judiocuaca camarucua Jesuucuara saquiriojotanu paniriquiaa juucuacuajani, jiyacaritij, na sapojonuta Jesu nequesotaturee naari.

—¿Maninateeri samaatenu juuca cusosu naataniniuria? Paacuajaruhua niishitijoosaacuhaarini maja pa poonijionura samaatenu juuca.

¹¹ Jesuuri cuno pojori riucuaree:

—Niaa jaara niquiriyatuja borregoniyojua jiitiare, cuno jaara tiyare raama samaatenu juuca, ¿majateeri nocua nia quianu, raamaji nia panura nia seruniyojua? ¡Taaquiriirinij! ¹² ¿Majateeri pueyano socua jiyanoehua panishano borregojiniji? Taaquiriirinij. Naaratej, maja

pa tarinitianu maninia pa miiniuria pueyaracaanu, samaatenu juucajuhuaj.

¹³ Na nuhuaji, sesarucojua sequereeri:

—Quia juashiquia quia shiitiore.

Na juashiquia shiitioreeri. Ritia jeequequeeri juhua tanecaraja.

¹⁴ Naa Fariseocuaca niquishacari Jesu miishanotej, tohuareetaqueeri. Tama nojorijiaaria roojotooquaari nojori motenura Jesu.

Jesujiniji pohuatasano tariucuacaanu naajiotasanojinia

¹⁵ Jesu jaara niishiquiaari Fariseocuaca miiniu panishano nojuaja, quiniquiji quiaqueeri. Queraatia pueyari na nuhuajiquiaari canaata. Jeesuuri puetunu cusosuhuajanaa naatanijioquiaari. ¹⁶ Jesuuri na naatanijiosano pueya rootaquiaari maja tamasaca niquiara nojori pohuatanura cante nojuajani. ¹⁷ Naacuajitij, tariucuacaanu Pueyaso sequencesano caminiujiunia Isaías pohuatasanoori tohuateequiaari. Nojuajaari juhuacarijia naa pohuataquiaari Jesujiniji Pueyaso sequencesano miriquitij:

¹⁸ “Niocuajaari cua seru, cua saquiriojosano. Na timitiaanijia. Nojuajaari jiyanohua cua panishano. Janiyari cua Sohuanu jiaronutaniya nocuani. Nojuajaari tamasaca pueyapue pohuatanutaniya janiyajiniji, nojori quiniuria cua muerasura pueyaracaanu. ¹⁹ Majaari pueyata juajia na quiniu quiniutianiya. Majaari nacojojua na quiniu quiniutianiya. Majaari na rupaa tojishano quiniutianiya tiacaacaco. ²⁰ Majaari quenaaja shuniitisano naajua na shutianu quiniutianiya puetunujuanaa. Naajuhuaj, majaari na maquishajanu quiriuftaniya jatarinitiaja nojiyano samaritiu. Nojuajaari naa sesa miijiaca jiyanooniutianiya, nojuaja jaara tiuquiriohuajaatijiaj, puetunu sesa miiniujanaa na puecanura, Jiyanijiajanaa na quiniuhara pueyaracaanu. ²¹ Puetunu tiquiyocuacajinjinio quijiaca pueyajanaari nocua tiuuniutianiya”.

Pueya sequencesacari Jesu samaru cumaacaracana

(Mr 3.20-30; Lc 11.14-23; 12.10)

²² Tiquiaari Jesuucua jaatucusaaquiaari. Cariyojuaru quiriquiaajaaariuhuaj. Naa quiquiaarii samaruraca na quiniuucua. Jesuuri na jeecaree. Naacuajitij, tiquiaari pocuajara quiquiaari, niquijiarujuhauj. ²³ Cunora, puetunu pueyajanaari nocuaji jiuujiatequiaari. Sequetureeri:

—¡Nio jiyyoteeri pa supuetana David niquiohuacuajinio supueno pueyano, tariucuacaanu sequencesano pa jiyanijiaira quiriquianotej!

²⁴ Fariseocuaca jaara tojiquiaari naa pueya sequencesacari Jesujinijitij, nojoriiri na juaaniutia sequequiaari saaja:

—¡Cuno pueyanoori samaruhua tohuatanijiya Satanás cumaacata!

Satanásri samaruhua jiyanijia. ²⁵ Jesuuri cuno pueya niishiriojosano niishiquiaari. Cunora, nojori sequereeri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia jatashiyari. Naajuhuaj, tiacajinia quinia jaara juayonuutare jiyareta tama nojorijiaaja, cuno pueyari maja na naata quiniu jatiqui. Naajaariuhuaj, pueyano jaara juayonuujutare tapueyocuacata tama na tiajiniaajaaja,

majaari nojori naata jatiqui quiniu. ²⁶ Jaara naa quiritij, samaruhua jaara tohuatanijiosaare Sesaaca cumaacata, tama na cuaqueya paracayajaarijia. Naacuajitij, majaari na naata na cumaaca rishiniu. ²⁷ Janiya jaara samaruhua tohuatanijiya Satanás cumaacatani, taa nia sequeya janiyacuajani, cua sequeretoj, ¿cante nia niishitiojosano pueya cumaquiya samaruhua nojori tohuataniniuriani? ¿Satanástee? Majaruhua. Nojoricuajaari samaruhua tohuataniquiaa Pueyaso cumaacata. Naacuajitij, nojori tohuatanijiosacari samaruhua Pueyaso cumaacata, niaari jiyano hua jiyajeneya nia sequencesacari janiya samaruhua tohuatanijiya Sesaaca cumaacatani. ²⁸ Seetanujuanaa Pueyaso Sohuanu cumaquishacari janiya, samaruhua cua tohuatanijionura, niaa cumaati cua sequencesano tojirii. Naa cua tohuatanijiosacari samaruhuatej, niaacuajaari niishiya Pueyasoori tari poonijiya juhua Jiyaniijia, mijiria nia tajinia.

²⁹ ¿Pueyanote na naata cumueeca pueyano tiajinia tiuquiniu na casami na jaariutianura? Maja na naata na jaariutianu, jaara coteenu na morojojyaquiri. Jaara na morojore coteenu, na nuhuaji cutara na naata na casami panu. Naajuhuaj, janiyari Pueyaso cumaacata jaariutiaa Sesaaca jiitiasano pueyani.

³⁰ Cante cua jiyano quiyaquiyani, cunoori cua paraca. Cante cua naacutaaquiya pueya rerecojonura Pueyasorani, nojoriiri saaja pueya cocuataa Pueyasooocuaj.

³¹ Naarate nia sequeyanijia: puetunu pueya miishano sesajanaari na naata jiyanooshaanu. Sesacojojua pueyanoori na naata jiyanooshaanu juhuaj. Saniniujia, cante Pueyaso Sohuanu miishano sesacajani, cunoori maja na jiyanooshaanu quiniutianiya cutara. ³² Cante Pueyaso Niyanu sesacajani, nojuajaari na naata jiyanooshaanujuhuaj. Saniniujia, cante Pueyaso Sohuanu sesacajani, nojuaja cutaraari jiyano aquishaanutaniya pueyaracaanu. Na ruuretanuuucua Pueyaso Sohuanu, majaari na jiyanooshaanu quiniutianiya mijiria, jiyocuacaanujuhuaj.

Naanaari niishishano na jajaujiniji

(Lc 6.43-45)

³³ Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacuajitij, na jajaujiniji paari niishiyanji taamueca naanatenojoni. ³⁴ Niaari juhua sacocua. ¿Niaatucua taa maninia pocuajaca quirini, niaa jaara pueyaracaanu sesa miijiaca quiyajaa? Paari poojiajiniji pa niishiriojosano pocuquiaani. ³⁵ Naacuajitij, maninia jiuujiaraca pueyanoori saaja maninia casaa pocuaja. Sesa jiuujiaraca pueyano saniniujia, sacuaraatia casaa pocuari. ³⁶ Nia sequeya cutaranijia, Pueyaso saniitionu juuca, pueyari puetunu najuhuana sesa na pocuasanojinijijiana nequesoreesaanutaniya. ³⁷ Cante maninia casaa pocuaja quiquiaarini, cunoori sequencesaanutaniya “maninia pueyanota”. Naajuhuaj, cante sesa casaa pocuaja quiquiaarini, nojoriiri saniitiosaanutaniya saniniujia. Naaratej, majaari nia niti nia taquiriocuatenu sacuaraatia casaa nia pocuanura.

Fariseocuaca niquiniu panishacari Jesu miishano Pueyaso cumaacata
(Mr 8.12; Lc 11.29-32)

³⁸ Noojiaqueya Moisés Rootasanojiniji niishitiojonaari tii quiriquiaa Fariseocuacata. Nojoriiri Jesu sequencesquia:

—Niishitiojonanaa, jiyajeneta casaa quia miiri Pueyaso cumaacata canaa niquishocoriquiano.

³⁹ Jesuuri nojori riucuaree:

—Niaari sesoriquia pueya, Pueyaso tojiyashijiaca. Majaari nia niquiara casaa cua miiniu quiniutianiya Pueyaso cumaacata. Niaari saaja niquiriyatu cutara miishano niquiniutianiya taa supuetana Jonás miishaquaaricuaani. Cuno Jonásri Pueyaso sequencesano caminiuijunia quiquiaari. ⁴⁰ Nojuajaari puereetuua sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhuaj, janiyari raaco macu niojosaqui camueenujunutaniya jiuujianaraca juucani, jiuujianaraca niucuanio. ⁴¹ Jonás pohuatasacari Pueyaso rupaa Nínive tiacajinia, cuno tariucuacaanu taucuacaari noojia tacatoquiaari sesa nojori miishanojiniji. Cunora, Pueyaso nequesoreenu juuca quishacari, Nínive pueyari saneeecuatunutaniya nojori tonujunura nio pa quishacari pueyacuara. Nojoriiri Pueyaso saquiriojotanutaniya nio pa quishacari pueyacuara, nojori ruuretanuucua tamonu Pueyaso sequencesano caminiuijunia socua jiyaniijajanaa cutara Jonásjiniji. ⁴² Naajuhuaj, tariucuacaanu jiyaniijia maajniiri niquiaari tucuacaanuji pa supuetanaa jiyaniijia Salomón tojiniuucua. Cunoori quiquiaari jiyanolhua niishijia Salomón quiniuucua. Cuno maajniiri pananu shuucuaji niquiaari Salomón na tojiniuria, jiyanolhua tucuacaanu na jiyajiniji. Naaratej, Pueyaso nequesoreenu juuca quishacari, cuno maajniiri sanenutaniya na saquiriojotanutura nio pa quishacari pueyacuara. Nojoriicuara saquiriojotanutaniyari nojori ruuretanuucua tamonu niishijia, socua niishijia Salomónjiniji cutara.

Samaruuri na tohuatanishaquiji tacatejohua

(Lc 11.24-26)

⁴³ Samaru jaara tohuatare pueyanojiniji, joojuashiquio rucuanejiyari na samaatejara na pajesacari. ⁴⁴ Jaara riuriataaquiri na samaatejara, naa niishiriojiyari: “Tacateyarohuaraque tariucua cua quiqiojinhua”. Jaara tacatemohua, cuno na pueyano riuriatasuhuari juhua camaruuju tia, netoosano, maninia jeenucusano. ⁴⁵ Naaratej, samaruuri socua tamasaca narta samaruhua pajeya. Socua siete narta samaruhua riuriataari socua jiyanolhua sesa nojuajiniji. Puetunu nojorijianaa jaara tiuquitiare cuno pueyanooqua tii na quiniuria, cuno pueyanoori na nuhuaji socua jiyanolhua sesa quijsara jiyacateja.

Naa quiniutianiayaariuhua nio pa quishacari pueyara na tojiti-aquiniuucua janiya. Nojoriiri socua sesa quijsacara jiyacatenutaniuhua taa cua niyacarijia quijsacara nojori quiquiaaricuajani.

Cante seetanujuanaa Jesu nucuani, tapueyocuacajuah

(Mr 3.31-35; Lc 8.19-21)

⁴⁶ Jesu pohuatasacarijia pueya niquiara, na nucuaari tiuquijioquiaari Jesu tapueyocuacata Jesuucua. Carijiniacuma quitiuriquiaari. Jesuta pocoojonu paniriquiaua juucuaari. ⁴⁷ Tamonu pueyanoori Jesu sequeree: —¡Niishitiojonanaa! Quia nucuaqui quia tapueyocuacata carijiniacuma quiya. Quiata pocoojonu paniyaquiniaari.

⁴⁸ Jesuuri saaja na numootena pueyano riucuaree:

—¿Cante cua nucuani? ¿Cante cua tapueyocuacani?

⁴⁹ Jiyacaritij, Jesuuri canaa na tojitianaa pueya shishirii. Tii quiniae pueya sequereeri:

—Nio cua tojitianaani, nojori cutaraari juhua cua nucua, juhua cua tapueyocuaca cutara. ⁵⁰ Naacuajitij, cante cua Que Pueyaso panishano miiquiaa cutarani, nojuaja cutaraari cua tarajanu, cua rimiatiu, cua nucuanio.

13

Natoojojua pueyanojiniji pohuatasano (Mr 4.1-9; Lc 8.4-8)

¹ Cuno juucaja, Jesuuri tohuataquiaari tiajiniji. Caminia casaqueyaji cajishiiri. Canaari nata quiriquiaani. ² Jiyanoqua queraatia pueyari nocua rerequeejoquiaari. Puera pueya quiniuucua, Jesuuri botejinia tacaquiaari. Tii cajishiiri. Puetunujuanaa pueyari jaaquajinbia ja-teequiaari, tiji na tojitianura Jesu canaata. ³ Jesuuri queraatia casaa pueya maanu niishitiojoriquiaa miriqui. Naa pohuataquiaari puetunu canaaajanaari:

—Pueyanoori natoojonura quiaquiaari na cuhuariquiajinia. ⁴ Na jacutasacari, secajaari nucuaco totequiaari. Shuhuari nocua rosetaquiaari. Puetunujuanaa nucuacoji na natau miojocuariai. ⁵ Tajaacaari totequiaari tamaqui sai tajiniaequeya. Majaari puera jiya quiniu quiquiaari tii. Naaratej, cuno natauri ritia moritiaquiaari. ⁶ Pananu jaara tacaquiaari, cuno natauri ritia sorequiaari maja puera nujuacaraca na quishacari. ⁷ Tajaacaari totequiaarijuhua riyocuaca tajinia. Riyocuaca maashishacari, majaari cuno natau maashiniu quiquiaari maninia. Majaari na metunu quiquiaari. ⁸ Maninia jiyajinbia totequiaarii tajaaca saniniuuja. Tii moritiaquiaari maninia cutaraari. Maninia metuquiaari cutaraari. Puetunu cuno jiyoneejinijijianaani, noojaqueyari metuquiaari cien jajau niquiriyatu jiyonaacua. Tamonu jiyoneeri metuquiaari sesenta jajau niquiriyatu jiyonaacuajuhuaj. Socua tamonu jiyoneeri metuquiaari treinta jajau. ⁹ Niaa jaara numaaraca quiri, nia tojitiare cua pohuatasano.

Casaara Jesu niishitiojinya miriquini (Mr 4.10-12; Lc 8.9-10)

¹⁰ Jesuuri naa pohuataquiaari miriqui pueya niquieratej. Na nuhuaji, canaa, Jesu saquiriojosano pueyani, canaari nocua catecanoquiaarinai. Canaari na nequesotaquiaarinai:

—Jiyaniijiana, ¿casaara pueya quia niishitiojoriquiaa miriquini?

¹¹ Jesuuri canaa riucuaree:

—Pueyasoori nia saquiriojoquiaari, nia niishishoo casaa Pueyasojiniji nia niishiniuria, taa Pueyaso poonijiya pueya jiuujiajiniani, na muerasura nojori quiniuria shuquiriaatia. Tamasacara saniniuuja, majaari nio jiyasohuaja Pueyasojiniji niishishano nojori niishishocoriquiano. ¹² Cante Pueyaso rupaa tojijia cutarani, nojuajaari socua niishitiosaanutaniya, Pueyasojiniji jiyanoqua na niishiniuria. Cante Pueyaso tojiyashijiani, shiitianiyoqua Pueyasojiniji nojori niishishanoori puetunu jaariutiasaanutaniyajanaa nojorijiniji. ¹³ Cunora, janiyari miriqui pohuatariquiaa nojori niquierani. Naacuajitij, nojori-iri najuhuana niquipuiaa cua miishano na niishiyaquiniutia. Nojori tojishacari cua pohuatasano, na numaa shama tojitiuquiaa saajaari.

Majaari quenaaja nojori niishiniu na tojishano. ¹⁴ Naa nojori quinuucuatej, tari tohuateereeri juhuacarrijia supuetana Isaías sequesano nojorijiniji. Pueyara Pueyaso sequesano caminiujiunia na quiniuucua, nojuajaari naa sequequiaari pueyatej:

"Niaari seetanujuanaa Pueyaso rupaa tojiniutianiya najuhuanaj. Majaari nia niishiniu quiniutianiya. Niaari Pueyaso miishano niquiniutianiya najuhuanaj. Majaari nia niishiniu quiniutianiya nia niquishano. ¹⁵ Nojoriiri cumajiuujiaaca quiya. Nojoriiri juhua numueeju, tojiyashijiaca. Nojoriiri juhua nimishitiu quiyajuhuaj. Naa juhua nimishitiu quitiuyari nojori niuiquianaquiniuucuaji. Nojoriiri naa juhua numueejunucuahuaj, nojori tojitiaaquiniuucuaji noojiata, cucua nojori tacatenuhuara cua jeecanura nojori jiuujia seque".

¹⁶ 'Cua pueyanaa, niaari saniniuujia shuquiriaatia quiya maninia nia niishishacari cua miishano, nia tojishacari cua pohuatasanojuhuaj. ¹⁷ Seetanujuanaa nia sequeyanijia, queraatia tariucuacaanu pueyari quiarrijia nia niquishano niquiniuucua jiaatiaquiaari juucua. Naa nio niquiniuucua jiaatiaquiaari tariucuacaanu Pueyaso sequesano caminiujiuniaa, queraatia maninia pueyanio. Majaari nojori niquiniu quiquiaari saaja. Nojoriiri nia tojishano tojiniuucua jiaatiaquiaari juucajuhuaj. Majaari nojori tojiniu quiquiaari saaja.

Jesu niishitiojosacari miriqui na pohuatasano natoojojuajiniji

(*Mr 4.13-20; Lc 8.11-15*)

¹⁸ 'Nia pohuatareera nia niishiniuria cua pohuatasano natoojojuajiniji. ¹⁹ Canapuete Pueyasojiniji cua pohuatasano niishiyaquiyani, nojoriiri juhua nucuaco toteno jajau. Sesaacaari niquiaa. Pueyaso Rupaa jaariutiaa noojiajiniiri. ²⁰ Noojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuuquiaa. ²¹ Nojoriiri juhua nujuacaaju. Majaari cumaatia na nujuatunu. Naaratej, nojori jaara naquiya miishaare Pueyaso Rupaa tojijiaca nojori quiniuucua, nojoriiri ritia Pueyaso tojiniu tarinitiaquiaa. ²² Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojirii. Na nuhuaji, nojoriiri saaja puera tacaaquiaa nio jiya casamicua. Naajuhuaj, nojoriiri sapojosaaquiaa nojori jiyanihacari nojori jaara queraatia casamiriaca quiriquia, nojori maara shuquiriaatia quiriquiaj. Cunora, Pueyaso Rupaari maja na naata poonijionu nojori jiuujiajinia. Naacuajitij, cuno pueyari juhua natau muetuho quiquiaa. ²³ Saniniuujia, cante maninia tojija Pueyaso Rupaani, maninia na niishiayi. Cunoori juhua jiya maniniujinia jacutasano jajau. Naacuajitij, cuno pueyari juhua maninia natau, maninia muetuho cutara. Jiyanoqua maninia pueyari quiquiaa na tojishacari Pueyaso Rupaa. Naaratej, tamonuuri juhua cien jajau muetuho. Tamonuuri juhua sesenta jajau muetuho. Tamonuuri juhua treinta jajau muetuhojuhuaj.

Jesu pohuatasano miriqui trigo tajinia moritiaja sesa jiyasocuajiniji

²⁴ Jesuuri tamonu miriqui pohuatasano pohuataquiaari pueya niquiara, nojori na niishitiojonura taa Pueyaso tojitiaashijiaca pueya quiniutianiya Pueyaso muerasu tajiniani. Jesuuri naa pueya pohuataquiaari:

—Tamonu pueyanoori maninia jajau nataquiaari na cuhuariquiajinia. ²⁵ Puetunu pueyajanaa jaara niucua maqueturiquiaa, na paracaari jiyacari niquiaari. Sesa jiyasocua jajau jaquerooquiaari trigo natasano cuhuariquiajiniaari. Na natanu nuhuaji, tacateyarohuari. ²⁶ Trigo jajauri maashiquiaari. Na nuhuaji, na jajau mueratuusacari shusha, sesa jiyasocuaari mariyata niquishaquaariai maashiyano. ²⁷ Cuhuariquia camaru seyari quiaquiaari na camarujuanaa nojori sequenura: “Jiyanijianaa, ¿majateeri maninia saquiriojosano jajau quiqianucuaja quia natasano cuhuariquiajiniani? ¿Teje cuno sesa jiyasocua moritiarucuua quia natau tajiniacuaraarini?” ²⁸ Cuhuariquia camaruuri nojori riucuaree: “Pa paracaari cunohuaj, naa pa miiriu-cuaani”. Na seyari na nequesotaree: “¿Quiaate paniya canaa quianura cuno jiyasocua jayotanura trigo tajiniaqueyajiniji?” ²⁹ Na seja sequeree saajaari: “Maja. Maja nia jayotanu jiyasocua, niaa mariqui trigo na cojiritiareeri. ³⁰ Naajaa, nia tarinitiare cuaara maashiiria, mariyata cuaara noshiirijaara trigo jajau. Na nuhuaji cutara janiyari senoonaa jiyaronutaniyani, cuaara coteenu jiyasocua namirioora, nojori jiuniocjonura jiyasocua catijiasocoriquiano. Na nuhuaji cutara, cuaara trigo jajau racatatuura nataco”.

*Jesu pohuatasano miriqui mostaza jajaujiniji
(Mr 4.30-32; Lc 13.18-19)*

³¹ Jesuuri socua miriqui pohuataquiaari pueya niquiara, na niishitiojonura taa Pueyaso poonijiya pueya jiuujiajiniani, nocua nojori tiushacari. Naa sequereeri:

—Tamonu pueyanoori mostaza jajau nataquiaari na cuhuariquiajinia. ³² Seetanujuanaa mostaza jajauri socua jiyanoehua shiitianiyojua puetunu tamonu jajaujinijianaa. Naajaa, cuno mostaza jaara maashiri, socua puereetuucara maashijiaari narta nataacuacajiniji. Naacuajitij, shuhuari na cashacucuaacua jesuya. Naajuhuaj, pueyano tojishacari Pueyaso rupaa, seetanujuanaa maninia Pueyaso muerasura jatanishiyari.

*Jesu pohuatasano miriqui pan poreetajajiniji
(Lc 13.20-21)*

³³ Jesuuri nio miriqui pohuatasano pohuatarohuacuhua pueya niquiara, taa Pueyaso Rupaa poonijiya mijiriani. Nojori sequereeri:

—Pueyaso rupaari jiyanoehua cumaacaraca na poonijionura juhua pan poreetaja. Maaji jaara pan poreetaja cojitiri jiuujianaraca shiitianiyojua tohuatashi mishaja trigo cashojuata, puetunujuanaa na poreeteyari. Pueyaso rupaari naa cumaacaracajuhuaj, pueya na jataniniuria quiariniora.

Casaara saaja miriqui sequesanota pohuatasaaquiaa pueya niquiarani

(Mr 4.33-34)

³⁴ Puetunu Jesu pohuatasanojuanaa pueya niquiarani, miriqui sequesanoori quiquiaari. Puetunu na pohuatasanojuanaari naa quiquiaartij. ³⁵ Naacuajitij, maninia tohuateequiaarii tariucuacaanu pueyara Pueyaso sequesano caminiuijunia sequesano, jaara nio naajiotaquiaari:

“Pueyasoori naa sequeyaquij: ‘Janiyari pueya niishitiojonutaniyani saaja miriqui cua pohuatasanota. Naacuajitij, janiyari pueya po-huatanutaniya pueyaracaanu nojori niishishoo casaani, shusha jiya shipinishaanujiniji’ ”.

Jesu niishitiojosacariuhua miriqui na pohuatasano sesa jiyasocuajiniji

³⁶ Na nuhuaji, Jesuuri pueya maanu sequeree:

—Tariucuaja pueyanaa. Nia quiojorohua.

Na nuhuaji, nojuajaari na quijia tajinia tacaarohua. Jiyacaritij, canaa, na saquiriojosano pueyani, canaari nocua catecanoquiaarini. Canaari Jesu sequereeni:

—Canaa quia niishitirijia miriqui quia pohuatasano cuno sesa jiyasocuajiniji.

³⁷ Jesuuri canaa sequeree:

—Janiyacuajaari cunoni, maninia jajau natoojojuani. ³⁸ Nio jiyari juhua cuno cuhuariquia. Pueyaso muerasuuri juhua cuno maninia jajau, cuhuariquiajinia natasanoni. Tamasacaari saniniuuja Sesaaca muerasu quiya. Nojoriiri juhua cuno sesa jiyasocua, cuhuariquiajinia natau tajinia maashinioni. ³⁹ Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senoosacari quiniutianiya. Jiyocuacaanuji Pueyaso seyari juhua cuhuariquia senoonaa quiniutianiya. ⁴⁰ Naatej, taa sesa jiyasocua namitiashiya catijiasocoriquianocuaani, naa quiniutianiyyaariuhua nio jiya puequesacari. ⁴¹ Janiyari cua seja jiyaronutaniya jiyocuacaanujini. Nojoriiri sesa miijiaca quioonutaniya, mariyata canapuete tamasaca miitiquiaa sesani. ⁴² Nojoriiri quejoosaanutaniya mani quiquojinie. Nojoriiri tii sapuenutaniya pueyaracaanu. Naquiya na miishacari, na quiaca miaquenutaniyari. ⁴³ Na nuhuaji, Pueyaso tojitiajacaari jiyanohua shacantuucara quiniutianiya juhua pananu, na Que Pueyaso jiitiasacari nojori pueyaracaanu. Cante numaaracani, cuaara tojitiaara cua sequesano.

Jesu pohuatasano miriqui jiyanohua parishano casaajiniji

⁴⁴ Jesuuri canaa na pueya pohuataquiaari miriqui, Pueyaso muerasu pa quiniuni, cunoori jiyanohua parishano. Nojuajaari naa sequequiaartij:

—Tamonu pueyanoori tamasaca cuhuariquia tajiriquiaa juucua. Casaa riuriatamaari, jiyanohua parishano casaa. Tiijia na jamorohuari tee na quiriquiaacuajani. Jiyanohua na shuquiritiasacari na riuriatasano casaa, puetunujuanaa tama na casamijiaaja niquitiojoreeri queraatia cumaneeca na jiitianura. Na nuhuaji, puetunu na cumaneeca-janaa pataareeri cuno cuhuariquia camaruucua, cuno cuhuariquia na masenura. Naacuajitij, cuno jiyanohua na parishano casaari tama na casaara quiquaarijiaaja. Naajuhuaj, socua jiyanohua parishano cutaraari, Pueyaso pueyanora nia quiniuria. Cunoori jiyanohua socua parishano puetunu pa parishano casaajinijijanaa.

⁴⁵ ’Socua nia tojiri nio pohuatasano. Casami niquitiojonaari pueyaracaanu rucuanejoriquiaa shanohua cohuajaaca tiujiau na pajenura. Cunoori noturu shipinijiosano sai quiquaari. ⁴⁶ Tamoru juuca, jiyanohua shanohua noturu saajia niquitishaquaariairi. Jiyanohua na parishano. Naaratej, puetunu na jiitiasanojuanaa niquitiojоquiaariiri,

cumaneeca na jitianura, cuno na panishano casaa na masetajara. Na nuhuaji, puetunujuanaa na casami samitia masequiaari cuno noturu saajaari, jiyanohua na panishanoni. Naajuhuaj, nia tarinitiare puetunu nia panishano casaajanaa, Pueyaso pueyara nia quiniuria seetanujuanaa.

Jesu pohuatasano miriqui shiyarujiniji

⁴⁷ Pueyaso Rupaari juhua puereetuua shiyaru na camaru jartasano caminiajinia. ⁴⁸ Jaara mishaja quiquiaari sapitiaajata, pueyari na jayotaquiaari jaaquiajiniara. Queraatia tamaatiuniucua sapitiaajaari tii quiriquiaa. Pueyari jaaquiajiniia cajitiuquiaari saaja maninia sapitiaaja nojori saquiriojonura. Canaasatujinia na niojotureeri racataso coriquiano. Sesa sapitiaajaari saniniuujia jacutasaquaaria. ⁴⁹ Naa quiniutianiyajaariuhuaj jiya puequesacari. Naacuajitij, Pueyaso seyari rosetanutaniya, sesa miijiaca na saquiriojonura maninia pueya tajiniji. ⁵⁰ Na nuhuaji, sesa pueyari quejoosaanutaniya mani quiqiojinia, taa sesa sapitiaaja jacutasaquaaricuaani. Nojoriiri tii sapuenutaniya. Na quiaca miaquenutaniyajaariuhua naquiya na miiniutia.

Pueyaso Rupaari jiyanohua panishano: tariucuacaanu naajiotasano, quiari naataja naajiotasanonio

⁵¹ Jesu pohuatan puecasacari, canaa na pueya nequesotaquiaari: —¿Niaate maninia niishirii puetunu cua pohuatasanojuanaacuaja? Canaari Jesu riucuareeni:

—Taaquiriirinij Jiyaniijanaa.

⁵² Jesuuri canaa sequeree:

—Maniniacuajaqui. Tariucuacaanu Pueyaso Rupaajiniji niishitiojona jaara quiarinio cua niishitiosano Pueyasojiniji niishirijiujuaj, nojuaja cutaraari Pueyaso Rupaa niishijia seetanujuanaa. Nojuajaari juhua tia camaru, cante tariucuacaanu shanohua casamiriacacuajani, quiarinio casamiriacajujuaj, na tiajiniaaco racatasano. Na panishacari, na camaruuri na racatasanojiniji na panishano rija.

Jesu quishacari Nazaret tiacajinia

(Mr 6.1-6; Lc 4.16-30)

⁵³ Jesu jaara puecaquiaari miriqui pohuatanu, tiji quiaquiaariuhuari. Canaari na nuhuajiriquiaani. ⁵⁴ Canaari na maashijia tiacajinia tiuquiquiaariuhuani. Canaa tiuquijiosacari, canaari Pueyaso secojojua tiajinia tiuquiquiaarini. Jesuuri tii pueya niishitiojonu coteequiaari. Pueyari jiuujiatequiaari na niishitiosano nojori tojishacari. Nojoriiri tama sequequiaariajiaaja:

—¿Taa nio pueyano niishiya puerajaarani? ¿Tejenotejaara na cumaanani, cusosuhua na naatanijionurani? ⁵⁵ Na shipininiocuajaari suruhuatujiniji casaa shipinijiona quijia. Na nucuacuajaari María. Na tapueyocuacaari Santiago, José, Simón, Judasnio. ⁵⁶ Na rimiatuhuari mariyata niya pa tajinia quiya. ¿Taa na niishiya puerajarini?

⁵⁷ Naaratej, pueyari na ruuretaquiaari saaja. Naa na tiacajinijinio pueya tojitiaaquishacari nojuajatej, Jesuuri nojori sequequiaari:

—Puetunu tiquiyocua pueyajanaari maninia tojitiaquiaa cutara Pueyaso sequenu panishano caminiuijunia. Saaja narta pueya tama na jiyajinijiniojuaarijia na tojitianu paniyaquiya, tama na tiajinijiniojuaaja pueyanio.

⁵⁸ Naa nojori ruuretantuucua Jesutej, majaari puera na cumaacata na miiniu quiquiaari tii, nojori tiuyaquiniuucua nocua.

14

Herodes motesacari Tiuquinijiona Juan

(*Mr 6.14-29; Lc 9.7-9*)

¹ Cuno quishacari, Galilea jiya jiyaniijia Herodesri pohuatasaquaari Jesu miishanojiniji na cumaacata. ² Herodesri na seja sequequiaari Jesujiniji:

—¡Nojuacuajaari cua mosano Tiuquinijiona Juan! ¡Samiitiarohuacuaaqui! Naacuajitij, jiyanolua cumaaca jiitiaari, jiyajeneta casaa na miiniuria Pueyaso cumaacata.

³ Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na morojoquiaariiri cumayocua shipinishano jiyocuata. Na nuhuaji, na nujuatequiaari nujuatejojuajiniaari. Herodesri naa miiquiaari na juaaniutia Juantej, Juan nacasunuucua nojuaja, Herodes quiniuucua tarajanu Felipe niquiocuata. ⁴ Tiuquinijiona Juanri naa Herodes sequequiaari quiasano na quiyaquishacariija:

—¡Quiaari Pueyaso tojiyashijia! ¡Majaari maninia quia quiniuria Herodíastal! ¡Nojuacuajaari quia tarajanu Felipe niquiocua!

⁵ Herodesri cunora Juan monu paniriquiaa juucua. Judiocuaca puereriquiaa saajaari. Judiocuacaari niishiquiaari cutara, Juanri see-tanujuanaa Pueyaso sequenu panishano caminiuijunia quiquiaari.

⁶ Tiuquinijiona Juan nujuasacarijia nujuatejojuajinia, Herodesri na rasaanu juucajinia queranacuquiaari na masuusano pueyata. Jiyacaritij, cuno maaji Herodías niyatouri nianujuquiaari Herodes masuusano pueya niquiara. Jiyaniijia Herodesri jiyanolua na shuquiritiaquiaari.

⁷ Naaratej, Herodesri necanuru sequequiaari puetunu pueya niquiajaranaa:

—Sanaunaa, cua sequere casaa quia paniyani. Janiyacua quia niquitore quia panishanoni. ¡Seetanujuanaa quia sequeyanija! Majaari cua rupaa cua jatanu quiniutianiya. ¿Casaa quia paniniutianiyyani?

⁸ Jiyacaritij, niyacoo nucua Herodíasri neyatu rootaquiaari jiyashuaja, casaa na masenutaniyani. Naaratej, niyacoori jiyaniijia Herodes sequesee:

—Cua quenunaa, cua niquitore Tiuquinijiona Juan naca miacojuajinia.

⁹ Jiyaniijia Herodesri taraajequee niyacoo sequesano na tojishacari. Naajaa, majaari na naata na rupaa jatanu quiquiaari, seetanujuanaa na sequenuucua na masuusano pueya niquiara. Naacuajitij, Herodesri na seja sequequiaari cuaara niquitiosaarianoj. ¹⁰ Naaratej, na pueyano jiyaroquiaari nujuatejojuajiniaari, Tiuquinijiona Juan na nacatanura. ¹¹ Na nuhuaji, Juan nacaari patasaquaariauhua miacojuajinia. Niyacoo niquitiosaasuhuari. Niyacoori saniniuujia na nucuaacua na pataquiaari.

¹² Na nuhuaji, Tiuquinijiona Juan pueyari quiojoquiaari na quete na panura. Na jamotuquiaariiri. Na nuhuaji, nojoriiri nijioquiaari Jesu pohuatantuucua Tiuquinijiona Juanjiniji.

Jesu mianuutesacari cinco mil pueya

(*Mr 6.30-44; Lc 9.10-17; Jn 6.1-14*)

¹³ Jesu tojishacari Tiuquinijiona Juan tari mosaarucuaa, nojuajaari canaa jiyataquiaari botejinia tamaquiria, pueya quiyaquishaquiria. Pueya jaara niishiquiaari tee Jesu quiaareeni, queraatia pueyari cuno jiya tiacajiniji quiojoquiaari tiriarajuhuaj. Nojoriiri na neteyotaquiaari nucuaco caminia shuriuquioco. Cuno pueyari canaaacuaji cutesee.

¹⁴ Naacuajitij, Jesu rosesacari botejiniji, jiyanohua queraatia pueya niquishii saajaari. Nojoriicua tarajereeri. Cuno pueya patootasano cusosuhua naatanajioreeri. ¹⁵ Tariucua tenacari, canaa, Jesu saquiriosano pueyani, canaari nocua niquiaarini. Canaari na sequreeni:

—Canaa Jiyanijiana, paa niya quiya pueya quiyaquishaquini. Paari nininiutianiyan. Juhuacarijia pueya quia sequere nojori cuaara quiojohuara tiacajinia, na miaquesocoriquiano nojori masenura.

¹⁶ Jesuuri canaa sequeree saaja:

—¿Maatucua casaara quiojiyarohuani? Niaa mariqui nojori mianutere saniya.

¹⁷ Canaari Jesu sequreeni:

—Maja canaa jiitianu miaquesano. Niya quiya saajaari cinco pan, caapiqui sapitiaajanio.

¹⁸ Jesuuri canaa sequeree:

—Miji nia patare.

¹⁹ Jesuuri sequeree pueya cuaara cajitiuria jiyasocuajinia. Na nuhuaji, Jesuuri cuno pan pataree, sapitiaajanio. Jiyocuacaanu maureeri na Queecuara, miaquesanoocuara na secojonura. Na nuhuaji, Jesuuri pan neecasequiaari queraatiara. Canaa na niquitiojoreeri puetunu pueyajanaa canaa niquitiosocoriquiano. ²⁰ Puetunu pueyajanaari miaquenuuquiaari. Maninia tooquioreeri. Nojori puecasacari miaquenu, canaari pan neeca reratequiaariuhuani, sapitiaaja raquiquianio. Doce canaasatuuri mishinijiosaquaari na raacuata. ²¹ Jiyanohua queraatia pueyari miaquenuuquiaari; cinco mil quiquiaari saa canuuju. Majaari maajipohua serojosaanu quiquiaari, naatujoorinio.

Jesu rucuanesacari mohuaca caco

(*Mr 6.45-52; Jn 6.16-21*)

²² Na nuhuaji, Jesuuri canaa na saquiriosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhuara. ²³ Pueya jaara tari quiojoquiaariuhua, Jesuuri tuhuananuuucua tacaquiaari tamajaaja, na Que Pueyaso na secojonura. Jaara niniquiaari, Jesuuri tii quiriquiaa tamajaaja. ²⁴ Canaari saniniuujia caminia jiuujajinia tari jaaretariquiaacuaani. Mohuacaari saaja canaaacuara cajiniuucuariquiaa, paratu piyarojosacari canaaacuara. ²⁵ Juhuaquenu parishacari, Jesuuri canaa rupuesee mohuaca caco na rucuanenuta. ²⁶ ¡Canaa niquishacari casaa mohuaca caco rucuaneyano, canaari jiyanohua shiriiquitiuriini! Canaari sariyocuatureeni.

—¡Yael! ¡Samaruruhua!

²⁷ Jesuuri ritia pocuaree. Canaa sequereeri:

—¡Nioojia nia cumaquiri! Janiyacuajanija. Maja nia puerenu.

²⁸ Canaa tojishacari Jesu, Pedroori Jesu sequeree:
—¡Jaara seetanujuanaa quiajaniya quiri Jiyanijianaa, cua sequere quiocua cua quianura mohuaca caco!

²⁹ Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiри Jesuucua na quianura. ³⁰ Na niquishacari paratu jiyanohua piyarojiyano, Pedroori puerequiaari. Na pueresacari, moo cariquimia tiuquinu coteequiaariiри. Nacareeri:

—¡Jiyanijianaa cua quiare!

³¹ Jesuuri ritia Pedro juaashiquiajini quiaree. Na sequereeri:

—Pedronaa, majaqi puera quia tiuuniu cucua. ¿Casaara cua sequanoocuaji quia taacanuureeni?

³² ¡Nojori jaara botejinia tacataquiaariuhua, paratuuri jiyacari pueyajekee! ³³ Canaa niquishacari naa Jesu miishano na cumaacatatej, canaari Jesuucuara mojoquetacoquiaarini. Canaari na sequreeni:

—¡Quiaqui seetanujuanaa Pueyaso Niyanu!

*Jesu naatanijiosacari cusosuhua Genesaret jiyajinia
(Mr 6.53-56)*

³⁴ Canaa jaara caminia taquijiria niuutiaquiaarini, canaari Genesaret jiyajinia shiitiaseeni. ³⁵ Genesaret pueya jaara niishiquiaari Jesu tiuquirii, nojoriiri puetunu na jiyajinajanaa pueya numootequiaari, cuaara patootasaaria cusosuhua Jesuucua. Naacuajitij, Jesuucua patootasaquiaariiri puetunu cusosuhuajanaa. ³⁶ Pueyari Jesu sequetuquiaari:

—Nareja quia shanacure cusosuhua quiocua, nojori cuaara quia tu cuaque toque quiaara quenaaja, nojori naataconuhuara.

Jesuuri naa miirii. Puetunu na toque quianaajanaari naatacoquiaariuhua na cusionujiniji.

15

*Casaate sesa miitijia pueyanoni
(Mr 7.1-23)*

¹ Na nuhuaji, Jerusalén tiacajinijino pueyari canaacua tiuquijioquiaari Jesuta pocoojonura. Nojoriiri quiquiaari Fariseocuaca, Moisés Naajioneejiniji niishitijoonaario. Jesu sequetureeri:

² —Quia pueyari shuquitioojua miaquenuuquiaa. ¿Casaara nojori tojitaquiaquiaa canaa niishitijojosano pa supuetanaajinijini? ¡Nojori cuaara miiria taa pa supuetanaa miiquiaaricuaani!

³ Jesuuri nojori nequesotaree saniniuujia:

—¿Niajaniyariuhuaj? ¿Casaara nia tojitiaaquiquiaa saniniuujia Pueyaso Rupaani, nia supuetanaa jiitishano miiniu nia miiniuriani?

⁴ Pueyasocuajaari sequequiaari: “Quia que tojijia quia quiri, quia nucua tojijianio. Majari nojori rerequetenu”. Naacuajitij, maninia pa cojuare pa queya. Pueyasoori sequequiaarijuhuaj: “Cuaara mosaaaria cante na que sesacajani, na nucua sesacajanio”. ⁵ Niaari saniniuujia sequequiaacujua, maniniacuajaari pueyano jaara na queya sequere: “Cua quenaas, cua nucuanas, janiyari Pueyasora niquitionutaniya cua casamini. Naacuajiti majari cua naata nia naacunu cua jiitiasano casamitia”. ⁶ Naa nia niishitijojosacari pueyatej, niaari pueya tarinitiya

na queya nojori cartenura, naacusoo nojori quiniuria. Naa nia tojishacari tama nia niishitiojosanojuaja juhua nia supuetanaa nia miiniuriatej, niaari Pueyaso Rupaa jiyateya najuhuanara. ⁷ ¡Sapueno Pueyaso Rupaa tojitiajacanaa! Supuetana Isaíasquiri maninia naajioquiaaricuaja niajaniyajiniji, na caminiuijushacari nio rupaa Pueyasojiniji:

⁸ “Nio pueyari saa na rupaataja cua maniniuhuaqueetaquiaa. Nojori jiuujiaria saniniuuja tucuacaanu quiya janiyajiniji. ⁹ Nojoriiri najuhuana rerejoquiaa na maniniuhuaqueetanura janiya. Nojori niishitiojosanoori tama nojori niishishanojuaja, maja cua rupaa”.

¹⁰ Na nuhuaji, Jesuuri puetunu pueyajanaa sequeree:

—Miji, niya cua tojitiaseecuaraj maninia nia niishiniuria. ¹¹ Pa miasanoni, cunoori maja sesara na jiyatenu poojia. Pa rupaata pa pocuasano sesani, cuno cutaraari poojia sesojuja.

¹² Jiyacaritij, canaa, Jesu saquiriojosano pueyani, canaari nocua catecanoquiaarini naa canaa sequenura nojuaja:

—Jiyaniijianaa, ¿quiaate niishiya Fariseocuacaari juaaqioree naa quia sequencescaritij?

¹³ Jesuuri canaa riucuaree:

—Naajaa. Cuaara juaaquoora. Cuno pojoriiri juhua sesa jiyasocua, Sesaaca natasano cua Que cuhuariquiajinia. Nojoriiri juhua sesa jiyasocua jayotasaanutaniya. ¹⁴ Seetanujuanaa Pueyaso niishiyashijica nojori quishacari, nojoriiri juhua cariyojuaru quiya. Narta cariyojuaru jaatucuyari. Cariyojuaru jaara narta cariyojuaru jaatucure juucua, nojoriiri mariyata raama totenutaniya.

¹⁵ Pedroori Jesu sequeree:

—Jiyaniijianaa, canaa quia niishitijooreja casaa quia sequenu paniriquiaa quia pohuatasacari pa miasanojinijini.

¹⁶ Pedro riucuareeri:

—¿Niaateeri na niishiyaquiyajuhuaj? ¹⁷ ¿Majateeri nia niishiniu, pa miaquesano pa rupaataari pa seecojinia tiuquiya saaja? Na nuhuaji, pa marecuahuacuma tajimiaari. ¹⁸ Saniniuuja, pa rupaata pa pocuasano sesani, cunoori poojaijiniji tohuataa cutara. Naacuajitij, pueyanoori sesa quiya Pueyaso niqliara, sesa casaa na pocuanuucua. ¹⁹ Pueyano jiuujiuinina coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuucua jiaatianu; nohuasejonu paniniu; sapojonuta saquiriojotanu paniniu; sacuaraatia coriaacojonu paniniu. ²⁰ Puetunu naa sesa pueya niishiriojosanojuanaa cutaraari pueyano sesojuja. Saniniuuja, pueyano jaara miaquere shuquitoojua, naajaa. Cunoori maja na sesonu pueyano Pueyasora.

Taatu tiuushacari Jesuucua

(Mr 7.24-30)

²¹ Jesuuri Genesaret jiyajiniji quiaquiaari canaa na pueyata. Canaari quiojoquiaari tamonu taucuaca jiyajiniarani. Cuno jiyajinia quiquiaari-iri Tiro tiaca, Sidón tiacajuahaj. ²² Canaa rucuanejosacari tii, cuno jiyajinjinio taattuuri Jesuucua niquiaari. Nojuajaari Cananeo pueyajinjinio maaji quiquiaari. Jesu nuhuaji nacariquiaari:

—¡Jiyaniijianaa, cucua quia taraajere! ¡Pueyaso Jiyarosanona, cucua quia taraajere quenaaja! Quiyatu samaru jiitaa. Jiyano hua taraatia na miquiaari.

²³Jesuuri maja na riucuanu quiquiaari. Sanaa canujuriquiaaa saajaari. Naaratej, canaari Jesu catecanoquiaarini canaa sequenura nojuaja:

—¡Jiyaniijianaa, na panishano quia miiri cuaara quiohuara! ¡Taajeta nacaa pa nuhuajini!

²⁴Jesuuri canaa riucuaree:

—Janiyari saaja Israel pueyacua jiyarosaaquiaarini. Nojoriiri juhua borregohua tashuquioono. Nojoriicua taraajeyanija.

²⁵Cuno maajiiri Jesu sequenceso tojirii. Naajaa, Jesu cariquimiaji mojoquetaseeri. Na sequereeri:

—¡Jiyaniijianaa, cua naacutare!

²⁶Jesuuri na riucuaree:

—Majaari maninia pa jaariutianura pa niquiohua miaquesano, sare niquiohua niquitosocoriquiano saniniujuja.

²⁷Maajiiri saaja na sequeree:

—Maniniacuaja quia sequenceso Jiyaniijianaa. Naajaa, sareyanijojuacuajaari miaquesano shiriya miaquenuuquiaa, na camaru totinijiosano na miaquejajiniji.

²⁸Jesuuri maaji sequeree:

—Maniniacuaja quia sequenceso maajiniae. Quiaaqui jiyano hua cua tiuya. Cuaara quiiriaqui taa quia paniyacuajani.

Jiyacaritij, neyatuuri naataquaariuhua.

Jesu naatanijiosacari queraatia cusosuhua

²⁹Canaari Jesuta cuniquiji quiaquiaariuhuani. Canaari Galilea caminia shuriuquioco tajimiaani. Canaari tuhuananuucua tacatamaani. Jesuuri tii cajishii. ³⁰Queraatia pueyari nocua nijioquiaari. Nojoriiri queraatia cusosuhua niojotaquiaari Jesu shuriucua, nojori tiacajiniji nojori patootasano. Cusosuhuari quiquiaari shipiiniquiujuniaa pueya, cariyojuarujurinio, tiquianucuajuhuaj, sesarunecatohuanio, socua queraatia tamaatia cusosuhuanio. Jesuuri nojori naatanijioquiaari puetunujuanaa. ³¹Pueyari jiuujiatequiaari nojori niquishacari tiquianucua pocoyano, shipiiniquiujuniaa rucuaneyano maninia, cariyojuarujuri niquishacari maniniajuhuaj. Naajuhuaj, sesarunecatohuari maninia numatucuaraca quiquiaariuhua. Naa pueya niquishacari Jesu miishanotej, nojoriiri Pueyaso maniniuhuaqueetaree. Sequetureeri:

—¡Jiyano hua maninia Israel pueya Pueyaso!

Jesu mianuutesacari cuatro mil pueya

(Mr 8.1-10)

³²Na nuhuaji, Jesuuri canaa na saquiriojosano pueya sequeree:

—Miji pueyanaa. Nio pueyacua taraajeyanija. Nojoriiri tari jiuujianaraca juuca camueenuiya niya pata. Majaari nojori jiitiatunu que-naaja casaa na miaquetusocoriquiano. Majaari cua jiyaronu paniniu miaqueyojua nojori, nojori mariqui na miaajenuta cusojoniyarohua nucuacoori.

³³Canaari Jesu nequesotareeni:

—¿Canaatucua tee riuriatare queraatia miaquesano nio queraatia pueyarani? Niya, majaari pueya quiniu quenaaja.

³⁴ Jesuuri canaa nequesotaree:

—¿Taa pan nia jiitiaani?

Canaari na riucuareeni:

—Canaa saaja siete pan jiitiaani, secaja sapitiaajaniyojuanio.

³⁵ Jesuuri pueya sequeree na cajitiuniuria. ³⁶ Na nuhuaji, Jesuuri cuno siete pan pataree, sapitiaajanio. Jesu jaara na Que secojoquiaari coteenu miaquesanoocuara, na nuhuaji na neecasequiaarii canaa niquitiojonura pueya. ³⁷ ¡Puetunu pueyajanaari maninia miaquenuuquiaari! Tooquioreeri. ¡Canaari miaquesano cureenota mishinijioquiaari siete canaasatuni! ³⁸ Queraatia pueyari na miaquenuuquiaari. ¡Saaja canuuri serojosaaquiaari cuatro mil pueya! Majaari maajipohua serojosaanu quiquiaari, naatujoorinio. ³⁹ Na nuhuaji, Jesuuri pueya sequequiaari nojori quionuhuara. Na nuhuaji, Jesuuri canaa jiyataquiaari botejinia Magdala jiyajiniara.

16

Fariseocuaca, Saduceocuaca niquinii panishacari Jesu miishano Pueyaso cumaacata

(*Mr 8.11-13; Lc 12.54-56*)

¹ Fariseocuacaari Saduceocuacata Jesuucua nijioquiaari nojori sanini-ijiuniuria nojuaja. Nojoriiri Jesu sequequiaari:

—Casaa quia miiri quia cumaacata canaa niquishocoriquiano, canaa niishiniuria quiaate seetanujuanaa Pueyaso jiyarosano.

² Jesuuri nojori sequeree saaja:

—Jiya jaara naatuuca quiri pananu tiuquishacari, niaari sequequiaa: “Maninia juucaqui tariqui quiniutianiya”. ³ Naajuhuaj, pananu jaara tariquicuaji jama, niquitioocua jaara niquishaarejuhuaj, niaari sequequiaa: “Maruqui niniutianiya”. Niaari naa niishiquiaa taamueca jucate quiniutianiyanji jiya nia niquishacari. ¡Mosanucuana! ¡Casaara saniniuujia nia niishiyaquia casaa Pueyaso niishitiojiya juucua niajanianji? Nojuacuajaari juucua na cumaacata na miishano miiquiaa nia niquiara najuhuanaj.

⁴ Jesuuri nojori niquiara sequereejuhuaj:

—Nio sesoriquia pueya, Pueyaso tojitiaashijiacani, nojoriiri Pueyaso cumaacata cua miishano niquinii paniya juucua. Majaari nojori niquishaaanu quiniutianiya socua. Nojoriiri saaja nio niquiriyatu Pueyaso cumaacata miishocoriquiano niquinietianiya: janiyari misahaanutaniyanji taa supuetana Jonás miishaaquiaaricuaani.

Naa Jesu sequenu nuhuajitij, nojori tarinitiaqueeri. Canaari quiaquenei.

Jesu numootesacari na pueya Fariseocuaca niishitiosanoocuaji

(*Mr 8.14-21*)

⁵ Canaa niuutiasacari caminia taquijiria, canaari canaa coseyaca panu niyajetaquiaari canaa sasocoriquianoni. ⁶ Jiyacaritij, Jesuuri canaa sequeree:

—Niishijiaca nia quiri. Tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

⁷ Cunora, canaari tama sequetooreeaanija:

—¿Casaa na sequeyani? Pan pa paaquiniuucua naa pa sequeya jiyoteeri.

⁸ Jesu niishishacari naa canaa sequencesanotej, canaa sequereeri:

—¿Majateeri juhuanojuaja cucua nia tiuuniu maninia? ¿Casaara tama nia pocoojiyajaaja panjinijini? ⁹ ¿Majateeri juhuanojuaja nia niishiniu tari cua miishanojiniji? ¿Niaateeri tari niyajetarucuaa taa canaasatu mishajate cureecanuni, cinco mil canuu jaara miaquenueucanu cinco panjinijitij? ¹⁰ Niaa jiyoteeri niyajetarucuaajuhuaj taa canaasatu mishajate cureecanuni, cuatro mil canuu jaara miaquenueucanu siete panjinijitij. ¹¹ ¿Casaara nia jiyaniriini janiya miaquesanojiniji sequeriquiaani? Maja cua sequenu panjiniji. Nia sequeriquiaanijia tama nia cuaqueyajaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

¹² Naa na sequencesacaritij, canaari jiyacari niishiquiini majaari Jesu sequenu quiriquiaa pan poreetajiniji. Canaari shusha niishiquiini Jesuuri miriqui canaa numooteriquiaa tama canaa cuaqueyajaja canaa cojuanura Fariseocuaca niishitiosanoocuaji, Saduceocuaca niishitiosanoocuajinio.

*Pedro sequencesacari Jesuuri seetanujuanaa Pueyaso Jiyarosano
(Mr 8.27-30; Lc 9.18-21)*

¹³ Canaa tiuquijijosacari Cesareya Filipo tiaca jiyajinia, Jesuuri canaa nequesotaree:

—¿Taa pueya sequequiaa janiyajiniji, cantena janiyani?

¹⁴ Canaari Jesu riucuareeni:

—Noojaqueya pueyari sequequiaa, quiaanaari Tiuquinijiona Juan. Herodes motesano naasucuanaari samiitiarohuacuaa. Tamasacaari sequequiaacujua, quiaanaari Elías, tariucuacaanu pueyara Pueyaso sequencesano caminiujiunia. Tamasacaari saniniuujia quia sequequiaacujua, quiaanaari supuetana Jeremías, pueyara Pueyaso sequencesano caminiujiuniajuhuaj, tamonu Pueyaso sequencesano caminiujiunia soj.

¹⁵ Jesuuri canaa nequesotarohua socua:

¿Niajaniyariuhuaj? ¿Taa nia sequeyanijia? ¿Cante janiyani?

¹⁶ Simón Pedroori na riucuaree:

—¡Quiaacuajaari Pueyaso Jiyarosano! Quiaari Cristo, Pueyaso Niyanu.

¹⁷ Jesuuri Simón Pedro sequerohua:

—Quiaacuajaari Pueyaso shuquiritiasano pueyano, Jonás niyanunaa. Jiyocuacaanu Quija cua Quecuajaari quia niishitirii cante janiyani. Janiyajiniji quia niishishanoori maja pueya niishitishano quiajaniya.

¹⁸ Janiyari socua sequenu paniya quiajaniyani Pedronaa. Quia sesaari Pedro. Niiori pueyano rupaajinia sequeya “saajia”. Naatej, taa saajiacuaani jataniyaquishoo, quiaari cumaatia nujuataja quiniutianiya, seetanujuanaa cucua quia tiuushacari, quia niishishacari janiyari Pueyaso Niyanuni. Naajuhuaj, puetunu pueyajanaa cante cucua tiuriini taa cucua quia tiuyacuaani, janiyari nojori jiyatenutaniya cua muerasurani. Puetunu cua saquiriojosano pueyajanaari cumaatia nujuatutaniya, nojori niishishacari janiyari Pueyaso Niyanuni. Naacuajitij, nojoriiri juhua puereetuua saajiaacua tiasano quiniutianiya. Puetunu cua muerasujuanaari juhua cua tia quiniutianiya, cua quiqio

nojori quishacari. Sesaacaari maja na naata cua tia pojoretanu quiniutaniya. Majaari na naata na tarinitiniu quenaaja janiya, cua tiasacari cua quiqiiora. ¹⁹ Naajuhuaj Pedronaa, quiaari juhua cua quiqio tiootiu riatataja jiitiana quiniutaniya. Naacuajitij, quiaari coteenu pohuatanutaniya pueya niquiara janiyajiniji, nojori tiuuniuria cucua, juhua Pueyasocua nojori tiuquiniuria na muerasura nojori quiniuria. Naajuhuaj, quiaa jaara rootare taate Pueyaso muerasu naata miiniu maniniani, Pueyasoori sequenutaniya cuaara naa quiiriatej. Naajuhuaj, quiaa jaara casaa tenujure, maja naa pueya miiniuriatej, Pueyasooriaa sequenutaniyajuhuaj.

²⁰ Na nuhuaji, Jesuuri canaa na pueya rootaree maja canaa pohuatanura tamasaca niquiara nojuacuajaari Pueyaso Niyau.

*Jesu numootesacari na pueya, nojuajaari mosaanutaniya
(Mr 8.31–9.1; Lc 9.22–27)*

²¹ Jiyacaritij, Jesuuri canaa pohuatanu coteequiaari taa nojuaja mishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judiocuaca jiyaniijianucuaari tii cua miiniutaniya naquiya jiyanoehua. Pueyacuara secojonaa jiyaniijianucuaari nojori rupuenutaniya naa cua para-acaashaanurajuhuaj, mariyata tariucuacaanu Moisés Naajioneejiniji nishitiojonaanio. Naacuajitij janiyari mosaanutaniyani. Jiuujianaraca juucajinia, janiyari samiitianutaniuhuani.

²² Naa Jesu sequencesacaritij, Pedroori Jesu jaatucuree tamocora na nacasunura tamajaaja. Jiyanoehua Jesu sequereeri:

—¡Maja naa pocuanutej! ¡Pueyaso cuaara cojuaara quiajaniya maja naa quia miishaanuratej!

²³ Jesuuri saaja Pedro nijiniaquequee. Na sequereeri:

—¡Niiquiji quia quiaare Satanásnaa! ¡Quia sanaajere! Sesaacaari naa quia pocuateree Pedronaa. Quia sequencesanori maja Pueyasojiniji. Quia niishiriojosanori juhua mijiria pueya niishiriojosano saaja. Naa quia sequencesacaritij, quiaari cua Que sequencesanocuaji cua tarinitiniu paniya juucua.

²⁴ Na nuhuaji, Jesuuri canaa na pueya sequencequiaari:

—Pueya jaara cua tojijiara quiniu paniya, nojori cuaara carteera tama nojori panishanojuaaja. Na nuhuaji cutara, cuaara miiria cua panishano, tama na cuaqueya na panitianutajaaja cucuara. ²⁵ Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyanoehua taraatia quiniutaniya. Saniniuuja, cante tama na cuaqueyajaaja panitaa cucuara mijiriani, cuno pueyanoori na nuhuaji pueyaracaanu shuquiriaatia quiniutaniya cutara. ²⁶ Naajuhuaj, pueyano jaara masere puetunu nio jiya casamijanaa, na casamiiiri najuhuana quiniutaniya nera, na camaru jaara jatasare mani quiqiojinia na shaajesacari. Nojuajaari maja na naata Pueyaso jiyanoootiniu tama na cuaqueyajaaja, naajaa, nojuaja jaara puetunu na casamijanaa niquitoire Pueyaso, Pueyaso samiitianiniuhuara nojuaja.

²⁷ Janiyacuajaari jiyanoehua shacantuua quijiara quiniutaniyani, cua Que jiyatesacari janiya Jiyaniijiarajanaa. Na nuhuaji, janiyari

mijiria niniutianiuhua jiyocuacaanuji cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niq-uitiosaanutaniya maninia nojori miiniuucua. Pueyaso tojitiaashijia-caari saniniuujia naquiya miishaanutaniya, sesa nojori miiniuucua.²⁸ Seetanujuanaa nia sequeyanijia, noojiaqueya niajaniyajinijino niya cuata quiyani, majaari nia shaajenu quiniutiani juhuanojuaja, niaa cuaara niquirijaatijia Pueyaso cumaaca cucua tiuquiyano, cucua tiuujjaca jiitariiquiano.

17

Jesu jatasacari shacantuucara

(*Mr 9.2-13; Lc 9.28-36*)

¹ Seis juuca nuhuaji, Jesuuri nio pojori jiyataquiaari jiyaconaja tuhu-nanuucua. Nojoriiri quiquiaari Pedro, Santiago, Santiago tarajanu Juan-nio. Jiyareta tama nojorijiaarijia quiaquiaari. ² Jesuuri tii tamaatiara jataquiaari nojori niquiara. Na jiquiocoori jiyanohua shacantuucara jataquee, juhua pananu. Na toqueeri mariyata jiyanohua cohujara jataquiaarijuhuaj, juhua cuhuatana. ³ Jiyacaritij, nojoriiri caapiqui supuetanaa niquirii, Moisés, Elíasnjo. Jesuta pocoojoriquiaari. ⁴ Cunora, Pedroori Jesu sequeree:

—¡Jiyaniijanaa, canaaqui namitia niya quiyani! Quiaa jaara paniri, canaa quiocuaji suhuoronutaniyani, Moisésrajuhuaj, Elíasranio.

⁵ Pedro pocuasacarijia, shacantuucara najacaari nojori mishiquiomaa. Najacajiniji, rupaari tojishaquaaria naa sequeyano:

—¡Nioori cua Niyununyoja, cua shuquiritiasano! ¡Saaja nojuaja nia tojitiare!

⁶ Naa nojori tojishacari Pueyaso pocuaanotej, nojoriiri jacamatuquiaari jiyanohua na puerenuta. ⁷ Jesuuri nojoriicua nimiaa. Nojori quiaseeri na juaashiquiata. Nojori sequereeri:

—Nia saneecuaturopuha. Maja puerenu.

⁸ Nojori jaara niquinijionuuquiaari, majaari tari na niquitiuniu quiquiaari cuno supuetanaa. Saaja Jesuuri quiriquiaa.

⁹ Nojori rosetasacariuhua tuhuananujiniji, Jesuuri naa nojori rootaquiaari:

—¡Majaari nia pohuatanu pueya niquiara tuhuananujiniji nia niquishano! Niocua na pohuatarohua cutara janiya jaara samiitiarohuani.

¹⁰ Na pueyari Jesu nequesotaree:

—¿Casaara tariucuacaanu Pueyaso Rupaajiniji niishitiojonaa seququiaacuaraarini, supuetana Elíasnaari quiocuaji mijiria niniutianiuhua coteenu, pueya na jiyanoootienuhuara necohuata?

¹¹ Jesuuri riucuaree:

—Elíasri seetanujuanaa coteenu niriquiano quiquiaari, puetunu pueya jiuu{jiaajanaa na jeenucuanura. ¹² Janiya cutaraari nia sequeyani, Elíascuajaari tari niquiaari. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricuajani. Nojoriiri naa cua miiniutiani naquiyahuaj.

¹³ Naa Jesu pohuatasacari Elíasjinijitij, na pueyari niishiquivi nojuajaari Tiuquinijiona Juanjiniji pohuatariquiaa miriqui.

Jesu naatanishacari samaruraca caya samija

(*Mr 9.14-29; Lc 9.37-43*)

¹⁴ Jesu jaara tuhuananujiniji tiuquijioquiaari canaacua, tamonu pueyanoori nocua catecanoquiaari canaata quiniaa maanujiniji. Jesuucuara mojoquetaseeri na sequenura neyanuucuara. ¹⁵ Jesu sequereeri:

—Jiyaniijianaa, cua niyanuucua quia taraajere quenaaja! ¡Nojuajaari pueyaracaanu cusojoquia! Na jiitiasano cusionuuri na taquiriocuatequiaa. Na cusojosacari miiquiaa naquiyari. Naacuajitij, sequeyarucua manijinia tiquiaari, moojinianio. ¹⁶ Janiyari quia pueyacua na tiuquitiasee na naataniniuria juucuani. Nojoriiri maja na naata na naataniniu.

¹⁷ Jesuuri cunora sequeree:

—¡Niaaqui Pueyasooocua tiuyashijiaca, na tojiyashijiacanio! ¿Janiyateeri nia rejeretanutaniya pueyaracaanuni? ¿Taacari nia niishiniutaniya Pueyaso tamajaajaarini? Miji nia jaatucuma cuno mueya.

¹⁸ Mueya tiuquishacari nocua, Jesuuri samaru juaarii. ¡Na tohuatereeri! Jiyacaritij, caya samijiaari maninia quiuiuhua.

¹⁹ Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriquiaani?

²⁰ Jesuuri canaa riucuaree:

—Maja puera maninia nia tiuuniu juhuanojuja Pueyasooocua. Seitanujuanaa nia sequeyanijia, nia tiuuniu Pueyasooocua jaara quiriquia shiitianiyojua juhua mostaza jajau quenaaja, jiyacari cutaraari nia naata miiniu puetunu nia panishanojuanaa. Naacuajitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”. ²¹ Saniniujia, jiyano samarutej, na naata tohuatanshano cutara saaja Pueyaso nia secojosacari nia miaqueyaquinuitia.

*Jesu pacutesacari pohuatanu nojuajaari mosaanutaniya
(Mr 9.30-32; Lc 9.43-45)*

²² Tamonu juuca Jesu rucojosacari canaa na pueyata Galilea jiyajinia, Jesuuri canaa sequeree:

—Janiyari sapojonuta niquitiosaanutaniya taucuacani. ²³ Nojoriiri cua monutaniya. Jiuujianaraca juucajinia, janiyari samiitianutaniuhuani.

Naa Jesu sequencesacari canaatej, canaari jiyanolhua taraajequiaarini.

Cumaneeca niquitiosacari Pueyaso Secojojua tiaacuara

²⁴ Canaa jaara tiuquijioquiaari Capernaum tiacajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojojua tiaacuara. Cuno pueyanoori Pedro nequesotaree:

—¿Majate nia niishitijoona niquitionu na cumaneeca Pueyaso Secojojua tiaacuara, taa pa jiyaniijianucua sequequiaaricuajani?

²⁵ Pedroori na riucuaree:

—Na niquitioquiaanocuaja.

Na nuhuaji, Pedro tiuquishacariuhua na tiajinia, Jesuuri na nequesotaree:

—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿teyano pueyajiniji cumaneeca maseshiyani? ¿Tama na pueyajinijitii, taucuacajiniji soj?

²⁶ Pedroori Jesu riucuaree:

—Taucuaca niquitiojoteshiyanocuaja nojori jiya jiitiana sequencesano.

Jesuuri na sequeree:

—Naacuaaquiniatejaj. Naacuajitij, tama na pueyajaarijia majaa na niquitionu. Pueyaso Secojouua tiacuajaari cua Que tia. Naaratej, majaa cumaati Neyanu sequencesanu na niquitionura na cumaneeca.²⁷ Naajaa, pa niquitiore juhuari nojori sequencesano, paa mariqui nojori juaatiriiri. Nocuaji quia rioosee caminiajinia. Quiocua coteenu quia jatasano sapitaaja rupaama niquiri. Quiaari tii cumanee riurianutananiya. Quiocua cuno cumanee niquitosuhua nojori, quiria, quiarajuhuaj.

18

Cante jiyanijiajanaa cutarani

(Mr 9.33-37; Lc 9.46-48)

¹ Jiyacaritij, canaa, Jesu saquiriojosano pueyani, canaari Jesuucua catecanoquiaarini naa canaa nequesotanura nojuaja:

—Jiyanijiajanaa, canaa quia queretoj, puetunu quia pueyajinijinio-juanaani, ¿cante jiyanijiajanaa cutarani?

² Jesuuri naatujua piirii. Canaa tajinia na nujuatereeri.

³ Na nuhuaji, Jesuuri canaa sequeree:

—Nia niyajetare socua tojishano pueyano nia quiniu paniniu tamasacajiniji. Seetanujuanaa nia sequeyanijia, nia jataniyaquishacari tama nia cuaqueyajaa juhua nio naatujoori nia quiniuria, majaari Pueyaso muerasura nia quiniu quiniutianiya quenaaja.⁴ Naacuajitij, cante tama na cuaqueyajaa jiyateya pueya shocoteyashijia na quiniuria juhua naatujuan, nojuajaari socua jiyanijiajanaa quiniutianiya cutara narta Pueyaso muerasujinijinio.⁵ Naajuhuaj, cante naatujua maseja maninia na paniniuucua janiyani, nojuajaari cua maseyajuhuaj.

Paari cocuaatia miyani sesa pa miishacari

(Mr 9.42-48; Lc 17.1-2)

⁶ 'Sesa cutaraari, sesa nia miitiniuria cucua tiuujia naatujua. Socua maninia cutaraari sesa miitiriquiano pueyanora, nojuaja jaara juhuacarijia caminia queronijinie jartasaare puereetujuajau saajia na riquajiniji morotasano. ⁷ ¡Mijiria quiniaari jiyanohua cocuaatia miiquiaa sesa na miitishacari tamasaca! Mijiria, pueyari pueyaracaanu sesa miitishaaquiajuhuajaj. ¡Taraatia quiniutianiya cutaraari noo pueyanora, cante sesa miitirii tamonuni!

⁸ 'Nio miriqui cua niishitiosacari tojiri: nia juashiquia, nia niohuaca jaara sesa miitiya niajaniya, nia rashiquiarenoj, tucuacaanu jatasocoriquiano. Naa nia miiri niaa mariqui mani quiquiojinia jatasareeri puetunu nia cuaqueyatajanaa. Socua maninia cutaraari juashiquiaaju, niohuacaaju nia tiuquitianura Pueyaso quiquiojinia jiyocuacaanu. Niaari tii quiniutianiya shuquiriaatia pueyaracaanu. ⁹ Naajuhuaj, nia namijia jaara nia miitiri sesa, nia jatere. Tucuacaanu nia jatarenoj. Jiyanohua socua maninia cutaraari niaara, jiyocuacaanu nia tiuquiniuria namijijiu, maja nia jatasanura mani quiquiojinia, sanitiosocoriquiano puetunu nia namijiaatajanaa.

Naa Jesu niishitiosacari miriquitij, nojuajaari canaa niishitioriquiaa canaa tarinitianura jiyanohua canaa miiniu panishano, cuno jaara sesa mijiara jiyateriquia canaa.

*Jesu pohuatasano miriqui borrego tashucuanojiniji
(Lc 15.3-7)*

¹⁰ Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniuuucuaji tamonu muerasuniyojua, juhua nio mueyaja. Cua tojitiare. Pueyasocujaari na seya seerataquiaa nojori cojuanura muerasu. Cuno na seyari pueyara-caanu cua Que Pueyaso jiquioco shootiaquiaa. Naajuhuaj, Pueyasocujaari na muerasuranoocua niishiriojoquiaa. ¹¹ Naaratej, janiyari mijiria niquiaarini tashucuano pueya cua pajenura, nojori cua jaariutianura Sesaca.

¹² ¿Taa nia sequeyaní pueyanaa? Tamonu pueyano jaara cien borreghua jiitiare, niquiriyatujua jaara tashucuare tapueyocuacajiniji, ¿majateeri na camaru na borregohua cureeno tiujianu rupaquijia, tashucuano na pajenura? Taaquiriirinij. ¹³ Jaara na riuriatare, seetanujuanaa socua jiyanojua cuno borrego tashucuano shuquiritiaari tamasaca na borregohuajiniji. ¹⁴ Naajuhuaj, jiyocuacaanu quijia nia Queeri maja na paniniu quenaaja niquiriyatujua nio muerasujinjinio tashucuanura puetunurajanaa.

*Taa pa jiyanova pa tarajanuni
(Lc 17.3)*

¹⁵ Quiarta Pueyaso pueyano jaara sesa miiri quiajaniya, nocua quia quiaare na nacasunura tamajaaja nia quishacari. Nojuaja jaara tojiri quiajaniya, maniniacuajaari. Niaari maninia rupuetoojuacara quiniutianihuacuhuaj. ¹⁶ Nojuaja jaara tojiyaquiri quiajaniya saniniuujia, nocua quia quiaare socua tamonu pueyanota, caapiqui pueyata soj. Nojori niquiriara quia nacasure cuno sesa miinia. Niaa jaara naa miiritij, naa quiniutianiyari taa tariucuacaanu Pueyaso Rupaajinia niishitiosaaquiaaricuajani: “Querajaa pueya jaara mariyata pohuatare na niquishano, na tojishanojuhuaj, cunoori maja sapojonu”. Naacuajitij, nojori saquiriojotasanoori seetanujuanaa quiniutianiya. ¹⁷ Cuno sesa quia miinia jaara nia tojiniu paniyaquiyia saaja, puetunu niarta Pueyaso pueya niquirajanaa quia pohuatare sesa na miishano. Cuno pueyano jaara tojiniu paniyaquiri puetunu Pueyaso pueyajanaa, nojuaja cuaara quiiria juhua Pueyaso niishiyashijia niaara. Naacuajitij, majari socua nia rupuenunoj.

¹⁸ Seetanujuanaa nia sequeyanijia, cana nia jiyanovaquirii mijiriani, na tojiniu paniyaquishacari niajaniya, cunoori jiyanovaquishano quiniutianiya jiyocuacaanu cua Que Pueyisorajuhuaj. Naajuhuaj, cana nia jiyanoorii mijiria na tojishacari niajaniyani, cunoori jiyanooshano quiniutianiya jiyocuacaanu cua Que Pueyisorajuhuaj.

¹⁹ Naajuhuaj, janiyari seetanujuanaa sequeya niajaniyani. Caapiqui niajaniyajinjinio jaara mariyata niishiriojore nia panishanoocuara nia secjonura Pueyaso, cua Queeri nia tojiniutianiya. Nojuajaari jiyocuacaanuji naa maninia miiniutianiya niaara, taa nia secojosacari nia sequeereecuajanoj. ²⁰ Querajaa niajaniyajinjinio jaara rerejore, cucua tiuuijaca nia quishacari, janiyari tii niaata quiyajaaniuhuaj. Naacuajitij, cua Queeri nia secojosano tojiniutianiya cutara.

²¹ Jiyacaritij, Pedroori Jesu nequesotasee:

—Jiyaniijianaa, tamonu pueyano jaara sesa miiniu pacutejore janiya, janiyatucua pueyaracaanu na jiyanoorini? ¿Majateeri tariucuaja, janiya jaara na jiyanoori siete sesa na miishanojiniji janiyani?

²² Jesuuri Pedro riucuaree:

—Maja naatej Pedronaa. Maja quia tarinitianu na jiyanooniu. Pueyaracaanu sesa na miishacari quiabajaniya, pueyaracaanu quia jiyanoori quiarta pueyano. Majaari quia serojonu sesa na miishano quiabajaniya. Pueyaracaanu quia jiyanoori saaja.

Jesu pohuatasano jiyanoyashijia serujiniji

²³ Naaratej, cua tojiri pueyanaa. Nia pohuatareera nia niishiniuria taa Pueyaso paniya jiyanoootiojuaca na muerasu nia quiniuriani. Tamonu jiya jiyaniijaari nera poonijionaa pueya sequequiaari nojori cuaara tari niquitijoora nojuaja na cumaneeca, nojori na niquitiosanojiniji na casami. ²⁴ Noojaqueya nera poonijionaa pueya jaara tari nojori pasano casamijiniji niquitiojoriquiacuaa tama nojori cumaneeca-jinijijaaja, jiyacaritij, tamonuuri tiuquinishaareejuhuaj. Nojuajaari jiyanoohua queraatia casami masejoquiaari na jiyaniijaajiniji, queraatia millón cumaneeca. ²⁵ Nojuajaari maja na jütianu quiquiaari na cumaneeca, na jiyaniija na niquitionuhuara. Na jiyaniijaari cunora na pueya sequeree: “Tamonu camarnu nia niquitiore nio cua seru, necocuataja, cua cumaneecara, necohuajuahuaj, puetunu na casamijianaanio. Naacuajitij, na cuentaari puequenutaniya”. ²⁶ Cuno na seru tojishacari naa na jiyaniija seqesenotej, nocuara jacamaquiaarii. Na jiyaniija sequereeri: “¡Cua tarinitiare quenaaja cua jiyaniijianaa! ¡Rupaquijira cua tarinitiarejaara! Janiyacuajaari quia cumaneeca niquitionutaniya puetunujuanaani”. ²⁷ Na jiyaniijaari nocua taraajeree. ¡Na carteroehua puetunujuanaari! Naa na jiyanooriiri, nocua na taraajenuucua.

²⁸ Cuno seru tohuatasacari jiyaniija tiajiniji, narta seruta naacuneetoreeri. Cuno narta seruuri tarrijia masequiaari shiitianiyojua casami cuno jiyanooshano serujiniji. Secaja cumaneecaari quiquiaari na cuenta. Naajaa, cuno jiyanooshano seruuri narta seru quiaree. Cumaa-tia na riquajinna na miniriiri. Na sequereeri: “¡Ritia cua niquitiore cumaneeca, tarrijia quia masesano janiyajiniji!” ²⁹ Narta seruuri na riquajinna mininia cariquimiaji mojoquetaree. Na sequereeri: “¡Cua tarinitiarecuaraja quenaaja! ¡Janiyacuajaari quia cumaneeca quia niquitionutaniyani!” ³⁰ Majaari na sashiniu paniniu quiquiaari. Saaja na nujuatequiaari nujuatejojuajinnaari cuaara na cumaneeca na niquitiore-jaatijia. ³¹ Narta seja niquishacari naa cuno jiyanooshano seru miishan-otej, nojoriiri jiyanoohua taraajequiaari. Nojoriiri jiyaniijaacua quiojquiaari puetunu sesa narta seru miishanojuanaa nojori pohuatanura. ³² Naaratej, jiyaniijaari tamonu na seru jiyaroree cuno jiyanooshano seru riniuucua. Na tiuquishacari, jiyaniijaari na juaarii. Na sequereeri: “¡Quiaqui jiyanoohua sesajuhuanajaj! Quia seqesenacari janiya, janiyari quia jiyanooriicuaani, maja quia naata niquition quishacari quia cumaneeca. ³³ ¿Majateeri quia naata quiriquiaa taraajenu quiarta seruucua, taa cua taraajeree quiocuacuaani?” ³⁴ Jiyaniijaari jiyanoohua juaarii. Cunora, cuno sesa miijia seru jiyarotareeri nujuatejojuajinna na nujuatesaanura. Sequereejaariuhuaj cuaara naquiya miishaaria tii, cuaara puetunujuanaa na cumaneeca niquitiorejaatijia, casami na pasanojiniji.

35 'Nia Que Pueyasoori naa miiniutianiya niajaniyajuhuaj, niaa jaara seetanujuanaa jiyanoyaquiri niarta Pueyaso muerasu.

19

*Jesu niishitiojosano maja pa niquiocua pa cartenura
(Mr 10.1-12; Lc 16.18)*

¹ Jesu jaara naa pohuatanu puecaquiaaritij, canaa na pueyata quiaquiaari Galilea jiyajinijiiri. Canaari Judea jiya shuriucua tiuquishii Jordán moo taquijiriani. ² Jiyano hua queraatia pueyari Jesu nuhuajiyaree. Quiniqui canaa quishacari, Jesuuri cusosuhua naatanijioree.

³ Jiyacaritij, noojiaqueya Fariseocuacajinjiniori Jesuucua nijioquiaari sesa na pocuatenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maniniate pa cartenura pa niquiocua, jaara pa juuatiri?

⁴ Jesuuri nojori riucuaree:

—¿Majate nia serojonu quiquiaacuaja Pueyaso Rupaajinia? Coteenujuanaa Pueyaso shipinishacari pueyano, Pueyasoori shipiniquiaari caya, maajinio. ⁵ Naaratej, nojori shipininiaari sequequiaari: “Caya cuaara tiujiara na que, na nucuanio, necocuata na quiniuria. Nojoriiri juhua niquiriyatu pueyanora quiniutianiya na camitioosacari”. ⁶ Naaratej, caya, maaji jaara camitioore, majaari tari na quiniu caapiqui pueyano. Juhua niquiriyatu pueyanojuaari quiqui. Naacuajitij, majaari maninia Pueyaso rupuetootesano rupartanura.

⁷ Nojoriiri Jesu sequeree:

—Jaara naa quiritij, ¿casaara supuetana Moisés rootaquiaaricuaraarini caya cuaara naajionee niquitioora necocua, na cartenu panischacari?

⁸ Jesuuri nojori riucuaree:

—Moisés cuajaari niishiquiaari niaari puera cumajiuujiaaca. Naaratej Moisésri nia tarinitiaquiaari nia niquiocua nia cartenura. Coteenujuanaa, Pueyaso jaara shipiniquiaari caya, maajinio, majaari naa na quiniu quiquiaari. ⁹ Cua tojitiare pueyanaa. Janiyari nia sequeya cutarani. Cante necocua carteree najuhuanani, tamonu maajitia na caminiuria, coteenu necocua jaara tamonu cayata quiyaquiri, neyacaari jiyano hua sesa miya Pueyaso niquirara. Jaara naa miiritij, Pueyasora, nojuaajaari sesoriquia pueyano. Nojuacuajaari juhua pueyano, cante narta pueyano niquiocua numuetucujuani. Naajuhuaj, cante cartesano maaji camiyani, naa sesa miyajaariuhuaj.

¹⁰ Canaa, Jesu saquiriojosano pueyani, canaa tojishacari naa Jesu sequesanotej, canaari na sequreeni:

—Jaara naa quiritij taa quia queriquiaacuajani, maninia naasucuaari maja mashaja caminiuria. ¿Naatejaaratej?

¹¹ Jesuuri canaa riucuaree:

—Maja na naata puetunu pueyajanaa nio cua niishitiojosano tojiniu. Saaja noojiaqueya pueya cutaraari na tojiniutianiya, noo pojori canapuete jiyocuacaanuji cumaaca niquitiosaareeni na tojiniuria. ¹² Naajuhuaj, noojiaqueya canuuri maja na naata caminiu, riyacajajaaju nojori quishacari. Nojoriiri naa rasanojuhuhanaj. Tamasaca canuuri maja na caminiu saniniuujia, jiatejosano nojori riyacajajaaju quishacari.

Tamasacaari maja na caminiujuhuaj tama nojori paniyaquishacariiji-aaja, saaja Pueyasora nojori poonijionu panishacari. Cante na naata naa miiniuni, cuaara naa miiriatej.

Naatujooriicuara Jesu secojosacari Pueyaso

(*Mr 10.13-16; Lc 18.15-17*)

¹³ Na nuhuaji, pueyari Jesuucua nitiaquiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujuree canaa juaaniutiani. ¹⁴Jesuuri saniniujuja canaa sequeree:

—¡Maja nojori tenujunu! Nia tarinitiare naatujoori cuaara cucua nijioora. Nia tojiri, canapuete seetanujuanaa juhua nio naatujoorini, nojoriiri Pueyaso muerasu quiriquiano.

¹⁵ Na nuhuaji, Jesuuri na juaashiquia niaquiaari naatujooriicua, nojoriicuara na secojonura, Pueyaso miiniuria maninia nojori. Na nuhuaji, Jesuuri quiniquiji quiaquiaariuhua.

Jiyanohua casamiriaca mashaja pocoojosacari Jesuta

(*Mr 10.17-31; Lc 18.18-30*)

¹⁶Tamonu mashajaari Jesuucua niquiaari. Na nequesotaseeri:

—Niishitijonanaa. Quiaari maninia pueyano. Cua sequere, ¿taa cua miiniutianiyani maninia cua quiniuria Pueyaso niquiara, pueyara-caanu quijjara cua quiniuriani?

¹⁷Jesuuri na riucuaree:

—¿Casaara quia sequeya janiya maninia pueyanotani? Saaja niquiry-atujuari maninia quijjia cutara. Nojuacuajaari Pueyaso. Naajaa, quiaa jaara maninia quiniuucua jiaatiaa Pueyaso pueyano quia quiniuria, quia tojiri tariucuacaanu Moisés Rootasano Pueyasojiniji.

¹⁸Jesu riucuareeri:

—¿Teyano rootasanotenii?

Jesuuri na sequeree:

—Maja quia monu. Maja quiarta pueyano niquiocua quia numuetucunu. Maja quia nohuasenu. Maja quia saquiriojotanu tamonuucuara quia sapojonuta. ¹⁹Quia que, quia nucua tojijia quia quiriquia. Maja nojori quia rerequetenu. Mariyata quiarta pueyano quia paniri taa quia paniyacuuaa tama quia cuaqueyajaajani.

²⁰Mashajaari Jesu sequeree:

—Janiyacuajaari puetunujuanaa nio tojijia quiquiaari cua naatujau-jinijini. ¿Casaa cua miiniutianiya socuani?

²¹Jesuuri na sequeree:

—Quiaa jaara seetanujuanaa maninia quiniuucua jiaatiaa Pueyaso niquiara, quia quiaarohua quia tiajinia. Quia niquitijore puetunu quia casamijiana cumaneecara. Na nuhuaji, casamijiuniucua quia niquitijore nareja quia cumaneeca. Naacuajitij, quiaari queraatia casami jjitianutaniya jiyocuacaanu. Na nuhuaji, quiocua nimiohua cutara, cua tojijia quia quiniuria.

²²Na tojishacari naa Jesu sequencesanotej, mashajaari taraatia quiaarohua jiyanohua casamiriaca na quiniuucua.

²³Jiyacaritij, Jesuuri canaa sequeree:

—Seetanujuanaa nia sequeyanijia, jiyanohua jiyajenetaari pueyano tojiniuria Pueyaso, na pueyano na quiniuria, cuno pueyano jaara

puera jiyanohua casamiriaca quiri. ²⁴ Pueyanaa, ¿camelloteeri na naata cusupuetaja cuhuoco tamajiria tajiniu? Maja na naata. Cua tojitiare. ¡Socua jiyanohua jiyajenetaari casamiriaca pueyanora, Pueyaso pueyanora na jatanishaanura!

²⁵ Canaa tojishacari naa Jesu sequesanotej, canaari jiyanohua jiuujiatereeni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitio?

²⁶ Jesuuri canaa shootiaree tacuriitia. Canaa sequereei:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na panishanojuanaa na miiniuria.

²⁷ Pedroori Jesu sequeree:

—¿Canaarijijat? Canaari puetunu canaa casamijianaa tiujiaquiaarini canaa rupuenura quiajaniya. ¿Casaa canaa masenutaniyarinijia?

²⁸ Jesuuri canaa riucuaree:

—Seetanujuanaa nia sequeyanijia. Nio jiya maniniushitishacariuhua, janiyari cajiniutianiyanji jiyanijia cajitiujinia puetunu cua Quejiniji shanohua cua cumaacatajanaa. Jiyacaritij cua pueyanaa, niaari mariyata cajitijosaanutaniya doce jiyanijia cajitiucuajinija. Niaari pa supuetana Israel doce niquiohuacuajinio caneno pueya nequesoreena quiniutianiya. ²⁹ Cua pueya tojiniuria janiya, noojiaqueya nojorijinijinoori na tia tiujianutaniya, tapueyocuaca, na rimiatiuhua, na que, na nucua, necohua, na cuhuariquianio. Canapuete naa tiujiaquiaa na tojiniuria janiyani, cuno pojoriiri Pueyasojiniji socua jiyanohua queraatia masenutaniya nojori tiujiasanojiniji. Nojoriiri pueyaracaanu shuquiriata quijiacu quiniutaniyajuhuaj, shaajeyashijiaca. ³⁰ Saniniuuja, queraatia tojishano pueyari Pueyaso shocotasano quiniutaniya na tojitiaashijiaca nojori quiniuucua. Naajuhuaj, mijiria, queraatia pueyari juhua shocotasano pueya quiya Pueyaso niishiyashijiaca pueyara. Cuno pojori jiyanishano najuhuana quijiacani, nojoriiri Pueyaso shuquiritasano pueya quiniutaniya cutara.

20

Jesu pohuatasano cuhuariquiajinia poonitijiosano pueyajiniji

¹ Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaru miiquiaari na poonitijiosano pueyacuana. Cuno cuhuariquia camaruuri quiaquiaari tariquiicuaji pueya na pajenura na uva cuhuariquiajinia nojori poonijionura. ² Cuhuariquia camaruuri pueyata pocoojoquiaari taa cumaneeca na niquitionutaniya cuno juuca nojori poonijiosanojinijini. Poonijionaa pueyari na sequeree: “Maniniacuajaari taa quia sequereecuajani”. Na nuhuaji, cuno pueya jiyaroreeri uva cuhuariquiajinia nojori poonijionura. ³ Pananu tacasadari, cuhuariquia camaruuri tohuataquiaariuhua na tiajiniji. Jiyacaritij, socua tamasaca pueya niquishiiri juhuajaniya quiyano tiaca jiuujiajinia curotasano cajitiucuajinija. ⁴ Cuhuariquia camaruuri nojori sequesee: “Nia quiaarejuhuaj, cua uva cuhuariquiajinia nia poonijionura. Janiyacua cumaneeca nia niquitorohua nia poonijionu samini”. ⁵ Naacuajitij, nojoriiri quijoquiaari cuno cuhuariquiajinia poonijionurajuhuaj. Na camaruuri socua tohuataquiaariuhua panacari. Socua tamasaca pueya niquishiiri

juhuajaniya quiyano tiaca jiuujiajinia curotasano cajitiucuajinia. Nojori sequereejaariuhuaj nera nojori poonijionura cuno juuca. Pananu mueecosacari, socua pueya riuriataquiaariiri. Nojori jiyaroree poonijionuucuaajaariuhuaj.⁶ Tariucua pananu piriushacari, na camaruuri socua tohuataquiaariuhua. Socua tamasaca pueya niquishiiri tiaca jiuujiajinia curotasano cajitiucuajinia najuhuana quiyano. Nojori sequereeri: “¿Casaara nia quiojijaquiyaree poonijionuucuani? ¿Casaa nia miya niyani? Niaa mariqui poonijiore”.⁷ Nojoriiri na riucuaree: “¿Canaatucua taa poonijioreni, canaa jaara pajeshiyaquiri poonijionurani?” Cuhuariquia camaruuri nojori sequeree: “Nia quiaarequi cua cuhuariquiajinia nia poonijionura. Janiyacua nia poonijionu sami cumaneeca nia niquitiorohuani”.⁸ Pananu tiuquishacari, cuhuariquia camaruuri na casami cojuana sequeree: “Cua poonitijiosano pueya quia piiri miji, nojori rerejonura. Na nuhuaji, cua sequesano cumaneeca quia niquitiojore puetunu nojorijiana taa cua sequeree coteenuujuanaa quiria poonijionaacuajani. Majaari rimiajata nojori niquitijonu. Coteenu quia niquitiojore tariucua pananu piriushacari cua jiyaramiquishano. Naa quia niquitiojore puetunujuanaa. Quiocua naa tucuatate niquitijonu noo pojorijiuuhuaj, canapuete tariquiicuaji coteeree poonijionucuajani”.

⁹ 'Jiyacaritij, tariucua pananu piriushacari poonitijiosano pueyari nijiomaa. Puetunu nojorijianaari cumaneeca niquitiosaaree taa cuhuariquia camaru coteenuujuanaa tariquiicuaji poonijionaa pueya sequequiaaricuajani. Majaari rimiajata nojori niquitiosaanu quiquiaari cumaneeca, nojori poonijionu sami. ¹⁰ Na nuhuaji, coteenuujuanaa poonijionaa pueyari sequesaaquiaari na cumaneeca nojori masenura. Nojoriiri jiyaniquiaari nojori naasucuaari socua cumaneeca niquitiosaanutaniya rupaquijia poonitijiosano pueyajiniji. Nojoriiri saaja niquitiosaaree taa cuhuariquia camaru sequeree nojori cuno juucacuajani. ¹¹ Nojori masesacari na cumaneeca, nojoriiri cuhuariquia camaruta juaaquioree. ¹² Na sequetureeri: “Cuno pueyari saaja rupaquijia poonijioree. Quiaari nojori niquitioree taa quia niquitioree canaacuaani. Canaari pananucari cateree cutarani, pueyaracaanu canaa poonijiosacari”. ¹³ Cuhuariquia camaruuri tamonu nojorijinijinio sequeree saaja: “Sanajanaa, maja sesa cua miiniu quirii quiajaniya. ¿Majateeri quia niishinii, paa jaara tariquiicuaji pocoojoriquiaatej, janiyari juhuacarrijia quia sequereeni janiyari naa cumaneeca quia niquitionutaniyani? Quiaari cua riucuaree: ‘Maniniacuaja’”. ¹⁴ Naaratej, quia jiyataarohua quia cumaneeca quia tiajinohua. Janiyacuajaari naa niquitionu paniriquiaa tariucua pananu piriushacari cua poonitijiosano pueyani, taa cua niquitioree quiajaniyacuajaani. ¹⁵ ¿Majateeri cua naata miiniu tama cua panishanojuaaja tama cua cumaneecatajaaja? ¿Quiaateeri socua cumaneecaacua jiaatiajara quiquii, capora cua quiniuucua?”

¹⁶ Na nuhuaji, Jesuuri naa sequequiaarijiuhuaj, na pohuatasanojiniji na niishitiojonura:

—Naa quiniutianiyari taa cua sequeriquiaacuajani: canapuete nuhuajishanaani, nojoriiri coteetanaa quiniutianiya. Naajuhuaj, cante coteetanaani, nojoriiri nuhuajishanaa quiniutianiya saniniuujia.

Queraatia masuusano pueyari quiya. Saniniujia, secajaari saquirojosano quiya nojorijinijinio.

*Jesu camishacariuhua pohuatanu taa na mosaanutaniyani
(Mr 10.32-34; Lc 18.31-34)*

¹⁷ Tari Jesu quiasacari Jerusalén tiacajiniara, Jesuuri canaa na doce saquirojosano pueya piirii tamocora nuu shuriuquiocora, tamajaaja canaata na pocoojonura. Canaa sequereeri:

¹⁸ —Cua tojiri. Niaacuajaari niquiaja paa tari Jerusalén tiacajiniara tacataani. Janiyari tii niquitiosaanutaniya pueyacuara secojonaa jiyaniijianucuani, Moisés Naajioneejiniji niishitiojonaanio. Nojoriiri cucuara saquirojotanutaniya nojori sapojonuta cua mosaanura. ¹⁹ Nojoriiri cua niquitionutaniya taucuaca. Cuno pojoriiri cua rerequetenutaniya. Cua majacutunutaniyari. Na nuhuaji, niyacutesanojinia cua teetetunutaniyari tii cua cusionura. Jiuujianaraca juucajinia janiyari macujiniji samitianutaniuhuani.

*Santiago, Juan nucua sequencesacari Jesu, maninia na miiniuria necohua
(Mr 10.35-45)*

²⁰ Jiyacaritij, Zebedeo niquiocuaari Jesuucua catecanoquiaari necohuata. Jesuucuara mojoquetaseeri Jesu na sequenura nera na miiniuria na panishano. ²¹ Jesuuri na sequeree:

—¿Casaa quia paniyani?

Jesu riucuareeri:

—Quia jaara Jiyaniijiara jiyatesaare, quiocua cua niquiohua cajiti-jiore quia shuriucua, Santiago, Juannio. Tamonu cuaara cajiiria quia mi-aquetajara, tamonu quia muenecara, quia naacunaa nojori quiniuria, juhua jiyaniijianucuajuhuaj.

²² Jesuuri Santiago sequeree, Juannio:

—Majaari nia niishiniu casaa nia maseyani. ¿Nia naataateeri rejeren-tanu naquiya miiniu taa cua miishaanutaniyacuaani?

Nojoriiri saaja Jesu riucuaree:

—Taaquiriirinij. Canaa naatacuaaquiniatejaj.

²³ Jesuuri nojori sequeree:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu niajaniya, cante cua miaquetajara cajiniutaniyani, cua muenecaranio, Jiyaniijia cua quishacari. Saaja cua Que cutaraari tari na saquirojosano pueya sequenutaniya cua shuriucua nojori cajitiuniuria, teyano pojoriicuají na jeenucuaquiaaricuajani.

²⁴ Canaa, narta saquirojosano pueyani, canaari Juan juaariini, Santi-agonio, canaa tojishacari nojori masesano juucua. ²⁵ Jesuuri saniniujia canaa sequeree:

—Miji pueyanaa. Niya cua tojitiasee. Niaacuajaari niishiya, mijiria jiyaniijianucuari na pueya poonitijoquia juhua tama na seyajaaja. Mijiria camarucuaari taraatia miiquiaa na pueya, nojori na miitishacari puetunu na panishanojuanaa. ²⁶ Niajaniya saniniujia, majaari naa nia quiniu quiniutaniya. Naacuajitij, cante tojishano pueyano quiniu paniya niajaniyajinijinioni, cuno cuaara quiria narta Pueyaso pueya cumaquinia. ²⁷ Cante nia jiyaniijia quiniu paniyani, cuno cuaara quiria juhua nia seru, maninia na miiniuria niajaniya, naatej, taa cua miiquiaa niajaniyacuaani. ²⁸ Janiya cutaraari Jiyaniijiani. Naajaa, majaari mijiria

cua niniu quiquiaari pueya cua poonitijionura quiria, shuquiriaatia cua quiniuria tamajaaja. Niquiaari cutarananjia pueya cua naacunura, tama janiyajaja mosaanura pueya niti, queraatia pueyacuaji cua ritianura Sesaaca.

Jesu jeecasacari caapiqui cariyojuaru namijaa

(*Mr 10.46-52; Lc 18.35-43*)

²⁹ Jesuta canaa quiasacari Jericó tiacajiniji, jiyanohua queraatia pueyari Jesu nuhuajiriquiaa. ³⁰ Jiyacaritij, caapiqui cariyojuaruuri nuu shuucuaji cajitiuriquiaa. Nojori niishishacari Jesuuri nojori tajiriquiaa, nojoriiri nacanu coteequiaari:

—¡Jiyaniijanaa! ¡Canaacua quia taraajere! Quiaacuajaari Pueyaso Ji-yarosano, Jiyaniijia quia quiniuria pa supuetanaa jiyaniijia David niti.

³¹ Pueyari nojori juaarii nojori sanaajetanura juucua. Nojoriiri saaja jiyacatequee nacanura:

—¡Jiyaniijanaa, canaacua quia taraajere, Pueyaso Jiyarosanona!

³² Jesuuri socua nujuasee. Nojori sequereeri:

—¡Mijil! ¿Casaa nia paniya cua miiniuria niajaniyarani?

³³ Jesu riucuatureeri:

—¡Jiyaniijanaa, canaa namijaa quia jeecare!

³⁴ Jesuuri nojoriicua taraajeree. Nojori namijaa quiareeri. ¡Nojoriiri niquijiacara quiui! Na nuhuaji, Jesuucua sacuaaree canaataari.

21

Jesu tiuquishacari Jerusalén tiacajinía

(*Mr 11.1-11; Lc 19.28-40; Jn 12.12-19*)

¹ Canaa quiojosacari, canaari socua tiuquijiosee Betfagé tiacajiniani, Olivo nacuhua tuhuananu shuriucua. Cuniquiji, majaari puera tucucaanu quiquiaari Jerusalén tiacajinira. Jiyacaritij, Jesuuri caapiqui canaa na pueyajinjinio sequequiaari:

²—Cuno tiacajinia nia quiaare, nooj pocuaji niquishiyatej. Niaari tii ruriatanutaniya niquiojuaraca burro morotasano. Niocua na samaacartasee. Niocua miji na jaatucuyarohuanoj, necojuataja. ³ Pueya jaara nia tenujunu paniri nocuaji, niocua na sequere: “¡Jiyaniijia na paniya. Ritia na tacatonutaniuhuacuaja”.

⁴ Naa tohuateequaariiri tariucuacaanu Pueyaso sequesano caminiujunia sequesano, nojuaja jaara naa naajioquaari Jerusalén tiacajinia quiniaas pueyara:

⁵ “Sión tiacajinia quiniaas pueya nia sequere: ¡Nia niquiri! Nia Jiyaniijiaari burrojinia niaacua niya. Maninia pueyanoori, juayashijia. Burro nijinias cajiyano, necojuuaacuanio”.

⁶ Jiyacaritij, cuarta Jesu pueyari quiaquiaari. Nojoriiri naa miiquiaari taa Jesu sequequiaari nojoricuajani. ⁷ Nocua jaatucutuquiaariuhua burroori, necojuataja. Na nuhuaji, Jesu cajijiara, canaari canaa tucuaque toqueya niojoquiaari burro nijiniani, necojuua nijinianio. Na nuhuaji, Jesuuri na nijinias cajirii. ⁸ Jiyanohua queraatia pueyari tii quiriquiaa. Nojoriiri na tucuaque toqueya muejoquiaari nucuaco Jesuucuaji. Tamasacaari jaamasucua piyotaquiaari Jesuucuaji niojotasocoriquiano nucuaco, nuu niquishaanura shanohua, juhua cutara jiyaniijiaacuaji maniniushitishano. ⁹ Jesu puetanaa, mariyata na nuhuaji nijionaajuhuaj, nojoriiri naa coteequiaari nacoojonura: “¡Pueyanaa,

nioori pocuaji Tacuna! ¡Nojuacuajaari pa Jiyaniijia, pa supuetanaa jiyaniijia David niti! ¡Cuaara quiiria shuquiriaatia pa Pueyaso jiyarosano! ¡Jiyanohua maniniaari pa Pueyaso! ¡Cuaara shuquiritasano quiiria!"

¹⁰ Jesu tiuquishacari Jerusalén tiacajinia, puetunu tii quiniaas pueyajanaari jiuujiatecoquiaari. Sequetureeri:

—¿Cantejaara cunoni, tiuquiyani?

¹¹ Jesuta tiuquijionaari nojori riucuaree:

—Nojuacuajaari Jesu, Pueyaso sequenu panishano caminiujiunia, Nazaret tiacajinjinio pueyano, Galilea jiyajinjinio.

*Jesu jaacasacari seja niquitijonaa Pueyaso Secojojua tiacariji
(Mr 11.15-19; Lc 19.45-48; Jn 2.13-22)*

¹² Na nuhuaji, Jesuuri Pueyaso Secojojua tiacari matacajinia tiuquiquiaari. Tii pueya niquishiiri seja niquitijiyano. Jesuuri puetunu nojorijianaa tohuatanijioree. Cumaneeca tacatojojuaca juhuacutucua caponeetareeri, tee pueya niquitijoriquiaa taucuaca cumaneeca, Pueyaso Secojojua tiajinia niquitijosocoriquiano cumaneecaracuajani. Mococoou niquitijonaa cajitiucua caponeetareejaarihuaj, tee mococoou niquitijosacoriquiaacuajani Pueyasoocuara catijasocoriquiano. ¹³ Jesuuri nojori sequeree:

—Pueyaso sequencesanocuajaari naa naajiotasaacuaria tarisia:

“Cua quiquoori sesojosaanutaniya Pueyaso Secojojua tia”.

¡Niaari saniniuuja na jiyatecanu nohuasenuujuaca quiquiero!

¹⁴ Secojojua tiajinia na quishacarijia, cariyojuarujuri pueya, mariyata shipiiniquiuijuniaa pueyari nocua nijioquiaari. Jesuuri nojori naatanijioree. ¹⁵ Pueyacuara secojonaa jiyaniijianucuaari Moisés Naajioneejiniji niishitijonaata Jesu shootiariquiaa cusosuhua naatanijiyano. Jiyacaritij, naatujooriiri Secojojua tiajinia naa nacooriquiaa Jesujiniji: “¡Pa supuetanaa jiyaniijia David niquiohuacuajinio supueno pueyano! ¡Nojuajaari pa Jiyaniijia!” Canaa Judiocuaca jiyaniijianucua niquisshacari naa Jesu miishanotej, mariyata nojori tojishacari naatujoori, nojoriiri juaquioree. ¹⁶ Nojoriiri Jesu nequesotaree:

—¿Quiaate naatujoori tojiya casaa nojori sequeyani? ¡Nojoriiri jiyaniya quiaari Pueyaso Jiyarosano!

Jesuuri nojori riucuaree:

—¡Taaquiriirinij! Na tojiyacuajanijia. Maniniacuajaari nojori sequencesano. ¿Majateeri nia serojonu quiquiaacuaja taricuacaanu Pueyaso Rupajinaria naa sequencesanotej:

“Quiaari naatujoori niishitirii conaanjanio, seetanujuanaa nojori maniniuhuaqueetanura quia Jiyarosano”?

¹⁷ Naa nojori na sequenu nuhuajijij, Jesuuri nojori tiujiaquee. Jerusalén tiacajiniji quiaqueeri canaata Betania tiacajinia. Canaari tii maqueseeni.

*Jesu sesacasacari higo naana, muetuho na quiniuucua
(Mr 11.12-14, 20-26)*

¹⁸ Tariquiicuaji, Jesuuri Jerusalén tiacajinjara tacateriquiohua canaa na saquirijoosano pueyata. Jesuuri miaajeriquiaa. ¹⁹ Higo naana niquiriiri nuu shuriucua nujuano. Nocua canujiyareeri. Shaanoori quiriquiaa, saa na jaamasucuaja. Cunora, Jesuuri naana sequencesano:

—Majaari socua quia jajau sanishaanu quiniutianiya.

¡Naanaari ritia sorequee! ²⁰ Naa canaa niquishacaritij, canaari jiuuji-
atereeni. Canaari Jesu nequesotareeni:

—¿Taateni? ¿Casaara higo naana sorequee ritiani?

²¹ Jesuuri canaa riucuaree:

—Seetanujuanaa nia sequeyanijia, niaa jaara Pueyasocua tiuuijaca
quiri nioojia nia niquipioteyaquinijia nocuaji, niaa maara socua cutara
miishano miiri, socua jiyaneneta cua miishanojiniji. Naacuajitij, niaa
maara nia sequesano niquiri niaa jaara nio tuhuananu sequere: “Quia
jaataare shoniniacu caminajinija”. ²² Puetunujuanaa nia masesano nia
secojosacari Pueyaso, niaa jaara seetanujuanaa nocua tiuuri, niaari nia
masesano masenutaniya.

*Judiocuaca jiyanijianucua nequesoreesacari Jesu, cante na jiyaronani
(Mr 11.27-33; Lc 20.1-8)*

²³ Jesuuri Pueyaso Secojojua tiajinia tiuquiquiaari. Tii pueya ni-
ishitiojoriquiaari. Jiyacaritij, canaa Judiocuaca jiyanijianucuaari
nocuacatecanoquiaari. Nojoriiri pueyacuara secojonaa jiyanijianucua
quiquiaari, canaa Judiocuaca camarucuanio. Nojoriiri Jesu nequesota-
ree:

—¿Canteeri quiajanijani, naa quia miiniuriatej? ¿Canteeri quia jiyate-
canu juhua canaa jiyaniijia quia quiniuriani?

²⁴ Jesuuri nojori sequeree saniniujia:

—Janiyari nia nequesotanutaniya saniniunijia. Niaa jaara cua riu-
cuare, janiyacua nia sequerohua saniniunijia cante cua jiyaroquiaari
naa cua miiniuriani. ²⁵ Naacuajitij, cua riucuature coteenu. ¿Cante
Tiuquinijiona Juan jiyaroquiaari pueya na tiuquinijionurani? ¿Pueyaso-
tee? ¿Tama pueyajaja soj?

Jiyacaritij, tama nojoriajariajia juayonuutanu coteequiaari jiyaso-
huaja. Tama sequetooreea jiajia:

—Paa jaara na riucuareni: “Pueyaso na jiyaroquiaari”, pa sequeru-
cua: “¿Naatee? ¿Casaara na niishitiosanoocua nia tiuyaquiquianu-
cuaraarini?” ²⁶ Saniniujia, paa jaara sequereni: “Nojuajaari nareja
pueya jiyarosano quiquiaari”, ipuereeta quiniutaniyari pajaniyara!
Paacuajaari niishiyanu puetunu pueyajanaari sequequiaa Tiuquinijiona
Juanna seetanujuanaa Pueyaso sequesano caminiujiunia quiquiaari.

²⁷ Naaratej canaa Judiocuaca jiyanijianucuaari Jesu riucuaree:

—Maja canaa niishiniu canariquitijia na jiyaroquiaaritijiaj.

Jesuuri nojori sequeree:

—Janiyajuhuaj, majaari cua sequenu quiniutaniya niajaniya cante
cua Jiyaronani, naa cua miiniuriatej.

Jesu pohuatasano pueyano niquiohuajiniji

²⁸ Jesuuri naa nojori sequerohuacuhuaj:

—¿Cua tojitiare! Tamoru pueyanoori caapiqui niyanuraca quiquiaari.
Nojuajaari jiyapueranu jiyaroree: “Quiyanunaa, quiria quia pooni-
jiosee uva cuhuariquiajinia quiarijia”. ²⁹ Neyanuuri saaja na riucuaree:
“Maja cua quianu paniniu”. Na nuhuaji, niishiriojorohuari. Quiaque-
eri. Poonijioseeri. ³⁰ Na queeri naa na nuhuajishana sequereejuhuaj.
Neyanuuri na riucuaree: “Maniniacuaja, cua quenaa. Janiya quianu-
taniyani”. Na nuhuaji, majaari na quianu quiquiaari saaja. ³¹ ¿Taa nia
sequeyanijia pueyanaa? ¿Teyano cuno caapiqui necohuajinijiniote na que
tojijia quiquiaarini?

Nojoriiri Jesu riucuaree:

—Na jiyapueranucuaja.

Naaratej, Jesuuri nojori sequeree:

—Seetanujuanaa nia sequeyanijia. Cumaneeca masejonaa pa pueyajiniji Roma tiacajinia quijia jiyaniijiarani, mariyata paanatujurinio, cuno nia soosano pueyari nia shocotanutaniya Pueyaso muerasura nojori quiniuria. ³²Cua tojitiare casaara naa cua sequeree niajaniyani. Tiuquinijiona Juanri niquiaari na niishitiojonura juucua niajaniya, maninia nia quiniuria Pueyaso niquiara. Majaari nia tiuuniu quiqianu nocua. Niaari saaja na tojiyaquiquianu. Cumaneeca masejonaa nia soosano pueya cutaraari nocua tiuquianu, paanatujurinio. Nojoriiri na tojitiajara quiqianu. Niaacuajaari na niquiquianu taa cuno sesa miijiaca pueya maninia pueyara jatacanuni. ¡Niajaniyarijijataj, majaari nia tacatonu quiqianu nioojia sesa nia quiniujiniji! Niaari saaja Tiuquinijiona Juancua tiuyashijaca quiqianu.

Jesu niishitiosano cuhuariquia cojuanaa sesa miijiacajiniji

(*Mr 12.1-12; Lc 20.9-19*)

³³ 'Socua tamonu cua pohuatasano nia tojiri. Tamonu pueyanoori cuhuariquiajinia uva natooquiaari. Maninia matacoquiaari puetunu na shuriuquiocojuanaari maja casaa tiuquitianura nocua. Saajia quejaquiaariajuhuaj uva rapijiojuara, na caaca reratesaanura. Jiyaconajara tiaquiaariajuhuaj, cojuana niquijiara tiji nohuasejojuaacuaji. Na nuhuaji, na camaruuri tamasaca pueya niquitioquiaari na cuhuariquia, nera nojori cojuasocoriquiano. Na nuhuaji, na camaruuri tucuacaanu quiaquiaari pueyaracaanu camueenujunura. ³⁴ Jaara tari quiquiaari uva carojotasacari, saniya cuhuariquia camarujuanaari na seja jiyaramiquiquiaari na cuhuariquia cojuanaa pueyacua. Nojori jiyaramiquiquiaari nojori masenura cuhuariquia cojuanaa carojotasanojiniji, taa nojori pocoojoquiaari taricuajani. ³⁵ Cuhuariquia cojuanaari cuhuariquia camarujuanaa jiyaramiquishano seja quiooree. Niquiriyatu majacuttureeri. Tamonu moturee cutaraari. Tamonu ja cuturee saitiaari. ³⁶ Na nuhuaji, na camaruuri socua queraatia seja jiyaramiquiquiaarijuhuaj. Nojoriiri naquia miishaacquiaarijuhuaj.

³⁷ 'Na nuhuaji, na camarujuanaari tama sequereejaja: "Jiyaroreera cua niyanu. Maja cutara nojori rerequetenu quiniutianiya cua niyanu".

³⁸ Cuhuariquia cojuanaa jaara niquiquiaari camarnujuanaa niyanu nojoriicua niyanu, nojoriiri tama sequetooreejaja: "¡Cunocuajaqui cuhuariquia camaru quiriquiano na que niti, na que jaara shaajequee! ¡Pa morej! Naacujitij, pocua nio cuhuariquia camaruhuara quiqiini".

³⁹ Naaratej, camarnujuanaa niyanu tiuquishacari, cuhuariquia cojuanaari na quiaree. Na jaatucuttureeri cuhuariquiajiniji tamama. ¡Cuniqui na motureeri!

⁴⁰ Naa Jesu pohuatanu nuhuajitij, nojuajaari cuno canaa Judiocuaca camarucua nequesotaree:

—¿Taa nia sequeyani pueyanaa? Cuhuariquia camaru jaara tiuquiriohua na cuhuariquiajinia, ¿taa na miiniutianiya cuno cuhuariquia cojuanaani?

⁴¹ Jesu tojitiajari na riucuaturee:

—¡Cuno cuhuariquia camaruuri nojori puecoonutaniya, nojoriicua na taraajeyaquiniutia! Na nuhuaji, tamasaca pueya sequenutaniya

cutaraari, nojori cojuanura nera na cuhuariquia. Nojori cutaraari cuhuariquia camaru panishano niquitionutaniya nojori carojotasano-jiniji.

⁴² Jesuuri nojori sequeree:

—Jaa, naa miiniutianiyari. ¿Majate nia serojonu quiquiaaricuaja nio, tariucuacaanu Pueyaso Rupaajiniani?:

“Pueyari saitia tiariquiaa. Nojoriiri tamonu saajia jiyaniquiaari saajia sesarujuajau naasucua. Cuno saajiacuajaari socua panishano saajia quiquiaari. Jiyaniijajanaari naa na jiyatequiaari. Cuno saajiaita tiaree maninia cutaraari. Pueya niquishacari, jiuujiate-coreeri”.

Naa naajiotasano quiyacuajaari.

⁴³ 'Camarucuanaa, nocuaji nia numooteyanijia, Pueyasoori nia ruretanutaniya maja tari nia quiniuria na muerasu jiitiana. Tamasaca pueyari nia niti jiyatesaanutaniya cutara, nojori jiitiana maninia Pueyaso muerasurano. Nojoriiri maninia Pueyaso tojitiana quiniutianiya cutara, Pueyaso muerasu canenura jiyanoehua nera, juhua cuhuariquiajiniji senoosano queraatia. ⁴⁴ Cuno saajajiniji saniniuuja, pueyano jaara cuno saajiacuacu tiyare, nojuajaari juhua rashiquijintianiya. Cuno saajia jaara tiyare pueyanooocua, jacanaura na miiniutianiyari.

⁴⁵ Pueyacuara secojonaa jiyaniijianucua, mariyata Fariseocuaca tojiti-asacari naa Jesu pohuatasanotej, nojoriiri niishiquii Jesuuri nojorijiniji pohuatariquiaa miriqui. ⁴⁶ Naaratej, nojoriiri Jesu quianu panirii juucua, nojori juaaniutia. Nojoriiri saaja puereriquiaa pueya. Pueyacuariai sequeriquiaa Jesuuri seetanujuanaa Pueyaso sequenu panishano caminiuijiunia quiquiaari. Naaratej, jiyaniijianucuaari jiyamitia puerecoriquiaa Jesu nojori quianura.

22

*Jesu pohuatasano miriqui camishacari queranacunujiniji
(Lc 14.15-24)*

¹ Na nuhuaji, Jesuuri socua niishitijoquiaari miriqui pohuatasanota. Naa pohuataquiaaritij:

² —Pueyasoori pueya masuya nojoritia na quiniuria shuquiriaatia, taa tamonu cutara jiyaniijia miiquiaari mijiriacuaani. Cuno jiyaniijiaari shuquiriaatia quiniu paniriquiaa queraatia pueyata, neyanu camishacari. Naaratej, jiyaniijiaari queraatia sumatutequiaari, queraatia pueya miaquesocoriquiano. ³ Na nuhuaji, na seja jiyaramiquiri na masuusano pueya numootenura nojori niniuria queranacunura. Masuusano pueyari maja na niniu paniniu quiquiaari saaja. ⁴ Jiyaniijiaari socua tamasaca na seja sequeree: “Cua masuusano pueya nia numootejocoo. Nia sequesee: ‘Jiyaniijia nia sashiya. Puetunujuanaari tari jeenucusano nia queranacunura. Tari puecoosaaree na juyaca, na shiyoshitishano seyanio. Tariucua rariyosanoori quiya. Ritia nia nimia. Nia miaquenuee’”. Naa na seja na rootanu nuhuajitij, jiyaniijiaari nojori jiyaramiquirii. ⁵ Masuusano pueyari saaja tojitiaaquirii. Puetunujuanaari tama na panishanoquaaja miiriquiaa saaja. Tamonuuri na cuhuariquiajinia quiaaree. Tamonuuri na casami niquitionjosaqui quiaareecuja. ⁶ Tamasacaari saniniuuja jiyaniijia seja quooree.

Jiyanoqua naquiya nojori miiriiri. Na nuhuaji, nojori puecootureeri. ⁷ Jiyaniija niishishacari, jiyanoqua juuariiri. Nocuaji na soldadohua jiyaramiquirii cuno monaa nojori naminuria saniniujia, nojori tiaca na catijitanurajuhuaj. ⁸ Na nuhuaji, jiyaniijaari na seja sequeree: "Puetunujuanaari tari jeenucuasano pa queranacunura cua niyanu camishacari. Cua masuusano pueyacuajaari saaja cua ruuretareeni. Namitia majaari nojori nijionu quimiaa, saaja cua rerequetejaca nojori quiniucua. ⁹ Quiarijia cutara, nia quiaare nuu tuneequetajajin, tee queraatia pueya tajiniuuquataquiaacuajani. Nia masuure puetunu nia niquishano pueyajanaa".

¹⁰ Na seyari quojoquiaari tiaca nucuaco. Nojoriiri puetunu na riuriatasano pueyajanaa rerejoteree, maninia pueya, sesa pueyanio. Queranacunuusaquirii mishiquiaari masuusano pueyata. Camarnu seyari puetunu pueyajanaa cushiyotequiaari camishacari cushiyosano toqueya, nojori tiuquitiasacari tiaco queranacunura.

¹¹ Na nuhuaji, jiyaniijaajanaari tiuquiquiaari masuusano pueya na niquiniuria. Tamonu pueyano niquishiiri camishacari cushiyosano toqueju. ¹² Jiyaniijaari na sequeree: "Pueyanonaa, ¿taa quia tiuquimiaa camishacari cushishano toqueejuni?" Pueyanoori sanaa na tojiriquiaa. Majaari na riucuanu quirii. ¹³ Cunora, jiyaniijaari na seja sequeree: "¡Nia morojore na cashacuca, na numatucuanio! ¡Niocua na jartarohua carijinacuma ninishiqui! Tii sapuenutaniyari. Na quiaca miaquenutaniyajaa nahuua na noonuta, naquiya na miishacari".

¹⁴ Naajuhuaj pueyanaa, Pueyasoori queraatia pueya masuya quiarijia na muerasu nojori quiniuria. Saniniujia, secajaari saquiriojosaanutaniya nojorijinjinio seetanujuanaa na muerasura nojori quiniuria.

*Jiya jiyaniija cuaara niquitiojosaaria na sequesano cumaneeca
(Mr 12.13-17; Lc 20.20-26)*

¹⁵ Na nuhuaji, Fariseocuacaari quojoquiaari Jesu shuriucuaji tama nojori niishitiojootonurajaa. Nojoriiri Jesu pocuatenu paniquiaari sesa juucua, nocuara nojori saquiriojotanura. ¹⁶ Na nuhuaji, Fariseocuacaari na niishitiojosano pueya jiyaramiquirii Jesuucua, jiyaniija Herodes panijiaca pueyata. Herodesri jiyaniija César jiyatesano quiquiaari Judea jiyajin jiyaniija na quiniuria. Fariseocuaca jiyaramiquishano pueyari Jesu sequesee:

—Niishitiojonanaa, canaari niishiyani quiaria maninia pueyano. Majaari quia cuaracashijonu. Quiaria seetanujuanaa casaa niishitiojquiaa cutara taate canaa naata maninia quiniu Pueyaso niquiarani. Majaari quia puerenu quiquiaa, pueya niquiara quia pohuatanura quia niishishano. Majaari rimiajata quia niquiniu pueya. ¹⁷ Naaratej, canaa quia sequere taa canaa miiniutianiyani. Paari sequesaaquiaarini pa cumaneeca pa niquitiojonura jiyaniijaajanaa Césarra, taa cuno tahue César sequequiaaricuajani. Quiajaniyariuhuaj, ¿taa quia sequeya saniniunija?

¹⁸ Jesuuri ritia niishiquii, nojoriiri naa na nequesotariquiaa na saponuta. Nocuaji nojori sequereeri:

—Sapueno maninia quiijacanaa, ¿casaara nia saniniujiya naa janiani?
¹⁹ Cua niquitiri nia cumaneetoj, cuno, jiyaniija César sequesano pa niquitiojonura nojuajani.

Nojoriiri Jesu niquitirii cumanee.²⁰ Jesu niquishacari cuno cumanee, nojori nequesotareeri:

—¿Cana naaquitii nio nocuani? ¿Cana sesate nocua naajiotasanojanihuaj?

²¹ Nojoriiri na riucuaree:

—Jiyaniijia César naaquinicuaja, na sesajuhuaj.

Jesuuri nojori sequeree:

—Jaara naa quiriti, César nia niquitiojore tama na casaajaaja. Nojuacuajaari na camaru. Saniniujia, Pueyaso nia niquitiojore nerano tama na casaajaaja. Nojuaja cutaraari pa camarnu.

²² Nojori tojishacari naa Jesu sequencesotej, jiuujiatecoreeri. Na tarinitiatureeri. Quiojiyarohuari.

¿Macunucuate samiitiaconutaniuhua?

(Mr 12.18-27; Lc 20.27-40)

²³ Cuno juucaja, Saduceocuacaari Jesuucua nijioquiaari. Nojoriiri jiyaniquiaari macunucua maja na samiitiaconu quiniutaniuhua. Naaratej, nojoriiri Jesu sequencesee:

²⁴ —Niishitiojonanaa, supuetana Moisésri pa sequequiaari na naajiotasanojinia, pueyano jaara cusoyare mueyaju, na tarajanu cuaara camiiria mashiquio, mueya na mueratenura tarajanu niti. ²⁵ Tarijia, tamonu pueyanoori niya quiquiaari. Siete niquohuaraca quiquiaari, saa canuujuja. Jiyapueranuuri camiquiaari. Na nuhuaji, shaajequiaari, iri muetuhojua. Naaratej, na mashiquoorni camitishaquaari neyaca tarajanuta. ²⁶ Nojuajaari muetuhojua shaajequiaarijuhuaj. Naaratej, neyaca tarajanuuri mashiquio camiquiaarijuhuaj. Nojuajaari mueyaju cusoquiaarijuhuaj. Naa cusionuuquiaari puetunu cuno siete canuujuanaa. ²⁷ Na nuhuaji, mashiquoorni cusoquiaarijuhuaj. ²⁸ Saniniujia, macunucua jaara samiitiacorohua, ¿teyano cuno siete neyacaajinjiniote seetanu neyacajanaa quiniutianiyyani, puetunu cuno pojorijianaa jaara neyacaa quiquiaari?

²⁹ Jesuuri nojori riucuaree:

—¡Niaari jiyanoqua jiyajeneya nia niishiyaquishacari Pueyaso Ru-paajinia naajiotasano, Pueyaso cumaacanio! ³⁰ Macunucua samiitiacosacariuhua, majaari canuu camiyonu quiniutianiyya maaji. Naajuhuaj, maajipohuari maja na camiyonu quiniutianiyya neyacaara. Caya, maajinio, nojoriiri juhuajaniya quiijiaca quiniutianiyya juhua jiyocuacanu quiijiaca Pueyaso seya, maja camiyosano. ³¹ Socua cua tojitiare. Macunucuaari seetanujuanaa samiitiacoriquianohua. ¿Majateeri nia serojonu quiquiaacuaja taa Pueyaso sequequiaari niajaniyacuajani? Naa sequequiaariiri:

³² “Janiyari nia supuetana Abraham Jiyaniijiani, nia supuetana Isaac Jiyaniijiajuhuaj, nia supuetana Jacobo Jiyaniijianio”.

Naaratej, nia sequeyanijia, Pueyaso muerasu shaajecononi, nojoriiri maja macunucua na quiniu. Canapuete seetanujuanaa Pueyaso muerasu, nojori cutaraari pueyaracaanu quiijiaca.

³³ Pueya tojishacari naa Jesu niishitiojosanotej, nojoriiri jiyanoqua jiuujiateeree.

Puetunu Pueyaso rootasanojinijijanaani, teyanote socua na pueya tojishocoriquianoni

(*Mr 12.28-34*)

³⁴ Fariseocuaca jaara niishiquiaari Jesu Saduceocuaca sanaajaree, nojoriiri Jesuucua nijioquiaari nojori saniniuijuniuria nojuaja, nojori nequesoreenuta. ³⁵ Nojoriiri jaarajaaja Jesu pocuatenu paniriquiaa sesa juucua. Tamonu nojorijnijinioori Moisés Rootasanojiniji niishitiojona quiquiaari. Na saniniuijuniuria, nojuajaari Jesu nequesotaree:

³⁶ —Niishitiojonanaa, ¿Pueyaso rootasanojinijini, teyanote socua pa tojishocoriquianoni?

³⁷ Jesuuri na riucuaree:

—Naa naajiosano quiyacuajaari:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia niishitiajatajanaanio”.

³⁸ Niocuajaari socua na pueya tojishocoriquiano Pueyaso rootasano.

³⁹ Tamonu na sequesanoori quera juhua niojuhuaj. Naa sequeyari:

“Quiarta pueyano quia paniri taa quia paniyacuua tama quia cuaqueyajajani”.

⁴⁰ Puetunu Moisés rootasanojuanaa, mariyata puetunu tariucuacaanu Pueyaso sequesano caminiuijuniaa rootasanojuanaari nio caapiqui rootasanojinijicuaja.

¿Cante Cristo supuetanani?

(*Mr 12.35-37; Lc 20.41-44*)

⁴¹ Fariseocuaca quishacarijia cuniqui, Jesuuri nojori nequesotaree:

⁴² —¿Taa nia niishiriojiya Cristojinijini? ¿Cante na supuetanani?

Nojoriiri Jesu riucuaree:

—Pa jiyaniijiarano Cristoni, nojuajaari pa supuetana David niquiohuacujinio supuenutaniya.

⁴³ Jesuuri nojori sequerohuacuhuaj:

—Taaquiriirinij. Jaara naa quiritij, ¿niaateeri niishiyacuaja casaara David sequequiaari “cua Jiyaniijita” Cristocuaraarini, Pueyaso Sohuanu jaara na pocuatequiaari? Naa sequequiaariiri:

⁴⁴ “Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuaara quia paraa shocojotare quiocuajijaatijia’”.

⁴⁵ ¿Cristotucua taa David niquiohuacuaji supuereni, David jaara Cristo jiyaniquia na jiyaniijita?

⁴⁶ Nojoriiri Jesu niquitiaree sanaa. Nojoriiri majaa na naata na riucuanu quiquiaari. Cuno nuhuaji, pueyari majaa socua na nequesoreenu paniniu quiquiaari Jesu.

23

Jesu juashacari Fariseocuaca, Moisés Rootasano niishitiojonaanio

(*Mr 12.38-40; Lc 11.37-54; 20.45-47*)

¹ Na nuhuaji, Jesuuri tii quiniaa pueya sequeree, canaa na saquiriosano pueyario:

² —Moisés Rootasanojiniji niishitiojonaa, mariyata Fariseocuacaari supuetana Moisés niti quiya, tariucuacaanu Pueyaso Rupaa nojori niishitiojonura. ³ Naaratej, nia tojitiare puetunu nojori sequesanojuanaa niajaniya. Saniniujia, majaa cutaraari nia miiniu taa nojori

miiquiaacuaani. Nojoriiri najuhuana niishitiojoquiaa taa pueya miiniutianiyani. Majaari saniniujia nojori miiniu tama nojori niishitiojosanojuaja. ⁴ Nojoriiri tama nojori niishishanojuaja rootaquiaa, maja saaja tariucuacaanu Pueyaso niishitiojosano pa supuetanaa. Nojori rootasano pueya miishocoriquianoni, cunoori juhua jiyahohua niiquia casaa pueya nitiasocoriquiano. Nojoriiri maja quenaaja na naacutanu quiquiaa na juashiquia sacasaruta. ⁵ Nojoriiri puetunu na miishanojuanaa miiquiaa saaja pueya niquishocoriquiano, pueya shuquiritanura nojori. Nojoriiri Pueyaso Rupaajinji naajiotasano cushitiaquiaa na jiniji morotasano, na numatucuaacuanio. Nojoriiri naa miiquiaa taa pa supuetanaa miiquiaaricuaani. Saniniujia, nojoriiri najuhuana socua puereetuucara na quiquia cusupuequiaa pueya shootiasocoriquiano. Naajuhuaj, nojoriiri na toqueecuaji sohuataco-juva tunujutaquiaa taa pa supuetanaa Pueyaso tojitiajaca miiquiaaricuaani. Saniniujia, nojoriiri puera tucuacuvara na tunujutaquiaa saaja pueya niquishocoriquiano, pueya shootianura nojori. ⁶ Nojori jaara masuusaare tamonu tiajinia queranacunura, nojoriiri secooquiaa socua panishano cajitiujinia nojori cajitiuniuria tia camaru shuriucua. Naajuhuaj, Pueyaso secojojua tiacajinia pueya rerejosacari, nojoriiri cajitiuniu paniquiaa camarucua cajitiucuajinia pueya shootianura nojori. ⁷ Nojori rucuanejosacari tiacajinia, nojoriiri paniquiaa pueya saruhuananura nojori. Panitiuquiaajaariuhua pueya jiyaniquinuria nojori “niishitiojonaata”.

⁸ 'Niajaniya saniniujia cua pueyanaa, majaari pueya shanacunu niaacula, nojori jiyaniquinuria niajaniya “niishitiojonaata”. Niajaniya cutaraari niquiriyatujuja Niishitiojonaraca. Puetunu niajaniyajanaari niarta Pueyaso pueya tapueyocuaca. ⁹ Naajuhuaj, majaari tamonu pueyano mijiria nia jiyaniquiniu “cua queta”. Niaacuajaari niquiriyatu Queraca. Nojuajaari jiycuacaanu Quinia. ¹⁰ Naajuhuaj, majaari pueya nia shanacunu niaacula, nojori jiyaniquinuria niajaniya “cua jiyaniijiata”. Niaari niquiriyatujuja Jiyaniijiaranacuaja. Nojuacuajaari Pueyaso jiyrasano nia Jiyaniijiaranoni. ¹¹ Cante jiyaniijiajanaa cutara niajaniyajinjinioni, cuno cuaara jiyateera tama na cuaqueyajaaja nia cumaquinia na quiniuria. ¹² Cante tama na cuaqueyajaaja jiyateja pueya shocotaja na quiniuriani, narta pueya jiyaramiquijia na quiniuriajuhuaj, jiyano pueyano cutaraari cararosaanutaniya. Cante saniniujia juhua narta pueya serura jiyateja tama na cuaqueyajaajani, cunoori jiyaniijiara jiyatesaanutaniya cutara.

¹³ 'Cua tojitiare, Moisés Rootasanojiniji niishitiojonaanaa, niajaniya Fariseocuacahuaj, niaari cocuaatia miiquia! ¡Niaari sapuenu juhua maninia quijiaca niquishano! Niaari pueya tarinitiaaquiquiaa nojori rupuenura Pueyaso. Niaari maja nia tiuuniu Pueyasooocua. Naajuhuaj, majaari pueya nia tarinitianu nojori tiuuniuria Pueyasooocua, na muerasura nojori quiniuria.

¹⁴ ¡Niaari taraatia miishaanutaniya, Moisés Rootasanojiniji niishitiojonaanaa, niajaniya Fariseocuacahuaj! Niaari sapuenu juhua maninia miijiaca niquishano. Niaari mashiquiopue tiaca masequiaa secaja nia cumaneecata, nia sapojonuta nojori. Naacuajitij, niaari nojori tiaca masequiaa tama niajaniyarajaaja. Naa nia miiniu nuhuajitij, niaari shitiarayocua secojoquiaa najuhuana Pueyaso, pueya niquiara,

maninia pueya nia jiyanishaanura. Naaratej, niaari socua jiyanohua saniitiosaanutaniya tamasaca pueyajiniji.

15 '¡Niaari puereeta miishaanutaniya Moisés Rootasanojiniji niishitijoanaanaa, niajaniyajuhuaj Fariseocuacanaa! Niaari sapuenu juhua maninia mijjiaca niquishano. Niaari tucuacaanu rucuanejoquiaa jiya caco, shoniniacu caminia taquijirianio, tamonu nia niishitijonura na-juhuana Pueyaso tojijiara na quiniuria juucua, juhua tama niajaniyajaja. Nia niishitiosano pueyano jaara nia tojijiara quiri, nojuajaari socua jiyanohua saniitiosocoriquiano quiya niajaniyajiniji, sesa nia rootasano tojija na quiniucua.

16 '¡Niaari taraatia miishaanutaniya mosanucuanaa! Niajaniyari juhua cariyojuaru, cante tamonu pueyano jaatucuya juucuani, nuu nia niishiyaquishacari. Naacuajitij, niaari capa niishitijoquiaa. Niaari rootaquiaa, pueyano panishacari tamonu tiuuniuria na sequesanoocua, nojuaja cuaara sequeera: "Taa oro Pueyaso Secojojua tiajinia pueyaracaanu quiyacuaani, naajuhuaj, cua sequesano quiajaniyari seetanujuanaa tohuateenutaniya quiara". Saniniuujia, niaari sequequiaa, Pueyaso Secojojua tiajinia oro jaara sequeyaquishaare, majaari na sequesanoocua tiuushaanu. Naacuajitij, niaari sequequiaa, pueyano sequesanoori nareja sequesano, nojuaja jaara sequeera: "Taa Pueyaso Secojojua tia pueyaracaanu quiyacuaani, naajuhuaj, cua sequesano quiajaniyari seetanujuanaa tohuateenutaniya quiara". Niaari sequequiaa cuno sequesanoocuaari maja tiuushaanu. ¹⁷ ¡Mosanucuanaa, niaari juhua cariyojuaru! ¿Teyanote socua pueresanoni, cuno orotee, Pueyaso Secojojua tia soj? Cuno oroori naa pueresanora jiyatesaaquiaari saaja Pueyaso Secojojua tiajinia na quiniucua. ¹⁸ Niaari rootaquiaajuhuaj, pa sequesacari parta pueyano, casaa pa miiniutianiya nerani, pocua na tiuuniuria paa cuaara sequeera naatej: "Seetanujuanaa quia sequeyanijia. Naatej, taa casaa Pueyasocuara catijiaja juhuacutuucua niasano jiyanohua maninia quiyacuaa Pueyisorani, naajuhuaj, cua sequesanoori saaja maniniajuhuaj. Majaari cua sapojonu". Naacuajitij, niaari sequequiaa, paa jaara naa sequereni, paa cuaara miiria pa sequesano. Saniniuujia, niaari sequequiaa: "Pa sequesanoori najuhuana sequesano, paa jaara saaja Pueyasocuara catijiaja juhuacutu sequereni. Majaari nocua tiuushaanu". ¹⁹ ¡Cariyojuarujuriniae! ¿Majateeri nia niishinii? ¿Teyanote socua maniniani, Pueyasocuara catijiasocoriquiano casaatee, Pueyasocuara catijiaja juhuacutu soj? Catijiasocoriquiano casaari narejajuhuanajaj, jaara Pueyasocuara catijiajaacua niasoo quiyaquiri. ²⁰ Naaratej, cante Pueyasocuara catijiaja sequeree seetanujuanaani, nojuajaari maja saaja Pueyasocuara catijiaja na sequenu quirii. Nojuaja cutaraari na caco niasano sequereejuhuaj. ²¹ Naajuhuaj, cante Pueyaso Secojojua tia sequeree najuhuanani, cunoori maja saaja Pueyaso Secojojua tia na sequenu quirii. Nojuajaari Pueyaso sequereecuaja, Pueyaso Secojojua tia na sequesacari. ¡Pueyasocuajaari na Secojojua tiajinia quijia! ²² Naajuhuaj, pueyano jaara sequere na sequesano seetanujuanaa juhua jiya cajiniocua, nocua tiuushaanura, cunoori maja saaja jiya cajiniocua na sequenu quirii. ¡Pueyaso cajishaqui sequereejaariuhuaj, Pueyasojuanaa sequereejaariuhuaj, jiyocuacaanu casaa na sequesacari!

23 '¡Niaari taraatia miishaanutaniya, Moisés Rootasanojiniji niishitio-

jonaanaa, niajaniyajuhuaj Fariseocuacanaa! Niaari sapuenu juhua maninia mijiaca niquishano. Niaari Pueyaso niquitiojoquia maninia puetunu nio nia nataujinijijanaa, shanohua jaanujua jaamasucua, mi-aquesanojinia jatasano casaa: menta, anis, cominonio. Niaari jacaria serojoquia diez casaa puetunu cuno cien casaajinijijanaa, Pueyasa rora nia niquitiosocoriquiano taa supuetana Moisés sequequiaaricuajani. ¡Niaari saniniuujia socua pa tojishocoriquiano Moisés rootasano tojitiaaquiquia! ¡Naacuajitij, majaari maninia pueyano nia quiniu taa Moisés rootaquiaaricuajani! ¡Majaari nia taraajenu quiquia niarta pueyanoocua! ¡Majaari nia tiuuniu Pueyasooocua! Niaari maninia niquitiojoquia nia nataacuacajiniji. Taa nia niquitiojoquia nia nataacuacajinijicuaani, ¡naa nia tojitiarejuhua socua pa tojishocoriquiano rootasano Moisés Naajiotasanojiniji! ²⁴ Pueya nia niishitiojosacari Moisés Rootasanojiniji juucua, niaari juhua cariyojuaru cante narta cariyojuaru jaatucuya juucuani. Niaari juhua tamonu pueyanojuhuaj. Na ratusacari, nujujuja taquirii na mashacajiniji. Socua na ratusacariuhua, ¡saaja cuartia miataaree juhuajaniyari!

²⁵ ¡Niaari cocuaatia miiquiaa, Moisés Rootasanojiniji niishitiojonanaa, niajaniyajuhuaj Fariseocuacanaa! Niaari sapuenu juhua maninia mijiaca niquishano. Niaari juhua noo pueyajuhuaj, cante nareja na ratujua cuaqueya jeequejoquiaani, na miacojua cuaqueyanio. Na jiniacumaari saniniuujia jiyanohua curuutuuca quiyajaa. Nio miriqui cua seqesano nia niishiri. Nioojiaari naa quiyajuhuaj. Niaari nohuasenuujuaca, jamuejacanio. ²⁶ ¡Cariyojuaru Fariseocuacanaa, nia ratujua jiniacuma nia jeequere coteenu, nia miacojua jiniacumanio! Naacuajitij, na cuaqueyari maninia jeequesano quiniutiani yahuaj.

²⁷ ¡Niaari taraatia miishaanutaniya, Moisés Rootasanojiniji niishitiojonaanaa, niajaniyajuhuaj Fariseocuacanaa! Puetunu niajaniyajanaari sapuenu juhua maninia mijiaca niquishano, juhua macunucua quiqio shanohua niquishano, cohujata noshijosano. Saniniuujia na jiniacuma quiyari sacuaraatia jaanujua pueya nucuhua mocuaca. ²⁸ Niaari naajuhuaj. Niaari sapuenu juhua maninia pueya niquishano. Saniniuujia nioojiaari jiyanohua sesa, jiyanohua sapojonu niishijia.

²⁹ ¡Niaari taraatia miishaanutaniya, Moisés Rootasanojiniji niishitiojonaanaa, niajaniyajuhuaj Fariseocuacanaa! Niaari sapuenu juhua maninia mijiaca niquishano. Niaari macunucua niojotajara shanohua niquishano shipinijoquia, tariucuacaanu pueyara Pueyaso seqesano caminiuijunia nucuhuacuaji. Naajuhuaj, niaari tariucuacaanu Pueyaso tojitiajaca puecoosano quiqio maniniushitijiaca. ³⁰ Naa nia miishacaritij, niaari juhua sequequiaaruhua: “Paa jaara shipinijiosaaquiaari pa supuetanaa quishacarijia tariucuacaanuni, paa maara nojori cojiyaquiquiaari cutarani, nojori puecoosacari Pueyaso seqesano caminiuijunia”. ³¹ Saniniuujia, naa nia seqesacaritij, niaari tama niaacuara toreejaacuaja. Niaaqiiri cuno tariucuacaanu Pueyaso seqesano caminiuijunia puecoonaacuajinio supuenocuaja. ³² Naa Pueyaso seqesano caminiuijunia puecoonaacuajinio supueno nia quishacaritij, Pueyaso Jiyarosano nia morejuhuaj, nia tucuanatura nia supuetanaa coteesano.

³³ ¡Sesa mijiaca pueyanaa, niaari noonacuraca, juhua sacocua! ¿Ni-ateeri jiyaniya niaari saniitioyaquishaanutaniya mani quiqiojinia nia

supuetanaata? ³⁴ ¡Cua tojitiare! Janiyari Pueyaso rupaa caminiujuniaa jiyaramiquiniutianiya niaacuani, Pueyaso Rupaa niishijiacajuaj, Pueyaso rupaa niishitiojonaanio. Nojoriiri nia pohuatanutaniya Pueyasojiniji. Niaari noojiaqueya nojorijinjinio puecoontaniya. Niaari tamasaca teetejonutaniya niyacutesanojinia nojori nia monura. Niaari tamasaca majacunutaniya Pueyaso secojojua tiacajinia. Niaari tamasaca neteyojotanutaniya puetunu tiacajinijianaa, naquiya nia miiniuria nojori. ³⁵ Niaacuajaari niishiya, co-teenujuanaa mosaaquiaari Abel, maninia muijia pueyano. Naa puecoosaaquiaarii queraatia Pueyaso tojitiajaca pueya. Na nuhuaji, socua jaatesaaquiaarii monuuri Zacarías, Berequías niyanu. Cuno maninia pueyanoori mosaaquiaari Pueyaso Secojojua tiajinia, Pueyasoocuara catijiasaqui shuriucua. Monu porocua nia quiniuucua taa nia supuetanaa quiquiaricuaani, niaari saniniuujia nocua namishaanutaniyacujua puetunu tariucuacaanu Pueyaso tojitianaa puecoosaanuu-cuajanaa. ³⁶ Seetanujuanaa nia sequeyanijia, nio pa quishacari pueyani, nojoriiri saniitiosaanutaniya puetunu cuno pueya puecoosaanuu-cuajanaa.

*Jesu nujuquesacari Jerusalén tiacajinia quiniaa pueyacua
(Lc 13.34-35)*

³⁷ ¡Jerusalén tiacajinia quiniaa pueyanaa, jiyanohua taraajeya ni-aacuanijia! Niaari Pueyaso sequencesano caminiujuniaa pueya puecojuaca. Niaari Pueyaso jiyaramiquishano pueya jacujuaca saitia nojori pohuatanuucua Pueyaso rupaa nia niquiara juucua. Janiyari cucua nia nijionura panijia juucuani taraatia nia miyaquishaanuucuajia cua tacunura niaacuajia, naate taa caacaraja rijoquiaacuaa necohua na nesu cariquiacorani, na cojuanura nojori. Niaari saaja cua paniyaquijia cua cojuanura niajaniya. ³⁸ Cua tojitiare. ¡Niaari nia quiqiojiniji sanaajasaanutaniya niiquiji! ³⁹ Seetanujuanaa nia sequeyanijia, majaari socua nia niquiniu quiniutianiya janiya, niaa cuaara cua tiuquishacariuhua sequerejaatija: “Pueyaso cuaara shuquiritiiria pa Jiyaniijia quiriquiano na jiyarosano.”

24

*Jesu pohuatasacari, Pueyaso Secojojua tia niyartasaanutaniya
(Mr 13.1-2; Lc 21.5-6)*

¹ Jesuuri Pueyaso Secojojua tiajiniji tohuataarohua. Nata canaa quiosacari nucuaco, canaa, na saquiriojosano pueyani, canaari nocua catecanoquiaarini. Canaari Jesu niquitiriquiaa Pueyaso Secojojua tiani, shanohua niquishano tia. ² Jesuuri saa canaa riucuareejaa:

—Jaa, na niquiyacuajanijia. Niaa cumaati maninia na niquiyacujua. ¡Seetanujuanaa nia sequeyanijia, cuno tia niaa na niquiyani, cunoori niyartasaanutaniya puetunujuanaa! ¡Majaari quenaaja tamonu saajia manu quiniutianiya tamonu caco!

*Taa pa niishiniutianiyaní quera jiya puequesacari
(Mr 13.3-23; Lc 21.7-24; 17.22-24)*

³ Na nuhuaji, canaari Olivo cuhuariquia tuhuananuucua quiojquiaarini. Jesu cajishacari tii, canaa na saquiriojosano pueyani, canaari nocua catecanoquiaarini. Tama canaa quishacariajiaaja, canaari na nequesotareeni:

—Canaa quia sequere *¿taacari* Pueyaso Secojojua tia niyartasaanutaniyani? Naajuhuaj, *¿taa* canaa niishiniutianiyarini taacari quia tacatenutaniuhua mijiriani? Canaa quia sequerejuhuaj, *¿taacari* jiya puequenutaniyani?

⁴ Jesuuri canaa riucuaree:

—Tama nia cuaqueyajaaja nia cojuare tamasaca mariqui nia sapojoreeri. ⁵ Queraatia sapojonuujuacaari supuenutaniya. Nojoriiri tama na cuaqueyajaaja sequenutaniya: “Janiyacuaja Cristoni, Pueyaso Jiyarosano”. Naa nojori sequencesacaritij, queraatia pueya sapojonutaniyari. ⁶ Naajuhuaj, niaari pueyapue miaquetoojonujiniji tojiniuuntianiya, niya, tamonu jiyacajinianio. Niaari miaquetoojonura miananajotoonujiniji tojiniuuniutianiyajuhuaj. Niaa jaara naa tojiniuuritij, majaari puerenu. Naa quiniutianiyari mijiria. Naajaa, juhuanojuajaari maja jiya puequesacari quiniutianiya. ⁷ Tamonu pueyari tamasaca pueyata miaquetoojonutaniya. Tamonu jiyajiniji jiyaniijiaari tamonu jiyaniijiata miaquetoojonutaniyajuhuaj. Jiyacaritij, jiyanolua miaajenuuri quiniutianiya queraatia jiyacajinia, cusionuunujuhuaj. Rijiaari queraatia jiyacajinia jiuuquiujiutianutaniya. ⁸ Naa naquiya miishacari mijiriatej, cunoori juhua manajaraca coteesacari noonu. Na nuhuaji, socua jiyacatenutaniyari naquiya miishacari, mijiria cua tiuquiyaquishacaricia.

⁹ Jiyacaritij, niaari jiya camarucua niquitiojosaanutaniya cua muerasu nia quiniuucua, naquiya nojori miitianura niajaniya. Niaari puecoosaanutaniya. Puetunu jiyacajinjinio pueyajanaari nia niquiniu paniyaquiniutaniya, cua muerasu nia quiniuucua. ¹⁰ Jiyacaritij, queraatia cucua tiuuniaa pueyari cucua tiuuniu tarinitianutaniya nojori jaara naquiya miishaare. Nojoriiri narta Pueyaso muerasu tacartanutaniya. Majaari nojori niquiniu paniniu quiniutianiya tarijia narta Pueyaso muerasu. ¹¹ Queraatia sapojonuujuaca Pueyaso rupaa pohuatanaari supuenutaniya. Nojoriiri queraatia pueya sapojonutaniya. ¹² Jiyacaritij, sesa miiniuuri socua jiyanolua jiyacatenutaniya mijiria. Cunora, queraatia pueyari narta pueya paniniu tarinitianutaniya. ¹³ Saniniuujia, cucua tiuujia jaara rejeretare pueyaracaanu cuno naquiya miishacari jiya cuaara puequerejaatijia, nojuaja cutaraari shacantuua quihiara jatanishaanutaniya, pueyaracaanu na rishiniuria. ¹⁴ Pueyaso rupaa jaara pohuatasaare janijajiniji pueyapue niquiara puetunu jiyacajinajanaa, nojori niishiniuria taate nojori naata cua muerasura quiniuni, jiyacaritij, jiyari shusha puequenutaniya cutara.

¹⁵ Pueyaso sequencesano caminiujiunia Danielri tariucuacaanu pohuataquiaari sacuaraatia casaanaari supuenutaniya, puereeta niquishano. Cunoori Pueyaso pueya shaajariquiano. (Cante nio serojiyani, cuaara niishiiria casaa na sequeyani.) Niaa jaara cuno sacuaraatia casaa niquiri Pueyaso Secojojua tiajinia nujuatesano, niocua mashiri. ¹⁶ Jiyacaritij, canapuete Judea jiyajinia quiyani, nojori cuaara mashiiria tuhuananuhuacua. ¹⁷ Canapuete na tia cacojiria quiyani, nojori cuaara tiuquiyaquirria na tiajiniaaco maja na tarishiniuria na casamiicua. ¹⁸ Canapuete cuhuariquajinia quiyani, cuaara tacateyaquihuara na tiajiniohua na toqueyacua. ¹⁹ Jiyacaritij, jiyanolua taraatia quiniutianiyari maajipohuara, canapuete manajaatohua quiyani, mariyata

canapuete supuejaca muerasu jiitiaani.²⁰ Juhuacarijia Pueyaso nia secojoriquia nia mashiyoquatunu panishacari quiyaquiniuria shuniyara, samaatenu juucanio.²¹ Cuno quishacari, jiyano hua naquiya miiniuri quiniutianiya seetanujuanaa. Jiya coteenujiniji, jiyano naquiya miiniuri majaa na niquishaanu quiquiaari tari. Naajuhuaj, naa naquiya pueya miiniu nuhuajitij, majaaari socua na caminiu quiniutianiu hua juhua nio naquiya miiniu.²² Cuno naquiya miishacari jaara tajiyaqirri ritia, pueya maara cureyaquirij. Pueyaso cutaraari na tajitiniutianiya ritia, na saquiriojosano pueyacua na taraajesacari.

²³ 'Jiyacaritij, majaaari nia tojiniu, tamonu jaara sequere niajaniya: "¡Cua tarajanunaa, Cristoqui tari tiuquirohua! Niya quiyano". Naa juhuaj, majaaari nia tojiniu tamonu jaara nia sequere: "Nooj, jati quiyatej".²⁴ Queraatia sapojonuujuacaari supuenutaniya. Nojoriiri tama na cuaqueyajaaja jiyatenutaniya juhua Pueyaso jiyarosanora. Tamasacaari sequenutaniyacujua: "Janiyari Pueyaso sequenu panishano caminiujuniani". Nojoriiri pueya sapojonutaniya jiyajeneta nojori miishanota. Naa nojori miishacaritij, mijiria quiniaas pueyari jiyaniutianiya nojoriqui seetanujuanaa Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniyajaa riuhuaj.²⁵ Pueyanaa, naa cua sequencesacari niajaniyatej, janiyacuajaari juhuacarijia nia numootereeni.²⁶ Naaratej, majaaari nia quianu cua pajenuucua, pueya jaara sequere niajaniya: "Cristo jati cariicquia jiyajinias quiya". Naajuhuaj, majaaari pueya nia tojiniu nojori jaara sequere niajaniya: "Miji, Cristo sohuacamara cajiya. Nia niquishijia". Majaaari nia shanacunu naa nia sapojosaanuratej.²⁷ Mijiria cua tiuquishacariuhua, majaaari jiyasohua cua tiuquinii quiniutianiu hua. Naatej, taa pueya niquiquiaa miacana nunujiyano pananu muetasamajicuaani, pananu tiuquishocorario, pueyari naa cua niquinutianiya cua tiuquishacariuhua.²⁸ Tee casaa mocua quiyani, mohuari tii rerequeejonutaniya.

Jesuuri naa niishitiojoriquiaa miriqui, mijiria quiniaas pueya jaara sesere puera, nojoriiri saniitiosaanutaniya.

*Taa na quiniutianiyan Cristo tiuquishacariuhua
(Mr 13.24-37; Lc 21.25-33; 17.26-30, 34-36)*

²⁹ Jesuuri naa canaa pohuataquiaari socuatej:

—Ritia naquiya miishaanu nuhuajijia, pananuuri ninishiquiria quiniutianiya. Racaari maja na cuhuatanu quiniutianiya. Riyari totenutaniya. Jiya cajiniocua cumaaca jiitajacaari tetecatunutaniya.³⁰ Jiyacaritij, puereeta casaari jiya cajiniocua niquishaanutaniya, mijiria quiniaas niishiniuria janiyari quera roseyan. Puetunu nio jiyajinias pueyapuejanaari sapiyonuunutaniya, jiyano hua nojori taraajenuta. Na nuhuaji, cua niquitiuniutiani yari cohuaja najacajinias roseyan, jiyano hua cua cumaacata, jiyano hua shacantuca.³¹ Janiyari jiyocuacaanuji cua seyata tiuquiniutianiu hua, cua jiyaramiquiniuria nojori puetunu cua saquiriojosano pueyacuajanaa. Nojori tojitasacari trompeta jonenenu jiyano hua, nojoriiri cua saquiriojosano pueya rerejotenutaniya cucua, puetunu nio jiyajinijijanaa.

³² 'Nia pohuatareera higo naanajiniji, socua maninia nia niishiniuria taacari jiya puequenutaniyani. Higo naana cashacucua jaara macumaaaca quiri, na jaamasucuaari mueratiuya. Naa nia niquishacaritij, niaari niishiya tacareejonuqui quera quiniutianiya.³³ Naajuhuaj,

niaa jaara puetunu cua seqesanojuanaa niquiri tari tohuateyano, niocua niishiri janiyari quera tiuquihuani. Tari jiya puequesacari quera.³⁴ Seetanujuanaa nia sequeyanijia, nio pa quishacari pueyani, majaari nojori shaajenu quiniutianiya juhuanojuaja, nojori cuaara puetunujuanaa cua pohuatasano niquirijaatijia.³⁵ Jiya, jiya cajiniocuanio, cunoori shaajenutaniya. Cua seqesano cutaraari tohateenutaniyacuja. Cua rupaari pueyaracaanu seetanu rupaajanaa quiniutianiya.

³⁶ 'Maja cutaraari quenaaja tamonu pueyano niishiniu taacari jiya puequenutaniyani, mariyata taacari cua niniutianiuahuani. Jiyocuacaanu quiniaa Pueyaso seyari maja na niishiniujiuhuaj. Majaari queenaaja cua niishiniujiuhuaj. Saaja cua Queeri tamajaaja na niishiya cutara.

³⁷ 'Quera cua tiuquinii panishacariuhua, mijiria pueyari juhuajaniya quiniutianiya taa Noé quishacari mijiria tariucuacaanu pueya quiquiaricaunaani. ³⁸ Jiyacaritij, nio jiya pajaashitiaaquishacarijia, supuetanaari juhuajaniya miaquenuujua quiquiaari. Juhuajaniya queranacunuuriquiaajaariuhuaj. Juhuajaniya necohua camiyoteriquiaajaariuhuaj Noé jaara tiuquitiaquiaariajiaatijia na puereetuua buquejiniacuma. ³⁹ Nojoriiri saaja juhuajaniya quiriquiaa pajaa jaara nojori pajaashitiaquiaariajiaatijia. Puetunu pueyajanaari canashiyaquiji netasaquaiaari. Mariyata naa quiniutaniyari cua tiuquishacariuhua. ⁴⁰ Jiyacaritij, caapiqui pueya quishacari cuhuariquiajinia, niquiriyatuuri rishaanutaniya, Pueyaso pueyano na quiniuucua. Tamonuuri jateenutaniya saniitosocoriquiano saniniuujia. ⁴¹ Naajuhuaj, caapiqui maajipohua riiquiniiushacari tunanajiniacuma, niquiriyatuuri rishaanutaniya. Tamonuuri jateenutaniya. ⁴² Nocuaji juhua sutejaca nia quiriquia. Majaari nia niishiniu taacari nia Jiyaniijia tiuquiniiutianiuhuani. ⁴³ Nio nia niishiri. Tia camaru jaara niishiriquia taacari nohuasejojua niniutaniya nocuani, nojuaja maara nocuaji sutere maja nohuasejojua tiuquiniiuria na casami nohuasenura. ⁴⁴ Naaratej pueyanaa, niaa cumaati cua sashiya, janiya mariqui nia jiyajenetemohuarini.

*Jesu pohuatasano maninia seruiniji, sesoriquia seruinijinio
(Lc 12.41-48)*

⁴⁵ 'Socua cua pohuatasano nia tojitiare pueyanaa. Jiyanolua casamiraca pueyanoori queraatia seyaraca quiquiaari. Cuno jiyaniijiaari tu cuacaanu quianu paniquiaari tamonu jiyajinia. Naaratej, na nuhuajiria, nojuajaari niquiriyatu na seyajinijinio jiyatequiaari juhua na tia camarura, narta seja na mianuutenura maninia, puetunu juucajanaa. Cuno seruuri niishijia quiquiaari, na camarnu tojijajuhuaj. ⁴⁶ Cuno seruuri shuquiriaatia quiniutianiya na camarnu jaara na riuriatasuhua maninia poonijiyano taa na camarnu sequequiaari na nuhuajiriacuajani. ⁴⁷ Naaratej, seetanujuanaa nia sequeyanijia, na camarnuuri na jiyatenutaniya puetunu na jiiitasanojuanaa cojuanara. ⁴⁸ Saniniuujia, cuno seru jaara sesa mijiia quiri, nojuajaari tama sequenutaniyajacuajua: "Cua jiyaniijiaari jiyanolua tarishiniutianiya". ⁴⁹ Jaara naa niishirijore, nojuajaari narta seja piquiniu coteenutaniya. Mashaasequenuujuaca cojiniutianiyaquaariuhua queranacunuunura. ⁵⁰ Naa juhuajaniya na quishacaritij, na jiyaniijiaari jiyacari na jiyajenetenutaniya. ⁵¹ Naa sesa na quiniuucuatej, na jiyaniijiaari jiyanolua na saniitionutaniya.

Na nuhuaji, na jatanutaniyari na cojiritiasocoriquiano saniitionu sapueno juhua maninia niquishano mijiaca pueyata. Nojoriiri tii nujuquetunutaniya. Na quiaca miaquenuunutaniyari, naquiya na miqiosacari.

25

Jesu pohuatasano diez niyacoojorijiniji

¹ 'Nia pohuatareera taa Pueyaso shuriucua tiuquitianu panijaca quiniutianiya cua tiuquishacariuhuani. Nojoriiri juhua diez niyacoojori quiniutianiya, canapuete camiriquiano pueyano sashiriquiaacuajani. Cuno niyacoojoriiri quojoquiaari camiriquiano pueyano sashiniuria, na tiuquishacari nojori tiuquitianura nata tiaco. Nojoriiri samaritiu patootaquiaari. ² Cinco cuno niyacoojorijinijiiri mosanucua quiquiaari. Tamasacaari saniniuujia niishijiaca quiquiaari cutara. ³ Mosanucuaari saaja niquiriyatu samaritiu patootaquiaari. Majaari socua samaritiu nojori panu quiquiaari. ⁴ Niishijiaca cutaraari socua samaritiu pooquiaari, nojori samaritiu puequesacari na noshitishocoriquiano. ⁵ Camiriquiano pueyano tarishishacari, puetunu nojorijianaari maque-nuujuquiaari. Nojoriiri socua maquetuquee. ⁶ Shiyaqueya, tamonu pueyanoori nacaquiaari: "¡Camiriquiano pueyano cumaji tari! ¡Nia naacusee!" ⁷ Puetunu cuno niyacoojorijianaari ritia saneecuatuquiaari. Quera pueetacoyano na samaritiu nishiriiniuuri. Nocuaji niishijiaca niyacoojoriiri socua na pootusano samari noshitirii. ⁸ Jiyacaritij, mosanucua niyacoojoriiri narta niyacoojori sequeree: "Canaara nia rashiquojoreja nia samaritiujiniji. Canaa samaritiu tari pueetaareeni". ⁹ Cuno cinco niishijiaca niyacoojoriiri nojori riucuaree: "Maja. Maja maninia canaa niquitionura niajaniya, puetunu pa samaritiujianaacua senota pueetama. Ritia nia quiaare juhuari na masejosaqui, socua nia masenura tiji". ¹⁰ Cuno mosanucua niyacoojori quijosacari samari masenuucua, camiriquiano pueyanoori nojori niyacari tiuquishii. Cuno samaritiuriaca niyacoojori cutaraari camiriquiano pueyanota tiuquiti-aquiaari camishaqui tiaco queranacunura. Tia tiotoiuuri mishiquiosaa-re. ¹¹ Na nuhuaji, mosanucua niyacoojoriiri tiuquijioquiaariuhua. Tia tohuateyaji jiiquoonuusuahuari. Sequentereeri: "¡Jiyaniijiana, jiyani-ijiana, canaacuaji quia riatareja tiootiu!" ¹² Jiyaniijaari saa sequeree-jaa: "Seetanujuanaa nia sequeyanijia, maja cua niishiniu niajaniya".

¹³ Naa na pohuatanu nuhuajitij, Jesuuri canaa na saquiriojosano pueya sequeree:

—Pueyanaa, nia quiri juhua sutejaca, nia niishiyaquishacari taacari cua tiuquinuitianiuuhuani, casaa juucatej.

Miriqui Jesu pohuatasano cumaneeca poonitijionaajiniji (Lc 19.11-27)

¹⁴ Na nuhuaji, Jesuuri socua miriqui pohuataquiaari canaa na niishijionura taa Pueyaso muerasu miishaanutaniya jiya puequesacarini. Jesuuri naa canaa pohuataquiaritij:

—Tamonu jiyaniijaari tucuacaanu quianu paniquiaari tamonu jiyajinia. Na nuhuajiria, na seja niquitiojquiaari na racatasano cumaneecaari, nojori cuaara poonitijiora cuno cumaneeca na canijiasocoriquiano. ¹⁵ Naacuajitij, coteenu seru niquitioree cinco mil cumaneecaari. Tamonuuri niquitiosaaree dos mil. Tamonuuri niquitiosaaree

mil cumaneeeca. Na jiyaniijaari naa nojori niquitiojoquiaari na niishishacari nojoriiri rimiajata niishijiacquaari, socua cuno cumaneeeca nojori canijianura. Na nuhuaji, nojori jiyaniijaari quiaquiaari.¹⁶ Cinco mil cumaneeeca jiitianaari ritia coteequiaari casami masenura na niquitiosocoriquiano socua cumaneeecara, na reratenura na jiyaniijaara. Naacuajitij, cuno seruuri socua cinco mil cumaneeeca reratequiaari coteenu na jiitiasanojiniji. ¹⁷ Naajuhuaj, dos mil cumaneeeca jiitianaari socua dos mil cumaneeeca reratequiaari na jiitiasanojiniji. ¹⁸ Mil cumaneeeca masenaari saniniujuja maja na poonitijionu quiaquiaari na jiyaniija niquitiosano cumaneeeca. Nojuajaari saaja jiyajinia jiuutiaquiaari na jamojuara na jiyaniija cumaneeeca. ¹⁹ Seya jiyaniijaari camueenujuquiaari jiyanohua. Socua tiuquiquiaariuhuari na cumaneeeca na masejonuhuara na seyajinji. ²⁰ Coteenu nocua tiuquiquiaariiri cante cinco mil cumaneeeca niquitiosaaquiaaricuajani. Nojuajaari na jiyaniija sequeree: "Jiyaniijanaa, quiaari cua niquitio-canu cinco mil cumaneeeca. Niya quiyari socua cinco mil cumaneeeca quiara, cua poonijiosanojiniji cua reratesano". ²¹ Na jiyaniijaari na sequeree: "Maniniacuaja. Quiaacuajaari maninia cua seru. Majaqui najuhuana cua tiuuniu quiquieranu quiocua. Quiaacuajaqui maninia miiquianu secaja cua niquitiosanota quiajaniya. Janiyari quia jiyatenu-taniya queraatia jiitianaran. Miji quia tiuquimia. Niya cuata quia quishii shuquiriaatia". ²² Na nuhuaji, tamonu seruuri na jiyaniijaacua tiuquishijihuaj, nooj, cante dos mil cumaneeeca niquitiosaaquiaaricuajani. Na jiyaniija sequereeri: "Jiyaniijanaa, quiaari cua niquitiocanu dos mil cumaneeeca. Niya quiyari socua dos mil cumaneeeca quiara, cua reratesano cua poonijiosanojiniji". ²³ Na jiyaniijaari na sequeree: "Maniniacuaja. Quiaacuajaari maninia cua seru. Majaqui najuhuana cua tiuuniu quiquieranu quiocua. Quiaacuajaqui maninia miiquianu secaja cua niquitiosanota quiajaniya. Janiyari quia jiyatenutaniya queraatia jiitianaran. Miji quia tiuquimia. Shuquiriaatia niya quia quishii cuata". ²⁴ Na nuhuaji, tamonu seruuri tiuquishijihuaj cante mil cumaneeeca niquitiosaaquiaaricuajani. Na jiyaniija sequereeri: "Jiyaniijanaa, janiyari niishiyani quiaacuajaari quiarta pueyacua taraajeyashijia. Quiaari tamasaca natoosanojiniji senoojua. Quiaari tamasaca poonijiosanojiniji miajahuaj. ²⁵ Naaratej, janiyari quia cumaneeeca pueretacanu nohuasenujuacani. Cunora janiyari quia cumaneeeca jamocanu raamani. Quia niquiri. Niya quiyacuaja quia cumaneeeca puetunujuanaa". ²⁶ Na jiyaniijaari na juaarii: "¡Quiaaqui sesoriquia pueyano! ¡Taajeca seque! ¿Quiaateeri niishiquivianu janiyari tamasaca natoosanojiniji senoojuani, tamasaca poonijiosanojiniji miajahuaj? ²⁷ Quia jaara cua jiyaniquivianu naa quijatej, ¿casaara cua cumaneeeca quia niquitioyaoquiquianu cumaneeeca cojuanaarini? Nojori jaara cua cumaneeeca poonijiotecanu, nojori maara socua na canijiacanu quiria". ²⁸ Jiyacaritij, jiyaniijaari tamasaca na seja sequeree: "Nio sesa cua serujiniji nia jaariuutiare cua mil cumaneeeca. Nia niquitiore cutara cua maninia seru, cante diez mil jiitaa tariucuajani. ²⁹ Naacuajitij, cante casaa jiitiaacuaani, nojuajaari socua niquitiosaanutaniya, queraatia jiitaja na quiniuria. Saniniujuja, cante secaja jiitaa najuhuanani, nojuajaari secaja na jiitiasano jaariutiasaanutaniya puetunujuanaa. ³⁰ Nio najuhuana quijia seru saniniujuja, nia jatare carijiniacuma ninishiqui.

Tii sapuenutaniyari. Na quiaca miaquenutaniyari na noonuta, naquiya na miishacari”.

Jiya puequesacari, puetunu pueyapuejanaari nequesoreesaanutaniya sanüttiosocoriquiano

³¹ Puetunu cua seyajanaari jiyocuacaanuji cua cojiniutianiya janiya jaara tiuquiriohuani Pueyaso shacantuua cumaacata, Jiyaniijiajanaa cua quiniuria mijiria. Janiyari shanohua puereeta jiyaniijia cajitiujinia cajiniutianiyan, pueya cua nequesoreesacari. ³² Puetunu pueyapuejanaari cucua rerejotesaanutaniya puetunu nio jiyajinijiniojuanaa. Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquia cabraacuaca tajinijicuaani. ³³ Janiyari maninia pueya nujuatejonutaniya cua miaquetajarani. Saniniujia, janiyari sesoriquia pueya nujuatejonutaniya cua muenecarani. ³⁴ Na nuhuaji, janiyari cua miaquetajara nujuatiuyano sequenutaniyani: “Miji, cua Que shuquiritiasano pueyanaa. Shusha jiya shipinishacari niaarano cua Que riuriotaca nia masere. ³⁵ Cunoori niajaniyara, maninia miijiaca nia quiniuucua. Cua maaajesacari, niaari cua miaqueteja. Cua jiyamuesacari, niaari cua raateja. Tucuacaanu cua rucuanejosacari, niaari nia tiaco cua tiuquinijia. ³⁶ Toqueeju cua quishacari, niaari cua niquitioquiaari. Cusosu cua quishacari, niaari cua niquiniuucua quiaja. Nujuatejojuajinlia cua quishacari taraatia, niaari cucua quiojojua cua cumanijianuucua”. ³⁷ Na nuhuaji, maninia pueyari cua nequesotanutaniya: “Jiyaniijianaa, ¿taacari canaa niquiquiaari quiajaniya miaajeyanon? ¿Canaateeri quia miaquetequiaarini? Majaruhua. ¿Taacari canaa niquiquiaari quiajaniya jiyamueyanon? ¿Canaateeri quia raatequiaarini? ³⁸ ¿Taacari canaa niquiquiaari quiajaniya canaa jiyajinia rucuanejeyanon? ¿Canaateeri canaa tiajinia quia tiuquiniquiaarini? Majaruhua naa canaa miiniu quiquiaari quiajaniya. ¿Naajuhuaj, taacari canaa niquiquiaari quiajaniya toqueejuni? ¿Canaateeri quia niquitioquiaari toqueni? Maja. ³⁹ ¿Taacari canaa niquiquiaari quiajaniya cusosuni, nujuatejojuajinianio? ¿Canaateeri quiocua quiojoquiaari canaa niquiniuria quiajaniyani? Maja”.

⁴⁰ Janiyari cuno maninia pueya riucuanutaniyani: “Seetanujuanaa nia sequeyanija. Niaa jaara naa maninia miiquiaari tamonu cua muerasunijojuajinjinio, niaari maninia cua miiquiaarijuhuaj”.

⁴¹ Na nuhuaji, janiyari cua muenecara nujuatiuyano sequenutaniyani: “¡Cua shuriucuaji niiquiji nia quiaare, sesoriquia pueyanaa! ¡Niaari cua Que sesacasano! Niaari mani quiquiojinia quejoosaanutaniya. Cuno mani quiquioori maquesaashijia. Shipinishaaquiaariiri samaruhua jiyaniijiaacuaji, na seja samaruhuacuajinio. ⁴² Niaari naa miishaanutaniyaqui nia tarajeyaquiniuucua cucua. Cua maaajesacari, majaari nia miaquetenu quijia janija. Cua jiyamuesacari, majaari quenaaja nia raatonu quijia janija. ⁴³ Cua rucuanejosacari nia jiyajinia, majaari nia tiajinia nia tiuquininiu quijia janija. Toqueeju cua quishacarijuhuaj, majaari toque nia niquitionu quijia janija. Nujuatejojuajinlia cua quishacari, cusosu cua quishacarijuhuaj, majaari nia quianu quijia cua niquiniuucua quenaaja”.

⁴⁴ Jiyacaritij, cuno pueyari cua nequesotanutaniya: “Jiyaniijianaa, ¿taacari canaa niquiquiaari quiajaniya miaajeyanon, jiyamueyanajuaj? Majaari canaa niquiniu quijia quiajaniya canaa jiyajinia ru-

cuanejiyano tiaaju, toqueeju quiyano, cusosu quiyano, nujuatejojua-jinia quiyanojuhuaj. Canaa jaara naa quiyano quia niquiquiaarini, canaa maara quiocua taraajequiaarini".⁴⁵ Janiyari nojori riucuanu-taniyani: "Seetanujuanaa nia sequeyanija, nia taraajeyaquiniuucua tamonu cua muerasuniyojuaacua, niaari seetanujuanaa cucua taraa-jeyaquiquiaari".⁴⁶ Jiyacaritij, maninia miyashijia pueyari quejoosaanu-taniya pueyaracaanu saniitosocoriquiano. Saniniuujia maninia miijia pueyari Pueyaso shuriucua quianutaniya, pueyaracaanu shuquiriaatia nojori quiniuria.

26

*Judiocuaca camarucua roojotoosacari Jesu nojori quianura
(Mr 14.1-2; Lc 22.1-2; Jn 11.45-53)*

¹ Jesu jaara puetunu nio pohuatasanojuanaa pohuatanu puecaquiaari, canaa na saquiriojosano pueya sequereeri:

² —Niaacuajaari niishiya, tama tariquiiri Pascua juucara querana-cusacari. Janiyari jiyacari taucuaca niquitiosaanutaniyani, moso-coriquiano niyacutesanojinia teetesano.

³ Jiyacarijuhuaj, canaa Judiocuaca camarucuaari rerejoquiaari Caifás tiajinia. Caifásri pueyacuara secojonaa jiyaniijajanaa quiquiaari. Cuno pueya rerejoquiaarini, nojoriiri quiquiaari pueyacuara secojonaa camarucua, canaa Judiocuaca camarucuanio. ⁴ Nojoriiri cuno tiajinia pocoojoquiaari taa nojori sapojonutaniya Jesu na quiatusocoriquianoni, nojori mosocoriquiano. ⁵ Nojoriiri tama sequetooquiaariajiaaja: "Maja pa monu Pascuara queranacuscacari, paa mariqui pueya juaatiriri".

*Tamonu maaji totasacari na shanohua jaanutaja Jesuucua
(Mr 14.3-9; Jn 12.1-8)*

⁶ Tamonu juuca, Jesuta canaa quishacari Betania tiacajinia, canaari Simón tiajinia miaquenuriquiaani. Cuno Simónri tarijia lepra cusionu-jiniji Jesu naatanishano quiquiaari. ⁷ Miaquejajinia Jesu cajishacari, tamonu maajiiri nocua catecanoquiaari. Shiitianiyojua shucuariquiaja pataconiyojua cacatariquiaari, cohuala saajajiniji quejasano. Tii quiriquiaari shanohua jaanutaja. Cuno jaanutajaari jiyano hua quer-aa-tia cumaneecata masesano quiquiaari. Cuno maajiiri Jesu nacaacua na totaree puetunujuanaa. ⁸ Canaa jaara niquiquiaari naa cuno maaji miishanotej, canaari juaaquioreeni. Noojiaqueya canaajinijinioori naa sequeturee:

—¿Casaara cuno maaji niitiaree najuhuana shanohua jaanutajani?
⁹ ¡Cuno jaanutaja maara queraatia cumaneecara niquitiosaare, casami-ijuniucua niquitiosocoriquiano!

¹⁰ Jesu tojishacari taa canaa sequeriquiaa cuno maajini, canaa se-quereeri:

—¿Casaara nio maaji nia taroojiyani? ¡Na miishano janiyani, cunoori jiyano hua maninia quiria! ¹¹ Casamijijiuniucuaari niaata quiriquiano pueyaracaanu cutara. Janiya saniniuujia, majaari cua quiniu quiniu-tianiya pueyaracaanu niaata. ¹² Nio maaji totasacari cucua na shanohua jaanutajani, juhuacarrijia cua cuaqueya jeecaari, raaco cua niasaanura janiya jaara mosaareni. ¹³ Seetanujuanaa nia sequeyanija, pueyaracaanu pueya pohuatasacari Pueyaso rupaa janiyajiniji, nio maaji miis-hanoori pohuatasaanutaniyajuhua puetunu jiyacajinajanaa. Naa na

miishano janiyani, majaari na niyajetasaanu quiniutianiya pueyara-caanu.

*Judas tacartasacari Jesu, na quiatenura
(Mr 14.10-11; Lc 22.3-6)*

¹⁴ Jiyacaritij, Judasri pueyacuara secojonaa jiyanijianucuaacua quiaquiaari. Nojuajaari niquiriyatu canaanjinjinio Jesu doce saquiriojosano pueyano quiaquiaari. Na sesaari quiaquiaari Judas Iscariote. ¹⁵ Secojonaa jiyanijianucua sequeseeri:

—¿Taa cumaneeeca nia niquitionutaniya janiyani, janiya jaara nia quiatere Jesuni?

Nojoriiri ritia treinta cumaneeeca niquitionutaniya janiyani, Judasri pueyaracaanu niishiriojoriquiaa maatucua taacari quiatere Jesuni.

*Jesu miaquesacari na nuhuajiria na pueyata
(Mr 14.12-25; Lc 22.7-23; Jn 13.21-30; 1 Co 11.23-26)*

¹⁷ Puetunu marijiarajanaa, canaa Judiocuacani, canaari poreetesoo pan miaquenuuquiaari puetunu siete juucajanaani. Coteenu juucaari sesojosaaquiaari Pascua juuca. Naaratej, Pascua juuca, canaa, Jesu saquiriojosano pueyani, canaari nocua catecanoquiaarini naa canaa nequesotanura nojuaja:

—Jiyanijiana, ¿tee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

¹⁸ Jesuuri canaa riucuaree:

—Paacuajaari miaquenutaniyani tari cua sequesano pueyano tiajinia Jerusalén tiacjinia. Tii nia quiaare. Tia camaru nia sequesee: “Canaa niishitiojonaari naa quia sequeya: ‘Quera cua cusosacari. Janiyari cua nuhuajiria cua pueyata miaquenutaniya Pascua borrego quia tiajini-aní’”.

¹⁹ Canaari naa miiquiaarini taa Jesu sequequiaari canaacuajani. Canaari tii majeetequiaari borregoni, Pascua juuca miaquesocoriquiano.

²⁰ Jaara niniquiaari, Jesuuri canaa na doce pueyata miaquejajinia cajituriquiaa. ²¹ Canaa miaquenuuusacari, Jesuuri canaa sequeree:

—Seetanujuanaa nia sequeyanija, tamonu niajanijainjinioori cua tacartanutaniya, cua paraa na quiatenura janiya, nojori monura janiya.

²² Canaari jiyanohua taraaqequeeni naa Jesu sequesacaritij. Puetunu canaajanaari Jesu nequesotareeni:

—Janiya jiyoteeri Jiyanijiana?

²³ Jesuuri canaa riucuaree:

—Cante cuata tureneetaa pa miacojuajiniji, nojuacuajaari cua quiatenutaniya mosocoriquiano. ²⁴ Janiyacuajaari mosaanutaniyani taa janijainiji naajiotasaaquiaaricuajani tariucuacaanu Pueyaso Rupajinie. Saniniujia, jiyanohua taraatia miishaanutaniyari cua quiateriquiano pueyano. Maara socua maninia quiquiaari cuno pueyanora jaara raaquishaquiaari.

²⁵ Na quiateriquiano Judasri socua Jesu nequesotareejuhuaj:

—Janiya jiyoteeri Niishitiojonanaa?

Judas riucuareeri:

—Taaquiriirinij. Quiajanijayacuaaquinatejaj.

²⁶ Canaa miaquesacari, Jesuuri pan ririi. Na Que Pueyaso secojoree nocuaraari.

Na nuhuaji, na neecasereeri puetunu canaarajanaa, canaa miaquesocoriquiano. Canaa sequereeri:

—Jajaa, nia masere. Nia miaquere. Nio panri cua cuaqueya.

²⁷ Na nuhuaji, Jesuuri raatonuque pataree. Pueyaso na secojonu nuhuaji nocuara, Jesuuri canaa na niquitioree. Canaa sequereeri:

—Niojiniji nia rature puetunu niajaniyajanaa. ²⁸ Nioori cua nanaca, Pueyaso jiyanooniuria niajaniya. Cua nanacaari queraatia pueyacuara shoonutaniya, nojori jiyanooshaanura sesa nojori miishanojiniji. ²⁹ Seetanujuanaa, majaari socua cua ratunu quiniutianiya niaata mijiria nio uva caacajiniji. Janiyari niaata na ratunutaniya cutarani janiya jaara tacatemohuani, pueyaracaanu Jiyaniijajanaa cua quiniuria. Jiyacaritij, jiyanolua maninia quiniutianiyyari cuno quishacari. Paari mariyata jiyanolua shuquiriaatia quiniutianiya pueyaracaanuni.

Jesu sequesacari Pedro, nojuaja nocuaji seetanutaniya

(Mr 14.26-31; Lc 22.31-34; Jn 13.36-38)

³⁰ Canaa jaara jaaquequejoquiaari supuetana David naajioneejinijini, na nuhuaji canaari quojoquiaarin Olivo cuhuariquia tuhuananuucua.

³¹ Jesuuri jiyacari canaa sequeree:

—Puetunu niajaniyajanaari cucua tiuuniu tarinitianutaniya quiari niucuaja. Naa naajiotasano quiyacuajaari Pueyaso sequesano tariija: “Janiyari borrego cojuana monutaniyani. Na borregohuari niyaquejonutaniya tamajaaja”. ³² Naajaa, janiya jaara samiitiarohua macujinijini, janiyari nia puetanutaniya Galilea jiyajiniani.

³³ Pedroori Jesu sequeree:

—Puetunu quia pueyajanaa jaara quiocua tiuuniu tarinitiare, janiya cutaraari maja cua catenu quiniutianiya quiocuaji.

³⁴ Jesuuri Pedro sequeree saaja:

—Seetanujuanaa nio niucuajani, caacaraja niunijiyaquishacarijia, quiaari naa pacutejonutaniya seetanu cucuaji: “Maja cua niishiniu cuno pueyano”.

³⁵ Pedroori Jesu sequeree:

—¡Pueya cuaara moora janiyaqui, naajaa, majaari cua seetanu quiniutianiya quiocuaji!

Puetunu canaa Jesu pueyajanaari mariyata naa sequequiaaritij, taa Pedro sequeriquiaacuaani.

Jesu secojosacari Getsemaní cuhuariquiajinia

(Mr 14.32-42; Lc 22.39-46)

³⁶ Na nuhuaji, Jesuuri tamonu cuhuariquiajinia tiuquijioquiaari canaa na saquieriosano pueyata. Cuno cuhuariquia sesaari quiquiaari Getsemaní. Jesuuri canaa sequeree:

—Niyaja nia cajitiuri cua secojosacari cua Que jati socua nia taccoji.

³⁷ Jesuuri Pedro jiyataquiaari, caapiqui Zebedeo niquiohuanio. Jesuuri juhuacatecara taraajequiaari. Jiyanolua tacaariquiaajaariuhuaj.

³⁸ Jiyacaritij, Jesuuri nojori sequeree:

—¡Coojia quera jiaqueya jiyanolua cua taraajenuta! ¡Quera cusoyanjia! Niyaja cua sashitiuri. Nia sutere nia tarajanura janiya quenaaja.

³⁹ Jesuuri nojori shuriucuaji canuiyaree tamajaaja socua nojori taccoji. Jiyocuara jacamaseeri Pueyaso na secojonura. Naa sequereeri:

—¡Cua Quenaa, jaara na naata quiri, maja quenaaja cua cartenu naquiya cua miishaanura! Naajaa, janiya cuaara miishaariaqui taa quia paniyacuajani, maja juhua cua panishano.

⁴⁰ Na nuhuaji, Jesuuri na pueya niquishuhua. Nojoriiri saaja maqueturquiaa. Pedro sequereeri:

—Pedronaa, ¿majate nia naata cuata sutenu quenaaja rupaquijia?

⁴¹ Nia sutere Pueyaso nia secojonura, niaa mariqui sesa miiriiri niaa jaara saniniujujushaare. Seetanujuanaa, poojiaari maninia miiniu pani-jia. Pa cuaqueyari saniniujua sasaca quiyacujua. Naacuajitij, majaari pa naata maninia miiniu Pueyaso cumaquiyacuahaci pajaniya.

⁴² Jesuuri socua tacatequiaariuhua tamajaaja Pueyaso secojonuhuara. Naa sequereeri:

—Cua Quenaa, janiya jaara naquiya miishaareni, janiya cuaara miishaariaqui taa quia paniyacuajani.

⁴³ Jesuuri na pueyacua tacateyarohuacuhuaj. Maquetuyano nojori riuriatasuhuariuhuaj. Nojori namijaari saaja seecutayariquiaa jiyanohua nojori maquenu paniniutia. ⁴⁴ Jesuuri nojori tarinitiaquiaari socua. Quiaquiaariuhuari na Que secojonuhuara. Secojonu pacutequiaariiri taa na secojoriquiaa coteenucuajani. ⁴⁵ Na nuhuaji, na pueyacua nimiohuariuhuaj. Nojori sequencesuhuari:

—Quiarijia cutara nia maquetuyare. Nia paniyatere cutara maquetunu. ¡Juaj! ¡Nia tojiri! ¡Janiyari tari quiatesaanutaniya sesa miijiaca pueyani! Nojoriiri cua miiniutaniya taa na panitiuyacuajani. ⁴⁶ ¡Nia saneecuature! Pa quiaare. Cumaji tari cua quiateriquiano.

Moronucua na paraa jaatucutasacari Jesu

(*Mr 14.43-50; Lc 22.47-53; Jn 18.2-11*)

⁴⁷ Jesu pocuasacarijia, Judasri jiyacari tiuquishii. Nio Judascua-jaari niquiriyatu canaajinijinio Jesu doce saquiriojosano pueyajiniji quiquiaari. ¡Queraatia pueyari Judasta nijioquiaari! Nojoriiri secojonaa jiyaniijianucua jiyaramiquishano pueya quiquiaari, canaa Judiocuaca camarucua jiyaramiquishano pueyajuhuaj. Nojoriiri nijiniaquietucuaja mueruu pooriquiaa, macacanio. ⁴⁸ Judasri tari niishitioquiaari Jesu quiaturiquiano pueya taa nojori niishiniutaniyani teyanote Jesuni. Nojuajaquiiri tari nojori sequencequiaari: “Teyano pueyano cua nujiya pa tiuquishacarini, cunocuajaari nojuaja. Niocua na quiasee ritia”.

⁴⁹ Naacuajitij, Judas tiuquishacari Jesuucua, na sequenceseeri:

—Quiocua tiuquianijia Niishitiojonanaa.

Jiyacarijia na nujuureeri. ⁵⁰ Jesuuri na sequeree:

—Cua rupuenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee. ⁵¹ Jiyacaritij, tamonu canaajinijinio pueyanoori ritia shitiaree na nijiniaquietucuaja mueruu na shuucuaji. Nata jaateree secojonaa jiyaniijia seru numocoori. ⁵² Jesuuri na sequeree:

—¡Na co jiniacuma quia shiriohua quia mueruu! ¿Majate quia niishiniu, cante mueruuta miaqueja pueyanoni, mueruuta mosaanutaniyajaariuhuaj? ⁵³ ¿Quiaate niishiyaquiyajuhuaj, janiya jaara cua Que sequereni cucua na jiyaramiquiniuria na seya jiyocuacaanuji na cojuanura janiya, cua Que maara ritia cucua jiyaramiquiri cincuenta mil na seyajinijinio? ⁵⁴ Naajuhuaj, janiya jaara naa cua Que sequere

na cojuatenura janiyani, ¿tariucuacaanu Pueyaso Rupaajinia janiyajiniji naajiotasanotucua taa tohuateereni?

⁵⁵ Jiyacaritij, Jesuuri na paraa sequeree:

—¿Taateni? ¿Janiyateeri nohuasejojuani, naa nia tiuquitianura cua quianura mueruuta, macacatanio? Niaacujaari juucua cua niquijia puetunu juucajanaa Pueyaso Secojojua tajinia cajiyano, pueya cua niishitiosacari. ¿Casaara tii nia quiaaquiquianu janiyani? ⁵⁶ Naajaa, naacuajitij puetunu nia miishanojuanaari tohuateenutaniya, taa tariucuacaanu Pueyaso Rupaajinia naajiotasaaquiaari janiyajinijicuajani.

Jiyacaritij, canaa, na saquiriojosano pueyani, canaari Jesu tiuji-aquiaari niquiriyatuni. Puetunu canaaajanaari mashiyocuatureeni.

*Judiocuaca camarucua nequesoreesacari Jesu
(Mr 14.53-65; Lc 22.54-55, 63-71; Jn 18.12-14, 19-24)*

⁵⁷ Jesu quianaari na jaatucuquiaari jiyaniijia Caifásrua. Caifásrua pueyacuara secojonaa jiyaniijia quiquiaari. Judiocuaca camarucuaari tari Jesuucuaji rerejoquiaari Caifás tajinia. Nojoriiri quiquiaari Moisés Rootasanojiniji niishitiojonaa, canaa Judiocuaca camarucuanio. ⁵⁸ Pedroori Jesu nuhuajiquiaari tucuacaanuji secojonaa jiyaniijia tajiniara. Cuno puereetuua tia shocuaari mataca quiquiaari. Pedroori tii cariiniancumia tiuquiquiaarijuhuaj. Jiyaniijia Caifás seja tajinia cajishiiri, na niquinuria taa nojori miiniutianiya Jesuni.

⁵⁹ Pueyacuara secojonaa jiyaniijianucuaari puetunu canaa Judiocuaca camarucuatajanaa pajeriquiaa pueya, nojori saquiriojotanura na sapojonuta Jesuucuara, na mosaanura. ⁶⁰ Queraatia pueyari najuhuana Jesuucuara saquiriojotaree juucua. Nojori sequencesanori rimiajata quiquiaari tamasaca sequencesanoiniji. Na nuhuaji, socua caapiqui pueyari mariyata sesa saquiriojotaree Jesuucuara. ⁶¹ Nojoriiri naa sequeree:

—Cuno pueyano naa sequecanutej: “Janiya jaara Pueyaso Secojojua tia niyatareni, janiyari na tianu tucuatanutaniuhua jiuujianaraca juucajiniani”.

⁶² Jesuuri sanaa nujuariquiaa saaja. Nocuaji, secojonaa jiyaniijiaari nujuaree. Jesu sequereeri:

—¿Majate quenaaja quia riucuanuuja? ¿Quiaate pueya tojirii quiocuara saquiriojotaano? ¿Seetanutejanaa nojori sequencesano?

⁶³ Jesuuri saaja sanaa na tojiriquiaa. Nocuaji secojonaa jiyaniijiaari Jesu sequeree:

—¡Cua tojiri! Paa niya quiya Pueyaso niquierani. ¡Cua riucuare! ¡Majaari sapojonu! ¿Quiaate Cristo, Pueyaso Niyanu?

⁶⁴ Jesuuri na riucuaree:

—Jaa. Nojuacuajanija taa quia sequereecuajani. Cua tojitiare. Na nuhuaji, niaari cua niquinutianiya Pueyaso miaquetajara cajiyano. Niaari cua niquinutaniyajuhuaj jiyocuacaanuji tacateyanohua cohujajinija.

⁶⁵ Pueyacuara secojonaa jiyaniijia jaara tojiquiaari naa Jesu sequencesanotej, tama na toque sutareejaarijia na juaniutia. Nata quiniaa sequereeri:

—¡Juhuej! ¡Nia tojishuriucuara na sequencesano! ¡Nojuajaari tama na cuaqueyajaaja jiyateya juhua Pueyaso na quiniuria! ¡Jiyanoohua sacuaraatiaari na sequencesano Pueyaso niquierara! ¡Paatucua casaara sashiri socua

tamonu saquiriojotanura nocuaraarini? Niaacuaja shusha tojitiaree tama na sequencesanojuaaja sacuaraatia Pueyaso niquiara. ⁶⁶ ¿Taa pa miiniutianiyanoj? ¿Taa nia sequeyani?

Nojoriiri pueyacuara secojonaa jiyaniijia riucuaree:

—¡Cuaara mosaaria!

⁶⁷ Jiyacaritij, tamasacaari Jesu jiquioco riocojoree. Na jiquioco na masetejotureejaariuhuaj. Tamasaca saniniujia, Jesu namijia na morotunu nuhuaji, na mocoritia na piquitiuriiri. ⁶⁸ Na nuhuaji Jesu nequesotatureeri:

—Quiaa jaara Cristo quiri, Pueyaso jiyarosano, quia niishiritioj, ¿cante quia piriini?

Pedro seetasacari Jesuucuaji

(*Mr 14.66-72; Lc 22.56-62; Jn 18.15-18, 25-27*)

⁶⁹ Pedroori jiyacari tii cajiriquiaajaa carijiniacuma. Jiyacaritij, secojonaa jiyaniijia seruuri Pedro niquishii. Nojuajaari niyacoo quiquiaari. Pedro sequereeri:

—¡Jaj, quiaacuaja cuno Jesuta rucuanejojua, cuno Galilea jiyajinjinio pueyanotani!

⁷⁰ Pedroori jiyacari seetaree puetunu pueya niquiarajanaa. Naa sapojoreeri:

—¡Maja cua niishiniu casaa quia sequeyani!

⁷¹ Pedroori tohuateyajiria canujiyaree. Jati, tamonu niyacoori na niquirijiuhuaj. Cuno seruuri jiyacari tii quinia sequeree:

—¡Nio pueyanoori cuno Jesuta quijiajuhuaj, cuno Jesu, Nazaret tiacajinjinio pueyanon!

⁷² Pedroori Jesujiniji socua seetanu camiriohuacuhuaj:

—¡Maja cua niishiniu cuno pueyano! ¡Pueyasocuajaari niishiya, seetanujuanaa nia sequeyanijia!

⁷³ Pasaja na tarishiniu nuhuaji, quiniqui quiniaari Pedro sequetusee:

—¡Quiaaqi seetanujuanaa cuno Jesu pueyajinjinio! ¡Quiaari juhua nojori pocuaajuhuaj!

⁷⁴ Jiyacaritij, Pedroori socua jiyacateree sapojonura. Naa cuno pueya sequereeri:

—¡Pueyasocuajaari niishiya maja cua niishiniu cuno pueyano, niaa na sequeyani! ¡Pueyasocuajaari cua sequencesano tojiya! ¡Majaari cua sapojonu niajani!

Caacaraajaari canashiyaquiji niunijioquee. ⁷⁵ Jiyacaritij, Pedroori naa cuno niucuaja Jesu sequencesano niishiquii: “Pedronaa, caacaraja niuniyyaquishacarijia, quiaari tari janiyajiniji seetanu pacutejonutaniya”. Pedroori tia shocua matacainiji tohuataquiaari ritia. ¡Jiyanohua nujuquequeeri na taraajenuta!

27

Judiocuaca camarucua niquitiosacari Jesu jiyaniijia Pilato

(*Mr 15.1; Lc 23.1-2; Jn 18.28-32*)

¹ Tariquiicuaji, puetunu pueyacuara secojonaa jiyaniijianucuajanaari rerejoree narta Judiocuaca camarucuata. Nojoriiri roojotooree taa na miitiuniutianiya Jesu na motenurani. ² Na nuhuaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

Judas Iscariote cusosacari

³ Judasri jiyanohua macuhuajequiaari na niquishacari Jesuuri mosaanutaniya na quiatenuucua nojuaja. Na tacaaniutia, Judasri quiaquiaari secojonaa jiyaniijianucuaacua, canaa Judiocuaca camarucuaacuanio, nojori na niquitionuhuara cuno treinta cumaneeca.

⁴ Judasri nojori sequesee:

—¡Janiyaqui sesa miiriucuaani, najihuana cua quiatenuucua maninia pueyano niajani!

Nojoriiri saa na riucuareejaa:

—Naajaa. Maja canaa miishano. Cunocuajaari tama quia miishano-juuaja.

⁵ Judasri nojori cari cuno treinta cumaneeca jataree Pueyaso Sec-ojojua tiajinia. Tiji quiacuhuari. Na riquiajiniji morotaquiaari so-huaneyocuaari. Naa cusoquiaariiri. Sohuaneycopuaacuaji jaasutaari.

⁶ Secojonaa jiyaniijianucuaari Judas jatasano cumaneeca reratequiaari. Nojoriiri tama sequetooquiaariajaa:

—Nio cumaneecaari maja na naata Pueyasora racatabajinia niaso-coriquiano. Nio cumaneecaari pueyano monu sami.

⁷ Puetunu nojorijanaa jaara niishirijoquaari taa na miitiuniutianiya cuno cumaneecani, nojoriiri marau paniyoru pueyano cuhuariquia masequiaari cuno cumaneecata. Cuno cuhuariquiaari jiyatesaaquiaari rucoona jamojuara, nojori jaara cusoyare Jerusalén tiacajinia nojori quishacari. ⁸ Pueyano monu samitia cuno cuhuariquia masesaanuucua, cuno cuhuariquiaari sesojosaaquiaari “Nanaca samitia masesano cuhuariquia”. Naa quiyajaari na sesa. ⁹⁻¹⁰ Naacuajitij, Pueyaso sequenu panishano caminiujiunia supuetana Jeremías sequesanoori maninia tohuateequiaari. Nojuajaari naa sequequiaaritij: “Nojoriiri na treinta cumaneeca pataquiaari cuhuariquia masenura

marau paniyoru pueyanojiniji, taa cua jiyaniijia Pueyaso se-quequiaari janiyacuajani. Tarrijia, cuno treinta cumaneecata, maninia pueyanoori nata masesaaquiaari. Israel pueyari naa sequequiaaritij: ‘Cuaara treinta cumaneecata masesaaria cuno pueyano’ ”.

Pilato nequesoreesacari Jesu

(Mr 15.2-5; Lc 23.3-5; Jn 18.33-38)

¹¹ Jesuuri jaatucusaaquiaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaree:

—Jaa. Naacuaaquinatejaj, taa quia sequereecuajani.

¹² Secojonaa jiyaniijianucua, canaa Judiocuaca camarucuanio, nojori jaara Jesuucuara saquirijotariquia, Jesuuri sanaa tojiriquia nojori.

¹³ Naaratej, jiyaniijia Pilatoori Jesu sequeree:

—¿Majate quia tojinii nojori, quiocuara tonujiyano queraatia?

¹⁴ Majaari Jesu riucuanu quirii quenaaja. Pilatoori nocuaji jiuuji-aterree, casaara na riucuaaquuya quenaajani.

Pilato sequesacari Jesuuri mosaanutaniya

(Mr 15.6-20; Lc 23.13-25; Jn 18.38-19.16)

¹⁵ Puetunu Pascua juucarajanaa, Pilatoori nujuatejojuajinia nujuatesano pueyano cartenu jiitiquiaari. Judiocuaca panishano

pueyanoori cartesaaquiaari pueyaracaanu.¹⁶ Cuno quishacari, tamonu pueyanoori nujuatejojuajinia nujuatesano quiriquiaa, Barrabás jiyanihano. Puetunu pueyajanaari na niishijia sesa na miiniuucua.¹⁷ Pueya rerejosacari Jesu na nacoojotasacari Pilato niquiara, Pilatoori nojori nequesot aquiaari:

—Judiocuacanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequencesano, Pueyaso jiyarosanona.

¹⁸ Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojitiaquiriquiaa, nojori tojitianura Jesu. Cunora, camarucuaari Jesu monu paniriquiaa.

¹⁹ Pilato cajishacari na nequesoreesaqui, necocuaari nocua jiyarquiaari tamonu na seru, naa na numootenuratej: “¡Narejatejataj, nareja! ¡Janiyari niucua maquijoyoree puereeta cuno pueyanoocuajini!”

²⁰ Jiyacaritij, secojonaa jiyaniijianucuaari, canaa Judiocuaca camarucuata pueya niishitiojoriquiaa nojori sequenura, Barrabás cuaara cartesaaria, Jesu cuaara mosaaria saniniuuja. ²¹ Naacuajitij, jiyaniijia Pilato jaara pueya nequesot aquiaariuhua teyano nojori paniya na cartenurani, nojoriiri na riucuaree:

—¡Barrabás quia cartere!

²² Pilatoori nojori nequesotaree:

—¿Naatee? ¿Taa cua miiniutaniya Jesuurinitioj, pueya sequencesano “Pueyaso jiyarosanoni?”

Puetunu pueyajanaari ritia na riucuaree:

—¡Cuaara teetesaaaria niyacutesanojinia!

²³ Pilatoori nojori nequesotarohuacuhuaj:

—¿Casaarateni? ¿Sesa miiriitijaara?

Pueyari saaja socua jiyanoehua nacaree:

—¡Cuaara mosaaria niyacutesanojinia teetesano!

²⁴ Pilato cartenu saniniujiushacari Jesu juucua, pueyari saaja socua jiyanoehua nacooriguiaa. ¡Socua jiyanoehua juaaquieriquiaari! Pilato niishishacari maja na naata quiniutaniya Jesu cartenu, taa na paniriquiaa juucuacuajani, nojuajaari mohuaca maseree. Pueya niquiara shuquitareeri. Na shuquitiasacari, Judiocuaca sequereeri:

—¡Majaari cucua na tiuutiasaanu quiniutaniya nia mosacari nio maninia pueyano! Cunoori maja cua miishano quiniutaniya. ¡Cunoori tama nia miishanojuaaja!

²⁵ Puetunu pueyajanaari na riucuaree:

—Naajaa. ¡Jaara mosaare, cuaara tiuutiasaaria canaacua, canaa niquiohuacuanio!

²⁶ Na nuhuaji, Pilatoori Barrabás tohuateree nujuatejojuajiniji. Saniniuuja Jesu majacutereeri. Na nuhuaji, na soldadohua na niquitioreeri niyacutesanojinia nojori teetesocoriquiano.

²⁷ Jiyaniijia Pilato soldadohuari jiyacari Jesu jaatucuree Pilato tiajiniaaco. Nojoriiri puetunu narta soldadohuajanaa rerejoteree Jesu shocuaqueya. ²⁸ Na nuhuaji, nojoriiri Jesu toque jocuaturee. Tamonu tuquaue toque cushitishaareeri, shaaruque, juhua jiyaniijiajanaa cushishano. Naa na miitiuriiri na macaatinuria. ²⁹ Nojoriiri juhuaccontucua maaturee na nacaquerajuhuaj. Na nuhuaji, na cushititiurii Jesuuri.

Naajua niquitiosaareejaariuhuaj, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucuara mojoquetaquiaari. Nojoriiri naa na macaatirii:

—¡Jejejee, Judiocuaca jiyaniijiana!

³⁰ Nojoriiri Jesu riocojoree. Na naajua na jaariutiatureeri. Nataja na naca piquitiuriiri. ³¹ Naa nojori macaatiniu nuhuaji Jesutej, nojoriiri cuno tucuaque toque jocuaquiaariuhua nocuaji. Tama na toquejaaja cushitishaarohuari. Na nuhuaji, nojoriiri na jiyataquiaari na teetenura niyacutesanojinia.

Jesu teetesacari niyacutesanojinia

(*Mr 15.21-32; Lc 23.26-43; Jn 19.17-27*)

³² Nojori tohuareetasacari tiacajiniji puecoosaquiria nojori quiosacari, nojoriiri tamonu pueyano naacumaa. Nojuajaari Cirene jiyajinjinio pueyano quiquiaari. Simónri na sesa quijia. Soldado-huari cuno Simón pateree Jesu teetejara niyacutesano. ³³ Nojoriiri tiuquijiosee sesa miijiaca puecoosaqui. Pueya puecoosaquini, na sesa quiquiaari “Gólgota”. Nioori pueyano rupaajinia sequeya “Pueyano nacaco”. ³⁴ Quiniqui, soldadohuari Jesu raateree vino juucua, casaa piajata cojitishano. Jesu jaara na saniquiaari, majaari na ratunu quirii.

³⁵ Jesu jaara niyacutesanojinia teetesaaquiaari tari, soldadohuari saitia tacuarishijoree nojori niishiniuria cante Jesu toque poonutaniya nerani. Naacuajitij, tama nojorijaarijia Jesu toque seraatiquiaari. Naa tohuateequiaariiri tariucuacaanu Pueyaso sequesano caminiujiunia sequesano, nojuaja jaara naa naajiotquiaari:

“Pueyari saitia tacuarishijoree cua toque nojori seraatiianura”.

³⁶ Na nuhuaji, cuno soldadohuari cajitiuquiaari Jesu na cojuanura.

³⁷ Jesu nacaacuma, naajioneeri rupotasaquiaari. Tii naajiosano quiriquiaari casaara na teetesaareeni. Naa naajiosano quiriquiaari: “Nioori Jesu, Judiocuaca Jiyaniijia”.

³⁸ Caapiqui nohuasenuujuacaari Jesu shuriucua teetesaaquiaarijihuaj, socua tamonu caapiqui niyacutesanojinia; tamonu na miaquetajara, tamonu na muenecara. ³⁹ Tamasaca pueya tajishacari nucuaco Jesu shuriuquico, nojoriiri Jesu macaatiquiaari. Na maanuquenuta, nojoriiri Jesu sequetuquiaari:

⁴⁰ —¡Jaj! ¡Cumaacaraca quijia naatijia! Quiaacuajaari sequeja quiaa jaara Pueyaso Secojuela tia niyartare, quia naata na tianu tucuananuhua juujianaraca juucajinaria. ¿Naatee? ¡Quia jaara naa cumaacaraca quirikitij, canaa niquiara quia roserecuarajaj, quia jaara Pueyaso Niyanu quiri seetanujuanaa!

⁴¹ Secojonaa jiyaniijianucuaari tii quiriquiaajuhua Moisés Rootasano-jiniji niishitijoonaata, canaa Judiocuaca camarucuanio. Nojoriiri Jesu macaatiriquiaajuhuaj. Tama sequetooriquiaajaarijia:

⁴² —Saa ja tamasaca naatanijoquaquiiri. Maja cutaraari na naata tama nocuajijiaaja tacunu. Jaara seetanujuanaa pa Israel pueya jiyaniijia quiri, cuaara roseera quiarijia pa niquiara niyacutesanojiniji, nocua pa tiuuniuria. ⁴³ ¡Pueyasoocua tiuujia naatijia! Jaara naa quirikitij, Pueyaso cuaara na roshiniiria, nojuaja jaara seetanujuanaa Pueyaso panishano quiri. Nojuacuajaari pa sequeja: “Janiyari Pueyaso Niyanuni”.

⁴⁴ Cuno caapiqui nohuasenuujuaca Jesu shuriucua teetejosano quiriquiaani, nojoriiri Jesu macaatiriquiaajuhuaj.

Jesu cusosacari

(*Mr 15.33-41; Lc 23.44-49; Jn 19.28-30*)

⁴⁵ ¡Panacari, mijiriaari ninishiquiria quiqui! Pananu mueecosacari cuhuatemohuari. ⁴⁶ Jiyacaritij, Jesuuri jiyanohua nacaquiaari naatej:

—¡Elí, Eliinaa! ¿lama sabactani?

Nioori pueyano rupaajinia sequeya: “¡Cua Pueyasonaa, cua Pueyasonaa!, ¿casaara quia carteree janiyani?” ⁴⁷ Tamasaca na shuriucua nujuatunaari na tojitiariquiaa. Nojoriiri sequeree:

—¡Nia tojiri! ¡Supuetana Elías jiiquioonuyano! Noo Elías, tariucuacaanu pueyara Pueyaso sequencesano caminiujiunia quiquiaaritij.

⁴⁸ Tamonuuri ritia netequee namasu casaa na riniuria. Naajuaacua na morotanu nuhuaji, jereeca vinojinia na shiriiri. Na nuhuaji, Jesuucua na shiitoreeri na raatenura. ⁴⁹ Tamasacaari sequeree:

—¡Pa shanacure! ¡Elías jiyoteeri nocua niniutianiya na roshininiuria niyacutesanojiniji!

⁵⁰ ¡Jiyacaritij, Jesuuri jiyanohua nacarohua! ¡Na nuhuaji na sohuanu tohuataniriiri! ¡Cusoqueeril! ⁵¹ Pueyaso Secojouja tajinia, shiquiaruque toquejiniji sohuacaari quiquiaari Pueyaso Quishaqui mishiquiotaja. ¡Jesu cusosacari, cuno toqueeri sutequee jiyocuacaanuji jiyocuara puetunujuanaa! ¡Rijaari jiya jiuuquiuquiaari jiyanohua! ¡Sairi jiaquetacoquiaari noojiaacoji! ⁵² ¡Macunucua raacaari riatequequiaari! ¡Queraatia tariucuacaanu Pueyasoocua tiuuniaari samiitiacoquee na raacajinia! ⁵³ Jesu jaara samiitiaciaariuhua, cuno samiitiaconohua pueyari tohuareetaquiaari na raacajiniji. Nojoriiri Jerusalén tiacajinia tiuquiti aquiaari. Nojoriiri queraatia pueyacua muetaquiaari tii, Pueyaso panishano tiacajiniani. ⁵⁴ Soldadohua capitánri na pueyata Jesu cojuarquiaa, Jesu cuaara cusoyarejaatijia nojori niqiura. Nojori jaara jiya niqui- tiuquiaari jiuuquiuquiaano, socua puetunu nojori niquishanojuanaanio, nojoriiri jiyanohua puereturee. Sequetureeri:

—¡Nio pueyanoqui seetanujuanaa Pueyaso Niyanu quiquianu!

⁵⁵ Queraatia maajipohuari tii quiriquiaajuhuaj. Nojoriiri tucucaanuji shootiaturquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenueriquiano. ⁵⁶ Cuno maajipohua tajinia quiriquiaari María Magdalena, Santiago nucua Maríajuhuaj, José nucua Maríanio, mariyata Zebedeo niquiohua nucuanio.

Jesu quete niasacari raaco

(*Mr 15.42-47; Lc 23.50-56; Jn 19.38-42*)

⁵⁷ Tamonu pueyanoori quiquiaari Arimatea tiacajinjinio. Jiyanohua casamiriaca quijiaari. Na sesa quiquiaari José. Nojuajaari tarijia Jesu tojijiari quiquiaari. Joseeri Jesu cusionu juucaya tuiquiquiaari cuno tenacari. ⁵⁸ Joseeri Pilatoocua quiaquiaari Jesu quete na masenura. Pilatoori na pueya sequeree cuaara na niquitiosaarianoj. ⁵⁹ Joseeri Jesu quete paquiaari na jeenucuanura raaco na niasocoriquiano. Na jiuniocoreeri quenaaruque cohuaque toquejinia. ⁶⁰ Na nuhuaji na niaquiaari tama na raacojaari. Quiarinio raa quiquiaari, José jiuutianishano saajajinia. Na nuhuaji, Joseeri puereetuua saajia saquitiniquiaari raa tiootiuria. Quiacuhuari. ⁶¹ María Magdalenaari na sesaanucuuta cajitiurquiaa raa caneja taquijiria.

Soldadohua cojuasacari Jesu raa

⁶² Pascuara jeenucuanu juuca nuhuaji, secojonaa jiyaniijianucuaari Pilatoocua quiojoquiaari Fariseocuacata. ⁶³ Naa na sequetuseeri:

—Jiyaniijianaa, canaari cuno sapojouja pueyano sequencesano niishiquini, na sequencesano saminio na quishacarijia. Nojuajaari sequeja: “Janiyari jiuujianaraca juucajinia samiitianutaniuhuani”. ⁶⁴ Nocuaji na raa quia cojuatere maninia tiosano, jiuujianaraca juuca cuaara shocorejaatijia, na pueya mariqui niucua macu nohuasequeeri. Nojori jaara na nohuasere, nojoriiri sequenutaniya Jesu samiitiarohuacuaa. Nojori jaara naa sapojore pueyatej, socua jiyacatenutaniyari Jesu sequencesano, nojuaja jaara sequecanu: “Janiyari Pueyaso Jiyarosanoni”.

⁶⁵ Pilatoori nojori sequeree:

—Niya quiyacuaja cua soldadohua. Nojori nia cojuatere maninia cuno raa, taa nia paniyacuajani.

⁶⁶ Nojoriiri soldadohua nujuajequaari raa nojori cojuanura. Raa tiootiuuri rupanacusaquiaarijuhuaj jiyaniijia Pilato sesa naajiotajata.

28

Jesu samiitiasacariuhua

(*Mr 16.1-8; Lc 24.1-12; Jn 20.1-10*)

¹ Samaatenu juuca jaara shocoquiaari, coteenu juuca semaanajinijinio juhuaquesacari, shusha cuhuatesacari, María Magdalenaari raa niquinuucua quiariquiaa na sesaanucuata. ² ¡Canashiyajiji, rijiaari jiyanoehua jiuuquiutiaree! Cunoori quiquiaari Pueyaso seru rosenuucua jiyocuacaanuji raacula. Raa tiootiu saajia saquitinishiiri. Na nuhuaji, saajiaacua cajiriohuari. ³ ¡Pueyaso seruuri niquishaquiaari shacantuca juhua miacana! Na toqueeri jiyanoehua cohuaque quiquiaari, juhua sohuanatuu. ⁴ Raa cojuatunaari jiyanoehua shiriiquiuquiaari nojori niquishacari Pueyaso seru. Jiyanoehua tetecatureeri. Na puerenuta socua cusojonuureeri. ⁵ Maajipohua jaara tiuquiquiaari raajinia, Pueyaso seruuri nojori sequeree:

—Maja nia shiriiquiniu. Janiyacuajaari niishiyani niaari Jesu pajeya, niyacutesanojinia mosanotej. ⁶ Maja niya na quiniu. Tari samiitiarohuano, taa nojuaja sequequiaari niajaniyacuajani. Miji. Nia niquishushiiria na masaqui. Shaaqui. ⁷ Ritia nia quiaarohua. Na saquirijosano pueya nia sequencesuhua: “Jesu tari samiitiarohua. Nojuajaari nia puetanutaniya Galilea jiyajinia. Niaari jati na niquinutianiya”. Janiyacuajaari tari nia sequereeni. Naa nia pohuatasuhua na pueya.

⁸ Maajipohuari masaacujutanuuriqiohua raajiniji na puerenuta, na shuquiriniutiajuhuaj. Nojoriiri socua netecuatiuyarohuaquij, canaa na pohuatanuhuara Pueyaso seru sequencesano nojori. ⁹ ¡Jiyacaritij, Jesujuanaari canashiyajiji nojoriicua muetaquee nuujinia! Nojori saruhuatareeri. Maajipohuari nocua catecanoree. Na cariquimiaji mojouetacoreeri. Jesu niohuaca quiatureeri. Jesu shootiatureeri na jiuujiatenuta. ¹⁰ Jesuuri nojori sequeree:

—Maja nia puerenu. Nia quiaarohua. Cua pueya nia sequencesuhua nojori cuaara quiojoora Galilea jiyajinia. Nojoriiri seetanujuanaa cua tapueyocuaca. Nojoriiri jati cua niquitiuniutianiya.

Raa cojuanaa pohuatasano

¹¹ Maajipohua quojosacariuhua, noojiaqueya raa cojuanaajinjinioori tiacajinia quijoquiaariuhua pueyacuara secojonaa jiyanijianucua nojori pohuatanura nojori niquisshano. ¹² Pueyacuara secojonaa jiyanijianucuaari canaa Judiocuaca camarucuata rerejoree na roojotoonura taa na miitiuniutianiyan. Na nuhuaji, nojoriiri queraatia cumaneeca niquitioquiaari raa cojuanaa, pueya niquiara nojori pohuatanura tamaatia nojori niquisshanojiniji. ¹³ Soldadohuari naa rootasaaquiaaritij:

—Niocua naa sequere pueyatej: “Canaa maquesacari, Jesu pueyaquiri niucua nohuasequee Jesu quete raajiniji”. Niocua naa sequeretej. ¹⁴ Jiyaniijia Pilato jaara niishiri naa nia pohuatasacaritij, majaari nia puerenu. Canaacuajaari na shinianjanutaniyan jaara juaari. Naacuajitij, majaari na juaaniu quiniutaniya niajaniya.

¹⁵ Jiyacaritij, soldadohuari cumaneeca maseree. Nojoriiri naa pohuatanu coteequiaari taa nojori rootasaareecuajani. Nojori cuarcashishanoori ritia caminiujushaaquiaari canaa Judiocuacara. Naacuajitij, canaa Judiocuacaari naa sequeyajaa quiarijia.

*Jesu rootasacari na pueya na jiyaramiquiay quisshacaricia nojori
(Mr 16.14-18; Lc 24.36-49; Jn 20.19-23)*

¹⁶ Canaa, Jesu once saquiriosano pueyani, canaari Galilea jiyanjinia quijoquiaari tamonu tuhuananuucuani. Jesuuri canaa sequequiaari canaa quiojonura tiriara, tii canaa coquetoonura nata. ¹⁷ Canaa niquisshacari Jesu quiyano tii, canaari nocuara mojquetacoquiaari canaa shuquiritianura nojuajani. Tamasaca canaajinjinioori jiyaniquiriaa maja naasucuaari Jesu. ¹⁸ Jesuuri canaacua catecanoree. Canaa sequereeri:

—Janiyari puetunu cumaacajanaa niquitiosaareeni, Jiyaniijajanaa cua quiniuria jiyocuacaanu, mijirianio. ¹⁹ ¡Naaratej, nia quiojore! ¡Puetunu pueyapuejanaa nia pohuatare cua rupaa, cua tojitiajacara nojori quiniuria! Moojinia nia tiuquinijiore cua tojitiajaca Pueyaso sesajinia, nojori rupuesacari pa Que Pueyaso, janiya, na Sohuanunio. ²⁰ Nojori nia niishitiojore puetunu cua rootasanojuanaa niajaniya, nojori tojishocoriquiano. Nia niishiri nio: ijaniyacuajaari niaata quiniutaniya pueyaracaanuni, jiya cuaara quequerejaatijia!

MARCO NAAJIOTASANO JESUCRISTOJINIJI

*Cariiquia jiyajinia Tiuquinijiona Juan poojotasacari Pueyaso rupaa
(Mt 3.1-12; Lc 3.1-9, 15-17; Jn 1.19-28)*

¹ Pueyaso Niyanu Jesucristojiniji naa coteetasaaquiaari pohutanutej. ² Tariucuacaanu pueyara Pueyaso sequencesano caminiijiunia Isaíasri Pueyaso Niyanu niyacari naajiotaquiaari. Naajiotaquiaarii taa Tiuquinijiona Juan poojotanutaniya pueya jeenucuanura nojori jiuujiani, niriquiano Jesu tojijia nojori quiniuria. Isaásri naa naajiotaquiaari Pueyaso sequencesano miriqui Neyanutej:

“Janiyari quiocuaji jiyyaronutaniya tamonuni, quiocuaji quia nuu jeenucuariquiano. ³ Na nacanuuri tojishaanutaniya cariiquia jiyajinia. Naa pueya sequeyari: ‘¡Nia jeenucuare Jiyaniijia nuu! ¡Nia nuunore maninia, maja shuutiuniu!’”

⁴ Quiari naataja, Tiuquinijiona Juanri seetanujuanaa naa miiquiaari cariiquia jiyajiniatej. Nocua nijionaa pueya tiuquinijioriquiaa moojiniaari. Tiuquinijiona Juanri cuno pueya sequequiaari:

—¡Nioojia nia tacatore sesa nia miiniujiniji, moojinia cua tiuquinijonura niajaniya! ¡Pueyasoca sesa nia miishanojiniji nia jiyanoori puetunujuanaa!

⁵ Puetunu Judea jiyajinjinio pueyajanaari nocua nijioquiaari nojori tojitianura nojuaja, Jerusalén tiacajinjinio pueyanio. Cuno pueya jaara sesa na miishano pohuataquiaari Juan niquiara, Pueyaso niquiara juhuaj, Juanri nojori tiuquinijioquiaari Jordán moojinia.

⁶ Tiuquinijiona Juan toqueeri camello cajacajiniji shitiasano quiquiaari. Na cajiniocua na camarucutesanoori quiquiaari shoque sacuanijiasano. Na miaquesanoori quiquiaari sequeru, samiyatunio, cariiquia jiyajinia na riuriatasano. ⁷Juanri pueya niquiara pohuataquiaari naatej:

—Tamonuuri cua nuhuaji niniutianiya. Nojuajaari socua cumaacaraca janiyajiniji. Janiya maara shuquiriaatia quirini, nojuaja jaara quenaaja cua sequere cua naacutanura nojuaja, juhua na seru, na sapatu neyocua cua samaacatanura. Nojuajaari Jiyaniijajanaa cutara janiyajiniji. ⁸ Janiyari nia tiuquinijiya moojiniani, juhua jeequejosano nia quiniuria sesa nia miishanojiniji. Cua nuhuaji ninia cutaraari Pueyaso Sohuanu tiuquinijionutaniya nioojiajinia, na cumaaca nia jüitianura, seetanujuanaa maninia miijiaca nia quiniuria.

*Jesu tiuquinishacari moojinia
(Mt 3.13-17; Lc 3.21-22)*

⁹ Jesuuri jiyacari Nazaret tiacajiniji quiaquiaari Tiuquinijiona Juan-cua. Nazaret tiacaari Galilea jiyajinia quijia. Tiuquinijiona Juanri Jesu tiuquiniquiaari Jordán moojinia. ¹⁰ Jesu tacasacari moojiniji na tiuquinishaanu nuhuaji, jiyacaritij, nojuajaari jiya cajiniocua niquiquiaari riateyano. Pueyaso Sohuanu niquiriiri nocua rosezano juhua moco-coonu. Nocua tiuushiiri. ¹¹ Jiyacaritij, jiyocuacaanuji tojishaaquiaarii Pueyaso pocuaano. Naa Jesu sequequiaarii:

—¡Quiaari Quiyanunijoyua, cua panishano! ¡Jiyanoqua quia timitiaani-jia!

*Samaruhua jiyanijija saniniujiushacari Jesu
(Mt 4.1-11; Lc 4.1-13)*

¹² Na nuhuaji, Pueyaso Sohuanuuri Jesu jiylatequiaari ritia cariiquia jiylajiniara. ¹³ Jesuuri cuarenta juuca shocojotequiaari tii tamajaaja, puereeta jiya camaruhua casami quishaqui. Tii na quishacari, Satanásri Jesu saniniujiuriquiaa na tojijiara Jesu quiniuria juucua. Na nuhuaji, Pueyaso seyari nocua nijioquiaari na naacunura, na mianuutenura-juhuaj.

*Jesu coteesacari poonijionu Galilea jiylajinia
(Mt 4.12-17; Lc 4.14-15)*

¹⁴ Jiyaniijija Herodes jaara Tiuquinijiona Juan nujuatequiaari nujuatejojuajinaria, na nuhuaji, Jesuuri Galilea jiylajinia quiaquiaariuhua. Nojuajaari pueya niquiara poojotaquiaari tii, maninia pohuatasano Pueyasojiniji, taa Pueyaso jiiitanutaniya na muerasuni. ¹⁵ Jesuuri naa sequequiaari pueyatej:

—Nia sequeyanijia, nio pa quishacarini, quiarijiaari Pueyaso jiylanoooshacari pueya, na muerasura nia quiniuria. Cunora, Pueyasojiniji cua pohuatasanocua nia tiuuri. Nioojia nia tacatore sesa nia miiniujiniji, Pueyaso tojitiajaca nia quiniuria.

*Jesu saquiriojosacari pueya, na tarajariquiano
(Mt 4.18-22; Lc 5.1-11)*

¹⁶ Galilea caminia shuriuquioco Jesu rucuanejosacari, nojuajaari Pedro niquiquiaari, tarajanu Andrésnjo. Nojoriiri shiyaru jaqueroootanaa quiquiaari. Jiyacaritij, nojoriiri shiyaru jaqueroootariquiaa caminajinia. ¹⁷ Jesuuri nojori sequesee:

—¡Miji, cua nuhuajitiuyare! Janiyari nia jiyatenutaniya pueya quioojuara saniniunijia, juhua sapitiaaja.

¹⁸ Nojoriiri ritia na shiyaru tiujiaquiaari. Jesuta quiojiyareeri.

¹⁹ Socua shiitianiyojua na taccoji Jesu canujusacari, Santiago niquishiiri, tarajanu Juannio. Nojoriiri na shiyaru cushipirijionuuriquiaa botejinia. Nojoriiri Zebedeo niquiohua quiquiaari. ²⁰ Jesuuri jiyacari nojori sequequiaari nata nojori quianurajuhuaj. Nojoriiri na que Zebedeo tiujiaquiaari botejinia na naacunaata. Nojoriiri Jesuta quiojookee.

*Samaruraca pueyanojiniji pohuatasano
(Lc 4.31-37)*

²¹ Nojoriiri Capernaum tiacajinia tiuquishii. Samaatenu juuca, Jesuuri tiuquiquiaari Pueyaso secojojua tiajinia. Tii pueya niishitiojonu coteequiaariiri. ²² Pueyari jiyanohua jiuujiatequiaari na rootasano nojori tojishacari. Jesuuri juhua jiyaniijajanaa niishitiojoriquiaa. Majaari na niishitiojonu quiquiaari taa Moisés Rootasanojiniji niishitijonaa niishitiojoriquiaaricuaani. Nojoriiri saaja Moisés pohuatasanojiniji caminiujuquiaari, pueya niquiara nojori pohuatasacari Pueyaso Rupaa. ²³ Samaruraca pueyanoori Pueyaso secojojua tiajinia quiriquiaa tiijuuhuaj. Nojuajaari nacaquiaari:

²⁴ —¡Nazaret tiacajinijinio Jesunaa!, ¿quiaateeri tarì canaaacua nimiaa, canaa quia shaajanura? Janiyari quia niishiyani. ¡Quiaacuajaari Pueyaso Niyau!

²⁵ Jesuuri cuno samaru juaarii. Na sequereeri:

—¡Quia sanaajere! ¡Quia tohuatare nio pueyanojiniji!

²⁶ Jiyacaritij, samaruuri jiyanoqua taraatia miirii cuno pueyano. Jiyanoqua na sariyotequiaariiri na tohuatasacari nojuajiniji. Juhua macu tiuquiaquee pueyanoori. ²⁷ Puetunu pueyajanaari shiriiquitiuquiaari. Tama nojorijiaarijia nequesoreetooquiaari:

—¿Casaatucuaa nioni? ¡Nioruhua quiarinio niishitiosano! ¡Nio pueyanoqui cumacaaraca! ¡Taa samaruhua tojitiaa nojori na ji-yarosacariiri!

²⁸ Pueyari ritia caminiujuquiaari Jesujiniji puetunu Galilea jiyajinianaa.

Jesu naatanishacari Simón Pedro reyarucua

(Mt 8.14-15; Lc 4.38-39)

²⁹ Jaara tohuareetaquiaariuhua Pueyaso secojojua tiajiniji, Jesuuri Simón, Andrés tiajinira quiaquiaari Santiagota, Juantanio. ³⁰ Simón reyarucuaari naseeca matariquia maquetujinia. Cusosutuhuaj. Tiajinia quiniaari Jesu sequeturee nojuaja cusosu mataa. ³¹ Jesuuri nocua canujiyaree. Na juaashiquajiniji cusosu sanaseeri. Na cusionuuri seetanujuanaa ritia tajiquiaari nocuaji. Naacuajitij, nojuajaari pueya mianuutenu coteequiaari ritia.

Jesu naatanijiosacari queraatia cusosuhua

(Mt 8.16-17; Lc 4.40-41)

³² Shusha ninishacari, Jesuucua patootasaaquiaariiri puetunu cusosuhuajanaa, samaruhuaraca cusosu pueyanio. ³³ Puetunu cuno tiacajiniji pueyajanaari tia tohuateyaji rerequeequiaari tee Jesu quiriquiaacuajani. ³⁴ Jesuuri queraatia puetunu tamaatia cusionujuanaa naatanijioquiaari na rupaa cumaacata. Queraatia samaruhua tohuatanijioquiaari tamasaca pueyajinijiaariuhuaj. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

Jesu pohuatasacari Pueyaso rupaa Galilea jiyajinina

(Lc 4.42-44)

³⁵ Jesuuri jiyanoqua tariquiuuji sanequiaari, ninishiqui quishacarrijia. Tiacajiniji quiaquiaari tamaquiriaari, tii Pueyaso na secojonura tamajaaja. ³⁶ Na nuhuaji, Simónri Jesu pajenuucua quiojoquiaari, nata quiniaata. ³⁷ Jaara na riuriatatuquiaari, na sequetuseeri:

—¡Puetunu pueyajanaa quia juureeta!

³⁸ Jesuuri saaja nojori sequeree:

—Pa quiaare juhuari catecanaataja tiacajinia. Tii pa pohuatarejuhua Pueyaso rupaa pueya niquiara. Janiyacuajaari cunora jiyasohuaja tohuataareeni.

³⁹ Naacuajitij, Jesuuri puetunu Galilea jiyajinajanaa rucuanejoquiaari. Pueyaso rupaa pohuataquiaariiri Pueyaso secojojua tiacajiniqueya puetunu Galilea jiya tiacajinajanaa. Nojuajaari samaruhua tohuatanijioquiaarijuhuaj.

Jesu naatanishacari lepraraca pueyano

(Mt 8.1-4; Lc 5.12-16)

⁴⁰ Lepraraca cusosu pueyanoori Jesuucua catecanoquiaari. Jesu cariquimiaji mojoquetaseeri. Na sequereeri:

—Quiaajaa jaara paniri, quia naata cua naataniniu cua cusionujiniji.

⁴¹ Jesuuri nocua taraajequaari. Na juaashiquia niaree nocuaari. Na sequereeri:

—Taaquiriirinij. Quia naataniniu paniyanijia. Quia cuaqueya cuaara jeequehuara.

⁴² Jesu jaara naa na sequequiaaritij, na lepraari ritia cushiriiquii. Na cuaqueyajiniji shaajequaariiри na cusionu. Na cuaqueyari maniniara quiquiaariuhua. ⁴³ Na jiroyaquishacarijia na naatanishano pueyano, Jesuuri jiyanohua na rootaquiaari. Na sequereeri:

⁴⁴ —¡Cua tojiri, majaari pueya quia pohuatanu cua miishano! Saaja pueyacuara secojonaa jiyanijia quia cuaqueya quia niquitishii, na cartenuhuara quiajaniya, pueya tajinia quia rucuanejonuhuara juhujaniya. Mariyata ritia quia niquitiore quia seru Pueyasocuara catijiasocoriquiano. Naa quia miiri taa Moisés niishitiojoquiaricuajani, puetunu pueyajanaa niishiniuria quiaa tari naatarohua quia cusionujiniji.

⁴⁵ Cuno pueyano jaara quiaquiaari, juhuacatecara pohuataquiaari puetunu pueyajanaari taa na naatanishaarohuani. Naaratej, puetunu pueyajanaari Jesu niquinii panijia. Cunora, Jesuuri maja tari na naata tiuquinii quiquiaari juhuajaniya tamonu tiacajinia. Nocuaji Jesuuri pueya quiyaquishaqui rucuanejojua. Naajaa, puetunu cuno jiyajiniji pueyajanaari saaja nocua nijioquiaari na niquinuria.

2

Jesu naatanishacari cumatacuruhuana cusosu (Mt 9.1-8; Lc 5.17-26)

¹ Na rucuanejonu nuhuaji, Jesuuri Capernaum tiacajinia tiuquiquiaariuhua na saquiriosano pueyata. Pueya jaara niishiquiaari Jesu tari na quijia tajinia tiuquiriohua, ² queraatia pueyari nocua nijioquiaari cuno tajiniara. Nojoriiri tiaco mishiquiaari, tohuateyajijiuhuaj. Jesuuri cuno pueya niquiara pohuataquiaari Pueyaso rupaa. ³ Jesu quishacari tii, nocua patasa aquiaariiри pueyano cusosu na matujinia. Cuatro pueyari na patamaa. Cuno cusosuuri pootia mataja quiquiaari pueyaracaanu, cumatacuruhuana na quiniuucua. ⁴ Cusosu patanaari maja na naata tiaco tiuquitianu quiquiaari Jesuucua, puera pueya rerequesacari tohuateyaji. Nocuaji nojoriiri tia cacojiria cusosu tacataquiaari tacatuhuoco. Nojoriiri tia nijinia cuhuataquiaari. Namitia Jesu nujuasaquijanaa cuhuataturee tiaari. Na nuhuaji, tia cuhuocojiniji, Jesuucua roshinitiasaareeri cusosu na matujinia. ⁵ Jesuuri cusosu patanaa pueya niquirii seetanujuanaa nocua tiuyano. Naaratej, Jesuuri cusosu sequeree:

—Quiyanunaa, sesa quia miishanojiniji quia jiyanoorii taricuajanjia.

⁶ Moisés Rootasanojiniji niishitiojonaari tii cajitiuriquiaa. ⁷ Nojori tojishacari Jesu jiyanoyano cuno pueyano, nojoriiri niishirionuuree: “¿Casaara nio pueyano pocuaa naani? Majaari quenaaja pueyano naata pa jiyanooniu sesa pa miishanojiniji. ¡Nojuajaari tama na cuaqueyajaaja jiyateya juhua Pueyaso na quiniuria! ¡Cunoori jiyanohua sacuaraatia! ¡Saaja Pueyaso cutaraari na naata pa jiyanooniul!” ⁸ Jesuuri tamajaaja ritia niishiquiaari noojajinija naa cuno pueya niishirionuusano. Jesuuri cunora nojori sequeree:

—¿Casaara naa nia niishiriojiyani? ⁹ ¿Casaate jiyajenetashiya sequenu-rani: “Sesa quia miishano tari jiyanooshaaree”? ¿Mariyata jiyajeneta-teeri sequenurajuhuaj: “Quia sanere. Quia matu quia pataarohua”? ¹⁰ Seetanujuanaa nia sequeyanijia, janiyari quiarijia nia niishitiniu-tianiyani, pueyano cua quishacari mijiria, naajaa, janiyari Pueyaso cumaaca jiitaa sesa miijiaca cua jiyanooniuriani.

Jiyacaritij, Jesuuri cumatacuruhuana cusosu sequeree:

¹¹—Cua tojiri. ¡Quia sanere! Quia matu quia patare. Quia tiajinia quia quiaarohua.

¹² Cusosuuri ritia sanequee. Pueya niquiara na matu pataarohuari. Naaratej, pueyari jiuujiatequiaari. Pueyaso maninihuaqueetatureeri. Cuno pueyari naa sequetuquiaaritij, na shuquiritiasacari Pueyaso:

—¡Majaari quenaaja pa niquiniu quiquiaari naa miishanotej!

Jesu sequesacari Leví na nuhuajiniuria

(Mt 9.9-13; Lc 5.27-32)

¹³ Na nuhuaji, Jesuuri na saquiriojosano pueyata tacatequiaariuhua caminia casaqueyajiria. Queraatia pueyari nocua nijoquiaari. Jesuuri cuniqui nojori niishitiojquiaari Pueyaso rupaa. ¹⁴ Na nuhuaji, Jesu quiojosacari na saquiriojosano pueyata cuniquiji, Jesuuri Leví niquimiaa cajiyano Roma tiacajinia quijia jiyaniijiara cumaneeca mase-jojuajinia. Nojuajaari Alfeo niyanu quiquiaari. Jesuuri na sequeree:

—Miji. Cua nuhuajiyare.

Jiyacaritij, Leviiri sanequiaari. Jesu pueyanora quiaquiaariiri.

¹⁵ Cuno niucuaja, Jesuuri Leví tiajinia miaqueriquiaa. Leví tiajinia miaquenuriquiaajaariuhua queraatia narta cumaneeca masejonaa. Queraatia tamasaca pueyari nojoritia miaquenuriquiaajuhuaj, canapue Judiocuaca camarucua sequequiaari sesa pueyatucuajani. Nojoriiri Jesuta miaquenuriquiaa, Jesu saquiriojosano pueyatatio. Jiyanoqua queraatia pueyari Jesu rupuenaa quiriquiaa. ¹⁶ Moisés Naajioneejiniji niishitiojona, mariyata Fariseocuaca jaara Jesu niquirii cuno pueyata miaqueyano, nojoriiri Jesu saquiriojosano pueya nequesotaquiaari:

—¿Casaara nia niishitiojona miaqueya cuno cumaneeca masejon-aatani, mariyata cuno sesa miijiacatani? ¿Casaara cuno pojoritia na ratuyaajaaniuhuaj?

¹⁷ Jesuuri cuno pueya sequesano tojirii. Nojori sequeree miriquiiri:

—Jiyotuucaari maja na paniniu naarajona. Cante cusosuni, cuno cutaraari naarajona paniya. Majaari cua niniu quiquiaari maninia miijiacaacua. Niquiaari cutaranijia nia sequesano sesa miijiaca cua jiyanooniuria sesa nojori miijiosanojiniji.

Pueya nequesotasacari Jesu, casaara na pueya miaquenu carteyaquiyaní, nojori shuquiritiniuria Pueyaso

(Mt 9.14-17; Lc 5.33-39)

¹⁸ Tamacari, Tiuquinijiona Juan tojitiajaca, mariyata Fariseocuaca miaqueyaquishacari, tamasaca pueyari Jesuucua nijoquiaari. Na se-quetuseeri:

—¿Casaara quia saquiriojosano pueya carteyaquiya miaquenu quenaajani? Tiuquinijiona Juan pueya cutaraari miaajecoquiaa Pueyaso nojori shuquiritiniuria. Fariseocuacaari naa miiquiaajuhuaj. ¿Casaara naa quia pueya miyaquijayaaniuhuaj?

¹⁹ Jesuuri nojori riucuaree miriqui:

—¿Masuuusano pueyateeri miaajenutaniya nojori jaara queranacusaqui quiya, pueyano camishacari maaji? Camiriquiano pueyano jaara nojoritia quiyajaa, maja na naata nojori miaajenu, shuquiriaatia nojori quishacari.²⁰ Tamacari cutara, cuno camiriquiano pueyanoori nojori tajiniji rishaanutaniya. Cua pueyari jiyacari miaqueyaquiniutianiya cutara.

²¹ Seetanujuanaa nia sequeya cutaranijia, toque mocua cuhuocoori maja na naata cushipirijiosaanu quiariqui toquerauta. Jaara jeequesaare, quiarinio toquerauri posequeja. Naacuajitij, toque mocua cuhuocoori socua queraaqueetaaree.²² Naajuhuaj, quiariniacu uva caacaari maja na naata racatasaanu shoque tariucuacojinia. Quiariniacu uva caaca jaara jerema, shoque tariucuaco pojuarentaari. Naacuajitij, paari najuhuana niitiaa uva caacani, shoquenio. Cunora, maninia cutaraari quiariniacu uva caaca shuujionu shoque quiariquojinia, maja vino niitasaanura najuhuanaj, shoquenio.

Jesuuri naa pohuataquiaaritij, pueya na niishitiojonura quiarinio na niishitiosanoori maja na naata cojitishaanu tariucuacaanu niishitiosanota.

Jesu pueya carojotasacari trigo samaatenu juuca

(Mt 12.1-8; Lc 6.1-5)

²³ Jesuuri samaatenu juuca quiojoquiaari cuhuariquiajiniaaco na saquieriosano pueyata. Na pueyari jiyacari trigo carojotanu coteequiaari na miajenuta.²⁴ Fariseocuaca jaara na niquiquiaari, Jesu sequetureeri:

—¡Quia niquiri! ¡Casaara quia saquieriosano pueya poonijiya samaatenu juucani! ¡Pueyaso Rupaajinia, paari pirijojoshiyacuajani maja samaatenu juuca pa poonijionura!

²⁵ Jesuuri nojori sequeree:

—¿Majateeri nia serojonu quiquiaari Pueyaso Rupaajinia pa supuetanaa jiyanijia David miishanojiniji, nojuaja jaara miajequiaari na cojiniaata, nojori jiitiaaquishacari na coseyaca?²⁶ Cuno quishacari, supuetana Abiatar pueyacuara secojonaa jiyanijia quiquiaari. Davidri tiuquiquiaari Pueyaso Secojojua tajinia. Nojuajaari Pueyasora niquitosano panjiniji saquiaari. Cuno panri saaja Pueyaso Secojojua tia cojuanaa sasocoriquiano quiquiaari. Naajaa, Davidri na saquiaari. Na neecasequiaariajhuihua nata quiniaas pueyara.

²⁷ Jesuuri nojori sequequiaarijuhuaj:

—Pueyasoori samaatenu juuca shipiniquiaari pueyara. Maja cutaraari Pueyaso shipininiu quiquiaari pueya, samaatenu juucara.²⁸ Naaratej, pueyano cua quishacari mijiria, janiyari cumaacaraca cua Quejinijini cua sequenura casaa pa miiniutianiya samaatenu juucani. Janiyacuajaari samaatenu juuca camarnuni.

3

Jesu jeecasacari pueyano juaashiquia cuseetucojuara joojequetano

(Mt 12.9-14; Lc 6.6-11)

¹ Jesuuri Pueyaso secojojua tajinia tiuquiquiaarijuhuua na saquieriosano pueyata. Tii quiriquiaari pueyano, cuseetucojuara joojequetano juaashiquiaraca.² Cuniqui quiniaas Fariseocuacaari shanacutariquiaa

na niquiniuria taa Jesu miiniutianiyanoj. Nojoriiri tama sequetooreejaaja:

—¿Jesuteeri sesarucojua pueyano juaashiquia jeecanutaniya samaatenu juucani?

Nojoriiri Jesuucuara saquiriojotanu paniriquiaa, nojuaja jaara samaatenu juuca poonijiore. ³ Jesuuri jiyacari sesarucojua pueyano sequeree:

—Quia sanere. Niya quia nujuasee canaa tajinia pueya niquiara.

⁴ Na nuhuaji, Jesuuri pueya nequesotaree:

—¿Casaate samaatenu juuca miishiyani? ¿Paate maninia miyani, paate sesa miya soj? ¿Pueyanote naatanishiya, moshiyajanaa soj?

Nojoriiri sanaa niquitiariquiaa saaja, Jesu sequencesacari naatej. ⁵ Jesuuri na shocuaqueya nujuatiuyano pueya niquinijoree na juaaniutia. Nojoriicua taraajeriquiaajaariuhuaj, cumajiuujiaaca nojori quiniuucua. Majaari nojori niishiniu paniniu quiquiaari taa Pueyaso paniya pueyacua taraajeja pa quiniuriani. Jesuuri sesarucojua pueyano sequeree:

—¡Quia juaashiquia quia shiitiore!

Na juaashiquia shiitioreeri. ¡Jiyacaritij, na juaashiquiaari ritia jeequeque! ⁶ Fariseocuaca niquishacari naa Jesu miishanotej, nojoriiri tohuareetaquee na juaaniutia. Nojoriiri Herodes panijiaca pueyata pocoojoquiaari ritia, taa nojori monutaniya Jesuni.

Queraatia pueya rerequeejosacari caminia casaqueyaji

⁷ Na nuhuaji, Jesuuri quiojoquiaari caminiajinia na saquiriosano pueyata. Queraatia pueyari na nuhuajiquiaariuhua Galilea jiyajiniji.

⁸ Pueya niishishacari puetunu Jesu maninia miishanojinijijanaa na cumaacata, queraatia pueyari nocua nijioquiaari na niquiniuria. Nojoriiri nocua nijioquiaari puetunu jiyacajinijiniojuanaa: Judea jiyajinijinio pueya, Jerusalén tiacajinijinio pueyajuhuaj, Idumea jiyajinijinio pueyanio. Nijioquiaariajiaariuhua Jordán moo taquijiriajiniji pananu muetasamaji pueya, Tiro tiacajinijinio pueyanio. Sidón tiacajinijinio pueyari nijioquiaariuhuaj na niquiniuria Jesu. ⁹ Nocuaji Jesuuri na saquiriosano pueya sequequiaari:

—Niocua juhuacaricia bote cojuare quiria, cua tacajara pueyacuaji, maja pueya tanuujunura janiya.

¹⁰ Jesuuri jiyacari jiyanoehua queraatia pueya naatanijoriquiaa. Nocuaji cusosuhuari Jesuucua riutioconeetariquiaa na quianura Jesu, nojori cusionujinji nojori naataconuhuara.

¹¹ Samaruhuaraca pueya jaara Jesu niquitiuquiaari, nojoriiri nocuara mojoquetacoquiaari. Naa nacatuquiaarii:

—¡Quiaacuajaari Pueyaso Niyuan!

¹² Nocuaji Jesuuri nojori sequequiaari na juaaniutia, maja nojori sequenura pueya niquiara cante nojuajani.

Jesu saquiriosacari doce pueya na pueyajinijinio, na rupaa pohuatariquiano

(Mt 10.1-4; Lc 6.12-16)

¹³ Na nuhuaji, Jesuuri tacaquiaari tuhuananuuucua. Nojuajaari tiji sequequiaari cana na paniquiaaricuajani. Nocua nijioquiaarii na jiyaniquishano pueya. ¹⁴ Jesuuri doce pueya saquiriojocuaria nata nojori quiniuria. Nojori jiyatereeri na jiyaramiquishocoriquiano,

Pueyaso rupaa nojori pohuatanura. ¹⁵ Nojori niquitioree na cumacaari, cusosuhua nojori naatanijionura, samaruhua nojori tohuatenurajuhuaj. ¹⁶ Nioori na saquiriojosano doce pueya sesaca: Simón, Jesuuri na sesojoquiaari Pedro; Santiago, tarajanu Juannio. ¹⁷ Jesuuri nojori sesojoquiaari “Boanerges”. Naa sequenu paniyari nio, “Ritia juajia, juhua miacana”. Nojoriiri Zebedeo niquiohua quiquiaari. ¹⁸ Socua quiquiaariiri Andrés, Felipe, Bartolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijiaca pueya maanujinjinio quiquiaari. ¹⁹ Quiquiaariajuahuahua Judas Iscariote, Jesu quiatequiaari mosocoriquianon.

*Judiocuaca camarucua sapojosacari, Jesu samaruhua cumaaca jiitiae
(Mt 12.22-32; Lc 11.14-23; 12.10)*

²⁰ Na nuhuaji, Jesuuri na saquiriojosano pueyata tamonu tiajinia tiuquitiaquiaari tamonu tiacajinia. Queraatia pueyari tiuquitiaquiaari jiuuhua cuno tiajinia Jesuucua. Naacuajitij, majaari nojori naata mi-aquenu quiquiaari. ²¹ Jesu tapueyocuaca jaara niishiquiaari naa nocuajitij, nojoriiri nocua nijioquiaari na riniuucua juucua. Tama sequetoriquiaajaarija:

—¡Jesuqui tari paatecara quirijuhanaj!

²² Moisés Rootasanojiniji niishitiojonaa Jerusalén tiacajiniji nijiono pueyari saniniuujia naa sequetuquiaari Jesujiniji:

—Samaruhua jiyaniijia Satanáscuaajaari cumaaca niquitiorucuaa cuno pueyano. Cunora, samaruhua tohuatanijiya pueyajinijiiri.

²³ Naaratej, Jesuuri cuno pojori sequequiaari nojori na niishirio-jotenura:

—Miji, niya cua tojitiasee. ¿Pueyanoteeri na naata Satanás tohuatenu pueyanojiniji tama Satanás cumaacatajaaja? Maja na naata. ²⁴ Naajuhuaj, mijiria jiya jiyaniijia jaara juayonuutaa tama na pueyatatajaaja, nojuajaari maja na naata nujuatanu na paraa, jaara nocua nijiomia. Nojuajaari shocotasaanutaniya. ²⁵ Naajaariuhuaj, pueyano jaara tapueyocuacata juayonuutare, majaari nojori naata jatiqui quiniu nojori tiajinia. ²⁶ Niaari saniniuujia cua sequeree, janiyana Satanás cumaacata tohuatanijoquiaa samaruhuani. Satanás jaara naa miiritij, cuno maara tari quiri na shaajasaaanurajanaa.

²⁷ Naajuhuaj, pueyano maja na naata tiuquinii cumueeca pueyano casamiriaca tiajinia, na casami na jaariuutianura, jaara coteenu na camaru moroziyaquiri. Pueyano jaara coteenu na camaru morojore-jaatijia, naa cutara na naata na casami jaariuutianu.

²⁸ Seetanujuanaa nia sequeya cutaranijia, pueyano sesa miishanoori na naata jiyanooshaanu. Janiyajiniji sesa na pocuasanoori jiyanooshiyajuhuaj. ²⁹ Saniniuujia, cante sesa rimiaaqueja Pueyaso Sohuanuucuarani, cuno cutaraari maja na jiyanooshaanu quiniutianiya quenaaja. Jiyano pueyanotej, nojuajaari pueyaracaanu saniitiosaanutaniya.

³⁰ Jesuuri naa nojori sequequiaaritij, pueya sequesacari, nojuajana samaruraca quijia, Pueyaso Sohuanu cumaacata na tohuatejosacari samaruhua.

*Jesu nucuajiniji pohuatasano, Jesu tapueyocuacajinijinio
(Mt 12.46-50; Lc 8.19-21)*

³¹ Jiyacaritij, Jesu nucuaari tiuquijioquiaari, Jesu tapueyocuacanio. Majaari tiajiniaaco na tiuquitianu quiquiaari Jesuucua. Saaja carijini-acumaji tamonu pueyano sequetureeri na numootenura Jesu nojori-icuara. ³² Jesu shocuaqueya cajitiuniaari Jesu sequeturee:

—Quia nucuana quia tapueyocuacata jati carijiniacuma nujuatiuya. Quia pajenuyaquinia.

³³ Jesuuri saaja nojori sequeree:

—¿Cante cua nucuani, cua tapueyocuacajuaj?

³⁴ Na nuhuaji, na shocuaqueya cajitiuniaa niquinijioreeri. Sequereei:

—Nio pueyari cua nucua, cua tapueyocuacanio. ³⁵ Cante cua Que panishano miijiani, nojuaja cutaraari cua tarajanu, cua rimiatu, cua nucuanio.

4

Miriqui pohuatasano natoojojua pueyanojiniji

(Mt 13.1-9; Lc 8.4-8)

¹ Jesuuri socua Pueyaso rupaa niishitiojonu coteequiaariuhua caminia casaqueyaj. Jiyanoqua queraatia pueyari rerequeejochaari nojori tojitianura nojuaja. Boteeri tii cuatariquiaa caminiajinia. Naacuajitij, Jesuuri botejinia tacaquiaari. Tii cajishiiri, caminia casaqueyaj rerequeejono pueya na niishitiojonura tiji. ² Cuno pueya niishitijooreeri queraatia miriqui pohuatasanota. Na niishitiosacari pueya, Jesuuri naa sequequiaaritij:

³ —Nia tojitiare nio sequesano. Tamonus juuca, pueyano na cuhuariquiajinia natoojonuucua quiaquiaari. ⁴ Na jacutasacari, nucuaco totequiaariiri tajaaca. Shuhuari na miojoree. Majaari na moritianu quiquiaari. ⁵ Tajaacaari totequiaari sai tajiniaqueyajuhuaj. Majaari cuniqui puera jiya quiniu quiquiaari na maashiniuria. Naacuajitij, najuhuana ritia moritiaquiaariiri. ⁶ Pananu jaara jaquiaari, na catijiareeri. Maja puera nujuacaraca na quishacari, ritia sorequeeri. ⁷ Tajaacaari totequiaarijiuhua riyoquaca tajinia. Jiohuacacaari socua ritia maashiquiaari. Natauri tarinitiucuara quiquiaari saniniuuja. Naaratej, majaari na muetunu quirii. ⁸ Tajaacaari saniniuuja totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia. Niquiriyatu jiyonajiniji carojosaaquiaariiri treinta jajau. Tanajajiniji socua sesenta jajau, naajuhuaj socua cien jajau tanajajiniji.

⁹ Jesuuri nojori sequeree:

—Cante numaaracani, cuaara cua sequesano tojitiaara.

Casaarate miriqui pohuatasanoni

(Mt 13.10-17; Lc 8.9-10)

¹⁰ Na nuhuaji, Jesu quishacari tamajaaja, na saquiriojosano doce pueyari na nequesotaquiaari, tamasaca pueyanio. Cuno pojoricuajaari Jesu shuriucua quiriquiaa. Nojoriiri Jesu sequeree:

—¿Casaa miriqui quia pohuatasano sequenu paniyani?

¹¹ Jesuuri nojori sequeree:

—Pueyasoori nia niishitiojya jiyasohua na miiniu panishano, taa na muerasu na jiitianutaniya pueyaracaanu cutarani. Tamasacara

saniniujuja, canapuete Pueyaso ruuretajacani, nojoririaari miriqui po-huatashiyacuja. ¹² Naacuajitij, nojoriiri cua cumaacata cua miishano niquitiuquiaa pueyaracaanu najuhuanaj. Majaari nojori niishiniu na niquishano. Naajuhuaj, nojori jaara Pueyaso Rupaa tojitiare, majaari na niishiniu na tojishano. Nojori jaara niishiri, nojori mariqui noojia tacatorohuari sesa nojori miishanojiniji nojori jiyanooshaanura.

*Jesu niishitiojosacari miriqui na pohuatasano natoojonajiniji
(Mt 13.18-23; Lc 8.11-15)*

¹³ Jesuuri nojori sequequiaarrijuhuaj:

—¿Majateeri nia niishiniu miriqui cua pohuatasano? ¿Niaatucua taa niishiriquia socua tamonu cua pohuatasanoni? ¹⁴ Cua pohuatasano cuhuariquiajinia natoojonajinijini, nojuajaari juhua Pueyaso Rupaa pohuatana. ¹⁵ Noojiaqueya pueyari juhua nucuaco toteno jajau. Na-juhuana Pueyaso Rupaa tojiyari. Na tojiniu nuhuaji, Satanásri nimiaa. Nojuajaari puetunu Pueyaso Rupaajanaa noojiajinia natasano jaariu-tiaquiaa. ¹⁶ Tamasaca pueyari juhua noo jajau saniniujuja, sai tajini-aqueya jacutasanotej. Nojori jaara Pueyaso Rupaa tojiri, jiyanohua na timitiaari. ¹⁷ Cunoori juhua secaja nujuacaraca moritiano jajau, sai tajinia na moritianuuucsua. Majaari na rishiniu. Naajuhuaj, cuno pueya jaara saniniujuishaare taraatia, jaara naquiya miishaarejuhuaj Pueyaso Rupaa tojijiaca nojori quiniuucua, nojoriiri ritia Pueyasoocea tiuuniu tarinitiaja. ¹⁸ Noojiaqueya pueyari juhua noo jajau, jiohuacaca tajiniaqueya jacutasanotej. Pueyaso Rupaa tojiyari. ¹⁹ Na nuhuaji, nojoriiri puera niishiriojiya taa nojori quiniutianiya maninia mijiriani. Nojoriiri sapojosaaquiaa puera na shuquiritisasacari mijiria casami. Nio jiya casamiicua jiaatiaquiaajaariuhuaj. Puetunu cunorajanaa, nojoriiri Pueyaso rupaa tojitiaquiaa na numaa shama. Naacuajitij, nojoriiri juhua muetuhuo quiya. ²⁰ Noojiaqueya pueya saniniujuja, nojori cutaraari maninia tojitiaja Pueyaso Rupaa. Cuno pueyari juhua cuhuariquiajinia natau, queraatia muetujua, maninia jiyajinia natasano. Cuno maninia nataujinijinioni, noojaqueyari maja puera na muetunu. Tarajanuuri maninia muetuna. Naajuhuaj, tarajanuuri jiyanohua queraatia muetujua. Naajuhuaj, cante Pueyaso Rupaa tojijia cutarani, nojuajaari juhua maninia muetujua natau.

*Pueyaso muerasuuri juhua samari
(Lc 8.16-18)*

²¹ Jesuuri nojori sequereejuhuaj:

—¿Samaritiutiiri noshitishano, conatu cariquiaco jamotasocoriquiano, maquetu cariquiacojuhuaj? Maja. Samaritiu jaara noshitishaare, morijiucua morotashiyari, tiajiniaaco na cuhuatanura maninia. ²² Naajuhuaj, jiyasohua nia miishanoori puetunujuanaa niishishaantu-taniya. Cua pohuatasanoori juhua samaritiu, puetunu pueya jiuujiabajanaa na cuhuatanura. Naajuhuaj, Pueyaso Rupaa jaara nioojiajinia jamosaare, juhua muetunutaniyari puetunu pueya niquishocoriquianojuanaa. ²³ Niajaniya, canapuete numaa jiitiaani, nia tojitiare cua pohuatasano.

²⁴ Jesuuri naa nojori sequequiaarrijuhuaj:

—Nia niishiri nia tojishano. Nia shanacutajataja, teyanota nia shanacujuquiaa nia niquitiosocoriquianocuajani, Pueyasoori cunotaja niaara shanacunutaniyajuhuaj. Naacuajitij, niaa jaara capora quiriquia tamasacata, Pueyasoori socua capora quiniutaniya niaarajuhuaj.²⁵ Cante na rupaa tojijiani, socua na niishitiojonutaniyari. Saniniuujia, canapuete na rupaa tojitiaaquiyani, secaja na niishisanoori puetunu jaariutiasaanutaniyajanaa.

Miriqui pohuatasano natau moritianojiniji

²⁶ Jesuuri nojori sequequiaarijuhuaj:

—Nia niishitiojonu saniriiria taa Pueyaso muerasu supuequiaani, Pueyaso jiitiasano nojori quiniuria. Tamonu pueyanoori na cuhuariquiajinia nataquiaari jajau. Na nuhuaji, majaari na tacatenu quiquiaariuhua pueyaracaanu na natasano na niquiniuria.²⁷ Cuno pueyanoori na natantu nuhuaji camueenujuquiaari. Cuno jajauri moritiaquiaari juuca, niucuanio. Maashiquiaariiri na camaru maquesacari, na niquishacarijuhuaj. Tamonu juuca, na camaru tacatesacariuhua na natasano na niquiniuria, tariucua puereetuuccaari quiquiaari. Majaari na camaru niishiniu quiquiaari taa na moritiareeni.²⁸ Jiyari tamajaaja moritianijia natau. Coteenu moritiaari na jiyona. Na nuhuaji, na jajau coori supueya. Na nuhuaji, na jajauri querasapijaacara quimiaa na noshiniuria.²⁹ Na natau jaara noshimia, na senoonaari na senoojua na racatasocoriquiano. Pueyaso muerasuuri naa miishaanutaniyajuhuaj.

Miriqui pohuatasano mostaza jajaujiniji

(Mt 13.31-32; Lc 13.18-19)

³⁰ Jesuuri socua sequequiaari:

—Juhua casaa niquishanote Pueyaso cumaacani? ¿Casaatate pa naata na saniniujiuniuni, taa Pueyaso Rupaa poonijiya pueya jiuujiajini-ani? Quiarijia nia pohuatareeraj.³¹ Pueyaso Rupaari pueya jiuujiajinia quiya juhua mostaza jajau. Mostaza jajauri jiyanohua socua shiitianijojua puetunu tamasaca jajaujinijianaa, majaari puera maatia na niquishaanu. Pueyaso Rupaari naajuhua pueya jiuujiajinia, nocua nojori tiuushacari.³² Mostaza jajau jaara natasaare, maashiyari socua puereetuucara tamasaca nataujiniji. Na cashacucuaari maashiya puereetucucuara. Shuhuari na cashacucua cariquiaco nujuatujuua shinishiqui.

Pueyaso Rupaari pueyano jiuujiajinia naa cumaacaracajuhuaj, na jataniniuria na tojijia, maninia mijia na quiniuria.

Jesu niishitiojosacari pueya saa na miriqui pohuatasanotaja

(Mt 13.34-35)

³³ Jesuuri naa queraatia miriqui pohuatasanota niishitiojoquiaari Pueyaso rupaa saaja pueya niishishano casaata. Majaari socua jiyaneta casaa na pohuatanu quiquiaari.³⁴ Naacuajitij, nojuaja jaara casaa niishitiojonu paniquiaari pueya niquiara, nojuajaari puetunujuanaa naa niishitiojoquiaari miriqui na pohuatasanota. Tamajaaja nojori quishacari saniniuujia, Jesuuri na saquiriojosano pueya niishitioquiaari maatia, casaa miriqui na pohuatasano sequenu paniriquiaani.

Jesu pueyajetesacari paratu, mohuaca cajiniuucuanunio

(Mt 8.23-27; Lc 8.22-25)

³⁵ Cuno juuca jaara niniquiaari, Jesuuri na saquiriojosano pueya sequequiaari:

—Caminia taquijiria pa quiaare.

³⁶ Cuniquijia pueya tiujiatiuyareeri, nojori quianura caminia taquijiria. Na pueyari Jesuta quiojiyaree cuno botejinaja, tee nojuaja quiriquiaacuajani. Jesu quiasacari caminia taquijiria, tamasaca boteeri nata jaatequetariquiaajuhuaj. ³⁷ Maja pueria na quenaacoyaquishacaria, maruuri paratuta canashiyaquiji jiyanohua niquiaari nojoriicua nojori niuutiasacari. Paratuuri jiyanohua cajiniuucuatequiaari mohuaca nojori botejiniacumara. Nocuaji na boteeri tari quera tiuquitiarquiaia mohuacata. ³⁸ Jesuuri jiyacari bote pajamaji maqueriquiaa juhuajaniya. Na nacaacuaji mataja caco maqueriquiaari. Na pueya niucuajatusacari nojuaja, Jesu sequetureeri:

—¡Niishitiojonanaa!, ¿majateeri quia puerenuujua paa tari tiuquitiaareeni?

—Jesuuri sanemaa. Paratu sequereeri, caminianio:

—¡Quia suraajere! ¡Tariucuaja!

Paratuuri tajimiohua. Caminiaari pootia maquee. ⁴⁰ Jesuuri na saquiriojosano pueya sequeree:

—¿Casaara nia puereya puerani? ¿Niaateeri Pueyasocua tiuyashijiaca quiyajuaruhuaj?

⁴¹ Nojoriiri jiyanohua shiriiquitiurii. Tama nojorijaarrijia sequetooquiaari:

—¿Cantejaaranojoni? ¡Paratu, caminiaari na tojirii!

5

*Gerasa jiyajinjinio samaruuhuaraca pueyanojiniji poihuatasano
(Mt 8.28-34; Lc 8.26-39)*

¹ Na nuhuaji, nojoriiri caminia taquijiria tiuquijioquiaari, Gerasa jiyajinjinio. ² Jesu tacasacari botejiniji, nocua niquiaariiri tamonu pueyano raacajiniji, macunucua nucuhua paaquiosaquiji. Cuno pueyanoori samaruraca quiquiaari. ³ Raacajinlia quijia quiquiaariiri. Majaari na naata moronu quishaquaiaari quenaaja cumayocua shipinishano casaata. ⁴ Pueyari juucua na morojojua, na cashacucua, na juaashiquianio. Saaja na turojotajaari. Majaari quenaaja na nujuataja pueyano quiniu quijia. ⁵ Pueyaracaanu tuhuananuhuacua rucuanejoquiaariiri, raacajinianio. Na rucuanejosacari sariyacojojuaari, juuca, niucuanio. Tama na cuaqueyajaja piquijia saitiaari. ⁶ Nojuaja jaara Jesu niquiquiaari tucuacaanuji, nocua netequiaariiri. Jesu cariquimiaji mojquetaseeri. ⁷ Jesuucuara nacareeri:

—¿Casaacua miji quia niyani, Jesunaa, jiyocuacaanu Quijia Pueyaso Niyanunaa? ¡Quia secojiyanijia maja naquiya quia miiniuria janiya!

⁸ Samaruuhuaraca pueyanoori naa sequeree Jesutej, tari Jesu sequenuucua samaru nojorijiniji na tohuatanura.

—Jesuuri na nequesotaree:

—Taa sesanaacatequia?

Na riucuareeri:

—Canaa jiyanohua queraatiani, cunora cua sesa “Queraatia”.

¹⁰Cuno samaruuri jiyanohua Jesu secojoriquiaa maja nojori na taanunura cuno jiyajiniji. ¹¹Cushiyari jiyacari cateca naataja miaquenuriquiaa tuhuananucari. Jiyanohua queraatia cushiyari quiriquiaa.
¹²Samaruhuari Jesu secojoree naatej:

—¡Canaa quia jiyarore canaa tiuquitianura cuno cushiyacua!

¹³Jesuuri samaruhua jiyaroree. Samaruhuari pueyanojiniji tohua-reeetaquee. Cushiyacua tiuquitiaeeri. Dos mil cushiya naasucuaari quiriquiaa. Cuno cushiyari cocuatequiaari, samaruhuaraca nojori quiniuucua. Tacojiniji totesee caminiajiniaari. Puetunujuanaari tii shushiniuuquiaari.

¹⁴Cushiya cojuanaari jiyacari netecuatuohua na shiriiquiniutia. Na tiacajinia pueya poojotanuusuhua nojori niquishanoori, cuhuariquia-cajinia quiniaa pueyanio. Nocuaji pueyari nijioquiaari nojori niquinuria casaate quiquiaarini. ¹⁵Cuno pueya jaara tiuquijioquiaari Jesu quishaqui, cuno tarilia samaruhuaraca quijia pueyano niquitiushiiri panaatia cajiyano, toqueraca. Naa nojori niquishacari nojuajatej, pueyari pueretuquiaari. ¹⁶Jesu miishano niquitiuniaari cuno pueya pohuataquiaari taa samaruhuaraca pueyano miishaareeni, mariyata cushiyajinjinio. ¹⁷Cunora, cuno pueyari Jesu secooteree na quianuhuara cuniquiji, nojori jiyajiniji.

¹⁸Jesu jaara tacaquiaariuhua na botejinia, cuno tarilia samaruhuaraca quijia pueyanoori nata quianu paniquiaari juucua.

¹⁹Majaari Jesu paniniu quiquiaari. Na sequeree saajaari:

—Quia quiaarohua quia tiajinia quia pueyacua. Quia pohuatasuhua nojori taa Pueyaso miirii quiajaniyani, quiocua na taraajenuucua.

²⁰Pueyanoori quiaarohua. Nojuajaari pohuatanu coteequiaari cuno na jiya diez tiacajinia taa Jesu miiquiaari maninia nojuajani. Puetunu pueyajanaari jiuujiatequiaari nojori tojishacari nojuaja. Cuno diez tiaca sesa quiquiaari “Decápolis”.

*Jairo niyatujiniji pohuatasano, Jesu toque quiana maajijinijihuaj
(Mt 9.18-26; Lc 8.40-56)*

²¹Jesu jaara niuutiaquiaariuhua botejinia caminia taquijiriohua, queraatia pueyari nocua tiuquijioquiaari na quishaqui. ²²Jesu quishacarrijia caminia casaqueyaji, nocua tiuquiquiaarii tamonu pueyano, Pueyaso secojojua tia jiyanijia. Na sesa quiquiaari Jairo. Jaara Jesu niquiquiaari, na cariquimiaji mojoquetaseeri. ²³Naa Jesu secojoree jiyanohuari:

—¡Quiyatu quera cusoya! ¡Miji, quia juaashiquia nocua quia niaquee na naatanuhuara!

²⁴Jesuuri jiyacari nata quiaaree, na saquiriosano pueyanio. Puera jiyanohua queraatia pueyari na nuhuajiriquiaa. Jesu tanuujuturiquiaari. ²⁵Cuno pueya tajinia quiriquiaajaariuhua tamonu cusoso maaji. Doce marijiaari tari na shoconujuquiaari pueyaracaanu na naatesacari. ²⁶Queraatia naarajonaari nareja naquiya na miiquiaari. Socua na jiyacatojquiaari saajaari. Najuhuana na cumaneeca puecaquiaarii na naarojosaanura juucua. ²⁷Cuno maajijaara Jesujiniji tojiquiaari, na nijiniji na nuhuajiquiaari jiyasohuari. Na tucuaque toque quiasee pueya tajiniaari. ²⁸Cuno maajiji tama sequequiaariajaa: “Janiya jaara quenaaja na toque quiaren, janiyari naatanutaniuhuani”. ²⁹Naacuajitij, na quiasacari Jesu toque, na nanacaari ritia curetaquee.

Jiyacari na niishiquiiri. Tama sequequiaariajiaarijia: “¡Cua cusionu tari tajiyatema!”³⁰ Jesuuri jiyacari niishiquiui nojuaja na cumaacata cusosu naatanirii. Cunora, nojuajaari tacareecuaree na niquiniuria pueya. Pueya nequesotareeri:

—¿Cante cua toque quiareeni?

³¹ Na saquiriojosano pueyari na sequeree:

—Quiaacuajaari queraatia pueya niquiya quia tanuujiyano. Quiaari najuhuana nequesotaariquohua saajuhuaj: “¿Cante cua quiareeni?”

³² Jesuuri saaja na shocuaqueya niquinijoriquiaa, na niquiniuria cante na toque quiareeni. ³³ Maajiiri jiyacari tetecariquiaa na puerenuta. Jesu cariquimiaji mojoquetasee ritiaari. Nojuajaari niishiquiaari Jesu cumaaca na naataniriohua. Cunora, Jesu sequeree puetunu seetanujuanaari. ³⁴ Na nuhuaji, Jesuuri na sequeree:

—Sanaunaa, cucua quia tiuuniucua, quiaacuaja tari quia cusionujiniji naatarohua. Juhuajaniya quia quiaarohua. Quia cusionucuaja tari tajiyatemohua quiocuaji.

³⁵ Jesuuri cuno maajicua pocuariquiaajaa pueya tiuquijiosacari Jairo tiajiniji. Cuno pojoriiri maaji samiriu que sequetusee:

—¡Quia niyat tarisoquee! Maja najuhuana Niishitiojona riniu quia tajiniara.

³⁶ Jesuuri nojori sequesano tojirii. Naaratej, maaji samiriu que sequereeri:

—¡Maja puerenu! ¡Cucua quia tiuuri saaja!

³⁷ Majaari Jesu paniniu quiquiaari tamasaca quiojonura nata. Saaja nata quojoquiaari cutaraari Pedro, Santiago, Santiago tarajanu Juan-nio. ³⁸ Nojori jaara tiuquijioquiaari Jairo tiajinia, pueya niquishii nujuquetiuyanoori, sariyocuatiuyanonio. ³⁹ Jesu jaara tiajiniaaco tiuquiquiaari, cuno pojori sequereeri:

—¿Casaara puera nia cojuatuneyani? ¿Casaara naa nia nujuqueyani? Maaji samiriu maja macu. Nareja maqueyano.

⁴⁰ Pueyari saaja Jesu saroojotaquiaari nojuaja na rerequetenuta, naa nojori na sequenuucuatej. Jesuuri cunora nojori tohuatanijioree tiajiniaacoji. Jesuuri macuucua sohuacamara tiuquinitiaquiaari Jairo necocuata, tama na pueyajaajanio, cuniqui tii nata quitiuriquiaani. ⁴¹ Macu juaashiquiajini quiaseeri. Na sequereeri:

—Talita, cumi.

Nioori pueyano rupaajinia sequeya: “¡Maaji samiriuniaa, quia sequayanijia, quia sanere!”

⁴² Jiyacaritij, maaji samiriuuri ritia sanequee. Juhuacatecara ru-cuanereeri. Doce marijiaari tari cuno maaji samiriu shocojoquiaari na queyata na quishacari. Pueya niquishacari naa Jesu miishanotej, nojoriiri jiyanohua jiuujiatequiaari. ⁴³ Jesuuri jiyanohua nojori rootaree maja nojori pohuatanura pueya niquiara na miishano. Saaja sequeree cutaraari maaji samiriu cuaara mianuutesaaria.

6

Jesu quishacari Nazaret tiacajinia (Mt 13.53-58; Lc 4.16-30)

¹ Jesuuri cuniquiji quiaquiaariuhua tama na jiyajiniohuajaaja. Na saquiriojosano pueyari nata quojoquiaarijiuhuaj. ² Jaara quiquiaari

samaatenu juuca, Jesuuri tii niishitiojonu coteequiaari Pueyaso seco-jojua tiajinia. Queraatia pueyari na tojitiariquiaa. Nojoriiri jiuujiatequiaari. Tamajaaja sequetooquiaariiri:

—¿Tee nio pueyano niishitiojosaaquiaari puetunu niojuanaani? ¿Teje na masecanu puetunu na niishishanojuanaani, cuno cumaacanjo, jiyaneneta miishano na miiniuriani? ³ Nojuacuaari suruhuatujiniji casaa shipinijiona tiajiniaacora, niya pa tiacajiniani. Nojuacaari pa tiacajinia quinia María niyanu. Niya quiyajaariuhua na tapueyocuaca: Santiago, José, Judas, Simónnio. Na rimiatushuari niya quiyajuhuaj pa tiacajiniani.

Cunora, majaari nojori tojitanu paniniu quiquiaari Jesu. ⁴ Naaratej, Jesuuri nojori sequeree:

—Pueyari tiquiyocua Pueyaso sequenu panishano caminiujiunia tojiniu paniquiaa cutara. Saaja tama na tiacajinijnio pueya cutaraari maja na tojitiuniu paniniu, na jiyasojinijnio supueno pueyajuhuaj, tama na tiajinia quiniaajaajanio.

⁵ Naacuajitij, nocua nojori tiuyaquinuucua, majaari na naata na cumaacata na miiniu quiquiaari. Saaja secaja cusosuhuacua niojquiaari na juaashiquiaari, nojori na naatanijionura. ⁶ Jesuuri jiuujiatequiaari nojori tiuyaquishacari nocua. Na nuhuaji, Jesuuri rucuanejoquiaari pueya na niishitiojonura, queraatia shiitianiyojua tiacajinia catecaja na tiaca shocua.

Jesujiyaramiquishacari na saquiriojosano pueya Pueyaso rupaa pohutanura

(Mt 10.5-15; Lc 9.1-6)

⁷ Na nuhuaji, Jesuuri na saquiriojosano doce pueya sequequiaari nocua nojori niniuria. Nojori jiyaramiquiniu coteereeri, nojori quionura caapiqui, caapiqui, Pueyaso rupaa nojori pohuatanura. Nojori niquitioree na cumacaari samaruhua nojori tohuatanijionura pueyajiniji. ⁸ Nojori sequeereeri maja nojori panura nojori parishano, saaja nojori miojotu cutara. Nojori sequereejaariuhuaj, maja nojori panura caashoque, coseyaca, cumaneecanio. ⁹ Nojori sequeereeri saaja nojori cushiniuria na sapatu cutara, maja socua toque nojori panura na cushishocoriquiano. ¹⁰ Nojori sequereejaariuhuaj:

—Niaa jaara tiuquishiiquia tamonu tiajinia, cuniquijia nia jiyojetare, niaa jaara cuniquiji quiaarejaatijia. ¹¹ Pueya jaara nia tiuquinitianu paniyaquiri na tiajinia, nia pohuatasano nojori tojiniu paniyaquishacar-ijuhuaj, niocua cuniquiji quiaare. Niocua nia niohuacaacuaji jiya joocua piihire nojori niquiara, nojori niishiniuria Pueyasoori nojori saniitionutaniya, na rupaa tojiyashijianucua nojori quiniuucua.

¹² Na nuhuaji, Jesu jiyaramiquishano pueyari quiojquiaari. Nojoriiri Pueyaso rupaa pohuatanuuquiaari pueya tacatonuhuara nojori jiuujia Pueyasocua. ¹³ Nojoriiri queraatia samaruhua tohuatanijioquiaari. Naajuhuaj, nojoriiri cusosuhuacua tarooquiaari naana jajau shiyocua, nojori naatanijiosacari queraatia pueya.

Tiuquinijiona Juan mosacari

(Mt 14.1-12; Lc 9.7-9)

¹⁴ Jesu miishanojinijiiri caminiujiushaaquiaari puetunu cuno jiyajinajanaa. Naacuajitij, Galilea jiya jiyanijia Herodesri Jesujiniji pohuatasaaquiaariuhuaj. Herodesri cunora sequequiaari:

—¡Tiuquinijiona Juanqui samiitiarohuacuaa, cua mosano pueyanotej! Naaratej, cuno Jesuuri cuno cumaacaraca, jiyajeneta casaa na miiniuria na cumaacata. Nojuacujaari cua mosano Juan samiitianohua.

Jiyaniijia Herodesri na jiyajenetaquiaari jiyanohua cumaacaraca Jesu quiniuucua. ¹⁵ Tamasaca pueyari Jesujiniji sequequiaari tamaatia saniniujia, nojori jiyajenesacarijuhuaj. Naa sequetuquiaarii:

—¡Nojuacujaari tariucuacaanu pueyara Pueyaso sequencesano caminiujuunia Elías!

Tamasaca pueyari saniniujia naa sequequiaari, nojori jiyajenesacarijuhuaj:

—Nojuacujaari quiarijia nio pa quishacari Pueyaso sequencesano caminiuijunia pajaniyara, juhua tariucuacaanu pueyara Pueyaso sequencesano caminiuijuniaajuhuaj.

¹⁶ Herodes jaara pueya sequencesano tojiquiaari, nojuajaari saa sequequiaariajia:

—Nojuacuaja Tiuquinijiona Juan, cana cua nacataniquianucuajani. Samiitiarohuacuaquiiiri.

¹⁷ Tiuquinijiona Juan moyaquishacarijia, nojuajaari Herodías rupaa-jinia nujuatesaaquiaari. Cuno maaji Herodíasni, nojuajaari Herodes tarajanu Felipe niquiocua quiquiaari coteenu. Herodesri tarajanu Felipe niquiocua jaariutiaquiaari necocuara. ¹⁸ Nocuaji, Tiuquinijiona Juanri Herodes nacasujuja. Naa na sequejaari:

—¡Pueyasora, majaari maninia quia jiitianura quia tarajanu niquiocua!

¹⁹ Cunora, cuno maaji Herodíasri maja na niquinii paniniu quiija Tiuquinijiona Juan. Na monu panijiaari. Majaari na naata quiquiaari saaja. ²⁰ Herodesri Tiuquinijiona Juan puereja. Nojuajaari niishiquiaari Tiuquinijiona Juanri maninia pueyano, Pueyaso tojijia pueyano, maja sesa mijia. Naaratej, Herodesri maninia na cojuateja nujuatejojuajinia. Majaari na shanacunu quiquiaari sesa na miishaanura. Herodesri Tiuquinijiona Juan pohuatasano tojiniu maniniucuaja. Nojuajaari saaja noojia niquijoteja quiquiaari. Majaari na niishiniu quiija taa na miiniutianiyan. ²¹ Saniniujia, cuno maaji Herodíasri pueyara-caanu niishiriojoriquiaa, Tiuquinijiona Juan na motenura. Jiyacar-itij, namitia nera, Herodes rasaanu juuca quiquiaari. Cuno juuca, jiyaniijia Herodesri queraatia pueyata queranacuree. Na querana-cunura, nojuajaari Galilea jiyajinjinio jiyaniijianucua masuuquiaari, tama na soldadohua jiyaniijianucuaajaajanio. ²² Jiyacaritij, Herodías niyatueri tiuquiquiaari queranacusaqui, tii na nianujunura puetunu pueya niquiarajanaa. Herodesri niyacoo nianujunu shuquiritiaquiaari jiyanohua. Nata miaquenaa pueyari jiyanohua na shuquiritiaquiaarijuhuaj. Naaratej, jiyaniijia Herodesri niyacoo sequeree:

—Cua masere quia panishano. Janiyacua quia niquitioreni.

²³ Herodesri socua puetunu pueya niquiarajanaa na sequero-huacuhuaj:

—¡Seetanujuanaa quia sequeyanijia, maja cua sapojonu! Janiyari quia niquitionutaniya quia masesanoni. Quiaa jaara cua masere cua jiitisano cajiniocua, naajaa, janiyari quia niquitionutaniyan.

²⁴ Niyacoori tohuataquee na nucua Herodías na nequesotanura. Na sequeseeri:

—Cua nucuanaa, ¿casaa cua masenutaniya cua quenuni?

Na nucuaari na sequeree:

—¡Quia masere Tiuquinijona Juan naca!

²⁵ Cuno niyacoori ritia tiuquiquuhua jiyanijja Herodes quishaqui. Na sequereeri:

—¡Quiarijja cua niquitiore Tiuquinijona Juan naca miacojuajinia!

²⁶ Naa jiyanijja Herodes tojishacaritij, jiyanohua taraajequeeri. Naa jaa, seetanujuanaa na sequenuucua na masuusano pueya niquiara, majaari tari na naata ruuretanu quiquiaari cuno niyacoo masesano.

²⁷ Naaratej, jiyanijjaari ritia jiyooree na soldado, Juan naca na niquitionura cuno niyacoo. ²⁸ Soldadoori quiaaree nujuatejojuajinia. Juan nacataseeri. Na naca patamohua miacojuajiniaari. Soldadoori niyacoo na niquitosuhua. Nojuajaari na nucua na niquitiosee saniniuuja.

²⁹ Tiuquinijona Juan pueya jaara na niishiquiaari, na maanu patuquiaari, na jamotusocoriquiano.

Jesu mianuutesacari cinco mil pueya

(Mt 14.13-21; Lc 9.10-17; Jn 6.1-14)

³⁰ Jesu jiaramiquishano pueyari tiuquijioquiaariuhua Jesuucua nojori rucuanejonu nuhuaji Pueyaso rupaa nojori pohuatana. Nojoriiri Jesu pohuataquiaari puetunu nojori miitiushanojuanaa, nojori niishitiosanojinijinio. ³¹ Na nuhuaji, Jesuuri nojori sequeree:

—Miji, pueya quiyaquishaqui pa quiaare tamaqui, tii pa samaatenura rupaquijja quenaaja.

Jiyanohua queraatia pueyari pueyaracaanu nojoriicua nijoriquiaa. Tamasacaari quiojoriquiohuacuua. Tamasacaari saniniuuja shusha tiuquijioriquiaacuua. Naaratej, majaari jeya nojori quiniu quiquiaari na miaquenura quenaaja. ³² Jiyacaritij, Jesuuri saaja na jiaramiquishano pueyata quiaquiaari botejinia, pueya quiyaquishaqui. ³³ Queraatia pueyari saaja nojori niquitiurii quiaano. Cuno pojoriiri Jesu niishitiuquiaari. Naaratej, puetunu caminia shuriuquioco tiacajinijijanaa pueyari netecuatuquiaari. Nojoriiri Jesuucuaji cutesee. ³⁴ Jesu rosesacari botejiniji, saaja queraatia pueya niquiriiri. Nojori na niquishacari, cuno pojoriicua taraajequiaari. Nojoriiri juhua cojuanaaju borregohua quiriquiaa. Naaratej, Jesuuri nojori niishitiojonu coteeree queraatia casaa Pueyasojiniji. ³⁵ Jaara quiquiaari tari tenacari, na saquiriojosano pueyari nocua nijioquiaari. Na sequetuseeri:

—Tari tenacari. Paa tiajiyaqui quiyani. ³⁶ Pueya quia sequere, nojori cuaara quiojoraa cateca naataja tiacajinia, na miaquesocoriquiano nojori masenura tii.

³⁷ Jesuuri nojori riucuaree saaja:

—Niaa mariqui nojori miaquetereja saniya.

Nojoriiri na sequeree:

—¿Quiaateeri paniya queraatia pan masenuucua canaa quianura puetunu cuno pojoririajanaa? ¡Pa mianuutenura nojori, panishiyari dosciento cumaneeca! Majaari pa jiitianu.

³⁸ Jesuuri nojori nequesotaree:

—¿Taa pan nia jiitiaani? Nia niquishiitioj.

Nojori jaara niishiquiaari taa pante quiyani, na sequetusuhuari:

—Cinco pan quiya, caapiqui sapitiaajanio.

³⁹ Jesuuri jiyacari na pueya sequeree nojori cajitijionura pueya jiayasocuajinia, na mianuutesocoriquiano. ⁴⁰ Pueyari cajitiurii cien, tamocora cincuenta, tamaqui socua cien, camiria cincuenta. Pueyari naa queraatia maapuera raquiriojotasaaree nojori mianuutesaanura. ⁴¹ Jesuuri cuno pan pataree, sapitiajanio. Na nuhuaji, jiyouacaana maureeri Pueyaso na secojonura nocuara. Na nuhuaji pan neecasequiaari na saquiriojosano pueyaraari, nojori serotasocoriquiano pueya. Cuno caapiqui sapitiaaja shiquioreerejaariuhua puetunu pueyajanaa. ⁴² Puetunu pueyajanaari maninia miaquenuuquiaari. Maninia tooquioreejaariuhuaj. ⁴³ Na nuhuaji, doce canaasatuuri mishini-jiosaquaari pan raacuata, sapitiaaja raquiquiatanio. ⁴⁴ Cinco mil pueyari cuno panjiniji miaquenuuuna quiquiaari.

*Mohuaca caco Jesu rucuanenujiniji pohuatasano
(Mt 14.22-27; Jn 6.16-21)*

⁴⁵ Nio nuhuaji, Jesuuri na saquiriojosano pueya tacanitiaquiaari botejinia, nojori puetanura nojuaja caminia taquijiria Betsaida tiacajiniara. Jiyacaritij, Jesuuri pueya sequeriquiaa nojori quionuhuara na tiacajiniohua. ⁴⁶ Pueya jaara tari quiojoquiaariuhua, Jesuuri tuhuananuucua tacaquiaari tii na secojonura na Que Pueyaso. ⁴⁷ Jaara niniquiaari, boteeri tari caminia jiuujiajinia jaaretariquiaa. Jesuuri juhuanojuaja na jateesaqui quiriquiaajaa. ⁴⁸ Jesuuri nojori niquipuquiaari najuhuana juuariocunuyano. Majaari nojori naata jaaretanu quiriquiaa, pueru paratu piyarojosacari nojoriicuara. Quera juhuauquenu panishacari, Jesuuri nojori rupuesee. Mohuaca caco canujuriquiaari. Quera nojori tajiriquiaari. ⁴⁹ Nojori jaara na niquitiuquiaari mohuaca caco canujiyano, nojoriiri na jiyaniituquiaari samaru. Nocuaji sariyocuatureeri. ⁵⁰ Puetunu nojorijianaari na niquitiurii. Shiriiqutiuriiri. Jesuuri ritia pocuaree. Nojori sequereei:

—¿Casaara nia puereyani? ¡Nioojia nia cumaquiri! ¡Maja pueretunu! Janiyacuajanija.

⁵¹ Botejinia tacasee nojoriicuari. Paratuuri jiyacari pueyajequee. Nojoriiri na shootiariquiaa tacuriitia, jiyanoehua na jiuujiatehuta. ⁵² Nojoriiri juhuanojuaja maja na niishiniu quiquiaari Jesu miishano, queraatiara na jiyatesacari pan, pueya miaquesocoriquiano. Nojori jiuujiaacaari juhua ninishiqui quiquiaariija.

*Jesu naatanijiosacari cusosuhua Genesaret jiyajinia
(Mt 14.34-36)*

⁵³ Jesuuri na pueyata caminia niuutquiaari. Tiuquijioseeri Genesaret jiyajinia. Nojoriiri tii morotasee na bote. ⁵⁴ Nojori jaara tohuareetaquiaari botejiniji, cuniquijinio pueyari ritia Jesu niishiquiaari. ⁵⁵ Pueyari jiyacari netecuatuquiaari, Jesujiniji nojori pohuatanura puetunu cuno jiyajinajanaa. Cusosuhuari juhuacatecara patootasaaquiaari na matucuajinia tee Jesu quiriquiaa na rucuanejosacari nojori jiyajiniacuajani. ⁵⁶ Tiquiyocua Jesu rucuanejosacari, cusosuhuari nocuaji niojotasaquiaari nucuaco, tuhuaqui tiacajinia, queraatia shiitianiyojua tiacajinajuhuaj, cuhuariquiajajinianio. Pueyari Jesu secojoree cusosuhua na quiatenura quenaaja na toque casaca. Canapuete na toque quiaquiaarinii, puetunu nojorijianaari na cusonujiniji naatacoquiaariuhua.

*Casaate sesoriquiara pa jiyateja Pueyasorani
(Mt 15.1-20)*

¹ Jesuucua catecanoquiaarii Fariseocuaca, Moisés Rootasanojiniji niishitiojonaanio, canapuete Jerusalén tiacajiniji nijioquiaaricuajani.

² Cuno pojori quishacari tii, nojoriiri noojaqueya Jesu pueyajinjinio niquiquiaari shuquitoojua miaqueyano. Nojoriiri jiyanijia, nojori ru-cuanejosacari sesa mijiaca pueya tajinia, sesa nojori quiniu na naata nojoriicua pacunu. Nojoriiri cunora shuquitianu jiitiquiaari, nojori jiyanishacari nojori jiuujia naasucua curuushiniutianiya, shuquitoojua nojori miaquesacari. Naaratej, cuno pueyari Jesu pueya pocuanu coteequiaari. ³ Cuno Fariseocuaca, puetunu narta Judiocuacajanaanio, nojoriiri maja na cartenu quijia taricuacaanu nojori supuetanaa niishitiojosano. Naaratej, majaari nojori miaquenu quijia shuquitioo.

⁴ Naacuajitij, nojori jaara miaquesano niquitiojosaquiji tacatequiohua, majaari nojori miaquenu shuquitoojua. Socua queraatia quiyari cuno pojori niishishano. Naacuajitij, nojoriiri jiyaniquaa, sesa nojori quiyaquiniiucuaji Pueyaso niquiara, nojori cuaara na ratujua jeequejoora, pataco, coshi, na maquetucuanio. ⁵ Naaratej, Fariseocuaca, Moisés Rootasanojiniji niishitiojonaanio, nojoriiri Jesu nequesotaquiaari:

—¿Casaara quia pueya tojitiaquia pa supuetanaa niishitiojosanoni? Nojoriiri maja na shuquitianu quiquiaa na miaquenuunura.

⁶ Jesuuri cuno pojori riucuaree:

—¡Niaari sapueno juhua maninia pueya niuishishano! ¡Niaacuajaari seetanujuanaa sesa mijiaca! Pueyaso sequenceso caminiujiunia Isaíasri maninia sequequiaari niajaniyajinijicuaja, naa na naajiotasacari Pueyaso sequenceso:

“Nio pueyari saaja na rupaata shuquiritaa janiya. Nojori jiuujiaari saniniuujia tucuacaanu quiya janiyajiniji. ⁷ Nojori miishano quiriani, cunoori najuhuanaj. Naa nojori miishanon, majaari na shuquiritiniu janiya. Nojori niishitiojosanoni, cunoori tama pueya niishitiojosanojuaja, maja cua sequenceso”.

⁸ Niaari cua pueya pocuariquiaa. ¿Niajaniyariuhuaj? ¿Casaara Pueyaso sequenceso nia tojiyaquiaanijia? Niaacuajaari Pueyaso sequenceso tojiyaquia, tama nia supuetanaa niishishanojuaja nia miiniuria najuhuanaj.

⁹ Jesuuri socua naa sequequiaari cuno pojoritij:

—Tama nia miiniu jiitishanoocua nia miiniuriajaaja, ¡niaari Pueyaso sequenceso shocortaa saaja! ¹⁰ Moisésuajaari naa rootaquiaari: “Maninia quia miiri quia que, quia nucuanio. Majaari nojori rerequetenu. Cante na que, na nucua sesacajani, cuno pueyano cuaara mosaaria”. ¹¹ Niaari sequeya saniniuujia, maniniacuaja, pueyano jaara na que, na nucua sequere: “Maja cua naata naacutanu niajaniya cua casamitia. Janiya tari Pueyasora jiyateree puetunu cua jiitiasanojuanaani”. ¹² Niaari sequequiaajuhuaj, pueyano jaara naa sequeretej, maniniacuaja maja na naacutanura na que, na nucuanio. ¹³ Naacuajitij, niaari Pueyaso sequenceso shocortaa saaja, tama nia niishishanojuaja nia miiniuria najuhuanaj. Cuno nia niishishanocuajaari saaja nia supuetanaajiniji caminiujiushano. Niaari socua queraatia cassaa miiquiaa juhua cunojuhuaj.

¹⁴ Naa na nacasunu nuhuaji cuno pojoritij, Jesuuri pueya rerejotero-hua na shocua. Nojori sequereeri:

—Cua tojitiare puetunu niajaniyajanaa, maninia nia niishiniuria.
¹⁵ Casaa pa miaqueyani, Pueyasora naajaa. Cunoori maja na naata pueyano jiyatenu sesa miijiara. Poojajinia pa niishiriojosano cutaraari sesara pa jiyateya Pueyasora. ¹⁶ Cante numaaracani, nojuaja cuaara tojitaara cua sequencesano.

¹⁷ Jesu jaara tiujiquiaari cuno pueya, tiajiniaaco tiuquiyarohuari. Na saquiriojosano pueyari tii na nequesotaree pueya na niishitiosano-jiniji. ¹⁸ Jesuuri nojori sequeree:

—¿Niaateeri cua sequencesano niishiyaquiyajuhuaj? ¿Majateeri nia niishiniu? Puetunu pa jiniacuma tiuquijajanaani, cunoori maja na jiyatenu sesa miijiara pajaniya. ¹⁹ Pa miasanoni, majaari na tiuquiniu poojajinia, saaja pa seecojinia mishiya cutaraari. Na nuhuaji pocoma tajiyari pa marecuahuacuma.

Nio sequencesano, pueya niishitiojoriquiaari, puetunu miaquesanojuanaari maniniacuaja pa miaquesocoriquiano. Maja cutaraari na naata na jiyatenu pajaniya juhua curuutuucara Pueyasora. ²⁰ Jesuuri sequeree-juhuaj:

—Pueyano niishiriojosano sesa noojajiniani, cuno cutaraari sesara na jiyatequia. ²¹ Pueyano jiuujajiniji supueya cutaraari sesa niishiriosano, sesa na miiniuria. Naacuajitij, pueyanoori na camishoo maajipohua numuetucujua, seja numuetucujuajuhuaj. Tamonu pueyano casami nohuasejoquiaari. Pueya moquiaajaariuhuaj. ²² Narta pueyano niquiocua numuetucuquiaari. Tamonu pueyano casamicua jiaati-aquiaari. Jiyanoehua sesa miquiaari. Cuaracashijionu niishiayari. Tama na cuaqueyajaaja shuquiritiquiaari na miiniu jiitishanota. Narta pueyano miananajoquiaari. Tamonuu cuara tonujuquiaari. Naajuhuaj, saaja tama na cuaqueyajaaja shuquiritija quiquiaari. Juhuajaniya sesa miquiaajaariuhuaj, moseeca na quiniuucua. ²³ Puetunu nio sesa miishanojuanaari pueya jiuujajiniji supuequia. Cuno cutaraari sesa quiqiara pueya jiyateja Pueyaso niquiara.

Taatu tiuushacari Jesuucua (Mt 15.21-28)

²⁴ Jesuuri cuniquiji quiaaree Tiro tiaca shocua jiyajiniara. Tii tiuquishii tamonu tiajinaari. Majaari na paniniu quiquiaari pueya niishiniuria nojuajiniji, tee na quiyani. Naajaa, majaari na naata jamaaniu quiriquia. ²⁵ Tamonu maajiiiri ritia Jesujiniji niishiquiaari. Neyatuuri samaruraca quiriquia. Naaratej, maajiiiri Jesuucua niquiaari. Na cariquimiaji mojoquetaseeri. ²⁶ Cuno maajiiiri Sirofenicia jiyajinijnio taatu quijia. Jesu secojoseeri samaru na tohuataniniuria neyatujiniji.

²⁷ Jesuuri maaji sequeree miriqui:

—Quia tarinitiare, muerasu cuaara coteenu miaquenura. Majaari maninia muerasu pa jaariutianura na miaquesano, sareyacari jatasocoriquiano.

²⁸ Maajiiiri Jesu riucuaree:

—Jaa, Jiyaniijiana. Naajaa, sareyacuajaari miaqueja cariquiacoji tatuscuaja, muerasu totinijiosano miaquesano shiriya.

²⁹ Jesuuri na sequeree:

—¡Quiaacuaja maninia cuá riucuaree! Quia tacateyarohua. Samaru-cuajaari tari tohuataree quia niyatujiniji.

³⁰ Maaji tiuquishacariuhua na tiajiniohua, neyatu riuriatasuhuari na maquetujinija mataano. Samaruuri tari tohuatano quiriquiaa nocuaji.

Jesu jeecasacari numueeju, tiquia pueyano

³¹ Jesuuri tacatequiaariuhua Tiro tiaca shocua jiyajiniji. Na tacatesacariuhua, Sidón tiaca shocojoquiaariuhuari, Décápolis jiya tiacanio. Galilea caminiajinia tiuquishuhuari. ³² Tii na quishacari, nocua jaatucusa aquiaarii numueeju, tiquia pueyano. Na jaatucunaari Jesu secojotuquiaari na juaashiquia na nianura nocua, na jeecanura cuno pueyano. ³³ Jesuuri pueyano numueeju jaatucuree tamocora pueyacuaji. Na numaama shirii na juaashiquiaari. Na nuhuaji, tama na juaashiquajinijaaja riocoreeri. Na riacau cojuata pocuaashijia niti quiareeri. ³⁴ Jiyacaritij, jiyocuacaanu maureeri. Noojia niareeri. Na nuhuaji, cusosu numaa sequereeri:

—¡Efata!

Nioori pueyano rupaajinia sequeya: “¡Quia riatere!”

³⁵ Jiyacaritij, numueeju numaari riatequequee. Na nitiri jeequequee-juhuaj. Ritia pocuaquee maniniaari. ³⁶ Jesuuri cuno pojori rootaree maja nojori pohuatanura na jeecasano pueyanojiniji tamasaca niquiara. Nojoriiri saaja tiquiyocua pohuatanuuquiaari. Naa Jesu rootasacari na naatanijiosano pueyatej, maja nojori pohuatanura na miishanojiniji, nojoriiri saaja socua jiyacatequiaari pohuatanura. ³⁷ Pueyari jiyanohua jiuujiatequiaari Jesu miishano na niquitiushacari. Tama nojorijiaarijia sequetooquiaari:

—¡Puetunujuanaa miya maniniaari! Numueejunucua jiyateya tojitia-jacaraari. Tiquianucua pohuateyajaariuhuaj.

8

Jesu mianuutesacari cuatro mil pueya

(Mt 15.32-39)

¹ Jiyacaritij, jiyanohua queraatia pueyari rerejoquiaari Jesu na tojitanura. Majaari nojori jiitianu quiquiaari casaa quenaaja na miaquetuso-coriquiano. Jesuuri na saquiriojosano pueya piirii. Nojori sequereeri:

² —Nio pueyacua tarajeyanija. Nojori tari jiuujianaraca juuca quiya niya cuata. Majaari quenaaja nojori jiitiatunu miaquesano. ³ Janiya jaara nojori jiyaramiquiriohua na tiajinia miaqueyojuani, nucuaco cu-sojoniyarohuacua. Noojiaqueya nojorijinijiniori niyara nijiorucuuaa tucuacaanuji.

⁴ Na saquiriojosano pueyari na riucuaree:

—¿Paatucua taa miaquetero nojori niyani, pueya quiyaquishaquini?

⁵ Jesuuri nojori nequesotaree:

—¿Taa pan nia jiitiaani?

Nojoriiri na sequeree:

—Nareja siete.

⁶ Jesuuri na pueya sequeree, nojori cuáraa sequeera puetunu pueyajanaa nojori cajitiuniuria. Na nuhuaji, Jesuuri cuno siete pan pataree. Pueyaso secojoree nocuaraari. Na nuhuaji, na saquiriojosano pueyara na neecasereeri. Nojoriiri saniniuuja pueya na serotaree puetunujuanaa. ⁷ Secaja sapitiaaja jiitiaturiquiaajaariuhuaj. Jesuuri socua

nocuara secojorohuacuhuaj. Na nuhuaji, na pueya sequereeri nojori niquitiojonura pueya.⁸ Puetunu pueyajanaari maninia miaquenuuuree. Tooquioreejaariuhuaj. Miaquesano cureenota mishinijosaaquiaari-iri siete canaasatu.⁹ Na miaquenaa pueyari quiquiaari cuatro mil pueya. Na nuhuaji, Jesuuri nojori sequeree nojori quiojonuhuara.¹⁰ Na nuhuaji, Jesuuri botejinia tacataquiaari na saquiriojosano pueyata. Quiaareeri Dalmanuta jiyajiniara.

Fariseocuaca niquiniu panishacari Jesu miishano Pueyaso cumaacata (Mt 16.1-4; Lc 12.54-56)

¹¹ Fariseocuacaari Jesuucua tiuquijiosee. Nata juayonuutaseeri. Nojori saniniujiuniuria Jesu, nojoriiri na sequeree juucua cuaara nojori niquishocoriquiano casaa miiria Pueyaso cumaacata. Nojoriiri naa na sequeturee, nojori niishiniuria Jesute seetanujuanaa Pueyaso Jiyarosano.¹² Jesuuri noojia niaree na taraajenuta. Sequereeri:

—¿Casaara nio pueya niquiniu paniya Pueyaso cumaacata miishanon? Seetanujuanaa nia sequeyanijia, majaari cua niquitiniu quiniutianiya niajani cua cumaacata cua miishano.

¹³ Jiyacaritij, cuno pojori tiujiaqueeri. Na pueyata botejinia tacataaro-huari. Caminia taquijiria niuutiaareeri.

Jesu numootesacari na pueya Fariseocuaca niishitiosanoocuaji (Mt 16.5-12)

¹⁴ Jesu pueyari na coseyaca niyajetatuquiaari. Nareja niquiriyatujua pannijojua jiitiaturiquiaa botejiniaari. ¹⁵ Jiyacaritij, Jesuuri nojori sequeriquiaa miriqui:

—Cua tojitiare. Niocua tama nia cuaqueyajaaja cojuariquia Fariseocuaca pan poreetajaacuaji, Herodes pan poreetajaacuajijiuhuaj.

¹⁶ Majaari na pueya niishiniu quiriquiaa naa Jesu sequencesacaritij. Nojoriiri cunora tama sequetooriquiaaja:

—Pa jiyaniijia jiyoteeri naa pa sequeya, coseyaca pa paaquiniiucua pa sasocoriquiano.

¹⁷ Jesuuri na saquiriojosano pueya niishiriojosano niishiui. Nojori sequereeri:

—¿Casaara nia niishiriojiya pan nia jiitiaaquishacarini? ¿Majateeri juhuanojuaja nia niishiniu tamonu juuu cua miishanojiniji? ¿Niaateeri cumajiuuquiaacato, maja nia niishiniuria?¹⁸ ¿Majateeri cua miishano nia niquiniu quiquiaacuaja nia namijiata? ¿Majateeri nia tojiniu quiquia nia numaatajuhuaj? ¿Niaateeri ritia niyajetarucuaa cua miishano?¹⁹ Janiya jaara cinco pan neecaserucua cinco mil pueyarat, ¿taa canaasatu nia mishinijocanu miaquesano cureenotani?

Nojoriiri na riucuaree:

—Doce.

²⁰ —Naajuhuaj, janija jaara siete pan neecaserucua cuatro mil pueyarat, ¿taa canaasatu nia mishinijorucuaani?

Nojoriiri na riucuaree:

—Siete.

²¹ Naaratej, Jesuuri nojori sequeree:

—¿Majateeri juhuanojuaja nia niishiniu naa cua miishanojinijitij? Jiyacariti nojoriiri Jesu sequencesano niishiui.

Jesu jeecasacari cariyujuaru pueyano, Betsaida tiacajinia

²² Na nuhuaji, Jesuuri Betsaida tiacajinia tiuquijioquiaari na pueyata. Tii na quishacari, Jesuucua jaatucusaaquiaarii cariyojuaru pueyano. Pueyari Jesu secojotuquiaari cuno cariyojuaru namijia na quianura quenaaja. ²³ Jesuuri cariyojuaru quiaree na juaashiquajiniji. Tiaca jijaquiria na jaatucuyareeri. Cariyojuaru namijia piquiojoree na ria-cautaari. Na nuhuaji, na juaashiquia niaree nocuaari. Na nequesotareeri:

—¿Quia naatate niquiniu shiitianiyojua quenaaja?

²⁴ Cariyojuaruuri niquiniu sanirii. Jesu sequereeri:

—¡Jaa! ¡Pueya niquianijia, juhua nacuhua rucoyano!

²⁵ Jesuuri socua pacuterohua na juaashiquia nianu cariyojuaru nami-jiacua. Cariyojuaruuri niquiniu saniriohuacuhuaj. Jiyacaritij, toje-taarucuajanaa maninia niquijiara quiuiiri. ²⁶ Jesuuri na tiajinia na jiyarorohua. Cariyojuaru rootaree naari:

—Majaari tiacajinia quia quianuhua pueya quia pohuatanura cua miishanojiniji quiajaniya.

Pedro sequesacari, Jesu seetanujuanaa Pueyaso Jiyarosano

(Mt 16.13-20; Lc 9.18-21)

²⁷ Na nuhuaji, Jesuuri quojoquiaari na saquiriojosano pueyata tu-cuaqui tiacajiniara Cesareya Filipo tiaca shocuaqueya. Na quiasacari nucuaco, na pueya nequesotareeri:

—¿Taa pueya sequequiaaa janiyani, cantena janiyani?

²⁸ Nojoriiri na riucuaree:

—Noojiaqueya pueyari quia sequequiaaa, quiaanaari Tiuquinijiona Juan. Tamasacaari saniniujia quia sequequiaacujua quiaanaari supuetana Elías. Naajuhuaj, tamasacaari quia sequequiaaa, quiaaa naas-cuanaari tariucuacaanu pueyara Pueyaso sequencesano caminiujiunia, samiitianohuatuhuaj.

²⁹ Na nuhuaji, Jesuuri nojori nequesotaree:

—¿Niajanijarijiaataj, taa nia sequeyani, cante janiyani?

Pedroori na sequeree:

—Quiajanijayacuaja Cristo, Pueyaso Jiyarosano.

³⁰ Jesuuri nojori rootaree maja nojori pohuatanura tamasaca niquiara nojuajiniji Pedro niishishano.

Jesu numootesacari na pueya, nojuaja mosaanutaniya

(Mt 16.21-28; Lc 9.22-27)

³¹ Jiyacaritij, Jesuuri na pueya niishitiojonu coteequiaari tama nojuajinijiaaja, taa Pueyaso Niyantu miishaanutaniya jiyanohua naquiya taraatiani. Naa na pueya sequeree:

—Parta Israel pueya jiyanijianucuaari cua tojitiaaquiniutianiya, pueyacuara Pueyaso secojonaa jiyanijianucuajuhuaj. Naajuhuaj, Moisés Rootasanojiniji niishitiojonaari cua rerequetejaca quiniutianiya. Janiyari mosaanutaniyani. Na nuhuaji, janiyari jiuujianaraca juucajinia samiitianutaniuhuani.

³² Jesuuri naa seetanujuanaa nojori sequequiaari. Na pohuatasanoori maja miriqui na quiniu quiquiaari. Jesu jaara naa sequequiaari, Pedroori tamocora na jaatucuree. Cuniqui na nacasureeri maja naa na pocuanuratej. ³³ Jesuuri na nijiniara tacatequee saaja. Na saquiriosano pueya na niquiniutia, Pedro sequereeri:

—¡Cua shuriucuaji quia quiaare, Satanásna! Quia niishiriojosanoori maja Pueyasojiniji. Majaari quia niishiriojonu juhua Pueyaso panis-hano. Quiaari saaja juhua nio jiyajinijinio pueya niishiriojiya.

³⁴ Naa na sequenu nuhuajitij, Jesuuri na saquiriojosano pueya piirii, puetunu cuniqui quiniaa pueyajanaanio. Nojori sequereeri:

—Pueyano jaara cua tojijiara quiniu paniri, nojuaja cuaara niiria cucua, seetanujuanaa noojiata na panishacari janiya. Nojuaja cuaara niyajetaara tama na cuaqueya na cojuanurajaaja. Cuaara cucuara panti-aara tama na cuaqueyajaaja. ³⁵ Saniniuu{jia, cante tama na cuaqueyajaaja shuquiritiniu panijiani, na nuhuaji, nojuajaari jiyanohua taraatia quiniutianiya pueyaracaanu. Saniniuu{jia, cante tama na cuaqueya panitiaa cua panishano na miiniuriani, na pohuatanura janiyajinijijiuhuaj, cuno pueyano cutaraari pueyaracaanu quiniutianiya shuquiri-aatia. ³⁶ ¿Niaarate maninia, pueyano jaara puetunu nio jiya casamijiana jiitiare, na nuhuaji na sohuanu jaara jatasare mani quiquiojinia pueyaracaanura? ³⁷ ¿Pueyanote na naata Pueyaso niquitionu queraatia na casamijinijinio, Pueyaso jiyatenuhuara nojuaja pueyaracaanu rishi-jia na quiniuria nata? Maja na naata. ³⁸ Cante cua rupaa pohuatanu caririquiya sesa miijaca pueya niquiara nio jiyajiniani, janiyari nojori caririquinijinioyacuhuaj. Naajuhuaj, cante caririquiya mijiria quiniaa niquiara sequenurani, janiya nojori jiyanijiani, janiyari cua tacatesacariuhua nojori caririquinijinioyacuhuaj. Janiyari jiyacari cua Que cumaacata jiyocuacaanuji tacatenutaniuhuani, maninia miijaca cua Que seyatajuaj.

9

¹ Jesuuri nojori sequequiaarijuhuaj:

—Seetanujuanaa nia sequeyanijia pueyanaa. Noojaqueya niya quiniajinijinio quiarabajani, majaari nojori cusionuunu quiniutianiya juhuanojuaja, nojori cuaara niquirijaatijia Pueyaso cumaacatiuquiano cucua, na muerasu jiitiariquianonni.

Jesu jatasacari shacantuucara

(Mt 17.1-13; Lc 9.28-36)

² Seis juuca nuhuaji, Jesuuri jiyaconaja tuhuananuucua tacaquiaari. Saaja nata quiojoquiaariiri Pedro, Santiago, Juannio. Jesu quishacari tuhuananujiniji, na cuaqueyari tamaatiuucuara jataquiaari nojori niquiara. ³ Na toqueeri shacantuquera jataquiaari, socua jiyanohua cohua-jara sohuanatuujiniji. Nio jiyajinbia toqueya jeequejonaari maja na naata jiyanohua cohuaquaera toque na jiyatenu, taa Jesu toque jataquiaaricuaani. ⁴ Jiyacaritij, nojoriiri supuetana Elías niquituquiaari, supuetana Moisésjuhuaj, Jesuta pocoojiyano tii. ⁵ Jiyacaritij, Pedroori Jesu sequeree:

—Niishitiojonanaa, ¡canaa namitia niya quiyani! ¡Canaacua niaacuaji suhuorojoren: quiara, Moisésra, Elíasranio!

⁶ Jesu pueyari shiriiquitiuriquiaa. Nocuaji Pedroori naa juhuajaniya pocuariquiaa. Majaari na niishiniu quiriquiaa casaa na pocuariquiaani.

⁷ Jiyacaritij, jiyocuacaanuji cohua-ja najacaari nojoriicua rosequiaari. Cohua-jaari nojori mishiquiomaa. Cohua-ja najacajiniji, Pueyaso-ri tojishaaree pocuaano. Naa sequequiaaritij:

—¡Niocuaja cua Niyanuniyojua, cua shuquiritiasano! ¡Saaja nojuaja nia tojiri!

⁸ Jiyacaritij, nojori jaara ritia niquinijionuuquiaari na shocuaqueya, majaari quenaaja tamonu na niquitiuniu quiquiaari socua. Saaja Jesuri tamajaaaja quiriquiaa.

⁹ Nojori rosetasacariuhua tuhuananuucocoji, Jesuuri nojori rootaquiaari maja nojori pohuatanuhuara tamasaca niquiara nojori niquishano. Jesuuri nojori sequequiaari cuaara noojiajinia racatatuura, nojuaja jaara samiitiarohuaatijia. ¹⁰ Cunora, tama nojorijaarija maninia racataquiaari noojiajinia nojori niquitiushano. Maja cutaraari nojori niishitiuniu quiquiaari, casaara naa Jesu sequeree nojorini “cua samiitiasacariuhua”. ¹¹ Cunora, nojoriiri Jesu nequesotaquiaari:

—¿Casaara Moisés Rootasanojiniji niishitiojonaa sequequiaacuaraarini, Elíasna coteenu tiuquiniutianiuhua Pueyaso Jiyarosocoriquianooocuaji?

¹² Jesuuri nojori riucuaree:

—Seetanujuanaacuaquinatejaj, Elíasri coteenu tiuquiriquiano quiquiaari, puetunu cucuaji jeenucuariquanojuanaa. ¿Niaate niishiya casaara tariucuacaanu Pueyaso Rupaajinie naa naajiotasaquaari janiyajinijini: “Pueyaso Jiyarosanoori naquiya miishaanutaniya? Pueyari na soonutaniyajuhuaj”. ¹³ Janiyari seetanujuanaa nia sequeyanji, Eláscauajari tari niquiaari. Pueyari naquiya na miiquiaari taa nojori paniquiaaricuajani. Pueyaso Rupaajiniacuajaari naajiotasaquaari nojuajaari naa miishaanutaniyaquij. Seetanujuanaa tari naa miishaquaarii.

Jesu tohuatesacari samaru, caya samijiajiniji

(Mt 17.14-21; Lc 9.37-43)

¹⁴ Na nuhuaji, Jesu jaara tacatequiaariuhua na saquiriojosano pueya quishaqui, queraatia pueya niquishuhuari nojori shocua maano. Tii quitiuriquiaajaariuhua Moisés Rootasanojiniji niishitiojonaa. Nojoriiri Jesu pueyata juayonuutariquiaa. ¹⁵ Pueya jaara Jesu niquitiuquiaari, puetunu pueyajanaari nocuaji jiuujiatequiaari. Nojoriiri nocua netecuatuquiaari na saruhuatanura. ¹⁶ Jesuuri na saquiriojosano pueya nequesotaree:

—¿Casaajiniji nia juayonuutariquiaa cuno pojoritiani?

¹⁷ Tamonu cuno pueyajinjinioori Jesu riucuaree:

—¡Niishitiojonanaa, quiocua nitiaaree quiyanunijia! ¡Samaru jiitiaano! ¡Samaruuri na jiyatequiaari tiquiara! ¹⁸ Tiquiyocua na quishaqui, samaruuri na pojotequiaa. Naa na cusojosacaritij, cushau jataquiaa na rupaamajiiri. Na quiaca miaquequiaajaariuhuaj. Na nuhuaji, pootia maquiaari juhua macu. Quiyanuuri cunora sasacara quiyaree. ¡Socua piriuquiuniutianiyari! Janiyacuajaari tari sequeree quia pueyani, nojori tohuatenura cuno samaru nojuajiniji. Nojoriiri maja na naata na tohuatenu quiriquiaa.

¹⁹ Jiyacaritij, Jesuuri naa sequeree:

—¡Niaaqi Pueyasocua tiuyashijiacaja! ¿Janiyatucua pueyaracaanu nia jiitiariquiani? ¿Janiyateeri pueyaracaanu nia rejeretanutaniyajaaniuhuaj? ¡Miji nia jaatucure cuno caya samijia!

²⁰ Nocua jaatucusareeri caya samijia. Samaru niquishacari Jesu, caya samijia miirii taraatiaari. Caya samijiaari pojoquee Jesu niquiara.

Tii taquiriocuariquiaari. Na rupaamajiiri cushaariquiaa. ²¹ Jesuuri caya samijia que nequesotaree:

—¿Taacari na coteecanu naa na quiniuria juhuacatecarani?

Na queeri Jesu riucuaree:

—Na naatujuajiniji naa quijajuhuanajaj. ²² Na cusojuanura juucua, cuno samaruuri sequeyarucua na pojotequiaa manjinia, mooinjajuhuaj. Naaratej, jjaara quia naata quiri, canaacua quia taraajere quenaaja! ¡Canaa quia naacure!

²³ Jesuuri na sequeree:

—¿Casaara naa quia sequeree janiyani, “jaara quia naata quiri”? Cante Pueyasoocua tiuya noojiata seetanujuanaani, nera miishiyari puetunu na panishanojuanaa.

²⁴ Jiyacaritij, caya samijia queeri nacaree:

—Jaa, quiocua tiuyanijia! ¡Cua naacure socua cua tiuuniuria quiocua!

²⁵ Jesu niquishacari queraatia pueya nocua rerequeejiyano, ritia samaru sequereeri:

—¡Tojiyashijia, tiquia samarunaa, janiya quia sequeyani, quia tohutare nio caya samijajiniji! ¡Puetunu quia tohuatarezanaa! ¡Majaari socua quia tacatenuhua, nocua quia tiuquinihuara!

²⁶ Samaruuri sariyocuaquee. Caya samijia taquiriocuaterohuariuhuaj. Na tohuatesacari caya samijajiniji, juhua macu na tiujaqueeri. Nocuaji, queraatia na niquitiana pueyari sequequiaari:

—¡Juaj! ¡Tari cusoquee cutaratej!

²⁷ Jesuuri na juaashiquajiniji na quiaree. Na sanareeri. Caya samijiaari juhuajaniya nujuquaariuhua.

²⁸ Na nuhuaji, Jesuuri tiaco tiuquitiaquiaari na pueyataga. Tamajaaja nojori quishacari tii, na saquiriojosano pueyari na nequesotaree:

—¿Casaara maja canaa naata cuno samaru tohuatenu quiriquiaani?

²⁹ Jesuuri nojori riucuaree:

—Jiyano samaruuri na naata tohuatanishaanu cutara saaja jiyano hua Pueyaso nia secojonuta nia miaqueyaquinuti.

Jesu pohuatanu pacutesacariuhua nojuaja mosaanutaniya

(Mt 17.22-23; Lc 9.43-45)

³⁰ Nojori jaara quiojocuariuhua tiji, Galilea jiya tajimiaari. Majaari Jesu paniniu quiquiaari pueya niishiniuria tee na quiyani. ³¹ Jesuuri jiyacari saaja na saquiriojosano pueyata quiniu paniriquiaa. Jiyacari, nojori niishitiojoriquiaari. Naa nojori sequereeri:

—Janiyari pueya niquitosaanutaniyani, nojori miiniuria janiya taa nojori paniyacuajani. Nojoriiri cua monutaniya. Jiuujianaraca juucuinjia, janiyari samiitianutaniuhuani.

³² Majaari quenaaja na pueya niishiniu quiriquiaa Jesu seqesano. Nojoriiri saaja puereriquiaa maninia na nequesoreenura casaa naa na sequenu paniriquiaani.

—¿Cante jiyaniijajanaa cutarani?

(Mt 18.1-5; Lc 9.46-48)

³³ Nojoriiri Capernaum tiacajinia tiuquijiosee. Tari nojori quishacari tiajinia, Jesuuri nojori nequesotaree:

—¿Casaajiniji nia juayonuutariquiaa nucuamajini?

³⁴ Nojoriiri saaja sanaajetaquee. Na juayonuutanujiniji niishi-tiuriquiaacuajaari. Nucuamaji, nojoriiri riutioconeetariquiaa teyano nojorijinijiniote socua tojishano pueyanoni. ³⁵ Jesuuri jiyacari cajirii nojori na rootanura. Na doce pueya piiriiri. Nojori sequereeri:

—Cante socua tojishano pueyanora quiniu paniyani, nojuaja cuaara quiiria juhua serura, narta pueya na naacunura puetunujuanaa.

³⁶ Na nuhuaji, Jesuuri mueya nujuatequiaari nojori tajinia. Cuno mueya paree nojori niquiaraari. Na pueya sequereeri:

³⁷—Cante jiyano mueya maseja na paniniutia janiyani, nojuajaari cua maseyajaacuhuaj. Cante cua maseyani, majaari saaja na masenu janiya. Jiyocuacaanu Quijia cua Jiyarona maseyajaariuhuaj.

*Tamonu pueyano tohuatanijiosacari samaruhua Jesu cumaacata
(Mt 10.42; Lc 9.49-50)*

³⁸ Tamacari, Juanri Jesu sequeree:

—¡Niishitiojonanaa, canaari tamonu pueyano niquiriini quia sesa jiyaniquiano samaruhua na tohuatanijionura pueyajiniji! Nojuajaari maja pajaniyajinjinio. Nocuaji, ¡canaari na tenujureeni maja socua naa na miñiuriatej!

³⁹ Jesuuri nojori sequeree:

—¿Casaara nia tenujureeni? Pueyano jaara maninia miishano miiri cua sesa cumaacata, na nuhuaji, nojuaja maja na naata sesa pocuanu janiyajiniji. ⁴⁰ Nia niishiri, cante maja pa paracani, nojuajaari pa jiyano. ⁴¹ Nia rucuanejosacari, cante nia raateya mohuacanijojuua na paniniutia janiyani, cua pueya nia quiniuucuahuaj, Pueyasoori saniniuujia maninia casaa na niquitionutaniya na jiitiasanojiniji.

*Puereeta quiniutianiyari sesa miijiacara
(Mt 18.6-9; Lc 17.1-2)*

⁴²’Nio mueyari cucua tiuujia. Cante jiyano mueya miitirii sesani, nera maara socua maninia quiri, puereetujuajau saajia jaara morotasaare na riquajiniji, caminia queronijinia jartasocoriquiano. ⁴³⁻⁴⁴ Nio miriqui cua niishitiosano nia tojiri: tama nia juaashiquiaaja jaara nia jiyatere sesa miijiera, nia juaashiquia nia rashiquiare juhuari niaa mariqui mani quiqiojinia jatasareeri, sesa miijia nia quiniuucua. Cuno mani quiqiojiniani, majaari mani maquesanu. ¿Niaateeri paniya tii nia jatasaanura caapiquiquojuata? Jiyano hua socua maninia cutaraari niaaara, juaashiquiaaju nia tiuquinshaanura Pueyaso shuriucua, pueyaracaanu shuquiriaatia nia quiniuria nata. ⁴⁵⁻⁴⁶ Naajuhuaj, nia niohuaca jaara nia jiyatere sesa miijiera, nia rashiquiarenoj maja nia jatasaanura mani quiqiojinia. ¿Niaateeri paniya tii nia jatasaanura caapiquiniocuata, pueyaracaanu tii nia saniitiosaanura? Jiyano hua socua maniniaari niquinioocuata Pueyasocua nia tiuquinuria, pueyaracaanu nata nia quiniuria shuquiriaatia. ⁴⁷⁻⁴⁸ Naajuhuaj, nia namijia jaara sesa miitiriquia niajaniya, nia jiaterenoj. Naa nia tarinitiare sesa nia miiniu, maja nia jatasaanura caapiqui namijiata pueyaracaanu mani noshishaqui. Sesa miijiacari cuno mani quiqiojinia quejoosaantuaniya, pueyaracaanu nojori saniitiosaanura. Cuno manijinia, majaari porohua cusionuunu. Maniiri tii pueyaracaanu noshiya. Majaari na maquesanu. Jiyano hua socua maniniaari nia tiuquinuria Pueyasocua niquiriyatujuua namijiata pueyaracaanu shuquiriaatia nia shootianura nojuaja.

Naa Jesu niishitiojosacari miriquitij, nojuajaari pueya niishitiojoriquiaa nojori tarinitianura jiyanoehua na miiniu panishano, cuno jaara sesa miijiara jiyateriquia nojori.

⁴⁹ Jesuuri socua niishitiojorohua:

—Puetunu Pueyaso muerasujuanaari saniniujuhsaanutaniya juhua manitia, taa shu caquishiyaculaani na moqueyaquiniuucuaji. ⁵⁰ Naajuhuaj, shoniiri jiyanoehua maninia, shu moqueyaquiniuucuaji. Saniniujujia, shoni jaara shaacara quiri, ¿maatucua taa tiquiriiquiara quirioehua saajaniuhuaj? Maja na naata. Naajuhuaj, Pueyaso cumaaca nia jiitiare nioojajinria, niaa mariqui najuhuana quijia quiriiri juhua Pueyaso niishiyashijia pueya. Naajuhuaj, jiyanoojiaca nia quiri, jatiqui nia quiniuria shuquiriaatia.

10

*Jesu niishitiojosano maja pueya cartenura necocua
(Mt 19.1-12; Lc 16.18)*

¹ Na nuhuaji, Jesuuri Capernaum tiacajiniji quiaquiaari na saquiriosano pueyata. Judea jiyajinria quiojiyareeri, Jordán moo taquijiriajuhuaj, pananu muetasamaji jiyajinria. Pueyari jati nocua rerejoquiaariuhua Jesu quishaQUI. Jesuuri nojori niishitiojonu coteeree socua, taa na niishitiojquiaari tarijiacuajani. ² Jiyacaritij, noojaqueya Fariseocuacaari Jesuucua nijioquiaari na saniniujuuniuria nojori nequesotanuta, nocuara nojori saquiriojotanura juucua. Cunora, cuno pojoriiri Jesu nequesotaree:

—¿Maniniate pueyano cartenura necocua?

³ Jesuuri nojori nequesotaree saniniujujia:

—Cua sequeretoj, ¿taa Moisés sequequiaari niajaniyan?

⁴ Cuno pueyari Jesu riucuaree:

—Moisésri pa sequequiaaricuaja, pueyanoori na naata necocua cartenu. Neyaca cuaara coteenu na niquitoora na cartetaja naajionee, necocua na cartenura. Moisésruaari naa pa sequequiaaritij.

⁵ Jesuuri cuno pojori sequerree:

—Moisésri naa sequequiaari niajaniyatej, pueyaracaanu cumajiuujiaaca nia quiniuucua, nia niquieriuacua taraajeyashijiaca nia quiniuucuajuhuaj. ⁶ Saniniujujia, Moisésri naa naajiotquiaari pueyajinji:

“Pueyaso jaara puetunu casaajanaa shipiniquiaari, nojuajaari niquiriyatu caya shipiniquiaari, niquiriyatu maajinio”.

⁷ Naaratej, pueyanoori na queya tiujianutaniya necocuara na caminiuria. ⁸ Nojori jaara camitioore, nojoriiri juhua niquiriyatujuua pueyanora quiqii. Naacuajitij, nojoriiri maja juhua caapiqui pueya na quiniu tari. Saaja juhua niquiriyatujuua pueyano quiyari. ⁹ Cunora, pueyano cuaara necocua carteyaquiiria, Pueyaso rupuetootesano nojori quiniuucua.

¹⁰ Majaari Jesu saquiriojosano pueya niishitiuniu quiquiaari naa Jesu sequesano. Na nuhuaji, tiajinria nojori quishacariuhua, na saquiriosano pueyari Jesu nequesotaquiaari casaa na sequenu paniriquiaa naani. ¹¹ Jesuuri nojori sequerree:

—Cante necocua carteya tamonu maajitia na caminiuriani, cuno pueyanoori jiyanoehua sesa miya coteenu necocua. Pueyasora, naa na miishacaritij, nojuajaari juhua narta pueyano niquieriuacua quiija.

¹² Naajuhuaj, maaji jaara cartere neyaca tamonuta na caminiuria, cuno maajiiri sesa miya Pueyaso niquierajuhuaj.

*Jesu niasacari na juaashiquia naatujooriicua
(Mt 19.13-15; Lc 18.15-17)*

¹³ Na nuhuaji, Jesuucua jaatucunuusaaquiaarii naatujoori, Jesu nianura na juaashiquia nojori nacaacula. Na saquiriojosano pueyari naatujoori jaatucunaa tenujuriquiaa saaja. ¹⁴ Jesu jaara na niquieria, juaaqiiri. Nojori sequereeri:

—¡Nia tarinitiare naatujoori cuaara niiria cucua! ¡Maja na tenujunu! Canapuete Pueyaso muerasura quiniu paniyani, nojori cuaara juhua nio naatujooriria jataara. ¹⁵ Seetanujuanaa nia sequeyanijia, Pueyasoocua nia tiuuri seetanujuanaa, taa naatujoori tiuya cucuacuaani na taacanuyaquiniutia. Saaja naacuajiti niaari Pueyaso pueyara jiyatesaanutaniya cutara, pueyaracaanu Pueyaso jiitiasano nia quiniuria.

¹⁶ Jesuuri jiyacari cuno naatujoorinijoja pooree. Nojori nacaacula niojoree na juaashiquiaari Pueyaso na secojonuta, Pueyaso miiniuria maninia nojori.

*Jiyanohua casamiriaca mashaja pocoojosacari Jesuta
(Mt 19.16-30; Lc 18.18-30)*

¹⁷ Quera Jesu quianu panishacari quiniquiji, nocua netequiaarii tamonu pueyano. Jesu cariquimiaji mojoquetaseeri. Na nequesotareeri:

—Maninia niishitiojonanaa, ¿taa cua miiniutianiyani, seetanujuanaa Pueyaso pueyanora cua quiniuriani?

¹⁸ Jesuuri na sequeree:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuanaa maninia. ¹⁹ Quiaacuajaari Pueyaso niishitiojosano niishiya. Moisescuajaari naa na naajiotaquiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucuara tonujunu sapojonuta. Maja cuaracashijionu. Quia queya tojija quia quiriquia”.

²⁰ Pueyanoori Jesu riucuaree:

—Niishitiojonanaa, janiyacuajaari puetunu cuno rootasanojuanaa tojija pueyaracaanu cua naatujuajinijini.

²¹ Jesuuri na paniniutia na niquirii. Na sequereeri:

—Juhuanojuaja niquiriyatu casaari quiyajaa quia miishoo. Quia quiaarohua. Puetunu quia casamijanaa quia niquitiojocoo. Na nuhuaji, casamijiuniucua nareja quia niquitiore quia masesano cumaneeca quia casami sami. Naacuajitij, quiaari quia casami jiitianutaniya jiyocuacaanu Pueyaso shuriucua. Na nuhuaji cutara, quiocua nimiohua cua nuhuajiriquiano.

²² Cuno pueyano jaara tojiquiaari naa Jesu sequesanotej, jiyanohua taraajequeeri. Na taraajenuta quiacuhua na tiajiniaari. Nojuajaari jiyanohua casamiriaca pueyano quiquiaari. ²³ Na nuhuaji, Jesuuri na shocuaqueya niquinijoree. Na saquiriojosano pueya sequereeri:

—¡Jiyanohua jiyajeneta cutaraari casamiriaca pueyano quiniuria Pueyaso pueyanora!

²⁴ Na saquiriojosano pueyari shiriiquitiuquiaari naa na sequesacaritij. Na nuhuaji, Jesuuri nojori sequenu pacutequiaari:

—Sanajooriniaa, seetanujuanaa nia sequeyanijia. Jiyanohua jiyajenteaari casamiriaca pueyano quiniuria Pueyaso pueyanora.²⁵ Taa camello maja na naata cusupuetaja cuhuoco tamajiria tajiniucuaani, naajuhuaj, casamiriaca pueyanoori maja na naata tama na cuaqueyajaaja jiyatenu Pueyaso pueyano na quiniuria.

²⁶ Na saquiriojosano pueya jaara na tojitiaquiaari, nojoriiri socua jiyanohua jiujiateree. Naaratej, tama nojorijaarijia nequesoree-tooquiaari:

—¿Canteeri Pueyaso pueyanora jiyatesaanutaniya socuanitioj?

²⁷ Jesuuri nojori niquirii. Naa sequereeri:

—Pueyano maja na naata tamajaaja Pueyaso pueyanora quiniu. Pueyaso cutaraari na naata na jiyatenu na muerasura. Pueyasora, maja jiyajeneta casaa quiniu.

²⁸ Pedroori Jesu sequeree:

—Jiyanijianaa, canaari puetunu canaa jiitiasanojuanaa tiujquiaarini quia pueya canaa quiniuria.

²⁹⁻³⁰ Jesuuri nojori riucuaree:

—Seetanujuanaa nia sequeyanijia, shuquiriaatia quijia quiniutianiya cutaraari noo pueyano cante na jiitiasano tiujjaja cua tojijia na quiniuucuani, janiyajinji pohuatana na quiniuucuajuhuaj. Cante na tia tiujjajani, tapueyocuaca, na rimiatushua, na queya, necohua, na cuhuardiquianio, nojuajaari maninia miishaanutaniya quiarrijia mijiria na quishacarijia. Nojuajaari socua jiyanohua queraatia niq- uitiosaanutaniuhua na tiujiasanojiniji. Niquitiosaanutaniyari tiaca, tapueyocuaca, na rimiatushua, na nucua, necohua, cuhuardiquianio. Naajuhuaj, naquiya mishano quiniutaniyari cua tojijia na quiniuucua. Naajaa, na nuhuaji, pueyaracaanu Pueyasota shuquiriaatia quiniutaniyari quiarinio jiyajinria.³¹ Saniniuuja, queraatia tojishano pueyari na- juhuana quijiacu quiniutaniya Pueyasora, nojori tojijayquiniiucua no- juaja. Saniniuuja, Pueyaso ruuretajacara, queraatia Pueyaso pueyari quiarrijia juhua najuhuana quijiacu niquishano quiquiaa. Naajaa, no- joriiri na nuhuaji seetanujuanaa juhua jiyaniijianucua quiniutaniya Pueyasora, na tojitiajaca nojori quiniuucua.

*Jesu pacutesacariuhua pohuatanu nojua ja mosaanutaniya
(Mt 20.17-19; Lc 18.31-34)*

³² Jerusalén tiacajiniara nucuamaji nojori quiasacari, Jesuuri na saquiriojosano pueya puetariquiaa. Nojoriiri na nuhuaji sacuariquiaa na puerenuta. Socua pueyari na nuhuajitiuriquiaa nojori puerenutajuaj. Nuu cajiniocua, Jesuuri na doce saquiriojosano pueya jaatiaree tamocora tamajaaja. Tii nojori sequeriquiaari taa nojuaja miishaanutaniyani, nojori tiuquishacari Jerusalén tiacajinria.

³³ Nojori sequereeri:

—Niaacuajaari niishiya, paa tari Jerusalén tiacajinria quiaani, tee cuniqui Pueyaso Niyanu niquitiosaanutaniya pueyacuara secojonaa jiyaniijianucuani, Moisés Rootasanojiniji niishitiojonaanio. Cuno pojoriiri cucuara tonujunutaniya jiyaniijianucua na sapojonuta, cua mosaanura. Janiyari taucuaca niquitiosaanutaniyani. Janiyari jiyanohua naquiya miishaanutaniyani.³⁴ Nojoriiri cua rerequetenu- taniya. Cua riocojotunutaniyari. Cua piquitiuniutianijayaariuhuaj.

Naa cua miishaanu nuhuajitij, nojoriiri socua cua monutaniya. Naajaa, jiuujianaraca juucajinia, janiyari seetanujuanaa samiitianutaniuhuani.

Santiago, tarajanu Juanta, nojori sequencesacari Jesu, maninia nojori na miiniuria

(Mt 20.20-28)

³⁵ Na nuhuaji, Santiagoori, tarajanu Juanta Jesuucua catecanoquiaari. Nojoriiri Zebedeo niquiohua quiquiaari. Jesu sequetuseeri:

—Niishitiojonanaa, canaara quia miiri canaa masenu panishano quiajaniya.

³⁶ Jesuuri nojori nequesotaree:

—¿Casaa nia paniya cua miiniuria niaarani?

³⁷ Nojoriiri Jesu riucuaree:

—Pueyaso jaara quia jiylatera pueya jiyaniijiara, quiocua canaa cajitjiore quia shuriucua, tamonu quia miaquetajara, tamonu quia muenecara, quia naacunaa canaa quiniuria.

³⁸ Jesuuri nojori sequeree:

—Majaari nia niishiniu nia masesano. ¿Nia naatateeri rejeretanu naquiya miiniutaa cua miishaanutaniyacuaani? Naquiya cua miiniuuri jiyanoohua noonu quiniutaniya juhua pueyano jaara mani noshiyano-jinia tiuquinishaare.

³⁹ Nojoriiri na riucuaree:

—Taaquiriirinij, canaa naatacuaaquinateja naquiya miiniu rejeren-tanu juhua quiajaniya.

Jesuuri nojori sequeree:

—Seetanujuanaa, niaari na nuhuaji cua ratusano raturiquianojuhuaj. Niaari juhua manijinia tiuquinishaariquianojuhuaj, taa cua tiuquin-isshaanutaniyacuaani.

Jesuuri naa nojori sequeriquiaa miriqui, taa jiyanoohua naquiya na miishaanutaniyani, na cusosacari pueyacuara. Jesuuri naa nojori se-queree socuatej:

⁴⁰ —Maja cutara cua naata niquitionu niajaniya nia masesano, cua ca-jitiniuria niajaniya cua miaquetajara, cua muenecaranio. Cunoori noo pojori niquitiosaanutaniya cutara, canra tari na jeenucuasaquaar-icuajani.

⁴¹ Narta saquiriojosano pueya jaara tojiquiaari nojori masesano Jesu juucua, nojoriiri juaaquioquiaari. ⁴² Jesuuri nojori piirii. Nojori se-quereeri:

—Niaacuajaari niishiya, mijiria jiya jiyaniijiyanucuaari na pueya jiiti-aquiaajahua na seja, tama nojori panishano na miiniuriajaaja nojori-tia. Naajuhuaj, pueya jiyaniijiyanucuaari na jiitiasano pueyacua paare-taquiaajahua na cumaaca, tojishano pueya nojori quiniuria. ⁴³ Niajaniya saniniujjia, majaari naa nia quiniu quiniutaniya. Cante tojishano pueyanora quiniu paniya niajaniyajinjinioni, cuno cuaara jiyateera tama na cuaqueyajaja juhua narta Pueyaso pueya serura na quiniuria.

⁴⁴ Cante nia jiyaniijia quiniu paniyani, nojuaaja cuaara quiiria narta Pueyaso muerasu cumaquinia. ⁴⁵ Janiyajuhuaj, majaari mijiria cua niniu quiquiaari pueya cua poonijotenura quiria, tama cua cuaqueyaa cua shuquiritiniurajajaaja. Janiya cutaraari niquiaarini pueya cua naa-cutana, tama janiyajajaaja mosaanura pueya niti, queraatia pueyacuaji cua ritiana Sesaaca.

*Jesu jeecasacari Bartimeo namijia**(Mt 20.29-34; Lc 18.35-43)*

⁴⁶ Nojoriiri jiyacari tiuquijioquiaari Jericó tiacajinia. Jesuuri cuno tiacajiniji quiariquiaa na saquiriojosano pueyata. Queraatia pueyari nata quiariquiaajuhuaj. Jiyacaritij, tamonu cariyojuaru pueyanoori tii cajiriquiaa nuu shuucuara. Na sesa quiquiaari Bartimeo, Timeo niyanu. Nojuajaari cumaneeca mashiniquijona quiquiaari, cariyojuaru na quiniuucua. Nojuajaari maja na naata poonijionu quijia tamaajaaja. ⁴⁷ Nojuaja jaara tojiquiaari cuno tajiyano pueyano quiquiaari Jesu, Nazaret tiacajinjinio, nojuajaari naa nacanu coteeree:

—¡Jesunaa, Pueyaso Jiyarosanonaa, cucua quenaaja quia taraajereja!

⁴⁸ Queraatia pueyari na tenujuriquiaa na sanaajanura juucua. Saaja socua nacaree jiyanoahuari:

—¡Pueyaso Jiyarosanonaa, cucua quia taraajere!

⁴⁹ Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariyojuaruuri naa sequesaaree:

—¡Quia sanere! ¡Quia shuquiriri! ¡Quia sequeyacuaja! ¡Nocua quia canuijare!

⁵⁰ Naa na tojishacaritij, cariyojuaruuri na tucuaque toque jataquee. Ritia jaaqueeri Jesuucua na catecanonura. ⁵¹ Jesuuri na nequesotaree:

—¿Casaa quia paniya cua miiniuria quijanijani?

Cariyojuaruuri na riucuaree:

—¡Niishitijonanaa, niquijiara quiniu paniuhuanijia! ¡Cua namijia quia jeecarohua quiria!

⁵² Jesuuri na sequeree:

—Quia quiaarohua. Quia namijiaacuaja tari jeequerohua cucua quia tiuuniuucua.

Jiyacaritij, cariyojuaruuri tari na naata niquiniu quiriquiaa. Nucuaco Jesu nuhuajiyareeri.

11*Jesu tiuquishacari Jerusalén tiacajinia**(Mt 21.1-11; Lc 19.28-40; Jn 12.12-19)*

¹ Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquijiosee Olivo cuhuariquia tuhuananuucua. Cunoori Betfagé tiaca shuriucua, Betania tiaca shuriucuanio. Jesuuri caapiqui na saquiriojosano pueya jiyaroree tiji. ² Nojori sequereeri:

—Cuno tiacajinia nia quiaare, pa taccoji niquishiyani. Niaa jaara tiuquishii tii, niaari burro riuriatanutaniya morotasano, pueyano cajishoojua na nijnia. Niaa jaara niquishiinioj, niocua na samaacartasee. Niocua na jaatucumohua miji. ³ Pueya jaara naa nequesotare niajaniya: “¿Casaara nia samaacartaanoj?”, niocua na sequere: “Jiyanijia na paniya rupaquijia. Ritia na niquitionutaniuhuacuaja”.

⁴ Nojoriiri quiojoquiaari. Burro riuriatatuseeri morotasano nuujinia, tamonu tia tohuateya shuriucua. Nojoriiri na samaacartasee.

⁵ Tamasaca tii quiniaari nojori sequereei:

—¿Casaa nia miyani? ¿Casaara nia samaacartaa cuno burroni?

⁶ Nojoriiri na riucuaquiaari taa Jesu rootaquiaari nojoricuajani. Naaratej, cuno pueyari nojoriria na tarinitiaquiaari. ⁷ Na nuhuaji,

Jesuucua jaatucutumohua cuno burroori. Pueyari na toqueya niojquiaari burro nijinua, Jesu cajijiara. Na nuhuaji, Jesuuri nocua cajirii.⁸ Queraatia pueyari na toqueya muejoquiaari nucuaco, Jesuucuají nojori maniniushitiniuria nuu. Tamasacaari jaamasucua piyotaquiaari cuhuariquiacajiniji, Jesuucuají nojori niojotasocoriquiano na nucuacojuhuaj.⁹ Jesu puetanaa, mariyata na nuhuaji nijionaari jiyanoahua nacoojonu coteequiaari nojori shuquiriniutia. Naa sequeturiquiaari:

—¡Pa shuquiritiare pa Jiyaniijia Pueyaso! ¡Jiyanoahua maniniacuaja pa Jiyaniijia, cuno, Pueyaso cumaacata tiuquiyani!¹⁰ ¡Pueyaso cuaara na jiyateera maninia Jiyaniijia na quiniuria pajaniyara! ¡Nojuajaari pa supuetanaa jiyaniijia David niti pa jiitianutaniya maninia cutara! ¡Jiyocuacaanu Quijia pa Pueyasocuajaari pa shuquiritiasano!

¹¹ Jesuuri naa tiuquiquiaari Jerusalén tiacajinatej. Pueyaso Secojojua tiajinia tiuquishiiri. Na niquinijionu nuhuaji puetunu casaajanaa, Betania tiacajiniara quiaquiaari ritiaari na doce saquiriojosano pueyata. Jiyacaritij, tari tenacariiри quiriquiaa.

*Jesu sesacasacari jajauju higo naana
(Mt 21.18-19)*

¹² Tariqui, nojori quiojosacari Betania tiacajiniji, Jesuuri miajeriquiaa.¹³ Tucuacaanuji niquirii higo naanaari queraatia jaamasucuaraca. Nocua canujiyareeri na niquiniuria seetanujuanaa jajauracate quiriquiaa. Saaja queraatia jaamasucuaari quiriquiaa. Maja higo muetusacari quiquiaari jiyacari.¹⁴ Jesuuri naa sesacaree higo naana:

—Maja quiocuaji socua quia jajau miasaanu quiniutianiya.

Na saquiriojosano pueyari na tojitiariquiaa naa na sequesacaritij.

*Jesu jaacasacari seja niquitiojonaa Pueyaso Secojojua tiajiniji
(Mt 21.12-17; Lc 19.45-48; Jn 2.13-22)*

¹⁵ Nojori jaara tiuquijioquiaari Jerusalén tiacajinia, Jesuuri tiuquiquiaari Pueyaso Secojojua tiajinia. Tiji pueya tohuatanijionu coteereeri, cuno pojori, canapuete Pueyasocuara puecoosocoriquiano seja niquitiojoriquiaa cumaneecaracuajani. Na masejonaa tohuatanijiorejaariuhuaj. Cumaneeca tacatojojuaca juhuacutucua caponeetareeri, tee pueya tacatojoriquiaa taucuaca cumaneecacuajani, Pueyaso Secojojua tiajinia niquitiosocoriquiano cumaneecaracuajani. Naajuhuaj, Jesuuri mococoonu niquitiojonaa cajitiucua caponeetaree.¹⁶ Naajuhuaj, majaari na shanacunu quiquiaari pueya niyacunura najuhuana Pueyaso Secojojua tia, na nitiootasano casamitia.¹⁷ Na nuhuaji, pueya niquiara niishitiojonu coteereeri. Naa sequereeri:

—Tariucuacaanu Pueyaso Rupaajinía naa naajiotasanocuajaari quiya:

“Cua tia sesaari quiniutianiya, Pueyaso Secojojua tia. Puetunu jiyacjinijiñionujuanaa pueya secojonuujuara quiniutianiyyari”.

Niaari saniniujuja na jiyatequiaari nohuasenuujuaca quiquiora.

¹⁸ Pueyacuara secojonaa jiyaniijianucua, mariyata Moisés Rootasanojiniji niishitiojonaari niishiquiaari naa Jesu miishanojiniji. Cunora, nojoriiri roojotooquiaari taa na motunutaniya Jesuni. Saniniujuja, puetunu pueyajanaari jiujiateriquiaa Jesu niishitiojosano nojori tojishacari. Cunora, Judiocuaca jiyaniijianucuaari Jesu puereturiquiaa,

puetunu pueyajanaa tojishacari na niishitiojosano.¹⁹ Jaara niniquiaari, Jesuuri Jerusalén tiacajiniji quiacuhua na saquiriojosano pueyata.

*Higo naana sorenojiniji pohuatasano
(Mt 21.20-22)*

²⁰ Tariquiucuaji, nojori shocosacari higo naana, na niquitiuquiaariiri tariucua soreno, puetunu na nujuacatajanaa. ²¹ Pedroori jiyacari Jesu sequencesano niishiquii. Jesu sequereeri:

—Niishitiojonanaa, ¡quia niquiri! ¡Quia sesacasano higo naanaqui tari soreree!

²² Jesuuri nojori riucuaree:

—Pueyasocua nia tiuuri. ²³ Seetanujuanaa nia sequeyanijia, niaa jaara Pueyasocua tiuuriquia nia taacanuyaquiniutia, nia naata nio tuhuananu sequenu: “Shiiquia niiquiji. Quia jaataare shoniniacu caminiajinia”. Niaa jaara naa sequere seetanujuanaa Pueyasocua nia tiuuniutia, niaari nia sequencesano niquiniutianiya. Naacuajitij, Pueyasocuaji nia taacanuyaquishacari, nia sequencesanocuajaari tohuateenu-taniya taa nia sequereecuajani. ²⁴ Janiyari cunora nia sequeyanji, puetunujuanaa nia masesano nia secojosacari Pueyasoni, nia niishiri niaa na jiitiae tari. Na nuhuaji, niaari seetanujuanaa na masenutaniya. ²⁵ Nia secojosacari, niaa jaara niishiquii niaa sesa quiya tamonu pueyanta, sesa na miiniucua niajaniya, nojuaja nia jiyanoori. Naacuajitij, jiyocuacaanu Quijia nia Queeri nia jiyanooniutianiya sesa nia miishanojinijijuah. ²⁶ Niaa jaara jiyanojashijia quiriquia, jiyocuacaanu Quinia nia Queeri nia jiyanoquiniutianiya, sesa nia miishanojinijijuah.

*Pueya nequesotasacari Jesu, cante na jiyaronani
(Mt 21.23-27; Lc 20.1-8)*

²⁷ Na nuhuaji, nojoriiri quiaquiaariuhua Jerusalén tiacajiniohua. Jesu rucuanejosacari Pueyaso Secojojua tiajinia, nocua catecanoquiaariiri pueyacuara secojonaa jiyaniijianucua, Moisés Rootasanojiniji niishitijonaajuhuaj, narta Judiocuaca camarucuanio.

²⁸ Nojoriiri Jesu nequesotaree:

—¿Cante quia sequecanu naa quia miiniuriani? ¿Cante quia jiyatecanu Pueyaso Secojojua tia jiyaniijia quia quiniuriani?

²⁹ Jesuuri nojori riucuaree:

—Janiya nia nequesotanutaniya saniniunijia. Niaa jaara cua nequesotasano riucuare coteenucuaa, janiyari nia sequenutaniyajuhuaj cante cua jiyaroquiaari naa cua miiniuriani. ³⁰ Cua riucuaturetoj, ¿cante Tiuquinijiona Juan jiyaroquiaari pueya na tiuquinijionura moojiniani? ¿Narejaca pueyatee, Pueyaso soj? Cua riucuature.

³¹ Jiyacaritij, cuno pueyari jiyasohuaja tama juayonuutanu coteequiaariajaja. Naa sequetooquiaariiri:

—Paa jaara na sequereni Pueyaso na jiyaroquiaari, pa riucuarucua: “¿Casaara nocua nia tiuyaquiquianucuaraarini?” ³² ¿Paatucua taa sequereeri, nojuaja nareja pueya jiyarosano quiquiaari?

Cuno pojoriiri narta Israel pueya puereturiquiaa sequenura, Tiuquinijiona Juanri nareja pueya jiyarosano quiquiaari. Nojoricuajaari niishiriquiaa puetunu pueyajanaari niishiriquiaari Tiuquinijiona Juanri seetanujuanaa Pueyaso sequencesano caminiuijunia quiquiaari. Cunora, nojoriiri Tiuquinijiona Juan rerequetenu

pueretuquiaari, pueya quishacari tii. ³³ Naacuajitij, maja na naata na riucuatunu quishacari, Jesu sequetureeri:

—Maja canaa niishiniu.

Jesuuri nojori sequeree:

—Janiyajuhuaj, maja cua sequenu quiniutianiya niajaniya, cante cua jiyaroquiaari naa cua miiniuriani.

12

Miriqui pohuatasano sesa miijiac poonijionaajiniji

(Mt 21.33-46; Lc 20.9-19)

¹ Jiyacaritij, Jesuuri miriqui pohuatanu coteequiaari cuno pojori niquiara. Cuno camarucua sequereeeri:

—Tamonu pueyanori cuhuariquiajinia uva natooquiaari. Na nuhuaji, na shuriuquioco matacoreeri. Naajuhuaj, saajia quejaquiaariiri uva rapijiojuara, na caaca reratesaanura. Jiyaconajara tiareejaariuhuaj, tiji na cuhuariquia na cojuajara nohuasejojuaacuaji.

'Na nuhuaji, tamasaca poonijionaa pueya na niquitioreeri nojori cojuasocoriquiano nera. Naacuajitij, uva carojotasacari, nojoriiri nojuaja niquitionutaniya tijijiuhuaj, na camarujuanaa na quiniuucua. Na nuhuaji, nojuajaari tucuacaanu quiaquiaari, tii marijia na shocotejonura. ² Jaara tari quiquiaari uva carojotasacari, saniya cuhuariquia camarujuanaari na seru jiyaroquiaari cuhuariquia cojuanaa pueyacua. Na jiyaroquiaariiri cuhuariquia cojuanaa niquitionura nojori carojotasanojiniji, taa na camarujuanaa pocoojoquiaaricuaja nojoritia tarjian. ³ Cuhuariquia cojuanaa pueyari saaja jiyarosano seru quiaturee. Na piquitiuriiri. Na nuhuaji, juhuasu na jiyaroturohua na camarnuucuaari. ⁴ Na camaruuri socua jiyaroquiaari tamonu na seru. Cuno seruuri jacusaaree saitia. Na nacaari surtasaaree saajita jasano. Na sesacatureejaariuhuaj. ⁵ Na camaruuri socua jiyaroquiaari tamonu na seru. Cuno na seru cutaraari mosaaquiaari. Na nuhuaji, socua ji-yaramiquiquiaari queraatia na seyari. Puetunu nojorijinijiniojuanaani, tamasacaari piquishaquaaria. Tamasacaari puecoosaquaaria cutara.

⁶ 'Cuhuariquia camaruuri saaja niquiriyatujua niyanuniyojua jiit aquiaari, jiyanolhua na panishano. Cunora, nojuajaari socua cuno neyanuniyojua jiyaroquiaari. Na queeri tama sequequiaarijiaaja: "Cuno pueya jaara niquiri cua niyanu, nojoriiri na tojiniutianiya cutara". ⁷ Cuno cuhuariquiajinia poonijionaa niquishacari nojori camarnu niyanu nojoriicua niyanu, nojoriiri saaja tamajaaja niishitiojootoquaari:

—¡Nioori pa camarnu niyanu! Nio cuhuariquiaari tama nerajaaja quiniutianiya, na que jaara cusoyare. ¡Pa morej! ¡Pocua nio cuhuariquia camaruhuara quiqui tamajaajani!

⁸ 'Cunora, na quiatureeri. Na motureeri. Na motunu nuhuaji, nojoriiri macu jataree cuhuariquiajiniji tamama.

⁹ Jiyacaritij, Jesuuri cuno pojori nequesotaree:

—¿Taa cuhuariquia camaru miiniutianiya socuani? Nia sequereera pueyanaa. Nojuajaari cuhuariquia cojuanaa puecoonutaniya. Na nuhuaji, tamasaca pueya niquitionutaniya cuno cuhuariquiaari, nera nojori cojuanura.

¹⁰ ¿Majateeri tariucuacaanu Pueyaso Rupaajinia nia serojonu quiqianucuaja nio? Naa sequeyari:

“Tiajonaa pueyari tamatiujiajau saajia jataree nojori tiasacari saijiniji tia. Na nuhuaji, cuno jatasano saajiaari socua cutara saajia jiyatesaaro hua tamasaca saijiniji. ¹¹ Cunoori pa Jiyaniijia miishano. Pajaniyara, na miishanoori jiyanohua maninia. Nocuaji jiuujiatesano”.

¹² Jiyacaritij, cuno Judiocuaca camarucuaari niishiriicuaja miriqui Jesu pohuatasanoori tama nojorijinijiaaja quiriquiaa. Naaratej, nojoriiri Jesu quiatunu panirii juucua, nojori nujuatesocoriquiano. Nojoriiri pueya puereriquiaa saaja, naa nojori miiniuria Jesutej. Naacuajitij, nojoriiri nareja quiojoquiaariuhua. Naa Jesu pohuatasacari miriqui cuno saajajinijitij, nojuajaari tama na cuaqueyajinijiaaja pohuatariquiaa.

Jiya jiyaniijia cuaara pueyaracaanu niquitosaaria na sequesano cumaneeéca

(Mt 22.15-22; Lc 20.20-26)

¹³ Na nuhuaji, Jesuucua jiyaramiquishaquaarii noojiaqueya Fariseocuacajinjinio, Herodes panijiaca pueyajinjiniojuhuaj. Cuno pojoriiri Jesu pocuatenu paniquiaari sesa juucua, jiyaniijia nojori saquiriojotanura nocuara. ¹⁴ Naaratej, cuno pojoriiri Jesuucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojiyashijia. Quiaari seetanujuanaa sequeja. Majaari rimiajata quia niquiniu pueyajuhuaj. Majaari pueya naata sapojonu quiajaniya. Quiaari seetanujuanaa pueya jiuujia niquijia. Quiaa cutaraari seetanujuanaa Pueyaso jiniji niishitiojoua, taate pa naata maninia quiniu Pueyaso niquiarani. Naaratej, canaa quia sequere, ¿maniniate pa niquitiojonura pa cumanecacajiniji jiyaniijia Césarra, taa cuno tahue sequequiaari pajaniyacuajani? ¿Taa quia sequeyani, niquitiojoshiyatee, maja soj?

¹⁵ Jesuuri ritia niishiquii, naa nojori nequesotasacari nojuajatej, cuno pojoriiri na saniniujiuriquiaa sesa na pohuatenura najuhuanaj. Naaratej, Jesuuri nojori sequeree:

—¿Casaara nia saniniujiya janiyani? Miji nia riri cumanee cua niquishocoriquiano.

¹⁶ Nera rishaareeri cumanee. Jaara na niquiquiaari, Jesuuri nojori nequesotaree:

—¿Cana naaquitu nocuani? ¿Cana sesateeri nocua naajiotasanojanihuaj?

Nojoriiri na riucuaree:

—Jiyaniijia César naaquiucuaja, na sesajuhuaj.

¹⁷ Jesuuri jiyacari nojori sequeree:

—Jaara tama César casaajaaja quiri, tama na casaajaaja nia niquitiore na camaru. Saniniuujia, Pueyaso nia niquitiore nerano tama na casaajaaja.

Jesu jaara naa nojori riucuaquiaaritij, nojoriiri jiyanohua jiuujiatequiaari.

¿Macunucuate samiitiacconutaniuhua?

(Mt 22.23-33; Lc 20.27-40)

¹⁸ Fariseocuaca nuhuaji, noojiaqueya Saduceocuacajinijinioori Jesucua niijoquiaari. Saduceocuacaari jiyaniya macunucua maja na samitiacu quiniutianuhua. Naaratej, nojoriiri Jesu nequesotasee nojori niishiniuria taa na sequenutaniya macunucuajiniji. Na sequetuseeri:

¹⁹ —Niishitiojonanaa, supuetana Moiséscuajaari pa rootaa na naajioneejinia, pueyano jaara cusoyare mueyaju, tarajanu cuaara camiiria mashiquio, mueya na mueratenura tarajanu niti. ²⁰ Tarijia, tamonu pueyanoori niya quiquiaari. Siete niquohuaraca quiquiaarii, saa canuujuja. Jiyapueranuuri camiquiaari. Na nuhuaji, shaajequaarii muetuahuojua. ²¹ Naaratej, na nuhuajishanaari tarajanu mashiquio camiquiaari. Nojuajaari muetuahuojua cusoquiaarijiuhuaj. Naajuhuaj, jiyareta na nuhuajishanaari na camiquiaari. Nojuajaari juhua tapueyocuaca cusoquiaari mueyajujuhuaj. ²² Cuno siete canuuri naa camiyocquiaari cuno maaji. Puetunu nojorijianaari cusionuuquiaari. Majaari quenaaja niquiriyatujua mueya nojori mueratenu quiquiaari. Na nuhuaji, cuno maajiiiri cusoquiaarijiuhuaj. ²³ Naacuajitij, macunucua jaara samiitiacorohua, ¿teyano cuno siete neyacaajinijinote seetanu neyacajanaa quiniutianiyani, puetunu cuno pojorijiana jaara neyacaa quiquiaari?

²⁴ Jesuuri nojori riucuaree:

—Niaari jiyanolua jiyajeneya Pueyaso Rupaajinia naajotasano nia niishiyaquishacari, Pueyaso cumaacanio. ²⁵ Macunucua samiitiacosacariuhua, majaari canuu camiyonu quiniutianiya maaji. Naajuhuaj, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuacaanu quiqiaca Pueyaso seja, maja camiyosano. ²⁶ Niaa macunucua samiitianijionujiniji nequesoreetaate. ¿Majateeri nia serojonu quiquiaacuaja supuetana Moisés naajioneejinia, taa Pueyaso sequequiaari Moiséscuaja nequeru casaja noshiyanojinijini? Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiajuhuaj, quia supuetana Jacobo Jiyaniijianio”.

²⁷ Naacuajitij, paari niishiyaní Pueyaso pueya shaajeconoori saminiucua quiya Pueyasora cutara. Pueyasoori maja macunucua Jiyaniijia, saaja saminiucua pueya Jiyaniijia cutaraari. Janiyari cunora nia sequeyani, niaari jiyanolua jiyajeneya nia niishiyaquiniuucua Pueyaso Rupaa.

Puetunu Pueyaso Rootasanojinijijianaani, teyanote socua pa tojishocoriquianoni

(Mt 22.34-40)

²⁸ Tamonu pueyanoori Jesu tojiriquiaa Saduceocuaca riuhuaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuacaanu Pueyaso Rootasanojinijinote socua pa tojishocoriquianoni?

²⁹ Jesuuri na riucuaree:

—Pueyaso seqesano socua na pueya tojishocoriquianoori nio: “Nia tojitiare Israel pueyanaa, pa Jiyaniijia Pueyasoni, nojuacuajaari pa Jiyaniijiajanaa. Majaari tamonu quiniu socua. ³⁰ Nia Jiyaniijia

Pueyaso nia paniri puetunu nioojiatajanaa, puetunu nia sohuanutajanaa, puetunujuanaa nia niishitajata, puetunu nia cumaacatajanaanio". Nio rootasanoori socua pa tojishocoriquiano puetunu Pueyaso rootasanojinijijanaa. ³¹ Socua tarajanu na rootasano pa tojishocoriquianoori quera juhua coteenu na rootasanojuhuaj. Naa sequayari: "Quiarta pueyano quia paniri taa quia paniyacuua tama quia cuaqueyajaajani". Puetunu Pueyaso rootasanojinijijanaani, majaari socua tamonu rootasano quiniu socua tojishocoriquiano nio caapiqui na rootasanojiniji.

³² Jiyacaritij, cuno Moisés Rootasanojiniji niishitiojonaari na sequeree:

—Quiaacuaja maninia sequeree, niishitiojonanaa. Seetanujuanaari quia sequesano: quiyacuuaquinateja niquiriyatujua Pueyaso. Majaari socua tamonu quiniu juhua nojuaja. ³³ Seetanujuanaa jiyanohua maninia cutaraari Pueyaso pa paniniuria puetunu poojiatajanaa, puetunujuanaa pa niishitajata, puetunu pa sohuanutajanaa, puetunujuanaa pa cumaacatanio. Naajuhuaj, jiyanohua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojijiaca quirini, cunoori jiyanohua socua maninia Pueyasora, puetunu seja catijiasanojinijijanaa nocuara, mariyata puetunu pueya niquitiososano na casamijinijijanaa nera.

³⁴ Jesu jaara tojiquiaari naa cuno pueyano riucuasano maniniatej, na sequereeri:

—Quiaequi quera Pueyaso pueyanora quiya.

Na nuhuaji, majaari socua pueya nequesoreetanu paniniu quiriquiaa Jesu.

¿Canaacuajinio supuenote Cristoni?

(Mt 22.41-46; Lc 20.41-44)

³⁵ Jesuuri Pueyaso Secojojua tiajinia niishitioriquiaa pueya. Jiyacaritij, nojuajaari na tojitianaa pueya nequesotaree:

—¿Casaara Moisés Rootasanojiniji niishitiojonaa sequiaacuaraarinii: "Cristonaari supuetana David niquiohuacuajinio supuenutaniya"? ³⁶ Pueyaso Sohuanu pohuatesacari supuetana David, nojuacuajaari sequeriaari:

"Jiyaniijia Pueyasoori cua Jiyaniijia Cristo sequeree: 'Quia cajirijiaara cua miaquetajara, janiya cuara quia paraa shocojotare quiocuajijiaatija, Jiyaniijajanaa quia quiniuria pueyaracaanu cutara'".

³⁷ Supuetana David jiyaniijiacasacari Cristo, ¿Cristotucua taa supuetana David niquiohuacuajinio supueno quirini? Davidcuajaari na jiyaniquipa "cua Jiyaniijia".

Queraatia pueyari shanohua tojitiariquiaa Jesu pohuatasano.

Jesu sequesano Moisés Rootasano niishitiojonaajiniji

(Mt 23.1-36; Lc 11.37-54; 20.45-47)

³⁸ Jesuuri nojori na niishitiosacari sequeriquiaa:

—Tama nia cuaqueyajaaja nia cojuare Moisés Rootasano niishitiojonacuaji. Cuno pojoriiri pueru tucuaque toque cushiyonu maniniucuaja nojori rucuanejotajara, pueya shootianura nojori. Nojoriiri timiquiaa pueya saruhuatasacari nojori, nojori quishacari tiaca jiuujiajinia curotasano cajitiucuajinio. ³⁹ Nojori jaara masuusaare tamonu tiajinia queranacunura, nojoriiri ritia secooquiaa socua panishano cajitiujinio nojori

cajitiuniuria tia camaru shuriucua. Naajuhuaj, Pueyaso secojojua tiacajiniqueya pueya rerejosacari, nojoriiri camarucua cajitiucuajinia cajitiuni paniquiaa, pueya shootianura nojori. ⁴⁰ Nojoriiri mashiquiopue tiaca masequiaa secaja cumaneecata nojori na sapojonuta. Naa nojori miiniu nuhuajitij, nojoriiri Pueyaso secojoquiaa shitiarayocua pueya niquiara, maninia pueya nojori jiyanshaanura. Naaratej, Pueyaso saniitiosacari maniria miyashijiaca pueya, nojoriiri socua jiyanoahua naquiya miishaanutaniya tamasacajiniji.

*Casamijiu mashiquio niquitiosacari na cumanee juuranee Pueyasora
(Lc 21.1-4)*

⁴¹ Tamacari, Jesuuri cajiriquiaa Pueyaso Secojojua tiajinia cumaneeca niquitiojoua tacoji, tee pueya niojoriquiaa na cumaneeca Pueyasoracuajani. Jesuuri tiji pueya shootiariquiaa na cumaneeca niquitiojiyano. Queraatia casamiriaca pueyari queraatia cumaneeca niquitiojoriquiaa. ⁴² Jiyacari tiuquishijiaariuhua casamijiu mashiquio. Caapiqui cumaneeniyojua niasee cumaneeca niojojuajiniaari. Cuno cumaneeca na niasanoori maja puera cumaneeca na quiniu quiriquiaa. Saaja cobrejiniji shipinishano quiquiaariiri. ⁴³ Jesuuri jiyacari na saquiriosano pueya piirii. Nojori sequereeri:

—Seetanujuanaa nia sequeyanija, nio casamijiu mashiquio cutaraari socua queraatia niquitioree puetunu tamasacajinijijanaa.

⁴⁴ Puetunu pueyajanaari na cumaneeca cureenojiniji niquitiojoriquiaa. Saniniujia, nio maajiiri puetunujuanaa na miaquesocoriquiano na masetajarano niquitioree cutara.

13

Jesu sequencesacari Pueyaso Secojojua tia niyartasaanutaniya

(Mt 24.1-2; Lc 21.5-6)

¹ Jesu tohuareetasacari Pueyaso Secojojua tiajiniji, tamonu na saquiriosano pueyajinjinioori na sequeree:

—Niishitijonanaa, quia niquiri Pueyaso Secojojua tia, puereetu juaaca saitia tiasano. ¡jiyanoahua shanohua tia!

² Jesuuri na riucuaree:

—¿Quiaateeri cuno shanohua tia niquia, sajiniji tiasano jiyaconajani? Cuniqui, majaari saajia cureenu quiniutianiya tamonu caco maano quenaaja. Puetunu niyartasanojuanaa quiniutianiyyari.

Taa pa niishiniutianiyanijiya puequesacari quera

(Mt 24.3-28; Lc 21.7-24; 17.22-24)

³ Na nuhuaji, nojoriiri quiojochiaari olivo cuhuariquia tuhuananuccua. Cuniquiji, maja puera tucuacaanu quiquiaari Pueyaso Secojojua tia. Na taquijirija quiquiaariiri. Jesu cajishacari tii, nocua catecanoquiaariiri Pedro, Santiago, Juan, Andrésnjo. Nojoriiri na sequetuquiaari jiyasohuaja:

⁴ —Canaa quia sequere taacari Pueyaso Secojojua tia niyartasaanutaniyani. ¿Casaa Pueyaso miiniutianiyan canaa niishiniuria quia sequesano quera tohuateya?

⁵ Jesuuri nojori riucuaree:

—Tama nia cuaqueyajaaja nia cojuare tamasaca sapoziyaquiniuucuaji niajaniya. ⁶ Nia numooteyacuajanijia, queraatia sapojonuujuacaari nijionutaniya nojori sequenura niajaniya: “Janiya Cristoni”. Naa sapojotunutaniya queraatia pueyari.

⁷ 'Niaa jaara tojiniuuri miaquetojonujiniji niya, tucuacaanujuhuaj, majaari najuhuana nia shiriqquitiuniu. Seetanujuanaa naa quiniutiani-yari. Naajaa, jiyacari, majaari jiya puequesacari quiniutianiya juhuano-juaja. ⁸ Tamonu rupaa pocuajacaari miaquetojonutaniya tamaatiu-ucua rupaa pocuajacata. Pueyari tamonu jiyajiniji miaquetojonu-taniya tamonu jiyajinjinio pueyata. Naajuhuaj, rijaari jiuuquiuiju-tianutaniya queraatia tiquiyocua tiacajinia. Jiyanoqua miaajesacari-ri quiniutianiya jiyacari. Naajaa, puetunu niojuanaari saaja shusha naquiya miiniu coteesacari quiniutianiya.

⁹ Tama nia cuaqueyajaaja nia cojuare. Niaari tama nia tiacajinia jiyaniijianucuaajaaja niquitiosaanutaniya saniitiosocoriquiano. Naajuhuaj, niaari Pueyaso Secojojua tiacajinajanaa majacusaanutaniya. Niaari jiyatasaaanutaniyajuhua tiaca jiyaniijiaacula, jiya jiyaniijianu-cuaacuanio, nojori nequesoreenura niajaniya, janiyajiniji pohuatanaa nia quiniuucua. Naacuajitij, niocua janiyajiniji pohuatarae nojori niquiarajuhuaj. ¹⁰ Jiya puequeyaukishacaria, Pueyaso rupaari tari pohuatasano quiniutianiya puetunu jiyacajinajanaa. ¹¹ Cua tojiri, niaa jaara jiyatashiyare jiyaniijianucuaacula nequesoreesocoriquiano, majaari nia tacaaniu taa nia sequenutaniyani, taa nia pocuanutaniyani. Majaari quenaaja nia niishiriojonu naatej. Saaja nia sequere nojori niquiara jiyacari Pueyaso Sohuanu niishitijoosano niajaniya. Nia pocuasanoori maja niajaniyajiniji quiniutianiya, nia pocuasacari nojori niquiara. Cunocuajaari Pueyaso Sohuanu niishitishano quiniutianiya, na pocuatesacari niajaniya. ¹² Jiyacarijuuhuaj, pueyanoori sesa miiniutianiya tama tarajanujaaja, cua tojijia tarajanu quiniuucua. Tama tarajanujaarijia na niquitionutaniya mosocoriquiano. Jiyacaritij, pueyari tama necohuaajaaja miniutianiya sesa, cucua tiuujjaca necohua quiniuucua. Naajuhuaj, necohuari tama na queya tacartanutaniya monujuaaja, na queya tojiniuucua Pueyaso rupaa. ¹³ Puetunu nio jiyajinjinio pueyajanaari maja na niquinu paniniu quiniutianiya niajaniya, cua tojitiajaca nia quishacari. Naajaa, cante seetanujuanaa pueyaracaanu cucua tiuyajaani nio jiya jaara puequerejaatijia, nojuaja cutaraari sha-cantuua quijsara jatanishaanutaniya, pueyaracaanu cuata na quiniuria shuquiriaatia.

¹⁴ 'Niaa jaara cuno jiyanoqua sacuaraatia casaa niquira Pueyaso Secojojua tiajinia nujuatesano, taa supuetana Daniel sequeya na naajionejiniacuajani, niocua ritia mashiri. (Cante nio seroziyani, nojuaja cuaara niishiuria casaa na sequeyani.) Judea jiyajinria quiniae cuaara mashiriua ritia tuhuananuhuacula, cuno sacuaraatia casaa jaara nujuatesaare Pueyaso Secojojua tiajinia. ¹⁵ Canapuete jiyacari quiya na tia cacojiriani, nojori cuaara tiuquitiaaquirria tiajiniaaco na casaa na rinuria juucua. ¹⁶ Canapuete jiyacari quiya na cuhuariquiajiniani, nojori cuaara tacateyaquihuara na toqueya na poonuhuara. ¹⁷ Jiyacaritij, jiyanoqua taraatia quiniutianiyyari maajipohuara, nojori jaara manajaa-tohua quiya, jaara jiyacari jiitiare supuejaca conaaajuhuaj. ¹⁸ Nia secosacari, Pueyaso nia maseriquia juhuacaria, nia mashiyocuatusacari

cuaara quiyaquiiria shiniquia quishacari. ¹⁹ Cuno quishacari, jiyanohua naquiya miiniuuri quiniutianiya. Tariucuacaanu, majaari naa naquiya miini quiquiaari Pueyaso shipininiu nuhuaji nio jiya. Naajuhuaj, cuno naquiya miiniu nuhuaji, majaari jiyanu naquiya miiniu quiniutianiuuhua socua, juhua nio. ²⁰ Pueyaso jaara ritia tajitiyaquiri cuno naquiya miiquiosacari, pueya maara mijiria cureyaquirij. Pueyasocuajaari ritia tajitiniutianiya cuno naquiya miiniu, na saquiriojosano pueyacua na taraaajenuucua.

²¹ Jiyacaritij, tamasaca jaara nia sequere: “Nia niquiri, Cristo tari niya quiya”, jaara sequerejuhuaj: “Nooj, jati quiyatej”, majaari na tojitianunoj. ²² Jiyacaritij, queraatia sapojonuujuacaari supuenutaniya. Nojoriiri sequenutaniya: “Janiyacuaja Cristoni”. Tamasacaari sequenutaniyajuhuaj: “Janiya Pueyaso sequenu panishano caminiuijuniani”. Nojoriiri pueya niquishoo casaa miiniutianiya na cumaacata, Pueyaso saquiriojosano pueya na sapojonura juucua. Jiyacaritij, queraatia pueya cutaraari sapojosaanutaniya. ²³ Cunora pueyanaa, tama nia cuaqueyajaja nia cojuare. Janiyacuajaari tari juhuacarijia nia nmootevani. Majaari cua sequesano nia niyajetanu.

*Pueyaso Niyanu tacatenujiniji poihuatasano
(Mt 24.29-35, 42, 44; Lc 21.25-36)*

²⁴ Naa naquiya pueya miiniu nuhuajitij, pananuuri ninishiquiria quiniutianiya. Naajuhuaj, racaari maja na cuhuatanu quiniutianiya mijiria. ²⁵ Riyari totenutaniya. Jiyocuacaanu cumaacaraca quiijaacari tete-catunutaniyajuhuaj. ²⁶ Jiyacari, janiya Pueyaso Niyanuuri niquishaanutaniya jiyocuacaanuji rosezano cohuajiniani, jiyanohua shacantuca cua cumaacata. ²⁷ Jiyacaritij, janiyari cua seja jiyaramiquiniutianiyani nojori rerejotenura puetunu cua saquiriojosano pueyajanaa. Nojoriiri puetunu nio jiyajinjiniojuanaa rerejotesaanutaniya, socua jiyanohua tucuacaanu jiya cajiniocua puequeetujinjinio.

²⁸ Quiarijia cutara nia niishiri higo naanajiniji. Shuniyara, na jaamasucuaari totequiaa jarancujua na quiniuria. Na nuhuaji, na cashacucua jaara macumaaca quiri, quiarinio jaamasucuaari mueratuumohua. Niaa jaara naa niquiritij, niaari niishiquiaa tacareejonuqui quiniutianiya. ²⁹ Quiarijia saniniuujia, naatej taa nia niishiquiaa higo naanacuaani, niocua naa niishirijiuuhuaj janiya quera tiuquihuani, niaa jaara puetunu cua pohuatasanojuanaa niquiri tohuateyano. ³⁰ Seetanujuanaa nia sequeyanijia, puetunu cua pohuatasanojuanaari niquishaanutaniya nio pa quishacari quiniaa pueya cusonuyaquishacarijia. ³¹ Jiya cajiniocuaari shaajenutaniya, nio jiayuhuaj. Cua Rupaa cutaraari maja na jatanu quiniutianiya. Cua sequesanoori puetunujuanaa tohuateenutaniya.

³² Maja cutaraari nia niishiniu taacari cua tiuquinutianiuuhuani, casaa juucatej. Majaari jiyocuacaanu quiijaac Pueyaso seja niishiniujuuhuaj. Janiyajanaari maja cua niishiniu. Saaja cua que Pueyaso cutaraari tamajaaja na niishiya.

³³ Cunora, janiyari nia sequeya cutarani, maja juhua maquenuujuaca nia quiniu. Pueyaracaanu nia niquitiare cucuaji, juhua sutejaca. Tamajaaja nia soquere. Saaja pueyaracaanu nia secororiquia Pueyaso. Majacuajaari nia niishiniu taacari cua tiuquinutianiuuhuani. ³⁴ Cunoori

quiniutianiya juhua tamonu pueyano quianu panishacari tamonu jiyanjiniara tucuacaanu. Na quianura, nojuajaari na seja seerataaree maninia nojori cojuanura na tia. Tamasaca niquitoyaree na poonijosanoori, nojori poonijosocoriquiano. Tamoru sequereeri, tohuateyaji na cojuanura pueyaracaanu, nojuaja cuaara tiuquiuhuarajaatija.³⁵ Naaratej, nia sutere. Maja maquenuujunu. Majaari nia niishinieuuaja taacari tia camaru tiuquiniutianiuuhuani, shusha ninishacari, shiyaqueya, caacaraja niunijiosacari, taricuicuaji soj. ¿Taacari cua tiuquiniutianiuuhuani? Johuaj, maja pa niishiniu.³⁶ Cunora, juhua sutejaca nia quiriquia, janiya mariqui nia jiyajenetesuhuari, canashiyaquejui cua tiuquishacariuhua niaacua.³⁷ Cua sequenceso niajaniyani, cunoori puetunu pueyarajanaa: “¡Nia sutereja! ¡Maja maquenu!”

14

*Judiocuaca camarucua roojotoosacari nojori quianura Jesu
(Mt 26.1-5; Lc 22.1-2; Jn 11.45-53)*

¹ Jiyacari, juhuanojuja querajaa juuca quiriquiaajaari Pascua juucara queranacunura. Pascua juucajuhuaj, poreetajaaju shipinishano pan miaquenu coteesaquaari siete juucara. Pueyacuara secojonaa jiyaniijianucuaari jiyacari Moisés Rootasanojiniji niishitiojonaata roojotooriquiaa Jesuucuara. Nojoriiri roojotooriquiaa taa nojori sapojonuta nojori quiatunutaniya Jesu jiyasohuajani, na motusocoriquiano.

² Nojoriiri naa sequetooriquiaa:

—Maja queranacusacari naa pa miiniutij, paa mariqui puetunu pueyajanaa juuatirri.

*Tamonu maaji totasacari na shanohua jaanutaja Jesuucua
(Mt 26.6-13; Jn 12.1-8)*

³ Jesuuri Betania tiacajinia quiriquiaa Simón tiajinia na saquirijosano pueyatata. Cuno Simónri tarijia lepra cusotaja quiriquiaari. Jesu cajishacari tii miaquejajinia, tamonu maajiiri tiuquiquiaari. Shitianiyuja shucuariquiaja pataconiyuja cacatariquiaari, shanohua cohuaaja saajiajiniji quejasano. Mishaja quiriquiaari shanohua jaanutajata, nardo jaamasucuajiniji shipinishano. Jiyanojuha queraatia cumaneecata masesano quiriquiaari. Jiyacaritij, cuno maajiiri na shucuariquiaja pataconiyojua cocuataree, na totanura Jesu nacaacua.

⁴ Tamasaca tii quinia pueyari juaarii naa cuno shanohua jaanutaja niitiasanuucua. Tama nojorijiaarijia sequetooriquiaa:

—¿Casaara cuno shanohua jaanutaja niitiasaree najuhuanani?⁵ ¡Cuno jaanutaja maara niquitiosaacanu queraatia cumaneecara, casamijijiuniucua niquitiosocoriquiano!

Nojoriiri juhuacatecara cuno maaji juaarii.

⁶ Jesuuri nojori sequeree saaja:

—¡Nia tarinitiare! ¿Casaara nia rimiaaqueya nio maajiicuarani? Naa na miishano janiyani, cunoori jiyanojuha maninia quiria.

⁷ Casamijijiuniucua pueyacuajaari pueyaracaanu quiriquiano niaata. Nia naatacuajaari maninia miiniu nojori nia panishacari. Janiya saniniujuja, maja cutaraari cua quiniu quiniutianiya pueyaracaanu niaata. ⁸ Nio maajiiri maninia miirii. Majaari na naata miiniu quiriquiaa socua maninia nio na miishanojiniji. Na totasacari cucua na shanohua jaanutajani, nojuajaari juhuacarijia cua

cuaqueya jeenucuua, raaco cua niasaanura janiya jaara mosaareni.⁹ Seetanujuanaa nia sequeyanijia, puetunu jiycajinajanaa tee Pueyaso rupaa pohuatasaanutaniyani, nio maaji miishanoori pueyaracaanu pohuatasaanutaniyajuhuaj. Naa na miishano janiyatej, majaari na niyajetasaanu quiniutianiya.

Judas tacartasacari Jesu, na quiatenura

(Mt 26.14-16; Lc 22.3-6)

¹⁰ Jiyacaritij, Judas Iscarioteeri quiaquiaari pueyacuara secojonaa jiyaniijianucuata roojotoonura taa nojori na quiatenutaniya Jesuni. Nojuajaari Jesu saquiriojosano pueyajinijinio quiquiaarijuhuaj. ¹¹ Jiyaniijianucua jaara tojiquiaari, Judas nojori quiatenu paniya Jesu, nojoriiri jiyanohua shuquiririi. Nojoriiri Judas sequeree:

—Canaa quia niquitionutaniya cumaneecani, canaa quia quiatenu sami Jesu.

Cunora, Judasri niishiriojonu coteequiaari taacari nojori na quiatenutaniya Jesuni.

Jesu miaquesacari na nuhuajiria na pueyata

(Mt 26.17-29; Lc 22.7-23; Jn 13.21-30; 1 Co 11.23-26)

¹² Puetunu marijiarajanaa, Judiocuacaari Jerusalén tiacajinia rerejquiaari poreetesoo pan nojori miaquenuunura siete juuca. Coteenu juuca sesaari quiquiaari “Pascua”. Cuno juuca puecoosaaquiaari-iri Pascuara riuriotaca borregohua, Pueyaso niquiara miaquenuusocoriquiano. Naaratej, Pascua juuca quishacari, Jesu saquiriojosano pueyari Jesu nequesotaree:

—Jiyaniijiana, ¿tee quia paniya canaa majeetenura quiocuaji borre-goni, pa miaquesocoriquiano quiarijia Pascuarani?

¹³ Jiyacaritij, Jesuuri caapiqui na saquiriojosano pueyajinijinio sequeree:

—Nia quiaare Jerusalén tiacajinia. Niaari tii riuriatanutaniya tamonu pueyano, na mohuaca pataano na patacojinia. Niaa jaara na riuriatasee, niocua na nuhuajimia. ¹⁴ Jaara tiuquishii tiajinia, niocua cuno tia camaru sequencesee: “Niishitiojona naa quia sequeya: ‘¿Tee cuniqui cua miaquenutaniya cua saquiriojosano pueyata quiarijia Pascua ni-ucuani?’” ¹⁵ Jiyacaritij, nojuajaari nia niquitiniutianiya puereetuca sohuaca, jiyocuacaanu nataco, tariucua maninia jeenucuasano. Niocua cuniqui borrego majeetesee, niocua pa miaquesocoriquiano.

¹⁶ Na saquiriojosano pueyari quojoquiaari. Tiacajinia tiuquijioseeri. Nojori tiuquijiosacari, nojoriiri puetunujuanaa riuriatasee taa Jesu sequeree nojoricuajani. Nojoriiri tii majeetesee borrego, Pascuara miaquesocoriquiano.

¹⁷ Jaara niniquiaari, Jesuuri tiuquijiosee na saquiriojosano doce pueyata. ¹⁸ Nojori miaquenuusacari, Jesuuri nojori sequeree:

—Seetanujuanaa nia sequeyanijia, tamonu niajanijajinijinio niya cuata miaqueyani, nojuajaari cua tacartanutaniya na quiatenura janiya, naquiya cua miishaanura.

¹⁹ Jesu sequencesacari naatej, nojoriiri jiyanohua taraajequee. Jiyacaritij, tama nojorijaarijia na nequesoreetanu coteeree:

—¿Janiya jiyoteeri quia quiatenutaniyani Jiyaniijiana?

Puetunu nojorijianaari naa na nequesotaree.

²⁰ Jesuuri nojori riucuaree:

—Niquiriyatujua doce niajaniyajinijinociua, nojuacuaajaari nio, shusha pan shiya miaconjajiniani, nojuajaari cua quiatenutaniya.
21 Janiyacuaajaari maninia tohuateenutaniya puetunujuanaani, taa tar-iucuacaanu Pueyaso Rupaajinia janiyajiniji naajiotasaaquiaaricuajani. Saniniujia, jiyanoqua taraatia quiniutianiyari cuno pueyanora, cantucuaja cua quiatenutaniya mosocoriquianoni. Maara socua maninia quiquiaari cuno pueyanora, nojuaja jaara raaquishaquiaari.

22 Nojori miaquenusacari, Jesuuri pan ririi. Na Que Pueyaso secojoree nocuaraari. Na neecasenu nuhuaji, nojori niquitiojoreeri. Na niquitiosacari, naa miriqui sequequiaariiri:

—Jajaa. Nia miaquere. Nioori cua cuaqueya.

23 Na nuhuaji, Jesuuri ratujua pataree. Na Que Pueyaso secojoreeri nojori ratusocoriquianoocuara. Na secojonu nuhuaji, na saquiriojosano pueya niquitiojoreeri nojori ratunura tiji. Puetunu nojorijianaari ratujua-jiniji raturee. **24** Nojori sequeree miriquiiri:

—Nioori cua nanaca. Cua nanacaari queraatia pueyacuara shoonutaniya. Naacuajitij, Pueyasoori seetanujuanaa jiyanooniutaniya pueya, saaja nojori tiuuniucua cucua, taa Pueyaso sequequiaaricuajani.
25 Seetanujuanaa nia sequeyanijia, maja socua cua ratunu quiniutiani-uhua uva caacajiniji, janiya cuaara tacatemohuajaatijia pueyaracaanu Jiyaniijiajanaa cua quiniuria. Jiyacaritij, janiyari shusha niaata na ratunutaniuhuani.

*Jesu sequesacari Pedro, nojuaja nocuaji seetanutaniya
 (Mt 26.30-35; Lc 22.31-34; Jn 13.36-38)*

26 Pueyasora na jaaquequenuunu nuhuaji, nojoriiri quiojoquiaari olivo cuhuariquia tuhuananuucua. **27** Na quiojosacari, Jesuuri nojori sequeree:

—Nio niucuajani, puetunu niajaniyajanaari cucua tiuuniu tarini-tianutaniya. Naa naajiotasano quiyacuaajaari niajaniyajiniji tariucua-anu Pueyaso Rupaajinia. Naa sequeyari:

“Janiyari borrego Cojuana monutaniyani. Na borregohuari na camaru nuhuaji niyaquejonutaniya tamajaaja”.

28 Na nuhuaji, janiya jaara samiitiarohua macujinijini, janiyari nia puetanutaniya Galilea jiyajiniani.

29 Pedroori jiyacari Jesu sequeree:

—Niya cuata quiniaa naasucua quiocuaji carajenutaniya. ijaniya cu-tara maja cua catenu quiniutaniya quiocuaji!

30 Jesuuri saaja na sequeree:

—Pedronaa, janiya seetanujuanaa quia sequeyani, nio niucuajani, quiaari janiyajiniji naa seetanutaniya pueya niquiara: “¡Maja cua ni-ishiniu Jesu!” Quiaari naa pacutejonutaniya sequenutej, caacaraja caminiuijyaquishacarijia niunijionu.

31 Pedroori saaja na pataariquiaa naa Jesu sequesacari nojuajatej. Socua sequerohuari:

—ijaniya cuaara mosaaria quiataqui, naajaa, majaari cua seetanu quiniutaniya quiocuaji!

Narta saquiriojosano pueyari naa sequetureejuhuaj.

*Taraatia Jesu secojosacari Getsemani cuhuariquiajinia
 (Mt 26.36-46; Lc 22.39-46)*

³² Nojoriiri jiyacari tiuquijioquiaari tamonu cuhuariquiajinia. Cuno cuhuariquia sesa quiquiaari Getsemaní. Jesuuri na saquiriojosano pueya sequeree:

—Niyaja nia cajitiuri, cua secojosacari cua Que socua nia taccoji.

³³ Nojuajaari saaja nocua rupojiyaree jiuujianaraca na pueya: Pedro, Santiago, Juannio. Jesuuri juhuacatecara shiriquiriquiaa. Tacaariquiaajaariuhuaj. ³⁴ Nojori sequereei:

—¡Coojajinia taraajeya jiyanohuanijia, quera cusoyanijia! Niyaja nia jijojetare. ¡Nioca niquitiareja! ¡Majaari maquenu!

³⁵ Jesuuri socua shiitianijoja quiaaree nojori taccoji. Na secojonura Pueyaso, mojoquetaseeri. Jiyocuara jacamaquiaarii. Pueyaso masereeri, maja naquiya na miishaanura juucua. ³⁶ Na secojosacari, nojuajaari naa sequequiaaritij:

—Cua Quenaa, quiara maja jiyajeneta quia panishano quia miiniuria. Naaratej, janiya quia secojiani, nio raatonuque cucuaji quia tajitiri. Naajaa, cuaara quiyaquiiria juhua cua panishano. Saaja cuaara quiiria cutara taa quia paniyacuajani.

“Nio raatonuque” na seqesacari, Jesuuri miriqui sequeriquiaa naquiya na miishocoriquiano.

³⁷ Na secojonu nuhuaji, na saquiriojosano pueyacua tacateyarohuari. Nojori riuriatasuhua maquetiuyanoori. Jesuuri Pedro sequeree:

—Simónnaa, ¿quiaate maqueya? ¿Majateeri quenaaja quia naata rejeretanu rupaquijia quia maquenu? ³⁸ Nia sutere. Maja maquenu. Pueyaso nia secojore niaa mariqui sesa miitishaareeri. Seetanujuanaa, poojiaari maninia miiniu panijia. Pa cuaqueyari saniniuujia sasaca quiyacujua. Majaari pa naata maninia miiniu pa panishano tamajaaja. Cunora, Pueyaso nia secojore na cumaquinuria niajaniya maninia nia miiniuria.

³⁹ Jesuuri quiaquiaariuhua socua secojonuhuara. Na secojosacari, socua sequenu pacutequiaariiri juhua coteenu na seqesano. ⁴⁰ Na nuhuaji, socua tacatequiaariuhua na saquiriojosano pueyacuaari. Nojori riuriatasuhuariuhua maquetiuyano. Nojori namijiaari saaja seecutayariquiaa na maquenuujunuta. Jiyacaritij, nojoriiri maja na niishiniu quiriquiaa taa na riucuatunutaniyanoj. ⁴¹ Jesuuri socua quiaquiaariuhua na Que secojonura. Na tacatesacariuhua secojonujiniji, nojori seqesuhuari:

—¿Niaate maquetiuyajaa? ¿Niaate samaateyajaa? ¡Tariucuajal! ¡Quiarijia cutara janiyari sesa miijiaca pueya quiatesaanutaniyani, nojori miiniuria janiya taa nojori panitiuyacuajani! ⁴² Nia saneecuature. Pa quiaare. Cua quiateriquiano tarí cumaji.

Na paraa quiasacari Jesu (Mt 26.47-56; Lc 22.47-53; Jn 18.2-11)

⁴³ Jesuuri pocuariquiaajaa Judas tiuquishacari nojoriicua. Cuno Judasri, Jesu saquiriojosano doce pueyajinijinio quiquiaarijuhuaj. Queraatia pueyari Judasta nijioquiaari. Cuno pueyari nijiniquetucuaja mueruu pooriquiaa, macacanio. Cuno pojoriiri pueyacuara secojonaa jiyanijianucua jiyaramiquishano pueya quiquiaari, Moisés Rootasanojiniji niishitijonaa jiyanijianucua jiyaramiquishanojuhuaj,

Judiocuaca camarucua jiyaramiquishanonio. ⁴⁴ Judas, Jesu quia-teriquianoni, nojuajaari juhuacaricia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacarini, cunocuajaari nojuaja. Niocua na quiassee. ¡Niaari maninía morojosano jaatucutaaro-huaquinio!

⁴⁵ Naacuajitij, Judas jaara tiuquiquiaari Jesuucua, nocua catecanoquiaariiri. Na sequereeri:

—¡Niishitiojonanaa!

Jiyacari na nujuureeri. ⁴⁶ Judasta nijionaa pueyari jiyacari Jesu quiassee. Morojosanoori jaatucutashiyarohua.

⁴⁷ Cuniqui Jesuta quiniaa pueyajinijnioni, niquiriyatu nojorijin-jinioori na shuucuaji shitiaquiaari nijiniaquetucuaja mueruu. Nata jaateree pueyacuara secojonaa jiyaniijia seru numocoori. ⁴⁸ Jesuuri nocua nijionaa pueya sequeree:

—¿Casaara cucua nia nijioree nijiniaquetucuaja muerutani, macacatanio, morojosano nia riniuria janiya juhua nohuasejojuani? ⁴⁹ Janiyacuajaari puetunu juucajanaa nia tajinia quiquiaani, Pueyaso Secojoua tajinia cua niishitiosacari pueya niquiara. Majaari tii cua quishacari nia quianu quiquianu janiya. Naajaa, naa nia miiriuki, tariucuacaanu janiyajiniji Pueyaso Rupaajinlia naajotasano tohuateenura.

⁵⁰ Jiyacaritij, puetunu Jesu saquiriosano pueyajanaari na shuriucuaji mashiyocuatuquiaari. Tamajaaja Jesu tiuijatuqueeri. ⁵¹ Saaja tamonu mashajaari Jesu nuhuaji sacuariquiaa cutara. Cuno mashaja sesaari Marco. Nojuajaari saaja puereetue lino toquerauta cuhua-jaatiariquiaa. Jesu quiatunaa niquishacari nojuaja, na quiatureejaari-uhuaj. ⁵² Nojuajaari saaja na toque tiujiaguee nojori juaashiquajinlia. Juhuasuuri ritia netequee. Mashimiaari. Janiyacuajaari cuno pueyano quiquiarini, nio naajionajuhuaj.

Judiocuaca camarucua nequesoreesacari Jesu

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesu quiatunaari Jesu jaatucuquiaari pueyacuara secojonaa jiyaniijia tajinia. Puetunu nio pojorijianaari tii rerejoquiaari: pueyacuara secojonaa jiyaniijianucua, Judiocuaca camarucuajuhuaj, Moisés Rootasanojiniji niishitiojonaanio. ⁵⁴ Pedroori Jesu nuhuajiquiaari tu-cuacaanuji. Jateeseeri pueyacuara secojonaa jiyaniijia tia carijin-acuma. Cuno jiyaniijiajanaa seja tajinia cajishiiri. Mani jitiuriquiaa nojoritia cuniqiiri.

⁵⁵ Pueyacuara secojonaa jiyaniijianucua, puetunu Judiocuaca camarucuajanaari niishiriojonuuriquiaa nojori saquiriojotanura Jesuucuara. Jesuucuara tonujuriquianoori pajesaaquiaari juucua, na motenura. Saaja shaaqui quiquiaariiri sesa casaa, nocuara tonujuso-coriquiano. ⁵⁶ Queraatia pueyari nocuara tonujuriquiaa juucua, nojori sapojonuta. Nojori saquiriojotanura saaja rimiajata quiriquiaa puetunujuanaa. ⁵⁷ Na nuhuaji, tamasacaari sanetaquiaari nocuara nojori tonujunura na sapojonutajuhuaj. Nojoriiri naa sequetuquiaaritij:

⁵⁸ —Canaa na tojiquianu sesa sequeyanoni. Naa sequecanuuri: “Janiya nio Pueyaso Secojoua tia niyartanutaniyani, pueya tiasanoni.

Juuujianaraca juucajinia, janiyari tamajaaja na tianu tucuanutanani-uhuani. Cunoori maja pueyata tiasano na quiniu quiniutianiya".

⁵⁹ Nojori saquiriojotasanoori saaja rimiajata quiquiaari jiyaniijianu-cua niquiara.

⁶⁰ Jiyacaritij, pueyacuara secojonaa jiyaniijiaari nujuaree pocuanura. Jesu nequesotareeri:

—¿Majate quenaaja quia riucuanuuju? ¡Quia tojiri, pueyaruhua quiocuara tonuji!

⁶¹ Jesuuri saaja sanaa nujuariquiaa. Majaari na riucuanu quiriquiaa quenaaja. Pueyacuara secojonaa jiyaniijiaari socua na nequesotaquiaariuhua:

—¿Quiaate Cristo, jiyocuacaanuji Pueyaso Jiyarosano?

⁶² Jesuuri na riucuaree:

—Jaa, nojuacuajanija. Niaari cua niquinutianiya jiyocuacaanu cumaaca Jiiiana miaquetajara cajiyano. Na nuhuaji, niaari cua niquinutianiya tacatehuano cohuajajinia jiyocuacaanuji.

⁶³ Pueyacuara secojonaa jiyaniijia jaara tojiquiaari naa Jesu sequesan-otej, tama na toquejaaja sutaree na juanutiaria. Sequereeri:

—¿Casaara pa sashiya tamasaca saquiriojotanura saa nocuarajaara-niuahuaj? ⁶⁴ Niaacuaja shusha tojirii Pueyasoocuara na sequesano sacuaraatia. ¿Najaniyarijatay, taa nia niishiriojyani?

Puetunu pueyajanaari sequequiaari:

—¡Cuaara mosaaria!

⁶⁵ Jiyacaritij, tamasacaari Jesu riocojonu coteequiaari. Na jiquioco morotureejaariuhua maja na niquinuria. Na nuhuaji, pueyari na piquiniu coteequiaari. Na pinu nuhuaji, na nequesotaturiquiohuari:

—Quia niishiritioj, ¿cante quia piriini?

Secojoua tia cojuanaa pueyari na jiquioco piquitiurijiuhuaj.

Pedro seetasacari Jesuiniji

(Mt 26.69-75; Lc 22.56-62; Jn 18.15-18, 25-29)

⁶⁶ Pedroori jiyaniijia tia carijiniacuma quiriquiaa. Jiyacaritij, tamonu niyacoori rucuanejoriquiaa carijiniacuma. Nojuajaari pueyacuara se-cojonaa jiyaniijia seru quiquiaari. ⁶⁷ Pedro niquishii cajiyanoori, mani jitiuyano. Tacuriitia na shootariquiaari. Na nuhuaji na sequereeri:

—Jaj, quiaacuajaruhua Jesuta rucuanejojuajuhuaj, cuno Nazaret tia-cajinijinio pueyanotani.

⁶⁸ Pedroori na seetaree. Na sequereeri:

—¡Cuno pueyano maja cua niishishano! ¡Majaari quenaaja cua ni-ishinu casaa quia sequeyani!

Pedroori canujiyaree. Mataca tohuateyaji nujuaseeri. Caacarajaari jiyacari niunijioree. ⁶⁹ Cuno niyacoo jaara Pedro niquiquiaariuhua socua, juhuacatecara nata quiniaar sequereeri:

—¡No pueyanoori cuno Jesu pueyajinjiniojuhuaj!

⁷⁰ Pedroori socua na seetaquiaari. Pasaja na tarishishacari, cuniqui nata quiniaari Pedro sequeree socua:

—Seetanujuanaa, quiaari cuno pueyajinjinio. Quiaacuajaari Galilea jiyajinjinio pueyano. Canaa tojishacari quiajaniya, quia pocuanuuri juhua nojori pocuanujua.

⁷¹ Pedroori socua jiyanoqua sapojonu coteequiaari. Naa sequereeri:

—¡Pueyaso cuaara saniitioora janiyaqui, janiya jaara sapojiyani! ¡Sestanujuanaa, maja cua niishiniu cuno pueyano, canajiniji nia nequesoreetaacuajani!

⁷² Jiyacaritij, caacarajaari niunijionu pacuterohuacuhuaj. Pedroori jiyacari niishiquii naa Jesu sequencesano nojuajatej: “Juhuanajuaja caacaraja niunijionu pacutejiyaquishacarijia juhuaquenu panishacari, quiaari janiyajiniji tari seetanu pacutejonutaniya”. Pedro jaara niishiquii naa Jesu sequencesano nojuajatej, jiyanohua nujuquequeeri.

15

Jesuucuara pueya saquiriojotasacari Pilato

(Mt 27.1-2, 11-14; Lc 23.1-5; Jn 18.28-38)

¹ Tariquiicuaji, pueyacuara secojonaa jiyaniijianucuaari rerejoquiaari Judiocuaca camarucuata, Moisés Rootasanojiniji niishitiojonaatajuhuaj, Sanedrín maanutanio. Nojoriiri moronucua Jesu jaatucutaquiaari Pilatoocua. Cuno Pilatocuajaari Judea jiya jiyaniijia quiquiaari. ² Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaree:

—Jaa. Naacuaaquinatejaj, taa quia sequereecuajani.

³ Pueyacuara secojonaa jiyaniijianucuaari Jesuucuara tonujuriquiaa queraatia sesa casaa. ⁴ Pilatoori Jesu nequesotarohuacuhuaj:

—¿Majateeri quenaaja quia riucuanuujua? Quia tojiri taa cuno pojori saquiriojotaa quiocuarani.

⁵ Jesuuri maja na riucuanu quiriquiaa quenaaja. Cunora, Pilatoori jiyanohua jiuujiatequiaari.

Na paraa sequencesacari Jesu cuaara mosaaria

(Mt 27.15-31; Lc 23.13-25; Jn 18.38-19.16)

⁶ Puetunu marijarajanaa, Pascuara queranacunu juuca, Pilatoori nujuatesano pueyano tohuataniniu jiitiquiaari nujuatejojuajiniji, cana pueya paniquiaari na cartesaanuracuajani. ⁷ Jiyacaritij, tamonu pueyanoori nujuatejojuajinija nujuariquiaa. Na sesa quiquiaari Barrabás. Nojuajaari tamasaca pueyata pueyano moquiaari. Cunoori quiquiaari nojori juaashacari, Romano taucuaca jiyaniijia jiitianuucua Judiocuaca. ⁸ Pilato nequesoresesacari Jesu, jiyacaritij, queraatia pueyari Pilatoocua nijoquiaari naa nojori secojonura nojuaja:

—Pueyano quia carteroehua nujuatejojuajiniji, taa quia miiquiaacuaja puetunu marijarajanaani.

⁹ Pilatoori nojori riucuaree:

—¿Cana nia paniya cua cartenurani? ¿Niaate niarta Judiocuaca jiyaniijia paniya cua cartenura?

¹⁰ Nojuajaari tama niishiquiaariajiaaja, pueyacuara secojonaa jiyaniijianucuaari Jesu niquinii paniquaquiquiaari pueya shocotenuucua nojori saniniuujia Jesuucuara. ¹¹ Pilato nequesotatasacari nojori, pueyacuara secojonaa jiyaniijianucuaari jiyacari pueya shiniuijuquiaari nojori sequenura Pilato, nojuaja cuaara carteera Barrabás. ¹² Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequencesano niarta Judiocuaca jiyaniijiani?

¹³ Nojoriiri naa nacaree jiyanohua:

—¡Cuaara mosaaria niyacutesanojinia teetesano!

¹⁴ Pilatoori nojori riucuaree:

—¿Casaarateni? ¿Casaa na miiquianu sesajaaran?

Nojoriiri saaja jiyanolhua nacaree:

—¡Niyacutesanojinia quia teetere!

¹⁵ Pilatoori socua tariniquiaari. Nojuajaari maninia quiniu paniquiaari Judiocuacata. Cunora, Barrabás cartereeri. Saniniujia, Jesu majacuteree cutaraari. Na nuhuaji, na soldadohua na niquitioreeri, niyacutesanojinia na teetesaanura.

¹⁶ Jiyacaritij, soldadohuari Jesu jaatucuquiaari jiyaniijia Pilato tiajini-aaco. Nojoriiri puetunu narta soldadohuajanaa rerejoteree Jesu shocua.

¹⁷ Soldadohuari Jesu cushimaquiaari shaaruque toque, juhua jiyaniijia-janaa cushishano. Juhuacontucua maatusano cushimaareejaariuhua na nacaquera. ¹⁸ Na nuhuaji, nojoriiri na rupaa paaretanu coteequiaari Jesu na macaatiniuria:

—¡Jejejee, Judiocuaca camarnuna nooj!

¹⁹ Nojoriiri na naca piquirii naajuata. Na riocojotureejaariuhuaj. Nocuara mojoquetacoreeri juhua jiyaniijiajanaa cariquimiaji, nojori sapojonuta na macaatiniuria nojuaja. ²⁰ Naa na rerequetesaanu nuhuajitij, toque naatuqueeri nocuaji jocuasaquaiaari. Tama na toquejaaja cushimaaroahuari. Na nuhuaji, soldadohuari na tohuataniquiaari. Na jiyatatuquiaariiri niyacutesanojinia na teetesaanura.

Jesu teetesacari niyacutesanojinia

(Mt 27.32-44; Lc 23.26-43; Jn 19.17-27)

²¹ Soldadohua jiyatasacari Jesu, tamonu pueyanoori jiyacari tacateriquiohua na cuhuariquiajiniji. Cuno pueyano sesa quiquiaari Simón. Soldadohuari Jesu teetejarano niyacutesano patanirii nojuaja. Nojuacuajaari Alejandro que, Rufo quenio.

²² Jesuuri shiitianiyojua tuhuananuucua jiyatasaaquaiaari. Cuno tuhuananu sesa quiquiaari Gólgota. Nioori pueyano rupaajinia sequeya, “Pueyano nacaco”. ²³ Soldadohuari Jesu raatequiaari vino juucua, mirrata cojitishano. Saaja na ratuyaquiriiri. ²⁴ Jiyacaritij, nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijoquiaari, nojori niishiniuria cantucua Jesu toque poore nerani. Naacuajitij, nojoriiri Jesu toqueya seraatiaquiaari tama nojoririaajaaja.

²⁵ Jiyacaritij, niyacutesanojinia na teetesacari, shusha pananu tacasacacariiri quiquiaari. ²⁶ Naajioneeri na nacaacuma rupotasano quiquiaarijuhuaj. Tii sequequiaariiri casaara na mosaareeni. Naa naajiosano quiquiaari cuno rupotasanojinia: “Nioori Judiocuaca jiyaniijia”. ²⁷ Jiyacaritij, caapiqui nohuasenujuacaari Jesu shuriucua teetejosaaquaiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. ²⁸ Naa tohuateequiaariiri taa tariucuacaanu Pueyaso Rupaajinia na naajiotasaaquaiaaricuajani. Naa sequeyari:

“Na sesaari sesa miijiaca pueya sesacata cojiritiasaaquaiaari naajiotasaanujuhuaj”.

²⁹ Pueya tajishacari nucuaco Jesu shuriuquioco, nojoriiri na macaatiquiaari. Na maanuquenuta naa na sequetuquiaariiri:

—¡Jaj! ¿Majateeri quiajaniya cumAACaracacuaja? ¿Quiaateeri jiyaniquiriaa, quiaa jaara Pueyaso Secojojua tia niyartare, quia naata

na tianu tucuanuhua jiuujianaraca juucajinia? ³⁰ Quiaa jaara naa cumaacaraca quirijit, niyacutesanojiniji quia roserecuarajaj.

³¹ Pueyacuara secojonaa jiyaniijianucua, Moisés Rootasanojiniji nishitiojonaari na macaatiquiaarijuhuaj. Tama nojorijiaarijia naa se quetooquiaari:

—¿Maatucua saa tamasaca naatanijioriquiajaari? Tama nojuaja cuitaraari maja na naata niyacutesanojiniji rosenu. ³² Jaara seetanujuanaa quiri Pueyaso Jiyarosano, pa jiyaniija na quiniuria, cuaara roseera niyacutesanojiniji pa niquiara. Pocua jiyacari nocua tiuuri cutarani.

Cuno nohuasenuujuaca Jesu shuriucua teetejosano quiriquiaani, nojoriiiri na sesacariquiaajuhuaj.

Jesu cusosacari

(Mt 27.45-56; Lc 23.44-49; Jn 19.28-30)

³³ Panacari, jiyari ninishiquiria quiquiaari puetunujuanaa. Tarishiquiaariiiri. Shusha tenacariishacari cuhuatemohuari. ³⁴ Jiyacaritij, Jesuuri jiyanoehua na rupaa paaretaquiaari:

—Eloi, Eloi, ¿lama sabactani?

Nioori sequeya: “Cua Pueyasonaa, cua Pueyasonaa, ¿casaara quia carteree janiyani?”

³⁵ Na shuriucua nujuatunaa tojitasacari naa Jesu paaretasacari na rupaatej, nojoriiiri sequeturee:

—¡Nia tojiri, supuetana Elías jiiquoonuyano, nocua na niniuria!

³⁶ Tamonu pueyanoori ritia netequiaari namasu casaa na shiniuria jereeca vinojinia. Na nuhuaji, na morotaree naajuaacuaari, na shitisocoriquiano Jesu rupaama. Na raatereeri. Na nuhuaji, nojuajaari sequequiaari:

—¡Pa shanacure! ¡Supuetana Elías jiyooteeri nocua niniutianiya na roshininiuria niyacutesanojiniji!

³⁷ Jiyacaritij, Jesuuri jiyanoehua na rupaa paaretarohuacuhuaj. Cuso queeri. ³⁸ Jiyacaritij, Pueyaso Secojonua tiajiniacuma, shiquiquia toquejiniji sohuacaari sutequee tamajaaja, jiyocuacaanuji jiyocuara. Cunoori pueya pueresano quiqio mishiquiotaja quiquiaari, pueya mariqui cusoqueeri Pueyasocua nojori tiuquishacari juucua, jiyanooshoojua nojori quishacari. ³⁹ Cuno Romano soldadohua jiyaniijaari Jesu tacoji nujuariquiaa. Na niquishacari taa Jesu nacaquiaarini, naajuhuaj, taa Jesu cusoquiaari na rupaa na paaretanutani, jiyacariti nojuajaari naa sequeree:

—¡Nio pueyanoqui seetanujuanaa Pueyaso niyanu!

⁴⁰ Maajipohuari tii quiriquiaajuhuaj. Tucuacaanuji Jesu shootiaturiquiaari. María Magdalenaari nojoritia quiriquiaajuhuaj, socua narta maajipohuanio. Cuno maajipohuani, nojoriiiri quiquiaari Salomé, Maríario, cante Santiago, José nucua quiquiaaricuajani. Nio Santagoni, nojuajaari socua naatujua na sesaanucua Santiagojiniji. ⁴¹ Puetunu nio maajipohuajanaari Jesu nuhuajiniae quiquiaari. Nojoriiiri nera puer aquenunaa quiquiaari, Galilea jiyajinia na quishacari. Socua queraatia maajipohuari tii quiriquiaajuhuaj, canapuete Jerusalén tiacajiniara nijioquiaari Jesutacuajani.

Jesu quete niasacari raaco

(Mt 27.57-61; Lc 23.50-56; Jn 19.38-42)

⁴² Jesu cusonu juucani, cuno juuca sesa quiquiaari “Jeenucuanu juuca”, maja samaatenu juuca poonijionura. Saniniujujia, tariqui quiquiaarii samaatenu juuca. Cunora, pueyari juhuacarija jeenucuaquiaari puetunujuanaa. ⁴³ Cuno juucajani, jeenucuanu juuca ninishacari quera, tamonu pueyanoori Pilatoocua quiaquiaari. Nojuajaari José, Arimatea tiacajinijinio pueyano. Cuno Joseeri tojishano pueyano quiquiaari narta Sanedrín pueyara. Joseeri mijiria Pueyaso Jiyarosocoriquiano niquiniiucua jiaatiaja quiquiaarijuhuaj, canaa Jiyaniijajanaa na quiniuria. Nojuajaari maja na puerenu quiquiaari Pilatoocua na tiuquiniuria, Jesu quete na masenura. ⁴⁴ Pilatoori jiyanohua jiuuijatequiaari na tojishacari Jesu tari cusoquee. Pilatoori soldadohua jiyaniijia sequeree nocua na niniuria. Nocua na tiuquishacari, na nequesotareeri:

—¿Taacari Jesu cusoqueeni?

⁴⁵ Soldadohua jiyaniijia jaara na riucuaquiaari taacari na cusoqueeni, Pilatoori jiyamitia José sequeree Jesu quete na panura. ⁴⁶ Joseeri jiyacari shanohua quenaaruque toque masequiaari tama na cumaneecatajaa. Na nuhuaji, macu roshiniriiri niyacutesanojiniji. Cuno toquejinia na jiuuniocoreeri. Na nuhuaji, na niaquiaari raacoori. Cuno raari jiuutiasano quiquiaari saajiajinia. Joseeri raa tioree jiyanohua puereetuca quejasano saajiajita. ⁴⁷ María Magdalena, José nucua Maríano, nojoriiri na niquitariquiaa tee na niasaareeni.

16

Jesu samiitiasacariuhua

(Mt 28.1-10; Lc 24.1-12; Jn 20.1-10)

¹ Samaatenu juuca jaara shocoquiaari, María Magdalena, Santiago nucua Maríajuhuaj, Salomeenio, nojoriiri shanohua jaanutaja masequiaari macuucua na tuujutasocoriquiano. ² Jiyanohua tariquiicuji Domingo juuca, shusha pananu muetasacari, nojoriiri raajinia quiojocquiaari.

³ Nucuaco na quiojosacari, tama nojorijiaarijia sequetooriquiaa:

—¿Canteeri pocuaji shuuquitiniutianiya tamocora raa tiootiuni?

⁴ Nojori jaara niquipuquiaari raa, saajia niquitiuriiri tariucua tamocora shuuquitishano. Puereetuca saajiaari quiquiaari raa tiootiu.

⁵ Nojoriiri raaco tiuquitiamaa. Mashaja niquitiushiiri tii cajiyano nojori miaquetajara, cohujia tucuaque toque cajitiaano. Nojoriiri jiyanohua shiriiquitiuquiaari na niquitiushacari nojuaja. Cuno mashajaari Pueyaso seru quiriquiaa. ⁶ Maajipohua sequereeri:

—¡Maja nia shiriiquiniu! Janiyari niishiyacuajani, niaari Jesu pajeya, Nazaret tiacajinijinio pueyano, niyacutesanojinia teetesaarucuaani. ¡Nojuacuaja tari samiitiarohua! Maja niya na quiniu. Nia niquishuriiria na maja, tee na niasaarucuaacuajani, shaaqui. ⁷ Na saquiriosano pueya nia sequesuhua, Pedrojaajanio: “Nojuajaari nia puetanutaniya Galilea jiyajiniara. Niaari tii na niquiniiutianiya, taa na seuecanu niajaniyacuajani”.

⁸ Maajipohuari netecuatuquiaariuhua raajiniji. Nojoriiri teteca-turiquiaa na shiriiquiniutia. Majaari quenaajia tamasaca pueya na sequetunu quiquiaari na puerenuta.

Jesu muetasacari María Magdalenaacua

(Jn 20.11-18)

⁹ Jesu samiitianu nuhuaji, cuno Domingo juucaya, shusha semaana coteenu juucani, Jesuuri coteenujuanaa muetaquiaari María Magdalenaacua. Jesucuajaari tarijia siete samaruhua tohuatanijioquiaari cuno Marájiniji. ¹⁰ María Magdalena niquinii nuhuaji Jesu, nojuajaari quiaquiaari Jesu cojiniaa na numootenura. Cuno pojoriiri jiyacari taraajecoriquiaa. Nujuqueturiquiaari Jesu mosaanuucua. ¹¹ María Magdalenaari nojori sequesee:

—Pueyanaa, ¡Jesu tari samiitiarohua! ¡Janiya na niquiriini!
Nojoriiri María sequesano cuaracashitirii saaja.

*Jesu muetasacari caapiqui na saquiriojosano pueyacua
(Lc 24.13-35)*

¹² Na nuhuaji, Jesuuri socua caapiqui na pueyacua muetaquiaari nojori quiojosacari tamocora. Nojuajaari tamaatia niquishano quiriquiaa nojoriria. ¹³ Nojori niishishacari nojuacuaja Jesu quiquiaari, nojoriiri ritia riuiuuquiaariuhua tamasaca nojorijnijinio nojori numootenuhuara. Naajuhuaj, Jesu saquiriojosano pueyari nojori pohuatasano cuaracashitirijihuaj.

*Jesu rootasacari na jiyaramiquishocoriquiano pueya
(Mt 28.16-20; Lc 24.36-49; Jn 20.19-23)*

¹⁴ Tamacari, Jesuuri na once saquiriojosano pueyacua muetaquiaari. Nojoriiri miaquejajinia cajitiuriquiaa jiyacari. Jesuuri jiyacari nojori juaarii cumajiuujiaca nojori quiniuucuaja. Majaari quenaaja nojori tiuuniu quiquiaari nojorijnijinio pueyacua, nojori sequesacari: “Canaa Jesu niquiriini, samiitiarohuacuaaqui”. ¹⁵ Na nuhuaji, Jesuuri nojori sequeree:

—Nia quiaare puetunu jiyacajinajanaa, janiyajiniji Pueyaso rupaa nia pohuatanura, puetunu nia pohuatasanoocua tiuujjaca pueyapuejanaa jiyanooshaaanura. ¹⁶ Cante moojinia tiuquinishiya Pueyaso rupaacua na tiuuniuucuani, Pueyasoori na jiyatenutaniya na pueyanora. Saniniujia, cante Pueyaso rupaacua tiuyaquiyani, nojuajaari sanitiosano quiniutianiya. ¹⁷ Cucua tiuujjacaari nocuaji pueya jiuujiate-sano casaa miiniutianiya cua cumaacata, pueya niishiniuria Pueyaso rupaaqui seetanu rupaajanaa. Naacuajiti, cucua tiuuniaa pueya nia quiniuucua, niaari samaruhua tohuatanijionutaniya cua cumaacata, nia jiyaniquishacari cua sesa. Niaari nia niishiyaquishoo rupaaca pocuajaca quiniutaniyajuhuaj. ¹⁸ Naajuhuaj, niaa jaara soconu sajishaaare, niaa jaara casaa raatesaarejuhuaj nia cusojuasaanura juucua, majaari nia cusonu quiniutianiya. Naajuhuaj, cusosuhuacua nia niasacari nia juaashiquia, cusosuhuari naataconutaniuhua.

*Jesu tacasacariuhua jiyocuacaanu na Queecua
(Lc 24.50-53)*

¹⁹ Na pocuanu nuhuaji, Jiyaniijia Jesuuri tacanishaquiaariuhua jiyocuacaanu. Nojuajaari Pueyaso miaquetajara cajiquiaariuhua. ²⁰ Na nuhuaji, na saquiriojosano pueyari quiojochiaari Pueyaso rupaa nojori pohuatanura puetunu jiyacajinajanaa. Jiyaniijia Jesuuri pueyaracaanu nojori cumaquiriquiaa. Pueya niquitirijiaariuhua na cumaacata na pueya miijosano, pueya niishiniuria maatia, Jesu jiyaramiquishano pueya pohuatasanoori seetanu rupaajanaa.

LUCAS NAAJIOTASANO JESUCRISTOJINIJI

Niya pohuatashiyari casaara Lucas naajioquiaari nioni

¹ Queraatia pueyari suraatia naajionu saniniujuquiaari puetunu canaa tajinia miishanojuanaa. ² Nojoriiri naajioquiaari taa Jesu jiyaramiquishano pueya pohuataquiaari Jesujiniji pajaniyani. Cuno pojoriiri Jesu niquiniaa quiquiaari, shusha poonijionu na coteesacari. Nojoriiri na nuhuaji na rupaa pohuatanaara jiyatesaaquiaari. ³ Janiyari niishiriojoriquiaani, maniniaruhua quiocuara cua naajionurajuhuaj cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniji. ⁴ Naacuajitij, quiocuara naajiyaniija na coteenujiniji, seetanujuanaa quia niishiniuria puetunujuanaa, taa quia niishitijoosaacanucuajani.

Pueyaso seru pohuatasacari Tiuquinijona Juan rasaanutaniya

⁵ Herodes jaara jiyaniija quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niquiohuacuajinio supueno quiquiaari. Necocua sesa quiquiaari Isabel. Cuno maajiri supuetana Aarón niquiohuacuajinio supueno quiquiaari. Nojori supuetanaari mariyata tariucuacaanu pueyacuara secojonaa quiquiaari. ⁶ Zacaríasri necocua Isabelta maninia miijiaca quiquiaari Pueyaso niquiara. Nojoriiri puetunu Pueyaso rootasanojuanaa tojitiajaca quiquiaari, taa Pueyasojiniji caminiujuuniaa naajionuutaquiaaricuajani. Nojoriicuara maja na naata sesa casaa tonujusaanu quiquiaari, saaja maninia miijiaca nojori quishacari. ⁷ Nojoriiri maja na muetunu quijia, niyajaru Isabel quiniuucua. Naajuhuaj, nojoriiri maja tari na naata muetunu quiquiaari, saaquiapue nojori quishacari.

⁸ Tamacari, Zacaríasri narta pueyacuara secojonaata poonijoriquiaa Pueyaso Secojoua tiajinia Pueyaso niquiara Jerusalén tiacajinia. Jiyacari saniniujuja nojori poonijiosacariiri quiquiaari. ⁹ Shanohua jaanutajaari catijiasaaquiaari puetunu juucajanaa Pueyaso Shuriucua Quiquiojinia, Secojoua tiajinia. Pueyacuara secojo naari jiitiquiaari saajia naajiosano jacutanura juhua tacuarishijiosacari, nojori niishiniuria teyanu nojorijinijiniote Pueyaso Shuriucua Quiquio tiuquinutianiyani, shanohua jaanutaja na catijanura tii. Cuno juuca saniniujuja, saajiaari Zacaríascuara tacatequiaari. Naacuajitij Zacaríasri seeratasaaquiaari tii na tiuquinuria shanohua jaanutaja na catijanura. ¹⁰ Na catijiasacari, puetunu pueyajanaari Pueyaso secojonuuriquiaa Secojoua tia carijiniacuma. ¹¹ Jiyacaritij, Pueyaso seruuri Zacaríascu muetaquiaari. Nujuariquiaari shanohua jaanutaja catijiasaqui miaque-tajara. ¹² Zacaríasri shiriñquirii na niquishacari Pueyaso seru. Jiyahua na puerereeri. ¹³ Pueyaso seruuri na sequeree:

—Maja puerenu Zacaríasnaa. Pueyasocuajaari quia secojosano tojiquiaari. Quia niquiocua Isabelri quiara muetunutaniya. Quiocua na sesojore “Juan”. ¹⁴ Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuquiritianutaniya na rasacari. ¹⁵ Quia niyanuuri cutara pueyano quiniutianiya Pueyaso niquiara. Nojuajaari vino ratuyashijia quiniutianiya, najatunacunio.

Pueyaso Sohuanuraca pueyano quiniutianiyari na rasaacarijiyojua. ¹⁶ Nojuajaari queraatia Israel pueya tacatonutaniuhua nojori Jiyaniijia Pueyasoocta. ¹⁷ Nio Juanri pa Jiyaniijia puetana quiniutianiya. Nojuajaari pueyara Pueyaso sequencesano caminiuijunia supuetana Elías sohuanu jiitianutaniya, na cumaacanio. Naacuajitij, pueya jiuujia taraajonutaniya, nojori jiyanooniuria necohua. Naajuhuaj, nojuajaari tojitiaashijiaca pueya rootanutaniya maninia, Pueyaso tojitiajaca nojori quiniuria. Naacuajitij, pueya jiuujiacaari jeenucuasano quiniutianiya pa Jiyaniijiaacuaji.

¹⁸ Zacaríasri Pueyaso seru nequesotaree:

—¿Taa cua niishiniutianiyarini quia sequencesano seetanujuanaa tohuateenutaniya quiria? Janiyari tari saaqianoni. Cua niquiocuaari motajajuhuaj.

¹⁹ Pueyaso seruuri na riucuaree:

—Janiyacuajaari Gabrielni, Pueyaso tacoji nujuana, na sequencesano cua miiniuria. Nojuajaari cua jiyaroree cua pohuatanura quiajaniya nio maninia casaa Pueyasojiniji. ²⁰ Quiarijia saniniuuja, cua sequencesanoocua quia tiuyaquiniuucua, quiaari tiquia quiniutianiya. Majaari quia pocuanu quiniutianiya cuaara rasaarejaatija quia niyanu. Naajaa, puetunu cua sequencesanojuanaari naa quiniutianiya taa Pueyaso paniyacuajani.

²¹ Jiyacaritij, pueyari Pueyaso quiquo carijiniacuma sashiriquiaa, Zacarías cuaara tohuatohuara. Nojoriiri shiriiquitiurii pueyaracaanu Zacarías tarishishacari Pueyaso Shuriucua Quiquojinia. ²² Zacaríasri socua tohuatamohua. Majaari na naata pocuanu quiriquiaa. Nareja shishiniojoriquiaari. Naacuajitij, pueyari niishirii Pueyasoqui casaa niquitirii Zacarías, Pueyaso Shuriucua Quiquojinia na quishacari.

²³ Zacarías jaara puecaquiaari puetunu na poonijionu juucajanaa taa na sequencesaaquiaaricuajani, na tiajinia quiaarohuari. ²⁴ Na nuhuaji, necocua Isabelri manajeree. Na manaja jamaatiaquiaarii. Majaari na muetanu quiquiaari na tiajiniji cuaara na shocojoquiaariajiaatija cinco raca. Nojuajaari tama sequequiaariciaaja: ²⁵ “Quiarijiani, cua Jiyaniijiaari maninia miirii janiya. Majaari socua pueya rerequetenu quiniutianiya janiya, muetujua cua quishacari tari”.

Pueyaso seru sequencesacari Jesu rasaanutaniya

²⁶ Seis raca jaara shocojoquiaari Isabel manajesacaricuua, Pueyasoori na seru Gabriel jiyaroree Nazaret tiacajinia, Galilea jiyajinia. ²⁷ Tamonu niyacoocua na jiyaroreeri, cante tari sequencesaaquiaaricuajani José jiyaniishano pueyanota na caminiuria. Na camiriquianoori supuetana jiyaniijia David niquiohuacuajinio supueno pueyano quiquiaari. Niyacoo sesa quiquiaari María. ²⁸ Pueyaso seruuri nocua tiuquimiaa. Na sequereeri:

—Janiyari quiocua jiyarosaareeni, Pueyaso shuquiritasano niyacoonaa. Jiyaniijia Pueyasoori quiata quiya, socua shuquiriaatia quia quiniuria tamasaca maajipohuajiniji.

²⁹ Mariari jiyanoehua tacaaquiaari naa Pueyaso seru sequencesacari nojuaja. Nojuajaari tamajaaja niishiriojoriquiaa: “¿Casaara naa na sequeree janiyani?” ³⁰ Na nuhuaji, Pueyaso seruuri na sequeree:

—Maríanaa, maja puerenu. Pueyasoori quia shuquiritiniutianiya. Quiaacuajaari na timitiasano. ³¹ Quiarijiani, quiaari manajentaniya. Quiaari cayaniyojua ranutaniya. Quiocua na sesojore “Jesu”. ³² Nojuajaari cutara pueyano quiniutianiya. Sesojosaanutaniyari “Pueyaso Niyanu”, jiyocuacaanu Quijia Niyanu. Pa Jiyaniijia Pueyasoori na jiyatenutaniya Jiyaniijiarajanaa na quiniuria na supuetana David niti. ³³ Israel pueya jiyaniijia quiniutianiyari. Pueyaracaanu jiitiantaniya na pueyari. Majaari na shaajenu quiniutianiya Jiyaniijia na quishacari.

³⁴ Maríari Pueyaso seru nequesotaree:

—¿Taa cua manajenutaniyari, niyacaaju cua quishacari?

³⁵ Pueyaso seruuri na sequeree:

—Pueyaso Sohuanuuri quiocua niniutianiya. Na cumaaca naaquiri quiocua pacunutaniya. Naacuajitij, quia niyanuranoni, cunoori Pueyaso Niyanu quiniutianiya. Nojuajaari seetanujuanaa Pueyaso tojija quiniutianiya. ³⁶ Naajuhuaj, quia supuetanajinjinio motaja Isabelri neyanu ranutaniyajuhuaj. Cuno maajiiri seqesaaquiaari “niyajaru maajitia”. Naajaa, seis racaari tarí na shocojiya na manajesacari. ³⁷ Pueyasora, majaari jiyajeneta casaa quiniu. Nojuajaari cumaacaraca na miiniuria puetunu na panishanojuanaa.

³⁸ Maríari sequeree:

—Maniniacuajaqui. Janiyacuajaari cua Jiyaniijia Pueyaso seruni. Pueyaso cuaara miiria janiya taa quia sequereecuajani.

Na nuhuaji, Pueyaso seruuri quiacuhua.

Maria quiasacari Isabel niquiniuucua

³⁹ Maríari jiyacari quiaquiaari na secoonuta Judea jiyajinia, Zacarías tiajiniara tamonu tiacajinia. Cuno jiyari tuhuananuhuaraca. ⁴⁰ Zacarías tiajinia María tiuquishacari, Isabel sequereeri. ⁴¹ Isabel tojishacari María seqesano nojuaja, ¡conajaari na jiniacuma nujuanequee! Pueyaso Sohuanuuri Isabelcua tiuquiquíi na cumaaca na jiitianura. ⁴² Naacuajitij, Isabelri jiyacari na rupaa paaretaree. Naa María sequereeri:

—¡Pueyasocuajaari socua maninia miiriucuaa quiajaniya tamasaca maajipohuajiniji! ¡Maninia miiniutaniya quia niyanujaariuhuaj! ⁴³ ¡Janiyateeri pueya tojishano maajini, cua Jiyaniijia nucua tiuquiniuria cua tiajinia, na niquiniuria janiya? ¡Maja! Naajaa, ¡jiyanohua timiyanjija! ⁴⁴ Shusha cua tojishacari quiajaniya cua seqeyano, cua mueyari cua jiniacuma nujuanequee na shuquiriniutia. ⁴⁵ Shuquiriaatia quia quiri, quia tiuuniuucua Pueyaso seqesanoocua quiajaniya.

⁴⁶ Maríari sequeree:

—¡Coojia jiyanoehua shuquiritaa cua Jiyaniijia Pueyaso! ⁴⁷ ¡Cua sohuanuuri cua Jiyanoonia Pueyaso timitiaani! ⁴⁸ Juhua na juhuana quijianijia. Naajaa, Pueyasoori cua jiyanoorii. Cua saquiriojorucuaari na tojija cua quishacari. Quiarijiani, pueyari pueyaracaanu cua sequenutaniya: “Pueyaso shuquiritiasano María”. ⁴⁹ ¡Pueyasoori jiyanoehua maninia miirii janiya! Nojuajaari puetunu cumaacaracajanaa. Nojuajaari tojetaarucuajanaa maninia quijia. ⁵⁰ Nojuajaari pueyaracaanu jiyanoquoiaa na tojitiana, canapuete na rerequeteyaquijiacacuajani. ⁵¹ ¡Nojuajaari

jiyanohua maninia miiquiaa na cumaacata! Nojuajaari niishi-jaca pueya shocotequiaari, canapuete tama na cuaqueyajaja jiyatequiaari juhua niishijiacaracuajani. ⁵² Nojuajaari cutara jiyaniijianucua jataree, cuno pojori jiyanishano niishiyashijiaca pueya jiyatesaanura jiyaniijiara nojori niti saniniuuja. ⁵³ Miaajeejunucua tootijoreeri maninia sumatuuta. Puera casamiriaca pueya taanuuquaarii, casaaju nojori quiojonura. ⁵⁴ Na pueya Israel naacureeri. Majaari na niyajetanu quiquiaari nojoriicua na taraajenu. ⁵⁵ Naa miiquiaarii taa na sequequiaari pa supuetanaacuajani. Pueyasoori naa pa supuetana Abraham sequequiaari: “Seetanujuanaa quiocua taraajenutaniyania, quiocuajinio supueriquiano pueyacuanio”.

⁵⁶ Na nuhuaji, Maríari queraatia tarishiquiaari Isabel tajinia. Jiuujianaraca raca nuhuaji, Maríari tacatequiaariuhua na tajiniohua.

Tiuquinijiona Juan rasacari

⁵⁷ Na nuhuaji, Isabel rasacari quiquiaari. Jiyapueratereeri. ⁵⁸ Na shuriucua quinia, mariyata na jiyasoocuajinio supueno pueyahuaj, nojoriiri jiyanojua shuquiriquiaari nojori tojishacari taa Pueyaso jiyanojua taraajequiaari Isabelcuani, na shuquiritiniuria neyanuta. Nojoriiri Isabelta shuquiriquiaarijuhuaj. ⁵⁹ Nojoriiri Zacarías tajinia rerejoquiaari conaaja jiitiasacari ocho juuca, na cararaatiuquia comiatesaanura, taa Moisés rootaquiaaricuajani. Nojoriiri na sesojonu paniriquia juucua Zacarías, na que sesaanucua na quiniuria. ⁶⁰ Na nucuaari saaja sequeree:

—¡Maja! Sesojosaaanutaniyano “Juan”.

⁶¹ Pueyari saaja sequeree:

—¿Casaarateni? ¡Majaari quenaaja tamonu quia pueyajinijinio cuno sesaraca na quiniu quiquiaari! ¿Casaara naa quia sesojonu paniyarini?

⁶² Cunora, pueyari na que Zacarías shishinioree na nequesotanura taa na sesojonu paniriquia neyanuni. ⁶³ Zacaríasri naajiooju casaa maseree na naajionura tii neyanu sesarano. Naajioreeri: “Na sesa, Juan”. ¡Pueyari jiuujiatequee! ⁶⁴ Jiyacaritij, Zacarías nitiiri sasaquitacuhua. Juhuacatecara pocuarohuari. Pueyaso miishano pohuateree pueya niquiaraari, na shuquiritiasacari Pueyaso. ⁶⁵ Cunora, na tia shuriucua quinia pueyari jiuujiateree. Puetunu niojuanaari caminiujiushaaquiaari puetunujuanaa cuno Judea tuhuananuhuacua quiijaca pueyara. ⁶⁶ Puetunu nio tojitiana pueyajanaari niishiriojonuuquiaari. Tama nojorijariajia nequesoreetooquiaari:

—¿Casaaquitija cuno mueya quiniutaniya na nuhuajitijia?

Pueyari niishiquiaari Pueyasoori seetanujuanaa cuno mueyata quiriquia, na cumaquinuria.

Zacarías sequenceso na shuquiritiasacari Pueyaso

⁶⁷ Na que Zacarías jiuujiaari jiyanojua mishaja quiriquia Pueyaso Sohuanuta. Pueyaso Sohuanuuri na pohuateree. Naaratej, Zacaríasri naa sequequiaari:

⁶⁸—¡Jiyanojua maninia pa Jiyaniijia Pueyaso, pa supuetana Israel Jiyaniijia! ¡Cuaara jiyanojua shuquiritiasaaria mijiria na miniuucua na pueyacua, pocuaji na tacunura! ⁶⁹ Pocua jiyaroree cumaacaraca pocuaji Tacuriquianoori. Pa Jiyaniijiaranoori Pueyaso seru David

niquiohuacuajinio rasaanutaniya, taa Pueyaso sequequiaari tar-iucuacaanucuajani. ⁷⁰⁻⁷¹ Tariucuacaanu na sequenu panis-hano caminiijiuniaacuajaari naa pohuataquiaari pa supuetanaa niquiaratej, taa pa paraa na ritianutaniya pocuajini, pa niquiniu paniyaquijia pueyanio. ⁷² Nojuajaari sequequiaarijiuhuaj, ma-jaari na niyajetanu quiniutaniya na seqesano pa supuetanaa, pocua na taraajenura. ⁷³⁻⁷⁴ Pueyasoori pa supuetana Abraham sequequiaari seetanujuanaa, nojuajanaari pocuaji ritianutaniya pa paraa, pa puereyaquiniutia nera pa poonijionura shitimia. ⁷⁵ Nojuajaari Abraham sequequiaarijiuhuaj maninia quijara pa jataniniutaniyaquiniaari, saaja nera pa quiniuria pueyaracaanu. ⁷⁶ Quiajaniya saniniujia, quiyanuniyojuanaa, quiaari seso-josaanutaniya Jiyocuacaanu Quinia sequenu panishano camini-ijiunia. ¡Quiaari pa Jiyaniijiaranujuanaa puetanutaniya, juhua na nuu jeenucuariquiano! ⁷⁷ Quiocua Pueyaso saquiriojosano pueya niishitiojore, nojoriiri na naata jiyanooshano quiniu sesa nojori miishanojiniji Pueyaso pueya nojori quiniuria. ⁷⁸ ¡Pa Pueyasoori jiyanoqua jiyanojjia! Pocua taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua. ⁷⁹ Maninia pa cuhuatanutaniyari, maninia pa rucuanejonura Pueyaso niquiara, panaatia poojia-cata. Naacuajitij, majaari socua pa cajitiuniu quiniutaniya taraa-tia ninishiqui, juhua pa jamaca shuriucua.

⁸⁰ Conajaari maashiquiaari. Nojuajaari tama na cuaqueyajaaja cumaquiquiaari socua seetanujuanaa Pueyasoori tiuujia na quiniuria. Nojuajaari pueyaracaanu cariquia jiyajinia quijia quiquiaari nojuaja jaara Pueyaso sequenu panishano caminiijiuniu coteequiaarijiaatija narta Israel pueya niquiara.

2

Jesu rasacari (Mt 1.18-25)

¹ Tiuquinijiona Juan rasaanu nuhuaji, jiyaca jiyaniijiajanaa César Augusto Rómulo Roma tiacajiniji sequequiaari puetunu na jiitiasano pueya-puejanaa cuaara serojosaaria puetunu nojori jiyacajinajanaa. ² Pueya jaara coteenujuanaa serojosaaquiaari, Cirenio jiyaniishano pueyanoori jiyacari Siria jiyajinia jiyaniiji quiquiaari. Nojuajaari jiyaniijiara César Augusto jiyatesano quiquiaari. ³ Puetunu pueyajanaari seque-saaquiaari nojori cuaara quiojohuara na raja tiacajinia, na sesaca naajiotasaanura tii.

⁴ Joseeri jiyacari Nazaret tiacajinia quiriquiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaacuajicuana. Naaratej, Joseeri Belén tiacajinia quiaquiaariuhua. ⁵ Mariari tari seqesaaquiaari nojuaja Joseeta caminiutaniya. Naaratej, Mariari nata quiaquiaarijiuhua Belén tiacajinia, nojori sesaca naajiotasaanura tii. José niquiocuaroori tariucua manajaraca quiriquiaa. ⁶ Belén tiacajinia nojori quishacari, jiyacari tari quiquiaari María ranu juuca. ⁷ Tii jiyapueratereeri. Conaja jiu-niocoquiaari toqueraacuacajiniaari. Na nucuaari na niaquiaari juyaca

miaquejajinia. Maríari naa raquiaari cuniqui maja quiquo quishacari nojoriria rucoonaa tiuquijia tiajinia.

Pueyaso seja muetasacari borrego cojuanaa pueyacula

⁸ Belén tiaca shuriucua cuno niucuaja, borregohua cojuanaari su-teriquiaa cuhuariquiajinia, na seja nojori cojuasacari. ⁹ Canashiyaqueiji Pueyaso seruuri nojoriicua muetaquiaari. Jiyaniijia Pueyaso shacan-tuuca cumacaacari nojori cuhuataquiaari. ¡Nojoriiri jiyanoohua shiriiqui-tiurii! ¹⁰ Pueyaso seruuri nojori sequeree:

—¡Maja nia puerenu! Niaacua nimiaanijia, jiyanoohua maninia casaa cua pohuatanura niajaniya. Cunora, puetunu pueyajanaari shuquiriniutianiya. ¹¹ ¡Niaacuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristo-tuhuaj. ¹² Niaa jaara nocua quiaare, niaari conaaja riuriatanutaniya to-queraacuacajinia jiuniocosano, juyaca miaquejajinia maano. Naacuajitij, niaari niishiniutianiya, seetanujuanaari cua pohuatasano niajaniya.

¹³ Jiyacaritij, narta Pueyaso seyari na cojishii. Jiyanoohua queraatia quiriquiaari. Nojoriiri naa maniniuhuaqueetariquiaa Pueyaso:

¹⁴ —¡Jiyanoohua maninia pa Pueyaso, jiyocuacaanu Quijia! ¡Nojuajaari jiyanoohua pa shuquiritiasano, na jiyaronuucua jiyacua quiniae Jiyanoonia! Naacuajitij, cana Pueyaso shuquiritiaani, nojoriiri jiyanoootioonutaniya narta pueyata.

¹⁵ Pueyaso seja jaara tacataquiaariuhua jiyocuacaanu na quiqiojin-ihua, borregohua cojuanaari tama sequetooquiaariajiaaja:

—¡Belén tiacajinia pa quiaarequij! ¡Pa niquishii cuno, casaajiniji pa Jiyaniijia numooteree pajaniyacuajani!

¹⁶ Nojoriiri ritia quojoquiaari. Conaaja riuriatatuseri, María, Joséño. Conaajaari juyaca miaquejajinia niasano mariquiaa. ¹⁷ Nojori niqusshacari conaaja, nojoriiri ritia tii quiniae pueya caminiujurii conaaajiniji Pueyaso seru pohuatasano nojori. ¹⁸ Puetunu pueyajanaa, cante nojori pohuatasano tojiriquiaani, nojoriiri jiuujiateree. ¹⁹ Majaari María niyajetanu quiquiaari puetunu nojori pohuatasanojuanaa. Noo-jajinia na niishiriojoriquiaa pueyaracaanuuri. ²⁰ Borregohua coju-naari quojoquiaariuhua. Nojoriiri Pueyaso maniniuhuaqueetariquiaa nojori tojishanojiniji, nojori niqusshanojinjinio. Puetunujuanaari naa quiquiaari taa cuno niucua Pueyaso seru pohuataree nojoricuajani.

Conaaja Jesu pasacari Pueyaso Secojojua tiajinia, Pueyasora jiyateso-coriquiano

²¹ María conaaja jaara ocho juuca jiiquiaari, na cararaatiuuquia coori miatesaaquiaari, taa Moisés rootaquiaaricuajani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Maríacuajani, na manajeyaquisshacarijia.

²² Na nuhuaji, Moisés seqüesano juucaari quiquiaari na nucua neyacata cuaara juhua tuteera, jeequesano nojori quiniuria Pueyaso niquia, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. ²³ Na queyari naa miquiaaritij, taricuacaanu Pueyaso Rupaajinia naajiotasano tojitiajaca nojori quiniuucua. Naajiotasanoori naa quiyatej: “Puetunu nia jiyapueranuhuajanaa cuaara Pueyasora

jiyatesaaria". ²⁴ Naaratej nojoriiri quiaaree na seru mosaanura nojori-icuara Pueyaso Secojojua tiajinia, juhua jeequesano nojori quiniuria Pueyaso niquiara, taa pueya rootasaaquaari Moisés naajiotasanojini-jicuajani. Pueyasoori naa sequequiaari Moisés tarijke:

"Cuaara puecoosaaria caapiqui mococoonu jaara
quiyaquiri, cuaara puecoosaaria caapiqui shinijia".

²⁵ Jiyacaritij, tamonu pueyanoori Jerusalén tiacajinia quiija quiriquiaa. Na sesa quiquiaari Simeón. Nojuajaari maninia miijia quiquiaari Pueyaso niquiara. Pueyaracaanu Pueyaso shuquiritiaja quiquiaariiri. Nojuajaari pueyaracaanu sashijia Pueyaso cuaara jiyaroora Israel pueyacuaji Tacuriquiano. Nojuajaari Pueyaso Sohuanu jiitija. ²⁶ Pueyaso Sohuanuuri na niishitiquiaari majaari na shaajenu quiniutianiya nojuaja cuaara niquiri Cristojaatijia, Pueyaso jiyarosaariquiano. ²⁷ Pueyaso Sohuanuuri na jiyatequiaari namitia cuno juuca Pueyaso Secojojua tiajiniara. Naacuajitij, Jesu jaara pasaaquiaari Secojojua tiajinia, nera na miishaanura puetunu tariucuacaanu rootasanojuanaa, Simeónri jiyacari tii na niquirii. ²⁸ Simeónri Jesu paree. Na cacanuureeri. Naa Pueyaso sequeree jyanohua na shuquiriniutiaari:

²⁹ —¡Cua Jiyanijianaa, tariucuaja! ¡Quiarrijia cutara cua naata cusionu juhuajaniya, shuquiriaatia cua quishacari! Quiaacuajaari tari cua niquitirii tarijia quia sequencesano janiya, quia seru cua quiniuucua. ³⁰ Tari niquirii quia Jiyarosanocuajanijia, canaacuaji Tacuriquianoni. ³¹ Nojuajaari quia niquitiosano puetunu jiyacanjia quiniaa pueyapueecuarajanaa. ³² Nojuajaari puetunu tau-cuaca jiuujajanaa cuhuatanutaniya, maninia nojori niishiniuria quijaniya. Naajuhuaj, quia pueya Israelni, nojoriiri tamasaca pueya shuquiritasano quiniutianiya na seera.

³³ Jesu que, na nucuajuhuaj, nojoriiri jiuujiateree naa Simeón sequencesaci conaajajiniji. ³⁴ Na nuhuaji, Simeónri nojoriicua niaree na juaashiquia. Naa sequereeri:

—Pueyaso cuaara jiitiaara maninia niajaniya.

Jesu nucua María sequereejaariuhuaj:

—¡Cua tojiri! ¡Nio conaajaari cutara pueyano quiniutianiya! Queraatia Israel pueyari juhua tiuriiniutianiya nojori ruuretasacari nojuaja. Saniniuujia, queraatia Israel pueyari cumaatia nujuatujuaca quiniutianiya, nocua nojori tiuushacari. Na cumaacata na miiniuucua, pueyari na naata Pueyaso niishiniu maninia. Naajaa, queraatia pueyari na ru-uretanutaniya saaja. ³⁵ Naacuajitij, tama pueya niishiriosano noojiacajinijaarijia niishishaanutaniya. Quiara saniniuujia, jyanohua taraatiaari quiniutianiya. Quoojiaari juhua mueruuta tohuariquitiishaanutaniya quia mueyacua quia miishacari.

³⁶ Cuniquijia, Pueyaso Secojojua tiajiniani, tamonu motajaari tii quiriquiaajuhuaj. Cuno motajaari Pueyaso sequencesano caminiujiunia quiquiaari. Na sesa quiquiaari Ana, Fanuel niyat. Nojuajaari supuetana Israel niyanu Aser niquiohuacuajinio supueno maaji quiquiaari. Jyanohua motaja quiquiaariiri. Shusha niyacoo na quishacari, nojuajaari camiquiaari. Na nuhuaji, siete marijiaari na shocojoquiaari neyacata na quishacari. ³⁷ Neyaca cusionu nuhuaji, socua ochenta y cuatro marijia na shocojoquiaari mashiquio na

quishacari. Nojuajaari pueyaracaanu quiquiaari Pueyaso Secojojua tiajinia, Pueyaso na shuquiritiasacari juuca, niucuanio. Nojuajaari sequeyarucua miaqueyaquiquiaari Pueyaso na secojosacari pueyara- caanu.³⁸ Simeón pocuasacarijia, jiyacaritij, Anaari nocua nimiaa. Na niquishacari conaaja Jesu, Anaari noojajinia niishiquiaari cante no- juajani. Cunora, Pueyaso sequeree na shuquirinuitiaari: “¡Paacarasho!” Na nuhuaji, nojuajaari juhuacatecara Jesujiniji pohuataree Pueyaso Jiyarosocoriquiano sashijiac a pueya niquia. Nojori sequereeri:

—¡Niocuajaari pa sashishano pa pueyacuaji Tacuriquiano!

Na queya tacartasacariuhua conaaja Nazaret tiacajiniohua

³⁹ Jesu queyari puetunu Moisés naajoneejinia Pueyaso rootasanojua- naa tucuataquiaari na conaajara. Na nuhuaji, nojoriiri Galilea jiya- jiniara tacatequiaariuhua tama nojori tiacajiniohuaja, Nazaret tiaca- jinia. ⁴⁰ Naatujua Jesuuri maashiquiaari. Socua cumueecara quiquiaari- iri, maninia niishijiaranio. Pueyasoori jiyanohua na naacujua.

Mashajaniyojua Jesu quishacari Pueyaso Secojojua tiajinia

⁴¹ Puetunu marijjarajanaa, Jesu queyari quiojquotaari Nazaret tiaca- jiniji, Jerusalén tiacajiniara, Pascua juucajinia nojori queranacunura.

⁴² Doce marijia jaara Jesu shocojquotaari tari, Jesuuri nojoritia jiyacari quiaquiaari shushajanaa, taa nojori quianu jiitiquiaaricuajani puetunu marijjarajanaa. ⁴³ Queranacunuun jaara puequequiaari, Jesu que- yari quiojoriquiohua juhuajaniya. Jesuuri jiyacari Jerusalén tiacajinia jiyojequiaari. Majaari na queya niishiniu quiriquiaa. ⁴⁴ Nojoriiri jiyaniquiaari Jesu naasucua narta quiojonaa tajinia quiariquiohua- juhuaj. Naacuajitij, nojoriiri juhuajaniya rucuaneree puetunu cuno ju- ucajanaa. Cuno niucuaja, nojoriiri Jesu pajequiaari nojori pueya tajinia, nojori niishishano pueya tajinianio. ⁴⁵ Shaaqui quiriquiaari. Cunora, nojoriiri Jerusalén tiacajinia tacatequiaariuhua, tii na pajenuhuara.

⁴⁶ Jiuujianaraca juuca nuhuaji, nojoriiri socua Jesu riuriataquiaari Pueyaso Secojojua tiajinia, Moisés Rootasanojiniji niishitiojonaa pueya tajinia cajijano. Nojori tojiriquiaari. Nojori nequesoreetariquiaajaari- uhuj. ⁴⁷ Puetunu pueyajanaa, canapuete na tojitiariquiaani, nojoriiri jiuujiatequiaari niishijia Jesu quishacari. Jesuuri maninia nojori ri- uhuaneriquiaa saaja, nojori jaara na nequesoreeriquiaa. ⁴⁸ Na queya jaara na niquia, nojoriiri shiriiquitiuquiaari. Na nucuari na sequereei:

—Quiyanunaa, ¿casaara naa quia miirii canaani? ¡Janiyari quia queta quia pajeriquiaani jiyanohua canaa tacaaniutia quiocua!

⁴⁹ Jesuuri na riucuaree:

—¿Casaara nia pajeriquiaa janiyani? ¿Majateeri nia niishiniu, janiyari cua Que Secojojua tiajinia quiniuucua jiaatiaani?

⁵⁰ Majaari nojori niishiniu quiquiaari Jesu sequesano.

⁵¹ Jesuuri na queyata quiaarohua nojori tiajiniohua Nazaret tiacajinia. Na queya tojija quiquiaariiri. Na nucuari pueyaracaanu noojajinia racataja puetunu na niishishanojuanaa neyanu Jesujiniji. ⁵² Jesuuri socua maashiquiaari, socua niishijiara quiquiaarijiaariuhuj. Pueyaso shuquiritiasano quiquiaariiri. Puetunu pueyajanaari na shuquiriti- aquiaariuhuj.

3

*Tiuquinijiona Juan pohuatasacari Pueyaso rupaa cariiquia jiyajinia
(Mt 3.1-12; Mr 1.1-8; Jn 1.19-28)*

¹ Na nuhuaji, Tiuquinijiona Juanri Pueyaso rupaa pohuatanu coteequiaari. Jiyacaritij, quince marijiaari tari shocojoquiaari César Tiberio, jiyaniijiajanaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacaritij, Poncio Pilatoori jiyaniijia quiriquiaa Judea jiyajinia. Herodesri saniniuujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaajuhua Iturea jiyajinia, Traconite jiyajinianio. Lisaniasri jiyaniijia quiriquiaa Abilinia jiyajinia. Puetunu cuno jiyaniijianucuajanaani, nojoriiri jiyaniijianucuara César Tiberio jiyatesano quiquiaari cuno jiyacajinia. ² Jiyacaritij, Anásri Caifásta Judiocuacaacuara secojonaa jiyaniijianucua quiriquiaa. Jiyacaritij, Zacarías niyanu Juanri cariiquia jiyajinia quiriquiaa. Tii na quishacari, Pueyasoori na rupaa na niishitiquiaari. ³ Naaratej, Juanri puetunu Jordán moo shuriuquioco jiyacajanaa tajiquiaari na poojotasacari Pueyaso rupaa pueya niquiara. Nojuajaari naa pohuataquiaartitj:

—¡Nioojia nia tacatore maja socua sesa nia miiniuria, moojinia cua tiuquinijionura niajaniya, Pueyaso jiyanooniuria niajaniya sesa nia miishanojiniji!

⁴ Naacuajitij, supuetana Isaías naajiotasanoori tohuateequiaari. Pueyaso sequenu panishano caminiujiunia na quiniuucua, nojuajaari naa miriqui naajiotaqviaari supueriquiano Juanjiniji:

“Pueyano rupaari tojishiya cariiquia jiyajinia nacaano. Sequeyari:

‘¡Jiyaniijia nuura nia jeenucuare! ¡Puetunu maninijajanaa nia nunure, maja shuutiuniu na quiniuria! ⁵ ¡Puetunu tacocuajanaa cuaara mishiquiojosaaria maninia jamatunu na nuu quiniuria! ¡Puetunu tuhuananuhujanaa cuaara jiuurioosaaria jacananu na nuu quiniuria! ¡Shuyorocotunu nuu cuaara poocuareesaaria! ¡Puetunu surocoshiquajanaa cuaara mishiquiojosaaria jacananu na nuu quiniuria! ⁶ Naacuajitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanoootiriquiano pueyani’”.

Naa miriqui Isaías naajiotasanoni, cunoori pueya numooteriquiaa juhuacarijia nojori jeenucuanura noojiaca, Jiyaniijia Jesu tojitiajaca nojori quiniuria.

⁷ Pueya jaara quiojoquiaari na tiacajiniji Tiuquinijiona Juancua, Juan tiuquinijionura nojori, Juanri naa nojori juaaqviaari:

—¡Niaacuajaari juhua sacocua! ¿Cante nia numooteree nia mashiniuria jiyanoohua Pueyaso saniitionu panishacari niajaniyani? ⁸ ¡Maninia mijijara nia quiri, canaa niishiniuria niaari seetanujuanaa nioojiaca tacatoree sesa nia miiniujiniji! ¡Majaari najuhuana tama nia cuaqueyajaaja nia sequenu: “Pueyaso pueyanonijia, supuetana Abrahamjinijinio cua supuenuucua”! ¡Nia niishiri, Pueyaso jaara paniri, nojuajaari na naata nio saijiniji shipininiu Abraham niquiohuarajuhuaj! ⁹ ¡Pueyaso cajiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijiasocoriquiano. Naajuhuaj, niajaniyari juhua sesa muetuna naana, maninia miyashijia nia quishacari. ¡Niaari quera saniitioshiyacuaja!

¹⁰ Naaratej, pueyari Tiuquinijiona Juan nequesotaree:

—¿Taa canaa miyarinitioj?

¹¹ Juanri nojori riucuaree:

—Cante querajaqueya toqueracani, nojuaja cuaara niquitioora taque cante toqueejuni. Naajuhuaj, cante miaquesanoracani, nojuaja cuaara niquitioora miaquesanoojunucua.

¹² Roma tiacajinia quijia jiyanijijajanaa Césarra cumaneeca masejonaari Tiuquinijiona Juancua nijioquiaarijuhuaj. Nojoriiri tiuquinijiosano quiniu paniriquiaajuhuaj. Naaratej, nojoriiri Juan nequesotaree:

—Niishitiojonanaa, ¿canaarijijataj, casaa canaa miyarinijia?

¹³ Juanri nojori riucuaree:

—Maja puera cumaneeca nia masenu pueyajiniji. Saaja nia jiyanijija sequesano nia masejore.

¹⁴ Naajuhuaj, soldadohuari Tiuquinijiona Juan nequesotaree:

—¿Canaarijijataj? ¿Casaa canaa miiniutianiyyarinijia?

Juanri nojori riucuaree:

—Niaacuajaari puecootajaraca. Naajaa, majaari pueya casami nia jaariuutianu, nojori nia miananajonuta, nojoriicuara nia tonujusacar-jiuhua nia sapojonuta. Juhuajaniya nia quiri saaja nia jiyanijija niquitiosano cumaneecata.

¹⁵ Pueyari jiyanohua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriquiano niquiniuucua jiaatiaja. Naaratej, nojoriiri jiyaniriquiaa Tiuquinijiona Juan naasucua Cristo, tariucuacaanu Pueyaso sequesano na Jiyarosocoriquianotej. ¹⁶ Nocuaji, Tiuquinijiona Juanri puetunu pueyajanaa sequeree:

—Janiya nareja nia tiuquinijija moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhuaji niniutianiya. ¡Nojuajaari Pueyaso Sohuanu tiuquinijionutaniya nioojiajinia, na cumaaca nia jitianura, seetanujuanaa maninia miijia nia quiniuria! ¡Nojuajaari juhua manitia nia saniniujiuntianiyyajuhuaj, maninia jiuujiaraca nia quiniuria! ¡Nojuajaari socua jiyanohua cumaacaraca janiyajiniji! Janiya maara shuquiriaatia quirini, nojuaja jaara cua sequere cua naacutanura nojuaja juhua na seru, quenaaja na sapatu neyocua cua saacatanura. ¹⁷ Niaari niishiyacuaja taa pueyano miiquiaa na trigoni paratu panura na cocua, na sucuanio, saniniuujia na jajau na racatasocoriquiano tajiniaaco. Naajuhuaj, cuno pueyanoori tari niya quiya na pueya na saquiriojonura na tojiyashijiaca pueya tajiniji, na rrijosocoriquiano nata nojori quiniuria. ¡Sesa pueyari juhua trigo sucua catijasaanutaniya saniniuujia! ¡Nojoriiri jatasaanutaniya manijinija! ¡Cuno maniiri maja na maquesanu quiniutianiya!

¹⁸ Tiuquinijiona Juanri naa pohuataquiaari Pueyaso rupaa pueya niquiara. Maninia rupaari, na tojitiabajaca pueya quiniuria shuquiriaatia. Socua queraatia quiquiaariiri na pohuatasano na numootenura pueya.

¹⁹ Jiyanijija Herodesri jiyacari tarajanu Felipe niquiocua jitiariquiaa necocuara. Cuno maaji sesa quiquiaari Herodías. Tiuquinijiona Juanri jiyanijija Herodes pirijoquiaari sesa na miishanojiniji. Herodesri maja na tojiniu quiquiaari saaja. Jiyanijija Herodesri socua queraatia sesa casaa miijia quiquiaari. ²⁰ Na nuhuaji, jiyanijija Herodesri socua sesa miiquiaari: Tiuquinijiona Juan nujuatequiaari nujuatejojuajinijaari.

*Jesu tiuquinishacari moojinia**(Mt 3.13-17; Mr 1.9-11)*

²¹ Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaarijuhuaj. Jesu tohuatasacari moojiniji, na que Pueyaso secojoriquiaari. Jiyacaritij, jiya cajiniocuaari riatequee. ²² Pueyaso Sohuanuuri Jesuucua roseyaree juhua mococoonu niquishano. Jiyocuacaanuji, Pueyaso rupaari tojishaaree sequeyano:

—¡Quiaacuajaari cua panishano quiyanunijoja! ¡Jiyanoqua quia shuquiritiaanija!

*Jesu supuetanaa sesaca**(Mt 1.1-17)*

²³ Treinta marijia jaara na shoconujuquiaari, Jesuuri na Que Pueyadora poonijionu coteequiaari. Pueyari jiyaniquiaari José naasucua seetanujanaa na que quiquiaari. Joseeri Elí niyanu quiquiaari. ²⁴ Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. ²⁵ Joseeri Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. ²⁶ Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari. Semeiri Josec niyanu quiquiaari. Josecri Judá niyanu quiquiaari. ²⁷ Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. ²⁸ Neriiri Melqui niyanu quiquiaari. Melquiiri Adi niyanu quiquiaari. Adiiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. ²⁹ Erri Jesús niyanu quiquiaari. Jesúsri Eliezer niyanu quiquiaari. Eliezerri Joram niyanu quiquiaari. Joramri Matat niyanu quiquiaari. ³⁰ Matatri Leví niyanu quiquiaari. Leviiri Simeón niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. ³¹ Eliaquimri Melea niyanu quiquiaari. Meleari Mena niyanu quiquiaari. Ménari Matata niyanu quiquiaari. Matataari Natán niyanu quiquiaari. ³² Natánri David niyanu quiquiaari. Davidri Isái niyanu quiquiaari. Isaiiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. ³³ Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. ³⁴ Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. ³⁵ Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. ³⁶ Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeeri Lamec niyanu quiquiaari. ³⁷ Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. ³⁸ Cainánri Enós

niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

4

*Samaruhua jiyaniijia saniniujiushacari Jesu
(Mt 4.1-11; Mr 1.12-13)*

¹ Jesu quiásacariuhua Jordán moojiniji, Pueyaso Sohuanuuri noojijinija quiriquiaa puetunu na cumaacajanaa na jiitianura. Pueyaso Sohuanuuri na jiyatequiaari pueya jiyaqui cariquia jiyajiniara. ² Tii camueenujuquiaari cuarenta juuca. Sesaacaari tii na saniniujiuriquiaa. Majaari quenaaja casaa na miaqueno quiquiaari tii na quishacari. Na nuhuaji miaajequiaariiri. ³ Jiyacaritij, Sesaacaari na sequeree:

—Quia jaara seetanujuanaa Pueyaso Niyanu quiri, nio saajia quia jataniri neecaruura na quiniuria.

⁴ Jesuuri saaja na riucuaree:

—Pueyaso Rupaajiniacuajaari naa naajiotasano quiya:

“Pueyanoori maja saminio na quiniu saa miaquesanotaja. Seetanujuanaa saminio quiyari na tojishacari puetunu Pueyaso Rupaa-janaa”.

⁵ Na nuhuaji, Sesaacaari Jesu jiyataaree jiyanoehua jiyaconaja tuhuanuuucua. Sesaacaari ritia niquitirii Jesu puetunu mijiria jiyacajanaa.

⁶ Jesu sequeree:

—Janiya quia niquitionutaniya puetunu nio jiyaca jiyaniijianucua cumaacajanaani, maninia jiyaniijajanaa quia quiniuria mijiria. Janiyari puetunu nio jiyacajanaa niquitiosaaquiaarini. Naacuajitij, janiyari cumaca niquitioquiaani cana cua niquitionu paniyacuajani, jiyani-ijiara na quiniuria. ⁷ Puetunujuanaari quiara quiniutianiya, quia jaara cucuara mojoquetare quia shuquiritianura janiya.

⁸ Jesuuri saaja na sequeree:

—Pueyaso Rupaajiniacuajaari naa naajiotasano quiya:

“¡Quia Jiyaniijia Pueyaso quia shuquiritiare! ¡Saaja nojuaja quia tojiri!”

⁹ Na nuhuaji, Sesaacaari Jesu jiyataaree Jerusalén tiacajinia. Na tacaniriiri Pueyaso Secojojua tia cacojiria, jiyocuacaanu. Jesu sequeree:

—Niiquiji quia jaataare jiyocua, quia jaara seetanujuanaa Pueyaso Niyanu quiri. ¹⁰ Pueyaso Rupaajiniacuajaari naa naajiotasano quiya:

“Pueyasoori na seja sequenutaniya na cojuanura quiajaniya.

¹¹ Nojoriiri quia quianutaniya, saajiaacua quia jiriataaquiniucuají”.

¹² Jesuuri na riucuaree saaja:

—Naa naajiotasano quiya jaariuhua Pueyaso Rupaajinia:

“Maja quia Jiyaniijia Pueyaso quia saniniujiuniu”.

¹³ Sesaacaari naa Jesu saniniujiuniu puecaquiaari puetunujuanaa. Majaari quenaaja na naata quiriquiaa sesa na miitiniuria. Naaratej, rupaquijia na tarinitiaquiaari tamacarirriaari.

*Jesu coteesacari na poonijiosano miiniu Galilea jiyajinia
(Mt 4.12-17; Mr 1.14-15)*

¹⁴ Na nuhuaji, Jesuuri tacatequiaariuhua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujiutooquiaari. ¹⁵ Jesuuri Pueyaso secojojua

tiajiniaqueya niishitiojoquiaari puetunu tiacajinajanaa cuno jiyajinia. Puetunu pueyajanaari na timitiaja.

Jesu quishacari Nazaret tiacajinia

(Mt 13.53-58; Mr 6.1-6)

¹⁶ Jiyacaritij, Jesuuri quiaquiaari Nazaret tiacajinia, tee na canashitishaquaaricuajani. Samaatenu juuca, Jesuuri Pueyaso secojojua tiajinia tiuquiquiaari taa na jiitiquiaari miiniucuajani. Nojuajaari nujuquaiaari Pueyaso Rupaa serojonura pueya niquiara. ¹⁷ Pueyari na niquitioree tariucuacaanu Pueyaso sequesano caminiujiunia Isaías naajionee jiuniocosano, pueya niquiara na serojosocoriquiano. Jesuuri na saacartaree. Serojonu coteereeri tee nio naajiotasano quiyacuajani:

¹⁸ “Pueyaso Sohuanuuri coojiajinia quiyani, na cumaaca cua jiitianura.

Naacuajitij, Pueyasoori cua seeratarucuaa maninia rupaa cua pohuatanura casamijiuniucua pueya niquiara. Cua jiyaroree-jaariuhua Sesaaca quoosano pueya cua pohuatanura maninia rupaa Pueyasojiniji. Naacuajitij, nojoriiri cartesano quiriohua Sesaaca sapojosanojiniji. Cua jiyaroreejaariuhua cariyojuarujuri pueya namijiaa cua jeecanura, maninia niquijiara nojori quini-uhuara. Cua jiyaroreejaariuhua taraatia miitiasusano pueya cua jiyatenura shuquiriaatia quiyiacara. ¹⁹ Cua jiyaroreejaariuhua cua pohuatanura pueya niquiara, quiarijiaari Jiyaniijia Pueyaso jiyanooshacari pueya”.

²⁰ Na serojonu nuhuaji, Jesuuri naajionee jiuniocorohua. Na niq-uitiorohua na cojuanaari. Jesuuri cajiriohua. Puetunu pueyajanaari tacuriitia na shootiaturiquaa. ²¹ Jesuuri juhuacatecara pocuarohua. Naa sequereeri:

—Quiarijiani, Pueyaso Rupaajinia nio naajiotasanoori tari tohua-teeree nia niquiara.

²² Puetunu pueyajanaari jiuujiateree shanohua Jesu pohuatasano nojori tojishacari. Naaratej, nojoriiri maninia pocojoriquiaa Jesujiniji. Tama nojorijiaarijia nequesoreetooriquiaa:

—¿Majate nio pueyano José niyanucuaja, niya pa tiacajinia maashin-iotej?

²³ Jesuuri nojori sequeree:

—Niaa jiyoteeri cua sequenu paniya nio tariucuacaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miiniuria cua cumaacata niya tama cua tiacajinijaajani, taa nia tojiquianucuaja cua miishanojiniji Capernaum tiacajiniacuaani.

²⁴ Jesuuri socua sequeree:

—Seetanujuanaa nia sequeyanijia, puetunu Pueyaso sequenu panishano caminiujiuniaajanaari tojishoo quijia, tama nojori tiacajini-ajaaja. ²⁵ Supuetana Elías quishacari, queraatia mashiquopueeri quiquiaari Israel jiyajinia. Jiyanolua miaajesacari quiquiaariiri maru niyaquishacari pueyaracaanu. Jiuujianaraca marijiaari shocojoquiaari socua seis racanio, maru niyaquishacari. ²⁶ Naajaa, majaari Pueyaso jiyaronu quiquiaari Elías narta Israel jiyajinia quiniae mashiquoocua. Pueyaso cutaraari na jiyaroquiaari taatu mashiquoocua Sarepta tia-cajinia, Sidón tiaca shuriucua. Naacuajitij, cuno taatu mashiquoocua

miaquesano jiitiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniuucua Pueyasoocua tiuujia, cuno taatu miaquesanori maja na puetanu quiquiaari nojoriria. ²⁷ Naajuhuaj, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojorijinjinio naatanishaanu quiquiaari Eliseo jiitiasano Pueyaso cumaacata. Saaja cuno tahue Naamánri naatanishaaquiaari cutara, Siria jiyajinjinio pueyanoni.

²⁸ Pueyaso secojojua tiajinia quiniaa pueya tojishacari naa Jesu pohuatasanotej, puetunu nojorijianaari jiyanoqua juaquiooree. ²⁹ Nojoriiri saneecuatuquee. Jesu caponeeturee nojori tiacajinijiiri. Nojoriiri Jesu jaatucuquiaari socua jiyocuacaanu nojori quichia tuhuananujinijiria, teyanocua nojori tiaca tiasano quiquiaaricuajani. Nojoriiri na capotunu paniriquiaa juucua tacojiyaji naa na monura. ³⁰ Jesuuri saaja nojori tajiniaaco canujuquiaari juhuajaniya. Quiniquiji tamocora quiaareeri.

Samaruraca pueyanojiniji pohuatasano

(Mr 1.21-28)

³¹ Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. ³² Nojoriiri juuijateree na niishitiosano nojori tojishacari. Na niishitiosanoori seetanujuanaa cumaacaraca quiquiaari juhua jiyaniija niishitiosano, maja juhua nareja rootasano caminiujiunia.

³³ Pueyaso secojojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanoqua nacareeri:

³⁴ —¡Nazaret tiacajinjinio Jesunaa! ¿Taa quia miiniu paniya canaan? ¡Canaa quia niquiri nareja! ¿Quiaate tari niyaree canaa saniitionuccua? ¡Quia niishiyacuajanjia, cante quiajaniyani! ¡Quiacuajaari sesa miyashijia Pueyaso Niyanu!

³⁵ Jesuuri samaru sequeree:

—¡Quia sanaajere! ¡Quia tohuatare nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quirii pueyano. ³⁶ Puetunu pueyajanaari shiriiquitiurii. Tama Jesujiniji sequetooreejaarijia:

—¡Nia tojiri! ¿Taamueca rupaatucuaanojoni? ¡Nio pueyanoori samaruhua jiyaronu niishiya juhua jiyaniija! ¡Na rupaari jiyanoqua cumaacaraca! ¡Cunora samaruhua tohuataniriiri!

³⁷ Puetunu cuno jiyajinajanaa, Jesu miishanojinijiiri caminiujiushaaquiaari pueya niquiara.

Jesu naatanishacari Simón Pedro reyarucua

(Mt 8.14-15; Mr 1.29-31)

³⁸ Jesuuri Pueyaso secojojua tiajiniji tohuareetaquiaari na pueyata. Quiojiyareeri. Simón tiajinia tiuuquitiushiiri. Simón reyarucuaari jiyacari jiyanoqua naseeca matariquiaa. Pueyari Jesu sequeree na naataniniuria. ³⁹ Jesuuri cusosu caco nujuasee. Jesuuri na naseeca cusonu jiyaroree. ¡Na naseecaari ritia shinitiaquee! Tariucua jiyotuucaari jiyacari sanemaa, na tiajinia quiniaa pueya na mianuutenura.

*Jesu naatanijiosacari queraatia cusosuhua
(Mt 8.16-17; Mr 1.32-34)*

⁴⁰ Pananu tiuquishacari, puetunu pueyajanaa, cante cusosuhua jiiti-aquiaarini, nojoriiri na jiyataquiaari Jesuucua. Jesuuri na juaashiquia niaquiaari puetunu cusosuhuacuajanaa. Nojoriiri queraatia tamaatia cusionu jiitiaquiaari. Jiyacari na naatanijioree puetunujuanaari.

⁴¹ Naajuhuaj, queraatia samaruuhuari tohuareetaquiaari cusosuhua-jiniji. Samaruuhuari naa nacaquiaari Jesuucua:

—¡Quiaacuaja Pueyaso Niyau!

Jesuuri nojori juaarii. Majaari na shanacunu quirii nojori pocuanura, nojori mariqui pueya niquiara pohuatareeri, nojuajaari Pueyaso Jiyarosano.

Jesu pohuatasacari Pueyaso rupaa Pueyaso secojonuujuia tiajini-aqueya

(Mr 1.35-39)

⁴² Tariquiuicuaji, Jesuuri tiacajiniji quiaquiaari tamaquiuicua tamajaaja. Pueyari na pajequiaari. Nojoriiri socua nocua tiuquijioquiaari na pajenuusacari. Majaari nojori cartenu paniniu quiquiaari Jesu quianura cuniquiji. ⁴³ Jesuuri nojori sequeree saaja:

—Janiyari jiyarosa aquiaarini pueyapue niquiara cua pohuatanura quiarinio Pueyaso Rupaa. Quiarijiani, Pueyasoori pueya jiyanooniu paniya, nojori quiniuria na pueya, nojori tiuushacari nocua. Naaratej, janiyari na rupaa pohuatanura quianu paniya tamonu tiacajinajani-uhuaj. Janiyacuajaari cunora jiyarosa aquiaarini.

⁴⁴ Naacuajitij, Jesuuri puetunu Judiocuaca jiyajinajanaa rucuanejoquiaari Pueyaso rupaa pohuatanura puetunu Pueyaso secojonuujuia tiajiniaqueyajanaa.

5

Sapitiaajara jaquerootanaa shiriiquitiushacari

(Mt 4.18-22; Mr 1.16-20)

¹ Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohuatariquiaa. Puera jiyanoohua pueyari nocua catecanoquiaari catecaji na tojitianura nojuaja. Nojoriiri Jesu tanujuriquiaa puera. ² Jesuuri caapiqui bote niquirii caminia casaqueyaji. Shaama quiriquiaari. Na camaruuhuari na shuriucua jeequejonuriquiaa na shiyaruhua. ³ Jesuuri Simón botejinia tacaquiaari. Simón sequereeri cuaara bote juaariocotaara caminia jiuujiajinia naata. Na nuhuaji, Jesuuri cajirii. Quiniquiji pueya niishitiojonu coteequiaariiri.

⁴ Jesu jaara niishitiojonu puecaquiaari, Simón sequereeri:

—Queronijinia pa jaaretaare. Niocua tii jartasee nia shiyaruhua sapitiaajara.

⁵ Simónri na riucuaree:

—Niishitiojonanaa, canaacuajaari tari jaquerootariquiaa najuhu-nani. Canaari naajaa nocua juhuaquemaani. ¡Saa shaa quiriquiaanojua! Naajaa, quiaacuaja na sequeya, socua canaa jaquerootarohuacuaraquij.

⁶ Nojori jaara socua na shiyaruhua jartaquiaariuhua, jiyanoohua quer-

aatia sapitiaaja ritiatureeri! Shiyaruhuari sureequetanu coteequiaari.

⁷ Nojoriiri jatiqui nata poonijionaa piinioree bote tarajanujinia quiyano,

nojori niniuria na naacutanura. Nojoriiri ritia nimiaa. Cuno caapiqui

bote mishinijioturee sapitiaajataari. ¡Quera tiuquitiariquiaari queraatia sapitiaajata! ⁸ Simón Pedro niquishacari naa Jesu miishano nojoririatej, Jesuucuara mojoquetareeri. Jesu sequereeri:

—Jiyaniijianaa, maja cua rupueno socua! Janiya puera sesa pueyanoni quia rupuena cua quiniuria.

⁹ Simónri shiriíquirii, jiyanoqua queraatia sapitiaaja nojori quiasacari. Nata quiniao pueyari shiriíquituriijuhuaj. ¹⁰ Cuno pojoritia quiriquiaajaariuhua Zebedeo niquohua, Santiago, Juannio. Nojoriiri Simón cojiniao quiquiaari. Jesuuri Simón sequeree miriqui:

—Maja puerenu. Quiaari saniniujuja pueya quioojua quiniutianiya juhua sapitiaaja.

¹¹ Nojori shiitiasacari, nojoriiri puetunu na casaajanaa tiujquiaari Jesuta nojori quiojonura.

Jesu naatanishacari lepraraca cusosu

(Mt 8.1-4; Mr 1.40-45)

¹² Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocuara jacamareeri. Jesu sequereeri:

—Jiyaniijianaa, quia jaara paniri, quia naata cua naataniniu cua cusionujiniji.

¹³ Jesuuri na quiaree. Na sequereeri:

—Taaquiriirinij. Quia naataniniu paniyanijia. Quia cuaqueya cuaara jeequehuara.

Naa na seqesacaritij, na lepraari shaajequee na cuaqueyajiniji.

¹⁴ Jesuuri na rootaree maja na pohuatanura na miishano tamasaca niquiara. Na sequereeri:

—Saaja pueyacuara secojonaa jiyaniijia quia niquitishii quia cuaqueya, na cartenuhuara quiajaniya, pueya tajinia quia rucuanejonuhuara juhuajaniya. Naajuhuaj, quia seru quia niquitiosee Pueyasoocuara catijiasocoriquiano. Naa quia miiri taa Moisés rootaquiaaricuajani, puetunu pueyajanaa niishiniuria quia tarjeequerohua quia cusionujiniji.

¹⁵ Maninia Jesu miishanojinijiiri jiyanoqua socua tamaquicua caminiujushaaquiaari pueya niquiara. Naaratej, jiyanoqua queraatia pueyari nocua nijioquiaari na tojiniuria, mariyata Jesu naatanijionura nojori, nojori cusionujiniji. ¹⁶ Jesuuri saaja pueya quiyaquishaqui quiquiaari na Que Pueyaso na secojonura. Nojuajaari naa pueyaracaanu miiquiaari.

Jesu naatanishacari cumatacuruhuana cusosu

(Mt 9.1-8; Mr 2.1-12)

¹⁷ Tamonu juuca, Jesuuri pueya niquiara niishitiojoriquia. Na tojitanaa tajinia cajitiuriquiaajaariuhua Fariseocuaca, Moisés Rootasanojiniji niishitiojonaanio. Nojoriiri nijioquiaari puetunu Galilea jiya tiacajinijianaa, Judea jiya tiacajiniji, Jerusalén tiacajinijino. Jesuuri jiyanoqua Pueyaso cumaaca jiitiariquia cusosuhua na naatanijionura. ¹⁸ Jiyacaritij, socua pueyari tiuquijioquiaari. Nojoriiri cumatacuruhuana cusosu patariquia na matujinia. Nojoriiri juucua na tiuquitianu paniriquia tiajiniaaco Jesuucua. ¹⁹ Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari. Nocuaji, nojoriiri tia cacojiria tacanitorgiaari cusosu. Cuno

pueya tiaca tucuruuri quiquiaari marauneeca majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree cuhuocojiniji na matujinia, Jesu nujuasaqui pueya tajinia.²⁰ Jesu niquishacari taa nojori tiuuriquiaa nocuani, cunora Jesuuri cusosu sequeree:

—Pueyanonaa, quiaacuaja tari jiyanooshaaree sesa quia miishanjiniji.

²¹ Naa Jesu sequencesacaritij, Moisés Rootasanojiniji niishitiojonaa, mariyata Fariseocuacaari naa niishiriojonuuriquiaa: “¿Cantejaara cuno pueyanoni? ¡Nojuajaari tama na cuaqueyajaaja jiyateya juhua Pueyaso na quiniuria! ¡Pueyanoori maja na naata tamonu pueyano jiyanooniu sesa na miishanjiniji! ¡Saaja Pueyaso cutaraari na naata pa jiyanooniu!”

²² Jesuuri naa nojori niishiriojosano niishiriquiaa. Cunora, nojori sequereei:

—¿Casaara naa nia niishiriojiyani? ¿Niaateeri cucuaji taacanuyajaa?²³ Janiyara, maja jiyajeneta cua sequenura: “Quiaari tari jiyanooshaaree sesa quia miishanjiniji”. ¿Jiyajenetatejaariuhua sequenura: “Quia sanere. Quia rucuanere”? ²⁴ Cunora, janiyari quiarijia nia niishitiniutianiyani, janiyari mijiria jiyanosaaquiaarini pueya cua jiyanooniuria sesa nojori miishanjiniji.

Naacuajitij, Jesuuri cumatacuruhuana pueyano sequeree:

—Cua tojiri. ¡Quia sanere! ¡Quia matu quia pataarohua quia tajinia!

²⁵ Jiyacaritij, pueyanoori sanequee nojori niquiara. Na tajinia pataarohua na matuuri. Shuquiriaatia quiariquiohua na tajiniohuari Pueyaso na maniniuhuaqueetanuta. ²⁶ Puetunu pueyajanaari shiriiqui-tiurii. Nojoriiri Pueyaso maniniuhuaqueetariquiaa cuno maninia casaa nojori niquiniuucua. Nojoriiri na puerenuta naa sequetuquiaarijuhuaj:

—¡Paari quiarijia jiyanohua maninia miishano niquiriini! ¡Nocuaji jiuujiatesano!

Jesu sequencesacari Leví, na pueyano na quiniuria

(Mt 9.9-13; Mr 2.13-17)

²⁷ Nio nuhuaji, Jesuuri tohuataquiaari. Tamonu pueyano niquiri ijiyanijijajanaa Césarra cumaneeeca masejosaqui cajiyano. Na sesa quiquiaari Leví. Jesuuri na sequeree:

—¡Cua nuhuajiri, cua pueyano quia quiniuria!

²⁸ Jiyacaritij, Leviiri ritia sanequiaari. Puetunu na jiitiasanojuanaa tuijiaqueeri. Jesuta quiaqueeri.

²⁹ Na nuhuaji, Leviiri jiyanohua queraatia sumatuquiaari na tajinia, Jesu na queranacutanura. Queraatia narta cumaneeeca masejonaari tii quiriquiaajaacuhuaj. Nojoritia miaquejajinia cajitiuriquiaari, socua tamasaca pueyano. ³⁰ Moisés Rootasanojiniji niishitiojonaa, mariyata narta Fariseocuacaari juhuacatecara Jesu pueyacuara rimiaaquenu co-teequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacartajacataajaajanio? Nojoriiri pa paraa sequera cumaneeeca masejonaaa.

³¹ Jesuuri nojori riucuaree:

—Cante na cuaqueya jiyaniyani nojuaja maja cusosu na quiniu, nojuaari maja naarajona na paniniu. Cusosuhua cutaraari naarajona paniya. ³² Naajuhuaj, majaari mijiria cua niniu quiquiaari maninia

mijia pueyacua. Niquiaari cutaranijia sesa mijiacaca cua tacatonuhuara Pueyasoocua, maninia mijia nojori quiniuria.

Pueya nequesotasacari Jesu, casaara na pueya carteyaquia miaquenu quenaajani Pueyaso nojori secojonura

(Mt 9.14-17; Mr 2.18-22)

³³ Pueyari Jesu sequeree:

—Tiuquinijiona Juan pueya cutaraari sequeyarucua miaqueyaquiquiaa. Nojoriiri naa Pueyaso secojoquiaa pueyaracaanu. Fariseocuacaari naa miiquiaajuhuaj. Quia pueya saniniujia, saaja miaquequiaari, ratuquiaari. ¿Casaarateni?

³⁴ Jesuuri nojori riucuaree:

—Pueyano camishacari maa ji, majaari masuusano pueya miaajenu, camiriquiano pueyano jaara nojoritia quiyajaa. ³⁵ Tamacari, camiriquiano pueyano jaara jaariutiasaare nojori tajiniji, jiyacariti nojori cutaraari miaqueyaquiniutianiya. Naajuhuaj, janiyari cua pueya tajiniji jaariutiasaanutaniyani. Jiyacariti nojori cutaraari miaqueyaquiniutianiya.

³⁶ Jesuuri socua nojori niquiara pohuataquiaari nio miriqui sequesano:

—Majaari pueyano miatenu quijia na toque quiariquipiniji, na toque mocua cuhuoco na cushipirijiotajara. Saniniujia, jaara naa miiritij, na toque quiariqui sesoyari. Quiarinio toquerauri sesoshiyajuhuaj, toque mocuajinia na posequesacari. Cua rupaari naajuhuaj, juhua quiarinio toque. ³⁷ Naajuhuaj, majaari na naata quiariniacu uva caaca mishinishaanu shoque tariucuacojinia, tariucuaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhuana niitiashiya. Shoqueeri najuhuana sesoshiyajuhuaj. ³⁸ Naaratej, maninia cutaraari quiariniacu uva caaca shuujionu shoque quiariquipinija, maja vino niitiasaanuucuaji, na quiquito shoquenio. Naajuhuaj, nia niishitiosanoori juhua tariucuaco shoque. ³⁹ Naajuhuaj, pueyano jaara vino tariucuanacu ratujua quiri, majaari na paniniu quiariniacu vino. Sequeyari: “Tariucuanacuuri maniniacuaja”. Naajuhuaj, majaari cua niishitiosano nia paniniu, quiarinio na quiniuucua.

Jesu pueya carojotasacari trigo samaatenu juuca

(Mt 12.1-8; Mr 2.23-28)

6

¹ Tamonu samaatenu juuca, Jesuuri trigo cuhuariquiajiniaaco quijoriquiaa na pueyata. Na pueyari trigo carojotariquiaa. Nojoriiri na juaashiquiajinia na shuuquijoriquiaa na corequetanura. Na nuhuaji, na jajau miojonuuriquiaari. ² Fariseocuacaari na niquitiariquiaa. Nojoriiri Jesu pueya juaarii:

—¿Casaara nia tojitiaquiaja Moisés Rootasanoni, taa na sequequiaaricuajani maja pa poonijionura samaatenu juuca?

³ Jesuuri nojori riucuaree:

—¿Majateeri nia serojonu quiquiaacuaja casaa supuetana David miquiaari na miajesacarini, mariyata na cojiniaa miajesacarijuuhuaj?

⁴ Nojuajaari Pueyaso Secojouja tiajinia tiuquiquiaari. Pueyasora niojosano pan pooquiaarii. Na sareeri. Mariyata nata quiniaa niqutiojoreeri nojori sanurajuhuaj. Cuno panri sequesaquiaari saaja pueyacuara secojonaa sasocoriquiano. Naajaa, Davidri na saquiaari. Majaari Pueyaso juaaniu quiquiaari naa David miiniuucua.

⁵ Jesuuri socua cuno Fariseocuaca sequequiaari:

—Janiyacuajaari Pueyaso Jiyarosanoni. Jiyaniijiara jiyatesaaquiaarinijia cua sequenura casaate samaatenu juuca miishiyani, Pueyaso pa shuquiritiniuria.

*Jesu jeecasacari pueyano juaashiquia, cuseetucojuara joojequetano
(Mt 12.9-14; Mr 3.1-6)*

⁶ Tamonu samaatenu juuca, Jesuuri Pueyaso Secojouja tiajinia tiuquiquiaari. Tii niishitiojoriquiaari. Quiniqui quiriquiaari

pueyano, cuseetucojuara joojequetano na juaashiquia miaquetajara.

⁷ Moisés Rootasanojiniji niishitiojonaa, mariyata Fariseocuacaari Jesu shanacutariquiaa. Nocuara tonujunu paniriquiaari Jesu jaara cuseetucojuara joojequetano juaashiquiaraca pueyano jeebare samaatenu juuca. ⁸ Jesuuri tari niishiriquiaa taa nojori niishiriojoriquiaani. Jesuuri cuno rimiajatucojua pueyano sequeree:

—¡Quia sanere! ¡Nya quia nujuasee pueya tajinia!

Pueyanoori sanequee. Nujuaseeri tee Jesu sequequiaari na nujuanracuajani. ⁹ Jesuuri nocuara tonujunu panijiaca pueya sequeree:

—Nia nequesotareeraj. Cua sequere, ¿taa pa niishitiosaaquiaari Moisés Rootasanojinijini? ¿Paate maninia miya samaatenu juucani? ¿Paate sesa miya soj? ¿Cusosuhuate naatanijoshiya, puetushiyajanaa monu soj? ¿Taa nia sequeyani?

¹⁰ Jesuuri puetunu na shocuaqueya quiniaajanaa niquinijoree. Na nuhuaji cusoso sequeree:

—¡Quia juaashiquia quia shiitiore!

Pueyanoori na juaashiquia shiitioree. ¡Na juaashiquiaari ritia jeequee! ¹¹ Cuno pueyari jiyahohua juaquioree naa Jesu miishacaritij. Nojoriiri naa pocoojoquiaari tamajaaja: “¿Taa pa miiniutianiya socua cuno Jesuurini?”

*Jesu saquiriojosacari doce pueya na jiyaramiquishocoriquiano
(Mt 10.1-4; Mr 3.13-19)*

¹² Jiyacaritij, Jesuuri tamonu tuhuananuucua quiaquiaari, Pueyaso na secojonura. Puetunu niucuajanaa secojoriquiaa Pueyaso. ¹³ Jaara juhuaquequiaari, Jesuuri na tojitiajaca pueya sequequiaari nocua nojori nijionura. Puetunu nojorijinijiniojuanaa, Jesuuri nareja doce pueya saquiriojoriquiaari. Nojori sesojooreeri, “cua jiyaramiquishocoriquiano pueya”. ¹⁴⁻¹⁵ Nioori Jesu saquiriojosano pueya sesaca: Simón. Jesuuri na sesojoquiaarijuhua “Pedro”. Simón tarajanu Andrésri saquiriosaaquiaarijuhua, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnico. Nojuajaari Celote maanujiniji pueyano quiquiaari. ¹⁶ Santiago niyanu Judasri saquiriojosaquiaarijuhua, Judas Iscariotenio. Nojuajaari quiquiaari Jesu quiateriquiano mosocoriquiano.

*Jesu niishitiosacari queraatia pueya
(Mt 4.23-25)*

17 Na nuhuaji, Jesuuri tuhuananujiniji rosetaquiaariuhua na saquirijosano pueyata, jamatujiniara. Cuno jamatujinia, queraatia na nuhujinias pueyari tari nocuaji quiriquiaa. Mariyata jiyano hua queraatia pueyari tii quiriquiaa puetunu Judea jiyajinjinio, Jerusalén tiacajinjinio juhuaj, shoniniacu caminia shuriuquiumia quijiacajinjinio pueyanio. Saaja nio pojoriiri quiquiaari Tiro tiacajinjinio, mariyata Sidón tiacajiniji pueyanio. Puetunu cuno pueyajanaari cuniquiria nijoquiaari nojori tojiniuria Jesu, na cusionujiniji nojori naatanijiosaanurahuaj. Jesuuri nojori naatanijioree. 18 Naajuhuaj, taraatia samaruhua miishano pueyari naatanijiosaaquiaarijuhuaj. 19 Puetunu cusosuhuajanaari Jesu quianu paniriquiaa, naatanijiosano nojori quiniuria. Jesu cumaca aari jiyano hua poonijioriquiaa. Naaratej, puetunu pueyajanaari naatanijiosaaquiaa, saaja nojori quiasacari nojuaja.

*Jesu pohuatasano shuquiriaatia quijajiniji, taraatia quijajinjinio
(Mt 5.1-12)*

20 Na nuhuaji, Jesuuri na pueya niquirii na pocuanura. Naa sequereeri:

—Niaari Pueyaso shuquiritiasano, niaa jaara niishiri quia nioojia saaja sesa muijia. Niaa jaara niishiri nioojia naa quiyatej, niaari Pueyaso jiitiasano pueya quiniutianiya.

21 'Niaari Pueyaso shuquiritiasano, niaa jaara maninia muijia quiniucua jiaatiaa, taa miajeyano pueyano miaquesanoocua jiaatiaacuaani. Niaa jaara naa quiniucua jiaatiaa, Pueyasocuajaari nia jataniniutianiya maninia quihiara nia quiniuria.

'Niaari Pueyaso shuquiritiasano, niaa jaara sesa nia miiniu nuhuaji taraajequiaa. Niaari na nuhuaji saroojonutaniya nia shuquiriniutia, niaa jaara jiyanooshaaro hua.

22 'Niaari Pueyaso shuquiritiasano, pueya jaara nia niquinio paniyaquiri, pueya jaara nia taanuure, pueya jaara nia macaatiri, pueya jaara nia soore cua tojijiaca nia quishacari. 23 Niaa jaara naa miishaaretej, jiyano hua nia timiri. Nia jaacuatare nia shuquiriniutia. Niaa jaara naa nia miishacari rejeretajaca quiri, Pueyasoori nia niishishoo casaa racatasano jiitaa jiyocuacaanu, na niquitosocoriquiano niajaniya. Nia paraa supuetanaari naa taraatia miquiaari taricuacaanu Pueyaso sequenu panishano caminiuijuniaa pueyajuhuaj.

24 'Niaari saniniuuja taraatia quihiaca quiniutianiya, jamuejaca casamiriaca pueyanaa. Niaacuajaari tari shuquiriaatia quihiuanu, puetunu nia panishanojuanaa nia jiitiasacari.

25 'Taraatia quihiacaari niajaniya, cante sequejani: "Janiyacuaja maninia pueyanoni. Janiyatucua casaara paniri Pueyaso jiyanooniuaria janiyani?" Naa sequejaca pueyanaa, na nuhuaji, niaari niishiniutianiya niaari saaja sesoriquia pueya seque.

Taraatia quihiacaari niajaniyajuhuaj, jeya nia quiyaquishacari Pueyasora, saaja tamajaaja shuquiriaatia nia quiniuria nia cojesacari pueyaracaanu. Niaari na nuhuaji sapuenutaniya Pueyasooju nia quishacari pueyaracaanu.

26 'Taraatia quihiacaari niajaniya, puetunu pueyajanaa jaara maninia pohuataquiaa niajaniyajiniji, maninia nia cojiniucua cuno pueya, Pueyaso tojiyashijiaca pueyan. Cuno pojori supuetanaacuajaari naa

shuquiritiaquiaari cuno sapojonuujuaca, canapuete maja seetanujuanaa Pueyaso sequesano caminiuijuniuaa quiquiaaricuajani.

*Pa paraa panijiaca pa quirij
(Mt 5.38-48; 7.12)*

²⁷ 'Niajaniya, cante niya cua tojitiaacuajani, cua tojitiuri. ¡Nia paraa nia paniri! Maninia nia miiri nia niquiniu paniyashijia pueya. ²⁸ Saaja maninia nia riucuare nia juayano pueyano. Sesa nia miijiaca pueyacuara nia secojore Pueyaso. ²⁹ Pueyano jaara quia maseca piri, quia jiyanoori nojuaja. Jaara taquijiria pirijiuhuaj, socua quia jiyanoori. Majaari na naminiu. Pueyano jaara shiniquiaacuaji quia cushishano toque jaariutiare, quia cacojoqui quia niquitiorejuhuaj. ³⁰ Pueyano jaara quia sequere quia casamijiniji quia niquitionura nojuaja, quia niquitiore nareja. Pueyano jaara quia casaa jaariutiare, majaari na sequenu: "Cua niquitiorohua". ³¹ Maninia nia miiri tamasaca, taa nia paniquiaa tamasaca miiniuria niajaniyacuaani.

³² 'Niaa jaara saaja nia panijiaca paniriquia, majaari nia jiyaniniu Pueyasoori nia shuquiritiaa naa nia miishacari. Sesa miijiaca pueyari naa paniquiaa nojori panijiacajuahuaj. ³³ Maja puera maninia miijia niajaniya, niaa jaara maninia miiquiaa saaja noo pojori, canapuete maninia miiquiaa niajaniyacuaani. Sesa miijiaca pueyari naa maninia miiniu niishiquiaajuhuaj, noo pojori canapuete maninia miiquiaa nojoricuuaani. ³⁴ Maja puera maninia miijia niajaniya, niaa jaara nia masena niquitioquiaa na panishano, nia niishishacari nojuaja ritia niquitionutaniuhua niajaniyajiniji na masesano casaa. Sesa miijiaca pueyari na casaa rupaquijira niquitioquiaa narta sesa miijia pueyajuhuaj, na niishishacari nojori ritia niquitionutaniuhua nojori masesano casaa rupaquijira. ³⁵ Nia paniri nia paraa. Maninia nia miiri nojori. Nia casami nia niquitiore nareja, pueya jaara na paniya rupaquijira. Majaari nia taraajenu cuno pueyano jaara nia niquitioyaquiriohua nia casaa. Naa nia miishacaritij, niaari seetanujuanaa Jiyocuacaanu Quijia muerasu. Pueyasoori socua jiyanoqua queraatia nia niquitionutaniya tamasaca nia niquitosanojiniji. Naaratej, capora nia quiri, taa nia Que Pueyasocuaani. Nojuajaari nareja niquitiojoquiaa sesa miijiaca pueya, mariyata canapuete na sequeyashijiacani "paacarasho". ³⁶ Naaratej, jiyanoootio nia quiri, taa nia Que Pueyasocuaani, jiyanoojia.

*Maja sesa nia niishiriojonu niarta pueyanooocuara
(Mt 7.1-5)*

³⁷ 'Maja nia rimiaaquenu tamasacaacuara, Pueyaso mariqui saniniujia nia jiyanoquaquiriiri. Niaa jaara tamasacaacuara tonujiyashijia quiri, naajuhuaj, Pueyasoori maja na saneenu quiniutianiya sesa nia miishanojuhuaj. Niaa jaara jiyanoootio quiri, Pueyasoori nia jiyanooniutaniyajacuhuaj. ³⁸ Niaa jaara tamasaca niquitioquiaa na panishano, Pueyasoori naa nia niquitionutaniya nia panishanojuhuaj, maninia shanacusano, jiuuquiutiasano, maninia quianujusano, mishaja quera niitiyano. Pueyasoori mariyata juhua nia shanacutajajinia niquitionutaniya niajaniya, taamueca shanacutajajinia nia niquitioquiaa pueyacuaani.

³⁹ Jesuuri socua niishitiojoquiaari pueya, nio miriqui sequesanota:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutaniya raama.⁴⁰ Pueyanoori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiya-jaariuhuaj, juhua na niishitiojonaja.

⁴¹ '¿Casaara nia niquia rucucua maano quia tarajanu namijajiniani, niaa jaara puereetuua maca jiiitaa tama nia namijajinijaaja? ⁴² Niaa jaara puereetuua maca shanacuya tama nia namijajinijaaja, ¿niaatucua casaara sequere quiarta pueyanoni: "Cua tarajanunaa, cuno rucucua pa taquiri quia namijajiniji"? Sesa jiuujiaracanaa, tama nia namijajiniji jaaja nia pare coteenu cuno maca. Na nuhuaji cutara nia naata maninia niquinii, cuno rucucua nia taquiniuria nia tarajanu namijajiniji. Naaratej, majaari nia rimiaaque niaartaa pueyanoocuara.

Naanaari niishishano na jajaujiniji

(Mt 7.17-20; 12.34-35)

⁴³ 'Maninia naanaari maja na naata piiquia jajau muetunu. Saniniujuja, sesa naanaari maja na naata shoqueeca jajau muetunu.

⁴⁴ Puetunu naanajanaari maninia niishishano na muetusanojiniji. Majaari pa naata satuna carojonu shuuniajiniji. Naajuhuaj, majaari pa naata tuhuaracona carojotanu saarianajiniji. ⁴⁵ Naajuhuaj, maninia pueyanoori maninia pocuua cutara, maninia jiuujiaraca na quishacari. Sesa pueyanoori saniniujuja sacuaraatia rimiaaqueja, sesa jiuujiaraca na quishacari. Casaa pa niishiriojoquiaa poojajiniani, paari cuno pocuani.

Miriqui Jesu pohuatasano cumueeca jiyajiniji, sasaca jiyajinijinio

(Mt 7.24-27)

⁴⁶ ¿Casaara nia sequequiaa janiyani, "Cua jiyaniijianaa, cua jiyaniijianaa", niaa jaara cua rootasano tojitiaaquiquiaa? ⁴⁷⁻⁴⁸ Cua tojiri. Cante cua rupuenara quirii cua rootasano tojijia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinija na morijiucuaji. Na nuhuaji, moo jaara pajaashiquiaari, pajaacaari jiyanoehua cajiquiaari cuno tiaacua. Naajaa, majaari na mueecurujutanu quiquiaari, maninia nujuatejosano na morijiucua quishacari cumueeca jiyajinija. ⁴⁹ Saniniujuja, cante najuhuana cua niishitiojosano tojiyaquiaa, na miyaquishacari cua sequenceso, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinija. Na nuhuaji, moo pajaashishacari, pajaacaari jiyanoehua cajiquiaari cuno tiaacua. Cuno tia pojoretaquiaari. Pajaari cuno tia niyartaquiaari puetunujuanaa.

7

Jesu naatanishacari Romano capitán seru

(Mt 8.5-13)

¹ Jesu jaara pueya niishitiojonu puecaquiaari, na pueyata quiaaree Capernaum tiacajinariai. ² Romano soldadohua capitánri quiniqui quijia quiquiaari. Jiyanoehua na parishano seruuri cusosu matariquiaa. Quera cusoriquiaari. ³ Capitán jaara tojiquiaari Jesujiniji, nojuajaari Judiocuaca camarucua jiyaramiquiaari Jesuucua, nojori sequenura

Jesu cuaara niiria nocua na seru na naataniniuria. ⁴Judiocuaca camarucuaari Jesuucua quojoquiaari. Nojoriiri juhuacatecara Jesu secojonu coteequiaari jiyanohua, nojoritia na quianura. Nojoriiri Jesu sequeree:

—Cuno Romano capitánri canaa jiyaroreeni, ¡nojuajaari jiyanohua maninia pueyano! ¡Quenaaja quia miiri na panishano! ⁵Nojuajaari parta Judiocuaca panijia. ¡Nojuacuajaari Pueyaso secojojua tiatequiaari canaara tama na cumaneeccatajaaja!

⁶ Naacuajitij, Jesuuri nojoritia quiaquiaari capitán tiajiniara. Tari Jesu quishacari cateca na tiaacuara, capitánri na rupuenaa pueya jiyaroquiaari Jesuucua, nojori caminiujiuniuria na sequencesano Jesura. Naaratej, nojoriiri naa Jesu caminiujiushii capitán sequencesano:

—Jiyaniijanaa, capitán naa sequeya: “Cua Jiyaniijanaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tiajinia. ⁷Nocuaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru naatanura. Janiyari niishiyani, quiaa jaara naa sequere, cua seruuri naatanutaniuhua. ⁸Janiyari niishiyajaaniuahuaj, cuno cusonuuri quia tojiniutaniya taa cua tojiquiaa cua jiyaniijianucuacuana. Janiyari cua jiyaramiquishano soldadohua jiitiaajuhuaj. Janiya jaara tamonu sequereni, ‘Quia quiaare’, nojuajaari quiaqueequiaa. Janiya jaara tamonu sequereni, ‘Miji’, ritia nimiaquiaari. Janiya jaara cua seru sequereni casaa na miiniuria, ritia na miyari. Niishiyanjia quiaari jiyano cumaacaracajuhuaj”.

⁹ Jesu tojishacari cuno pojori caminiujiushano capitán sequencesano, Jesuuri jiuujiateree. Jesuuri na nuhuajiniae pueya niquinijoree. Nojori sequereeri:

—Seetanujuanaa nia sequeyanijia, puetunu parta Israel pueyajinijiniojuanaani, ¡majaari quenaaja cua niquiniu quiqianu Pueyasoocua tiuujia pueyano juhua nio tahue!

¹⁰ Capitán jiyaramiquishano pueya tiuquijiosacariuhua capitán tiajiniohua, nojoriiri Capitán seru niquishuhua tariucua naatanohua.

Jesu samiitianishacariuhua mashiquio niyanu

¹¹ Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriquiaajuhuaj, socua queraatia tamasaca pueyanio. ¹² Nojori catecanosacari Naín tiacaacua, Jesuuri pueya niquiquiaari macu pataano jamosocoriquiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucuata macu nuhuaji sacuariquiaa, jamajiniara nojori quiojosacari. ¹³ Jesu niquishacari mashiquio, nocua taraajereeri. Na sequereeri:

—Maja nujuquenu.

¹⁴ Jesuuri macuucua catecanoree. Macu quiqio quiatareeri. Na patanaari pootia na nujuataquee. Jesuuri macu sequeree:

—Mashajanaa, janija quia sequeyani: “¡Quia sanerel!”

¹⁵ ¡Macuuri cajiquii! Juhuacatecara pocuareeri. Jesuuri na nucaacua na jaatucuree. ¹⁶ Puetunu pueyajanaa jaara naa Jesu miishano niquiquiaari, jiyanohua pueretureeri. Nojoriiri Pueyaso shuquiritiaree jiyanohua. Na puerenuta sequetureeri:

—¡Pueyaso sequenu panishano caminiujiuniaqui niya supueree pa tajinia! ¡Jiyanohua cumaacaraca!

Nojoriiri naa sequetureejuhuaj:

—¡Pueyasoori shusha quiarijia na saquiriojosano Israel pueya niishiri-ohuacuhuaj, na cumaquiniuria pajaniyal!

¹⁷ Jesujiniji pueya pohuatasanoori caminiujiushaaquiaari puetunu Judiocuaca jiyajinajanaa, mariyata puetunu na shocuaqueya jiyacajini-aianaanio.

Tiuquinijiona Juan jiyaramiquishano pueya nequesoreesacari Jesu (Mt 11.2-19)

¹⁸ Tiuquinijiona Juan pueyari puetunu Jesu miishanojuanaa po-huataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

¹⁹ —Jesuucua nia quiaare. Niocua na seqesee: “¿Quiaate seetanu-juanaa Pueyaso Jiyarosano, tariucuacaanu seqesano niriquianotej, tamonute sashishiyajaara soj?”

²⁰ Naaratej, Tiuquinijiona Juan jiyarosano pueyari Jesuucua quiojo-quiaari. Na sequetuseeri:

—Tiuquinijiona Juanri canaa jiyaroree quiocuani, canaa nequesota-nura quiajaniya: “¿Quiaatena Cristo, Pueyasojiniji niriquianotej, canaate tamonu sashiyajaara soj?”

²¹ Nojori tiuquijiosacari Jesuucua, jiyacaritij, Jesuuri queraatia pueya naatananjioree nojori niquiara; cusosuhua, pueyaracaanu nootunejaca, samaruhuaraca pueyanio. Mariyata queraatia cariyojuarujuri jiyatero-hua niquijiacaraari. ²² Na nuhuaji, Jesuuri naa Tiuquinijiona Juan pueya sequerree:

—Nia quiaarohua. Tiuquinijiona Juan nia pohuatasuhua taa nia niquiicuajani, nia tojishanonio. Nia seqesuhuanoj: “Cariyojuaru-juriiri niquijiacara quiriohua. Shipiiniuquijuiuniaari maninia rucooro-hua. Lepra cusotajacaari cushiriitishaarohua juhua juhuanaraja nojori quiniuhuara. Numueejunucuari tojijiacara quiriohua. Macunucuari samiitianijiosarohua. Casamijiuniucua pueyari Pueyaso rupaa pohu-atasaree, Pueyaso pueyara nojori jiyatesaanura. ²³ Shuquiriaatia quijia cutaraari nooj, cante cucua tiuuniu tarinitiaaquiyaní”.

²⁴ Tiuquinijiona Juan jiyarosano pueya jaara quiojoquiaariuhua, Je-suuri juhuacatecara pueya pohuataree Tiuquinijiona Juanjiniji. Jesuuri naa nojori nequesotaree:

—¿Casaa niquiniuucua nia quiojocanu cariiquia jiyajiniani? ¿Niaate noojia niquijoteja niquiniuucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua. ²⁵ ¿Casaa niquiniuucua nia quiojocanunitioj? ¿Niaate maniniuqui toque cushijia niquiniuucua quiojocanu? Niaacuajaari niishiya, shanohua toqueya cushiyonuujuacaari saaja jiyajinijianucua tajinia quiyano niquishano. Nojoriiri tama na panishanojuaja mijiaca. ²⁶ ¿Taateerinitioj? ¿Casaa niquiniuucua nia quiojocanuurini? ¿Pueyaso sequenu panishano caminiujiuniate quiquianu? Taaquiriirinij. Nia niquishano pueyanoori seetanujuanaa socua tojishano pueyano puetunu Pueyaso sequenu panishano caminiujiuniajinijianaa. ²⁷ Cuno Juanjinijicuajaari tariucuacaanu Pueyaso Rupaajinia naajiotasano quiquiaari. Pueyaso seqesano nojuajinijiiri naa naajiotasaquaaritij: “Cua sequenu panishano caminiujiuriquiano jiyaroyanija, na pueta-nura quiajaniya, nuu jeenucuariquiano quiocuaji”.

²⁸ Seetanujuanaa nia sequeyanijia, puetunu Pueyaso sequenu panishano caminiujuniaajinijiniojuanaani, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, Pueyasora, nojuajaari socua cutara pueyano Tiuquinijiona Juanjiniji.

²⁹ 'Puetunu pueyajanaa, mariyata cumaneeca masejonaa Roma tia-cajinia quija jiyaniijiarani, nojoriiri niishiqliuanu Tiuquinijiona Juan pohuatasano Pueyasojinijiri seetanu rupaajanaa quiqianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijiosaacanu.

³⁰ 'Saniniuuja, Fariseocuaca, mariyata Moisés Rootasanojiniji niishi-tiojonaani, nojoriiri Tiuquinijiona Juan pohuatasano ruuretacanu saaja. Naacuajitij, majaari nojori tiuquinijiosaanu quiqianu, nojori seetanu-ucua nojoriiri sesa miijiacajuhuaj. Nojoriiri Pueyaso miiniu panishano nojoriria soocanu saaja. Naacuajitij, majaari nojori jiyanooshaanu quiqianu.

³¹ Jesuuri socua sequeree:

—¿Quiarijia nio pa quishacari pueyarijijata? ³² Nojoriiri juhua naatu-joori, na tacuarishijionu panishacari, na cajitiushacari tiaca jiuujiajinia cajitiucuara curotasanojinia. Nojoriiri narta naatujooriicua nacaa: "Canaari juucua naajua jonenejiyani. Majaari nia nianujunu paniniu. Canaari taraatia jaaquequejosano jaaquequejiyani. Majaari nia sa-puenu paniniujiuhuaj". ³³ Naajuhuaj pueyanaa, niaari Tiuquinijiona Juan tojijaquiquianu Pueyaso rupaa na pohuatasacari nia niquiara. No-juaja cutaraari miaquesano miaqueyashijia quija, vino ratuyashijianio. Naaratej, niaari na sequeja, "samaruraca". ³⁴ Na nuhuaji, janiyari niquianuni. Janiyari saniniuuja miaquesano miaquejojuani, vino ratu-juajuhuaj. Cunora niaari cua sequequia: "Cunoori sacuaraatia mi-aquejoru, ratunu porocuanio, sesa miijiaca rupueja sacuaraatia, mariyata pa soosano cumaneeca masejonaa rupuenanio". Naa nia seque-sacaritij, niaari cua tojitiaaquiyajaacuhuaj. ³⁵ Naajaa, pueya jaara canaa pohuatasano tojijiaca quiri, jiyacari cutara nia naata niishiniu canaa niishitiosanoori seetanujuanaa Pueyasojiniji, cua tojijiaca jatasacari maninia quijiacara.

Jesu miaquesacari Fariseo Simón tiajinia

³⁶ Tamonu Fariseo pueyanoori Jesu masuuquiaari na tiajinia na mi-aquenura. Jesuuri na tiajinia quiaaree. Miaquenuuja shuriuquia-mia roshishiiri. ³⁷ Paanatuuri cuno tiacajinia quija quiquiaari. Na niishishacari Jesuuri cuno Fariseo tiajinia tiuquirii miaquenura, no-juajaari cuno tiajinia quiaquiaarijiuhuaj. Shitianiyojua seesariquiaja pataconiyojua cacatariquiaari, cohuaja saajiajiniji quejasano. Mishaja quiriquiaari shanohua jaanutajata. ³⁸ Maajiri Jesu cashacuucuma mojоquetasee. Nujuqueriquiaari. Na namijiaacaari Jesu niohuaca-acua totejoriquiaa. Naa Jesu niohuaca piquiojoreeri. Na nuhuaji, na muecacata na sacuanijiarohuari. Na niohuaca nujuureeri. Na shanohua jaanutaja totaree Jesu niohuacaacuaari. ³⁹ Cuno Fariseo pueyano niquishacari naa cuno maaji miishanotej, noojiajinia niishiri-ajoriquiaari: "Jesu jaara seetanujuanaa Pueyaso sequenu panishano

caminiujiunia quiri, mariqui niishiri cante na coyani, taamueca maa-jitijanojoni".⁴⁰ Jesuuri cuno Fariseo pueyano niishiriojosano ni-ishiriquiaa. Cunora na sequereeri:

—Simónnaa. Quia sequenu paniyanijia.

Fariseo pueyanoori Jesu riucuaree:

—Cua sequere, Niishitiojonanaa.

⁴¹ Jesuuri na sequeree:

—Caapiqui pueyanoori cumaneeca masequiaari rupaquijira tamonu cumaneeca niquitiojonajiniji. Niquiriyatu pueyanoori queraatia cumaneeca masequiaari, juhua quiniento juuca poonijiosanojiniji masesano. Tamonu pueyanoori masequiaari nareja juhua cincuenta juuca poonijiosanojiniji masesano.⁴² Na nuhuaji, nojori sequesano juuca jaara tari quiquiaari na camaru nojori niquitionuhuara na cumaneeca, majaari nojori jitianu quiquiaari cumaneeca. Naaratej, cumaneeca niquitiojonaari nojori sequeree: "Naajaa, maja socua nia niishiriojonu nia niquitionuhuara tarijia cua niquitiosano cumaneeca *niajaniya*". Cumaneeca niquitiojonaari naa cuno caapiqui pueya jiyanoocquiaari. Simónnaa, cua sequeretoj, ¿teyano cuno caapiqui pueyanojinijinote socua cuno cumaneeca niquitiojona panijiara quiniutianiyani?

⁴³ Simónri Jesu riucuaree:

—Cunocuajani, cante socua queraatia cumaneeca niquitiosaaquiaar-icuajani.

Jesuuri na sequeree:

—Taaquiriirinij.

⁴⁴ Jiyacaritij, Jesuuri cuno maajiicua tacateree. Simón sequereeri:

—¿Quiaate nio maaji niquia? Cua tiuquishacari quia tiajinia, majaari quenaaja quia niquitionu quirii mohuaca janiya, cua niohuaca cua jeequetajara. Nio maaji cutaraari cua niohuaca jeequeree na nami-jiaacata. Na sacuanijiarohua na muecacataari.⁴⁵ Majaari quenaaja quia nujuunu quirii janiya, quia saruhuatasacari janiya. Nio maaji cutaraari cua niohuaca nujuunequejoriquiaa pueyaracaanu, niya cua cajishacari.⁴⁶ Naajuhuaj, majaari quia totanu quirii muesu nunacu cua nacaacula. Nio maaji cutaraari cua niohuacaacua totaree shanohua jaanutaja.⁴⁷ Naaratej cua tojiri. Nio maajiiri jiyanohua sesa miijia quiriquiaa. Naaratej, jiyanohua cua paniyari puetunu sesa na miishano-jinijijiana cua jiyanooniuucua nojuaja. Saniniujia, cante secaja sesa na miishanojiniji jiyanooshaareeni, naajuhuaj, nojuajaari secaja panijia na jiyanoonia.

⁴⁸ Na nuhuaji, Jesuuri cuno maaji sequeree:

—Quiaacuajaari tari jiyanooshaaree sesa quia miishanojiniji.

⁴⁹ Narta masuusano pueya nata cajitiuyanoori juhuacatecara tama sequetooreejaja:

—¿Cantucuaa nio pueyanoni, sesa miijia jiyanooriquianoni?

⁵⁰ Jesuuri maaji sequeree saaja:

—Cucua quia tiuushacari, quiaacuajaari tari jiyanooshaaree. Juhua-janiya quia quiaarohua.

¹ Na nuhuaji, Jesuuri rucuanejoquiaari queraatia tiacajinia, shitianiy-
ojua tiacajinajuhuaj. Nojuajaari tii Pueyaso rupaa pohuatariquiaa,
taa Pueyaso jittianu paniya na muerasuni. Na doce saquiriojosano
pueyari na cojiriquiaajaacuhuaj. ² Noojaqueya maajipohuari na
tarajariquiaajuhuaj. Cuno maajipohuari tamaatia cusionujinji Jesu
naatanijiosano quiquiaari. Tii quiriquiaajaariuhua noo maajipo-
hua, Jesu nojorijinji tohuatanijioquiaari samaruuhatej. Nojorijinji-
jinoori quiquiaari María Magdalena. Jesuuri cuno Maríajinji tohu-
atanijioquiaari siete samaruuhua. ³ Quiriquiaajaariuhua Juana, Cuza
niquiocuani. Cuzaari jiyajinji Herodes jittiasano casami cojuana
quiquiaari. Susaanaari nojorijinjinio quiquiaarijuihuaj. Socua quer-
atia maajipohuari quiriquiaa. Puetunu cuno maajipohuajanaari Jesu
naacutaquiaari tama nojori jittiasano casaatajaja. Nojoriiri nera puer-
aquenuunaa quiquiaarijuihuaj, tiquiyocua nojori rucuanejosacari Je-
súta.

Jesu pohuatasano natoojona pueyanojiniji

(Mt 13.1-9; Mr 4.1-9)

⁴ Queraatia cuno jiya tiacajinjinio pueyari nijioquiaari nojori niquini-
uria Jesu. Jaara nocua rerequeejoquiaari queraatia pueya, Jesuuri
nojori niishitiojoquiaari miriqui, nio pohuatasanota. Nojori sequereeri:

⁵ —Tamonu pueyanoori na cuhuariquiajinia quiaquiaari natoojonu-
ucua. Na jacutasacari, secajaari totequiaari nucuaco. Tii rapi-
jiosaaquiaarii. Shuhuari na miojquiaari. ⁶ Tajaacaari toteree sai
tajinia. Cuno jajau jaara moritiaquiaari, ritia sorereeri puera joo-
juashiqui na quishacari. ⁷ Tajaacaari toteree riycuaca tajinia. Riyocua-
caari socua ritia maashiquiaari. Na natasanoori tarinitiucuara quirii.
⁸ Socua tajaacaari maninia jiyajinji toteree. Tii maashiquiaari manini-
aari. Queraatia mueturee cutaraari. Noojaqueya cuno nataujinijiiri
cien jajau quiquiaari niquiriyatu jiyonajinji.

Nio pohuatasano na puecasacari, Jesuuri na rupaa paaretaree. Naa
sequereeri:

—¡Nia jaara numaaraca quiri, nia tojitiare cua pohuatasano!

Casaarate miriqui pohuatasanoni

(Mt 13.10-17; Mr 4.10-12)

⁹ Na nuhuaji, Jesu pueyari na nequesotaree casaa na miriqui pohu-
atasano niishitiojonu paniyani. ¹⁰ Jesuuri nojori riucuaree:

—Niaari saquiriojosaaquiaari nia niishiniuria taa Pueyaso poonijija
pueya jiuujiajiniani, na muerasura nojori quiniuria. Cunoori tariu-
cuacaanu pueya niishishoo. Janiyari tamasaca pueya niquiara pohu-
ataquiaa miriqui cutarani. Naacuajitij, nojoriiri cua pohuatasano ni-
ishiyaquiquiaa na tojittiasacari. Naajuhuaj, cua cumaacata cua miishano
cariyoshituquiaari, nojori niquiara cua miishacari.

*Jesu niishitiojosacari na pueya, miriqui na pohuatasano natoojona-
jinji*

(Mt 13.18-23; Mr 4.13-20)

¹¹ 'Nia niishitiojoreera miriqui cua pohuatasano natoojonajinji.
Pueyano natoojosano jajauri juhua Pueyaso rupaa. ¹² Pueyano jaara
Pueyaso rupaa tojiri najuhuanaj, nojuajaari juhua nucuaco toteno jajau.
Sesaacaari nimiaa. Pueyaso rupaa na tojishano jaariutiarohua nooji-
ajinijiiri, maja nocua na tiuuniuria, nojuaja mariqui jiyanooshaareeri.

¹³ Sai tajinia toteno jajauri juhua noo pueya, canapuete Pueyaso rupaa tojiriini. Na nuhuaji, rupaquijia Pueyasoocua tiuuquiaa shuquiriaati-aari. Naa mijjiacaari juhua puera shiitianiyojua nujuacaraca. Naacuajitij, nojori jaara saninijuishaare, nojoriiri ritia Pueyasoocuaji rupatequiaa. ¹⁴ Riyocuaca tajinia toteno jajauri juhua noo pueya, canapuete maninia tojirii Pueyaso rupaani. Na nuhuaji, nojoriiri puera tacaaquiaa mijuria casaacua, casamiriaca nojori quiniuria, tama na cuaqueyajaaja nojori shuquiritiniuriajuhuaj. Naaratej, nojoriiri juhua muetuhuo natau quiya, tarinitiucuara riyocuaca tariyoshitishano. ¹⁵ Maninia jiyajinia toteno jajauri saninujujia juhua noo pueya, canapuete maninia tojitiareecuaja Pueyaso rupaani. Na racataa maninia noojajiniaari. Pueyaracaanu na tojitiaquiaari. Majaari na pishiniu Pueyasoocuaji. Naacuajitij, nojoriiri juhua queraatia muetujua natau.

*Pueyaso muerasuuri juhua samaritiu cuhuataja
(Mr 4.21-25)*

¹⁶ 'Majaari pueya noshitiniu quiquiaa samaritiu, na jamotasocoriquiano conatu cariquiaco, maquetu cariquiaconio. Samaritiu jaara noshitishaare, morijiucua morotashiyari na cuhuatanura, pueya tiuquitiasacari tiajiniaaco. Naajuhuaj, Pueyaso Rupaari pueya jiuujia cuhuataja. Cunora, Pueyaso Rupaa cuaara maatia pohuatasaaria puetunu pueya niquierajanaa. ¹⁷ Puetunu jamojosano casaajanaari riuriatasaanutaniya. Puetunu jiyasohuaja nia mijjiosanojuanaari niishishaanutaniyahuaj. Cuhuatasaanutaniyari maninia niquishocoriquiano. ¹⁸ Cunora, cua sequesano tojitiacija nia quiri maninia. Cante maninia jiitiae cua rupaani, nojuajaari socua na niishijiara jiyatesaanutaniya. Saniniujia, cante cua rupaa tojiyashijiani, secaja najuhuana na niishishanoori jaariutiasaanutaniya, puetunu shaquiriajanaa.

*Jesu tapueyocuaca tiuquijiosacari Jesuucua nojori nucuata
(Mt 12.46-50; Mr 3.31-35)*

¹⁹ Jiyacaritij, Jesu nucua Jesu tapueyocuacata tiuquijioquiaari Jesu quishaqui. Majaari nojori naata tiuquitianu quiriquiaa Jesuucua. Jiyanoqua queraatia pueyari nocuara ritiaquiriaa saaja tia tohuateyaji. ²⁰ Tamonuuri Jesu numooteree:

—Quia nucua quia tarajanuhuata jati carijiniacuma quiya. Quia niquitiuniu paniyaquinia.

²¹ Jesuuri tii quiniaai niquieria sequeree saaja:

—Canapuete seetanujuanaa Pueyaso Rupaa tojitijacani, nojoriiri cua nucua cutara, cua tarajanuhuanio.

*Jesu pueyajetesacari paratu, mohuacanio
(Mt 8.23-27; Mr 4.35-41)*

²² Tamonu juuca, Jesuuri botejinia tacataquiaari na saquiriojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niuutiariquiaa. ²³ Nojori niuutiasacari, Jesuuri maqueriquiaa. Canashiyaquiji paratuuri juhuacatecara piyarojonu co-teeree jiyanoqua. Mohuaca queyaqueteriquiaa bote jiniacumaraari. Boteeri quera tiuquitiariquiaa tari. ²⁴ Jiyacaritij, na pueyari Jesu niucuajasee ritia. Na sequetuseeri:

—¡Niishitiojonanaa! ¡Niishitiojonanaa! ¡Paa tari tiuquitiaani!

Jesuuri sanemaa. Paratu sequereeri, mohuacanio:

—¡Tariucuaja! ¡Nia surajere!

Paratu, mohuacaari ritia suraajequee. Paratu piyarojonuuri tajimiaa, caminia queyocuaanonio. ²⁵ Jesuuri na pueya sequerohua:

—Niaacuaja juucua Pueyasocua tiuujjaca. ¿Casaa nia tojetareerini?

Nojoriiri Jesuucuaji jiuujjatecoree. Shiriiquituriquiaari Jesu miishano nojori niquishacari. Tama nojorijaaricia nequesoreetooriquiaa:

—¿Cantucuaanojoni? ¡Paratu, mohuacaari na tojirii na sequencesacari!

Gerasa jiyajinjinio samaruhuaraca pueyanojiniji pohuatasano

(Mt 8.28-34; Mr 5.1-20)

²⁶ Na nuhuaji, nojoriiri shiitiaseequiaari Gerasa jiyajinia, Galilea jiya taquijiria. ²⁷ Jesu jaara rosequiaari botejiniji, jiyacaritij, samaruhuaraca pueyanoori nocua niquiaari, cuno jiya tiacajinjinio pueyano. Cuno pueyanoori pueyaracaanu samaruhuaraca quiquiaari. Majaari toque na cushiniu quijia. Naajuhuaj, majaari tiajinia na quiniu quijia. Saaja raacajinia quijsaari, macunucua nucuhua paaquiosaqui. ²⁸ Na niquishacari Jesu, na cariquimiaji mojoquetaseeri. Jesuucua nacareeri:

—¿Casaara quia niyaree miji canaa quia cushionurani Jesunaa? ¡Quia niishiyaniija! ¡Quiaacuajaari Jiyaniijajanaa Pueyaso Niyanu! ¡Cua tarinitiare quenaaaja! ¡Maja naquuya cua miinu!

²⁹ Samaruhuaraca pueyanoori naa sequeriquiaa Jesutej, Jesu sequencesacari tari nojuaja, cuaara tohuataara cuno pueyanojiniji. Samaruuri sequeyarucua cuno pueyano miitiquiaari sesa. Narta pueyari juucua na cashacucua, na numatucua morojoquiaari cumayocua jiyocua shipinishanota, na cojuasaanura maninia. Samaruhuaraca pueyanoori saaja na turojotaquiaari. Samaruuri na mashiquijia tiquiyocua, pueya quiyaquishaqui na quiniuria. ³⁰ Jiyacaritij, Jesuuri na nequesotaree:

—¿Taateja quia sesani?

Samaruuri na riucuaree:

—Cua sesa “Queraatia”.

Naa Jesu sequequiaariiri jiyahohua queraatia samaruhua na jiitisasacari. ³¹ Samaruhuari jiyahohua secojoree Jesu, maja nojori na jiyaronura puequeetuuju raama saniitiosocoriquiano. ³² Jiyacaritij, queraatia cushiyari miaquenuriquiaa cateca naataja, tuhuananujinia quiniqui. Samaruhuari cunora Jesu secojoree nojori na tiuquitianinuria cushiyajinia. Jesuuri nojori tarinitiaree. ³³ Cunora, samaruhuari pueyanojiniji tohuareetaquee. Cushiyajinia tiuquitiaeeri. Puetunu cushiyajanaari cocuateree. Tacojiniji totesee caminiajiniaari. Tii shushiniuriiri.

³⁴ Cushiya cojuanaa jaara niquiaari naa miishanotej, nojoriiri netecuatuquiaari na shiriiquiniutia, Jesu miishano nojori pohuatanura tiacajinia, cuhuariquiacajinajuhuaj, tee pueya quiriquiaacuajani.

³⁵ Puetunu pueyajanaari Jesuucua nijioquiaari na tiacajiniji, pueya po-huatanuusanojiniji nojori niquinuria. Nojori tiuquijiosacari Jesuucua, nojoriiri cuno pueyano niquishii, canajiniji samaruhua tohuareeta-reecuajani. Nojuajaari Jesu shuriucua cajiriquiaa toqueraca, panaatia na quishacariuhua. Naa pueya niquishacari nojuajatej, pueretuquiaari-ri. ³⁶ Jiyacaritij, Jesu miishano niquituniaari shusha nijiono pueya po-huataree taa samaruhuaraca pueyano naatanishaarohuani. ³⁷ Cunora,

puetunu Gerasa jiyajinijinio pueyajanaari jiyanohua puereturiquiaa. Naaratej, ¡Jesu secojotureeri na quianura nojori jiyajiniji! Naaratej, Je-suuri botejinia tacataquiaariuhua na pueyata na quianuhuara.³⁸ Cuno pueyano, canajiniji samaruhua tohuareetareecuajani, nojuajaari Jesu secojoree juucua nata na quianura. Jesuuri saaja naa na sequeree:

³⁹ —Quia tiajinia quia quiaarohua. Quia pueya niquiara quia pohu-atasuhua taa Pueyaso miirii maninia quiajaniani.

Pueyanoori quiaarohua. Puetunu na tiacajinajanaa pohuatasuhuari taa Jesu miiriucuaa maninia nojuajani.

*Jesu naatanishacari Jairo niyat, Jesu toque quiana maajinio
(Mt 9.18-26; Mr 5.21-43)*

⁴⁰ Jesu jaara niuutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa.⁴¹ Jiyacaritij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojojua tia jiyaniija quiquiaari cuno tiacajinia. Jesu cariquimiaji mojoquetaseeri na seco-jonura na tiajinia Jesu quianura.⁴² Neyatunyoyuuaari quera cusoriquiaa jiyacari. Majaari socua niquiohuaraca na quiniu quijia. Doce mariciaari tari shocojoquiaari cuno neyatu.

Jesu quiasacari Jairota, jiyanohua queraatia pueyari nata quio-joriquiaajuhuaj. Pueyari jiyanohua na tanuujuriquiaa, nata nojori quiojosacari nucuaco.

⁴³ Tamonu maaji cusosuuri cuno pueya tajinia quiriquiaajuhuaj. Doce mariciaari tari na shocojoquiaari pueyaracaanu na naatesacari. Cuno maajijiri puetunu na cumaneeca puecaquiaarijianaaj najuhuanaj, na naarajosaanura juucua. Naarajonaari maja na naata na naataniniu quiquiaari.⁴⁴ Maaji cusosuuri Jesu nijiniji catecanoquiaari nocua. Na tucuaque toque casaca quiaeet jiyasohuari. ¡Na nanacaari ritia cure-taquee!

⁴⁵ Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaniani.

Pedroori Jesu sequeree:

—Niishitiojonanaa, ¿majateeri quia niquinicuaja? Queraatia puey-acuajaari quia tanuujiya.

⁴⁶ Jesuuri saaja sequeree:

—Maja. Cusosu cua quiareeni. Niishiyanjia cua cumacaari tari na naatanirii.

⁴⁷ Maaji niishishacari na miishano jiyasohuaja tari niishishaaree, Jesuucua nimiaari. Na puerenuta tetecariaquiaari. Jesu cariquimiaji mojoquetaseeri. Puetunu pueya niquierajanaa pohuatareeri casaara Jesu na quiareeni. Pohuatareejaariuhuaj taa na naataquee ritiani, Jesu na quiasacari.⁴⁸ Jesuuri na sequeree:

—Sanaunaa, cucua quia tiuuniuucua, quiaari naatarohua. Quioojia quia cajitiriohua. Juhuajaniya quia quiaarohua.

⁴⁹ Jesu pocoojosacarijia cuno maajitia, tamonu pueyanoori tiuquiquiaari Jairo tiajiniji. Jairo sequeseeri:

—¡Quia niyat taru cusoquee! Maja najuhuana riniu paniniu Niishitio-jona quia tiajiniara.

⁵⁰ Jesu tojishacari cuno pueyano sequenceso, Jairo sequereeri:

—Maja puerenu. Cucua quia tiuuri saaja. Quia niyatucuaja naatanutaniuhua.

⁵¹ Jesu tiuquishacari Jairo tiajinia, nojuajaari maja na shanacunu quirii quenaaja tamonu pueyano tiuquiniuria macuucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuanio. ⁵² Puetunu tii quiniaas pueyajanaari maaji samiriucua nujuqueturiquiaa. Sapiyonuuriquiaajaariuhuaj. Jesuuri nojori sequeree:

—Maja najuhuana nia nujuqueno. Maaji samiriu maja macu, nareja maqueyano.

⁵³ Naa Jesu sequencesacaritij, pueyari na saroojotaree saaja. Nojoricuajaa ri niishiriquiaa maaji samiriuri seetanujuanaa macu quiriquiaa.

⁵⁴ Jiyacaritij, Jesuuri macuucua tiuquiquii. Na juaashiquajiniji na quiasereri. Jiyanoehua na sequereeri:

—Maaji samiriuniaa, ¡quia sanere!

⁵⁵ Na sohuanuuri nocua tacatemohua jiyacari. Samiitiamohuari. Ritia sanequeeri. Jesuuri na nucua sequeree na mianuutenura. ⁵⁶ Na queyari jiyanoehua jiuujiateree. Jesuuri nojori sequeree, maja nojori pohuatanura tamasaca niquiara na miishano.

9

Jesu jiyaramiquishacari na doce pueya Pueyaso rupaa nojori pohuatanura

(Mt 10.5-15; Mr 6.7-13)

¹ Jesuuri na doce saquiriojosano pueya rerejotequiaari na jiyaramiquishocoriquiano. Nojori niquitioree cumacaaci, puetunu tamaatia sesa samaruuhajanaa nojori tohuatejonura, cusosuhua nojori naatanijionurajuhuaj. ² Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanooni paniya nojorini, na muerasu nojori quiniuria. Nojori jiyaramiquirijaariuhua cusosuhua nojori naatanijionura. ³ Jesuuri nojori sequeree:

—Maja nia panu nia rucuanejotajara nia panishano. Majaari nia miojotu nia panu, nia caashoque, nia coseyaca, nia cumaneecanio. Saa nia cushishano toquetaja nia quiaare cutara. Maja socua toque nia panu nia cushishocoriquiano. ⁴ Niaa jaara tamonu tiajinia tiuquishiiquia, niocua cuniqui jiyojetaseequiaja, niaa jaara cuno tiacajiniji quiaarejaatijia. ⁵ Niaa jaara tamonu tiacajinia tojiniu paniyaquishaare, cuno tiacajiniji nia quiaare. Nia nuhuajiria, cuno pueya niquiara niocua nia niokuacajiniji cuno tiaca jaaquia nuutare. Naacuajitij, cuno pueyari niishiniutaniya, Pueyasoori nojori jiyanoayaquiniutaniya, nojori tojitanu paniyaquiniuucua Pueyaso rupaa pohuatanaa.

⁶ Na nuhuaji, Jesu pueyari quiojoquee puetunu cuno jiyajinia shiitaniyojua tiacajinajanaa, Pueyaso rupaa nojori pohuatanura tii. Nojoriiri Pueyaso rupaa pohuatanuuquiaari pueya jiyanooshaanura, Pueyaso pueya nojori quiniuria. Naajuhuaj, cusosuhua naatanijiotuquiaariiri.

Jiyaniijia Herodes niishiniu panishacari cante Jesuni
(Mt 14.1-12; Mr 6.14-29)

⁷ Jiyaniijia Herodesri pohuatasaaquiaari puetunu Jesu miishanojiniji-jianaa. Herodesri saaja jiyajenequiaari cante Jesuni. Jiyacaritij, nooji-aqueya pueyari sequeriquiaa: “Jesucuajaari jiyaniijia Herodes nacatan-ishano Tiuquinijiona Juan samiitianohua”. ⁸ Tamasaca pueyari Jesu-jiniji sequeriquiaajuhuaj: “Supuetana Elíascuaja tari tiuquiriohua”. No-juacuajaari tariucuacaanu Pueyaso sequenu panishano caminiuijunia quijia. Saniniujija, tamasaca pueyari sequeriquiaajuhuaj: “Jesucuajaari tamonu tariucuacaanu Pueyaso sequenu panishano caminiuijunia samiitianohua”. ⁹ Herodesri saniniujija sequeree:

—Janiyacuajaari cua pueyano jiyarocanu Tiuquinijiona Juan na nacatanurani. ¿Cantejaara cuno Jesuni? Janiyari queraatia nocuaji tojiniuyani.

Cunora, Herodesri jiyanolhua Jesu niquiniu paniriquiaa juucua.

Jesu mianuutesacari cinco mil pueya

(Mt 14.13-21; Mr 6.30-44; Jn 6.1-14)

¹⁰ Jesu jiyaramiquishano pueya tacatesacariuhua, nojoriiri Jesu pohuataquiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. ¹¹ Pueya niishishacari tee Jesu quiriquiaani, nojoriiri saaja nocua quiojoquiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijoreejuhuaj.

¹² Tenacariishacari, Jesu doce pueyari nocua catecanoquaari. Na sequetureeri:

—Pueya quia jiyaramiquiri cateca tiacajinia, nojori cuaara cuniqui pajenuura na miaqueniusocoriquiano, na maquetujuarajuhuaj. Nojori panishanoori shaaci niya pa quishaquini.

¹³ Jesuuri nojori sequeree saaja:

—Niaa mariqui nojori mianuutere saniya.

Nojoriiri Jesu sequeturee:

—¿Canaateeri miaquesanoracajaarani? Canaa saaja cinco pannijo-juja jiitiaani, caapiquiriyatu sapitiaajanio. ¿Canaateeri seacija pa cumaneecata masenutaniya queraatia miaquesano puetunu nio pueyara-janaani?

¹⁴ Cuniqui nojoritia quiriquiaa naasucuaari cinco mil pueya. Jesuuri na pueya sequeree:

—Pueya nia raquiriojotare maninia. Cuaara cajitiuria cincuenta ja-tiqui, socua cincuenta tamaqui. Mianuutesocoriquiano puetunu pueyajanaaa, cuaara naa cajitiuriatej.

¹⁵ Nojoriiri Jesu sequenceso miirii. Puetunu pueyajanaari cajitiurii. ¹⁶ Na nuhuaji, Jesuuri cuno cinco pan pataree, caapiqui sapitiaajanio. Jiyocuacaanu maureeri na Que Pueyaso na secojonura miaquesanoocuara. Na nuhuaji na neecasereeri. Na pueya na niquitioreeri puetunu pueyajanaa nojori serotasocoriquiano.

¹⁷ Puetunu pueyajanaari na miaquenuree. Maninia tooquioreeri. Na nuhuaji, doce canaasatuuri mishinijiosaaquiaari pan raacuata, sapitiaaja raquiquiatamio.

Pedro sequencesacari Jesuuri seetanujuanaa Cristo

(Mt 16.13-19; Mr 8.27-29)

¹⁸ Tamacari, Jesuuri Pueyaso secojoriquiaa tamajaaja. Na saquiriosano pueyari nata quiriquiaa. Jiyacaritij, Jesuuri nojori nequesotaree:
—¿Taa pueya sequequiaa janiyani, cantena janiyani?

¹⁹ Nojoriiri na riucuaree:

—Noojiaqueya pueyari quia sequequiaa, quiaana nacatasano samitianohua Tiuquinijiona Juan. Tamasacaari quia sequequiaajuhuaj, quiaana Elías, tariucuacaanu Pueyaso sequenu panishano caminiuijunia. Tamasacaari saniniuuja quia sequequiaa, quiaaa naasucuana tamonu tariucuacaanu Pueyaso sequenu panishano caminiuijunia samitianohua.

²⁰ Jesuuri saniniuuja nojori nequesotaree:

—¿Niajaniyariuhuaj? ¿Taa nia sequeyani, cante janiyani?

Pedroori na sequeree:

—Quiajaniyacuajaari Cristo, Pueyaso Jiyarosano.

²¹ Jesuuri jiyanohua nojori rootaree maja nojori pohuatanura tamasaca niquiara cante nojuajani.

Jesu numootesacari na pueya, nojuaja mosaanutaniya

(Mt 16.20-28; Mr 8.30-9.1)

²² Jesuuri naa nojori sequeroahuacuhuaj:

—Janiyari jiyanohua naquiya miishaanutaniyani. Pa Judiocuaca camarucuaari cua niquiniu paniyaquiniutianiya, na tojitianu paniyaquishacari janiya. Naajuhuaj, pa pueyacuara secojonaa jiyanijianucuaari cua niquiniu paniyaquiniutianiya, Moisés Rootasanojiniji niishitiojonaanio. Nojoriiri cua monutaniya. Naajaa, juujianaraca juucajinia, janiyari samitianutaniuhuani.

²³ Na nuhuaji, Jesuuri puetunu pueyajanaa sequeree:

—Cante cua nuhuajiniu paniyani, cua pueyano na quiniuria, nojuaja cuaara niyajetaara tama na miiniu panishanojuaja. Cuaara panitiaara tama na cuaqueyajaaja puetunu juucajanaa, cua tojjia na quiniuria seetanujuanaa. ²⁴ Saniniuuja, cante tama na cuaqueyajaaja shuquiritiniuria niishirijoquiaani, nojuajaari jiyanohua taraatia quiniutianiya na nuhuaji. Saniniuuja, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. ²⁵ Pueyano jaara puetunu nio jiya casamijiana jiitiana quiri, cuno maara nahuuhuana quiri, nojuaja jaara na shaajesacari jatasare mani quiqiojinia Pueyasooju. ²⁶ Cante cua seera caririquiya mijiria quiniaa pueya niquiara sequenurani, janiyari nojori jiyanijiani, naajuhuaj janiyari nojori seera caririquiniutianiyan cua tiuquishacariuhua Jiyaniijia cua quiniuria. Janiyari shanohua niquishano quiniutianiya cua tiuquishacariuhua cua Que shacantuca cumaacatani, na seja cumaacatajuuhuaj. Naajuhuaj, cante cua rupaa pohuatanu caririquiya sesa mijaca pueya niquiarani, janiyari nojori seera caririquiniutianiyanjuuhuaj. ²⁷ Seetanujuanaa nia sequeyanija, noojiaqueya niajaniyajinijiniori maja nia cusionuunu quiniutianiya juhuanojuaja, niaa cuaara niquirijiaatija Pueyaso cumaaca tiuquiyano cucua, na muerasu jiitariquianoni.

Jesu jatasacari shacantuucara

(Mt 17.1-8; Mr 9.2-8)

²⁸ Naa Jesu sequenu nuhuajitij, ocho juuca nuhuaji, nojuajaari tuhuanuuucua tacaquiaari na Que Pueyaso na secojonura. Nata quiaareeri

Pedro, Santiago, Juannio. ²⁹ Jesu secojosacari Pueyaso, na jiquiocoori tamaatiara jataquiaari. Na toqueeri jiyanohua cohuajara jataquiaari jihuaj, shacantuquera. ³⁰ Jiyacaritij, caapiqui pueyari nocua metaquiaari. Jesuta pocoojoriquiaari. Nojoriiri quiriquiaa supuetana Moisés, supuetana Eliasnio. ³¹ Nojori nujuatusaquiiri shacantuca quiriquiaa puetunu nojori shocuajanaa. Nojoriiri pocoojoriquiaa taa Jesu mosaanutaniya Jerusalén tiacajiniani. ³² Jiyacaritij, Pedroori jiyanohua maquenuujuriquiaa, nata quiniajahuaj. Naajaa, majaari nojori maquenu quiriquiaa. Naacujitij, nojoriiri Jesu shacantuca niquiquiaari. Cuno caapiqui supuetanaa niquiturijiaariuhuaj, Jesuta pocoojiyano. ³³ Cuno caapiqui pueya quiononu panishacariuhua Jesu shuriucuaji, Pedroori Jesu sequeree najuhuanaj:

—¡Niishitiojonanaa, canaa namitia niya quiyani! ¡Canaa suhuororeera jiuujianaraca suhuorotucua; quiara, Moisésra, Eliásranio!

Pedroori naa najuhuana pocuariquiaa. Majaari na niishiniu quiquiaari casaa na sequeriquiaani. ³⁴ Pedro pocuasacarijia, cohuaja najacaari nojori mishiquomaa. Nojoriiri puereturiquiaa cohuaja najacajinia nojori quishacari. ³⁵ Na nuhuaji, nojoriiri Pueyaso tojirii pocuaano cuno cohuaja najacajiniji. Naa sequereerii:

—¡Nioori cua Niyano, cua saquiriojosano nia Jiyaniijia na quiniuria! ¡Nojuaja nia tojitiare!

³⁶ Naa nojori tojiniu nuhuaji cuno rupaatej, nojoriiri Jesu niquiriohua. Tari tamajaaja nujuariquiaari. Nojoriiri sanaa na niquitariquiaa. Na nuhuaji, majaari quenaaja tamonu nojori pohuatanu quiquiaari nojori niquishano, Jesu jaara samiitiaquiaariuhuaatijiaj.

*Caya samijajiniji Jesu tohuatesacari samaru
(Mt 17.14-21; Mr 9.14-29)*

³⁷ Tariqui, nojori jaara rosetaquiaariuhua tuhuananujiniji, queraria pueyari Jesuucua nijioquiaari. ³⁸ Cuno pueya tajiniji, tamonu pueyanoori naa nacaquiaari:

—¡Niishitiojonanaa, cucua quia taraajere quenaaja! ¡Cua niyanuniojua quia niquiri! ¡Jiyanojuanaari quiyanuniojua! ³⁹ ¡Samaruuri na miiquiaa taraatia! ¡Na sariyotequiaari! ¡Na taquiriocuatequiaajaariuhuaj! ¡Na rupaamajiiri cushaaquiaa! ¡Na cuaqueya miiquiaa moquituriuriaari! Majaari ritia na cartenu paniniu quiquiaa. ⁴⁰ Janiyari juucua quia pueya sequereeni, cuno samaru nojori tohuatenura. Majaari nojori naata quiriquiaa na tohuatenura.

⁴¹ Jesuuri sequeree:

—Pueyaso tojitiaashijiacanaa, niaaqui Pueyasocua tiuyashijiacahuanaajaj. ¿Janiyateeri pueyaracaanu rejeretanutaniya niajanianyi? Miji quia niyanu quia jaatucure.

⁴² Caya samijia catecanosacari Jesuucua, samaruuri na pojotequee. Na taquiriocuatereeri. Jesuuri samaru sequeree na tohuatanura. Caya samijia naatanirri. Na niquitiorohua na queeri. ⁴³ Puetunu pueyajanaari jiyanohua jiuujiateree nojori niquishacari Jesu miishano Pueyaso cumaacata.

*Jesu pacutesacari pohuatanu nojuaja mosaanutaniya
(Mt 17.22-23; Mr 9.30-32)*

Pueya jiuujiatesacarija puetunu Jesu miishanojinijianaa, Jesuuri na pueya sequeree:

⁴⁴—Maninia nia tojiri casaa cua sequenutaniya niajaniyani. Majaari na niyajetanu. Janiyari niquitiosaanutaniyani pueya miiniuria janiya taa nojori paniyacuajani.

⁴⁵ Majaari na pueya niishiniu quiriquiaa Jesu sequencesano. Juhua miriqui sequencesanoori quiriquiaa nojoriria. Naacuajitij, majaari nojori naata niishiniu quiquiaari. Nojoriiri Jesu nequesotanu puereturiquiaajuhuaj, casaa nojori na pohuatasano sequenu paniriquiaani.

Cante jiyanijijajanaa cutarani

(Mt 18.1-5; Mr 9.33-37)

⁴⁶ Jesu pueyari juhuacatecara juayonuutariquiaa teyano nojorijinijiniote jiyanijijajanaa quiniutianiyani. ⁴⁷ Jesuuri nojori niishiriojosano niishirii. Naaratej, Jesuuri naatujua nujuateree na shuriucua. ⁴⁸ Na pueya sequereeri:

—Cante nio mueya rupueya na cumaquinuria cucua tiuujia cuno mueya quiniuucuani, nojuajaari cua rupueyajuhuaj. Cante cua rupueyani, cua Jiyarona rupueyajaariuhuaj. Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuani, nojuajaari jiyanijijajanaa quiniutianiya puetunu narta Pueyaso muerasujinijiniojuanaa.

Cante maja pa paracani, nojuajaari pa jiyano

(Mr 9.38-40)

⁴⁹ Juanri Jesu sequeree:

—Niishitiojonanaa, canaari pueyano niquiriucuaani samaruhua tohuatanijiyano quia cumaacata. Canaari na tenujurucuaani nojuaja quiyaquinuucua pajaniyajinjinio.

⁵⁰ Jesuuri na riucuaree:

—¿Casaara nia tenujurucuaarinioj? ¿Niaateeri niishiyaquiya, cante pa paraca quiyaquiyan, nojuajaari pa jiyano?

Jesu nacasusacari Santiago, Juannio

⁵¹ Quera Jesu tacanu panishacari jiyocuacaanu, nojuajaari juhuacatecara Jerusalén tiacajiniara quiaaree, juhua jiuujiaaju na puereyaquinuitia. ⁵² Jerusalén tiacaacuara nuu cajiniocua Samaria jiyajinia Jesu quishacari na pueyata, noojiaqueya na pueyajinjinio puerateree tamonu tiacajinia nojori masenura tia nojoriicuajiri. Naacuajitij, na pueyari Samaria jiyajinia quijia shiitaniyojua tiacajinia quiojoquiaari tii Jesu maquejara nojori pajenura. ⁵³ Cuno Samaria pueya jaara niishiquiaari Jesuuri Jerusalén tiacajiniara quiariquiaa, majaari nojori paniniu quirii Jesu maquenura nojori tiacajinia. ⁵⁴ Santiago, Juan niishishacari cuno Samaria pueyari nojori sooriquiaa, nojoriiri cunora Jesu nequesotaree:

—Jiyanijijanaa, ¿quiaate paniya canaa tininiuria mani jiyocuacaanuji, cuno pojori na catijianura, taa tariucuacaanu Pueyaso sequenu panishano caminiuijunia Elías miiquiaaricuaani?

⁵⁵ Jesuuri nojoriicua tacateree. Nojori nacasureeri naa nojori sanititionu panishacari cuno Samaria pueya. Naa nojori sequereeri:

—Majaari nia niishiniu cana sohuanute naa nia niishiriojoteyani. Nia niishiri, majaari cua niniu quiquiaari mijiria cua puecoonura pueya. Saaja niquiaari cutaranijia, pueyacuaji cua tacunura.

⁵⁶ Na nuhuaji, nojoriiri tamonu shiitianiyojua tiacajinia quiojiyaree tii maquenura.

*Tamasaca pueya quiniu panishacari Jesu pueyara juucua
(Mt 8.19-22)*

⁵⁷ Nojori quiojosacari nucuaco, tamonu pueyanoori Jesu sequenciaari:

—Jiyaniijiana, quia pueyanora quiniu paniyanijia. Janiyacua quia tarajarenipuetunu tiquiyocua quia rucuanejosacarijiana.

⁵⁸ Jesuuri na riucuaree:

—Quoojuapueeri na raaca jiitaa cutara. Shuhuari na jesuhua jiitaa-juhuaj. ¿Saniniujuja Pueyaso Niyanuurijiataj? Majaari cua jiitianu tama cua maquejarajaaja.

⁵⁹ Jesuuri tamonu pueyano sequeree:

—Cua nuhuajiniara quia quiri.

Nojuajaari saa sequereeja:

—Cuaara Jiyaniijiana. Cua que cuara cua niquiara shaajeeraajaara. Janiya jaara na jamoren, janiyacua na nuhuaji quiata rucuanejore cutarani.

⁶⁰ Jesuuri na riucuaree:

—Naajaa, quia tarinitiare. Cua tojitiaashijiacaari juhua macunucua. Naaratej, cuno macunucua cuara jamoora tama narta macujuaaja. Quia rucuanejore cutara Pueyaso rupaa quia pohuatanura.

⁶¹ Na nuhuaji, tamonu pueyanoori Jesu sequeree:

—Jiyaniijiana, janiya cutara quiata quianu paniyani. Coteenu cua tiajinia quiqiooraj, cua pueya cua niquinuria cua nuhuajiria.

⁶² Jesuuri miriqui na riucuaree:

—Pueyano jaara na juyaca poonitijiya, jiya jiacataja na jayotanura na cuhuariquia na jeenucuanura, maja cumaati na nijiniara na niquinio. Na camaru jaara na nijiniara niquiri, sesa naaniutianiari shuyorocotiuycuara. Naajuhuaj, cua pueyano jaara na quiqiojinia tacatenu panijiohua quiri, nojuajaari maja maninia Pueyasora poonijiona.

10

Jesu jiyaramiquishacari setentay dos na pueyajinijinio, Pueyaso rupaa nojori pohuatanura

¹ Nio nuhuaji, Jesuuri socua setenta y dos pueya saquiriojoquiaari, nojori puetanura nojuaja, puetunu Israel pueya tiacajinijanaa Pueyaso rupaa nojori pohuatanura. Jesuuri nojori nuhuaji tii quianu paniriquiaajuhuaj. Puetunu nojorijiana jiyaramiquiriiri caapiqui, caapiqui. ² Nojori nuhuajiria, Jesuuri nojori rootaree nio miriqui seqesano:

—Queraatia Pueyaso muerasuranoori quiya, juhua senoso-coriqiano. Saniniujuja, seacija na senoonaari quiya. Cunora, cuhuariquia camaru nia secojore, socua senoonaa na jiyaramiquiniuria puetunujuanaa na senoosaanura. ³ Nia quiojiyare pueyanaa. Nia niishiri, janiyari nia jiyaramiquiya juhua borrego niquiohuani puereeta sareya tajinia. Pueyaso paraari juhua puereeta sareya.

⁴ Nia quiojosacari, majaari nia caashoque nia patanu, nia cumaneeeca quiqiojuhuaj, nia sapatunio. Majaari nucuaco nia tarishiniu pueya nia saruhuatasacari. ⁵ Tamonu tiajinia nia tiuquishacari, coteenu nia

saruuhuatare na camaru nio sequesanota: "Juhuajaniya nia quiri, nio tiajinia quiniaanaa".⁶ Cuno tiajinia quiniaa pueya jaara jiyanoojiaca quiri, naa nia sequencesacaritij, Pueyasoori nojori miiniutianiya maninia. Nojori jaara juaaajiaca quiri saniniuujia, Pueyasoori nojori shuquiritiyaquiniutianiya.⁷ Tee nia masesaareni, cuno tiajinia nia jijojere. Nia miaquere, nia rature nojori niquitiosano niajaniya. Nia pohuatanuuucua Pueyaso rupaa nojori niquiara, niajaniya cuaara niquitiosaaria nia panishano. Majaari tamasaca tiajinia nia pacunujunu tii nia miaquenura.⁸ Nia tiuquijiosacari tamonu tiacajinia, pueyano jaara nia masuure na tiajinia nia quiniuria, niocua niaara nojori rupojosano miaquere. Majaari na soonu.⁹ Cusosuhua nia naatanijiore cuno tiacajinia. Pueya niquiara nia sequere: "Pueyasoori quiarrijia nia jiyatenu paniya na muerasu nia quiniuria".¹⁰ Nia tiuquishacari tamonu tiacajinia, pueya jaara tii nia tojiniu paniyaquiri, niocua cuno tiaca nuucuajinia naa nacare pueya niquiara:¹¹ "Nia tiacajinijinio jaaquiani, canaari canaa niohuacaacuaji na majiriuutiaani. Cunoori nia niishiniuria, Pueyaso jaara nia saniitiore, majaari canaacua na tiuutiasaanu quiniutianiya. Pueyasocujaari nia jiyanooni paniriquiaa juucua, na muerasu nia quiniuria".¹² Seetanujuanaa nia sequeyanijia pueyanaa, Pueyaso saniitionu juuca jaara quiri, cuno tiacajinia quiniaari socua jiyanolhua saniitiosaanutaniya Sodoma tiacajinia quiniaas pueyajiniji.

*Jesu pirijojosacari Pueyaso tojitiaashijiaca pueya
(Mt 11.20-24)*

¹³ ¡Corazín tiacajinia quiniaas pueyanaa, mariyata Betsaida tiacajinia quiniaas pueyanaa! Cua tojiri. ¡Niaari jiyanolhua saniitiosaanutaniya! ¡Niaari socua Pueyaso tojiyashijiaca quiya cuno taricuacaanu Tiro tiacajinia quiniaas pueyajiniji, Sidón tiacajinia quiniaas pueyajinijinio! Cuno pueya jaara Pueyaso cumaacata miishano niquiquiaari, taa cua miiquianu nia tiacajinacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuuquiaari, nojori taraajesacari sesa nojori miiniuucua. Naajuhuaj, nojori maara juaca niojoquiaari nojori nacaacua quera nojori macaashacari, sesa mijiaca nojori quiniuucua.¹⁴ Niaa cutaraari cua cumaacata cua miijiosano niquijiaca. Naajaa, majaari nioojia nia tacatonu quiquianu Pueyasoocua. Naaratej, Pueyaso saniitionu juucajinia, ¡niaari socua jiyanolhua saniitiosaanutaniya Tiro tiaca pueyajiniji, Sidón tiaca pueyajinijinio!¹⁵ Niajaniyarijiataj, Caper-naum tiacajinia quiniaas pueyanaa, ¿niaateeri jiyaniya niaari jiyocua-caanu quiniaara jiyatesaanutaniya? ¡Maja! ¡Niaari puequeetuuju raama quejoosaanutaniya saniya!

¹⁶ Cua pueyanaa, cante nia tojitiajacani, nojoriiri cua tojitiajacajuaj. Naajuhuaj, cante nia ruuretaa cua rupaa nia pohuatasacarini, nojoriiri cua ruuretaajuhuaj. Cante cua ruuretaani, nojoriiri cua Jiyarona ruuretaajuhuaj.

Jesu jiyaramiquishano setenta y dos pueya tiuquijiosacariuhua nocua

¹⁷ Jesu jiyaramiquishano setenta y dos pueyari Jesuucua tiuquijioquiaariuhua. Nojoriiri jiyanolhua shuquiriaatia quiriquiaa. Jesu seque-tureeri:

—Jiyaniijianaa, samaruhuari canaa tojitiacanuni canaa tohuatani-jiosacari nojori, canaa jiyaniquisacari quia sesa!

¹⁸ Jesuuri nojori sequeree:

—Taaquiriirinij. Janiyari Sesaaca niquiquianuni juhua niaco tiyano jiyocuacaanuji. ¹⁹ Janiyacuajaari cua cumaaca nia niquitiocanuni, juhuajaniya nia rucuanenura sacocua caco, turucuaniiniu caconio. Cua cumaacata, niaari puetunu Sesaaca cumaacajanaa shocotanutaniya, juhuajaniya panaatia nia rucuanejonura, cua rupaa nia pohuatanura. Majaari quenaaja tamonu casaa miiniu quiniutianiya naquiya nia-janiya. ²⁰ Naajaa, majaari saaja shuquiriaatia nia quiniu samaruhua tojitianuuucsua niajaniya. Shuquiriaatia nia quiri cutara nia sesaca naajiotasano quishacari jiyocuacaanu, Pueyaso muerasu sesaca naajio-tasaqui.

*Jesu shuquirishacari
(Mt 11.25-27; 13.16-17)*

²¹ Jiyacaritij, Pueyaso Sohuanuuri Jesu shuquiritiri jiyano hua. Cunora, Jesuuri na Que Pueyaso sequeree:

—Quia shuquiritiaanija cua Quenaa! Quiaacuajaari Jiyaniijiajanaa quiya jiyocuacaanu, mijirianio! Quiaari maninia miirii! Cua pueyari juhua naatujoori, maja puera niishijiaca. Naajaa, quiaari quiarijia nojori niishitirii quia niishishano, quia jamosano mijiria niishijiacaacuaji. Jaa, cua Quenaa, quiaacuajaari naa nojori panitiaja.

²² Cua Queeri tari cua niquitioquiaari puetunu na jiitiasanojuanaa, Jiyaniijiarano cua quishacari. Majaari tamonu niishiniu quenaaja cante Pueyaso Niyanuni, saaja cua Que cutaraari cua niishiya. Naajuhuaj, majaari tamonu niishiniu cutara cante cua Queni. Saaja janiya cutaraari na niishiyani. Naajuhuaj, noo pueyari na niishiya, canapue cua niishitiniu paniya cua Quecuajani.

²³ Na nuhuaji, Jesuuri na pueyacua tacateree. Saaja nojori sequereei:

—Shuquiriaatia quihiaca cutaraari niajaniya, nia niquiniuuucsua puetunu nia niquishanojuanaa nia rupuenuucua janiya. ²⁴ Seetanujuanaa nia sequeyanija, queraatia taricuacaanu Pueyaso sequesano caminiuijuniiaa pueya, mariyata jiyaca jiyaniijianucuanio, nojoriiri nia niquishano niquiniuuucsua jiaatiaquiaari juucua. Majaari na niquitiuniu quiquiaari. Nojoriiri cuata nia quishacari nia tojishano tojitianuuucsua jiaatiaquiaari juucuajuhuaj. Majaari na tojitiuniu quiquiaari.

Samaria jiyajinjinio maninia miijijiniji pohuatasano

²⁵ Na nuhuaji, Moisés Rootasanojiniji niishitiojona pueyanoori Jesuu-cua niquiaari nata na pocoojonura. Jesu na pocuatenura sesa juucua, naa na nequesotareeri:

—Niishitiojonaanaa, ¿taa cua miiniutianiya pueyaracaanu rishijia cua quiniuriani?

²⁶ Jesuuri na riucuaree:

—¿Taate Moisés Rootasanojinija naajiotasanoni? ¿Taa quia niishiriojo-quiaani, quiaaa jaara na serojoquiaa?

²⁷ Moisés Rootasanojiniji niishitiojonaari Jesu riucuaree:

—Naa sequeyano:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia cumaacatajanaa, puetunu

quia niishitiajatajanaanio. Naajuhuaj, quiarta pueyano quia paniri taa quia paniyacuua tama quia cuaqueyajaajani".

²⁸ Jesuuri na sequeree:

—Quiaacuajaari maninia riucuaree. Naa quia miishacaritij, quiaari pueyaracaanu rishijia quiniutianiya.

²⁹ Moisés Rootasanojiniji niishitijoonaari tama nocuaji tacunu paniriquiaajaaja, maninia quijia na quiniuria Pueyaso niquiara. Naaratej, naa nequesotarohua Jesuuri:

—¿Canteeri cuarta pueyanoni?

³⁰ Jesuuri nio pohuatasano na pohuataree na niishitijonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén tiacajiniji. Nohuasenuujuaca pueyari na quia-ree. Puetunu na jiitiasanojuanaa na jaariuutiatureeri, na cushishano toquenio. Na piquitiuriiri. Quera macu na tiujiatuqueeri.

³¹ Na nuhuaji, pueyacuara secojonaari cuno nucuaco quiariquiaajacuhuaj. Na niquishacari piquishano narta Judio pueyano mataano nuu shuriuquiocora, na shocortamaa saajaari. ³² Na nuhuaji, Levita pueyanoori cuno nucuaco quiariquiaajahuaj. Na niquishacari narta Judio piquishano pueyano, nojuajaari saaja na shocortamaajahuaj.

³³ Na nuhuaji, Samaria jiyajinjinio tahueri cuno nucuaco quiariquiaajuhuaj. Na niquishacari parta Judio pueyano mataano, Samaria jiyajinjinio tahueri nocua taraajeree. ³⁴ Na cacataseeri. Nohuasenuujuaca piquiyashiquia matejoree shiyocuataari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijinijajarijia. Ritia na jiyataaree rucoojojuaca tiuquijioja tiajiniaraari. Cuniqui na cojuatareeri. ³⁵ Tariqui, cuno tahue quianu panishacariuhua, nojuajaari caapiqui cumaneeca pueraree. Rucoonaa tia camaru na niquitioreeri. Na sequereeeri: "Cucua quia jiyanoori. Nio pueyano quia cojuatare quiria. Quiaaa jaara socua quia cumaneeca nocua puecare, janiyacua saniniuujia quia niquitiorohuanijia cua tacatesacariuhua".

³⁶ Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca rucoonaa pueyajinjinioni, ¿teyano cuno pojorijinijinote narta pueyanoocua taraajeja cutarani?

³⁷ Moisés Rootasanojiniji niishitijona pueyanoori Jesu riucuaree:

—Cuno Samaria jiyajinjinio tahuecuajani, nocua taraajequaarini.

Jesuuri na sequeree:

—Taaquiriirinij. Quia quiaarohua. Naa pueyacua taraajeja quia quirijiuuhuaj, taa cuno tahue taraajequaaricuaani.

Jesu quishacari Marta, María tiajinia

³⁸ Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masu-uquiaari. Naaratej, na tiajinia na tiuquinitiareeri. Cuno maaji sesa quiquiaari Marta. ³⁹ Martaari tarajanu jiitija. Na sesaari quiquiaari María. Mariari Jesu niohuaca shuriuquiumia cajiriquiaa, na tojiniuria Jesu pohuatasano. ⁴⁰ Marta cutaraari poonijoriquiaa queraatia na misoshcoriquiano na jiitiasacari. Cunora, Martaari Jesuucua catecanoree. Na sequereeeri:

—Jiyaniijianaa, ¿majate cucua quia taraajenu? Cua tarajanuuri cua tarinitiaquee niquiriyatujua, puetunu nio poonijiosanotajanaa. ¡Quia sequere na naacutanura janiya!

⁴¹ Jesuuri saaja na sequeree:

—Martanaa, quioojia quia cajitiri sanaunaa. Quiaari puera quia miishano tacaatiaa. ⁴² Saaja niquiriyatu casaa cutaraari jiyanojua panishano. María cutaraari cuno socua panishano casaa saquiriojoree. Tamonuuri maja na naata na tojishano jaariutianu noojiajiniji.

11

*Jesu niishitiojosacari na pueya nojori secojonura Pueyaso
(Mt 6.9-15; 7.7-11)*

¹ Tamacari, Jesuuri Pueyaso secojoriquiaa tamaqui. Na puecasacari secojonu, tamonu na pueyajinjinioori na sequeree:

—Jiyaniijianaa, canaa quia niishitiojore canaa secojonura Pueyaso, taa Tiuquinijiona Juan niishitijoquaari na pueyacuaani.

² Jesuuri nojori sequeree:

—Pueyaso nia secojosacari, naa nia sequere:

“Jiyocuacaanu quijia canaa Quenaa, puetunu pueyajanaa cuaara niishi-
ria quiaari tojetaarucuajanaa sesa miyashijia. Pueya cuaara see-
tanujuanaa quia jiyateera nojori jiyaniijia quia quiniuria. Quia
panishano cuaara miishiiria mijiria, taa jiyocuacaanu miishiy-
acuaani. ³ Canaa quia niquitioriquia canaa miaquesocoriquiano
canaa panishano puetunu juucajanaa. ⁴ Canaa quia jiyanoori
sesa canaa miishanojiniji, taa canaa jiyanoquaacuaa sesa canaa
miiniaani. Naajuhuaj, canaa quia cojuare, maja sesa canaa mi-
itishaanura”.

⁵ Jesuuri naa sequereejuhuaj, socua nojori na niishitiojonura:

—Niaa jaara nia rupuenaacua quiaare shiyaqueya, casaa nia
masenura nojuajiniji, ¿nojuajatucua taa quia sequereni?, quia
jaara na sequere: “Cua rupuenanaa, cua niquitiore jiuujianaraca
pan. ⁶ Tamonu cua cojiniaari shusha tiuquiriohua tucuacaanuji,
miaajeyari. Shaaquiiiri cua sumatuu cua miaquetesocoriquiano
nojuaja”. ⁷ ¿Quiaatucua taa miirini quia rupuena jaara na tiajiniacumaji
quia riucuare?: “Maja cua taajetenu. Cua tia tiootiu tioree tarinijia.
Tari cua mueya mataa maquetujinianijia. Maja cua naata sanenu
cua niquitionura quia panishano”. ⁸ Jaara naa sequeretej, niaa
jaara na tia tiootiu piquiniu tarinitiaaqiri, janiyari seetanujuanaa
nia sequeyani, nojuajaari sanenutaniya na niquitionura niajaniya
puetunu nia panishanojuanaa. Majaari na sanenu quiniutianiya saaja
nia rupuena na quiniuucua. Sanenutaniyari pueyaracaanu taajeta
nia piquishacari na tia tiootiu. ⁹ Naajuhuaj, maja nia tarinitianu
Pueyaso nia secojonu. Nojuajaari nia panishano nia niquitionutaniya.
Cunora, nia panishano nia pajeriquia. Niocua na riuriatare. Tiootiu nia
pquiriquia. Niaara riatasaanutaniyari. ¹⁰ Naaratej, cante Pueyaso
secojoquaani, nojuajaari na panishano masenutaniya. Cante na
pajejani, na panishano riuriatanutaniyari. Cante tiootiu piquiquiaani,
nera riatasaanutaniyari.

11 '¿Niaatucua nia niyanu niquitiore saajia, neecaruu na masesacari niajaniya? Maja. ¿Niaatucua soconu niquitiore nia niyanu, sapiti-aaja na masesacari niajaniya? Maja. ¹² ¿Niaatucua turucuaniiniu niquitiore nia niyanu, caacaraja riuriuquiu na masesacari niajaniya? Maja. ¹³ Puetunu niajaniyajanaari sesa miiniu niishijiaca. Naajaa, niaari maninia casaa niquitionu niishiya nia niquohua. ¿Taatucuaa socua jiyocuacaanu Quijia nia Que Pueyasoni, tojetaarucuajanaa sesa miyashijiani? Seetanujuanaa capora na quishacari, nojuacuajaari na Sohuanu niquitionu niishijia na muerasu, canapuete na masequiaacuajani.

Pueya sequesacari Jesu, samaru cumaacaracana

(Mt 12.22-30; Mr 3.20-27)

¹⁴ Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiquiaari samaru na jiitiasacari. Samaru jaara tohuataquiaari cuno pueyanojiniji, pocuajara quiriohuari. Pueya niquishacari naatej, nocuaji jiuujiatereeri. ¹⁵ Tamasaca pueyari saa sequequiaaria:

—Cuno pueyanoori samaruhua tohuatanijiya samaruhua jiyaniija Satanás cumaacata.

¹⁶ Tamasaca pueyari Jesu saniniujiuniu paniriquiaa. Naaratej, nojoriiri na sequeturee na cumaacata na miiniuria casaa, na niquitinuria nojori, nojori niishiniuria nojuajaari seetanujuanaa Pueyasojinijino. ¹⁷ Jesuuri nojori niishiriojosano niishiriquiaa. Nocuaji nojori sequereeri:

—Tamonu jiyajinia, cuno pueya jaara miaquetoojija tama nojori pueyatajaaja, nojoriiri maja na naata na paraa nujuatanu, na paraa jaara nocua tiuquitiare raquiritiano nojori quishacari. Naajuhuaj, niquiriyatu tajinia quiniajaara tama nojorijiaaja juayonuujataquiaa, nojoriiri maja na naata jatiqui quiniu. ¹⁸ Naajuhuaj, niaari cua sequeriquiaa, janiana samaruhua tohuatanijiya Satanás cumaacatani. Jaara naa quiritij, ¿Satanástucua taa pueyaracaanu quiri jiyaniijiani, nojuaja jaara tama na samaruhuaaja tohuatanijiya tama na cuma-acatajaaja? ¹⁹ Naajuhuaj, janija jaara samaruhua tohuatanijiya Satanás cumaacatani, taa nia sequeyacuajani, ¿nia niishitiojosano pueyariuhuaj, cana cumaacata nojori tohuatanijoquiaa samaruhuani? ¿Taa nia sequeyani? ¿Satanás cumaacatatee? Majaruhua. Naacuajitij, tama nianjanijayaaja nia niishiri, niaari jiyajeneya. ²⁰ Naa Pueyaso cumaacata cua tohuatanijiosacari samaruhuatej, naacuajiti nia niishiri, Pueyasoori tari nia masuya seetanujuanaa na muerasu nia quiniuria.

²¹ 'Niojinia nia niishiriojorejuhuaj: cumueeca pueyano jaara na tia cojuaa queraatia na miaquejotaja casaata, majaaari tamonu naata na jiitiasano casami jaariuutianu. ²² Saniniuujia, socua cumueeca pueyano jaara nocua tiuquiri, na miaquejotaja casaa jaariuutiaari, cuno, nocua na tiuushano juucuani. Na nuhuaji, na jaariuutiasano casami paari, na pueya na serotasocoriquiano. Naajuhuaj, janiyari Satanás jiitiasano jaariuutiajani.

²³ 'Cante cua jiyano quiyaquiyani, nojuajaari cua paraca. Cante cua naacutaaquuya pueya rerecojonura Pueyasorani, nojoriiri saaja pueya cocuataa Pueyasocuaji. Naaratej, jacaria nia niishiriojore casaa nia niishiriojija janijajinijini.

*Samaruhuari riujuujia na quiquiero jiniohua
(Mt 12.43-45)*

²⁴ Samaru jaara tohuatare pueyanojiniji, joojuashiquio rucuanejiyari na samaatejara na pajenura. Jaara na riuriataaquiri, niishiriojiyari: "Cua quiquiero jinia riujuyarohuaraqui teje cua tohuatacanucuajani". ²⁵ Samaru tiuquishacariuhua cuno pueyanoocua, na riuriasuhuari shaaco, juhua maninia netoonujusano tia, maninia jeenucuasano juhuaj. ²⁶ Naaratej, cuno samaruuri socua sesa mijiaca nojuajiniji siete narta samaruhua riquiohua nata na quiniuria. Puetunu nojorijianaari cuno pueyanojinija tiuquitiasuhua. Naacujitij, cuno pueyanoori socua sesara jiyacateja, tarisia na quiniujiniji.

Seetanujuanaa shuquiriaatia quiniu cutara

²⁷ Jesu pohuatasacari nio, tamonu maajiiri jiyacari pueya tajiniji naa nacaree:

—¡Shuquiriaatia quijia cutaraari cuno maaji cante quia raquiaarini, cante quia canashitiquiaarini!

²⁸ Jesuuri saaja na riucuaree:

—Socua shuquiriaatia quijia saniya sajara cante Pueyaso rupaa tojijiani, cante Pueyaso panishano miiquiaajaanihuaj.

*Sesa pueyari saaja Pueyaso cumaacata miishano niquiniu panijiaca
(Mt 12.38-42; Mr 8.12)*

²⁹ Socua queraatia pueyari Jesuucua rerejoriquiaa puetunu na shocuaqueyajanaa. Jesuuri juhuacatecara naa pohuateree nojori niquiara:

—Nio pa quishacari pueyari sesa mijiaca. Nojoriiri cua sequequia, jiyajeneta casaa cua miiniuria Pueyaso cumaacata, nojori niishiniuria janiyari Pueyaso Jiyarosanoni. Seetanujuanaa majaari socua cua niquitiniu quiniutianiya nojori, cua cumaacata cua miishano. Nojoriiri saaja niquinutianiya cutara taa cua miishaanutaniyani, naatej taa supuetana Jonás miisha aquiaaricuaani. ³⁰ Jonás miishaanuuri nocuaji jiuujiatesano quiquiaari cutara. Naacujitij, Nínive tiacajinia quinia pueyari niishiquiaari Jonásri Pueyaso jiyarosano quiquiaari. Janiyari naa miishaanutaniyajaanihuaj, nio pa quishacari pueya niishiniuria janiyari Pueyaso Jiyarosanoni. ³¹ Cua supuetana Salomón jaara Israel pueya jiyaniijia quiquiaari, jiyacari tamonu maajiiri pananu shuu-cuaji jiyajinbia jiyaniijia quiquiaari. Nojuaajaari jiyano hua tucuacaanuji niquiaari narta jiyaniijia Salomón tojiniucua, jiyano hua niishijia Salomón quishacari. Jiya puequesacari Pueyaso saniniujiushacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretanuucua socua Niishijiajanaa cutara Salomónjiniji. Cuno Niishijiaari niya nia tajinia quiyacuaja. Janiyacu-jaari nojua jani. ³² Naajuhuaj, cuno tariucuacaanu Nínive tiacajinia quinia pueyari saneecuatunutaniya Pueyaso nequesoreesacari nio pa quishacari pueya. Nojoriiri nio pa quishacari pueyacuara tonujunutaniyajuhuaj, nojori tacatoyaquiniuucua nojori jiuujia sesa nojori miishanojiniji, Pueyaso rupaa nojori tojijaquiniuucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiuijunia Jonás jaara Pueyaso rupaa pohuataquiaari nojori niquiara. Pueyaso sequenu panishano caminiuijunia quiarijia

nia tajinia quiyani, nojuajaari socua cutara Jonásjiniji. Janiyacuajaari nojuajani.

*Pueya jiuujia cuhuatanajiniji pohuatasano
(Mt 5.15; 6.22-23)*

³³ 'Pueya jaara samaritiu noshitiri, majaari na jamotanu. Majaari na niatanu conatu cariquiaco. Maninia cutaraari jiyoquaacaanu na morotanu, tiaco tiuquitianaa cuhuatariquiano. ³⁴ Pa namijiaari juhua pa cuaqueya cuhuatanajuhuaj. Naacuajitij, paa jaara Pueyaso casaacula jiaatiaja quirini, paari cuhuashiqui quiya puetunujuanaani. Saninuuquia, pa namijia jaara sesa casaa niquinuucua jiaatiaja quiri, paari ninishiqui quiya puetunujuanaani. ³⁵ Tama nia cuaqueyajaja nia cojuare, niaa mariqui nioojia cuhuatana maquishajareeri. ³⁶ Niaa jaara puetunujuanaaa juhua cuhuashiqui quiya, sesa casaacula jiaatiaashijia nia quishacari, niocua maninia niquipiara quiri puetunujuanaaa, juhua samaritiu cuhuatasacari niajaniya. Naacuajitij, niocua niishijia quiri, maninia mijiia nia quiniuria.

Jesu nacasusacari Fariseocuaca, Moisés Rootasanojiniji niishitiojon-anio

(Mt 23.1-36; Mr 12.38-40; Lc 20.45-47)

³⁷ Jesu puecasacari pocuanu, tamonu Fariseo pueyanoori na masuquiaari na tajinia na miaquenura. Jesuuri na tajinia quiaquiaari. Na tiuquishacari, miaquejajinaj cajishijijanaari. ³⁸ Fariseo pueyanoori jiuujiatequiaari na niquishacari Jesuuri shuquitioo tari cajiriquiaa mi-aquenura. Judiocuacaari jiyanijia, nojori rucoojosacari tamasaca pueya tajinia, tamasaca sesa miishanoori na naata nojoriicua pacunu. Nocuaji nojoriiri shuquitianu niishijia, tajinia nojori tiuquishacariuhua. ³⁹ Naa cuno Fariseo pueyano niishiriojosacaritij, Jesuuri saa na sequerejaa:

—Niajaniya Fariseocuacanaa, niaari juhua noo pueya, canapuete saaja na ratujua cuaqueya jeequejoquiaacuajani, saaja na miacojua cuaqueyanio. Majaari na jiniacuma na jeequenu. Niaari naajuhuaj. Niaari sapuenu maninia pueya niquishano. Saninuuquia niijojiacaari jiyanohua sesa quiya, casami nia masejonuucua nia nohuasejonuta, puetunu sesa nia miiniutiajanaajuhuaj. ⁴⁰ Mosanucuanaa, ¿niaateeri niishiyaquia, pa cuaqueya Shipininiaari poojia shipiniquiaarijuhuaj? Naaratej, nioojia nia jeequere cutara, maja saaja nia cuaqueya. ⁴¹ Niaa jaara puetunu nioojiajinia nia jiitiasanojuanaa jiyatere Pueyasora na quiniuria, niaa maara juhua jeequesano quiri puetunujuanaaa.

⁴² '¡Niaari taraatia miishaariquiano, Fariseocuacanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucua jinijojuanaa, Pueyasora nia niquitiosocoriquiano. Cuno jaamasucuaari culantro, menta, socua tamonu jaamasucuaniyojuanio. Niaari naa maninia miiquiaa taa Moisés niishitiojoquiaaricuajani. Naa jaa, Moisésri niishitiojoquiaarijuhuaj maninia pa miiniuria parta pueya, Pueyaso pa paniniuriajuhuaj. Majaari cuno na sequesano nia miiniu quiquiaa. Puetunu na sequesanojuanaa tojijiaca nia quiri. Majaari saaja jaamasucua niquitiojojuaca nia quiniu.

⁴³ '¡Niaari taraatia miishaariquiano, Fariseocuacanaa! Niaari jiyanijianucua shuriucua cajiniuucua jiaatiaquiaa, Pueyaso secojojua tajinia

nia quishacari, juhua cutara pueya nia quiniuria pueya niiquiara. Naa-juhuaj, niaari pueya paniquiaa nojori saruhuanura niajaniya juhua jiyanijianucua, nia rucuanejosacari tiacajinia.

⁴⁴ '¡Niaari taraatia miishaariquiano! Niaacujaari juhua niqusishoo jamaca. Pueyari juhuajaniya na caco rucooquiaa na niishiyaquishacari. Naajuhuaj, pueyari juhuajaniya nia rupuequiaa, nojori niishiyaquishacari nioojiaari jiyanohua sesa, juhua pueyano mocua jamajinia.

⁴⁵ Jiyacaritij, tamonu Moisés Rootasanojiniji niishitiojonaari Jesu se-queree:

—¡Niishitiojonanaa, naa quia sequesacari Fariseocuacatej, quiaari canaa sequeyajuhuaj!

⁴⁶ Jesuuri na riucuaree:

—Taaquiriinij. ¡Niaari taraatia miishaariquianojuhuaj, Moisés Rootasanojiniji niishitiojonaanaa! Puetunu nia rootasanojuanaari juhua jiyanohua niiquia casaa nitiasocoriquiano. Majaari nia tojitiajaca pueya nia naacunu quiquia quenaaja nia juaashiquia sacasaruta, cuno niiquia casaa nitiasaanura. Naacujitij, pueyari maja na naata rejete-tanu nia niishitiosano.

⁴⁷ '¡Niaari taraatia miishaariquiano! Niaari macunucua niojotajara shipinijioquiaa shanoaura, tariucuacaanu pueyara Pueyaso sequesano caminiuijuniaa nucuhuacuaji, teyano nia supuetanaa puecooquiaaricuajani. ⁴⁸ Naacujitij, canaari niishiyaní, niaari nia supuetanaa miishano shuqiritiaa, nia cojuasacari nojori puecosano nucuhua.

⁴⁹ 'Naacujitij, Pueyasoori na niishiniutia sequequiaari:

"Janiyari cua sequenu panishano caminiuijuniaa jiyaramiquiniutianiya

Israel pueyacuani, cua rupaa niishitiojonaanio. Israel pueyari noojaqueya puecoonutaniya. Tamasacaari naquiya miishaanu-taniyajuhuaj".

⁵⁰ Cunora, Pueyasoori nio pa quishacari pueya naminiutianiya puetunu na sequenu panishano caminiuijuniaa nanacaacuajanaa, canapuete nio jiya coteejajiniji puecoosa aquaariajani. ⁵¹ Coteenujuanaa mosaaquiaarii Abel. Na nuhuaji, queraatia Pueyaso sequesano caminiuijuniaari puecoosa aquaaria. Na nuhuaji, Zacaríasri socua jaatesaaquiaari monujuhuaj. Nia supuetanaari na moquiaari Pueyaso Secojojua tiajinia, Pueyaso Shuriucua Quiquio tacoji, Pueyasoocuara catijiasaqui shuriucua. Seetanujuanaa nia sequeyanijia, nio pa quishacari pueyari namishaanutaniya puetunu nojori puecoosaanuu cuajanaa.

⁵² '¡Niaari taraatia miishaariquiano, Moisés Rootasanojiniji niishitio-jonaanaa! Niaari najuhuana Pueyaso Rupaa jiitiae. Majaari nia to-jiniu paniniu, Pueyaso jiyanoshano pueya nia quiniuria. Saniniujia, tamasaca jaara Pueyaso Rupaa niishiniu paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

⁵³ Jesu jaara nio sequequiaari, Moisés Rootasanojiniji niishitiojona, mariyata Fariseocuacaari jiyanohua juaaquioree. Jiyanohua nojori juaaquiosacari, nojoriiri Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua. ⁵⁴ Nojoriiri nocuara tonujunu paniriquiaa juucua, jaara sesa quiri na sequesano.

12

Jesu niishitiojosano, maja sapuenu maninia pueyano niquishano pa quiniuria

¹ Jiyacaritij, jiyanohua jiyanohua queraatia pueyari Jesuucua rerejoree. Tama nojorijaarijia rapijiotooriquiaa puera nojori rerequeejosacari. Jiyacaritij, Jesuuri saa na pueyaja sequenu coteeree. Naa nojori sequereeri:

—Tama nia cuaqueyajaaja nia cojuare Fariseocuaca pan poreetajaacuaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniujinji. Nojoriiri sapuenu maninia miijiacapueya niquishano tamasaca niquiara. Saniniujia, nojori jiuujiaari saa sesaja pueyaracaanu. ² Nia niishiri, puetunu jiyashahuaja miishanojuanaari niishishaanutaniya. Puetunu jamosano casaa-janaari niquishaanutaniyajuhuaj. ³ Puetunu nia sequencesanojuanaa ninishiquinii, cuhuashiqui caminiujiushaanutaniyari. Naajuhuaj, nia sasacojosano tama nia sohuacamarajaajani, cunoori jiyocuacaanu tia nijiniji nacatasaanutaniya puetunu pueya tojishcoriquianojuanaa.

Cante puereshiya cutarani

(Mt 10.26-31)

⁴ 'Cua rupuenaanaa, majaari nia puerenu canapuete nareja pa cuaqueya mojuani. Nojoriiri maja na naata socua sesa na miiniu pajaniya, paa jaara tariucua macu quiyani. ⁵ Seetanujuanaa nia sequereraj, cante puereshiya cutarani. Noo nia puerere cutara, cante cumaacaraca cutara na jatanura niajaniya mani quiquojiniani, na cusoujanu nuhuaji niajaniya. Saaja nojuaja nia puerere cutara.

⁶ 'Cinco shuhuari saaja caapiqui cumaneecaniyojuata masesano. Pueyara, cunoori najuhuanaj. Naajaa, majaari Pueyaso niyajetanu cuno shuhua jaara puecoosaare. Nojuajaari na niishiya cutara. ⁷ Naajuhuaj, nia muesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jiyahua Pueyaso panishano cutara queraatia na cojuasano shuhuajiniji.

Tamasaca niquiara pa sequere paari Jesucristo pueyani

(Mt 10.32-33; 12.32; 10.19-20)

⁸ 'Cua tojitiare. Cante tamasaca niquiara sequejani: "Janiya Jesucristo pueyanoni", naajuhuaj, janiyari cua Que Pueyaso seya niquiara sequenutaniyani: "Nojuaja cua pueyano". ⁹ Cante saniniujia tamasaca pueya niquiara seetaa janiyajiniji, cua pueyano na quishacarini, janiyari cua Que Pueyaso seya niquiara na tamacanutaniyajuhuaj.

¹⁰ 'Cante cua sesacareeni, nojuaja na naata jiyanooshaanu. Saniniujia, maja cutaraari na naata jiyanooshaanu cante Pueyaso Sohuanu sesacareeni.

¹¹ 'Cua muerasu nia quiniuucua, niaari Pueyaso secojojua tiajini- aqueya jiyatasaanutaniya, nequesoreenaa niquiara, mijiria jiyani- ijianucua niquiaranio. Nojori nequesoreesacari niajaniya, majaari nia niishiriojonu taa nia riucuanutaniyanoj, casaa nia sequenutaniyajahuaj. ¹² Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanutaniyani.

Puereetaari casamiriaca pa quishacari

¹³ Tamonu pueyanoori pueya tajiniji naa Jesu sequequiaari:

—Niishitiojonanaa, cua tarajanu quia sequere na niquitionura janiya canaa shipininio jiitiasanojiniji, taa canaa shipininio sequequiaari canaacuajani, saminio na quishacarijia.

¹⁴ Jesuuri saaja na riucuaree:

—Pueyanonaa, ¿janiyateeri pueya nequesoreenara jiyatesaaquiaarini, cua serotanura niajaniyi nia shipininio casamini?

¹⁵ Jesuuri naa nojori sequequiaarijuhua:

—Jiyanoqua nia cojuare tama nia cuaqueyajaaja, majaa casamiicua jiaatiajaca nia quiniuria. Pa naata shuquiriaatia quiniu casamiijiu. Queraatia casamiiiri majaa na naata seetanujuanaa shuquiriaatia quijacara na jiyatenu pajaniyi.

¹⁶ Na nuhuaji, Jesuuri pueya niishitioree nio miriqui pohuatasanota. Naa sequereeri:

—Tamonu pueyanoori quiquiaari, jiyanoqua casamiriaca. Na cuhuariquiajinia na natoosanoori jiyanoqua muetuquiaari. Naacuajitij, queraatia miaquesocoriquiano jiitiaquiaariiri na cuhuariquiajiniji na carojotasano. ¹⁷ Tama sequereejaarija: “¿Taa cua miiniutianiyani? Cua tiajoso cua racatajara cua carojotasanoori puetunujuanaa tari mishaja quiya. ¿Tee cua racatanutaniya shusha cua carojotasanoorinitioj? ¹⁸ ¡Ja!, niishiquinijia! Coteenu cua tiajoso cua casamiicuaji niyaroorohuaraquij. Janiyari socua puereetucocuara tiajonutaniyani. Janiyari cuniqui mishinijionutaniya puetunu cua carojotasano cua cuhuariquiajinijiniojuanaani, puetunu cua jiitiasano casamijianaanio. ¹⁹ Na nuhuaji, janiyari tama cua cuaqueyajaaja sequenutaniyani: ‘Pueyanonaa, quiarijia cutara juhuajaniya quia quiri. Quiaari queraatia casamiriacacuaja, queraatia marijira. Quiaari queraatia quia miaquesocoriquiano jiitiaacuaja. Quiarijia cutara quia samaatere. Quia miaquere. Quia rature. Tama quia cuaqueyajaaja quia shuquiritiri’”. ²⁰ Cuno niucuaja, Pueyasoori na sequequiaari: “Moseecanaa, quiaari quiarijia macu juhuauenutaniya. ¿Canteeri puetunu quia jamuesano casamijiana jiitianutaniya quia nuhuajini? ¿Canra na quiniutianiyarin?” ²¹ Naa miishaanutaniyari puetunu pueyajanaa, cante saaja tama nerajaaja reratequiaas casamini. Cuno, jamuejaca casamiriaca pueyani, nojoriiri seetanujuanaa casamiijiuniucua Pueyasora.

Pueyasoori na muerasu cojuaja maninia

(Mt 6.25-34)

²² Na nuhuaji, Jesuuri na saquiriojosano pueya sequequiaari:

—Naaratej nia sequeyanijia pueyanaa, majaaari nia tacaaniu casaa nia miaquenutaniyani, casaa nia cushionutaniyani. ²³ Pueyasoori jaara pa shipiniquiaari saminio pa quiniuria, majaaari jiyajeneta nera na rishitiniuria pajaniyajuhuaj. Naajaariuhuaj, nojua jaara pa cuaqueya shipiniquiaari, majaaari jiyajeneta na cushionutaniuria pajaniyajuhuaj. ²⁴ Riquiacujua nia niquiriquia. Majaaari nojori natoojonu. Majaaari nojori carojotanu na racatasocoriquiano, na nuhuaji na miojosocoriquiano. Naajuhuaj, majaaari nojori jiitianu na miojosano na racataja. Majaaari tiaca nojori jiitianu na carojotasano nojori racatajarajuhuaj. Naajaa, Pueyasoori nojori miojotequia. Niaa cutaraari socua jiyanoqua Pueyasoori panishano cuno riquiacuhuajiniji. ²⁵ Naajuhuaj, nia nequesotaanijia, niaa jaara socua tamonu juucara rishiniu paniriquia quera

nia shaajenu panishacari, ñnia naataateeri socua rishiniu, jiyanohua nia tacaaniutia? Maja nia naata. ²⁶ Naaratej, nia tacaaniu jaara najuhuana quiya socua shiitianiyojua nia rishiniuria, ñniaatucua casaara tacaari tamonu casaacuani?

²⁷ Natau shuucuaca nia niquishurij, taa nojori corequetaani. Majaari nojori poonijionu. Majaari na cusupuenuunujuhuaj. Supuetana jiyanijja Salomónri jiyanohua shanohua toqueyaraca quiquiaari. Cuno jiyanohua shanohua niquishano na cushishano toqueni, naajaa, majaari na shocotanu cuno natau shuucuaca. ²⁸ Pueyasoori cuno natau shuucuaca shipiniquiaari rupaquijia naa shanohua niquishocoriquianotej. Jaara sorere, tariqui catijiashiya saniniuuriphia pan majeetetajara. Pueyaso jaara naa maniniushitiyyacuua shuucuacatej, ñmajateeri na naata cushitiniu niajaniyajuhuaj, jatarinitiaja Pueyasoocua tiuujiacanaa? ²⁹ Naaratej, nia sequeyanijja, maja nia tacaaniutia nia pajenu casaa nia miaquenutaniyani, casaa nia ratunutaniyani. ³⁰ Pueyaso niishiyashijiaca pueyari pueyaracaanu na panishano casaacua tacaacuiaa. Niajaniya cutaraari Queraca. Nojuacuaari tari niishiya puetunu nia panishanojuanaa. ³¹ Naaratej, nia niishirijoore Pueyaso panishano nia miiniuria. Nojuajaari saniniuujia nia niquitionutaniya puetunu nia panishanojuanaa.

Nia casami nia racatare Pueyaso shuriucua

(Mt 6.19-21)

³² Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijja. Capora na quiniucua, ñnia niquitionutaniya puetunu na jiitiasanojuanaari! ³³ Nia casami nia niquitionore cumaneecara. Na nuhuaji, cuno cumaneeca nia niquitionore nareja casamijiuniucua pueya. Naa nia miishacaritij, niaari jiyocuacaanu racataa nia jiitiasano. Tee Pueyaso racataa nareja nera nia niquitosanocuajani, cuniqui, nia cumaneeca quiquoori maja na piquiniu. Niaari tii nia racatasano jiitianutaniya pueyaracaanu. Majaari nohuasejojua na naata nocua tiuquinu na nohuasenura. Naajuhuaj, surequeyari maja na naata miaquenu nia casami tii. ³⁴ Nia casami jaara naa racatasano quiya jiyocuacaanu Pueyaso shuriucuatej, niaari saaja Pueyasoocua niishirijojonutaniya, tee nia casami racatasano quiyacuaani.

Jeenucusano nia quiri nia Jiyanijjaacuaji

³⁵ Juhuata jeenucusano nia quiri pueyaracaanu, nia sashishacari nia Jiyanijja, taa tiajiniaaco maninia seyacuaani. Nojori sashishacari na jiyanijja, nojoriiri na toqueya cushiyono quiya tari, na samaritiu noshitishanojuhuaj. ³⁶ Naa jeenucusano nia quirijiuhuaj, juhua cuno seyaja. Nojoriiri na jiyanijja sashiya na caminiujinji na tiuquishacariuhua. Nojuaja jaara tohuateya piquishuhua, nojoriiri ritia nocuaji riatanutaniya tia tohuateya. ³⁷ Shuquiriaatia quijiaca cutaraari cuno seya, canapuete na jiyanijjaacuaji suteyajaani, na jiyanijja cuaara tiuquirohuajaatijia. Seetanujuanaa nia sequeyanijja, nojori jiyanijjaari nojori cajitijionutaniya miaquejajinna. Na toque maniniuqui jocuanutaniyari na mianuutenura nojori. ³⁸ Nojori jiyanijja jaara tiuquirohua shiyaqueya, juhuaquenu parishacari, naajaa, shuquiriaatia quijiaca quiniutianiyari cuno seya, nojori jaara suteyajaa tia tohuateya riatariquiano nojori jiyanijjaacuaji. ³⁹ Nio nia niishirijuuhuaj, tia camaru jaara niishiri

taacari nohuasejojua niniutianiyani, nojuaja maara sutere na tia cojuanura, maja nohuasejojua tiuquiniuria na casami na nohuasenura.⁴⁰ Naajuhuaj, jeenucuasano nia quiri pueyanaa, juhua cuno sutejaca seyaja. Niaa jaara jiyaniya juhuanojuaja maja cua tiuquiniu quiniutianiuhua, janiyari jiyacari nia jiyajenetenutaniyani.

Jesu pohuatasano maninia serujiniji, sesa serujinijinio
(Mt 24.45-51)

⁴¹ Jiyacaritij, Pedroori Jesu nequesotaree:
—Jiyaniijiana, ¿quiaate nio pohuataree saa canaaraja, puetunu pueyarajanaa soj?

⁴² Jiyaniijiaari na riucuaree:
—Tamonu seru jaara maninia seru quiri, nocua tiuushano, niishijaijuhuaj, na jiyaniijiaari cuno na seru jiyatenutaniya narta seja jitariquiano na niti na niyacari. Nojori jiyaniija niyacari, cuno seeratasano seruuri narta seja mianuutenutaniya maninia, taa nojori jiyaniijiajanaa mianuutequiaa nojoricuani.⁴³ Cuno seruuri shuquiriaatia quiniutianiya na jiyaniija jaara na riuriatasuhua naa maninia miyanojua, taa na sequesaquaari na miiniuriacuajani.⁴⁴ Seetanujuanaa nia sequeyanijia, na jiyaniijiaari cuno maninia seru jiyatenutaniya puetunu na jitiasano casamijiana cojuana na quiniuria.⁴⁵ Saniniuuja, cuno seru jaara sesa miiniuria niishiriojore, na jiyaniishacari na jiyaniijiaari jyianohua tarishiniutianiya, nojuajaari niishiriojonutaniya nojuaja na naata miiniu na panishano. Cunora, nojuajaari narta seja majoonu coteenutaniya, seja maajipohuanio. Naajuhuaj nojuajaari saaja miaquejonutaniya. Pueyaraacaanu raru-junutaniyari. Mashaasequejonutaniyajaariuhuaj.⁴⁶ Na jiyaniishacari na jiyaniija juhuanojuaja maja na tiuquiniu quiniutianiuhua, jiyacaritij, cuno juucaja, na jiyaniijiaari tiuquiniutianiuhua canashiyaquiji. Naa cuno seru miiniuucua sesatej, na jiyaniijiaari jyianohua na saniitionutaniya. Na jatanutaniyari Pueyaso tojiyashijiaca pueyata na saniitiosocriquiano.

⁴⁷ Tamonu jiyaniija jaara na seru rootare maninia, taa nojuaja miiniutianiyani, cuno seru jaara jeenucuaaquiri na jiyaniijiaacuaji, mariyata jaara miyaquiri taa na jiyaniija sequequiaari na nuhuajiriacuajani, nojuajaari jyianohua majacusaanutaniya cutara.⁴⁸ Saniniuuja, tamonu seru jaara sesa miiri na niishiyaqueiniuucua na jiyaniija panishano na miiniuria, nojuajaari saaja secaja majacusaanutaniya. Naa-juhuaj, cante queraatia niquitiosaareeni, cuno serujinijiiri queraatia masenu panishaanutaniya. Naajuhuaj, cante jiyatesaaree queraatia jiitiana na quiniuriani, na jiyaniijiaari nocua tiuuniutianiya socua jyianohua maninia mijija na quiniuria.

Jesuucua tiuujiacaari narta pueya panishoo
(Mt 10.34-36)

⁴⁹ Mijiria niquiaarinijia, juhua mani cua noshitiniuria pueya tajinia. ¡Seetanujuanaa na noshitiriquia tarinij! Cua rupaari juhua mani quiniutianiya.⁵⁰ Coteenu, janiyari jyianohua saniniujiushaanutaniya juhua manitianii. Nocuaji coojiaari tacaya janiya jaara naa miishaarejaatija. Seetanujuanaa na jiyateriquia tariucua tucuateenonij.⁵¹ ¿Niaateeri jiyaniya janiyari niquiaarini mijiria quiniae quiniuria juhuajaniya? ¡Maja! Seetanujuanaa nia sequeyanijia, janiyari niquiaarini pueya cua

raquiriojotanura.⁵² Naaratej, pueyari quiarijia juayonuutanu coteenu-taniya. Pueyano jaara necocuata jiitiare jiuujianaraca niquiohua na tia-jinia, jiuujianaraca nojorijinjinio jaara cucua tiuuri, cuno caapiqui cu-cua tiuyashijiacaari saniniuu{jia nojori juaajiaca quiniutaniya. Naa noo-jiaqueya pueyajinjinio tiuuniucua cucuatej, queraatia pueyari naa tama tacaresetanutaniyajacu{jua. Naacuajitij, tamonu tiajinia, quer-ajaa pueyari caapiquiriyat cucua tiuuijaca juaajiaca quiniutaniya.⁵³ Pueyari necohua paracaajia quiniutaniya, necohua tiuushacari cu-cua. Naajuhuaj, necohuari na que paracaajia quiniutaniya na que tiu-ushacari cucua. Naajuhuaj, maajipohuari necojori paracaajia quiniutaniya necojori tiuushacari cucua. Naajuhuaj, necojoriiri na nucua paracaajia quiniutaniya na nucua tiuushacari cucua. Naajuhuaj, maajipohuari necohua niquiocohua paracaajia quiniutaniya, necohua niquiocohua quiniuucua cucua tiuuijaca. Naajuhuaj, pueya niquio-cohuari na quinia paracaajia quiniutaniyajuhuaj, cucua tiuuijaca na quinia quiniuucua.

Pueya cuaara niishiiria quiarijia Pueyaso miishanojiniji, casaa na ni-shitiniu pantyani

(Mt 16.1-4; Mr 8.11-13)

⁵⁴ Jesuuri naa sequequiaari pueyajuhuaj:

—Niaa jaara niquitioocua niquiquiaa pananu tiuquishocora, niaari sequequiaa: “Maruqui niniutaniya”. Seetanujuanaa naa quiquiaari.⁵⁵ Naajuhuaj, paratu jaara piyarojoquiaa pananu shuucuaji, niaari sequequiaa: “Tacareejonuqui quiniutaniya”. Naa quiquiaari.⁵⁶ Pueyanaa, {niaateeri seetanujuanaa niishijiaca? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniu{jia, nia niquishacari quiarijia Pueyaso miishano nia niquiara, majaari cuno nia niishiniu, casaa na sequenu paniyani. Naaratej, majaari seetanujuanaa niishijiaca niajaniya.

Niaacuara tonujunata nia jeecatoore

(Mt 5.25-26)

⁵⁷ ’Niaacuajaari niishiya, sesa miijiacaari saniitiosaanutaniya. Naaratej, tama niajaniyajaja nia niishiriojore, casaate maninia nia miiniuriani.⁵⁸ Tamonu pueyano jaara quiocuara tonujure quia sesonuucua na casaa, quia saniri juhuata nata pocoojonu maninia, na jaatucusacari quiajaniya nequesoreena pueyanooocua. Quia sequerenoj casaa quia miiniutaniya nerani, na jiyanooniuria quiajaniya. Quiaa jaara jeecatoyaquiri nata, nojuajaari quiocuara saquiriojotanutaniya nequesoreena pueyano. Jaara quiocuara saquiriojotare nequesoreena pueyano, nequesoreenaari saniniu{jia quia niquitionutaniya na pueya, quia nujuatesaanura nujuatejojuajinija.⁵⁹ Seetanujuanaa nia sequeyanijia, majaari nia tohuatanu quiniutaniya nujuatejojuajiniji, niaa jaara puetunu nequesoreena sequencesano cumaneecajanaa niquitiorejaatijia niaacuara tonujuna pueyano.

13

Nioojia nia tacatore sesa nia quiniujiniji

¹ Jiyacari, tamasaca pueyari Jesuucua tiuquijioquiaari. Cuno pueyari naa Jesu pohuataquiaari:

—¡Jiyaniijia Pilatoori Galilea jiyajinjinio pueya puecoorucuaa! ¡Na nuhuaji, nojori nanaca cojitiriiri Pueyasooocuara nojori puecosano seya nanacata!

²Jesuuri nojori sequeree:

—¿Niaateeri jiyaniya cuno Galilea pueyari naa miishaarucuaa socua jiyanolhua sesa miijiaca nojori quiniuucua narta Galilea pueyajiniji? ³ Seetanujuanaa nia sequeya cutaranijia, nojoriiri maja socua sesa miijiaca quiqianu niajaniyajiniji. Niajaniyajuhuaj, niaa jaara tama nioojiajaaja tacatoyaquiri sesa nia miiniujiniji, niaari taraatia puecoosaariquianojuhuaj. ⁴ ¿Cuno dieciocho pueyariuhuaj, canapuete cusonuucanu cuno jiyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaca quiqianu narta Jerusalén tiacajinia quiniaa pueyajiniji? ⁵ Seetanujuanaa nia sequeyanijia, nojoriiri maja socua sesa miijiaca quiqianu niajaniyajiniji. Janiyari quiarijia nia numooteyaní, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhuaj.

Miriqui Jesu niishitiojosano muetu huo naanajiniji

⁶Jesuuri na nuhuaji pueya niishitiojoquiaari nio miriqui pohuatasanota:

—Tamonu pueyanoori higo naana jiitiaquiaari na uva cuhuariquiajinia. Tamacari, na camaruuri nocua quiaquiaari na niquiniuria. Na jajau mianu paniriquiaa juucuaari. Shaanoori quiriquiaa. ⁷Cunora, na cuhuariquia cojuana sequereeri: “Quia niquiri nio naana. Janiyari pueyaracaanu najuhuana niquiaani na jajau pajenura. Pueyaracaanu muetuyaquiyari. Tari na shocojorucuaari jiuujianaraca marijia. ¡Quia nure! Tamonu cuaara na nujuasaqui natasaaria, na muetunura cutara”. ⁸Cuhuariquia cojuanaari na riucuaree: “Jiyaniijiana, quia tarinitiarejaara tamonu marijiera. Janiya na pajama jiya tacarojotanutaniyani na sasetanura. Na nuhuaji, janiyari juunu cueaca na pajama paa-tiniutaniyani. ⁹Janiya jaara naa na miirini, muetunutaniya naasucua. Jaara muetuyaquiri, pocua socua na nurení”. Naajuhuaj pueyanaa, Pueyasoori sashiya, maninia miijiaca nia quiniuria.

Jesu jeecasacari porocuatucua samaatenu juuca

¹⁰Tamonu samaatenu juuca, Jesuuri tamonu tiacajinia niishitioriquiaa Pueyaso secojojua tiajinia. ¹¹Tamonu maaji cusosuuri tii quiriquiaajuhuaj. Dieciocho marijiaari na shoconujuquiaari porocuatua na quishacari. Samaruuri naa na jiyatequiaari. Majaari quenaaja na naata maninia nujuanu quijia. ¹²Jesu jaara na niquiquiaari, na sequereeri:

—¡Maajiniae miji! ¡Quia nijiniacuaja tari jeequerohua!

¹³Jesuuri na juaashiquia niaree maajicua. Jiyacaritij, maajiri maninia jeequequee. Nojuajaari Pueyaso maniniuhuaqueetanu co-teeree naa na miishaanuucuatej. ¹⁴Pueyaso secojojua tiajinia jiyaniijiaari juaarii naa Jesu miiniuucua samaatenu juuca. Naaratej, tii quiniaapueya sequeree Jesu niquiaraari:

—¡Seis juucacuajaari quiya puetunu semaanajinajanaa pa poonijionura! ¡Niocua cuno juuca nijioriquia nia naatanijiosaanura, maja samaatenu juuca!

¹⁵Jiyaniijia Jesuuri sequeree:

—¡Sapueno juhua maninia mijiaca niquishano pueyanaa, puetunu niajaniyajanaari nia juunu, nia burro samaacartaquiaa samaatenu juuca, nia jaatucusocoriquiano mohuaca na raatenura! ¹⁶ ¿Nio maaji-iriuahuaj? Nojuaja cutaraari supuetana Abraham niquiohuacuajinio supueno. ¿Majateeri maniniajuhua samaatenu juuca pa samaacatanura Satanás morojosano? Dieciocho marijiaari tari nio maaji shoconujuru-cuaa pueyaracaanu porocuatu na quishacari.

¹⁷ Naa Jesu sequencesacaritij, puetunu na paraajanaari caririquitiurii. Saniniujuja, puetunu pueyajanaari shuquiriaatia quiriquiaa nojori niquishacari queraatia maninia Jesu miishano na cumaacata.

Miriqui Jesu pohuatasano mostaza jajaujiniji

(Mt 13.31-32; Mr 4.30-32)

¹⁸ Jesuuri sequequiaari:

—¿Taate cua naata niishitiojonu niajaniyani, nia niishiniuria taa Pueyaso poonijiya pueya jiuujiajinia na rupaatani? ¹⁹ Na rupaari juhua mostaza jajauniyojua, pueyano natasano na cuhuariquiajinia. Cuno jajau jaara moritiare, puereetuucara caneyari. Naacuajitij, shuhuari na cashacucuaacua jesuya. Naajuhuaj, Pueyaso rupaari caneya pueya jiuujiacajinlia puetunu nio jiyajinijanaa maninia mijiaca nojori quiniuria.

Miriqui Jesu pohuatasano pan poreetajajiniji

(Mt 13.33)

²⁰ Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijiya mijiria na rupaatani? ²¹ Pueyaso rupaari juhua pan poreetaja maaji cojitishano trigo cashojuata, shanacusano jiuujianaraca shiitianijojua tohuatashijinia. Pan poreetajaari puetunu cuno cashojuaminiquiootasanojuanaa poreeteja. Pueyaso rupaari naa poonijiojuajuahuaj.

Juhua shiitianijojua tohuateyari quiya Pueyasoocua pa quianura

(Mt 7.13-14, 21-23)

²² Jesuuri Jerusalén tiacajiniara quiariquiaa na pueyata. Nucuaco na quiasacari, pueya niishitiojoriquiaa tiacajiniaari, shiitianijojua tiacajinianio. ²³ Jiyacaritij, tamonu pueyanoori na nequesotaree:

—Jiyanjijanaa, ¿saaja quenaaraqui pueyateeri Pueyaso pueyara jiyatesaanutaniya?

Jesuuri nojori riucuaree miriqui:

²⁴ —Jiyanoqua nia saniniijiuri shiitianijojua tohuateyaco nia tiuquiniuria, Pueyaso nia rupuenura. Juhuacarijia nia numooteyanijia, queraatia pueyari nocua tiuquitianu paniniutianiya juucua. Majari nojori naata quiniutianiya saaja. ²⁵ Cua tojitiare. Tia camaru jaara sanere, tohuateya tionutaniyari. Niajaniya, cante na tia carijiniacuma quiyajaani, niaari tohuateya piquiniuuniutianiya najuhuanaj. Niaa jaara naa nacare: “Jiyanjijanaa, canaacuaji quia riatare tohuateya!”, nojuajaari nia riucuanutaniya: “Maja cua niishiniu tejenote niajaniyani”. ²⁶ Jiyacaritij, niaari juhuacatecarasequenutaniya: ¿Majateeri canaa quia niishiniu? Canaacuajaari quiata miaquenuujuani. Canaari quiata ratujua mariyatani. Quiaacuajaari canaa tiaca nuucuacajinlia niishitiojoua”. ²⁷ Tia camaruuri nia riucuanutaniya: “Janiyacuajaari tari nia sequereeni, maja cua niishiniu

tejenote niajaniyani. Nia quiojorohua niiquiji, puetunu niajaniyajanaa sesa miijiacanaa".²⁸ Naa na taanuusacari niajaniyatej, niaari nujuquetunutaniya. Niaari nia quiaca miaquenutaniya jiyanohua nia taraajenuta, nia niquishacari Abraham, Isaac, Jacobo, puetunu pueyaso Pueyaso sequencesano caminiujiuniaa Pueyaso shuriucua quiyanocuaa.²⁹ Queraatia tamasaca pueyapueeri nijionutaniya puetunu jiyacajinijinojuanaa Pueyaso shuriucua cajitiuniuria, nojori miaquenuunura nata. Nijionutaniyari pananu muetasamaji, pananu tiuquishacojinio, pananu shuucuaji jiyacajinijinio, pananu muetasamaji miaquetajara jiyacajinijinojuhuaj.³⁰ Quiarijiani, queraatia pueyari juhua tojishoo quiya narta pueyara. Cuno quishacari saniniujia, nojori cutaraari seetanujuanaa tojishano pueya quiniutianiya Pueyasora, Pueyaso tojitiajaca nojori quiniuucua mijiria. Naajuhuaj, quiarijiani, queraatia pueyari juhua tojishano pueya quiya narta pueyara. Saniniujia, jiya puequesacari, nojoriiri najuhuana quiqiaca quiniutianiya Pueyasora, nojori tojitiaaquiniuucua nojuaja.

Jesu taraajesacari Jerusalén tiacajinia quiniaa pueyacua

(Mt 23.37-39)

³¹ Jiyacari noojiaqueya Fariseocuacaari Jesuucua tiuquijioquiaari. Nojoriiri Jesu numooteree:

—¡Niiquiji quia mashiri! ¡Jiyaniijia Herodes quia monu paniya!

³² Jesuuri nojori sequeree saaja:

—Cuno pueyanoori niishijia juhua jaami. Naa nia caminiujiushuhua cua sequencesano cuno jaamiria: "Janiyari samaruhua tohuatanijiyani. Janiyari cusosuhua naatanijiyajaaniuhuaj. Janiyari naa miya quiarijiani, tariquijiuahuaj. Janiyari tama tariqui tucuatanutaniya puetunu cua miiniu panishanojuanaani". Naa nia sequencesuhua cuno pueyano.³³ Cuaara rupaquijia cua sashiiria. Janiya quiarijija rucuanenutaniya-jaarani, tariqui, tama tariquinio. Janiya cuara mosaaria cutara Jerusalén tiacajinia, tee cuniqui puetunu pueyara Pueyaso sequencesano caminiujiuniaajanaa puecoosaquiaaricuaani. Majaari tamaqui cua monu quishaanutaniya.

³⁴Jerusalén tiacajinia quiniaa pueyanaa, niaacuajaari Pueyaso sequencesano caminiujiuniaa puecojuaca. Niaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatiajani, taa caacaraja necohua rijoquiaacuaa na nesu cariquiaconi. Niaari saaja paniyaquiquiaa cua cojuanura niajaniya.³⁵ ¡Cunora, cua tojitiare! Nia quiquitoori tojetaarucuajanaa shaqui quiniutianiya. Naajuhuaj, majaari socua nia niquinu quiniutianiya janiya, niaa jaara nia timitiasacari janiya sequerejaatija: "¡Cuaara shuquiriaatia quiiria pa Jiyaniijia, Pueyasojiniji tiuquihuano!"

14

Jesu naatanishacari cusosu poreeno pueyano

¹ Tamonu samaatenu juuca, Jesuuri tamonu Fariseocuaca jiyaniijia tiajinia quiaquiaari miaquenura, socua tamasaca Fariseocuacatanio. Nojoriiri Jesu shootiaturiquiaa nojori niishiniuria casaa na miintianiya samaatenu juucani.² Jiyacaritij, tamonu pueyanoori Jesu tacoji nujuariquiaa, poreeno cusotaano.³ Jesuuri Moisés Rootasanojiniji nishitiojonaa nequesotaree, Fariseocuacanio:

—¿Taa nia serojoquiaa Moisés Rootasanojiniani? ¿Maniniate cusosu pa naataniniu samaatenu juuca?

⁴ Nojoriiri saaja sanaa na tojitiariquiaa. Jesuuri cusosu quiaree jiyacari. Na naatanirri. Na jiyarorohua na tajiniaari. ⁵ Na nuhuaji, Jesuuri cuno Fariseocuaca sequeree:

—Nia burro, nia juunu jaara raama tiyare samaatenu juuca, ¿niaatucua samaatenu juuca shocoterejaara, raamaji nia jaaniuhuara nia seru?

⁶ Majaari nojori riucuanu quirii quenaaja.

Taa pa miyani queranacunura masuusano pa quishacari, taamueca pueyate masuushiyajaaniuhuaj

⁷ Jesuuri shootiariquiaa taa masuusano pueya socua panishano cajitiucuajinia nojori cajitiuniuria riutioconeetariquiaani. Jesuuri cunora nojori niquiara pohuataree nio pohuatasano. Naa sequereeeri:

⁸ —Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajaniyajiniji.

⁹ Socua tojishano pueyano jaara tiuquishii, nia masuuna pueyano naasucuaari quiocua niniutaniya na sequenura quiajaniya: “Shiiquia. Quia sanere nio pueyanooceuji”. Naacuajitij, quiaari cajitishaantuaniya quia caririquiniutia pueya paniyaquishano cajitiujinia, miaqueja puequeetujinia. ¹⁰ Nocuaji nia sequeyanija, niaa jaara masuusaariquia miaquenura tamonu tajinia, niocua cajishiiquia socua paniyaquis-hano cajitiujinia. Naacuajitij, quia masuuna jaara niquiri quiajaniya, nojuajaari quia sequenutaniya: “Cua rupuenanaa, jniya quia cajishii socua panishano cajitiujiniani!” Naacuajitij, cuniqui quiata quini-aari niishiniutaniya, quiajaniyaqui nia masuuna panishano pueyano.

¹¹ Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutaniya. Sanini-ujia, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

¹² Jesuuri na masuuna pueyano sequereejuhuaj:

—Quiaa jaara queranacunu paniya, majaari quia masuunu saaja quia rupuenaa, quia tapueyocuaca, quia panishano pueyano. Naajuhuaj, majaari quia masuunu quia shuriucua quiniaas casamiriaca pueya. Quiaa jaara nojori masuure, nojoriiri quia masuunutaniya saniniuuja. Naacuajitij, quiaari tari namishaarohuacuaja. Cunora, majaari socua quia masenu quiniutaniya Pueyasojiniji. ¹³ Naaratej, quiaa jaara queranacunu paniya, quia masuure casamijiuniucua pueya, sesaruneca pueya, sesacujuanucua pueya, cariyojuarujurinio. ¹⁴ Naacuajitij, quiaa jaara naa miiri, quiaari shuquiriaatia quijia quiniutaniya cutara. Majaari nojori naata masuunu quiajaniya saniniuuja. Naaratej, Pueyaso cutaraari maninia miiniutaniya quiajaniya saniniuuja, na samiitani-jiosacariuhua maninia mijiaca pueya.

Miriqui Jesu pohuatasano na queranacunujiniji

(Mt 22.1-10)

¹⁵ Jesuta cajiyano pueyano tojishacari naa Jesu pohuatasanotej, Jesu sequereeeri:

—¡Shuquiriaatia quijia cutaraari cuno, cante Pueyaso shuriucua mi-aquenutaniya jiyocuacaanuni!

¹⁶ Jesuuri na sequeree:

—Tamonu pueyanoori queraatia sumatuquiaari pueyata na queranacunura. Nojuaajaari coteenu queraatia pueya masuuquiaari. ¹⁷ Quera miaquenuusacari, na seru jiyaroreeri na masuusano pueya na sequenura: “Miji, puetunujuanaa tari jeenucuasaaree niaacuaji. Nia miaquesee”.

¹⁸ Puetunu masuusano pueyajanaari juhuacatecara sequequiaari maja na naata quianu miaqueniuucua. Coteenu masuusano pueyanoori cuno seru sequeree: “Janiyari shusha maseree tamonu cuhuariquiani. Janiyari nocua quiaa na niquiniuucuani. Cua jiyanoori quenaaja. Maja cua naata quianu quiata queranacunuucua”. ¹⁹ Tamonu masuusano pueyanoori sequeree: “Janiyari diez poonijiojuaca juyaca masereeni. Na saniniuucua quiaanijia. Quiocua cua jiyanoori cua quiaaquishacari queranacunujinija”. ²⁰ Tamonu masuusano pueyanoori sequereejuhuaj: “Shusha camiriinijia. Cunora, maja cua naata quianu”. ²¹ Seruuri tamajaaja tacateyarohua na camarnu tiajiniohua. Na jiyaniijia pohuatasuhua na masuusano pueya seqesanoori. Na jiyaniijiaari juaaquii. Na seru sequereeri: “Ritia quia quiaare tamasaca pueya masuunuu-cua tiaca nucuaacaco. Miji quia riijocoo casamijiuniucua pueya, sesaruneca pueya, sesacujua pueya, carijojuarujuri pueyanio”. ²² Seru tiuquishacariuhua, na jiyaniijia seqesuhuari: “Jiyaniijiana, janiyari tari miiriini taa quia sequeree janiyacuajani. Juhuanojuaja maja tia mishiniu”. ²³ Na jiyaniijiaari na sequeree: “Socua pueya quia pajecoo tiaca nucuaacaco, tamasaca tiacajiniara nucuaacaconio. ¡Socua pueya quia nenecojocoo nojori niniuria, cua tia mishiniuria! ²⁴ Seetanujuanaa nia sequeyanijia, coteenu cua masuusano pueyajinijionni, majaari quenaaja niquiriyatu nojorijinijinio saniniu quiniutianiya cua sumatu-sano”.

*Saaja tama na cuaqueya panitajajaarija na naata Cristo nuhuajiniu
(Mt 10.37-38)*

²⁵ Jiyahua queraatia pueyari Jesuta quiojoriquiaa. Jesuuri nojori-icua tacateree. Nojori sequereeri:

²⁶ —Cante cucua niya cua pueyano na quiniuriani, nojuaja cuaara niishirria nio. ¡Maja nia naata cua pueyano nia quiniu nia panuyaquishacari janiya socua nia quejiniji, nia nucuajinijinio! Nia niquiocua, nia niquiohua, nia tapueyocuaca, nia rimiatuhuajuhuaj, nia panishacari nojori socua janiyajiniji, ¡majaari nia naata cua pueyara nia quiniu! Naajuhuaj, ¡majaari quenaaja nia naata tama nia cuaqueyajaja panijia nia quiniu socua janiyajiniji! ²⁷ Cante tama na cuaqueyajaja panitiaquijia cucuarani, majaari na naata cua pueyanora na quiniu. ²⁸ Niaa jaara jiyaconaja tia tianu paniri, ¿majate coteenu nia cajinji nia niishiriojonura taa cumaneecate panishaanutaniyi, na tucuatanura puetunujuanaa? Naajuhuaj, niaari niishiriojiya, queraatia quiyacuajate nia cumaneeca. ²⁹ Niaa jaara coteenu naa miyaquiri, niaari najuhuana morijiucua nujuatejonutaniyi, na nuhuaji majaari socua nia cumaneeca quiniu nia tucuatanura nia tia. Puetunu nia tia niquiniaajanaari juhuacatecara nia macaatiniutianiya. ³⁰ Nojoriiri sequenutaniya: “Cuno pueyanoori tianu coteecanu najuhuanaj. Majaari na naata na tucuatanu quiarrijia”. ³¹ Naajuhuaj, jiya jiyaniijia jaara quianu narta jiyaniijiaita miaquetoonura,

¿majate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? ³² Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetoonu quiniutianiya. Saniniuujia, tucuacaanu narta jiyaniijia quishacarijia, nocua jiaramiquiniutianiya na pueyari, nata nojori pocoojonura maninia, nojori jiyanoootioonura. ³³ Naajuhuaj, niaa jaara carteyaquiri puetunu nia jiitiasanojuanaa, majaari nia naata cua pueyanora nia quiniu.

*Miriqui Jesu pohuatasano shonijiniji
(Mt 5.13; Mr 9.50)*

³⁴ 'Shoni jaara tiquiriiquia quiya, maniniaari, pa panishano. Jaara shaacara quiquii, ¿taate na naata tiquiriiquia na quiniuhuani? Maja na naata. ³⁵ Najuhanu quiyari. Majaari quenaaja maninia na quiniu cuhuariquiajinia jatasocoriquiano maninia na moritianiniuria nataacuaca. Majaari quenaaja maniniajuhuaj, na paatishaanura na moquijianura, natau pajama niojosocoriquiano. Jaara naa maninia quiyaquiritij, nareja jatashiyari. Cante numaaracani, cuaara tojitiaara miriqui cua pohuatasano. Cuaara na niishiiriajuhuaj. Seetanujuanaa cua tojitiajaca pueyani, nojoriiri juhua shoni mijiria.

15

*Jesu pohuatasano miriqui tashucuano borregojiniji
(Mt 18.10-14)*

¹ Roma tiacajinia quijia jiyaniijiara cumaneeeca masejonaa, mariyata sesa miijiaca pueyari Jesuucua nijoriquiaa na pohuatasano nojori tojtianura. ² Cuno pojoriiri Fariseocuaca soosano pueya quiriquiaa, Moisés Rootasanojiniji niishitiojonaa soosano pueyanio. Cunora, Fariseocuacaari, mariyata Moisés Rootasanojiniji niishitiojonaari tama rimiaaque-turiquiaajaaja Jesuucuara. Naa pocuatuiriquiaa Jesuuri:

—Cuno pueyanoori sesa miijiaca pueya shanacuquiaa nocua nojori nijionura. ¡Juhuajaniya nojoritia miaquequiaajaariuhuaj!

³ Naaratej, Jesuuri nojori niquiara pohuataree nio miriqui pohuatasano:

⁴ —Niaa jaara cien borregohua jiitiariquia, nojorijinijinio niquiriyatu-nijojua jaara tashucuare, ¿taa nia miiquiaani? ¿Niaatucua nia noventa y nueve borregohua cureeno tiujiaquiri rupaquijia cuhuariquiajinia, tashucuano borrego nia pajenura, niaa cuaara na riuriatarohuajaatija? Taaquiriirinij. Niaacuajaari naa miiquiaaquij. ⁵ Niaa jaara na riuriatasee, niaari nia shuquiriniutia na paquiohua nia numueecuaji. ⁶ Niaa jaara na tiuquitiarohua nia tiajinohua, niaari nia rupuenaa, mariyata nia shuriucua quiniaarerejotenutaniya nia sequenura nojori: “¡Cuuta nia shuquiriri quiarijia! ¡Tari riuriatarohua cua borregoniyojua tashucuanonijia!” ⁷ Seetanujuanaa nia sequeyanijia, naajaariuhuaj, jiyocuacaanu quiniaari jiyanoohua shuquiritiuquiaa niquiriyatu sesa miijia jaara noojia tacatore sesa na miiniujiniji. Cuno pueyanoori socua jiyanoohua shuquiritiasano tamasaca noventa y nueve pueyajiniji, canapuetucuaja tari maninia pueyacuaani.

Jesu pohuatasano miriqui juurequetesano cumaneejiniji

⁸ 'Naajuhuaj, tamonu maaji jaara diez cumaneecaraca quiri, jaara niquiriyatu juurequetere tiajiniaaco, ¿maatucua taa miirini? Na samaritiu noshitiniutianiyari, na tia na netoonujunura. Pueyaracaanu jacteria na pajenutaniyari cuaara na riuriatarejaatija. ⁹ Na riuriatasacari na juurequetesano cumanee, maajiri na rupuenaa, mariyata na shuriu-cua quiniaa maajipohua rerejotenutaniya na sequenura nojori: "¡Miji nia niimia! ¡Cuata nia shuquiriri! ¡Tari riuriatarohua cua juurequetesano cumaneenijia!" ¹⁰ Seetanujuanaa nia sequeyanijia, jiyocuacaanu Pueyaso seyari naa shuquiriquiajuhuaj sesa mijia jaara noojia tacatore sesa na miiniujiniji.

Jesu pohuatasano taa tamonu pueyano jiyanoquiaari neyanuni

¹¹ Na nuhuaji, Jesuuri nio pohuatareejuhuaj:

—Tamonu pueyanoori caapiqui niyanuraca quiquiaari. ¹² Socua naatujuuaari na que sequeree: "Cua quenaa, quiarijia cua niquitiore quia jiitiasanojiniji, quiria quiriquiano quiaa jaara shaajeyare". Naacuajitij, na queeri puetunu na jiitiasanojuanaa niquitiojoree necohua. ¹³ Socua naatujuuaari rupaquijia camueenujuquiaari na que tiajinia. Na nuhuaji, puetunu na que niquitiosanojuanaa nojuajani, nojuajaari saniniuuja tamasaca na niquitiojoree na cumaneecara. Na nuhuaji, na cumaneecata quiaquiaari tucuacaanuuri, tamonu jiyajinia. Cuniqui, puetunu na cumaneecajanaa puecaquiaariiri sesa na miiniutia. ¹⁴ Nojuaja jaara puetunu na cumaneeca puecaquiaarijanaa, cuno jiyajiniaari jiyanoehua miaajesacari quiquiaari. Mashajaari juhuacatecara miaajequiaari. ¹⁵ Cunora quiaaree tamonu tahuecua cuno jiyajiniaari, nera na poonijionura. Cuno tahueri na jiyaroree na cuhuariquiajinia na cushiya na cojuanura. ¹⁶ Mashajaari cushiya miaquesano miaquenu paniriquiaa juucua na miaajenuta. Cunoori tamaatia purootu cocua quiquiaari. Majaari tamonu pueyano niquitionu quijia quenaaja na miaquesocoriquiano. ¹⁷ Na nuhuaji, tama sequereejaarijia: "Cua queeri queraatia na tiajiniaaco seyaraca. Nojoriiri maninia miaquenuuquiaa taquiya. Nojori sumatuuri cureequiaajuhuaj. ¿Janiyarijiataj? ¡Janiyari niya quera cusoya cua miaajenutani!" ¹⁸ ¡Cua queecua tacateyarohuarauquij! Janiyacua na sequenceshuani: 'Cua quenaa, janiyari Pueyaso miiquianu sesani. Janiyari sesa miiquianu quiajanijayuhuaj. ¹⁹ Majaari socua cua sequenu quia niyanuta. Janiyari puera sesa mijiani. Cua jiyatere juhuari juhua quia seru cua quiniuria, quiara cua poonijionura'. ²⁰ Naa na niishiriojonu nuhuajitij, mashajaari quiaquiaariuhua na queecua.

"Tucuacaanu na quishacaricia na que tiajiniji, na queeri na niquirii. Nocua tarajereeri. Nocua neteyareeri na naacunura. Na cacaseeri. Na nujuunequereejaariuhuaj. ²¹ Neyanuuri na que sequeree: "Cua quenaa, janiyari sesa miiquianu Pueyasoni, quiajanijanio. Majaari cua sequenu quia niyanuta". ²² Na queeri saaja na tiaco seya sequeree: "¡Ritia! ¡Socua maniniuqui toque miji nia riquioo! ¡Niocua quiyanu cushitirinioj! ¡Jaaniisho nia cushitiri! ¡Sapatu nia cushitirijuhuaj! ²³ Pa riutianishano juunu niquiojua nia quiacoo mosocoriquiano. Quiarijia pa queranacure. Pocua miaquenuuren, quiyanu pa shuquiritasacari. ²⁴ Nio quiyanuniyojuaari juhua macu quiriquiaa. Quiarijia samiittiarohuari. Nojuajaari shaajequiaari. ¡Tari pocua muetarohuari!" Naacuajitij, nojoriiri juhuacatecara queranacuquiaari.

²⁵ 'Jiyacaritij, jiyapueranuuri cuhuariquiajinia quiriquiaa. Na tacatesacariuhua tiajiniohuara, jaara tari cateca quiriquiaa, saaja pueya tojirii jaaquequenuyanoori, nianujuniuyanonio. ²⁶ Naaratej, na que tiaco seru piiriiri: "Miji, cua sequere, ¿casaara tiajinia cojuatuneshiyani?" ²⁷ Seruuri na riucuaree: "Quia nuhuajishanacuaja tari tiuquiriohuano. Quia queeri shuquiriaatia quiya maninia na tiuquishacariuhua, maja cusosu. Naaratej, canaa sequereeri querasapiquia juunu niquojua canaa monura". ²⁸ Jiyacaritij, jiyapueranuuri jiyanolhua juaaquii. Majaari tiajinia na tiuquiniu paniniu quiriquiaa. Nocuaji na queeri nocua tohuatamaa carijiniacuma, na neneconjonura tiajinia na tiuquiniuria. ²⁹ Na que sequeree saajaari: "Quiaacuaaari niishiya, janiyari pueyara-caanu poonijioquiaa quiarani. Majaari quenaaja cua tarijionu quiquiaa quiajaniya. Naa maninia tojijia cua quishacari quiajaniyatej, ¡majaari quia niquitionu quiquiaari janiya quenaaja niquiriyatu cabraniyojua, cua queranacunura cua rupuenaata! ³⁰ Quiarijia saniniujuja, quia niyanu seque tiuquishacariuhua, ¡quiaari querasapiquia juunu niquojua moree nera! ¡Nojuajaari quia cumaneeca puecacanu paanatujuricual!" ³¹ Na queeri na sequeree: "Sanajanaa, quiaari pueyaracaanu cuata quiya. Puetunu cua jiitiasanojuanaari quia casaa. ³² Naajaa, quiarijiani, maninia pa queranacure. Shuquiriaatia pa quirij. Quia tarajanuuri juhua macu quiriquiaa tari. Quiarijia samiitiarohua pa-janiyaraari. Nojuajaari juhua tashucuacanu pocuaji. Quiarijia pocua muetarohuari".

16

Miriqui Jesu pohuatasano pueyanojiniji, cante na jiyaniijia cumaneeca riutiocojuani

¹ Jesuuri na pueya pohuataquiaari nio miriqui pohuatasanojuhuaj, nojori na niishitiojonura:

—Tamonu casamiriaca pueyanoori tamonu pueyano jiitiaja na casami cojuariquiano, na cumaneecanio. Tamasaca pueyari cuno camarnu pohuataree na seruna na cumaneeca riutiocoriquiaa jiyasohuaja, tama nerajaaja. ² Cunora, jiyaniijiaari cuno na seru sequeree: "¿Taa quia miiquiaa janiyani? ¡Quiana sesa miiquiaa! Quiarijia cua niquitiore quia naajiotasano puetunu quia miishanojinijianaa. Majaari socua quia quiniu quiniutianiya cua casami cojuana". ³ Cunora, cumaneeca cojuanaari niishirijoquee. Tama sequereejaarrijia: "¿Taa cua miiniutianiyyarini cua jiyaniijia jaara cua jatare cua poonijiosanojiniji? Janiyari maja cumueecani, cuhuariquiajinia cua poonijionura. Naajuhuaj, jiyanolhua cararaatiaari quiria, pueyajiniji nareja cua mashiniquijionura cua panishano. ⁴ ¡Jaj! Tari niishiquiinjia taa cua miiniutianiyyani tamasaca taraajenura cucua, nojori masuunura janiya nojori tiajinia cua quiniuria, janiya jaara nio poonijiosanojiniji jatasaareni". ⁵ Naaratej, nojuajaari naa miiquiaari. Juhuacatecara sequequiaari pueyari, nojori nijionura nocua, canapue na jiyaniijia niquitiojquiaari casamicuajani. Coteenu tiuquinia pueyano nequesotareeri: "¿Casaa cua jiyaniijia niquitiojocanu quiajaniyani?" ⁶ Pueyanoori na riucuaree: "Cua niquitiocanu cien patacocua mishaja shiyocuani". Cumaneeca cojuanaari na sequeree: "Ritia quia cajiri. Niya quiya quia masesano casamijiniji naajiotasano.

Tamonu quiarinio quia miiri. Quia naajiotare saaja cincuenta patacocua mishaja shiyocua".⁷ Na nuhuaji, tamonu pueyano nequesotareeri: "¿Quiajaniyariuhuaj? ¿Casaa cua jiyanijia niquitiojocanu quiabajaniyani?" Na riucuareeri: "Cua niquitiocanu cien canaasatu mishaja trigoni". Cumaneeca cojuanaari na sequeree: "Niya quiya quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo".⁸ Na jiyanijia jaara niishiquaari sesa na seru miishano, na sequereeeri: "¡Quiaaqui jiyanolua niishijia tama quia cuaqueyajaaja quia cojuanura!"

'Seetanujuanaa pueyanaa, Pueyaso niishiyashijiaca pueyari socua jiyanolua niishijiaaca cuhuashi quiyjaca pueyajinji. Nojori cutaraari niishijia maninia nojori miiniuria narta pueya, pueya paniniuria saninuuja nojori.

⁹'Naarate nia nacasuyanijia, naa capora nia quirijuhuaj, maninia nia miiniuria pueya. Maja nia casami nia jamuenu. Cunocuajaari nareja Pueyaso niquitiosano niajaniya. Naacuajitij, capora nia quishacari mijiria jaara puequema, nia Jiyanijiaari nia tiuquinitianutaniya pueyaraacaanu quishaqui jiyocuacaanu, jiyanolua na shuquiritisacari niajaniya.

¹⁰'Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutaniya. Naaratej, na camarnuuri queraatia casami cojuanara na jiyatenutaniya. Saniniujia, cante jiyatesaaree secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohuaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniya-jaariuhuaj.¹¹ Naajuhuaj, niaa jaara maninia jiitiaaquiquiaa mijiria casami, Pueyasoori niaacua tiuyaquinutaniya seetanujuanaa maninia jiyocuacaanuji casami nia jiitianura.¹² Naacuajitij, niaa jaara tamonu pueyano casami cojuaaquiquiaa maninia, ¿Pueyasotucua taa niquitiore niaarano na riuriotacani? Maja cutaraari nia niquitiosaanu quiniutaniya.

¹³'Poonitijiosano pueyanoori maja na naata caapiqui jiyanijijara poonijionu. Jaara caapiqui jiyanijijaraca quiri, tamonu samiritiaari, na panishacari tamonu. Naajuhuaj, niquiriyatu jiyanijijia tojijia quiniutaniya maniniaari, na soosacari tamonu. Naajuhuaj pueyanaa, majaari nia naata Pueyasocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijijotesaanutaniya saaja. Naacuajitij, Pueyasoori maja na naata nia poonitijionu nera.

¹⁴ Fariseocuacaari jiyanolua cumaneeca panijiacu quijia. Naaratej, nojori tojishacari Jesu sequenceso, nojoriiri saaja na rerequeteree.

¹⁵Jesuuri nojori sequeree:

—Niaacuajaari tama nia cuaqueyajaaja jiyatequiaa sapuenu pueyano maniniu nia niqusishaanura. Pueyasocuajaari nioojia niishiya. Niaari pueya jiyajenetequiaa nojori jiyashacari niaari Pueyaso panishano cutara, queraatia casami nia jiitiasacari. Saniniujia, casaa pueya jiyatequiaa socua jiyanolua na panishanorani, Pueyasoori cuno soya cutara.

Moisés Rootasanoori coteenu quiquiaari, quiarijia quiya cutaraari quiarinio Pueyaso Rupaa

¹⁶ 'Moisés Rootasano, mariyata puetunu tariucuacaanu Pueyaso sequenu panishano caminiujiuniaa pohuatasanojuanaari pueya to-jitiascoriquiano quiquiaari, Tiuquinijiona Juan pohuatasanojuhuaj. Quiarijia saniniuujia, maninia rupaa Pueyasojinijiiri pohuatasaaquiaa, taa Pueyaso jiyanooni paniya pueyani, na muerasu nojori quiniuria. Quiarijiani, puetunu pueyajanaari jiyanohua saniniujiya Pueyaso muerasu nojori quiniuria.

¹⁷ 'Nio jiyari shaajeriquiano, jiya cajiniocuanio. Saniniuujia, taricuacaanu pueyara Pueyaso sequencesano caminiujiuniaa pohuatasano cutaraari maja na shaajenu quiniutianiya quenaaja.

Jesu niishitiojosano, pueyano carteyaquiniuria necocua

(Mt 19.1-12; Mr 10.1-12)

¹⁸ 'Pueyano jaara necocua cartere tamonu maa jitia na caminiuria, cuno pueyanoori jiyanohua sesa miya Pueyaso niquiara. Naajuhuaj, cante cartesano maa jitia camiyani, cunoori sesa miyajuhuaj.

Jesu pohuatasano casamiriaca pueyanojiniji, Lázarojinjinio

¹⁹ 'Casamiriaca pueyanoori quiquiaari. Jiyanohua maniniuqui toqueya cushiyojouaari, juhua jiyaniijianucua toqueya. Jiyanohua na shuquiriniutia, puetunu juucajanaa queranacujuhuaari. ²⁰ Jiyacaritij, casamijiu pueyanoori quijajuhuaj. Jiyanohua sapueyaraca. Nojujaari cuno casamiriaca pueyano tia tohuateyaji niojotasano puetunu juucajanaa. Na sesaari quijia Lázaro. ²¹ Nojujaari casamiriaca miaquejajiniji totinijiosano raacula miaquenu panija juucua. Saaja sareyari na sapueya rimianacunuujua. ²² Na nuhuaji, cuno casamijiu pueyanoori cusoquiaari. Pueyaso seyari na riquiaari supuetana Abrahamta na quiniuria, Pueyaso muerasurano shanohua quiquojinlia. Cuno casamiriaca pueyanoori cusoquiaarijuhuaj. Jamosaaquiaari-iri. ²³ Sesa miijiacarano quiquojinlia na quishacari, naquiya na miishacari tii, nojujaari mauquiaari. Cuniquiji tucuacaanu niquirii Lázaroori, shuquiriaatia quiyano supuetana Abrahamta. ²⁴ Casamiriaca pueyanoori nacaree: "¡Cua supuetana Abrahamnaa, cucua quia taraajere quenaaja! ¡Lázaro quia jiyarore cucua! ¡Cuaara na juaashiquia nacatu shiiria mohuacajinlia! ¡Cua niti shiniajaquee quenaajacua! ¡Janiyari puera jiyanohua naquiya miya nio manijiniani!" ²⁵ Abrahamri saaja na riucuaree: "Sanajanaa, quia niishiri taa jiyanohua maninia quia quiquiaarini, pueyaracaanu jiyocua quia quishacari. Lázaroori saniniuujia jiyanohua taraatia quiquiaari pueyaracaanu, jiyocua na quishacari. Lázaroori quiarijia niya cumanijashiya. Quiaari saniniuujia naquiya miishiyacujua. ²⁶ Naajuhuaj, jiyanohua tucuua tacoori pa tajinia quiya. Cunora, cante niiquiji niuuniu paniya cuniquijiria quiocuani, majaari na naata. Naajuhuaj, cante quia quiquojiniji niuuniu paniya niiquijiriani, majaari na naatajuhuaj". ²⁷ Casamiriaca pueyanoori supuetana Abraham sequeroahuacuhuaj: "Naa naasucuaj cua supuetana Abrahamnaa. Naajaa, quia secojiyanilia, Lázaro quia jiyarorohua cua que tiajinlia. ²⁸ Tii quiyajaari cua tapueyocuaca. Cinco tarajanuhuaracanijia. Lázaro cuaara nojori numooteera, maja nojori quejoosaanurajuhua nio saniitiosaqui quiquojinlia". ²⁹ Abrahamri na riucuaree: "Nojoricuajaari Moisés Rootasano jiitiae, puetunu Pueyaso sequencesano caminiujiuniaa naajiotasanojuanaanio. Quia tapueyocuaca

cuaara tojitiaara cuno".³⁰ Casamiriaca pueyanoori riucuaree: "Naa naasucuatuhuaj, cua supuetana Abrahamnaa. Naajaa, tamonu pueyano macunucuajinjinio jaara muetarohua nojoriicua, nojoriiri noojia tacatonutaniya sesa nojori miiniujiniji".³¹ Abrahamri saaja na riucuaree: "Nojori jaara Moisés Rootasano tojitianu paniyaquiquiaa, Pueyaso sequesano caminiujiuniaa naajionuutasanonio, majaari nojori tojitianu quiniutianiayahuaj, macu pueyano jaara samiitiarohua".

17

Puereetaari quiniutianiya sesa mijiacara

(Mt 18.6-7, 21-22; Mr 9.42)

¹ Na nuhuaji, Jesuuri na pueya sequequiaari:

—Mijiria, pueyari pueyaracaanu sesa miihishaaquiaa. Jiyano hua taraatia quiijaari cuno, cante sesa miihirii tamonuni.² Jiyano pueyanoratej, maara socua maninia quiri nera, puereetuua saajia jaara na riquajiniji morotasaare, shoniniacu caminia jiuujiajinia jartasocoriquiano. Jaara naa miihishaaretej, maara maninia quiri, maja sesa miihiaja na jiyatenura niquiriyatu nio muerasuniyojuajinjinio.³ Cunora, tama nia cuaqueyajaaja nia cojuare maja quenaaja sesa nia miitiniuria pueya.

'Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniuucua quiajaniya, quia jiyanoorinioj.⁴ Nojuaja jaara sequeyarucua sesa miya quiajaniya niquiriyatu juuca, naajaa, quia jiyanooriquia, nojuaja jaara quia sequere: "Sesa miirii quiajaniyanijia. Cua jiyanoori quenaaja". Nojuaja jaara quia pacutejore sesa miiniu siete cuno juucaja, naajaa, majaari na tarinitianu jiyanooniu.

Pueyasoocta tiuujia pueyanoori jiyano hua cuma acaraca

⁵ Jesu saquierojo sano pueyari Jesu sequequiaari:

—Jiyaniijiana, socua jiyano hua canaa quia tiuutiri Pueyasoocta, socua cumaaca canaa jittianura.

⁶ Jiyaniijia Jesuuri nojori riucuaree:

—Pueyasoocta nia tiuuniu jaara quiri quenaaja juhua mostaza jajau niyoja, jiyano hua shiitianiyoyuja, niaa jaara nio satuna jiyona sequere: "Niiquipi quia pacure. Moojinia quia nujuasee", maara nia sequesano tojiri.

Pueyasora poonijionatucua taa mijia quiriquianij

⁷ 'Niaa jaara seruraca quiriquia, nojuaja jaara tiajinia tiuquiriohua quia cuhuariquiajini tee na namitiariquiaacuajani, quia seja cojuanujiniji soj, ¿niaatucua na sequere: "Miji, quia miaquesuhuaja"?⁸ Majaruhua. Niaari saaja na sequenutaniya: ¡Quiria quia sumature! Cua mianuutere coteenu. Cua raaterejuhuaj. Cua miaquenu nuhuaji, quiocua saniniuujia miaquerohua. Quiocua raturohuajuhuaj".⁹ Na nuhuaji, nia seru jaara puetunu nia sequesanojuanaa miiri, ¿niaateeri na sequequiaa "paacarasho"? ¡Maja!¹⁰ Naajuhuaj, niaa jaara puetunu Pueyaso sequesanojuanaa miiri, tama nia sequerejaaja: "Janiyari maja maninia seruni. Majaari tama cua niishitajajinijiaaja cua miiniu quiquiaa cua Jiyaniijia. Janiyari saaja pueyaracaanu paniquiaa cucua na tequejonura juhua naatujuacuani".

Jesu naatanijiosacari diez pueya, lepraraca cusosuhua

¹¹ Jesuuri Jerusalén tiacajiniara na pueyata quiariquiaacuhuaj. Jiyacari, Galilea jiya, Samaria jiya tajiniaaco quiariquiaari. ¹² Quera na tiuquishacari shiitianiyojua tiacajinia, diez pueya lepraraca cuso-suhuari na naacuquiaari. Nojoriiri tucuacaanujijia Jesuucuaji nujuatusee. ¹³ Nojoriiri Jesuucua nacaree:

—¡Niishitijona Jesunaa, canaacua quia taraajere!

¹⁴ Jesu niquishacari nojori, nojori sequereeri:

—Nia cuaqueya nia niquitishii pueyacuara secojonaa, taa supuetana Moisés sequequiaaricuajani.

Nojori canujuucuatusacarijia, nojori cusionuuri shaajequee.

¹⁵ Tamonu nojorijinijinio niquishacari na cuaqueya tari cushiriiquii, nojuajaari Jesuucua tacateyarohua. Nojuajaari na rupaa paaretariquiaa na maniniuhuaqueetasacari Pueyaso. ¹⁶ Jesu cariquimiaji mojoquetaseeri. Jiyocuara naniriiri. Jesu sequereeri: “¡Paacarasho Jesunaal!” Cuno pueyanoori Samaria jiyajinijinio tahue quiquiaari. ¹⁷ Jesuuri na pueya niquiara naa sequeree:

—¿Majateeri diez cusosuhua naatanijiosaanu quirii? ¿Teeteeri narta naataconohua nueve pueyan? ¹⁸ ¿Saaja nio tahueteeri tacaterohua Pueyaso na maniniuhuaqueetanura?

¹⁹ Na nuhuaji, Jesuuri cuno tahue sequeree:

—Quia sanere. Quia quiaarohua. Quiaacuaja naatarohua cucua quia tiuuniuucua.

Taa na quiniutianiyani, Jiyaniijia Cristo tiuquishacariuhua

(Mt 24.23-28, 36-41)

²⁰ Fariseocuacaari Jesu nequesotaquiaari taacari Pueyaso Jiyaroso-coriquiano niniutianiya jiyaniijiara na quiniuria mijiriani. Jesuuri nojori riucuaree saaja:

—Pueyaso Jiyarosano jiitiasacari na muerasu, majaari namijiata niquishano. ²¹ Majaari na naata sequesaanu: “Niya quiya pa Jiyaniijia quiqio”, “Jati quiyaruhua”. Pueyasocuajaari tari niya jiitiaa na muerasu nia tajinia.

²² Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Niaari cua niquiniuucua jiaatianutaniya niaata cua quiniuria rupaquijia, taa niaata cua quiya quiarijia cuaa. Majaari nia niquinu quiniutianiya janiya. ²³ Tamasacaari nia sequenutaniya: “¡Niya quiyacuaja nia Jiyaniijia!” Tamasacaari saniniuujia sequenutaniyacujua: “¡Nooj, jati quiyatej!” Majaari nia tojinii jiyano pueyatej, nojori jaara naa nia sequeriquia. Majaari nojori neteyotanu najuhuanaj. ²⁴ Mijiria cua tacatesacariuhua, cuno juuca, janiyari niquishaanutaniyani, naatej, taa miacana puetunu jiya cajiniocuajanaa niquishaquaacuaani na nunujusacari. ²⁵ Saniniuujia, mijiria cua quishacarijia, janiyari co-teenu jiyano hua naquiya miishaanutaniyani. Nio pa quishacari pueyari cua paniyaquinutianiya. ²⁶ Quera cua tiuquiniu panishacariuhua mijiria, naa quiniutianiysi taa mijiria quiniae pueya quiquiaricuua supuetana Noé quishacarini. ²⁷ Naa quiquiaarii cuno quishacari. Mijiria quiniae pueyari juhuajaniya miaquenuujuja. Raruujuaari. Juhuajaniya maa ji camiyoyaar. Pueyari necojori camiyoteja. Pueyari naa juhuajaniya mijioriquiaa Noé jaara tiuquitiaquiaari na puereetuua buquejinia. Canashiyaquiji, maruuri jiyano hua niquiaari. Puetunu

mijiria quiniaajanaari cusionuuquiaari pajaacajinia. ²⁸ Naa quiquiaar-
ijiuhua supuetana Lot quishacari Sodoma tiacajinia. Cuno pueyari
juhuajaniya miaquenenujua. Raruujuuaari. Casami masejojuaari. Juhua-
janiya na casami niquitiojojuaari. Na cuhuariquiaca natoojuaari. Na
tiacara tiajouuaariuhuaj. ²⁹ Naa juhuajaniya nojori quishacaritij,
Lotri tohuataquaariai Sodoma tiacajiniji. Jiyacaritij, maniiri asufreta
cojitishano juhua maru niquiaari jiyocuacaanuji. Puetunu cuno sesa
miijiacajanaari manijinia catequiaari. ³⁰ Naa quiniutianiayaariuhua
quera jiya puequesacari. Pueyari juhuajaniya quiniutianiya. Janiyari
jiyacari canashiyaquiji tiuquinintianihuani.

³¹ 'Cuno juuca, pueyano jaara na tia cacojiria quiya, cuaara
roseyaquirria na casamiicua tiajiniaaco. Naajuhuaj, pueyano jaara
na cuhuariquiajinia quiya, nojuaja cuaara tacateyaquiuuhuara na
tiajinia. ³² Nia niishiriquia supuetana Lot niquiocua. Na mashishacari,
nojuajaari ritia cusoquiaari na nijiniara na niquiniuucua, na casamiicua
na taraajesacari. ³³ Cante saaja shuquiriaatia mijiria na quiniuria
niishirijojuani, nojuajaari na nuhuaji jiyanoehu taraatia quiniutianiya
Pueyasooju. Saniniuumia, cante tama na cuaqueyajaaja panitiaja cua
tojijiara na quiniuriani, nojuajaari pueyaracaanu shuquiriaatia quihiara
jiyatesaanutaniya.

³⁴ 'Cua tojiri. Cuno niucuajuhuaj, caapiqui pueya jiuriatoosacari juu-
cua na maquetujinia, niquiriyatujuuaari rishaanutaniya jiyocuacaanura,
Pueyaso pueyano na quiniuucua. Tamonuuri tiujiasaanutaniya sani-
itiosocoriquiano. ³⁵ Cuno juucajuhuaj, caapiqui maajipohua riiquiniu-
ushacari jatiqui juucua, cucua tiuujiaari tarajanu shuriucuaji rishaanu-
taniya. Tamonuuri tiujiasaanutaniya saniitiosocoriquiano. ³⁶ Caapiqui
pueya quishacari cuhuariquiajinia, cua pueyanoori rishaanutaniya.
Tamonuuri tiujiasaanutaniya saniitiosocoriquiano.

³⁷ Jesu pueya tojishacari naa Jesu sequesanotej, nojoriiri na neque-
sotaree:

—¿Tee nio quia pohuatasano niquishaanutaniyarini?

Jesuuri nojori riucuaree miriqui:

—Tee casaa moqueyani, mohuari tii rerejiya.

Naajuhuaj, majaari quenaaja niquiriyatu Pueyaso tojiyashijia
cureenu quiniutianiya saniitiosoo.

18

*Jesu pohuatasano mashiquojiniji, pueya nequesoreena pueyanojini-
jinio*

¹ Jesuuri na pueya pohuataquiaari nio miriqui pohuatasano nojori na
niishitijonura, nojori cuaara Pueyaso secojoora pueyaracaanu, nojori
taacanuyaquiniutia. ² Naa nojori sequereeri:

—Tamonu tiacajinia, pueya nequesoreena pueyanoori quiija.
Pueyaso puereyashijia quiijaari, pueya rerequetejanio. ³ Cuno
tiacajiniaja tamonu mashiquoori quiquiaarijihuaj. Mashiquoori
cuno nequesoreenaacua rucuanejojua pueyaracaanu. Na secojojuaari
sesa na miinia pueyano cuaara na niquitiohuara na casaa saniniuumia,
sesa na miishanojiniji nojuaja. ⁴ Majaari nequesoreena tojiniu paniniu
quiija pueyaracaanu cuno mashiquo. Naajaa, pueyaracaanu nocua na
rucuanejosacari, cuno nequesoreenaari socua tama sequequiaariajiaja:

“Janiyari maja Pueyaso puerejani. Janiyari pueya tojiyashijia cutarani. ⁵ Naajaa, naa nio mashiquio taajetesacari janiya pueyaracaanutej, janiyari quiarijia na panishano miiniutianiya nerani, mariqui cua juuatijiore pueyaracaanuuri na nenecojosacari janiya”.

⁶ Maninia na pueya niishiniuria na pohuatasano, Jiyaniijia Jesuuri naa nojori sequeroahuacuhuaj:

—Naa miiquiaariiri, cuno pueya nequesoreena seque. Jiyanohua pueya rerequeteja quiquiaariiri, naajaa, nojuajaari maninia miiquiaari cuno mashiquiora. ⁷ ¿Nia que Pueyasoorijiataj? ¿Niaateeri jiyaniya maja nojuaja tojiniu quiniutianiya na muerasu, canapuete na secojoquiaani juuca, niucuanio? ¿Pueyasoteeri nia sashitiniutianiyyaara? ¡Maja! ⁸ Nojuajaari maja na tarishiniu quiniutianiya. Ritia nia naacunutaniyari sesa nia miijiaca pueyacuaji. Sesa nia miijiacaari namishaanutaniya niaacua. Naaratej, majaari secojonu nia tarinitianu. Mijiria cua tiuquishacariuhua, ¿janiyate Pueyasocua tiuujiacra riuriatanutaniya naa pueyaracaanu secojonuujuacani?

Jesu pohuatasano miriqui Fariseo pueyanojiniji, Romano jiyaniijiar cumaneeca masejojuajinjinio

⁹ Jesuuri socua nio miriqui pohuatasano pohuataquiaari noo pueya niquiara, canapuete tama na cuaqueyajaaja jiyaniijiani nojoriiri maninia pueyano. Naacuajitij, nojoriiri tamasaca pueya soojea, nojori jiyanihacari cuno pueyari socua sesa miijiaca nojorijiniji. Cunora, Jesuuri nojori niquiara naa pohuataquiaari:

¹⁰—Fariseo pueyanoori quiaquiaari Pueyaso Secojoua tiajinia na sec-ojonura Pueyaso. Jiyacaritij, Romano jiyaniijiar cumaneeca masejojua pueyanoori quiaquiaari Pueyaso na secojonura tiijuuhuaj. ¹¹ Fariseo pueyanoori nujuariquia Pueyaso na secojosacari. Naa sequeriquiaari: “Pueyasonaa, paacarasho janiyari maja juhua tamasaca pueyani. Tamasaca cutaraari nohuasenuujuaca, sesa miijiaca, maaji porocuajuuhuaj. Naajuhuaj, shuquiriaatia quiyanijia, janiyari maja sesa miijiiani juhua nio pueyanojua niya cuata secojiyani, cumaneeca masejona pueyanoni. ¹² Janiyari caapiqui juuca miaqueyauquiaani puetunu semaanajanaa cua shuquiritiniuria quiyaniya. Naajuhuaj, janiyari pueyaracaanu puetunu cua masesanojinijijiana niquitoquiaa quiarani, taa Moisés rootaquiaaricuajani”. ¹³ Cumaneeca masejon-aari saniniuujia tucuacaanuji nujuasee. Na secojosacari, majaari que-naaja na maunu quiriquiaa jiyocuacaanu. Tama nojuajaari na jiriquia piquiriquiaa na taraajenuta sesa na miishanojiniji. Naa sequereeri: “Pueyasonaa, cucua quia taraajere. ¡Cua jiyanoori! ¡Sesa miijianijia!” Naa secojoquiaariiri. ¹⁴ Seetanujuanaa nia sequeyanijia, cumaneeca masejonaari Pueyaso jiyanooshano tacateyarohua cutara. Fariseo pueyanoori saniniuujia jiyanyaquishoo tacateyarohuacujua. Naacuajitij, cante tama na cuaqueyajaaja jiyateya juhua maninia pueyano na quiniuria tamajaajani, nojuajaari cararosaanutaniya. Saniniuujia, cante sesa na miishano seetaaquijiani Pueyaso jiyanooniuria nojuajani, Pueyasoori cuno pueyano jiyatenutaniya seetanujuanaa sesa miyaquiajia na quiniuria.

*Jesu niasacari na juashiquia conaajaacua
(Mt 19.13-15; Mr 10.13-16)*

¹⁵ Jiyacaritij, conaaajaari poosaariquiaa Jesuucua, Jesu nianura nojoricua na juaashiquia, Pueyaso jiitianura maninia nojori. Jesu saquiriosano pueya jaara niquiquiaari conaaaja pooshiyano Jesuucua, nojoriiri na poonaa juaarii. ¹⁶ Jesuuri saaja conaaaja poonaa sequeree, conaaaja cuaara nocua poosaaria. Na nuhuaji, na pueya sequereeri:

—Natujoori cuaara poosaaria cucua. Maja na poonaa tenujunu. Cante Pueyaso muerasura quiniu paniyani, nojori cuaara jiyateera tama na cuaqueyajaaja juhua nio natujooriria. ¹⁷ Seetanujuanaa nia sequeyanija, cante tama na cuaqueyajaaja jiyateyaquiya juhua naatujooriria Pueyaso rupaacua na tiuuniuriani, cuno pueyanoori maja na naata Pueyaso muerasura na quiniu.

*Casamiriaca pueyano pocoojosacari Jesuta
(Mt 19.16-30; Mr 10.17-31)*

¹⁸ Tamonu Judiocuaca camarnuuri Jesu nequesotaquiaari:

—Maninia niishitiojonanaa, ¿taa cua miiniutianiyani, jiya puequesacari cua samiitianishaanura, pueyaracaanu quiijara cua quiniuria Pueyasotani?

¹⁹ Jesuuri na riucuaree:

—¿Casaara quia sequeya janiya maninia pueyanotani? Saaja Pueyaso cutaraari seetanujuanaa maninia. Majaari socua tamonu quiniu.

²⁰ Pueyanonaa, quiaacujaari Moisés Rootasano niishijia. Naa naajiotasanocujaari quiya: “Maja quia camishoo maaji numuetucunu. Maja monu. Maja nohuasenu. Maja tamonuucuara saquiriojotanu quia sapojonuta. Quia que, quia nucua tojijia quia quiri”.

²¹ Pueyanoori Jesu riucuaree:

—Janiyacujaari cua naatujuiniji puetunu cuno tojijajanaani.

²² Naa na seqesacaritij, Jesuuri na sequeree:

—Quiyajaari niquiriyatu casaa quia miishoojua. Nio quia miiri: puetunu quia jiitiasanojuanaa quia niquitiojore cumaneecara. Na nuhuaji, casamijiuniucua pueya cuno cumaneeca quia niquitiojore nareja. Naacuajitij, quiaari jiyanolhua casamiriaca quiniutianiya cutara jiyocuacaanu. Na nuhuaji, quiocua nimiohua cutara, cua pueyano quia quiniuria.

²³ Na tojishacari Jesu seqesano, nojuajaari jiyanolhua taraajequee, jiyanolhua queraatia casamiriaca na quishacari. ²⁴ Jesu niquishacari nojuaja taraajeyano, Jesuuri na pueya sequeree:

—Casamiriaca pueyara, jiyanolhua jiyajenetaari Pueyaso muerasu nojori quiniuria. ²⁵ ¿Camelloteeri na naata cusupuetaja cuhuoco tamajiria tajiniu? Maja na naata. Naajuhuaj, casamiriaca pueyanora, socua jiyanolhua jiyajenetaari Pueyaso muerasu na jatanishaanura.

²⁶ Pueya tojishacari naa Jesu seqesanotej, nojoriiri naa na nequesotaree:

—¿Canteeri Pueyaso muerasura quiniutianianitioj?

²⁷ Jesuuri nojori riucuaree:

—Maja pueya na naata tama na cuaqueyajaaja jiyatenu Pueyaso muerasu nojori quiniuria. Naajaa, Pueyaso cutaraari na naata.

²⁸ Pedroori Jesu sequeree:

—Jiyaniijiana, ¿canaarijiataj? Canaari puetunu canaa jiitiasanojuanaa tiuquiaarini canaa nuhuajiniuria quiajaniya.

²⁹ Jesuuri na riucuaree:

—Seetanujuanaa nia sequeyanijia, cante na panishano casaa tiujquiaari Pueyasora na poonijionurani: na tia, na que, na nucua, tapueyocuaca, necocua, necohua, nojuajaari socua jiyanohua queraatia masenutaniya mijiria na quishacarijia.³⁰ Na nuhuaji, samiitianishano quiniutianiyyari pueyaracaanu shuquiriaatia na quiniuria Pueyaso shipinishocoriquiano quiarinio jiyajinia.

Jesu pacutesacari pohuatatu, nojuaja mosaanutaniya

(Mt 20.17-19; Mr 10.32-34)

³¹ Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quiarijia Jerusalén tiacajinia quiaani. Janiyari quiniqui puetunujuanaa miishaanutaniyani taa tariucuacaanu pueyara Pueyaso sequencesano caminiijiuniaa sequequiaaricuaja janiyajiniji. ³² Naacuajitij, janiyari tahuua niquitiosaanutaniyani. Nojoriiri cua macaatiniutaniya. Taraatia cua miitiuniutaniyyari. Cua riocojotunutaniyari. ³³ Cua piquitiuniutaniyyajaariuhuaj. Na nuhuaji, cua motunutaniyari. Naajaa, jiuujianaraca juucajinia, janiyari samiitianutaniuhuani.

³⁴ Majaari Jesu pueya niishiniu quiriquiaa quenaaja na sequencesano. Majaari nojori niishiniu quiriquiaa casaa Jesu sequeriquiaani. Juhua miriqui sequencesanoori quiriquiaa nojoriria.

Jesu jeecasacari cariyojuaru pueyano Jericó tiacajinia

(Mt 20.29-34; Mr 10.46-52)

³⁵ Na pueyata Jesu quishacari tari cateca Jericó tiacaacuara, cariyojuaru pueyanoori nuu shuucuaji cajiriquiaa, cumaneeca na masejonura pueya tajishacari nucuaco. ³⁶ Cariyojuaru tojishacari queraatia pueya tajiyano, pueya nequesotareeri:

—¿Casaatejanojoni?

³⁷ Pueyari na sequeree:

—Nazaret tiacajinjinio Jesucuaja tajiya.

³⁸ Cariyojuaruuri nacaquee:

—¡Jesuna! ¡Supuetana David niquiohuacuajinio supueno pueyanonaa! ¡Cucua quia taraajere quenaaja!

³⁹ Jesu puetanaa pueyari na juaarii na sanaajanura juucua. Nojuajaari saaja socua jiyanohua nacaree:

—¡Supuetana David niquiohuacuajinio supueno pueyanonaa! ¡Cucua quia taraajere!

⁴⁰ Jesu tojishacari nojuaja, nujuaseeri. Jesuuri pueya sequeree cariyojuaru cuaara jaatucusaaria nocua. Cariyojuaru tiuquishacari nocua, Jesuuri na nequesotaree:

41 —¿Casaa quia paniya cua miiniuria quiajaniyani?

Cariyojuaruuri Jesu riucuaree:

—¡Jiyanijianaa, niquijiara quiniu paniuhuanija!

⁴² Jesuuri na sequeree:

—¡Niquijiara quia quiriohua! Quia namijiacuaja tari jeequerohua cucua quia tiuushacari.

⁴³ Jiyacaritij, cariyojuaruuri maninia niquijiara quiquii. Jesu nuhuaji sacuaareeri na shuquiritanuta Pueyaso. Puetunu Jesu miishano niquiniaajanaari Pueyaso maniniuhuaqueetariquiaa.

19

Jesu pocoojosacari Zaqueota

¹ Jesuuri Jericó tiacajinia tiuquijioquiaari na pueyata. Tiaca jiuuji-aaco quiariquiaari. ² Cuno tiacajinia quiquiaariiri casamiriaca pueyano. Na sesa quiquiaari Zaqueo. Zaueori Roma tiacajinia quijia jiyanijiara cumaneeca masejonaa camarnu quiquiaari. ³ Nojuajaari Jesu niishiniu panijia juucua. Majaari na naata niquiniu quiriquiaa Jesu, puera jiyanohua pueya quiniuucua Jesu shocua. Naajuhuaj, Zaueori puera posucuashi quijia. ⁴ Cunora, Zaueori netequiaari Jesu tacoji. Nuu shuucuaji sicómoro naanaacua macaseeri, maninia na niquiniuria tiji Jesu, jaara cunoco tajimia. ⁵ Jesu tajishacari Zaueo cariquiaco, Jesuuri nocua mauree. Na sequereei:

—Zaqueonaa, jritia quia rosemhua! Janiya quiarijia quia tajinia maquenutaniyani.

⁶ Zaueori ritia rosemhua. Jesu tiuquinitiaree na tajinjiaari jiyanohua na shuquiriniutia. ⁷ Tamasaca pueya jaara Jesu niquiquiaari Zaueo tajinjia tiuquiyano, puetunu nojorijianaari Jesu sesacanu coteequiaari. Tama sequeturiquiaajaari: “Cuno pueyanoori sesa miijia pueyano tajinjia tiuquishii”. ⁸ Na nuhuaji, Zaueori nujuaree. Jesu sequereei:

—Seetanujuanaa quia sequeyanijia, Jiyaniijianaa, janiyari quiarijia quiocua tiuuriini. Naacuajitij, janiyari casamijijuniucua nareja niq-uitiojonutaniya puetunu cua jitiwasano cajiniocuajinijianaani. Naajuhuaj, janiyari jaara puera cumaneeca masecanu tamasaca pueyajiniji cua sapojonutani, janiyari nojori niqutionutaniuhua socua jiyanohua queraatia cumaneecani cua nohuasesanojiniji nojori.

⁹ Jesuuri na sequeree pueya niquiara:

—iQuiarijiani, nio tajinjia quinia pueyari tari jiyanooshaaree! Nio pueyanocuajaari supuetana Abraham niqiohuacuajinio supuenojuhuaj. Nojuajaari cucua tiuuri taa Abraham tiuquiaari Pueyasoocuacuana. ¹⁰ Janiyacuajaari cunora mijiria niquiaarini, tashucuano pueya cua pajenura, nojori cua jaariutianura Sesaaca.

*Miriqui Jesu pohuatasano diez cumaneecajiniji
(Mt 25.14-30)*

¹¹ Tii quinia pueyari Jesu pohuatasano tojitiariquiaa. Jesuuri tari cateca quiriquiaa Jerusalén tiacajiniji. Pueyari jiyaniriquiaa Jesuuri Israel pueya jiyanijiara quiniutaniya tari, Pueyaso muerasu na jitianura mijiria. Nocuaji, Jesuuri nojori pohuataree nio miriqui pohuatasano, nojori na niishitiojonura. ¹² Naa nojori niquiara pohuatareeri:

—Tamonu jiyanijia niyanuuri quiquiaari. Nojuajaari tucuacaanu tamonu jiyanjina quiaquiaari jiyanijiara na jiyatesaanura. Jiyanijiara na jiyatesaanu nuhuaji, nojuajaari tacateriquianohua quiriquiaa, narta pueya jiyanijia na quiniuria. ¹³ Na nuhuajiria, nojuajaari diez na seya sequeree nocua nojori nijionura. Nojuajaari puetunu nojorijianaan niqutiojoree niquiriyatu cumanee, orojiniji shipinishano. Nojori sequereei: “Nio cumanee nia poonitijoire, janiyari cuaara tiuquiriohua-jaatiinijiaj”. ¹⁴ Na nuhuaji quiaqueeri. Na jiyanijinio pueyari maja

na niquiniu paniniu quijia cuno pueyano. Cunora, nojoriiri pueya ji-yaramiquirii na nuhuaji, jiyaniijajanaa nojori sequenura: "Maja canaa paniniu cuno pueyano, canaa jiyaniijia na quiniuria".

¹⁵ Naajaa, nojuajaari saaja jiyatesaaree jiyaniijia na quiniuria. Na nuhuaji, na jiyajinia tacateyarohuari. Jaara tiuquishuhua, na cumaneeca na niquitiosano seja sequereeri, nocua nojori nijionura. Nojuajaari niishiniu paniriquiaa taa cumaneeca socua nojori reratequiaarini, nojori poonitijiosacari na niquitiosano cumaneeca. ¹⁶ Coteenu seruri nocua nimiaa. Na jiyaniijia sequeseeri: "Cua jiyaniijianaa, cua poonitijiosacari quia niquitiosano cumanee janiya, janiyari socua diez cumaneeca reratecanuni". ¹⁷ Na jiyaniijaari na sequeree: "¡Maninacuaja! ¡Quiaacuajaari maninia cua seru! Quiaari secaja cua niquitiosano quiajaniya poonitijioriquiaa shitimia quiria. Naaratej, janiyari quia jiyatenutaniya diez tiaca jiyaniijiara quia quiniuriani". ¹⁸ Na nuhuaji, tamonu na seruuri nocua nimiaajuhuaj. Nojuajaari na jiyaniijia sequeree: "Cua jiyaniijianaa, cua poonitijiosacari quia niquitiosano cumanee janiya, janiyari socua cinco cumaneeca reratecanuni". ¹⁹ Na jiyaniijaari na sequereejuhuaj: "Quiaari cinco tiaca jiyaniijiara quiniutaniya".

²⁰ Na nuhuaji, tamonu na seruuri nocua nimiaajuhuaj. Na jiyaniijia sequeseeri: "Jiyaniijianaa, niya quiya quia cumanee quia niquitiosano janiya. Janyari na cojuacanu maniniani, toqueraujinuji jiuniocosano. ²¹ Janyari naa miiquianuni cua pueresacari quiajaniya. Janyari nishiyani, quiaari quiarta pueyacua taraajeyashijia. Quiaari tamasaca racatasanojiniji poojua. Quiaari tamasaca natoosanojiniji senoojuajuhuaj". ²² Na jiyaniijaari na juaarii: "Sesaacanaa, tama quia sequesanotajaaja janiyari quia nequesoreenutaniyani. ¿Naatee? ¿Quiaateeri niishiquianu janiyari pueyacua taraajeyashijiani? ¿Janiyateeri tamasaca racatasanojiniji poojuani? ¿Janiyateeri tamasaca natoosanojiniji senoojuajuhuaj"? ²³ Quiaa jaara jiyaniquianu janiya naa miijiani, ¿casaara cua cumanee quia niquitoyaquiquianu cumaneeca cojuanaarini? Nojori jaara cua cumanee poonitijiocanu, janiya maara socua queraatia na riuriatasuhuani, cua tiajinia cua tiuquishacariuhua". ²⁴ Cunora, na jiyaniijaari tii quiniae pueya sequeree: "¡Cua cumanee nia jaariutiare cuno! Nia niquitiore cua maninia seru, cante diez cumaneeca jiitiaacuajani". ²⁵ Nojoriiri na sequeree: "Jiyaniijianaa, ¿casaarateni? Nojuacuaja tari diez cumaneeca jiitiae". ²⁶ Jiyaniijaari saaja nojori riucuaree: "Seetanujuanaa nia sequeyanijia, cante tari jiitiaani, nojuajaari socua niquitiosaanutaniya. Cante na jiitiaaquiyani, secaja na jiitisanoori puetunujuanaa jaariutiasaanutaniya, cucua tiuyashijia na quiniuucua. ²⁷ Quiarijia, cua paraa saniniuuja, cuno pojori canapuete cua paniyaquiquianu nojori jiyaniijia cua quiniuriani, miji nia jayore nojori. Niya cua niquiara nia puecoore cua ruuretajaca seque".

*Jesu tiuquishacari Jerusalén tiacajinia
(Mt 21.1-11; Mr 11.1-11; Jn 12.12-19)*

²⁸ Nio na pohuatanu nuhuaji, Jesuuri na pueya puetaareecuhuaj Jerusalén tiacajiniara. ²⁹ Jaara cateca quiriquiaa tari Betfagé tiaca, Betania tiacanio, Olivo cuhuariquia tuhuananujuhuaj, Jesuuri caapiqui na pueya sequeree:

³⁰—Cuno shiitianiyojua tiacajinia nia quiaare, pa taccoji niquishiyani. Niaa jaara tiuquishii, niaari burro riuriatanutaniya morotasano,

pueyano cajishoojua na nijnia. Niaa jaara na niquishii, niocua na samaacartasee. Niaari na jaatucumohua miji. ³¹ Pueya jaara nequesotare niajaniya casaara nia samaacartaanoj, niocua na riucuare: "Jiyaniijia na paniya".

³² Jesu pueyari quiaaree. Nojoriiri na riuriatasee taa Jesu sequaariajani. ³³ Nojori samaacartasacari burro, na camaruhuari nojori nequesotaree:

—¿Casaara nia samaacartaa canaa burroni?

³⁴ Nojoriiri na riucuaree:

—Jiyaniijia na paniya.

³⁵ Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijnia Jesu cajijiara. Na nuhuaji, nojoriiri Jesu cajitirii na nijnia. ³⁶ Na quiasacari Jerusalén tiacajiniara, pueyari na toqueya muejoquiaari nucuaco Jesuucuaji. ³⁷ Nojori rosetanu panishacari Olivo cuhuariquia tuhuananujiniji, puetunu Jesu pueyajanaari juhuacatecara nacooquiaari nojori shuquiriniutia. Nojoriiri Jesu maniniuhuaqueetariquia puetunu na cumaacata na miishanojuanaa nojori niquiniuucua. Nojoriiri cunora jiyanoohua shuquiritiariquia Pueyaso.

³⁸ Nojoriiri naa nacooriquiaa:

—¡Pueyaso cuaara shuquiritiiria pa Jiyaniijia, Pueyaso Jiyarosano na quiniuucua! Pueyaso pocua taraajeroihuani. Pa jiyanoorioihuani. ¡Nojuajaari jiyanoohua maninia! ¡Pa shuquiritiarenoj!

³⁹ Cuniqui pueya tajinia quinia Fariseocuaca tojishacari naa nojori sequesanotej, nojoriiri Jesu sequeree:

—¡Niishitiojonanaa, quia pueya quia sanaajare, maja naa nojori sequenura!

⁴⁰ Jesuuri saa sequereejaa:

—Seetanujuanaa nia sequeyanijia, nio pojori jaara sanaajetare, ¡sairi saniniuujia nacoonutaniyacuua!

⁴¹ Tari Jesu quishacari Jerusalén tiaca shuriucua, na niquishacari cuno tiaca, Jesuuri cuno tiacajinia quiniaacula nujuqueree. ⁴² Cunora, juhua pueyano sequeree Jerusalén tiacaari:

—Jerusalén tiacanaa, quia niishitiriquia quiarijiani, casaa quia paniya jiyanooshano quia quiniuriani, shuquiriaatia quia quiniuriajuhuaj. Taraatia quijanaa, quia Jiyanooriquianoori juucua niya quiya. Majaari quia niishiniu nojuaja, juhua nimishitiu quia quishacari. ⁴³ Cunora, na nuhuajiiri jiyanoohua taraatia quiniutianiya quiara. Quia paraari quia mataconutaniya quia shocuaqueya, na cosenura maninia quiajaniya quia mashiyaquiniuucuaji. Naacuajitij, quia paraari quiocua juhuacunutaniya na miaquejonura quiajaniya. ⁴⁴ Quiaari jiyareta sureesaanutaniya. Quia tiacajinia quiniaari puecoosaanutaniya. Quia tiacaari puetunu niyartasaanutaniyajanaa. Majaari tamonu saajia cureenu quiniutianiya quenaaja tamonu saajia caco maano. Quiaari naa miishaanutaniyatej quia niishiyaquiniuucua, Pueyasoori quiocua niquiaari najuhuanaj, quiocuaji na tacunura juucua. Quiaari saaja na ruuretacanu.

Jesu jaacasacari seja niquitiojonaa Pueyaso Secojojua tiajiniji

(Mt 21.12-17; Mr 11.15-19; Jn 2.13-22)

⁴⁵ Na nuhuaji, Jesuuri Pueyaso Secojojua tiajinia tiuquiquiaari na pueyata. Nojuajaari juhuacatecara pueya tohuatanijioree, canapuete

na seja niquitiojoriquiaacuajani Pueyasoocuara puecoosocoriquiano.
⁴⁶ Jesuuri nojori sequeree:

—Tariucuacaanu Pueyaso Rupaajinia naa naajiotasaaquiaariti Pueyaso sequenceso: “Cua tiaari pueya secojonuujuja janiya”. ¡Niaari saniniujia na jiyatecanu nohuasenuujuaca quiquirora!

⁴⁷ Puetunu juucajanaa, Jesuuri jiyacari pueya niishitiojoriquiaa Pueyaso Secojojua tiajinia. Narta Judiocuaca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojona, mariyata narta Judiocuaca jiyaniijianucuanio, puetunu nojorijianaari tari roojotooriquiaa juucua taa na motunutaniya Jesuni. ⁴⁸ Puetunu pueyajanaari saaja shamaatia tojitiariquiaa puetunu Jesu sequencesanojuanaa. Cunora, majaari cuno jiyaniijianucua naata monu quiriquiaa Jesu.

20

Pueya nequesotasacari Jesu, cante na jiyaronani
(Mt 21.23-27; Mr 11.27-33)

¹ Tamonu juuca, Jesuuri Pueyaso Secojojua tiajinia niishitiojoriquiaa. Pueya niquiara pohuatariquiaari taate nojori naata Pueyaso muerasura quiniuni. Jiyacaritij, pueyacuara secojonaa jiyaniijianucuaari Jesuucua nijiomaa. Moisés Rootasanojiniji niishitiojonaari nojoritia nijiomaa-juhuaj, narta Judiocuaca camarucuanio. ² Nojoriiri Jesu nequesotaree:

—¿Cante quia jiyatecanu Pueyaso Secojojua tia jiyaniija quia quiniuriani? ¡Canaa quia riucuare! ¿Cante quia jiyaronani?

³ Jesuuri nojori sequeree saniniujia:

—Janiya nia nequesotanu paniyajuhuaj. Cua riucuature. ⁴ ¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaaja soj?

⁵ Nojoriiri juhuacatecara tamajaaja pocoojoquiaari. Tama sequetooriquiaajaarijia:

—¿Taa pa riucuanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaariirini?” ⁶ Saniniujia, paa jaara na sequereni: “Juan-cuaja nareja pueya jiyarosano quiquiaari”, puetunu pueyajanaari pa jacunutaniya saitia na pueconura pajaniya. Nojoricuajaari seququia: “Juanna seetanujuanaa Pueyaso sequenu panishano caminiujunia quiquiaari”.

⁷ Nojoriiri cunora Jesu riucuaree:

—Johuaj. Maja canaa niishiniu canaquitijia Juan jiyaroquiaari na tiuquinijionura pueyatej.

⁸ Naaratej, Jesuuri nojori sequeree:

—Janiyajuhuaj, majaari cua sequenu quiniutaniya niajaniya, cante cua jiyaroquiaarini naa cua miiniuriatej.

Miriqui Jesu pohuatasano sesa miijiaca poonijionaajiniji
(Mt 21.33-44; Mr 12.1-11)

⁹ Na nuhuaji, Jesuuri pueya niishitiojonu coteerohuacuhuaj nio miriqui pohuatasanota. Sequereeri:

—Tamonu pueyanoori cuhuariquiajinia uva natooquiaari. Na nuhuaji, na niquitioquiaari tamasaca pueyari, nojori cojuanura nera. Na camaruuri tucuacaanu quiaaree, tii na shocotejonura marijia.

¹⁰ Uva quishacari noshuriujua, saniya cuhuariquia camarujuanaari na seru jiyaroree cuhuariquia cojuanaa pueyacua. Jiayarosaareeri tiji na masenura na camarurajanaa, uva carojotasanojiniji. Na camarujuanaacujaari tarisia pocoojoquiaari cuhuariquia cojuanaa pueyata, taa nojori niqutionutaniya na carojotasanojinijini. Cuhuariquia camaru seru tiuquishacari, ¡cuhuariquia cojuanaari na piquitiuri saaja! Na jiayroturohua juhuasuuri. ¹¹ Cunora, cuhuariquia camarujuanaari tamonu na seru jiyaroree. Cuhuariquia cojuanaari na miitiurii sesajuhuaj. Na saarijiotureeri. Na piquitiuriiri. Na jiayroturohua juhuasujaariuhuaj. ¹² Cuhuariquia camarujuanaari socua tamonu na seru jiyaroree nojoriicua. Nojoriiri sesa miitiurii nojuajuhuaj. Na nuhuaji, nojoriiri na caponeeree cuhuariquiajiniji tariucua naatishano.

¹³ 'Naaratej, cuhuariquia camaruuri tama sequereejaa: "¿Taa cua miiniutianiyarini? Quiyanuniyojua jiayoreeraquij. Cuno pojori jaara cua panishano niyanu niquitiuri, maja naasucua nojori rerequetenu quiniutianiya nojuaja". ¹⁴ Saniniuujia, cuhuariquia cojuanaa jaara cuhuariquia camaru niyanujuanaa niquirii nojoriicua niyano, tama nojorijaarijia sequetoree: "Nojuacuaja cuhuariquia camarura quiniutianiya na que niti, na que jaara shaajeyariquia. ¡Pa morej! Paari nio cuhuariquia camarura quiniutianiya saniniunijia". ¹⁵ Naacuajitij, cuno cuhuariquia cojuanaa pueyari cuhuariquia camaru niyanu jaatiurii cuhuariquiajiniji. ¡Cuniqui na motureeri!

Naa nojori na pohuatana nuhuajitij, Jesuuri pueya nequesotaree:

—Naa nojori miiniuucua neyanutej, ¿taa na que miiniutianiya cuno sesa pueyarini? ¹⁶ Seetanujuanaa nia sequeyanijia, nojuaajaari nocua quianutaniya nojori na puecoonura. Na nuhuaji, na cuhuariquia niqutionutaniya tamasaca pueyari, nera nojori cojuanura cutara.

Pueya tojishacari nio, nojoriiri sequequiaari:

—Juhuej! ¡Pueyaso cuaara naa miyaquiiriatej!

¹⁷ Jesuuri nojori niquinijioree. Nojori sequereeri:

—¿Naatee? ¿Nio naajiotasanooriuahuaj, tariucuacaanu Pueyaso Rupajiniani? ¿Niaate niishiya casaa na sequeyanijia? Naa sequeyariquij:

"Saitia tianaa pueyari tamonu saajia soojotanutaniya, nojori jiyanishacari cuno saajia sesarujuajau. Na nuhuaji, cuno saajiaari socua panishano saajia jiyatesaanutaniuhua".

¹⁸ Cante cuno saajiacua tiuriyani, nojuaajaari juhua rashiquijiniutianiya. Cuno saajia jaara pueyanoocua tiyare, cuno pueyano jacana-jonutaniyari. Shahuej.

¹⁹ Jiyacaritij, pueyacuara secojonaa jiyanijianucua, mariyata Moisés Rootasanojiniji niishitiojonaari Jesu quianu panirii juucua. Nojoricua-jaari niishirii, Pueyaso saquiriojosano Israel pueya jiitiana nojori quiniuucua, Jesuuri miriqui pohuatariquiaa nojorijiniji, tianaaajiniji na pohuatasacari. Naajaa, jiyacaritij, majaari nojori quiatunu quiquiaari Jesu, nojori pueresacari Jesu panijiaca pueya.

*Jiya jiyanijia cuaara niquitiosaaria na sequesano cumaneeca
(Mt 22.15-22; Mr 12.13-17)*

²⁰ Naaratej, nojoriiri tamasaca pueya jiyaramiquiaari Jesuucua, sapuenu juhua maninia pueya niquishano. Cuno pueyari jiyaramiquishaquaari Jesu nojori pocuatenura sesa juucua, nocuara

tonujusaanura. Jesu jaara nojori riucuaquiaari sesa, maara Romano jiyaniijia niquitiosaaquiaari saniitiosocoriquiano. ²¹ Naacuajitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitijo-jona. Majaari sesa quia sequencesano. Naajuhuaj, majaari rimiajata quia niquinu pueya. Quiaacuajaari seetanujuanaa niishitiojoquiaa, taa Pueyaso paniya canaa miiniuriacuajani. ²² Cunora, canaa quia sequere taa canaa miiniutianiyani. Roma tiacajinia quijia jiyaniijiaari pa sequequiaari Judiocuaca cuaara cumaneeca niquitiojoraa nera, na jiitiasano pueya pa quishacari. Naaratej, ¿maniniateeri pa miiniuria na sequencesano?

²³ Jesuuri niishiquii nojoriiri nojuaja nequesotariquiaa najuhuanaj, nojori sapojonuta. Cunora, nojori sequereeri:

²⁴—Cua niquitiri quia cumanee. ¿Niooriuhuaj? ¿Cana naaquitinocuani? ¿Cana sesate nocua naajiotasanoni?

Jesu riucuatureeri:

—Cunocuaja canaa sequencesano Roma tiacajinia quijia jiyaniijia César naaqui, na sesajuhuaj.

²⁵ Jesuuri nojori sequereei:

—Jiyaniijia César cuaara tama na casaajaaja niquitiosaaria. Nojuacua-jaari na camaru. Saniniuujia, Pueyaso nia niquitiore cutara nerano tama na casaajaaja. Nojuajaari pa camarnu.

²⁶ Saaja maninia Jesu riucuasacari pueya niquiara nojori, majaari nojori naata nocuara tonujunu quirii. Nojoriiri saniya jiuuijateree Jesu riucuasacari saaja maninia nojori. Naacuajitij, nojoriiri socua sanaajetaree.

¿Paate samiitiacconutaniuhuani?

(Mt 22.23-33; Mr 12.18-27)

²⁷ Na nuhuaji, noojaqueya Saduceocuacajinijinoori Jesuucua niquiaari. Saduceocuacaari jiyaniijia macunucua pueya maja na samiitiacconu quiniutianihuua. Naaratej, nojoriiri Jesu sequereei:

²⁸ —Niishitiojonanaa, supuetana Moisescuaajaari pa rootaa na naajioneejinia, pueyano jaara cusoyare mueyaju, tarajanu cuaara cami-iria mashiquio, mueya na mueratenura tarajanu niti. ²⁹ Tamonu mashajaari seis tapueyocuacaraca quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari mue-tuhuojua. ³⁰ Cunora, na nuhuajishanaari na mashiquio camirii. Nojuajaari muetuhuojua cusoquiaarijiuhuaj. ³¹ Naaratej, neyaca tarajanuuri mashiquio camiquiaarijiuhuaj. Nojuajaari muetuhuojua cusoquiaarijiuhuaj. Puetunu cuno mashiquorijianaari naa camiyoquiaari cuno maajitia. Puetunu nojorijianaari cusionuquiciaari muetuhuojua. ³² Na nuhuaji, pueya mashiquioori shaajequiaarijiuhuaj. ³³ Naacuajitij, macunucua jaara samiitiacorohua, ¿teyano cuno siete neyacaajinijin-iote seetanu neyacajanaa quiniutianiyani? Cuno mashiquiocuajaari puetunu cuno siete pueya niquiocua quiquiaari.

³⁴ Jesuuri nojori riucuareei:

—Mijiria pa quishacarijia, canuu, maajipohuari camiyoquiaa.

³⁵ Saniniuujia, majaari noo pojori camiyonu quiniutianiyia canapuete samiitianijiosaanutaniuhuacuajani, maninia quiwijaca nojori quiniuucua Pueyaso niquiara mijiria. ³⁶ Majaari nojori

shaajenu quiniutianiuhua. Nojoriiri shaajeyashijiaca quiniutianiya juhua Pueyaso seja. Nojori samiitiaconuucua macujiniji, cunora, nojoriiri Pueyaso muerasujuanaa quiniutianiya cutara.³⁷ Supuetana Moisescuaajaari pa niishitiquiaari, macunucuaari samiitianijiosaanutaniuhua. Moisésri naa naajiotaquiaari Pueyaso sequencesano nojuaja nequeru casaja noshiyanojinijitij. Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijianio, quia supuetana Jacobo Jiyaniijajuhuaj”.

³⁸ Naacuajitij, paari niishiyani, puetunu Pueyasocua tiuuijaca shaajecono pueyajanaani, nojoricuajaari saminiucua quiya Pueyasora. Pueyasoori maja macunucua Jiyaniijia. Na pueya shaajeconocuajaari saminiucua quiya nera cutara.

³⁹ Noojiaqueya Moisés Rootasanojiniji niishitijonaa pueya tojishacari naa Jesu sequencesanotej, nojoriiri Jesu sequeree:

—Maniniacuajaari quia sequencesano, Niishitijonanaa.

⁴⁰ Naa Jesu riuhuanesacari saaja maninia nojoritij, majaari socua pueya nequesoreenu paniniu quiriquiaa nojuaja.

¿Cante Cristo supuetanani?
(Mt 22.41-46; Mr 12.35-37)

⁴¹ Jesuuri naa nojori nequesotaree saniniuuja:

—¿Casaara na sequencesaquaacuaraarini, Pueyaso Jiyarosanonaari supuetana David niquiohuacuajinio supuenutaniya?⁴²⁻⁴³ Supuetana Davidjanaacuajaari naa naajiotaquiaari na jaaquequejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijaara, janiya cuaara quia paraa shocotare puetunujuanaajaatijia’ ”.

⁴⁴ ¿Cristotucua taa David niquiohuacuajinio supuereni? Davidcuajaari na sequeya “cua Jiyaniijiata”.

Cuno pueyari maja na naata na riucuanu quiriquiaa.

Jesu numootesacari na pueya, Moisés Rootasanojiniji niishitijonaa pueyacuaji

(Mt 23.1-36; Mr 12.38-40; Lc 11.37-54)

⁴⁵ Puetunu pueyajanaa tojitasacarijia Jesu, Jesuuri naa na saquiriosano pueya sequeree:

⁴⁶ —Tama nia cuaqueyajaaja nia cojuare Moisés Rootasanojiniji niishitijonaa pueyacuaji, nia miyaquinuucuaji taa nojori miiquiaaculaani. Nojoriiri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhuananura nojori juhua tojishano pueya, nojori rucuanejosacari tiaca jiuujiajinia curotasano cajitiucuajinia. Nojoriiri socua panishano cajitiucuajinia cajinii maniniucuaquiaa Pueyaso Secojojua tiajinia, tamasaca tiajinajuhuaj, nojori jaara masuusaare queranacunura.⁴⁷ Naajuhuaj, nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori miiniu nuhuajitij, pueya niquiara, nojoriiri najuhuana tucuayocua secojoquiaa Pueyaso, pueya jiyanimurua nojori maninia pueya cutara. Naa nojori miiniuucuatej, nojoriiri jiyahohua saniitiosano quiniutianiya.

21

*Casamijiu mashiquio niquitiosacari na cumanee juuranee Pueyasora
(Mr 12.41-44)*

¹Pueyaso Secojojua tiajinia, Jesuuri casamiriaca pueya shootiariquiaa na cumaneecca niojiyano cumaneecca racataja quiquojinia, nojori niq-uitiosano Pueyasora. ²Jesuuri tamonu casamijiu mashiquio niquirijiuhua caapiqui cumaneneejojua niaano tiijuuhaj. Na niasanoori nareja cobrejiniji shipinishano cumaneecca quiquiaari. ³Jesuuri na pueya sequeree:

—Seetanujuanaa nia sequeyanijia, cuno casamijiu mashiquiori socua queraatia niquitioree Pueyaso, cuno casamiriaca pueyajiniji. ⁴Puetunu cuno pojorijianaari saaja na cureeno cumaneeecajiniji niquitiojya puetunu nojori panishanojuanaa nojori masejonu nuhuaji. Cuno mashiquio cutaraari puetunu na miaajaara na masetajara cumaneeecajanaa niquitioree.

*Jesu pohuatasacari, Pueyaso Secojojua tia niyartasaanutaniya
(Mt 24.1-2; Mr 13.1-2)*

⁵Noojiaqueya tii quiniaa pueyari pocoojoriquiaa Pueyaso Secojojua tiajiniji. Jiyanolua shanohua saitia shipinishano quiriquiaari. Nojoriiri na shootiariquiaa, naajuhuaj taa na maniniushitishaquaari nareja pueya niquitiosano casamitian. Jesuuri nojori sequeree:

⁶—Puetunu cunojuanaa niaa na niquiyani, tamacari niyartasaanutaniyari. Majaari quenaaja tamonu saajia cureenu quiniutianiya tamonu caco maano. Puetunu niyartasaanutaniyajanaari.

*Taa nio jiya puequenu parishacari quiniutianiyan
(Mt 24.3-28; Mr 13.3-23)*

⁷Na pueyari Jesu nequesotaquiaari:

—Niishitiojonanaa, ¿taacari nio tia niyartasaanutaniyarini? ¿Casaa canaa niquinutianiyarini, canaa niishiniuria quia sequencesanoori quera tohuateya?

⁸Jesuuri nojori riucuaree:

—Tama nia cuaqueyajaaja nia cojuare niaa mariqui sapojosaareeri. Queraatia sapojonuujuaca pueyari supuenutaniya. Nojoriiri sequenutaniya: “¡Janiya Cristoni, Pueyaso Jiyarosano! ¡Nio jiya quera puequeyela!” Niaa jaara naa sequencesaretej, majaari nia tojinu cuno sapojonuujuaca.

⁹Naajuhuaj, majaari nia puerenu niaa jaara tojiri tamonu jiyajinjinio pueyari tamasaca jiyacajiniji pueyata miaquetoojiya, naajuhuaj, pueya jaara juatatioquiaa tama nojori jiyaniija nojori jatanurajaaja. Naa quiniutianiyari coteenu. Naajaa, juhuanojuaja maja nio jiya puequesacari.

¹⁰Jesuuri naa nojori pohuatariquiaa socua:

—Tamonu rupaa pocuajacaari miaquetoojonutaniya tamaatia ru-paa pocuajacata. Naajuhuaj, tamonu jiyajinjinio jiyaniijaari mia-quietoojonutaniya tamonu jiyajinjinio narta jiyaniijiata. Naa queraatia miaquetoojonuuri quiniutaniya. ¹¹Rijaari jiyanolua jiuuquiu-jiutianutaniya queraatia jiyacajinija. Jiyanolua miaajenuuri quiniutaniya queraatia tamonu jiyacajinija juhuaj. Paaqueja cusionuuri quiniutaniya niya, tamaquicuajuhuaj. Naajuhuaj, jiyanolua puereeta casaari niquishaanutaniya jiyocuacaanu, mijiria quiniaa niishiniuria jiya puequenuraari tari catecanoya.

¹² 'Cuno puereeta quiyaquishacarijia, niaari quoosaanutaniya naquia ya nia miishaanura, cua pueya nia quiniuucua. Niaari jaatucusaanutaniya Pueyaso secojonuujuja tiajiniaqueya nequesoreesocoriquiano. Niaari nujuatejojuacajinu nujuatejosaanutaniya. Niaari nia pueya camarucuaacua, mariyata jiyaca jiyaniijianucuaacua jaatucusaanutaniya nequesoreesocoriquiano. Niaari naa miishaanutaniya nia pohuatanuucua janiyajiniji pueya niquia ra.¹³ Naacuajitij, nia naata cuno jiyaniijianucua niquia pohuatanu janiyajiniji. ¹⁴ Nioojiaca nia cajitiri, maja juhuacarijia nia niishiriojonura taa nia riucuanutaniya nojorini. ¹⁵ Janiyacuajaari jiyacari nia niishitiojonutaniyani taa nia riucuanutaniyan, mariyata casaa nia pohuatanutaniya jiyano hua cua niishitiajatani. Niaari nojori sanaajanutaniya maninia nia riuhuanesacari saaja. Nia paraari maja na naata nia sequesano rerequetenu quiniutianiya. ¹⁶ Jiyacarijihuaj, tama nia queyajaarijia nia tacartanutaniya, cua pueya nia quiniuucua. Nia tapueyocuacaari nia tacartanutaniyajihuaj, nia jiyasoocuajinio supueno pueyajihuaj, nia rupuenaanio. Nojoriiri noojiaqueya niajaniyajinjinio pueconutaniya. ¹⁷ Puetunu mijiria quinia pueyajanaari nia niquinu paniyaquiniutianiya cua pueya nia quishacari. ¹⁸ Naajaa, majaari nia puerenu. Majaari quenaaja niquiriyatu muesu shaajenu quiniutianiya nia nacajiniji, Pueyaso jaara paniyaquiri. Pueyaso jaara naa nia muesu cojuaacuaa, ¿maatucua casaara cojuaaquiri saniya niajaniyani? ¹⁹ Naaratej, rejeretajaca nia quiri. Niaa cutaraari shacantuca quijiacara jatanishaanutaniya pueyaracaanu nia rishiniuria, niaa jaara cumaatia nujuatare pueya miishacari sesa niajaniya.

²⁰ 'Niocua niishiri Jerusalén tiaca tari niyatasaanutaniya, niaa jaara na paraa niquiri puetunu na shocuaqueyajanaa maano. ²¹ Jiyacaritij, canapuete Judea jiyajinia quiyani, cuno pojori cuaara mashiiria tuhua-nanu huacua. Canapuete Jerusalén tiacajinia quiyani, nojori cuaara ritia mashiiria tiji. Canapuete na cuhuariquiajinia quiyani, nojori cuaara tacateyaquihuara Jerusalén tiacajinio hua. ²² Cuno quishacari, jiyano hua saniitiosacariiri quiniutianiya. Jiyacaritij, puetunu Pueyaso Rupaajinua naajiotasanojuanaari tohuateenutaniya. ²³ Jiyano hua taraatia quiniutiani yari noo maajipohuara, canapuete manajaatohua quiya jiyacarini, mariyata canapuete conaaja supueja jiitiaani. Jiyano hua naquia quiniutiani yari cuno quishacari nio jiyajinija. Nio jiya pueyari jiyano hua saniitiosaanutaniya. ²⁴ Noojiaqueya nojorijinijinio or puecoosaanutaniya tahuia miaquetoosacari nojoritia. Tamasaca nojorijinijinio or quioosaanutaniya. Nojoriiri puetunu jiyacajiniarajaa rijiosaanutaniya poonitijosocoriquiano. Taucuacaari Jerusalén tiaca jiitianutaniya tama nojoririaaja, Jerusalén tiaca nojori jiitiana cuaara puequerejaatijia, taa Pueyaso seququiaari tamajacuajani.

*Taa na quiniutiani yani Jesu tacatesacariuhua
(Mt 24.29-35, 42-44; Mr 13.24-37)*

²⁵ 'Mijiria quinia niishiniuria jiya quera puequeya, nojoriiri puereeta casaa niquinutiani yia pananujinu, racajinu, riyajinajihuaj. Shoniniacu caminia acuaji shiriiquituniutiani yia jaariuhuaj, jiyano hua na queyocuasacari. Nojoriiri cushitiiniutiani yia na pueretunutajihuaj, jiyano hua cojua shoniniacu caminia cajiniuucuasacari. ²⁶ Mijiria

quiniaari cusojonuunutaniya na puerenuta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso shipinishano casaajanaari jiuuquitiasaanutaniya jiyano. ²⁷ Jiyacaritij, mijiria quiniaari cua niquituniutianiya cohuala najacajinia niyan, jiyano. shacantuua cua cumaacata. ²⁸ Naaratej, niaa jaara nio cua pohuatasano niquiri tari cotezano, niocua tama cumaquitioorejaaja. ¡Niocua timiri! ¡Niaacuaaari quera rijiosaanutaniya niiquiji, pueyara-caanu cuata nia quiniuria!

²⁹ Jesuuri nojori pohuataree nio miriqui pohuatasanojuhuaj:

—Higo naana nia niquiri, tamonu jarancujua naananio. ³⁰ Na jaamasucua jaara mueratuure, niaari niishiya, tacareejonuqui quera quiniutaniya. ³¹ Naajuhuaj, niaa jaara puetunu cua pohuatasanoju-naa niquiri tari tohuateyano, niocua jiyacari niishiri, janiyari quera tiuquihuani, Jiyaniijiajanaa cua quiniuria.

³² 'Seetanujuanaa nia sequeyanijia, puetunu cua sequesanojuanaari tohuateenutaniya Pueyaso tojitiaashijiaca pueya puequeyaquishacar-ijia. ³³ Jiya cajiniocua, mariyata nio jiyari shaajenutaniya. Cua se-quesanoori saniniuujia puetunu tohuateenutaniyajanaa cutara, taa cua sequeyacuajani.

³⁴ 'Tama nia cuaqueyajaaja nia cojuare niaa mariqui cua tojiyashijiacara quiriohuari. Naaratej, majaari shuquiriaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutano. Maja naa nia quiniu, janiya mariqui nia cariyatureeri, jeenucuasoo nia quishacari, canashiyaquiji cua tiuquishacariuhua. ³⁵ Cua tiuquishacariuhua, juhua noriijotaja quiniutaniyari puetunu mijiria quiniae pueyarajanaa, taa noriijotaja canashiyaquiji majaacuaani. ³⁶ Cunora, cucuaji jeenucuasano nia quiri juhuacaricia. Pueyaso nia secojore pueyaracaanu, maja naquia nia miishaanura cuno taraatia quishacari, taa cua sequeyacuajani, mariyata juhuajaniya nia nujuatunura cua tacoji, cua nequesoreesacari puetunu pueyajanaa.

³⁷ Jesuuri puetunu juucajanaa niishitiojojua Pueyaso Secojojua tia-jinia. Saniniuuija, niucua quiojojuaari Olivo cuhuariquia tuhuananu-jinia tii na quiniuria. ³⁸ Puetunu pueyajanaari tariquicuaji quiojojua Pueyaso Secojojua tiajinia, nojori tojiniuria Jesu pohuatasano.

22

Judiocuaca camarucua roojotoosacari Jesu nojori quianura

(Mt 26.1-5, 14-16; Mr 14.1-2, 10-11; Jn 11.45-53)

¹ Quera Pascuara queranacunuusacari quiquiaari, pueya miaque-sacari pan na poreetajaaju shipinishano. ² Jiyacari, pueyacuara sec-ojonaa jiyaniijianucua, mariyata Moisés Rootasanojiniji niishitiojon-aari roojotooriquiaa juucua taa nojori motunutaniya Jesuni, nojori juatiyaquiniutia pueya. Nojoriiri narta pueya pueretujuaca, jiyano. queraatia pueya paniniuucua Jesu.

³ Jiyacaritij, Satanásri Jesu pueyano Judas Iscariote jiuujiatinia tiuquiquiaari. ⁴ Nojuajaari pueyacuara secojonaa jiyaniijianucuaacua quiaquiaari, Pueyaso Secojojua tia cojuanaa jiyaniijianucuaacuahuaj. Judasri cuno pojoritia pocoojoquiaari. Nojori sequereeri nojuaja na naata nojori quiatenu Jesu. ⁵ Nojoriiri shuquiririi. Cunora, Judas

sequetureeri taa cumaneeca nojori niquitionutaniya nojuajani.
⁶ Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quiatenutaniya Jesu jiyasohuajani.

Jesu miaquesacari na nuhuajiria na pueyata

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Poreetajaaju pan miaquenu juucaari tari quiquiaari. Cuno juucujuhauj, borregoori mosano quijia, Pueyaso niquiara miaquesocoriquiano Pascuara queranacusacari. ⁸ Cunora, Jesuuri Pedro jiyaroree Juanvio, nojori miaquesocoriquiano nojori majeetenura. Nojori sequereeri:

—Nia quiaare. Borrego nia majeetesecuua pocuaji, pa miaquesocoriquiano quiarijia Pascuara.

⁹ Nojoriiri na nequesotaree:

—¿Tee quia paniya canaa majeetenurani?

¹⁰ Jesuuri nojori riucuaree:

—Niaa jaara Jerusalén tiacajinia tiuquishii, niaari tamonu pueyano riuriatanutaniya mohuaca taquitiaano patacojinia. Niocua na nuhuaji rupaamia na tiajinira. ¹¹ Cuno tiajinia na tiuquishacari, niocua cuno tia camaru sequesee: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarijia Pascua niucuaní?’” ¹² Nojuajaari nia niquitinitianiya puereetuua sohuaca, nataco na tiajinia, tariucua jeenucusano. Niocua cuniqui miishii puetunujuanaa pa miaquesocoriquiano.

¹³ Jesu pueyari quiaaree. Nojoriiri puetunujuanaa riuriataquiaari taa Jesu sequequiaari nojoricuajani. Nojoriiri tii miishii puetunujuanaa, Pascua niucua nojori miaquesocoriquiano.

¹⁴ Jaara tari quiquiaari Pascuara miaquesacari niucua, Jesuuri na saquieriosano pueyata cajitiushii miaquejajinia. ¹⁵ Jesuuri nojori sequeree:

—Janiyari jiyanolua niaata miaquenu paniriquiaa nio Pascua niucuani, pueya moyaquishacarrijia janiya. ¹⁶ Seetanujuanaa nia sequeyanijia, majaari socua cua miaquenu quiniutianiya Pascuara, janiya jaara tiuquiriohuajaatijia puetunu Pueyaso muerasuranotajanaa. Jiyacari cutara, paari jatiqui miaquenutaniyani, Jiyaniijajanaa cua quishacari.

¹⁷ Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

—Jajaa, nio nia masetare. Nia rature puetunu niajaniyajanaa.

¹⁸ Seetanujuanaa nia sequeyanijia, majaari socua cua ratunu quiniutianiya uva caacajiniji, janiya jaara tiuquiriohuajaatijia, Jiyaniijajanaa cua quiniuria puetunu Pueyaso muerasurajanaa.

¹⁹ Na nuhuaji, Jesuuri pan ririi. Pueyaso secojoree nocuaraari. Na neecasereeri. Na pueya na niquitiojoreeri. Nojori sequereeri:

—Nioori cua cuaqueya niaacuara mosocoriquiano. Niocua naa mirequia pueyaracaanutej, nia niishiriojonura janiya.

²⁰ Nojori miaquenu nuhuaji, Jesuuri ratujua patareejuhuaj. Naa sequereeri:

—Cua nanacaari niaacuara shoonutaniya nia jiyanooshaanura see-tanujuanaa. Majaari socua seja nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyano-niutianiya.

²¹ 'Cua tojitiare. Quiarijiani, cante cua tacartanutaniya pueya na motenura janiyani, nojuajaari cuata miaqueya. ²² Janiyari naa mi-ishaanutaniyani taa janiyajiniji juhuacarijia pohuatasaquaaricuajani tariucuacaanu Pueyaso Rupaajinia. Saniniujija, cua tacartanaari jiyanohua taraatia quiniutianiya naa na miiniuucua janiya.

²³ Jesu pueyari jiycari juhuacatecara nequesoreetoree tama nojori-jiaaja:

—¿Canteeri na tacartanutaniyani?

Cante seetanujuanaa jiyaniijiajanaani

²⁴ Jesu pueyari tama juayonuutariquiaajaacujua, teyano nojorijinijin-iote jiyaniijiajanaani. ²⁵ Jesuuri nojori sequeree saaja:

—Mijiria, jiya jiyaniijianucuaari jiyanohua jiyaramiquiniu niishijia nojori jiitiasano pueya, juhua nojori poonitijiosano pueya. Nojori-iri tama nojorijinijiaja sequeja: “Canaari maninia miiquiaa canaa pueyani”. ²⁶ Niajaniya saniniujija, majaari naa nia quiniu juhua nojorijia. Cante socua tojishano pueyano quiya niajaniyajinijionni, nojuaja cuaara tama na cuaqueyajaaja jiyateyaquiiuria na cumaaca paaretaja pueyacua. Cuaara quiiria jacaria pocuaja. Naajuhuaj, cante jiyani-ijiajanaa quiya niajaniyajinijionni, nojuaja cuaara jiyateera tama na cuaqueyajaaja juhua nia serura. ²⁷ ¿Taa nia sequeyani? ¿Cante jiyaniijiajanaani? ¿Miaqueyano pueyanotee? ¿Na mianuutena soj? ¡Miaqueyano pueyanocuaja! Naajaa, janiyari juhua nia seru quiquiaa niaarani, maninia cua miiniuria niajaniya. Naajuhuaj, naa maninia mijjiaca nia quiriquia.

²⁸ 'Niaacuajaari pueyaracaanu cua cojiriquia janiya jaara saniniu-jiushaariquiaani. ²⁹ Naaratej, janiyari nia jiyatenutaniya jiyaniijianucua nia quiniurani, taa cua Que jiyatequiaari janiyacuaani, Jiyani-ijia cua quiniuria. ³⁰ Naacuajitij, niaari cua miaquejajinia cajitiuniutianiya cuata nia miaquejonura, cuata nia raruujunurajuhuaj, Jiyaniijiajanaa cua quishacari. Niaari mariyata jiyaniijianucua quiniutianiya, supuetana Israel doce niquiohuacuajinio supueno pueyapue neque-soreenaa nia quiniuria.

Jesu sequencesacari Pedro, nojuaja nocuaji seetanutaniya

(Mt 26.31-35; Mr 14.27-31; Jn 13.36-38)

³¹ Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara sequerucuua Pueyaso, jiyanohua na saniniujiuniuria niajaniya. Naacuajitij, niaari jiyanohua saniniujiushaanutaniya, naatej, taa trigo quejooshiya jiyocuacaanu-cuaani, paratu panura na cocua. ³² Janiyari saniniujija Pueyaso seco-joree quiocuara cutarani Simónnaa, cucua tiuuuni quia tarinitiaquini-uucuaji. Naacuajitij, quiaa jaara quioojia tacatorohua cucua, quiocua quiarta pueya cumaquiriohuajuhuaj, nojori tiuuniuria seetanujuanaa pueyaracaanu cucua.

³³ Simónri Jesu sequeree:

—¡Cua Jiyaniijianaa, quiaa jaara nujuatejojuajinia nujuatesaare, janiya cuaara nujuatesaaria quiatajuhuaj! ¡Quiaa jaara mosaare, naajaa, janiya cuaara cojiritiasaaria quiajaniyajuhuaj!

³⁴ Jesuuri na sequeree:

—Pedronaa, seetanujuanaa quia sequeyanijia, caacaraja niunijiyaquishacarijia quiarijia, quiaari tari naa cucuaji seetanu caminiuijuniutianiya pueya niquiara: “Maja cua niishiniu Jesu!”

Quera Jesu miishacari taraatia

³⁵ Jesuuri na pueya nequesotaree:

—Janiya jaara nia jiyaramiquiquaari Pueyaso rupaa nia pohuatura caashoququeejuni, cumaneeca quiquipooju, sapatuujunio, ¿niaateeri nia panishano casaa niquitioyaquishaacquiaari?

Nojoriiri Jesu riucuaree:

—Maja. Canaacuajaari puetunu canaa panishanojuanaa niquitiososaaquiaarini.

³⁶ Jesuuri nojori sequeree:

—Quiarijia saniniuuja, cante caashoqueracani, cuaara na pataara. Cante cumaneeca quiquieracani, cuaara na pataarajuhuaj. Cante nijiniquetucuaja mueruu jiitiaequivi, cuno cuaara niquitioora na shiniquiaacuaji toque, nijiniquetucuaja mueruu na masenura na toque samitia. ³⁷ Seetanujuanaa nia sequeyanijia, taricuacaanu Pueyaso Rupaajinia janiyajiniji naajiotasanoori tohuateenutaniya. Janiyajiniji naajiotasanoori naa sequeyatej: “Nojuajaari jiyanihsaaree sesa miijia, sesa miijiacata na teetesacari”. Puetunu janiyajiniji naajiotasanojuanaari tari tohuateya taa na naajiotasaquaaricuajani.

³⁸ Nojoriiri Jesu sequeree:

—Jiyaniijianaa, niya quiya caapiqui nijiniquetucuaja mueruu.

Nojori riucuareeri:

—Tariucuaja.

Jesu secojosacari Pueyaso, Getsemaní cuhuariquiajinia

(Mt 26.36-46; Mr 14.32-42)

³⁹ Na nuhuaji, Jesuuri tohuataquiaari tiajiniji. Olivo cuhuariquia tuhuuananujinira quiaareeri. Nojuajaari cuniqui quianura jiitiquiaari. Na saquiriosano pueyari na nuhuajiyaree. ⁴⁰ Na tiuquishacari tii, Jesuuri nojori sequeree:

—Pueyaso nia secojore, niaa mariqui sesa miiriiri niaa jaara saniniujushaare.

⁴¹ Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojoquetasee Pueyaso secojonuraari. ⁴² Naa secojoreeri:

—¡Cua Quenaa, maja cua miiniu paniniu naquiya! Naajaa, janiya cuaara miyaquishaaria taa cua paniyani. Janiya cuaara miishaaria cutara taa quia paniyacuajani.

⁴³ Jiyacaritij, Pueyaso seruuri jiyocuacaanuji nocua nimiaa na cumaquinuria. ⁴⁴ Jesuuri jiyanolhua naquiya miiriquiaa. Noojiaari quera jiaqueriquiaa na tacaaniutia. Jiyanolhua, jiyanolhua secojoriquiaa Pueyasoori! Cunora, na paneyacaari puereetujuaaca juhua nanaca quiriquiaa, na caatesacari jiyocua. ⁴⁵ Na secojonu nuhuaji, Jesuuri sanerohua. Na pueyacua tacateyarohuari. Nojori niquishuhua

maquetiuyano saajaari, puera nojori taraajenuucua. ⁴⁶ Jesuuri nojori sequeree:

—¿Casaara nia maquetiuyani? Nia saneecuature. Pueyaso nia secojore na cojuanura niajaniya, maja sesa nia miiniuria niaa jaara saniniujishaare.

Judiocuaca camarucua quiasacari Jesu

(Mt 26.47-56; Mr 14.43-50; Jn 18.2-11)

⁴⁷ Jesu pocuasacarija na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano pueyajinjinio quiquiaari. Judasri Jesuucua nimiajanaa. Na saruhuataseeri na nujuunuta. ⁴⁸ Jesuuri na sequeree:

—Judasnaa, ¿quiaate tama cua tacartaajaaja, quia nujuunuta sapojonu janiya?

⁴⁹ Jesu pueya niquishacari casaa cuno pueya miiniu paniriquiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

⁵⁰ Tamonu nojorijinjiniori pueyacuara secojonaa jiyaniijia seru pirii na mueruuta. Saaja na miaquetajara numoco jaatereeri. ⁵¹ Jesuuri na sequeree:

—¡Tariucuaja! Maja naa miiniu.

Jesuuri numoco ririi. Na ruporohuari. ⁵² Judasta quiriquiaari pueyacuara secojonaa jiyaniijianucua, Pueyaso Secojojua tia cojuanaa jiyaniijianucuajuhuaj, Judiocuaca camarucuanio. Nojoriiri Jesuucua nijioquiaari na quianura. Jesuuri cuno pojori sequeree:

—¿Casaara cucua nia nijioree nijiniaquetucuaja mueruutani, macatania nia quianura janiyan? ¿Janiyateeri nohuasejojuani, naa nia nijionura cucuatej? ⁵³ Pueyaracaanu cua quishacari niaata Pueyaso Secojojua tajinria, majaari nia quianu quijia janiya. Naajaa, quiarijia cutaraari niajaniyara, nia panishano nia miiniuria janiya. Quiarijiani, Sesaacaari cumaacaraca na panishano na miiniuria.

Pedro seetasacari Jesujiniji

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jiyacaritij, nojoriiri Jesu quiaree. Na jaatucutiyareeri pueyacuara secojonaa jiyaniijia tajiniara. Pedroori tucuacaanuji na nuhuajiriquiaa. ⁵⁵ Jiyacaritij, pueyari jiyaniijia tia carijiniacuma mani noshitirii. Na shocua cajitiuriohuari. Pedroori nojori tajinia cajishijijiuhuaj. ⁵⁶ Cuno jiyaniijia serujinjinioni, niyacoori Pedro niquirii mani jitiuyano. Nojuajaari Pedro shootariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijiajuhuaj.

⁵⁷ Pedroori seetaree. Naa sequereeri:

—Niyacoona, ¡majaari quenaaja cua niishishano cuno pueyano!

⁵⁸ Na nuhuaji, tamonu pueyanoori Pedro niquirijijuahuaj. Nojuajaari cuno jiyaniijia seru quiriquiaajuhuaj. Pedro sequereeri:

—¡Quiaqui cuno pojorijinjinio pueyanajuahuaj!

Pedroori saa sequereejaa:

—¡Maja, pueyanonaa! ¡Janiya maja nojorijinjinioni!

⁵⁹ Pasaja na tarishiniu nuhuaji, tamonu pueyanoori sequenu pacuterohua:

—Nio pueyanocuajaari cuno pueyanota quijia. Nojuajaari Galilea jiyajinjiniojuhuaj.

⁶⁰ Pedroori saa sequereeja:

—Pueyanonaa, maja cua niishiniu quenaaja casaa quia sequeyani!

Pedro pocuasacarijia, jiyacaritij, caacarajaari niunijoree. ⁶¹ Jiyaniijia Jesuuri tificatequee. Na nijiniara niquirii Pedroori. Pedroori jiyacari Jiyaniijia sequencesano nojuaja niishiquii, naa na sequencesanotej: “Quiaari tari seetanu caminiuijuniutianiya janiyajiniji pueya niquiara, caacaraja niunijiyaquishacarijia”. ⁶² Pedroori cuniquiji tohuataquee. Jiyanolhua nujuquereeri na taraajenuta, sacuaraatia na seetanuucua.

Pueya macaatishacari Jesu

(Mt 26.67-68; Mr 14.65)

⁶³ Jesu cojuanaa pueyari Jesu macaatiriquiaa. Nojoriiri na piquitiuriquiaa. ⁶⁴ Nojoriiri Jesu namijia morotuquiaari coteenu. Na jiquioco piquitiuriohuari. Na nuhuaji, na sequetureeri:

—¡Quia niishiritio! ¿Cante quia piriini?

⁶⁵ Nojoriiri socua queraatia sesa casaa sequeturiquiaa na macaatinuria Jesu.

Judiocuaca jiyaniijianucua nequesoreesacari Jesu

(Mt 26.59-66; Mr 14.55-64; Jn 18.19-24)

⁶⁶ Jaara juhuaquequiaari, Judiocuaca camarucuaari rerejoree pueyacuara secojonaa jiyaniijianucuata, mariyata Moisés Rootasanojiniji niishitiojonaatajuhuaj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua tacoji, nojori nequesoreenura tii nojuaja. Nojoriiri naa Jesu nequesoreeree:

⁶⁷ —Canaa quia sequere, ¿quiaate Cristo, Pueyaso Jiyarosano?

Jesuuri nojori riucuaree:

—Janiya jaara nia sequereni: “Taaquiriirinij”, niaari saaja cua sequenutaniya: “Quiaapojiya”. ⁶⁸ Saniniujia, janiya jaara nia nequesoreere Pueyaso Jiyarosanojinijini, majaari nia riucuanu quiniutianiya janiya. ⁶⁹ Naajaa, quiarabajani, janiyari puetunu cumaacaraca Quijijanaaa miaquetajara cajiniutianiya jiyocuacaanuni.

⁷⁰ Naa Jesu sequencesacaritij, puetunu nojorijianaari na sequeree:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucuaree:

—Taaquiriirinij. Naacuaaquiniatejaj, taa nia sequeyacuajani.

⁷¹ Nojoriiri tama sequetooreejaaja:

—¿Paatucua casaara socua tamonu pueyano pajere nocuara tonujuriquianoni? Paacuajaari tari tama pa numaataajaaja sesa na sequencesano tojitiareeni.

23

Pilato nequesoreesacari Jesu

(Mt 27.1-2, 11-14; Mr 15.1-5; Jn 18.28-38)

¹ Cuno nuhuaji, puetunu nojorijianaari sanetaree. Jesu jiyatatiuyaareeri jiyaniijia Pilatoocua. ² Cuniqui, nojoriiri juhuacatecara Jesuucuara saquiriojotaree na sapojonuta. Pilato sequetureeri:

—Canaari nio pueyano niishiyani. Nojuajaari canaa Israel pueya nasaquoquiaaa pocuara. Nojuajaari niishitiojoquiajuhuaj, maja canaa Israel

pueya niquitiojonura canaa cumaneeeca pa jiyaniijajanaa Césarra, taa César sequequiaaricuajani. Naajuhuaj, tama nojuajaari naa sequequiaa: "Janiya Cristoni, Pueyaso Jiyarosano, nia jiyaniija cua quiniuria".

³ Pilatoori Jesu nequesotaree:

—¿Quiaate Judiocuaca jiyaniija?

Jesuuri na riucuaree:

—Taaquiriirinij. Naacuaj, taa quia sequereecuajani.

⁴ Jiyacaritij, Pilatoori pueyacuara secojonaa jiyaniijianucua sequeree, pueya maanunio:

—Nio pueyano nequesoreeree tarinijia. Nojuajaari maja sesa miijia.

⁵ Nojoriiri saaja socua jiyacateree Jesuucuara tonujunu. Naa sequetureeri:

—¡Nojuajaari puetunu canaa Judiocuacajanaa sesoya na niishitiosanota! Nojuajaari Galilea jiyajinia niishitiojonu coteequiaari. Quiarijia, niya niishitiojiyajaariuhua Judea jiyajiniani.

Jiyaniija Herodes nequesoreesacari Jesu

⁶ Pilato tojishacari naa nojori sequencesanotej, nojori nequesotareeri:

—¿Nio pueyanote Galilea jiyajinjinio?

⁷ Nojoriiri na riucuaree:

—Jaa.

Cunora, Pilatoori pueya jiayrotaree Jesu, Galilea jiya jiyaniija Herodescua. Herodesri namitia tii Jerusalén tiacajinia quiriquiaa jiyacari. ⁸ Nojuajaari pueyaracaanu Jesu niquiniiucua jiaatiaja juucua. Herodesri tari pohuatasaquaari Jesujiniji. Naaratej, Herodesri Jesu miishacari na cumaacata niquinii panijia juucua. Naacuajitij, na niuishacari Jesu, nojuajaari timirii. ⁹ Herodesri queraatia nequesoreeree Jesu. Majaari quenaaja Jesu riucuanu quiquiaari nojuaja. ¹⁰ Pueyacuara secojonaa jiyaniijianucuaari tii quiriquiaajuhuaj, Moisés Rootasanojiniji niishitiojonaanio. Cuno pojoriiri jiyanoehua Jesuucuara saquiriotoriquiaa queraatia sesa casaa. ¹¹ Herodesri na soldadohuata Jesu rerequeteriquiaa. Na macaatiriiri. Na cushitirii jiyanoehua shanohua toqueeri juhua jiyaniija cushishano. Na nuhuaji, Herodesri pueya jiayrotarohua Jesu Pilatoocua. ¹² Herodesri cuno juuca Pilato rupuenara quiquiaari. Coteenu, majaari nojori niquitioonu paniniu quijia. Nojoriiri saaja shocotetoojua.

Puetunu pueyajanaa sequencesacari Jesu cuaara mosaaria

(Mt 27.15-26; Mr 15.6-15; Jn 18.39-19.16)

¹³ Na nuhuaji, Pilatoori pueyacuara secojonaa jiyaniijianucua rerejotequiaari na tacoji, Judiocuaca camarucuajuhuaj, tii quiniaa pueyanio. ¹⁴ Nojori sequereeri:

—Niaari nio pueyano jaatucuree cucua najuhuanaj. Niaari cua sequeturee, nojuajaari niarta pueya nasojoquiaa. Janiyacuajaari na nequesoreeriquiaa nia niquierani. Niaacuajaari cua tojitiariquiaa cua nequesoreesacari nojuaja. Quiarijia niishiya cutaranijia, puetunu nocuara nia tonujusanojuanaari maja seetanujuanaa. ¹⁵ Jiyaniija Herodesquiiri tari niishiyajuhuaj, majaari seetanujuanaa nocuara nia saquiriotorasano. Cunora, Herodesri pocua na jiayororohua. Seetanujuanaa, majaari sesa na miiniu quiqianu na mosaanura. ¹⁶ Janiyari na majacutenutaniya narejani, cartesaarohuari.

17 Pascua juucara queranacusacari, Pilatoori nujuatesano pueyano cartenu jiitiquiaari nujuatejojuajiniji. Nojuajaari naa miquiaari pueyaracaanutej, pueya na shuquiritinuri. ¹⁸ Jiyacaritij, puetunu pueyajanaari juhuacatecara jiyanolhua nacaree jatiqui:

—¡Jesu quia more! ¡Barrabás quia cartere saniniuuja!

19 Tarijia cuno Barrabásri narta nasojosano Judiocuacata Romano pueya taanuuquiaari juucua Jerusalén tiacajiniji. Nojuajaari jiyacari pueyano moquiaarijuhuaj. Cunora, nojuajaari nujuatejojuajinija nujuatesano quiriquiaa. ²⁰ Pilatoori Jesu cartenu panijia juucua. Naaratej, Pilatoori pueyata pocoojorohua socua. ²¹ Pueyari saaja jiyacateree jiyanolhua nacoonura jatiqui:

—¡Cuaara mosaaria niyacutesanojinia teetesano! ¡Cuaara mosaaria!

²² Pilatoori pueya sequenu pacuteroahuacuhuaj:

—¿Maatucua casaara mosaarejaaraní? ¿Sesa miiriitijaaraj? Janiyacuajaari tari na nequesoreereeni. Majaari sesa na miiniu quirii na mosaanura. Janiyari na majacutenutaniya narejani. Na nuhuaji carte saarohuari.

²³ Pueyari saaja socua jiyanolhua nacooree niyacutesanojinia na mosaanura. Pueyacuara secojonaa jiyajianucuaari mariyata pueyata jiyanolhua nacooriquiaa. Puera jiyanolhua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. ²⁴ Naaratej, Pilatoori socua tariniriohua. Pueya panishano miiriiri. ²⁵ Pueya sequenceso pueyano cartereeri, cante nujuatesaaquiaari nujuatejojuajiniacuajani na taanuunu panini uucua Romano pueya, na monuucua pueyanojuhuaj. Na nuhuaji, Pilatoori Jesu tarinitiaree socua, nojori mosocoriquiano, taa nojori paniriquiaacuajani.

Niyacutesanojinia Jesu teetesacari

(Mt 27.32-44; Mr 15.21-32; Jn 19.17-27)

²⁶ Pueya jiyatasacari Jesu puecoosaquiria, nojoriiri tamonu pueyano quiaree Jerusalén tiacajiniara riuijuyano juucua. Nojuajaari Cirene jiyajinjinio pueyano quiquiaari. Na sesa quiquiaari Simón. Nojuajaari niyacutesano patesaaree Jesu nuhuaji.

²⁷ Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuuriquiaari, nocua nojori taraajenuta.

²⁸ Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuajaaja nia nujuqueture, nia niquiohuacuanio.

²⁹ Na nuhuaji, jiyanolhua taraatia quishacariiri quiniutaniya niaara, jiyanolhua taraatia. Jiyacaritij, pueyari sequencesutaniya:

“Socua shuquiriaatia quiijiaca cutaraari noo maajipohua cante muetuyashijiani, cante manajeyashijianucuani, mariyata cante mueya supueteyashijianucuajaniuhuaj”. Mueyaraca maajipohuari jiyacari jiyanolhua taraajenutaniya, nojori niquishacari necohua miishacari naquia. ³⁰ Naquiya miishacari, jiyacaritij, pueyari tuhuananuhua sequencesutaniya: “¡Canaacua quia jiyaretaare!” Naajuhuaj, shiitianiyojua tuhuananuhua sequencesutaniyari: “¡Canaacua nia tiyare canaa nia jamonura!” ³¹ Jiyacariiri jiyanolhua naquia miishacari quiniutaniya.

Quiarijia, janiya jaara naa naquiya miishiyacuaani, ¿taaquitijia Pueyaso tojitiaashijiaca miishaanutaniyatejaj?

³² Caapiqui sesa mijiacaari jaatucunuusaariquiaajuhuaj, mariyata teetejosocoriquiano Jesuta. ³³ Nojoriiri puecoosaqui tiuquijiossee. Cuniqui pueya puecoosaquini, na sesa quiquiaari “Pueyano Nacaco”. Nojoriiri tii Jesu teeteret maca niyacutesanojinia. Cuno caapiqui sesa mijiacaari teetejosaareejuhuaj, niquiriyatu na miaquetajara, tamonu na muenecara. ³⁴ Jesu jaara tari pijiosaariquiaa maca niyacutesanoocua, nojuajaari na Que Pueyaso sequeree:

—¡Cua Quenaa, quia jiyanoori nio pojori! Majaari nojori niishiniu casaa na miitiuyani.

Na nuhuaji, soldadohuari saitia tacuarishijoree, nojori niishiniuria taa nojori seraatianutaniya Jesu toqueni. ³⁵ Pueyari Jesu shootariquiaa. Judiocuaca jiyaniijianucuaari jaarajaaja Jesujiniji naa tama seque-tooriquiaajaaja:

—Nojuajaari saaja tamonu pueya naatanijiojua. Quiarijia, nojuaja jaara seetanujuanaa Pueyaso Jiyarosano Cristo quiri, cuaara roseera niyacutesanojiniji pa niquiara.

³⁶ Soldadohuari Jesu macaatiriquiaajuhuaj. Nojoriiri Jesu raateree piiquia vino juucua. ³⁷ Jesu sequetureeri:

—Quia jaara Judiocuaca jiyaniija quiri, ¡niyacutesanojiniji quia rosere-cuaraj!

³⁸ Jesu nacaacuma, suruhuatuneeri rupotasaquiaari naajiosano Griego rupaajinia, Romano pueya rupaajinia, Hebreo rupaajinianio. Tii naajiotasano quiriquiaari naa nocuara pueya saquiriojotasano: “Nio pueyanori Judiocuaca jiyaniija”.

³⁹ Tamonu cuno sesa mijiacaqjinjinio Jesu shuriucua teetesano quiriquiaani, nojuajaari Jesu rerequeteriquiaajuhuaj. Naa Jesu se-queriquiaari:

—Quia jaara Pueyaso jiyarosano Cristo quiri, tama quia roserejaaja cuniquiji. ¡Canaa quia roshinijiorejuhuaj!

⁴⁰ Narta sesa mijiariai na juaarii:

—¿Quiaateeri Pueyaso puereyashijia? Quiaari mosaanutaniyajuhuaj.

⁴¹ Pajaniya cutaraari sesa pa miiniuucua naquiya miishiyani. Paacua-jaari maninia saniitioshiyani sesa pa miiniuucua. Saniniuujia, nio pueyano pa tajinia nujuataani, ¡nojuajaari sesa miyashijia cutara!

⁴² Na nuhuaji, narta sesa miji juaaniaari Jesu sequeree:

—Jesunaa, majaari cua niyajetanuujua, Pueyaso jaara quia jiyatere Jiyaniijiajanaa quia quiniuria.

⁴³ Jesuuri na riucuaree:

—Seetanujuanaa quia sequeyanjia, quiarijiani, nio juucaja, quiaari cuata quiniutianiya shuquiriaatia quishaqui cutara.

Jesu cusosacari

(Mt 27.45-56; Mr 15.33-41; Jn 19.28-30)

⁴⁴ Panacari, ijiyari ninishiquiria quiquiaari puetunujuanaa, juhua ni-ucua! Pananu piriushacari, cuhuatemohuari. ⁴⁵ Jiya quishacarijia ninishiqui, jiyacaritij, Jerusalén tiacajinia Pueyaso Secojojua tiajinia, jiyanolua shiquiquia toquejiniji sohuacaari noojiaacoji sutequiaari puetunujuanaa querajaquera! ⁴⁶ Jiyacarijiuahuaj, Jesuuri nacaree:

—¡Cua Quenaa, cua sohuanu quia cojare!

Naa na sequenu nuhuajitij, Jesuuri cusoquee.

⁴⁷ Romano soldadohua jiyaniijia niquishacari puetunu niojuanaa, nojuajaari maninia sequeree:

—iSeetanujuanaa, nio pueyanoqui sesa miyashijia quiqianu!

Naa na sequesanoori Pueyaso shuquiritirii.

⁴⁸ Puetunu pueyajanaa, canapuete Jesu shootiariquiaa cusoyanonni, nojoriiri taraatia na tiajinia quiojoquiaariuhua. Nojoriiri tama na jiriquiaaja piquiniuuquiaariuhua, jiyahnuua nojori tacaaniutia naa nojori monuucua Jesu. ⁴⁹ Saniniuumjia, puetunu Jesu niishishano pueyajanaari tii jyojetarohuajaa, maajipohuajuhuaj, canapuete Jesu nuhuajiquiaari Galilea jiyajinijicuajani. Puetunu nojorijianaari tucuacaanuji niquitiariquiaa Jesu.

Jesu quete niasacari raaco

(Mt 27.57-61; Mr 15.42-47; Jn 19.38-42)

⁵⁰ Tamonu maninia pueyanoori quiquiaari. Nojuajaari Pueyaso tojijia pueyano quiquiaari Arimatea tiacajinjinio. Cuno tiacaari Judea jiyajinajuhuaj. Cuno pueyano sesa quiquiaari José. Nojuajaari Judiocuaca jiyaniijiancuajinjinio quiquiaari. ⁵¹ Cuno Joseeri Pueyasoocua tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuaara Jiyaniijia jiyatesaaria cutara. Cunora, majaari José paniniu quiquiaari cutara, narta jiyaniijiancua sequesacari Jesu cuaara mosaaria. ⁵² Naacuajitij, Jesu cusosacari, Joseeri Pilatoocua quiaquiaari, Jesu quete na masenura. ⁵³ Na nuhuaji, Jesu quete roshinirii niyacutesanojiniiri. Na jiuniocoreeri cohuaque que-naaruque toquejinia. Jesu quete niaree tarrijia na jiuutianishano saajia-jiniaari. Cuno raajinia, juhuanojuaja maja macu niasaanu quiquiaari. ⁵⁴ Cuno juucaari quiquiaari Judiocuaca jeenucuasacari juhuacarijia samaatenu juucaacuara. Nojori samaatenu juucaari quera coteeriquiaa-tari. Judiocuacaara, pananu tiuquishacari, tamonu juucaari tari coteequiaari nojoriria.

⁵⁵ Cuno maajipohua, cante Jesuta nijioquiaari Galilea jiyajinijicuajani, cuno pojoriiri José nuhuajiquiaari raajiniara. Nojoriiri raaco niquishii, taa Jesu quete niasaareeni. ⁵⁶ Nojori riuiuushacariuhua na tiajiniohua, nojoriiri juhuataja shanohua jaanutaja cojitijiosuhua, macuucua nojori niojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaaricuajani.

24

Jesu samiittiasacariuhua

(Mt 28.1-10; Mr 16.1-8; Jn 20.1-10)

¹ Coteenu semaana juucajinia, cuno maajipohuari tariquiicuaji raa-jiniara quiaquiaari. Nojori cojitijiosano shanohua jaanutaja patootaa-reeri. ² Nojori tiuquijiosacari raajinia, saajajiniji quejasano raa tiotiu niquitiushiiri taricua tamocora shuuquitishano. ³ Naaratej, nojori-rii raaco tiuuquitiamaa. Shaaqui quiriquiaari Jiyaniijia Jesu quete.

⁴ Nojoriiri shiriiquerii. Majaari nojori niishiniu quiriquiaa taa nojori miiniutianiyani. Canashiyaquiji caapiqui pueyari nojori shuriucua nujuatuquee. Nojori toqueeri shacantuque quiriquiaa. ⁵ Maajipohuari na puerenuta jiyocuara naniquioree. Cuno canuuri nojori sequeree:

—¿Casaara nia pajeya saminio pueyano macu niojosaquini? ⁶ Maja tari niya na quiniu. ¡Tari samiitiarohuano! ¿Niaateeri tari niyajetaree na sequencesano niajaniya, Galilea jiyajinia na quishacarijia? ⁷ Nojuajaari tari nia sequecanucuaja, nojuaja sesa miijiacu niquitiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitianutaniuhua jiuujianaraca juucajinia.

⁸ Jiyacaritij, maajipohuari shusha niishiquii tarrijia Jesu sequencesano nojori. ⁹ Nojori tacatesacariuhua jamajiniji, nojoriiri Jesu once saquiri-ojosano pueya caminiujiushuhua puetunu niojuanaa, puetunu Jesuu-cua tiuuniaa pueyajanaanio. ¹⁰ Cuno maajipohua, Jesu saquiriojosano pueya pohuataquiaariuhuani, nojoriiri nio maajipohua quiquiaari: María Magdalena, Juana, Santiago nucua Mariájuhuaj, socua tamasaca maajipohuanio. ¹¹ Jesu once pueyara, maajipohua pohuatasanoori juhua paateca sequencesano quiquiaari saaja. Nojoriiri saa cuaracashitiri-ijiaa maajipohua pohuatanuusano.

¹² Naajaa, Pedroori tiajiniji netequiaari raajiniara. Raaco na cuuquesacari, saaja Jesu jiuniocotaja cohuajaque toque niquiquiaari maanoori. Pedroori juhua jiuujiaaju tacateyarohua na shiriiquiniutia, na niquis-hanojiniji, maajipohua pohuatasanojinjinio.

Jesu tojitiana pueya niquishacari Jesu, nojori quiasacari Emaús tiacajinaria

(Mr 16.12-13)

¹³ Cuno domingo juucaja, caapiqui Jesu pueyari Emaús tiacajinaria quiojoriquiaa. Emaús tiacaari querajaa hora quiquiaari Jerusalén tia-cajiniji, niohuacata quiasacari tiriara. ¹⁴ Nojori quiojosacari nucuaco, nojoriiri Jesujiniji pocoojoriquiaa, mariyata shusha naataya pueya miishanojiniji Jesu. ¹⁵ Naa nojori pocoojosacari nucuacotej, Jesujuanaari jiyacari nojori rupuesee. Juhuajaniya nojoritia pacutaareeri. ¹⁶ Majaari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. ¹⁷ Jesuuri nojori nequesotaree:

—¿Casaa nia pocoojotaacuaani?

Nojoriiri nujuatuquee. Taraajecoyano niquishaariquiaari.

¹⁸ Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucuaree:

—Puetunu pueyajanaacuajaari niishiya casaate Jerusalén tiacajinia miishaarucuaa taraatiani. Quiaacuajaari Jerusalén tiacajinia quiquinujuhuaj. ¿Quiaatucua casaara niishiyaquirini casaate miishaarucuaani?

¹⁹ Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—¡Nazaret tiacajinjinio Jesuuri mosaarucuaajaj! Nojuajaari Pueyaso sequencesano caminiujiunia quiqianu. ¡Jiyanohua maninia quiijaari na cumaacata na miijiosano, na niishitiosanojuhuaj! Pueyaso timiti-asano quiijaari, puetunu pueya panishanojuanaanio. ²⁰ Pueyacuera sec-ojonaa jiyanijianucua, mariyata pa camarucuaari na niquitiorucuua Romano jiyanijia na motesocoriquiano. Niyacutesanojinia mosaaru-cuari. ²¹ Canaari juucua jiyaniquianuni, nojuajaari Romano pueya

taanuunutaniya, pa Israel pueya quiniuria juhuajaniya tama pajaniyaa. Quiarijani, jiuujianaraca juucaari tari na shoconujiya na mosaanujiniji. ²² Tamasaca maajipohua canaa maanujinjinioori canaa shirioree nojori pohuatasanota. Nojoriiri quiarijia tariquiicuaji quiojomaa Jesu raajinia. ²³ Nojoriiri maja na riuriatanu quishii na quete. Nojori tacatesacariuhua, nojoriiri canaa pohuatasuhua, nojorinia Pueyaso seja niquirii juhua na maquenujinria. ¡Cuno Pueyaso seyanaari nojori sequeree, Jesu tari samiitiarohua! ²⁴ Na nuhuaji, tamasaca canaaajinjinioori raajinia quiojyareejuhuaj. Seetanujuanaa naa quiriquiaari, taa maajipohua sequeree canaacuajani. Maja cutaraari nojori niquinu quirii Jesu.

²⁵ Jiyacaritij, Jesuuri nojori sequeree:

—Pueyanaa, majaqiiri juhuanojuaja nia niishiniu. Niaari taacanuyajaa puetunu taricuacaanu Pueyaso sequencesano caminiuijuniaa naajiotasanoocuajanaa nia tiuuniuria. ²⁶ ¿Majateeri naa na pohuatasaanu quiriquiaaricuaja: “Cristoori coteenu naa mosaanutaniyaquij. Na nuhuaji cutara, jiyanoqua cumaacaracara quiqiara jiyatesaanutaniuhuari Jiyaniijiajanaa na quiniuria”?

²⁷ Jesuuri juhuacatecara nojori niishitiojoree puetunu taricuacaanu Pueyaso Rupaajinijijanaa, tee nojuajiniji naajiotasano quiyacuajani. Moisés naajiotasanojiniji pohuatanu coteereeri, na nuhuaji, puetunu Pueyaso sequencesano caminiuijuniaa naajiotasanojinijijanaanio.

²⁸ Nojori tiuquishacari cuno tiacajinia, terara nojori quiojoriquiaacuajani, Jesuuri juhua shocoriquiano canujuriquiaa. ²⁹ Nojoriiri nojoritia na jiyojetenu paniriquiaa jiyanoqua. Nojoriiri na sequeree:

—¡Niyaja canaata quia jiyojere! Paa tari niniyareeni.

Naaratej, Jesuuri nojoritia jiyojesee cuniqui. ³⁰ Jesu jaara nojoritia cajiriquiaa tari miaquejajinia, nojuajaari pan ririi. Nocuara Pueyaso secojoreeri. Nojoriria na neecasereeri. Na nuhuaji, nojori serotareeri. ³¹ Jiyacaritij, nojori namijiaari juhua riatequee. Jiyacariqui na niishitiuquiri. Jesuuri saaja shaajequee cuniquijia nojori tajiniji.

³² Nojoriiri sequetooree:

—¡Jesucuajaqui quiriquiaa! ¡Cunora poojiaqui jiyamitia timiriquiaa na pocoojosacari pajaniyata nucuamaji, nojuaja jaara niishitiojoriquiaa pajaniya Pueyaso Rupaajinija naajiotasanotej!

³³ Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén tiacajiniara tacaretaarohuari. Nojori tiuquishacaruhua, nojoriiri puetunu Jesu once saquiriosano pueyajanaa riuratasuhua tii taricua rerejono, mariyata socua narta Jesu pueyata.

³⁴ Tariucua tajinija quiniaari Emaús tiacajiniji tiuquijionaa sequeree:

—¡Pa Jiyaniijiaqui seetanujuanaa samiitiarohua! ¡Simónri na niquirii!

³⁵ Na nuhuaji, shusha tiuquijionaaari nojori pohuatareejuhuaj, taa Jesu pocoojoriquiaa nojoritianii, nucuaco nojori quiasacari, mariyata taa nojori niishirii nojuajani, pan na neecasesacari nojoriria.

Jesu muetasacariuhua na saquiriosano pueyacua

(Mt 28.16-20; Mr 16.14-18; Jn 20.19-23)

³⁶ Nojori pocoojosacarijia nojori niquishanojiniji Jesu, jiyacaritij, Jesujuanaari canashiyajiji nojori tajinija nujuaquee. Naa nojori sequereeri:

—¿Niaate quiyajaa? Nioojia nia cajitiri.

³⁷ Nojoriiri shiriiquitiuquii. Jiyanoqua puereturquiaari. Nojoriiri Jesu jianiriquia naaqui. ³⁸ Jesuuri nojori sequeree:

—¿Casaara nia pueretuyani? ¿Casaara nia jiyanetaa janiyani? ³⁹ Cua juaashiquia nia niquiri, cua niohuacanio, nia niishiniuria janiyacua-jaari quiyani. ¡Cua cootiuri! ¡Cua niquitiuri! Naaquiiri maja cuaque-yaraca, maja nucuhuaraca taa nia niquiya janiyacuajani.

⁴⁰ Naa nojori na sequesacaritij, Jesuuri nojori niquitioree na juaashiquia, na niohuacanio. ⁴¹ Puer nojori jiuujiatesacari, puer nojori shuquirishacarijuhuaj, nojoriiri taacanuuriquiaajaa, maja naasucua Jesu. Cunora, Jesuuri nojori sequeree:

—¿Niaate miaquesocoriquiano jiitiaacuua?

⁴² Nojoriiri Jesu niquitioree sapitiaaja raqui caquishano. ⁴³ Jesuuri na maseree. Nojori niquiara na miaquereeri. ⁴⁴ Na nuhuaji, nojori sequereeri:

—Janiyari naa miishaarucuaani taa cua pohuataquiaari niajaniy-acuajani, pueyaracaanu niaata cua quishacari tarijia. Nia sequequiaar-icuajanijia, janiyari naa miishaanutaniyani, taa Moisés naajiotaquearia janiyajiniji cuajani. Puetunu Pueyaso sequesano caminiujiuniaajanaari janiyajiniji naajionuutaquiaarijuhuaj. Supuetana Davidri janiyajiniji naajiotaqueariajuhuua na jaaquequejoneejinia. Quiarijia tarí tohua-teerucuaari puetunu janiyajiniji cuno naajionuutasanojuanaa.

⁴⁵ Jiyacaritij, Jesuuri nojori niishitirii tariucuacaanu Pueyaso Rupaa naajiotasano. ⁴⁶ Nojori sequereeri:

—Tariucuacaanu naa naajiotasanoori quiya: “Pueyaso Jiyaroso-coriquianoori mosaariquiano, na nuhuaji, jiuujianaraca juucajinia samiütianutaniuhuari”. ⁴⁷ Naa naajiotasaaquiaarijuhuaj, Jerusalén tiacajinia, janiyajiniji pohuatasaanutaniya pueya niquiara, na nuhuaji puetunu jiyacajinajanaanio. Pueya tiuushacari cucua, nojori jaara noojiaca tacatorohua sesa nojori miiniujiniji, sesa nojori miishanoori tuujusaanutaniya, Pueyaso jiyanooshacari nojori. ⁴⁸ Niaacuajaari puetunu cua miishanojuanaa niquijiaaca. ⁴⁹ Cua tojitiare. Janiya jaara jiyocuacaanu quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricuajani. Niyaja pootia nia quiri Jerusalén tiacajiniani, niaa jaara jiyocuacaanuji niriquiano cumaaca masereajaatija.

Jiyocuacaanu Jesu tacasacariuhua

(Mr 16.19-20)

⁵⁰ Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqui nojori quishacarijia, Jesuuri na juaashiquia shiitioquiaari nojoriicuara na secojosacari Pueyaso, Pueyaso jiitianura maninia pueyaracaanu nojori. ⁵¹ Nojoriicuara na secojosacarijia, Jesuuri nojori shuriucuaji tacanishaaquiaari jiyocuacaanu. ⁵² Nojoriiri na shuquiritiaree. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanoqua shuquiriaatia quiriquiaa. ⁵³ Nojoriiri pueyaracaanu quijia Pueyaso Secojoua tiajinia. Tii Pueyaso maniniuhuaqueetatuja pueyaracaanuuri. Tariucuaja.

JUAN NAAJIOTASANO JESUCRISTOJINIFI

Pueyaso Rupaa jatasacari pueyanora

¹ Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijiajaariuhuaj. ² Jiya coteesacari, nojuajaari na Que Pueyasota quiriquiaa. ³ Na Queeri na shipinitiquiaari puetunu casaajanaa. Puetunu casaajanaari na shipinishano. Maja tamonu shipininia quiniu socua. ⁴ Nojuajaari quijiajuhuanaaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniuri-ajuhuaj. ⁵ Jesucristoori cuhuashiqui quijia. Naaratej, na rupaata poojia cuhuataari. Saniniujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. ⁶ Pueyasoori quiari naataja tamonu pueyano jiyaroquiaari, Neyanujiniji pohuatariquiano. Na sesa quiquiaari Tiuquinijiona Juan. ⁷ Pueyasoori na jiyaroquiaari pueya na niishitiniuria cante Jesucristoni, pueya tiuuniuria Jesuucua, nojori jiuujia na cuhuatanura. ⁸ Juanri maja pueya jiuujia cuhuatana. Nojuajaari Jesucristojiniji pohuataquiaari pueya niishiniuria cante saniya poojia cuhuatana cutarani. ⁹ “Pueyaso Rupaari” seetanu poojia cuhuatana janaa. Nojuajaari Jesucristo. Jiyocua niquiaariiri puetunu pueyajanaa niishiniuria cante Pueyasoni.

¹⁰ “Pueyaso Rupaari” mijiria rucuanejojua quiquiaari. Pueyari tama nojori Shipininiajaaja niishiyaquiquiaari. ¹¹ Tama na saquiriojosano Israel pueyacua niquiaariiri. Nojoriiri na tamacaquiaari saaja. ¹² Saaja noojiaqueya pueyari nocua tiuuquiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. ¹³ Nojoriiri Pueyaso jatanishano, seetanujuanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata metunu tariucua Pueyaso pueya. Naajuhuaj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiuushacari saaja.

¹⁴ “Pueyaso Rupaari” seetanujuanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumaacata na mijiosano niquiaariiri. Jiyanoehua maninia quiquiaariiri. Na Que Pueyasoori na cumaquijia jiyanoehua maninia na miiniuria, Neyanuniyojua na quishacari. Nojuajaari saaja seetanu rupajanaa sequeja Pueyasojiniji. Jiyanoohua quijiaari. ¹⁵ Tiuquinijiona Juanri Jesucristojiniji pohuataquiaari pueya niquiaara. Jiyanoehua na rupaa paaretaquiaariiri pueya tojitanura nojuaja. Naa sequejaari:

—Janiyacuajaari nojuajiniji nia pohuatajani, janiya jaara nia sequejani: “Tamonu pueyano cua nuhuaji niniutianiya”. Nojuajaari jiyaniiji-ajanaa cutara janiyajiniji. Nojuajaari tari quijia cua quiyaquishacarijia.

Juanri naa pohuataquiaari Jesucristojiniji.

¹⁶ Jiyaniijiajanaa Jesucristo quiniuucua, puetunu pajaniyajanaari na jiitiasanojiniji masequiaani. Jiyanoqua capora na quiniuucua, nojuajaari pueyaracaanu pa cumaquiquiaa. ¹⁷ Pueyasoori supuetana Moisés naajioequiaari na rootasano pajaniyara. Cunoori maja na cumaquiniu quiquiaari pajaniya. Quiarijia saniniuujia, pa panijia Pueyasu quiniuucua, nojuajaari Neyanujuanaa jiyaroquiaari pocua, pa jiyanooshaanura, naajuhuaj, seetanu rupaajanaa pa niishiniuria nojuajiniji. ¹⁸ Majaari quenaaja tamonu pueyano niquinu quijia Pueyasu. Neyanu, cante na Que shuriucua quiijacuajani, nojuajaari na Que pa niishitioquiaari.

Tiuquinijiona Juan pohuatasano Jesucristojiniji

(Mt 3.11-12; Mr 1.7-8; Lc 3.15-17)

¹⁹ Jerusalén tiacajinijnio canaa Judiocuaca camarucuaari na pueya jiyaramiquiaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví niquiohuacuajinio supueno pueya. Noojaqueya cuno pojorijinjinioori quiquiaarijuhua pueyacuara secojonaa pueya. ²⁰ Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujuanaa naa nojori sequequiaariiri:

—Janiyari maja Pueyasu Jiyarosano Cristoni.

²¹ Cuno pueyari socua na nequesotarohua:

—¿Canteeri quiajaniyani? ¿Quiaa jiyoteeri Pueyasu sequesano camini-
uijunia Elías soj? ¿Quiaa jiyoteeri samitiarohuacuua?

Tiuquinijiona Juanri saaja nojori riucuaree:

—Maja. Janiya maja supuetana Elíasni.

Cuno pueyari socua na nequesotarohuacuahuaj:

—¿Quiaa jiyoteeri Pueyasu sequesano caminiuijunia, nooj tariucua-
caanu sequesaquiaari niriquianotej?

Juanri saaja nojori riucuaree:

—Maja.

²² Cuno pueyari socua na sequeree:

—Canaa quia pohuatareja, ¿cante quiajaniyani? Canaacua saniniuujia canaa camarucua pohuatasuhuanijia.

²³ Juanri saaja naa nojori riucuaree:

—Janiyacuajaari noon, cariquia jiyajinia nacajatej, taa supuetana Isaías juhuacarrijia naajioequiaari janiyajinijicuajani: “¡Jiyaniijiaacuaji nia nuunore maninia! ¡Maja shuutiuniu!”

²⁴ Jiyacaritij, Fariseocuaca camarucua jiyaramiquishano pueyari Tiuquinijiona Juan nequesotaree:

²⁵ —Quiaa jaara quiyaquiri Cristo, Elíasjuhuaj, cuno tariucuacaanu sequesaquiaari niriquiano Pueyasu sequenu panishano caminiuijuni-
atej, ¿casaara pueya quia tiuquinijiya moojiniacuaraarini?

²⁶ Juanri nojori riucuaree:

—Janiyari nareja moojinia tiuquinijiya pueyani. Saniniuujia, ta-
monuuri niya quiya, nia niishiyaquishoojua. ²⁷ Nojuajaari cua nuhuaji
niniutianiya. Nojuajaari Jiyaniijiajanaa cutara. Majaari quenaaja cua
naata na seru quiniu na sapatu neyocua cua saacatanura nera.

28 Naa cuno pojori nequesoreesacari Tiuquinijiona Juantej, cunoori quiriquiaa Betania jiyanishano tiacajinia, Jordán moo taquijiria, tee cuniqi Juan tiuquinijioriquiaa moojinia pueyacuajani.

Jesu juhua Pueyaso borregoniyojua pocuara mosaariquiano

29 Tariqui saniniujuja, Tiuquinijiona Juanri Jesu niquirii nocua niyano. Juanri naa sequeree canaa niquiara:

—Paari pueyaracaanu mooquiaa borregohuani Pueyaso jiyanooniuria pajaniya. ¡Nia niquiri! ¡Cuno cumaji canujiyani, cunoori Pueyaso Jiyarosano, juhua borrego puetunu pueyacuara mosocoriquiano, seetanujuanaa sesa pa miishanojiniji pa jiyanooshaanura! ³⁰ Janiyacuajaari nojuajiniji nia pohuatajani janiya jaara nia sequejani: “Cua nuhuaji niniutianiyari Jiyanjiajanaa cutara. Nojuajaari tari rishijia cucuaji cua quyaquishacarijia”. ³¹ Janiyari na niishiyaquijiajuhua, cante nojuajani. Naajaa, janiyari parta Israel pueya tiuquinijioquiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

³² Tiuquinijiona Juanri pueya sequereejuhuaj:

—Janiyari Pueyaso Sohuanu niquiriucuaani jiyocuacaanuji rosezano nocua juhua mococoona. Nocua tiuushiiri. ³³ Cuno, cua jiyarquiaari pueya cua tiuquinijionura moojiniani, nojuajaari cua sequequiaari: “Quia jaara cua Sohuanu niquiri pueyanoocua rosezano, nocua na tiuuniuria, quiocua niishiri, cunocuajaari cua sequesano quiajaniya. Nojuajaari cua Sohuanu tiuquinijionutaniya pueya jiuuajinia cutara, seetanujuanaa cua muerasu nojori quiniuria”. Nojuaja jaara naa cua sequeyaquiquiaari, janija maara na niishiyaquiquianuni. ³⁴ Janiyacuajaari tari na niquiquianuni. Naaratej, janiyari saniniujuja nia pohuataani pueyanaa, ¡nojuajaari seetanujuanaa Cristo, Pueyaso Niyanu!

Coteenujuanaa Jesu pueyajiniji pohuatasano

³⁵ Tariqui, Tiuquinijiona Juanri tii quishiiquihua caapiqui na pueyat. Janiyari niquiriyatu cuno caapiqui pueyanojinijinio quiriquiaani.

³⁶ Tiuquinijiona Juan jaara Jesu niquiquiaari shocoyano, jiyacari canaa sequereeri:

—¡Nia niquiri! Cunoori cua sequesano niajaniya, Pueyaso Jiyarosano pocuara mosocoriquiano juhua borrego, sesa poojia seque jeequesanura.

³⁷ Naa canaa tojishacari Juan sequesanotej, canaari Jesu nuhuajiquiaarini. ³⁸ Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Casaa nia paniyani?

Canaari na sequereeni:

—Niishitiojonanaa, ¿tee quia maquequiaacuaani?

³⁹ Jesuuri canaa riucuaree:

—Miji. Nia niquiquii.

Canaari nata quiaareeni. Canaari na quijia niquitiushiini. Tari pananu piriushacariiri quiriquiaa jiyacari. Cunora, canaari tii maquetusee Jesutani.

⁴⁰ Tiuquinijiona Juan niquitinuucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jiitaja. Na

sesaari quijia Simón Pedro. ⁴¹ Tariquicuaji, Andrésri ritia tarajanu Simón pajenuucua quiaquiaari. Na riuriatasacari, na sequereeri:

—¡Cua tarajanunaa, canaari Cristo niquiriquiacuaani, tariucuacaanu Pueyaso sequencesano na jiyarosocoriquianotej!

⁴² Na nuhuaji, Andrésri tarajanu Simón jiyyataaree Jesuucua. Jesu niquishacari Simón, na sequereeri:

—Quiaacuajaari Simón, Juan niyanu. Quiarijia saniniujia, quia sesaari quiniutianiya Cefas.

Griego rupaajinina, nioori sequeya Pedro. Pedroori saniniujia pueyano rupaajinina sequeya “Saajia”.

Jesu saquiriojosacari Felipe, Natanaelno

⁴³ Tariqui, Jesuuri Galilea jiyyajiniara quiariquiaa. Felipe riuriata-maari. Na sequereeri:

—Cua tarajare cua pueyano quia quiniuria.

⁴⁴ Felipeeri nata quiaaree. Nojuajaari Betsaida tiacajinjinio quiquiaari. Andrésri tarajanu Pedrona cuno tiacajinjinio quiquiaarijuhuaj. ⁴⁵ Na nuhuaji, Felipeeri Natanael pajeree. Na riuriatasacari, na sequereeri:

—¡Canaa noo pueyano niquiriini, Moisés nojuajiniji naajiotaquiaari tariucuacaanutej! Tariucuacaanu Pueyaso sequencesano caminiuijuhunaa pueyari nojuajiniji naajionuutaquiaarijuhuaj. ¡Nojuajaari Nazaret tiacajinjinio Jesu, José niyanu!

⁴⁶ Natanaelri saa riucuareejaa:

—¡Jaj! ¿Na naatate maninia mijiia pueyano supuenuhuaara cuno sesa mijiaca Nazaret tiacajiniji?

Felipeeri na sequereei saaja:

—¡Miji! ¡Pa niquishii!

⁴⁷ Jesuuri Natanael niquirii nocua niyanu. Na sequereeri:

—Nio pueyanoori seetanu pa supuetana Israel niquiohuacuajinio supuenujuanaa cutara. Majaari na niishiniu sapojonu.

⁴⁸ Natanaelri na sequereei:

—¿Taa quia niishiya janiyarini?

Jesuuri na riucuareei:

—Felipe sequeyaquishacarijia quiajanaya cucua quia niniuria, janiyari tari quia niquirii coojiatani, higo naana pajama tateyano.

⁴⁹ Natanaelri shiriquirii. Jesu sequereeri:

—Niishitjonanaa, ¡quiaacuajaqui Pueyaso Niyantu! ¡Quiaari parta Israel pueya jiyaniijiaranojuhuaj!

⁵⁰ Jesuuri na sequereei:

—¿Quiaateeri cucua tiuuquii shusha saaja cua sequencesacari quiajanaya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua mijiiosano niquiniutianiya cutara.

⁵¹ Jesuuri cuniqui quiniaa pueya sequereejuhuaj:

—Seetanujuanaa nia sequeyanijia, niaari jiya cajiniocua niquiniutianiya riateno. Pueyano cua quishacari, niaari Pueyaso seya niquiniutianiya cucua roseetaano, cucuaji taqueetaanojuhuaj.

¹ Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masuusano pueyari queranacuriquiaa. Jesu nucuaari tii quiriquiaajuhuaj. ² Jesuuri na saquiriojosano pueyata masuusaacquiaarijihuaj, camishacari queranacunura. Janiyari na saquiriojosano pueyano quiriquiaa jiyacari tarjiuhuaj. ³ Jiyacaritij, mashacaari ritia puequemaa. Na nucuaari Jesu sequeree:

—Sanaa, mashaca tari puequemaa.

Mashacaari quiquiaari uva caaca, vinotuhuaj. ⁴ Jesuuri na nucua riucuaree saaja:

—Maajiniae, ¿casaara quia sequeya janiyani? Juhuanojuaja maja cua poonijiosacari Pueyaso cumaacata.

⁵ Na nucuaari pueya raatojonaa sequeree:

—¡Niocua Jesu tojirijia! Jaara nia sequere, niocua puetunu na sequanojuanaa miiri.

⁶ Tii cajitiuriquiaari seis conatu, saajiajiniji quejasano. Canaa Ju-diocuacaari sequeyarucua shuquirioojua tiajinia nojori tiuquishacar-ihuua, juhua jeequesano nojori quiniuria Pueyaso niquiaara. Nojori mohuaca cajitiacojua quiquiaarii cuno conaa. Jiyanohua puereetucocua quiphiaari. Cuno conatuuri setenta tumococua mishaja mohuacata mishinishano quijia. ⁷ Jesuuri pueya raatojonaa sequeree:

—Mohuaca nia taquirioore. Niocua nio conaa mishinijioree.

Pueya raatojonaari conaa mishinijioree. Mohuacaari conaa ru-paacuma puecacosee. ⁸ Jesuuri nojori sequeree:

—Quiarijiani, tiji nia shuuri. Queranacunu camaru nia sanitiore coteenú.

Raatojonaari na raatesee. ⁹ Queranacunu camaruuri vinora jatano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaaree vinora. Saaja pueya raatojonaa cutaraari na niishiriquia. Nojoricuajaari mohuaca mishinijioree cuno conaa-jinia. Queranacunu camaru saniniu nuhuaji cuno ratusano, camiyano pueyano piiriiri. ¹⁰ Na sequereei:

—Pueyaruhatijia coteenu raateja shocuanacu vinote. Puetunu ma-suusano pueya jaara tari raruure queraatia, na nuhuaji raatesano cutaraari shaarunacu vino. ¡Quiarijia saniniuuja, nio cua ratusanoni, cunoori socua maniniuniacu vino coteenu quia raatojotesanojiniji!

¹¹ Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojuajaari naa niquitiquiaari Pueyasojiniji na cumaacata. Naacuajitij, canaa na saquiriojosano pueyani, canaari niishiquiaarini Jesuuri see-tanujuanaa Pueyaso Jiyarosano.

¹² Na nuhuaji, Jesuuri Capernaum tiacajinia quiaaree na nucuata, tapueyocuacatajuhuaj, canaa na saquiriojosano pueyanio. Canaari tii camueenujuquiaari pasajani.

*Jesu jaacasacari seja niquitiojonaa Pueyaso Secojojua tiajiniji
(Mt 21.12-13; Mr 11.15-18; Lc 19.45-46)*

¹³ Quera canaa Judiocuaca queranacuscacari Pascua juucara Jerusalén tiacajinia, Jesuuri tii canaa jiyataareejuhuaj. ¹⁴ Na tiuquishacari, Pueyaso Secojojua tiajinia quiamaari. Tii niquishii pueyari juyaca niqui-tiojiyano Pueyasoocuara puecoosocoriquiano, borregohua, noseyanio.

Pueyari tii na juhuacutucuajinia cajitiuriquiaajuhuaj, pueya na tacatojonura taucuaca cumaneeca, Pueyaso Secojojua tiajinia niquitiojosocoriquiano cumaneecara.¹⁵ Naa na niquishacari pueya miyano Pueyaso Secojojua tiajiniatej, Jesuuri seja morojotaja jiyocua tatucree. Na majacutajara na shitiareeri. Cunota, puetunu nojorijanaa jaacaree Pueyaso Secojojua tiajinijiiri, puetunu nojori borregohuatajanaa, mariyata puetunu nojori juyacatajanaario. Cumaneeca rerecojoree jiyocuara juhuacutucuajinijiiri. Naajuhuaj, cumaneeca juhuacutucua caponeetareeri. Pojotaariquiaaculaari.¹⁶ Noseya niquitiojonaa pueya sequereeri:

—¡Niiquiji nia patootare nio noseya! ¿Casaara nia jiyatecanu juhua casami niquitiojosaoquiria cua Que tiani?

¹⁷Jiyacaritij, canaa, Jesu saquierojozano pueyani, canaari niishiquiini, seetanujuanaa tariucuacaanu Pueyaso Rupaajinia naa naajiotasanoori quiya:

“Quia tiaacua juaatishaaree jiyanohuanijia, jiyanohua cua panishacari quia tia”.

¹⁸ Naa Jesu miiniuuucuatej, narta Judiocuaca camarucuaari Jesu nequesotaturee:

—¿Cante quia sequerucuaa naa quia miiniuriani? ¡Canaa quia niquitiricuaraja Pueyaso cumaacata quia miishano, canaa niishiniuria quiaari seetanujuanaa Pueyaso Jiyarosano!

¹⁹Jesuuri nojori riucuaree miriqui:

—Pueyaso tia nia niyartare, janiyacua saaja jiuujianaraca juucajinia na tucuatarohua tianu tamajaajani.

²⁰Narta Judiocuaca camarucuaari na riucuaree:

—¡Cuarenta y seis marijiaari shoconujuquiaari pueya tucuatanura nio secojojua tia! ¿Quiaateeri jiyanaya quia naata na tianuhua ritia, saaja jiuujianaraca juucajinia? ¡Maja quia naata!

²¹ Jesuuri tama na cuaqueyajaaja pohuatariquiaa, Pueyaso tia na sequesacari. ²²Naacuajitij, Jesu jaara samiitiaquiaariuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuacaanu Pueyaso Rupaajinia naajiotasanoocua tiuquiaarini, Jesu sequesanoocuanio.

Jesu puetunu jiuujia niishijajanaa cutara

²³ Canaari ocho juuca camueenujuquiaari Jesuta Jerusalén tiacajiniani, Pascuara queranacunuusacari. Tii canaa quishacari, tii quiniae pueyari Jesu cumaacata na miijiosano niquiaari. Naaratej, queraatia pueyari nocua tiuquiaari. ²⁴Naajaa, majaari Jesu tiuuniu quiriquiaa seetanujuanaa nojoriucua. Nojuajaari nojori niishiriquiaa, taamueca pueyate nojorini. ²⁵Tamonu pohuataaquishacarijia nojuaja, nojuajaari tarí niishiya taamueca jiuujiaracate pueyani.

3

Nicodemo pocoojosacari Jesuta

¹ Niucua, tamonu pueyanoori niquiaari Jesuucua. Na sesa quiquiaari Nicodemo. Nojuajaari canaa Judiocuaca camarucuajinjinio quijia, Fariseocuaca maanuinjiniojuhuaj. Tojishano pueyano. ²Jesuucua na tiuquishacari, naa na sequeserri:

—Niishitiojonanaa, quia cumaacata quia miiniuucua canaa niquiara, canaari cunora niishiyani quiaari Pueyaso jiyarosano, canaa niishitioriquiano. Seetanujuanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatanijionu taa quia miquiaaculaani.

³ Jesuuri Nicodemo sequeree:

—Seetanujuanaa quia sequeyanija, pueyano jaara juhua conaaja raaquishaarohua, majaari na naata Pueyaso pueyanora na quiniu, Pueyaso jiitianura nojuaja.

⁴ Nicodemoori Jesu nequesotaree:

—¿Pueyanotucua taa rasaarohuani, nojuaja jaara tari cumantumaca quiya? Majaari na naata na nucua saracajinia tiuquiniuhua na rasaanuhuara.

⁵ Jesuuri na riucuaree:

—Seetanujuanaari cua seqesano. Cua tojiri. Paari coteenu rasaquaari pueyano pa quiniuriani. Saniniuujia, cante quiarinio pueyanora jataniyaquishano Pueyaso Sohuanutani, nojuajaari maja Pueyaso jiitiasanonijoja na quiniu quiniutiani. ⁶ Mijiria pueya mutusanoori saaja pueyano. Saniniuujia, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano. ⁷ Naaratej, majaari quia shiriiquiniu puera, naa cua sequenuucua quiajaniyatej, quiaas cuaara rasuhuara, seetanujuanaa quiarinio pueyano quia quiniuria. ⁸ Mijiria, paratuuri piyarojoquia taa na paniyacuajani. Paari nareja na cojuatunenu tojiquiaani. Majaari pa niishiniu teje na piyarojiyani, tee cunocora na quiaajaaniuuhuaj. Naajaariuhuaj, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

⁹ Nicodemoori Jesu nequesotarohuacuhuaj:

—¿Pueyanotucua taa quiarinio pueyanora jatanishaarejaarani?

¹⁰ Jesuuri na riucuaree:

—¿Majateeri quia niishiniu cua seqesano quiajaniya? Quiaari Pueyaso Rupaa niishitiojonacuaja Israel pueyara. ¹¹ Canaari seetanujuanaa pohuataquiaa canaa niishishanoni, canaa niquishanojuhuaj. Niaari saniniuujia saaja na cuaracashitiquiaa, canaa pohuatasacari niajaniya seetanu rupaajanaa. ¹² Niaa jaara saaja cuaracashitiquiaa cua pohuatasano mijiria casaajiniji, ¿niaatucua taa niishiriquiani, janiya jaara nia pohuatare jiyocuacaanuji casaani? ¹³ Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tijinio roseno cutara. Nojuacuajaari janiya. ¹⁴ Cariquia jiyajinia pa supuetanaa Israel pueya rucuanejosacari, Moisésri na shipinishano soconu nujuaretapiaari macaacula, soconu sasuhua niquishocoriquiano. Na niquiniae pueyari naatacoquiaariuhua. Naahuaj, janiyari macaacula nujuaretasocoriquianoni. ¹⁵ Naacuajitj, puetunu cucua tiuuniaajanaari pueyaracaanu quijiaca quiniutiani.

Pueyasoori puetunu mijiria quinia pueyajanaa panija

¹⁶ Jiyanoehua cua Que Pueyaso paniniuucua puetunu mijiria quinia pueyajanaa, nojuajaari Neyanujuanaa jiyaroquiaari puetunu pueyapueecuarajanaa mosocoriquiano. Puetunu cucua tiuuniaa pueyajanaari saniitoyaquishaanutaniya cutara. Nojori cutaraari pueyaraacaanu rishijiaca quiniutiani Pueyaso shuriucua. ¹⁷ Pueyasoori maja

na jiyaronu quiquiaari janiya pueya cua saniitionura. Seetanujuanaa cua jiyaroquiaari cutaraari pueyacuaji Tacuna cua quiniuria.

¹⁸ 'Cante cucua tiuujiani, majaari na saniitiosaanu quiniutianiya. Saniniujia, cante cucua tiuyashijiani, nojuajaari tari pueyaracaanu saniitosocoriquiano jiyatesano quiya. ¹⁹ Janiyari mijiria niquiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniuucua. Sesa mijjiaca nojori quiniuucua, majaari nojori paniniu cuhuatasano nojori quiniuria. Naaratej, nojoriiri saniitiosaanutaniya. ²⁰ Puetunu sesa mijjiacajanaari cua niquinu paniyashijia, pueya jiuujia cuhuatana cua quishacari. Majaari nojori niniu paniniu cucua, sesa nojori miishano mariqui niishishaareeri. ²¹ Saniniujia, cante maninia miiquiaani taa Pueyaso sequeya na Rupaajiniacuajani, nojoriiri cuhuashiqui quiniu panijiaca cutara. Nojoriiri cucua nijioquiaa na niishishaanura nojori miishano cutaraari puetunu maniniajanaa, taa Pueyaso paniyacuajani.

Tiuquinijiona Juan pohuatasacari socua Jesujiniji

²² Na nuhuaji, Jesuuri quojoquiaari canaata Judea jiyajinia, canaa na saquiriosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. ²³ Tiuquinijiona Juanri jiyacari pueya tiuquinijioriquiaajuhua Enón tiacajinia, Salím tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quojoquiaari-jiuhuaj tiuquinijiosano nojori quiniuria. ²⁴ Juanri jiyacari nujuatejojajinia nujuatesoo quiriquiaajaa.

²⁵ Cuno quishacari, Tiuquinijiona Juan pueyari tamonu narta Judio pueyanota pocoojoriquiaa taate pueya naata juhua jeequesano quiniu Pueyaso niquiarani. ²⁶ Nocuaji nojoriiri Tiuquinijiona Juan sequetusee Jesujiniji:

—Niishitjonanaa, noo pueyano, quiaa nojuajiniji canaa pohuat-acanutej, noo quiata quiqianu Jordán moo taquijiriatej, nojuajana pueya tiuquinijiyajuhuaj. Puetunu pueyajanaana nocua quiojiya tiuquinijiosano nojori quiniuria.

²⁷ Tiuquinijiona Juanri nojori riucuaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora. ²⁸ Niajaniyacuajaari cua tojiquianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosa aquiaarini”. ²⁹ Pueyano rupuena jaara camiya necocuara, quiarijia cutara necocuaari seetanujuanaa saaja nerano. Naajaa, na rupuena quishacari na shuriucua, na timitiaari na tojishacari necota pocoojiyano shuquiriaatia. Naajuhuaj, janiyari cunora shuquiriaatia quiarijia quiyani pueya rupuesacari Jesucristo.

³⁰ Janiyari cunora jiyarosa aquiaaricuajani, pueya cua tojitiniuria nojuaja. Naaratej, pueya cuaara carteera janiya, Cristoocua nojori pacunura saniniujia, nojori tojiniuria nojuaja. ³¹ Cante jiyocuacaanuji niquiaaricuajani, nojuajaari Jiyaniijajanaa cutara. Janiyari saaja mijiria quiniani. Cunora, cua pohuatasanoori saaja mijiria cua tojishano. Jesucristo saniniujia, nojuajaari jiyocuacaanuji ninio cutara. Nojuajaari Jiyaniijajanaa. ³² Naacuajitij, na pohuatasanoori tama na niquishanojuaaja jiyocuacaanu, na tojishanonio. Pueyari na pohuatasano cuaracashitiquiaa saaja. ³³ Canapuete Jesucristo

pohuatasanoocua tiuujiacani, nojoriiri sequeya, seetanujuanaaqui Pueyaso sequencesano Neyanujiniji.³⁴ Pueyasoori jiyanohua queraatia na Sohuanu niquitioquiaari na Jiyarosano. Naacuajitij, seetanu Pueyaso rupaaajanaa pohuataari.³⁵ Pueyasoori jiyanohua panijia Neyanu. Naaratej, nojuajaari na jiyatequiaari puetunu casaa jiitianarajanaa na quiniuria.³⁶ Canapuete Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniujia, canapuete Neyanuucua tiuyashijiacani, nojoriiri tariucua Pueyaso juaashano quiya. Nojoriiri saniitiosaanutaniya Pueyasooju nojori quiniuria pueyaracaanu.

4

Jesu pocoojosacari Samaria jiyajinjinio maajitia

¹ Fariseocuacaari pohuatasaaquiaari, jiyanohua queraatia pueya Jesuucua quiojiya na tojitianaa nojori quiniuria. Nojoriiri pohuatasaaquiaarijuhuaj, Jesuuri socua queraatia pueya tiuquinijija Tiuquinijiona Juanjiniji.² Seetanujuanaa majaari Jesujuanaa tiuquinijionu quiriquiaa pueya. Saaja canaa cutaraari pueya tiuquinijioriquiaani.³ Jesu jaara niishiquiaari Fariseocuaca naa pohuatasaaarucuaa nojuajinijitij, nojuajaari Judea jiyajiniji jiyataquiaariuhua canaa Galilea jiyajiniara.

⁴ Canaa quiasacari nucuaco, canaari Samaria jiyacuma tajiriquiano quiriquiaani.⁵ Naa canaa quiasacari nucuacotej, canaari Sicar tiacajinia tiuquishiini, Samaria jiyajinria. Cuniquiji, cateca quiriquiaari supuetana José cuhuariquia, na que Jacobo niquitiosano nojuaja.⁶ Cuno cuhuariquiajinia quiriquiaari cuari, supuetana Jacobo jiuutiasano tari-ucuacaanu. Pueyaracaanu Jesu rucuanenuucua nucuamaji, nojuajaari cuno cuari shuriucua cajishii na samareenuta. Panacariiri quiriquiaa.⁷⁻⁸ Jiyacaritij, canaari tiacajinia quiamaani canaa miaquesocoriquiano canaa masenura casaa. Canaa niyacari, cuno Samaria tiacajinjinio maajiri cuarimia quiaquiaari mohuaca taquitianura. Jesuuri na sequeree:

—Cua raatere.

⁹ Cuno maajiri Jesu sequeree:

—Pueyanonaa, ¿casaara quia sequeya Samaria jiyajinjinio maaji raatenura quiajaniyani? Quiaacuajaari Judio.

Cuno maajiri naa sequeree Jesutej, na niishiniuucua Judiocuacacua-jaari maja na niquinii paniniu quijia Samaria jiyajinjinio pueya.

¹⁰ Jesuuri saaja na sequeree:

—Majaari quia niishiniu cante quia sequereeni: “Cua raatere”. Quia jaara niishiriquia casaa Pueyaso jiitiae quiarani, quia maara cua sequere cua raatenura quiajaniya. Quia jaara cua masere, janiya maara quia raatere pueya samiitianijia mohuacani.

¹¹ Maajiri na sequeree:

—Jiyaniijiana, majaari quenaaja quia jiitianu casaa, mohuaca quia taquiriatajara. Nio cuariiri jiyanohua tucuua. ¿Quiaatucua teje taquitiare cuno mohuacani, pueya samiitianijiani?¹² ¿Quiaateeri jiyaniijajanaa cutara, socua pa supuetana Jacobojiniji? Nojuajaari nio cuari tiujiaquiaari canaara. Nojuajaari niiquiji ratujua quiquiaari necohuata, na seesano seyanio.

¹³ Jesuuri na riucuaree miriqui:

—Puetunu nio cuarijiniji ratujuacajanaari saaja jiyamuecoquiaa.

¹⁴ Saniniuujia, cante cua mohuaca ratunutaniyani, majaari socua na jiyamuenu quiniutianiuhua. Cua mohuacaari juhua samo naca pacartanutiya pueyaracaanu noojajinia, shuquiriaatia na rishinuria pueyaracaanu.

¹⁵ Cuno maajiiiri Jesu sequeree:

—¡Pueyanonaa, cuno mohuaca cua niquitiore cua ratusocoriquiano, maja socua cua jiyamuenura, naajuhuaj, maja pueyaracaanu cua taquiriojonura nio cuarijiniji!

¹⁶ Jesuuri na sequeree:

—Miji quia niyaca quia sequecoo coteenu.

¹⁷ Maajiiiri na riucuaree:

—¿Janiyate niyacaracajaarani, quiaa jaara naa cua sequere?

Jesuuri na sequeree:

—Quiaacuajaari seetanujuanaa cua sequeree: “Niyacaajunija”.

¹⁸ Seetanujuanaari. Quiaari tari cinco niyacaraca quiquiaari. Mariyata cuno, quiarijia quiata quiyani, majaari quia niyacajuhuaj.

¹⁹ Naa cuno maaji tojishacari Jesu sequencesanotej, Jesu sequereeri:

—Jiyaniijiana, ¡quiaqui Pueyaso sequenu panishano caminiujiunia!

²⁰ Canaa supuetanaa pueyari niya nio tuhuananuucua Pueyaso secojonuuju tarijia. Niajaniya saniniuujia, Judiocuacani, niaari sequequiaa Pueyaso cuaara secojosaaria saaja Jerusalén tiacajinia.

²¹ Jesuuri na riucuaree:

—Seetanujuanaa quia sequereera maajiniae. Cua sequencesanoocua quia tiurii. Quera quiniutaniyari Pueyaso nia secojosacari puetunu tiquiyocua nia quishacarijiana. Majaari tari Pueyaso secojosaanu quiniutaniya saaja Jerusalén tiacajinia, nio tuhuananuucuajuhuaj, taa quia sequereecuajani. ²² Niajaniyari maja nia niishiniu cana nia secojoquiaani. Canaa Judiocuacani, canaa cutaraari niishiyani cana canaa secojoquiaani. Pueyasocuajaari canaa Judiocuaca supuetanaa niishitioquiaari pueyacuaji Tacunaari supuenutaniya tama canaa Judiocuacajinijiniojuaaja. ²³ Quiarijia cutara, cante seetanujuanaa Pueyaso shuquiritiajacani, nojoriiri na Que Pueyaso secojonutaniya puetunu noojiatajanaa, seetanujuanaa na tojijiaca nojori quishacari. Pueyasoori naa paniya pueya secojonura nojuaja, cante na secojonuujuacacuajani.

²⁴ Pueyasoori sohuanu. Naaratej, cante Pueyaso shuquiritinu panijacani, nojori cuaara secojoora Pueyaso puetunu noojiatajanaa, Pueyaso Sohuanu tojijiaca nojori quishacari.

²⁵ Cuno maajiiiri Jesu sequeree:

—Janiyacuajaari niishiyani Pueyaso sequencesano Cristo mijiria na jiyarosocoriquianoori niniutaniya. Nojuaja jaara tiuquiri, nojuajaari puetunu maninia pa pohuatanutaniyajanaa.

²⁶ Jiyacaritij, Jesuuri maatia na sequeree:

—Janiyacuajaari cunoni, quiata pocoojiyacuajani.

²⁷ Jiyacaritij, canaari Jesuucua tiuquijiorohuani. Canaari jiuujiatequiaarini canaa niquishacari Jesu pocoojiyano cuno maajitia. Majaari quenaaja canaa nequesotanu quirii Jesu, casaa cuno maaji paniriquiaani, mariyata casaajiniji nojori pocoojoriquiaani. ²⁸ Cuno

maajiri cuniquijia na pataco tiujiaquee. Na tiacajinia quiaarohuari. Na tiuquishacari, na tiacajinia quiniae pueya sequesuhuari:

²⁹ —¡Miji pueyanaa, nia niquipui pueyano! ¡Nojuajaari cua sequeree puetunu cua miishanojuanaa! ¿Majate Cristoni, tariucuacaanu Pueyaso sequesano pocua na jiyarosocoriquianotej?

³⁰ Pueyari cuno tiacajiniji Jesuucua nijioquiaari. ³¹ Cuno maaji quiasacari na tiacajiniohua, jiyacaritij, canaari Jesu mianuutenu paniriquiaa juucuani. Canaari na sequeriquiaani:

—¡Niishitiojonanaa, quia miaquere!

³² Jesuuri saaja canaa sequeree:

—Janiyacuaja miaquesanoracani, cuno miaquesanori nia niishishoo.

³³ Canaa, Jesu saquiriojosano pueyani, canaari naa tama nequesoreetoreeaanijia:

—Pa niyacari miaquetesaaquee jirotucuaajaari.

³⁴ Jesuuri miriqui canaa sequeree:

—Cua miishacari cua Jiyarona panishano, cunoori cua miaquesano, naajuhuaj, cua tucuatasacari na panishano. ³⁵ Niaari sequequiaa: “Cuaara shocojoorajaara cuatro raca. Pueyari jiyacari shusha coteentaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia riatare maninia nia niquinuria. Nataacuacuaja tari noshiquia, carojotasocoriquiano. ³⁶ Na carojotanaari na poonijionu sami niquitioshiya. Na carojotasanoori pueyaracaanu quiriquiano. Naacuajitij, cuhuariquia natoonaari jatiqui shuquiriniutianiya nataacuaca carojotanaata. ³⁷ Naaratej, seetanujuanaari nio tariucuacaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniuuja na carojotaja”. ³⁸ Janiyari saniniuuja nia jiyaramiquiquianuni nataacuaca nia carojotanura quenaaja nia poonijiyaqueishoo cuhuariquiajinia. Cunoori tamasaca poonijiosano quiquiaari. Niaari juhuajaniya tamasaca poonijiosanojiniji carojetaquiaa shuquiriaatia.

³⁹ Queraatia pueya cuno Samaria tiacajinijiniori Jesuucua tiuquiaari, nojori tojishacari naa cuno maaji sequesanotej: “Cua sequeree puetunu cua miishanojuanaani”. ⁴⁰ Naaratej, cuno pueya jaara Jesuucua tiuquijioquiaari, nojoriiri na masuuquiaari tii na camueenujunura nojori tiacajinia quenaaja. Naaratej, canaari Jesuta tii camueequiaari caapiqui juucani. ⁴¹ Socua queraatia cuno pueyajinijiniori Jesuucua tiuquiaari, nojorijiana jaara Jesu tojiquiaari Pueyaso rupaa pohuataano. ⁴² Naaratej, nojoriiri cuno maaji sequeturee:

—Quiarijani, majaari canaa tiuuniu Jesuucua, saaja canaa quia po huatanuucua nojuajiniji. Quiarijia cutara, canaacuajaari tama canaa numaataajaaja tojirii na pohuatasanoni. Naaratej, canaari quiarijia niishiyani, Jesuuri seetanujuanaa Pueyaso jiyanoootriquiano pajaniya, puetunu mijiria quiniae pueyajanaanio.

Jesu naatanishacari jiyaniijia Herodes pueyano niyanu

⁴³ Caapiqui juuca Jesu camueetanu nuhuaji canaa, Samaria pueya tiacajinia, nojuaajaari cuniquiji canaa na pueya jiyataaree Galilea jiyajinira. ⁴⁴ Jesuuri tarisia sequequiaari: “Nio tariucuacaanu sequesanoori seetanujuanaa sequesano. Naa sequeyari: ‘Pueyaso sequenu

panishano caminiujuuniaari maja tojishano quijia tama na jiyajinijaaja' ".⁴⁵ Naajaa, Jesu jaara canaa tiuquitiasseequiaari jiyacari Galilea jiyajinia, cuniquijinio pueyari maninia na tiuquitiquiaari saaja. Nojoriiri naa maninia na tiuquitiquiaari tari nojori niquiniuucua Jesu miishano na cumaacata Jerusalén tiacajinia, Pascuara nojori queranacusacari tii.

⁴⁶ Galilea jiyajinia canaa quishacari, Jesuuri canaa jiyataaree Caná tiacajinia, tee na jataniquiaari mohuaca vinoracuajani. Jiyacaritij, Capernaum tiacajinia quiquiaariiri tamonu pueyano, Galilea jiya jiyaniijia jiyatesano camarnura. Cuno pueyano niyanuuri jiyahohua cusosu matariquiaa.⁴⁷ Cuno camarnu jaara niishiquiaari Jesu tari tiuquiriohua Judea jiyajiniji, nojuajaari jiyacari niquiaari Capernaum tiacajiniji Jesucua, Caná tiacajinia. Na tiuquishacari Jesuucua, na sequeseeri:

—¡Jiyaniijianaa, cucua quia taraajere! ¡Cua niyanu quia naataniquii, quera cusoyano!

⁴⁸ Jesuuri na riucuaree:

—Niaa jaara cua cumaacata cua miishano niquiyaquiri, niaari cucua tiuyaquiquiaa.

⁴⁹ Cuno camarnuuri saaja Jesu sequeree:

—¡Jiyaniijianaa, mijijiaj, jati pa quiaare cua tiajinia, quiyanu cusoy-aquishacariija!

⁵⁰ Jesuuri na sequeree:

—Quia quiarohua. Quia niyanucuaja tari naatarohua.

Cuno camarnuuri Jesu sequesanoocua tiuurii. Quiaarohuari.⁵¹ Jiyacari na tiajinia, na seyari niquiquiaari camarnu niyanuuri seetanujuanaa maninia naatarohua. Naaratej, nojoriiri quiojoquiaari na camarnu numootenuucua. Nojori quojosacari, na camarnu naacuturee saaja nuu cajiniocuaari. Nojoriiri na sequeree:

—¡Quia niyanu tari naatarohua!

⁵² Nojori camarnuuri nojori nequesotaree:

—¿Taacari na cusoñu tajiyatemohuacuaani?

Nojoriiri na riucuaree:

—Naseeca nocuaji tajimiohuacuaa shusha pananu mueecosacari nio niniriquiacuaani.

⁵³ Cusosu queeri niishiquii, Jesucuajaari jiyacari na sequeriquiacuaa: "Quia niyanu tari naatarohua". Naaratej, camarnuuri necocuataja Jesuucua tiuurii, puetunu necohuatajanaanio.

⁵⁴ Judea jiyajiniji Jesu tiuquishacariuhuaj, naa na naatanishacari cuno cusosutej, cunota tari caapiqui quiquiaariiri na cumaacata na miishano Galilea jiyajinia.

5

Jesu naatanishacari cumatacuruhuana cusosu Betzata cuari shuriucua

¹ Tamacariuhua, socua canaa Judiocuaca queranacusacari quiquiaari Jerusalén tiacajinia. Naaratej, canaari Jesuta nocua quiojoquiaariji-uhuaj. ² Jerusalén tiacaari puetunujuanaa puereetuca sohuacajini-acuma quiya. Tohuateyacaari quiya tiuquitiajara. Tamonu tohuateya sesa quiquiaari "Borregohua tiuquitiaja". Na shuriucua quiyari cuari. Canaa Judiocuaca rupaajiniani, cuno cuariiri sesojosaaquiaari "Betzata". Cinco suhuorotucuaari quijia cuno cuari shuriuquioco.

³ Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariyojuarujuri, shipiiniquiujiuniaa, cumatacruhuana cusosuhuanio. Nojoriiri mohuaca sashijia cuaara queyaquete-saaria. ⁴ Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante coteenujuanaa rosequiaari tiini, nojuajaari naataquiaariuhua na cusionujiniji. ⁵ Tamonu cusosuri tii narta cusosuhua tajinia matariquiaajuhua. Tari na shoconuquiciaariiri treinta y ocho marijia, pueyaracaanu na matasacari. ⁶ Jesuuri na niquipuiaari mataano. Noojiajinia niishirijiaariuhuaj cuno pueyano tari shocotejoquiaari queraatia marijia, naa pueyaracaanu na matasacari. Nocuaji Jesuuri na sequeree:

—¿Quiaate naatanu paniya?

⁷ Cusosuuri na riucuaree:

—¿Cantucua cua naacure cuarijinia cua rosenurani, mohuaca jaara queyaquetesaarecuua? Janiya jaara rosenu paniquiaa juucuani, cuarta cusosuuri saaja cua shocotaquiaani.

⁸ Jesuuri na sequeree:

—¡Quia sanere! Quia matu quia pataarohua.

⁹ Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquia. ¹⁰ Canaa Judiocuaca camarucua jaara cusosu niquipuiaari na matu pataano, na juatiuriiri. Naa na sequetureeri:

—¿Majateeri quia niishiniu, quiarijiaari Sábado? ¡Maja quia matu quia patanujuaj!

¹¹ Cusosu naatanohuari nojori riucuaree:

—Cua naataniniacuaja cua sequereo: “Quia matu quia pataarohua”. Janiyari cunora na pataani.

¹² Narta Judiocuaca camarucuaari na nequesotaree:

—¿Cantejaara naa quia sequereeni?

¹³ Nojori riucuareeri:

—Johuaj. Maja cua niishiniu canaquitijia cua naataniriitij.

Jesu naatanishacari cuno pueyano, queraatia pueyari namitia tii quiriquiaa. Naacuajitij, Jesuuri ritia tajiniocuareequiaari pueya tajinia, na naatanishano pueyanocuaji. ¹⁴ Na nuhuaji, Jesuuri na riuritaquiaari cuno juucaja Pueyaso Secojouja tiajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhuara socua, quiaa mariqui socua taraatia miiriiri.

¹⁵ Naacuajitij, cuno pueyanoori Jesu niishirii. Cunora, canaa Judiocuaca camarucuaacua quiaareeri. Nojori sequeseeri:

—Jesuqui cunocuaja cua naataniriini.

¹⁶ Naa Jesu miiniuucua samaatenu juucatej, narta Judiocuaca camarucuaari na quiatunu panijia juucua. ¹⁷ Jesuuri saaja nojori sequeree:

—Cua Queeri pueyaracaanu poonijiya. Janiyari cunora poonijiya-jaacuhuaj.

¹⁸ Naa Jesu sequesacari nojoritij, narta Judiocuaca camarucuaari jiyanoehua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijonuucua. Socua jiyanoehua

na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

Jesuuri Jiyaniijajanaa, Pueyaso Niyamu na quishacari

¹⁹ Nocuaji Jesuuri narta Judiocuaca camarucua sequeree:

—Seetanujuanaa nia sequeyanijia, Pueyaso Niyamu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niiququiaa miyanocuaani. Casaa cua Que miiquiaacuaani, janiyari naa miiquiaajaacuhuaj. ²⁰ Cua Queeri cua panijia. Cunora, nojuajaari puetunu na miishanojuanaa cua niishitiojoquiaa. Naajuhuaj, cua niishitiojonutaniyari socua jiyajeneta casaa tariucua cua miishanojinijicuua. Niaari nocuaji shiriiliquituniutaniya. ²¹ Cua Queeri macunucua samiitianijoquiaa, pueyaracaanu rishijia nojori quiniuria. Naajuhuaj, janiyari pueya samiitianijoquiaani, cana cua samiitianiniu paniyacuajani. ²² Cua Queeri maja na nequesoreenu quiniutaniya pueya. Nojuacuajaari tari cua niquitiocanu na cumaaca, puetunu pueyajanaa cua nequesoreenura. ²³ Nojuajaari naa miiquianu puetunu pueyajanaa quiniuria cua tojitiajaca, naatej, taa cua Que na tojitiatiquiaacuaani. Cante cua ruuretajani, cunoori cua Que ruuretajahuaj, nooj, cante mijiria cua jiyaroquiaaricuajani.

²⁴ 'Seetanujuanaa nia sequeyanijia, cante cua sequenceso tojijiani, mariyata cante cua Jiyaronaacua tiuyajaaniuhuaj, nojuajaari pueyaracaanu Pueyasota rishiriquiano cutara. Nojuajaari maja na saniitiosaanu quiniutaniya. Nojuacuajaari tari samiitianishaarohua juhua macu na quiniujiniji Pueyasooju na quishacari. ²⁵ Seetanujuanaa nia sequeyanijia, quera quiniutaniyari juhua macunucua quiijiaca samiitiacosacari. Seetanujuanaa quiarijiaari, juhua macunucua quiijiacaari cua rupaa tojitianutaniya. Cua rupaa tojitiajacaari samiitiaconutaniya, pueyaracaanu rishijiaca nojori quiniuria. ²⁶ Cua Queeri quiijiajuhanaj. Majaari na naata shaajenu. Nojuajaari naa quijiara cua jiyatequiaarijuhuaj, juhua nojuuarajuhuaj. Naacuajitij, cua naata pueya jiyatenu naa quijarajuhuaj. ²⁷ Pueyanora cua quiniuucua, na cumaaca cua niquitioreeri cuarta pueya cua nequesoreenura, nojori cua sanititionurajuhuaj. ²⁸ Cua tojitiare. Majaari nio sequencesanoocuaji nia shiriiquiniu. Tamacari, puetunu macunucuajanaari cua rupaa tojitiuniutaniya. ²⁹ Macunucua tojitiushacari cua rupaa, nojoriiri samiitiaconutaniya, na jamacajiniji nojori tohuareetanura. Cante maninia mijiaca quiquiaarini, samiitiaconutaniuhuari pueyaracaanu shuquiriaatia quiijiaca nojori quiniuria Pueyasota. Saniniuujia, cante sesa mijiaca quiquiaarini, puetunu nojorijianaari quejoosaanutaniya pueyaracaanu saniitiosocoriquiano.

Jiyaniijajanaa na quiniuucua, Jesu tama nojuajiniji pohuataajaaja

³⁰ 'Pueyaso Niyamu cua quishacari, naajaa, majaari cua miiniu tama cua parishanojuuaaja. Janiyari sesa mijiaca juaaquiaacuajani, saaja cua Que niishitishacari janiya, nojori miishanoori sesa. Tama cua parishanojuuaaja miyashijia cua quiniuucua, janiyari namitiajanaa nojori juaaquiaani. Janiyari pueyaracaanu miiquiaa saaja cua Jiyarona parishanon. ³¹ Pueyano jaara tama nojuajinijijaaja pohuataa narta pueyano, na pohuatasanoocua maja tiuushano. Naaratej, janiya jaara

tama janiyajiniji pohuatariquia nia niquiarani, tama cua pohuatasano-juaja maara najuhuana quiriquiaj.³² Naajaa, quiarijia cutara nia naata niishiniu cua pohuatasanoori seetanujuanaa. Tamonucuaajaari janiyajiniji pohuataa seetanujuanaa. Nojuajaari cua Que. Cunora, niishiyanjia na pohuatasano janiyajinijiiri maja najuhuanaj.

³³ 'Niaari nia pueya jiyarocanu Tiuquinijiona Juancua, nojori neque-sotanura janiyajiniji. Nojuajaari saaja seetanujuanaa nia pohuatacanu janiyajiniji. Majaari na seetanu quiqianu janiyajiniji.³⁴ Nojuaja jaara seetacanu janiyajiniji niajaniya, quiria, naajaa. Janiyacuajaari niishiyani seetanujuanaari cua pohuatasano niajaniya tama janiyajinijiariaja. Tiuquinijiona Juanri seetanujuanaa pohuatacanu janiyajiniji niajaniya. Niaa cuaara na pohuatasanoocua tiuuria, Pueyaso jiyanooniuria niajaniya. Janiyari saaja cunora nia pohuataa Tiuquinijiona Juanjinijini.³⁵ Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhu-atasacari niajaniya. Niaari najuhuana tojiquianu na pohuatasano.³⁶ Tiuquinijiona Juan pohuatasano janiyajinijiiri seetanujuanaa. Niaa jaara na pohuatasanoocua tiuuniu paniyashijiaca quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyaroquiaari. Nojuacuajaari cua sequequiaari naa cua miiniuriatej.³⁷ Cua Quejanaari cua jiyaroquiaari. Nojuajaari janiyajiniji niishitioquiaari pueya. Naajaa, majaari quenaaja nia tojiniu quiquiaari na pocuanu. Nojuajaari nia niqusshoojuhuaj.³⁸ Majaari quenaaja na rupaa quiniu nioojiajinia, nia tiuyaquishacari na Jiyarosanooocua.³⁹ Niaari suraatiia serojoquia taricuacaanu naajiosano Pueyaso Rupaa. Niaari jiyaniya niaa jaara Pueyaso Rupaa niishijiaca quiria, niaari naa pueyaracaanu quihiara quiniutianiya. Seetanujuanaa majaari naatej. Cuno Naajioneejinia, tiiri janiyajiniji naajiotasano quiyacuaja.⁴⁰ Niaari saaja cucua niniu paniyaquiquia cua jiyatenura niajaniya pueyaracaanu quijacara cutara.

⁴¹ 'Maninia cua miishanoori maja pueya sequenura janiya: "Quiaari maninia pueyano". Janiyari saaja cua Que shuquiritiquiaa cutaran.⁴² Janiyari seetanujuanaa nia niishiyani. Niaari Pueyaso shuquiritiaashijiaca, nia panuyaquishacari nojuaja.⁴³ Cua Quecuajaari cua jiyaroquiaari cua niishitiojonura niajaniya nojuajiniji. Quiarijiani, majaari nia tojiniu paniniu janiya. Saniniuuja, tamonu jaara tama na cuaqueyajaaja jiyateya juhua Pueyaso Jiyarosanora na quiniuria, niaa maara cuno tojiri cutara, nojuaja jaara niaacua nimia na niishitiojonura niajaniya tama na niishishanojuaja.⁴⁴ Majaari nia naata cua pohuatasanoocua tiuuniu, niaa jaara saaja niarta pueya shuquiritiasano quiniu paniquiaa, maja Pueyaso shuquiritiasano.⁴⁵ Majaari nia jiyaniyu janiya niaacuara tonujunutaniya cua Queni. Tama Moiséschuajaari niaacuara tonujunutaniya, cua tojitiaashijiaca nia quiniuucua. Niaari jiyaniya niaa Pueyaso muerasu, juhua Moisés tojijiaca nia quishacari. ¿Niaateeri seetanujuanaa Moisés tojijiaca? ¡Majal!⁴⁶ Nojuacuajaari janiyajiniji naajiotasanoocua. Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiuuri-jiuhuaj.⁴⁷ Nocuaji, niaa jaara Moisés naajiotasanoocua tiuyaquiquiaa, ¿niaatucua taa tiuuri quiarijia cua pohuatasanoocuani?

6

*Jesu mianuutesacari cinco mil canuu
(Mt 14.13-21; Mr 6.30-44; Lc 9.10-17)*

¹ Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarijuhua Tiberias caminia. ² Jiyanoqua queraatia pueyari Jesu niquiquiaari tari, cusosuhua na naatanijiosacari. Naaratej, nojoriiri Jesu neteyotariquiaa caminia shuriuquioco. ³ Canaa shiitiasacari caminia taquijiria, Jesuuri canaa tacata-maa tuhuananuucua. Tii cajitiasee canaari. ⁴ Jiyacaritij, quera Pascuara queranacusacariiri quiriquiaa. ⁵ Jesu niquishacari jiyanoqua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

⁶ Naa Felipe nequesotareeri nareja na saniniuria. Jesuuri tari nishiriquiaa taa nojuajanaa mianuutenutaniya cuno pueyani. ⁷ Felipeeri na riucuaree:

—¡Paa jaara cumaneeca jiitiare doscientos juuca pa poonijiosanojiniji pan pa masetajarani, cuno maara najuhuana secaja quiri puetunu nojorirajanaa!

⁸ Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquiriojosano pueyanojuhuaj. Jesu sequeseeri:

⁹—Jiyaniijiana, caya samijia niya cinco pan jiitiae cebada cashojuajiniji shipinishano, caapiqui sapitiaajanio. Naajaa, cunoori najuhuana puetunu cuno pueyajanaa.

¹⁰ Jesuuri saaja canaa na saquiriojosano pueya sequeree:

—Puetunu pueyajanaa nia sequere cuaara cajitiuria.

Cuniqui, canaa tii quiriquiaani, shanohua jiyasocuaari quiriquiaa, maninia cajitiujia. Naaratej, pueyari cajitiurii. Puetunu cuno pueya maanujinijinojuanaani, saaja canuuri quiquiaari cinco mil pueya. ¹¹ Jiyacaritij, Jesuuri cuno pan pataree. Pueyaso secojoree nocuaraari. Na nuhuaji, canaa na serotanirii. Canaari cajitiuyano pueya puetunu na panishanojuanaa niquitiojoreeni nojori miaquenusocoriquiano. Jesuuri naa miirii sapitiaajahuaj. ¹² Puetunu pueyajanaa jaara tooquioquiaari, Jesuuri canaa na saquiriojosano pueya sequreeni:

—Puetunu miaquesano raquiquiajanaa nia reraterohua, maja najuhuana na niitasaanura.

¹³ Canaari cuno cinco panjiniji pueya miaquesano raacua reratereeni. Canaa reratesacari, canaari doce canaasatu mishinijoreeni. ¹⁴ Pueya niquishacari naa Jesu miishano na cumaacatatej, nojoriiri sequeturiquiaa:

—¡Nio pueyanoqui seetanujuanaa Pueyaso sequenu panishano caminiuijunia, nooj, tariucuacaanu sequesaquiaari pocua niriquianotej!

¹⁵ Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaji, Jesuuri tamajaaja tacaquee socua jiyaconaja tuhuananuucua.

*Jesu rucuanesacari mohuaca caco
(Mt 14.22-27; Mr 6.45-52)*

¹⁶ Tariucua pananu tiuquishacari, canaa, Jesu saquiriojosano pueyani, canaari rosetaarohua caminiajiniarani. ¹⁷ Canaari botejinia

tacataseeni, cuniquiji Capernaum tiacajiniara canaa niuutianura caminia taquijiria. Tariucua ninishiquiiri quiriquiaa. Majaari Jesu tiuquiniu quiriquiohua juhuanojuaa canaacua.¹⁸ Tari canaa niuutiasacari, paratuuri jiyanolhua piyarojoriquiaa. Caminiaari cunora jiyanolhua cajiniuucuariquiaa.¹⁹ Canaari tari caminia jiuujiajinia quiriquiaani, seis kilómetroruhua canaa rupareetasaquiji. ¡Canaari jiyacari casaa niquirii canaacua catecanoyanoni! ¡Mohuaca caco canujuriquiaari! ¡Canaari nocuaji shiriiquitiurii jiyanolhuani!²⁰ Jiyacaritij Jesuuri canaa sequereeni:

—¡Maja pueretunu! ¡Janiyacuajanija!

²¹ Na rupaa canaa tojishacari, canaari shuquiriaatia na tacanitiurii botejiniani. Canashiyaquiji boteeri ritia shiitiasee terara canaa quiariquiaacuajani.

Jesu mianuutesano pueya pajesacari nojuaja

²² Jaara juhuaquequiaari, Jesu mianuutesano pueyari na pajenuunu coteequiaari tee canaa quiriquiaa caminia taquijiriacuajani. Nojoricua-jaari tenacari niquiquiaari saaja niquiriyatu boteeri shiitiariquiaa. Saaja canaa, Jesu saquiriojosano pueyani, canaari cuno botejinia quiaquiaariuhua nojori niquiarani. Majaari Jesu quianu quiriquiaa cutara canaata.²³ Jiyacaritij, Tiberias tiacajiniji boteeri tiuquijioquiaari catecaja nojorijniji, tee Jesu mianuutequiaari nojoricuajani.²⁴ Cuno pojori niishishacari maja Jesu quiniu quiriquiaa tari tii, canaa na saquiriojosano pueyajuhuaj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

Jesucristo juhua pooja miaquesano

²⁵ Cuno pojori tiuquijiosacari caminia taquijiria, Jesu riuriatatuseeri. Na nequesotatureeri:

—Niishitiojonanaa, ¿taacari quia niyarohuacuaarini?

²⁶ Jesuuri saaja nojori sequeree:

—Janiyari seetanujuanaa nia sequeyani, majaari nia pajenu janiya nia niquiniuucua cua cumaacata cua miishano. Niaari cua pajenuya saaja cua mianuutenuucua niajaniya, taa nia tooquiorucuaacuajani, cua mianuutesacari niajaniya.²⁷ Maja saaja miaquesanoocua nia tacaari, nia cuaqueya nia cumaquitiajara. Cunoori maja na jiyatenu quiniutianiya niajaniya pueyaracaanu rishijiara. Saaja nia tacaari cutara nioojia samiitianijia miaquesanoocua, pueyaracaanu rishijiaria nia quiniuria. Janiyacuajaari cuno nia niquitoriquianoni, pueyano cua quiniuucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosanoni.

²⁸ Cuno pueyari Jesu nequesotaree:

—¿Casaa canaa miiniutianiyaní Pueyaso panishano canaa miiniuria, Pueyaso shuquiritasano canaa quiniuriajuhuaj?

²⁹ Jesuuri nojori riucuaree:

—Pueyaso Jiyarosanoocua nia tiuuri. Saaja naa nia miishacaritij, Pueyasoori nia shuquiritanutaniya.

³⁰ Cuno pueyari Jesu sequeturee:

—Canaa niquiara quia cumaacata casaa quia miiricuarajaj, canaa niishiniuria quiaari seetanujuanaa Pueyaso Jiyarosano. ¿Casaa canaa quia niquitiniutianiya canaa tiuuniuria quiocuani? ³¹ Canaa quia niq-uitircuaraja quia cumaacata quia miishano, taa Moisés niquitiquiaari canaa supuetanaacuaani. Nojuajaari jiyocuacaanuji pan tiniquiaari pueyaracaanu nojoriria, cariiquia jiyajinia nojori rucuanejosacari. Naa naajiotasano quiyacuajaari tariucuacaanu Pueyaso Rupaajinia: “Nojuajaari nojori mianuutequiaari jiyocuacaanuji tinio pan”. Naacuajitij, canaari niishiyani Moiséscaajaari Pueyaso jiyarosano quiquiaari.

³² Jesuuri nojori riucuaree:

—Seetanujuanaa nia sequeyanija, cuno jiyocuacaanuji panni, cunoori maja Moisés tinishano quiquiaari. Majaari seetanujuanaa jiyocuacaanuji pan na quiniu quiquiaarijuhuaj. Quiarijia cutara, cua Queeri niaacula jiyarorucuuaa seetanujuanaa jiyocuacaanuji panjanaa cutara. ³³ Cuno, Pueyaso niquitiosano pan jiyocuacaanuji rosenoni, cunoori puetunu mijiria quiniae pueyajanaa samiitianijiojua cutara.

³⁴ Naaratej, cuno pueyari Jesu sequeree:

—¡Jiyaniijiana, quiocua pueyaracaanu canaa niquitioriquia cuno pan!

³⁵ Jesuuri nojori sequeree:

—Janiyacuajaari cuno panni, pueya samiitianijiojua. Cante cucua niyani, majaari na miajenu quiniutianiya socua. Cante cucua tiuuri-ijiaaniuhuaj, majaari na jiyamuenu quiniutianiyyajuhuaj. ³⁶ Taa cua sequeree tarí niajaniyacuajani, niaari juucua cua niquiya. Majaari que-naaja cucua nia tiuuniu. ³⁷ Naajaa, puetunu cua Que niquitiosanojuanaa janiyani, nojoriiri cucua niya. Cuno pojori, cante cucua niyyani, majaari cua ruuretanu nojori. ³⁸ Majaari jiyocuacaanuji cua roseno quiquiaari cua miiniuria tama cua miiniu panishanojuaaja. Mijiria niquiaarinijia saaja cua Que panishano cua miiniuria, cante cua jiyaroquiaaricuajani. ³⁹ Majaari cua Jiyarona paniniu cua juurequetenura quenaaja niquiriy-atusua na niquitiosanojiniji janiya. Nojuajaari paniya cutara, nojori cua samiitianijionura jiya puequesacari. ⁴⁰ Canapuete cucua tiuuijacani, nojori niishishacari janiya Pueyaso Niyanuni, cua Queeri puetunu cuno pojorijiana paniya pueyaracaanu rishijiaca nojori quiuria. Naacuajitij, janiyari nojori samiitianijionutaniya jiya puequesacarini.

⁴¹ Jesu sequenuucua, “Janiya jiyocuacaanuji roseno panni”, tii quiniae narta Judiocuacaari cunora juaaqioree. ⁴² Sequetteerei:

—¿Majate nio pueyano Jesucuaja, José niyanutej? ¡Paacuajaari na queya niishiyani! ¿Casaara quiarijia na sequeyari: “Jiyocuacaanuji rosenonijia”?

⁴³ Jesuuri nojori sequeree:

—¡Tariucuaja! ¡Maja nia juaaqionu! ⁴⁴ Pueyanoori maja na naata tiuuniu cucua tamajaaja, cua Que jaara noojajinia poonijiyquiri. Janiyari puetunu cucua tiuuniaajanaa samiitianijionutaniya jiya puequesacarini. ⁴⁵ Tariucuacaanu pueyara Pueyaso sequencesano caminiuijunia naajiotasanocuajaari naa sequeya:

“Pueyasocuajaari puetunu nojorijiana niishitiojonutaniya”.

Naacuajitij, cante cua Que niishitiosano tojjia seetanujuanaani, nojuaajaari cucua tiuya.

⁴⁶ 'Cua Queeri maja pueya niquishano quenaaja. Saaja na niquinia cutaraari janiya cante Pueyasojiniji niquiaaricuajani. ⁴⁷ Seetanujuanaa nia sequeyanija, cante cucua tiuujiani, nojuajaari tari pueyaracaanu rishijiara jatanishaaree. ⁴⁸ Janiyacuajaari pueya samiitianijia panni. ⁴⁹ Cariiquia jiyajinia nia supuetanaa camarucunejotasacari, nojori-iri cuno jiyocuacaanuji tinio pan miaquenuuquiaari juucua. Naajaa, saaja cusonuuquiaariiri. ⁵⁰ Saniniuujia, cante quiarijia seetanujuanaa jiyocuacaanuji roseno pan miaqueyani, majaari Pueyaso shaajanu quiniutianiya nojuaja. ⁵¹ Janiyacuajaari cuno samiitianijia panni, jiyocuacaanuji rosenoni. Cante nio panjiniji miaquejani, nojuajaari pueyaracaanu quijia quiniutianiya. Nio pan, janiya na niquitionutaniya puetunu mijiria quiniae pueyacuarajanaani, cunoori tama cua cuaqueyajaaja.

⁵² Jiyacaritij, tii quiniae narta Judiocuacaari naa sequetooree tamajaaja na juaaniutia:

—¿Nio pueyanotucua taa miaquetera tama na cuaqueyajaaja pa-janiyani?

⁵³ Jesuuri jiyacari nojori sequeree miriqui:

—Seetanujuanaa nia sequeyanija, niaa jaara miaqueyaquiri cua shu, niaa jaara ratuyaquiri cua nanacajuhuaj, majaari samiitianijiosano nia quiniu quiniutianiya, pueyaracaanu quijiac a nia quiniuria. ⁵⁴ Cante cua shu miaquereeni, cante cua nanaca ratureejaaniuhuaj, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianiniutianiuhua jiya puequesacarini. ⁵⁵ Cua shuuri seetanujuanaa miaquesano cutara. Naajuhuaj, cua nanacaari seetanujuanaa ratusano cutara. Cunoori maja juhua mijiria nia miaquesano. ⁵⁶ Cante cua shu miaquenani, cante cua nanaca ratuna-janiuhuaj, nojuajaari coojia rupueja. Janiyari noojia rupuejahuaj, pueyaracaanu rupuetootesano canaa quiniuria. ⁵⁷ Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijani. Naaratej, cante cua miaquenani, nojuajaari pueyaracaanu quijia quiniutianiyajuhuaj, na rupuesacari janiya. ⁵⁸ Janiyari maja juhua nia supuetanaa miaquesano panni. Nia supuetanaari cuno pan miaquenuuquiaari najuhuanaj. Naajaa, saaja cusonuuquiaariiri. Janiyari seetanujuanaa jiyocuacaanuji roseno pan cutarani, nia miaquesocoriquiano. Cante cua miaquejani, jaara cusoyare, naajaa, samiitianutaniuhuari pueyaracaanu quijia na quiniuria.

⁵⁹ Jesuuri puetunu niojuanaa pohuataquiaari pueya niquiara Pueyaso secojojua tiajinia Capernaum tiacajinia.

Queraatia Jesu nuhuajiniae pueya cartesacari nojuaja

⁶⁰ Naa pueya tojishacari Jesu niishitiojosanotej, queraatia na nuhuajiniae pueyari naa sequetooquiaari tamajaaja:

—Cuno na sequencesanori jiyano hua jiyajeneta pa miiniuria puetunu-juanaa. Maja pa naata. ¿Cantucua na tojirirajarajaaranijia?

⁶¹ Jesuuri naa nojori sequencesano niishirii noojiajinia. Nocuaji nojori sequereeri:

—¿Niaateeri naa cua sequenuuucua juaya? ⁶² ¿Niaatucua taa sequere socuani, niaa jaara cua niquiri tacaano jiyocuacaanuhua, teje cua

niquiaaricuajani? ⁶³ Cua shu maja cumaacaraca pueya na samiitianiniuria. Saaja cua Sohuanu cutaraari pueya samiitianijia, pueyara-caanu rishijiaca nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiniuria niajaniya. ⁶⁴ Noojiaqueya niajaniyajinjinioori cucuaji taacanuyajaa.

Jesuuri tarrijia niishijia cante nocua tiuyashijiacani, mariyata cante na paraa na quiatenutaniyani.

⁶⁵ Naa sequeree socua cuno pojoriiri:

—Janiyacuajaari cunora nia sequereeni: “Maja pueyano naata cucua tiuuniu, cua Que jaara noojiajinia poonijiyaquri”.

⁶⁶ Jiyacaritij, queraatia Jesu nuhuajiniae pueyari na cartequiaari. Nojoriiri maja tari Jesuta na rucoojonu quijia. ⁶⁷ Nocuaji, Jesuuri jiyacari canaa na saquiriojosano pueya nequesotaree:

—¿Niajaniyariuhuaj, niaateeri cua cartenutaniyajaacuhuaj?

⁶⁸ Simón Pedroori Jesu riucuaree:

—¡Maja Jiyaniijajanaa! ¿Canaatucua tamonu jiyaniijiaacua pacuren? Canaa quia pohuatasanocuajaari na naata canaa jataniniu pueyara-caanu rishijiia canaa quiniuria. ⁶⁹ Canaacuajaari tari quiocua tiuuquia-nuni, canaa niishishacari quiaari Pueyaso Niyanu, saa maninia miijiaja.

⁷⁰ Jesuuri canaa sequeree:

—Niaacuajaari tama cua saquiriojosano doce pueyajaaja. Saniniujuja, niquiriyatu niajaniyajinjinioori sesaaca.

⁷¹ Naa Jesu sequesacaritij, Judasjiniji sequeriquiaari, Simón Iscariote niyanuni. Nojuajaari seetanujuanaa niquiriyatu canaajinjinio Jesu doce saquiriojosano pueyajinjinio quiquiaari. Naajaa, tama na Jiyani-ijiaaja tacartariquiano quiriquiaaquii.

7

Tama Jesu tapueyocuacajaaja Jesuucua tiuyashijiacquaquiaari

¹ Na nuhuaji, Jesuuri Galilea jiyajinia rucuanejoriquiaa. Canaari na cojiriquiaani. Majaari na quiniu paniniu quiriquiaa Judea jiyajinia, tii quiriaa Judiocuaca monu panishacari nojuaja. ² Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariria pueyari ocho juuca shocotejoquiaari suhuorotucuajinia nojori quishacari. Naa miitiuquiaariiri puetunu marijarajanaa canaa niishirionura, canaa supuetanaa Israel pueyari saaja suhuorotucuajinia quiijaquaquiaari, pueyaracaanu nojori camarucuneejotasacari cariiquia jiyajinia nojori quishacari. ³ Jiyacaritij, tama Jesu tapueyocuacajaarijia naa Jesu sequeturee nojori macaatiniuria nojuaja:

—¡Majaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumaacata, quia jiyopue niquiniuria puetunu quia miishanojuanaa. ⁴ Pueyano jaara puetunu pueyajanaa tojiniu panishano pueyano quiniu paniri, ¿maatucua casaara jiyasohuaja miijiore na cumaacatani? Naatej, taa niya quia miijioquiaa quia cumaacatacuaani, naa quia miijiosee puetunu pueya niquiarajanaa Jerusalén tiacajinajuhuaj.

⁵ Majaari quenaaja tapueyocuaca tiuuniu quiija Jesuucua. Cunora naa na sequetureeri. ⁶ Jesuuri saaja nojori riucuaree:

—Juhuanojuaja maja cua quiasacari cua miiniuria taa nia sequeyacuajani. Niaa jaara quianu paniri, niama juhuajaniya quiaaretej.
⁷ Niarta mijiria quijiacu pueyari maja na naata juaaniu niajaniya. Janiya cutaraari nojori niquiniu paniyaquishooni. Cua niquitiuniu paniyaquiquiaari, nojori cua niishitishacari nojori miishanoori sesa.
⁸ Nia quiojiyare queranacunuucua. Janiya cutaraari maja cua quianu quiniutianiya juhuanojuaja. Quiarrijani, puera juhuacariciaari cua miiniuria taa nia sequeree janiyacuajani.

⁹ Naa nojori na sequenu nuhuajitij, Jesuuri cuniquija jiyojeree Galilea jiyajinia.

Jesu quishacari cuno queranacunuunujinia

¹⁰ Na tapueyocuaca jaara quiojoquiaaricuua Jerusalén tiacajiniara tii queranacunuunura, Jesuuri jiyyasohuaqua quiaaree nojori nuhuajijiuhuaj. ¹¹ Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

¹² Puetunu pueyajanaari Jesujiniji sasacojotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuuquia sequeriquiaacujua:

—¡Maja maninia pueyano! ¡Pueya sapojojua najuhuanaj!

¹³ Puetunu pueyajanaari naa sasacojotooriquiaa jiyyasohuaqua, nojori pueresacari narta Judiocuaca camarucua.

¹⁴ Jiuujianaraca juuca jaara tari shocojoquiaari nojori queranacunuusacari, Jesuuri jiyyacari shusha tiuquiquiaari Pueyaso Secojojua tiajinia. Tii coteeree pueya niishitiojonuuri. ¹⁵ Canaa Judiocuaca camarucuaari jiuujiatequiaari nojori tojishacari Jesu niishitiosano. Naa sequetureeri:

—¡Cuno pueyanoori maja quenaaja na serojonu quiquiaari! ¿Taa na niishiya pueraarini?

¹⁶ Jesuuri nojori sequeree:

—Cua niishitiosanoori maja tama cua niishishanojuaja. Cunoori cua Jiyarona niishitishano janija. ¹⁷ Cante Pueyaso panishano miiniu paniyani, nojuaja cuaara miiria taa cua niishitiojiyacuaani. Naacuajitij, nojuajaari jiyyacari niishiniutianiya, cua niishitiosanocuajaari Pueyasojiniji seetanujuanaa, maja tama cua niishishanojuaja. ¹⁸ Cante tama na niishiriosanojuaja pohuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuaara tojyaquishaaria. Saniniuuquia, cante na jiyarona niishitiosano pohuataa pueyani, pueya tojiniuria na jiyarona, cuno pueyano pohuatasano cutaraari seetanujuanaa. Cuno pueyanoori maja pueya sapojojua.

¹⁹ ¿Niaateeri seetanujuanaa supuetana Moisés Rootasano tojitiajaca? Majaruhua. Majaari quenaaja niquiriyatu niajanijinjinio na rootasano tojijia. ¿Casaara nia monu paniya janijani? ¿Supuetana Moiséste naa nia niishitiojiya na naajjoneejinia?

²⁰ Nojoriiri Jesu riucuaturee na juaaniutia:

—¡Quiaqui samaruraca! ¿Cante quia monu paniyani? ¡Canaa quia sequeretoj!

²¹ Jesuuri nojori sequeree:

—Puetunu niajaniyajanaari shiriiquitiuquianu samaatenu juuca cua miishacari niquiriyatu casaaniyojua cua cumaacata.²² Supuetana Moiséschujaari nia rootaquiaari nia mueya cararaatiuuquia co nia miatenura, ocho juuca jaara na shocojore na rasaanujiniji. Seetanujuanaa, nio niishishanoori maja tama Moisés niishishanojuuaaja. Cunoori tariucuacaanu pa supuetanaa niishishano Moisés niyacarijia. Pueyari naa rootasaaquiaari naa nojori miiniuria necohua, seetanujuanaa Pueyaso saquiriosano Israel pueya nojori quiniurajuhuaj. Naaratej, jaara quiri samaatenu juuca, naajaa, niaari naa nia niquiohua cararaatiuuquia co miatejoquiaa.²³ Naa nia miishacari samaatenu juucatej Moisés Rootasano nia tojiniuria, ¿casaara nia juaya janiyani, cua naataniniuccua cusosu samaatenu juucani? Niaari saaja shiitianiyojua miatejiya, maninia nia niquiohua quiniuria Pueyaso niquiara. Janiya cutaraari puetunu cuno cusosu cuaqueyajanaa jeecacanuni.²⁴ Naaratej, maja ritia pueya juabajia nia quinii, nia niishiyaquishacari maninia. Jacaria niishiriojoua nia quiri, niaa mariqui najuhuana pueya juaariiri na miishano jaara sesa quiyaquiri.

Jesu pohuatasacari tama nojuajinijijaaja

²⁵ Jiyacaritij, noojiaqueya Jerusalén tiacajinjinio pueyari tama sequetoreejaaja:

—¿Majate nio pueyano pa camarucua pajesanocuaja na mosocoriquianotej?²⁶ ¿Taateni? Noocuajaruhua juhuajaniya pohuataa pueya niquiaratej. Majaari quenaaja pa camarucua tenujununoj. ¿Pa camarucuate jiyaniya soj, nojuaja seetanujuanaa Cristo, tariucuacaanu sequesano pocua jiyarosaariquianotej?²⁷ Paacuajaari nio pueyano niishiyani, tejenote nojuajani. Saniniuujia, Cristojuanaa jaara tiuquiri, majaari quenaaja na niishishaanu quiniutianiya cutara tejenote nojuajani.

²⁸ Jesuuri jiyacari niishitiojoriquiaa Pueyaso Secojojuajinia. Naa na tojishacari pueya sequesanotej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri niishiyajuhuaj, tejenote janiyani? Naajaa, majaari cua niniu quiquiaari tama cua panishacarijiaaja. Janiyari jiyarosanoni. Cua Jiyaronaari seetanujuanaa quijajuhuanajaj. Nojuajaari nia niishishoo.²⁹ Janiyari na niishiya cutarani. Janiyacuajaari tiji ninioni. Nojuajaari cua jiyaroquiaari.

³⁰ Nojoriiri jiyacari Jesu quiatunu panirii. Naajaa, majaari quenaaja tamonu naata quiriquiaa na quianura. Majaari na naata quianu quishaquiaari, juhuanojuaja na monu juuca quiyaquishacarijia.³¹ Saniniuujia, queraatia cuniqui quiniaa pueyari Jesuucua tiuquiaari. Nocua tiuuniaari naa sequetuquiaari:

—¿Cristojuanaa jaara tiuquiri, nojuajatucua socua jiyajeneta casaa miri na cumaacata nio pueyano miishanojiniji?

Fariseocuaca quiatenu panishacari Jesu juucua

³² Fariseocuacaari cuno pueya tojiquiaari naa nojori maniniuhuaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojorijianaari Jesuucuara roojotooquiaari. Na nuhuaji, nojoriiri Pueyaso Secojojua tia cojuanaa pueya jiyaramiquiquiaari Pueyaso Secojojua tiajiniara, tii nojori quianura Jesu.³³ Jesuuri jiyacari nojori sequeree:

—Janiyari saaja rupaquijia niaata quiniutianiyyani. Na nuhuaji, janiyari cua Jiyaronaacua riuijuuniutianiuhuani.³⁴ Niaari cua pajenu-unutaniya najuhuanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyyacuaani.

³⁵ Nocuaji, cuno Judiocuacaari tama sequetooreejaaja:

—¿Tee na quianutaniyajanojoni naa pocuaaniquitij, na riuriataaquishaanurajuhuaj? ¿Parta Judiocuacaacua quianutaniya soj, noo pojoriicua Griegohua tajinia niyaquejoquiaaritij? ¿Tii niishitiojonutaniya cuno taucuaca soj?³⁶ ¿Casaa na sequenu paniya pajaniyarini na sequencesacari: “Niaari cua pajenutaniya najuhuanaj. Majaari nia riuriatanu quiniutianiya janiya”, na sequencesacarijuhuaj: “Maja nia naata quianu quiniutianiya tee cua quiniutianiyyacuaani”?

Jesu pohuatasono miriqui Pueyaso Sohuanujiniji

³⁷ Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquiaari socua Pueyaso timitisaanu juuca. Jiyacaritij, Jesuuri nujuauquiaari pueya niquiaira. Jiyanoqua na rupaa paaretareeri. Naa sequereeri:

—¡Cante jiyamueyani, nojuaja cuaara niiria cucua, na ratunura janijiniji!³⁸ Cucua na tiushacari, nera quiniutaniyari taa na naajiotasaaquiaari tariucuacaanu Pueyaso Rupaajiniacuajani. Naa sequeyari: “Cante cucua tiuyani, pueyano samiitianijojua mohuacaari noojajiniji jaatenutaniya”.

³⁹ Naa Jesu sequencesacaritij, nojuajaari Pueyaso Sohuanujiniji pohuatariquiaa miriqui. Jiyacaritij, Pueyaso Sohuanuuri juhuanojuaja maja na quiniu quiriquiaa mijiria, Jesu tacaaquishacarrijia Jiyaniijajanaa na quiniuria. Naaratej, tii quinia pueya sequeriquiaari, cante quiarijia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanuji.

Pueya juuatioosacari Jesuucua

⁴⁰ Jesu jaara pohuatantu puecaquiaari, tii quinia pueyari tama pocoo-joriquiaajaaja. Noojaqueya nojorijinijinioori sequereei:

—¡Nio pueyanoqui seetanujuanaa Pueyaso sequenu panishano caminiujiunia, nooj, tarijia sequencesaquiaari pocua niriquianotej!

⁴¹ Tamasacaari saniniuujia naa sequeriquiaacujua:

—¡Nojuacuajaari Cristo, Pueyaso Jiyarosano pocua!

Tamasacaari saaja nojori riucuaree:

—¿Cristoteeri Galilea jiyajiniji supuenutaniya? ¡Maja!⁴² Tariucuacaanu Pueyaso Rupaajinia naajiotasanojiniji, paari niishiyani, Cristoori pa supuetanaa jiyaniijia David niquiohuajiniji supuenutaniya. Belén tiacajinija rasaanutaniyari, supuetana David tiacajinija.

⁴³ Naacuajitij, puetunu pueyajanaari Jesuucua juayonuutaquiaari.

⁴⁴ Tamasacaari saniniuujia Jesu quianu paniriquiaa juucua. Naajaa, majaari na quiatunu quirii.

Judiocuaca camarucua tiuyaquishacari Jesuucua

⁴⁵ Pueyaso Secojojua tia cojuanaa pueyari Jesu tojitiariquiaa juhuaniya. Na nuhuaji, socua quiojiyarohuari na jiyaramiquiniae pueyacua. Nojori jiyaramiquiniae pueyari quiquiaari Fariseocuaca, pueyacuara secojonaa camarucuanio. Nojori jiyaramiquiniae nojori sequereei:

—¿Casaara Jesu nia jaatucuyaquimiohuani?

⁴⁶ Nojori jiyaramiquishano pueyari saaja nojori riucuaree:

—¡Majaari quenaaja tamonu pueyano pocuanu juhua cuno pueyano-juu, seetanu rupaajanaa pohuataja cutara!

⁴⁷ Fariseocuacaari cunora nojori juaarii:

—¿Niaateeri niaacua na shanacuree na sapojonura niajaniyajuhuaj?

⁴⁸ ¿Tamonu pa camarucuajinijinote nocua tiuurii, canaa Fariseocuaca-jinijiniojuhuaj? ¡Maja! ⁴⁹ ¡Cuno pojori Jesuucua tiuuijacani, nojoriiri Moisés Rootasano niishiyashijiaca! ¡Nojoriiri sesoriquia seque!

⁵⁰ Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niquiaari niucuatej. Nojuajaari narta Fariseocuaca sequeree:

⁵¹ —Pueyanaa, supuetana Moiséscuajaari pa rootaquiaari maja najujuana pa sesacanura pueyano, paa jaara coteenu na nequesoreyaquirini casaa na miiriini.

⁵² Narta Fariseocuacaari Nicodemo juaarii saaja:

—¿Quiaateeri narta Galilea jiyajinjinio pueyanojuhuaj? ¡Jacaria quia pajere taricuacaanu Pueyaso Rupaajinia! ¡Quiocua jiyacari niishiri majaari quenaaja niquiriyatu Pueyaso sequencesano caminiujiunia pueyano supuenu quiniutianiya Galilea jiyajinia!

⁵³ Na nuhuaji, puetunu cuno pojorijianaari na tiajinia quiojiyarohua.

8

Jesujiyanooshacari maaji

¹ Jesuuri saniniujujia Olivo cuhuariquiajinia quiaaree. ² Jesuuri taricuicuaji tiuquiriohua Pueyaso Secojojua tiajinia. Canaari nata quiriquiaajuhuaj. Pueyari nocua rerejoquiaari. Nojuajaari cajirii pueya na niishitijonura juucua.

³ Moisés Rootasanojiniji niishitijonaa, mariyata Fariseocuacanio, cuno pojoriiri jiyacari maaji jaatucumaa Jesuucua. Cuno maajiiiri riuriatasaaquiaari numuetucushiyano. Nojoriiri cuno maaji nujuateree pueya tacoji. ⁴ Jiyacari Jesu sequertureeri:

—Niishitijonanaa, nio maajiiiri quiasaaree numuetucushiyano.

⁵ Moisés Rootasanojiniji paari niishiyani, jiyano maaji cuaara mosaaria saitia jacusano. ¿Quiajanijiyarijataj, taa quia sequeyanijia?

⁶ Judiocuaca camarucuaari naa Jesu nequesotaree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiri-jotare nojori jiyajinjianucua. Jesu cutaraari maja quenaaja nojori na riucuanu quirii. Nojuajaari saaja jojoree, jiyajinia na naajionura na juaashiquiata. ⁷ Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajaniyajinijinote sesa miyashijiani, nojuaja cuaara na coteetaara janu.

⁸ Jesuuri jojorohuacuhua socua na naajionura jiyacua. ⁹ Cuno pojori tojishacari naa Jesu sequesanotej, puetunujuanaari sanaa quiojorohua. Juhuacatecara quiojonu coteequiaariiри socua saaquiapue, na nuhuaji, socua naatujoori nojorijiniji. Nojoriiri naa quiojoquiaariuhua puetunujuanaa. Saaja Jesuuri jateequeue cuno maajitia. ¹⁰ Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu cureenu quirii na jacunura quiabajaniya saitia?

¹¹ Maajiiri Jesu riucuaree:

—Shaaqui puetunujuanaa, Jiyaniijianaa.

Jesuuri maaji sequeree:

—Janiyari quia jiyanoya cutarani. Juhuajaniya quia quiaarohua. Majaari sesa quia miinu socua.

Jesuuri pueya jiuujia cuhuatana

¹² Nojori nuhuaji, Jesuuri pueya niishitiojonu coteerohua. Nojori sequereeri:

—Janiyari pueya jiuujia cuhuatanani. Cante cucua tiuriini, majaari tari ninishi quiquia na quiniu quiniutianiya. Pueyaracaanu cuhuashiqui quiquia quiniutianiya cutaraari.

¹³ Tii quinia Fariseocuacaari naa Jesu juaarii:

—¡Quiaacuajaari tama quia cuaqueyajiniji pohuataa! ¡Puetunu quia pohuatasanojuanaari maja tojishano!

¹⁴ Jesuuri nojori riucuaree:

—Tama cua cuaqueyajiniji aja cua pohuatasacari, cunoori maja najuhuana pohuatasano. Cua pohuatasanoori seetanujuanaa cutara. Janiyacuajaari niishiyani teje cua niquiaarini, tee cua quianutaniuhuani. Niaari saniniuujia niishiyaquiyacuua teje cua niquiaarini, tee cua quianutaniuhuani. ¹⁵ Niaari pueyacuara saquiriojotaquiaa saaja nia niquishanojiniji, nia tojishanojinijiuhuaj. Janiya cutaraari maja cua saquiriojotanu pueyacuara. ¹⁶ Janiya jaara juaari sesa mija cutarani, cua sequenceso cutaraari seetanujuanaa, niquiriyatujua cua quiyaquishacari. Cua Jiyarona cua Quecuajaari cua cojiquiaa cuata na juaniuria sesa mijiaca. ¹⁷ Niaacuajaari Moisés Rootasanojiniji niishitiojoquiaa: “Caapiqui pueyano pohuatasano jaara juhua tarajanu pohuatasano quirijihuaj, cuno cutaraari seetanujuanaa”. ¹⁸ Naajuhuaj, canaari caapiquinu. Tama cua cuaqueyajaa cua pohuatasacari, cunoori seetanujuanaa, cua Jiyarona cojishacari janiya. Nojuajaari cua Que.

¹⁹ Fariseocuacaari na nequesotaree:

—¿Teeteeri quia queni?

Jesuuri nojori riucuaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijujuaj.

²⁰ Jesuuri puetunu nio pohuatariquiaajanaa Pueyasora niquitiosano cumaneeca racataja shuriucuaji, Pueyaso Secojojua tiajinia. Naajaa, majaari pueya quianu quiriquinioj, juhuanojuaja na monu juuca quiyaquishacarijia.

Jesuucua tiuyashijiacaari jiyanoyaquishaanutaniya

²¹ Jesuuri cuno Fariseocuaca sequeroahuacuhuaj:

—Janiyari quianutaniyani. Niaari cua pajenuunutaniya juucua. Niiaari cusonuunutaniya sesa mijiaca, jiyanoshoo nia quishacarijia, cucua nia tiuyaquiniuucua. Naaratej, majaari nia naata quianu quiniutianiya tee cua quianutaniyacuaani.

²² Naa Jesu sequencesacaritij, cuno narta Judiocuacaari tama sequencesooreejaa:

—¿Casaara na sequereecuaraarini: “Maja nia naata quianu quiniutianiya tee cua quianutaniyacuaani”? Tama na cuaqueyajaaja miaquenutaniya jiyoteeri.

²³ Jesuuri nojori sequeree:

—Niaari ninishiqui quiquojinijinio. Janiya cutaraari jiyocuacaanujinijinioni. Niaari saaja mijiria quijiaca. Janiya cutaraari maja niiquijinioni. ²⁴ Janiyacuajaari cunora nia sequereeni, niaari jiyanooshoojua cusionuunutaniya nia cuaracashitiniuucua janiyari maja Pueyaso Niyanuni, taa cua sequequiaa niajaniyacuajani. Cunora niaari jiyanooshoo quiniutaniya, pueyaracaanu saniitiosano nia quiniuria.

²⁵ Nojoriiri Jesu nequesotaree:

—¿Canteeri quiajaniyani?

Jesuuri nojori riucuaree:

—Janiyari najuhuana niaata pocoojiyani. Majaari nia tojiniu janiya. Janiyacuajaari tari nia sequereeni cante janiyani. ²⁶ Janiyari queratia jitiaajaa cua sequesocoriquiano niajaniyani. Niaa jaara nocua tiuyaquiri, niaari pueyaracaanu saniitiosaanutaniya. Puetunu cua sequesanojuanaa niajaniyani, cunoori seetanujuanaa. Cua pohuatasano mijiria, cunoori cua Jiyaronacuajaari sequencesano janiya. Na sequencesanoori see-tanujuanaa cutara.

²⁷ Majaari nojori niishiniu quiriquiaa Jesuuri na Que Pueyasojiniji pohuatariquiaa na sequencesacari “cua Jiyarona”. ²⁸ Jesuuri cunora nojori sequeree:

—Niaa jaara cua teetera, niaari shusha jiyacari niishiniutaniya, janiyari Pueyaso Niyanuni. Niaari niishiniutaniyajuhuaj, majaari tama cua niishirijoosanojuaja cua miiniu quija. Janiyari saaja cua Que niishitijosano pohuatajani. ²⁹ Cua Jiyaronacuajaari cuata quiya. Majaari cua Que cartenu janiya, pueyaracaanu cua miiniuucua na parishano.

³⁰ Naa Jesu pohuatasacari pueya niquiaratej, queraatia pueyari jiyacari nocua tiuuri.

Pueyaso pueyajiniji pohuatasano, Sesaaca pueyajinijinio

³¹ Jesuuri shusha nocua tiuuniaa narta Judiocuaca sequeree:

—Niaa jaara seetanujuanaa cua pohuatasano tojijiaca quiri pueyaraanu, niaari cua pueya quiniutaniya. ³² Niaa jaara naa miiritij, niaari seetanu rupaajanaa niishijiaca quiniutaniya. Naacuajitij, niaari see-tanujuanaa juhua cartesano pueya quiniutaniya, juhuajaniya quijiaca nia quiniuria.

³³ Narta Judiocuacaari Jesu riucuaree:

—Canaacuajaruhua supuetana Abraham jiuahuacuajinio supueno pueyani. Majaari quenaaja canaa quiniu quijia tamasaca poonijotesano pueya. ¿Casaara naa quia sequeya canaarini, canaa quiniuria cartesano pueyani?

³⁴ Jesuuri nojori sequeree:

—Seetanujuanaa nia sequeyanijia, cante sesa miijacani, nojoriiri juhua poonijotesano pueya quiya. Majaari na naata maninia miijia na quiniu. ³⁵ Poonijotesano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaracaanu quiniutaniya cua camarnutani”. Na camarnu jaara na paniyaquiri, na naata na jatanu na parishacari. Camarnu niyanu cutara, na queeri maja na jatanu quijia, neyanu na quiniuucua.

³⁶ Naajuhuaj, janiya jaara nia jaariuutiare nia poonijiotenajinijini, niaari seetanujuanaa cartesano pueya quiniutianiya, Pueyaso muerasura nia quiniuria cutara. ³⁷ Janiyacuajaari niishiyani, niaari seetanujuanaa pa supuetana Abraham jiuhuacuajinio supueno pueya. Naajaa, niaari cua tojiniu paniyaquiya. Niaari cunora cua monu paniya. ³⁸ Janiyari nia pohuatariquiaa cua Quejiniji cua niquishanoni. Niaari saniniuujia nia que sequesano miiquiaacujua.

³⁹ Nojoriiri Jesu sequeree:

—¡Abrahamcuaajaari canaa shipininio!

Jesuuri nojori riucuaree saaja:

—Abraham jaara seetanujuanaa nia shipininio quiri, niaa mariqui maninia miijiaca quiricuara, taa Abraham quiquiaaricuana. ⁴⁰ Saniniuujia, niaari cua monu paniya saaja cua pohuatantuucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara. ⁴¹ Niaari saaja sesa miijiaca taa nia que miiquiaacuaani.

Nojoriiri Jesu juaarii:

—¿Casaa quia sequeyani? ¡Canaari maja saa maaji rasanojuani! ¡Pueyasocuajaari canaa Que, maja tamonu!

⁴² Jesuuri nojori sequeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua niniu quiquiaari. Cua Que Pueyasocuajaari cua jiyaroquiaari. ⁴³ Cua rupaa nia tojiniu paniyaquishacari, niaari cunora cua pohuatasano niishiyaqueya. ⁴⁴ Seetanujuanaa, nia quecuajaari Sesaaca, samaruhsa jiyaniijia. Niaari cunora miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuanaa. Pueyaracaanu sapojoujaari. Na sapojosacari, naa miyari sapojouja na quiniuucua. Sapojonu niishiniuni, cunoori nojuajiniji supuequiaari. Niaari cuno nia que tojijiaca. Nocuaji niaari naa sapojonuujuacahuaj. ⁴⁵ Saniniuujia, cua pohuatasacari seetanu rupaajanaa niajaniya, majaari cucua nia tiuuniu quiquiaa. ⁴⁶ ¿Casaa cua miiquianu sesani? Cante na niishiyani cuaara sequeera. Saniniuujia, janiya jaara sesa miyashijia quirini, ¿casaara cucua nia tiuyaquiyacuaraarini, seetanu rupaajanaa cua pohuatasacari niajaniyani? ⁴⁷ Cante Pueyaso pueyani, nojoriiri Pueyaso rupaa tojiquiaa cutara. Niajaniya saniniuujia, niaari na rupaa tojiquia, na muerasu nia quiyaquishacari.

Jesucristoori tariucuacaanu quijajuhuanaja Abrahamjiniji

⁴⁸ Narta Judiocuacaari naa Jesu juaarii:

—¡Canaacuajaquiri maninia sequeriquiaa quijajaniyajinijini, quiaari Samaria jiyajinjinio tahue, samaruraca pueyanotuhuaj!

⁴⁹ Jesuuri nojori riucuaree:

—Majaari janiya samaruracani. Janiya cutaraari saaja cua Que tojiquiaani. Niaari saniniuujia cua rerequetequiaacujua. ⁵⁰ Naajaa, majaari cua tacaaniu naa nia sesacasacari janiya. Tamonu cutaraari quiya, nojuajaari paniya pueya tojiniuria janiya. Nojuajaari cua rerequetejaca saniitioriquiano. ⁵¹ Seetanujuanaa nia sequeyanijia, cante cua rupaa tojijani, nojoriiri maja na shaajenu quiniutianiya.

⁵² Narta Judiocuacaari na sequeree:

—¡Quiarijia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiuijuniaajanaanio. Quiaari saniniujia quiarijia sequeyacujua: “Cante cua rupaa tojijiani, majaari na shaajenu quiniutianiya”.⁵³ ¿Quiaateeri jiyaniya quiaa socua cutara pueyano canaa supuetana Abrahamjiniji? ¡Maja! Nojuajaari shaajequaari. Mariyata puetunu Pueyaso sequenceso caminiuijuniaa pueyajanaari shaajequaarijuhuaj. ¿Canteeri quiajaniyani naa quia sequenuratej?

⁵⁴ Jesuuri nojori riucuaree:

—Janiya jaara tama cua cuaqueyajaaja jiyatenu paniri juhua jiyaniijiarani, cunoori najuhuanaj. Seetanujuanaa, cua Quecuajaari cua jiyatequiaari Jiyaniijiarajanaa. Nojuajaari nia sequenceso nia Pueyasota.⁵⁵ Niaari seetanujuanaa na niishiyashijiaca. Janiya cutaraari cua Que Pueyaso niishiyani. Janiya jaara nia sequereni, maja cua niishinuu nojuaja, janiya maara sapojojua quirini taa nia quiyacuaani. Janiya cutaraari na niishiyani. Janiyari cunora na rupaa tojijiani.⁵⁶ Nia supuetana Abrahamri timiquiaari na niishishacari janiya mijiria supuenutaniyani. Nojuaja jaara cua niquiquiaari mijiria quiyano tari, jiyano hua timiquiaarii.

⁵⁷ Narta Judiocuacaari Jesu juaarii. Naa na sequetureeri:

—¡Jaj! Majaruhua juhuanojuaja cincuenta marijia shocojonu quiajaniya. ¿Taa quia sequeyarini quiaa canaa supuetana Abraham niquiquiaari?

⁵⁸ Jesuuri nojori riucuaree:

—Janiya nia sequeya seetanujuanaani, Abraham raaquishacarijia, janiyari tari quijiani.

⁵⁹ Naa nojori tojishacari Jesu sequencesanotej, narta Judiocuacaari sai pajenuuree Jesu na jacutajara juucua. Jesuuri nojoriicuaji jamaarii saaja. Pueyaso Secojojua tiajiniji tohuatamaari.

9

Jesu jeecasacari cariyojuaru namija, naa rasanojuhanajaj

¹ Tamacari Jesu rucuanejosacari canaata, canaari cariyojuaru pueyano niquiriini, naa rasanojuhanajaj. ² Canaari cunora Jesu nequesotareeni:

—Niishitjonanaa, ¿casaara naa cuno pueyano rasa aquiaari cariyojuaruni, na queya miiniuucua sesatee, tama sesa na miiniuucuaaja soj?

³ Jesuuri canaa riucuaree:

—Maja. Maja cunora naa na rasaanu quiquiaari. Naa rasa aquiaarii Pueyaso cumaaca niishishaanura, na namijia jaara jeecasaare niquijiara na quiniuria. ⁴ Juuca quishacarijia, pa tucuatate miiniu cua Jiyarona sequenceso cua miiniuria. Paa quera niniyani. Jaara niniquii, majaari pa naata poonijionu quiniutianiya tari. ⁵ Mijiria cua quishacarijia, janiyari pueya jiuujia cuhuatanani.

Jesu sequencesacari: “Paa quera niniyani”, nojuajaari pa shaajenjiniji sequeriquiaa miriqui.

⁶ Naa Jesu sequenu nuhajitij, nojuajaari jiyocua riocoree. Na ria-cauta coniquioreeri. Coriyacau mara ruporohua cariyojuaru namijiacaculaari. ⁷ Cariyojuaru sequero huari:

—Siloé cuarimia quia jeequesee quia namijia.

Hebreo rupaajinía, Siloé cuariiri sequeya “Pueyaso Jiyarosano cuari”. Cariyojuaruuri cuarimia quiaaree. Tii na namijia jeequesee. Tariucua niquijaari na tiajinia tiuquiriohua.⁸ Cariyojuaru na quishacaríja, nojuajaari na miajajau na masetajara cumaneeca mashiniquipijoja quiquiaari. Puetunu pueyajanaari na niquitiujia naa na mashiniquipijoja. Naacuajitij, nojuaja jaara niquijiara quiquiaari, taríja na niquiniaas pueyari, mariyata na shuriucua quiniaas pueyanio, nojoriiri tama sequetooquiaariajia:

—¿Cante cuno pueyanojaarani? ¿Majate noocuaja taríja cumaneeca mashiniquipijojuate?

⁹ Noojaqueya pueyari sequeree:

—iTaaquiriirinij, nojujacuaj!

Tamasacaari saniniuuja sequereecuju:

—Nojuajaquinio naasucua. Juhua nojuaja niquishiyacuaj, majaari seetanujuanaa nojuaja.

Taríja quijia cariyojuaruuri saa sequereeja:

—Taaquiriirinij, janiyacuaaquinatejaj.

¹⁰ Naaratej, pueyari na nequesotaree:

—iQuiaacuaja cariyojuaru quijiaruhua! ¿Taa niquijiara quia quiriohuarin?

¹¹ Nojuajaari pueya riucuaree:

—Cuno, Jesu jiyanishano pueyanoni, nojuajaari mara coniquioree cucuara. Cua namijiaacua na ruporohuari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, ijaniyari niquijiara quiquiini!

¹² Pueyari na nequesotaree:

—¿Teeteeri quia namijia jeecana pueyanoni?

Nojori riucuareeri:

—Johuaj. Maja cua niishiniu.

Fariseocuaca nequesoreesacari na namijia jeecasano pueyano

¹³ Pueyari Fariseocuacaacua jiyataaree Jesu jeecasano cariyojuaru pueyano. ¹⁴ Jesu jaara mara coniquioquiaari na jeecanura cuno pueyano namijia, cuno juucaari Judiocuaca samaatenu juuca quiquiaari. ¹⁵ Nocuaji Fariseocuacaari taríja cariyojuaru quijia nequesotaree taa niquijiara na quiriini. Nojuajaari nojori riucuaree:

—Jesu cua namijiaacua rupojorucuaa marani. Na nuhuaji, janiyari cua namijia jeequeseeni. Naacuajitij, janiyari quiarijia niquijia quiyani.

¹⁶ Noojaqueya cuno Fariseocuacajinjinioori saa sequereeja:

—Cuno pueyano, nio pueyano namijia jeecarucuaani, nojuaja maja Pueyaso Jiyarosano. ¡Nojuajaari Moisés Rootasano tojiyashijia, naa na miiniuucua samaatenu juuca!

Tamasacaari saniniuuja sequeriquiaacujua:

—Jaara sesa mijiia quiri, ¿maautucua casaara poonijiore Pueyaso cumaa-catacvaraarini?

Naa nojori juayonuutanuucuatej, nojoriiri juhua raquitiirii.¹⁷ Nocuaji taríja quijia cariyojuaru nequesotaturohuariuhuaj:

—Niquijia quia quishacari quiarijia, ¿taa quia sequeya Jesuni? ¿Maninia mijiatee?

Nojuajaari saaja Fariseocuaca riucuaree:

—Janiyara, nojuajaari Pueyaso sequencesano caminiujujuria.

¹⁸ Tii quiniaas Judiocuacaari na cuaracashitirii saaja. Nojoriiri jiyaniquiaari maja naasucua seetanujuanaa cariyojuaru cuno pueyano quiniu quijia. Nocuaji nojoriiri na queya sequeturee nojoriicua na niniuria. ¹⁹ Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequencesano cariyojuaru rasanojuhanani? ¿Taa quiarijia niquijara na quiriohuarini?

²⁰ Na queyari cuno pojori riucuaree:

—Taaquiriirinij, nojuacuaaquinateja canaa niyanujuaj. Naa cariyojuaru rasaquaquiaari. ²¹ Majaari canaa niishiniu cutara taa na quiriohua niquijiarani. Majaari canaa niishiniujuhuaj, cante na namijia jeecarucuaani. Nojuaja nia nequesotare, tari cumantumacacuaja. Nojuajanaa cuaara nia pohuataara cutara.

²² Na queyari naa riucuaquiaari narta Judiocuaca camarucuatej, na pueretusacari nojori. Judiocuaca camarucuaari tari sequetuquiaari: “Cante Jesu sequeyani nojuaja seetanujuanaa Pueyaso Jiyarosano, naa sequejaca pueya cuaara tenujusaaria maja Pueyaso secojojua tiajinia na tiuquinuria socua”. ²³ Naaratej, na queyari naa narta Judiocuaca riucuaquiaari: “Nojuaja nia nequesotare, cumantumacacuaja”.

²⁴ Cunora cuno Judiocuacaari socua piiriohua na namijia jeecasano pueyano. Nojoriicua na nishacari, na sequetureeri:

—¡Paacuajaari Pueyaso niquiara niya quiyani! Naaratej, ¡seetanujuanaa canaa quia pohuatara cuno pueyanojiniji! ¡Canaa cutaraari niishiyani cuno pueyanoori sesa mijia!

²⁵ Na namijia jeecasano pueyanoori nojori riucuaree:

—Naajaa, jaara sesa mijia quiri, jaara maninia mijia quirijiuahuaj, maja cua niishiniu cuno. Janiya cutaraari niishiyani, ijaniyari tarilia niquiyashijia quiquiaarini! ijaniyari saniniujia quiarijia niquijia quiya cutaran!

²⁶ Nojoriiri na nequesotarohuacuhuaj:

—¿Taa na miiriucuaa quijaniyajaarani, niquijia quia quiniuriani?

²⁷ Narta Judiocuaca camarucua sequeree saajaari:

—Janiyacuaja tari nia pohuatareeni. Majaari nia tojiniu paniniu janiya. ¿Casaara nia paniya socua cua pacutenura sequenu niajaniyani? ¿Niaate na pueyara quiniu paniya soj?

²⁸ Naa na sequencesacari nojoritij, cuno Judiocuaca camarucuaari na sesacaturee. Naa na sequetureeri:

—¡Quiaari cuno pueyano tojijiacuaja! ¡Canaa cutaraari supuetana Moisés Rootasano tojitiajacani! ²⁹ ¡Canaa cutaraari niishiyani Pueyasojuanaari Moisésca muetaquiaari na rootanura nojuaja! ¡Saniniujia cuno pueyanoori jataj, majaari quenaaja pa niishiniu teje na supuequiaarini!

³⁰ Na namijia jeecasano pueyanoori nojori riucuaree:

—¡Niaaqiiri mosanucua seetanujuanaa! ¿Majateeri nia niishiniu teje na supuequiaarini? ¡Nojuajaari cua namijia jeecarucuaa! ³¹ ¡Paacuajaari niishiyani Pueyaso maja na tojiniu quijia sesa mijia secojosano! ¡Saaja na timitiajaca secojosano tojiya cutaraari, cante na panishano

miiquiaacuajani! ³² ¡Majaari quenaaja pa tojiniu quijia tamonu pueyanojiniji, cante cariyojuaru namijia jecajani, naa cariyojuaru rasanojuhnajan! ³³ Cuno pueyano jaara Pueyaso Jiyarosano quiyaquiri, ¿taa cua namijia na jecarucuaacuaraarin?

³⁴ Cuno pojoriiri na juaaniutia na sequeturee:

—¡Quiaari sesa mijia rasaaquiaari! ¿Quiaateeri jiyanojuaa canaa niishitiojonu paniyaruhua?

Naaratej, narta Judiocuaca camarucuaari na tenujturee maja socua na tiuquiniuria Pueyaso secojojua tiajinia. Naacujitij, cuno pueyanoori juhua taanuusano pueyano quiquiaari narta Pueyaso timitajaca pueyajiniji.

Jesu tojitiaashijiaca pueya juhua cariyojuaru

³⁵ Jesuuri niishiquiaari cuno pueyanoori tenujusaarucuaa. Jaara na riuriataquiaari, Jesuuri na sequeree:

—¿Quiaate Pueyaso Niyanuucua tiuujia?

³⁶ Jesu sequereeri:

—Jiyaniijianaa, cua sequere canteeri nojuajani, nojuaja cua niishinuria nocua cua tiuuniuria.

³⁷ Jesuuri na sequeree:

—Quiaacuaja na niquiyaruhua. Nojuajaari cunocuaja, quiata pocoojiyani.

³⁸ Jiyacaritij, pueyanoori Jesu cariquimiaji mojoquetaree. Na sequereeri:

—¡Quiocua tiuyanijia, cua Jiyaniijianaa!

³⁹ Na nuhuaji, Jesuuri cuniqui quiniaa pueya niquiara sequeree:

—Janiyari mijiria niquiaarini juhua cua raquiriojotanura mijiria quiniaa. Naacujitij, cante niishiyani nojuaja juhua cariyojuaru quiya, nojuajaari juhua namijiaraca quiniutianiya cucua na tiuushacari. Saniniuuja, cante jiyaniyani nojuaja niquijia cutara, nojuajaari juhua cariyojuarura tari jiyatesaaree, cucua na tiuyaquinuucua.

⁴⁰ Tii quinia Fariseocuaca jaara tojiquiaari naa Jesu sequesanotej, nojoriiri Jesu sequeree:

—Naa quia sequencesacaritij, ¿quiaateeri sequeya canaari cariyojuarujuri-jiuhuaj?

⁴¹ Jesuuri nojori riucuaree:

—Niaa jaara tama nia cuaqueyajaaja jiyatere juhua cariyojuarura cucua nia tiuuniuria, Pueyaso maara nia jiyanoori. Quiarijiani, tama nia sequenuucuajaaja, “Canaa niquijia cutarani”, niaari jiyanooshoojua nioojia nia tacatoyaquiniuucua.

10

Jesu pohuatasano miriqui borrego cojuanajiniji

¹ Jesuuri socua pohuatarohua pueya niquiara. Naa sequereeri:

—Seetanujuanaa nia sequeyanijia, cante borrego mataca tohuateyaco tiuquiyajijani, nojuaja jaara tamocoji tiuquimia, cunoori nohuasejojua. ² Saniniuuja, cante tohuateyaco tiuquijia cutarani, cunoori borregohua camarujuanaa cutara. ³ Tohuateyera cojuanaari tiootiu rataquiaa nocuaji. Borregohua camaruuri puetunu na seja sesacajanaa jiyaniquijia. Na borregohuari na rupaa niishijia. Na camaruuri naa na

tohuatanijiojua puetunujuanaa na matacajiniji. ⁴ Puetunu na borrego-huajanaa jaara tohuareetama, na camaruuri na puetaja. Na seyari na nuhuaji sacuaja, na camaru rupaa nojori niishishacari. ⁵ Saniniujia, borregohuari maja na nuhuajiniu quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

⁶ Jesuuri naa pohuataquiaari miriqui nojori niquiara. Nojoriiri saaja niishiyaquiaari casaa na niishitiojonu paniriquiaa nojorini.

Jesucristo, maninia pa cojuana

⁷ Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuateyani, cua borregohua tiuquitianura cua Que Pueyasocua. ⁸ Cante cua niyacaricia nijioquiaari coteenuni, nojoriiri sesa miijiacquaari, nohuasenujuaca. Cua borregohuari namitia nojori numueejushiquiaari. ⁹ Janiyari juhua tohuateyani. Cante janiyajiniji tiuquiya cua Queecuani, nojuajaari Pueyaso pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutaniyani, tii na quiniuria maninia cojuasano. Janiyari juuca na tohuatenutaniyani, jiyasocua cua miaquetenura carijiniacuma.

¹⁰ 'Nohuasejojuaari saaja tiuquijia borregohuacua na nohuasenura, na puecoonorajuhuaj. Naa na shaajaaja puetunujuanaari. Janiyari saniniujia niquiaarini cua borregohua cua jiyatenura pueyara-caanu quijiacara, seetanujuanaa jiyanohua shuquiriaatia quijiacar nojori quiniuria. ¹¹ Janiyari maninia cojuanani, maja tamonu. Pueyano jaara maninia na seja cojuana maniniu quiri, tama na cuaqueyajaaja panitiaja na seyacuari. ¹² Saniniujia, borregohua camarujuanaa jaara tamonu cojuateya na seja, cuno pueyano jaara niquiri sare nocua canujijano, nojuajaari na puerenuta neteja. Borregohua tiujiaqueeri. Naa miijiaari cuno borregohua quiyaquiniuucua na seyajanaa. Naacuajitij, sareeri borregohua soojua. Naa na cocuatajaari. ¹³ Cuno borregohua cojuanaari naa neteja sareecuaji na tacayaquishacari seetanujuanaa cuno borregohuacua. Nojuajaari saaja paniya na poonijiosano sami na niquitiosaanura.

¹⁴ 'Janiya cutaraari maninia cojuaja borregohuani, na camarujuanaa cua quishacari. Janiyari puetunu cua seyajanaa niishijiani. ¹⁵ Nojoriiri cua niishiyajuhuaj, taa cua Que niishiya janiyacuana, mariyata taa cua niishiya cua Quejaniuhuaj. Janiyari tama cua cuaqueyajaaja panitiaja cua borregohuacuarani. ¹⁶ Janiyari socua borregohua jiitiaani. Nojoriiri maja nio cua borregohua maanujinjinio. Janiyari nojori rijionutaniya niyarajuhuaj. Nojoriiri cua tojitiariquiano. Naacuajitij, puetunu cua borregohuajanaari jatiqui quiriquiano, niquiriyatu cojuanaracajuhuaj.

¹⁷ 'Cua Queeri cua paniya naa cua panitiasacari tama cua cuaqueyajaaja cuno borregohuacuara. Janiyari tama cua panishacariciaaja mosaanutaniyani, na nuhuaji cua samiitianuhuara, pueyaracaanu quijia cua quiniuhuara. ¹⁸ Majaari quenaaja tamonu naata monu janiya cua paniyaquishacari. Janiyari cua panishacari cusionutaniya cua borregohuacuarani. Janiyari cumaacaracanu nojoriicuara cua cusionura. Janiyari cumaacaracajuhuaj cua samiitianuhuara. Cua Quecuajaari naa cua miiniuria cua jiyaroquiaari mijiria.

¹⁹ Narta Judiocuaca jaara tojiquiaari naa Jesu sequencesanotej, nojoriiri socua tama juayonuutaquiaariajiaaja Jesuucua. ²⁰ Queraatia pueyari jiyacari sequeree:

—¡Cuno pueyanoori samaruraca! ¡Maja na tojiniu, pueyanaa! ¡Najuhanu pocuaano!

²¹ Tamasacaari saniniuuja sequeriquiaacujua:

—¿Samaruraca pueyanoteeri maninia casaa pohuatajajaara juhua nio pueyanojua? ¡Maja! ¿Pueyanoteeri na naata samaru cumaacata jeecanu cariyojuaru namijiajaa? ¡Maja na naata!

Judiocuaca camarucua niquiniu paniyaquishacari Jesu

²² Tamacari, Jerusalén tiacajiniaari queranacusaariquiaa. Cunoori quiriquiaa pueya niishiriojonura nojori juhua cuno juucajinia Pueyaso Secojouua tia jiyatequiaariuhua seetanujuanaa juhua Pueyaso quiquiriora na quiniuhuara. Jiyacariiri shuniya quiriquiaa.

²³ Jesuuri tii quiriquiaajuhuaj. Pueyaso Secojouua tiajinia quiriquiaari. Nojuaaari pueya jiyaniquishano tariucuacaanu jiyaniijia Salomón canujuucojojuajinua riujiuuniuquiojoriquiaa. ²⁴ Jiyacaritij, canaa Judiocuaca camarucuaari tii na cosesee. Naa na nequesotatureeri:

—¿Taacari canaa quia sequenutaniya socuaari cante quiajaniani? ¡Quiaa jaara seetanujuanaa Pueyaso Jiyarosano quiri, quiarijia canaa quia sequere!

²⁵ Jesuuri nojori riucuaree:

—Janiyacuaja tari nia sequecanuni. Niaari saaja na cuaracashitiquianu. Niaa cuaara niishiiria cante janiyani, nia niquishacari cua miishano cua Que sequencesano janiya. ²⁶ Niaari saaja cucua tiuyaquiquiaa cua borregohua maanujinijinio nia quiyaquishacari. ²⁷ Cua borregohuari cua rupaa tojija cutara. Janiyari nojori niishiyajaaniuhuaj. Nojoriiri cunora cua nuhuajiquiaa. ²⁸ Janiyari pueyaracaanu quiijara nojori jiyatequiaani. Majaari nojori juurequenu quiniutianiya. Majaari quenaaja tamonu naata jaariuutianu quiniutianiya nojori janiyajiniji. ²⁹ Cua Queeri cua borregohua cua niquitioquiaari. Nojuaaari socua jiyanoehua cumaacaraca tamasaca cumaacaraca quiijacajiniji. Naacuajitij, maja quenaaja tamonu naata cua borregohua jaariuutianu cua Quejiniji. ³⁰ Janiya cua Queta, canaari juhua niquiriyatuni.

³¹ Jiyacaritij, canaa Judiocuaca camarucuaari sai rijorohuacuhuaj, Jesu na jacutajara juucua. ³² Jesuuri saaja nojori sequeree:

—Janiyari queraatia maninia casaa miiquianu saaja cua Que cumaacata nia niquiarani. ¿Teyanoocua nia jacunu paniya janianyi?

³³ Nojoriiri Jesu riucuaree:

—Majaari canaa jacunu quiniutianiya quiajaniani maninia quia miiniuucua. ¡Canaari quia jacunutaniyani sacuaraatia quia pocuanuucua Pueyaso niquiara! ¡Quiaari tama quia cuaqueyajaaja jiyateya juhua Pueyasora! ¡Cunoori jiyanoehua sesa! ¡Quiaacuajaari pueyano, juhua canaaajuuhuaj!

³⁴ Jesuuri nojori sequeree:

—Niaacuajaari tariucuacaanu naajiosano Pueyaso Rupaa jiitiae. Pueyaso sequencesanoori naa naajiotasano quiya tii:
“Janiyacuajaari nia sequequiaarini, niaari pueyashua”.
³⁵ ‘Paacuajaari niishiiriani, Pueyaso Rupaajinia naajiotasanoori maja na naata cuaracashitishaanu. Pueyasojuanaari pueya jiyaniquipuiaari

“pueyasohuata”, noo pojori, teyano nojuaja jiyatequiaari Israel pueya jiitianaaracuajani.³⁶ Naajuhuaj, Pueyasocuajaari cua saquiriojocuaria mijiria na jiyarosocoriquiano. Naa Pueyasojuanaa Jiyarosano cua quishacaritij, ¿niaatucua casaara sequereni janiya Pueyaso niquiara pocuaree sesani, cua sequencesacari janiya Pueyaso Niyanuni?³⁷ Janiya jaara cua Que panishano miyaquiri na cumaacatani, janiya maara nia juayaquirini cucua nia tiuyaquinuucua.³⁸ Niaacuajaari cua Que cumaacata cua miishano niquiquiaa. Niaa jaara cua pohuatasanoocua tiuuniu paniyaquiri, naajaa, cua Que cumaacata cua miishanoocua nia tiuuri quenaaja. Niaa jaara niishiri puetunu cua miishanojuanaari cua Que Pueyaso cumaacata miishano, niaa maara niishiri Pueyasoori coojia rupueja, janiyari noojia rupueyajaanuhuaj.

³⁹ Jiyacaritij, nojoriiri socua Jesu quiatunu paniriohuacuhuaj. Jesuuri saaja nojoriicuaji mashiquii.

⁴⁰ Jesuuri canaa jiyataarohua Jordán moo taquijiria tee Juan tiuquini-jioquiaari tarijia pueyacuajani. Canaari tii quishiini.⁴¹ Queraatia pueyari Jesuucua nijioquiaari tee canaa quiriquiaacuajani. Nojoriiri tama sequequiaariajiaaja Jesujiniji:

—Tiuquinijiona Juanri maja quenaaja na miiniu quijia casaa Pueyaso cumaacata. Naajaa, puetunu nio pueyanojiniji na sequencesanojuanaaquiri seetanujuanaa quijia.

⁴² Naacuajitij, queraatia pueyari Jesuucua tiuuquiaari tii, tee canaa quiriquiaacuajani.

11

Lázaro shaajenujiniji pohuatasano

¹ Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiniojuanaa quiquiaari, Judea jiyajinia. Na rimiatuhua quiquiaari María, Martanio. Nojoriiri cuno Betania tiacajinijinio quiquiaarijuhuaj.² Lázaro rimiatu Maríani, nojuajaari noo maajicuaja Jesu niohuaca sacuanijiaquiaari na muecacatatej, nocua na totanu nuhuaji na shanohua jaanutaja.³ Lázaro matasacari cusosu, na rimiatuhuari pueyano jiyarotuquiaari Jesu numootenuucua. Naaratej, cuno pueyano tiuquishacari Jesuucua, nojuajaari naa caminiujuquiaari Lázaro rimiatuhua sequencesano nojuaja:

—Jiyajinijiana, quia panishano pueyanona cusosu mataa.

⁴ Jesu tojishacari naa cuno pueyano sequencesanotej, tii quiniaa pueya sequereeri, canaa juhuaj:

—Nojuajaari maja na cusionu quiniutianiya na shaajenura puetunujuanaa. Cuno cusionu na jiitiasanojinijini, pueyari Pueyaso cumaacata miishano niquiniutianiya. Pueyari cunora Pueyaso Niyanu maniniuhuaqueetanutaniya, cua Que Pueyasojuhuaj.

⁵ Marta, María, Lázaronio, nojoriiri Jesu panishano pueya quijia.

⁶ Naajaa, Jesu jaara numootesaquiaari Lázaroniji, majaari nocua na quianu quiquiaari ritia. Caapiqui juuca camueeree cuniquiaaraari, tee canaa quiriquiaacuajani.⁷ Na nuhuaji, canaa na saquiriojosano pueya sequereeri:

—Judea jiyajinia pa quiaarohuacuara socua.

⁸ Canaari Jesu sequereeni:

—Niishitiojonanaa, cuniquijinio Judiocuacacuajaari shusha naatata
tii quia jacunu paniquianu. ¿Casaara socua tii quia quianu paniuhuar-
niuhuaj?

⁹ Jesuuri canaa riucuaree miriqui:

—Janiyara, juuca juhuanojuaja. Juucaari maninia seetanujuanaa pa
rucuanejonura. Paa jaara pananu tiuquiaquishacarijia rucuanejoreni,
paari maninia niquia pocuajini. Majaari pa tiuriiniu. ¹⁰ Paa jaara
ninishiqui rucuanejore saniniunijia, paari tiuriijiani cuhuashiqui na
quiaquishacari.

Jesuuri naa sequeriquiaa miriquitij, nera, maja puereeta na quiniu
quiriquiaa Judiocuaca niquiaira na rucuanejonura, na mosaanu juuca
quiaquishacarijia. ¹¹ Na nuhuaji, Jesuuri naa canaa sequeree socua:

—Pa rupuena Lázaroori tari maquee. Janiyari na niucuajanuuucua
quianutaniyani.

¹² Canaari Jesu sequereeni:

—Jiyaniijiana, nojuaja jaara maqueya, maniniacuajaqui. Naacua-
jiti paari niishiyani naatanutaniuhuacuajaqui. ¿Paatucua casaara na-
juhuana nocua quiaaren?

¹³ Naa Jesu pohuatasacari canaa Lázarojinijitij, canaa sequeriquiaa juu-
cuaari Lázaro tari macu quiriquiaa. Canaari saniniujia jiyaniquirquiaani
Jesu naasucuaari canaa pohuatariquiaa Lázaro nareja maqueriquiaa.

¹⁴ Nocuaji Jesuuri maatia canaa sequeree:

—Lázaro tari cusoyarucuua. ¹⁵ Janiyari timiyani tii cua quiyaquiniuu-
cua Lázaro quishacarijia saminio. Naa quiarijia macu na quishacaritij,
niaari socua jiyajeneta casaa cua miishano niquinuitianiya, seetanuju-
naa cucua nia tiuuniuria cutara. Quiarijia cutara, nocua pa quiaare.

¹⁶ Jiyacaritij, Tomásri canaa narta saquiriosano pueya sequeree:

—Pa Jiyaniijiata pa quiaarejuhuaj, nata pa cojiritiasaanura puecoonu.
Cuno Tomásri pueya sesojosano quiquiaari “Caapueya muetusano”.

Jesu, macunucua samiitianijojua

¹⁷ Canaa jaara tiuquijioseequiaarini, Jesuuri pohuatasaaquiaari
Lázaro tari cuatro juuca shocotejoriquiaa raaco na niasaanujiniji.

¹⁸ Betania tiacaari catecaja Jerusalén tiacajiniji. (Nareja media hora paa
jaara ritia rucuaneyaren). ¹⁹ Naaratej, queraatia narta Judiocuacaari
quiojoquiaari Marta, María tiajinia, nojori na cumanijanura na nanu
nuhuaji. ²⁰ Marta jaara niishiquiaari Jesu shusha tiuquiriquiaa, noju-
jaari nocua tohuataquiaari canaa na naacunura. Majaari María niniu
quiriquiaa cutara. Tiajiniaja quiriiri. ²¹ Canaacula Marta tiuquishacari,
nojuajaari Jesu sequences:

—Jiyaniijiana, ¡quiajaara niya quiqianu, cua nanu maara sha-
jeyaquiaquianu! ²² Naajaa, janiyari niishiyani quiajaara Pueyaso sec-
ojore, Pueyasoori quia secojosano tojiniutianiya.

²³ Jesuuri Marta sequeree:

—Quia nanucuaja samiitianutaniuhua.

²⁴ Martaari na riucuaree:

—Taaquiriirinij, janiyacuaja niishiyani nojuajaari samiitianutani-
uhua macunucua samiitiacosacariuhua jiya puequesacari.

²⁵ Jesuuri na sequeree:

—Janiyacuajaari macunucua samiitianijojuani. Cante cucua tiujiani, jaara cusoyare, naajaa, samiitianutaniuhuari.²⁶ Cante cucua tiurii saminio na quishacarijani, nojuaja jaara cusoyare, naajaa, majaari na shaajenu quiiniutianiya seetanujuanaa. ¿Quiaate cua sequesanoocua tiuya Martanaa?

²⁷ Nojuajaari Jesu riucuaree:

—Jaa, Jiyaniijianaa. Janiyacuaja niishiyani quiaari Cristo, Pueyaso Niyunu, nooj tariucuacaanu sequesaquaari mijiria niriquianotej.

²⁸ Naa Marta riucuanu nuhuaji Jesutej, na tiajinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quia quianura.

²⁹ Naa María tojishacari Marta sequesanotej, ritia sanequeeri. Jesuu-cua nimiaari tee canaa quiriquiaacuajani.³⁰ Jesuuri juhuanojuaja maja na tiuquitianu quiriquiaari canaa cuno tiacajinia. Canaari tiaca shuri-ucua quiriquiaajaani tee Marta naacuquiaari canaacuajani, Jesuucua na nishacari.³¹ Nojori cumanijianaa pueya jaara María niquiriquiaari ritia tohuataano tiajiniji, nojoriiri na jiyaniquiaari na nanu raajinia nu-juqueniuucua quiaaa naasucua. Naaratej, nojoriiri na nuhuaji quiaaree.

³² María tiuquishacari canaacua, Jesu cariquimiaji mojoquetaseeri. Naa na sequereeri:

—Quiaaa jaara niya quiqianu, cua nanu maara shaajeyaquiaquianu.

³³ Jesu niquisshacari María nujuqueyano, mariyata nata quiniaaa nu-juqueyanojuhuaj, Jesuuri nojori taraajetaree.³⁴ Jesuuri pueya neque-sofaree:

—¿Tee na niasaarucuaani?

Pueyari Jesu sequeree:

—Miji, Jiyaniijianaa. Quia niquiriquia. Niya niasaarucuaano.

³⁵ Jesuuri nujuquesee.³⁶ Tii quiniaaa Judiocuaca niquisshacari Jesu nujuqueyano, tama sequetoooreejaarija:

—¡Nia niquiri! Jiyanolua Lázaro panijijaquiiri.

³⁷ Noojaqueya cuno pojorijinijinioori sequeriquiaajuhuaj:

—Jesu jaara cariyojuaru namijia jeecacanucuaa, maara Lázaro naataniquianujuhuaj maja na shaajenura.

Jesu samiitianishacari Lázaro

³⁸ Jesuuri jiyanolua na taraajenuta raa jiyajiria catecanoquiaari, canaajuhuaj. Raari puereetuua saajiata mishiquiosano quiriquiaa.

³⁹ Jesuuri pueya sequeree:

—¡Saajia nia ruutiniri tamocora!

Martaari Jesu sequeree:

—¡Jiyaniijianaa, cuatro juuca tari na shoconujiya! ¡Tari mocuaatia jaaniuya naasucua!

⁴⁰ Jesuuri Marta sequeree:

—Janiyacuaja tari quia sequereeni, quiaaa jaara cua sequesanoocua tiuuri, quiaari Pueyaso cumaacata cua miishano niquinintianiya.

⁴¹ Jiyacaritij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequeree:

—Cua Quenaa, quia timitiaanijia. Quiaari tari cua sequesano tojiri-ucuaacuaja.⁴² Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaaa pueya niishiniuria quiaari mijiria cua jiyaroquiaari.

43 Naa Jesu sequenu nuhuajitij, jiyanohua na rupaa paaretareeri. Naa sequereeri:

—iLázaronaa, quia tohuatama!

44 Macuuri tariucua saminio tohuatamaa. Na juaashiquiaca, na niohuacaari jiuniocosano quiriquiaajaa. Na nacaari puetunu na jiquicotajanaa mishiquiosano quiriquiaajuhuaj, toquerauta morosano. Jesuuri pueya sequeree:

—Nia saacatare, cuaara rucuaneera.

Judiocuaca camarucua roojotoosacari na monura Jesu

(Mt 26.1-5; Mr 14.1-2; Lc 22.1-2)

45 Naa Jesu samiitianishacari Lázarotej, queraatia narta Judiocuacaari nocua tiuquiaari, noo pojori canapuete Maríacua nijioquiaari na cumanijianuracuajani. 46 Noojiaqueya cuno Judiocuacajinjinioori Fariseocuacaacua quiojoquiaari nojori pohuatanura Jesu miishano. 47 Naaratej, Fariseocuaca, pueyacuara secojonaa jiyaniijianucuanio, nojoriiri rerejoquiaari puetunu Judiocuaca camarucuatajanaa. Nojoriiri sequetuquiaari:

—¿Taa pa miiniutianiyyani? Cuno pueyanoori queraatia casaa miquiaa na cumaacata pueya niquiara. 48 Paa jaara nareja na shanacure naa na miiniuriatej, ipuetunu pueyajanaari na pueyara quiniutianiyya, nocua nojori tiuushacari! Nojoriiri na jiyaniijiara socua na jiyatentaniya. Naaratej, pa jiitiana Romano pueyari pocua nijionutaniya Pueyaso Secojojua tia nojori niyartanura, pa pueya na pueconurahuaj.

49 Caifásri tii quiriquiaajuhuaj. Nojuajaari canaa pueyacuara secojonaa jiyaniijiajanaa quiriquiaa cuno marijiara. Jiyacaritij, nojuajaari narta camarucua sequeree:

—iNiaaquiri niishiyashijiaca seetanujuanaa! 50 ¿Majateeri nia niishiniu? Maninia cutaraari niquiriyatu pueyano cusionura pa niti, maja najuhuana puetunu pa pueyajanaa puecoosaanura.

51 Caifás sequencesanoori maja tama na sequencesanojuaaja quiquiaari. Pueyacuara secojonaa jiyaniijiajanaa na quishacari, Pueyasoori naa na pohuaterree taa Jesu cusionutaniya puetunu Judiocuacaacuarajanaani. 52 Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapueecuarajanaajuhuaj, tee tiquiyocua niyaquejonu na muerasurano quiyacuajani. Nojuajaari cusoriquiano puetunu cuno pojorijanaa na rerejotenura, jatiqui na quitiuniuria juhua niquiriyatu maanu. 53 Naacuajitij, cuno juucajiniji, cuno Judiocuaca camarucuaari roojotooriquiaa taa nojori monutaniya Jesuni.

54 Nocuaji, Jesuuri maja tari na rucuanejonu quijia narta Judiocuaca niquiara. Cunora tamaquiria canaa jiyataquiaariiri. Canaari nata quishii cariiquia jiya shuriucua tamonu tiacajiniani. Cuno tiaca sesa quiquiaari Efraín.

55 Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajinijiiaaja. Nojoriiri quiojoriquiaari juhuacarijia nojori jeenucuanura na cuaqueya nojori puecoosacari tama na seyajaaja nojoriicuara. Nojoriiri naa miquiaari jiyanoooshano nojori quiniuria Pueyaso niquiara, taa

supuetana Moisés rootaquiaaricuajani. Nojoriiri naa miquiaari juhuajaniya nojori queranacunura Pueyaso niquiara Pascua juuca.⁵⁶ Pueyari tii Jesu pajenuuriquiaa. Pueyaso Secojouja tiajinia nojori quishacari, nojoriiri tama nequesoreetooriquiaaja:

—¿Taa nia sequeyani? ¿Pa queranacunujinia niniutianiyatenojotij, maja soj?

⁵⁷ Pueyacuara secojonaa jiyaniijianucua, Fariseocuacanio, nojoriiri tari pueya rootaquiaari, tamonu pueyano jaara niishiri tee Jesu quiyani, cuaara nojori numooteera nojori quiatenura Jesu.

12

*María totasacari na shanohua jaanutaja Jesuucua
(Mt 26.6-13; Mr 14.3-9)*

¹ Seis juuca jaara cureeriquiaajaa Pascua juucara, canaari jiyacari Jesuta Betania tiacajinia quiaareeni, Lázaro quijia tiacajinia, teyano Jesu samitianiquiaaricuajani. ² Cuno tiacajinijinio Jesu rupuenaa pueya timitiasacari Jesu, nojoriiri sumatunuquiaari nojori miaque-nuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuriquiaa narta masusano pueyata, canaanatnio. ³ Jiyacaritij, Mariari Jesuucuara pataree na shanohua jaanutaja. Cunoori “nardo” jiyaniishano nataujiniji shipinishano quiquiaari. Jiyanoqua queraatia cumaneecata masesano. Puereetuua motiiquio cajiniocua puecariquiaari cuno shanohua jaanutaja. Mariari Jesu nio-huacaacua na totaree. Na nuhuaji, na sacuanijiarhua na muecacataari. Puetunu tiacojuanaari shanohua jaanuriquiaa. ⁴ Naa María miishacaritij, niquiriyatu canaajinijinio Jesu saquiriojosano pueyanoori juaarii. Nojuajaari Judas Iscariote quiriquiaa, na nuhuaji Jesu quiatequiaari na paraani. Nojuajaari naa sequeree:

⁵ —¿Casaara cuno shanohua jaanutaja niquitioy aquishaaree queraatia cumaneecarani, casamijiuniucua pueya niquitiosocoriquianoni? ¡Jaara masenu panishaare, maara niquitiosaare juhua niquiriyatu marijara pueyano poonijionu sami!

⁶ Naa Judas sequencescaritij, majaari seetanujuanaa na taraajenu quiriquiaa casamijiuniucua pueyacua. Naa sequereeri saaja cumaneecaacua jiaatiaja na quiniucua, nohuasejojua na quishacari. Judasri cumaneeca quiqio cojuatana quijia puetunu canaarajanaa. Naacuajitij, nojuajaari tiji nohuasejojua, pueya niquitiosanojiniji canaara.

⁷ Jesuuri saaja Judas sequeree:

—Nareja quia niquiri. Nojuajaari nio shanohua jaanutaja cojuataja pueyaracaanu, juhuacarijia na jeenucuatajara cua cuaqueya, pueya niaaquishacarijia janiya raajinia, janiya jaara mosaren.

⁸ Casamijiuniucua pueyari pueyaracaanu niaata quiriquiano cutara. Saniniujia, janiyari maja pueyaracaanu niaata quiriquianoni.

Pueyacuara secojonaa jiyaniijianucua roojotoosacari Lázaroocuara

⁹ Queraatia canaa Judiocuacaari niishiquiaari Jesu Betania tiacajinia quiriquiaa. Cunora, nojoriiri nocua quiojoquiaari na niquinuucua, Lázaro niquiniuucuajuhua, teyano Jesu samitianiquiaaricuajani. ¹⁰⁻¹¹ Jesu samitianiniucua Lázaro, queraatia canaa Judiocuacaari Jesuucua tiuquiaari, na pueya nojori quiniuria. Cunora, canaa

pueyacuara secojonaa jiyaniijianucuaari roojotooquaari Lázaro na motunurajuhuaj.

*Juhua Jiyaniijajanaa Jesu tiuquishacari Jerusalén tiacajinia
(Mt 21.1-11; Mr 11.1-11; Lc 19.28-40)*

¹² Cuno queraatia pueya, tari Jerusalén tiacajinia quiriquiaacuaa Pascua juucara queranacunurani, nojoriiri niishiquiaari Jesu tariqui tiuquiniutianiyyahuaj. ¹³ Nocuaji, nojoriiri tucuru piyotaree. Na nuhuaji, niiyyareeri Jesu naacunuucua, na tucuru shiiniotanuuriquiaari. Naa nacooriquiaajaariuhua nojori shuquiritiasacari Jesu:

—¡Pocuaji Tacuna! ¡Pocuaji Tacuna! ¡Cuaara shuquiriaatia quiiria pa Jiyaniijia, teyano Pueyaso jiyaroquiaari pocuacuajani! ¡Nojuacuajaari Israel pueya Jiyaniijajanaa!

¹⁴ Jesuquiiri jiyacari burro niquiojua riuriatamaa. Tari na nijinia cajiriquiaari, taa tariucuacaanu Pueyaso Rupaajinia naajiotasano quiyacuajani. ¹⁵ Naa sequeyari:

“¡Sión tuhuananuucua quiniaa pueyanaa, maja puerenu! ¡Nia niquiri!
¡Nia Jiyaniijia cumaji niya niaacua! ¡Burro niquiojua nijinia cajiyari!”

¹⁶ Jiyacaritij, majaari canaa niishiniu quiriquiaa naa canaa tiuquitishacari canaa Jiyaniijia Jesutej, canaari nio tariucuacaanu Pueyaso Rupaajinia naajiotasano tohuateeriquiaani. Pueyaso jaara Jesu samiitianiquiaariuhua, canaari jiyacari shusha niishiquiaarini cuno naajiotasanoquiiri Jesujiniji quiquiaari.

¹⁷ Cuno pueya, Jesu samiitianishacari Lázaro niquiquiaarini, nojoriiri pueya pohuatariquiaa taa Jesu jiiquiooquiaari Lázaro na raacoji na tohuatanurani. ¹⁸ Queraatia pueya niishishacari naa Jesu miishano na cumaacatatej, nojoriiri Jesu naacunuucua niiyyaree. ¹⁹ Nocuaji, Fariseocuacaari tama sequetooriquiaaja:

—¡Canaacuajaari cunora nia sequequiaani pa morejanaa! ¿Niaate na niquiya? ¡Puetunu pueyajanaari cuno pueyanoocua pacuree, na pueya nojori quiniuria!

Grecia jiyajinjinio taucuaca pocoojonu panishacari Jesuta

²⁰ Grecia jiyajinjinio taucuacaari Jerusalén tiacajiniara nijioquiaari-juuhuaj Pueyaso niquiara nojori queranacunuunura Pascuara. ²¹ Cuno pojoriiri canaa cojinia Felipeecua catecanoquiaari. Felipeeri Betsaida tiacajinjinio quiquiaari. Cunoori Galilea jiyajinia tiaca. Cuno Griego-huari Felipe sequeturee:

—Pueyanonaa, canaa quia Jiyaniijia Jesuta pocoojonu paniyani.

²² Jiyacaritij, Felipeeri Andrés sequesee cuno pojori sequesano nojuaja. Na nuhuaji, Andrésri Felipeta quiaaree Jesuucua. Nojoriiri Jesu pohuataseejuhuaj. ²³ Jesuuri naa nojori riucuaree:

—Quiarijiani, tama janiyajaarijia mosaanutaniya pueya nitini. ²⁴ Seetanujuanaa nia sequeyanijia, sohuajajau jaara raama jataaquishaare, pueyaracaanu niquijajau quiniutianiyyari. Saniniuujia, jaara natasaare juhua na moquenura, saaja moritianutaniyyari queraatia na muetunura. ²⁵ Naajuhuaj, cante tama na cuaqueyajaaja panijia puerani, nojuajaari puetunu shaajenutaniyyajanaa. Saniniuujia, cante tama na cuaqueyajaaja panitija na tojiniuria janiya mijiriani,

nojuajaari pueyaracaanu shuquiriaatia rishijiara jiyatesaanutaniya.
²⁶ Cante quiria poonijionu paniyani, cuaara seetanujuanaa cua tojija quiria. Tee cua quiniutianiyyacuaani, cua tojitiajacaari tii quiniutianiyyajuhuaj. Cua Queeri cua tojijiaca timitianutaniya. Jiyanoehua maninia nojori miiniutianiyyaariuhuaj!

Jesu pohuatasacari nojuaja mosaanutaniya

²⁷ 'Quiarijiani, janiyari jiyanoehua tacayani. ¿Casaa cua sequeyarini? Janiyate sequeya soj: "Cua Quenaa, maja naquiya cua miitiniu"? Maja. Maja naa cua sequenu quiniutianiya. Janiyacuajaari cunora niquiaari mijiriani. ²⁸ ¡Cua Quenaa, janiya cuaara miishiiriaqui taa quia paniyacuajani, pueya niishiniuria quiaari jiyanoehua maninia!

Jiyacaritij, Pueyasoori tojishaaree pocuaano jiyocuacaanuji. Naa Neyanu sequereeri:

—Janiyacuajaari naa niishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuara mosaare.

²⁹ Cuno pueya, canaata tii quiriquiaa Jesutani, nojori tojishacari Pueyaso pocuaano, nojoriiri sequeturee:

—¡Miacanacuaja cuno tojishaareeni!

Tamasacaari saniniuuja sequereecujua:

—¡Pueyaso serucuaja nocua pocuareeno!

³⁰ Saniniuuja, Jesuuri canaa sequeree:

—Cuno rupaa niaa na tojiriini, majaari quiria na quiniu quiriquiaa. Cunoori nia tojishocoriquiano quiriquiaa, nia niishiniuria cua Queeri cua tojiquiaa cua secojosacari nojuaja. ³¹ Quiarijiani, mijiria quiniae miishacari naquiya janiya, nojoriiri saniniuuja saniitiosocoriquiano jiyatesaaree tari. Naajuhuaj, mijiria jiyaniijia Sesaacaari jatasanutanijayajuhuaj, maja cumaacaraca na quiniuria socua. ³² Janiya jaara nujuaretasaareni, janiyari puetunu pueyapuejanaa nijotenutaniya cucuani. Nojoriiri juhua jaatiasaanutaniya cucua, cucua nojori tiuuniuria, nojori ruuretanura janiya soj.

³³ Naa Jesu sequencesacaritij, canaa niishitiriiri taa pueya monutaniya nojuajani. ³⁴ Tii quiniae pueyari na riucuaree:

—Canaacuajaari tariucuacaanu Pueyaso Rupaajiniji niishiyani, Pueyaso Jiyarosocoriquiano Cristoori pueyaracaanu rishiriquiano cutara. Quiajaniyarijijataj, ¿casaara quia sequeyarinijia, Pueyaso Jiyarosanoori nujuaretasaanutaniya tii na cusionura? ¿Canteeri cuno pueyanoni, quiaa na sequeya Pueyaso Jiyarosanoni?

³⁵ Jesuuri nojori sequeree saaja:

—Janiya, nioojia cuhuatanani, janiyari niaata quiniutianiyyaara ru-paquieriani. Nocua nia tiuuri juhuacarrijia, ninishiqui quiyaquishacarrijia. Cante ninishiqui rucuanejojuani, nojuajaari maja na niishiniu tee na quiaani. ³⁶ Nioojia cuhuatanaacua nia tiuuri, niaata cua quishacarrijia, seetanujuanaa cuhuashiqui quiyilaca nia quiniuria.

Naa Jesu sequenu nuhuaji cuno pojoritij, quiacuhuari. Nojoriicuaji jamaashiiri.

Judiocuaca tiuyaquishacari Jesuucua

³⁷ Jesuuri jiyanoehua queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiaari.

³⁸ Naacuajitij, tariucuacaanu Pueyaso sequenu panishano caminiujunia Isaías pohuatasanoori tohuateequiaari, nojuaja jaara naa sequequiaari:

“Jiyaniijianaa, ¿cante canaa pohuatasanoocua tiuriini, canaa pohuatasacari quia Jiyarosocoriquianojinijini? ¡Shaaqui! ¿Cante ni shirijiaaniuhuaj, jiyajeneta casaa nojori niquishanoori seetanujuanaa quia cumaacata miishano quiriquiaa? ¡Shaaqui!”

³⁹ Naacuajitij, majaari nojori naata tiuniu quiquiaari Jesuucua. Isaíasri naa naajotaquiaarijuhuaj:

⁴⁰ “Pueyasoori nojori jiyateree juhua nimishitiuria, maja nojori niquinuria na namijiata. Nojori niishitiaja cushimaoreejaariuhuaj, maja nojori niishiniuria nojori jiuujiata. Naa nojori miiriiri maja nojori tacatonura nojori jiuuji, cua jiyanooniuria nojori, quiarinio pueyara cua jataniyaquinuria nojorijuhuaj”.

⁴¹ Supuetana Isaíasri naa caminiujuquiaari Pueyaso niishitishano nojuajatej, Jesu na niquiniiuucua na shacantuua cumaacajinia quiyano. Naa na pohuatasacaritij, nojuajaari juhuacarijia Jesujiniji pohuatariquiaa.

⁴² Naajaa, queraatia narta Judiocuacaari Jesuucua tiuquiaari. Querataatia canaa jiyaniijianucuaari nocua tiuquiaarijuhuaj. Cuno jiyaniijianucuaari maja na pohuatanu quijia pueya niquiara, Jesuucua tiujiaca nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujureeri maja socua nojori tiuquitianura Pueyaso secojojua tiacajinia. ⁴³ Nojoriiri saaja narta pueya shuquiritiasano pueya quiniu panijia, maja Pueyaso shuquiritisano cutara.

Pueya tojitia aquiniuuucua Jesu sequenceso, nojoriiri saniitiosaa riquiano

⁴⁴ Jesuuri jiyano hua na rupaa paaretaree. Naa sequereeri:

—¡Cante cucua tiuriini, majaari saaja na tiuuniu cucua! ¡Cua Queecua tiurijiaariuhuaj, cante cua jiyaroquiaaricuajani! ⁴⁵ ¡Cante cua niquiriini, nojuajaari cua Jiyarona niquirijjuhuaj! ⁴⁶ Janiyari mijiria niquiaarini cua cuhuatanura niajaniya. Naacuajitij, cante cucua tiuriini, majaari tari na quiniu ninishi qui. ⁴⁷ Pueyano jaara cua rupaa tojiriquia najuhuanaj, janiyajanaari maja nocuara cua saquiriojotana quiniutianiya na saniitiosaanura. Majaari cua niniu quiquiaari mijiria, pueya cua saniitionura. Janiya cutaraari niquiaarini nojoriicuaji cua tacunura. ⁴⁸ Cante cua ruuretaja saajani, cua sequenceso tojijaquiajia jaariuhuaj, nojuajaari tari nocuara saquiriojotana jiitiae na saniitiosaanura. Nojoriria cua sequenceso cutaraari tama nojoriicuara saquiriojotariquianojuaaja nio jiya puequesacari. ⁴⁹ Cua pohuatasanoori maja tama cua niishishanojuaaja. Cua Jiyarona cua Quecuajaari cua niishitiquiaa casaa cua sequenutaniyani, mariyata casaa cua niishitiojonutaniyani. ⁵⁰ Janiyari niishiyani cante cua Que rupaa tojijiani, nojuajaari pueyaracaanu quijia quiniutianiya cutara. Naaratej, janiyari setanujuanaa saaja na sequenceso caminiujuquiaani, taa na niishitiquiaa janiyacuajani.

13

Jesu jeequejosacari na saquiriojosano pueya niohuaca

¹ Jesuuri canaa na saquiriojosano pueyata rerejoquiaari Pascuaacuara juucajinia. Jesuuri jiyacari niishiquiaari tari quiquiaarii quera na tiujiasacari canaa mijiria, na Queecua na tacanuhuara. Nojuajaari canaa paniriquiaajaa, taa canaa na paniquiaari pueyaracaanucuajani, mijiria na quishacari canaata.

² Cuno niucuaja, Jesuuri canaa na saquiriojosano pueyata miaque-riquia. Sesaacaari tari Judas Iscariote niishitirii noojajinia, nojuaja cuaara Jesu quiateera na paraa, na mosaanura. Cuno Judasri tamonu Simón jiyanishano pueyano niyanu quiquiaari. ³ Jesuuri niishijia nojuaja seetanujuanaa Pueyasojiniji niquiaari. Naajuhuaj, nojuajaari niishiquiaari, na Que Pueyasoori na jiyatequaari Jiyaniijiarajanaa, puetunu casaa jiitianajanaa na quiniuria. Niishiriquiaajaariuhua nojuajaari quera na Queecua tacanutaniuhua. ⁴ Jiyaniijajanaa na quishacari, naajaa, nojuajaari miaquejajiniji sanequiaari. Na tucuaque toque jocuareeri. Na nuhuaji na cajiniocua camarucuteree cuaqueya tuujutajaari. ⁵ Na nuhuaji, mohuaca shuurii tohuatashijiniaari. Canaa niohuaca jeequejoriquiaari juhua tiaco seru. Na nuhuaji, na sacuanijiariquiaajaariuhua na cajiniocua na camarucutesano cuaqueya tuujutajata.

⁶ Na jeequenu panishacari Simón Pedro niohuaca, Pedroori saaja Jesu sequeree:

—Jiyaniijajanaa, ¿taa quia miyani? ¿Quiaateeri cua niohuaca jeequenu-taniya?

⁷ Jesuuri Pedro riucuaree:

—Quiarijiani, majaari quia niishiniu casaara naa cua miyani. Naajaa, quiaacuaja na nuhuaji niishiniutaniya.

⁸ Pedroori Jesu sequeree:

—¡Cua Jiyaniijajanaa, janiya cutaraari maja quenaaja cua shanacunu quiniutaniya cucua quiajaniya, cua niohuaca quia jeequenura!

Jesuuri na riucuaree:

—Janiya jaara quia niohuaca jeequejiyquirini, majaari cua pueyano quia quiniu quiniutaniya.

⁹ Simón Pedroori na sequeree:

—¡Jaara naa quiriti Jiyaniijajanaa, maja saaja cua niohuaca jeequenu-cuarajaj! ¡Quia jeequerejuhua cua juaashiquiaca, cua nacanio!

¹⁰ Jesuuri na sequeree:

—Cante shusha nanajani, saaja na niohuacaari jeequeshiya cutara. Na cuaqueyacuajaari tariucua jeequesano quiya. Puetunu niajaniyajanaari tari jeequejosano quiyacuaja. Saa niquiriyatujuari jeequesoo quiya saniniuujia.

¹¹ Jesuuri tari niishiquiaari cante na quiatenutaniya na paraani. Nocuaji queriquiaari: “Niquiriyatu pueyanoori jeequesoo quiya cu-tara”.

¹² Canaa niohuaca na jeequejonu nuhuaji, Jesuuri na toque cushirio-hua. Miaquejajinia cajiriohuari. Canaa nequesotareeri:

—¿Niaate niishiya casaara naa cua jeequejoree nia niohuacani?

¹³ Niaacuajaari cua sequequiaa “Niishitiojonata”, nia “Jiyaniijiatanio”. Seetanujuanaa nojuacuajanijia, taa nia jiyaniquipuiaa janiyacuajani.

¹⁴ Naaratej, janiya jaara jeequejoree nia niohuacaculaani, nia Jiyani-ijia cua quishacari, nia Niishitiojonajuhuaj, naa nia miiriquia niarta Pueyas muerasujuhuaj. ¹⁵ Janiyari naa miiriini, cua niishitiojonura

niajaniya, naa nia miitioonurajuhuaj taa cua miirii niajaniyacuaani. ¹⁶ Seetanujuanaa nia sequeyanijia, seruuri maja socua tojishano quijia na camarnujiniji. Naajuhuaj, jiyarosano pueyanoori maja socua tojis-hano quijia na jiyaronajiniji. ¹⁷ Niaa jaara cua rootasano niishiri, niaari shuquiriaatia quijiaca quiniutianiya niaa jaara na tojijiaca quiri.

¹⁸ 'Shusha cua sequesano niajaniyani, cunoori maja puetunu nia-janiyaranojuanaa. Janiyacuajaari niishiyani canapue cua saquiriojo-quiaarini, taamueca pueyate niajaniyani. Naacuajitij, tariucuacaanu Pueyaso Rupaajinija janijayjiniji naajiotasanoori tohuatenutaniya. Naa sequeyari:

"Tama cuata miaquenajaarija cua paracara quirii".

¹⁹ Janiyari juhuacarija nia toyani. Naacuajitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Niyanuni. ²⁰ Seetanujuanaa nia sequeyanijia, cante cua jiyaramiquis-hano pueya tojijiani, nojuajaari cua tojiyajuhuaj. Cante cua tojijiara quiriini, nojuajaari cua Jiyarona tojijiara quirijiujuhauj.

Jesu pohuatasacari, Judascuajaari na paraa na quiateriquiano

(Mt 26.20-25; Mr 14.17-21; Lc 22.21-23)

²¹ Naa Jesu sequenu nuhuaji canaatej, jiyahohua na taraajenuta naa canaa sequeree:

—Seetanujuanaa nia sequeyanijia, niquiriyatu niajaniyajinijiniori cua paraa cua quiatenutaniya.

²² Canaari jiyacari tama niquitiooreejaanijia. Majaari canaa niishiniu quiriquiaa canajiniji naa Jesu sequeriquiaani. ²³ Jiyacaritij, janiyari na shuriucuaji cajiriquiaa miaquenuujuajiniani, na panishano pueyano cua quiniucua. ²⁴ Naaratej, Simón Pedroori cua mashiniquirii sanaa cua nequesotanura Jesu, canajiniji naa na sequereeni. ²⁵ Naarate janiyari Jesuucua tatereeni, jiyasohuaja cua nequesotanura nojuaja. Janiyari naa na sasacareeni:

—Jiyaniijiana, ¿canteeri naa quia miiniutianiyani?

²⁶ Jesuuri cua riucuaree:

—Janiyari pan rau piquiojonutaniya caacajiniani. Cana cua niqui-tionutaniyani, nojuajaari cuno.

Jesuuri jiyacari pan rau piquiojoree. Judas Iscariote na niquitioreeri. Nojuajaari tamonu Simón jiyahishano niyanu. ²⁷ Judas masesacari cuno pan rau, Satanásri noojiajinia tiuquiquii. Jesuuri jiyacari Judas sequeree:

—Cuno, quiaa na niishiriojiya miiniuni, quiocua ritia miirinioj.

²⁸ Canaa na saquiriojosano pueya nata miaquenuuuriquiaani, majaari quenaaja canaa niishiniu quiriquiaa casaara naa Jesu sequerree Judasni.

²⁹ Judasri canaa cumaneeca cojuatana quijia. Naaratej, noojiaqueya canaajinijiniori jiyaririquiaani Jesu naasucua na jiyaroriquiaa socua casaa na masenura canaa queranacunuutajara, casamijijiuniucua na niquitiojonura cumaneeca soj. ³⁰ Judas jaara masequiaari Jesu niqu-tiosano pan, jiyacari tohuataqueeri. Tariucua niucuaari quiriquiaa.

Jesu rootasano quiarinio

³¹ Judas tohuatanu nuhuaji, Jesuuri canaa sequeree:

—Quiarijia cua miishanojiniji, janiyari maninihuaqueetasaanu-taniyani. Pueyasoori jiyahohua maninihuaqueetasaanutaniyajuhuaj,

naa cua miishanojiniji. ³² Pueyaso jaara maniniuhuaqueetasaare naa maninia cua miiniuuucuatej, nojuajaari cua jiyatenutaniya cumaacaraca quijia cua quiniuria na shuriucua. Quera naa cua miiniutiani-yari. ³³ Quiquiohuanijojuanaa, janiya rupaquijia niaata quiniutiani-jaarani. Taa cua sequecanu parta Judiocuacacuaani, janiyari naa nia sequeyajaaniuhuaj. Niaari cua pajenuunutaniya juucua. Majaari nia naata quianu quiniutianiya cucua, tee cua quianutaniyacuaani. ³⁴ Quiarijia nia niishitiriiria nio quiarinio rootasano. Nia tojiri. ¡Panitioojuaca nia quiri! Naatej, taa cua paniquiaacuua niajaniyani, naa nia panitioorejuhuaj. ³⁵ Niaa jaara naa panitioojuaca quiri, puetunu Pueyaso niishiyashijiaca pueyajanaari naacuaji niishiniutianiya, niaari cua tojitajaca puey.

*Jesu poahuatasacari Pedro nocuaji seetanutaniya
(Mt 26.31-35; Mr 14.27-31; Lc 22.31-34)*

³⁶ Simón Pedroori jiyacari Jesu nequesotaree:
—Jiyanjijanaa, ¿tee quia quianutaniyani?
Jesuuri na riucuaree:
—Tee cua quianutaniyacuaani, majaari quia naata nuhuajiniu janiya.
Naajaa, quiaari na nuhuaji quiariquiano.

³⁷ Pedroori na sequeree:
—Jiyanjijanaa, ¿casaara quia sequeyarini, quiarijia cutara maja cua naata quianu quiata? Janiyacuaja tama cua cuaqueyajaaja tarinijiotaaree quiocuarani.

³⁸ Jesuuri na riucuaree:
—¿Naatee? ¿Quiaate tama quia cuaqueyajaaja tarinijiotaaree cu-
cuara? Janiyari seetanujuanaa quia sequeyani: juhuauqueno pan-
ishacari caacaraja niunijiyaquishacarijia, quiaari jiyacari cucuaji see-
tanu pacutejonutaniya tari.

14

Jesuuri juhua nuu Pueyasoocua

¹ Jesuuri naa canaa sequeree socua:
—Maja nia tacaaniu, pueyanaa. Nioojia nia cajitiri. Saaja Pueya-
soocua nia tiuuri. Cucua nia tiuurijiuhuaj. ² Cua Que tiaari puereetuua. Queraatia quiquoori tii quiya. Cunora, janiyari coteenu nia puetanu-
taniyani, niaacuaji cua jeenucuanura nia quiijara. Jaara naa quiyaquir-
itij, janiya maara nia sequeyaquirini janiya nia puetanutaniyani, ni-
acuaji cua jeenucuanura. ³ Cua jeenucuanu nuhuaji nia quiqiora,
janiyari niaacua tacatenutaniuhuani, cua rijionuhuara niajaniya, cuata
nia quiniuriajuhuaj tee cua quiniutaniyacuaani. ⁴ Niaacuajaari cua
quiquojiniara neteja nuu niishiya, tee cua quianutaniyacuaani.

⁵ Tomásri Jesu sequeree:
—Jiyanjijanaa, ¡maja canaa niishiniu quenaaja tee quia quiaani!
¿Canaatucua taa cuno nuu niishirini, quiaaa na sequeyani?

⁶ Jesuuri na riucuaree:
—Janiyacuajaari cuno nuuni, Pueyasoocua nia quianura. Janiyacu-
jaari seetanujuanaa Pueyaso Rupaani. Janiyari pueya samiitianiji-
juhuaj. Majaari pueya naata Pueyaso rupuenu tamajaa. Saaja janiya
cutaraari pueya rupueteja Pueyasoni, nojori tiuuushacari cucua. ⁷ Niaa

jaara seetanujuanaa cua niishiquiaaricuua, niaa maara cua Que niishirijuhuaj. Seetanujuanaa, niaari tari na niishiyacuaja. Niaari na niquiquiaajuhuaj.

⁸Felipeeri na sequeree:

—Jiyaniijianaa, quiaa jaara canaa niquitiri quia Que Pueyaso, canacaucua panaatia quiriohuani.

⁹Jesuuri Felipe riucuaree:

—Felipenaa, janiyacuajaruhua pueyaracaanu niaata quiquiaa juucuani. ¿Majateeri juhuanojuaja quia niishiniu janiya? Cante cua niquiquiaani, cua Que niquiquiaajaariuhuaj. ¿Casaara quia sequeya cua niquitiniuria cua Que niajaniyarin? ¹⁰¿Majateeri quia tiuuniu cucua cua sequencesacari quiajaniya, janiyari cua Que jiuujiajinia quiyani, cua Queeri saniniuuja coojiajinia quiyacuaja? Canaari maja rimiajatani. Nio, cua sequencesano niajaniyani, cunoori maja tama cua niishishanajuaja. Cua Que, coojiajinia quiyani, nojuajaari na panishano miitiquiaa janiya. ¹¹Cucua nia tiuuri cua sequencesacari niajaniya, janiyari cua Que jiuujiajinia quiyani, cua Queeri saniniuuja coojiajinia quiyacuaja. Niaa jaara cua sequencesanoocua tiuuniu paniyaquiri, cucua nia tiuuri qui na cumaacata cua miiniuucua nia niquiara. ¹²Seetanujuanaa nia sequeyanijia, cante cucua tiuujiani, nojuajaari puetunu cua miishanajuanaa miiniutianiyajuhuaj. Cua tacasacariuhua cua Que shuriucua cua quiniuhuara, cucua tiuuijacaari cua cumaacata seetanujuanaa socua jiyajeneta casaa miiniutaniya cua miishanojiniji. ¹³Seetanujuanaa nioojiajinia cua quishacari, janiyari niaara miiniutianiyani puetunu nia masesanojuanaa nia secojosacari cua Que. Naacuajitij, pueyari cua Que timitianutaniya, nojori niishishacari cua Queeri jiyanolhua maninia mijia. ¹⁴Nioojia rupuetoosacari coojiata, janiyari puetunu nia masesanojuanaa miiniutaniya niaarani.

Jesu sequencesacari, nojuaja Pueyaso Sohuanu jiyaronutaniya mijiria

¹⁵'Niaa jaara seetanujuanaa cua panijiaca quiri, niaari cua rootasano tojitiajaca quiniutaniya. ¹⁶Naajuhuaj janiyari cua Que secojonutaniyani, niaacua na jiyaronura tamonu cua niti mijiria, nia cumaquiriquiano. Nojuajaari pueyaracaanu niaata quiriquiano. ¹⁷Nojuajaari Pueyaso Sohuanu, seetanu rupaa jiiitanajanaa. Pueyaso tojiyashijiaca pueyari maja na naata cuno Sohuanu na jiiitanu, nojori niquiyaquiniuucua nojuaja, na niishitiuyaquiniuucua nojuahuaj. Niaa cutaraari na niishijiaca. Nojuajaari niaata quiyacuaja. ¡Pueyaracaanu nioojiajinia quiriquianojaariuhuaj!

¹⁸Majaari seetanujuanaa cua tiujianu quiniutaniya niajaniya juhua japueyojuaca nia quiniuria. Janiyacuajaari tacatenutaniuhuani niaata cua quiniuhuara. ¹⁹Pueyaso tojitiaashijiaca pueyari quiari naataja cua niquiyaquiniutaniya socua. Niaa cutaraari cua niquijiaca quiniutaniya. Samiittianijiojua cua quiniuucua, niaari pueyaracaanu quiijiaca quiniutaniyajuhuaj. ²⁰Jiyacaritij, niaari niishiniutaniya janiyari cua Que jiuujia rupuejani, niaari coojia rupuejacahuaj. Janiyari saniniuuja nioojiajinia quiijani. ²¹Cante cua rootasano niishijiani, nojuaja jaara na tojija quirijuahuaj, nojuajaari cua panijia cutara. Cante cua panijiani, cua Queeri na panijia quiniutaniyajuhuaj. Janiyari na panijia quiniutaniyajuhuaj. Janiyari cua panijiaacua niniutaniyani, seetanujuanaa na niishiniuria janiyari nata quiyani.

²² Canaa cojinia Judasni, nooj, Judas Iscariote sesaanucuatej, nojujaari Jesu nequesotaree:

—Jiyaniijianaa, ¿casaara saaja canaacua quia niniutaniyarini, maja puetunu mijiria quiniaa pueyacuajanaa?

²³ Jesuuri na riucuaree:

—Cante cua panijiani, cua rootasano tojijijaariuhuaj. Cua Queeri jiyano pueyano panijia. Naaratej, canaari nocua niniutaniyani, noojiajinia canaa quiniuria, canaa quiquirora canaa jiyatenura nojuaja.

²⁴ Saniniujujia, cante cua paniyaquijiani, jiyano pueyari cua rootasano tojiyashijiacahuaj. Puetunu cua rootasanojuanaa, niaa na tojiquiaani, cunoori maja tama cua niishishanojuaja. Cunoori cua Que niishitishano janiya, cante mijiria cua jiyaroquiaaricuajani.

²⁵ Janiyari puetunu niojuanaa nia pohuataani, niaata cua quishacarijia mijiria. ²⁶ Cua Que jiyarosocoriquiano na Sohuanuuri nia cumaquiriquiano. Nojuajaari nia niishitionuonutaniya puetunu cua niishitionu panishanojuanaa niajaniya. Naajuhuaj, nojuajaari nia niishitiniutianiuhua puetunu tari cua pohuatasano niajaniyajanaa.

²⁷ Janiyari nioojia cajitiniutaniyani. Janiyari coojia nianutaniya nioojiajiniani, juhuajaniya quiqiaca nia quiniuria taa cua quiyacuani. Naacuajitij, niaari seetanujuanaa juhuajaniya quiniutaniya. Mijiria quiniaa pueyari maja na niishiniu cumanijianu juhua janiya. Naaratej, maja nia tacaaniu. Majaari puerenujuhuaj. ²⁸ Tari nia sequereecuajanijia: “Janiya quera quiohuani. Janiyari na nuhuaji tacatenutaniuhuani niaata cua quiniuria”. Niaa jaara seetanujuanaa cua panijiacu quiriquia, niaa maara shuquiriri nia niishishacari janiyari cua Queecua quiohuani. Nojuajaari seetanu Jiyaniijajanaa cutara janiyajiniji. ²⁹ Janiyacuajaari juhuacarijia nio nia sequeyani. Naacuajitij, niaa jaara niquiri tohuatayano cua seqesano niajaniya, niaari niishiniutaniya puetunu cua pohuatasanojuanaari seetanujuanaa.

³⁰ Majaari puera cua pocoojonu quiniutaniya niaata tari. Cua Paraca cucua quenaacoya tarini, na miiniuria janiya taa na paniyacuajani. Nojuajaari Pueyaso tojitiaashijaca jiyaniijia. Pueyaracaanu cua Que Pueyaso tojijia cua quiniuucua, cua Paraca maara naquiya cua miyaquiri janiya jaara cucua na shanacuyaquirini. Na cumaacaari maja na shocotanu cua cumaaca cutara. ³¹ Naajaa, na miishanojiniji janiya, puetunu pueyajanaari niishiniutaniya, janiyari puetunu cua Que seqesanojuanaa tojijiani, na panijia cua quiniuucua.

’Nia sanetare. Niiquiji pa quiaare.

15

Jesu pueyari juhua Jesu cashacucua, Jesu quishacari juhua neyona

¹ Jesuuri naa pohuataquiaari socua canaa niquiri:

—Janiyari juhua uva jiyonani, cua Que natau. ² Cua pueyari juhua cua cashacucua. Tamonu cua cashacucuajinijnio jaara muetuyashijia quiri, cua Queeri na piyotaja. Teyano cua cashacucuajinijnio muetujua saniniunijia, cua Queeri na nacareetaja, socua queraatia na muetunura.

³ Nia tojiniuucua cua rootasano, niaari tari juhua nacareetasano quiya.

⁴ Pueyaracaanu coojia nia rupuere, taa cua rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaj

piyotasaare, majaari na naata metutunu tari. Naajuhuaj, majaari nia naata metutuju quiniu, niaa jaara coojia rupueyashijiaca quiri.

⁵ Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya niajaniyacuaani, naacuajitij, niaari juhua queraatia metutujuaca quiniutianiya. Cucuaji rupatejacaari maja na naata casaa miiniu janiyaju. ⁶ Cante cua rupueyashijiani, nojujaari taraatia miishaanutaniya juhua uva cashacucua piyotasano neyonjiniji, tamocora jaqueroootasano. Jaara sorere, tatuscuasaarohuari manijinlia quejoosocoriquiano. Tii cateyari.

⁷ Niaa jaara coojia rupuejaca quiri, niaa jaara cua rootasano tojijiaca quirijuuhuaj, puetunu nia panishanoocuarajanaa nia secojore Pueyaso. Nojuacuajaari nia masesano miiniutianiya. ⁸ Naa cua Que miishacari nia panishanotej, niaari juhua queraatia metutujuaca quiniutianiya. Naacuajitij, cua Queeri jiyanoohua timitasaanutaniya. Naacuajitij, niishishaanutaniyajaaariuhua niaari cua tojitiajaca pueyanijoju.

⁹ Janiyari nia panijiani, taa cua Que paniya janiyaculaani. Coojia rupuejaca nia quiri pueyaracaanu, cua panishano pueya nia quiniuria.

¹⁰ Janiyari cua Que panishanon, pueyaracaanu cua miiniuucua na panishano. Naajuhuaj, niaa jaara cua rootasano tojijiaca quiriquia, niaari pueyaracaanu cua panishano pueya quiniutianiya juhuaj.

¹¹ Janiyari naa nia sequeyani, shuquiriaatia quijiaca nia quiniuria, taa shuquiriaatia quijia cua quiyaculaani. Naacuajitij, niaari cutaraaru-cuajanaa shuquiriaatia quijiaca quiniutianiya. ¹² Cua tojiri. Nioori cua sequesano niaara: “Pueyaracaanu panitoojuaca nia quiriquia, taa cua paniya niajaniyaculaani!” ¹³ Cante tama na cuaqueyajaaja panitiaja na cusionura na rupuenaa nitini, naa miijia cutaraari seetanujuanaa jiyanoohua narta pueya panijia. ¹⁴ Niaa jaara cua sequesano miijiaca quiri, niaari cua rupuenaa. ¹⁵ Naacuajitij, majaari cua sequenu quiniutianiya tarì niajaniya cua seyata. Pueyano seruuri maja na niishiniu casaa poonijiosano na camarnu miiquiaaculaani. Janiyari quiarijia nia sequeya cua rupuenaatani, cua niishitiniuucua niajaniya puetunu cua Que sequesanojuanaa janiya. ¹⁶ Majaari nia saquiriojonu quiquiaari janiya. Janiya cutaraari nia saquiriojquiaarini cua jiyaramiquiniuria niajaniya, cua panishano nia miiniuria. Naa nia miishacari cua panishanotej, niaari juhua queraatia metutuju naana quiniutianiya. Puetunu nia miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhuanaj. Naaratej, cua Queeri puetunu nia masesanojuanaa nia niquitionutaniya seetanujuanaa coojia rupuejaca nioojia quishacari. ¹⁷ Janiyari cunora nia sequeyani: “Pueyaracaanu panitoojuaca nia quiri”.

Pueyaso niishiyashijiaca pueyari Pueyaso muerasu niquiniu paniyashijiaca

¹⁸ Pueyaso niishiyashijiaca jaara nia niquiniu paniyaquiriquia, majaari nia tacaaniu. Cuno pojoricuajaari naa cua niquitiuniu paniyaquijiacacuaa. ¹⁹ Niaa jaara Pueyaso muerasu quiyaquiriquia, Pueyaso niishiyashijiaca maara nia panijiac quiriquia, taa nojori paniquiaa narta Pueyaso niishiyashijiacacuaani. Niaari Pueyaso niishiyashijiaca quiquiaarijuuhuaj. Naajaa, janiyari nojori tajiniji nia saquiriojquiaarini, cua pueya nia quiniuria. Cunora, Pueyaso niishiyashijiacaari nia niquiniu paniyaquiquiaa, maja tarì nia quishacari juhua

nojori. ²⁰ Majaari nio cua sequesano nia niyajetanu: "Seruuri maja socua tojishano na camarnujiniji". Naaratej, Pueyaso niishiyashijiaca jaara naquiya cua miiquiaacuua, niaari naquiya miishaanutaniyajuhuaj. Naajuhuaj, nojori jaara cua rootasano tojiquiaacuua, nojoriiri nia rootasano tojijiaca quiniutianiyyajuhuaj. ²¹ Nojoriiri naa naquiya miiniutaniya niajaniyatej, cua pueya nia quiniuucua, nojori niishiyaquishacari cua Jiyarona.

²² 'Janiya jaara niyaquiquiaari nojori cua pohuatanura Pueyaso ru paani, nojoriicuara maara saquirijojotaaquishaare, sesa nojori miishanoiniji. Nojori niquiara cua pohuatanuucua Pueyaso rupaa, majaari nojori naata sequenu quiniutianiya: "Cua jiyanoori. Maja cua niishiniu quiquiaari quia rootasano". ²³ Cante cua niquiniu paniyashijiani, nojoriiri cua Que niquiniu paniyashijiajuhuaj. ²⁴ Sesa nojori miishano maara nojoriicuara saquirijojotaaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta casaa miijioquiaari cua cumaacata nojori niquiarani, socua tamasaca miishanoiniji. Naajaa, naa nojori niquishacari cua cumaacata cua miishanotej, nojoriiri saaja cua niquitiuniu paniyaquijiac, cua Que niquitiuniu paniyaquijiacajaariuhuaj. ²⁵ Naajaa, naa nojori miiniuucua janiyatej, tariucuacaanu Pueyaso Rupaajinia naajiotasano janiyajinijiiri tari tohu ateeree. Naa sequeyari:

"Janiyari najuhuana niquiniu paniyaquishiyani".

²⁶ 'Janiya jaara cua Que shuriucua quishuhuani, janiyari tiji Pueyaso Sohuanu jiyaronutaniya mijiriani. Nojuajaari seetanu rupaajanaa jiitaja. Nojuajaari janiyajiniji niishitiniutianiya pueya. ²⁷ Niaari janiyajiniji pohuatanutaniya pueyajuhuaj, pueyaracaanu cuata nia quiniuucua shushajanaa cua coteesacari pohuatanu Pueyaso rupaa.

16

¹ 'Janiyari naa nia numooteyanu maja nia tarinitianura cucua tiuuniu niaa jaara naquiya miishaare. ² Cua pueya nia quiniuucua, majaari nia shanacusaanu quiniutianiya nia tiuquitianura Pueyaso secojojua tiacajinu. Pueya jaara nia puecoorejuhuaj cua tojitiajaca nia quiniuucua, nojoriiri jiyaniutianiya nojori maninia miya Pueyasora, naa nojori miishacari. ³ Nojoriiri naa miiniutaniya niajaniyatej, nojori niishiyaquiniuucua janiya, cua Quejuhuaj. ⁴ Janiyacuajaari juhuacaricia naa nia sequeyani. Naacuajitij, niaa jaara naquiya miishaare, niocua jiyacari niishiri janiyacuajaari tari naa nia sequequiaarini. Majaari quenaaja nio cua sequenu quijia niajaniya, pueyaracaanu niaata cua quiniuucua.

Pueyaso Sohuanu miishanojiniji pohuatasano

⁵ 'Quiarijiani, janiyari cua Jiyaronaacua quiohuani. Quiarijiani, majaari quenaaja niajaniyajinjinio nequesotanu janiya: "¿Tee quia quiohuarin?" ⁶ Janiya jaara nia sequereeni janiya quianutaniuhuani, niaari saaja taraajequee. ⁷ Seetanujuanaa nia sequeyanijia, socua maninia quiniutianiya niaaraari, janiya jaara quiaarohuani. Janiya jaara quiaaquiyarohuani, majaari Pueyaso Sohuanu niniu quiniutianiya niaacua, na cumaquinuria niajaniya. Janiya jaara quiaarohua cutarani, janiyari niaacua na jiyaronutaniyani. ⁸ Mijiria na tiuquishacari,

nojuajaari pueya jiuujiajinia poonijionutaniya, nojori na niishitiniuria nojoriiri seetanujuanaa sesa mijiaca. Nojori niishitiniutianiya jaariuhua nojoriiri na naata sesa miyashijiacara jiyatesaanu. Naajuhuaj, nojori niishitiniutianiyyari Pueyasoori na naata jiyanooni nojori, majaa Sesaacata nojori cojiritiasaanur mani quiquojinia quejoonu.⁹ Seetanujuanaa, Pueyasora, nojoriiri sesa mijiaca nojori tiuyaquiniuucua cucua. ¹⁰ Jiyocuacaanu cua tacasacariuhua cua Queecua, majaaari socua nia niquinii quiniutianiya janiya. Naacuajitij, Pueyaso Sohuanuuri pueya niishitiniutianiya, janiyari seetanujuanaa cua Que Pueyaso jiyanoootijia cucua tiuuriquiano pueyani. ¹¹ Cua shocotasacari Sesacaca, Pueyaso Sohuanuuri pueya niishitiniutianiya, nojoriiri sanitiosaanutaniya. Naacuajitij, nojori jiyaniijia Satanás jaara tari sanitiosocoriquiano quiyacuua, nojoriiri sanitiosaanutaniyajuhuaj, cucua nojori tiuyaquiniuucua.

¹² Janiyari queraatia jiitiaajaa cua pohuatanura niajaniyi. Naajaa, majaaari cua pohuatanu quiniutianiya quiarijia niajaniyi. Juhuanojuaja majaa nia naata na niishiniu. Pueraruhua. ¹³ Pueyaso Sohuanu tiuquishacari niaacula, nojuajaari nia niishitiniutianiya puetunujuanaa cutara. Nojuajaari seetanu rupaajanaa jiitiaja. Nojuajaari majaa tama na niishishanojuaja na niishitiniu quiniutianiya niajaniyi. Puetunu na tojishanojuanaa janiyajiniji, cuno nia niishitiniutianiya cutaraari. Nia niishitiniutianiyyajaa juhua taate nio pa quishacari nuhuaji quiniutianiyyi. ¹⁴ Niaari cua shuquiritanutaniya, nojuaja niishitiniuucua niajaniya janiyajiniji. ¹⁵ Puetunu cua Que jiitiasanojuanaani, cunoori cua casaajuhuaj. Naaratej, janiyari nia sequereeni, Pueyaso Sohuanuuri janiyajiniji masenutaniya cua jiitiasano niaara, na caminiujiuniuria niajaniyarajuhuaj.

¹⁶ Niaari saaja quiarijia cua niquiya. Na nuhuaji cutara, majaaari socua nia niquinii quiniutianiya janiya. Pasa naataja na nuhuaji, niaari cua niquiniiutianiuhuacuhuaj.

Nia tarabajenuuri jatanutaniya shuquiriaatia nia quiniuria

¹⁷ Jiyacaritij, noojiaqueya canaa na saquiriosano pueyajinjiniori tama nequesoreetooreejaaja:

—¿Casaa na sequenu paniyarini, nojuaja jaara sequere: “Niaari saaja quiarijia cua niquiya. Na nuhuaji cutara, majaaari socua nia niquinii quiniutianiya janiya”? ¿Casaa na sequenu paniyajaa raniuuhua na sequesacari: “Pasa naataja na nuhuaji niaari cua niquiniiutianiuhuacuhuaj”, na sequesacarijuuhuaj: “Cua Queecua quianutaniuhuani-jia”? ¹⁸ Naajuhuaj, ¿casaa na sequeyarini na sequesacari “quiarijiani”, mariyata “pasa naataja na nuhuaji”? ¡Majaari pa niishiniu casaaraqui na sequeyatejaj!

¹⁹ Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarijia cua niquiya, na nuhuaji cutara majaa socua nia niquinii quiniutianiya janiya. Pasa naataja na nuhuaji, niaari cua niquiniiutianiuhuacuhuaj”. ¿Niaatejara niojiniji nequesoreetoya tama niajaniyajaaaja? ²⁰ Seetanujuanaa nia sequeyanija, niaari nujuquenutaniya. Niaari taraajeconutaniyajuhuaj. Jiyacaritij, Pueyaso niishiyashijiacari taquiya shuquiriaatia quiniutianiyyacuua

niajaniyajiniji. Naajaa, cuno nia taraajenuuri jatanutaniya shuquiriaatia nia quiniuria. ²¹ Naajaariuhuaj, maaji ranu panishacari na mueya, jiyanohua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari. ²² Quiarijiani, niaari naa taraatia quiyajuhuaj. Naajaa, niaacua tacatenutaniuhuanijia. Niaari jiyanohua shuquiriniutianiya nia niquishacari janiya. Majaari quenaaja tamasaca pueya naata quiniutianiya cuno nia shuquiriniu jaariutianu.

²³ Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua Queeri nia niquitionutaniya puetunu nia masesanojuanaa nojuaja, seetanujuanaa coojia rupuejaca nioojia quishacari. ²⁴ Majaari juhuanojuaja nia secojonu Pueyaso see-tanujuanaa taa cua sequeyacuajani, seetanujuanaa coojia rupuejaca nioojia quishacari. Naa nia secojoretej. Niocua nia panishano niquitiosaare, seetanujuanaa shuquiriaatia nia quiniuria.

Jiyanijia Jesuuri Sesaaca shocotana

²⁵ 'Janiyari pueyaracaanu nia pohuataquiaa miriquini. Janiya quera nia pohuatanutaniya maatia seetanujuanaa cua Quejiniji cutarani. ²⁶ Jiyacaritij, niaari cua Que secojonutaniya coojia rupuesano nia quishacari. Jiyacaritij, majaari na panishaanu quiniutianiya cua shini-ijiuniuria cua Que, na tojiniuria niajaniya. ²⁷ Cua Quejanaacuaari nia panijia, nia paniniuucua janiya, nia niishiniuucuajuhuaj janiyari na jiyarosanoni. ²⁸ Niaacuajaari niishiya, janiyari cua Que shuriucuaji niquiaarini pueyanora cua quiniuria mijiria. Quiarijia saniniuuja, janiyari nio jiya tiujianutaniyani, cua Queecua cua quianuhuara.

²⁹ Naa Jesu sequesacari canaatej, canaari na sequereeni:

—Quiarijia cutara, quiaari maatijanaa sequeree, maja miriqui. ³⁰ Quiarijia cutara, canaari niishiyanu quiaari puetunu casaaajanaa niishijia. Majaari quenaaja na panishaanu pueya nequesoreenura quiajaniya. Naacuajitij, canaari niishiyanu, quiaacuajaqui Pueyaso Ji-yarosano.

³¹ Jesuuri canaa sequeree:

—¿Naatee? ¿Niaate shusha cucua tiuyaruhua? ³² Tari quenaacoyari naquiya cua miishaanura. Seetanujuanaa quiarijiaari. Niaari cucuaji cocuatasaanutaniya puetunujuanaa. Niaari tamajaaja cua tiujianutaniya. Naajaa, seetanujuanaa maja cua quiniu tamajaaja. Cua Quecuajaari cua cojijani. ³³ Janiyari puetunu niojuanaa nia sequeyani, nioojia nia cajitiniuria nio cua pohuatasanoocua nia tiuushacari. Mijiria nia quishacari, niaari seetanujuanaa naquiya miiniutianiya. Naajaa, janiyacuajaari mijiria jiyanijia shocotareeni. Naacuajitij, nioojia nia cumaquiri tamajaaja.

17

Jesu secocosacari na pueyacuara

¹ Naa Jesu sequenu nuhuajitij, jiyocuacaanu na mausacari, naa na Que sequereeri:

—Cua Quenaa, janiya nio juuca naquiya miishaanutaniyani taa quia sequequiaaricuajani. Cua tojiniuucua quiajaniya, quia Jiyarosano quia jiyatere pueya timitiasano cua quiniuria. Naacuajitij, janiyacua saniniu-ujia quia jiyatere pueya timitiasano quia quiniuriani, tojetaarucuajanaa

maninia muijia quia quiniuucua. ² Quiaacuajaari quia cumaaca cua niquitioquiaari puetunu pueyajanaa cua jitianura. Naacuajitij, janiyari saniniujia nojori jiyatenutaniya pueyaracaanu quiijiaca nojori quiniurianni, teyano pojori quia niquitioquiaari janiyacuajani. ³ Nojori niishishacari saaja quiabajaniyari seetanujuanaa Pueyasocuaja, naajuhuaj, nojori niishishacari janiyari quia jiyarosanoni, naacuajitij, nojoriiri pueyaracaanu quiijiara quiiniutianiya shuquiriaatia.

⁴ Janiyari tari tucuataree quia sequesano cua miiniuria mijiriani. Naa cua miiniuucua puetunu quia panishanojuanaatej, pueyari quia timitiaa. ⁵ Jiya shipiniyaquishacarijia, janiyari jiyanohua shuquiriaatia quiija quiquiaari quia shuriucuani, jiyajijajanaa cua quishacari. Cua Quenaa, naa quiijiara cua jiyaterohua quiarrijani, quia shuriucua cua quiniuhuara.

⁶ Quia niquitiosano pueya janiya, quia saquiriosano pueya quia niishiyashijiaca pueyajinijinioni, quiarrijia cutara, nojoriiri niishiya cante quiabajaniyani. Nojoriiri quia niishiya, nojori niquiniuucua cua mijjiosano quia cumaacata, cua pohuatasano quiabajajiniji nojori tojiniuucuajuhuaj. Nojoriiri quia pueya quiija. Quiaari saniniujia nojori cua niquitioquiaari. Nojoriiri quiarrijia quia rupaa tojitiajaca cutara. ⁷ Nojoriiri niishiya puetunu cua jiitiasanojuanaani, cunoori quia niquitiosano janiya. ⁸ Janiyari quia rupaa rootacanu nojorini, quia niishitishano janiyani. Nojoriiri seetanujuanaa nocua tiuuri. Nojoriiri seetanujuanaa niishiya, janiyari quia shuriucuaji niquiaarini. Niishitiuyaajaariuhuaj, janiyari seetanujuanaa quia jiyarosanoni.

⁹ Janiyari cunora nojoriicuara quia secojiyani, seetanujuanaa quia pueya nojori quiniuucua. Majaari cua secojonu quia niishiyashijiaca pueyacuara. Saaja noo pojoriicuara quia secojiyanijia, quiaa na niquitioquiaari janiyatej. ¹⁰ Naaratej, puetunu cua jiitiasano pueyajanaari quia pueyajuhuaj. Mariyata puetunu quia jiitiasano pueyajanaari cua pueyajuhuaj. Nojori tiuuniuucua cucua, nojoriiri jatanishano pueya quiiniutianiya. Naacuajitij, queraatia pueyari cua timitianutaniyahuhuaj, naa nojori niquishacari cua cumaaca.

¹¹ Majaari puera cua tarishiniu quiiniutianiya mijiria. Cua pueya cutaraari mijiria quiiniutianiyyaara, janiya jaara quiaarohua quiocuani. Jiyanohua maninia cua Quenaa, nojori quia cojuare quia cumaacata, teyano pojori quia niquitioquiaari janiyacuajani. Naa quia jiitiare nojori, jatiqui nojori quiuriuria juhua niquiriyatu juujiaraca, taa pa quiyacuaani. ¹² Mijiria cua quishacari nojoritia, janiyari nojori cojuajani quia cumaacata, quia rupaacua tiujiaca nojori quishacari. Majaari quenaaja niquiriyatu nojorijinijinio cua juurequetenu quiquiaari. Saa noojuaari juurequecanu cutara, tariucua juurequeriquiano quiijiacuatej. Naacuajitij, tariucuacaanu quia rupaajinlia naajiotasanoori tohuatteeceanu.

¹³ Quiarrijani, janiyari quiocua quianutaniyani, tee quia quiyacuaani. Niya cua quishacarijia, janiyari nio sequeya nojori niquiarani, nojori jiitianura cua shuquiriniujiuhuaj, tojetaarucuajanaa shuquiriaatia quiijiaca nojori quiuriuriajuhuaj. ¹⁴ Janyari nojori niishitiocanu quia rupaani. Naa nojori tojishacari quia rupaatej, quia niishiyashijiaca pueyari nojori niquiniu paniyaquiquiaa. Cua pueya nojori quishacari, nojoriiri maja saaja mijiria quiijiaca na quiniu tari, taa janiyacuaani. Naaratej, mijiria quiijiaca pueyari nojori niquiniu paniyaquiquiaa.

¹⁵ Naa cua secojosacari quiarijia nojoriicuaratej, majaari cua sequenu quiajaniya nojori quia rijonura niiquiji. Saaja quia secojiya cutaranijia, nojori quia cojuanura Sesaacaacuaji. ¹⁶ Nojoriiri maja mijiria quihiaca na quiniu tari cua pueya nojori quishacari, taa nio jiyajinijino cua quiyaquiyacuaani. ¹⁷ Quia rupaa quia poonijiotere nojori jiuujiajinia, tojetaarucuajanaa quia tojijiaca nojori quiniuria. Quia rupaari seetanu rupaajanaa cutara. ¹⁸ Quiaacuajaari cua jiyaroquaari mijiria quiniaa pueya niquiara cua pohuatanura quia rupaa. Naajuhuaj, janiyari cua pueya jiyaramiquiyani mijiria quiniaa pueyacuajuhuaj. ¹⁹ Quia tojijiaca nojori quiniuria seetanujuanaa, janiyari tama cua cuaqueyajaaja jiyateya puetunu quia panishanojuanaa mijia cua quiniuriani. Naacuajitij, nojori niishishacari seetanu rupaajanaa janiyajiniji, nojoriiri toje-taarucuajanaa maninia mijiacara jatanishaanutaniya.

²⁰ 'Majaari saaja cua secojonu nio pojoriicuara, tariucua quia tojitiacacuaani. Janiyari secojiyajuhuaj na nuhuaji cucua tiuuriquiano pueyacuara, noo pojoriicuara cante cucua tiuuniutianya na nuhuanjini, nojori tojishacari nio pojori pohuatasano janiyajiniji. ²¹ Cucua tiuuriquiano pueyacuara secojiyanija puetunu cucua tiuuniaajanaa cuaara quiiria jatiqui, juhua rupuetootesano, taa pa quiyacuaani, cua Quenaa. Naatej, taa cua quiya quioojiajiniacuaani, quiaari saniniuuja coojiajinia quiyacujua. Nojori jiuujia cuaara juhua rupuetootesano quiiria poojiajahuaj, mijiria quiniaa pueya niishiniuria, quiaari cua jiyaroquaari mijiria. ²² Janiyari nojori cumaquiya quia So-huanutani, quia niquitosano janiyacuaa, juhua niquiriyatu jiuujiaraca nojori quiniuria, naatej, taa niquiriyatu jiuujiaraca pa quiyacuaani. ²³ Quiaari coojiajinia quiya. Naajuhuaj, janiyari nojori jiuujiajinia quiyajaacuhuaj. Naacuajitij, paari nojoritia juhua niquiriyatu quiniutianiyani. Naacuajitij, mijiria quihiacaari niishiniutianya, quiaari seetanujuanaa mijiria cua jiyaroquaari. Nojoriiri niishiniutianiyajuhuaj, quiaari jiyanohua cua pueya panijia, taa quia paniya janiyacuaani.

²⁴ 'Cua Quenaa, cuno pueya quia niquitosano janiyani, janiyari paniyani nojori quiniuria cuata quia shuriucua, nojori niquiniuria cua shacantuca cumaaca. Quiaari cuno cumaaca cua niquitioquiaari pueyaracaanu quia paniniuucua janiya, jiya shipiniyaquishacarijia. ²⁵ Tojetaarucuajanaa sesa miyashijia cua Quenaa, mijiria quihiaca pueyari maja na niishiniu quiajaniya. Janiya cutaraari quia niishiyanji. Nio cua pueyari niishiyajuhuaj, janiyari seetanujuanaa quia jiyarosanoni. ²⁶ Janiyari nojori niishitiocanucuajani cante quiajaniyani. Janiyari naa pueyaracaanu nojori jiuujiajinia niishitiniutianya qui-ja-janiyajinijini, seetanujuanaa nojori niishiniuria quiajaniya. Naacuajitij, taa quia paniya janiyacuaani, nojori cuaara cuno paniniu jiitiaara nojori jiuujiajiniajahuaj. Naa nojori niishishacari quiajaniyatej, janiyari nojori jiuujiajinia quiiniutianiyajuhuaj.

18

*Na paraa quiasacari Jesu
(Mt 26.47-56; Mr 14.43-50; Lc 22.47-53)*

¹ Naa Jesu secojonu nuhuaji na Quetej, nojuajaari canaa puetaaree Cedrón suocono taquijiria. Tii quiquiaari olivo cuhuariquia. Cuno cuhuariquiaari matacosano quijia puetunu na shocuajanaa. Jesuuri

ti tiuquitiamaa canaa, na Que Pueyaso na secojonura. ² Jesuuri tii jiitiquiaari canaata na rerejonura. Naacuajitij, na paraa na quia-teriquiano Judasri cuno cuhuariquia niishiquiaarijuhuaj. ³ Canaa quishacari tii, Judasri jiyacari soldadohua tiuquitiasee, Pueyaso Sec-ojojua tia cojuanaa pueyanio. Cuno pojoriiri pueyacuara secojonaa jiyanijianucua jiyaramiquishano pueya quiriquiaa, Fariseocuaca ji-yaramiquishano pueyanio. Nojoriiri pueya na miaquetaja pooriquiaa, nocuaji na nunutaja jayoco, samarinio. ⁴ Jesuuri tari puetunujuanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia matacajiniji tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

⁵ Na paraari na riucuaree:

—Canaa Nazaret tiacajinjinio Jesu pajeyani.

Jesuuri nojori riucuaree:

—Janiyacuaja nojuajani.

Jesu tacartana Judasri cuno pojoritia quiriquiaa tii. ⁶ Jesu sequencesacari, “Janiyacuaja nojuajani”, na paraari na nijiniara pojotuquee. ⁷ Jesuuri socua nojori nequesotarohua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinjinio Jesu pajeyani.

⁸ Jesuuri nojori riucuaree:

—Janiyacuaja tari nia sequereeni, janiyacuaja nojuajani. Niaa jaara cua pajeya, nareja nia niquiri nio, cua cojiniaani.

⁹ Naacuajitij, tama Jesu sequencesojuariajia tohuateequiaari, nojuaja jaara naa na Que sequequiaari: “Majaari quenaaja niquiriyatu pueyanio cua juurequetenu quiquiaari quia niquitosano pueyajinjinio janiya”. ¹⁰ Jiyacaritij, Simón Pedroori tama na mueruujuaja shitiaree na shucuaji shiyano. Nata, pueyacuara secojonaa jiyanijija seru numoco jaatereeri, na miaquetajara na numoco. Cuno seru sesa quiquiaari Malco. ¹¹ Jesuuri Pedro sequeree:

—Na co jiniacuma quia shiiriohua quia mueruu. Cua Que jaara paniya naa cua miishaanura naquiyatej, ¿janiyatucua nio pojoriria tama cua cuaqueyajaaja tarinitiaaquiri naquiya cua miishaanurani? ¡Taaquiri-irinij!

Anás nequesoreesacari Jesu

(Mt 26.57-58; Mr 14.53-54; Lc 22.54)

¹² Jiyacaritij, na paraari Jesu quicaree. Nojoriiri quiquiaari Romano soldadohua, nojori jiyanijijajuhuaj, Pueyaso Secojojua tiaco cojuanaa pueyanio. Nojoriiri Jesu morojturee. ¹³ Na nuhuaji, nojoriiri co-teenu na jaatucutaquiaari Anásqua, canaa pueyacuara secojonaa jiyanijija Caifás cama na quiniuucua. Cuno marijiara, Caifásri pueyacuara secojonaa jiyanijijajanaa quiriquiaa. ¹⁴ Cuno Caifásquajaari tari naa sequequiaari narta Judiocuaca camarucua: “Maniniacujaari niquiriyatu pueyanio mosaanura puetunu pueya nitijanaa, maja najuhuana puetunu pueyajanaa puecoosaanura”.

Pedro coteesacari seetanu Jesujiniji

(Mt 26.69-70; Mr 14.66-68; Lc 22.55-57)

¹⁵ Simón Pedroori cuata Jesu nuhuajiriquiaa tucuacaanuji. Janiya cutaraari pueyacuara secojonaa jiyaniijajanaa niishishano pueyano quiquiaarini. Naacuajitij, janiyari tiuquinishaaree cutara Jesutani, jiyaniijia tia shocua mataca jiniacuma. ¹⁶ Saaja Pedro cutaraari to-huateyaji jateesee. Jiyaniijajanaa niishishano pueyano cua quiniuucua, janiyari tohuateyaji cojuna niyacoota pocoojoseeni, Pedro na tiuquininiuriujuhauj. ¹⁷ Cuno niyacoori Pedro nequesotaree:

—¿Majate quiajaniya cuno Jesu pueyajinjiniojuhauj?

Pedroori na riucuaree:

—¡Maja janiya!

¹⁸ Shiniquiaari jiyacari jaanujuriquiaa. Nocuaji cuno jiyaniijia seyari Pueyaso Secojojua tiajinia cojunaaa pueyata mani naatequiaari. Nojoriiri na jitiuriquiaa. Pedroori nojoritia tii quiriquiaajuhauj. Mani jitiuriquiaari.

Pueyacuara secojonaa jiyaniijia nequesoreesacari Jesu

(Mt 26.59-66; Mr 14.55-64; Lc 22.66-71)

¹⁹ Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitijo-sosanojiniji Jesu nequesoreerejaariuhauj. ²⁰ Jesuuri na sequeree:

—Janiyacuajaari pueyaracaanu puetunu pueya niquiarajanaa maa-tia niishitijoquaani. Janiyari pueyaracaanu tiquiyocua Pueyaso secojonuujuaca tiacajiniaequeya niishitijoquaiaa pueyani. Naajuhauj, janiyari niya Jerusalén tiacajinie Pueyaso Secojojua tiajinia niishitijo-riquiaani, tee puetunu parta Judiocuacajanaa rerejoquiaacuajani. Majaari quenaaja jiyasohua cua rootanu quiquiaa pueya. ²¹ ¿Casaara quia nequesoreya janiyani? Quia nequesoreere juhuari cuno pojori, canapuete cua pohuatasano tojiquianuni. Nojoricuajaari quia sequen-taniya casaa cua rootaquiaa nojorini.

²² Jiyacaritij, Pueyaso Secojojua tiaco cojuna pueyanoori Jesu shuriu-cua nujuariquiaa. Naa Jesu riucuasacari jiyaniijia Anástej, Secojonuuju-a tiaco cojuna pueyanoori Jesu jiquioco maseterree. Naa Jesu sequereeri:

—¿Naa riucuasanote pueyacuara secojonaa jiyaniijia?

²³ Jesuuri na riucuaree:

—Janiya jaara sesa riucuareeni, cua sequere casaate sesa quiriini. Saniniuujia, janiya jaara maninia sequereeni, ¿casaara quia maseterree cua jiquiococuaraarini?

²⁴ Canaa pueyacuara secojonaa jiyaniijajanaa Caifás quiniuucua, jiy-acaritij, Anásri Jesu moronucua jiyarotaree Caifáscua.

Pedro pacutesacari seetanu Jesujiniji

(Mt 26.71-75; Mr 14.69-72; Lc 22.58-62)

²⁵ Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinjiniojuhauj?

Pedroori saaja seetaree. Sequereeri:

—¡Maja janiya!

²⁶ Pueyacuara secojonaa jiyaniijia seruuri Pedro niquirii. Nojuaajaari noo pueyano cuna quiriquiaa, Pedro jaatesano na numocotej. Nojua-jaari Pedro sequeree:

—¡Janiyacuajarhua quia niquirii cuno pueyanota quia quishacari olivo cuhuariquiajiniani!

27 Pedroori na seetarohuacuhuaj. Caacarajaari jiyacari niunijioquee.

*Jiya jiyaniijia Pilato nequesoreesacari Jesu
(Mt 27.1-2, 11-14; Mr 15.1-5; Lc 23.1-5)*

28 Caifás tajiniji, Jesuuri jaatucusaaquiaari Romano jiyaniijia tajinjari. Cuno tiaari jiyano hua puereetuca quiriquiase, jiyaniijia acuají tiasano. Cuno jiyaniijianí, nojuajaari Romano jiyaniijia janaa César jiyatesano quiquiaari jiyaniijia janaa na quiniuria Judea jiyajinía. Na sesa quiquiaari Pilato. Canaa Judiocuaca jaara tiuquijioquiaari Jesuta Pilato tia cari jiniacuma, shusha juhua queriquiaari. Nojoriiri maja na tiuquitianu quiquiaari Pilato tiaco, nojori mariqui juhua curuushirri Pueyaso niquiara, nojori tiuquitianuu cua tahue tajinía. Nojori jaara juhua curuutuca quiri Pueyaso niquiara, naacuajitíj, nojori maara Pascuara miaquesano borrego miaqueyaquirij. ²⁹ Naaratej, Pilatoori nojoriicua tohuataquiaari. Nojori nequesotareeri:

—¿Casaa nio pueyano miiriucuaani, miji nia nitianura cucuani?

30 Nojoriiri saaja riucuaree:

—Jaara sesa miyashijia quiriquia, ¿canaatucua casaara quiocua na nitiamani?

31 Pilatoori nojori sequeree:

—¡Niiqui nia jiyataarohua! ¡Tama nia nequesoreesuhuajaaja, taa nia supuetanaa rootasano sequeyacuajani!

Canaa Judiocuaca camarucuuaari Pilato riucuaree:

—¡Niajaniya Romano pueyani, niaacuajaari canaa sequecanu maja canaa monura pueyano!

32 Naacuajitíj, naa taríjia Jesu sequencesanoori tohuateriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia. ³³ Jiyacaritíj, Pilatoori na tiaco tiuquiyarohua. Jesu piiriuri nocua na niniuria. Tii Jesu nequesotareeri:

—¿Quiaate seetanujuanaa Judiocuaca jiyaniijia?

34 Jesuuri Pilato sequeree:

—¿Cunote tama quia niishishano juaaja naa quia nequesotanura janiyatej? ¿Tamonu soj quia pohuatacanu janiyajiníj?

35 Pilatoori Jesu juaarii. Na sequeree:

—¿Quia jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? ¡Tama quiarta Judiocuacacuajaari cucua nitiamaa quiajaniya, nia pueyacuara secojonaa jiyaniijianucuata! ¡Cua sequere casaa quia miiriucuaani!

36 Jesuuri na riucuaree:

—Janiyacuajaari Jiyaniijianí, maja juhua mijiria jiyaniijia. Janiya jaara mijiria jiyaniijia quiriquiani, cua pueya maara cua quiatunaa cuarta Judiocuacata miaquetoore, maja nojori quiatunura janija. Maajaari jiyaniijia cua quinu mijiria, taa quia quiyacuani.

37 Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucuaree:

—Jaa. Janiyacuaja Jiyaniijianí. Janiyacuajaari cunora rasa aquiaarini. Janiyari mijiria niquiaarini seetanu rupaajanaa cua niishitiniuria pueya. Cante seetanu rupaajanaa panijiani, nojoriiri cua sequencesano tojitiajaca.

³⁸ Pilatoori najuhuana na nequesotaree:
 —¿Casaateeri cuno seetanu rupaajanaani?
 Naa na nequesotanu nuhuajitij, Pilatoori tohuatamohuacuhua canaa
 Judiocuacaacua.

Pueya sequencesacari Jesu cuaara mosaaria

(Mt 27.15-31; Mr 15.6-20; Lc 23.13-25)

Pilatoori jiyacari pueya sequeree:

—Nio pueyano nequesoreereecuajanijia. Nojuajaqui majas sesa na miiniu quiquianu. ³⁹ Niajaniya Judiocuacani, niaari puetunu Pascua juucarajanaa cua neneocojoquiaa cua cartenura nujuatejojuajiniji nujuatesano pueyano. Quiarijiani, ¿cana nia paniya cua cartenura nio Pascua juucarani? ¿Niarta Judiocuaca jiyanijiatee?

⁴⁰ Puetunu pueyajanaari naa jiyanohua nacoorohuacuhuaj:

—¡Maja cuno cartenu! ¡Barrabás quia cartere cutara!

Cuno Barrabásri nohuasejojua quijia.

19

¹ Jiyacaritij, Pilatoori na soldadohua majacuteree Jesu, coqueeca casaata. ² Soldadohuari juhuaccontucua maaturee Jesu nacaquera. Na nuhuaji cushitishaarohuari. Na macaatiniuria, shaaruque toque cushitishaarohuari, juhua jiyanijia toque. ³ Naa nojori miiniu nuhuaji Jesutej, nojoriiri nocua catecanoquiaari. Na sequetureeri:

—¡Judiocuaca jiyanijiana! ¡Quia timiri, Judiocuaca jiyanijiana!

Naa nojori sequencesacari Jesutej, nojoriiri na jiquioco piquitiurii.

⁴ Pilatoori socua tohuataquiaari canaa Judiocuacaacua. Nojori sequeree:

—¡Nia niquiri! Janiya na tohuateya niaacuani, nia niishiniuria janiyacuaja tari na nequesoreereeni. Janiyari quiarijia niishiyani, nio pueyanoqui majas sesa na miiniu quiriucaa.

⁵ Jesu muetasacari nojoriicua, juhuaccontucuajiniji nacaque cushiriquiaari, shaaruque toquenio. Pilatoori Judiocuaca sequeree:

—Nia niquiri niarta pueyano.

⁶ Canaa pueyacuara secojonaa jiyanijianucua, Pueyaso Secojojua tiaco cojuanaa pueyajuhuaj, nojori jaara Jesu niquipuiaari, naa nacoonu coteetureeri:

—¡Niyacutesanojinia quia teeteretii na cusionura! ¡Niyacutesanojinia quia teeteret!

Pilatoori nacoyano riucuaree saaja:

—¡Maja! ¡Janiyuacuajaari niishiyani, nio pueyano majas sesa na miiniu quiquianu! ¡Nia jaara na monu paniri, nia teeteretama niajanijayaaja!

⁷ Canaa Judiocuacaari Pilato riucuaree:

—¡Canaari Pueyaso Rootasano naajionee jiitiaani! ¡Canaari cunojiniji niishiyani, nio pueyano cuaara mosaaria tama na cuaqueyajaaaja na jiyatenuucua Pueyaso Niyanura!

⁸ Pilato tojishacari naa canaa Judiocuaca sequencesanotej, nojuajaari socua puerequiaari. ⁹ Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajaniyani?

Jesuuri majas na riucuanu quirii. ¹⁰ Pilatoori na sequeree:

—¡Cua riucuarejaj! ¿Quiaate niishiyaquia, janiya jiyanijiani? ¡Janiya jaara panirini, cua naata cua pueya sequenu na teetenura quiajaniya! ¡Janiya jaara paniyaquirijuahuaj, cua naata quia cartenujuhuaj!

¹¹ Jesuuri saaja na riucuaree:

—Jiyocuacaanu Quija jaara quia jiylateyiquiaari jiyanijia quia quiniuria, quiaa maara quia cumaaca paaretaaquiri cucuaj. Naaratej, cante niyara cua nitiamaa quiocuani, nojuajaari socua jiyanohua sesa miirii quiajaniyajiniji.

¹² Naa Pilato tojishacari Jesu sequencesanotej, nojuajaari socua shiri-iquiaari. Nocuaji, Jesu cartenu saniniujiuriquiaa juucuari. Judiocuacaari saa nacooreejaa. Naa Pilato sequetureeri:

—¡Cante tama na cuaqueyajaaja jiylateja jiyanijiarani, nojuajaari pa jiyanijia César paracara quijia! ¡Naaratej, quiaa jaara cuno pueyan o cartere, majaari socua pa jiyanijijajanaa César rupuena quia quiniu quiniutianiya!

¹³ Naa Pilato tojishacari pueya sequencesano nojuajatej, nojuajaari na soldado sequeree na tohuatenuhuara Jesu pueya niquiara. Pilatoori jiyacari cajirii pueya na nequesoreesaquiji cajitiujinia. Pilato tii cajiriquiaani, na tacoji pueya nujuatusaquinii, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitishano”. Judiocuaca rupaajinaria saniniuujia, cunoori quiquiaari “Gábata”. ¹⁴ Jiyacariiri panacari quiriquiaa. Cuno juuca, canaa Judiocuacaari juhuacaricia jeenucuariquiaa Pascuara juucajinia. Pilatoori jiyacari tii quiniae Judiocuaca sequeree:

—¡Nia niquiri nia jiyanijia!

¹⁵ Pueyari saa nacooreejaa:

—¡Cunoori maja canaa panishano canaa jiyanijia na quiniuria! ¡Niayutesanojinia quia teetero!

Pilatoori nojori sequeree:

—¿Janiyatucua nia jiyanijia teetereni? ¡Maja!

Pueyacuara secojonaa jiyanijianucuaari Pilato sequeree:

—¡Jiyanijia Césarcuajaari canaa jiyanijijajanaa! ¡Maja socua tamonu jiyanijia canaa jiitianu!

¹⁶ Pilatoori socua Judiocuaca niquitioree Jesu, nojori teetesocoriquiano. Naaratej, nojoriiri na jiyataquiaari na teetenuucua.

Jesu teetesacari

(Mt 27.32-44; Mr 15.21-32; Lc 23.26-43)

¹⁷ Jesuuri tama na teejaranojuaaja canujutaaree pueya puecoosaquia. Puecoosaqui sesa quiquiaari “Pueyano nacaco tuhuananu”. Judiocuaca rupaajinaria saniniuujia, “Gólgota”. ¹⁸ Jesuuri tii teetesaaquiaari, socua caapiqui pueyanio. Jesuuri cuno pojori tajinia nujuaretasaaree. ¹⁹ Pilatoori naa naajiotequiaarijuhuaj Jesu nacaacuma rupotasocoriquiano: “Nazaret tiacajinjinio Jesu, Judiocuaca jiyanijia”. ²⁰ Naajiosano quiriquiaari canaa Judiocuaca rupaajinaria, Romano pueya rupaajinajuhuaj, Griego rupaajinianio. Jesuuri catecaja teetesaaquiaari Jerusalén tiacajiniji. Naacuajitij, queraatia Judiocuacaari cuno naajio serojoquiaari. ²¹ Naaratej, Judiocuacaacuara secojonaa jiyanijianucuaari Pilato juatiurii:

—¿Casaara naa quia naajiotereeni: “Judiocuaca jiyaniijia”? Cuaara naajiosaaaria cutara: “Tama na cuaqueya sequejajaaja, Judiocuaca jiyaniijianijia”.

²² Pilatoori nojori riucuaree saaja:

—Janiyacuajaari naa naajiotereeni. ¡Cuaara naa quiiriatej!

²³ Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriquaari Jesu tucuaque cacojoqui. Cuno toqueeri shitisano quiquaari na riquajiniji jiyocuara. Maja cusupuesano. ²⁴ Naaratej, cuno soldadohuari sequetooquiaari:

—Maja pa surenu nio toque. Coteenu pa tacuarishijore, pa niishiniuria cante nera na panutaniyani.

Naacuajitij, tariucuacaanu Pueyaso Rupaajinia naajiotasanoori tohuateequaari. Naa naajiotasano quiyari:

“Cua toqueeri seraatiasaaree. Cua tucuaque toqueecuara tacuarishiyonuureeri, na pasocoriquiano”.

Seetanujuanaa, naa miitiuquiaarii cuno soldadohua.

²⁵ Niyacutesano shuriucua tee Jesu teeriquiaacuajani, tii nujuaturiquaari na nucua, na nucua tarajanujuhuaj, Cleofas niqliocua Maríajuhuaj, María Magdalenoario. ²⁶ Jiyanolhua Jesu panishano pueyanoori Jesu nucua shuriucua nujuariquaa. Cuno pueyanocuajaari janiya. Jesu niqishacari canaa, na nucua sequereeri:

—Maajiniae, cua panishano pueyano cuaara quiiria juhua quia mueya cua niti.

²⁷ Na nuhuaji, cua sequereejaariuhuaj:

—Juannaa, cua nucua cuaara quiiria juhua quia nucua.

Naaratej, janiyari María riquiaari cua tiajiniarani, tii na quiniuria canaata.

Jesu cusosacari

(Mt 27.45-56; Mr 15.33-41; Lc 23.44-49)

²⁸ Na nuhuaji, Jesuuri niishiquaari puetunu nojuajiniji naajiotasano-juanaari tari tohuateeree. Naajuhuaj, tariucuacaanu Pueyaso Rupaajinia naajiotasano tohuateenurajuhuaj, Jesuuri sequequiaari:

—¡Jiyamueyanijia!

²⁹ Cuniqui, vino jereeccaari patacojinia mishaja cajitiariquaa. Jiyacaritij, namasu casaari jereecca vinojinia shishaaree. Naajuaacua na morotatureeri. Na nuhuaji, Jesu rupaama shitisareeri. ³⁰ Jesu ratunu nuhuaji cuno jereecca vino, naa sequeroahuari:

—¡Tari tucuataree puetunujuanaacuajanijia!

Naa na sequenu nuhuajitij, naniquiiri. Cusoqueeri.

Soldado jitiasacari Jesu shuucuaji na cashanata

³¹ Cuno juucaari canaa Judiocuaca jeenucuasacari quiriquiaa Pascuacuara juucajinia. Cuno marijiara, Pascua juucaari Sábado juucajinia quiriquiaajuhuaj, samaatenu juuca. Naaratej, canaa Judiocuaca camarucuaria majaa na paniniu quiquaari samaatenu juuca macunucua jaasuconura na niyacutesanojinia. Naaratej, nojoriiri Pilato sequeree cuno teetejosano pueya cashacucua na shuniitianiniuria, ritia nojori cusojuunura, na roshinijiosaanura cuno juucaja. ³² Naaratej, Pilatoori na soldadohua jiyaramiquirii. Cuno soldadohuari coteenu shuniitiaree niquiriyatu pueyano cashacucua. Na nuhuaji, tamonu cashacucua

shuniitiatureejaariuhuaj. ³³ Saniniujia, nojori pacusacari Jesuucua, Je-suuri tariucua macu quiriquiaa cutara. Nojoriiri cunora na cashacucua shuniitiaquirii.

³⁴ Naajaa, tamonu soldadoori Jesu shuuucuaji jitiaree na cashanata najuhuanaj. Ritia shooqueeri nanaca, mohuacanio. ³⁵ Cuno pueyano, na naajiojinia naa nia pohuataani, cunocuajaari janiya. Janiyajanaari na niquipuiaarini. Naarate janiyari seetanujuanaa nia pohuataani. Tama janiyajaarijia niishiyani cua sequencesoori seetanujuanaa, nocua nia tiuuniuria. ³⁶ Jesuuri naa miishaaquiaaritij, tariucuacaanu nojuajiniji naajiotasano tohuateenura. Naa sequeyacuajaari juhuacaricia nojua-jiniji naajiotasano:

“Majaari quenaaja na nucu shuniitiasaanu quiniutianiya”.

³⁷ Tamaquiiiri nojuajiniji naa naajiotasano quiyahuaj:

“Cashanata na shuucuaji na jitiatusano niquitoiuntianiwayi”.

Jesu quete niasacari raaco

(Mt 27.57-61; Mr 15.42-47; Lc 23.50-56)

³⁸ Na nuhuaji, Arimatea tiacajinjinio Joseeri Pilato sequencesee:

—Cua niquitoire Jesu quete raaco cua niasocoriquiano.

Nio Joseeri jiayosuhaja Jesuucua tiuujia quiquiaari, na pueresacari narta Judiocuaca. Pilatoori na sequequiaari na panura Jesu quete. Naacuajitij, Joseeri quiaaree. Macu paquiaarii. ³⁹ Nicodemojuhuaj, noo pueyano Jesuucua niquiaari niucua nata pocoojonuratej, nojuajaari jiyacari tiuquishii Joseecua. Nojuajaari queraatia shanohua jaanutaja nitiariquiaa, macuucua niojosocoriquiano. Na niquiaari quiquiaari cuarenta y cinco kilo. Cuno shanohua jaanutajaari quiquiaari mirra, aloeta cojitijiosano. ⁴⁰ Joseeri Nicodemota Jesu jiuniocoree toque-neecajinia. Nojori jiuniocosacari, nojoriiri nocua niojoriquiaa cuno shanohua jaanutaja. Canaa Judiocuacaari naa miitiujjaca quiquiaari, na macu na niatunura raaco. ⁴¹ Tee Jesu teetesaaquiaaricuajani, cuniquija na shuriucua quiquiaarii cuhuariquia. Cuno cuhuariquiajiniani, quiarinio jiuutiasano raari quiriquiaa, macunucua niojoruara. Cuno raaconi, juhuanojuaja maja macu niasaanu quiquiaari. ⁴² Macuuri cuno raaco niasaaquiaari, cateca na quiniuucua. Naajuhuaj, quera puequeriquiaari canaa Judiocuaca jeenucuanu juuca. Cunoori, Pas-cuaacuara juuca.

20

Jesu samiittiasacariuhua

(Mt 28.1-10; Mr 16.1-8; Lc 24.1-12)

¹ Domingo, coteenujuanaa semaana juucani, María Magdalenaari tariquiucuaji quiaquiaari Jesu raajiniara. Ninishiuiiri quiriquiaa-jaa. Na tiuquishacari, cuno puereetuca saajia niquishii tariucua tamocora ruutinishano, teyanota raa tiosaaquiaaricuajani. ² Naa na niuishacaritij, nojuajaari neterohua Simón Pedroocua, cucuanio. Canaa sequencesuhuari:

—¡Pueyanaa, pa Jiyaniijaqui na raajiniji pasaaree! ¡Majaari canaa niishiniu teeriquitijia na niasaareetejaj!

³ Naaratej, janiyari Pedrota netequiaari raajiniarajuhuaj. ⁴ Canaari mariyata netecuaturiquiaa coteenuni. Janiya cutaraari socua ritia netequiaari Pedrojinijini. Naacuajitij, janiyari coteenu tiuquishii raajiniani.

⁵ Janiyari raaco cuuqueseeni. Janiyari saaja Jesu jiuniocotaja toque niquirii maanoni tee Jesu quete niasaarucuaacuajani. Majaari cua tiuquinii quimiaa raaco. ⁶ Simón Pedroori cua nuhuaji tiuquishii. Cami tiuquimiaajanaa cutaraari. Nojuajaari Jesu jiuniocotaja toque niquishii tii maanojuhuaj. ⁷ Jesu naca jiuniocotaja niquirijiaariuhuaj tamoco maano, maninia mariquiosano. Majaari na manu quiriquiaa Jesu cuaqueya jiuniocotaja toqueta. ⁸ Pedro tiuquinii nuhuaji raaco, janiyari shusha jiyacari tiuquimiaajaaniuhuaj. Cua niquishacari Jesu jiuniocotaja toque, janiyari niishiquiini Jesuqui tari samiitiarohua. ⁹ Canaari juhuanojuaja maja canaa niishiniu quiriquiaa tariucuacaanu Pueyaso Rupaajinlia naajiotasano Jesujiniji. Tii sequeyacuajaari Jesuuri samitanutaniuhua macujiniji. ¹⁰ Na nuhuaji, canaari tiajinia quiaarohuani.

Jesu muetasacari María Magdalenaacua

(*Mr 16.9-11*)

¹¹ Canaa quiojosacariuhua raajiniji, María Magdalenaari tijia jateequiaari. Raa shuriucua nujuqueriquiaari. Na nujuquenuta, raaco cuuquereeri. ¹² Raaco na niquishacari, caapiqui Pueyaso seja niquiriri, cohuajaque toqueyaraca. Nojorriiri macu niasaqui cajitiuriquiaa, tamonu na nacaacora, tamonu na cashacuucumara. ¹³ Pueyaso seyari María Magdalena sequeree:

—Maajiniae, ¿casaara quia nujuqueyani?

Nojuajaari Pueyaso seja riucuaree:

—Cua jiyaniijia quete niiquiji pasaarucuaa. Majaari cua niishiniu teeriquitija na niasaarucuaatejaj.

¹⁴ Naa na sequenu nuhuajitij, na nijiniara tacaterohuari. Saaja Jesu niquirii na shuriucua nujuanoori. Maja cutaraari na niishiniu quiriquiaa nojuaja Jesu.

¹⁵ Jesuuri na nequesotaree:

—Maajiniae, ¿casaara quia nujuqueyani? ¿Cana quia pajeyani?

Mariari na jiyaririi cuno cuhuariquia cojuana pueyano naasucua. Cunora, naa na sequereeeri:

—Pueyanonaa, quiae jaara canaa macu parucuaa, cua sequere tee quia niarucuaanoj. Janyacuua nocua quiaare na panurani.

¹⁶ Jesuuri na sequeree:

—¡Maríana!

Jiyacaritij, Mariari nocua tacatequee na niishishacari nojuajaari Jesu. Hebreo rupaajinlia na sequereeeri:

—¡Rabun!

Cunoori sequeya, “Cua Niishitiojonanaa”. ¹⁷ Jesuuri María sequeree:

—Maja cua quianu. Juhuanojuaja maja cua tacanu quiqioo cua Queecua. Quia quiaarohua. Cua tapueyocuaca quia sequesuhua: “Janiya cua Que Pueyasoocua tacanutaniuhuani. Nojuajaari nia Quejuhuaj. Nojuajaari cua Jiyaniijia, nia Jiyaniijiajuhuaj”.

Jesuuri naa na saquiriojosano pueya sequeree na tapueyocuacata, na Que Pueyaso na jiyatesacari nojori Quejuhuaj. ¹⁸ Jiyacaritij, María Magdalenaari nimiohua canaacula, Jesu saquiriojosano pueyacuani. Nojuajaari canaa pohuatasuhua taa Jesu na niquiriini. Naajuhuaj, Jesu sequesano caminiuijirii canaaraari.

Jesu muetasacari na saquiriojosano pueyacua

(*Mt 28.16-20; Mr 16.14-18; Lc 24.36-49*)

¹⁹ Cuno domingo juucajani, shusha ninishacari, canaa, Jesu saquiriojosano pueyani, canaari jatiqui quiriquiaa tiaconi. Canaari tia tohuateya mishiquiojoquiaari cumaatiani, canaa pueresacari Jesu motenaa Judiocuaca. Naa tia tiootiu mishiquiojosano quishacaritij, Jesuuri saaja canaacua tiuquimiaa. Canashiyaquiji nujuasee canaa tajiniaari. Naa canaa sequereeri:

—¿Niaate quiyajaa? Juhuajaniya nia quiri.

²⁰ Naa canaa na sequenu nuhuajitij, canaa niquitijoree na juaashiquiaari, na shuucuaji cashana jiyanio. Canaari jiyano hua timiriini canaa niquishacari canaa Jiyaniijia. ²¹ Jesuuri socua pacuterohua sequenu:

—¡Juhuajaniya nia quiri! Naatej, taa cua Que jiyaroquiaari janiya mifiria na rupaa cua pohuatanuracuaani, janiyari naa nia jiyaramiquinutianiyajuhuaj.

²² Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuquiniri nioojiajinia. ²³ Niaa jaara pueyano jiyano orri sesa na miishanojiniji, seetanujuanaa jiyanooshano quiniutianiyari. Saniniujia, niaa jaara pueyano jiyano aquiri sesa na miishanojiniji, Pueyasora, jiyanooshoo quiniutianiyajahuaj.

Tomás niquishacari Jesu, saminio seetanujuanaa

²⁴ Majaari Tomás quiniu quiriquiaa canaata, narta saquiriojosano pueyatani, Jesu muetasacari canaacua. ²⁵ Naaratej, canaari Tomás sequequiaari na nuhuajini:

—¡Caapueyanonaa, canaa pa Jiyaniijia niquiriicuaani!

Tomásri saa canaa sequereejaa:

—Majaari cua tiuuniu quiniutianiya nia sequencesanoocua, janiya jaara Jesu juaashiquiajinia niquiyaquiri clavo jiyacani. Janiya jaara cua juaashiquia shiyaquiri clavo jiyama, janiya jaara cashana jiyama pueraaquiri na shuucuajijuhuaj, janiyari nia cuaracashitiniutianiyani.

²⁶ Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaariuhuani. Tomásri jiyacari canaata quiriquiaa cutara. Tia tiootiuuri maninia mishiquiojosano quiriquiaa. Naajaa, Jesuuri saaja canaacua tiuquiquiaari. Canashiyaquiji canaa tajinia nujuaseeri. Canaa sequereeri:

—¿Niaate quiyajaa? Juhuajaniya nia quiri.

²⁷ Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucuaji quia puerarejuhuaj. ¿Casaara cucuaji quia taacanuyajaani? Cucua quia tiuuri.

²⁸ Tomásri jiyacari Jesu sequereei:

—¡Cua Jiyaniijiana! ¡Cua Pueyasonaa!

²⁹ Jesuuri na sequeree:

—Quia niquishacari janiya, quiaari shusha cucua tiuya. Socua shuquiriaatia quiniutianiya cutaraari noo pojori, canapuete cucua tiuuniutianiya saaja nojori tojishacari janiyajinijini, nojori niquiyaquishacari janiya.

Casaara Juan naajioquiaari nio naajioneeni

³⁰ Jesuuri jiyanohua socua queraatia casaa miquiaari na cumaacata canaa na saquiriojosano pueya niquiara. Cunoori nio nequesoree-tuneejinia naajiotasoo. ³¹ Janiyari secaja saquiriojoree niya cua naajiotasocoriquianoni, nia niishiniuria Jesuuri seetanujuanaa Pueyaso Jiyarosano, Pueyaso Niyanutuhuaj. Janiyari nio naajioreeni nocua nia tiuuniuria, Pueyaso muerasura nia jiyatesaanura, pueyaracaanu rishijiaca nia quiniuria.

21

Tiberias caminiajinia Jesu muetasacari na saquiriojosano pueyacua

¹ Na nuhuaji, Jesuuri canaa na saquiriojosano pueyacua muetaquiaar-uhua Tiberias caminiajinia. Naa quiquiaariti na muetasacari canaacula. ² Nio pojoriiri jiyacari mariyata quiriquiaa: Simón Pedro, Tomás (Caa-pueyano jiynishano), Natanaeljuhuaj. Nojuajaari Caná tiacajinjinio quiquiaari, Galilea jiyajinjinio. Janiyari cua tarajanuta tii quiriquiaajaaniuhuaj. Canaari Zebedeo niquiohuani. Socua caapiqui Jesu saquiriojosano pueyajinjinioori tii quiriquiaajuhuaj. ³ Simón Pedroori jiyacari canaa sequeree:

—Sapitiaajara quejootaseera shiyaru.

Canaari na riucuareeni:

—Canaa quiata quiaajuhuaj.

Naacuajitij, canaari quiojiyareeni. Canaari botejinia tacataseeni. Canaari puetunu cuno niucuajanaa shiyaru quejootariquiaa sapitiaajara juucuani. Canaari shaa juhuquetumaani. ⁴ Jiyacaritij, Jesuuri caminia casaqueyaji jaaquiajinia nujuariquiaa. Majaari canaa niishiniu quiquiaari cante nojuajani. ⁵ Jesuuri canaa jiiquooree. Canaa neque-sotareeri:

—¡Sanajoorinial! ¡Niaate na quiaree?

Canaari na riucuareeni:

—¡Maja! ¡Shaaqui sacaj!

⁶ Jesuuri canaa sequeree:

—¡Nia shiyaru nia jartare nia miaquetajara bote tamajiria! ¡Niaari cuniqui na quianutaniya cutara!

Canaari naa miiriini taa na sequeree canaacuajani. Na nuhuaji, majaari canaa naata canaa shiyaru jaatianu quiriquiaa, queraatia sapitiaaja canaa ritiasacari. ⁷ Jiyacaritij, janiyari Pedro sequreeni:

—¡Pa Jiyaniijaqui!

Naa Pedro tojishacari cua sequesanotej, nojuajaari ritia na toque cushionii. Nojuajaari juhuasu quiriquiaa. Na toque na cushioniu nuhuaji, caminiajinia jaataareeri Jesuucua na quianura. Jiritiuri quiriquiaa.

⁸ Canaari na nuhuaji jaatiariquiaa shiyaru botejinijini. Jaaquiaari namitia maja tucuacaanu na quiniu quiriquiaa, saaja cien metroruhua.

⁹ Canaa rosetasacari botejiniji, canaari na mani niquishiini. Sapitiaajaari tii mageeriquiaa, pannio. ¹⁰ Jesuuri canaa sequeree:

—Nia sapitiaajajiniji miji nia riri rarishocoriquiano.

¹¹ Simón Pedroori ritia botejinia tacamaa. Shiyaru tacanitiaree jaaquiajiniaari. Queraatia sapitiaajaari quiriquiaa. Ciento cincuenta y tres sapitiaaja, saa puereetunucuaja. Naa queraatia sapitiaaja quishacaritij, naajaa, majaari shiyaru turejetanu quirii quenaaja.

¹² Jesuuri canaa sequeree:

—Pueyanaa, miji. Nia miaquesee.

Majaari quenaaja niquiriyatu canaajinjinio nequesotanu quiriquiaa, cantejaaranojoni. Canaaacuajaari niishiriquiaani nojuacuajaari canaa Jiyaniijia Jesu. ¹³ Jiyacaritij, Jesuuri pan rishii manijiniji. Canaa na serotareeri. Sapitiaaja rariquia canaa niquitiojoreeaariuhuaj.

¹⁴ Jiyacari Jesu muetasacari canaa na saquiriojosano pueyacuatej, cunota tari quiquiaari jiuujianaraca na muetasacari canaacua na samitianu nuhuaji.

Jesu pocoojosacari Simón Pedrota

¹⁵ Canaa miaquenuunu nuhuaji, Jesuuri Simón Pedrota pocoojoriquiaa. Na nequesotareeri:

—Juan niyanu Simónnaa, ¿quiaate cua panijia socua nio quiarta saquiriosano pueyajiniji?

Pedroori na riucuaree:

—Jaa, Jiyaniijianaa, quiaacuajaari niishiya janiyari quia paniyani.

Jesuuri na sequeree:

—Cua borregohua niquiohuaniyojua cojuanara quia quiriqui.

Naa Jesu sequencesacari Pedrotej, nojuajaari miriqui na sequeriquiaa maninia na jiitianura narta Pueyaso muerasu. ¹⁶ Jesuuri Pedro nequesotarohuacuhuaj:

—Juan niyanu Simónnaa, ¿quiaate cua panijia?

Pedroori Jesu riucuaree:

—Jaa, Jiyaniijianaa. Quiaacuajaari niishiya janiyari quia paniyani.

Jesuuri na sequeree:

—Cua borregohua cojuanara quia quiriqui.

¹⁷ Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja. Seetanujuanaa Jesu riucuareeri:

—¡Jiyaniijianaa, quiaacuajaari puetunujuanaa niishijia! ¡Quiaari niishiya janiyari quia paniyani!

Jesuuri na sequeree:

—Cua borregohuaniyojua cojuanara quia quiriqui. ¹⁸ Seetanujuanaa quia sequeyanijia, mashaja quia quishacari, tama quiajanijayaarijia quia toque cushijia, quia quianura quia panishaqui. Saniniuujia, quia jaara saaquiano quiri, quiaari nareja quia numatucua shiitionutaniya tamasaca cushitiniuria quia toque. Na nuhuaji, quiaari canujutesaanutaniya quia paniyaquishaquiria.

¹⁹ Naa Jesu pohuatasacari miriqui Pedrotej, nojuajaari Pedro numotieriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutianiya na mosaanuuucua. Na nuhuaji, Jesuuri na sequeree:

—¡Pueyaracaanu cua tojijia quia quiri! Pa quiaarej.

Juanjiniji pohuatasano

²⁰ Pedro tacatesacari na nijiniara, Jesu panishano pueyano niquirii na nuhuaji sacuaanoori. Nojuacuajaari janija. Janiyari noo pueyanocuajani, canaa miaquenuusacari Pascuara, Jesu shuriucua cua cajishacari na nequesotaquiaaritij: “¿Cantejaara cunoni, quia quiatenutaniyani?”

²¹ Quiarijiani, Pedro niquishacari janija saniniuujia, Jesu nequesotareeri:

—Jiyaniijianaa, janiya jaara naa mosaanutaniyacuaani, ¿nojuajaarijijat, taa na miishaanutaniyarini?

²² Jesuuri Pedro riucuaree:

—Janiya jaara paniri nojuaja rishiniuria pueyaracaanuni, janiya jaara jiyocuacaanuji tiuquiriohuajaatijia, quiara, naajaa. Quiajaniya cutara, pueyaracaanu cua tojija quia quiri.

²³ Naa Jesu sequenuucua Pedrotej, puetunu cuarta Jesu pueyajanaari jiyaniquiriaa janiya naasucua shaajeyaquiriquianon. Jesuuri seetanujuanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuacaanuji tacatemohuajaatijia, quiajaniyara naajaa”.

²⁴ Janiyacuajaari nojuajani, Jesucristo panishano pueyanon. Nio cua naajiojiniani, janiyari nojuajiniji cua niquishano pohuataani. Cua pohuatasanoori seetanujuanaa.

²⁵ Jesuuri jiyanoqua queraatia socua casaa miiquiaari na cumaacata mijiria. Puetunu na miishanojuanaa jaara naajiotasaare, naa naasucua nio jiyajinia maara quiqio quiyaquiri puetunu cuno nequesoreetuneeecaacuajijianaa.

JESUCRISTO JIYARAMIQUISHANO PUEYA MIISHANO

“Pueyaso Sohuanu niaacua jiyarosaanutaniya”

¹ Quiocuara naajionu pacuterohuanijia, cua panishano Teófilonaa. Coteenu cua naajiosanojinia, janiyari quia pohuataquiaarini taa Jesu na poonijiosano coteequiaari mijiriani. Puetunu na miishanojua-naa naajioquiaarini, mariyata na niishitiosano na coteenujiniji, jaara tacanishaquaariuhua jiyocuacaanu na Queta na quiniuhuara.

² Mijiria na quishacarrijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. ³ Jesu cusonu nuhuaji, nojuajaari muetaquiaariuhua na saquiriosano pueyacula. Nojoriicua mueranacujuquiaarii. Cuarenta juuca nuhuaji tacquaquiaariuhua puetunujuanaari. Na miishanota nojoricuia na mueranacujasacari, nojori niishitiriiri nojuaja seetanujuanaa saminio quiya. Nojoritria pocoojoquiaarii taa Pueyaso jiitianutaniya na muerasuni.

⁴ Nojoritria na pocoojosacari tamonu juuca, Jesuuri nojori numootequiaari maja ritia nojori quianuhuara Jerusalén tiacajiniji. Nojori sequequiaarii:

—Nia sashirijaara cua Que cuaara niquitiorajaara na Sohuanu niajaninya. Nojuajaari cua sequequiaari na niquitionutaniya niajaninya, taa cua caminiujuquiaari tari niaaracuajani. ⁵ Naa sequequiaari niajaniyacuajanija: “Tiuquinijiona Juanri nia tiuquinijioquiaari moojinia, Pueyaso tojijiara nia jatasacari. Pueyaso saniniuujia na Sohuanu nioojajinia tiuquinijionutaniya, seetanujuanaa Pueyaso tojijiara nia quiniuria”. Quera niaacua tiuquiniutaniyacuajaari. Naaratej, nia sashiri.

Jesu tacasaracariuhua jiyocuacaanu

⁶ Tamonu juuca, Jesu pueyari Jesuucua rerejoquiaari. Na nequesotatureeri:

—Jiyaniijianaa, ¿quiaate Jiyaniijiara jiyatesaanutaniya quiarijia Israel pueyara, maninia pa quiniuhuara tama pa jiyaniijiataajaaja, taa pa supuetanaa quiquiaaricuaani?

⁷ Jesuuri nojori riucuaree:

—Nio cutaraari maja nia niishishocoriquiano, taacari Israel pueya jiyaniijiara cua jiyatesaanutaniyani. Pa Que Pueyaso cuno niishishano racataa tama nerajaaja. Saa nojuajaari na niishiya cutara. ⁸ Naajaa, niaari Pueyaso cumaaca masenutaniyacuaja, Pueyaso Sohuanu jaara nioojajinia tiuquiri. Niaari janijajiniji pohuatanutaniya pueya niquiara Jerusalén tiacajinia, puetunu Judea jiyajinajanaonio, Samaria jiyajinajuhuaj. Naa pohuatasaanutaniyajaariuhua puetunu jiyacajinajanaa, socua tucuacaanu jiya puequeetujinianio.

⁹ Jesu puecasacari pocuanu, nojuajaari tacanishaquaari na pueya shootiasacarija nojuaja. Cohuajajinia shaajemaari pueya niquiaquinuucuaji nojuaja. ¹⁰ Nojori mautasacari jiya cajiniocua Jesu tacasaracari,

canashiyaquiji, caapiqui pueyari nojori shuriucua nujuatuquiaari. Nojori toqueeri jiyanohua cohuajaque quiriquiaa. Nojoriiri jiyocuacaanujinio Pueyaso seja quiquiaari.¹¹ Nojoriiri Jesu pueya sequeree:

—Galilea jiyajinjinio pueyanaa, ¿casaara nia mautaa jiyocuacaanuni? Taa nia niquirii tacaanocuajani, niaari naa na niquinutianiya tacate-huanohuajuhuaj.

¹² Nojoriiri jiyacari Olivo nacuhua tuhuananuucua quiriquiaa. Pueyaso seja nuhuaji, Jesu pueyari Jerusalén tiacajiniohua tacatequiaari. Cuniquiji, cateca naataja quiquiaari Jerusalén tiaca. Moisés Naajiotasanojiniji, Judiocuacaari naa rootasaaquiaari majas socua tucuacaanu nojori rucuanenura samaatenu juuca.¹³ Nojori tiuquijiosacari Jerusalén tiacajinia, nojoriiri nojori quijia tajinia tiuquitiaquiaariuhuaj. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanucuajani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricuajani. Quiquiaariajiaariuhua Simón, cante tari quiquiaari Romano pueya jatanu panijiacuajani. Mariyata quiriquiaari Judas, Santiago tarajanu.¹⁴ Nojoriiri jiyacari pueyaracaanu Pueyaso secojonuuriquiaa tii maajipohuata, mariyata Jesu nucua Mariáta, Jesu tapueyocuacatanio.

Pueya saquiriojosacari Matías Judas niti

¹⁵ Nojori sashishacari Pueyaso Sohuanu tii, tamonu juuca, Pedroori nujuquiaari pueya niquiara na sequenura nojori. Naa naasucuahuaj ciento veinte pueyari tii quiriquiaa puetunujuanaa. Naa nojori se-quereeri:

¹⁶ —Cua tapueyocuacanaa, Pueyaso Sohuanu sequesanoori majas na naata naajaa tajiniu. Seetanujuanaa tari tohuateerucuaari Judasjiniji na pohuatanishano pa supuetanaa jiyaniijia David. Naacuajitij, Judasri Jesu monaarano niishitiquianu tee Jesu quiriquiaani, nojori na quiatenura. Judasri cunora niquitiosaacanu cumaneeca, naa nojori na niishitinuuucua Jesu quiasaanura. ¹⁷ Nojuacuajaari parta Jesu saquiriojosano pueyano quiquiaarijuhuaj. Nojuajaari mariyata Jesu jiyaramiquishano quiriquiaa juhua pajaniyajuhuaj.¹⁸ Tamonu cuhuariquiaari masesaacanu sesa na miishano samitia. Na nuhuaji, tama cusoyareejaaria. Jiyocuacaanuji tiquianu na nacaraari. Na saracaari cocuaretasee. ¹⁹ Jerusalén tiacajinia quinia jaara na niishitiquianu, nojoriiri cuno cuhuariquia sesojoree “Acéldama”. Acéldamaari pueyano rupaajinia sequeya “Nanaca samitia masesano cuhuariquia”. ²⁰ Judasjinijiiri naa naajiotasaaciaarijuhuaj tariucuacaanu supuetana David jaaquequejojuajinia. Naa sequeyari: “Na quiquio cuaara quiuria shaaco. Cuaara quiuria sanaaca, camaruuju”. Sequeyajaarijuhuaj:

“Tamonu pueyano cuaara jiyatesaaria na poonijiosano miiriquiano na niti”.

²¹ Cuarta Jesu saquiriojosano pueyanaa, niya quiyacuaja pueya, canapuetucuaja pa tarajaquiaarini pueyaracaanu pa Jiyaniijia Jesu quishacari pata. ²² Nojoriiri Juan niquiriaarijuhuaj Jesu tiuquiniyano moojinia, Jesu tacasacariuhua jiyocuacaanunio. Canapuetucuaja puetunu nio niquiriaariajianaani, niquiriyatu nojorijinjinio cuaara

jiyatesaaria Jesu jiyaramiquishanora, pata na quiniuria, Jesu samitianujiniji na pohuatanurajuhuaj.

²³ Naaratej, pueyari caapiqui pueya saquiriojoquiaari. Cuniqui quiriquiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiriquiaajuhuaj, Matías.

²⁴ Na nuhuaji, pueyari naa secojoquiaari Pueyaso:

—Jiyaniijiana, quiaari puetunu pueya jiuujia niishijajanaa. Canaa quia niishitiri tezano pueyano tari quia saquiriojoreeni, quia jiyaramiquishocoriquiano na quiniuria, Judas niti poonijoriquiano.

²⁵ Judasri quia niquitiosano poonijiosanojiniji catecanu sesa na miiniuucua, naquiya miishaqui na quianura, sesa mijiia na quiniuucua.

²⁶ Na nuhuaji, pueyari naajiosano saajia jaquerooree nojori niishiniuria teyanote Pueyaso panishano pueyanoni. Saajiaari Matíascuara tacatasee. Naacuajitij, Matásri Jesu saquiriojosano pueyanora quiquiaarijuhuaj. Naacuajitij Jesu saquiriojosano pueyari juhua juhuanoraja quiquiaariuhua doce.

2

Pueyaso Sohuanu tiuquishacari

¹ Pentecostés juuca jaara quiquiaari, puetunu Jesuucua tiuuni-aajanaari rerejono quiquiaari tamonu tiajinia Jerusalén tiacajinia.

² ¡Canashiyajiji, paratuuri tojishaquaquiaari jiyocuacaanuji, juhua paratu pocuaano jiyahohua cojuata! Jiyahohua tojishaareeri cuno tiajinia tee Jesu pueya cajitiuriquiaacuajani. ³ Jiyacari, juhua maniiri niquishaaree pueya caco rimianuqueyano. Puetunu nojori cacojuanaa rimianacuriquiaari juhua mani. ⁴ Jiyacaritij, Pueyaso Sohuanuuri puetunu tiajinia quinia jiuujiajiniajanaa tiuquirii. Pueyari juhuacatecara tamaatia rupaaca pocuaree. Pueyaso Sohuanuuri naa nojori pocooteree puetunujuanaa tamaatia rupaaca.

⁵ Cuno quishacari, queraatia Judiocuaca puetunu jiyacajinjinio-juanaari camueenjuriquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojoriiri Pueyaso tojitiajaca quiquiaari. ⁶ Nojori tojishacari cuno cojutunenu, nojoriiri cuqueree tee Jesu pueya pocooriquiaa tamaatia rupaacacuajani. Nojori tojishacari naatej, nojoriiri jiyahohua cushima. Naatej, puetunu rucoonaajanaari tama na jiyajinjinio rupaacajaaja tojitiariquiaa, cuno pojori pocoosacari. Nojoriiri maja na niishiniu quiquiaari casaara naa nojori miiriini. ⁷ Nojoriiri jiyahohua jiuujiatecoree. Tama sequetoreejaajija:

—Juhuej! ⁸ Cuno pojoriti maja Galilea jiyajinjinio pueyacuaja naa pocoyaniquitij? ⁸ Taa nojori pocuua puetunu coteenu pa rupaacajanaani? Pajaniyacuajaari queraatia tamaatia jiyacajinjinioni, puetunu tamaatia rupaaca pocuajacajanaa.

⁹ Seetanujuanaari. Cuno pojoriiri Partiya jiyajinjinio nijiono quiquiaari, Media jiyajinjinio, Elam jiyajinjinio, Mesopotamia jiyajinjinio, Judea jiyajinjinio, Capadoccia jiyajinjinio, Ponto jiyajinjinio, Asia jiyajinjinionio. ¹⁰ Quiquiaarijaarijuhuaj Frigia jiyajinjinio, Panfilia jiyajinjinio, Egipto jiyajinjinio, África jiyajinjinionio. Cuno Africa jiyajinjinio pueyari quera Cirene tiaca shuriucuaji quiquiaari. Roma tiacajinjinio pueyari

tii quiquiaarijuhuaj, canapuete Jerusalén tiacajinia pacunaa quiquiaaricuajani. Puetunu cuno pojorijianaari Judiocuaca quiquiaari. Noojaqueyari rasaacquaari Judiocuacajanaa. Tamasacaari na cararaatiuuquia co miatejosaaquaari Judiocuacara na quiniuria, Pueyaso tojijiacara nojori quiniu panishacari.¹¹ Creta jiyajinjinio pueyari tii quiriquiajuhuaj, Arabia jiyajinjinionio. Puetunu cuno jiyacajinajanaari tamaatia rupaaca pocuajaca quiquiaari. Nojoriiri socua naa sequetooquaari:

—¿Taateni? ¡Puetunu pajaniyajanaari cuno Galilea pueya tojitiaani Pueyaso cutara miishano pohuataano, tama pa coteenu rupaajinijaaja!

¹² Puetunu nojorijianaari jiuujiateriquiaa nojori jiyajenenuta. Tama nojorijiaarijia nequesoreetooquaari nojori tacaaniutia:

—¿Casaa na miitiuyaajaaranojoni?

¹³ Tamasaca nojorijinjinioori saaja Jesu pueya macaatirii. Tama nojorijiaarijia tama sequetooreejaacuju:

—Cuno pojoriqui mashaasequenuya shocuanacuhuata.

Pedro pohuatasano pueya niquiara

¹⁴ Jiyacaritij, Pedroori juhuacatecara pocuaree cuno pojori niquiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojitiare casaa cua sequentaniya niajaniyani. Puetunu Jerusalén tiacajinia quiniaajanaa cuaara niishiiria cua pohuatasano.¹⁵ Niaari canaa jiyaniya mashaasequenuyano. Pananucuajaari shusha taqueejiya. Maja canaa mashaasequenuunu.¹⁶ Niaari canaa tojitiaa tamaatia rupaaca pocuaano. Niocuajaari taricuacanau Pueyaso sequenceso caminiuijunia Joel pohuatasano. Cuno niaa na niquiyani, cunocuajaari na sequenceso, shusha tohuateyani. Nojuaajaari naa sequequiaaritij:

¹⁷ “Pueyasoori naa sequeyaquij: ‘Quera jiya puequesacari, janiyari cua Sohuanu niquitionutaniya puetunu pueyarajanaani. Naacuajitij, mashiquioriiri janiyajiniji pohuatanutaniya, niyacoojorinio. Cua Sohuanuuri cua niishishano niquitiniutianiya mashiquiori juhua na maquenujinia. Cua niishishano niishitiojonutaniya saaqiapue na maquenujinajaarijuhuaj.¹⁸ Cuno quishacari, janiyacua cua Sohuanu niquitiore puetunu cua tojitanajanaani, canuu, maajipohuanio. Nojoriiri janiyajiniji pohuatanutaniya pueya niquiara.¹⁹ Puereeta cua miishanoori jiya cajniocua niquishaanutaniya. Cua miishanoori jiyacua niquishaanutaniyahjuhuaj, pueya na numootenura. Nanacaari niquishaanutaniya, mani, jiyanoehua najacanio.²⁰ Pananuuri ninishquiria quiniutaniya. Racaari juhua nanacara quiniutaniyajjuhuaj. Naa co-teenutaniyari jiya puequenura. Na nuhuaji, Jiyaniijajanaari rosenutaniya mijiria quinia na nequesoreenura, saminiucua pueya, macunucuanio. Na rosesacari, cutara juuca quiniutaniyari, puereetajjuhuaj. Jiyanoehua shanohua quiniutaniyari na rosesacari.²¹ Puetunu Jiyaniijia secojonaa pueyajanaari jiyanooshaanutaniya Pueyaso pueya nojori quiniuria’ ”.

’Supuetana Joelri naa naajiotquaari Pueyaso sequenceso tarijiatej.

²² Naaratej, socua cua tojitiare cuarta Israel pueyanaa. Jesujiniji nia pohuatanutaniyanijia, Nazaret tiacajinjinio pueyano. Pueyasocuajaari pa

niishitiquiaari, Jesuuri na jiyarosano pueyano quiquiaari. Naacuajitij, Pueyasoori na poonitijoquiaari pa niquiara jiyano hua jiyajeneta casaa na miiniuria. Paacuajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri seetanujuanaa Pueyaso Jiyarosano quiquiaari. Niajaniyacuajaari maninia niishiya puetunu maninia na miishanojuanaa.²³ Saniniuuja, Jesu jaara niquitioshaarucuaa niajaniya, niaari na quiarucuaa juhua sesa miijia. Na nuhuaji, niaari Pueyaso tojiyashijiaca pueya na moterucuaa maca niyacutesanojinia, taa Pueyaso paniquiaari tarijiacuajani. Pueyasocuajaari niishiquiaari naa mosaanutaniyari Jesu.²⁴ Pueyaso cutaraari na samiitianiriohuacuaa macujiniji. Na carterohua macujinijiiri. Majaari quenaaja tamonu cumaacaraca quijia quiniu quiqianu Jesu na jiyojetenura macu quiqiojinia pueyaracaanura.²⁵ Pueyaso Sohuanu jaara pohuatequiaari pa supuetanaa jiyaniijia David, nojuajaari juhuacarijia naa pohuataquiaari Jesu sequesocoriquianotej:

“Cua shuriucua niquiquiaa Jiyaniijianijia. Nojuajaari cua shuriucua quiya, cua miaquetajara, maja quenaaja casaa teteyatenura janiya.²⁶ Naaratej, coojaari timirii. Cua niti taquiriocuateree cua shuquiriniutianijia.²⁷ Naajuhuaj, cua cusosacari, cua queerteeri juhuajaniya quiniutianiya, cua niishishacari quiaari cua tarinitiaaqiniutianiya macunucua quiqiojinia. Quiaari cua shu moquijiaaqiniutianiya saa maninia miijiaja cua quishacari quia niquiara.²⁸ Quiaari cua niishitijooree maninia cua miiniuria, pueyaracaanu quiqiara cua quiniuria. Quiaari jiyano hua cua shuquiritiniutianiya quiata cua quishacari pueyaracaanu”.

²⁹ ‘Cua pueyanaa, paacuajaari niishiyani, pa supuetanaa jiyaniijia Davidri jamosaaquaari na cusosacari. Na jamaari niya quiyajaa Jerusalén tiacajinia. ³⁰ Nojuajaari niishiquiaari Pueyasoori tari na sequequiaaricuaja:

“Davidnaa, tamonu pueyanoori supuenutaniya quiajaniyajiniji, jiyano hua quia nuhuaji. Cuno pueyanoori Jiyaniijijara cua jiyatesano quiniutianiya quia niti. Nojuajaari cua jiyarosocoriquiano Cristo. Seetanujuanaa naa quiniutaniyari Davidnaa. Maja cua sapojonu”.

‘Pueyanaa, paacuajaari niishiyani Davidri Pueyaso sequesano caminiuijunia quiquiaari.³¹ Naacuajitij, Davidri Cristojiniji pohuatariquiaa jiyano hua tari cuacaanujiniji, juhua tari na niquishano. Pueyaso Sohuanuuri na niishitiquiaari taa Cristo miishaanutaniyani. Naacuajitij, Davidri Cristo samiitianujiniji pohuatariquiaa naa na sequesacari: “Pueyasoori na tarinitiaaqiniutianiya macunucua quiqiojinia”, mariyata naa na sequesacari: “Na quete moquijiaaqiniutaniyari”.³² Pueyasoori nio Jesu samiitianiriohuacuaa. Na samiitianu nuhuaji, puetunu canaa janaari na niquiquianuni. Janiyari nia pohuataa seetanu canaa niquishanojuanaani.³³ Cutara na cumaacata, Pueyasoori na tacaniriohua na miaquetajara cajiriquiano, Jiyaniijijanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequequiaari tarijiacuajani. Jesuuri saniniuuja quiarijia canaa na niquitioree. Naaratej, niaari canaa niquirii tamaatia rupaaca pocuaano.

³⁴ Majaari David tacanu quiquiaari jiyocuacaanu cutara. Nojuacuaajaari Jesujiniji sequequiaari:

“Jiyaniijia Pueyasoori cua Jiyaniijia sequequiaari: ³⁵ ‘Cua miaquetajara quia cajishijiaara, janiya cuaara quia paraa shocotarejaatija’ ”.

³⁶ Cunora, puetunu niajaniyajanaa Israel pueyanaa, niaa cumaati niishiya, Pueyasocuajaari nio Jesu jiyatecanu Jiyaniijiajanaa na quiniuria. Niaacuaajaari niyacutesanojinia na mocanucuaja. Nojuajaari Cristo, Pueyaso jiyatesano Jiyaniijia. Majaari canaa pohuatasanojiniji nia taacanuunu pueyanaa.

³⁷ Pueya tojishacari naa Pedro pohuatasanotej, nojoriiri tetecatuquiaari. Pueyari saniniujia Pedro nequesotaquiaari, na cojiniaanio:

—Canaa pueyanaa, ¿taa canaa miiniutianiyarinijia?

³⁸ Pedroori nojori riucuaquiaari:

—Nioojia nia tacatore sesa nia miiniujiniji. Niajaniya cuaara moojinia tiuquinijiosaaria Jesucristoocua nia tiuushacari, nia jiyanooshaanura sesa nia miishanojiniji. Naa nia miishacaritij, Pueyasocua nia niquitiore na Sohuanu. ³⁹ Pueyaso sequencesacari nojuaja na Sohuanu niquitionutaniya pueya, cunoori niaaranocuaja, nia niquiohuaranonio, tucuacaanu quijiacarajuhuaj. Pueyaso Sohuanucuajaari puetunu pueyajanaa niquitiosaanutaniya, cana pa Jiyaniijia Pueyaso sequeya na muerasura na quiniuriacuajani.

⁴⁰ Pedroori jiyacari pueya pohuateree queraatia socua Jesujiniji na niishishano. Jiyanohua nojori nacasureeri. Naa nojori sequereeri:

—Nioojia nia tacatorohua Pueyasocua, maja Jesu ruuretajaca nia cojiritiasaanura quejoonu mani quiquojinia.

⁴¹ Pedro pohuatasanoocua tiuuniaari tiuquinijiosaquaaria. Cuno juuca, tres mil pueya naasucuaari coteenu Jesu tojitiana rupuenaara quiquiaari. Pueyaso pueyari naa canequiaaritij. ⁴² Puetunu nojorijianaari maninia tojitiaquiaari pueyaracaanu Jesu jiyaramiquishano pueya niishitiosano. Nojoriiri jatiqui quijia maninia. Majaari nojori juayonuujutanu quijia. Nojoriiri pueyaracaanu rerejojua neecaruu serotanura Jesu cusionu niishiniuria. Mariyata Pueyaso secojonuujuu pueyaracaanuuri.

Panitioojuaca Jesu tojitiana quishacari juhua tapueyocuacata

⁴³ Jesu jiyaramiquishano pueyari jiyajeneta miishano miijioriquiaa Pueyaso cumaacata. Naacuajitij, puetunu pueyajanaari puereturiquiaa. Pueyari shiriiquitiurii. ⁴⁴ Puetunu Jesuucua tiuuniaajanaari maninia rupuetooquiaari juhua tapueyocuacata. Nojoriiri maja jamuejaca quiquiaari. Casamiriaca pueyari na casami niquitijoquiaari nareja casamijiuniucua pueya. ⁴⁵ Tamasacaari na jiiitasano casami niquitijoquiaari na cumaneeca na masenura na casami sami. Na cumaneeca na masenu nuhuaji, nojoriiri tamasaca niquitijoquiaari juhuaj, casamijiuniucua jitianura puetunu nojori panishanojuanaajuhuaj. Tamasaca pueyari na cuhuariquia niquitijoquiaari nojori jitianura na cumaneeca, tamasaca na naacunurajuhuaj. ⁴⁶ Nojoriiri jatiqui rupuetooquiaari. Nojoriiri rerejojua puetunu juucajanaa Pueyaso Secojojua tiajinia. Mariyata tama nojori tiajiniaajaaja nojoriiri rerejojua, neecaruu neecasenura Jiyaniijia Jesu cusionu nojori niishiniuria,

mariyata jatiqui nojori miaquenuunura nojori shuquiriniutia. Nojoriiri maninia jiuujiaraca quiquiaari. Nojoriiri maja tamonu pueya shocotanu panijiaca quiquiaari.⁴⁷ Nojoriiri pueyaracaanu Pueyaso maniniuhuaqueetariquiaa nojori shuquiriniutia. Puetunu Jesuucua tiuyashijiaca pueyajanaari nojori paniquiaari. Puetunu juucajanaa, Jiyaniijia Jesuuri nojori canijiariquiaa, socua pueya tiuushacari nocua.

3

Sesarunocua pueyano jeecasacari

¹ Tamonu juuca, Pedroori Juanta tacatariquiaa Pueyaso Secojojua tiajinira. Tari quiquiaarii pananu piriushacari. Nojoriiri jiyacari quiojonu jiitiquiaari Pueyaso secojonura Secojojua tiajinia. ² Jiyacaritij, tamonu sesarunocua pueyanoori tii cajitiariquiaa Secojojua tia tohuateyaji. Nojuajaari naa rasanojuhuanaqui quiquiaari. Pueyaracaanu patootojotasaaquiaarii Pueyaso Secojojuajiniara, pueya na mashiniquinuria cumaneeeca nojori tiuquitiasacari. Na cajitiasaqui tohuateyasa quiquiaari “Tohuatey Maniniu”. ³ Sesarunocua pueyano jaara niquiquiaari Pedro, Juannio, nojori tiuquitianu panishacari Secojojua tiajinia, nojori maseree juucua na cumaneeecaari. ⁴ Pedroori Juanta na shootiaree tacuriitia. Jiyacaritij, Pedroori na sequeree:

—Canaa quia niquiri.

⁵ Sesarunocuaari juucua shootiariquiaa nojori. Cumaneeeca niquitosaariquiano jiyaniriquiaa juucuaari. ⁶ Pedroori na sequequiaari:

—Shaaqui cua cumaneeeca. Shaaqui tojetaarucuajanaa. Naajaa, cua jiitiasanota quia naacureera quiarijia. Quia sequeya Jesucristo sesajinianija: “Quia sanere. Quia rucuanerejuhuaj”.

⁷ Pedroori na juaashiquajiniji na quiaquiaari. Na nuuatereeri. Na niohuacaari jiyacari ritia jeequequiaari na sanesacari. Na sairi maniniujiaacara quiqiijiuhuaj. ⁸ Sesarunocuaari juhuacatecara rucuanequiaari. Nojoritia tiuquiquiaari Pueyaso Secojojua tiajiniaari. Maninia rucuaneriquiaari. Jaacuatariquiaari. Pueyaso maniniuhuaqueetariquiaajaariuhuaj. ⁹ Puetunu pueyajanaari na niquiquiaari rucuaneyano, Pueyaso maniniuhuaqueetaanojuhuaj. ¹⁰ Puetunu pueyajanaari na niishiquiaari nojuajaari sesarunocuacuaja, Secojojua tiajinia tohuatey Maniniujinie cumaneeca mashiniquijiojuatej. Pueyari cunora jiuujiatequiaari. Jiyano hua shiriiquitiuquiaarii.

Pedro pohuatasacari Pueyaso rupaa pueya niquiara

¹¹ Sesarunocuaari Pedro juaashiquia carteyaquiquiaari, Juan juaashiquianio. Nojoriiri Pueyaso Secojojuajinia nujuaturiquiaa tamocora. Nojori nujuatusaquiiiri pueya jiyaniquishano taricuacaanu jiyaniijia Salomón canujuucojoua quiquiaari. Puetunu pueyajanaari nocua netecuatuquiaari na shiriiquiniutia. ¹² Pedro niquishacari nojori, pueya sequequiaarii:

—Cuarta Israel pueyanaa, ¿casaara nia jiuujiateya nocuajini? ¿Casaara nia niquitia canaani? ¿Niaate jiyaniya canaa na niohuaca jeecareeni? Maja canaa. Majaari canaa cumaacata na jeequenu quirii. Niaa naasucuaari jiyaniya canaari nio miiriini socua maninia miijia canaa quiniuucua Pueyaso niquiara tamasaca pueyajiniji. ¡Majal!¹³ ¡Jesucuajaari na jeecarohua! Nojuacuajaari na Que Pueyaso jiyatesano Jiyaniijajanaa na quiniuria. Jiyaniijajanaara na jiyatenacuajaari Pueyaso, cante nio

pojori pa supuetanaa jiyaniijia quiquiaaricuajani: Abraham Jiyaniijia, Isaac Jiyaniijianio, Jacobo Jiyaniijiajuhuaj. Tama pa supuetanaa Jiyaniijia Pueyasocuajaari Neyanu Jesu jiyatequiaari Jiyaniijiajanaa na quiniuria. Niaa cutaraari Pueyaso Niyanu niquitiocanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiqianu na cartesaanura.¹⁴ Niaa maara maninia pueyanooocuaji tacucanu saniya cutara, niaari pueyano puecoojuaacua shiriiquitiurii saaja Pilato cartenura jiyano sesoriquia pueyano seque.¹⁵ Niaari naa motecanu pueyano samiitianijiacuajatej. Naajaa, Pueyasoori na samiitianiquianuhua macujiniji. Canaari na niquiquianuni. Naacuajitij, canaari nojuajiniji nia pohuataani.¹⁶ Nio sesarunocua pueyanoori Jesuucua tiuuri. Naacuajiti jeequeroohuari. Nojuacuajaari sesarunocua quiquiaari taa nia niquiquiaaricuajanoj. Jesuucua na tiuushacari, na cuaqueya cumaquirri. Na cuaqueyari seetanujuanaa jeequerohua maninia, taa nia niquiyacuajanoj.¹⁷ Cuarta Israel pueyanaa, quiarijia niishiyaniijia, majaari nia niishiniu quiqianu casaa nia miiquianuni. Majaari pa camarucua niishiniu quiqianujuhuaj. Niaari Pueyaso Jiyarosano mocanu nia niishiyaquishacari cante nojuaja quiqianuni.¹⁸ Naacuajitij, Pueyasoori na sequesano tohuateecanu, tarrijia na niishitishano na rupaa caminiijiuniaa. Seetanujuanaa, puetunu Pueyaso sequesano caminiijiuniaajanaari pa supuetanaa niquiara pojotaquiaari: "Pueyaso Jiyarosanoranoori naquiya miishaanutaniya". Jesuuri naa miishaacanu taritij.¹⁹ Naaratej, nioojia nia tacatore sesa nia miishanojiniji. Pueyasocua nia tacaterohua sesa nia miiniu tujusaanura.²⁰ Naacuajitij, pa Jiyaniijia Pueyasoori na naata juhua maniniushiquiariria jiyatenuhua pajaniyara, shuquiriaatia pa quiniuhuara mijiria na jiyarosacariuhua Jesu. Pueyasoori tarijia na sequeriaari pa Jiyaniijjiara na quiniuria.²¹ Nojuajaari jiyocuacaanu quiniutianiya na Que shuriucua, Pueyaso cuaara tucuatarejaatija puetunu taricuacaanu na pohuatanishanojuanaa na sequenu panishano caminiijiuniaa.²² Moiséscuajaari naa sequequiaari pa supuetanaatej:

"Jiyaniijia Pueyasocuajaari niaacua jiyaronutaniya nojuajiniji pohuatanana tama nia niquiohuacuajinio supuenojuaja, taa na jiyarquiaari janiyacuana. Nojuaja jaara supuere, niocua puetunu na sequesanojuanaa tojiri.²³ Canapuete cuno pueyano pohtasano ruuretanutaniyani, nojoriiri Pueyaso saquiriojosano pueya tajiniji shaajasaanutaniya puetunurajanaa".

²⁴ Pueyanaa, puetunu Pueyaso sequesano caminiijiuniaajanaari Moisés nuhuaji naa Jesujiniji pohuatanuuquiaarijuhuaj. Naacuajitij, Samuelri Jesucristojiniji pohuataquiaari taa na niniutianiyan. Naajuhuaj, Samuel nuhuaji, puetunu Pueyaso sequesano caminiijiuniaajanaari naa pohuatanuuquiaarijuhuaj.²⁵ Puetunu Pueyaso sequesano Jesujinijjianaani, cunoori quiarijia pajaniyara, taa Pueyaso pohuataniquiaari taricuacaanu na sequenu panishano caminiijiuniaacuajani. Nojoriiri pa supuetanaa quiquiaari. Pajaniyaranojaarijuhuaj Pueyaso sequesano pa supuetana Abraham. Pueyasoori naa sequeriaari pa supuetana Abraham:

"Quia muetusanojiniji tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajinijajanaacuajani".

²⁶ Pueyaso jaara na tojijia Niyanu samiitianiquianu, coteenu na ji-yaroree pocuaari poojia tacatoriquiano, sesa pa miiniu pa cartenura, shuquiriaatia quijsara pa quiniuria.

Pedroori naa pohuataquiaari pueya niquieratej.

4

Judiocuaca camarucua nequesoreesacari Pedro, Juannio

¹ Pedro pohuatasacarijia pueya niquia, nocua nijioquiaarii pueyacuara secojonaa, Pueyaso Secojojua tia cojuanaata, Saduceocuacatanio. ² Nojoriiri Pedro tojiquiaari pueya niishitiojiyano. Nojua-jaari pueya niishitiojoriquia macunucuaari saneecuatunutaniuhua na jamacajiniji, naatej taa Jesu samiitiarohuacuaani. Cuno jiyaniijianu-cua jaara naa tojiquiaari sequenceshiyanotej, nocuaji jiyanoohua juaaquio-quiaarii, na ruuretasacari Pedro sequencesano. ³ Cuno juaaquioyanoori Pedro quiatuquiaari, Juannio. Jiyaciiri tariucua tenacari quiquiaari. Tariucua niucua nujuatejosaaquiaarii. Nojoriiri tii juhuaquequiaari nujuatejojuajinia. ⁴ Naajaa, queraatia pueyari Jesuucua tiuquiaari Pedro pohuatasacari Jesujiniji. Quera cinco mil saaja canuuri tarí Jesuucua tiuuniaa quiquiaari. Maajipohuari serojosoo quiquiaari.

⁵ Tariqui, Judiocuaca camarucuaari rerejoquiaari camarucua nac-sunaata, Moisés Rootasanojiniji niishitiojonaatanio. Nojoriiri Jerusalén tiacajinia rerejoquiaari Jesujiniji pohuatanaa nojori nequesoreenura. ⁶ Anásri tii quiriquiaajuhuaj. Nojua-jaari pueyacuara secojonaa jiyaniijia quiquiaari. Caifásri tii quiriquiaajuhuaj, tamonu Juannio, Alejandronio, mariyata puetunu secojonaa jiyaniijia tapueyocuacanio. ⁷ Pedro, Juan-nio, nojoriiri nujuatejojuajiniji tohuatejosaaquiaari. Nujuatejosaaree jiyaniijianucua tajiniaari. Pedro shocua, Juan shocua cajitiuniaari nojori nequesoreeree:

—¿Taa nia miiriucuaa noonijia, sesarunocuatej? ¿Cana cumaacata nia jeecarohuacuaanoj? ¿Cante nia sequecanu naa nia miiniuriani?

⁸ Jiyacaritij, Pueyaso Sohuanuuri Pedro jiuujia cumaquiquiaari Pueyaso niishitiajata na pocuanura. Naacuajitij, Pedroori naa nojori riucuaquiaari:

⁹ —Canaa camarucuanaa, nia pohuatareera sesarunocuajiniji, taa na jeequerohuacuaani. ¹⁰ Niaa canaa nequesoreetaate, nia tojitiare canaa sequencesano, nia niishiniuria cua pohuatasano, puetunu Israel pueyajanaa niishiniuriajuhaj. Nio pueyano niya nujuani, nojua-jaari Jesucristo cumaacata jeequerohuacuaa. Niaari Nazaret tiacajinjinio Jesu cusojuacanu niyacutesanojinia. Pueyaso cutaraari na sanacanuhua macujiniji, pueyaracaanu na quiniuhuara. ¹¹ Niajaniyari juhua saitia tiajonaa Pueyasora. Nia tiasacari, niaari maniniujiajau saa-jia jataquiaari, nia jiyanihacari sesarujuajau naasucua. Na camaruuri saniniujia sequeya:

“Cuno nia jatasano saajiani, cunoori saniya cua maniniujiajau saajia”. Niaari naa Jesu jataquiaari juhua saajia sesarujuajau. Naajaa, Pueyasoori na niaquiaariuhua socua maniniushiqui. ¹² Majaari tamonu quiniu pocuaji tacuna. Puetunu pueya tajinjiniojuanaani, maja Pueyaso tamonu pueyano sesa jiyaniquinii quiquiaari cante pocuaji tacuriquianoni. Saaja Jesu cutaraari sequencesaaquiaari pocuaji tacuriquianora.

¹³Judiocuaca camarucuaari jiyanolhua na namijiaa riunitiquoquiaari nojori niquishacari taa Pedro, Juan seetanujuanaa cumaacata pohuatariquiaa nojori niquierani. Nojoriiri Pedro, Juan niishiquiaari nojoriiri seetanujuanaa maj a puera naajionuujuaca quiquiaari. Nareja poonijionuujuaca pueyajinjinio quiquiaarii. Naa nojori niishishacaritij, nojoriiri seetanujuanaa niishirii nojoriiri Jesu cojiniaa quiquiaari. ¹⁴Sesarunocua jeequenohuari cuniqui nojori shuriucua nujuariquiaajaacuhuaj. Naaratej, jiyaniijianucuaari socua sanaajetaquiaari. Saaja niishiriojonuuriquiaari. ¹⁵Camarucuaari Pedro, Juan tohuatanijoquiaari tamocora nojori tajiniji. Jiyareta camarucuaari tama pocoojquiaariajiaaja. ¹⁶Naa sequetuquiaarii:

—¿Taa pa miya socua nio pueyarini? Puetunu Jerusalén tiacajinia quiniaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jeeucasoo. Nojoricuajaari tari maninia na niishitiuya. ¹⁷Nio pojori pa piriyojore juhuari, maj a socua quiarijia nojori pohuatanura Jesujiniji pueya niquiara, nojori miishano paaqueyaquiniuria socua niya pa tia-cajiniani.

¹⁸Camarucuaari socua piquiaariuhua Pedro, Juannio. Nojori nacsuree jiyanolhuari, maj a socua quenaaja nojori pohuatanura Jesujiniji pueya niquiara.

¹⁹Pedroori Juanta nojori riucuaquiaari:

—¿Canaatucua casaara Pueyaso samiritiare canaa tojiniuria nijajaniyani? ¿Taa nia sequeyani jiyaniijianucuanaa? ²⁰Maja cutaraari canaa naata tarinitianu pohuatanu canaa niquishano, canaa tojishanorio.

²¹Camarucuaari nojori piriyojquiaari juucuhuaj. Puetunu pueyajanaari saaja maniniuhuaqueetariquiaa Pueyaso, puetunu maninia na miishanojinijijanaa. Naaratej, camarucuaari socua Pedro tariniti aquiaari Juannio. Majaari na mojoosaanu quirii. ²²Pedro jeecasanohua sesarunocua pueyanoni, nojuajaari cuarenta marijia shocotejoquiaari tari na quishacari.

Jesu pueya secojosacari Pueyaso, na cumaquinuria nojori

²³Pedro, Juan jaara cartesaquaaria, nojoriiri narta Pueyaso pueyacua quojoquiaariuhua. Nojori pohuatatureeri Judiocuaca camarucua sequesano nojori, camarucua nacasunaa sequesanojuhuaj. ²⁴Na tojishacari camarucua piriyojoso, puetunu nojorijianaari Pueyaso secojonu coteequiaari. Naa sequetuquiaarii:

—Canaa Jiyaniijiana, quiaari jiya cajiniocua shipininia, jiyano. Shoniniacu caminiaari quia shipinishanojuhuaj. Puetunu casaajanaari quia shipinishano. Quiaari jiyanolhua maninia. ²⁵Canaa supuetanaa jiyaniijia Davidri quia seru quiquiaari. Naacuajitij, quia Sohuanuuri na pohuatequiaari quia sequesano Jesujiniji juhua tariucua miishano. Quiaari naa na pohuatequiaaritij:

“¿Casaara jiyacua quiniaa pueya juayani? Pueyari najuhuana sesa niishiriojoriquiaa juucua. ²⁶Jiyajinjinio jiyaniijianucuaari na juaaquiaca sanetaree. Queraatia tiacajinjinio camarucuaari Jiyaniijia Pueyasocuara roojotooree, na jiyarosano Cristoocuaranio”.

²⁷ 'Pueyasonaa, naacuaaquiniatejaj. Jiyaniijia Herodes, Poncio Pi-
latonio, nojoriiri nio tiacajinia rerejocanu narta taucuacata, Israel
pueyatano. Quia Niyanuucuara roojotoocanuuri, tama quia Ji-
yarosanoocuarajaaja.²⁸ Naa nojori miiniuucuatej, nio pueyari tarí quia
miiniu panishano miiriucuaa, taa quia sequequiaari taricuacaanu-
cuajani: "Cua Niyanu cuaara mosaaria puetunu pueyacuarajanaa".²⁹
Canaa Pueyasonaa, quia tojishuriucuara. Nojoriiri quiarijia canaa
miananojiya saniniuujia. Canaacuajaari quia seyani. Canaa jiuujiia
quia cumaquiri quiarijia, canaa pohuatanura socua quia rupaa canaa
puereyaquiniutia. ³⁰ Cusosuhua cuaara naatanijiosaaria quia cumaa-
cata. Canaa jiyaniquishacari quia Niyanu sesa, jiyajeneta casaa cuaara
mijiosaaaria quia cumaacata pueya niquishocoriquiano. Nojuacuajaari
saa maninjia.

³¹ Nojori puecasacari secojonu, nojori quishaqui tiaari canashiyaquiji
jiuuquiquitquiaari. Pueyaso Sohuanuuri puetunu nojori jiuujiainia
tiuquiquiaari, nojori na cumaquinihuara. Naacuajitij, pueyari saaja
maninia pohuataquiaari Pueyaso rupaa pueya niquiara. Majaari na
pueretunu quiquiaari.

Jamueyashijiaca Jesu tojitiana quishacari

³² Jesuucua tiuuniaari maninia juhua rupuetootesano quiquiaari
puetunujuuanaa. Nojoriiri juhua seetanujuuanaa tapueyocuacataja
quiquiaari. Majaari nojori sequenu quiquiaari: "Cua casami
saaja quiria quiniutianiya". Nojori jiitiasano casamiiri saniniuujia
puetunu narta Jesuucua tiuuniaarajanaa quiquiaarijuhuaj.³³ Jesu
saquiriojosano pueyari Jesu samitianujiniji poojotaquiaari jiyanolua
cumaacata. Naajuhuaj, Pueyasoori puetunu Jesuucua tiuuniaajanaa
naacuriquiaa jiyanolua, shuquiriaatia nojori quiniuria.³⁴ Puetunu
Pueyaso pueyajanaari na panishano jiitiaquiaari puetunujuuanaa.
Nojorijinjinio jaara cuhuariquia jiitiaquiaari, tianio, nojoriiri na
niquitioquiaari cumaneecara.³⁵ Jaara cumaneeca masequiaari na
casaa sami, nojoriiri nareja na niquitioquiaari Jesu saquiriojosano
pueya. Nojoriiri saniniuujia casamijiu Pueyaso pueya na serotaquiaari,
nojori jiitianura na panishanojuhuaj.³⁶ Nojorijinjinio, tamonu
pueyanoori quiquiaari. Na sesaari José, Levita pueyano. Jesu
jiyaramiquishano pueyari na sesojoquiaari Bernabé. Nioori sequeya
"Cumanijiana". Chipre jiyajinia na raja.³⁷ Bernabeeri cuhuariquia
jiitiaquiaari. Na cuhuariquia niquitioquiaari cumaneecaraari. Jaara
masequiaari cumaneeca na cuhuariquia sami, nojuajaari nareja na
niquitioquiaari Jesu jiyaramiquishano pueya, casamijiu narta Pueyaso
pueya niquitiojosaanura saniniuujia.

5

Ananías, Safira sesa miishanojiniji pohuatasano

¹ Tamonu pueyanoori quiquiaari. Na sesaari Ananías quijia. Necocua
sesa quiquiaari Safira. Nojoriiri na cuhuariquia niquitioquiaari cuma-
neecarajuhuaj. ² Ananíasri na cuhuariquia samijiniji queyataquiaari
nera. Na cureeno pataquiaari Jesu saquiriojosano pueyacuaari. Juhua
papatasoo niquitioquiaari na sapojonutaari. Necocuaari na miishano
niishiquiaarijuhuaj. Majaari neyacata na quiniu quiriquiaa Ananías

niquitiosacari nareja na cumaneeca.³ Ananías niquitiosacari na cumaneeca, Pedroori na sequeree:

—Ananíasnaa, ¿casaara quia tiuquinirii Sesaca quioojajiniani, quia sapojonura Pueyaso Sohuanu juucuani? ¡Nojuacuajaari cua niishitiquii nio cumaneecaari maja puetunu quia masesanojuanaa quia cuhuariquia samijiniji! ¡Quiaacuajaari tiji queyateree!⁴ Quia cuhuariquia quia niquitioy aquishacarijia cumaneecara, cuno cuhuariquiaari quia casaa quiriquiaa. Na nuhuaji, quia jaara quia cuhuariquia niquitioree cumaneecara, quia cuhuariquia samiiri quia casaa quiriquiaajuhuaj. ¿Casaara naa sesa quia niishiriojoreerini? Naa sacuaraatia quia miishacaritij, majaari quia sapojonu quirii parta pueyano. ¡Quiaa cutaraari Pueyaso sapojoree juucua!

⁵ Ananías tojishacari naa Pedro sequencesanotej, ¡macuuri pojoquee! Puetunu pueyajanaa jaara tojiniuuquiaari nocuaji, jiyanohua shiriiq-utiupquaariiiri. ⁶ Mashiquioriiri na jiuniocoquiaari toquejinia. Na nuhuaji, na patuquiaari na jamonuraari.

⁷ Jiuujianaraca hora nuhuaji, necocuaari juhuajaniya tiuquiquiaari Pedroocuajuhuaj. ⁸ Pedroori na nequesotaree:

—Cua sequere, ¿niojuanaate nia cuhuariquia sami quiricuua?

Na riucuareeri:

—Jaa, niojuanaacuaaquinatejaj.

⁹ Pedroori na sequeree:

—¿Casaara naa nia roojotoorucuaa Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquijohua. Nojoriiri quiarijia quia panutaniyajuhuaj.

¹⁰ Jiyacaritij, maajiiri macu pojoquee Pedro shuriucuajuhuaj. Mashiquiori tiuquijiosacariuhua, nojoriiri Safira niquishuhua pojiyanohuaj, tariucua macu. Nojoriiri na patuquiaarijihuaj. Neyaca shuriucua na jamotuquiaariiri. ¹¹ Puetunu Pueyaso pueyajanaa, tamasaca pueyanio, nojori jaara tojiniuuquiaari puetunu nio miishanojinijiana, jiyanohua pueretuquiaariiri.

Queraatia mijiosacari Pueyaso cumaacata pueya niquiara

¹² Jesu jiyaramiquishano pueyari jiyanohua cutara casaa mijioquiaari Pueyaso cumaacata. Queraatia pueya naatanijioquiaariiri. Puetunu Pueyaso pueyajanaari pueyaracaanu rerejoquiaari pueya jiyaniquishano tariucuacaanu jiyaniija Salomón canujuucojouajinija, Pueyaso Secojojua tiajinia. ¹³ Tamasaca pueyari nojori puerequiaari. Majaari nojori rupuesaanu quijia. Na pueretujuacaari nojorijiniji sequetujua:

—Cuno pojoriiri maninia pueya.

¹⁴ Queraatia pueyari Jiyaniija Pueyasooqua tiuuquiaari, canuu, maa-jipohuanio. ¹⁵ Naajuhuaj, cusosuhuari patootasaaquiaari na maquetucuajinija nuujiniara. Pueyari naa niishiriojouquiaari, Pedro jaara cusosuhua shuriuquioco tajimia, cusosuhuari naataconutaniuhua Pedro naaqui jaara nojori caco netema. ¹⁶ Queraatia Jerusalén tiaca shocua quiniae pueyari na cusosuhua patootaquiaarijihuaj, Jerusalén tiacajinijara. Samaruhua sesosano pueyari jaatucunuusaaquiaarijihuaj. Puetunu pueyajanaari naatanijiosaaquiaari.

Pedro, Juan nujuatejosacari nujuatejojuajinija

17 Naaratej, pueyacuara secojonaa jiyaniija, nata quiniaa narta Saduceocuacanio, nojoriiri juaaquioquiaari shocotasano nojori quishacari. 18 Secojonaa jiyaniijaari na pueya jiyaroquiaari Jesu jiyaramiquishano pueya nojori quionura. Jaara na quiootuquiaari, nujuatejosaaquiaariiri Judiocuaca nujuatejojuajinia. 19 Pueyaso seruuri niucua jiyocuacaanuji nojoriicua rosequiaari. Nujuatejojua tohuateya riataseeri. Na tohuatejosacari Pedro, Juannio, nojori sequereeri:

20—Juhuajaniya nia quiaarohua. Pueyaso Secojonua tiajinia puetunu Jesujinijianaa nia pohuatare pueya niquiara. Nia pohuatarejuhuaj taa jatanishano pueya nia quiya quiarijiani.

21 Nojoriiri Pueyaso seru sequencesano tojiquiaari. Nojoriiri tariquiucuajui quojoquiaari Pueyaso Secojonua tiajinia. Tii niishitiojonuuriquiaa juhuajaniya Jesujiniji pueyari. Jiyacari, pueyacuara secojonaa jiyaniijaari nata quiniaata saniniujuja quojoquiaari pueya nequesoreesaqui. Puetunu Israel pueya camarucuajanaa rerejotereeri, nojori nequesoreenura Jesu jiyaramiquishano pueya. Puetunu nojorijianaa jaara tari rerejouquiaari, na pueya sequequiaariiri nojori tohuatejonura Jesu jiyaramiquishano pueya nujuatejojuajiniji, nequesoresesocoriquiano. 22 Na pueya jaara tiuquitiaquiaari nujuatejojuajinia, majaari nujuatejosano na riuriatatum quishii nujuatejojuajinia. Nojoriiri tacaretacuhua na shaacanu nuhuaji. 23 Naa pohuatanuuusuhua camarucua niquiaraari:

—Canaa tiuquishacari nujuatejojuajinia, canaari maninia cumaatia mishiquionucua na riuriataseeni. Tii cojuanaari maninia cojuariquiaa na tiootiu. Canaa riatasacari tohuateya, jshaacoori quiriquiaa!

24 Secojonua tia cojuanaa camarnu, mariyata pueyacuara secojonaa jiyaniijianucuaari tama sequetooquiaariajaa nojori shiriiquinuti:

—¿Taateerini? ¿Taariquitija socua na nuhuaji quiniutianiyatej?

25 Jiyacaritij, tamonu pueyanoori camarucuaacua tiuquishii. Naa nojori sequenceseri:

—¡Noo pojori, niaa na nujuatejocanu nujuatejojuajiniatej, nojoriiri juhuajaniya pueya niishitiojonuya Pueyaso Secojonua tiajinia!

26 Tari nojori niishishacari tee Jesu jiyaramiquishano pueya quiriquiaani, Secojonua tia camarnuuri na pueyata quojoquiaari Jesu jiyaramiquishano pueya quionura. Jaara na quiootuquiaari, nojoriiri jacaria na jaatucunuquaariuhua. Secojonua tia camarnuuri pueya puereriquiaa. Nojori jaara caponeere Jesu jiyaramiquishano pueya na juaaniutia, pueya mariqui nojori jacure saitia saniniurijia. Nojoriiri cuno puerequiaari. Nocuaji Jesu jiyaramiquishano pueyari jacaria jaatucunuusaquiaari. Majaari na caponeesaanu quiquiaari. 27 Jaara tiuquitiasaaquiaariuhua, nojoriiri Israel pueya camarucuajanaa tajinia nujuatejosaaquiaari, Sanedrincuaca tajiniatuhuaj. Pueyacuara secojonaa jiyaniijaari nojori sequequiaari:

28—¡Majaquiri nia niishiniu tojiniu! Canaaacuaaari tari nia tenujucanu juucuani maja socua cuno Jesujiniji nia pohuatanura pueya niquiara. ¿Niaate nia numaa shama tojiquianu canaa sequencesano? Naa nia niishitiosacaritij, ¡puetunu Jerusalén tiacajinia quiniaajanaari canaacua tiuttianutaniya Jesu mosaanu! Canaa sequetunutaniyari: “Cuno pojoriiri Jesu motucanu”.

29 Pedroori narta Jesu saquiriojosano pueyata nojori riucuaquiaari:

—Seetanujuanaari, pueya cuaara Pueyaso sequencesano miiria coteenu, maja narta pueya sequencesano. Maja cutaraari canaa tarinitianunoj. Na nuhuaji cutara, nio jiyajinia jiyaniijianucua sequencesano cuaara miishaaria. ³⁰ Pueyasoori tariucuacaanu pa supuetanaa Jiyaniijia quiquiaarijuhuaj. Cuno Pueyasujuanaacuajaari niyacutesanojinia nia cusojuasano samiitianiquianuhua. ³¹ Pueyasoori na tacaniquianu jiyocuacaanu. Na miaquetajara na cajitiquianuuri Jiyaniijajanaa na quiniuucua, pocuaji Tacuna na quiniuucuajuhuaj. Naa miiquianuuri Israel pueya tacatonuhuara noojia Pueyasocua, Pueyaso jiyanooniuria pajaniya sesa pa miishanojiniji. ³² Naaratej, canaari canaa tojishano pohuataani, canaa niquishanonio. Naajuhuaj, Pueyaso Sohuanuuri canaa niishitiojoquia maninia canaa pohuatanura pueya niquiara. Pueyasocuajaari na tojitiana niquitioquia na Sohuanu.

³³ Naa Judiocuaca camarucua tojishacari nojori sequencesanotej, juuaquioreeri. Nojori puecoonu panirii juucuaari. ³⁴ Jiyacaritij, tamonu pueyanoori narta camarucua tajiniji nujuquiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuacaanu rootasano niishijia quiquiaari cutara. Naajuhuaj, nojuajaari jiyanoehua narta Israel pueya tojishano pueyano quiquiaari. Gamalielri Secojojua tia cojuanaa camarnu sequequiaari Jesu jiyaramiquishano pueya na tohuatanijionura rupaquijia. ³⁵ Na nuhuaji, saa camarucua quishacarija tií nata, nojuajaari naa nojori sequequiaaritij:

—Cuarta Israel pueyanaa, jacaria nia niishiriojore taa nia miintianiya nio pueyani. ³⁶ ¿Majateeri nia niishiniu taa Teudas miiquiaari quiari naatajani? Nojuajaari jiyaniijira quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaquiaari. Puetunu na pueyajanaari niyaquequiaariuhua. Naa puequequiaariiri Teudas miiniu panishano. ³⁷ Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajinijinio tamonu Judasri jiyacari César ruuretaquiaari. Queratia pueyari na nuhuajiquiaari nojori jiyaniijia na quiniuria juucua. Nojuajaari mosaaquiaarijuhuaj. Puetunu na pueyajanaari niyaquequiaariuhuaj. ³⁸ Naaratej, naa nia sequeyanijia: nia tarinitiare nio canuu. Nojori niishitiosano jaara tama nojori niishishanojuaja quiri, shaajenutaniyari. ³⁹ Saniniuuja, nojori miishano jaara seetanujuanaa Pueyasojiniji quiri, majaari nia naata nojori tarinitiniu quiniutianiya nojori miishanojiniji. Nocuaji tama nia cuaqueyajaaja nia cojuare, majaari Pueyasota nia miaquetojonuruhua, naa nojori nia miishacaritij.

⁴⁰ Puetunu camarucuajanaari Gamaliel sequencesano tojiquiaari. Na nuhuaji, Jesu jiyaramiquishano pueyari tiuquinittiasaaroehua. Camarucuari nojori mojoree nareja. Nojori tenujutureeri maja Jesujiniji nojori pohuatanura socua pueya niquiara. Naa nojori miishaanu nuhuajitij, Jesu pueyari cartequesaaquiaariuhua. ⁴¹ Jesu jiyaramiquishano pueyari camarucua rerejoujiniji tohuareetaquiaariuhua shuquiriaatia. Nojoriiri timiquioriquia cararaatia nojori camarucua miiniuucua nojori, Jesujiniji nojori poojotanuucua maninia. Majaari nojori seetanu quiquiaari nojori Jiyaniijia Jesujiniji. ⁴² Majaari nojori pishiniu quiquiaari nojori pohuatanura Jesujiniji. Socua pueya niishitiojonura jiyacatequiaariiri. Nojoriiri pueyaracaanu pueya niquiara

pohuatariquiaa Jesucristojiniji, puetunu juucajanaa, Pueyaso Secojoua tiajinia, mariyata puetunu Jerusalén tiacajiniaqueyajanaanio.

6

Mashiquiopue mianuutenaara saquiriojosacari

¹ Jiyacaritij, Jesuucua tiuuniaa pueyari socua canequiaari. Puetunu nio pojorijinijiniojuanaani, noojaqueyari Judio rupaa pocuanaa quiquiaari. Naajuhuaj, noojaqueyari Griego rupaa pocuanaa quiquiaari. Jiyacaritij, Griego rupaa pocuanaari juaaquoquaari Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niquitioyaquiquiaa miaquesanonia?

² Nocuaji, Jesu jiyaramiquishano doce pueyari puetunu Jesuucua tiuuniaa pueyajanaa rerejoquiaari. Naa nojori sequequiaarii:

—Maja maninia canaa cartenura Pueyaso rupaa pohuatatu, canaa mianuutenura mashiquiopue. ³ Cunora canaa tapueyocuacanaa, tama niajanijayjinijo nia saquirijoore siete maninia miijiaca pueya, niishi-jijaca, Pueyaso Sohuanuraca cutara. Nojori nia seeratare nio poonijiosano, maninia nojori mianuutenura pa mashiquiopue. ⁴ Canaacua saniniuujia saa Pueyaso secojorenijia. Naajuhuaj, majari canaa tarintianu quiniutianiya Jesujiniji niishitiojonu.

—Puetunu pueyajanaari na shuquiriniutia naa riucuaquiaari:

—Taaquiririnij, naacuaaquiniateja maniniajaj.

Jiyacaritij, pueyari Esteban saquirijoquaari. Nojuajaari jiyanohua Pueyasoocua tiuujia pueyano quiquiaari. Nojuajaari Pueyaso Sohuanu cumaacaraca quiquiaarijuhuaj. Nio pojoriiri Estebanta saquirijosaaquiaarijuhuaj: Felipe, Prócoronio, Nicanornio, Timónnio, Parmenasjuhuaj, Nicolásnio. Nicolásri tahue quiquiaari Antioquia tiacajinijo. Tii rasaaquiaarii. Nojuajaari tarijia Judiocuaca niishitiosano pueyano quiquiaari, Judio pueyanora na quiniuria. ⁶ Puetunu pueyajanaa jaara cuno siete pueya saquirijoquaari, nojori jiyataquiaarii Jesu jiyaramiquishano doce pueyacua. Jesu saquirijosano pueyari cuno siete canuu nacaacua niaquiaari na juaashiquiaca. Pueyaso secnjoturee nojoriicuaraari Pueyaso Sohuanu cumaquinuria nojori, mi-aquesano niquitiojonaa nojori quiniuria.

⁷ Jiyacariti Pueyaso rupaari socua tojishano quiquiaari. Jesuucua tiuuniaari socua canequiaarijuhuaj. Queraatia Judiocuacaacuara secnjonaa pueyari Jesuucua tiuquiaarijuhuaj.

Jesu ruuretajaca quiasacari Esteban

⁸ Estebanri Pueyaso cumaacaraca quiquiaari jiyanohua. Pueyasoori maninia na jiitiaquiaari. Naacujitij, nojuajaari cusosuhua pueya naatananijoquaari Pueyaso cumaacata. Pueyari niishiquiaari Esteban pohuatasanoori seetanujuanaa Pueyasojiniji quiquiaari, nojori niquishacari jiyajeneta na miishano Pueyaso cumaacata.

⁹ Jiyacariti, tamasaca Judiocuacaari Jerusalén tiacajinia quiriquiaa. Nojori maanuuri sesojosaaquiaari “Quioosanojiniji cartequesano pueya”. Quiquiaarijiaariuhua Cirene tiacajinijo pueya, Alejandría tiacajinijo pueya, Cilicia jiyajinijo pueyajuhuaj, Asia jiyajinijo pueyanio. Puetunu nojorijianaari Estebancua rerejoquiaari

nata juayonuutanura.¹⁰ Nojoriiri majaa na naata Esteban shocotanu quiquiaari nojori niishishanota. Estebanri saniya nojori shocotaquiaarija. Nojuajaari Pueyaso Sohuanu niishitiojosanota saa maninia pohuataquiaarija nojori niquiara.¹¹ Maja socua nojori rejeretasacari Esteban pohuatasano, nojoriiri tamasaca pueya niquitioquiaari cumaneeca, najuhuana nojori cuaracashiniuria camarucua niquiara Estebancuara. Cuno pueya, cumaneeca niquitiojosaaquiaari na cuaracashiniuriani, nojoriiri naa sequequiaari Judiocuaca camarucua niquiaratej:

—¡Taaquiriinij, canaacuajaari cuno pueyano tojiquianu Moisés sesacaanoni, Pueyaso sesacaanojuhuaj!

¹² Naa nojori sequencesacaritij, puetunu pueyajanaari juaaquioree, Judiocuaca camarucuajuhuaj, Moisés Rootasano niishitiojonaanio. Puetunu nojorijianaari Estebancua catecanoquiaari. Na quiatureeri. Na nuhuaji, na jaatucutuquiaari pueya nequesoreesaquiriaari, Israel pueya camarucua nequesoreesocoriquiano tii nojuaja.¹³ Socua pajesaaquiaariiri tamasaca, Estebancuara tonujuriquiano najuhuanaj, na cuaracashiniutia. Cuno pojoriiri naa sequequiaari camarucua niquiaratej:

—Nio pueyanoori pueyaracaanu sesacaquiaa Pueyaso Secojoua tia. Moisés Rootasano sesacaarioquiohuariuhuaj.¹⁴ Canaari socua naa na sequenceso tojiquiaajaaniuhuaj: “Nazaret tiacajinjinio Jesuni, nojua-jaari Pueyaso Secojoua tia niyartanutaniya”. Naajuhuaj, tariucuacaanu Moisés niishitiojosano pajaniya pa cartetenutaniyaquiniaari.

¹⁵ Puetunu camarucuajanaari na cajitiushaquiji niquitariquiaa Esteban. Nojoriiri na jiquioco niquiquiaari shacantuca, juhua Pueyaso seru jiquioco.

7

Esteban pohuatasano

¹ Pueyacuara secojonaa jiyanijjaari Esteban nequesotaquiaari:

—¿Seetanutejanaa taa nio pojori sequereecuajani?

² Nojuajaari na riucuaree:

—Cua panishano pueyanaa, cua camarucuanaa, cua tojitiare. Pueyasoori jiyanohua maninia. Nojuajaari pa supuetana Abrahamcua metquaari Mesopotamia jiyajinna na quishacari, na pacuyaquishacaricia Harán tiacajinna.³ Pueyasoori jiyacari naa na sequequiaari:

“Quia tiujiare quia jiya, quia pueyanio. Niiquiji quia quiaare, janiya cuaara quia sequerejaatijia, niya quia quishii. Quiocua tii jijoje-see cutara”.

⁴ Abrahamri Pueyaso sequenceso tojiquiaari. Quiaquiaariiri Caldeo pueya jiyajinji. Harán tiacajinna quishiiri. Tii shaajaquiaari na shipininioori. Na nuhuaji, niyara pacuquiaariiri, paa tii quiyani.⁵ Jiyacaritij, Pueyasoori juhuanojuaja maja Abraham na niqutionu quiquiaari nio jiya. Naacuajitij, Abrahamri maja quenaaja jiya na jiitianu quiquiaari tama na quipiarajaaja. Naajaa, Pueyasoori na sequequiaari:

“Janiya na nuhuaji quia niqutionutaniya nio jiyani. Quia jaara shaaje-yare, quia niquiohuara quiniutianiya saniniuurija”.

Pueyaso jaara naa sequequiaari Abrahamtej, Abrahamri jiyacari juhuanojuaja niquiohuaju quiquiaari.⁶ Pueyasoori naa pacutequiaari sequenu Abrahamtej:

“Puetunu quia jinianuucuajinio supueno pueyajanaani, nojoriiri na niishishoo pueya jiyajinia quiniutianiya. Cuno jiya pueyari nojori poonijiotenutaniya jiyanoohua. Naa naquiya miishaanutaniyari. Tii nojori quishacari, na shoconujunutaniyari cuatro ciento mar-ijia”.

⁷ Pueyasoori Abraham sequereejuhuaj:

“Janiyari saniniuujia cuno taucuaca naminiutianiya quiocuajinio supueno pueyacuani. Janiyari nojori saniiutionutaniya saniniunijia nojori poonijiotenuucua quiocuajinio supueno pueya. Na nuhuaji, nojoriiri tiji quojonutaniuhua niyara. Nojori tiuquijiosacariuhua, nojoriiri cua secojonuujuaca quiniutianiya niya”.

⁸ Pueyasoori naa Abraham rootaquiaarijuhuaj:

“Niocua nia cararaatiuuquia co miatejore. Cunoori juhua naajiosano nia cuaqueyajinia quiniutianiya, pueyaracaanu nia niishiniuria cua seqesano niajaniya”.

Naa Pueyaso seqesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaquaiaari, na queeri neyanu cararaatiuuquia co miatequiaari na camueesacari ocho juuca. Isaacri naa miiquiaari neyanu Jacobojuhuaj. Pueyasoori Jacobo sesojoquiaari “Israel”. Jacoboori naa miiquiaari necohuahuaj. Necohuari quiquiaari doce canuu. Cuno doce canuu, Jacobo niquiohuani, nojoriiri puetunu pa doce Israel pueyapue supuetanaajanaa.

⁹ ’Pa supuetana Jacobo niquiohuajinijinioni, tamonuuri sesojosaaquiaari José. Tapueyocuacaari José juaajiacá quiquiaari jiyanoohua, puer na que panishano José quishacari. Majaari nojori niquitiuniu paniniu quijia nojua. Na queeri socua jiyanoohua José panijia quiquiaari na pueranaajiniji. Tapueyocuacaari cunora casami niquitiojonaa pueya niquitioquiaari cumaneecara tarajanu José. Casami niquitiosocoriquiano serura. Naajaa, Pueyasoori Joseeta quiriquiaa.¹⁰ Pueyasoori na naacuquiaari naquiya na miishacari. Pueyasoori na jiyatequiaari niishijiara. Naaratej, Egipto jiya jiyajinia Faraónri na maniniucuaquiaari. Na jiyatequiaariiri puetunu Egipto jiya pueya camarnurajanaa. Na jiyateree na tia camarnurajaariuhuaj.

¹¹ ’Na nuhuaji, miajenuuri quiquiaari puetunu Egipto jiyajinajanaa, Canaán jiyajinianio. Pa supuetanaa quishacari Canaán jiyajinia, nojoriiri quera titiacoquiaari na miajajaara. Seetanujuanaa shaaqui quiquiaariiri nojori miasano.¹² Jiyacaritij, Jacoboori caminiujiushaaquiaari: “Egipto jiyajinia quiyaquinia trigo”. Naaratej, necohua jiyaroreeri trigo masenura. Jiyacari nojori quojosacarini, cunoori shushajanaa nojori quianu quiquiaari Egipto jiyajinia. Cuno Jacobo niquiohuani, nojoriiri pa supuetanaacuaja.¹³ Coteenu nojori masesano jaara puequequiaari, nojoriiri Egipto jiyajinia tacatequiaariuhua socua trigo nojori masenura. Jiyacaritij, Joseeri tapueyocuaca sequequiaari: “Janiya nia tarajanuni”. Joseeri Faraón niishitiquiaari tapueyocuacajuhuaj. Naaratej, Faraónri shusha niishiquiaari tejeno pueyanote

José quiquiaarini. ¹⁴ Joseeri tapueyocuaca sequequiaari: “Pa que Jacobo nia riquioo niyara, puetunu necohuatajanaa”. Puetunu nojori-jianaari quiquiaari setenta y cinco pueya. ¹⁵ Jacoboori naa pacuquiaari Egipto jiyajiniaratej. Na nuhuaji, saaquianoori tii shaajeseequiaari. Necohuari tii puequeseequiaarijiuhuaj, tariucua saaquiapue. ¹⁶ Na nuhuaji, Egipto jiyajiniji pacusaaquiaariiri nojori nucuhua. Siquem tiacajinia niojosaaquiaariiri na supuetana Abraham raaco. Cuno raari cuhuariquiajinia quijia. Abrahamri cuno cuhuariquia masequiaari tariucuacaanu pueyajiniji raa na jiitianura necocua na niajara jaara cu-soyare. Cuno cuhuariquia masequiaariiri cumaneecata Hamor niquio-huajiniji, Siquem tiacajinia.

¹⁷ Pueyasocuajaari tariucuacaanu Abraham sequequiaari nojuajaari nio jiya na niquitionutaniya. Quera na niquitionu panishacari, Israel pueyari jiyanoehua canequiaari Egipto jiyajinia. ¹⁸ Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanoehua tar-ijia quiquiaari José shaajenu nuhuaji. Naacujitij majaari cuno jiyani-ijia niishiniu quiquiaari José. ¹⁹ Cuno jiyaniijiaari taraatia miquiaari shusha roosano pa supuetanaa niquiohua. Pa supuetanaa sequequiaari-iri shusha roosano cuaara quejoosaaria moojinia. Pa supuetanaari taraatia miquoquiaari naacuatej. ²⁰ Moisésri jiyacari rasaaquiaari. Pueyasoori na maniniucuquaiaari. Na queyari na jiitiaquiaari ru-paquijia. Jaara na shoconujuquiaari jiuujianaraca raca, conaajaari carijiniacuma niasaaquiaari. ²¹ Faraón niyatouri na paquiaari sanini-ujia. Na canashitiquiaari juhua na mueyari. ²² Egipto pueyari Moisés niishitijoquiaari puetunu nojori niishishanojuanaa. Puetunu Moisés sequesanojuanaari jiyanoehua tojishano quiquiaari cutara. Puetunu na miishanojuanaari maninia quiquiaarijiuhuaj.

²³ Cuarenta marijia jaara shocojoquiaari Moisés, mashaja na quishacarijia, narta Israel pueyacua rucuanenu paniquiaariiri, nojori na niquiniuria. Judiocuacacuajaari cuno pojori, naa sesojoshiya Israel pueyatani, maja tamonu. ²⁴ Naacujitij, Moisés jaara quiaquiaari narta Israel pueya niquiniuucua, saaja Egipto pueyano niquishii narta Israel pueyano majacuyanoori. Moisésri narta Israel pueyanoocua namiquiaari. Na juaaniutia moquiaari saniniuuja cuno Egipcio pueyanoori. ²⁵ Moisésri juucua jiyaniquiaari narta Israel pueyari niishiniutaniya Pueyasoori na jiyaroree nojori na mashiquiniuria Egipto jiyajiniji. Majaari nojori niishiniu quiquiaari saaja. ²⁶ Moisésri socua tariqui quiaquiaari narta Israel pueya niquiniuuquiohuaj. Nojuajaari saaja riuriatasee tama nojori piyotaanojuaja. Juucua nojori ruparetanu panishiiri. Nojori sequereeri: “¿Niaateeri tamonu, niaa jaara naa miitoyaniquitij? ¿Casaara naa nia nootujutoyani?” ²⁷ Cuno narta pueyano piquiriquiaani, nojuajaari saaja Moisés caporee. Na sequereeri: “¿Cante quia jiyatecanu juhua canaa jiyaniijia quia quiniuriani, naa quia sequenura canaatej? ¿Cante quia jiyatecanu canaa nequesoreenaraní?” ²⁸ ¿Quiaateeri cua monu paniyajuhuaj, naatej taa quia morucuaa cuno Egipto pueyanocuaani?” ²⁹ Moisés tojishacari naa cuno pueyano sequesanotej, ritia mashiquiaari Egipto jiyajinijiiri. Madián jiyajinia quishiiri tamonu pueya jiyajinia. Moisés quishacari cuno jiyajinia, tii camiquiaariiri. Caapiqui canuuniyojua mueratejoquiaariiri.

30 'Cuniqui na quishacari, na shocojoquiaariiri cuarenta marijia socua. Tamonu juuca, Moisésri rucuanejoriquiaa cariiquia jiayjinia, pueya sesojosano Sinaí tuhuananu shuriucua. Pueyaso seruuri tii nocua muetaquiaari nequeru casaja noshiyanojiniji. ³¹ Moisés niquishacari mani noshiyano, nojuajaari shiriiquiquiaari. Jaara nocua categanoquiaari na niquinuria maninia, saaja Jiyanijia Pueyaso tojirii manijiniji pocuaanoori. ³² Pueyasoori naa na sequequiaaritij:

"Janiyacuajaari Pueyasoni: quia supuetanaa Jiyanijia: Abraham Jiyanijia, Isaac Jiyanijiajuhuaj, Jacobo Jiyanijianio".

Moisés jaara naa tojiquiaaritij, tetecareeri. Majaari mani noshiyano na niquiniu paniniu quiquiaari na puerenuta. ³³ Pueyasoori na sequequiaari:

"Cuniquija quia jocojore quia sapatu. Niya, quiaa tii nujuuaani, nioori cua quishaqui. ³⁴ Janiyacuajaari cua pueya niquipuiaa Egipto jiayjinia quiyanoni. Egipto pueyari nojori miitaa puera. Cua pueyari noonu rejeretacoya. Janiyari nojori sariyocuatunu tojiquiaa taraatiani. Nojoriicua roseyareenijia cua mashiquiniuria nojori Egipto pueyajiniji. Cunora, janiyari quia jiaronutaniya Egipto jiayjiniani".

Pueyasoori naa Moisés sequequiaaritij.

³⁵ 'Israel pueyari tarijia Moisés juaaquaaricuaja. Naa na sequetuquiaariiri: "¿Cante quia jiaytecanu juhua canaa jiyanijia quia quiniuriani, canaa nequesoreenarahuaj?" Naajaa, Pueyaso cutaraari see-tanujuanaa na jiayroquiaariuhua nojori jiyanijia na quiniuria, Pueyaso seru jaara nocua pocuaquiaari nequeru casaja noshiyanojiniji. Na jiayroquiaariiri puetunu nojori tohuatananjioriquianojuanaa Egipto jiayjiniji. ³⁶ Moisésruuaari pa supuetanaa mashiquiquiaari Egipto jiayjiniji. Nojuajaari jiayjeneta miishano miijioquiaari Pueyaso cumaacata cuno jiayjinia, mariyata nojori niuutiasacari Naatunacu jiyanishano camini-ajuhuaj. Naa miiquiaari pueyaracaanu cariiquia jiayjinijaariuhuaj. Cuarenta marijiaari nojori shocojoquiaari pueyaracaanu nojori rucuanejosacari tii. ³⁷ Nio Moisésni, nojuajaari naa sequequiaari puetunu Israel pueyajanaa:

"Pueyasoori niaacua jiaronutaniya tamonu pueyano, na rupaa po-huatariquiano nia niquiara, taa na jiayroquiaari janiyacuuaani. Tama nia niquiohuacuajiniojuaaja supuenutaniyari. Niocua saa nojuaja tojiri cutara".

³⁸ Nio Moisésri narta Israel pueyata quiquiaari cariiquia jiayjinia. Nojuajaari Pueyaso seruta pocoojoquiaari Sinaí tuhuananuucua pa supuetanaa jateesacari tuhuananu cari. Moisésri Pueyaso seru rootasano na tojishano niishitijoquiaariuhua pa supuetanaa. Cuno rootasanoori samiitianijia rupaa quiquiaari pajaniyara, maninia pa quiniuria pueyaracaanu.

³⁹ 'Pa supuetanaari saa na ruuretaquiaariija. Majaari nojori tojiniu paniniu quiquiaari Moisés. Egipto jiayjinia tacatenu paniquiaariuhua saajaari. ⁴⁰ Naacuajitij, Moisés tarishishacari tuhuananuucua Pueyaso seru na tojishacari, pueyari socua Moisés tarajanu Aarón sequequiaari: "Puera quia shipinijiorequi pueyasohua, nojori puetariquiano pajaniya. Majaari pa niishiniu taa Moisés miishiicuaani. Shaajeseeecuaa naasucuajuhuanajaj, mariqui tiuquiriohua. Nojuajaari najuhuana pa

mashiquiquianu Egipto jiyajiniji".⁴¹ Naacuajitij, nojoriiri na pueyasora shipiniquiaari juhua seru juunu niyanujua niquishano. Nojoriiri na seya puecooquiaari na shuquiriniutia na juaashiquiata na shipinitiushano pueyasocuara. Nojoriiri jiyacari sacuaraatia timiquoriquiaa.⁴² Pueyasoori socua nojoriicuají pishiquiaari. Nojori tarinitiaquiaariiri jiya cajiniocua nunucojuaa nojori jiyatenura tama nojori pueyasohuara-jaaja. Seetanujuanaa naa naajiotasano quiyajaariuhua tariucuacaanu Pueyasor sequesano caminiuijuniaa naajioneejinia. Naa sequeyari:

"Israel pueyanaa, ¿canaacuara nia puecooquiaari pueyaracaanu nia seyaní cariiquia jiyajinía nia camarucuneetasacari cuarenta maríjia cuaara nia shocojoquiaarijiaatiójia? ¿Cucuaratee? ¡Maja! ¿Canaacuara nia catijiaquiaari nia seyaní? ¿Cucuaratee? ¡Maja! Niaari puetunu cuno miiquiaarijiana tamá nia jiyatesano pueyasohuacuarajaaja.⁴³ Niaari Moloc suhuorotu pataquiaari, shoqueniji suhuorotu, nia pueyasora nia jiyatesanoni. Cunocuajaari nia sequesano, 'canaa pueyasor'. Niaari Refam pataquiaarijihuaj, juhua rijia niquishano shipinishano. Niaari puetunu nio shipinijoquiaarijiana nia pueyasohuara, nojori cariquimiaji nia mojоquetaconura, nia shuquiritisacari nojori. Nocuaji, janiyari nia jiyaronutaniya tucuacaanuni, Babilonia jiya tamajiria".

Pueyasocuajaari naa sequequiaari pa supuetanaatej nojori miiniuucua sesa.

⁴⁴ Estebanri socua pohuataquiaari naatej:

—Pa supuetanaari Pueyasor secojojua suhuorotu jiitiaquiaarijihuaj, cariiquia jiyajinía nojori quishacari. Nojoriiri tii racataquiaari Pueyasor niquifiosano saajianeeca. Nocua naajiotasano quiquiaariiri Pueyasor rootasano na pueyara. Pueyasoori cuno suhuorotujiniji pocuquiaari na pueyacua. Cuno suhuorotuuri shipinishaaquiaari taa Moisés niquitishaquiaaricuajani Sinaí tuhuananuuucua na quishacari. Pueyasoori jiyacari naa sequequiaari Moisés: "Quia shipiniri taamueca cua niquitiquianu quiajaniyacuajani".⁴⁵ Na nuhuaji, pa supuetanaa, canapuete naatujoori quiriquiaa Moisés quishacarini, nojoriiri cuno suhuorotu pataquiaari. Na patatuquiaariiri Josuéta nojori pacusacari nio jiyajinía paa tii quiyani. Nojori miaquetoojosacari taucuacata, nojoriiri Pueyasor secojojua suhuorotu patariquiaa. Pueyasoori cuno taucuaca jataquiaari nio jiyajiniji, saniniuujia pa supuetanaa jiya na quiniuria. Cuno suhuorotuuri pa supuetanaata quiquiaarijia, David jaara jiyaniijia quiquiaari.⁴⁶ Jacoboori pa supuetanaa jiyaniijia David supuetana quiquiaarijihuaj. Davidri Pueyasor tojijia quiquiaarijihuaj. Pueyasoori na shuquiritisacari. Naaratej, Davidri Pueyasor Secojojua tiara tianu paniquiaari juucua.⁴⁷ David niyanu Salomón cutaraari Pueyasor tiaquiaari.⁴⁸ Naajaa, jiyocuacaanu Quijiaari maja na quiniu pueyano tiasanojiniaaco. Tariucuacaanu Pueyasor sequesano caminiuijuniaari naa naajioquiciaari Pueyasor sequesano nojuaja:

⁴⁹ "Jiyocuacaanuuri cua quiqio. Jiyari saniniuujia cua niohuaca cua niaja. ¿Taamueca tia nia tianutaniya quiriajaaraní?" Jiyaniijiaari naa sequeyaquij. '¿Taa nia sequeyani: na mueecujuara pa miiiri, shuquiriaatia na quihiara?' Maja.⁵⁰ ¿Majateeri puetunu nio jiyajinía niquishanojuanaa cua juaashiquiata cua miishanocuaja, jiyocuacaanujuhuaj?"

⁵¹ Estebanri socua nojori sequequiaari:

—¡Niaari tojitiaashijianucua! ¡Niaari Pueyaso sequencesano ruuretaquiaa juhua nia supuetanaa! Nioojiaari maja juhua Pueyaso pueya jiuu-jia. Nia numaacaari maja Pueyaso rupaa na tojiniu paniniu. Ni-aari pueyaracaanu tojiyaquiya Pueyaso Sohuanu niishitiosano. Ni-aari Pueyaso tojiyashijianucua juhua nia supuetanaajuhuaj.⁵² Nia niishiritioj, ¿nia supuetanaate quenaa niquiriyatujua Pueyaso sequencesano caminiuijuniiaa miitiaaquiquiaari? Nia supuetanaari puetunu Pueyaso sequencesano caminiuijuniunajanaa miiquioquiaari naquiya. ¿Quenaaja niquiriyatu nojorijnijinote miitiasoo cureequiaari? Maja. Nojoriiri tari puecooquiaari noo pueya, canapuete maninia mijiia mijiria niriquianojinji pohuatanuuquiaaricuajani. Cuno maninia mijiia jaara tiuquiquiaari, niaari sesa mijiia pueya na niquitiocanu nojori mosocoriquiano. ¡Niaari naa mocanu Pueyaso Jiyarosanotej! ¡Niaari pueyara-caanu Pueyaso ruuretaquiaa!⁵³ Naacuajitij jiyocuacaanuji Pueyaso seya pohuatasano Pueyaso rootasano niaarani, majaari cuno nia tojiniu quiquiaajuhuaj.

Jesu ruuretajaca mosacari Esteban

⁵⁴ Pueya jaara naa tojitiuquiaari Esteban sequencesanotej, nojoriiri jiyanolua juaaquioree. Na juaaniutia miaquenuuree na quiacaari. ⁵⁵ Jiyanolua Pueyaso Sohuanu cumaquishacari Esteban jiuujia, nojua-jaari jiyocuacaanu mauquiaari. Saaja Pueyaso shacantuua niquiriiri. Jesu niquirijijaariuhua na Que Pueyaso miaquetajara nujuano.⁵⁶ Naa na niquishacaritij, nojori sequeree juucuari:

—¡Nia niquishuriniaja! Jiyocuacaanu niquiya riatenonijia. ¡Pueyaso Niyana niquianijia na Que miaquetajara nujuano!

⁵⁷ Pueyari na numaaca mishiquionuuquiaari saaja, maja na tojitiu-niuria Esteban sequencesano. Jiyanolua sariyocuatuquiaari na juaaniuti-aari. Na nuhuaji, Estebancua cocuatequiaarii. ⁵⁸ Na caponeetuquiaari Jerusalén tiacajiniji. Tiacajiniji tohuatesaaree tamamaari. Na tohu-atesaanu nuhuaji, tii na jacutuquiaari saitiaari. Na jacuturiquianoori na toqueya cojuatequiaari tamonu mashaja. Nojori toqueya cojuna sesa quiquiaari Saulo. ⁵⁹ Nojori jacutusacari saitia Esteban, Estebanri Pueyaso secojoriquiaa naatej:

—Jiyanjijiana, cua sohuanu quia riri quia shuriucuara.

⁶⁰ Na nuhuaji, mojoquetareeri. Jiyanolua nacaquiaari na nuhuajiri-aari:

—¡Jiyanjijiana, majaari nio pojori saniitionu naa nojori miiniuucua janiyatej!

Naa na sequenu nuhuajitij, cusoqueeri.

8

Saulo miishacari naquiya Jesuucua tiuuniaa

¹⁻² Pueyaso panijiaca pueyari Esteban quete patuquiaari na jamotu-socoriquiano. Nojoriiri Esteban sapuequiaari. Cuno juuca, Jerusalén tiacajinia quiniaa Judiocuacaari juhuacatecara miitianu coteequiaari puetunu Jesuucua tiuuniaajanaa. Nocuaji, puetunu nojorijianaari tiji mashiquiaari. Saaja Jesu saquiriojosano doce pueyari tii cureequiaari nojori nuhuaji. Nojoriiri na mashishacari niyaquejoquiaari puetunu Judea jiyajinajanaa, Samaria jiyajiniaranio.³ Jiyacari Sauloori socua jiyacateriquiaa miitianu Pueyaso pueya. Nojori pajequiaari puetunu

tiacajiniaequeyajanaari Jerusalén tiacajinia. Na riuriatasacari, na jay-oquiaari tiacojiiri, na nujuatejosocoriquiano nujuatejojuajinia, maa-jipohua, canuunio.

Jesujiniji pohuatasasacari Samaria jiyajinia

⁴ Mashiyocuatuno pueyari puetunu na quiasacojuanaa Jesujiniji po-huatanuuquiaari pueya niquiara. ⁵ Nojorijinijinio quiquiaarijuhuaj Felipe. Nojuajaari mashiquiaarijuhuaj tamonu tiacajiniara Samaria jiyajinia. Cuno tiacajinia juhuacatecara pohuataquiaari Jesucristojinijijaarijuhuaj. ⁶ Puetunu pueyajanaari Felipe pohuatasano tojiniuucua rerejoquiaari. Pueyari sanaa na tojitiaquiaari. Nojoriiri Felipe shooti-aquiaari tacuriitia, na miishacari jiyajeneta casaa Pueyaso cumaca-tata. ⁷ Samaruhua tohuatanijioriquaa pueyajinijiiri. Samaruhua to-huareetasacari pueyajiniji, sariyocuamaquiaari. Queraatia cumatacu-ruhuana cusosuhuari naatanijiosaaquiaarijuhuaj, sesacujuanucuanio. ⁸ Naaratej, puetunu cuno tiacajinia quiniae pueyajanaari jiyanohua shuquiriquiaari.

⁹ Shimiachuuri cuno tiacajinia quijiajuhuaj. Na sesa quiquiaari Simón. Cuno tiacajinia quiniae pueyari na pueretujua. Puetunu pueyajanaa sapojojuaari jiyajeneta na miijiosanota. Naa sequeja tama na cuaque-yayaarijia: “Janiya cutaraari tojishano pueyanoni”. ¹⁰ Puetunu pueyajanaari na tojijia quiquiaari, camarucua, muerasunio. Nojoriiri seque-tuquiaari: “Nio pueyanoqui jiyanohua Pueyaso cumaaca jiitiae”.

¹¹ Puereeta Simón miishacari pueyaracaanu, pueyari sapo-josaaquiaari. Naaratej, pueyari na sequesanoocua tiuquiciaari. ¹² Na nuhuaji, nojori jaara tojiquiaari Felipe pohuatasacari Pueyaso rupaa, Jesucristojinijijiujuhuaj, cuno Samaria pueyari Jesuucua tiuquiciaari cutara. Canuu, maajipohuajjuhuaj, nojoriiri tiuquinijiosaaquiaari moojinia. ¹³ Simónri Jesuucua tiuquiciaarijuhuaj. Tiuquinisha aquiaariajuhuaj. Na tiuquinishaanu nuhuaji Felipeecua sacuaquiaarii. Felipe shootiaquiaari tacuriitiaari Felipe miijiosacari jiyajeneta casaa Pueyaso cumaacata.

¹⁴ Jerusalén tiacajinia Jesu saquiriosano pueya jaara tojiquiaari taa Samaria pueya tiurii Pueyasoocuani, nojoriiri cuniquiji jiyaro-tuquiaari Pedro, Juannio. ¹⁵ Nojori tiuquishacari Samaria jiyajinia, cuniqui quiniae Pueyaso pueyacuara secojotureeri nojori jiuujiajinia Pueyaso tiuquitiniuria na Sohuanujuhuaj. ¹⁶ Majaari Pueyaso So-huanu tiuquinii quiquiaari juhuanojuaja nojori jiuujiajinia. Nojoriiri nareja moojinia tiuquinijiosano quiquiaari Jesuucua nojori tiuushacari. ¹⁷ Pedro, Juan, cunora na juaashiquia niojoquiaari pueyacua, nojori-icuara na secojotusacari Pueyaso. Naa nojori miishacaritij, Pueyaso Sohuanuuri cuno pueya jiuujiajinia tiuquiciaari cutara.

¹⁸ Simónri niquiriquiaa taa Pueyaso Sohuanu tiuquiciaari pueya jiuujiajinia Jesu saquiriosano pueya niasacari na juaashiquia no-joriicuani. Naaratej nojuajaari Jesu saquiriosano pueya niquitionu paniquiaari cumaneeca juucua, cuno cumaaca na jiitianurajjuhuaj. ¹⁹ Simónri naa sequequiaari nojori:

—Cua niquitionreja cuno cumaaca. Janiyacua Pueyaso Sohuanu panijiacaacua niare cua juaashiquianija, Pueyaso Sohuanu nojori masenurajjuhuaj, taa nia miyacuaani.

²⁰ Pedroori na sequequiaari saaja:

—¡Quia cumaneeca cuaara shaajeera quiatajuhuaj! Quia naasucuaari jiyaniya Pueyaso Sohuanu cumaneecata masesano. Quia niishiri, Pueyasoori na Sohuanu niquitioquia nareja na tojitiajaca pueya.²¹ ¡Pueyaso Sohuanu cumaacaari maja quiarano! Quoojiaari jiyanojua sesa quiya Pueyaso niquiara, nocuaji maja na cumaaca niquitiosaanu quiniutianiya quiajaniya.²² Jiyanojua sesa quia niishiriojosanojiniji quia pishiriohua. Pueyaso quia secojore na jiyanooniuria quiajaniya naa quia niishiriojosanojiniji quioojiajinatej.²³ Niishiyacuajanijia, quiaari juhua cartesoo quiyajaa, sesa miiniuucua jiitinio quia quishacaricia. Quoojiaari puera najiquitishano quiyajaa jiyanojashijia quia quiniuucuajuhuaj.

²⁴ Simónri na riucuaquiaari:

—¡Pueyaso nia secojorequi cucuara, mariqui cua saniitioreeri taa nia sequeyacuajani!

²⁵ Na nuhuaji, Pedroori Juanta socua pohuataquiaari Jiyaniijia Pueyaso rupaa cuno pueya niquiara. Pueya niquiara pohuatatureeri socua Samaria jiya tiacajinia, cuniqui quiniae tiuuniuria Jesuucuajuhuaj. Maninia rupaari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaariuhua Juanta Jerusalén tiacajiniohua.

Jesujiniji Felipe pohuatasacari Etíope pueyano

²⁶ Cuno nuhuaji, Pueyaso seruuri Felipeecua rosequiaari. Na sequeseeri:

—Quia sanere Felipenaa. Pananu shuucuajiria nucuama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajiniara. Cuno nuuri cariiquia jiyacuma neteya.

²⁷ Felipe tojishacari naatej, nojuajaari ritia sanequiaari. Nucuama quiaquiaariiri. Nuujinia naacuneetooquiaari saaja Etiopía jiyajinjinio pueyanotaari. Cuno pueyanoori riyacajajaaju quiquiaari Etiopía jiya jiyaniijia naacutana na quiniuucua, maaji na jiyaniijia quiniuucua. Na jiyaniijia sesa quiquiaari Candace. Cuno maajiiri cuno pueyano jiyatequiaari Etiopía jiya casami jiitanara, na cumaneeca cojuariquiano nera. Nio Etiopía pueyanoori Jerusalén tiacajinia quiaquiaari Pueyaso secojonuucua. Cuniquiji tacateyanoori Felipeta naacuneetooquiaari nuujinia.²⁸ Nucuacoji na tacatesacariuhua na jiyajiniohuara, caballoori na jaatiariquohua, rucuanejotajarujinia cajiyano. Pueyaso rupaa serojoquiohuari, tariucuacaanu Pueyaso sequesano caminiujiunia Isaías naajioneejiniji.²⁹ Pueyaso Sohuanuuri jiyacari Felipe sequequiaari:

—¡Ritia nocua quia catecanore! Quiocua nata quiaare.

³⁰ Jaara nocua catecanoquiaari, Felipeeri Etíope pueyano tojiquiaari Isaías naajiosano serojojano cojuata. Felipeeri na nequesotaquiaari:

—¿Quiaate quia serojosano niishiya casaa na sequeyani?

³¹ Etíope pueyanoori na riucuaquiaari:

—Janiyatucua taa niishirinio, tamonu jaara cua serojosano niishitiox aquiri janiyani?

Felipe sequereeri:

—Miji quia tacama. Cua shuriucua quia cajishii.

³² Etíope pueyanoori nio serojoquiaua tariucuacaanu Pueyaso Rupaa-jinia:

“Juhua borrego jaatucusaaquiaarii mosocoriquiano. Naatej, taa borre-gocuaani sanaa niquiyari na cajaca miatejosacari, nojuajaari naa quiquiaarijuhuaj. Majaari na sariyocuanu quiquiaari quenaaja naquiya na miishacari. ³³ Naquiya miishaquaaria cararaati-aari. Nocua namiyaquishaquaaria. Mashaja na quishacarijia, nojuajaari shaajasaaquiaari nio jiyajiniji. Cunora, majaari na muetunu quiquiaari. Niquohuaajuuri mosaaquiaari”.

Etíope pueyanoori nio serojoriquiaa Pueyaso rupaajiniji.

³⁴ Na nuhuaji, Etíope pueyanoori Felipe nequesotaree:

—Cua sequere pueyanonaa, ¿canajiniji Isaías pohuataa niya na naajiosanojiniani? ¿Tama nojuajiniji pohuataatee? ¿Tamonujiniji soj?

³⁵ Felipeeri Etíope pueyano niishitiojonu coteequiaari Jesujiniji shusha na serojosano Isaías naajiosanojiniji. Felipeeri naa na sequeree:

—Isaías naajiosacari nio, nojuajaari juhuacarijia Jesujiniji pohuataquiaari, taa quiarrijia Jesu miishaacanu taraatiacuajani.

Felipeeri socua na pohuataquiaari Jesu miishanojiniji. ³⁶ Nojori quiasacari nucuaco, caminiaco shuriuquioco tajitiariquiaari. Etíope pueyano jaara caminiaco niquiquiaari, Felipe sequereeri:

—¿Majate maninia cua tiuquinishaanura niya?

³⁷ Felipeeri na sequeree:

—Quiaa jaara seetanujuanaa tiuuri Jesuucua, quia naata tiuquinishaanu.

Cuno pueyanoori na riucuaree:

—Jaa, janiya Jesucristoocua tiuyani. Nojuacuaari Pueyaso Niyanu. Na niishiyanija.

³⁸ Etíope pueyanoori jiyamitia na seru sequeree:

—Quia nujuaretare rucuanejotaja.

Felipeta rosetamaa caminiacojinaria. Felipeeri tii na tiuquiniquiaari Jesuucua na tiuushacari. ³⁹ Nojori tacatasacariuhua caminiacojiniji, Pueyaso Sohuanuuri Felipe riquiaari canashiyaquiji cuno Etíope pueyano shuriucuaji. Nojuajaari juucua tacareecuaquiaari na tiuquininiaacua. Majaari socua na niquiniu quiquiaari Felipe. Tariucua tiuquinishanoori shuquiriaatia quiaquiaariuhua na jiyajiniohua. ⁴⁰ Pueyaso Sohuanuuri Felipe jataquiaari Azoto tiacajinia. Nojuajaari cuniquiji puetunu tiacajinia poojotaquiaariuhuajanaa Pueyaso rupaa Jesujiniji. Naa tiuquishuhua Cesareya tiacajiniaari.

9

Saulo jatasacari Jesu tojiniara na quiniuria

¹ Sauloori jiyacari pueyaracaanu Jesuucua tiuuniaa miananajoriquiase. Nojori puecoonu paniquiaari puetunujuanaari. Naaratej, Sauloori pueyacuara secojonaa jiyanijiaacua quiaquiaari. ² Naa na sequeseeri:

—Damasco tiacajinia quianu paniyanijia. Quiria quia naajiore cu-niqui secojojua tiaca camarucuaacuara Damasco tiacajiniani, cuno naajioneeta cua tiuquijionura nojori rerejojuacajinia. Jesu tojiniaa pueya morojonu paniya cuniquijinija. Janiyari cua quioosano jaatucutaniya niyara Jerusalén tiajiniaran, canuu, maajipohuanio.

³ Naacuajitij, nucuaco Saulo quiasacari, tarí quenaacoturiquiaa Damasco tiacajiniaraari. Jiyacaritij, išhacantuuccaari canashiyaquiji

nunuquiaari jiyocuacaanuji! ⁴Sauloori juhua jatasaaquiaari na cari. Na pojosaquiaji tojiquiaari rupaa na sequeyanoori:

—¡Saulonaa, Saulonaa, cua tojiri! ¿Casaara quia miitaa puera janiyani?

⁵Sauloori na riucuaree:

—¿Cantequia Jiyaniijianaa?

Jiyocuacaanuji nocua pocuanoori na riucuaquiaari:

—Janiya Jesuni. Quiaari puera cua miitiaajanaajataj, cucua tiuuniaa quia miitiasacari puera. Naa quia miishacari puera quia juaaniutiatej, quiaari tama quia cuaqueya sesoyajaacujua. Quiaari juhua juaajia pueyano. Quiaari quia juaaniutia juhua jiohuaca patiyashijiya.

⁶Sauloori na puerenuta na tetecasacari na sequequiaari:

—Jiyaniijianaa, ¿casaa quia paniya cua miiniuriani?

Jiyaniijiaari na sequeree:

—Quia sanere. Naajaa quia tiuquishii Damasco tiacajinia. Quiaari tii sequesaanutaniya cua panishano quia miiniururia.

⁷Saulota quiojonaari shiriiquitiuquiaari nojori jaara tojitiuquiaari jiyocuacaanuji pocuanu. Nojoriiri juucua na niquinii paniquiaari. Saaja shaaquiri quiriquiaa. ⁸Na nuhuaji, Sauloori na pojosaquiaji sanerohua juucua. Majaari na naata niquinii quiquiaari saaja. Nata quiniaari na jaatucutaquiaari Damasco tiacajiniara. ⁹Nojuajaari tii camueenuquiaari jiuwjianaraca juuca, cariyojuaru na quishacari. Majaari na miaquenu quiquiaari pueyaracaanu cariyojuaru na quishacari. Ratuyaquiaquiaarijiaariuhuaj.

¹⁰Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniijia Jesuuri na sequequiaari juhua na maquenujinia:

—¡Ananíasnaa!

Nojuajaari na riucuaquiaari:

—¿Casaate cua Jiyaniijianaa?

¹¹Jiyaniijiaari na sequeree:

—Quiarijia quia quiaare Saulo pajenuucua. Nojuajaari noo Saulo, Tarso tiacajinjinio pueyanotej. Nojuajaari Judas tiajinia quiya. Judas tiaari jati tamonu nuujinia quiya. Cuno nuu sesa, Nuu Maniniu. Sauloori cuno tiajinia secojiya Pueyaso. ¹²Nojuajaari juhua na maquenujinia tari niquirii quiajaniya nocua tiuquiyano. Tari quia sesa niishiyajaariuhuaj. Sauloori tari quia niquirii na maquenujinia. Quiaari quia juaashiquia niariquia nocua, na namija jeequenuhuara, maninia na niquinuiuhuara.

¹³Ananías jaara naa tojiquiaari Jiyaniijia sequeyanotej, nojuajaari sequeree:

—¡Cua Jiyaniijianaa, queraatia pueyari cuno pueyanojinji cua po-huatacanuni! ¡Quiocua tiuuniaa pueya miitiaquia taraatia Jerusalén tiacajiniaari! ¹⁴Pueyacuara secojonaa jiyaniijia jiyarosanonaari cuno-huaj, quiarijia niya tiuquiriini. ¡Nojuajanaari quia secojonaa pueya quioonutaniya, morojonucuaca canaa na jiyatasocoriquiano Jerusalén tiacajiniara!

¹⁵Jiyaniijiaari Ananías sequequiaari saaja:

—Naajaa, quia quiaare. Janiyacuajaari cuno pueyano saquirijoquiaari tarrijia cua jiyaramiquishocoriquianoni. Nojuajaari tamasaca jiyacajinia poojotanutaniya janiyajiniji taucuaca niquiara. Taucuaca jiyaniijianucua poojotanutaniya janiyajiniji ariuhuaj, Israel

pueyanio. ¹⁶ Janiyacuajaari Saulo niishitiojonutaniyani taa jiyanohua naquiya pueya miitianutaniya nojuajani, janiyajiniji na pohuatasacari.

¹⁷ Naaratej, Ananíasri quiaquiaari. Judas tiajinia tiuquishiiiri, tee Saulo quiriquiaacuajani. Na tiuquishacari, Sauloocua niasee na juaashiquiaari. Na sequereeri:

—Cua tarajanunaa, pa Jiyanijia Jesu, quiocua muetarucuua nio tiaca nucuamaji niyara quia nishacarini, nojuajaari quiocua cua jiyaroreeni. Cua jiyaroreeni quia namijia jeequenuhuara maninia, Pueyaso Sohuanu tiuquinuriua quioojajinajuhuaj.

¹⁸ Jiyacari ritia totequiaarii juhua sapitiaaja cocua Saulo namijiajiniji. Maninia niquiquiaariuhua na nuhuajiri. Na nuhuaji, Sauloori ritia tiuquinishaquiaari moojinia Jesuucua na tiuushacari. ¹⁹ Na nuhuaji, miaquereeri, raturohuajaariuhuaj. Noojia jatarohuari. Pasaja camueenujuquiaari Damasco tiacajiniaari Jesuucua tiuuniaa pueyata.

Jesujiniji Saulo pohuatasacari Damasco tiacajinia

²⁰ Sauloori juhuacatecara coteequiaari Jesujiniji pohuatanu narta Judiocuaca secojojuaca tiajinia Damasco tiacajinia. Nojuajaari pueya niquiara na pohuatasacari sequeja:

—¡Jesuuri seetanujuanaa Pueyaso Niyano!

²¹ Naa nojori tojishacari Saulo pocuaanotej, pueyari shiriiquiquiaari. Na shiriiquitiuniutia sequetureeri:

—Nio pueyano pocuaani, ¿majate nootej, naquiya miiquiaa Jesuucua tiuuniaa pueya Jerusalén tiacajiniatej? Niyara niyareejaariuhuaj, Jesuucua tiuuniaa pueya na morojonura. Nojuajaari nojori jiyatanu paniriquiaa juucua Jerusalén tiacajinia secojonaa jiyanijianucua na niquitiososcoriquiano, nojori nujuatejosaanura.

²² Sauloori socua noojia cumaquiquiaari Pueyaso Sohuanuta, jiyanohua maninia na pohuatanura puetunu juucajanaa. Nocuaji pataquiaari saaja Damasco tiacajinia quiniaa narta Judiocuacaari. Sauloori maninia pohuataquiaari tariucuacaanu Pueyaso Rupajiniji, seetanujuanaa maatia pueya niishiniuria Jesuuri Pueyaso Jiyarosano pocuaji tacuriquiano.

Saulo mashishacari narta Judiocuacaacuaji

²³ Quiniqui Saulo camueenujusacarijia pueyaracaanu, narta Judiocuacaari nocuara roojotooquiaari na motunura juucua.

²⁴ Tamonuuri Sauloocua jiyanooquiaari. Naa na sequequiaariiri:

—¡Quiaa monu panishiya sacaj!

Judiocuacaari na sashiriquiaa tiaca tohuateyaji, na monu paniniutia juucua Saulo. Na shanacuturiquiaari juuca, niucuanio. ²⁵ Damasco tiacaari puereetuua sohuacaraca quiquiaari puetunu na shocuajanaa. Jesuucua tiuuniaa pueyari saaja Saulo mashiquiquiaari niucua. Sohacajiniji roshinitiasaaquiaari jiyocuacaanuji puereetuua canaasatujinii-aari. Sauloori naa mashiquiaaritij.

Saulo quishacariuhua Jerusalén tiacajinia

²⁶ Na tiuquishacariuhua Jerusalén tiacajinia, Sauloori Jesuucua tiuuniaa pueya rupueno paniquiaari juucua. Nojoriiri saaja na puerequiaari. Na puerenuta sequetuquiaariiri:

—Pueyasoocua tiuujiaquinio naasucua jiyanotej.

27 Bernabé cutaraari maja na puerenu quiquiaari Saulo. Nojua-jaari Jesu saquiriojosano pueyacua na jiyataquiaari, Saulo niishiniuria puetunu nojorijanaa. Bernabeeri Jesu jiyaramiquishano pueya seque-quiaari:

—Sauloori pa Jiyanijia niquiquianu Damasco tiacaacua neteja nu-cuamaji. Jiyanijiaari nata pocoojocanu. Sauloori cunora juhuajaniya pohuatariquiaa Jesujiniji Damasco tiacajinia.

28 Sauloori narta Jesuucua tiuuniaa pueyata jiyojequiaari cuniquijia Jerusalén tiacajinia. Nojoritia rucuanejojuaari, mariyata Jesujiniji po-huataja juhuajaniyari. 29 Saulo pocuasacari, nojuaari seetanujuanaa cumaacata pocuaquiaari Jiyanijia Jesuucua na tiuushacari. Griego rupaa pocuanaa Judiocuacata pocoojocuariairi. Noojiaqueyari Saulota juayonuutaquiaari saaja. Nojoriiri socua na motunu paniquiaari. 30 Jesuucua tiuuniaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniquiji jiyarosaaquiaari na raja Tarso tiacajiniaari.

31 Na nuhuaji, puetunu Judea jiyajinia Jesuucua tiuuniaa pueya-janaari panaatia quiquiaari quenaaja, Samaria jiyajinia, Galilea jiyajinianio. Tamasacaari maja tari naquija na miishaanu quijia. Nojori-iri socua Jiyanijia tojitiajacara quiquiaari nojori pueretusacari nojori mariqui na tojiyashijiara quiriohuari. Pueyaso Sohuanu naacusacari nojori, Pueyaso pueyari socua canequiaari queraatiara.

Pedro naatanishacari Eneas

32 Pedroori pueyaracaanu rucuanejojua Jesuucua tiuuniaa pueyacua, nojori na niishitiojonura socua Jesujiniji. Tamonu juuca nojuaari Pueyaso pueya niquiniuucua quiaquiaari Lida tiacajiniajuhuaj. 33 Tii quiriquiaari tamonu pueyano. Na sesa quiquiaari Eneas. Cuno pueyanoori cumatacuruhuana cusosu quijia. Tari na shocojoquiaari ocho marijia pootia na matasacari na matujinia. 34 Pedroori cuno cusosu sequequiaari:

—Eneasnaa, ¡Jesucristo tari quia naatanirii! ¡Quia sanere! Quia matu quia jeecare.

Eneasri ritia sanequiaari. 35 Puetunu pueyajanaa Lida tiacajinia quinia, mariyata Sarón tiacajinjinio pueyajuhuaj, puetunu nojorijanaari nio miishano niquiquiaari. Nojoriiri cunora tama na supuetanaa niishitiushano casaajaaja cartequiaari. Puetunu nojorijanaari Jesuucua tiuuquiaari.

Dorcus samiittianishaanujiniji pohuatasano

36 Jiyacarijuhuaj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupaajinia sequesano “Dorcus”. Dorcasri saniniuuja pueyano rupaajinia sequeshiyacuua “nequeru”. Cuno maajiji Jesuucua tiuujia quiquiaari. Nojuajaari maninia mijiia maaji quiquiaari. Casamijiuniucua pueya niquitiojoua nareja na jiitiasano-jiniji. 37 Na nuhuaji, Pedro quishacari Lida tiacajinia, Dorcasri cu-soquiaari. Na cusionu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tiajinia nataco, tamonu sohuacajinia. 38 Jope tiacaari cateca quiya Lida tiacajiniji. Pedroori Lida tiacajinia quiriquiaajaa Dorcas shaajesacari. Jesuucua tiuuniaa pueyari tari niishiriquiaa tee Pedro quiyani. Naaratej, caapiqui

pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Majaari tarishiniu”.

³⁹ Pedroori nojoritia tacatequiaariuhua Jope tiacajiniohua. Na tiuquishacari, quiniqui quiniaari Pedro tiuquiniquiaari macuucua so-huacamara. Mashiquiopueeri Pedro shocua rerejoquiaari na nuju-quetunuta. Nojoriiri Pedro niquitijoquiaari Dorcas cusupuenuusano toqueya, cacojoquianio. Cunoori quiquiaari na cusupuenuusano saminio na quishacarijia. ⁴⁰ Pedroori jiyacari puetunujuanaa pueya tohuatanijoquiaari sohuacamaji. Na nuhuaji, nojuajaari mojoque-taquiaari Pueyaso na secojonura. Na secojonu nuhuaji, macuucua tacatereeri. Na sequereeri:

—¡Dorcásnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. ⁴¹ Pedroori na juaashiquajiniji na quiaquiaari. Na nujuatereeri. Na nuhuaji sequequiaari Jesuucua tiuuniaa pueyari, mashiquiopuenio:

—Miji pueyanaa, jnia nimia!

Nojori tiuquitiasacari, saaja maaji niquitushii nujuanoori, taricuca saminio. ⁴² Pedro miishanoori puetunu Jope tiacajinajanaa niishishaquaaria. Queraatia pueyari cunora Jesuucua tiuquiciaari. ⁴³ Pedroori na nuhuaji janiya camueenuquaariajiaara Jope tiacajinia. Nojuajaari Simón tiajinia quiriquiaa cuniqui na camueenuusacari. Nio Simónri piiquia casaata shoqueya majeetejojua quiquiaari, casaara ship-inishocoriquiano shoquejiniji.

10

Pedro quiasacari Cornelio niquiniuucua

¹ Cesareya tiacajinia quiquiaariiri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuuri sesojosaaquiaari “Italiano”. ² Cornelioori Pueyaso secojojua pueyano quiquiaari, mariyata puetunu na tiajinia quiniaatajanaanio. Nojuajaari seetanujuanaa Pueyaso shuquiritiniu panijia quiquiaari. Cornelioori queraatia na cumaneecajiniji niquitijojua quiquiaari nareyajuhuaj, casamijiuniucua Judiocuaca niquitijosocoriquiano. Pueyaso secojojua pueyaracaanuuri. ³ Tamonu juuca, tariucua pananu piriushacari, Cornelioori Pueyaso seru niquiquiaari juhua na maquenujinia nocua niyano na tiajinia. Na sequeseeri:

—Cornelionaa.

⁴ Cornelioori saaja Pueyaso seru shootiaquiaari na shiriiquinutia. Na nuhuaji na riucuareeri:

—¿Casaate jiyaniijianaa?

Pueyaso seruuri na sequeree:

—Pueyasoori quia secojosano tojiquiaa. Quia timitiaari capora quia quiniuucua, quia jiitiasanojiniji quia niquitijosacari nareja casamijiuniucua pueyara. ⁵ Naaratej, quia seya quia jiyaramiquiri Jope tiacajinia. Nojori cuaara Simón masuunuuucua quiaara. Na sesaari Pedrojuhuaj. ⁶ Nojuajaari na sesaanucua pueyano tiajinia quiya. Tia camaruuri shoque majeetejojua piiquiajinia. Cunoori na poonijiosano. Na tiaari

shoniniacu caminia casaqueyaji naniya. Simón Pedroori quia sequenu-taniya casaa quia miiniutianiyani Pueyaso jiyanooniuria quiajaniya.

⁷ Pueyaso seru jaara quiaquiaariuhua, Cornelioori caapiqui na seyanjinjinio piiquiaari, niquiriyatu na soldadonio. Cuno soldadoori Pueyaso secojona quiquiaarijuhuaj. Maninia na jiyanijia naacujua quiquiaari-jaariuhuaj. ⁸ Cornelio jiyarosaacaricia na seja, nojori pohuataree co-teenuuri puetunu Pueyaso seru sequencesanojuanaa nojuaja. Na nuhuaji, nojori jiyaramiquirii Jope tiacajinariai.

⁹ Tariqui, Cornelio seja quiasacari nucuaco, nojori quenaacotusacari tari Jope tiacajinaria, Pedroori jiyacari tacaquiaari tia cacojiria, Pueyaso na secjonura. Pananu quishacari pa nacasuhuojuajinie quiquiaari jiyacari. ¹⁰ Nojuajaari jiyacari miajjeriquiaa. Neraari juucua sumatusaariquiaacuaja. Nera sumatusacaricia, Pueyasoori casaa na niquitiquiaari juhua na maquenujinia, na quishacari tia cacojiria. ¹¹ Pedro niquishacari jiyocuacaanu, saaja jiya cajinlocua niquirii riateyanoori. Sonaque queraque niquirii tiji roshinitiashiyanoori, na nacatucuajiniji morojotasano. Pedroocua roshinitiasaareejanaari. ¹² Sonaque jini-acuma quiriquiaari puetunu casaajanaa: sacocua, jiyacua rucoojuanario, jiyocuacaanu jaacuatujuacahuaj. Cuno casamiiri quiquiaari Judiocuaca pueresano casaa puetunujuanaa. Maja nojori miaquesano. ¹³ Jiyacaritij, Pedroori rupaa tojirii jiyocuacaanuji na sequeyano. Naa sequeriquiaari:

—¡Pedronaa, nocua quia sanere! Quia puecoore quia miaqueso-coriquiano.

¹⁴ Pedroori na riucuaree:

—¡Maja cua Jiyanijianaa! ¿Janiyatucua taa miaquere sacuaraatia cua miaquesooni? ¡Cunocuajaari tarijia quia sequencesano canaa puereso-coriquiano!

¹⁵ Jiyocuacaanuji rupaari socua na sequerohua:

—Pedronaa, majaari miaquesocoriquiano Pueyaso jiyatesano soonu.

¹⁶ Pueyasoori naa pacutejoquiaari sequenu Pedrotej. Na nuhuaji, son-aqueeri tacanitiasaaquiaariuhua jiyocuacaanu. ¹⁷ Pedro tacaashacari naa na niquiniuucua juhua na maquenujinatej, jiyacari Cornelio jiyaramiquishano pueyari tia tohuateyaji tiuquijioquiaari, Simón tia na pajetunura. Cornelio pueyari nequesoreetariquiaa nucuacoji nojori tiuquiniuria Simón tajinija. ¹⁸ Nojoriiri tohuateyaji nacaquiaari:

—¿Niya quiyate Simón jiyanshano pueyano? Na sesaari Pedrojuhuaj.

¹⁹ Pedroori juhuanojuaja niishiriojoriquiaa na niquishanojiniji juhua na maquenujinia tia cacojiria. Pueyaso Sohuanuuri jiyacari na se-queree:

—Pedronaa, jiuujianaraca pueya quia pajeya. ²⁰ Tariucuaja. Quia sanerohua. Nojoriicua quia roseyarohua. Quiocua nojoritia quiaaro-huahuaj. Majaari taacanuunu. Janiyacuajaari nojori jiyaramiquiriu-cuua quiocuani.

²¹ Pedroori Cornelio jiyarosano pueyacua rosequiaari. Nojori sequenceseri:

—Janiyacuaja nia pajesano pueyanoni. ¿Casaacua nia niyareecuarani?

²² Nojoriiri na riucuaree:

—Canaa jiyaniijaari Romano soldadohua jiyanijia. Na sesa Cornelio. Nojuajaari canaa jiyarorucuua quiocuani. Maninia miijia

pueyanoori. Jiyaniijia Pueyaso tojijiajaariuhuaj. Puetunu Judiocuacajanaari maninia na miiniucua na panitiuya. Pueyaso seruuri na sequerucuaa, nojuaja masuunura quiajaniya na tajinia quia quianura, na tojiniuria puetunu quia sequencesanojuanaa.

²³ Pedroori Cornelio pueya tiuquinitiaquiaari na quijia tajinia. Nojori sequereeri:

—Niyaja nia maqueseejaara. Pocua tariqui quiaariquiani.

Jaara juhuaquequiaari, Pedroori nojoritia quiaquiaari. Nata quiojquiaarijiaariuhua Jope tiacajinjinio Jesuucua tiuuniaa pueya.

²⁴ Tama tariqui saniniujia, nojoriiri Cesareya tiacajinia tiuquijioquiaari. Cornelioori na tajinia sashiriquiaa Pedro, puetunu na tajinia quijiacatajanaa, queraatia na rupuenaatanio. Cornelioori puetunu nio pueyajanaa masuunquiaari, nojori rerejonura juhuacaricia na tajinia Pedro tiuquiyaquishacaricia. ²⁵ Pedro tiuquishacari, Cornelioori nocua tohuataquiaari. Carijiniacuma na naacuseeri. Pedroocuara mojoque-taquiaariiri juhua Pueyasooqua. ²⁶ Pedroori saaja na sanaquiaari. Na sequereeri:

—¡Quia nujuare! Janiyari cayajuhuaj, juhua quiajaniya.

²⁷ Tiaco na tiuquitiasacari, pocoojoriquiaa Pedrotaari. Pedro tiuquishacari, saaja queraatia pueya niquishiiri. ²⁸ Pedroori nojori sequeree:

—Taucuacanaa, niaacuajaari niishiya canaari Judiocuacani. Ju diocuacaari rootasa aquiaari maja canaa rupuenura taucuaca, maja quenaaja tahue tajinia canaa tiuquiniuriajuhuaj. Saniniujia, Pueyasoori quiaricia cua niishitiorucuaa cutara maja cua soonura tamasaca. Taucuacaari maja sacuaraatia quiaricia quiria. ²⁹ Naaratej, cua niishishacari niaari cua masuurucuaa niyara, janiyari ritia canujiyarucuaani cua taacanuyaquinutia. Cua totureja, ¿casaara nia masuurucuaa janiyani?

³⁰ Cornelioori na riucuaree:

—Cuatro juucaari tari shoconujiya. Janiyari jiyacari Pueyaso sec ojoriquiaa juucua cua tajiniani, pananu mueecosacari. Jiyacaritij, pueyanoori cucua muetarucuaa. Jiyacaricuajaari quiriquiaa, tee pananu tiuyanija. Cuno pueyano toqueeri shacantuque quiriquiaa.

³¹ Cua sequereeri: “Cornelionaa, Pueyasoori quia secojosano tojirii. Naajuhuaj, niishiyari taa quia niquitijoquiaa quia casami casamijiuni- ucuani. ³² Naaratej, quia seja quia jiyaramiquiri Jope tiacajinia, cuaara Simón masuunuucua quiatuura. Na sesaari Pedrojuhuaj. Nojuajaari na sesaanucua tajinia quiya, shoniniacu caminia casaqueyaji. Tia camaruuri piiquijinna shoqueya majeetejonu poonijojua. Simón Pedro jaara nimia quia tajinia, quiata pocoojonutaniyari”. Pueyaso seruuri naa cua sequerucuaaqi Simónnnaa. ³³ Janiyari jiyamitia ritia jiyarorucuaa cua seja Jope tiacajiniani, nojori pajenura tii quiajaniya. Quiaacuajaari maninia miirii cucua quia nishacari. Quiariciani, puetunu pajaniyajanaari niya Pueyaso niquiara quiyani. Naa quia pohuatare canaa tojishocoriquiano quiaricia, taa Pueyaso niishitiojorucuaa quiajaniya canaa quia pohuatancuacuajani.

Pedro pohuatascari Cornelio tajinia

³⁴ Pedroori juhuacatecara pohuatanau coteequiaari. Sequereeri:

—Quiarijia niishiya seetanujuanaa cutaranijia, Pueyasoori maja rim-
iajata na niquiniu pajaniya. Majaari nia jiyaniniu Pueyasoori saaja Ju-
diocuacaacua jiaatiaa, Israel pueya nojori quiniuucua. Maja. Nojuajaari
tamasacaacua jiaatiaajuhuaj.³⁵ Tiquiyocua jiyacajinia Pueyaso seco-
jojua pueya quishacari, nojoriiri Pueyaso jiyanooshano pueya quiya-
juhuaj, maninia mijia nojori quishacari.³⁶ Pueyasoori na rupaa pohu-
ataniquiaari puetunu canaa Israel pueyarajanaa, jiyanooshano canaa
quiniuria Jesucristoocua canaa tiuushacari. Nio Jesucristoori puetunu
mijiria quinia Camarnujuanaa.³⁷ Tiuquinijiona Juanri Pueyaso rupaa
pohuataquiaari pueya tiuquinijiosaanura. Na nuhuaji, Jesuuri cutara
miishano miiniu coteequiaari Pueyaso cumaacata. Niaari tari niishiy-
acuaja na miishano canaa Galilea jiyajinia, na nuhuaji na miishano
puetunu Judea jiyajinajanaanio.³⁸ Niaari niishiyajuhuaj, Pueyasoori
na Sohuanu niquitioquiaari Jesu, na cumaaca na jiitianura. Nojuajaari
maninia miiquiaari pueya, tiquiyocua na rucuanesacari. Cusosuhua
naatanajiojuaari. Samaruhua camarnu sesosano jeecaquiaarijiaari-
uhuaj. Puetunu naa mijia maninajanaari na Que Pueyaso quini-
uucua nata.³⁹ Canaari puetunu na miishanojuanaa niquiriuariini,
puetunu canaa Judiocuaca jiyajinajanaa, Jerusalén tiacajinajuhuaj.
Janiyari seetanujuanaa canaa niquishano pohuataani. Na nuhuaji,
pueyari na teetequiaari niyacutesanojinia. Tii na cusoujatuquiaari-
iri.⁴⁰ Jiuujianaraca juucajinia, Pueyasoori na samiitianiquiaariuhua.
Jiyacaritij, na saquiriojosano pueyacua na mueratereeri.⁴¹ Majaari
na muetanu quiquiaari puetunu pueyacuajanaa. Saaja canaacua
muetaquiaariiri, teyano Pueyaso saquiriojoquiaari coteenu taricua-
caanucuajani, Jesujiniji pohuatantuuriqiano. Na samiitianasacariuhua,
canaari nata miaquenuuquiaari mariyatani. Canaari nata raruuquiaar-
ijiuuhuaj.⁴² Jesu jaara canaa jiyaramiququiaari, nojuajaari canaa se-
quequiaari: “Naa nia pohuatare pueya niquiara: ‘Pueyasoori Jesu jiy-
atequiaari puetunu mijiria quinia nequesoreenarajanaa, macunucua
nequesoreeriquanojuhuaj’”.⁴³ Tariucuacaanu pueyara Pueyaso se-
quesano caminiuijuniaari naa juhuacarrijia sequetuquiaari Jesujiniji-
uhuaj: “Cante nocua tiuyani, nojuajaari jiyanooshaanutaniya sesa na
miishanojiniji”.

Pueyaso Sohuanu tiuquishacari taucuaca jiuujajinajuhuaj

⁴⁴ Pedro pohuatasacarijia taucuaca niquiara, Pueyaso Sohuanu-
uri Pedro tojitiana taucuacaacua niquiaari, nojori jiuujajinajia na
tiuquinuria. ⁴⁵ Pueyasoocua tiuuniaa Judiocuacani, Pedrota ni-
jioquiaari Jope tiacajinijini, nojoriiri shiriiququiaari Pueyaso niq-
uitiosacari cuno taucuaca na Sohuanu. ⁴⁶ Cuno taucuacaari no-
jori niquiara pocooriquiaa tamaatia rupaacajinia. Pueyaso manini-
uhuaqueetaturiquiaari.⁴⁷ Naaratej, Pedroori sequequiaari:

—Nio pueyari tari jiitaa Pueyaso Sohuanu noojajinajia, taa pa jiiti-
aacuaani. Naaratej, nojori cuaara tiuquinijiosaaria quiarijia. ¿Cantucua
nojori tenujure maja na tiuquinijiosaanurani?

⁴⁸ Pedroori na nuhuaji sequequiaari cuno taucuaca tiuuquinijiosa-
nura Jesucristo sesajinia, nojori tiuushacari nocua. Na nuhuaji, Corne-
lioori Pedro sequequiaari:

—Niyaja quia camueenujurejaara canaata. Maja senota quianuhua.

11

Taucuacajiniji Pedro pohuatasacari Jerusalén tiacajinía

¹ Jesu jiyaramiquishano pueya, mariyata puetunu Jesuucua tiuuniaa pueyajanaa Judea jiyajinía, nojoriiri naa pohuatasaaquiaaritij: “Taucuacanaari Pueyaso rupaacua tiuuriucuaajuhuaj”. ² Nocuaji, Pedro jaara tacatequiaariuhua Jerusalén tiacajiniohua, narta Pueyaso pueyari na juaaquiaariuhua. Na juaaniaari taucuaca cararaatiuuquia co miatoronu panijiacá quiquiaari, taucuaca quiniuria seetanujuanaa Pueyaso pueya nojoriria. ³ Nojoriiri naa juaaquiaari Pedro:

—¿Casaara quia quiaarucuaa cuno taucuacaacuani? Nojoriiri maja Judiocuaca juhua pajaniya. ¡Quiaanaari nojoritia miaquejocanujuhuaj! Quia miishanoori maja maninia taa Pueyaso rootaquiaari taricuacaaanucuajani.

⁴ Pedroori suraatiaja nojori pohuataquiaari puetunujuanaa tahuajiniji. Coteenu pohuataree na niquishano juhua na maquenujiníaari. Naa sequereeri:

⁵ —Jope tiacajinía cua quishacari, janiyari panacari secojoriquiaani. Janiyari jiyacari juhua cua maquenujinía sonaque na nacatucuiniji morojotasano niquiriini. Jiyareta cucuajanaa roshinitiasaareeri. ⁶ Cua niquishacari sonaquejinía cua niishiniuria casaate mii quiriquiaani, janiyari saa puereeta casami niquirijiaani. Janiyari niquiriini jiyacua rucoojuaca, sacocuajuhuaj, jiyocuacaanu jaacuatujuacanio. Puetunujuanaari pa miaquesocoriquiano pa pueresano casaa quiriquiaa. ⁷ Janiyari jiyacari jiyocuacaanuji rupaa tojiriini. Cua sequereeri: “Pedronaa, nocua quia sanere. Quia puecoore quia miaquesocoriquiano”. ⁸ Janiyari saaja na riucuareeni: “¡Maja cua Jiyaniijiana! ¿Janiyatucua taa miaquere sacuaraatia cua miaquesooni?” ⁹ Jiyocuacaanuji rupaari socua cua sequerohuani: “Pedronaa, majaari miaquesocoriquiano Pueyaso jiyatesano soonu”. ¹⁰ Pueyasoori naa pacutejocanu sequenu juucua janiyatej. Na nuhuaji, sonaque tacanitiarohua jiyocuacaanuuri. ¹¹ Jiyacaritij, jiuujianaraca canuuri cua quijia tiajinia tiuquishii. Nojoriiri Cesareya tiacajiniji jiyaramiquishano quiqianu, na pajenuunura janiya. ¹² Nojori tiuquiyaquishacarijia, Pueyaso Sohuanuuri cua sequeree: “Quiocua nojoritia quiaare. Majaari taacanuunu. Majaari tahuá soonu nojori quia rupuesacari”. Naa cua tojiniuuquatej, janiyari cunora juhuajaniya nojoritia quiaarucuaani. Nio seis parta Jesuucua tiuuniaa pueyari cuata quiojiyarucuaajuhuaj. Canaari mariyata cuno tahuá tiajinia tiuquishiini. ¹³ Tia camaruuri canaa pohuatarucuaa taa na niquiquianu Pueyaso seru na tiajinia nocua nujuaanoni. Pueyaso serunaari na sequeree: “Jope tiacajinía quia jiyarore quia seya, nojori cuaara quiaara Simón masuunuuucua. Na sesaari Pedrojuhuaj. ¹⁴ Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiajinia quiniaajuhuaj”. ¹⁵ Saaja cua coteesacari Pueyaso rupaa pohuatanu nojori niquiara, Pueyaso Sohuanuuri nojoriicua niquianu, taa pocua coteenujuanaa na niquianucuajani. ¹⁶ Janiyari jiyacari niishiquii pa Jiyaniijia sequesanoni. Naa na sequesanotej: “Juanri moojinia tiuquinijija pueya. Pueyaso cutaraari na Sohuanu jiyaronutaniya niaacua, nioojajinía na tiuuquinuria”. ¹⁷ Naacuajitij, taucuaca tiuushacari pa Jiyaniijiaacua, Pueyasoori na Sohuanu niquitiorucuaa

nojorijuhuaj, taa na niqutiochanu pajaniyacuaani. Cante Jesucristoocua tiuyani, Pueyasoori na Sohuanu na niqutioya. ¿Janiyatucua taa Pueyaso sequereruhuarini: “Maja cuno pojori niqutionu quia Sohuanu”?

¹⁸ Jerusalén tiacajinia quiniae Pueyaso pueya jaara tojiquiaari naa Pedro sequesanotej, nojoriiri sanaajetaquiaari. Tama nojorijaarija Pueyaso maniniuhuaqueetaquiaari. Naa sequetuquiaariiri:

—¡Pueyasojuhanaja jiyano hua maninia! Nojuajaari taucuaca paniyahuaj nojori tacatonura noojia sesa nojori miishanojiniji, jiyanooshano nojori quiniuriajuhuaj, pueyaracaanu nojori rishiniuria Pueyasota.

Antioquiya tiacajinia Jesu pueyajiniji pohuatasano

¹⁹ Esteban jaara mosaaquiaaricuaa, Judiocuacaari juhuacatecara Jesuucua tiuuniaa miiquiaari naquiyahuaj. Queraatia Jesuucua tiuuniaa pueyari nocuaji mashiyocuatuquiaari. Nojoriiri tiquiyocua niyaquejoquiaari. Noojiaqueyari na mashiyocuatusacari tiuquijioquiaari Fenicia jiyajinia. Tamasacaari tiuquijioquiaari Chipre jiyajinia. Noojiaqueyari Antioquiya tiacajinia tiuquijioquiaarijuhuaj. Nojoriiri tii pohuatanuuquiaari Pueyaso rupaa Jesujiniji saa Judiocuacara, maja taucuacara. ²⁰ Mashiyocuatinuaa tajinia quiquiaariiri Chipre jiyajinjinio pueya, Cirene tiacajinjinio pueyahuaj. Nio pueya jaara tiuquijioquiaari Antioquiya tiacajinia, nojoriiri Jesujiniji pohuataquiaari Griegohua niquierajuhuaj. ²¹ Jiyaniijia Jesu cumacaara nojoritia quiquiaarijuhuaj. Naacuajitij, queraatia Griegohuari taricuacaanu tama nojori niishishanojuaaja cartequiaari, Jiyaniijia Jesu tojijadi nojori quiniuria.

²² Jerusalén tiacajinia quiniae Pueyaso pueya jaara nio niishiquiaari, nojoriiri Bernabé jiyarotuquiaari Antioquiya tiacajinia. ²³ Bernabé jaara tiuquiquiaari nojoriicua, nojuajaari jiyano hua shuquiriquiaari na niqusshacari taa Pueyaso miiriucuaa maninia cuno Griegohuani, nocua nojori tiuushacari. Naaratej, nojuajaari naa rootaquiaari nojori:

—Pa Jiyaniijiaacua nia tiuuri pueyaracaanu. Majaari nocua tiuuniu nia cartenu. Suraatia na tojijiara nia quiri.

²⁴ Bernabeeri jiyano hua maninia pueyano quiquiaari. Pueyaso Sohuanuuri noojia cumaquiquiaari jiyano hua. Naacuajitij, na pohuatasacari Jesujiniji, queraatia pueyari Jiyaniijiaacua tiuquiquiaari.

²⁵ Na nuhuaji, Bernabeeri Tarso tiacajinia quiaquiaari Saulo pajenuucua. Jaara na riuriataquiaari, na jiyataquiaari Antioquiya tiacajinaria. ²⁶ Nojori quishacari Pueyaso pueyata cuno tiacajinia, nojoriiri tii shocotequiaari niquiriyatu marijia. Nojoriiri queraatia Pueyaso pueya niishitiojonuuquiaari. Tii Antioquiya tiacajiniani, Jesuucua tiuuniaa pueyari coteenu sesojosaaquiaari “Cristiano”. Nioori pueyano rupaa jinia sequeshiya “Cristo tojiniaa pueya”.

²⁷ Cuno quishacari, Jerusalén tiacajiniji Pueyaso sequenu panishano caminiuijuniaa pueyari tiuquijioquiaari Antioquiya tiacajinia.

²⁸ Tamonu nojorijinjinioni, na sesa quiquiaari Ágabo. Nojuajaari Jesuucua tiuuniaa pueya rerejonaa tajiniji nujuaquiaari pocuanura. Naa caminiuijuquiaari Pueyaso Sohuanu niishitiosano nojuajaari:

—¡Pueyanaa, puetunu pa jiyacajinajanaani, miaajenuuri quiniutiania!

Seetanujuanaa sequequiaarii Ágabo. Cuno miaajenuuri quiquiaari Claudio quishacari jiyanijijajanaa, Césartuhuaj. Nojuajaari Roma tiacajiniji jiitiaquiaari puetunu jiyacajanaa.²⁹ Antioquia tiacajinia quiniaa Pueyaso pueya tojishacari naa Ágabo sequesanotej, nojoriiri sequequiaari:

—¡Judea jiyajinia quiniaa parta Pueyaso pueya pa naacure!

Nojoriiri naa miquiaari. Naaratej, cante queraatia cumaneeca jiiti aquiaarini, nojoriiri queraatia niquitioquiaari. Saniniuujia, cante maja puera cumaneecaraca quiquiaarini, nojoriiri secaja niquitioquiaari na jiitiasanojiniji.³⁰ Na nuhuaji, nojoriiri nareja na niquitiosano cumaneeca jiyarotaquiaari Bernabeeta, Saulotanio. Nojoriiri Pueyaso pueya jiitiana niquitioquiaari saniniuujia Judea jiyajinia.

12

Jacobo nacatasaanujiniji pohuatasano, Pedro nujuatesaanujinjinio

¹ Jiyacaritij, Herodesri jiyanijija quiquiaari Judea jiyajinia. Nojuajaari Jesuucua tiuuniaa miquiaari naquiya. Noojaqueya quootequiaari na saniitiosocoriquiano nujuatejojuajinija. ² Naa Juan tarajanu Santiago motequiaaricuajaari nijiniquetucuaja mueruuta. ³ Judiocuacaari shuquiriquiaari naa nojori jiyanijija motesacari Santigotej. Naaratej, Herodesri Pedro quiatequiaari na soldadohuajuhuaj, Judiocuaca timitanura socua nojuaja. Pedroori quiasaaquiaari Judiocuaca queranacunuusacari, nojori sasacari pan na poreetajaaju majeetesano. ⁴ Pedro quiasaanu nuhuaji, Herodesri na nujuatequiaari nujuatejojuajinija. Na tohuatenu paniriquiohua juucua Pascua nuhuajiri, na nequesoreesocoriquiano puetunu quiniqui quiniaa Judiocuaca niquiarajanaa. Dieciséis soldadohuari Pedro cojuariquiaa pueyaracaanu. Nocua sanitijotooquiaari; coteenu cuatro, na nuhuaji socua cuatro. Nojoriiri naa sanitijotooquiaaritij. ⁵ Pedroori maninia cojuasaquaaria nujuatejojuajinija. Jiyacaritij, Jesuucua tiuuniaa pueyari saniniuujia nocuara secojonuuriquiaa jiyahohua, Pueyaso naacunura Pedro.

Pueyaso mashiquishacari Pedro nujuatejojuajiniji

⁶ Cuno niucuajani, na juhuaqueyaquishacarijia, quera Herodes tohuatesee tariquicuaji Pedroni, na nequesoreesocoriquiano puetunu pueya niquiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuata na numatucua cajiniocua. Tamasaca soldadohuari nujuatejojua tohuateyaji cojuariquiaacujua. ⁷ Jiyacaritij, Pueyaso seruuri canashiyaquiji coretaquiaari jiyareta Pedro shuriucuajanaa nujuatejojua jiniacuma. Na shacantuuaari jiyahohua cuhuataquiaari nujuatejojua. Pueyaso seruuri Pedro jiuquirii na shuucuaji. Na niucuajareeri. Na niucuasacari, na sequereeri:

—¡Ritia quia sanere!

Cumayocuari tamajaaja saacarejetaquiaari Pedro numatucuaacuaji.
⁸ Pueyaso seruuri na sequereejuhuaj:

—¡Quia cajiniocua camarucujua quia saatiri socua! ¡Quia sapatu quia cushirijiuhuaj!

Pedro jaara naa miquiaari puetunu na sequesanjuanaa, Pueyaso seruuri socua na sequerohua:

—¡Quia toque quia cushiri ritia! Majaari tarishiniu. ¡Quiocua cua nuhuaji rupaashijia!

⁹ Pedroori ritia Pueyaso seru nuhuaji sacuariquiaajaa. Jiyanohua jiyajeneriquiaari. Majaari na niishiniu quiriquiaa puetunu na niquishanojuanaa. Nojuajaari jiyaniquiriaa na maquenujinia niquiya naasucua. ¹⁰ Nojoriiri coteenu shocomaa na taccoji cojuanaa soldadouha. Socua na taccoji cojuanaa tajitiumiaajaahuaj. Naa quenaacoturee njuatejojua tohuateyaji. Nojuajaari Pueyaso seruta nujuatusee jiyareta tohuateyaji. Tohuateyari cumueeca casaata shipinishano quiriquiaari. Jiyacaritij, tohuateyari tamajaaja riatequee. Nojoriiri tohuareetamaa carijiniacuma. Pueyaso seruuri Pedro jiyatariquiaa sapuenujuaara tiaca jiuujiaaco. Na nuhuaji, na shuriucuaji shaajequeeri. ¹¹ Pedroori jiyacari shusha niishiquii. Naa sequereei:

—¡Seetanujuanaaqui quiriquiaa! ¡Cua Jiyaniijiaquiai na seru jiyaroree cucua, na mashiquiniuria janiya Herodescuaji, cuarta Judiocuacaacuajijiuhuaj! Naa na jiyaroreeri maja cua miishaanura taa nojori niishirioriquiaa na miiniuria juucua janiyani.

¹² Nojuajaari naa na niishiriojonuta María tiajinia quiaquiaari. Nio Maríacuajaari tamonu Juan nucua. Cuno Juan sesaari Marcojuhuaj. Cuno tiajinia, queraatia Pueyaso pueyari Pedroocuara tii secojonuuriquiaa jiyacari. ¹³ Pedroori jiyacari piquiquiaari carijiniacuma mataca tohuateyaji. Tiaco seruuri na tojiquiaari piquiyano. Nio seru sesaari quiquiaari Rode, niyacoo. Nojuajaari juucua catecanoquiaari tohuateyaji, na niquiniuria cante quiriquiaani. ¹⁴ Nojuajaari saaja Pedro tojishii tia camaru jiyaniquiriyano, na tiootiu na riatanura nocuaji. Niyacoo tojishacari seetanujuanaa Pedro rupaa, majaari tiootiu na riatanu quiquiaari na shuquiriniutia. Saaja netequiaariuhua tiaco quinia numootenuraari. Nojori sequencesuhuari:

—¡Pedrocuaajaqui nooj, tohuateyaji nujuate!

¹⁵ Pueyari saa niyacoo riucuaquiaariija:

—¿Quiaate paateya? Teyano Pedrote nujuatesaarucuaacuajani.

Niyacoori nojori sequenu pacutequiaariuhua:

—¡Taaquiriirinij! ¡Pedrocuaaquiniatejaj, nooj nujuate!

Pueyari saaja sequequiaari:

—Maja nojuaja. Pedro cojuana Pueyaso seru naasucuacuaja.

¹⁶ Nojori nacoojosacari tiaco, Pedroori tohuateyaji piquijoriquiaajaa. Tiootiu jaara socua riatasaaquiaari, nojuacuajaari quiriquiaa. Pueyari na niquishacari shiriiquitiuquiaari. ¹⁷ Pedroori nojori sanaajaree jiyacari na juaashiquiata. Cuniqui quiniaa pohuatareeri taa Pueyaso tohuaterohua nojuaja nujuatejojuajiniji. Pedroori naa sequequiaari nojoritij:

—Niocua naa pohuatare Santiagojuhuaj, parta Jesuucua tiuuniaanio.

Na nuhuaji, Pedroori tiji tohuatacuhua. Tamaqui quiaareeri.

¹⁸ Jaara juhuaquequiaari, nujuatejojuajinia cojuanaa soldadouhari jiyanohua shiriiquitiuquiaari. Majaari nojori niishiniu quiriquiaari taa Pedro miirii nujuatejojuajiniji nojori tajinijini. Tama nojorijiaarijia naa sequetuquiaari na puerenuta:

—¡Pa jiyaniijia Herodesri quiarijia pa puecoonutaniya, maninia pa cojuaquiniiucua Pedro!

¹⁹ Herodes niishishacari, na shuriucua nujuatunaa soldadohua jiyaroquiaariiри nujuatejojuajinia nojori pajenura Pedro. Nojori jaara na riurataaquipuaari, Herodesri nujuatejojuajinia Pedro cojuanaa soldadohua nequesoreequiaari na juaaniutia, na niishiniuria juucua taa Pedro juurequeree nojori shuriucuajini. Na nuhuaji, Herodesri jiyanolhua na juaaniutia na shuriucua nujuatunaa soldadohua sequequiaari, nojori puecoonura narta soldadohua, nojori cojuaaquiniuucua maninia Pedro nujuatejojuajinia. Naa na miiniu nuhuajitij, Herodesri Judea jiyajiniji pacuquiaari. Cesareya tiacajinija quishiiri.

Herodes shaajenujiniji pohuatasano

²⁰ Jiyacaritij, Herodesri jiyanolhua juaariquiaa Tiro tiacajinija quiniaa pueyata, Sidón tiacajinija quiniaatanio. Nio caapiqui tiacajinijinio pueyari jiyaniijia Herodes tiajinia quojoquiaari nata nojori pocoojonura juucua. Majaari cuno juuca nojori pocoojonu quirii jiyaniijia Herodesta. Nocuaji, nojoriiri Herodes seru sequeree:

—Quiocua quia jiyaniijia sequere, canaa nata jiyanootioonu paniyani.

Cuno Herodes seru sesaari quiquiaari Blasto. Nojuajaari na jiyaniijia panishano quiquiaari. Na jiyaniijia maqueja cojiana quiquiaariajiaariuhuaj. Tiro tiacajiniji pueya, mariyata Sidón tiacajinijinio, nojoriiri na cumaneecata masetujua na miaquesocoriquiano jiyaniijia Herodes jiitiasano pueyajiniji. Nojoriiri jiyamitia jeecatoonu paniriquiaa cuno jiyaniijiata, maninia nojori quiniuhuara nata, Herodes niquitiojotenuhuara na jiitiasano pueya na miajajaura Sidón tiacajinijinio pueya, Tiro tiacajinijinio pueyanio.

²¹ Herodes seruuri nojori sequequiaariuhua:

—Niocuana tamonu juuca nimia, jiyaniijiata nia pocoojonura.

Na nuhuaji, cuno pueyari na sequenceso juucajinia niquiaariuhua. Jiyaniijia Herodesri nojoriicuaji maniniushiquiaari. Na maniniuqui toque cushiquiaarii. Jiyaniijiaacuajinio shipinishano cajitiujinia cajiriohuari. Tiji pocuaquiaari cuno pueyacuaria. ²² Puetunu cu-niqui quiniaa pueya tojishacari naa maninia Herodes pocuaano nojori niquiaratej, nojoriiri nacoonu coteequiaari. Naa sequetuquiaari na nacoosacariiri:

—¡Nio pueyano pocuaani, majaari nareja pueyano! ¡Nojuajaqui Pueyaso!

²³ Pueya sequencesacari naa Herodestej, nojuajaari juhua shuquiu-riosaaquiaari sajaruhua. Majaari quenaaja cuno pueya na sequenu quirii: “Maja naa cua sequetunutej. Janiya maja Pueyasoni”. Nocuaji, Pueyaso seruuri canashiyaqueiji na tojetequiaari. Na pocuasacariijia cu-somaari. Na sarapiyari na jiniacuma miaquequiaari. Naa cusotaquiaari tama na sarapiyajaarijia.

²⁴ Pueyaso rupaari saniniuujia socua niyacasaaquiaari, tiquiyocua pohuatasacari puetunu pueya niquiarajanaa. Naacuajitij, Pueyasoocua tiuuniaa pueyari socua queraatiara canequiaarijihuaj. ²⁵ Bernabé, Saulonio, nojori jaara niquitioquiaari cumaneeca Jerusalén tiacajinia Pueyaso pueya jiitanaa, nojoriiri ritia quojoquiaariuhua Antioquiya tiacajiniohua. Nojoriiri jiyacari Jerusalén tiacajiniji riquiaariuhua Juan. Juan sesaari quiquiaariuhuaj Marco.

13

Saulo Bernabeeta rucuanejonu coteesacari Jesujiniji pohuatanura tiquiyocua

¹ Antioquiya tiacajinia Jesuucua tiuuniaa pueyajinijionni, noojiaqueyari quiquiaari Pueyaso sequenu panishano Pueyaso pueyara camini- ujiuniaa. Quiquiaariajiaariuhua Pueyaso Rupaa niishitiojonaa. Nioori nojori sesaca: Bernabé, Simónnio, na sesa tarajanu quiquiaari Negro; Lucionio. Nojuajaari Cirene tiacajinjinio pueyano. Quiquiaariajiaariuhua Manaén. Nojuajaari mariyata Galilea jiyajinia jiyaniijiarano Herodesta canashitijiosaaquiaari. Quiquiaariajiaariuhua Saulo. ² Tamonu juuca, puetunu nojorijianaari Pueyaso secojonuuriquiaa. Cuno juuca- juhuaj, majaari nojori miaquenunu quiriquiaa socua na secojonu- unura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequequiaari tariucuacaanucuajani.

³ Nojoriiri jiyacari socua maja na miaquenunu quiquiaari. Saaja Pueyaso secojonuuriquiaa socua jiyanoahuari. Na secojonuunu nuhuaji, nojoriiri Bernabé nacaacua, mariyata Saulo nacaacua niatuquiaari na juaashiquiaca. Nojoriiri naa miishaaquiaari nojori jiyatesaa- nura Pueyaso jiyaramiquishano pueyara, Pueyaso rupaa pohuatanu- uriquiano jiyanohua Pueyaso Sohuanu cumaacata.

Jesujiniji pohuatasacari Chipre jiyajinia

⁴ Pueyaso Sohuanu jiyaramiquishano Bernabé, Saulonio, nojoriiri cu- niquiji janiya quiaquiaariajara nucuaco Seleucia tiacajiniara, shonini- acu caminia casaqueyaji. Nojoriiri cuniquiji quiaquiaari puereetuca buquejinia Chipre jiyanhano jiyajiniara. Chipre jiya tucuaatiaja, shoniniacu caminia jiuujiajinia. ⁵ Nojori tiuquijiosacari Salamina tiaca tacatajajiniji, tii Pueyaso rupaa pohuatanunu coteequiaari puetunu cuniqui quinia Judiocuaca secojojuaca tiajiniaqueyajanaari. Juanri nojoritia quiriquiaajuhuaj, nojori naacuriquiano. ⁶ Naa nojori rucoo- josacari Pueyaso rupaa pohuatanura Chipre jiya tucuaatiajaacuatej, socua tiuquijioseequiaari Pafos tiacajiniaari Chipre tamajiria. Nojoriiri tii riuriataquiaari shimiaci, narta Judio pueyano. Na sesa quiquiaari Barjesús. Nojuajaari cuniqui quinia sapojoquiaari naatej: “Janiyacuaja Pueyaso sequenu panishano caminiuijunia pajaniyarani”.

⁷ Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniija quiquiaari. Cuno jiyaniijaari jiyanohua niishijia quiquiaari. Nojuajaari Bernabé masuuquiaari Saulonio, nojori pohuatanura Pueyaso rupaa nojuaja. ⁸ Cuno shimiacu sesaari Griego rupaajinia sequencesaquiaari Elimas. Nojuajaari saaja cuno jiyaniija niquiara cuaracashitiquiaari Pueyaso rupaa. Naa sequeree cuno jiyani- iijaari:

—Maja cuno pojori tojiniu. Jiyanohua sesaari nojori pohuatasano. Quia sapojoitiuyano.

⁹ Saulo sesaari Pablo quiquiaarijihuaj. Jiyacari, Pueyaso Sohuanu cumaquishacari nojuaja, Pabloori jiyanohua shitimia shimiaci jiquioco shootiaree naa na sequencesacari nojuaja:

¹⁰ —¡Sesaaca niyanu sequenaa! ¡Maninia mijiaca paracaajianaa! ¿Casaara pueya quia tenujiya Pueyasocuajini? ¹¹ ¡Cua Jiyaniijiaari quiarijia quia saniitionutaniya! ¡Quiaari cariyojuarura quiniutianiya seetanujuanaa! ¡Quiaari pasaja tarishiniutaniya cariyojuaru quia quishacari!

Jiyacaritij, juhua niniquiaari na namijiajinia cajimiaa. Cariyojuarura quiquiri. Juhua ninishiqui quiaquejoquiaari puetunu cunocojuanaari, na juaashiquiajiniji na jaatucusaanura juucua. ¹² Cuno jiyanijia jaara naa niquiquiaaritij, Pueyasocuua tiuuriiri na niquiara nojori pohatasacari shanohua Jiyaniijia Jesujiniji.

Pablo, Bernabé quishacari Antioquiya tiacajinia, Pisidia jiyajinie

¹³ Pabloonri na cojniaata Pafos tiacajiniji quiaquiaari buquejinia Perge tiacajiniera, Panfilia jiyajinie. Juanri Perge tiacajinie cateseequiaari nojoriicuaji. Tiji riuiuuquiaariuhua Jerusalén tiacajiniohuari. ¹⁴ Na nuhuaji, Pabloonri Bernabeeta Perge tiacajiniji quiaquiaari Antioquiya tiacajinie. Antioquiya tiacaari Pisidia jiyajinie. Tii nojori quishacari, nojoriiri samaatenu juuca quiaquiaari narta Judiocuaca secojonuuja tiajinie. Na tiuquishacari, cajitiushiiri. ¹⁵ Jiyacaritij, tariucuacaanu Moisés Rootasanoori serojosaaquiaari. Tariucuacaanu Pueyaso sequesano caminiujiuniaa naajotasanoori serojosaaquiaarijuhuaj. Na nuhuaji, rerejojua tia camarnuuri naa sequequiaari Pablo, Bernabeeno:

—Cuarta Judiocuacanaa, niaa jaara Pueyasojiniji nia niishishano casaa sequenu paniri, nia niishitijoore quiarijia niya quiniae niquiara.

¹⁶ Pabloonri sanequiaari. Na juaashiquiata sanaajaree pueyari. Naa nojori sequereeri:

—Nia tojitiare cuarta Israel pueyanaa, niajaniyajuhuaj, canapuete Pueyaso tojitiajacacuajani tamasaca pueyapuejinjinio. ¹⁷ Paari sequequiaani: “Pueyasoori pa Jiyaniijia, Israel pueya pa quiniuccua”. Seetanujuanaa, paacuajaari Pueyaso saquiriojosano pueyacuajinioni. Tariucuacaanu, Pueyasoori maniniushiquiari pa supuetanaa saquiriojoquiaari na pueyara quiriquiano. Na nuhuaji, jiyanoehua pa supuetanaa canetequiaariiri Egipto jiyajinie nojori quishacari. Na nuhuaji, Pueyasoori nojori mashiquiquiaari cuno jiyajiniji na cumaacata. ¹⁸ Cuarenta marijiaari pa supuetanaa shoconujuquiaari pueyaraacaanu nojori rucoojosacari najuhuana cariiquia jiyajinie. Pueyasoori jiyacari nojori rejeretaquiaari na tojitiaaquishacari nojuaja. ¹⁹ Na nuhuaji, Pueyaso cumaacata, siete tamaatiuucua rupaa pocuajaca tau-cuacaari puecoosaquiaari Canaán jiyajiniji, saniniuujia cuno jiya na niquitosocoriquiano pa supuetanaa. ²⁰ Pa supuetanaa jaara Canaán jiya camaruhua quiquiaari tari, socua cuatrociento cincuenta marijiaari nojori shoconujuquiaari saaja nequesoreenaa jiitiasacari nojori. Na nuhuaji Samuelri nojori nequesoreenara jiyatesaaquiaarijuhuaj. Nojuajaari Pueyaso sequesano caminiujiunia quiquiaarijuhuaj. ²¹ Samuel quishacarijia, pa supuetanaari Pueyaso secojonuuquiaari na panitiushacari jiyaniijia, nojori jiitariquiano nequesoreenaa niti. Naacuajitij, Pueyasoori nojori jiyaniijia jiyatequiaari Saúl, Cis niyanu, supuetana Benjamín niquiohuacuajinio supueno pueyano. Saúlri nareja cuarenta marijia shocotejoquiaari pa supuetanaa jiyaniijia na quishacari. ²² Na nuhuaji, Pueyasoori Saúl sojotaquiaariuhua Saúl tojiyauquiuucua nojuaja. Saúl niti David jiyatequiaariuhua Israel pueya

jiyanijiara saniniuurijia. Pueyasoori naa sequequiaari Davidjiniji, na timitiasacari nojuaja:

“Isái niyanu Davidcuajaari cua shuquiuriojua. Nojuajaari cua panishano pueyano. Nojuajaari puetunu cua panishano miiniutianiyanaa”.

²³ Quiari naataja, Pueyasoori na sequencesano tohuateequiaari na mueratesacari pocuaji Tacuna. Nojuajaari Jesu, David niquiohuacuajinio supuenon. Pueyasoori na seerataquiaari Israel pueyacuají Tacuna quiriquiano, taa na sequequiaari tariucuacaanucuajani. ²⁴ Jesu coteyaquishacarijia rucuanenu na Quejiniji pohuatanura, Tiuquinijiona Juanri coteenu nocuaji pohuataquiaari Pueyasojiniji puetunu Israel pueya niquierajanaa. Tiuquinijiona Juanri nojori sequequiaari noojia nojori tacatonuhuara Pueyasooqua, naajuhuaj, moojinia nojori tiuquinijiosaanura, Pueyaso tojijiara nojori quiniuria. ²⁵ Quera Tiuquinijiona Juan shaajesacari, nojuajaari naa sequequiaari: “Janiyari maja Pueyaso Jiyarosanoni taa nia jiyaniquiaa najuhuana janiyacuajani. Na Jiyarosano cutaraari cua nuhuaji niniutianiya. Nojuajaari seetanujuanaa Jiyanijiajanaa cutara. Janiya maara jiyanohua shuquiriaatia quirini, nojuaja jaara cua sequere na serura cua quiniuria quenaaja na sapatu cua jocuanura nera. Nojuaja cutaraari saaja maninia mijiia”.

²⁶ ‘Cuarta pueyanaa, niajaniya cante Abraham niquiohuacuajinio pueyacuajani, cua tojitiare, niajaniyajuhuaj taucuacanaa, canapuete Pueyaso tojijiacacuajani. Niaaranoori nio maninia rupaa Pueyasojiniji, nia jiyanoshaanura sesa nia miishanojiniji. ²⁷ Jerusalén tiacajinia quinia, mariyata na camarucuanio, nojoriiri maja na niishiniu quija cante Jesu quiquiaarini. Majaari nojori niishitiuniu quiquiaarijihuaj Pueyaso sequencesano caminiuijuniaa naajiotasano tariucuacaanu. Cunoori najuhuana nojori serojonuusano puetunu samaatenu juujanaa. Naacuajitij, nojori jaara moquiaari Jesu, maninia tohuateequiaariiri Pueyaso sequencesano caminiuijuniaa naajiotasano, taa Jesujiniji sequencesaquaari tariucuacaanucuajani. ²⁸ Jesuuri seetanujuanaa maja na miiniu quiquiaari sesa. Tama nojorijiaarijia juhua sesa mijiara na jiyatequiaari cutara. Naacuajitij, Pilato sequetuquiaariiri cuaara na moteeranoj. ²⁹ Nojori jaara tari miiquiaari taa nojuajiniji naajiotasano quiya tariucuacaanu Pueyaso Rupaajiniacuajani, na roshinitiuquiaari niyacutesanojinijiiri. Raaco na niatureereri. ³⁰ Naajaa, macu na quishacari, Pueyasoori saaja na samiitianiquiaariuhua. ³¹ Na samiitianu nuhuaji, Jesuuri sequeyarucua na pueyacua mueranacuquiaari, noo pojoriicua canapuete na tarajaquiaari na quiasacari Galilea jiyaniji Jerusalén tiacajiniaracuajani. Nojoricuajaari quiarijia nojuajiniji poojotaniuhua puetunu pueya niquierajanaa.

³² ‘Canaari timiyani canaa pohuatasacari niajaniya, ¡Pueyaso pohuatasano pa supuetanaari tari tohuateeecan! ¡Pocuaji Tacunacuajaari tari miiquianu puetunu pa jiyanoshaanurajanaa! ³³ Seetanujuanaa, Pueyaso sequencesano pa supuetanaa Israel pueyarani, cunoori shusha pajaniyara tohuateeecanu, pa supuetanaa Israel pueyacuajinio pa quiniuucua. Pueyasoori tari tohuateeecanu na sequencesano pajaniyara, na samiitianishacariuhua Jesu, naatej, taa David jaaquequejonee Salmojinia na sequencesano quiyacuajani. Naa naajiotasano quiyari segundo Salmojinia: “Quiaari cua Niyancuaja. Janiyari quiarijia quia samiitianiriini”.

³⁴ Pueyasocuajaari sequequiaari, nojuacuajaari na samiitianiniutianiuhua na moqueyaquiniiucuaji na raaco. Nioori naajiotasano quiyajuhuaj tariucuacaanu Pueyaso Rupaajinia. Naa sequeyari:

“Janiyari maninia niaara miiniutianiyani taa cua sequequiaari Davidcuajani”.

³⁵ Naa naajiotasanoori Jesujiniji quiyajuhua David jaaquequejonee Salmojinia:

“Majaari quia panishano seru cuaqueya quia shanacunu quiniutianiya na moquenura”.

³⁶ Pueyanaa, paari seetanujuanaa niishiyani Davidri puetunu Pueyaso panishano na miinuu nuhuajijianaa shaajequiaari. Nojuajaari na supuetanaa rupuequiaari macunucua quiqiojinia. Na cuaqueyari seetanujuanaa moquequiaari cutara. ³⁷ Noo Jesu saniniuujia, Pueyaso cutaraari na samiitianiquiaariuhua. Majaari na moquenu quiquiaari cutara. ³⁸ Cuarta Israel pueyanaa, niaa cumaati canaa pohuatasano niishiya. Canaari Jesujiniji nia pohuataaani. Niaa jaara nocua tiuuri, niaari sesa nia miishanojiniji jiyanooshaanutaniya. ³⁹ Moisés Rootasanojinia, paari tariucuacaanu niishitiosaaquiaarini pa seja pa pueconura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniuujia. Majaari seetanujuanaa pa jiyanooshaanu quiquiaari naa pa miishacaritij. Quiarijia cutara, canapuete Jesuccua tiuya saniniunjia, nojoriiri puetunu sesa na miishanojinijianaa jiyanoshiya. ⁴⁰ Niaa cutaraari cocuaatia miiniutianiya pueyanaa, nia jaara cua pohuatasano ruuretare. Pueyasoori na tojiyashijiaca saniitionutaniya taa tariucuacaanu Pueyaso sequenceso caminiuijuniia sequequiaaricuajani. Naa sequetuquiaariiri:

⁴¹ “Nia tojitiare, rerequetejacanaa. Niaari jiuujiatenutaniya najuhuanaj. Na nuhuaji, niaari shaajasaanutaniyajuhuaj. Janiyari Pueyasoni. Janiyari tarilia nia niquivishoo casaa miiniutianiyani. Tamasaca jaara nia pohuatare, niaari saaja na cuaracashitiniutianyi”.

⁴² Na nuhuaji, Pabloori narta Judiocuaca rerejojua tiajiniji tohuareetaquiaariuhua na cojiniaata. Taucuacaari tii quiriquiaajuhuaj. Nio tau cuacaari Judiocuacaacua pacunaa quiquiaari, Judiocuaca nojori quiniuriajuhuaj, Pueyaso sequenceso tojitarianara na quiniuria. Nojoriiri Pablo sequequiaari, Bernabeenio:

—Niocua tamonu sábado canaa pohuatareeruhuaj, socua canaa tojiniuria Jesujiniji.

⁴³ Nojori quijosacariuhua Judiocuaca rerejojua tiajiniji, queraatia narta Judiocuacaari nojori nuhuajiquiaari, queraatia taucuacajinijinio Judiocuacaacua pacunaanio. Cuno pojoriiri maninia Moisés niishitiosano tojitarianaa quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta naa rootaquiaari nojori:

—Saaja Pueyasocuua tiuuijaca nia quiri. Majaari nocuaji taacanuunu. Nojuacuajaari pa cumaquijia.

⁴⁴ Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniuucua rerejoquiaari.

⁴⁵ Judiocuaca secojojua tia camarucua jaara niquivquiaari queraatia pueya na rerejojuajinia mishiyano, Pablo pohuatasano na tojitarianura, nojoriiri juaaquioquiaari. Nojoriiri tama sequetooquiaariajiaaja:

—Puetunu pueyajanaari cuno pojori tojitiajacara quiniutianiya. Pa tojiyaquiniutianiya saniniuurijia.

Naa sequeturiquiaa pueya niquiara Pablojinijijaariuhuaj:

—¡Pabloori maja maninia na niishiniu Pueyaso rupaa! ¡Najujuana sesa pohuataano! ¡Nojuajaari niishiyashijia!

⁴⁶ Pabloori saaja Bernabeeta sequequiaari na puereyaquiniutia:

—Maniniacuajaqui, cuarta Judiocuacanaa. Canaaacuajaari naa panitiaja niajaniyatej, Pueyaso rupaa canaa coteetanura pohuatanu niajaniya, Pueyaso saquirojosano Judiocuaca nia quiniuucua. Niaacuajaari saa na ruuretareejaa. ¡Majaquiiiri nia rishiniu paniniu, pueyara-caanu nia quiniuria Pueyasota! Quiarijiani, canaari saniniuujia tau-cuacaacua quianutaniyani, Pueyaso rupaa canaa pohuatanura nojori niquiara. ⁴⁷ Canaa Jiyaniijia jaara canaa jiyaramiquiaari, noju-jaari naa canaa sequequiaaritij: “Quia jiyatequiaari mijiria cuhu-atariquianonijia. Quia pohuatasano janiyajiniji caminiujiushaanu-taniya taucuaca niquiara puetunu jiya puequeetujinajanaa, Pueyaso jiyanooniuria nojorijiuhuaj”.

⁴⁸ Cuniqui quiniaa taucuaca jaara naa tojiquiaari sequeshiyanotej, nojoriiri shuquiriquiaari. Pueyaso rupaa maniniuhuaqueetareeri. Se-quietureeri:

—¡Jiyanoehua maninia pa Jiyaniijia Pueyaso rupaa!

Teyano pueya Pueyaso saquirojoquiaari tariucuacaanu na pueyara quiriquianocuajani, pueyaracaanu nata rishiniuriacuajani, jiyacaritij, nojoriiri Jesuucua tiuuquiaari. ⁴⁹ Jiyaniijia rupaari pohuatasaaquiaari puetunu cuno jiyajinajanaa. ⁵⁰ Judiocuacaari na juanauitua Pueyaso panijiaca maajipohua shiniujuquiaari na cojitiuniuria nojori, nojori miiniuria naquiya Pablo, Bernabeenio. Naa rootatuquiaari cuno tiaca-jiniji camarucuajaariuhuaj, mariyata cuno jiyajiniji nojori taanuunura Pablo, Bernabeenio. ⁵¹ Naaratej, na nuhuajiria, Pablo, Bernabeenio, nojoriiri na niohuacajiniji seseeca rapijionuutaquiaari. Naacuajitij, An-tioquiya tiacajinija quiniaa pueyari niishiquiaari, Pueyaso saniitiosacari nojori, majaari nojori Pabloocua, Bernabeeecua na tiututianu quiniutianiya Pueyaso jiyanoaquishacari nojori. Na nuhuaji, Pabloori Bern-abeeta cuno tiacajiniji quiaquiaari Iconio tiacajinija. ⁵² Jesuucua tiuu-niaa pueyari saniniuujia shuquiriaatia jateequiaari Antioquiya tiaca-jinija, nojori jiitiasacari Pueyaso Sohanu.

14

Pablo, Bernabé quishacari Iconio tiacajinija

¹ Pablo, Bernabeeta naa miiquiaarijuhua Iconio tiacajinija. Nojori-iri narta Judiocuaca rerejojua tiajinia tiuquitiaquiaari. Nojoriiri tii poahuataquiaari Jesujiniji puetunu nojori niquiarajanaa. Queraatia pueyari Jesuucua tiuuquiaari, Judiocuaca, taucuacanio. ² Noojiaqueya Judiocuacajinjinioori maja na tojiniu paniniu quiquiaari Jesujiniji po-huatasano. Cuno pojoriiri taucuaca shiniujuquiaari nojori juanauuria Jesuucua tiuuniaa pueya. ³ Pabloori, Bernabeeta cunora socua jiyo-jequiaari pueyaracaanu cuniqui, Jesuucua tiuuuniaa nojori cumaquinu-uria. Nojoriiri maja na puerenu quiquiaari Jiyaniijajiniji nojori pohu-atasacari. Seetanujuanaa, Jiyaniijaari nojori naacuquiaari jiyanoehua cutara maninia miishano nojori miiniuria, pueya naatanijionurajuhuaj.

Jiyaniijiaari nojori naacuquiaari cuno pueya niishiniuria, seetanujuanaari quiquiaari Pablo, Bernabé pohuatasano.⁴ Cuno tiacajinia quiniaa pueyari raquitiquiaari. Noojaqueyari tama narta Judiocuaca tojiquiaariajaja. Saniniuujia, tamasacaari Jesu jiyaramiquishano pueya tojijiara quiquiaari. Nojoriiri naa quiquiaari cuno tiacajinia.⁵ Naa nojori quishacaritij, Judiocuacaari taucuacata roojotooquiaari cuno tiacajinia jiyaniijianucuata. Naa roojotooquiaariiri nojori sesacanura Pablo, Bernabeenio, na jacutunura saitajuhuaj.⁶ Pablo, Bernabé jaara niishiquiaari naa cuno pueya miiniu panishacari nojoritij, tiji mashiyocuatuquiaariiri Licaonia jiyajiniara. Nojoriiri Listra tiacajinia quojquiaari, Derbe tiacajiniaranjo, cuno caapiqui tiaca shocua quiijiaca tiacajinajuhuaj.⁷ Nojoriiri tii poojotaquiaari Jesujiniji nojori niishishano.

Listra tiacajinia pueya jacutusacari Pablo saitia

⁸ Listra tiacajinia quiquiaariiri sesarunocua pueyano. Majaari na rucuanenu quijia. Nojuajaari naa rasaaquiaarijuhanajaj. Majaari na pooniniu quijia na cajitiujiniji.⁹ Cuno pueyanoori Pablo tojiriquiaa na pohuatasacari Jesujiniji. Pablo jaara na niquiquiaari, na niishiriiri nojuaajaari seetanujuanaa tiuuriquiaa na pohuatasanoocua. Naa Jesuucua na tiuuniuucuatej, Pabloori niishirii cuno pueyano na naata na cashacu jeequenuhua.¹⁰ Pabloori jiyamitia jiyanohua na sequeree:

—¡Maninia quia nujuare! ¡Maja porequetanu!

Cuno pueyanoori ritia sanequee. Rucuanenu saniriiri.¹¹ Cuno Licaonia pueya jaara niquitiuquiaari naa Pablo miishanotej, nojoriiri tama na rupaajinijaaja sequetuquiaari:

—¡Cumaacaraca quijiacaari juhua pueyasohua pocua rosetareeni, juhua pueya niquishano!

¹² Naa nojori sequencesacaritij, majaari Pablo, Bernabé niishiniu quiquiaari nojori sequencesano tama nojori rupaajinijaaja. Cuno pueyari Bernabé sesojoree Júpiterta, juhua nojori pueyaso sesa. Pabloori sesojosaareecujua Mercurio, jiyanohua pocuanu niishijia na quiniuucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jiitiasano juhua na pueyasohuara cuno jiyajinia.¹³ Júpiter secojojua tiaari Listra tiaca tohuateya shuriucua quiquiaari. Jiyacaritij, Júpiter secojojua tia cojuanaari juyaca jaatucunuquiaari, Pabloocuara nojori puecoosocoriquiano Bernabeecuaranjo, juhua nojori pueyasohuacuara. Maniniushitiajara naana shuucuaca shiyosano patootaquiaariajuhuaj. Cuno pueyanoori puetunu pueyatajanaa Pablo, Bernabé shuquiritianu paniriquiaa juucua, juyaca na puecoosacari nojoriicuara juhua Pueyasocuara.¹⁴ Pablo, Bernabé jaara niquiquiaari naa cuno pueya miiniu paniyano nojoritij, nojoriiri na toqueya sutaquiaari nojori tacaaniutia. Pueya tajiniaoaco netecuatuquiaariiri nojori miiniu panishano nojori tarinitianura. Pabloori naa nacaquiaari puetunu cuno pueya tojishocoriquianojuanaa:

¹⁵ —¡Pueyanaa! ¿Casaara naa nia miya canaani? ¡Canaari nareja pueyani taa niajaniyacuaani! ¡Canaari naacua niyarucuaa niaacuatej canaa sequenura niajaniya, puetunu nio najuhuana nia miishanojuanaa nia cartenura! ¡Saaja nia shuquiritiare cutara pueyaracaanu rishijia

Pueyaso! Nojuajaari nio jiya shipiniquiaari, jiya cajiniocua. Na shipinishanojaariuhua shoniniacu caminia. Puetunu pa niquishanojuanaari na shipinishano.¹⁶ Pueyasoori tarija puetunu pueyajanaa tarinitiaquiaari nojori miiniuria tama nojori panishanojuuaaja.¹⁷ Naajaa, nojuajaari pa supuetanaa niishtiquiaari cante nojuajani, maninia na miishacari nojoriria. Nojuajaari maru nitiquiaa pajaniyara, pa nataacuaca moritianura, pa miasocoriquiano pa jiitianura queraatia, shuquiriaatia pa quiniuriajuhuaj.

¹⁸ Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojori cuara na puecoonu panishano juyaca.

¹⁹ Jiyacaritij, Antioquiya tiacajinjinio Judiocuacaari tii tiuquijiosequiaari, Iconio tiacajinjinionio. Nojoriiri cuniqui quiniaa nasojosee Pabloocuara, Bernabeecuaranio. Cuniqui jacuturee saitia Pabloori. Nojori jaara jiyaniquiaari Pablo naasucuaari tari cusoyaree saitia jacusano, na jaatiuquiaari tiacajinji tamamaari.²⁰ Jesuucua tiuuniaa pueya jaara rerejoquiaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiquiaariuhua saajaari. Tariqui cuno tiacajinji quiaquiaari Bernabeeta Derbe tiacajiniaari.

²¹ Jaara Jesujiniji pohuataquiaari tii, queraatia pueyari Jesuucua tiuquiaari. Na nuhuaji, nojoriiri Derbe tiacajinji riujuutuquiaariuhua. Tiuquijioquiaariuhuari Listra tiacajinia, Iconio tiacajinia, Antioquiya tiacajinianio.²² Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

—Canapuete Pueyaso shuriucua quiriquianoni, nojoriiri naquiya miiniutianiya mijiria.

²³ Nojoriiri maninia Pueyaso tojijiaca pueya saquiriojotuquiaari, nojori jiyyatesocoriquiano Pueyaso pueya jiitiariquiano. Naa miitiuquiaari puetunu cuno tiacajinajanaari, Pueyaso pueya jiitianura tama nojori nacasunaajaaja. Jesu saquiriojosano pueyari maja na miaquenuunu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jiitiariquianoocuara:

—Canaa Jiyaniijianaa, nio pueya quiocua tiuujiacani, nojori quia naacure quiocua tiuuniaa narta pueya nojori jiitianura maninia.

Pablo tacatesacariuhua Bernabeeta Siria jiyajinia Antioquiya tiacajinjara

²⁴ Nojori riujuunihuara Antioquiya tiacajinohuara, Pisidia jiya shocotumohuara. Na nuhuaji, tiuquijioquiaariuhua Panfilia jiyajinjaaari.²⁵ Tii Pueyaso rupaa pohuatatuquiaari Perge tiacajiniaari cuno pueya niquiara. Nojori pohuatanu nuhuaji, Atalia tiacajinia quiójiquiaariuhuaj.²⁶ Cuniquiji, buquejinia jaaretatuquiaari Antioquiya tiacajinjaraari. Cuno Antioquiya tiacaari quiquiaari tee cuniqui narta Pueyaso pueya niaquiaari nojori icua na juaashiquiacuajani, Pueyaso nojori secojosacari. Nojori naa miiquiaari, Pablo, Bernabé jiyyatesaanura tucuacaanu nojori quiójonura Pueyaso rupaa nojori po-huatanura taucuaca. Cunoori quiquiaari shushajanaa nojori coteenu panishacari rucuanejonu tamaquicuia. Naacuajitij, nojori tohuateenu

nuhuaji puetunu Pueyaso panishanojuanaa, jiyacari shusha tiuquijioriquiohuari.²⁷ Antioquiya tiacajinia nojori quishacari tari, nojoriiri puetunu Jesuucua tiuniaa pueya masuunujuquiaarrijanaa. Cuniqui pohuataturee puetunu nojori niquiarajanaari, taa Pueyaso naacucanu maninia nojori pohuatasacari Jesujiniji. Pohuatanuuquiaarrijiaariuhuaj taa Pueyaso tarajetequaari taucuaca jiuujiani, Jesuucua nojori tiuuniuriajuhuaj.²⁸ Pabloori, Bernabeeta cuniqui tarishiquiaarriaara narta Jesuucua tiuniaata.

15

Jesuucua tiuniaa jiitiana nacoosacari Jerusalén tiacajinia

¹ Jiyacaritij, Judea jiyajinjinio pueyari Antioquiya tiacajinia quiojquiaari. Nojoriiri tii sesa niishitiojonu coteequiaari cuniqui quiniaas Jesuucua tiuniaa pueya. Nojoriiri naa sequeriquiaas Antioquiya tiacajinia quiniaas narta Pueyaso pueyatej:

—¡Pueyanaa, Jesuucua tiuniaa pueya cuaara na cararaatiuuquia comiatejoteera, taa Moisés niishitiojoquiaaricuajani! Jaara miatesoo quiri, mayaari Pueyaso jiyanooni quiniutianiya jiyaneotej, na pueya nojori quiniuria!

² Pablo, Bernabeenio, nojori jaara tojiquiaari naa cuno pojori niishitiosanotej, nojoriiri cuno pojoritia nacojoquiaari jiyanoohua. Naacuajitij, Antioquiya tiacajinia quiniaas Pueyaso pueyari Pablo, Bernabé sequequiaari nojori quianura noojiaqueya cuniquipuinio pueyata Jerusalén tiacajinia. Nojori jiyaroreeri na nequesotanura Jesu jiyaramiquishano pueya Jerusalén tiacajinia, mariyata Jesuucua tiuniaa pueya jiitianaanio. Nojoriiri jiyaramiquishaaree cuno pojori nequesotasaanura, ¿seetanutejanaa naa miishiyatena, taa cuno Judea jiyajinjinio nijiono pueya niishitiojiya canaacuajani?

³ Naacuajitij, Pabloori Bernabeeta jiyarosaaquiaari Jerusalén tiacajiniara. Nojori quiasacari Jerusalén tiacajiniara, Fenicia jiyacuma quiojomaqueaariiri, Samaria jiyacumanio. Nojoriiri cuno jiyacajinia Pueyaso pueya pohuatanuumaqueaari taa taucuaca cartequiaari tama sesa nojori miishanojuajani, Pueyaso tojijiara nojori quiniuria. Jesuucua tiuniaa pueya jaara naa tojiquiaaritij, nojoriiri jiyanoohua shuquiriquiaari.

⁴ Nojori tiuquijiosacari Jerusalén tiacajinia, puetunu Jesuucua tiuniaa pueyajanaari nojori rerejotaquiaari, mariyata puetunu Jesu jiyaramiquishano pueyajanaanio. Pablo, Bernabeeri jiyacari nojori pohuataquiaari puetunujuanaa, naajuhuaj, taa Pueyaso naacuquiaari maninia nojorini, nojori pohuatasacari taucuaca Jesujiniji.⁵ Cuniqui quiriquiaajaariuhuaj Fariseocuaca, tariucua Jesuucua tiuuijaca. Cuno pojoriiri rerejonaa tajiniji nujuatuquiaari. Naa sequetureeri:

—Cuno taucuaca Jesuucua tiuniaani, na cararaatiuuquia co cuaara miatejosaaria Judiocuaca nojori quiyaquishacari. Na nuhuaji, nojori cuaara Moisés niishitiosano tojijiara quiiria, taa Moisés rootaquiaari tariucuacaanucuajani.

⁶ Naa nojori nacoojonu nuhuajitij, saa Jesu jiyaramiquishano pueyajari rerejotaquiaari jiyareta Jesuucua tiuniaa narta pueya jiitianaata. Nojoriiri maninia niishiriojonuuquiaari taa na miiniutianiyani.⁷ Naa

pueyaracaanu nojori pocoojosacaritij, Pedroori socua nojori tajiniji nujuquiaari. Naa nojori sequereeri:

—Pueyanaa cua tojitiare. Niaacujaari niishiya, pa Jiyaniijaari cua saquiriojoquiaari na rupaa pohuatariquiano taucuaca tojishocoriquiano, nojori tiuuniuria Pueyasooocuahuaj.⁸ Pueyasocuajaari poojia niishijia. Nojuajaari cuno taucuaca niishitiquiaari, nojuajaari nojori jiyateree na pueyarajuhuaj, na Sohuanu na niquitiosacari nojori, taa na niquitioquiaari pajaniyacuaani. ⁹ Majaari nia jiyaniini Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya paniyajanaa. Cuno taucuaca jaara nocua tiuquiaari, nojuajaari nojori jiuujia jeequereejuhuaj saaja Jesuucua nojori tiuushacari.¹⁰ Naa nia tamacasacari taucuacajinjinio parta Pueyaso pueyatej, niaari Pueyaso miishano soojotaaruhua. ¿Casaara nia tamacaas Pueyaso miishanoni? Niaari quiarijia Moisés niishitiojosano tojitiniu paniya Jesuucua tiuuniaa pueya, juhua pa tojishanocuaa. Saniniujia, majaari quenaaja pa supuetanaa na naata na miiniu quiquiaari puetunujuanaa, taa Moisés niishitiojoquiaaricuajani.¹¹ Paari niishiyani pa Jiyaniija Jesuuri pa jiyanoojia. Naaratej, pa jiyanoquiaari, na pueya pa quiniuria. Mariyata naa miiquianu cuno taucuacajaariuhuaj. Majaari seetanujuanaa maninia pa miiniu quiquiaari pa jiyanooshaanura.

¹² Naa Pedro seqesacaritij, puetunu pueyajanaari socua sanaaje-taquiaari. Bernabeeri Pablota jiyacari pohuataquiaari taa Pueyaso na cumaacata miitiquiaari maninia taucuaca niquierani, naajuhuaj, taa nojori naatanijioquiaari cusosuhuajaniuhuaj.¹³ Naa nojori pohuatanu nuhuajitj, Santiagoori sequequiaarijuhuaj:

—Cuarta Pueyaso muerasunaa, cua tojitiare. ¹⁴ Simón Pedrocuajaari tari pa pohuataree taa Pueyaso coteecanu shusha na Sohuanuta poonijionura cuno taucuaca jiuujiajiniani. Pueyasocuajaari nojorijinjinio jiyateya seetanujuanaa na pueyara, nojori maniniuhuaqueetanura nojuaja. ¹⁵ Seetanujuanaari nio. Naajuhuaj, tariucuacaanu Pueyaso sequenu panishano caminiujiuniaacuajaari naa naajionuutaquiaari Pueyaso seqesanotej:

¹⁶ “Janiyari David niquiohuacuajinio mueratenutaniya tamonu pueyanoni. Davidcuajaari na supuetanarano. Nojuajaari Jiyaniija janaa quiriquiano puetunu pueyapuerajanaa, taa David quiquiaari Israel pueya jiyaniijiacuaani. ¹⁷ Naacuajitj, puetunu taucuacajanaari cua pajenuunutaniya, noo pojori teyano cua saquiriojoquiaari tariucuacaanucuajani, nojori jiyatesocoriquiano na Jiyaniija janiya”. ¹⁸ Jiyaniijaari naa sequeyaquij. Nojuajaari tariucuacaanu pueya toquiaari nio”.

¹⁹ ‘Naaratej pueyanaa, janiyari nia sequeyani, nareja nia niquiri cuno taucuaca, Jiyaniija Jesuucua tiuuniaani. Majaari nojori najiquitinu Pueyasooocuaji, nia tojitinu panishacari nojori tariucuacaanu Moisés niishitiojosano. ²⁰ Nareja nojoriicuara pa naajiore. Pocua pa naajioneejinia sequere nojorini, maja tari nojori miaquenunura shipinshano pueyasooocuara na puecootusano casaa, juunu, borregonio. Cuaara quitiuria saa necocuataja, maja tamonu na numuetucunura socua. Jaara shu miaquetunu paniri, cuaara na miaqueera puetunu na nanaca caatinijiasanojuanaa, naajuhuaj, maja na miaquenunura

casami nanaca. ²¹ Puetunu nio cua seqesanojuanaari parta Judiocuaca tojishano. Cuno niishitiojosanoori pueyaracaanu parta Judiocuaca rerejojuaca tiajiniaqueya naa serojosaaquiaia Moisés naajioneejiniji puetunu samaatenu juucajanaa, puetunu tiquiyocua tiacajinajanaa.

²² Naa nojori pocoojonu nuhuajitij, Jesu jiyaramiquishano pueya, puetunu tii quiniaa Jesuucua tiuuniaa pueyajanaanio, nojori jitianaajuhuaj, puetunu nojorijianaari mariyata niishiriojonuuquiaari. Naacuajitij, nojoriiri narta Pueyaso pueya saquiriojotuquiaari na jiyarotusocoriquiano Antioquiya tiacajinia Pablota, Bernabeetanio. Jiyacari saquiriojosaareeri Judas, Silasnio. Judas sesaari Barsabás quiquiaarijuhuaj. Cuno pojoriiri Jesuucua tiuuniaa pueya tojishano quijia cutara, cuniqui Jerusalén tiacajiniani. ²³ Nojoritia jiyarotasaaquiaariiri naajionee. Cuno naajioneejiniaari naa sequequiaari:

“Niaacuara naajionaani, canaari Jesu jiyaramiquishano pueyani, Je-suucua tiuuniaa jitianaanio, Jerusalén tiacajinia niarta Jesuucua tiu-niaa pueyajuhuaj. Canaari nia saruhuataani pueyanaa. Taucuaca nia quishacari, naajaa. Jesuucua tiuuniaa nia quishacari, niaari canaa tapueyocuacajujuaj, tiquiyocua Antioquiya tiacajinia quijiaca, Siria jiyajinia quiniaanio, Cilicia jiyajinia quiniaajuhuaj. ²⁴ Canaari nia-janiyajiniji pohuatasaarucuaani, niiquiji pueyanaari niaacua quiacanu. Canaa nia jiyanoori. Majaari canaa jiyaronu quiquianu nojori. Cuno pojoriniaari nia taajetecanu tamaatia nojori niishitiojosacari niajaniya. Naajuhuaj, nia cushitiocanuuri nojori sequesacari nia cararaatiuuquia co nia miatejonura taa Moisés niishitiojouquiaaricuajani. Nojorini-aari nia shiniujuquianu nia tojitianura socua Moisés Rootasanojuhuaj. Quiarijia maja naate pueyanaa. ²⁵ Naaratej, saa jiyareta canaajaari niya rerejoreeni canaa niishiriojonura canapue canaa saquirionutaniyani niaacua jiyaramiquishocoriquiano. Canaari nojori saquirio-joree tarini canaa jiyarosocoriquiano Pablota, Bernabeetanio, nojori pocoojoriquiano maninia niaata. ²⁶ Canaa panishano pueya Pablo, Bernabeenio, nojoriiri tama na cuaqueya panitiaquiaariajaa Jesujiniji nojori pohuatascari tiquiyocua. ²⁷ Quiarijani, canaari niaacua ji-yaroya canaajinijinio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miiniutianiyani, naatej, taa canaa pocoojoree canaa rerejosacaricuajani. ²⁸ Canaa niishirio-josanoori maninia quiya Pueyaso Sohanuara. Canaari na shuquiri-tiaajuhuaj. Majaari canaa cushionionu paniniu niajaniya puera canaa supuetanaa niishitiosanota najuhuanaj. ²⁹ Canaari saaja nio nia se-quenu paniyani pueyanaa. Nia tojitiare. Majaari socua nia miaquenu shipinijosano pueyasohuacuara puecoosano casaa. Majaari nanaca miaquenu. Naajuhuaj, niaa jaara shu miaquenu paniri, nia miaquere maninia na nanaca caatinijiasano. Naajuhuaj, saaja nia niquiocoahuata nia quiriquia. Majaari socua tamonu numuetucunu. Niaa jaara nio tojijia quiri, niaari maninia miyacuaja. Tariucuaja pueyanaa”.

³⁰ Naacuajitij, cuno cuatro pueyari jiyarosaaquiaari Jerusalén tiacajiniji. Jaara tiuquijioquiaari Antioquiya tiacajinia, nojoriiri puetunu Je-suucua tiuuniaa pueyajanaa numootejoquiaari na rerejonura. Puetunu nojorijiana jaara tari rerejoquiaari, jiyacari niquitiosaaquiaariiri cuno naajionee puetunu nojori niquiarajanaa serojosocoriquiano.

³¹ Naajjionee jaara serojosaaquiaari, puetunu Jesuucua tiuuniaa tau-cuacajanaari shuquiriquiaari jiyanoqua. Naacuajitij, nojoriiri noo-jia cajitiquiaariuhua tacaaquioyano juucua. ³² Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jiitiaquiaari, Pueyaso sequenu panishano nojori caminiujiuniuria. Naacuajitij, nojoriiri Jesuucua tiuuniaa pueya cumanijiaquiaari jiyanoqua. Na rootatutuquiaariiri maja nojori tarin-i-tianura Jesuucua tiuuniu. ³³ Nojoriiri Antioquiya tiacajinia camueenu-juquiaari pasaja. Na nuhuaji, nojori quianu panishacariuhua Jerusalén tiacajinohua na jiyaronaacua, Antioquiya tiacajinia quinias Pueyaso pueyari nojori sequequiaari:

—Maniniacuaja. Juhuajaniya nia quiaarohuaqui.

³⁴ Silasri saaja na cojiniaacuaji jateequiaari cuniquijia Antioquiya tiacajinia. Naacuajitij, Judasri tamajaaja tacatequiaariuhua Jerusalén tiacajinohua. ³⁵ Pablo, Bernabeeri Antioquiya tiacajinia camueenu-juquiaariuhua. Nojoriiri cuniqui Jesuucua tiuuniaa pueya niishi-tiojocuiaari. Queraatia cuniquijinio pueyari nojori rupuequiaari ni-ishitiojonurajuhuaj. Puetunu nojorijianaari Jiyaniijia Jesujiniji pohu-ataquiaari tamasaca niquierajuhuaj.

Pablo pacutenu panishacariuhua quianu Pueyaso pueya na niquini-uhuara

³⁶ Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocuara socua niquiniuhua, paa tii po-huatacanu Jiyaniijia rupaatej. Naa pa miiri pa niishiniuria taa parta Jesuucua tiuuniaa pueya quiyani.

³⁷ Bernabeeri na riucuaree:

—Jajaa. Juan pa riyarecuarajaj, pa tarajariquiano.

Juan sesaari Marco quiquiaariuhuaj. ³⁸ Majaari Pablo paniniu quiquiaari Juan quianura nojoritia. Nocuaji Bernabé sequequiaariiri:

—¿Paatucua casaara rupoyare pocua Marco saajaaraniuhua? Nojuacuajaari pa tiuquiaariuhua Panfilia jiyajinia pa quishacari. ¿Pueyaso rupaa pa pohuatasacari pa tarajacanu maniniatucuaa? Naacuajaa.

³⁹ Saa nojorijiaari socua juayonuutaquiaari Juan Marcoocua. Nocuaji Bernabeeri jiyacari Pabloocuaji rupatequiaari. Na rupatesacari na rupuena Pablojiniji, nojuajaari Juan riquiaari cutara na tarajariquiano. Jiyacaritij, tama nojorijiaarijia buquejinia quiaquiaari Chipre jiyajiniara. ⁴⁰ Pabloori saniniuuja Silas saquiriojocuaria na tarajariquiano. Nojori quiaaquishacarijia, Jesuucua tiuuniaa pueyari nocuara Pueyaso secojotuquiaari. Naa na miitiuniu nuhuajitij, Pablo, Silasnio, nojoriiri panaatia quiaquiaari cutara Pueyaso rupaa pohuatanura. ⁴¹ Nojori quiasacari Jesuucua tiuuniaa pueya shiniujiuniucua, Siria jiyacuma tajitiumiaquiaariiri, Cilicia jiyacumanio. Pabloori cuno jiyaca tiacajinia socua poojotaquiaari Jesujiniji. Naa cumaquiquiaari Jesuucua tiuuniaa pueyari.

16

Timoteo cojishacari Pablo, Silasnio

¹ Pabloori Silasta tiuquijioquiaari Derbe tiacajinia, Listra tiacajini-anio. Tii riuriatatuquiaari Timoteo jiynishano pueyanoori. Cuno

mashajaari Jesuucua tiuujia pueyano quiquiaari. Na nucuaari Judio maaji quiquiaari, Jesuucua tiuuniajuhuaj. Timoteo queeri tahue quiquiaari cutara.² Listra tiacajinia Jesuucua tiuuniaa pueyari Timoteo maniniucuatujua. Naa sequetujuuaari nojori: "Timoteori jiyanolhua maninia pueyano". Iconio tiacajinijinio Jesuucua tiuuniaa pueyari naa sequetujujuhuaj.³ Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiuuquia co miatetequiaariiri, cuno jiyajinia quiniaas Judiocuaca soojotanuuquiaji nojuaja. Puetunu pueyajanaari na niishijia, na queeri seetanujuanaa tahue quija. Nocuaji naa miishaareeri. Na nuhuaji, Timoteo cutaraari Pablo cojiquiaari.⁴ Pabloori Jesuucua tiuuniaa taucuaca niquiquiaari puetunu tiacajinajanaa. Nojori niquiara caminiujiuquiaari Jerusalén tiacajiniji Jesu jiyaramiquishano pueya sequencesano nojoririaari, mariyata Jesuucua tiuuniaa pueya jiitiana sequencesanojuhuaj.⁵ Naa Pablo caminiujiushacaritij, puetunu Jesuucua tiuuniaa pueyajanaari socua noojia cumaquiquiaari jiyanolhua. Tamasacaari socua Jesuucua tiuququiaarijuhuaj. Jesuucua tiuuniaa pueyari naa canequiaari socua. Naa caneriquiaaa puetunu juucajanaari.

Pueyaso Sohuanu tosacari Pablo, Macedonia jiyajiniara na quianura

⁶ Na nuhuaji, Pueyaso Sohuanuuri Pablo tenujuquiaari maja nojori pohuatanura Jesujiniji Asia jiyajinia. Naacuajitij, nojoriiri Frigia jiyacuma quojoquiaari, Galacia jiyacumanio.⁷ Naa tiuquijioseequiaari Misia jiya shuriucuaari. Nojoriiri cuniquiji quianu paniquiaari Bitinia jiyajinia juucua. Naajuhuaj, majaari Pueyaso Sohuanu paniniu quiquiaari tii nojori quianura.⁸ Cunora, Pabloori na cojiniaata cuaniquiaari Misia jiyacuma. Troas tiacajinia tiuquijioseeri. Nio Troas tiacaari shoniniacu caminia casaqueyaji quiya. Tiiri buque tiutiajoua.⁹ Pabloori cuno niucua juhua na maquenujinia niquiquiaari Macedonia jiyajinijinio pueyano nocua nujuano. Cuno pueyanoori Pablo sequencequiaari: "¡Mijo! Canaa quia naacutaquee Macedonia jiyajinia". Cuno Macedonia jiyari quiquiaari shoniniacu caminia taquijiria.¹⁰ Naa Pablo niquiniu nuhuaji juhua na maquenujinatej, canaari jiyacari ritia pajequiaarini taa canaa quianutaniya cuniquijini. Canaari sequereeni:

—¡Pa quiaarequij! Pueyasocuajaari pa panitiaa Jesujiniji pa pohuatanura cuno pueya niquiarajuhuaj.

Pablo quishacari Filipo tiacajinia Silasta

¹¹ Canaari Troas tiacajiniji quiaquiaari buquejiniani. Canaari Samotracia jiya tucuaatijaacua tiuquishiini. Canaari cuniquiji sanequaari tariquiniuhuaj, tiuquishiiri Neápolis tiacajinia.¹² Canaari cuniquiji quiamaa Filipo tiacajiniani. Filipo tiacaari socua panishano tiaca quiquiaari tamasaca tiacajiniji Macedonia jiyajinia. Roma tiacajinijinio pueyari tii pacuquiaari tarisia. Nojoriiri cuno Filipo tiaca jiyatequiaari nojori quiquirora. Canaari tii camueenujuquiaari rupaquijiani.¹³ Cuniqui canaa quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jii-tiquiaari Pueyaso secojonura. Canaari tii narejashiquijia cajitiuquiaari

mariyatani. Jiyacaritij, maajipohuari cuniqui rerejoquiaari na secojonuuunura juucua. Canaari saaja nojori niquiara pohuataree Jesujinijini. ¹⁴ Cuniqui maajipohua rerejosaquni, nojori tajinia quiquiaari jiaariuhua tamonu maaji. Na sesa quiquiaari Lidia. Nojuajaari Tiyatira tiacajinjinio quiquiaari. Shanohua quenaaruqueya naatuque toqueya niquitiojoua quiquiaari na cumaneecaraari. Nio maajiiri tarilia Pueyaso secojoua quiquiaari. Tii na quishacari, Pablo pohuatasano tojiriquiaari. Pueyasoori jiyacari na tojeteree. Juhua noojia riataareeri seetanujuanaa Pablo pohuatasano na tojiniuria maninia. Jesuucua tiuuriiri. ¹⁵ Na nuhuaji, Lidiaari puetunu na tajinia quiniaatajanaa tiuquinijosaaquiaari moojinia. Canaa tiuquinijionu nuhuaji puetunu nojorijanaa, Lidiaari canaa sequequiaari:

—Niaa jaara cucuaji taacanuyaquiri, miji, nia quishii cua tajinia. Janiyari pa Jiyaniijia tojijajuhuaj.

Nojuajaari seetanujuanaa canaa panitiaquiaari na tajinia canaa quiniuria. Naacuajitij, canaari na tajinia camueenujuquiaarini.

¹⁶ Tamonu juuca, socua canaa pacutesacari quianu pueya secojonujuajiniara, canaari samaruraca niyacoo niquiopiaarini. Cuno niyacoori camaruhuaraca quiopiaari. Niyacoori “niishijia samaru” jiitaja. Naaratej, cuno niyacoori puetunu pueya niishiniu panishanojuanaa pohuataja nojoriria. Naa na miishacaritij, na camaruhuara maseja queraatia cumaneecaari. ¹⁷ Cuno niyacoori canaa nuhuaji sacuariquiaa. Naa nacariquiaa canaa na nuhuajishacariiri:

—¡Nio canuu cutaraari jiyocuacaanuji Jiyaniijiajiniji pohuatanaa! Nia niishitiojiyari Pueyaso jiyanooshano nia quiniuria, pueyaracaanu nia rishiniuria nata.

¹⁸ Saa naa canaa nuhuaji nacajaari, cuno tiacajinia canaa camueenujusacari. Pabloon socua na juaatiaquiaari. Nocua tacatequiaarii. Cuno niyacoojinia quijia samaru sequereeri:

—Janiyari Jesucristo sesajinia quia jiyaroyani! ¡Cuno maajijiniji quia tohuatare!

Naa Pablo sequencesacaritij, samaruuri na tojiquiaari. Ritia tohuataquiaari cuno niyacoojinijiiri.

¹⁹ Cuno niyacoo camaruhuari niishiopiaari maja tari nojori masenu quiniutianiya socua cumaneeca juhua coteenu, niyacoo pohuatasanojiniji. Naaratej, nojoriiri Pablo, Silas quoquoquiaari na juaaniutia. Nojori jaatucunuquiaari tiaca jiuujiajinia curotasano pueya cajitiucuajiniaraari. Tiaca jiyaniijianucuaari tii quiqiaca pueyaracaanu, nojori jiitianura pueya. ²⁰ Niyacoo camaruhuari Pablo, Silas nujuatejoquiaari tiaca jiyaniijianucua tacoji, cuniqui na nequesoreesaanura. Jiyaniijianucua sequetureeri:

—¡Nio canuuri Judiocuaca! Nojoriiri niya pa tiacajinia quinia pueya juaatijosee. ²¹ Nojoriiri tamaatia niishishano niishitiojonuya. Maja cumaati pa tojiniunioj. ¡Paari Romano pueyan!

²² Naacuajitij, puetunu cuno pueyajanaari na juaaniutia, Pablo, Silas cosequiaari ritia. Jiyaniijianucuaari nojori toqueya jaamitiquiaari jiyanoehua, na jocojosacari nojorijiniji. Na nuhuaji, tamasacaari seeratasaaaree nojori na mojoonura macata. ²³ Jiyanoehua na mojoosaanu nuhuaji, nojoriiri socua na tiuquinijoquiaari nujuatejojuajinia. Na nuhuaji, nujuatejojua tia camarnu seeratasaaareeri maninia na cojatenura nojori nujuatejojuajinia. ²⁴ Naacuajitij, cuno nujuatejojua

tia camarnuuri Pablo, Silas nujuatejoquiaari socua mij, nujuatejojuu cariquimiatej. Cuniqui nujuatejosaaquiaarii tii na cojuasaanura maninia, na mashiyocuatunuucuaji. Nojori cashacucuaari suruhuatuneeca quejasano tajiniocoma saatijosaaquiaarijuhuaj.

²⁵ Cuno niucua shiyaqueya, Pabloori Silasta Pueyaso secojonuriquiaajaa. Pueyaso maniniuhuaqueetaturiquiaari na jaaquequejosanota. Cuniqui nujuatejosano pueyari nojori tojitiariquiaaa. ²⁶ Jiyacaritij, rijiaari canashiyaquiji jiuuquiutiaquiaari jiyanohua cuno nujuatejojuua tia. Puetunu na tiootihuajanaari riatequequiaari. Puetunu pueya numatucuaacua morojotasano casaajanaari tamajaaja saacarejetaquiaari. ²⁷ Nujuatejojuua camarnuuri ritia niucuaquiaari. Saaja niquirii puetunu tohuateya riatequenojuanaari. Cunora, na nijininaquetecuaja mueruu shitiaree ritia na shuucuajiiri tama na cuaqueya na miaquenurajaja. Naa miiriiri na jiyanishacari puetunu nujuatejosano pueyajanaa naasucuaari tari mashiyocuaturee. ²⁸ Pablo jaara na niquiquiaari, nocua nacareeri:

—¡Maja najuhuana naa miiniutij! ¡Canaacuajaari puetunujuanaa niya quiyani!

²⁹ Nujuatejojuua camarnuuri na shiriiquiniutia tetecariquiaa. Tamonu sequereeri ritia samaritiu na patanura nocua. Samaritiu caaniuji netequee cutaraari nujuatejojuua jiniacumara. Pablo, Silas cariquimiaji mojoquetaseeri. ³⁰ Jiyacari nojori tohuatejoree carijiniacumaari. Nojori nequesotareeri:

—¡Pueyanaa! ¿Taa cua miyarinijia, Pueyaso jiyanoshano cua quiniuri-ajuhuaj?

³¹ Nojoriiri na riucuaree:

—Jiyanijia Jesucristoocua quia tiuuri jiyanoshano quia quiniuria, puetunu quia tiajinia quiniaaa quiniuria jiyanoshanojuhuaj.

³² Naaratej, Pabloori Silasta na niquiara pohuataree Pueyaso rupaa Jesujiniji, mariyata puetunu na tiajinia quiniaajanaa niquiaranio.

³³ Jiyacaritij, nujuatejojuua camarnuuri cuno niucuaja Pabloocua jiyanooquiaari, Silascuanio. Nojori cuaqueya majacuyashiquia jeequejoreeri. Na nuhuaji, puetunu cuno pueyajanaari ritia tiuquinijiosaaquiaari moojinia Jesuucua nojori tiuushacari. ³⁴ Jiyacari na tiajinia nojori jiyataquiaariiri. Tii Pablo, Silas mianuutereeri. Cuno nujuatejojuua camarnuuri jiyanohua shuquiriaatia quiriquiaaa puetunu na tiajinia quiniaatajanaa, Pueyasocua tiuuniaa nojori quishacari.

³⁵ Cuno tariqui, Filipo tiaca jiyaniijianucuaari na seja jiylaroquiaari nujuatejojuua tia camarnuucua, na sequenura nojuaja cuaara Pablo, Silas tohuatanijoora tari. ³⁶ Nujuatejojuua camarnuuri Pablo sequencesee:

—Tiaca jiyaniijianucua cucua jiylaroree na rupaani, cua cartenura quiarijia niajaniya. ¡Juhuajaniya nia quiaarohuaqui!

³⁷ Pabloori saaja jiyaniijianucua seja sequequiaari:

—¿Majateeri nia jiyaniijianucua niishiniu canaari Romano pueyajuhuaj? Canaa mojooturiquiaacuaa puetunu pueya niquiarajanaari. Majaari coteenu canaa nequesoreesaanu quiriucuaa. Canaari jiyanouua nujuatejosaarucuaani. ¿Taa na miitiuniu paniya quiarijia canaarini, jiylasohuaja tohuatejonu paniniu? ¿Jiylasohuaja mojooturiquiaacuaa canaatucuaa? ¡Nojorijanaa cuaara niiria quiarijia, niquipi nojori tohuatejonura canaa!

³⁸ Jiyaniijianucua seja jaara tacatequiaariuhua, puetunu Pablo sequencesanojuanaa pohuataquiaari Filipo tiaca jiyaniijianucua niquiaraari. Nocuaji jiyaniijianucuaari pueretuquiaari nojori niishishacari Pablo, Silas Romano pueya quiquiaarijiuhuaj. ³⁹ Naaratej, cuno jiyaniijianucuaari ritia quiaquiaari nujuatejojuajinie Pabloocua, Silascuanio, nojori jiyanoootioonura. Jiyaniijianucuaari nojori tohuatosee. Nojori sequereeri cuaaaa quiojoora quenaaja nojori tiacajiniji. ⁴⁰ Naacuajitj, Pablo, Silas jaara tohuareetaquiaari nujuatejojuajiniji, Lidia tiajinia quiojoquiaarii. Tii rootatuquiaari socua Jesuucua tiuuniaa pueyari, socua Pueyasocua nojori tiuuniuria. Na nuhuaji, tiji quiojoquiaariuhuari.

17

Tesalónica pueya juuashacari Pueyaso pueya

¹ Pablo rucuanejosacari Silasta Jesujiniji nojori pohuatasacari, nojoriiri jiyacari shoconujutuquiaari Anfípolis tiaca, Apolonia tiacanio. Naa tiuquijioseequiaari socua Tesalónica tiacajiniaari. Cuno tiacajinia quiquiaariiri Judiocuaca rerejojua tia. ² Taate Pablo quijacuajani, nojuajaari narta Judiocuaca rerejojua tiajinia quiaquiaari. Cuno tiacajinia na quishacari, jiuujianaraca semaana shocotejoquiaarii. Puetunu semaana shocojosacarijanaa, samaatenu juuca, cuno pueya niquiara pohuataquiaari Pueyaso rupaari. ³ Pabloori nojori niishitiojoquiaari taa tariucuacaanu Pueyaso sequencesano caminiujiuniaa naajiotaquiaari Pueyaso Jiyarosocoriquianojinicuajani. Niishitiojoquiaarii cuno naajiotasanoori tari tohuateequiaari Jesu jaara naquia miishaaquiaari, naajuhuaj, Jesu jaara na cusonu nuhuaji samiitiaquiaariuhua. Naa nojori sequereeri:

—Nio Jesucuajani, janiya nia pohuataani, nojuajaari Pueyaso Jiyarosano pocua.

⁴ Jiyacaritj, noojiaqueya Judiocuacaari Jesuucua tiuuquiaari. Querataia taucuacaari Jesuucua tiuuquiaarijiuhuaj, canapuete tari Moisés niishitiosano tojijiaca quiquiaaricuajani. Querataia cuno tiacajinia quinia pueya tojishano maajipohuari Jesuucua tiuuquiaarijiuhuaj.

⁵ Pueyasocua tiuyashijiaca Judiocuacatej, nojoriiri juaaquioquiaari juhua shocotasano nojori quiniucua. Nocuaji, nojoriiri sesa miijiaca taajecori masuunujuquiaari. Nooj, nareja rucoojuaca tiacaacacotej. Cuno pojoriiri masuusaquiaari nojori na cojiniuria, tamasaca nojori nasojonura. Na nuhuaji, puetunu cuno pojorijanaa jaara tonuju-tooquiaari taa na miitiuniutianiyan, nojoriiri puetunu cuno tiacajinia quiniajanaa juatiquiaari Pueyaso pueyacuara. Nocuaji, puetunu cuno pojorijanaari Jasón tiaco tiuquitiaciaari, Pablo, Silas nojori quioonura juucua, juaaquoyano pueya nojori niquitiosocoriquiano. ⁶ Nojori jaara na riuriataaquiquiaari, noojiaqueya Jesuucua tiuuniaa pueyari Jasonta cojiritiasaaquiaari quionu. Cuno tiacajinia jiyaniijia-caacua na jayotuquiaarii. Naa nacatureeri:

—¡Nio canuuri puetunu jiyacajinia pueya sesojoyajanaa! ¡Niya tiuquijioreejaariuhua naa na miiniuriajuhuaj! ⁷ ¡Jasónri nojori masecanu maninia na tiajinia! ¡Puetunu nojorijanaari pa jiyaniijia César sequencesano tojitiaashijiaca! ¡Nojoriiri saaja sequequiaaa socua tamonu jiyaniijianaari quiya! ¡Na sesanaari “Jesu”! Naa sequetuquiaaqi nio pojori.

⁸ Puetunu pueyajanaa, mariyata tiaca jiyanijianucuanio, nojori jaara naa tojiquiaari sequeshiyanoje, nojoriiri juaaquoquiaari. ⁹ Jiyacaritij, tiaca jiyanijianucuaari queraatia cumaneeca masequiaari Jasónjiniji, narta Jesucua tiuuniaa pueyajinjinio. Naa sequeturee nojoriiri:

—¡Pablo jaara niiquiji quiaaquiri, majaari canaa niqditionu quiniutia-niuhua nia cumaneeca!

Naa na miishaanu nuhuajitij, Jasónri nata quoosano pueyata carte-quesaaquiaariuhua.

Berea tiacajinia Pablo quishacari Silasta

¹⁰ Cuno niucuaja, cuno tiacajinia quiniaa Jesucua tiuuniaa pueyari Berea tiacajiniara mashiquiquiaari Pablo, Silasnio. Berea tiacajinia na tiuquijiosacari, cuniqui quiniaa Judiocuaca rerejojua tiajinia quio-joquiaariiri. ¹¹ Cuniqui quiyiaca Judiocuaca cutaraari maninia pueya quiquiaari, maja juhua Tesalónica tiacajinia quiniaa. Naacuajitij, Pablo jaara Jesujiniji pohuataquiaari nojori niquiara, nojoriiri maninia to-jitiaquiaari na pohuatasano. Na nuhuaji, puetunu juucajanaa, tama nojorijiaarija tariucuacaanu Pueyaso Rupaajinlia naajiotasano pajenu-uquiaari, nojori niishiniuria seetanujuanaa quiriquiaate Pablo niishitiosano. ¹² Naacuajitij, queraatia Judiocuacaari Jesucua tiuquiaari, queraatia taucuacanio, canuu, mariyata queraatia tojishano maajipo-huanio. ¹³ Tesalónica tiacajinia quiniaa Judiocuaca jaara niishiquiaari Pabloori Berea tiacajinia Pueyaso rupaa pohuatasecuhuaj, nojoriiri nocua quiojoquiaari nojori taanuunura nojuaja cuniquijijuah. Na tiuquijiosacari Berea tiacajinia, cuniqui pueya nasojoseeri, Pablo na juatiuniuria. ¹⁴ Nocuaji, Jesucua tiuuniaa pueyari cuniquiji ritia mashiquiquiaari Pablo shoniniacu caminajiniara. Silasri Timoteota Berea tiacajinia jateequaari saaja. ¹⁵ Berea tiacajinjinio pueyari Pablo mashitiaquiaari, nuu na niishitiniuria. Nojoriiri Pablo jiyataquiaari Atenas tiacajiniara. Nojoriiri cuniqui jataquiaari Pablo. Cuno pojori jaara tacaretanu paniquiaariuhua cuniquiji Berea tiacajiniohuara, Pabloori nojori sequequiaari:

—Niocua ritia jiyarosuhua Silas, Timoteonio. Nojoricua niyaja cua coquesee.

Pablo quishacari Atenas tiacajinia

¹⁶ Pabloori Silas, Timoteo sashiquiaari Atenas tiacajinia. Cuno tiacajinia na rucuanejosacari pueya na sashishacari, Pabloori niiquiquiaari tama cuno pueya shipinijiosanojuaja na pueyasohuara. Nojori shipinijiosanoori puetunu cuno tiacajinajanaa quiriquiaa. Pabloori cunora jiyanoehua tacaaquiaari. ¹⁷ Pabloori Jesujiniji Judiocuaca poojotaquiaari nojori rerejonuuja tiajinia, noo pojori taucuacahuaj, canapuete Pueyaso tojitiajaca quiquiaaricuajani. Naajuhuaj, Pabloori cuno tiaca jiuujiajinia pueya cajitiucuara curotasanojinia pohuataquiaari Jesujiniji cuniqui quiniaa niquiara. ¹⁸ Tamasaca niishijiacaari Pablo po-huatasacari Jesujiniji tojitiariquiaa. Nojoriiri caapiqui maapuejinjinio quiquiaari. Tamonu maanuuri sesojosaaquiaari “Epicureohua”, Epicuro jiyuishano niishijia niishitiosano tojitiajaca nojori quiniucua. Tamonu maanuuri saniniuujia sesojosaaquiaari “Rejeretajaca”. Naa sesojosaaquiaariiri Zenón jiyuishano niishijia niishitiosano nojori tojiniucua. Pablo pohuatasacari nojori niquiara, nojoriiri maja na

niishitiuniu quiquiaari casaa na pohuatariquiaani. Nocuaji tama nojori-jiaarijia sequetooquiaari:

—¿Casaariquitija cuno paateca pohuataa pajaniyatejaj? Najuhanua pocuaa pueyaracaanuuri.

Tamasacaari saniniuuquia sequetuquiaari:

—Tamasaca pueyasohuajiniji poojotana juhuhanaruha.

Nojoriiri naa sequeriquiaa Pablo pohuatanuucua Pueyaso rupaa Jesu-jiniji, mariyata taa cusounuuno samiitiacutaniuhuani.¹⁹ Na nuhuaji, nojoriiri Pablo jiyataquiaari tuhuananujiniji, tee nojori jiitiquiaari rere-jonuunucuajani. Cuno tuhuananu sesaari quiquiaari Areópago. Nojori-iri naa sequetuquiaari Pablo:

—Miji. Socua canaa tojishocoriquiano quia pohuataqueeruhuaj. Canaari quia pohuatasanojiniji socua maninia niishiniu paniyani.²⁰ Quiaari jiyajeneta sequeriquiaa canaa niquiara quia pohuatasacari. Quiarijia canaa quia tore maninia.

²¹ Puetunu Atenas tiacajinia quiniaa pueyajanaa, mariyata tamonu jiyacajinijinio cuniqui quiniaajuhuaj, nojoriiri maja socua tamonu casaa na miitiuniu quijia. Saaja quiarinio sequencesanojiniji niishitiuniu panijacaari.

²² Jiyacaritij, Pabloori Areópagojiniji nujuquiaari na pohuatanura na tojitanu panijiacu niquiara. Naa coteereeri:

—Atenas tiacajinia quiniaa pueyanaa, janiyari quiarijia niishiyani, niaaqui pueyasohuacua jiaatiajaca jiyanoehua.²³ Janiyari naa nia sequeyani pueyanaa, cua niquiniuuucua queraatia nia shipinijiosano pueyasohua, cua rucuanejosacari nia tiacajinia. Naajuhuaj, janiyari saajiajiniji nia shipinishano juhua juhuacutura niquiriucuaajuhuaj. Nocua naajioori sequeya, “Niishishoo Pueyasora”. Cuno Pueyaso niaa na tojitiaquiaa na niishiyaquiniutiani, nojuajaari nio Pueyasocuaja janiya nia pohuataani.

²⁴ Cuno Pueyasoori nio jiya shipiniquiaaricuaja, puetunu pa niquis-hanojuanaanio. Nojuajaari jiyocuacaanu camarnujuhuaj. Nojuajaari puetunu tiquiyocuajanaa Quijia. Majaari pueya tiajosoano secojojua tiacajinia na quiniu.²⁵ ¿Taa nia jiyaniyani pueyanaa, cutara Pueyasojuanaate pa jiitiasano casamijiniji paniyajuhuaj? Maja. Nojuacuajaari puetunu pa jiitiasanojuanaa shipiniquiaari puera. Pa rishiniuria, na Sohuau-jiniji pa niquitioquiaariajiaariuhuaj, pa rrijosocoriquiano paratunio.

²⁶ Pueyasoori niquiriyatu pueyano shipiniquiaari juhuacatecara. Paari cuniquiji canequiaarini, puetunu jiyacajinajanaa pa quiniuria. Pueyasoori tarisia sequequiaari tee pueya quiniutianiyani. Se-quequiaariajiaariuhuaj taacari tii pa quiniutianiyani.²⁷ Pueyasoori naa panitiaquiaaricuaja puetunu jiyacajinia quiniaa pueyajanaa pa-jenura nojuaja. Pueyasoori pa saniya, na niishiniuria, ¿pueyate na pajenutaniyani pa riuriatanura nojuaja? Pueyasocuajaari maja na quiniu tucuacaanu pajaniyajiniji.²⁸ Pueyasoori pa samiitianiya. Pa cumaquiajiaariuhuaj pa poonijionura. Pa rishitiquiaajaari-uhuaj. Naatej, taa nia pohuatajaca sequequiaaricuajani: “Paari Pueyaso muerasuni”.²⁹ Paa jaara seetanujuanaa Pueyaso muerasu quirini, majaari socua pa jiyaniyu Pueyaso naasucuaari juhua orojiniji pa shipinijiosano niquishano. Majaari juhua platajiniji shipin-ishano, juhua saajiajiniji shipinishanonio. Pueyaso cutaraari maja

na niquishaanu juhua tama pa niishirijojosanojuuaaja. Majaari na niquishaanu taa pueya shipinijioquiaacuajani, nojori jiyanishacari Pueyaso naasucuaari naa niquishanotej.³⁰ Pueyasocujaari pueya miniu sesa rejeretariquiaa pueyaracaanu. Saniniujia, nojuajaari quiarijia puetunu tiquiyocua quijaca pueyajanaa sequeya, nojori cartenura puetunu sesa na miiquiosanojuanaa, saaja nojuaja nojori tojitianura.³¹ Pueyasocujaari tari saquiriojoquiaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunujuanaari. Pueyasoori tari na saquiriojosano pueyano jitiaa pa nequesoreriquianojuhuaj. Na samiitianishacari cuno pueyano macujiniji, nojuajaari naa pa niishitiquiaari, cunocuajaari na saquiriosano pueyano.

³² Nojori jaara tojiquiaari Pablo pohuatasacari taa macunucua samiitiacconutaniuhuani, cuno niishijiacaari na saroojotaquiaari na rerequetenuta. Tamasacaari saniniujia Pablo sequequiaari:

—Canaacua tamacari quia tojiriirianiuuhuaj.

³³ Na nuhuaji, Pabloori cuno pueya tajiniji quiacuhua. ³⁴ Noojaqueya cuno pueyajinijiniori Jesuucua tiuquotaari, Pablo pohuatasano nojori tojittiasacari. Nojorijinijiniori quiquiaari Dionisio jiyanishano pueyano. Nojuajaari Areópago niishijiaca pueya maanujinijinio quiquiaari. Jesuucua tiuquotaariajiaariuhua tamonu maaji. Dámaris na sesa. Socua tamasaca pueyari Jesuucua tiuquotaariajihuaj.

18

Pablo quishacari Corinto tiacajinia

¹ Na nuhuaji, Pabloori Atenas tiacajiniji quiaquiaari Corinto tiacajinia. ² Cuniqui riuriataseequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasa aquiaari. Aquilaari necocua Priscilata shusha Italia jiyajiniji tiuquijiono quiriquiaa Corinto tiacajinia, tii Pablo tiuquishacari. Jiyacaritij, Claudioori jiyaniijajanaa quiquiaari Roma tiacajinia, Italia jiyajinia. Nojuajaari puetunu pueyapue camarnujuanaa quiquiaari puetunu jiyacajinajanaa. Nojori juitiquiaari Roma tiacajiniji. Nojuajaari tama na tiacajinia pueyajaja sequequiaari puetunu Judiocuacajanaa nojori taanuunura Roma tiacajiniji. Naaratej, Aquilaari necocuata quiaquiaari Roma tiacajiniji. Corinto tiacajinia quishiiri. Pabloori nojoriicua quiaquiaari nojoritria na pocoonjona. ³ Aquilaari necocuata suhuoronuutaja toqueya cusupuenuuja quiquiaari juhua Pablojuhuaj. Naaratej, Pabloori nojoritria quishii, mariyata na poonijionuunura tii. ⁴ Pabloori maja nareja na shocotenu quijia samaatenu juuca. Nojuajaari Judiocuaca rerejouua tiajinia rucuanejojua. Tii nojori pohuataquiaari Jesujiniji, taucuaca niquiaranio, noo pojori canapuete Judiocuacara jiyatesaaquiaaricuajani, tariucuacaanu Moisés niishitiosano nojori tojishacari.

⁵ Silas jaara Timoteota Pabloocua tiuquijioquiaari Macedonia jiyajiniji, Pabloori jiyacari coteequiaari puetunu juucajanaa Jesujiniji pohutanura Judiocuaca niquiara. Nojori sequequiaari:

—¡Jesucuajaari nia sashishano, Pueyaso Jiyarosano seetanujuanaa pocua!

⁶ Judiocuaca jaara tojiquiaari naa Pablo sequesanotej, na tojiti-aquirii saajaari nojori cuaracashitiniutia Pablo sequesano. Saaja

juaaquioreeri. Sesa pocooreejaariuhua. Naaratej, Pabloori nojori niquia na toque nuutojoquiaari, nojori niishiniuria Pablo tari nojori tiujiarohua. Pabloori nojori sequequiaari:

—Majaari cucua nia tiuutianu, Pueyaso jaara mijiria quiniaaa sanitiore. Niaacuajaari Pueyaso rupaa ruuretaquiaaa saaja. Quiarijia tau-cuacaacua quiaa cutaranijia, nojori cua pohuatanura Pueyaso rupaa Jesucristojiniji.

⁷ Na nuhuaji, Pabloori cuno Judiocuaca rerejojua tiajiniji tohu-ataquiaariuhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quija. Na tiaari jiyareta Judiocuaca rerejojua tia shuriucua quiriquiase. ⁸ Crispoori jiyacari cuno Judiocuaca rerejojua tia camarnu quijia. Nojuajaari puetunu na tiajinia quiniaaa pueyat�anaa Jesuucua tiuquiaari. Naajuhuaj, queraatia Corinto pueyari Jesuucua tiuquiaari Pueyaso rupaa nojori tojishacari. Naaratej, puetunu Jesuucua tiuniaajanaari moojinia tiuquinijiosaaquiaari. ⁹ Jiyacari tamonu niucua, Jiyaniijia Jesuuri Pablo sequequiaari na maquenujinia:

—Maja quia puerenu Pablona. Socua quia pohuatare cuno pueya tojishocoriquiano. Majaari sanaajenu. ¹⁰ Janiyacuajaari quiata quiyani. Majaari quenaaja tamonu pueyano jiyashiniu quiniutianiya taa na miiniu paniniuria quiajaniya. Janiyari queraatia pueya nio tiacajinia jiitiae cucua tiuuriquianoni.

¹¹ Naaratej, Pabloori Corinto tiacajinia jiyojequiaari. Tii na quishacari, quera shocojotequiaari caapiqui marijiaari. Cuniqui na quishacari, Pueyaso rupaa niishitiojoriquia cuno pueyari.

¹² Jiyacaritij, Galión jiyanihano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiriquiasejuhuaj. Jiyacari, Judiocuacaari tii Pabloocuara roojotooquiaari. Na nuhuaji, na quiatuquiaariiri. Naa na jaatucutuquiaari cuno jija camarnuucuaari, Pablo nequesoreesaanura. ¹³ Naa sequetusee camarnuuri:

—¡Canaa camarnunaa, nio pueyanoori pueya shiniujiya Pueyaso nojori shuquiritanura tamaatia canaa supuetana Moisés Rootasanojini!

¹⁴ Pabloori jiyacari juucua pocuanu paniriquiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocuacanaa, niaa jaara maninia miyashijiacu cucua jaatucure cutara, sesa miijiaca sequenio, janiya maara jiyano pueyanoocuara nia tonujusacari tojiri cutarani. ¹⁵ Niaari saaja tama nia niishishano-jiniji juayonuutaajaacujua. Maja cua nequesoreenu quiniutianiya tama nia juayonuutasacariajaa nia sequenceso tamasaca shaajecono pueya sesacajiniji, tama nia supuetanaa rootasanojini jiajanio. ¡Tama nia jeecatoorejaaja!

¹⁶ Na nuhuaji, cuno camarnuuri nojori juaarii. Na shuriucuaji na ji-yaramiquiriohuari. ¹⁷ Naa Galión miishacari nojoritij, narta taucuacaari cuniquijia quiatuquiaari Sóstenes, Judiocuaca rerejojua tia cojuana. Na piqutiurii camarnu Galión niquia cuniquijiaari. Majaari Galión tenu-junu quirii nojori. Nareja na niquiriquiaari.

Pablo riuiushacariuhua Antioquia tiajiniohua. Na nuhuaji juu-jianaraca pacutequiaariuhua quianuuri

¹⁸ Pabloon cuniqui queraatia camueenujuquiaaria Corinto tia- cajinia. Tari na riujiuushacariuhua cuniquiji, na nuhuajiria saruhu- ataarohua narta Jesuucua tiuuniaa pueyari. Buquejinia quiaarohua Siria jiyajiniohuari. Na cojiriquiaajaari Priscila, neyaca Aquilanio. No- jori tacataaquishacarijia buquejiniacuma, Cencrea tiacajiniji na quio- jonura, Pabloon jiyacari na naca riujiuquiaari caritianajara. Noju- jaari Pueyaso sequequiaari tari, maja na naca na riujiutiniu quiniu- tianiya nojuaja jaara na sequesano Pueyaso tucuataaquiri.

Cunora, naa quiarijia riujiutirii na nacaari. ¹⁹ Nojori tiuquijiosacari Éfeso tiacajinia, Pabloon tii jatamaquiaari Priscila, Aquilanio. No- juajaari tajimiaa Judiocuaca rerejojua tiajinia. Cuniqui rerejono Ju- diocuaca pohuatasee Jesujinijiiri. ²⁰ Nojoriiri Pablo neneocojoquiaari ju- ucia cuniqui na camueenunurajaara nojoritia. Majaari Pablo paniniu quiquiaari. ²¹ Cuniqui quiniaa sequereeri:

—Quiohuaniija pueyanaa. Jerusalén tiacajinira secohuanijia. Canaari tii rerejonutaniya Jesuucua tiuuniaa pueyatani. Pueyaso jaara paniri, janiyacua nia niquinuuriat tacatemohuaraniuhuaj.

Cuniquiji tacaquiaariuhua buquejiniaari. Éfeso tiacajiniji quiaarohuari. ²² Pablo tiuquishacariuhua Cesareya tiacajiniohua, cuniquiji quiamaa Jerusalén tiacajiniaari, puetunu Jesuucua tiuuniaa na saruhuanurajanaa. Na nuhuaji, quiaarohua Antioquiya tiacajiniaari. ²³ Cuniqui tarishiquiaari pasajaari. Na nuhuaji, socua quiaquiaariuhua cuniquijiiri puetunu jiyacajiniarajanaa. Quiariquiaari na niquinuuhuara Jesuucua tiuuniaa pueya Galacia jiyajinia, Frigia jiyajinianio. Pabloon nojori niquiara pohuataquiaari socua Pueyaso rupaajiniji. Jesuucua tiuuniaa nacasuquiaariiri maja nojori tarinitianura Jesuucua tiuuniu.

Éfeso tiacajinia Apolo pohuatasacari Pueyaso rupaa

²⁴ Jiyacaritij, tamonu Judio pueyanoori Éfeso tiacajinia tiuquiquiaari. Alejandría tiacajinijinio pueyano. Na sesaari Apolo quijia. Nojuajaari maninia Pueyaso rupaa pohuatana quiriquiase. Tariucuacaanu Pueyaso Rupaa naajiosano niishijia quiquiaariajuhuaj. ²⁵ Nojuajaari maninia niishitiojosaaquiaari Jiyanijia Jesu niishitiojosanojiniji. Shitimia pohuataja pueya niquiaraari. Maninia niishitiojojua Jesujiniji na pohuatasacarijuhuaj. Seetanujuanaa sequeja Jesujiniji puetunujuanaari. Maja cutaraari na niishiniu quijia Pueyaso Sohuanute pueyano jiuujiajinia tiuquijia. Saaja moojinia tiuquinijionu niishiquiaariiri, taa Tiuquinijiona Juan niishitiojoquiaaricuaani. ²⁶ Apoloori na puerenu jataquiaari tii na pohuatasacari Pueyaso rupaa narta Judiocuaca rerejojua tiajinia. Aquilaari Priscilata tii quiriquiaajuhuaj. Apolo pohuatasano tojitiariquiaari. Apolo jaara puecaquiaari pohuatanu, nojoriiri tamocora na jaatucuquiaari na niishitiojonura taa pa jatanishaquiaa Pueyaso Sohuanutani, Pueyaso muerasu pa quiniuria cutara. ²⁷ Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuuniaa pueyari na cumaquiaari. Naajuhuaj, nojoriiri Acaya jiyajinia Jesuucua tiuuniaa pueyacuara naajioquiaari Apolo patasocoriquiano, maninia cuno pueya tojiniuria nojuaja na tiuquishacari tii. Jaara tiuquishiiquiaari Acaya jiyajinia, Apoloori Jesuucua tiuuijica

cumaquiairaari jiyanohua, nojori na niishitiojosacari. ²⁸ Apoloori nojori niquiara niishitiojoquiaari tariucuacaanu Pueyaso Rupaajiniji naajiotasano. Jiyanohua maninia na niishitiojosacari Jesuuri seetanujuanaa nojori sashishano quiquiaari, naacuajitij Judiocuaca niishishano pataquiaarii.

19

Pablo quishacari Éfeso tiacajinia

¹ Apolo quishacari Corinto tiacajinia, Pabloori saniniuuja Antioquia tiacajiniji quiaquiaari nucuaco Éfeso tiacajiniara. Na quiasacari, tuhananuhua shoconujuquiaarii. Naa tiuquishiiquiaari Éfeso tiacajiniaari. Tii riuriataquiaari Pueyaso pueya maanuuri. ² Pabloori jiyacari nojori nequesotaquiaari:

—¿Niaate Pueyaso Sohuanu tiuquiniquianu nioojajinia, Pueyaso rupaacua nia tiuushacari?

Pablo riucuatureeri:

—Majaari quenaaja canaa niishiniu quijia Pueyaso Sohuanute quiyajuhuaj.

³ Pabloori nojori sequequiaari:

—¿Casaara nia tiuquinijiosaacanucuaraarini?

Nojoriiri na riucuaquiaari:

—Canaari tiuquinijiosaacuaarini taa Tiuquinijiona Juan niishitiojquiaaricuajani.

⁴ Pabloori nojori riucuaree:

—Taaquiriirinij. Tiuquinijiona Juancuaaquiniateja pueya tiuquinijioquiaariijaj, nojori jaara noojia tacatoquiaari sesa na miitiushanojiniji. Nojori sequequiaariajiaariuhuaj: “Cua nuhuaji Niriquianoocua nia tiuri”. Naa Tiuquinijiona Juan sequencesacaritij, nojuajaari Jesucristojiniji sequeriquiaa.

⁵ Cuno pojori jaara Pablo pohuatasano Jesucristojiniji tojiquiaari, nojoriiri socua tiuquinijiosaacuaariuhua Jesuucua nojori tiuushacari seetanujuanaa. ⁶ Naacuajitij, Pablo niasacari na juaashiquia nojori nacaacua Pueyaso na secojosacari, Pueyaso Sohuanuuri cuno pojori jiuujajinia tiuquiquiaari. Naacuajitij, nojoriiri niishishoo rupaacajinia pocoree. Naajuhuaj, Pueyaso Sohuanu niishitiojosano Pueyasojiniji pohuatanuuquiaarii. ⁷ Cuno pojoriiri doce canuu quiquiaari.

⁸ Pablo quishacari cuno tiacajinia, nojuajaari tii shocotejoquiaari jiuujianaraca raca. Jiyacari, puetunu samaatenu juucajanaa quija Judiocuaca rerejojua tiajiniaari. Tii pohuataja Pueyaso rupaa pueya niquiaraari. Naajuhuaj, nojori niishitiojouaari taa Pueyaso jtitianutaniya pueyaracaanu Jesuucua tiuuniaa pueyani. Pueyari na tojitiaquiaari maninia, na puereyaquinietia na niishitiojosacari. ⁹ Noojiaqueya cuno pueyajinijinioori saaja ruuretaquiaari Pueyaso rupaa. Na rerequetequiaari saajaari. Sacuaraatia pocooquiaari Jesu rupaajiniji pueya niquiaraari, Jesuucua nojori tiuuniu paniyaquishacari. Nocuaji, Pabloori saa jiyareta Jesuucua tiuuniaa pueya jiyataquiaari cuniquiji, tamaquiria serojonuujuua tiajiniara. Tirano jiyanishano pueyanoori cuno serojonuujuua tia camaru quiquiaari. Pabloori cuniqui puetunu juucajanaa niishitiojoua Pueyaso rupaa Jesuucua tiuuniaa pueya. ¹⁰ Caapiqui marijiaari

socua Pablo shocojoquiaari tii na poojotasacari Pueyaso rupaa Tirano serojonuuja tiajinia. Naacuajitij, puetunu Asia jiyajinia quiniae pueyajanaari Pueyaso rupaajiniji caminiujiushaaquiaari, Judiocuaca, taucuacajujuaj. ¹¹ Pueyasoori jiyacari Pablo cumaquiquiaari jiyajeneta casaa na miiniuria Pueyaso cumaacata. ¹² Naacuajitij, pueyari Pablo paneyaca tuujutaqueya rijoquiaari, Pablo cooshano toqueraacuanio. Cuno pueya jaara na cusosuhuacua niojquiaariuhua cuno toqueraacua, ¡cusosuhuari naatacoquiaariuhua! Naajuhuaj, samaruhuari tohuareetaquiaarijuhuaj, samaruhua jiitaja pueyacuaji.

¹³ Tamasaca Judiocuacajinjinioori quiriquiaajuhuaj, pueyajiniji samaruhua tohuatanijiojua. Nojoriiri puetunu tiacajinajanaa rucoojojuaca quiquiaari. Jiyacaritij, nojoriiri juhua Pablo miiniu paniquiaarijuhuaj. Juucua naa sequetuquiaari samaruhuari:

—Pablo pohuatasano Jesu sesajinia nia sequeyanijia: “¡No pueyanojiniji nia tohuareetare!”

¹⁴ Naa miijiacaari siete canuu quijia. Nojoriiri Esceva jiyanshano pueyano niquohua quiriquiaa. Escevaari pueyacuara secojonaa camarnu quiriquiasejuhuaj, Judio pueyanotuhuaj. ¹⁵ Cuno pojori jaara saniquiaari juucua Jesu sesajinia samaruhua tohuatanijionura pueyanojiniji, samaruuri saaja pojori riucuaquiaari:

—Jesu niishiyacuajanijia. Janiyari Pablo niishiyajaaniuhuaj. ¿Canteerini niabajanijia, naa nia sequenura janiyate?

¹⁶ Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiiri juhuasunucua, jiyareta naatiquishanojuhuaj. ¹⁷ Puetunu Éfeso tiacajinia quiniae Judiocuacajanaa, mariyata tii quiniae taucuacanio, nojori jaara niishiquiaari naa miishanojinijitij, jiyanoqua pueretuquiaariiri. Naacuajitij, puetunu Éfeso tiacajinia quiniae pueyajanaari sequequiaari:

—¡Jesuqui seetanujuanaa Jiyajijajanaa cutara!

¹⁸ Naajuhuaj, queraatia Jesuucua tiuuniaa pueyari nijioquiaari, tarijia sesa na miiushano pohuatanura puetunu pueya niquiarajanaa. ¹⁹ Naajuhuaj, queraatia pueyari juhua shimiacuri mijiopujiuaca quiquiaari. Nojoriiri na nequesoreetuneeca mueratejotaquiaari. Cuno nequesoreetuneecajinaari serojosano quijia taate pueyano cumueeca shimiacura quiniuni. Na camaruhuari jiyacari puetunu cuno nequesoreetuneecajanaa patootaquiaari. Na catijiaquiaari puetunu pueya niquiarajanaari. Puetunu cuno nequesoreetuneecajanaa catijiasaaquiaarini, cunoori cincuenta mil platajiniji shipinijiosano cumaneecata masesano quiquiaari. ²⁰ Naacuajitij, Pueyaso rupaari socua cuno jiyajinia paaquequiaari, na cumaaca poonijiosacari pueya jiuujiatinia.

²¹ Na nuhuaji, Pabloori cuniquiji naquerejoquiaari Macedonia jiyajiniarajujuaj, Acaya jiyajiniaranio. Cuniquiji riujuuniu paniriquiohua Jerusalén tiacajiniohuaraari. Sequequiaarijiaariuhuaj:

—Janiya jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

²² Jiyacaritij, Pabloori na naacunaa jiyaramiququiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jiyojequiaariaa.

Éfeso pueya cushitiishacari na juuaquionuta nahuuanaj

²³ Pablo quishacari Éfeso tiacajiniaja, Éfeso tiacajinia quiniaa pueyari jiyanohua juuaquioquiaari Pablo niishitiojonuucua Jesucristojiniji.

²⁴ Naa quiquiaarii. Demetrio jiyanishano pueyanocuajaari juhuacatecara narta pueya nasojoquiaari. Cuno pueyano, Demetrioni, nojuajaari shiirijiaa tia platajiniji shipinijiojua quiquiaari. Cuno shiirijiaa tiacaari juhua nojori jiyanishano pueyaso secojojua tia niquishano quiquiaari. Nojori pueyasoori maaji sesaanucua quijia, "Artemisa". Na shipinijiosano niquitiojoua na cumaneecaraari. Naacujitij, Demetrioori nata poonijionaa pueyata queraatia cumaneecaraca quijia. ²⁵ Demetrioori jiyacari nata poonijionaa rerejotequiaari nojori nacootanura Pablo miishanojiniji nojori tiacajinia. Nojoritia rerejoequiaarii tamasaca pueya, casaa shipinijionaa platajiniji juhua nojorijiuhuaj. Puetunu cuno pueyajanaa jaara tari rerejoequiaari, Demetrioori nojori sequequiaari:

—Pueyanaa, niaacujaari niishiya, paari puetunu pa panishanojua naa jiitiaani pa niquitiojosacari pa cumaneecara pa shipinijiosano. ²⁶ Quiarijia cuno Pablo jiyanishano pueyanoni, nojuajaari queraatia pueya niishitioquiaa, pueyano shipinijiosano pueyasohuanaari maja seetanu pueyasohuajanaa. Niaari na niquiriquiaacuaja naa na niishitiojosacari. Niaari na tojiriquiaajuhuaj. Naacujitij, majaari tari pueya masenu quiniutianiya pa shipinijiosano platajiniji casami. Queraatia nio Éfeso tiacajinia quiniaa pueyari na sequences tojiya. Puetunu pa Asia jiyajinia pueyapuejanaari na sequences tojitiaajuhuaj. ²⁷ Taa cua sequeyacuajani, pa shipinijiosano jaara shocotesaare saaja, paari pa poonijiosano carteriquiano socuani. Majaari pueya shocotenu quiniutianiya saa pajaniyaya, pa pueyaso Artemisa rerequetenutaniyayaari-uhuaj. Nocuaji, majaari pueya nijionu quiniutianiya tari pa pueyaso Artemisa secojojua tiajiniara, tii nojori secojonura, naa cuno Pablo niishitiojonuucua pueyaracaanu pueyatej. ¡Naacujitij, puetunu pa Asia jiyajinjinio pueya, mariyata puetunu jiyacajinjinio pueyapuejanaari pa pueyaso Artemisa rerequetejacara jatanutaniya! ¡Puetunu pueyapuejanaari naa niyajetanutaniya socua pa pueyaso Artemisatej!

²⁸ Cuniqui quiniaa pueya jaara tojiquiaari naa Demetrio sequences notej, nojoriiri jiyanohua juuaquioquiaari. Naa nacooquiaarii:

—¡Pa timitiasano Artemisa cuara pueyaracaanu quiuria Éfeso tiacajinia quiniaa pueyaso!

²⁹ Naa nojori juuaquiosacaritij, puetunu cuno tiacajinajanaa pueyari cushitiiquiaari. Nojoriiri jiyacari quiooturee caapiqui Pablo cojiniaa pueya, Macedonia jiyajinjinio pueya. Nojoriiri quiquiaari Gayo, Aristarconio. Na jayoturee Éfeso tiacajinjinio pueya rerejouja tiajiniaraari. ³⁰ Pabloori cuno pueya nacoosaqui tiajinia tiuquiniu paniquiaari juucuajuhuaj. Quera na pocuasee cuno pueya tajiniani. Jesuucua tiuuniaa pueyari saa na cosequiaarijia na tiuquiyauquiniuucuaji. ³¹ Asia jiya camarucuaari na seja jiyaroquiaari Pabloocuajuhuaj. Camarucuaari coteenu naa sequequiaari na seja:

—Niocua Pablo sequences, maja cumaati jaarajaaja na tiuquiniu pueya nacoojosaqui, mariqui mosaareeri.

Cuno camarucua na seja jiyyaroquiaari nocuani, nojoriiri Pablo rupuuenaa quijia. ³² Cuno nacoosacari rerejono pueyari saaja cushiti-iquiaari na juuaquionuta. Jiyano hua nacooreeri. Tamasacaari saniniu-ujia tamaatia nacooriquiaajuhuaj. Jiyyacaritij, tama cuno nojorijinijinio pueyari majaa na niishiniu quiquiaari casaajiniji na nacooriquiaani. Secaja nojorijinijiniori na niishiquiaari cutara. ³³ Jiyyacaritij, Judiocu-kaari Alejandro jiyanishano pueyano caponeequiaari pueya nacoyano taccoji na nujuuatesocoriquiano. Cuniquijinio pueyajaari tii toquiaari Ale-jandro casaara pueya nacoyani. Alejandroori Judio pueyano quiquiaar-ijiuuhuaj. Naaratej, Judiocuacaacuaji tacunu paniriquiaa juucuaari. Ale-jandro jaara nujuquiaari pocuajajiniji, na juashiquia shiitioquiaarii pueya sanaajetanura. ³⁴ Saniniuujia, cuno pueya jaara niishiquiaari Ale-jandroori Judio pueyano, puetunu pueyajanaari socua jiyyacatequiaari nacoonura. Nojoriiri caapiqui hora shocoteree pueyaracaanu naa na nacoosacari najuhuanaj. Naa sequeturiquiaa na nacoosacariiri:

—¡Pa timitiasano Artemisa cuaara pueyaracaanu quiria Efesio tiaca-jinia quinia pueyaso!

Naa pueyaracaanu nacooriquiaari. ³⁵ Cuno tiaca camarucuara naajiona pueyano jaara na naata quiriquiaa nojori na sanaajanura, nojori sequereeri:

—Cuarta Éfeso pueyanaa, puetunu jiyyacajinia quiniaajanaari niishiya, pajaniya Éfeso tiacajinia quinia pueyaso Artemisa secojojua tia cojuanaani. Niishitiuyajaariuhuaj paacuajaari cuno casaa juhua pa pueyaso Artemisa niquishano coju aquiaani, jiya cajniocuaji tinio pa riuriatasanoni. ³⁶ ¡Canteeri nio niishiyaquianija! Shaaqui. Cunora tariucuaja. ¡Nia sanaajetarohua! Majaari najuhuan sesa nia miiuniu, maninia nia niishiriojiyaquishacari. ³⁷ Nio canuu niaa niyara na jay-oreeni, nojoriiri majaa na nohuasenu quirii casaa pa pueyaso secojojua tiajiniji. Majaari na sesacatunu quiquiaa pa pueyasojuhuaj. ³⁸ Demetrio jaara nata poonijionaata cuno pueyacuara tonujunu paniri, ¿casaara na quiaquiya pa nequesoreenaa niquiria tonujunuraarini? ¿Casaara pa jiitiae nequesoreenaa pa tiacajiniaarini? ¿Najuhuanaj? Pa neque-soreenaari pa paraa tacujua pocuaji. ³⁹ Nia jaara tamonu casaacua juuaquioreja, pocua tamonu juuca na rerejotariquiani pa jiyanijianucu-ata pa jeecanura puetunu nia sequencesanojuanaa. ⁴⁰ Pueyanaa, ¿majate nia puerenu, Roma tiacajinia quijia pa jiyanijiajanaa jaara pocuara tosaare pa nacoojonujiniji? Paa jaara sequencesaare nocua quiojonurani, ¿paatucua taa pocuaji tacurenii jaara pa nequesoreere pa nacoojonujiniji?

⁴¹ Tiaca camarucuara naajiona pueyano jaara puecaquiaari pocuanu, pueya sequequiaariiri:

—Nia quiojorohua pueyanaa.

Naacuajitij, puetunu pueyajanaari cuniquiji niyaquejoquiaariuhua.

20

Pablo rucuanejosacariuhua Macedonia jiyyajinia, Grecia jiyyajinianio

¹ Pueya jaara na juuaaniutia na nacoojonu nuhuaji sanaajetaquiaar-ihua, Pabloori jiyyacari Jesuucua tiuuniaa pueya sequequiaari tama jiyyareta nojorijiaaja rerejonura. Tii nojori nacasuree maniniaari. Tari na quiasacari cuniquiji, na nuhuajiria cacanuuquiaari puetunu nojori-jianaari. Na nuhuaji, Macedonia jiyyajinia quiaareeri. ² Nojuaaari

puetunu cuno jiyajinia rucuanequiaarijiana. Jesuucua tiuuniaa pueya cumashitiquaari socuaari, maja nojori tarinitianura Jesuucua tiuuniu. Naa na rucuanesacari cuno jiyajiniatej, socua tiuquishiiquiaari Grecia jiyajiniaari.³ Pabloori tii na quishacari shocotejoquiaari jiuujianaraca raca. Juucua cuniquiji quianu paniriquiaa buquejinia Siria jiyajiniaraari. Judiocuacaari na niishiquaari saaja. Nojoriiri jiyacari na monu paniquiaari. Naa Pablo niishishacaritij, nojuajaari nocuaji Macedonia jiyajiniara neteja nucuacohua tacatequiaariuhua saaja.⁴ Nucuaco na quiasacariuhua, na tarajaquiaariiri Sópater jiyanshano pueyano Berea tiacajinjinio, Pirro niyanu. Na tarajaquiaarijiaariuhua Aristarco, Segundonio. Nojoriiri Tesalónica tiacajinjinio pueya quiquiaari. Nata quiaquiaarijiaariuhua Gayo, Derbe tiacajinjinio. Timoteori nojoritia quiriquiaajaacuhuaj, Tíquiconio, Trófimojuhuaj. Nojoriiri Asia jiyajinjinio quiquiaari.⁵ Puetunu nio canaa tapueyocuacajanaari canaa puetaquiaari. Canaaacuaji tiuquijioseequiaari co-teenu Troas tiacajinaria. Cuniqui sashitiuquiaari canaari.⁶ Jiyacariiri queranacunuusacari quiquiaari, poreetajaaju shipinijiosano pan mi-aquesacari. Queranacunuunu nuhuaji, canaari Filipo tiacajiniji jaaretaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

Pablo niishitiojosacari Troas tiacajinia

⁷ Shusha semaana coteejajinia domingo juuca, canaari rerejorgiaarini pan neecasenura pa Jiyanjija cusosacari niishirionura. Pabloori jiyacari Jesuucua tiuuniaa pueya rootariquiaa niucua. Nojuaajaari cuno tariqui quiariquiano quiriquiaa cuniquiji. Naaratej, na nuhuajiria pocoojoriquiaa pueyataari. Pueyaracaanu na pohuatasacari, shiyaqueyari tari quiquiaari.⁸ Cuno tiajinia canaa tii quiriquiaani, canaari jiyocuacaanu tercero na natacojinia rerejoriquiaani. Queraatia samariiri canaa caaniiji noshiquioriquiaa. Pabloori shitimia pohuatariquiaa pueya niquiara.⁹ Jiyacaritij, tamonu mashajaari tia shuucuaji tacuhuajiniji cajiriquiaa. Na sesaari Eutico quijia. Pablo pohuatasacari pueyaracaanu, socua maquequiaari na cajishaquiiri. Jiyanolua na maquesacari, jiyocua tiqui socuaari. Cusoseejanaari.¹⁰ Pabloori nata quiniaata ritia nocua netecuatuquiaari jiyocua. Pabloori nocua jacamasee na cacatanura. Narta Jesuucua tiuuniaa pueya sequereeri:

—Maja najuhuana shiriiquitiuniu. Saminiocuaja.

¹¹ Na nuhuaji, puetunu nojorijianaari tiniota shuquiriaatia tacataquiaariuhua. Pabloori neecaruu neecasequiaari canaa miaquenauusocoriquiano. Pabloori socua pohuataquiaari pueya na niishitiojonura. Naa juhuaquemaajaa socuaari. Tariucua juuca quiaqueeri. Nojuaajaari nucuaco quianu paniquiaari cuniquiji Asón tiacajiniara.¹² Cuno mashajaari saminio jaatucusaaquiaariuhua na tiajiniohua. Puetunu pueyajanaari noojia cajitiquiaariuhua, saminio mashaja tacatesacariuhua.

Pablo quiasacari Mileto tiacajiniara

¹³ Pabloori na quiaquishacarijia tari canaa sequequiaari:

—Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniyani.

¹⁴ Naacuajitij, canaari coquetooquiaari Asón tiacajiniani. Canaari cuniquiji Pablo tacanimiaquiaarini. Canaari mariyata tiji quiaaree Mitilene tiacajiniani. ¹⁵ Canaari tariqui shocomaa Quío jiya tucuaatiajani. Canaari tama tariqui tiuquishii Samos tiaca tacatajajinijimi. Canaari ru-paquijia samaatemaacuara Trogilio tiacajiniani. Canaari cuniquiji santeaaree tariquinihuaj. Canaari Mileto tiacajinia tiuquishiini. ¹⁶ Canaari naa secooriquiohua ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tiacajinajuhuaj. Ritia tiuquiniu paniquiaariuhua Jerusalén tiacajinaria. Pentecostés juucara quiniu paniriquiaa tiiri.

Pablo cumashitishacari Éfeso tiacajinijino Jesuucua tiuuniaa jiitiana pueya

¹⁷ Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuuniaa pueya jiitiana. ¹⁸ Nojori jaara canaacua tiuquijioquiaari, Pabloori nojori sequeree:

—Niaacuajaari maninia niishiya taa cua quishiiquiaari niaatani, cua tiuquishacari Asia jiyajinia niaacula. ¹⁹ Niaata cua quishacari, janiyari pueyaracaanu nia niishitijojuani, pueyaracaanu pa Jiyaniijiara cua poonijiosacari. Naa cua miishacaritij, majaari cua quiniu paniniu quijia juhua nia jiyaniijia. Janiyari niaacula cua tacaashacari nujuquejojuani. Janiyari pueyaracaanu naquiya miishanoni, cuarta Judiocuaca para-caashacari janiya. ²⁰ Naajaa, majaari cua pishiniu quijia nia niquiara cua pohuatanura Pueyaso rupaa. Janiyari nia niishitijojuani puetunu-juanaa maninia nia quiniuria, maninia mijija nia quiniurajuhuaj. Majaari cua niishitijojonu quijia jiyasohuaja. Janiyari puetunu pueya niquiarajanaa nia niishitijojuani, tama nia tiacajiniaequeyajajanio. ²¹ Janiyari Judiocuaca sequejani taucuacanio, nojori tacatonuhuara noojia Pueyasoocua, sesa nojori miishanojiniji, pa Jiyaniijiaacua nojori tiuuniuria cutara. ²² Quiarijiani, Pueyaso Sohuanuuri cua jiyaroya Jerusalén tiacajinia. Majaari cua niishiniu taa cua miishaanutaniya cuno tiacajiniani. ²³ Janiyari saaja niishiya cutarani, puetunu tiacajini-ajanaa cua quiasacari, Pueyaso Sohuanuuri cua sequeya: “Quiaari nu-juatesaanutaniya. Quiaari naquiya miishaanutaniyajuhuaj”. ²⁴ Janiya jaara naa niishirini, majaari cua tacaaniu quiquiaa. Cuaara cua motuuraqui jaara monu panitiuri. Janiyari saaja pa Jiyaniijia sequenceso tucuatanu paniya cutarani. Pa Jiyaniijia Jesuuri cua jiyaroquiaari cua pohuatanura pueya niquiara, taa Pueyaso jiyanooni paniya pueyani.

²⁵ 'Janiyari seetanujuanaa nia sequeyani pueyanaa. Puetunu nia-janiyajanaa, cana niquiara cua pohuataquiaari Pueyaso rupaacuajani, majaari socua nia niquiniu quiniutaniya mijiria janiya. ²⁶ Naaratej, janiyari nia sequeyani, majaari na nuhuaji nia sequenu: “Maja canaa pohuatasaaanu quiquiaari Pueyaso rupaani”. ²⁷ Janiyacuajaari tarinia pohuataquiaari puetunu Pueyaso sequencesanojuanaa pajaniyarani. ²⁸ Quiarijiani, tama nia cuaqueyajaaja nia cojuare. Maninia nia cojuare Jesuucua tiuuniaa pueyajuhuaj. Pueyaso Sohuanucuajaari nia jiyatequiaari Jesuucua tiuuuniaa pueya jiitiana nia quiniuria. Nojuajaari nojori masequiaari na nanacata tama nerajaaja, pocuara na

cusosacari.²⁹ Janiyari seetanujuanaa niishiyani, janiya jaara niiquiji quiaqueeni, tamasacaari cua nuhuaji nijionutaniya. Jesuucua tiuniaa pueya sesonutaniyari, sacuaraatia nojori niishitiojosanota. Nojoriiri juhua marucuatuque sareya tiuquitianutaniya Jesuucua tiuuniaa pueya tajinia. Taa marucuatuque sare tiuquiya borregohua tajini-acuaani, puetunu na sooseejanaari, cuno pojoriri naa miiniutianiya Pueyaso muerasutej.³⁰ Naajuhuaj, tama niajaniyajinijiniojuaariija na-juhuana tamaatia niishitiojonu coteenutaniya na sapojonuta. Majaari Pueyaso panishano na niishitiojonuunu quiniutianiya tari. Naa sapo-jotunutaniya Jesuucua tiuuniaa pueyari, pueya tojiniuria nojori sanini-uujia.³¹ Janiyacuajaari nia sequeyani, jiyanohua nia cojuare tama nia cuaqueyajaaja. Nia niishirijiujuhau, jiuujianaraca marijiaari tari cua shocojoree pueyaracaanu cua niishitiosacari niajaniya. Majaari cua tarinitianu quijia rootanu niajaniya, juuca, niucuanio. Janiyari naajaa cua namijiaacatenuta niishitiojojua puetunu niajaniyajanaani. Majaari naa cua miishano nia niyajetanu pueyanaa.

³² 'Nia tiujianutaniya tarinijia. Janiyacuajaari pa Jiyannijia juaashiquajinia nia jataani. Na rupaa nia tojiriquia pueyaracaanu, juhua rishimiaca pueyano nia quiniuria, cumueecara. Nia jaara naa miiritij, Pueyasoori nia rijionutaniya na shuriucuara, na saquiriojosano pueyata nia quiniuria.³³ Niaata cua quishacari, majaari tama quiriajaaja cua paniniu quijia cumaneeeca, toquenio.³⁴ Niaari naa quiyano cua niquijiajuhuaj. Janiyari tama cua juaashiquatajaaja poonijiojuani, cua panishano cua masetajara, cua cojiniaa panishano masetajarajujuhau.³⁵ Janiyari nia niishitiojojuani, naa poonijiosanotej casamijijiuniucua pa naacunura pa jiitiasanota. Majaari pa Jiyannijia Jesu sequences nia niyajetanujuhuaj. Naa sequequiaariiri: "Maninia pueyano jaara na jiitiasanojiniji niquitiore nareja tamonu pueyano, na niquitiosacari tamonu, nojuajaari socua shuquiriaatia quiya, niquitiosano masejajiniji".

³⁶ Naa nojori na sequenu nuhuajitij, Pabloori mojoquetaree. Puetunu nojoritajanaa secojoreeri.³⁷ Puetunu pueyajanaari nujuqueturee. Pablo cacanuuttureeri. Na nujuunequeturreejaarijuhuaj.³⁸ Pueyari jiyanohua taraajeriquiaa Pablo sequenuucua nojori, maja tari socua na niquitiuniu quiniutianiya nojuaja. Nojoriiri caminiajiniara rose-taquiaarijuhuaj, Pablo na niquitiuniuria buquejinia na tacasacari.

21

Pablo quiasacari Jerusalén tiacajiniara

¹ Éfeso tiacajiniji canaa ruparetasacari, canaari shoniniacu caminia jiuujiaaco quiaareeni. Canaari Cos tiacajinia tiuquishiini. Cuniquiji canaa quiasacari tariqui, canaari Rodas tiacajinia tiuquishiiniuhuaj. Tama tariqui canaa quiasacari Rodas tiacajiniji, canaari Pátara tiacajinia tiuquishiini.² Pátara tiacajinia canaa tiuquishacari, canaari tii riuri-atasee tamonu buque quera Fenicia jiyajiniara ruparetaanoni. Canaari tii tacataareeni.³ Canaa jaaretasacari, canaari canaa muenecara niquimohua Chipre jiya tucuaatiajani. Canaari Siria jiyajinia tiuquishi-ini. Cuno buquejinia canaa tii quiariquiaani, casami pariquiaari Tiro tiacajinia jatasocoriquiano. Naaratej, canaari Tiro tiaca tacatajajiniji

tiuutiaseeni, casami jatanura tii. ⁴ Jesuucua tiuuniaa pueyari tii qui-jiajuhuaj. Canaari nojoritia quishiini. Canaari siete juuca camueenu-jusee cuniqui nojoritiani. Pueyaso Sohuanuuri cuniquipinio Jesuucua tiuuniaa pueya niishitioquiaari taa Pablo miishaanutaniyani. Nocuaji nojoriiri Pablo sequetuquiaari maja na quianura Jerusalén tiacajinia. ⁵ Naajaa, siete juuca jaara tari shocojoquiaari cuniqui canaa quishacari, canaari tiji quiaquiaarini. Jiyacaritij, puetunu Jesuucua tiuuniaa pueya-janaari necocohuata, mariyata necohuata canaata quiaquiaari canaa na jatanura buquejinia. Canaari rosetaquiaari tiacajiniji tacatajajini-jiriani, Pueyaso canaa secojonura jaaquajinia. Puetunu canaaajanaari mojoquetacoquiaarini shoniniacu caminia casaqueyaji. ⁶ Na nuhuaji, canaari nojori cacanuuree canaa nuhuajiriani. Canaari buquejinia tacataqueeni. Nojoriiri tacatajajiniji quojoquiaariuhua na tiajiniohua.

⁷ Canaari Tiro tiacajiniji jaaretaareeni. Canaari Tolemaida tiacajinia tiuutiaseeni. Canaari cuniqui tacatassee puetunujuanaani. Canaari tii quiqiaca Jesuucua tiuuniaa pueya saruhuataseeni. Canaari nojoritia quishii niquiriyatu juucani. ⁸ Tariqui saniniujia, puetunu canaa-janaari mariyata quojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriquiaa. Canaari na tiajinia quishiini. Felipeeri Jesujiniji pohuatana quijia. Nojuacuaaari Jerusalén tiacajinia coteenujuanaa tamasacata jiyatesaaquiaari mashiquiopue mianuuteriquiano. ⁹ Felipeeri necojori jiitija, saa caqueetacaneeja, niy-acoojori. Cuno niyacoojoriiri Pueyaso Sohuanu jiitajaca. Naacuajitij, Pueyaso Sohuanu niishitiojosano nojori jiuujajinia Pueyasojiniji pohu-atantuujuaari. ¹⁰ Canaa camueenujusacari cuniqui, jiyacari tiuquishi-iquiaarilri Judea jiyajinjinio pueyano. Nojuajaari Pueyaso sequenu panishano caminiujiunia quijajuhuaj. Ágabo jiyanhano pueyano. ¹¹ Nojuajaari canaacua niquiaari Felipe tiajinia. Jiyacaritij, Pablo cajin-iocua camarucujua samaacataseeri. Nata morojoree tama na cashacu-cuaajarria, na numatucuanio. Na nuhuaji sequeroihuari:

—Jerusalén tiacajinia parta Judiocuacaari naa morojonutaniya nio cajiniocuaque camarutej. Na nuhuaji, taucuaca niquitiosaanutaniyari. Pueyaso Sohuanuuri naa cua sequereequij.

¹² Naa Cesareya tiacajinia quiniaa Jesuucua tiuuniaa pueya tojishacar-itij, canaaajuhuaj, puetunu canaaajanaari juucua Pablo nenecojoquiaarini maja na quianura Jerusalén tiacajinia. ¹³ Saa canaa sequereequij:

—¿Casaara nia nujuquetiuyaajarani? ¿Niaateeri cua taraajonu pani-yaruhua? Majaari saaja cua paniniu pueya morojonura janiya Jerusalén tiacajinia; janiyari tama cua cuaqueyajaaja panitiaacujua. Cuaara cua motuuraqui, cua pohuatantuucua cua Jiyaniijia Jesujiniji.

¹⁴ Maja canaa naata na tarinitiniu quishacari, canaari socua na tarini-tiareeni.

—Cuajaquij. Pueyaso cuaara miiria taa na miiniu paniyacuajani.

¹⁵ Naa canaa sequenu nuhuaji nojuaja juucuatej, canaari canaa ji-itiasano casaa jeenucuareeni. Canaari Jerusalén tiacajinia quiaaree-jaaniuhuaj. ¹⁶ Canaata quojoquiaariiri Cesareya tiacajiniji Jesuucua tiuuniaa pueyajuhuaj. Canaata quiariquiaajaariuhua Mnasón jiyanhishano pueyano. Nojuajaari Chipre jiya tucuaatiajajinjinio pueyano quiquiaari. Nojuajaari tarijia Jesuucua tiuujia quijia. Nojuajaari canaa sequequiaari:

—Paa jaara Jerusalén tiacajinia tiuquishiini, niocua cua tiajinia quishii cuata.

Pablo pocoojosacari Santiagota

¹⁷ Canaa tiuquijiosacari Jerusalén tiacajinia, cuniquijinio Jesuucua tiuuniaa pueyari canaa timitiaree canaa tiuquijiosacari. ¹⁸ Pabloori tariqui canaata quiaquiaari Santiago niquinuucua. Tii quiriquiaajaariuhua puetunujuanaa Jesuucua tiuuniaa jittianaa pueya. ¹⁹ Canaa tiuquishacari, canaari nojori saruhuataquiaarini. Na nuhuaji, Pabloori nojori pohuataquiaari puetunu Pueyaso miishanojuanaa na pohuatanuucua Jesujiniji, na rucuanejosacari tucuacaanu taucuaca quijia jiyacajinia. ²⁰ Pueya jaara naa tojiquiaari Pablo pohuatasanotej, puetunu tii quiniaajanaari Pueyaso maniniuhuaqueetaquiaari nojori shuquiritiasacari Pueyaso.

Na nuhuaji, nojoriiri Pablo sequequiaari:

—Canaa tarajanunaa, taa quia niquipuiaacuajani, jiyanohua queratia parta Judiocuacaari Jesuucua tiuya. Puetunu nojorijianaari taricuacaanu Moisés niishitiojosano tojitiajacahuaj, nocua nojori jiaatianuta jiyanohua. ²¹ Nio Jerusalén tiacajinia quiniaa Jesuucua tiuuniaa pueyari quiocuaji tojiquianujuhuaj. Quiaanaari tamonu jiyacajinia quijiacarta parta Judiocuaca niishitijoquia maja nojori miiniuria tari taricuacaanu Moisés niishitiojosano. Quiaanaari niishitijoquiajuhuaj maja nojori necohua cararaatiuquia co nojori miatejonura, taa pa supuetanaa niishitiojosaquiaaricuaani. ²² Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? ²³ Canaari naa niishiriojiyani, naa quia miiri juhuari. Niya quiyari cuatro pueya na naca tuquenuuteriquiano, tarilia na sequetusano Pueyaso na tohuateenura. ²⁴ Nojori quia jiyataare Pueyaso Secojojua tiajinia. Niocua nia cuaqueya jeequejosee taa pa supuetanaa sequequiaaricuaajani. Naajuhuaj, quiocua nojoriria cumaneeca niquistiore nojori naca riuuiushaanura. Quia jaara naa miiritij, puetunu pueyajanaari niishiniutianiya majaqui seetanujuanaa quiqianu pueya sequesano quiajaniyajiniji. Niishitiuniutianiyyajaariuhuaj, quiaqui taricuacaanu Moisés niishitiojosano miyajaa. ²⁵ Majaari Jesuucua tiuunio taucuacaacua quia tacaniu. Canaacuajaari tari nojori nacasuquiaari canaa naajioneejiniani, nojoriicuara canaa naajiosacari. Canaari nojori sequequiaari cutarani maja tari nojori tojiniuria Moisés niishitiojosano. Canaari nojori sequequiaarijuhuaj, maja na miaquenunura shipinishano pueyasohuacuara puecosano casaa, naajuhuaj, maja na miaquenunura nanaca. Canaari nojori sequequiaarijuhuaj maja na miaquenunura shu na nanacataja, naajuhuaj, maja na numuetucunura na camishoo maaji. Puetunu pa supuetanaa rootasanojinijijianaani, saa niojuaari taucuaca tojishcoriquiano rootasano.

Na cojiniaata Pablo quioosacari Pueyaso Secojojua tiajinia

²⁶ Pabloori narta Pueyaso pueya sequesano tojiquiaari jaarajaaja. Naaratej, nojuaajaari cuno cuatro pueya jiyataquiaari tariqui. Nojoria jeequejoquiaari na cuaqueyari taa Moisés niishitijoquiaaricuaajani. Naa na miiniu nuhuajitij, Pueyaso Secojojua tiajinia tiuquitiaquiaariiri

pueyacuara secojonaacua. Na sequetuquiaariiри casaa juuca na tu-cuatatunutaniya na cuaqueya na jeequejonuununi, naajuhuaj, casaa juuca nojori panutaniya Pueyasora na niquitiosocoriquianoni.

²⁷ Quera nojori tucuatasacari puetunu cuno semaana juucajanaa, Asia jiyajinjinio narta Judiocuacaari Pablo niquirquiaari Pueyaso Secojojua tiajinia. Nojoriiri puetunu pueyajanaa nasojoquiaari ritia. Jiyacari Pablo quiatureeri. ²⁸ Na quiatusacari Pablo, pueya na jiiquionuuta-reeri:

—¡Israel pueyanaa, miji! ¡Canaa nia naacuseeja! Nioori noo pueyanocuaja tiquiyocua na rucuanesaqui pueya niishitiojoquiaa sacuaraatia pocuaratej, nio Pueyaso Secojojua tiaacuarajuhuaj. Naajuhuaj, tariucuacaanu Moisés Rootasano sesacatequiaa pueyajaariuhuaj. ¡Quiarijiani, pa Secojojua tiajinia sacuaraatia tiuquinitiaree taucuacaari!

²⁹ Cuno Judiocuacaari naa sequetuquiaari Pablotej, Trófimo jiyanhano pueyanota nojori niquiniuucua nojuaja tarilia na rucuanejosacari cuno tiacajiniaja. Trófimoori Jesuucua tiuunia tahue quijia, Éfeso tia-cajinjinio pueyano. Naaratej, cuno Judiocuacaari jiyaniquiaari Pablo naasucuaari cuno tahue tiuquinirii Pueyaso Secojojua tiajinia.

³⁰ Puetunu Jerusalén tiacajinia quiniaa pueyajanaari juaaquoquiaari. Pabloocua netecuatuquiaariiри. Na quiatureeri. Pueyaso Secojojua tiacoji na jaatiuquiaari carijiniacumaari. Pueyaso Secojojua tia to-huateyari ritia tionujusaquaari na nuhuaji. ³¹ Pueyari tari monu paniriquiaa Pablo. Jiyacaritij, tii Jerusalén tiacajinia quijia Romano soldadohua comandanteeri numootesaaquaari: “¡Judiocuaca na juaaniutia nacoya!” Cuno comandanteni, nojuajaari soldadohua capitáncuaca jiyaniijia. ³² Jiyacaritij, comandanteeri na soldadohua rerejotequiaari ritia, na capitáncuacanio. Tee pueya nacooriquiaani, nocua netecuatuquiaariiри. Judiocuaca jaara niquirquiaari comandante na soldado-hua neretaano nojoriicua, jiyacari shusha cartetuquiaari Pablo piquitiumuuri. ³³ Comandante tiuquishacari nojoriicua, Pablo quiasereejanari. Na soldadohua sequereeri:

—Caapiqui cumayocua casaa nia saatijiore na numatucua cajiniocua. Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

³⁴ Pueyari saaja jiyajeneta nacooriquiaa. Nioori tamaatia na-cooriquiaacujua. Tamasacaari socua tamaatia nacooriquiaajajataj. Comandanteeri cunora maja na niishiniu quiquiaari casaa Pablo mi-riijiaarani, puera nojori cojuatunenuucua na nacoosacari. Cunora na soldadohua sequereeri:

—¡Pa quijia tiajinia nia jaatucuyarohua!

³⁵ Soldadohua tacatasacari tari nojori quijia tia tacatuhuoco Pablo nojori jaatucusacari, Judiocuacaari jiyacari quera na macaaniutia socua shiiniuquitiaquiaari Pabloocua, na monu paniniuria juucua. Soldado-huari nojoriicuají Pablo shiitioquiaari jiyocuacaanu. ³⁶ Pueyari soldado-hua nuhuaji na cocuatesacari jiiquionuuriquiaa:

—¡Nia more cuno sesaaca! ¡Nia more!

Tama nocuaji Pablo tacusacari jiaaja

³⁷ Quera soldadohua tiuquinishacari Pablo nojori quijia tiaco, Pabloori soldadohua comandante sequeree:

—Quenaaja niquiriyatu rupaa sequereera cuno pueya.

Comandanteeri na riucuaree:

—¿Quiaaquiri Griego rupaa pocuaja? Janiya juucua quia jiyaniriquiaa Egipto jiyajinjinio pueyanoni.³⁸ ¿Majateeri noo quiajaniya quiqianu-cuaja, cariquia jiyajinia jiyatacanu cuatro mil puecojuaca pueyatej?

³⁹ Pabloori saaja na sequeree:

—Janiyari Judío pueyanoni, Tarso tiacajinia rasanotuhuaj. Naacuajitij, janiyari Tarso tiacajinjinio pueyanoni, teyano tiacatucuaja socua panishano tiaca Cilicia jiyajiniani. Quenaaja rupaquijia cua tarishitiricuarajaj. Cuno pueya sequenu paniya niquiriyatu rupaa quenaajanija.

⁴⁰ Comandanteeri socua na sequeree:

—Quia pocuare.

Pabloori jiyacari tacatujiniji nujuquiaari. Na juaashiquia shi-tioquiaari pueya na sanaajanuraari. Puetunujuanaa jaara sanaaje-taquiaari, nojoriicuara pocuaree tama nojori Hebreo rupaajinijaari. Naa nojori sequereeri:

22

¹ —Cua tapueyocuacanaa, cua jiyaniijianucuanaa, nia tojitiare cua sequesano niajaniya tama cua tacusacarriaa cuuaji.

² Cuno pueya jaara tojiquiaari Pablo pocuasacari nojoriicuara Hebreo rupaajinija, pueyari maninía sanaajetaquiaarrijanaa. Pabloori nojori sequereei:

³ —Janiyari Judío pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaarini. Gamalielri cua niishitiojona quijia. Jiyanolhua rootasaaquiaari pa supuetanaa niishitiosanonijia. Janiyari pueyaracaanu Pueyaso panishano miiniuucua jiaatiquiaaani, taa quiarijia nia miiniu paniyanijia. ⁴ Janiyari tarrijia Jesuucua tiuuniaa pajejani naquia cua miitiascoriquiano. Janiyari na mooquiaarijuhuaj. Janiyari canuu cojiritiaquiaari quioonu maajipo-huatajani, cua nujuatejoscoriquiano nujuatejojuajinija. ⁵ Pueyacuara secojonaa camarnuuri cua miijiosano niishiyajuhuaj, puetunu pa jiyani-ijianucuajanaanio. Nojoricuajaari cua niquitioquiaari nojori naajionee Damasco tiacajinia quiniae parta Judiocuacaacuara. Janiyari juucua quiariquiaa Jesuucua tiuuniaa pueya cua pajenura Damasco tiacajiniani. Quera cua quioosano cua nitiamohua niya Jerusalén tiacajiniani, saniiitioscoriquiano.

Pablo pohuatasacari Jesuucua na tiuuniujiniji

⁶ Janiyari juucua nucuaco quiariquiaani. Quera cua tiuquishacari Damasco tiacajinia, panacariiiri quiriquiaa. Canashiyaquiji jiyanolhua shacantuua juhua miacanaari cua nunuquiaari. ⁷ Janiyari juhua jatasareeni. Jiyacaritij, janiyari rupaa tojirii cua sequeyanoni: “Saulo, Saulonaa, ¿casaara quia miitiae puera janiyani?” ⁸ Janiyari na nequesotareeni: “¿Cantequia Jiyaniijiana?” Cua sequereeri: “Janiyacuajaari Jesuni, Nazaret tiacajinjinio pueyano. Cunocuajaari quiaa na miitiae-ani”. ⁹ Cua cojiniae pueyari cuno shacantuua na niquishacari shiri-iquitiuquiaari. Majaari na tojitiuni quiquiaari cutara jiyocuacaanuji rupaa cucua pocuaano. ¹⁰ Janiyari socua na sequereeni: “¿Casaa cua miyarini Jiyaniijiana?” Jiyaniijaari cua sequereeni: “Quia sanerohua. Naajaa quia quiaare Damasco tiacajinia. Quiaari tii sequesaanutaniya

puetunu cua panishanojuanaa quia miiniuria".¹¹ Cuno shacantuua cua nunuquiaari jiyocuacaanujini, cua namijia sesoquaariiiri. Janiyari cariyojuaru quiriquiaani. Naacuajitij, cua cojiniaari cua jaatucutuquiaari. Naa cua tiuquitiatusee Damasco tiacajiniaari.

¹² 'Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari seetanujuanaa tariucuacaanu Moisés niishitiosano tojija cutara. Puetunu Damasco tiacajinia quiniae Jodiocuacaari na panijia. Nojoriiri na sequetujua: "Ananías cutaraari maninia pueyano".¹³ Ananíasri jiyacari cua niquiniuucua niquiaari. Jaara tiuquiquiaari cucua, cua sequeseeri: "Cua tarajanu Saulonaa, maninia niquijiara quia quiriohua". Jiyacaritij, cua namijiaari ritia jeequequee. Janiyari maninia niquiquii Ananíasni.¹⁴ Cua sequereejaaariuhuaj: "Pa supuetanaa Jiyaniijia Pueyasocuajaari quia saquiriojquiaari tariucuacaanujiniji, na niishitionura quiajaniya na panishano quia miiniuria. Quia saquiriojquiaariajiaariuhuaj quia niquiniuria taquiya pocuajinio sesa miyashijia cutara, tama na camaru rupaajiniji quia tojiniuria na sequencesanojuhuaj. Nojuacuajaari pa Jiyaniijia Jesucristo.¹⁵ Quiaari puetunu pueyapue niquiarajanaa pohuatanutaniya nojuajiniji quia niquishano, quia tojishanonio".

¹⁶ 'Ananíasri socua cua sequequiaari: "¿Casaara quia tarishiyarini? Quiarrijani, quiaa cuaara tiuquinishaaria. Jiyaniijia Jesu quia sequere: 'Cua jiyanoori sesa cua miishanojiniji'. Nocua quia tiuushacari, quia sesa miishanoori jeequesaanutaniya".

Pablo pohuatasano taa Jesu jiyaroquiaari nojuaja taucuacaacuani

¹⁷ Janiya jaara riujuuquiaariuhua Jerusalén tiacajiniohuani, janiyari Pueyaso Secojonuujuua tiajinia secojoriquiaani.¹⁸ Cua secojosacari, janiyari Jesu niquiquiaari juhua cua maquenujiniani. Cua sequereeri: "Ritia quia quiaare niquiji. Nio pueyari maja na tojitianu quiniutianiya quiajaniya, nojori quia pohuatasacari janiyajiniji".¹⁹ Janiyari saaja na sequereeni: "Cua Jiyaniijianaa, nojoricuajaruha niishiya janiyari quiocua tiuuniaa pueya quiojuani puetunu rerejojua tiajinijijianaa cua nujuatejosocoriquiano nojori. Janiyari nojori mojoojuajuhuaj.²⁰ Naajuhuaj, quia rupaa pohuatana Esteban jaara mosaaquiaaritij, janiyari catecaji saitia na jacusacari shootiaquiaarini. Janiyari na jacunaa toqueya cojuariquiaajaaniuuhuaj, nojori mosacari Esteban. Janiyari jaarajaaja sequequiaarinii: 'Cuaara mosaaria' ".²¹ Naa cua sequencesacaritij, Jiyaniijiaari saaja cua sequereeni: "¡Niquiji quia quiaarejaj! Janiyacuajaari tucuacaanu quia jiyaronutaniya taucuacaacuani".

Comandante jiitiasacari Pablo

²² Pueyari sanaa tojitiariquiaa Pablo pohuatasacari. Saniniujia, Pablo jaara jiyaniquipuiaari taucuaca, pueyari jiyacari coteequiaari nacoona, taucuaca soojeaca nojori quiniuucua:

—¡Cuaara mosaaria cuno pueyano! ¡Majaari maninia jiyano pueyano rishiniuria socuate!

Cuno pueyari naa nacooriquiaa.

²³ Na juuaquionuta na nacoosacarijia, na toqueya quejootuquiaari jiyocuacaanuuri quera na macaaniutia. Naa quejootuquiaari jiyojiaariuhuaj.²⁴ Comandanteeri na capitáncuaca sequequiaari Pablojiniji:

—Nio pueyano nia tiuquiniri nia quijia tiajinia. Niocua na saniri majacununoj, cuaara sequeera casaara naa pueya nacoyani.

²⁵ Soldadohua jaara tari Pablo morojotuquiaari tiaacuara na majacutusocoriquiano juucua, Pabloori capitán sequequiaari:

—¿Jiyanijia César rootasanotee, naa nequesoreesoojua nia majacunura narta Romano pueyanotej?

²⁶ Capitán jaara tojiquiaari naa Pablo sequencesanotej, ritia netequiaari-iri. Na comandante sequenceseeri:

—¡Quiaa cocuaatia miya! ¡Cuno pueyanona Romano!

²⁷ Comandanteeri ritia Pabloocua catecanoquiaari. Na nequeso-taseeri:

—¿Seetanutejanaa? ¿Quiaatena Romanotej?

Pabloori na riucuaree:

—Taaquiriirinij.

²⁸ Comandanteeri na sequeroahuacuhuaj:

—Romano pueyano cua quiniuria, janiyari queraatia cua cumaneeca niquitioquiaarini.

Pabloori saaja na sequeree:

—Janiyari Romano cutarani, nojori tiacajinia cua rasaanuuucua.

²⁹ Cuno pojori, Pablo majacunura seeratasaaquiaari juucuani, naa nojori tojitasacaritij, Pablo shuriucuaji ritia shiriquitiaquiaarii. Co-mandante niishishacari Pablo seetanujuanaa Romano quiquiaari, puer-ereejaariuhuaj, Pablo na morojotenuucua.

Tama nocuaji Pablo tacusacarijiaaja Judiocuaca jiyaniijianucua niquiaira

³⁰ Tariqui saniniuuja, comandanteeri maninia niishiniu paniquiaari casaara Judiocuaca nacootariquiaacuua naa Pablóni. Naaratej, coman-danteeri Judiocuacaacuara secojonaa jiyaniijianucua rerejotequiaari. Puetunu Judiocuaca camarucua nacasunaa maanujuanaa rerejote-quiaariajuahuaj. Nojoricuajaari Sanedrín maanu. Jiyacari Pablo nu-matucuajiniji rupareetaquiaari cumayocua saatijiotasanoori. Puetunu nojorijanaa jaara tari rerejoquiaari, jiyacari Pablo tohuatequiaarii. Nojori tacoji na nujuatereeri.

23

¹ Pabloori juhuacatecara pohuatanu coteequiaari camarucua niquiaira. Nojori sequereeri:

—Cua tapueyocuacanaa, janiyari pueyaracaanu juhuajaniya quiquiaani, Pueyaso tojijia cua quishacari pueyaracaanu.

² Naa Pablo sequencesacaritij, pueyacuara secojonaa jiyaniijiajanaari juaarii. Ananías na sesa. Nojuaajaari Pablo jiyaniquiaari najuhuana pocuua naasucua. Nocuaji, Ananíasri Pablo shuriucua nujuatunaa se-quequiaari ritia:

—¡Na rupaajinie nia piri naa pocuaaniquitij!

Pablo shuriucua nujuanaari jaarajaaja na piquii. ³ Majaari Pablo niishiniu quiquiaari casaate Ananías quiquiaarini. Naacuajitij, Pabloori juhuajaniya Ananías sequequiaari:

—¡Pueyasoori saniniuuja cucua quia naminutianiyacujua, Moisés Rootasano tojiyashijanaa! Nia jiyaniishacari janiyari Moisés Rootasano tojiyashijani, niaari coteenu cua nequesoreya maninia taa Moisés

rootaquiaaricuajani. ¡Quia sajara Moisés Rootasano tojiyashijia cutara, quia sequesacari cua pishaanura nia nequesoreyaquishacarijia maninia janiya!

⁴ Pablo shuriucua nujuatunaari Pablo sequequiaari:

—¿Quiaateeri saa rerequeteyajaa pueyacuara secojonaa jiyani-ijiaruhua?

⁵ Pabloori nojori riucuaree:

—Cua tapueyocuacanaa, cua jiyanoori. Paacuajaari naa rootasaaquiaari Moisés nequesoreetuneejiniani:

“Majaari sacuaraatia rimiaaquenu nia camarnuuucuara”.

Cua pueyanaa, maja cutaraari cua niishiniu quiriquiaa nojua jate pueyacuara secojonaa jiyaniijia.

⁶ Pabloori niishiquii cuno Judiocuaca camarucua nacasunaa cuni qui quiriquiaani, noojiaqueya nojorijinjinioori Saduceocuaca maanujiniji quiriquiaa. Tamasacaari saniniuujia narta Fariseocuaca maanujiniji quiriquiaacujua. Naoratej, Pabloori jiyano hua na rupaa paaretaquiaari naa na sequenura nojori:

—¡Cua tapueyocuacanaa, janiyari Fariseo pueyanon! Cua shipininioori Fariseo pueyano quiquiaari juuhuaj. Canaari Pueyaso Rupaacua tiuujiacani. Naacuajitij canaari niishiyani Pueyasoori macunucua samiitianijionutaniuhua taa puetunu cuarta Fariseocuaca niya quiniao tiuyanijia. ¡Niaaquiri jiyamitia cua nequesoreya!

⁷ Pablo jaara naa sequequiaaritij, Fariseocuacaari Saduceocuacata juhuacatecara juayonuutaquiaari tama nojorijiaaja. Naacuajitij, nojoriiri caapiqui maapuera raquitiquiaari. ⁸ Saduceocuacaari jiyaniya maja macunucua samiitiacuonu quiniutaniuhua. Nojoriiri sequeyajuhuaj: “Maja Pueyaso seja quinio”. Pueyapuenaari sohuanu-jujuhuaj. Fariseocuaca cutaraari nojori cuaracashitishanoocua tiuya. ⁹ Naacuajitij, puetunu pueyajanaari naco oriquiaa na juayonuutasacari. Jiyacaritij, tariucuacaanu Moisés Naajiotasanojiniji niishitiojonaa pueyari sanetaquiaari. Nojoriiri Fariseocuaca quijiajuhuaj. Nojoriiri naa sequetuquiaari Pablojiniji:

—¡Nio pueyanoori maja sesa na miiniu quiqianu! Maninia sohuanu jiyoteeri nocua muetacanu, Pueyaso seru soj. Majaari pa niishiniu. ¿Paatucua casaara tenujure Pueyaso panishano na miishacarini?

¹⁰ Pueyari socua jiyacatequiaari naco onu. Comandanteeri puerequiaari, na jiyanihacari Pablo naasucua socua sureesaantu-taniyaquij. Naa jiyaniquiaariiri, puerajanaa pueya juaaquiosacari. Nocuaji, comandanteeri ritia na soldadohua jiyaramiquiquiaari, na tiajinia nojori tiuquininiuhuara Pablo pueya tajiniji. Naa miitiuquiaariiri.

¹¹ Cuno niucuajani, Jiyaniijia Jesuuri Pabloocua muetaquiaari. Na sequereeri:

—Quioojia quia cumaquiri Pablona. Naatej, taa quia pohuatarucuaa janiyajiniji niya Jerusalén tiacajiniacuaani, quiaari naa pohuatanutaniya janiyajiniji Roma tiacajinia quiniaajuhuaj, Césarjanaa ni quiara-juhuaj.

12 Tariqui saniniujuja, noojaqueya Judiocuacajinijinioori Pabloocuara roojotooquiaari na monura. Nojoriiri naa sequetuquiaari-tij:

—Paa jaara Pablo moyaqirini, pocua miaqueyaquirini, pocua ratuyaquirijaniuhuaj.

13 Nojoriiri cuarenta canuu quiquiaari, naa sequetuquiaarini. 14 Na nuhuaji, cuno pojoriiri pueyacuara secojonaa jiyanijijianucuaacua quiaquiaari, Sanedrín maanuucuanio. Nojoriiri naa sequetuquiaari:

—Majaari canaa miaquenu quiniutianiya quenaaja casaa, canaa cuaara more Pablojaatijia. 15 Niajaniya, pueyacuara secojonaa jiyanijijianucuaanaa, puetunu Sanedrín maanujuanaanio, nia sequere comandante cuaara nitiaara tariqui Pablo niaacua. Niocua naa na sequerenoj: “Miji Pablo quia nitiaare. Canaari socua maninia na nequesoreenu paniyani”. Canaacua jiyacari niaacua na tiuquiyashacarijia nuu cajiniocua na moreni.

16 Tamonu pueyanoori Pablo raaquia caminiujuquiaari naa cuno pojori sequencesano camarucuatej. Pablo raaquiaari nocuaji ritia soldadohua quijia tajjinia quiaquiaari na cama Pablo na pohuatanura. 17 Jaara tari na pohuataquiaari, Pablorri jiyacari cuniquí cojuanaajinijinio capitán piiquiaari. Na sequereeri:

—Nio caya samija quia jiyataare comandanteecua. Nojuajaari comandante numootenu paniya.

18 Jiyacaritij, capitánri Pablo raaquia jiyataquiaari. Na tiuquishacari, comandante sequequiaariiri:

—Pa quiasano Pablorri cua piiini. Cua sequereeri cua nitianura quiocua nio caya samija. Nojuajanaari casaa quia sequenu paniya.

19 Jiyacaritij, comandanteeri caya samija numatujiniji quiaquiaari. Tamocora na jaatucureeri. Tii na nequesotaseeri:

—¿Casaa quia sequenu paniya janiyani?

20 Caya samijiaari na sequeree:

—Noojaqueya Judiocuacajinijinioori Pabloocuara roojotorucuaa. Quiaari sapojonu sequencesanutaniya tariqui quia jiyatanura Pablo,

puetunu Sanedrín maanujuanaa niquiara nequesoresocoriquiano.

21 Quiaa jaara sequencesare, majaari nojori tojiniu. Cuarenta canuuri tari nuu cajiniocua nocuaji jamaatiuya. Cuno pojoriniaari maja na mi-aquenuunu quiniutianiya, majanaari na raruunu quiniutianiyajuhuaj, cuaara moture Pablojaatijia.

22 Comandanteeri caya samija sequequiaari:

—Maniniacuaja. Majaari tamasaca pohuatanu quia sequencesano janiya. Tariucuaja. Quia quiaarohua.

Soldadohua jiyatasacari Pablo camarnu Félix

23 Comandanteeri caapiqui capitán piiquiaari. Nojori sequereeri na numootejonura dosciento soldadohua, Cesareya tiacajinia quijoriquiano cuno niucuaja. Mariyata cuaara quijoora setenta soldadohua caballohua nijinia cajitiujiacajuhuaj, socua dosciento soldadohua saa cashiriacajanio. 24 Comandanteeri na capitáncuaca sequequiaarijihuaj, nojori niojotanura cajitiucua tamasaca caballohua nijinia Pablo cajijara. Nojori sequequiaarijiaariuhuaj:

—Niocua maninia cojuuare Pablo, cuaara tiuquiiria camarnu Félix nequesoresocoriquiano.

²⁵ Comandanteeri na naajionee niquitioquiaari Pablo jiyatanaa. Naa naajiosanoori quiquiaari camarnu Félixcuara:

²⁶ "Camarnu Félixnaa. Nio Claudio Lisisas naajionee. ¿Taa quia quiyani cua panishano camarnunaa? ²⁷ Cua jiyyarotasano pueyanojiniji quia pohuatareeraj. Na sesa Pablo. Narta Judiocuacaari na motunu paniquianu. Janiyari jiyacari cua soldadoluata nocua tiuquishii namitianu. Janiya jaara niishiquianuni nojuaja Romano pueyano, janiyari cua soldadoluah sequereeni: 'Judiocuacaacuajia quia ritia cuno pueyano, mariqui na motureeri'. ²⁸ Maninia cua niishiniuria casaara naa pueya nacootariquiaa Pablón, janiyari puetunu Judiocuaca camarucua nacasunaa rerejotecanuni. Janiyari nojoriicua tohuatecanu Pablón, nojori nequesoreenura nojuajanaa cua tojishocoriquiano. Janiyajanaa jaara Pablo tojiquianuni, casaara pueya monu paniriquiaanoj, janiyari jiyacari shusha niishiriini. ²⁹ Nojoriquiri na nacootacanu Pablo tojiyaquiniuucua tariucuacaanu tama nojori supuetanaa rootasanojuaaja. Cunora na motunu paniriquiaari. Janiyari quia sequeyaní, ¿maatucua cunora mosaareeri? Majaari quenaaja sesa na miiniu quiqianu, pueyaracaanu na nujuatesaanura. ³⁰ Janiyari sequencesuarucuaajuhuaj, noojiaqueya Judiocuacajinijionaari na monu paniya. Janiyari jiyamitia quiocua cua soldadoluah na jiyyaratareeni. Janiyari nocuara saquiriojotanaa sequerucuaajuhuaj, cuaara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuaja".

³¹ Soldadoluari naa miiquiaari taa comandante sequequiaari nojoricuajani. Nojoriiri cuno niucuaja Pablo jiyataquiaari. Antípatris tiacajinija tiuquijioseeri. ³² Na niohuacata quijonaa soldadoluari Antípatris tiacajiniji tariquiucuajia riuijutiaquiaariuhua Jerusalén tiacajiniohua. Caballohua nijinía cajitiuniaa soldadoluah cutaraari Pablo jiyataquiaari. ³³ Pablo jiyatanaa jaara tiuquijioseequiaari Cesareya tiacajinía, nojoriiri comandante naajionee niquitiosee camarnu Félix. Pablo na niquitiotureejaariuhuaj. ³⁴ Camarnu serojonu nuhuaji comandante naajionee, Pablo nequesotaquiaariiri:

—¿Tee quia rasaaquiaarini?

Pabloori na riucuaree:

—Cilicia jiyajinía rasanonijia.

³⁵ Camarnuuri na sequeree:

—Janiyacua quia nequesoreeriquiani quiocuara saquiriojotanaa jaara tiuquijiore.

Jiyacaritij, camarnuuri na soldadoluah sequequiaari cuaara maninia cojuatuura Pablo tariucuacaanu jiyaniijia Herodes tiaco. Herodes quishacari jiyaniijia, cuno tiaari nocuaji tiasaaquiaari na quijsara.

24

Tama Pablo tacusacari nocuajijaaja camarnu Félix niquiara

¹ Pabloori cinco juuca camueequiaari tari Cesareya tiacajinía. Jiyacari tiuquijioquiaariiri nocuara saquiriojotanuuriqiano pueya. Nojoriiri quiquiaari pueyacuara secojonaa jiyaniijia Ananías, mariyata secaya

Judiocuaca camarucuanio. Nojoritia tiuquiquiaarii Tértulo jiyanishano pueyanojuhuaj. Jiyanohua pocuanu niishijia. Puetunu nio pojorijanaari camarnu Félixcuia tiuquitiaquiaari Pabloocuara na saquiriojotanura.² Pablo jaara tohuatesaaquiaari nojoriicua, Tértulo juhuacatecara coteequiaari camarnu Félix saquiriojotanu nocuara. Naa sequequiaari camarnu Félixri:

—Canaa camarnunaa, quiaari jiyanohua niishijia. Naa niishijia quia quishacaritij, quiaari maninia quia pueya jiitaa. Canaari naacua juhuajaniya quiyani, maninia canaa quia jiitiasacari.³ Canaari cunora quia timitiaani camarnunaa, maninia quia jiitianuucua canaa pueyaracaanu, puetunu canaa jiyajinajanaa.⁴ Maja pueras cua tarishitinii paniniu quiajaniya. Quenaaja rupaquijia canaa quia tojiricuara.⁵ Nio pueyanoori tariucuacaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitijoquiaa tamonu jiyacajinias quinias Judiocuacajujuaj. Naa sesa na niishitijonuucua pueyatej, tamasacaari maja tari na rupueno paniniu narta pueyano. Nio pueyano tojitiajacaari sesojosaaquiaari Nazarenoocua tiuuniaa maapue. Nio pueyanocuajaari cuno pojori jiyaniijia.⁶ Juucua Pueyaso juuatiniu paniquianujaarijuhuaj, tahue na tiuquininiu panishacari Pueyaso Secojojua tiajinia. Canaari jiyamitina na quiarucuaani, canaa nequesoreesocoriquiano taa tariucuacaanu canaa supuetanaa rootasaaquiaaricuajani.⁷ Comandante Lisiásri canaa na jaariutiarucuua saajani.⁸ Canaa sequerucuaajaarijuhuaj: “Cante nio pueyanoocuara saquiriojotanu paniyani, cuaara quiaara camarnu Félixcuia”. Naa canaa sequerucuaari. Nio pueyano quia nequesotasure, quia niishiniuria maninia. Seetanujuanaacuaj, canaari cunora nocuara quia saquiriojotaani.

⁹ Cuniqui quinias Judiocuacaari jaarajaaja sequeturee:

—Taaquiriirinij, camarnu Félixnaa. Naacuaaquiniatejaj, taa Tértulo sequeyacuajani.

¹⁰ Camarnuuri na juaashiquia shiitioquiaari Pablo pocuanura saninuuja. Pablori jiyacari coteeree. Naa sequereeri:

—Taaquiriirinij, pocuashiyacuaaquiniatejaj. Camarnunaa, janiyari niishiyani, quiaari tari queraatia marijia shocotejiya cuarta Judiocuaca nequesoreena quia quishacari. Naaratej, janiyari juhuajaniya quia niquiara tama cucuaji tacunu paniyani, cuarta Judiocuaca saquiriojotasacari cucuara quiajaniya.¹¹ Janiyari shusha tiuquiriohuacuaa Jerusalén tiacajiniani, Pueyaso cua secojonura Secojonuujuja tiajinia. Janiyari shusha camueesuhua doce juucani. Cucuara saquiriojotanaa quia nequesoreesureeraj.¹² Nojoriiri maja quenaaja na riuriatanu quiqianu janiya tamonu pueyanota juayonuutaano. Majaari na riuriatatu quiqianu janiya pueya ruutaqueyano quenaaja Pueyaso Secojojua tiajinia. Majaari quenaaja nojori riuriatanu quiqianu janiya canaa Secojojua tiajinia juayonuutaano pueyata. Majaari quenaaja naa cua miiniu quiquiaari puetunu tiacajinajanaa cua rucuanejosacari.¹³ Nio pojori cucuara quia saquiriojotaani, nojoriiri maja na naata sequenu seetanujuanaa janiya sesa mijjani.¹⁴ Nojori sequesacari janiyanaari Pueyaso tojjia tamaatia nojorijinijini, cua tojiniuucua cuno Nazareno pueyano, taaquiriirinij. Saaja cuno nojori sequesano cutaraari seetanujuanaa. Janiyari Nazareno tojjiani seetanujuanaa cua

tiuushacari puetunu Moisés naajiotasanoocuajanaa, naajuhuaj, cua tiuushacari puetunu canaa supuetanaa caminiujiushano Pueyasojiniji naajionuutasanoocuajanaanio. ¹⁵ Janiyari juhua cucuara saquiri-jotanaa pueya tiuya Pueyasooocuajuhuaj, taa Pueyasо samiitianijonutanuhua macunucuani; maninia mijiaca, sesa mijiacionio. ¹⁶ Naaratej, janiyari pueyaracaanu sesa miyaquiniu saniniujiuquiaani, maninia cua quiniuria Pueyasо niquiara, pueya niquiaranio. Naacuajitij, janiya jaara samiitiarohuani, majaari cua macuhuajenu quiniutianiya.

¹⁷ Queraatia marijia cua shocotejonu nuhuaji cua rucuanejosacari tamonu jiyacjinia, janiyari shusha tiuquiriohuacuaa cua jiyajiniani. Tamonu jiyacjiniji Jesuucua tiuuniaa niquitiosano cumaneeca tiuquitiarohuacuaanijia. Janiyari na tiuquitiarohuani na jatanuhuara Jerusalén tiacajinia, Jesuucua tiuuniaa casamijijiuniucua niquitiosocoriquiano, mariyata cua jiitiasanojiniji cua niquitionuhuara Pueyasora. ¹⁸ Naa cua miiniu nuhuaji Pueyasо Secojojua tiajiniatej, Asia jiyajinjinio Judiocuacaari cua naacutucanu tohuataano juucua Pueyasо Secojojua tiajiniji. Janiyari juucua tohuatariquiohuani cua cuaqueya cua jeequenu nuhuaji, taa canaa supuetanaa niishitiosaaquaaricuajani. Cuno juuca, majaari queraatia pueya quiniu quiriquiaa Pueyasо Secojonuujuajinio. Majaari quenaaja pueyata cua juayonutanu quiriquiaajuhuaj. ¹⁹ ¿Teete cuno pojoricuarani? Mariqui niya nimi-acuara cucuara na saquiri-jotanuunura, janiya jaara sesa miiquianuni. ²⁰ Cucuara saquiri-jotanaa jaara nijiyaquimia, naajaa, nio pojori niya quiyani, nojoriiri Judiocuaca camarucua nacasunaa nequesoreesacari janiya tii quitiuquianu jiyacarijuhuaj. Nojori cuaara sequeera, ¿cuno camarucuate cua sequecanu janiya sesa miiquianuni? ²¹ ¿Pueyateeri cucuara saquiri-jotaa soj, nio cua sequenuuucua Judiocuaca camarucua: "Niaari cua nequesoreya quiarijia, cua niishishacari macunucuari samiitianijiosaanutaniuhua"? Janiyacuajaari naa nacacanu camarucua nequesoreesacari janiyani.

²² Camarnu Félix jaara naa tojiquiaari Pablo sequestanotej, nojuajaari pueya sequequiaari:

—Comandante Lisisas cuaara tiuquiriajaara, janiyacua Pablo nequesoreeriquiania.

Camarnu Félixri Jesujiniji pohuatasano tari maninia niishiquiaari. Naaratej, nojuajaari Pabloocuara saquiri-jotanaa pueya tariniti-aquiaariajiaara. ²³ Na nuhuaji, camarnu Félixri soldadohua capitán sequequiaari:

—Pablo nia tiuquiniriohuajaara. Niocua maninia na cojuarenoj. Na rupuenaa, tapueyocuacanio, nojori jaara Pabloocua nimiaquia, majaari nocuaji na tenujununoj. Nojori cuaara na niquitiotuura na panishano.

²⁴ Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiquiaariuhua necocuataari. Necocua Drusilaari Judiocuacajinjinio maa ji quijia. Camarnu Félixri na soldado-hua sequequiaari:

—¡Pablo nia tohuatere! Janiyari cua niquiocuata na tojiniu paniyani. Cuaara canaa niquiara pohuataara taate Jesuucua tiuushanojuuarani.

²⁵ Naacuajitij, Pabloori Félix pohuataquiaari nojori niquiara taate pa naata maninia mijiara pa quiniuni. Pohuataquiaariajuahuaj taate pa naata tama pa cuaqueyajaaja pa cojuanu maniniani, sesa pa

miyaquiniuuucuaji. Naajuhuaj, Pabloori na numootequiaari Pueyasoori sesa miijiaca saniitionutaniya.

Camarnu Félix jaara naa tojiquiaaritij, jiyanohua shiriiquiquiaarii. Pablo sequereeri:

—¡Tariucuaja! Quia quiaarohuacuarajaara. Janiya jaara jeya quiriquiani, janiyacua quia sequereeraniuahuaj.

²⁶ Camarnu Félixri naa sequeyarucua na soldadohana sequequiaari Pablo na jiyatanura nocua, nata na pocoojonura. Nojuajaari juucua jiyaniquiaari Pablo naasucuaari cumaneeca na niquitionutaniya na cartesaanura. ²⁷ Pablo shocojoquiaarii caapiqui marijia, nujuatesano na quishacari Cesareya tiacajinia. Jiyacaritij, Porcio Festoori saninuujia camarnura jiyatesaaquiaari Félix niti. Majaari Félix tohuatenu quiquiaari na nuhuajiria Pablo. Naajaa na tiujiaciaquiaari nujuatesanoori. Naa miiquiaarii Judiocuaca timitianura nojuaja.

25

Pablo pohuatasacari Festo niquiara Jesujiniji

¹ Jiyacaritij, Festoori tiuquiquiaari Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quiaquiaari Jerusalén tiacajiniaari. ² Jerusalén tiacajinia na quishacari, pueyacuara secojonaa jiyanijianucuaari tii Judiocuacajinijino socua tojishano camarucuata Pabloocuara saquiriojotaquiaari camarnu Festo. ³ Nojoriiri camarnu Festo sequequiaari cuaara na soldadohana jiyaroora, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nucuamaji na nishacari. ⁴ Camarnu Festoori saaja nojori riucuaquiaari:

—Nujuatesano quiya Cesareya tiacajiniacuajaruhua. ¿Maatucua casaara niyara rishaareni? Janiyacuajaari nocua tacatenutaniuhuani.

⁵ Camarnuuri nojori sequequiaarijuhuaj:

—Niajaniyajinjinio socua tojishano pueya cuaara quiojohuara cuata Cesareya tiacajinia. Nojoriiri na naata Pabloocuara saquiriojotanu cua niquiara tii, cua niishiniuria maninia, Pablotseetanujuanaa sesa miiquianujuara.

⁶ Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaariuhua Cesareya tiacajiniohuari. Na tiuquinu nuhuaji, saninuujia tariqui cajiquiaari nequesoreesaqui camarnu cajitiuinariai, camarnu na quishacari. Jiyacari na soldado sequequiaarii cuaara Pablo tohuateera na nequesoresocoriquiano. ⁷ Judiocuacaari tari tiuquijioquiaari Jerusalén tiacajinijiiuhuaj, Pabloocuara na saquiriojotanuuunura. Pablo jaara nujuatesaaquiaari camarnu tacoji, cuno pojoriiri jaarajaaja catecanoquiaari Pabloocua. Nojoriiri jiyanohua sesa nocuara saquiriojotanuuquiaari najuhuana queraatia casaa. ⁸ Jiyacaritij, Pabloori tama nocuaji na tacusacariciaja naa sequequiaari:

—Maja sesa cua miiniu quiqianu. Janiyari tariucuacaanu Moisés Rootasano tojiquiaajaaniuhuaj. Majaari sesa cua miiniu quiqianu Pueyasor Secojojua tiajuhuaj. Majaari Roma tiacajinia quijia pa jiyaniijia tojiyashijia cua quiniu.

⁹ Camarnu Festoori jaarajaaja Judiocuaca panishano miiquiaari, cuno pueya paniniuria nojuaja. Naaratej, Pablo nequesotaquiaarii:

—¿Quiaate Jerusalén tiacajinia quianu paniya, tii cua nequesoreenura quiajaniya?

¹⁰ Pabloonari riucuaquiaari:

—¿Majateeri Roma tiacajiniji pa jiyaniijiajanaa quia jiylatecanu niya camarnura quia quiniuriacuaja? ¿Casaara niyaja quia nequesoreyaquiya janiyarini? Roma tiacajinia quijia pa jiyaniijiacuajaari niya camarnura quia jiylatecanu. Quiaacuajaari niishiyajuhuaj, mayaari sesa cua miiniu quiqianu Judiocuaca. ¹¹ Janiya jaara sesa miirii seetanujuanaani, cuaara cua motuuraqui. Cucuara cuno pojori saquiriojotasano jaara coriaa quiri, mayaari quenaaja tamonu pueyano naata niquitionu janiya cua mosaanura. ¿Janiyatucua casaara mosaare najuhuanani? Naaratej, janiyari quia sequeyani camarnunaa: jiyaniija Césarjanaa cuaara cua nequesoreeraqui.

¹² Camarnu Festo pocoojonu nuhuaji na nacasunaata, Pablo sequiaariiri:

—Quiaacuajaari cua sequeree cua jiylaronura quiajaniya pa jiyaniija Césarcua, nojuajanaa nequesoreenura quiajaniya. Janiyari nocua quia jiylaronutaniya cua soldadoluhatani.

Jiyaniija Herodes Agripa niquiara Pablo pohuatasacari Jesujiniji

¹³ Naa Pablo sequesaanu nuhuajitij, pasaja camueenujuquiaariiri. Jiyacari jiyaniija Agripaari Cesareya tiacajinia tiuquiquiaari Festoocua, na saruhuanura nojuaja. Agripaari tiuquiquiaari na rimiatu Bereniceta. ¹⁴ Nojori camueenujusacari camarnu Festo tiajinia, Festoori socua jiyaniija Agripa pohuataquiaari Pablojiniji. Na sequequiaariiri:

—Tamonu pueyanoori niya quiya, Félix tiujiasano nujuatesano. ¹⁵ Jerusalén tiacajinia cua quishacari, Judiocuacaacuara secojonaa jiyaniijianucuaari nocuara cua saquiriojotacanu, Judiocuaca camaru-cuata. Nojoriiri cua sequetucanu Pablo cua motenura. ¹⁶ Janiyari saaja nojori riucuacanuni: “Roma tiacajiniji jiyaniijaari maja ritia na monu pueyano. Nocuara saquiriojotanaa cuaara nijioma niya nocuara saquiriojotanuunurajaatijia. Monu panishano cuaara riuhuaneera tamajaaja quenaaja nocuaji, jaara seetanujuanaa quiyaquiri nocuara saquiriojotasano”. ¹⁷ Naacuajitij, Jerusalén tiacajinjinio pueya nocuara saquiriojotanuuriquiano jaara cucua tiuquijicocanu, mayaari socua cua tarishiniu quiqianu. Janiyari tariquiicuaji nequesoreeja cajitiuinia cajiquianuni, pueya camarnu cua quishacari. Janiyari jiyacari cua soldadoluha sequereeni nojori jaatucunura cucua cuno pueyano. ¹⁸ Cuno pojori Pabloocuara saquiriojotanuucanuni, nojoriiri maja que-naaja na saquiriojotanunu quiriucaa juhua cua niishiriojosano. ¹⁹ Saaja tamaatia nocuara cua saquiriojotanuureeri. Pablonaari nojori supuetanaa Pueyasojiniji rootasano tamacaquiaa saaja. Cua seque-tureejaariuhuaj, Jesu jiyashano pueyanonaari mosa aquiaari. Pablonaari saaja pueya niishitiojiyacuua, cuno Jesu jiyashanonaari sami-itiaquiaariuhuaj. Saminionaari quiari quiyajaa. ²⁰ Naa cua tojishacari nocuara pueya saquiriojotasano tej, mayaari cua niishiniu quiqianu taa cua miiniutianiyan. Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quiajaniya?” ²¹ Nojuajaari saaja cua sequecanu: “Jiyaniija César Augustojuanaa cuaara cua nequesoreera juhuari”. Janiyari cunora

niyaja nujuatesano na jiitiaani, janiya cuaara na jiyarore jiyaniijia César Augustoocuajaatija.

²² Jiyaniijia Agripaari camarnu Festo sequequiaari:

—Janiyari cuno pueyano tojiniu paniyajaacuhuaj.

Festoori na riucuaquiaari:

—Quiaacuajaari tariqui na tojiniutianiya.

²³ Tariqui, jiyaniijia Herodes Agripaari niquiaariuhua Bereniceta. Nojoriiri tiuquitiaquiaari nequesoreeja sohuacajinia, shanohua jacaria na rucuanenuta, shanohua na toqueya maniniuquiyatajuhuaj. Puereeta niquishano. Nojori tiuquitiasacari, nojori cojiquiaariiri soldadohua camarucua, mariyata tama cuno tiacajinijinio camarucuajaanio. Camarnu Festoori jiyacari na soldadohua seerataquiaari Pablo na riniuria, nojori tacoji na nujuatesocoriquiano. ²⁴ Pablo tiuquishacari, Festoori sequequiaari:

—Jiyaniijia Agripanaa, puetunu niya canaata rerejono pueyajanaanaa, cua tojitiare. Cuno pueyano niaa na niquiyani, queraatia Judiocuacaari nocuara cua saquiriojotanuuquiaa, Jerusalén tiacajinia cua quishacari, niya Cesareya tiacajinajuhuaj. Nojoriiri pueyaracaanu cua taajetequiaa. Cua sequetuquiaari: “Cuno pueyano cuaara mosaaria camarnunaa”. ²⁵ Janiyacuajaari tari niishiyani, nio pueyanoori maja sesa na miiniu quiqianu. Naacuajitij, janiyari niishiriojiyani, ¿pueyanotucua casaara najuhuana mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustoocua, pa Jiyaniijiajanaa nequesoreenura nojuaja. Janiyari cunora na jiyaronutaniyani. ²⁶ Saniniujia majaari cua niishiniu taa cua pohuatanutaniya cua jiyaniijia cua naajiojiniani. Cunora, nio pueyano nitirii niya nia nequesoreesocoriquianonijia, pueyanaa. Janiyari quia panitiae cutara nojuajanaa quia nequesoreenurani, jiyaniijia Agripanaa. Quia nequesoreere, cua naajionura pa jiyaniijia Augustoocuara casaara nio pueyano cua jiyaroree nocuani. ²⁷ Majaari cua naata naajaa jiyaronu quiasano pueyano, maninia nequesoreyaquishoojua.

26

Pablo riuhuanesacari jiyaniijia Agripa

¹ Jiyacaritij, Jiyaniijia Agripaari Pablo sequequiaari:

—Quiocuaji quia riuhuanereja, jaara seetanujuanaa quiyaquiri quiocuara pueya saquiriojotasano.

Pabloonri na juaashiquia sanaquiaari. Naa coteequiaari pocuanuuri:

² —Timiyanijia jiyaniijia Agripanaa, quia sequesacari cua pocuanura quia niquiara, tama cua tacunura cucuajijiaaja, Judiocuaca saquiriojotasanojiniji cucuara. ³ Quiaari puetunu cuarta Judiocuaca miijiosanojuanaa niishijajuhuaj, puetunu canaa nacoojotasanojuanaanio. Janiyari cunora quia sequeyani, nareja cua tojiri cua pohuatasacari quiajaniya.

Pablo pohuatasacari taa na quiquiaari Jesuucua na tiuyaquishacari-jiani

⁴ Puetunu Judiocuacajanaari niishiyajuhuaj taa quijia cua quiquiaari cua naatujuajiniji nojoritia cua quishacari cua jiyajiniani, Jerusalén tiacajinianio. ⁵ Cuno Judiocuaca quia nequesotasureeraj. Nojori

cuaara quia pohuataara jaara paniri pohuatanu. Cua mashajajiniji, janiyari seetanujuanaa Fariseo quijiani. Fariseocuacaari puetunu canaa supuetanaa rootasano Pueyasojinijijanaa tojitiaja cutara, socua tamasaca cuarta Judiocuacajiniji.⁶ Nojorijiaari cucuara saquiriojotacanu cua tiuushacari Pueyasoocta, taa na samiitianijionutaniuhua macunucuani. Pueyasoori nojori samiitianijionutaniuhua taa na seququiaari taricuacaana canaa supuetanaacuajani.⁷ Quiarijiani, canaa supuetana Israel doce niquiohuacuajinio caneno pueyari naa seetanujuanaa Pueyasoo sequesano niquiniuria sashiyajaa. Naaratej, nojorii pueyaracaana Pueyasoo secojonuuquiaa, juuca, niucuanio, Pueyasoo na tojitiwasacari. Naa cua sashishacari Pueyasoo sequesanojuhuaj Jiyaniijia Agripanaa, nio cuarta Judiocuacaari quiarijia cucuara saquiriojotanuquiaa.⁸ ¿Niaateeri jiyaniya Pueyasoori maja na naata macunucua samiitianijionuhua?

Taa Pablo miitiaquiaari Jesuucua tiuuniaa tarijiani

⁹ Janiyari tarijia sequequiaari tamajaajani sesa cua niishiriojosacari Jesujiniji: “Nazaret tiacajinjinio pueyanocua tiuuniaa pueya para-caariiriaj”.¹⁰ Janiyari seetanujuanaa taraatia nojori miitiaquiaari Jerusalén tiacajiniani. Pueyacuara secojonaa jiyaniijianucuaari cua jiyatequiaari nojori cua miitianura. Naacuajitij, janiyari queraatia Jesuucua tiuuniaa riuniujuquiaari nujuatejojuajiniani. Nojori jaara puecoosa aquiaarijuhuaj, janiyari jaarajaaja sequequiaarini: “Maninacuaja, cuaara puecoosaaria”.¹¹ Janiyari sequeyarucua naa miitiaquiaari Jesuucua tiuuniaa pueyani, nojori cua pishojonura Jesuucua nojori tiuuniu.

Janiyari naa miiquiaari nojorini puetunu cuarta Judiocuaca rerejojua tiacajiniaequeyajanaa canaa jiyajinia. Janiyari jiyanoehua nojori juaajia quiquiaarini. Majaari quenaaja nojori cua niquiniu paniniu quijia. Naa cua miitiasocoriquiano nojoritij, janiyari nojori pajequiaari tucuacaanu tamonu jiyaca tiacajiniani.

Pablo pohuatasacari taa Jesuucua tiuuijara na quiquiaarini

¹² Naacuajitij, janiyari juucua quiariquia Damasco tiacajiniani, pueyacuara secojonaa jiyaniijianucua jiyarosano. Janiyari tiriara quiariquiaani cua pajenura socua Jesuucua tiuuniaa pueya cua miitiasocoriquiano.¹³ Nucuaco cua quiasacari jiyaniijia Agripanaa, janiyari jiyocuacaanuji nunusa aquiaarini, cuata quiojonaajuhuaj. Cuno shacantu- ucaari socua jiyanoehua shacantuca quiquiaari pananujiniji. Panacariri jiyacari quiriquiaa.¹⁴ Cuno shacantuca jaara canaa nunuquiaari, canaari juhua quejooosa aquiaarini. Janiyari jiyacari tojiquiaari rupaani. Hebreo rupaajinua cua sequeriquiaari: “¡Saulo, Saulonaa! ¿Casaara puera quia miitiaa janiyani? Naa quia miishacaritij, quiacia tama quia cuaqueya miitiaajaacuaja. Juhua juaajia pueyano, na juaashacari saaja mocoshoco patiyashiyari”.¹⁵ Janiyari na sequereeni: “¿Cantequia Jiyaniijianaa?” Cua riucuareeri: “Janiyacuajaari Jesuni, quiacia na miitiaquiaani”.¹⁶ Quia sanerohua. Janiyacuajaari quiocua muetareeni puetunu cua panishanojuanaa mijiaria cua jiyatenura quiajaniya, quiarijia janiyajiniji quia niquishano quia pohuatanurajuhuaj. Naa juhuaj, na nuhuaji janiyari quiocua muetanutaniuhuani janiyajiniji quia niquishanorano pohuatanu quia quiuriua. ¹⁷ Cua jiyarosacari

quiajaniya, janiyari quiarta Judiocuacaacuaji quia cojuanutaniyacuajani, tamonu jiyacajinjinio taucuacaacuajinio, tiquiyocua quia ru-cuanejosacari janiyajiniji quia poojotasacari. ¹⁸ Nojoriicua quia ji-yaroyanijia, janiyajiniji nojori quia pohuatanura, maja juhua nimishitiu nojori quiniuria pueyaracaanu. Quia pohuatasacari janiyajiniji nojori, nojori jiuujiaari juhua cuhuatasaanutaniya cucua nojori tiuushacari. Nojori jaara naa miiri, Sesaacaari maja tarí nojori jiyaniijia na quiniu quiniutianiya. Naa nojori tiuushacari cucuatej, Pueyasoori puetunu sesa nojori miishanojuanaa jiyanooniutianiya. Pueyasoori puetunu na saquiriosano pueyatajanaa nojori rupuetootenutaniya, puetunu Pueyaso jiitiasanojinijijanaa nojori jiitianurajuhuaj”.

Pablo pohuatasano Jesu tojijiara na jatanujiniji

¹⁹ Naacuajitij jiyaniijia Agripanaa, janiya jaara naa tojiquiaari se-queshiyano jiyocuacaanujini, majaari cua taríjionu quiquiaarinijo. ²⁰ Janiyari jiyacari juhuacatecara Damasco tiacajinia Pueyaso rupaa Jesujiniji pohuatanu coteequiaarini, na nuhuaji Jerusalén tiacajinia, mariyata puetunu cuno Judea jiyajinajanaanjo. Maja saaja cuarta Judiocuaca cua pohuatanu quiquiaari Jesujiniji, janiyari taucuaca po-huataquiaarijuhuaj. Nojori nacasuquiaariniji cuaara sesa nojori miishano carteera, Pueyasoocua nojori tacatonuhuara nojori jiuujia. Janiyari nojori sequequiaarijuhuaj, cuaara saaja maninia miijiaca qui-iria, na niishishaanura Pueyasoori seetanujuanaa nojori jataniquianu. ²¹ Naa cua pohuatanuucuatej jiyaniijiana, cuarta Judiocuacaari cua quiatucanu Pueyaso Secojonuujuja tiajinia. Cua motunu paniquianuuri. ²²⁻²³ Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pohuatanu Pueyasojiniji; poonijionuutesano pueya, tojishano pueyanio. Majaari tama cua niishishano-juaja cua pohuatanu quiquiaa. Janiyari pueya niishitiojoquiaani taa taríjicuacaanu Pueyaso seqesano caminiuijuniaa naajionuutaquiaar-icuajani, naajuhuaj, taa Moisés naajiotasano quiya taríjicuacaanu Pueyaso Rupajiniacuajani. Nojori naajionuutasanoori seetanujuanaa. Naa sequeyari:

“Pueyaso Jiyarosocoriquianoori naquiya miishaanutaniya. Na cuso-nuahuaji, nojuajaari coteenu samiitiariquianohua. Jaara sami-itiarohua, nojuajiniji pohuatasanoori puetunu pueyapuejanaa cuhuatanutaniya. Naacuajitij, nojoriiri niishiniutianiya nojori jaara nocua tiuuri, nojoriiri samiitiaconutaniuhuajuhuaj; Ju-diocuaca, taucuacanio”.

Pablo tiuutiniu panishacari jiyaniijia Agripa Jesuucua juucua

²⁴ Pablo jaara naa sequequiaari tama nocuaji na tacusacaritij, camarnu Festoori nacaquiaari:

—¿Taa quia miyani Pablona? ¡Quia mueyocuauqui seseree puera quia niishiniuucua!

²⁵ Pabloori na riucuaquiaari saaja:

—Maja cua paatenu, camarnu Festonaa. Cua seqesanoori seetanu-juanaa, maja cuaracashiniu. ²⁶ Jiyaniijia Agripaari puetunu cua se-quesanojiniji niishiyajuhuaj. Cunora majaari cua puerenu na niquia-pocuanu. Nojua jaasacuaari taríjia tosaaquiaaricuaja Jesujiniji, Je-suucua tiuuniaa pueya miishanojinijijuhuaj. Puetunu canaa miishanojuanaari maja jiyasohuaja na miishaanu quiquiaa. ²⁷ Jiyaniijia

Agripanaa, ¿quiaate tariucuacaanu Pueyaso sequesano caminiuijuniaa naajionuutasanoocua tiuyajuhuaj? Quiaacuajaari nocua tiuya. ¿Naate-jaaretej?

²⁸ Jiyaniijia Agripaari na sequequiaari:

—¿Quiaateeri ritia cua jiyatenu paniya Jesuucua tiuuniara?

²⁹ Pabloori na riucuaquiaari:

—Naajaa, ritia, na nuhuaji soj, taa quia paniyacuajani. Pueyaso maara seetanujuanaa naara quia jiyatere taa quia sequeyacuajani; maja saaja quiajaniya, mariyata puetunu pueyajanaa niya cua tojitiaani, juhua janiya nia quiniuriajuhuaj. Maja naatej, taa cumayocuata moronucua cua nujuatashuyanijia.

³⁰ Jiyacaritij, jiyaniijia Agripaari sanequee, camarnu Festojuhuaj, Berenicenio, puetunu cuniqui nojoritia cajitiuniaa pueyanio.

³¹ Nojoriiri cuniquijii tamaqui pacutaquiaari jiyareta nojori pocoojonura Pablojiniji. Tama nojoriiri sequetooquiaari:

—Cuno pueyanoqui seetanujuanaa maja sesa na miiniu quiqianu na mosaanura, maja quenaaja na nujuatesaanurajuhuaj.

³² Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyaquiquianu pa jiyaniijiaacua quia jiyaronura nojuaja.

27

Roma tiacajiniara Pablo jiyarosaanujiniji pohuatasano. Nio naajiona Lucasri nata quiriquiaa na cojiriquiano

¹ Camarucua jaara sequequiaari canaa buquejinia jiyarosaanutaniya Italia jiyajiniani, Pabloori jiyacari narta quoosano pueyata cojiritiasaaquiaari niquitionu soldadohua capitán. Cuno capitán sesaari quiquiaari Julio. Na soldadohua maanuuri sesojosaaquiaari “Augusto”.

² Jiyacaritij, Adramitio tiacajiniji buqueeri quera ruparetariquiaa, Asia jiya tiacajinia shiiniuquitiariquiano. Canaari cuno buquejinia jaaretaquiaarini. Canaata quiriquiaajaariuhua Aristarco. Nojuajaari Macedonia jiyajinias Tesalónica tiacajinjinio pueyano quijia. ³ Canaa quianu nuhuaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Julioori jiyacari cuniqui maninia miiquiaari Pablo. Nojuajaari Pablo tarinitiaquiaari cuaara tacaara na rupuenaa pueyacua, nojori na saruhuananura Sidón tiacajinlia, naajuhuaj, na rupuenaa niquitionura puetunu Pablo panishanojuanaanio. ⁴ Canaa jaara jaaretaquiaari Sidón tiacajinijini, canaari canaa muenecara niquimiaa Chipre jiya tucuaatijani. Paratuuri buque nacaacoji piyarojoriquiaa saaja. ⁵ Canaari Sidón tiacajiniji niuuti aquiaari Cilicia jiyacuani, Panfilia jiyacuano. Canaari na shuriuquimia jaaretamaani. Canaari Mira tiacajinia tiuutiaseeni, Licia jiyajinlia.

⁶ Capitánri cuniqui riuriataquiaari Alejandría tiacajinjinio buque. Italia jiyajinlia quiariquiaari. Naaratej, canaa tacanitiaquiaari cuno

buquejinaari, tii canaa quianura saniniuujia. ⁷ Canaari camueenujuquiaarini, puera jacaria canaa jaaretanuucua. Naa canaa tarishiniuucuatej, canaari socua tiuquishiiquiaari Gnido tiaca taquijiriani. Paratuuri saa canaa patariquiaajaa. Naacuajitij, canaari Salmón jiya tucuaatiajanijoja shuriucuaratamaani. Canaari Creta jiya tucuaatiajamaru-cutamaajaaniuhuaj. ⁸ Naa puera canaa tarishiniuucua canaa jaaretasacari Creta jiya shuriuquiumiatej, canaari socua tiuquishiiquiaari pueya jiyaniquishano "Tacataja Maniniujiniani". Cunoori Lasea tiaca shuriucua quiya.

⁹ Canaari puera tarishiquiaari tarini. Judiocuaca miaquenuyaquiniujuucaari tari shocoquiaari. Jiyacaritij, shoniniacu caminiajiniaari puereeta quijia tari buqueta jaaretanura. Pabloori juucua sequequiaari:

¹⁰ —Camarucuanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiiniutaniya. Paa naasucuaari cusionuunutaniyajuhuaj. ¿Casaatejaj pa toyani?

¹¹ Pablo jaara naa sequequiaaritij, majaari buque jiyatana capitán tojiniu quiquiaarinioj. Saaja buque camarujuanaa tojiquiaariiri, buque capitánnio. ¹² Cuno tacatajajiniji canaa tii tiuutiariquiaani, majaari maninia quiquiaari shuniya canaa tajitiniuria tii. Nocuaji, puetunu pueyajanaari sequetuquiaari:

—¡Niiquiji pa quiaarej! Fenice tiacajinia pa quishii shuniyacuaji.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatiajacula.

Shoniniacu caminiajinia paratu piyarojosacari jiyanohua nojori

¹³ Jiyacaritij, paratuuri jacaria piyarojonu coteequiaari pananu shuu-cuaji, canaa muenecarajiniji. Naaratej, nojoriiri sequetuquiaari:

—¡Pa naatacuajaqui niiquiji quianu!

Canaari cuniquiji ruparetaquiaarini. Creta jiya tucuaatiajamuruiumia jaaretaareeri. ¹⁴ Na jaaretasacari shiitianijoja, paratuuri canashiyaquiji jiyanohua piyarojoquiaari buque. Cuno paratu sesaari quijia "Noreste". ¹⁵ Paratuuri buque capotariquiaa na shuu-cuajiria saaja. Naaratej, majaari canaa naata jaaretanu quiriquiaa paratu piyarojosacoji. Paratuuri saa canaa patariquiaajaa. Nocuaji, canaari buque tarinitiaquiaarini paratu cuaara na capotaara tamajaaaja. ¹⁶ Paratuuri canaa capotaquiaari tamonu jiya tucuaatiajamururia. Cuno jiya tucuaatiajasesaari quiquiaari Cauda. Majaari puera paratu piyarojonu quiriquiaatii. Canaa rishano botenijojaari buque pajamaji jaasutariquiaa. Canaari jiyanohua poonijioquiaari cuniquini, canaa tacaniniuhuara buque cacojiria cuno botenijoja. ¹⁷ Bote tacanishaanu nuhuaji, canaari buque cuaqueya morojoquiaarini na cumaquinuria na jiaqueyaquiniuucuaji. Pueyari na puerenuta sequetuquiaari:

—¡Paratuuri pa capotanutaniya jaaquiajiniara! ¡Paari tii riitianutaniyani!

Cuno canaa pueresano jaaquiani, na sesa quiquiaari Sirte. Nocuaji, nojoriiri buque toqueya roshinitiaquiaari. Paratuuri saaja capotaquiaari buque. ¹⁸ Jaara juhuaquequiaari, paratuuri saaja jiyanohua piyarojoriquiaajaa. Naaratej, nojoriiri buque pasano casami quejojonu coteequiaari moojinia. ¹⁹ Canaa camueenujusacari jiuujianaraca juuca naquiya canaa miishacari, canaari buque

casamijanaa quejooquiaari socuani, buque namuenura quenaaja. ²⁰Tari canaa shocojoquiaariiри queraatia juuca. Majaari quenaaja canaa niquinii quiquiaari pananu, riyario. Paratu piyarojosacari canaacua, mohuacaari socua jiyahua cajiniuucuaquiaari canaacua. Nocuaji, canaari niishiriojoriquiaani canaari quiarijia cusionuunutaniyani.

²¹ Majaari tojetaarucuajanaa quenaaja canaa miaquenu quiquiaari pueyaracaanu. Pabloori jiyacari nujuquiaari canaata quiniaa tajiniji. Naa nojori sequequiaariiри:

—Camarucuanaa, niaa jaara tojiquianu quenaaja cua sequesano, maja pa ruparetanura Creta jiya tucuaatiajiniji, paatuma naa miya naquiyani. ²²Naajaa, nioojia nia cumaquiri. Maja quenaaja niquiriyatu pajaniyajinjinio cusionu quiniutaniya. Pa buque cutaraari juhua rapti-tiasaanutaniya puetunujuanaa. ²³Janiyari quiarijia cua maquenujinia cua Jiyajijia Pueyaso seru niquirii cua shuriucua nujuanoni. Janiyari cuno Pueyaso tojijiani. Janiyacuajaari na pueyanoni. ²⁴Pueyaso seruuri cua sequeree: “Majaari puerenu Pablona. Quiaacuajaari jiyajijajanaa Augustoocua tiuquiniutaniya Roma tiacajinlia. Quiaari na tacoji nujuanutaniya quia pocuanura. Naajuhuaj, Pueyasoori quia secojosano tojiriucuaa. Naaratej, puetunu quiata quiniaajanaari quiata rishiniutaniyajuhuaj”.

²⁵Naacuajitij camarucuanaa, nioojia nia cumaquiri. Janiyacuajaari seetanujuanaa niishiyani, naa quiniutaniyari taa Pueyaso seru sequeree janiyacuajani. ²⁶Naajaa, paari tamonu jiya tucuaatiajaacua juhua niojosaanutaniyani.

Pabloori naa canaa cumanijiaquiaari.

²⁷ Pueyaracaanu canaa jaaretasacari shoniniacu caminajinia, caapiqui semaanaari tari canaa shocoquiaari. Tamonu niucua canaa jaaretasacari, canaari Adriajinia quiriquiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneetariquiaa jiyareta. Jaara shiyaqueya quiriquiaa cuno niucua, buque jiniacuma poonijionaari niishiquiaari canaari tari jiyacua catecanoyani. ²⁸Buque jiniacuma poonijionaari jiya shanacuquiaari, na niishiniuria queroniti quiriquiaajaa. Na shanacutusacari, saaja treinta y seis metro queroni quiriquiaari. Jaara socua na tacoji shanacutuquiaariuhua, saaja veintisiete metro queroni quiriquiaari. ²⁹Nojoriiri puerequiaari buque naasucuaari shoniniacu caminia casaqueyaji pojotuja saicua cutetanutaniya. Nocuaji, buque pajamaji sohuaneyocuata morojotasano cuatro niajaaca casaa quejootuquiaarii, buque nujuutanura pootia. Nojoriiri cuniquijia na puerenuta sashiquiaari cuaara juhuaqueera. ³⁰Jiyacaritij, buquejinia poonijionaa pueyari juucua cuno niucuaja jiyasohuaja mashiyocuatunu paniriquiaa buquejiniji. Naaratej, nojoriiri buque nacaacoji sapojonu tinijotariquiaa niajaaca casaa moojinia. Jiyasohuaja roshinitiuriquiaa jiyocuacaanu tacanishano boteeri, tii na mashiyocuatunura. ³¹Pabloori jiyacari na jiyatana capitán toquiaari, na soldadohuanio. Naa nojori sequequiaariiри:

—Cuno pojori jaara niya juhuaqueyajimia pata, niaari cusionuuriquiano.

³² Soldadohuari ritia jiyocuacaanu tunusano bote neyocua jiyatajotaquiaari. Moojinia na tinitiuriiri. Paratuuri na piyarojoquiaari tamoco nojorijiniji.

³³ Juhuaquenu panishacari, Pabloori puetunu buquejinia quiniaajanaa sequequiaari cuaara quenaaja miaquenura. Naa nojori sequequiaariiri:

—Tari nia shocojiyari catorce juuca pueyaracaanu nia sutesacari. Majaari nia miaquenku quiquiaajuhuaj. ³⁴ Quiarijia nia miaquererecuara, nia cuaqueya nia cumaquitajara quenaaja. Majaari quenaaja niquiriyatu nianjajinjinio cusonu quiniutianiya quiarijia.

³⁵ Naa na sequenu nuhuajitij, Pabloori pan riquiaari. Na miqueyaquishacarijia, coteenu Pueyaso secojoree puetunu nata quiniaaniquiarajanaari. Na nuhuaji miaquerohuari. ³⁶ Tamasaca jaara naa niquiquiaari Pablotej, puetunu nojorijianaari noojia cajitiquiaari. Pan satureejaariuhuaj. ³⁷ Cuno buquejinia, puetunu canaaajanaari quiquiaarini dosciento setenta y seis pueya. ³⁸ Puetunu pueyajanaa jaara tooquioquiaari, na nuhuaji trigo quejootuquiaari moojiniaari, buque namuenura quenaaja.

Buque coquesacari caminajinina

³⁹ Jaara juhuaquequiaari, buquejinia poonijionaa pueyari maja na niishiniu quiquiaari teyano jiya tucuaatiajatejaara cunoni, nojori na niquiriquiaani. Nojoriiri cuno jiya tucuaatiajaaqua niquiquiaari puereetuua surocohua. Jaaquiaari puetunu na shocuajanaa quiriquiaa. Naacuajitij, nojoriiri sequetuquiaari:

—Buque pa saniri shiitianiniu cuno surocohua.

⁴⁰ Buquejinia poonijionaa pueyari niajaaca sohuaneyocua jiyatajotaquiaari. Cuno niajaacaari caminia jiuujajinina jateequiaari cuniquija. Nojoriiri buque niquinijotetajaa roshinitiaquiaarijuhuaj, buque tacutajara. Buque nacaacuaji teeja toque tacanitiatuerajuhuaj. Buqueeri canujutaaree jaaquiajiniara, paratu piyarojosano. ⁴¹ Buqueeri saacariji jaaquiajinia riitiaseequiaari, caminia cajiniuucuasacari mohuaca paatishano jaaquiajinia. Buque nacaari jiyanohua tiuquishii cumaatia jaaquiajinia. Majaari quenaaja na naata pooniu quiriquiaa na matasaquiji. Na pajari maa rapuequiaarijia moo cajiniuucuasacari jiyanohua nocua. ⁴² Soldadohuari nojori jiyatasano quioosano pueya puecoonu paniquiaari cuniquija, nojori jiyanishacari cuaconutaniya naasucua, mashiyocuatumaa. ⁴³ Capitán cutaraari Pablo tiuquitiniu paniquiaari jiyajinjia Augustoocua. Naaratej, na soldadohua sequequiaariiri:

—Maja quioosano pueya puecotunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuaara cuacoora coteenu, jaaquiajinia rupaatiushiicuaari. ⁴⁴ Cuaashijianucua saniniuuja cuaara buque jiniacumaji suruhuatuneecaacua jacamatutura na cuatajara. Tamasaca cuaara buque neecaacua jacamatuurajuhuaj.

Naa miitiuquiaariiri. Puetunu pueyajanaari jaaquiajinia rupaatiushiiquiaari.

¹ Puereeta canaa cuaconu nuhuaji shoniniacu caminajinia, canaari namitia puetunujuanaa maninia tacataseequiaari cuno jiya tucuaatiajaacuani. Canaari jiyacari shusha niishiquiaarini, cuno jiya tucuaatiaja sesaari quiquiaari Malta. ² Cuno jiya tucuaatiajaacua quijia taucuacaari maninia canaacua jiyanoquoiaari. Shiniquiaari quiriquiaa. Maruuri niriquiaajuhuaj. Naa canaa shiniquiosacaritij, taucuacaari canaara noshitiquiaari puereetuua mani. Na nuhuaji canaa sequetureeri:

—Miji. Nia jitiushii.

³ Pabloori naanacucua reratejoriquiaajuhuaj. Manijinia na quejoriquiaari. Jiyacaritij, soconuquiiri maniicuaji mashiriquiaa juucua. Pablo juaashiquia saariiri. ⁴ Cuno jiya tucuaatiajaacua quijia pueyari soconu niquiquiaari Pablo juaashiquiaacuaji sohuataano. Jaara naa niquitiuquiaaritij, tama nojorijiaarijia sequetooquiaari:

—¡Nio pueyano naasucuaari pueyano mojua! Cocuaatia miirii juucua shoniniacu caminajinia na cuasacari buquejinijiiri. Pueyasoori quiarijia saniniuujia cunora soconu na sajitirii na cusonura.

⁵ Pabloori saaja manijinia majiriataree soconu. Majaari quenaaja na sajiyashi noonu quirii. ⁶ Puetunu pueyajanaari na sashiriquiaa, taacari na poreenutaniyani. Na sashitiuriquiaajaariuhuaj na jiyani-tiushacari canashiyaquiji cusonutaniya naasucua. Naa pueyaracaanu na sashitiushacari juucuatej, nojoriri socua tamaatia niishirionu-uquiaari. Nojoriri Pablojiniji sequetooquiaari:

—¡Cuno pueyano naasucuaari pueyasojuhuanaaj!

⁷ Cuniqui canaa quishaquini, canaari tamonu pueyano cuhuariquia shuriucua quiriquiaani. Na camaruuri cuno Malta jiya tucuaatiaja camarnu quiquiaari. Na sesaari Publio quijia, maninia pueyano. Nojua-jaari canaa masuuquiaari na tiacora. Canaa mianuutequiaari maninia tiiri. Canaari jiuujianaraca juuca na tajinia camueequiaarini. ⁸ Cuno camarnu queeri jiyacari cusosu matariquiaa. Jiyano hua naseecaari quiriquiaa. Coriyacau rurequeriquiaajaariuhuaj, na jiniacuma noonunio. Pabloori nocua tiuquiquiaari na matasaqui. Pueyaso seco-joree nocuaraari. Na secojosacari, nocua niaquiaari na juaashiquiaari. Pueyanoori naatarohua. ⁹ Cuno jiya tucuaatiajaacua cusosuhua jaara niishiquiaari naa Pablo naatanishanocuaa cuno pueyanotej, nojoriri nijioquiaariuhuaj. Pabloori puetunujuanaa na naatanijoquiaari. ¹⁰ Naa Pablo miiniuucuatej, cuno pueyari na jiitiasano casamijiniji canaa niquitijoquiaari nareja. Na nuhuaji, canaa jaara quiaquiaari cuniquiji tamonu buquejiniani, nojoriri canaa jiyatajara canaa panishano niquitiojotuquiaari narejajuhuaj.

Pablo tiuquishacari Roma tiacajinia

¹¹ Canaa sashishacari shuniya cuaara tajirria, jiuujianaraca racaari canaa shocojoquiaari Malta jiya tucuaatiajaacua canaa quishacari. Ale-jandría tiacajinijino buqueeri tii nujuatariquiaajuhuaj. Shuniyacuaji tiuitiaquiaari tiiquiri. Cuno buque nacatuuri juhua nojori pueyasohua Cástor nacara quejasano quiquiaari, juhua Pólux nacanio. Canaari cuno buquejinia quojoquiaari cuniquijini. ¹² Canaari Siracusa tiaca tacata-jajiniji tiuitiaseequiaarini. Canaari jiuujianaraca juuca camueenu-jusee tiini. Siracusa tiacaari Sicilia jiya tucuaatiajaacua. ¹³ Cuniquiji canaa quiasacari, canaari cuno jiya tucuaatiaja shuriucuataareeni.

Canaari Regio tiacajinia tiuquishiini. Tariqui, paratuuri maninia piyaro-
joriquiaa buque nijiniji. Canaari cunora tama tariqui tiuquishii Puteoli
tiacajiniani. Canaari quiniqui tacatasee puetunujuanaani.¹⁴ Puteoli
tiacajinia Jesuucua tiuuniaa pueyari canaa masuuquiaari na tiajiniri.
Canaa sequetuquiaariiri:

—¡Maja canaa shoconu pueyanaa! Canaa tiajinia nia camueenujuma-
jaara.

Naaratej, canaari siete juuca nojoritia camueenujuquiaarini. Na
nuhuaji, canaari cuniquiji Roma tiacajiniara neteja nucuaco
quiaquiaarini.¹⁵ Roma tiacajinijinio Jesuucua tiuuniaa pueya jaara
niishiquiaari canaa tari nucuamaji niyaní, nojoriiri nucuacoji canaa
naacunuucua nijioquiaari. Coteenu nijionaari canaa naacuquiaari
Foro de Apio tiacajinia. Tamasacaari saniniujia canaa naacuquiaari
Tres Tabernas jiyanishano tiacajinia. Pablo jaara narta Jesuucua
tiuuniaa niquiquiaari, noojia cumaquiquiaariiri. Naaratej, Pueyaso
sequequiaariiri:

—¡Paacarasho cua Pueyasonaa!

¹⁶ Canaa jaara tiuquiquiaari Roma tiacajiniani, Pablo jiyatana
capitánri puetunu quioosano pueyajanaa niquitioquiaari Roma
tiacajinia quoosano cojuanaa camarnu. Pabloori saniniujia
tarinitiasaaquiaari tamonu tiajinia na quiniuria tamajaaja, tamonu
soldadota na cojuariquiano.

Pablo pohuatasacari Jesujiniji Roma tiacajinia

¹⁷ Jiuujianaraca juuca na quishacari tari Roma tiacajinia, Pabloori
puetunu tii quihiaca narta Judiocuaca camarucuajanaa masuuquiaari,
nata nojori rerejonura. Cuno pueya jaara rerejoquiaari, Pabloori nojori
sequequiaari:

—Cua tapueyocuacanaa, majaari cua miiniu quiquiaari sesa parta
Judiocuacani. Majaari cua numueejushiniu quiquiaa pa supuetanaa
niishitiosanojuhuaj. Naajaa, pueyari cua quiatucanu Jerusalén tiacajinia.
Cua niquitotucanu Romano pueyari, cua morosaanura.¹⁸ Nojori
nequesoreenu nuhuaji janiya, cua cartetunu paniquianu juucuaari,
nojori niishishacari maja sesa cua miiniu quiquiaari cua mosaa-
nura.¹⁹ Romano camarucua jaara cua cartenu paniquianu, parta Ju-
diocuacaari saaja juaaquioree. Janiyari jiyamitia sequecanuni, cuaara
cua jiyarotuura jiyajijajanaacua niya Roma tiacajiniani, Césarjanaa
nequesoreenura janiya. Naajaa, majaari cua saquiriojotanu quiniu-
tianiya saniniujia nojoriicuara, cuarta Judiocuaca nojori quiniuucua.²⁰
Janiyari cunora nia niquiniu paniriquiaani, cua pohuatanura nia-
janiya taa puetunujuanaa parta Israel pueya niishiyacuajani, niajaniya-
juhuaj; macunucuaari samiitianijiosaanutaniuhua. Janiyari cunora
cumayocuata moronucua niya quiyani.

²¹ Judiocuaca camarucuaari Pablo riucuaquiaari:

—Maja quenaaja canaa masetanu quiquieranu Judea jiyajiniji naa-
jioneey, canaa pohuatasanura quiajaniyajiniji. Cuniquijinio parta Ju-
diocuacaari niya tiuquijijocanujuhuaj. Naajaa, nojoriiri maja quenaaja
sesa na pohuatanuunu quiquieranu canaa quiajaniyajiniji.²² Canaari
saaja niishiyani, puetunu tiquiyocuajanaa sesacasaaquiaaquiniaari Je-
sujiniji pohuatasano. Quiaa mariqui cunojiniji canaa pohuatate, canaa
niishiniuria socua.

²³ Jiyacaritij, Judiocuacaari Pablo sequequaari:

—Canaacua tamonu juuca quia tojiquiiquiani.

Na nuhuaji, nojoriiri na sequetusano juuca nijioquiaari. Pablo quijia tiajinia mishitiuquiaariiri. Pabloori nojori niquiara pohuatanu coteequiaari tariquiicuaj. Naa niniyareejaari. Juucua nojori niishitiojquiaariiri, Jesuuri seetanujuanaa Pueyaso Jiyarosano quiquiaari. Nojori sequequiaariajiaariuhuaj taa Pueyaso jiitiae na jiyanooshano pueyani. Naajuhuaj, taricuacaanu Moisés naajiotasano Jesujiniji niishitiojquiaariiri, Pueyaso sequencesano caminiuijuniaa naajionuutasanonio.

²⁴ Noojaqueya nojorijnijinoori Pablo sequencesano tojiquiaari cutara. Tamasacaari saaja na cuaracashitiquiaari saniniujia. ²⁵ Nojorijnijinio jaara Pablo niishitiosano tojiquiaari cutara, tamasacaari nojoritia juayonuutanu coteequiaari. Naa na juayonuutasacaritij, tohuareetaquiaariiri na quiojonuhuara. Pabloori jiyacari nojori sequequiaari:

—Pueyaso Sohuanuquiiiri seetanujuanaa taricuacaanu Pueyaso sequencesano caminiuijunia Isaías pohuataniquiaari parta Israel pueya niquiara, jaara na sequequiaari:

²⁶ “Quia quiaare cuno pueyacua. Quiocua nojori sequencesee: ‘Niaari cua rupaa tojiniutianiya. Majaari nia niishiniu quiniutianiya casaa nia tojiyani. Niaari cua cumaacata cua miishano niquinutianiyajuhuaj. Majaari quenaaja nia niishiniu quiniutianiya’.

²⁷ Cuno pueyari noojia cumantaree maja na tojitianura cua rupaa. Naaratej, saaja sesa tojitiaquiaari. Nojori namijaari mishiquiosanojuhuaj, na niquitiaaqiniuuucuaj, maja na numaata na tojitianura, noojiata na niishitiuyaquinurianio. Naa jiyatecanu nojorinijia, maja na niishitiuniuria janiya, mariqui cucua tacateturohuari, nojori cua naarajonura”.

²⁸ Pueyanaa, nia niishiri. Niaa jaara ruuretare cua pohuatasano Jesujiniji, taucuacaari saniniujia pohuatasanutaniyacuja, taa Pueyaso jiyanooni paniya pueyani, maninia na jiitianura nojori. Taucuacaari na tojitianutaniya cutara.

²⁹ Pablo jaara naa sequequiaari nojoritij, Judiocuacaari quiojiyaro-hua. Tama nojorijiaarijia juayonuutaarohua na quojosacariuhua.

³⁰ Caapiqui mariijaari Pablo shocojoquiaari rupaquijia na masesano tiajinia moronucua na quishacari Roma tiacajinia. Puetunu pueyajanaa jaara nocua niquiaari na niquinuria, nojuajaari maninia na masequiaari na quijia tiajinia. ³¹ Majaari jiyasohuaja na pohuatanu quijia taa Pueyaso jiitiae na jiyanooshano pueyani. Jiyaniijia Jesujiniji niishitiojouajaariuhuaj. Majaari na sanaajasaanu quijia.

PABLO NAAJIONEE ROMA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pabloni, Jesucristo seru. Nojuajaari cua saquiriojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupaajanaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niaacuarani.

² Pueyasocuajaari tariucuacaanu na sequenu panishano caminiujiuniaa pueya niishitiquiaari, nojori naajiotanura Pueyaso Rupaa, pa niishiniuria taa Neyanu na miiniutianiya pocuarani. ³ Pueyano na quiniuria mijiria, Neyanu Jesucristoori rasaaquiaari. Na supuetanaari quiquiaari Israel pueya jiyaniijia David. ⁴ Jesu sohuanuuri saniniuuja pueyaracaanu Pueyaso Niyanujuhanaj. Paa cutaraari quiari naataja niishitishaquaarini, nojuajaari seetanujuanaa Pueyaso Niyanu. Paari quiarijia na niishiya seetanujuanaa cutarani, Pueyaso Sohuanu samiitianiniuuca nojuaja macujiniji. Nojuajaari tari jiyatesaaquiaari Jiyaniijajanaa na quiniuria, puetunu cumaacajanaa na jiitianurajuhanaj. Nojuajaari pa Jiyaniijia Jesucristo.

⁵ Nocua canaa tiuuniuucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaquiriiri puetunu jiyacajinijinio pueyajanaa canaa tiuutiniuria Neyanuuucua, na tojitinjaca nojori quiniuria.

⁶ Niajanijayuhuaj, Roma tiacajinia quiniaa Pueyaso pueyanaa, Pueyasoori nia saquiriojoquiaari Jesucristo pueya nia quiniuriajuhuaj. ⁷ Puetunu Pueyaso panishano pueyajanaa, canapue Pueyaso saquiriojoquiaari saa maniniaja nojori quiniuriacuajani, janiyari niaacuara naajioteyani. Pa Que Pueyaso, pa Jiyaniijia Jesucristojuhuaj, nojori cuaara cumaquiria niajaniya, maninia na tojijiaca nia quiniuria. Naajuhuaj, nojori cuaara nioojiaca cajitiiria shuquiriaatia nia quiniuria pueyaracaanu.

Pablo naquerejosacari Roma tiacajiniara

⁸ Coteenu nia sequenu paniyanijia, janiyari nia timitiaquiaani, maninia niajaniyajiniji pueya pohuatanuuca puetunu jiyacajinijajanaa. Nojoriiri pohuataquiaa, niaanaari maninia tiuuijaca pa Jiyaniijia Jesucristoocua. Naa Jesucristo miiniuucua niajaniyatej, janiyari cua Pueyaso sequequiaani: “¡Paacarasho! Quiaari jiyanoehua maninia”.

⁹ Janiyari pueyaracaanu cua Pueyasora poonijioquiaani puetunu cua cumaacatajanaa, Neyanujiniji cua pohuatanura. Pueyasocuajaari niishiya, pueyaracaanu cua secojosacari nojuaja, janiyari niaacuara sec-ojoquiajuhuaj. ¹⁰ Naa cua secojosacari nojuajatej, janiyari na sequequiaani cuaara cua tiuquitiria niaacua, rupaquijia cua quiniuria niaata, nojuaja jaara naa paniri. ¹¹ Janiyari nia niquiniiuuca jiaatiaani, cua cumaquinuria socua niajaniya na Sohuanu cumaacata, socua jiyanoehua Pueyasooecua tiuuijaca nia quiniuria. ¹² Majaari cua

cumaquiniu paniniu saa niajaniyaja. Janiyari paniyani nia cumaquinuria janiyajuhuaj. Naacuajitij, mariyata pa tiuushacari Jesucristoocua, paari mariyata cumaquitiojonutaniyani.

¹³ Cuarta Pueyaso muerasunaa, janiyari nia sequenu paniyani nia niishiniuria, janiyari sequeyarucua niaacua naquerejoquiaa juucuani. Majaari juhuanojuaja cua naata quianu niaacua. Janiyari Jesucristojiniji pohuatanu paniya tii Roma tiacajiniani, tee nia quiyacuajani, cuno taucuaca tiuuniuria Jesuucuajuhuaj. Tamonu jiyacajinlia tau-cuacaari tari Jesucristoocua tiuujjaca quiyacuua, cua pohuatanuucua Jesucristojiniji nojori niquiara. Janiyari naa miiniu paniya nia tajinajuhuaj. ¹⁴ Cua Jiyaniijaari cua jiyatequiaari na rupaa pohuatanara. Janiyari cunora na rupaa pohuataquiaani. Majaari na tojiyashijia cua quiniu paniniu. Naaratej, janiya cuaara pohuataara na rupaa pueree-tuuca tiacajinlia pueya niquiara, mariyata tiquiyocua quiijaca pueya niquiarajuhuaj. Janiya cuaara na rupaa pohuataara niishijiaca pueya, niishiyashijiaca pueyanio. ¹⁵ Janiyari cunora quianu paniya Roma tiacajiniani, cua pohuatanura Jesucristojiniji niajaniya.

Pueyaso Rupaari cumaacaraca na jataniniuria pajaniya

¹⁶ Maja cutaraari cua caririquiniu Jesucristojiniji cua pohuatanura. Jesucristo rupaacuajaari Pueyaso cumaacaraca, pueya na jataniniuria Pueyaso muerasu nojori quiniuria, nocua nojori tiuushacari. Puetunu Jesuucua tiuuniaa pueyapuejanaari Pueyaso pueyara jatanishaanutaniya, taa Judiocuaca jatanishaaquiaa Pueyaso pueyaracuaani. ¹⁷ Jesucristo pohuatasanojiniji paari niishiyani, Pueyasoori pa jiyanoquiaa sesa pa miishanojiniji, saaja Jesucristoocua pa tiuushacari. Saaja nocua pa tiuuniuucua, paari Pueyaso pueyara jatanishaaquiaani. Cunora, naa naajotasano quiyacuajaari tariucuacaanu Pueyaso Rupaajinija:

“Pueyaso jiyanooshano pueyanoori pueyaracaanu shuquiriaatia quijia quiniutiani, saaja Pueyasooocua na tiuushacari”.

Pueyasora, puetunu pueyajanaari sesa mijiaca

¹⁸ Pueyasoori jiyocuacaanuji na tojiyashijiaca pueya saniitioquiaa. Naa nojori na saniitiosacaritij, Pueyasoori nojori numootequiaa, nojua-jaari puetunu na tojiyashijiaca pueyajanaa saniitionutaniya jiyahohua na juaaniutia. Naa saniitiosaanutaniyajaaariuhuaj, puetunu sesa mijiaca pueyajanaa. Naa sesa mijiaca pueya quishacaritij, nojoriiri Pueyasojiniji niishishano ruuretaquiaa saaja. ¹⁹ Nojori jaara Pueyaso niishiniuucua jiaatiariquia, nojori maara na niishirij. Pueyasocuajaari tari nojori niishitiquiaari taamuecate nojuajani. Nojoricuajaari tari maninia nojuajiniji niishiya. ²⁰ Majaari pa naata Pueyaso niquiniu pa namijiata, pa niishiniuria taamuecate nojuajani. Naajaa, Pueyaso shipininiuucua jiya, maatia niishishiyacuajaari nojuajaari Pueyaso, pa niquishacari puetunu na shipinishanojuanaa. Na shipinishanojiniji niishishiyajaaariuhuaj, majaari na cumaaca puequenu quiniutiani. Pueyaracaanu quiriquianoori. Naacuajitij, Pueyaso saniitionu pan-ishacari na tojiyashijiaca pueya, nojoriiri maja na naata sequenu quiniutiani Pueyaso: “Maja canaa niishiniu quijia quiajaniyajiniji”. ²¹ Nojoricuajaari Pueyaso niishijiaca najuhuanaj. Na niishijiaca nojori

quishacari, nojoriiri saaja na rerequeteja. Nojoriiri na tojitiaaquiquiaajuhuaj. Pueyaso miiniuucua maninia pueyaracaanu nojori, nojoriiri maja quenaaja na sequetunu quijia: "Paacarasho Pueyasonaa". Tama nojorijaarijia jiyanoehua cushimaquiaa sesa nojori niishiriojonuuusacari najuhuanaj. Naa mosanucua nojori quishacaritij, nojori jiuujiaari juhua ninishiquiria quiquiaa.²² Nojori jiyanihacari nojori cutaraari seetanujuanaa niishijiaca, naacuajitij nojoriiri socua niishiyashijiaca quiquiaa.²³ Nojoriiri Pueyaso shuquiritiaaquiaa tama nojori shipinishano casaajaaja nojori shuquiritianura. Pa shipininia Pueyaso cutaraari jiyanoehua cumaacaraca, pueyaracaanu quijiajuhanaj. Nojoriiri Pueyaso niti shuquiritiaquiaa tama nojori shipinijiosanojuaja. Cuno, nojori shipinijiosano Pueyaso niti na shuquiritisocoriquianoni, cunoori quiquiaa juhua shaajeja pueya niquishano, juhua jaacuatujuaca niquishanojuhuaj, juhua nacujiniaaco canujuucuatujuaca niquishanojuhuaj, juhua roshiyocuatujuaca niquishanonio.

²⁴ Naaratej, Pueyasoori nojori tarinitiaquiaa sacuaraatia casaa nojori miiniuria tama na cuaqueyataajaaja, taa nojori miiniu paniquiaacuajani. Nojoriiri socua jiyacatequiaa sesa miiniuria. Naacuajitij, pueyari tama na cuaqueyajaaja miiquiaa sesa, cararaatia nojori miitioosacari narta pueyanota.²⁵ Naa sesa mijiaca nojori quishacaritij, pueyari seetanu casaajanaa Pueyasojiniji niishishano ruuretaquiaa, sapojonuunu nojori tojiniurie saniniuujia. Naaratej, pueyari Pueyaso shipinijiosano casami shuquiritiaquiaa, saniya na Shipininia niti. Nojuajaari pa Pueyasojuanua cutara. Nojuaja cuaara shuquiritisaaria pueyaracaanu cutara.

²⁶ Pueya jaara Pueyaso cartequiaa, Pueyasoori nojori tarinitiaquiaajuhuaj, cararaatia casaa nojori miiniuria, taa nojori jiaatiaquiaa miiniuriacuajani. Naacuajitij, maajipohuari maja na caminiu paniniu quiquiaa. Saaja narta maajipohuata cararaatia casaa miiquiaari juhua canuu. ²⁷ Naajuhuaj, canuuri maajitia quiniu paniyaquiquiaa, sacuaraatia na jiaatiasacari narta canuucua. Canuuri jiyanoehua cararaatia miitooquiaa. Naa nojori miniuucuatej, nojoriiri tama na cuaqueyajaaja miitiaquiaa naquia na miishaanura.

²⁸ Nojori niishiniu paniyaquiniiucua Pueyaso, Pueyasoori nojori tarinitiaquiaa nojori miiniuria tama nojori niishiriojosano sesajaaja. Nojoricuajaari niishiya, nojori miishanoori sesa. Naajaa, nojoriiri saaja na mijiaca quiquiaa, cararaatia miiniu niishiriojonuujuaca nojori quiniuucua.²⁹ Naacuajitij, nojoriiri puetunu tamaatia sesa miishanujuanaa miiniu niishijiaca. Jaara sesa miri, timiquoyari. Nojoriiri nio mijiaca: puera casamiriaca quiniuucua jiaatiajaca. Sesa miiquiaari na parishano nojori jittianura. Nojoriiri tamasaca pueya jittiasano casamiicua jiaatiajaca. Nojoriiri pueya puecojuaca. Nojoriiri pueya ruutaqueja. Nojoriiri na parishano casami nohuasenuujuaca jiyasohua. Nojoriiri narta pueya miitianu panijiaca. Rimiaacatujuriijaariuhuaj.³⁰ Nojoriiri sacuaraatia sequejojua narta pueya. Nojoriiri Pueyaso niquiniu paniyashijiaca. Nojoriiri tamasaca soojeaca. Nojoriiri tama na cuaqueyajaaja jiyatequiaa juhua socua maninia pueyara tamasacajiniji. Nojoriiri najuhuanu sequeja: "Janiya maninia mijiiani". Nojoriiri jiyanoehua niishijiaca, niishishoo sesa casaa na miiniuria. Nojoriiri na queya tojiyashijiaca.³¹ Nojoriiri seetanujuanaa mosanucua Pueyaso na tojitiaaquiniuucua. Nojoriiri saaja tama na rupaajaaja jataja. Majaari

na sequencesano na miiniu. Nojoriiri narta pueya paniyashijiaca. Majaari nojori niishiniu jiyanooniu. Majaari nojori niishiniu taraajenu narta pueyacua.³² Nojoricuajaari tariucuacaanu naa Pueyaso sequencesano niishiya: "Cante naa sesa mijiacani, cuaara puecoosaaria". Naajaa, nojoriiri saaja sesa miiquiaa juhuajaniya. Majaari nojori quiniu shuquiriaatia saaja tama nojori miishacarrijaaja sesa, nojoriiri shuquiriquiaajuhuaj tamasaca jaara sesa miiri juhua nojori.

2

Pueyasoori sesa mijiaca saniitionutaniya sesa nojori miiniuuucua

¹Naacuajitij pueyanaa, niaa jaara tamonuucuara tonujuju quiriquia, majaari nia jiyaninu niaari sesa miyashijiaca cutara. Niaa jaara tamonuucuara tonujure sesa na miishano, niaari tama niaacuarajaaja tonujiya naa sesa miiniu niishijiaca nia quishacarijuhuaj.² Paacuajaari niishiyani, Pueyasoori puetunu sesa mijiacajanaa saniitionutaniya, maninia na niishishacari nojori miijiosano.³ Quiajaniya saniniuuja, quiarta pueyacuara tonujujuanaa, majaari quenaaja quia jiyaninu quiaa saniitoyaquishaanutaniya. Quiaari saniitiosaanutaniyajuhuaj. Quiaacuajaari juhua nojori, sesa mijiajuhuaj.⁴ Majateeri quia niishiniu, Pueyasocuajaari pueyaracaanu quia sashiquiaa juucua, quioojia quia tacatonuhuara nocua? Naaratej, nojuajaari pueyaracaanu maninia quia miiquiaa. Quia rejeretaquiaajaariuhuaj. Quiaateeri jiyaniquiaa Pueyasoori naa maninia quia miiquiaa, maninia quia quiniuucua na niquiara?⁵ Majal⁶ Quiaari quioojia tacatonu paniyauquiquiaa, sesa quia miishanojiniji quia taraajeyauquishacari. Cunora, quiaari puetunu sesa quia miishanojinijiana saniitiosaanutaniya jiya puequesacari. Jiyacaritij niishishaanutaniyari, Pueyasoori seetanujuanaa maninia sanitiojua.⁷ Pueyasoori puetunu pueyajanaa miiniutianiya taa nojori miishano quiquiaari mijiriacuajani.⁸ Naacuajitij, Pueyasoori maninia mijiaca jiyatenutaniya pueyaracaanu rishijiacara. Nojoriiri pueyaracaanu maninia mijiaca quiquiaari mijiria, Pueyaso timitasano nojori quiniuria, shaajeyashijiaca nojori quiniuriajuhuaj.⁹ Saniniuuja, Pueyasoori na tojiyashijiaca saniitionutaniya jiyanohua na juaniutia. Naa saniitiosaanutaniyajahu noo pojori, canapuete saaja sesa miiniu panijiaca quiquiaarini.¹⁰ Puetunu sesa mijiaca pueyapuejanaari naquiya miishaanutaniya, taa Pueyaso tojiyashijiaca cuarta Judiocuaca miishaanutaniyacuana. Saniniuuja, Pueyasoori puetunu maninia mijiaca pueyapuejanaa miiniutianiya maninia, taa maninia mijiaca Judiocuaca miishaanutaniyacuana. Pueyaso timitasano pueya nojori quiniuucua, nojoriiri jiyanohua shuquiriaatia quijiaca quiniutianiya pueyaracaanu. Naacuajitij, nojoriiri juhuajaniya quiniutianiya Pueyasoira pueyaracaanu.

¹¹ Pueyasoori maja rimiajata na miiniu quiniutianiya taucuaca, Ju diocuacanio. Puetunu maninia pueyajanaari maninia miishaanutaniya. Sesa pueyari saniitiosaanutaniyacuua. ¹² Naacuajitij, pueya jaara Pueyaso rootasano Moisés niishiyashijiaca quiriquia, naajaa, nojori jaara sesa mijiaca quiri, nojoriiri saniitiosocoriquiano. Naajuhuaj, pueya jaara Pueyaso rootasano Moisés niishijiaca quiriquia, nojori jaara na tojiyashijiaca quiquiaarijuhuaj, nojoriiri cuno Moisés Naajioneenjiniji nequesoreesaanutaniya na tojitiaaquiniuucua.¹³ Majaari nia

jiyaniniu niaari jiyanoshaanutaniya sesa nia miishanojiniji nareja na-
juhuana nia tojishacari Moisés Rootasano. Niaari jiyanoyaquishaanu-
taniya maja seetanujuanaa na tojijiaca nia quiniuucua. Noo pojori
cutaraari jiyanoshaanutaniya, canapuete seetanujuanaa na tojiji-
cacuajani.¹⁴ Moisés Rootasano jiitiaashijiaca pueya jaara tamajaaja
maninia miiniu niishijiaca quiriquia, naacuajitij, niishishiyari, nojoriri
tamajaaja maninia miiniu niishijiaca cutara.¹⁵ Naa maninia miiniu ni-
ishijiaca nojori quiniuucuatej, niishishiyari, Pueyaso rootasano Moisésri
juhua nojori jiuujiajinia naajiotasano quiya. Naaratej, nojori jaara sesa
miiri, tama nojori jiuujiajaarrijia nojori niishitiya: "Sesa miiriinijia".
Naajuhuaj, nojori jaara maninia miiri, tama nojori jiuujiajaarrijia nojori
niishitiya: "Maninia miiriinijia".¹⁶ Naacuajitij, cuno juuca, Pueyaso
nequesoreetesacari Neyanu Jesucristo puetunu mijiria quiniaa pueya-
janaani, jiyacaritij, tama pueya jiuujiaari nojoriicuara tonujunutaniya
sesa nojori miishanojiniji jiyasohua. Naaratej, janiyari pueyaracaanu
pueya numootequiaacuajani cua pohuatasacari Pueyaso rupaa Jesu-
cristojiniji.

*Pablo nacasusacari Judiocuaca nojori tojitiaaquiniuucua Moisés
Rootasano*

¹⁷ Cuarta Judio pueyanonaa, quiaari jiyaniya quiaa Pueyaso pueyano
cutara, na saquiriojosano Israel pueyajinijinio quia quishacari, Moisés
Rootasano niishijia quia quishacarijuhuaj. Cunora, quiaari seque-
quiaaa: "Janiya cutaraari Pueyaso pueyanoni".¹⁸ Janiyari niishiyani
casaa Pueyaso paniya cua miiniuriani. Moisés Rootasano niishijia cua
quishacari, janiyari niishiyani teyano casaate socua tojishocoriquiano
rootasanoni Pueyaso cua shuquiritiniuria".¹⁹ Quiaari sequequiaa-
juhuaj: "Janiyacuajaari seetanu rupaajanaa niishiyashijiaca pueya ni-
ishitiojonani. Janiyari juhua ninishiqui quiijiaca pueya cuhuatanani.²⁰ Janiyari niishiyashijiaca niishitiojojuani, naatujoorinio, maninia
cua niishishacari seetanu rupaajanaa Moisés Naajioneejiniji".²¹ Naa
tamasaca niishitiojona quia quishacaritij, tama quia cuaqueyajaaja
quia niishitiojore coteenu, maninia miiija quia quiniuria. Quiaaa jaara
tamasaca niishitiojquiaa maja na nohuasenuunura, ¿casaara nohuase-
jojua quia quiyacuaraarini?²² Quia rootasacari tamasaca, maja no-
jori numuetucunura niyacaraca maaji, ¿casaara saniniuujia naa quia
miiquiaacuaraarini? Quiaacuajaari sequeja: "Janiyari pueya shipini-
jiosano casaa soojeani, nojori shipinijiosano na secojonuuusocoriquiano
juhua Pueyasoni". Naa quia soosacari nojori shipinijiosano casaatej,
¿casaara quia nohuasejoquiaa cuno casaa nojori secojonuujuja tiaca-
jinijicuaraarini?²³ Quiaari sequequiaajuhuaj: "Moisés Rootasanoori
jiyanohua maninia. Na timitiaanijia". Naajaa, quiaari Pueyaso
rerequetequiaa quia tojiyaquishacari Moisés Rootasano.²⁴ Cunora,
tariucuacaanu Pueyaso Rupaajinia naajiotasanoori seetanujuanaa naa
sequeya:

"Pueyaso niishiyashijiaca taucuacaari Pueyasocuara rimiaaquequiaa
sacuaraatia, Pueyaso tojiyahijiaca nia quiniuucua nojori
niquiara".

²⁵ Cuarta Judiocuacanaa, Pueyasocuajaari pa supuetanaa
rootaquiaari pa cararaatiuuquia co cuaara miatesano quiiria, na
saquiriojosano pueya pa quiniuucua. Naacuajitij, nia cararaatiuuquia

co jaara miatesano quiri, cunoori maniniacuaja, niaa jaara seetanujuanaa Moisés Rootasano tojijiaca quiri. Saniniujija, niaa jaara Moisés Rootasano tojiyashijiaca quiriquia, niaari juhua miatesoo quiyajaa Pueyaso niquiara. Nia cararaatiuuquia coori najuhuana miatesano quiya.²⁶ Saniniujija, taucuaca jaara maninia miijiacqua taa Moisés rootasano sequeyacuajani, miatesoo nojori cararaatiuuquia co quishacari, naajaa. Pueyasora, nojoriiri juhua miatesano quiya, na muerasu nojori quiniuria.²⁷ Naacuajitij, na cararaatiuuquia co miatesoo tahue jaara maninia miijia quiri, taa Moisés Rootasano sequeyacuajani, nojuajaari jiyanooshaanutaniya, Pueyaso muerasu na quiniuria. Quiajaniya saniniujija Judio pueyanonaa, quiaari Moisés Rootasano niishijiacuaja. Quiaacuajaari quia cararaatiuuquia co miatesanoraca. Naajaa, quiaa cutaraari saniitiosaanutaniya quia tojiyauquiuucua Moisés Rootasano. Naacuajitij, cuno tahuerai quiocuara tonujuriquiano saniya, Judio pueyanonaa.²⁸ Pueyasocuajaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasorani? ¿Na cararaatiuuquia co miatesano pueyanotee, Judio pueyacuajinio supueno pueyanotejuhuaj?²⁹ Maja.²⁹ Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyaso Sohuanu jaara pueyano juuujia jataniri Pueyaso tojijia na quiniuria, cunoori juhua na cararaatiuuquia co miatesano cutara, seetanujuanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohuanu cutaraari na naata.

3

¹ Naa cua sequesacari niajaniyatej, niaa naasucuaari sequeya: “Tau cuaca jaara naa maninia miishaanutaniya nojori quiyauquishacari Pueyaso saquiriojosano Judiocuaca, naatej, taa pajaniyacuana, ¿casaara pa cararaatiuuquia co miatejosaquiaricuaraarini? ¿Paateeri na juhuana Pueyaso saquiriojosano Judiocuacani?”² Maja, Judiocuacanana. Maniniacuajaari pa quishacari Judiocuaca. Pueyasocuajaari Judiocuaca cuacua tiuquiaari nojori jiitanura na rupaa.³ Noojiaqueya Judiocuacajinjinio jaara Pueyaso Rupaacua tiuyashijiaca quiya, ¿Pueyasoteeri cunora na rupaa jatanutaniyajuhuaj?⁴ ¡Maja!⁴ Puetunu pueyajanaa jaara sapojonuujuaca quiriquia, naajaa, Pueyaso cutaraari tojetaarucuajanaa sapojiyashijia. Naaratej, nojuajinijiiri naa naajiotasano quiya taricuacaanu na Rupaajinie:

“Puetunu pueyajanaari niishiniutaniya puetunu quia sequesanojuanaari seetanujuanaa cutara. Naajuhuaj, pueya jaara quiocuara tonujure juucua, puetunu nojorijanaari sanaajasaanutaniya, saa maniniaja quia miiniuucua pueyaracaanu”.

⁵ Pa supuetanaa tiuyaquiuucua seetanu Pueyaso rupaacuajanaa, naacuajitij, mijiria quiniaa pueyari niishiya, Pueyasoori socua jiyanoehua maninia pueyajiniji. Sesa pa miiniujiniji, paari niishiyani Pueyaso cutaraari jiyanoehua maninia. Naacuajitij, nojuaja jaara pa saniitiore sesa pa miiniuucua, ¿taa nia sequeyani? ¿Nojuajate sesa, jaara pa saniitiore sesa pa miiniuucua?⁵ ¡Juaj! Juhua niishiyashijia

pocuareenijia. ⁶ ¡Seetanujuanaa, Pueyasoori sesa miyashijia! Nojuaja jaara sesa miijia quiriquiajuhuaj, ¿maatucua taa mijiria quiniae nequesoreereni?

⁷ Tamasaca naasucuaari sequequiaa: “Sapojojua cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaaajanaa jiitaja. Naaratej, ¿Pueyasotucua casaara cua saniitioren?” ⁸ Teyano pueyanote naa sequejani, nojuaja naasucuaari naa sequejahuaj: “Socua sesa pa miiri, Pueyaso jiyanooniuria pajaniya. Naacuajitij, pocua Pueyaso shuquiritiare socuani, nojuaja jaara pa jiyanoori”. Tamasacaari canaaccuara tonujuquiaa na-juhuanaaj, canaanaari naa niishitiojoquiaani. Canapuete naa sapojonu-uquiaa canaaccuarani, nojoriiri saniitosaanutaniya, nojori sesacanuu-cua canaa.

Pueyasora, puetunu pajaniyajanaari sesa miijiacani

⁹ Quiarijia, jaara naa quiritiq cuarta Judiocuacanaa, ¿paateeri socua maninia miijiaca taucuacajiniji Pueyasorani? Maja. Janiyacuajaari shusha nia pohuatariquiaani, puetunu mijiria quiniae pueyajanaari sesa miijiaca; Judiocuaca, taucuacanio. ¹⁰ Tariucuacaanu Pueyaso Rupaajiniacuajaari naa naajiotasano quiya:

“Majaari quenaaja niquiriyatu maninia miijia quiniu. Shaaqui tojetaarucuajanaa. ¹¹ Majaari quenaaja maninia niishiriojojua pueyano quiniu. Majaari quenaaja Pueyasooocua jiaatiaja pueyano quiniujuhuaj. ¹² Puetunu pueyajanaari Pueyasooocuaj tashuquioorucuua. Puetunu nojorijanaari seserucuua. ¿Cante maninia miijiani? Shaaqui. Shaaqui tojetaarucuajanaa. ¹³ Nojoriiri miananajonu maniniu. Nojori rupaari saa monujua. Nojoriiri na niti taquiriocateja saa sapojonuraja. Cuno pojoriiri juhua soconu noonacu jiitaa na rupaama, rimiaacatujuri nojori quiniuucua. ¹⁴ Nojori jaara pocuare, saaja tamasaca sesacaquiaari, puera juajia nojori quishacari. ¹⁵ Nojoriiri puecoojuaca. Puereeta nanaca shootejaca. ¹⁶ Puetunu mijiria nojori miishanojuanaari casaa sesoqua, narta pueya taraajetejahuaj. ¹⁷ Majaari nojori niishiniu jiyanooni. ¹⁸ Nojoriiri juhuajaniya miiquiaa sesa saaja. Majaari na pueretunu Pueyaso”.

¹⁹ Paacuajaari niishiyani, puetunu Pueyaso Rupaajinia naajiotasano-juanaari Pueyaso saquiriojosano Judiocuacara quiquiaari, nojori niishiniuria, puetunu pueyajanaari sesa miijiaca. Naacuajitij, puetunu mijiria quiniaeajanaari sanaajetanutaniya, nojori niishishacari puetunu nojorijanaari sesa miijiaca; Judiocuaca, taucuacanio. ²⁰ Naacuajitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijiara. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

Paari Pueyaso jiyanooshano cutarani, Jesiucua pa tiuushacari

²¹ Pueyasoori quiari naataja pa niishitiquianu cutara, taate pa naata maninia miijija pa jatanishaanuni. Moisés Rootasanojinija, tariucuacaanu Pueyaso sequenu panishano caminiuijiuniaa naajionuutasano-jinijaari naa sequeyajahuaj. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojiyashijiaca quiri. ²² Quiarijiani, Pueyasoori pa jiyanoquiaa cutara, saaja Neyanu

Jesucristoocua pa tiuushacari. Judiocuaca, taucuacajuhuaj, Pueyasoori puetunujuanaa jiyanoouquiaa Neyanuucua nojori tiuushacari. Majaari rimiajata na jiyanooniu.²³ Puetunu pueyajanaari sesa mijiaca; Judiocuaca, taucuacanio. Naacuajitij, nojoriiri juhua tucucaanu quiya Pueyasojiniji. Sesa mijiaca pueya quiniuucua, nojoriiri soosano pueyara jataquiaari. Naacuajitij, pueyari Pueyaso timitasoo quiquiaari.²⁴ Naajaa, jiyanohua panijia Pueyaso quiniuucua, nojuajaari pa jiyanoouquiaari Jesucristo cusionuucua pocuara. Naacuajitij, Pueyasoori pa jiyatequiaari juhua sesa miyashijiara.²⁵ Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonuucua niyacutesanojinia. Naacuajitij, pueya jaara niishiriquia Jesucristo nojori niti cusoquiaari, saaja naa nojori tiuushacari nocuarej, nojuajaari na Que Pueyaso jiyanoootquiaa pueya. Naajuhuaj, Pueyaso saniitioyauquishacari tariucuacaanu nocua tiuuijaca pueya Jesu cusoyaquishacarijia, majaari najuhuana puera jiuujiaajia na quiniu quiquiaari.²⁶ Pueyasoori niishiriquiaari Neyanu Jesucristoori nojori-icuara mosocoriquiano, sesa nojori mijirosano tuujusaanura seetanujuanaa. Naaratej, nojuajaari pueyaracaanu sesa nojori mijirosano rejeretaquiaari saaja. Jesucristo cusionuucua quiari naataja pocuara, paari niishiyani, Pueyasoori seetanujuanaa maninia mijiia. Nojuajaari maja najuhuana na jiyanooniu pajaniya. ¡Neyanu motequiaari pocuaraari!

²⁷ ¿Teyano niajaniyajinijiniote tojetaarucuajanaa saaja maninia mijiiani? Shaaqui. Naacuajitij, maninia miyashijiaca pa quishacari, puetunu pueyajanaari sanaajasaanutaniya Pueyaso nequesoreesacari pueya. Saniniuujia, paa jaara puetunu Moisés Rootasanojuanaa tojitiacija quiriquia maniniani, paa maara tama pa cuaqueyajaaja shuquiritajaca quiriquia cutarani. Saniniuujia, Pueyasoori pa jiyanoouquiaa saaja pa tiuushacari Jesucristoocua. Naacuajitij, majaari pa jiitianu tama pa miishanojuaaja pa shuquiritiasocoriquiano.²⁸ Naacuajiti paari niishiyani, Pueyasoori pa jiyanoojia puetunu sesa pa miishanojinijijiana saaja Jesucristoocua pa tiuushacari. Majaari na jiyanooniu pajaniya, Moisés Rootasano pa tojishacari.

²⁹ ¿Niaateeri jiyaniya, Pueyasoori saaja Judiocuaca Jiyano? ¡Maja! Pueyasocuajaari puetunu mijiria quiniae pueyapuejanaa Jiyano.³⁰ Pueyasoori maja caapiqui. Nojuajaari saaja niquiriyatu. Naacuajitij, majaari niquiriyatu Pueyaso quiniu Judiocuacara, socua tamonu Pueyaso taucuacara. Naaratej, puetunu pueyapuejanaari jiyanooshaaquiaa saaja Jesucristoocua nojori tiuushacari; tariucuacaanu na saquiriojosano Judiocuaca, taucuacanio.³¹ Pueyaso muerasu pa quishacari saaja Jesuucua pa tiuushacari, ¿paateeri Moisés Rootasano shocoteyani? Maja. Paacuajaari Moisés Rootasanojiniji niishiyani, paari sesa mijiacani. Naacuajitij, Moisés Rootasanoori panishiya, pa niishiniuria paa cuaara Jesucristoocua tiururia, jiyanooshano pa quiniuria.

4

Pueyaso jiyatesacari Abraham juhua sesa miyashijiara

¹ Naaratej cuarta Judiocuacanaa, ¿taa nia sequeya pa supuetana Abrahamjinijini? ² ¿Casaara Pueyaso jiyatequiaari nojuaja juhua sesa

miyashijiarani? Abrahamri maja na jiyanooshaanu quiquiaari maninia na miiniuucua. Pueyaso jaara nojuaja jiyanoquaari maninia na miiniuucua, nojuaja maara tama na cuaqueyajaaja timitiaja quiquiaari.³ Saniniujujia, tariucuacaanu Pueyaso Rupaajinia naa naajiotasano quiyari Abrahamjiniji:

“Abrahamri Pueyasocua tiuquotaari. Naaratej, Pueyasoori na jiyatequiaari juhua sesa miyashijira”.

⁴ Cua tojiri pueyanaa. Pueyano jaara poonijiore tamonura, na poonijotenaari na poonijionujiniji na cumaneeca niquitiojua. Jaara niquitiosaare, cuno cumaneecaari maja nareja niquitiosano. Cunoori see-tanujuanaa na poonijiosanojiniji. ⁵ Saniniujujia, maninia miyashijia jaara Pueyasocua tiuuri, Pueyasoori na jiyatenutaniya juhua sesa miyashijira saaja nocua na tiuuniuucua. ⁶ Pa supuetanaa jiyaniijia Davidcuajaari naa pohuataquiaari taa shuquiriaatia pa quiyani, Pueyaso jaara pa jiyatere juhua sesa miyashijiac pa quiniuria na niquiara, maninia miyashijia pa quishacarijia. Naa naajiotasaquaari-iri David seqesano:

⁷ “Shuquiriaatia quiijaca cutaraari noo pueya, canapue Pueyaso jiyanova sesa na miijiosanojinijicuajani, Pueyaso jaara tuujure sesa nojori miijiosanojuhuaj. ⁸ Shuquiriaatia quiijacaari noo pueyahuaj, puetunu sesa nojori miishanojuanaa Pueyaso saneyaquishootej”.

⁹ Janiyacuajaari tari sequereeni, Pueyasoori Abraham jiyatequiaari juhua sesa miyashijia na quiniuria, saaja nocua na tiuushacari. Pueyaso jaara naa jiyanoquaaricuaa Abrahamtej, ¿Pueyasote saaja Judiocuaca jiyanooni panjia, noo pojori canapuete na cararaatiuuquia co miatesano jiitiaani, taa nojori supuetana Abrahamcuaani? ¿Taa nia sequeyani? ¿Taucuacaarijataj? ¿Nojoriti jiyanooshiyajuhuaj? ¡Taaquiriirinij! ¹⁰ ¿Taa nia sequeyanija? ¿Abrahamte tari na cararaatiuuquia co miatesano quiquiaari Pueyaso jiyanooshacari nojuaja? Maja. Pueyasocua-jaari na jiyanoquaari miatesoojua na quishacari. ¹¹ Na tiuuniu-nuhuaji Pueyasocua, Pueyasoori shusha jiyacari na niishitiquaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasocua na tiuushacari, Pueyasoori na jiyatequiaari juhua sesa miyashijira, miatesoojua na quishacari. Naacuajitij, miatesoo taucuaca tiuushacari Jesucristoocua, taa Abraham tiuquiaaricuaani, Pueyasoori nojori jiyateya juhua sesa miyashijiac nojori quiniuriajuhuaj, mariyata juhua Abraham niquiohua nojori quiniuria. Naacuajitij, puetunu Pueyaso seqesano Abrahamjanaani, cunoori nojorirajuhuaj. ¹² Naajuhuaj, pueya jaara na cararaatiuuquia co miatesano quirí Judiocuaca nojori quiniuria, naajaa. Nojori jaara Jesucristoocua tiuuri taa Abraham tiuquiaaricuaani miatesoo na quishacarijia, Pueyasoori nojori jiyateya juhua Abraham niquiohua nojori quiniuriajuhuaj.

Pueyaso seqesano Abrahamni, cunoori Jesucristoocua tiuuijacara-juhuaj

¹³ Pueyasocua-jaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiuushacari. Majaari naa Abraham

sequesaanu quiquiaari Moisés Rootasano tojijia na quiniuucua. Jiyacaritij, Moisés Rootasanoori maja na quiniu quiquiaari juhuanojuaja. ¹⁴ Pueyaso seqesano Abraham jaara saaja Moisés Rootasano tojijiaca quiriquia, na seqesano maara najuhuana quiri Pueyasooocua tiuujiacaca pueyara. Naajuhuaj, pueya maara najuhuana Pueyasooocua tiuujiacaca quiriquiajuhuaj. Seetanujuanaa Pueyaso seqesano Abrahamni, cunoori puetunu Pueyasooocua tiuujiacarajanaa. ¹⁵ Cunoori maja saaja Moisés Rootasano tojijiaca. Pueyasocuajaari niishiquiaari, pueyari maja na naata Moisés Rootasano tojiniu quiniutianiya puetunujuanaa. Moisés Rootasanojiniji, paari niishiyani, paari saniitiosaanutaniyani pa tojitiaquiniuucua cuno rootasano. Saninuujia, Moisés Rootasano jaara quiyaquiriquia, pueya maara seqeyaquaishaare: "Niaari sesa mijjiaca".

¹⁶ Pueyasoori tariucuacaanu na seqesano Abraham nareja niquitionu paniquiaari, puetunu necohuarajanaanio. Naaratej, seetanujuanaa pa masenura na seqesano Abraham, Pueyasoori seqequiaari, nojuajaari nareja na niquitionutaniya nocua tiuuijaca. Naacuajitij, Pueyaso seqesanoori maja saaja Moisés Rootasano tojijiaca. Cuno seqesanoori puetunu pueyapuerajanaa, canapuete Pueyasooocua tiuuijaca quiyani, taa Abraham quiquiaari Pueyasooocua tiuuijacuaani. Naa Pueyasooocua tiuuijaca pa quishacari taa Abraham tiuuiquiaari Pueyasooacuaani, paari Abraham niquiohuani. Naaratej, Pueyasora, Abrahamri pa que. ¹⁷ Pueyasocuajaari naa seqequiaari Abrahamtej nojuajaari queraatia niquiohuaraca quiriquiano. Naacuajitij, Pueyaso seqesanoori naa naajiotasano quiya:

"Abrahamnaa, janiyari quiarijia quia jiyateree queraatia tamaatia rupaaca pocuajaca que quia quiniuriani".

Abrahamri Pueyaso seqesanoocua tiuuiquiaari. Nojuajaari niishiquiaari Pueyasoori macunucua samiitianijia. Niishiquiaarijiaariuhuaj, Pueyasoori cumaacaraca na panishano na shipininiuria shaaquijiniji.

¹⁸ Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso seqesanoocua tiuuiquiaari. Naacuajitij, nojuajaari see-tanujuanaa queraatia tamaatia rupaaca pocuajaca pueyapue que, taa Pueyaso seqequiaari nojuacuajani. Pueyasoori naa na seqequiaari: "Quia niquiohuari tojetaarucuajanaa queraatia quiriquiano".

¹⁹ Naa Pueyaso seqesacari nojuajatej, nojuajaari tari cien marijia shocotejoquaaria. Naa saaquiano na quishacaritij, necocua Saarajuhuaj, naajaa, majaari na tarinitianu quiquiaari Pueyaso seqesanoocua tiuuniu. ²⁰ Saaja Pueyaso seqesanoocua na tiuushacari, nojuajaari noojia na niquijotenu quiquiaari. Majaari Pueyaso seqesanojiniji na taacanuunu quiquiaarijuhuaj. Saaja Pueyasooocua na tiuushacari, nojuajaari noojia cumaquiquiaari socua. Naacuajitij, nojuajaari naa maniniuhuaqueetaquiaari Pueyaso: "Paacarasho cua Pueyasonaa. Niishyanijia quiaari canaa muetutenutaniya taa quia sequecanu janiyacuajani. ²¹ Quiaacuajaari cumaacaraca quia miniuria puetunu quia seqesanojuanaa". ²² Naa Abraham tiuuniuucua Pueyasoouatej, Pueyasoori na jiyatequiaari juhua sesa miyashijia pueyanora.

²³ Jaara naa naajiotasaaquiaari Abrahamjiniji: "Pueyasoori na jiyatequiaari juhua sesa miyashijiara", cunoori maja saaja Abrahamra

sequesano.²⁴ Cunoori pajaniyara sequesanojuhuaj. Cunora, Pueyasoori pa jiyateya juhua sesa miyashijiarahuaj, nocua pa tiuushacari, pa niishishacarijiuhuaj nojuacuajaari pa Jiyanijia Jesucristo samiitianiquaariuhua macujiniji.²⁵ Pueyasocuajaari mijiria na jiyaroquiaari sesa pa miishanoocuara mosocoriquiano. Nojuajaari na samiitianiquaariuhua, Jesu jaatianura nocua pajaniya, juhua tariucua sesa miyashijaca.

5

Jesuucua tiuuniaa pueyari jiyanooshano

¹ Naacuajitij, paa jaara tari jiyanooshano quiyani Jesucristoocua pa tiuushacari, paari juhuajaniya quiya Pueyaso niquiarani. Jesucristoori na Que pa jiyanoootiquaari, pocuara na cusosacari. ² Jesucristoocua tiuuijaca pa quishacari, Pueyasoori pa timitiaquiaa. Pa cumaquiquiaa-jaariuhuaj maninia necohua pa quiniuria. Paari shuquiriyajaacuhuaj, pa niishishacari paari jatanishaanutaniyani, shacantuua quiijaca pa quiniuria juhua nojuajuhuaj. ³ Majaari saa cunojua. Paari shuquiriquiaajuhuaj, paa jaara taraatia miishaareni. Paacuajaari niishiyani, paa jaara naquiya miishaareni, paari socua juhuajaniya rejeretajaca quiniutianiyan. ⁴ Naa rejeretajaca pa quishacaritij, paari cumueeca Pueyaso muerasu quiniutianiyan. Naa cumueeca Pueyaso muerasu pa quishacaritij, paari juhuajaniya sashijiaca quiniutianiyan, pa niishishacari Pueyasoori seetanujuanaa maninia miiniutianiyan pa janiya, taa na sequequiaaricuajani. ⁵ Naa pa niishishacaritij, majaari sapojosano pa quiniu quiniutianiyan. Pueyasocuajaari tari jiyaroquiaari na Sohuanu, poojajinie quiriquiano, seetanujuanaa Pueyaso paniniu pa jiitianura poojajinie.

⁶ Pueyaso tojiyashijiaca pa quishacarijia, majaari pa naata quiquaari Pueyaso jiyanoootiniu tama pa cuaqueyajaaja. Jesucristoori jiyacari namitia pocuara cusoquiaari na Que na jiyanoootiniuria pajaniya.⁷ Sesa miyashijia pueyano jaara monu panishiya juucua, ¿tamona maninia pueyanoteeri quiya na sequenura: “Janiya cuaara mosaaria juhuari cuno pueyano niti”? Majaruha. Monu panishano pueyano jaara seetanujuanaa maninia pueyano quiri, na rupuena pueyano jaara jiyanoohua na panijia quiri, nojuaja maara sequere: “Janiya cuaara na niti mosaaria juhuari”. ⁸ Saniniujia, sesa miijiaca pa quishacarijia, Jesucristoori pa niti cusoquiaari cutara. Naacuajitij, paari niishiyani, Pueyasoori jiyanoohua pa panijia. ⁹ Quiarijia, paari sesa miyashijiaca quiya Pueyaso niquiarani, Jesucristo cusionuuucua pocuara. Naacuajitij, paa cutaraari niishiyani, Pueyaso saniitiosacari na tojiyashijiaca pueya, Cristoori pocuaji tacunutaniya cutara, tariucua na jatanishano pueya pa quiniuucua. ¹⁰ Na paraa pa quishacarijia, Pueyasocuajaari pa jiyanoquiaari, Neyanu cusionuuucua pocuara. Quiarijia, nata jeecatoono pa quishacari, Neyanuuri saminio quiya pueyaracaanu pocuaji na tacunura. ¹¹ Majaari saaja cunora shuquiriaatia pa quiniu. Paari shuquiriyajuhuaj, pa Jiyanijia Jesucristo rupuetootenuucua pajaniya na Que Pueyasota.

Pa supuetana Adánri maja juhua pa Jiyano Cristo

¹² ¿Casaara pa cusionuuquiaani? Juhuacatecara pa supuetana Adán miiniuucua sesa, naaratej puetunu pueyajanaari sesa

mijiacajuhuaj. Pueyasocuaajaari tari sequequiaari: "Cante sesa mijiani, cuaara shaajeera". Seetanujuanaa naari. Puetunu pajaniyajanaari shaajeriquianon, sesa mijiacapa quiniuucua.¹³ Moisés Rootasano quiyaquishacarijia, pueyari tari sesa miiniu niishijiaca quiquiaari. Jiyacaritij, pueya miishacari sesa, majaari nojoriicuara saquiriojotasaanu quijia sesa nojori miishacari.¹⁴ Cuno pojori, Moisés niyacari quiquiaarini, nojoriiri maja na tojiyaquinu quiquiaari Pueyaso sequenceso taa Adán tojiyaquiquiaari Pueyaso sequencesanocuaani. Naajaa, puetunu nojorijianaari cusionuuquiaarijuhuaj sesa mijiacapajaniyarani, sesa mijija Adáncuajinio nojori supuenuucua. Quiarijia saniniuujia, nia pohuatareera Adán miishanojiniji, Jesucristo miishanojinjinio.

¹⁵ Adán miishanoori jiyanoqua tamaatia Jesu miishanojiniji. Coteenu shipinishano pueyano miiniuucua sesa, puetunu pueyajanaari shaajenu niishiya. Saniniuujia, Jesucristo miiniuucua maninia, Pueyasoori queraatia pueya jiyatequiaa pueyaracaanu rishijiaca nojori quiniuria cutara. ¹⁶ Pueyaso miishano maninia pajaniyarani, cunoori sesa Adán miishano shocotaa jiyanoqua cutara. Naa niquiriyatu sesa casaa Adán miiniuucuatej, puetunu pueyajanaari saniitiosocoriquiano. Saniniuujia, maninia Jesucristo miiniuucua pajaniyarani, Pueyasoori pa jiyanoqua puetunu sesa pa miishanojinijijanaa. ¹⁷ Niquiriyatu pueyano miiniuucua sesa, puetunu pueyajanaari cusionuujuacara quiquiaari. Saniniuujia, niquiriyatu pueyano miiniuucua maninia pajaniyara, cunora, Pueyasoori pa jiyateya juhua sesa miyashijiaca pa quiniuria. Cunoori, Jesucristoocua pa tiuushacari. Majaari saaja cuno, naajuhuaj, paari shuquiriaatia quijia jiyaniijianucua quiniutianiya maniniushiquini, Jesucristo rupuesano pa quishacari.

¹⁸ Naa Adán miiniuucua sesatej, nojuajaari puetunu nocuajinio supueno pueyajanaa jiyatequiaari sesa mijiacara, saniitiosano nojori quiniuria. Naajuhuaj, Jesucristo miiniuucua maninia, puetunu pueyajanaari na naata jiyanooshaanu, nojori saniitioyaquishaanuu-cuaji, pueyaracaanu quijiaca nojori quiniuria. ¹⁹ Adán tojiyaquiniuucua Pueyaso sequenceso, puetunu pueyajanaari sesa mijiacara jiyatesaaquiaarijuhuaj. Saniniuujia, Jesucristo tojiniuucua Pueyaso sequenceso, puetunu nocua tiuujiacajanaari juhua sesa miyashijianucuara jiyatesaaquiohua.

²⁰ Moisés Rootasano jaara niishishaquaaria, pueyari socua sesa mijiacara jiyacatequiaari. Naa socua sesa mijiacara pa quishacaritij, naajuhuaj, Pueyasoori socua jiyacatequiaari pocua taraajenujuhuaj. ²¹ Sesa miiniu tarinitianu niishiyashijiaca pa quiniuucua, puetunu pueyajanaari cusionuuriqquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo motequiaari pa niti, pa jiyanooshaanura. Naacuajitij, nojuajaari juhua pa samiitianijoquaariuhua, pueyaracaanu rishijiaca pa quiniuria pa Jiyaniijia Jesucristota.

6

Pablo niishitiosano moojinia tiuquinijionujiniji

¹ Pueyaso jaara naa pa jiyanoqua pocua na taraajesacari, ¿taa nia sequeyani pueyanaa? ¿Paate socua pueyaracaanu sesa mijija quiniutianiyan, pueyaracaanu Pueyaso jiyanooniuria pajaniya, pueya

niishiniuria, Pueyasocuajaqui jiyanohua maninia na jiyanooniuria pajaniya? ² ¡Maja pueyanaa! ¡Maja naa nia niishiriojonu! Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, ¿paatucua casaara socua sesa miijia quirini? Pueyasora, paacuajaari tari cusionuuquiaari Jesutani. ³ ¿Niaateeri cuno niishiyaquiyajaa? Naajuhuaj, paa jaara moojinia tiuquinishaare Jesucristoocua pa tiuushacarini, Pueyaso niquiara, paari Jesu rupuequiaari niyacutesanojiniani. Nojuacuajaari pa niti saniitiosaaquiaari. ⁴ Naacuajitij, paa jaara moo cariquimia shishaareni, jiyacaritij, paari juhua Jesuta jamoshiyahuaj. Naa juhua macu pa quishacaritij, paari samiitianijiosanohuani, taa Jesucristo samiitianishaquiaariuhua macujiniji jiyanohua Pueyaso cumaacatacuaani. Naa samiitianijiosanohua pa quishacaritij, maninia mijiaca pa quiri juhua quiarinio pueya.

⁵ Paa jaara Jesucristo rupuetesaaquiaari sesa pa miishanoocuara na cусосасарини, naajuhuaj, paa cutaraari tari samiitianijiosanohua juhua nojuajani, maninia quiyiaca pa quiniuria. ⁶ Tarijia, majaari pa naata tarinitianu quiyia sesa pa miiniu, sesa jiuujiaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa tiuushacari, maja socua cumaaca na jitianura, sesa na miitiniuria pajaniya. ⁷ Naacuajitij, sesoriquia poojia seque jaara tari jatanishano quiya, majaari tari sesa mijiaca pa quiniu. ⁸ Paa jaara tari naa cojiritiasaaquiaari monu Jesuta nocua pa tiuushacarini, paari quiarijia niishiya cutarani, paari pueyaracaanu nata quiriquiano saminioni. ⁹ Cristocuajaari samiitiaquiaariuhua. Paari niishiyahuaj, majaari socua na pacutenu quiniutianiuhsa cusionu. Nojuacuajaari tari cu-soquiaari puetunu sesa pa miishanoocuarajanaa. Naaratej, noju-jaari maja na naata socua cusojuasaanuhua. ¹⁰ Majaari socua Je-sucristo pacutenu quiniutianiuhsa cusionu, sesa pa miishanoocuara. Nojuacuajaari tari cusoquiaari, Pueyaso jiyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, no-juajaari seetanujuanaa pueyaracaanu rishiriquiano Pueyasora cutara. ¹¹ Naajuhuaj pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Nia niishirijihuaj, niaacuajaari Jesucristota samiitiaconohua, Pueyaso tojijiaca nia quiniuria.

¹² Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujuanaa nia niyajetare tama nia cuaqueya panishanojuaja nia miyaquiniuria. ¹³ Majaari nia cuaqueya nia panitianu sesa nia miiniuria, taa na paniya nia miiniuria juucuacuajani. Saniniuujia, nia cuaqueya nia jiyatere cu-tara saaja Pueyaso panishano mijiia na quiniuria. Niaacuajaari tari samiitiacoquiaariuhua juhua macunucua nia quiniujiniji. Naacuajitij, nia cuaqueya nia jiyatere saa maninia mijiia na quiniuriaja. ¹⁴ Niaa jaara nioojiajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari niajaniya. Nia niishiri, niaari quiarijia Pueyaso tojitiacija cutara, maja tari Moisés Rootasano tojijiaca.

Pueyaso tojiyashijiaca pueyani, nojoriiri Sesaaca pueya

¹⁵ Cua sequesacari niajaniya, pajaniya maja tari Moisés Rootasano tojijiacani, ¿niaateeri cunora sesa miiniutianiya, Pueyaso quishacari pa

jiyanoojia? ¡Maja naa nia miiniu pueyanaa! ¹⁶ Niaacuajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacuajitij, paari pueyaracaanu na tojija quiniutianiyani. Naajuhuaj, niaa jaara sesa miijiaca quiriohua, niaari Sesaaca tojijiaca. Naa sesa miijiaca nia quishacaritij, niaari cusionutaniya. Saniniuujia, niaa jaara Pueyaso tojijiacara quiri, niaari sesa miyashijiaca quiniutianiya. ¹⁷ Tarijia, niaari Sesaaca tojijiaca quijia, juhua na seja, sesa miijiaca nia quishacari. Quiarijia, janiyari Pueyaso timitiaani nia tojiniucua Jesucristo rootasano puetunu nioojiatajanaa, taa nia niishitiosaaquiaaricuajani. ¹⁸ Jesucristo rupaa nia tojishacari, Pueyasoori nia jiyatequiaari na muerasu nia quiniuria, maja Sesaaca seja nia quiniuria socua. Naacuajitij, niaari Pueyaso tojijiacara jatanishano, saaja maninia miijiaca nia quiniuria. ¹⁹ Janiyari naa pohuataa serujiniji niajanianyi, maatia nia tojiniuria cua niishitiosano. Majaari juhuanojuaja nia naata puera jiyajeneta niishitiosano niishiniu, cumueeca Pueyaso muerasu nia quiyaquishacarijia. Tarijia, niaari tama nia cuaqueyajaaja jiyatequiaari Sesaaca panishano nia miiniuria. Naacuajitij, niaari jiyanolhua sesa miijiacara jiyacatequiaari. Naajuhuaj, quiarijia saniniuujia, tama nia cuaqueyajaaja nia jiyatere Pueyaso panishano nia miiniuria. Niaa jaara naa miiri, niaari tojetaarucuajanaa maninia miijiaca quiniutianiya Pueyasora.

²⁰ Niaa jaara sesa miijiaca quiquiaarijia Sesaaca tojijiaca nia quishacarijia, niaari juhuajaniya Pueyaso tojiyashijiaca quiquiaari. ²¹ ¿Sesaacate maninia nia miiquiaari sesa nia miiniucua nera? ¡Maja! Niaa cutaraari saaja caririquiquiaa sacuaraatia casaa nia miiniucua tarijia. Niaari quiarijia niishiyajuhuaj, cante sesa miijiaca quiquiaani, nojoriiri shaajasaariquiano. ²² Naa sesa miyashijiaca nia quishacari quiarijia saniniuujia, niaari Pueyaso tojijiacara jiyatesaaquiaari, saaja na panishano nia miniuria cutara. Naa Pueyaso tojijiaca nia quishacaritij, nojuaajaari nia jiyatenutaniya seetanujuanaa maninia miijiaca nia quiniuria. Naacuajitij, niaari pueyaracaanu shuquiriaatia rishijiaca quiniutianiyajuhuaj. ²³ Saniniuujia, sesoriquia pueya miiniucua sesa saaja, nojoriiri naa na miiniucua shaajasaanutaniya. Saniniuujia, saaja Jesucristoocua tiuuijaca pa quishacari, Pueyasoori saa cunoraja pa jiyatequiaa pueyaracaanu rishijiaca pa quiniuria, pa Jiyaniijia Jesucristo rupuejaca pa quishacari.

7

Paari juhua camishanonii

¹ Pueyanaa, niaacuajaari Moisés Rootasano niishijiaca. Niaari niishiyajuhuaj, paa jaara shaajequeeni, paari jiyacari Moisés Rootasano cartequee shushani. ² Naajuhuaj, paacuajaari rootasaaquiaarinii, maaji jaara camishano quiri, cuaara tamonu cayata quiyaquieria, neyaca jaara saminio quiyajaa. Neyaca jaara cusoyare, caminio pueyara Moisés rootasanoori maja tari na quiniu cuno mashiquio tojishocoriquiano. ³ Saniniuujia, maaji jaara tamonu pueyanota quiriquia neyaca quishacarijia saminio, cuno maajiiiri sequeshiya paanatuta, naa na quiniucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés

Rootasano tojiyashijia na quiniu cunora. Nojuajaari maja paanatu, naa na miishacari.

⁴ Niaari naajuhuaj pueyanaa. Jesucristo cusionuucua pa niti, niaari juhua cusionuuquiaarijuhuaj, maja Moisés Rootasano tojijiaca nia quiniuria socua. Naacuajitij, niaari tamonu tojijiaca quiya cutara. Nojuajaari pa Jiyaniijia Jesucristo, nooj, macujiniji samiitiaquiaariuhuatej. Naacuajitij, quiarijia pa Jiyaniijia Jesucristo tojijiaca pa quishacari, paari maninia miijiaca Pueyasorani. ⁵ Tarijia, Pueyaso tojiyashijiaca pa quishacarijia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniujiuquiaari sesa pa miiniuria. Naacuajitij, tama sesa pa miishacarijiaaja, paari tama pa cuaqueyajaaja jiyateriquiaa saniitiosano pa quiniuria maquesaashijia mani quiqiojiniani. ⁶ Tarijia, paari juhua quoosano pueya Moisés Rootasano tojitishaquaarini. Saniniuujia, Jesucristota pa cusionuucua, nojuaja jaara pocuara cusoquiaari, paari tari Moisés Rootasano tojiniu cartequiaarini. Moisés Rootasano pa tojiyaquishacari quiarijia, naacuajiti pa naata Pueyasujuanaa tojiniu shitimia cutara, na Sohuanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojitijacca quiquiaari maniniani, pa puerenuta paa mariqui saniitiosaareeri pa tojiyaquiniuucua niquiriyatu queraatia na rootasanojiniji.

Poojiaari saa sesa miiniu niishijiaja

⁷ Tamasaca naasucuaari jiyaniya janiyari Moisés Rootasano soojeani. Maja. Quiria, jiyanolhua maniniacuajaari Moisés Rootasano. Moisés Rootasanojiniji, paacuajaari niishiyani paari sesa miijiacani. Moisés Rootasano jaara quiyaquiriquia, janiya maara niishiyaquiaarini, cua jiaatiasacari tamasaca jiitiasano casamiicua, cunoori sesa Pueyasora. ⁸ Saniniuujia, Moisés Rootasanojiniji cua niishishacari maja tamasaca casamiicua cua jiaatianura, janiyari saaja juhua shiniujiushaaquiaarini casamiicua jiaatiaja cua quiniuria socuani. Naacuajitij, Moisés Rootasano cua niishiyaquishacarijia, coojiaari juhuajaniya quiquiaari juhua maqueja. Saniniuujia, janiya jaara Moisés Rootasano niishiquiaarini, coojia sequeeri juhua niucuaquiaari, puetunu sesa casaajanaa na miiniu paniniuria. ⁹ Moisés Rootasano cua niishiyaquishacarijia, janiyari juhuajaniya quiija quiquiaarini. Saniniuujia, Moisés Rootasano cua niishishacari, janiyari jiyanolhua taraajequiaarini, cua niishishacari janiyari jiyanolhua sesa mijiia Pueyaso niquiarani. ¹⁰ Naa sesa mijiia cua quishacaritij, janiyari niishiopiaarini, janiyari quera jatashiya saniitiosocoriquianoni. Janiya jaara Moisés Rootasano tojiquiaari shushajanaani, janiyari jiyaniquiaarini, janiya jaara cuno rootasano tojirini, janiya naasucuaari pueyaracaanu rishijia quiniutianiyani. Saniniuujia, Moisés Rootasanoori saaja cucuara tonujuquiaari puetunu sesa cua miishanojinijianaa. ¹¹ Naacuajitij, janiyari jiyanolhua jiyajenequiaarini, cua jiyanihacari cua naatacuaja Moisés Rootasano tojiniu maninia, Pueyaso jiyanooniuria janiya. Jaara maja cua naata quiquiaari Moisés Rootasano cua tojiniuria maninia, janiyari niishiopiaarini Pueyasoori cua jiyanoaquiutianiyaa.

¹² Seetanujuanaa nia sequeyanijia pueyanaa, Moisés Rootasanoori jiyanolhua maninia. Tojetaarucuajanaa maninia rootasano. Cunoori

seetanujuanaa rupaa maniniu Pueyasojiniji. ¹³ Moisés Rootasano jaara naa maninia quiri, *¿janiyateeri nia sequeyani cuno na rootasanoori pa cusojuaja?* Maja. Janiyari nia sequeyani, Moisés Rootasanojiniji, paari niishiyani sesa pa miishano cutaraari jiyanoohua sesa Pueyasora. Naacuajitij, paari Moisés Rootasanojiniji niishijiani, paari puetunujuanaa jatasocoriquiano quijia juucuani, seetanujuanaa sesa miijacapa pa quiniuucua.

¹⁴ Paacuajaari niishiyani, Moisés Rootasanoni, cunoori maja nareja pueyano niishitiojosano. Pueyaso niishitiojosanocuaajaari pa tojishocoriquiano puetunu poojiatajanaa. Saniniuujia, coojaari Pueyaso tojiyashija. Janiyari tamajaaja juhua coojia seruni, na panishano cua miiniuria. Naa sesa jiuujiaraca cua quishacaritij, majaari cua naata Moisés Rootasano tojiniu. ¹⁵ *¿Casaara naa sesa cua miiquiaani?* Janiyari saaja cua niishishano sesa casaa miiquiaani. Majaari maninia cua miiniu quiquiaa, taa cua paniyacuajani. ¹⁶ Janiya jaara cua panishoo sesa casaa miirini, naacuajitij, janiyari sequequiaani, Moisés Rootasanoori seetanujuanaa maninia. ¹⁷ Naa cua panishoo sesa casaa cua miishacaritij, cunoori maja tama cua miishanojuaja. Cuno sesa cua miishanoori coojajiniji supueno tamajaaja. ¹⁸ Quiarijia niishiya cutaranijia, coojaari tojetaarucuajanaa sesa miiniu niishijia. Naacuajitij, janiyari juucua maninia miiniuucua jiaatiaquiaani. Naajaa, majaari cua naata quiquiaa maninia cua miiniuria tamajaaja. ¹⁹ Naacuajitij, cua miishanoori maja maninia, taa cua miiniu paniquiaa juucuacuajani. Cua miishanoori saaja cua miiniu paniyaquishoo quiquiaa. ²⁰ Naacuajitij, janiya jaara cua panishoo sesa casaa miirini, janiyari niishiyani, cunoori tama coojajiniji supuenojuaja, majaari tama cua miiniu panishanojuaja.

²¹ Quiarijia niishiya cutaranijia, janiyari naa sesa miijiani: janiya jaara maninia casaa miiniu paniyani, janiyari saaja sesa miiquiaani. ²² Janiya cutaraari niishiyani Pueyaso rootasano Moisésri seetanujuanaa maninia cua tojishocoriquiano. Na tojiniuucua jiaatiaquiaa juucuanijia. ²³ Janiyari niishiyayaaniuhuaj, coojaari juhua cua niishitija paraca quiya. Naacuajitij, cua niishiriojosacari, "Maninia miiniutianiyajia", coojaari saaja sesa cua miitiquiaa. Naacuajitij, tama janiyayaarijia juhua coojia seruni, cua miishacari puetunu sesa na panishanojuanaa.

²⁴ *¿Taa cua miiniutianiya socuaarini? ¡Tojetaarucuajanaa taraatia qui-jianijia!* Pueyaracaanu sesa miijianijia. Majaari cua naata tamajaaja maninia miijia cua quiniu. Naa sesa miijia cua quishacaritij, cua cuaque-yari macu quiriquiano. *¿Cante na naata cua jataniniuni, naa sesa miijia cua quishacaritij?* ²⁵ *¡Pueyaso shuquiritiaanijia cua niishishacari, no-juacuajaari cua Jiyaniijia Jesucristota cua jataniniutianija tojetaarucuajanaa maninia miijia cua quiniuria!* Naacuajitij, mijiria cua quishacar-ijia, janiyari Pueyaso tojijia quiniu paniyani. Saniniuujia, naa coojia quiniuucua sesatej, saaja sesa cua miitiniu paniquiaari.

8

Pueyaso Sohuanu pa tojishacari, paari maninia miijia quiniutianiyani

¹ Pa rupuesacari Jesucristo, nocua pa tiuushacari, Pueyasoori pa jiyanoocquiaa. Naacuajitij, paari tojetaarucuajanaa jiyanooshano quiyani. ² Puetunu pueyajanaari cusonuuriquiano quijia, sesa miijacaca

nojori quishacari. Saniniujuja, Jesucristo pa rupuesacari, Pueyaso Sohuanuuri pa jiyatequiaa saaja maninia miijiaca pa quiniuria. Naacuajitij, majaari tari sesa miijiaca pa quiniu pa saniitiosaanura. ³ Moisés Rootasano pa tojishacari juucua, majaari pa naata quiniu jiyanooshano. Cunoori saaja sesa miijiaca pa quiniuucua. Naaratej, Pueyasoori Neyanujuanaa jiyaroquaari mijiria, pueyano na quiniuria juhua pajaniya, pa niti na mosaanura. Naacuajitij, Jesucristo jiitiasacari juhua pa cuaqueyajuhuaj, Pueyasoori juhua sesa miijiara na jiyatequiaari, pa niti na saniitiosocoriquiano. ⁴ Naacuajitij, Pueyaso Sohuanu pa jiitiasacari quiarijia, pa naata maninia miijiaca quiniu, taa Moisés Rootasano sequeyacuajani. Pueyaso Sohuanu tojijiaca pa quishacari, majaari tari pa quiniu sesa miijiaca, taa pa quiquiaari tarijiacuajani.

⁵ Canapuete tama na panishanojuuaaja miiquiaani, nojoriiri tama na cuaqueyajaaja shuquiritiniuria jiaatiaquiaa. Saniniujuja, canapuete Pueyaso Sohuanu tojijiaca cutaraní, nojoriiri saaja Pueyaso shuquiritiniuria jiaatiaquiaa. ⁶ Tama na cuaqueyajaaja shuquiritiniuria jiaati-ajacaari saaja shaajecoriquiano cutara. Saniniujuja, Pueyaso shuquiritiniuria jiaatiacijaari pueyaracaanu rishiriquiano cutara. Nojoriiri juhuajaniya shuquiriaatia quijiacajuah. ⁷ Cante tama na cuaqueyajaaja shuquiritiniuria jiaatiaciaani, nojuajaari Pueyaso paraca. Majaari Pueyaso tojijia na quiniu paniniu. Seetanujuanaa majaari na naata Pueyaso tojijia na quiniujuhuaj. ⁸ Naacuajitij, canapuete saaja tama na cuaqueyajaaja shuquiritiniuria jiaatiaquiaani, cuno pojoriiri maja na naata Pueyaso shuquiritiniu.

⁹ Niajaniya cutaraari maja nia quiniu juhua cuno pojorijia, tama na cuaqueyajaaja shuquiritiniuria jiaatiajacani. Niaa cutaraari Pueyaso shuquiritijiaca, Pueyaso Sohuanu cumaquishacari niajaniya, nojuaja jaara seetanujuanaa nioojajinina quiya. Cante Pueyaso Sohuanu jitiaaquiyani, nojuajaari maja Pueyaso pueyano. ¹⁰ Cristo quishacari poojajinina, pa sohuanuuri tari jatanishano quiya maninia miijiaca pa quiniuria, pueyaracaanu rishijiaca pa quiniurajuhuaj. Pa cuaqueya cutaraari shaajasocoriquiano, sesa miijiaca pa quiniuucua. ¹¹ Naajaa, Pueyaso Sohuanu jaara poojajinina quiya, nojuajaari pa cuaqueya samitianijionutaniuhua, taa na samitianiquiaariuhua macujiniji Jesu- cuaani.

¹² Naa Pueyaso miishacari maninia pajaniyatej, maninia miijiaca pa quiri Pueyaso Sohuanu cumaquishacari pajaniya. Maja cumaati tama pa cuaqueyajaaja pa shuquiritiniuria pa jiaatianu tari, taa pa mi- iquiaari tarijiacuajani. ¹³ Cante naa miijiaca quiyajaani, nojoriiri sha- jasaariquiano. Saniniujuja, niaa jaara Pueyaso Sohuanu cumaacata rejeretariquia saaja tama sesa nia cuaqueya miiniu panishanojuuaaja, niaa cutaraari pueyaracaanu shuquiriaatia quijiaci quiniutianiya.

¹⁴ Canapuete Pueyaso Sohuanu tojitiajacani, nojoriiri Pueyaso niquio- hua cutara. ¹⁵ Pueyaso Sohuanucuajaari pa jiyatequiaari Pueyaso muerasuniyojua pa quiniuria. Naacuajitij, cuno pa jiitiasano So- huanuuri Pueyaso pa sequetequiaa, "cua Quenaa". Naa Pueyaso muerasuniyojua pa quishacaritij, majaari tari pa puerenu paari sani- itiosaanutaniyani, Moisés Rootasano pa tojiyaquinuucua. ¹⁶ Pueyaso Sohuanuuri pa sohuanu rupuequiaa, na niishitiniuria pajaniya, paari

Pueyaso muerasuni. ¹⁷ Naa Pueyaso muerasu pa quishacaritij, puetunu Pueyaso jiitiasanojuanaari pa jiitiasano quiniutianiyanjuhuaj. Pueyasoori Neyanu Jesucristota pa cojiritianutaniya naa maninia na miniuria pajaniya, paa jaara naquiya miiniu rejeretajaca quirini, Jesucristoocua tiuujiaca pa quiniuucua. Paa jaara naquiya miishaare nocuara mijiriani, paari jiyanolhua maninia quijiacara jiyatesaanutaniyani juhua nojuajuahuaj.

Pueyasoori maninia miiniutianiya na muerasu

¹⁸ Quiarijia mijiria naquiya pa miiniuni, cunoori saaja rupaquijia. Janiyara, naajaa, cua niishishacari naa naquiya pa miiniu nuhuajitij, paari jiyanolhua maninia miishaanutaniyani, pueyaracaanu shuquiri-attia pa quiniuria. ¹⁹ Quiarijiani, puetunu Pueyaso shipinishano casaa-janaari pa niquiniuucua jiaatiaa paa jaara quiariniora jatanishaareni. Na niishiniu paniyari taamueca quijiacara Pueyaso jataniniutianiya pajaniya na cumaacatani, tojetaarucuajanaa maninia jeenucuasano na muerasu pa quiniuria. ²⁰ Coteenujuanaa pa supuetana pueyano jaara juhuacatecara sesequiaari, jiyacaritij, puetunu Pueyaso shipinijiosano casaajanaari sesequiaarijuhuaj. Majaari na sesenu quiquiaari tama na panishacarijiaaja. Pueyasocujaari naa paniquiaari sesa na quiniuria, na shipinishano pueya sesenuucuajuhuaj. Naajaa, majaari pueyara-caanu sesa na quiniu quiniutaniya. ²¹ Pueyaso muerasu jaara jatanishaare shacantuca quiijiaca pa quiniuria, jiyacaritij, puetunu Pueyaso shipinijiosano casaajanaari pata cojiritiasaanutaniya jeechanujuhuaj. Naacuajitij, puetunu Pueyaso shipinijiosano casaajanaari maniniara quiniutianiuhua, maja na sesenura socua. ²² Quiarijiani, puetunu Pueyaso shipinijiosanojuanaari jiyanolhua noojia niojya taraatia na quishacari. Quiatojiyari juhua maaji noyano, cuaara quiariniora jatanishaarejaatijia. ²³ Majaari saaja puetunu Pueyaso shipinishano casaa-janaa quiatojonu, poojiaari juhua quiatojiyajuhuaj, na panishacari to-jetaarucuajanaa jatanishano quiijiaca pa quiniuria. Paacuajaari tari jiitiae Pueyaso Sohuanu poojiajiniani, pa niishiniuria, paari seetanjuanaa Pueyaso muerasuni. Saaja pa cuaqueya cutaraari juhuanojua jatanishoojua. Paari cunora quiatojijayaani. ²⁴ Paacuajaari tari Pueyaso muerasu quiyani. Jesucristo cutaraari pa saquirijoquiaari shacantuca quijiacara pa jatanishaanura. Paari naa na jataniniuria pajaniya sashiyajaani. Pa cuaqueya jaara tari jatanishano quiriquia, paa maara na jataniniuucua jiaatiaaquirini. Paa jaara tari jiitiariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhuanojua jatanishoojua. ²⁵ Naajaa, paacuajaari niishiyani pa cuaqueyari jatanishaanutaniya, jiyocuacaanu pa rupuenura pa Jiyani-ijia. Cunora, paari mijiria taraatia pa quishacari juhuajaniya rejere-taquiaani pueyaracaanu pa sashishacari.

²⁶ Naa rejeretajaca pa quishacari mijiria pa sashishacari pueyaracaanutej, Pueyaso Sohuanuuri pa cumaquiquiaa, cumueeca pa quiyaquishacari. Naacuajitij, Pueyaso pa secojosacari, pa niishiyaquishacari casaacuara pa secojonutaniyani, Pueyaso Sohuanucuaajaari poojiajiniji Pueyaso secojoquiaa pocuara. Jiyanolhua na secojosacari pocuara, jiyasohua quiatojija poojiajiniaari. ²⁷ Poojia niishijia Pueyasoni, nojuajaari niishiyacuaja casaa na Sohuanu secojija

nojuaja pocuarani. Na Sohuanucuajaari maninia secojojua cutara, taa Pueyaso miiniu paniya na muerasuracuajani.

Jesucristo pa shocotanija cutara

²⁸ Paacuajaari niishiyani, paa jaara maninia miishaareni, paa jaara sesa miishaarejuhuaj, Pueyasoori puetunu cuno miishanojuanaa jiyatequiaa saaja maninia na quiniuria na panijiacara. Nojuacuajaari pa saquiriojoquiaari na muerasuniyojua pa quiniuria. ²⁹ Naajuhuaj, jiya shipiniyaquishacarijia, Pueyasoori tari niishiquiaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quiriquianojuhuaj. Naa sequequiaariiri Jesucristo quiniuria pa puerana, queraatia tapueyocuacaraca na quiniuria. ³⁰ Naacuajitij, canapue Pueyaso saquiriojoquiaari na muerasu nojori quiniuriacuajani, juhua Jesucristo nojori quiniuriajuhuaj, Pueyasoori cuno pojori niishitiquiaa nojori tiuuniuria Neyanuucua. Jesucristoocua nojori tiuushacari, Pueyasoori nojori jiyatequia juhua sesa miyashiji-acara. Jiyanooshano nojori quishacari, Pueyasoori nojori niquitioquiaa na Sohuanu, na Sohuanu jataniniuria nojori shacantuua quiijaca nojori quiniuria juhua Neyanu.

³¹ Naa Pueyaso miishacari maninia pajaniyaratej, ¿taa pa sequeyani? Pueyaso jaara pa jiyano quiya, ¿tamonute na naata sesonu pajaniya? ¡Maja! ³² Pueyasoori jiyanoqua pa panijia. Nojuajaari Neyanuniyojua jiyaroquiaari pocuara mosocoriquiano. Nojuaja jaara Neyanu jamueyaquiquiaaricuua, ¿maatucua casaara quiarijia niquitioyauri puetunu pa panishanojuanaani? ³³ ¿Cantucua Pueyaso saquiriojosano pueyacuara saquiriojotare sesa nojori miishanon? Pueyasujuanaacuajaari pa jiyatequiaari juhua sesa miyashijiaca pa quiniuria. ³⁴ Jesucristocuajaari tari cusoquiaari pa niti. ¿Cantucua saniniujia quiarijia Pueyaso sequeriquia pocuarani: “Cuno pojori quia shaajare”? Pocuaji Tacunacuajaari samiitorgiaariuhua. Quiarijia na Que Pueyaso miaquetajara cajiyari, pocuara na Que na secojonura pueyaracaanu. ³⁵ Nojuajaari jiyanoqua pa panijia. ¿Tamonu casaate na naata Cristo tarinitiniu maja na paniniuria pajaniya? ¡Majaari quenaaja casaa quiniu na tarinitiniuria nojuaja! Naaratej, majaari nia jiyaniiniu Cristo pa paniyaquiya, paa jaara taraatia miishiyani, paa jaara casaacua tacayani, tamasaca jaara naquiya miya pajaniyani. Naajuhuaj, paa jaara quera titiacoya pa miajenutani, majaari nia jiyaniiniu Cristo pa paniyaquiya, naajuhuaj, paa jaara toqueeju quiyani, paa jaara cocuaatia miyani, paa jaara miananajoshiya monurajaniuhuaj. Puetunu niojuanaari maja na tarinitiniu Jesucristo, na paniyaquiniuria pajaniya. ³⁶ Paacuajaari taraatia miishocoriquianoni, naatej, taa tariucuacaanu Pueyaso Rupaajinie naajiotasano quiyacuajani. Naa sequeyari:

“Canaa Pueyasonaa, canaari puecooshiya pueyaracaanuni, quia tojitiacuaca canaa quiniuucua. Nojoriiri juhua miaquesocoriquiano borregohua canaa puecoquia juhuajaniya”.

³⁷ Paari naa miishaquaajaaniuhuaj. Naajaa, naa taraatia pa mishacaritij, Jesucristo panishacari pajaniya, nojuajaari shocotajacara pa jiyatequia. Naacuajitij, majaari saaja pa rejeretanu naquiya pa miishacari. Jesucristoori seetanujuanaa cuno naquiya pa miiniu jiyatequia maninia na jeecanura pajaniya, juhua nojuaja pa

quiuriua socua. ³⁸ Seetanujuanaa niishiyanijia, Pueyaso panishacari jiyanoqua pajaniya, majaari quenaaja tamonu casaa na naata rupatanu pajaniya Nojuajiniji. Paa jaara quiri saminiojuani, macu soj, naajaa, pa panijia Pueyasocuajaari pata quiyajaa. Naajuhuaj, Pueyaso seja, samaruhuanio, puetunu cunojuanaari maja na naata pa rupatanu Pueyasocuaji. Naajuhuaj, majaari quenaaja tamonu cumaacaraca quijiaca na naata pa rupatanu Pueyasocuaji. Pueyaso paniniu pajaniyani, cunoori maja na puequenu quiiniutianiya quiarijia, tamacarinio. ³⁹ Naajaariuhuaj, tee pa quiyani, jiyouacaanu, jiya cariquimia soj, naajaa. Pa panijia Pueyasoori tii quiya patajuhuaj. Naacuajitij, pa Jiyaniijia Jesucristota rupuetootesano pa quishacari, puetunu Pueyaso shipinijiosano casaajanaari maja na naata pa rupatanu Pueyasojiniji.

9

Pueyasojuanaari pueya saquiriojojua na pueyara

¹⁻³ Naa Pueyaso pueyano cua quishacaritij, janiyari jiyanoqua cuarta Israel pueyacua taraajequiaani, nojori tiuyaquiniuucua pa Jiyaniijia Jesucristoocua. Janiyari pueyaracaanu nojoriicua taraajequiaa jiyanoquani, maja cua naata quishacari cuarta Israel pueya tiuutiniu Jesucristoocua. Seetanujuanaa nia sequeyanijia, Pueyaso jaara na naata quiri mani quiqiojinia na jatanura janiya nojori niti, janiya maara sequereni, maniniacuajaari naa cua miishaanura. Nojori jaara na naata quiri Jesucristoocua rupuetesaanu cua niti, janiya maara Pueyaso sequereni: "Cua rupatare cutara Jesucristojiniji, saniya cuarta Israel pueya jiyatesaanura Pueyaso muerasura cutara". Naa cua sequesacari niajaniyatej, janiyari coojajinia niishiyanijia, seetanujuanaari cua sequesano. Pueyaso Sohuanuuri cua niishitiyajuhuaj majaari cua sapojonu. ⁴ Cuarta Judiocuacaari pa supuetana Israel niquoohuacuajinio supueno pueyacuaja. Pueyasoori nojori jiyatequiaari na muerasu nojori quiuria, nocua nojori tiuushacari. Pueyasoori nojori niquitiquiaari shacantuua na cumaaca, tariucuacaanu nojorita na quishacari. Pueyasoori nojori sequequiaari: "Janiyacuajaari Pueyasoni. Niaari cua pueya quiiniutianiya niaa jaara cucua tiuuri". Naajuhuaj, Pueyasoori Moisés niquitioquiaari caapiqui saajianeecua na naajiosano, saniniujia Moisés niishitijojonura tiji nojori. Pueyasoori nojori niishitiquiaarijihuaj taa nojori miiniutianiyani, tariucua jiyanooshano nojori rerejonura na niqiara. Pueyasoori nojori sequequiaarijihuaj, nojuajaari puetunujuanaa na sequesano Abraham tohuatenutaniya nojoriria. ⁵ Israel pueya supuetanaari quiquiaari Abraham, Isaac, Jacobonio. Pa Jiyaniijia Cristoori cuno pojori niquoohuacuajinio supuequiaari. Nojuajaari tari jiyatesaaquiaari Jiyaniijajanaa na quiuriua, puetunu casamijiana jijitiana na quiuriua jihuaj. Nojuajaari Pueyasojuhanajaj, juhua na Quejuhuaj. ¡Nojuaja cuaara pueyaracaanu maniniuhuaqueetasano quiuria! ¡Cuaara naa quiuria pueyaracaanutej!

⁶ Quiarijiani, queraatia parta Israel pueyajinjinio pueyari maja Pueyaso muerasu. Naa cua sequesacari niajaniyatej, majaari nia jiyaniui tariucuacaanu Pueyaso sequesano pa supuetanaari tohuatyequiniutianiya. Maja pueyanaa. Tohuatenutaniyanocuaja. Jaara naa quiritij, ¿casaara puetunu Israel pueyajanaa maseyaquiniutianiya

Pueyaso sequencesano nojoririaarini? Cua tojitiare pueyanaa. Puetunu pa supuetana Israel niquiohuacujinio supueno pueyajanaari maja seetanujuanaa Israel pueya Pueyasora.⁷ Naajaariuhua Abraham niquiohua. Puetunu Abraham niquiohuajanaari maja seetanujuanaa Abraham niquiohua na quiniu quiquiaari Pueyasora. Pueyasocujaari naa sequequiaari Abraham:

“Cua sequencesano quiajaniyari saaja quia niyanu Isaaccuajinio supueno pueyarano quiniutianiya cutara”.

⁸ Naa Pueyaso sequencesacari Abrahamtej, naacuajiti paari niishiyani, majaari puetunu Pueyaso saquiriojosano pueyacuajinio supueno pueyajanaa seetanujuanaa Pueyaso muerasu. Saniniuuja, seetanujuanaa Pueyaso muerasu cutaraari noo pojori, Pueyaso sequencesanoocua tiuuijicatej, taa pa supuetana Abraham tiuuiquiaari Pueyaso sequencesanoocuacuaani. Pueyasora, nojori cutaraari Abrahamcuajinio supueno pueya. ⁹ Abrahamri Pueyaso sequencesanoocua tiuuiquiaari, Pueyaso jaara naa na sequequiaari:

“Abrahamnaa, janiyari quiocua tacatenutaniuhua tamacarini. Janiyari jiyacari quia niquio Saara riuriatanutaniuhua tariucua mueyarcani”.

Naacuajitij, Isaac jaara rasaaquiaari, Pueyaso sequencesanoori tohuateequiaari. Naacuajitij, puetunu Abraham niquiohuajinijiniojuanaani, saaja Isaacri Pueyaso saquiriojosano pueyano quiquiaari.

¹⁰ Naa quiquiaarijiaariuhua Isaac niquiohua. Isaac jaara neco Rebeca manajoquiaari, Rebecaari caapueya manajequiaari. ¹¹⁻¹³ Cuno caapueya royaquishacarrijia, juhuanojuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenutaniya na nuhuajishana tojijiari”. Naa Pueyaso sequencesacaritij, cunoori juhua Pueyaso sequencesano tariucacaanu. Naa sequequiaari cuno royaquishoojua caapueyajinijiiri:

“Jacoboori cua panishano quiniutaniya. Esauuri saniniuuja cua soosano quiniutaniyacujua”.

Naa Pueyaso sequencesacaritij, paari niishiyani, Pueyasoori saquiriojquiaa cana na saquiriojonu paniyacuajani, tama na miiniu panishanojuaja na tohuateenura. Naacuajitij, Pueyaso jaara saquiriojore pueya, nojuajaari maja na niishiriojonu nojori miishanojiniji; maninia, sesa soj.

¹⁴ Naa Pueyaso miishacari tama na panishanojuajatej, ¿taa pa sequeyani? ¿Pueyasote sesa miya, naa rimiajata na saquiriojosacari pueyatej? Maja. ¹⁵ Pueyasocujaari naa Moisés sequequiaari:

“Janiyari pueya jiyanooniutaniyani teyano pueyano cua jiyanooniupaniyacuajani. Naajuhuaj, janiyari pueyanoocua taraajenu-taniyani, teyano pueyanoocua cua taraajenu paniyacuajani”.

¹⁶ Naacuajitij paari niishiyani, pueyano maja na naata tama na cuaqueyayaaja jiyatenu Pueyaso pueyano na quiniuria. Pueyasocujaari tama saquiriojquiaajaaja cana na jiyanooniupaniyani. ¹⁷ Naajuhuaj, taricuacaanu Pueyaso sequencesano Egipto jiyaniijiaraari naa naajiotasano quiyajuhuaj:

“Faraónnaa, janiyari quia jiyatequiaari Egipto pueya jiyaniijia quia quiniuriani, cua cumaacata cua miijiosano cua niquitiniuria

quiajaniya. Naacuajitij, puetunu jiycacjinia quiniaa pueyapue-janaari niishiniutianiya, janiyari Pueyasojuanaa cutarani”.

¹⁸ Naacuajitij, paari niishiyani, Pueyasoori taraajeja teyanooocua na taraajenu paniyani. Naajaariuhuaj, nojuajaari na tojiyashijia pueyano jiuujia jiyateja cumajiuujiaacara, teyan pueyano jiuujia na jiyatenu paniya naaracuajani.

¹⁹ Naa cua sequesacari niajaniyatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacuajani, ¿maatucua casaara sesa pa miiniuucua pa saniitiores? ¿Canteeri na naata Pueyaso tarinitiniu na miiniu panishanojinijini?” ²⁰ Majaari naa sequenu pueyanonaa. ¿Canteeri quiajaniyani, naa quia juaanuria Pueyasotej? Paacuajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaaniu: “Juaashiquiaracanaa, ¿casaara quia panirii conatura janiyani?”? ²¹ Paniyojojuacuajaari na naata paniniu maraujiniji na panishano casaa, shanohua pataconijoju, mashaca quiquirora manijinias cajitiariquiano conatunio.

²² Naajuhuaj, ¿taa pa sequenutaniyani, Pueyaso jaara niishitiniu paniya na juaaniu, na cumaacanio, na saniitiosacari sesa mijiaca? Naajaa, Pueyasoori jiyanohua rejeretaquiaa sesa mijiaca, cante tari saniitiosocoriquiano quiyacuajani. ²³ Pueyasoori naa tarishiyajaara na saniitionura na tojitiaashijiaca pueya. Naa na tarishishacaritij, nojuajaari pueya niishitiquiaa na shacantuucu cumaaca, maninia na miishacari na jiyanoooshano pueya, cante tari saquiriojosano quiya na shuriucua quiriquianocuajani. ²⁴ Paacuajaari cuno jiyanoooshano pueyani, canapue tari Pueyaso saquiriojoquiaaricuajani Judiocuacajinijinio, taucuacajinijinionio. ²⁵ Naa naajiotasano quiyacuajaari Pueyaso sequesano supuetana Oseas naajioneejinia:

“Cante cua pueya quiyacuquiaarini, janiyari nojori sequenutaniyani: ‘Niaari cua quiquipuohuaniyoju’. Naajuhuaj, cante cua shuquirittasoo pueya quiquiaarini, nojoriiri cua timitiasano pueyara quiniutianiya”.

²⁶ Naa naajiotasanoori quiyajuhuaj:

“Tee cuniqui naa pueya sequesaaquiaaricuajani: ‘Niaari maja cua pueya’, nojoriiri cuniquijia jiyaniquishaanutaniya: ‘Niaari Pueyaso niquipuohuajanaa cutara’”.

²⁷ Saniniuuji, supuetana Isaíasri naa sequequiaari Jacobo niquihuacuajinio supueno pueyajiniji:

“Israel pueyari jiyanohua canenutaniya, juhua shoniniacu caminia shuriuquio paajia jaaquia, serojosoo. Saniniuuji, saaja secaya nojorijinijinioori Pueyaso pueyara jatanishaanutaniya.

²⁸ Pueyasoori mijiriara na sequesano tohuateenutaniya. Majaari na tarishiniu quiniutianiya”.

²⁹ Supuetana Isaíascuajaari naa sequequiaari tarijiajuhuaj:

“Pa Jiyanijia Pueyaso jaara Israel pueya niquipuohua jiyanoyaquiaarini, Israel pueya maara quiarijia quiyquiri. Maara tari shaajasaacanu tojetaarucuajanaa, naatej, taa Sodoma tiacajinias quiniaa pueya puecoosaquiaaricuajani, Gomorra tiacajinias quiniaa pueyano”.

Judiocuacaari Pueyaso rupaacua tiuyashijiaca saaja

³⁰ Naa cua pohuatasacari niajaniya tariucuacaanu Pueyaso Rupaa-jinijitij, paari quiarrijia nio niishiyani: taucuacaari maja quenaaja na tacaaniu quijia taate nojori naata Pueyaso jiyanoshano quiniuni. Nojoriiri juhuajaniya quijia saaja. Naajaa, quiarrijia, Pueyasoori nojori jiyatequiaa juhua sesa miyashijiaca, saaja Jesucristoocua nojori tiuushacari. ³¹ Israel pueyari saniniujia jiyanohua Moisés Rootasano tojijiaca juucua, nojori jiyanishacari Pueyaso naasucuaari naa nojori miishacari nojori jiyanooniutianiya. Majaari Pueyaso jiyanooniu quijia nojori. ³² ¿Niaate niishiya casaara Pueyaso jiyanoyaquiquiaari nojorini? Pueyasoori nojori jiyanoyaquiquiaari nojori tiuyaquiniuucua nocua. Nojoriiri jiyaniquiaari tama nojorijiaarrijia na naata tama nojori cuaque-yayaaja jiyatenu juhua sesa miyashijiaca, Moisés Rootasano nojori tojishacari. Naaratej, majaari nojori tiuuniu quiquia Jesucristoocua. Nojoriiri saaja na sooquiaa. Naacuajitij, Jesucristoori juhua saajia nojoriria, nocua nojori tiuriiniuria. ³³ Jesucristojiniji miriqui Pueyaso sequencesanocuajaari naa naajiotasaaquiaari tariucuacaanu, Jesucristo niyacarrijia:

“Cua tojitiare. Janiyari Sión tuhuananuucua nianutaniya saajiani, pueya tiuriiniuria nocua. Saniniujia, cante nocua tiuyani, nojoriiri puetunu Pueyaso sequencesanocuanaa na muerasurano masenu-taniya”.

10

¹ Cuarta Pueyaso muerasunaa, janiyari jiyanohua Pueyaso seco-joquiaani parta Israel pueyacuara, Jesucristoocua nojori tiuuniuria, Pueyaso pueya nojori quiniuriajuhuaj. Janiyari jiyanohua nojoriicua tacayani. ² Janiyacuajaari seetanujuanaa niishiyaní, Israel pueyari seetanujuanaa Pueyaso panishano miiniu panijiaca juucua, na muerasu nojori quiniuria. Nojoriiri naa miiquiaa najuhuanaj, nojori niishiyaquishacari maninia. ³ Nojoriiri saaja sequequia, majana Pueyaso naata pueya jiyanoniu saaja nojori tiuushacari nocua. Naaratej, nojoriiri jiyanohua saniniujiquia maninia nojori quiniuria Pueyaso niquia tama nojori miishanotajaaja. Naacuajitij, nojoriiri Jesucristoocua tiuyaquiquia Pueyaso jiyanooniuria nojori. Pueyasorjuanaari Cristo jiyatequiaari pa niti mosocoriquiano. ⁴ Naacuajitij, Cristo jaara mosaaquiaari, nojuajaari Moisés Rootasano tojiniu tohuatee-quiaari cutara. Naacuajitij, Pueyasoori puetunu nocua tiuuniaajanaa jiyatequia juhua sesa miyashijiaca. ⁵ Moisescuajaari naajioquiaari taa na rootasano tojijiaca miiniutianiyani, juhua sesa miyashijiaca nojori quiniuria. Nojuajaari naa naajioquiaari:

“Cante puetunu cua rootasanojuanaa tojijiani, nojuajaari pueyaracaanu rishijiara jiyatesaanutaniya”.

⁶ Saniniujia, saaja Jesucristoocua pa tiuushacari, paari juhua sesa miyashijiaca jiyatesaaquiaani, pueyaracaanu rishijiaca pa quiniuria. Naacuajitij, majaari naa nia niishiriojonu nioojajinia nia taacanu-usacari: “¿Cante na naata jiyocuacaanu tacanu Jesucristo na roshiniuria Pueyaso pueyara na jataniniuria pajaniyani?” ⁷ Naajuhuaj, majaari naa nia niishiriojonu: “¿Cante na naata macunucua quiquojinia quianu, Jesucristo na tacaniniuria pocuani?” ¡Pueyanaa, majaari quenaaja naa nia

niishiriojonutej! ⁸ Pueyaso Rupaacuaajaari tari naa naajiotasaaquiaari pajaniyara:

“Niaacuaajaari cua rupaa jiitiae. Niaari na niishiayahuaj. Nioojiajinia quiyacuaajaari”.

Cuno rupaa canaa na pohuataquiaa niajaniyani, cunocuajaari Jesucristoocua nia tiuuniuria. ⁹ Naacuajitij, Pueyasoori pueya jiyatequiaa na pueya nojori quiniuria, Jesucristoocua tiuuja jaara pueya niquiara pohuatare: “Jesucristoori seetanujuanaa Jiyaniijiajanaa cutara”, noojiajinia na niishishacarrijuhuaj Pueyasoori Jesu samiitianiquiaariuhua macujiniji. ¹⁰ Seetanujuanaa naari: poojiata pa tiuushacari Neyanuccua, Pueyasoori pa jiyateya juhua sesa miyashijia pa quiniuria. Naa-juhuaj, pa rupaata pa pohuatasacari: “Janiya Jesucristoocua tiujiani”, jiyacaritij, Pueyasoori pa jataniquiaa na pueya pa quiniuria cutara.

¹¹ Tariucuacaanu Neyanujiniji Pueyaso sequesanoori naa naajiotasano quiyajuhuaj:

“Puetunu nocua tiuuniaajanaari puetunu cua sequesanojuanaa cua muerasurano masenutaniya”.

¹² Naacuajitij Judiocuaca, mariyata taucuacanio, nojori jiyanooshaanutaniya nojori jaara sequere: “Jiyaniijianaa, cua jiyanoori”. Pa Jiyaniijiaari maja rimiajata na jiyanooniu nocua tiuujiacapueya. Nojuajaari jiyanoohua capora. Jiyaniijiajanaa cutaraari. ¹³ Tariucuacaanu Pueyaso Rupaajinariaa naa naajiotasano quiyajuhuaj:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijianaa, cua jiyanoori’ ”.

¹⁴ Jaara naa quiritij, ¿pueyatucua taa Jiyaniijia secojonuuren, nojori jaara nocua tiuyaquiyajaa? Naajuhuaj, ¿pueyatucua taa nocua tiuurini, nojori jaara nojuajiniji pohuataaquishoo quiyajaa? ¿Nojoritucua taa nojuajiniji niishijia quirini, tamasaca jaara quenaaja nojori pohuataaquiri?

¹⁵ ¿Pueyaso Rupaa pohuatanaatucua taa cuno pojoricua quiaaren, nojori jaara jiyaramiquiyyaquishaare? ¿Pueyaso rupaa pohuatanaate jiyaramiquiyyaquishaquiaari? ¡Maja! Jiyaramiquishaaquiaaricuaja. Naaratej, naa naajiotasano quiyari tariucuacaanu Pueyaso Rupaajinia:

“Jiyanoohua timitiasano pueya cutaraari, noo pojori canapuete tamasacaacua quiajani, nojori na pohuatanura Pueyaso rupaa”.

¹⁶ Naajaa, majaari puetunu pueyajanaa tojiniu quiquiaa, Pueyaso Rupaa jaara nojori niquiara pohuatasaaare. Naacuajitij, supuetana Isaíasri naa sequequiaari na taraajenuta:

“Jiyaniijianaa, majaari pueya tojiniu paniniu canaa pohuatasano quiajanijiniji”.

¹⁷ Naacuajitij pueyanaa, paa jaara Jesucristo rupaa pohuatasaaaren, paari pa numaata na tojiyani. Paa jaara pa tojishanoocua tiuurini, Pueyasoori pa jiyatenutaniya na pueya pa quiniuria.

¹⁸ Pa jaara Pueyaso pueyara jiyatesaaquiaa saaja pa tiuushacari Pueyaso rupaacua, jaara naa quiritij, ¿casaara puetunu Israel pueyajanaa Pueyaso pueyara jiyateyaquishaquiaariirini? ¿Cristo rupaateeri nojori niquiara pohuataaquishaquiaari? Maja. Nojori niquiaracuaajaari pohuatasaaquiaari. Naa naajiotasano quiyacuaajaari tariucuacaanu Pueyaso Rupaajinia:

“Pueyaso Rupaacuajaari puetunu jiyacajinajanaa pohuatasaquaari.
Na rupaari tojishaquaari puetunu tiquiyocuajanaa, jiya
puequetujinía”.

¹⁹ Jaara naa pohuatasaquaaritij, ¿Israel pueyateeri Pueyaso rupaa niishiyaquiaaria nojori tojishacari? Maja. Nojoricuajaari na niishijaca quiquiaari. Nojoriiri saaja na ruuretajaca quiquiaari. Supuetana Moisésuajaari naa naajiotaquiaari Pueyaso sequencesano Israel pueyara, tariucua na tojiyashijiaca nojori quishacari:

“Maninia cua miishacari tiquiyocua quijiaca taucuaca nia niti, janiyari nia juaatinutaniyani. Niaari jiyanohua juaaniutaniya cua jiyanoshacari mosanucua taucuaca”.

²⁰ Na nuhuaji, supuetana Isaíasri naa maatia sequequiaari Pueyaso niishitiosano nojuaja:

“Cucua jiaatiaashijiaca taucuaca cutaraari cua riuriataquiaa, cua tojijiaca nojori quiniuria cutara. Naajuhuaj, janiyari cua pajeyashijiaca taucuacaacua muetaquiaani”.

²¹ Saniniujuja, Isaíasri naa Pueyaso sequencesano Israel pueyajiniji naajiotaquiaari:

“Janiyari puetunu juucajanaa Israel pueyacuaji masequiaa juucuani, maninia cua miiniu panishacari nojori. Nojoriiri saaja cua shocotequiaa, cua tojiyashijiaca pueya nojori quishacari”.

11

Israel pueyajiniji cureenoori Pueyaso saquiriojosano

¹ Israel pueya jaara naa Pueyaso tojiyashijiaca quiya, ¿Pueyasote setanujuanaa nojori tarinitiacanu, na tojiyashijiaca nojori quiniuucua? ¡Maja pueyanaa! Janiyacuajaari Israel pueyanojanihuaj. Abrahamri cua supuetana. Janiyari na jinianu Jacobo niyanu Benjamíncaujinio supuenoni. ² Naacuajitij, janiyari niishiyani, Pueyasoori maja na cartenu quiqianu puetunu tariucuacaanu na saquiriojosano Israel pueyajanaa. ¿Niaateeri supuetana Elíasjiniji naajiotasano niishiyauquia? Tariucuacaanu Pueyaso Rupaajinija naa naajiotasano quiyacuajaari Elías sequencesano Pueyaso, na tacaashacari Israel pueya quiniuucua sesa:

³ “¡Cua Jiyanjijiana, cuarta Israel pueyari puetunu quia sequencesano caminiujiuniaa pueyajanaa puecorucua! ¡Saa janiyajaari cureyani! Naajuhuaj, nojoriiri puetunu juhuacutucuajanaa niyarequetarucuaa, tee quia tojitiajaca pueya catijiaquiaa na seya quiocuaracuajani. ¡Nojoriiri quiarijia cua pajenuyajuhuaj, na motunura janija!”

⁴ Pueyasoori naa Elías riucuaquiaari saaja:

“Janiyari siete mil pueya jiitiaajaani. Nojoriiri cua tojitiajaca. Nojoriiri maja na mojoquetaconu quiquiaa cuno sacuaraatia shipinishano Baalcuara cua niti, taa narta Israel pueya miiquiaacuani”.

⁵ Quiarijiaari naajuhuaj, Pueyasoori secaja na saquiriojosano Israel pueyajinjinio jiitia, jiyanoootio na quiniuucua. ⁶ Naa Pueyaso muerasu nojori quishacari saaja Pueyaso jiyanooniucua nojori, naacuajiti paari niishiyani, majaari Pueyaso saquiriojonu quiquiaari nojori, maninia nojori quiniuucua. Nojori jaara maninia miijiaca quiriquia, nojori maara paniyaquiri na jiyanooshaanura.

⁷ Naacuajitij, paari niishiyani, Pueyasoori saaja na saquiriojosano pueya jiylatequiaa na muerasura. Israel pueya saniniuujia, nojoriiri saaja maninia quiniuria saniniujiujia juucua. Naajaa, majaari nojori naata tama na cuaqueyajaaja jiyatenu quiquiaari Pueyaso muerasu nojori quiniuria. Cuno pojori jiuujiaari saaja cumajiuujiaacara quiquiaari, tojetaarucuajanaa niishiyashijiaca nojori quiniuria. ⁸ Tariucuacaanu Pueyaso Rupaajiniacuajaari naa naajiotasano quiya:

“Pueyasoori nojori jiylatequiaari niishiyashijiaca, maja nojori niishiniuria nojuaja. Naaratej, majaari nojori niishiniu quijia, nojori niquishacari Pueyaso miishano. Majaari nojori niishiniu quijajuhuaj, nojori tojishacari na rupaa. Israel pueyari naa Pueyaso tojiyashijiaca quiyajaa quiarijiani”.

⁹ Supuetana David sequesanoori nojorijiniji naa naajiotasano quiyajuhuaj:

“Pueyasonaa, Israel pueyari puetunu nojori panishanojuanaa jiitiaa, maninia quia miishacari nojori. Saniniuujia, nojori tojiyajquiniiucua quiajaniya, nojori shuquiritiasano casaa cuaara quiiria juhua norijia tama nojoririajaaja, nojori saniitiosaanura. ¹⁰ Nojori jiuujia cuaara jataara juhua carijojuarujuriria, maja nojori niishiniuria seetanu Pueyaso rupaajanaa. Nojori cuaara porequetacoora socua, pueyaracaanu taraatia nojori miishacari”.

Pueyaso jiyanoshacari taucuaca, Israel pueya niti

¹¹ ¿Niaateeri jiyanija Pueyasoori Israel pueya cartequiaarrijanaa, tojiyashijiaca nojori quiniuucua? Maja. Pueyaso tojiyashijiaca nojori quiniuucua, taucuacaari saniniuujia Pueyaso muerasura quiquiaa, nojori tiuushacari Jesucristoocua. Cunoori Israel pueya jiaatianiquiaa taucuacaacua, Pueyaso muerasu nojori quiniurajuhuaj. ¹² Quiarijia, puetunu jiylacajinajanaa taucuacaari shuquiriaatia quiya, Pueyaso muerasu nojori quishacari Israel pueya tiuyaquiniuucua Jesucristoocua. Saniniuujia, Israel pueya jaara Pueyaso muerasura quiriohua Jesucristoocua nojori tiuushacari, jiylacaritij, socua jiyanohua maninia quiniutianiyari puetunu pueyapuerajanaa, puetunu jiylacajinajanaa.

¹³ Taucuacajinijino cuarta Pueyaso muerasunaa, cua tojiri. Nia sequenu paniyanija. Janiyari seetanujuanaa jiylaramiquishaquaari Jesucristo rupaa cua pohuatanura taucuaca niquiarani. Naaratej, janiyari puetunu cua cumaacatajanaa pohuataquiaa Jesucristojiniji taucuaca niquiarani, nojori quiniuria Pueyaso muerasujuhuaj. ¹⁴ Janiyari seetanujuanaa naa miquiaani cuarta Israel pueya jiaatianura niacua, nojori tiuuniuria Jesucristoocuajuhuaj, noojiaqueya nojorijinijino Pueyaso jiylatenura na pueyara. ¹⁵ Pueyasoori juhua taanuquiaari Israel pueya nocuaji, nojori tiuyaquishacari Neyanuucua. Naajaa, naacuajiti Pueyasoori puetunu mijiria quiniaa pueyapuejanaa jiyanooquia, na muerasu nojori quiniuria. Saniniuujia, Israel pueya jaara jiyanoshaarohua, jiylacaritij, jiyanohua maninia quiniutianiyari puetunu pueyapuerajanaa. Israel pueya tiuushacari Jesucristoocua, nojoriiri juhua macujiniji samiitiaconutaniuhua. ¹⁶ Seetanujuanaa maninia nia niishiniuria nio miriqui cua pohuatasanoni, maatia nia pohuatareeraj. Nia tojiri. Coteenuujuanaa pa jiuniocotasano neecaruu jaara maninia quiri Pueyasora pa niquitiosocoriquiano, tariquiaari

puetunujuanaa maniniajuhua Pueyasora. Naajuhuaj, naana nujuaca jaara maninia quiri puetunujuanaa, na cashacucuaari maniniuquiu-cuahuaj. Nio miriqui cua pohuatasanoori nia niishitiya cutara Israel pueyajiniji. Naacuajitij, Pueyaso jaara Abraham jiyanooquaaricuua nocua na tiuushacari, naacuajiti paari niishiyani, Pueyasoori puetunu Israel pueyajanaa jiyanooniutianiyajuhuaj, nojori jaara tiuuriquia Jesu-cristoocua.

¹⁷ Supuetana Abrahamri juhua Pueyaso panishano olivo naana nujuaca. Saniniuujia, na jinianuucuajinio supueno Israel pueyari juhua na cashacucua. Cuno na cashacucuajinjinio jaara Jesucristoocua tiuyaquiaari, Pueyasoori na piyotaquiaari. Niajaniya saniniuujia taucuacanaa, niaari panishoo quiquiaari, juhua nacujiniaacoji olivo naana cama, maja natau. Naajaa, Jesucristoocua nia tiuushacari, Pueyasoori nia rupotaquiaari na panishano naanaacua nia moritianura. Naa Pueyaso panishano naanaacua nia moritiasacaritij, cuno naana nujuacaari nia nujuacajuhuaj. Naacuajitij, niaacuajaari puetunu Pueyaso sequesanojuanaa supuetana Abrahamra masequiaa tari. ¹⁸ Naa Pueyaso rupotanuucua niajaniya na panishano naanaacuatej, majaari tama nia cuaqueyajaaja nia shuquiritianu. Majaari nia jiyaniniu niaa cutaraari socua maninia pueya, Pueyaso cartesano Israel pueyajiniji. Niaa jaara jiyaniya niaari socua maninia pueya nojorijiniji, nia niishiri, niaari maja nia nujuaca rishitija. Nia nujuaca cutaraari nia rishitiya.

¹⁹ Niaa naasucuaari sequeya: "Taaquiriirinij. Cuno olivo cashacuajaari canaaacuaji piyotasaquaaria, saniniuujia canaa rupotasaanura nocua nojori niti". ²⁰ Taaquiriirinij, seetanujuanaacuaquinateja nia sequesanojuaj. Saniniuujia nia niishiri, nojoriiri Pueyaso panishano naanajiniji piyotasaquaaria, nojori tiuyaquiniuucua Jesucristoocua. Niaari saniniuujia cuno naanaacua rupotasono quiya, saaja Jesucristoocua nia tiuuriuucua. Naacuajitij, maja tama nia cuaqueyajaaja nia shuquiritianu nia jiyanishacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucuacanaa, niaa mariqui piyotasaarohuari, niaa jaara Pueyaso tojiyashijiacara quiriohua. ²¹ Pueyaso jaara jiyanoyaquiaari na saquiriojosano pueyacuua, nojori tiuyaquiniuucua nocua, ¿maatucua casaara jiyanoori niajaniyanijia? Niaacuajaari taucuaca. Niaacuajaari maja na saquiriojosano Israel pueyacuajinio. ²² Naacuajiti pueyanaa, nia niishiri. Pueyasoori jiyanohua maninia. Naajuhuaj, nojuajaari saniitionu niishijia cutara. Naaratej, nojuajaari na tojitiaashijiac Israel pueya jiyanoyaquiaari. Saniniuujia, nojuajaari jiyanohua maninia miiquiaa niajaniya na jiyanoshano pueya nia quishacari, niaa jaara pueyaracaanu nocua tiuuijacia quiriquia. Niajaniya tau-cuacanaa, niaa jaara nocua tiuyashijiacara quiriohua, niaari nocuajti rupatasaanutaniuhua. ²³ Saniniuujia, Israel pueya jaara Jesucristoocua tiuuijacara quiriohua, Pueyasoori nojori rupotanutaniuhua na panishano olivo naanaacua. Pueyasoori jiyanohua cumaacaracacuaja na rupotanuhuara na panishano naanaacua. ²⁴ Niajaniya taucuacanaa, niaari maja seetanujuanaa Pueyaso saquiriojosano Israel pueya. Niaari juhua nacujiniaacoji olivo naana cashacucua. Naajaa, nia tiuushacari Cristoocua, Pueyasoori nia rupotaquiaari na panishano olivo naanaacuajanaa. Naaratej, majaari jiyaneneta Pueyasora, na piyotasano

olivo cashacucua na rupotanuhuara tama neyonaacuajaaja, nojorijaara Jesucristoocua tiuujiacara quiriohua.

Pueyaso jatanishacari puetunu Israel pueyajanaa na pueyara

²⁵ Taucuacajinijinio cuarta Pueyaso pueyanaa, tariucuacaanu pueyari niishiyaquijia taa Pueyaso miiniutianiya Israel pueyani. Quiarijia cutara nia niishiri Pueyaso niishitishano janiya, maja nia jiyaniniuria Pueyasoori nia paniya socua Israel pueyajiniji. Naarate cua tojitiare. Quera puetunu Israel pueyajanaari Pueyaso tojiyashijiaca quiya. Nojoriiri naa quiniutianiya, puetunu Pueyaso saquiriojosano taucuacajinijinio pueyajanaa cuaara Jesucristoocua tiuurijiaatijia. ²⁶ Jiyacaritij, puetunu Israel pueyajanaari jiyatesaanutaniya Pueyaso pueyarajuhuaj, taa tariucuacaanu Pueyaso Rupaajinia naajiotasaquaaricuajani. Naa sequeyari:

“Sión tiacajinia supuenutaniyari pueyacuaji Tacuriquiano. Nojuajaari puetunu sesa casaajanaa jaariutianutaniya Jacobo niquiohuacuajinio supueno pueya jiuujiajiniji. ²⁷ Naa cua jiyanooshacari puetunu sesa nojori miishanojuanaatej, janiyari jiyacari tohusteenutaniya tariucuacaanu cua sequesano nojori supuetanaani”.

²⁸ Quiarijia Israel pueya tiuyaquishacari Jesucristo rupaacua saniniujia, nojoriiri juhua Pueyaso paraa, Pueyaso jiyanooniuria niajaniya saniniujia, taucuacanaa. Naajaa, Pueyasoori cuno Israel pueya paniyajaa, nojori supuetanaa quiniuucua na saquiriojosano pueya. ²⁹ Pueyasoori maja na jaariutianu quijia na niquitiosano. Na saquiriojosano pueya jiyanojiaari. Majaari nojori na ruuretanu. Pueyasocuajaari Israel pueya saquirijoquiaari na pueya nojori quiniuria, maninia na miiniuria nojori. ³⁰ Maniniushiquiari, niajaniya tau-cuacanaa, niaari Pueyaso tojiyashijiaca quijia. Israel pueya tojiyauquinuucua Pueyaso quiarijia saniniujia, Pueyasoori niaacula taraajequiaa. ³¹ Nojoriiri Pueyaso tojiyashijiaca quiya quiarijia, Pueyaso taraajenura nojoriicua taa na taraajeya niaacuacuaani. ³² Naacuajitij, Pueyasora, puetunu pueyajanaari na tojiyashijiaca quiya, Israel pueya, taucuacanio. Naacuajitij, Pueyasoori na naata jiyanooniu nojorijuhuaj, nojori tiuushacari Jesucristoocua. Pueyasoori maja rimiajata na jiyanooniu.

³³ ¡Pa Pueyasoori jiyanohua niishijia, maninia na miiniuria! ¡Nojuajaari puetunu niishijajanaa cutara! ¿Cante niishiquiaarini casaa Pueyaso miiniutianiyan? Na miishanoori jiyanohua jiyajeneta. ¿Cante na naata na niishiniuni? Shaaqui. ³⁴ Naaratej, seetanujuanaari nio tariucuacaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? ¡Maja!

³⁵ ¿Pueyaseo na panishano jiitiaaquiquiaari tamonu niquitionura nojua ja na panishano, na nuhuaji na niquitionuhuara? ¡Maja!”.

³⁶ Seetanujuanaa puetunu casaajanaacuajaari Pueyaso shipinishano. Na camaruuri na rishitiquiaa na cumaacata. Puetunu cunojuanaari nerano. ¡Pueyaracaanu pa shuquiritiare pa Que Pueyaso! ¡Nojuajaari jiyanohua maninia! ¡Cuaara naa quiiriatej!

12

Saaja Pueyasora pa quirij

¹ Cuarta Pueyaso niquiohuanaa, jiyanohua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucuajanaa saa neraja nia quiniuria. Naacuajitij, niaari Pueyaso shuquiritiniutianiya, pueyaracaanu na tojijiaca nia quishacari.

² Majaari socua nia quiniu taa Pueyaso tojiyashijiaca quiquiaaculaani. Saniya Pueyaso Sohuanu tojijiaca nia quiri cutara, seetanujuanaa quiariniora jatanishano pueya nia quiniuria. Naacuajitij, niaari niishiniutianiya casaa Pueyaso paniya nia miiniuriani. Nia niishitiaja jaara jatanishano quiri, naacuajiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutianiya, cunoori tojetaarucuajanaa jiyanohua maninia.

³ Jiyanojia Pueyaso quiniuucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu niajaniyajanaa cua tojitiare quiarijia. Niaa jaara Pueyaso cumaaca masequiaari nocua nia tiuushacari, nojuajaari puetunu niajaniyajanaa jiyatequiaari tamaatia poonijiosano miijiaca nia quiniuria. Naaratej, majaari tama nia cuaqueyajaaja nia jiyatenu paniniu socua maninia quiijiaca nia quiniuria tamasacajiniji. Saaja jacaria niishiriojojuaca nia quiri, maninia nia miiniuria nia poonijiosano, tezano Pueyaso sequequiaari nia miiniuriacuajani. ⁴ Pa cuaqueyajiniacuma, paari queraatia tamaatia casaa jiitiaani. Puetunu cunojuanaari tamaatia miiniu niishijia, maninia pa quiniuria. ⁵ Paari naajuhuaj, taa pa jiniacuma casaacuana. Queraatia Pueyaso muerasu pa quishacari, naajaa, paari juhua niquiriyatu cuaqueyani, Cristota rupuetootesano pa quishacari, maninia pa miitioonura.

⁶ Naatej, taa pa cuaqueyajiniacuma casaa tamaatia poonijiosano miiniu niishiyacuana, naajuhuaj, Pueyasoori puetunu na muera-sujuanaa na cumaaca niquitioquia, tamaatia miiniu niishijiaca pa quiniuria. Naaratej, cante Pueyaso cumaaca jiitiaani, Pueyaso niishitishano nojuaja na pohuatanurani, nojuaja cuaara seetanujuanaa pueya niquiara pohuataara na taacanuyaquinuti. ⁷ Naajuhuaj, cante Pueyaso cumaaca jiitiae pueya na naacunurani, nojuaja cuaara maninia naacuura pueya. Naajuhuaj, cante Pueyaso cumaaca jiitiae Pueyaso rupaa niishitiojona na quiniuriani, nojuaja cuaara maninia niishitiojora Pueyaso rupaa pueya niquiara. ⁸ Cante Pueyaso cumaaca jiitiae pueya na shiniujiumuriani, nojuaja cuaara pueya shiniujiuuria, maja pueya cartenura Pueyaso rupaa. Cante na jiitiasanojiniji nareja niquitiojorua casamijiuniucua pueyani, nojuaja cuaara juhuajaniya niquitiojora nareja, nojori na paniniutia. Naajuhuaj, cante Pueyaso pueya jiitianani, nojuaja cuaara jiitiaara Pueyaso pueya nojoriicua na tacaaniutia. Cante taraatia miishano pueya naacujuani, nojuaja cuaara shuquiriaatia na naacuuranoj.

Pueyaso tojijiaca nia quiri, taa Pablo rootaacuajani

⁹ Seetanujuanaa panitoojuaca nia quiri. Puetunu sesa casaajanaa soojea nia quiri. Majaari maninia miiniu nia tarinitianu cutara. ¹⁰ Jiyanohua panitoojuaca nia quiri, taa nia paniquiaa nia tarajanucuana. Niarta Pueyaso muerasu nia jiyatere juhua socua maninia pueya niajaniyajiniji. Majaari nojori nia rerequetenu.

¹¹ Tama nia cuaqueyajaaja nia cumaquiri maninia nia poonijionura pa Jiyaniijiara. Majaari taajecori nia quiniu.

¹² Shuquiriaatia nia quiri pueyaracaanu, nia niishishacari taa Pueyaso miiniutianiya jiyanoohua maninia na muerasuni. Saaja juhuajaniya nia rejeretare niaa jaara naquiya miishaare. Pueyaracaanu Pueyaso nia secojore. Majaari quenaaja nia tarinitianu na secojonu.

¹³ Niarta Pueyaso pueya jaara na panishano jiitiaequiri, nareja nia niquitiore nojori nia jiitiasanojiniji. Naacuajitij, nojori jaara rucoonaa quiri, nojori nia masuure nia tiacora.

¹⁴ Niaa jaara naquiya miishaariquia, majaari nia miitianaa nia sesacanu. Saaja nia secojore Pueyaso nojoriicuara, Pueyaso taraajenura nojoriicu.

¹⁵ Cante shuquiriaatia quiyacuaani, nojoritia nia shuquiririjuah. Saniniuuja, cante nujuqueyacuaani, nojoritia nia nujuquerejuhuaj.

¹⁶ Jiyanoootiojuaca nia quiriquia, jatiqi nia quiniuria maninia. Majaari tama nia cuaqueyajaaja nia jiyatenu juhua socua maninia quiyiaca pueya tamasacajiniji. Majaari pueya rerequeteja nia quiniu. Saniniuuja, tama nia cuaqueyajaaja nia mueyashitiri cutara, maninia nia rupuenura paniyaquishoo pueyahuah. Majaari tama nia cuaqueyajaaja nia jiyatenu juhua socua niishijiaca pueya nia quiniuria tamasacajiniji.

¹⁷ Niaa jaara sesa miishaariquia, majaari nia paraa nia naminiu saniniuuja. Puetunu nia miishanojuanaa cuaara quiuria maninia puetunu pueya niquiarajanaa. ¹⁸ Maninia nia quiri puetunu pueyat�anaa, majaari nojori ruutaquenu niaacuara. ¹⁹ Socua cua tojtiare cua panishano cuarta Pueyaso pueyanaa. Niaa jaara sesa miishaariquia, majaari nojori nia naminiu. Juhuajaniya nia rejeretare saaja. Pueyasocuajaari niaacua naminutianiya nojori. Pueyaso sequesanocuajaari naa naajiotasano quiya na rupaajinija:

“Quiria nia tarinitiare puetunu sesa nojori miishanojuanaa niajaniya.

Janiyacuajaari nojori naminutianiya niaacuani”.

Cua tojiri. Pueyasojuanacuajaari naa sequequiaari. ²⁰ Naaratej pueyanaa, majaari nia paraca nia naminiu. Saaja maninia nia miiri nojori taa tariucuacaanu Pueyaso Rupaajinija naajiotasaquaaricuajani. Naa sequeyari:

“Quia paraca jaara miaajeya, quia miaqueterenoj. Jaara jiyamueyahuah, quia raatorenjoj. Quia jaara naa na miiritij, tama nojuaajarrijia jiyanoohua caririquiniutianiya noojiajinija”.

²¹ Naacuajitij, niaa jaara sesa miishaariquia, majaari nia juaaniu, niaa mariqui sesa mijiria quirijiaariuhuaj. Saaja maninia nia miiriquia nia paraca. Naacuajitij, niaari Sesaaca shocotanutaniya.

13

Pa jiya jiyaniijianucua tojijiaca pa quirij

¹ Pueyanaa, mijiria nia jiyaniijianucua tojitiacija nia quiri. Nojricuajaari Pueyaso jiyatesano, nia jiya jiyaniijianucua nojori quiniuria. Majaari pueyano na naata jiyatesaanu jiyaniijia na quiniuria, Pueyaso jaara paniyaquiri. ² Naacuajitij, cante mijiria jiyaniijianucua tojiyashijiani, nojuaajaari jiyaniijiara Pueyaso jiyatesano tojiyashijia. Cante naa mijiria jiyaniijianucua tojiyashijiani, nojuaajaari

saniitiosaanutaniya. ³ Paa jaara maninia mijiaca quirini, ¿paatucua casaara pa jiyaniijianucua puereriquiani? Jiyaniijianucuaari maja na pueretenu maninia mijiaca. Sesa mijiaca cuaara na puereera cutara, sesa mijiaca nojori quiniuucua. Saaja maninia mijiaca nia quiri. Naacuajitij, nia jiyaniijianucuaari maninia poojotanutaniya niajaniyajiniji. ⁴ Nojoricuajaari Pueyasora poonijionaa, maninia nojori jiitianura niajaniya. Saniniuujia, niaa jaara sesa miiri, nia puerere cutara. Jiyaniijianucua pueyari maja najuhuanaj. Nojoricuajaari jiyaniijianucua cumaacaraca, sesa mijiaca nojori saniitionura. ⁵ Naacuajitij, nia jiyaniijianucua tojijiaca nia quiri maja nia saniitiosaanura, naajuhuaj, maja Pueyasor tojiyashijiaca nia quiniuria. ⁶ Naajuhuaj, nia cumaneeca-jiniji nia niquitiore nia jiyaniijianucua, taa nojori sequequia nia niquitionuracuajani. Nojoricuajaari Pueyasora poonijioquiaa pueyaracaanu, maninia nojori jiitianura niajaniya. Naaratej, nojoriiri cumaneeca masequiaa niajaniyajiniji.

⁷ Naaratej, puetunu nojorijanaa nia niquitiore, taa nojori sequequia nia niquitionuracuajani. Naacuajitij, niaa jaara seqresaare nia cumaneecajiniji nia niquitionura nia jiya jiyaniijiara, nareja nia niquitiore. Naajuhuaj, cumaneeca jaara jiya jiyaniijiara masenu cojiritiasaare, casami nia masesacari, majaari nia juanui. Naajuhuaj, majaari nia jiyaniijia nia sesacanu, jiyaniijianucuara na jiyatesano pueyanio. Majaari nojori nia rerequetenu. Naajuhuaj, nia jiyaniijianucua tojijiaca nia quiri, nojori quiniuucua Pueyasor jiyatesano nia jiyaniijianucuara.

⁸ Pueyanaa, majaari najuhuana casami nia poonu, niaa jaara cumaneecajau quiri. Saniniuujia pueyanaa, maja cutaraari niarta pueya paniniu nia puecanu. Pueyaracaanu nojori panijiacu nia quiri cutara. Naacuajitij, cante narta pueya panijiani, nojuajaari Moisés Rootasano tojijia cutara. ⁹ Supuetana Moisés cuajaari naa naajiotquiaari puer, Pueyasor seqesano nojuaja:

“Maja niyacaraca maaji numuetucunu. Maja pueyanio monu. Maja nohuasejonu. Maja tamasaca jiitiasano casamiicua jiaatiaja nia quiniu”.

Socua queraatia na rootasanoori quiya. Niocuajaari socua pa tojishocoriquiano na rootasano:

“Quiarta pueyanio panijia quia quiri, taa quia paniya tama quia cuaque-yacuaani”.

Paa jaara saaja nio Moisés rootasano tojijia quirini, paari tarí puetunu na rootasanojuanaa tojijia quiyani. ¹⁰ Cante seetanujuanaa pueyanio panijiani, nojuajaari maja sesa na miiniu narta pueyanio. Naaratej, paa jaara panijia quiriquiani, paari puetunu Moisés Rootasano tojijia cutarani.

¹¹ Pueyanaa, nio nia niishiri. Pa Jiyaniijia rijionu juuca pajaniyari tarí quenaacoya. Cuno juucaari quiarijia socua cateca quiya paa jaara nocua tiuuquiaarini. Naaratej, cante juhua maqueyajaani, nojuaja cuaara niucuaara, pa Jiyaniijiara na poonijionura. ¹² Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa Jiyaniijiaari quera tiuquiuhua. Nojuaja cutaraari na cumaacata pa cuhuatanutaniya. Naaratej, puetunu sesa pa miiniujiana pa cartere. Majaari juhua ninishiqui quiyacu pa quiniu socua. Taa pueya cushiquiaa na toque tariquiuaji na poonijionuracuuaani,

naa nia cushiri Pueyaso cumaacajuhuaj. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniuriajuhuaj.¹³ Seetanujuanaa juhua Pueyaso pueya nia quiri. Majaari juhua ninishiqui quiijiaca pueya nia quiniu. Niaacuajaari cuhuashiqui quiijiaca. Naaratej, majaari mashaasequenuujuaca nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatiajaca nia quiniu. Majaari sacuaraatia casaa miiniuucua nia jiitiniu. Majaari juayonuuujutajaca nia quiniujuhuaj. Naajuhuaj, majaari tamonu pueyano jiitiasano casaacua nia jiaatianu. Naajuhuaj, majaari nia juaaniu tamonu jaara nia shocotare.¹⁴ Naacuajiti pueyanaa, majaari nia niishiriojonu nia cuaqueya nia shuquiritiniuria taa nia paniya sacuaraatia nia miiniuriacuajani. Saniniuujia, maninia cutaraari Jiyaniijia Jesucristo niishitiaja nia jiitianura, na cumaacanio. Naa nia miishacaritij, niaari juhua soldadouha miaquetoojotaja toque cushiyojua, maja Sesaaca miitiniuria sesa niajaniya.

14

Maja quiarta Pueyaso pueyacuara nia rimiaaquenu sacuaraatia

¹ Pueyaso pueyajinjinio pueyano jaara Pueyaso rootasanojiniji taacanuujuua quiriquia pueyaracaanu, naajaa, na rupuejaca nia quiri. Majaari nata nia juayonuujutanu tamaatia na niishiriojosacari Pueyaso rootasanojiniji.² Naacuajiti, Pueyaso rootasano niishijia nia quishacari cutara, niaa naasucuaari niishiya nia naata puetunu miaquesanojunaanu miaquenu cutara. Saniniuujia, cante Pueyaso rootasanojiniji taacanuujuani, nojuaja naasucuaari jiyaniya na naata saaja na natau miaquenu, na shuquiritiniuria Pueyaso.³ Cante puetunu casaajanaa miaqueja cutarani, nojuaja cuaara soyaquiiria narta Pueyaso pueyano, cante na miaquesano miaqueyashijia saniniunijia. Naajuhuaj, cante puetunu casaajanaa miaqueyashijiani, nojuaja cuaara sesacaquiiria puetunu casaajanaa miaquejacajanaa. Cuno pojori, shu miaquejaca cutarani, nojoricuajaari Pueyaso jiyatesano na muerasu nojori quiniuriajuhuaj.⁴ ¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuajaari nojori sequenutaniya, nojori miishanote maninia, sesa soj. Naajuhuaj, pa Jiyaniijia Jesucristocuajaari cumaacaraca, na muerasu na jiyatenura maninia quiijiaca nojori quiniuria.

⁵ Cua tojiri pueyanaa, noojiaqueya Pueyaso muerasujinjinioori niquiriyatu juuca semaanajiniji jiyatequiaa nojori maniniuhuaqueetanura Pueyaso. Tamasacaari saniniuujia sequequiaa, puetunu juucajanaanaari maninia, Pueyaso pa maniniuhuaqueetanura. Puetunu niajaniyajanaa cuaara taacanuyaquiiria tama nia miishanojinijiaaja, maja nia macuhuajetenura nioojia.⁶ Cante niquiriyatu juuca semaanajinia jiyatequiaa samaatenu juucara Pueyaso na maniniuhuaqueetanura, maniniacuajaari. Nojuajaari naa miiquiaa Pueyaso na shuquiritiniuria. Naajuhuaj, cante puetunu casaajanaa, maniniacuajaari. Pueyaso na shuquiritiniuria, nojuajaari na miaquequiaa nocuara na secojonu nuhuaji. Naajuhuaj, cante shu miaqueyaquijia Pueyaso na shuquiritiniuriani, cuaara naa miria. Nojuajaari Pueyaso shuquirityahuaj na secojosacari Pueyaso, na natau na miaquenura.

⁷ Seetanujuanaa pueyanaa, majaari pa quiniu tama pajaniyarajaaja. Naajuhuaj, majaari quenaaja pa shaajenu tama pajaniyarajaaja. ⁸ Paa jaara mijiria quiyani, paari pa Jiyaniijiara rishiquiaani. Paa jaara cu-soyaren, paari pa Jiyaniijiara cusoqueeni. Naaratej, paa jaara saminio quiyajaani, naajuhuaj, paa jaara taricuca macu quiyani, paari pa Jiyaniijiia jiitiasanoni. ⁹ Jesucristocuajaari cunora cusoquiaari, macunucua Jiyaniijiia na quiniuria. Nojuajaari samiitiaquiaariuhua saminiucua Jiyaniijiia na quiniuriajuhuaj. Naacuajitij, nojuajaari pa Jiyaniijiajanaa cutara.

¹⁰ Naaratej, saaja niquiriyatu Jiyaniijiia pa jiitiasacari, ¿paatucua casaara parta Pueyaso muerasu soojeaca quirini, nojori miaqueyaquini-uucua shuni? Naajuhuaj, ¿paatucua casaara parta Pueyaso pueya sesacajaca quirini, nojori miaqueniuucua puetunu casaajanaani? Nia niishiri pueyanaa. Puetunu pajaniyajanaari nujuatejosaanutaniya Pueyaso tacojini, Pueyaso nequesoreenura pajaniya. ¹¹ Tariucuacaanu pa Jiyaniijiia sequesanoori naa naajiotasano quiya na rupaajinia:

“Seetanujuanaa sequeyanijia, puetunu pueyajanaari cucuara mojoguetaconutaniya, nojori niishishacari janiyari seetanujuanaa Jiyaniijiajanaa cutarani. Puetunu nojorijianaari sequenutaniya: ‘Jiyaniijiiana, quiaari Pueyasojuanaa cutara! Puetunu quia miis-hanojuanaari maninia’”.

¹² Naacuajitij, paari niishiyani, puetunu pajaniyajanaari Pueyaso ri-ruhanenutaniya tamajaajani, na nequesoresacari pajaniya.

Maja sesa pa miitiniu parta Pueyaso pueya

¹³ Naacuajitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijiaca quiri parta Pueyaso pueyajinji saniniunijia. Tama nia cuaqueyajaaja nia cojuare maja niarta Pueyaso pueya niquiara nia miiniuria nojori jiynishano sesa casaa. Nojori jaara saniri miiniu nia miishanocuua, naacuajitij, niaari tari sesa miitirii nojori Pueyaso niquiara. ¹⁴ Janiyacuajaari niishiyani, majaari quenaaja tamonu sumatuu quiniu pa miaquesacari sesa mijiacara na jiyatenura pajaniya Pueyaso niquiara. Janiyari naa niishiyani cua Jiyaniijiia Jesu rupaacua tiuujia cua quiniuucua. Saniniuujia, cante jiyaniyanijia tamonu sumatuu na naata na jiyatenu sesa mijiara nojuaja jaara na miaquere, nojuaja cuaara miaqueyaquirianoj. Jaara na pueresano saniri miaquenu, nojuajaari tama noojajaaja macuhuanutaniya. ¹⁵ Naacuajitij, paa jaara parta Pueyaso pueyano macuhuajetere pa miaqueniuucua na miaqueyaquishoo casaani, majaari seetanujuanaa parta Pueyaso pueyano panjia pa quiniu. Jesucristocuajaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casaa pa miaquesacari na niquiarani? ¹⁶ Naacuajitij, majaari nia shanacunu Pueyaso tojiyashijica pueya sesacanura Pueyaso rupaa, nia miaquesano casaacua nia juayonuujutanuucua niarta Pueyaso pueyata. ¹⁷ Seetanujuanaa nia sequeyanijia, majaari Pueyaso muerasu pa quiniu casaa pa miaqueyaquinuucua, casaa pa ratuyaquinuucuanio. Pueyaso muerasu pa quishacari, nojuaja cutaraari paniya maninia mijiaca pa quiniuria, jatiqui pa quiniuria juhuajaniya. Pa panitiaajaariuhua shuquiriaatia quiyiaca pa quiniuria. Paacuajaari na Sohuanu jiitiaani, naa maninia

pa quiniuria. ¹⁸ Paa jaara naa quiqiaca quiriquiani Cristora pa poonijiosacari, Pueyasoori pa shuquiritaa. Naacuajitij, Pueyaso tojiyashijiaca pueyari majaa na rerequetenu quiniutaniya pajaniya.

¹⁹ Naarate cuarta Pueyaso pueyanaa, jiyanohua nia saniniujiuri taate nia naata maninia rupuetosano quiniu puetunu niarta Pueyaso pueyatjanaani. Naacuajiti nia naata tama cumaquitioonuujaaja maninia Pueyaso muerasu nia quiniuria. ²⁰ Majaari nia sesonu Pueyaso miishano niarta Pueyaso pueya jiuujiajinia, saaja nia miaquenuuucua nojori niquiara nojori pueresano casaa. Seetanujuanaa, Pueyasora, puetunu miaquesano casaajanaari maninia pa miaquesocoriquiano. Saniniuujia, tama nia cuaqueyajaaja nia cojuare cutara, majaa niarta Pueyaso pueya niquiara nia miaquenura nojori miaquesoo casaa, niaa mariqui nojori cushitioreeri. Naacuajitij, majaari nia naata maninia rupuetosano quiniu niaa jaara nia miishanota taraajoriquia niarta Pueyaso pueya. ²¹ Naacuajitij, socua maninia juhuari majaa pa miaquenura parta Pueyaso pueya pueresano casaa. Naajuhuaj, majaari pa ratunu jereeca mashaca nojori niquiara, cuno naa pa miishano jaara quiri nojori shiniujiuniuria sesa nojori miiniuria. Naajuhuaj, pa cartere puetunu parta Pueyaso pueya jiyanishano sesa miiniu casaajanaa, majaa nojori pa taraajonura nojori ruparetanura pocuaji. ²² Naacuajitij, Pueyaso Rupaacua nia tiuushacari seetanujuanaa, niaa jaara niishiya nia miishanoori majaa sesa, tamajaaja nia miirinioj saaja Pueyaso niquiara. Shuquiriaatia quijia cutaraari noo pueyano, cante niishiyani na miishocoriquiano casaari maninia Pueyasora, majaa noojia na macuhuajetenura na miiniu nuhuaji. ²³ Saniniuujia, cante niishirijoijiani na miaquenu panishano casaa naasucuaari sesa quiniutaniya Pueyasora, jaara naa niishirijoijiya, seetanujuanaa naa sesa quiniutaniyari taa na niishirijoijacuajani. Paa jaara casaa miaquere seetanujuanaa pa tiuyaquiniutia Pueyasoocuani, pa miaquesacari, paari taris sesa miirii Pueyaso niquiarani. Seetanujuanaa, puetunu pa miishanouanaari sesa, paa jaara pa taacanuunuta na miiri奎ani. Naaratej poojiaari macuhuajenutaniya.

15

Parta Pueyaso pueya pa shuquiritiri, majaa tama pa cuaqueyajaaja

¹ Noojiaqueya parta Pueyaso muerasuuri juhuanojuaja seetanujuanaa Pueyaso Rupaacua tiuyashijiaca. Naacuajitij cuarta Pueyaso pueyanaa, pajaniya, cante taris seetanujuanaa Pueyaso Rupaa tojijiacaculaani, pajaniya cuaara nojori rejeretaara juhuajaniya. Paa jaara socua Pueyaso Rupaa niishijiacaculaani, nojori pa cumaquiri. Majaari pa niishirijojonu tama pa cuaqueyajaaja pa shuquiritiniuria tamajaaja.

² Puetunu pajaniyajanaa cuaara niishirijojoora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojijia na quiniuriajuhuaj. ³ Paacuajaari niishiyani, majaari quenaaja pa Jiyaniija Jesucristo niishirijojonu quijia tama na cuaqueyajaaja na shuquiritiniuria. Saniniuujia, nojuaja cutaraari taraatia miiniu rejeretaquiaari na rupuenura mijiria quiniae pueya, nojori na jaariutianura Sesaaca. Naacuajitij, nojuajaari nio tariucuacaanu tama nojuajinijiaaja naajiotasano tohuateequaari:

“Cua Quenaa, cuno pojori, canapuete quia sesacajacani, nojoriiri cua sesacaajuhuaj, cua miiniuucua quia panishano”.

⁴ Seetanujuanaari pueyanaa, puetunu tariucuacaanu Pueyaso Rupaajinlia naajiotasanojuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaa-janaa. Pa cumanijiaajaariuhuaj. Naacuajitij, paari juhuajaniya sashiya pa Jiyaniijiani. ⁵ Pueyasocuajaari pa cumaquinia, maninia rejeretajaca pa quiniuria, cumanijiasano pa quiniurajuhuaj. Nojuaja cuaara nia jiy-ateera jiyanoojiaca nia quiniuria taa Cristo quiquiaari jiyanojiacuaani, rupuetoojuaca nia quiniuria niarta Pueyaso pueyata. ⁶ Naacuajitij nia naata pa Que Pueyaso, mariyata pa Jiyaniijia Jesucristo manini-uhuaqueetanu, juhua niquiriyatu pueyano, maninia rupuetoojuaca nia quishacari.

Pueyaso rupaari maja saaja Judiocuacara

⁷ Pueyanaa, jiyanoootiojuaca nia quiriquia, taa Jesucristo jiyanoouquia pajaniyacuaani, maninia rupuetosano nia quiniuria. Naacuajitij, pueyari Pueyaso timitianutaniya nojori niquishacari Judiocuaca taucuacata Pueyaso maniniuhuaqueetaano jatiqui. ⁸ Janiyari seetanujuanaa nia sequeyani, Cristoorigi mijiria niquiaari Ju-diocuacaacua, na tohuatenura Pueyaso sequesano nojori supuetanaa. Tariucuacaanu Pueyaso sequesanoori seetanujuanaa. Nojuajaari maja na sequesano na jatanu. ⁹ Judiocuacara Cristo miishanoori taucuacara quiquiaarijuhuaj, nojori maniniuhuaqueetanura Pueyaso, na jiyanooniuccua nojorijiuhuaj. Tariucuacaanu Pueyaso Rupaajinlia supuetana David naajiotasanoori naa quiyajuhuaj:

“Maninia quia miiniuucua janiya Pueyasonaa, janiyari quiajaniyajiniji poojotanutaniya maniniani taucuaca jiyacajinlia. Maninia quia miiniuucua janiya, janiyari quia timitianutaniya cua jaaqueque-josanotani”.

¹⁰ Tamaqui Pueyaso Rupaajinlia naa naajiotasanoori quiyajuhuaj:

“Pueyaso niishiyashijiaca taucuacanaa, Pueyaso saquiriojosano pueya nia cojiri, mariyata jatiqui nia shuquiritianura pa Pueyaso”.

¹¹ Pueyaso Rupaajinlia, supuetana David naajiotasanoori naa sequeyajuhuaj:

“Pa Jiyaniijia Pueyaso nia maniniuhuaqueetare, puetunu niajaniyajanaa, tamaatia rupaaca pocuajaca taucuacanaa. Pueyasora nia jaaquequenuure puetunu jiyacajinlia quiniaas pueyajanaanaa, maninia na miiniuucua pajaniya”.

¹² Supuetana Isaías naajiotasanojinijijiuhuaj, paari niishiyani Pueyaso ri taucuaca jiitianu panijia pueyaracaanu, maja saaja Judiocuaca. Naaratej, Isaásri naa naajiotaqquiaari:

“Supuetana Isaí niyanujiniji supuenutaniyari pueya Jiitiana. Nojuajaari puetunu mijiria quiniaajanaa jiyaniijia quiriquiano. Puetunu jiyacajinjinio taucuacajanaari nocua tiuujjaca quiniutaniya”.

¹³ Pueyasocuajaari poojajinlia poonijiojua, juhuajaniya pa sashiniuria pueyaracaanu, nojuaja cuaara miirijaatijia puetunu na sequesanoju-naa pajaniyara. Pueyanaa, Pueyaso cuaara nia timitiiria jiyanojhua. Naajuhuaj, nojuaja cuaara nia jiitiaara juhuajaniya, canapuete nocua

tiuujiacacuajani. Naacuajitij, mijiria nia sashishacari, niaari shuquiri-
atia rejeretajaca quiniutianiya Pueyaso Sohuanu cumaquishacari nia-
janiya, seetanujuanaa nia niishishacari pa Jiyajijiaria pa rijionuucua
tacatenutaniuhua.

¹⁴ Cua panishano Pueyaso niquiohuanaa, naa cua naajiojinia cua
nacasusacari jiyano hua niajaniyatej, majaari nia jiyaniu janiyari
niaacuaji taacanuya jaani. Maja. Janiyacuajaari niaacua tiuyani ni-
aacuajaari seetanujuanaa maninia qui jiaca. Niaacuajaari Pueyaso
rupaa niishijiacaju huaj. Naacuajitij, nia naata tama nacasutoojonu-
juaja maninia, maninia rupuetoojuaca nia quiniuria Pueyaso niquiara.

¹⁵ Naajaa, qui rijia janiyari niaacuara naajiyani cua niishitiniuhuara
niajaniya tarijia nia niishishano. Cua jiyano ooturi, nio cua naajiojinia
jiyanohua cua nacasunuucua niajaniya. Naa nia rootaanijia Pueyaso jiy-
atenuucua janiya Neyanu Jesucristo jiyaramiquishano, taucuaca cua po-
huatanura na rupaa. ¹⁶ Pueyaso jiyatenuucua janiya nera poonijonara,
janiyari cunora Jesucristo rupaa pohuataquiaa taucuacan. Naacuajitij,
Pueyaso Sohuanu poonijonuucua nojori jiuujajin, nojoriiri Pueyaso
shuquiritasano muerasu quiniutiani yajahuaj.

¹⁷ Pueyasora cua poonijiosacari, janiyari jiyano hua timitiaa Jesu-
cristoni, cua niquishacari taa taucuaca tiuquiaa na rupa acuani.

¹⁸ Majaari cua timitianu tama cua miishano juaaja. Janiya cutaraari
Jesucristo miishano timitiaani. Nojuacuajaari taucuaca tiuutiquiaa
na rupa acu. Nojoriiri nocua tiuquiaa nojori niquiara cua pohu-

atasacari na rupaa, naajuhuaj, Pueyaso Sohuanu cumaacata cua mi-
niuucua nojori niquiara. ¹⁹ Nojori niquishacari Pueyaso Sohuanu
cumacata cua mijiosano, nojoriiri niishi quiaa cua pohuatasano or
seetanu rupaajanaa. Janiyari pocuaji Tacuna Jesucristojiniji tari po-

huataquiaari puetunu tiquiyocuajanaani, Jerusalén tiacajiniji, puetunu
Iliria jiyajiniarajanaan. ²⁰ Naa cua pohuatasacari pa Jiyano Jesucristo-
jiniji puetunu cuno jiyacajinajanaatej, janiyari pueyaracaanu pohu-

ataquiaari cuniquini, tee Jesucristojiniji tojiyaquisha aquiaari juhuano-
juajacuajani. Majaari cua pohuatanu paniniu quiquiaari tee tamasa-
ca pohuataquiaari tari Jesucristojiniji. ²¹ Naa cua pohuatasacari Jesu-

cristojiniji cuno pueya niquiaratej, janiyari nio tariucuacaanu Pueyaso
Rupaajin, naajiotasano tohuateeriquiaani. Naa sequeya Jesucristojiniji:

“Nojuajiniji pohuatasoojua pueyari nojuajiniji pohuatasaanutaniya.
Nojoriiri jiyacari niishiniutiani cante nojuajani”.

Pablo naquerejosacari Roma tiacajinira

²² Pueyaracaanu nio jiyacajin, cua pohuatasacari Jesucristojiniji,
majaari jeya cua quiniu quiriquiaa nia niquiniuucua cua quianura.

²³ Qui rijia cutara, janiyari Jesucristojiniji pohuatanu tucuatarucuaa
tarini, tee Jesucristo rupaa tojiyaquisha aquiaari juhuano juajacu-

jani. Janiyari Espania jiyajin, pohuatanu paniya Jesucristojiniji-
uhuaj. Queraatia marijiaari tari cua shocojocanu pueyaracaanu cua

naquerejosacari niaacua cua quianura. ²⁴ Naacuajitij, Espania jiy-
ajinira cua quiasacari, janiyacu nia tiacajin jateemani. Janiya jaara

pasaja camueenusee niaata shuquiriaatiani, na nuhuaji, janiyari
paniniutiani yani nia naacunura janiyari, cua quianura Espania jiy-
ajinira. ²⁵ Janiyari coteenu Jerusalén tiacajin jatacatenutaniuhua tii

quiniaa parta Pueyaso muerasu cua niquitionuhuara cumaneecani, niya quiniaa parta Pueyaso pueya niquitiojosano nojoriria.²⁶ Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanohua maninia miya. Nojoriiri tama nishirijojonuucanujuuaaja nareja na cumaneeca niquitiojonura Jerusalén tiacajinia quiniaa casamijiuniucua Pueyaso pueyara. Cunora, nojoriiri quiarijia na rerateya cuata na jiyarosocoriquiano.²⁷ Nojoriiri naa miya nojori niishirijojosacari, maniniacuajaari nojori naacunura narta Pueyaso pueya. Seetanujuanaa maniniacuajaari nojori miishano. Judiocuacaari maja na jamuenu quiquiaari Pueyaso rupaa pohu-atasaanura taucuaca niquiara. Naaratej, taucuaca cuaara saniniuujia quiarijia naacuura casamijiuniucua Judiocuaca, nojori jiitiasano cumaneecata.²⁸ Naacuajitij pueyanaa, janiyari nojori jiyarosocoriquiano cumaneeca niquitionutaniya Jerusalén tiacajinia parta Pueyaso pueya jiitianaani. Na nuhuaji, janiyari Espania jiyajiniara quianutaniya cutarani. Cua quiasacari, janiyari nia tiacajinia tacanutaniyani cua niquinuriua niajaniya.²⁹ Janiyari seetanujuanaa niishiyani, Cristoori cua naacunutaniya maninia pa shuquiriniuria jatiqui, niaacua cua tiuquishacari.

³⁰ Cuarta Pueyaso pueyanaa, cua Jiyaniijia Jesucristo nia jiitianuu-cuahuaj, mariyata Pueyaso Sohuanu panitiootesacari pajaniya, janiyari jiyanohua paniyani nia cojiniuria janiya, Pueyaso nia secojonuta cucuara.³¹ Cucuara nia secojore Pueyaso, na cojuanura janiya Jesucristo rupaa paraa Judiocuacaacuaji, Jerusalén tiacajinia cua quiasacari. Naajuhuaj, nia secojore Pueyaso, Jerusalén tiacajinia quiniaa Pueyaso pueyacuara. Nojoriicuara nia secojore, nojori masenura shuquiriaatia narta Pueyaso pueya taucuaca jiyarosocoriquiano cumaneeca nojoriria.³² Naajuhuaj, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua quishacari niaata, janiyacua tii samaatesee nia shuriucuani.³³ Pa jiyanoojia Pueyaso cuaara maninia jiitiaara puetunu niajaniyajanaa. Cuaara naa quiiriatej.

16

Nata quiniaata Pablo saruhuatasacari nojori niishishano pueya

¹ Cuarta Pueyaso pueyanaa, nio maaji niaacua tiuquiniutianiyani, nojuajaari maninia maaji, Pueyaso tojija. Na sesaari Febe. Nojuajaari Cencrea tiacajinia Pueyaso pueya maanu naacujua maninia.² Pa Jiyaniijia panijiaca nia quishacari, nia paniniutia nia masuure nia tiacora nio parta Pueyaso muerasu naacuna maaji. Niocua nia tiaco jiitiarenoj, taa nia jiitiaquiaacuua parta Pueyaso muerasuni, maninia na quiniuria na camueenujusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujuacuua. Cua naacujuajaariuhuaj.

³ Quiria nia saruhuatate Priscila, neyaca Aquilanio. Nojoriiri cua cojiniaa pa Jiyaniijia Jesucristora poonijionura.⁴ Nojoriiri tama nojori cuaqueyajaaja panitiaquiaari cucuara, nojori tacunura cucuaji cua moyaquishaanura. Janiyari cunora jiyanohua nojori timitiaani, naa nojori jiyanootiuniucua cucuatej. Majaari saa janiyaja nojori cua timitianu. Seetanujuanaa puetunu parta Pueyaso muerasu taucuacajinjiniojuanaari nojori timitiaajuhuaj, naa nojori miiniuucua.⁵ Quiria

nia saruhuatarejuhua parta Pueyaso pueya, noo pojori Priscila, Aquila tiajinia rerejoquiaa Pueyaso secojonuunuratej. Quiria nia saruhuatarejuhua cua rupuena Epéneto. Nojuajaari coteenujuanaa Jesucristoocua tiuquotaari Asia jiyajinie. ⁶ María nia saruhuatare quiriajuhuaj. Nojuajaari jiyanoehua poonijioquiaari niaara. ⁷ Quiria nia saruhuatarejuhua Andrónico, Juniasnio. Nojoriiri cuarta Judiocuaca. Nojoriiri cuata nujuatejosaaquiaari nujuatejojuajinie, canaa pohuatanuucua Jesucristojiniji. Puetunu cuarta Jesucristo jiyaramiquishano pueyajanaari nojori panjiacahuaj. Andrónico, Junias, nojoriiri socua coteenu janiyajiniji tiuquotaari Jesucristoocua.

⁸ Nia saruhuatarejuhua Ampliato. Nojuajaari cua panishano pueyano, Jesucristoocua na tiuuniucua. ⁹ Naajuhuaj, quiria nia saruhuatare Urbano. Nojuajaari pa Jiyaniijia Cristora poonijionajuhuaj. Cua rupuena Estaquis nia saruhuatarejuhuaj. ¹⁰ Apeles nia saruhuatare quiriajuhuaj. Nojuajaari puetunu casaajanaa rejeretaja cutara, Jesucristoocua tiujia na quiniuucua. Aristóbulo tiajinia quiniaa pueya nia saruhuatare quiriajuhuaj. ¹¹ Naajuhuaj, quiria nia saruhuatare Herodión, parta Judio pueyano. Naajuhuaj, Narciso tiajinia quiniaa pueya nia saruhuatare quiria, noo pojori pa Jiyaniijiaacua tiujiaca pueyatej. ¹² Trifena nia saruhuatare quiria, Trifosajuhuaj. Cuno maajipohuari pa Jiyaniijiaara poonijionuujuaca. Naajuhuaj, pa panishano maaji Pérsida nia saruhuatare quiria. Nojuajaari jiyanoehua poonijiojua pa Jiyaniijiaara. ¹³ Rufo nia saruhuatarejuhuaj. Nojuajaari maninia tojijia pa Jiyaniijia. Na nucua nia saruhuatarejuhuaj. Nojuajaari juhua cua nucua quiquiaari quiria. ¹⁴ Nio pojori quiria nia saruhuatarejuhuaj, Asíncrito, Flegonte, Hermes, Patrobas, Hermasnio, mariyata nojoritia quiniaa parta Pueyaso pueyanio. ¹⁵ Naajuhuaj, nio pojori nia saruhuatare quiria, Filólogo, necocua Julianio, Nereo, na rimiatunio, Olimpasjuhuaj, mariyata nojoritia quiniaa parta Pueyaso muerasunio.

¹⁶ Niarta Pueyaso pueya nia saruhuatare seetanujuanaa nia paniniutia nojori. Puetunu niiquijinio parta Pueyaso pueya maapuejanaari cua sequecanuni cua saruhuatanura niajani.

¹⁷ Cuarta Pueyaso pueyanaa, nia numooteyanijia, jiyanoehua nia cojuare tama nia cuaqueyajaaja najuhuana tamaatia niishitiojonuujuaca pueyacuaji. Nojoriiri Pueyaso pueya maapue cushitiojouquia, sesa nojori niishitiojosanota. Naacuajitij, Pueyaso pueyari juatatioquia. Majaaari nojori niishitiojonu pueya taa coteenujuanaa nia niishitiosaaquiaari seetanu rupaajanaa cutarani. Naa sesa niishitiojonuujuacaacuaji nia rupatere. ¹⁸ Nojoriiri maja seetanujuanaa na poonijionu pa Jiyaniijia Jesucristora. Nojoriiri poonijioquiaa tama nojori panishanojuaja nojori masenura. Najuhuana shanohua nojori pohuatasanota, nojoriiri niishiyashijiaca pueya sapojoquia. ¹⁹ Puetunu tamonu jiyacajinijinio parta Pueyaso pueyajanaari niishiya, niaari seetanujuanaa Jesucristo rupaa tojitiajaca cutara. Naaratej, janiyari jiyanoehua nia timitiaani. Naajuhuaj, janiyari paniyani niishiyashijiaca nia quiniuria, saaja seetanu rupaajanaa tojijiaca nia quiniuria, maninia mijiaca nia quiniuriajuhuaj. Saniniuujia, sesa niishitiojosano niishiyashijiaca nia quitiriquiani, maja sesa mijiaca nia quiniuria. ²⁰ Naacuajitij, poojia cajitijia Pueyasoori nia cumaquinintianiya, Satanás nia shocotanura na sapojosacari niajaniya juucua. Niaari juhua na tanacunutaniya

jiyocuara, Pueyaso tojijiaca nia quiniuucua. Pa Jiyaniijia Jesu cuaara nia cumaquiiria, shuquiriaatia nia quiniuria.

²¹ Timoteo, cuata poonijiona Jesucristorani, nojuajaari cua sequeya nera cua saruhuanura niajaniya. Cuarta Judiocuaca Lucio, Jasón, Sosipater, nojoriiri nia saruhuataajuhuaj.

²² Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiayrosocoriquiano. Janiyari nia saruhuataajaaniuhuaj Cristoocua tiujia cua quishacarijuhuaj. Niojuanaa, pueyanaa.

²³ Parta Pueyaso pueyano Gayoori nia saruhuataajuhuaj. Nojuajaari na tiajinia cua quiniuria cua masuucanu. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquijiosacari nio tiacajinia. Parta Pueyaso pueyano Erastoori nia saruhuataajuhuaj. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoori nia saruhuataajuhuaj.

²⁴ Pa Jiyaniijia Jesucristo cuaara cumaquiiria puetunu niajaniyajanaa.

Pablo maniniuhuaqueetasacari Pueyaso, quera na tucuatasacari na naajio

²⁵ ¡Pueyanaa, jiyanohua pa maniniuhuaqueetare pa Pueyaso! Nojuajaari na naata cumaquinu niajaniya, seetanujuanaa na muerasu nia quiniuria na rupaacua nia tiuushacari. Janiyari naa rootaquiaa niajaniyacuajani, cua pohuatasacari Jesucristojiniji. Pueyasojuanaacuajaari tarilia cua niishitiquiaari Neyanu Jesucristojiniji cua pohuatanura. Jiya shipiniyaquishaacarrijijoja, Pueyasoori jiyasohua tamajaaja na niishishano jiitiaja Neyanu Jesucristojiniji. ²⁶ Saniniujia, quiari naataja, paari niishiquiaarini, Jesucristocuajaari mijiria niquiaari puetunu pueyajanaa na jaariutianura Sesaaca. Tariucuacaanu Pueyaso sequencesano caminiuijuniaa naajionuutasanojiniji paari quiarijia seetanujuanaa na niishiya cutarani. Pueyaracaanu Quijia Pueyasocuajaari naa paniquiaari quiarijia pa niishiniuria Neyanujiniji. Quiarijiani, Pueyasoori Neyanujiniji pohuataniquiaa puetunu jiyacajinijnio pueya niquiarajanaa, Neyanuucua nojori tiuuniuria. Naa na pohuataniquiaarii Neyanu Jesu tojijiaca nojori quiniuria, Judiocuaca, taucuacanio.

²⁷ Pa Pueyasoori jiyanohua niishijia cutara. ¡Pueyaracaanu pa maniniuhuaqueetare nojuaja, maninia na miiniuucua pajaniya, Neyanu Jesucristoocua pa tiuushacari! Cuaara naa shuquiritiasaaria pueyara- caanutej.

COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Corinto pueya

¹⁻² Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sóstenesjuhuaj, canaari nia saruhuataani. Janiya Pabloni, Jesucristo jiyarosano na rupaa cua pohuatanura taa Pueyaso paniquiaaricuajani. Canaa niaacuara naajiyani, socua canaa niishitijonura niajaniya, Pueyaso saquiriojosano pueya nia quiniuucua. Niaari maninia quiya Pueyaso niquiara, Jesucristo nia rupuesacari. Niaari seetanujuanaa Pueyaso muerasu, puetunu jiyacajinia pueyatabajanaa, canapuete Jesucristoocua tiuujiacacuajani. Jesucristocuajaari nojori Jiyaniijia, pa Jiyaniijiajuhuaj. ³ Pa Que Pueyaso, pa Jiyaniijia Jesucristo cuaara cumaquirria niajaniya, juhuajaniya nia quiniuria.

Paari maninia miishaquaani Cristo pa rupuesacari

⁴ Maninia nia quiniuucua, janiyari pueyaracaanu Pueyaso sequequiaani “Paacarasho”. Pueyasocuajaari jiyanhua maninia miiquiaari niajaniya, nia rupuesacari Jesucristo. ⁵ Nia rupuesacari Jesucristo, Pueyasoori puetunu cumaquiquiaarrijanaa niajaniya na cumaacata, nia poojotanura puetunu na rupaajanaa, puetunu na rupaajanaa nia niishiniuriajuhuaj. ⁶ Maninia nia tojitasacari Cristojiniji pohuatasano, niaari maninia miishaquaari taa canaa sequequiaari niajaniyacuajani. ⁷ Naacuajitij, niaari tari masequiaari puetunu Pueyaso niquitionu panishanojuanaa, maninia na muerasu nia quiniuria, nocua nia jiaatianuta nia sashishacari pa Jiyaniijia Jesucristo tiuquishacariuhua. ⁸ Pueyasoori nia cumaquinutianiya pueyaracaanu, maja quenaaja niaacua casaa tiuutiasoo quiniuria, sesa nia miishanojiniji. Naacuajitij, pa Jiyaniijia Jesucristo jaara tiuquiriohua na ruuretajaca na saniitionura, niaa cutaraari juhuajaniya quiniutianiya. ⁹ Pueyasocuajaari maninia tohuateequiaa na sequesano. Nojuacuajaari pa sequequiaari pa cojiniuria Neyanu, maninia pa miishaanura Neyanutajuhuaj. Cuno Neyanuni, nojuacuajaari pa Jiyaniijia Jesucristo.

Pueyaso muerasu juhua tamasaca niquitioquiaari

¹⁰ Cuarta Jesuucua tiuuniaanaa, cua tojitiare. Pa Jiyaniijia Jesucristoori cua sequeteya nio. Maninia nia niishiriojore. Maja juhua tamasaca nia niquitioonu. Maja tamasaca niajaniya. Maninia nia niishiriojore, maja tamaatia. Nia jiuujiatioorejuhuaj. ¹¹ Naa nia sequeyanijia cuarta Jesuucua tiuuniaanaa, Cloe niquiohua pohuatanuuucua janiya niajaniyajiniji. Nojoriiri cua sequerucuua niaana juayonuujutaquiaa. ¹² Naa pohuatasaarucuua niajaniyajiniji: puetunu pueyajanaana tama sequequiaajaaja: “Canaari Pablo pueyani”. Tamasacanaari saniniuujia sequequiaacuahua: “Canaari Apolo pueyani”. Tamasacanaari sequequiaajaahuaj: “Canaari Pedro pueyani”. Tamasacanaari sequequiaajuhuaj: “Canaari Cristo pueyani”. ¿Naatee pueyanaa? ¿Casaara tamajaaja nia nia raquitijiquianuni? ¹³ ¿Majateeri nia niishiniu? Paari Jesucristo cuaqueyani. ¿Pa Jiyaniijia

cuaqueyateeri neequereresetanocuua? ¿Janiyateeri niaacuara cusoquiaari niyacutesanojiniani, cua pueya nia quiniuria? ¿Niaateeri cua sesajinia tiuquinijosaaquiaari moojiniajuhuaj? ¡Maja, cuarta Pueyaso pueyanaa! ¹⁴Janiyaquiiri namitia nia tiuquinijiyaquiquiaari moojiniani. Naacuajitij, majaari nia naata sequenu niaa cua sesajinia tiuquinijosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. ¹⁵Naacuajitij, majaari quenaaja tamonu na naata sequenu janiyari na tiuquiniquiaarini. ¹⁶Quera niyajetaanija. Janiyari Estéfanas tiuquinijosaaquiaarijuhua necohuatajani. Majaruhua socua pueya cua tiuquinijonu quiquiaari.

¹⁷Jesucristoori maja na jiyaronu quiquiaari janiya pueya cua tiuquinijonura. Cristo cutaraari cua jiyaroquiaari na rupaa cua pohuatanura. Majaari cua maniniushitiniu na rupaa cua pohuatasacari, pueya mariqui shanohua cua pohuatasanoocua tiuuri najuhuanaari. Cuaara tiuutiuuria cutara Jesucristoocua, na miiniuucua maninia pocuara. Pueyasoori pa jiyanoaquia saaja Jesucristo cusionuucua niyacutesanojinia pocuara.

Cristoori Pueyaso cumaaca jiitaa, Pueyaso niishitiajahuaj

¹⁸ Canaa pohuatasano Cristo cusionujiniji niyacutesanojinia pocuarani, cunoori juhua mosanucua pohuatasano shaajecoriquiano pueyara. Naajaa, Jesucristo rupaari Pueyaso cumaacaracacuaja na tojitiianaara, Pueyaso muerasura na jataniniuria pajaniya. ¹⁹Pueyaso sequencesanocuajaari naa naajiotasaaquiaaritit:

“Janiyari niishijiaca niishishano cushionutaniyani. Mijiria pueya niishishano jiyatenutaniya najuhuanaranija”.

Naacuajitij, cante mijiria pueya niishishanoocua tiuyani, nojuajaari maja na jiyanooshaanu quiniutianiya.

²⁰ ¿Pueyanoteeri jiyanoohua niishitiajaraca Pueyaso muerasura na jataniniuria pajaniya? ¡Maja! Niishijijanaa jaara jiyanoohua niishirijore, ¿pa naatate na sequencesanocua tiuuniu, Pueyaso na jiyanoootiniuria pajaniya? Maja. ¿Niishitijona rootasanote na naata Pueyaso pueyara jiyatenu pajaniya nocua pa tiuushacari? Maja. Naacuajitij, puetunu mijiria niishishanojuanaari najuhuana quiya Pueyasora. ²¹Pueyari maja na naata Pueyaso niishiniu quiquiaari tama nojori niishitiajataaja. Pueyasoori tama sequencequiaariajaa na niishitiajata cutara:

“Jaaja. Maninia naatej. Pueya jiyanooriiria saaja nojori tiuushacari cua Niyantuucua”.

Pueyari saniniuuja jiyaniya Jesucristo rupaari nareja sequencesanohuanajaj, tojishoo. ²²⁻²³Naaratej, cuarta Judiocuacaari maja Jesucristoocua tiuuniaara na quiniu ritia. Nojoriiri Pueyaso cumaacata miishano niquinii paniquia coteenu saaja. Cunora, nojoriiri canaa tojiti-aquiaquia canaa pohuatasacari Jesucristo mosaanujiniji niyacutesanojinia teetesano. Nojoriiri saaja sequencequia: “¿Pa Jiyaniijiaranotucua casaara naa cararaatia mosaareni?” Griego pueyari naajuhuaj. Majaari ritia nojori quiniu paniniu Jesucristoocua tiuuniaara. Nojoriiri saaja niishiniuucua jiaatiajaca. Nojoriiri jiyaniya Jesucristoori najuhuana cusoquiaari juhua moseeca. Naacuajitij, canaa pohuatasacari Jesucristo niyacutesanojinia mosaaquiaari, Judiocuacaari jiyaniya Jesucristoori cumaacaaju quiquiaari. Nojoriiri jiyaniyajahuaj Pueyaso Jiyarosocoriquianoori ritia Judiocuaca jiyaniijiara quiniutianiya cutara.

Majaari na niishitiuniu quijia Cristo cuaara coteenu miishaaria naquiya, jiyanooshano nojori quiniuria sesa nojori mijijsanojiniji. Griego pueyari canaa pohuatasano tojiyaquiquiaajuhuaj. Nojoriiri jiyaniya Pueyasoori niishiyashijia quiquiaari Neyanu na motenura.²⁴ Paa cutaraari niishiyani Cristoori pocuara cusoquiaari. Naacuajitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griego-huanio. ¡Pueyasoori jiyanolua niishijia cutara!²⁵ Pueyari jiyaniya Pueyasoori niishiyashijia quiquiaari. Cunora Neyanu cusojuquaiaari niyacutesanojiniaari. Naajaa, naacuajiti Pueyasoori pa jiyanoocquiaari. Pueyasoori jiyanolua socua niishijia cutara mijiria niishijiacajiniji. Pueyari jiyaniyajuhuaj, Pueyasoori cumueecaaaju quiquiaari Cristo cu-sosacari niyacutesanojinia. Naajaa, naacuajitij, ¡Cristoori Sesaaca shocotaquiaaricuaja! Pueyasoori jiyanolua socua cumueeca pajaniyajiniji.

²⁶ Cuarta Jesuucua tiuuniaanaa, niaacuajaari niishiya taamueca pueya nia quiquiaari pueya niquierani, Pueyaso sequencesacari niajaniya na muerasu nia quiniuria. Saaja secaja niajaniyajinjinioori niishijiaca quiriquiaa. Saaja secaja niajaniyajinjinioori tojishano pueya quiriquiaajuhuaj. Saaja secaja niajaniyajinjinioori jiyaniijianucua niquiohuacuajinio supueno quiriquiaa.²⁷ Mijiria quiniaa pueyara, Pueyasoori socua niishiyashijiaca pueya saquirijoquiaari, na muerasu nojori quiniuria. Naacuajitij, mijiria niishijiacaari tamajaaja caririquiniutianiya nojori jaara saquiriojinyaquishaare. Pueyasoori tojishoo pueya saquirijoquiaarijuhuaj, na muerasu nojori quiniuria, mijiria tojishano pueya caririquiniuria nojori jaara saquiriojinyaquishaare.²⁸ Pueyasoori soosano pueya saquirijoquiaarijuhuaj, tojishoo pueyanio. Pueyasoori naa saquirijoquiaari najuhuana quijiacia. Canapuete tama na cuaqueyajaaja jiyaniya cutara pueyanoni, cuno pojoriiri saniniujia quejoosaanutaniya.²⁹ Naacuajitij, majaari quenaaja jiyanolua pocuaja cureenu quiniutianiya Pueyaso niquierani. Tojetaarucuajanaa shaaquiiri pocuajaca quiniutianiya.³⁰ Pueyasujuanaacuajaari nia rupuetequiaari Jesucristo. Naacuajitij, niaari Pueyaso niishitiaja jiitiae. Nia rupuesacari Jesucristo, niaari maninia mijiia quiya Pueyasora. Pueyasoori nia jataniya saa na tojijiacaraja nia quiniuria, juhua Neyanu nia quiniuriajuhuaj. Niajaniyari puetunu jeecasaanutaniyajanaa. Paari naa miishiyani Jesucristo pa rupuesacari.³¹ Seetanujuanaari nio sequencesano taricuacaanu Pueyaso Rupaajiniji:

“Cante shuquiriaatia quiniu paniyani, nojuaja cuaara shuquiritiaara pa Jiyaniijia”.

2

Jesucristo mosaanujiniji pohuatasano

¹ Cuarta Jesuucua tiuuniaa pueyanaa, janiya jaara niaacua tiuquiquiaarini, niaacuajaari niishiya taa cua pohuataquiaari Pueyasojiniji Jesucristo rupaa niajaniyani. Majaari jiyajeneta cua pohuatanu quiquiaari niishijiaca niishishano rupaacata. Cua pohuatasanoori niishishaatia quiquiaarijia, maja juhua cutara pueyano pohuatasano. Janiyari jacaria pohuataquiaari Pueyaso rupaa niajaniyani.² Janiyari tari tama sequencequiaarijiaanijia: “Janiyari

saaja Jesucristojiniji pohuatanu paniya Corinto pueya niquiarani, naajuhuaj, taa na cusoquiaari pocuara niyacutesanojiniani".³ Cua pohuatasacari Jesucristo rupaa nia niquiara, janiyari sasaca quiriquiaa cua puerenutani. Janyari tetecariquiaani.⁴ Majaari cua paniniu quiquiaari cua tiuutiniuria niajaniya Jesucristoocua tama cua niishitajatajaaja. Naaratej, majaari cua pohuatasano quiniu quiquiaari juhua shanohua pohuataja sequesano. Naacuajitij, cua pohuatasacari Jesucristo rupaa nia niquiara, Pueyaso Sohuanu cutaraari nioojiacajinia poonijioquiaari Pueyaso cumaacata cutara.⁵ Naacuajitij, niaari Jesucristoocua tiuuquiaari Pueyaso cumaca miishacari maninia nioojajinlia. Maja cutaraari nia tiuuniu quiquiaari saaja pueya niishishanoocua.

Pueyaso Sohuanucuajaari pa niishitiya Pueyaso

⁶ Naajaa, canapuete Pueyasoocea tiuujia seetanujuanaa cutarani, nojoriiri niishiya canaa pohuatasano Jesucristojinijiiri seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyanijianucua niishishano. Mijiria niishijiacaari shaajeconutaniya. Nojori niishishanoori najuhuana quiniutianiya.⁷ Canaa pohuatasano cutaraari Pueyaso niishishano tarifia, jiya shipinishaacar-ijijoja. Pueyasoori jiyacari niishiriojocuariajiyanohua maninia na miiniuria pajaniya, shuquiriaatia pa quiniuria pueyaracaanu pa Jiyanijia Jesucristo shuriucua. Nio rupaari maja pueya niishishano tari. Pueyasoori maja nio na niishitionu quiquiaari pueya tari.⁸ Mijiria jiyanijianucuaari nio niishiyaquiquiaari. Nojori jaara na niishiquiaari tarifia, nojori maara pa Jiyanijia moyaquiquiaari niyacutesanojinlia. ¡Na Shipininia motuquiaarrijaari, pueyaracaanu shacantuua quijia!⁹ Naa naajotasano quiyacuajaari taricuacaanu Pueyaso Rupaajinlia:

"Pueyasoori jiyasohuaja casaa jeenucuasano jiitiae na panijaca pueyara. Cunoori maja pueya niquishano quenaaja. Majaari cunojiniji nojori tojishano quenaajahuaj. Majaari quenaaja pueya niishiriojonu quiquiaari jiyano casaate na naata quiniu nojoriria".

Quiarijiani, canaari saniniuuja pueya niquiara na pohuataani.¹⁰ Pueyasocuajaari quiarijia canaa niishitiquiaari canaa jiuujiajinlia na miiniu panishano pajaniyara. Canaa niishitiquiaariiri na Sohuanuta. Na Sohuanuuri puetunu Pueyaso niishiriojosanojuanaa noojajinlia niishiya.¹¹ ¿Cante pueyano niishiriojosano noojajinlia niishiyania? ¿Majate saa na camaru sohuanujua niishiniu? Taaquiriirinij. Naajuhuaj, saaja Pueyaso Sohuanuuri Pueyaso niishiriojosano noojajinlia niishiya.¹² Naaratej, Pueyasoori na Sohuanu niquitioquiaari pajaniya, pa niishiniuria Pueyaso niishishano. Naacuajitij, majaari pa jiitianu saaja tama pa sohuanujaaja Pueyaso niishishano pa niishiniuria. Paa cutaraari Pueyaso Sohuanuracajaniuhuaj. Naacuajitij, Pueyaso Sohuanu cumaquishacari pajaniya, pa naata puetunu Pueyaso niquitosano pajaniyarajanaa niishiniu. ¡Jiyanohua capora Pueyaso!¹³ Naacuajitij, canaa pohuatasanoori maja saaja mijiria pueya niishishano. Pueyaso Sohuanujuanaari canaa niishitiojocuariajiyanohua capora Pueyaso rupaa canaa niishiniuria canaa jiuujiajinlia. Naacuajitij, canaa naata Pueyaso Sohuanu jiitiana niishitiojonu seetanu

Pueyaso rupaajanaa, mariyata taa Pueyaso Sohuanu niishitiojoquiaa canaacuaani.

¹⁴ Mijiria quiniae pueyari Pueyaso Sohuanu niishitiojosano niishiniu paniyaquiquiaa. Nojoriiri saaja juhua tama mijiria niishirijojosano-juuaaja na jiyatequiaa. Seetanujuanaa, nojoriiri maja na naata na niishiniu. Saa Pueyaso Sohuanutaja pa naata Pueyaso Sohuanu niishitiojosano niishiniu. ¹⁵ Cante Pueyaso Sohuanu jiitiaani, nojuajaari na naata puetunu niishishanojuanaa saniniujiuniu. Saniniuujia, tamasaca pueyari maja na naata Pueyaso Sohuanu jiitiana miishano niishiniu nocuara na rimiaaquerenura. ¹⁶ Tariucuacaanu Pueyaso Rupaajinia naa naajiotasaaquiaarijihuaj:

“¿Cante pa Jiyaniija jiuujiajinia na niishirijojosano niishiyani, socua na niishitiojonura nojuajani? Shaaqui”.

Paa cutaraari Jesucristo niishishano niishiyani Pueyaso Sohuanuraca pa quishacari. Naacuajitij, majaari pa niishiniu saa mijiria pueya niishishanojua.

3

Pueyasora poonijionaa pueya cuaara poonijionuuriquia nojori panitoonuta

¹ Cuarta Jesuucua tiuuniaanaa, cua quishacari niaata, majaari cua naata jiyajeneta Pueyaso niishishano cua niishitiojonu quiquiaari niajaniya. Niaari quera juhua Pueyaso Sohuanuuju quiriquiaajaa. Niaari juhua Cristo conaaja quiriquiaajaa, maja Pueyaso tojjiacaseetanujuanaa. Nocuaji, janiyari nia niishitiojoriquiaa jacariani, juhua Pueyaso niishiyashijiaca pueya nia quishacarrija. ² Cua niishitiojosano niajaniyari niishishaatia quiquiaarijia, maja jiyajeneta. Majaari cua naata Pueyaso cutara niishishano cua pohuatanu quiquiaari niajaniya. Cuno niishishanoori cumueeca Pueyaso pueyara, naatej, taa shu quiyari taricuua puereetuua pueyaraculaani. Juhua naatujoori nia quishacarrija, majaari nia naata na tojiniu quiquiaari. Juhuanajuajaari maja nia naata na tojiniu quiarijiani. ³ Niaari juhua Pueyaso Sohuanuuju quiyajaa, juhua Pueyaso niishiyashijiaca pueya. ¿Naatejaaratej? Niaana niarta Pueyaso muerasu shocotanu paniquiaa juucua. Niaanaari juayonuu-jutaquiaa. Naa nia quishacaritij, niaari juhua Pueyaso Sohuanuuju quiyajaa pueyaracaanu, juhua Pueyaso niishiyashijiaca pueya. ⁴ Niaana sequequiaa: “Canaari Pablo pueyani”. Tamascanaari sequequiaajuhuaj: “Canaari Apolo pueyani”. Naacuajitij, puetunu niajaniyajanaari saaja juhua Pueyaso niishiyashijiaca pueya quiyajaa.

⁵ Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaa juhuanani. Canaari saa Pueyaso panishano miiquiaajaani, Jesucristo rupaa nia tojitianura. Canaari Jesucristo panishano miiquiaarini taa na sequequiaari canaa miiniuriacuajani.

⁶ Naacuajitij, janiyari Pueyaso rupaa nia pohuataquiaarini, naatej, taa casaa jajau pueyano natoohoquiaaculaani. Apoloori saniniuujia socua Pueyaso rupaa nia niishitiojoriquiaari na cumaquinuria niajaniya, naatej, taa pueyano na natau shiijoya mohuacatacuaani, maninia na maashiniuria. Pueyaso cutaraari na rupaa maashitiquiaari nioojiacajinia, na muerasu nia quiniuria cutara. ⁷ Naaratej, ¿casaateeri canaani; Apolo, janiyanio? Canaari Pueyasora poonijionaa narejani. Saa Pueyaso jua cutaraari cumaacaraca. Saaja nojuaja cutara na naata pa tojitiniu

na rupaa, seetanujuanaa na muerasu pa quiniuria. ⁸ Naacuajitij, paari niishiyani, cante natoojonani, cante mohuaca shijiotanani, canaari mariyata saaja Pueyaso poonitijosanoni. Pueyasocuajaari canaa niqutionutaniya na jiitiasano, nera canaa poonijionuucua. Cante socua poonijioreeni, Pueyasoori socua na jiitiasanojiniji na niqutionutaniya taajecori pueyajiniji. ⁹ Canaari mariyata Pueyasora poonijionaani. Ni-aari juhua Pueyaso nataacuaca nera. Niaari na muerasu cutara, maja canaa muerasu. Naajuhuaj, Pueyasoori juhua nia tiaa saitia, na quiquirano. Saitia tiasacari, sairi coteenu cumaatia niojoshiya na morijiuria, maja tia matanura. ¹⁰ Pueyaso jaara jiyaroquiaari janiya, janiyari Jesucristo rupaa pohuatanu coteequiaari maninia niajaniyani, Pueyaso muerasu nia quiniuria nia tiuushacari cua pohuatasanoocua. Naacuajitij, janiyari juhua Pueyaso tiara shipininiu coteequiaarini. Cua niishitiosano niajaniyani, cunoori juhua morijiui nujuatejosano quiquiaari. Cua nuhuaji, tamasacaari nia niishitiojoriquiaa socua Jesucristo rupaa, juhua Pueyaso tia tucuatasaanura. Nojori cuaara niishiiria maninia, maninia nojori niishitijonura niajaniya, juhua maninia tiasano nia quiniuria.

¹¹ Majaari socua tamonu rupaa quiniu nocua pa tiuuniuria Pueyaso pueya pa quiniuria. Saaja Jesucristo rupaa cutaraari pa jatanijia Pueyaso pueya pa quiniuria. Janiyacuajaari na rupaa pohuataquiaari niajaniyani. Saa na rupaacuaja nia tiuushacari, niocua maninia quiri, juhua maninia morijiucuaacua tiasano tia, maja na matanura. ¹²⁻¹³ Cante socua Jesucristo rupaa niishitijoja niajaniyani, cuno cuaara niishitijoora jiyano hua maninia. Cuaara niyajetaaquiiria cutara, nojuajaari na niishitiosanojiniji nequesoreesaanutaniya Jesucristo mue tasacariuhua pocua, pa miishano na saniniujiuniuria juhua manitia. Puetunu niishishaanutaniyajanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitiosanoori juhua pueyano tiasano. Pueya jaara tiare orota, platatanio, shanohua saitianio, maniiri maja na naata na catijianu. Cante saniniuji tiaree macacatani, tucurutajuhuaj, turequenacotanio, cunoori taraatia quiniutianiya na tia jaara sanishaare catijianu. Naaratej, pa niishiriojore, ¿pa rootasanote seetanujuanaa maninia? ¹⁴ Tamonu jaara maninia miiija quiquiaari Pueyaso cumaacata, na miishanoori maja najuhuana quiniutianiya Pueyasora. Pueyasoori cuno pueyano niqutionutaniya na jiitiasanojiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaariiri, maja na tia catenura jaara sanishaare senu. ¹⁵ Cante saniniuji tiaquiaari cateja casaatani, na tiasanoori catenutaniya. Puetunu na jiitiasanojuanaari ju urequenutaniya. Saaja nojuajaari Sesaaca jaariutiasaanutaniya juhua manijiniji jaashano. Naa miishaanutaniyari Jesuucua tiuuniaa, canapuete maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijiniji jaashano.

¹⁶ ¿Majateeri nia niishiniu pueyanaa? Niaacuajaari Pueyaso quiquo, juhua na tia. Na Sohuanuuri nioojiacajinaria quiija. ¹⁷ Tamonu jaara Pueyaso quiquo sesore, Pueyasoori cuno pueyano saniitionutaniya saniniuji. Puetunu Pueyaso muerasujuanaari juhua na tia quiya. Pueyaso quiquo cuaara quiuria tojetaarucuajanaa maninia, saa neraja, maja raquiriojotasano. Niaacuajaari na quiquo.

¹⁸ Tama nia cuaqueyajaaja nia cojuare tamonu mariqui nia sapojoreeri. Cante tama na cuaqueyajaaja jiyanija niishijiani, nojuaja naasucuaari niishijija saaja Pueyaso niishiyashijiaca niquiara. Cuno pueyano cuaara jataara cuno na niishishano juhua niishiyashijia na quiniuria narta pueya niquiara. Na nuhuaji, cuaara maseera Pueyaso niishitija, seetanu niishijia na quiniuriajanaa. ¹⁹ Mijiria pueya niishishanoori juhua paateca sequenceso Pueyasora. Tariucuacaanu Pueyaso Rupaajinie naa naajiotasanoori quiya:

“Pueyasoori mijiria quinia pueya cushiriquiitianiniutianiya, tama nojori niishitishanoocuaajaaja nojori tiuushacari najuhuanaj”.

²⁰ Naa naajiotasanoori quiyajuhuaj:

“Pueyasocuaajaari mijiria niishijiaca niishiriojosano niishiya. Naa sequayari: ‘Najuhanari cuno pojori niishirionuusano’ ”.

²¹ Naaratej, maja shuquiriaatia nia quiniu saaja niquiriyatu Pueyaso rupaa pohuatana nia tojishacari. Pueyasoori tamasaca pueya jiyaramiquiquiaa nia cumaquinuriyahuaj, maja saa niquiriyatu niishitiojonaja. Puetunu casaajanaari niaara, maninia nia quiniuria. Naaratej, majaari saa niquiriyatu pueyanoocuaaja nia jiaatianu.

²² Pueyasoori canaa jiyaramiquiquiaari canaa cumaquinuriyahajaniya. Naacuajitij, janiya, Apolo, Pedro, canaari niaara quiyani, maninia canaa miiniuria niajaniya Pueyaso rupaata. Nio jiyari niaara quiyajuhuaj. Pueyaso shipinishanocuaajaari niaara. Naajuhuaj, mijiria nia quishacari, cunoori niaara quiya, socua maninia quiijara nia quiniuhuara. Taa nia miishiya quiarijiacuajani, taa nia miishaanutaniyani, puetunu cunojuanaari niaara, cumueeca Pueyaso muerasu nia quiniuria. Nia shaajesacariiri maninia quiniutianiya niaarajuhuaj. Pueyasoori nia shaajeteya na shuriucua nia quianura. Naacuajitij, puetunu casaajanaari niaara quiya. ²³ Niajaniyari Cristora quiya saniniuuja. Cristoori saniniuuja Pueyasora quiyacujua.

4

Jesucristo jiyaramiquishano poonijiosano

¹ Naaratej pueyanaa, niajaniya cuaara niishiiria canaari saaja Jesucristo seyan. Canaari maja cutara pueyani. Pueyasoori canaa jiyatequiaari na rupaa canaa niishitiojonura niajaniya, Pueyaso niishitiosano canaa. Cunoori tarrijia pa niishishoo. ² Cante Pueyaso niishitija jiitiaani, cuno cuaara quiria seetanujuanaa Pueyaso miiniu panishano panijia, na rupaa na pohuatanura puetunu maniniajanaa. ³ Niajaniya, tamasaca pueyajuhuaj jaara sequenu paniya taamueca pohuatanate janiyani, quiria, naajaa. Mijiria nequesoreenaa jaara cua nequesoreere cua niishitiojonujiniji, naajaa. ¿Janiyate sesa niishitiojoquiaani? Johuaj. Maja cua niishiniu. ⁴ Janiya jaara sesa miiriquiaa cua Jiyaniijiara cua poonijiosacarini, majaari cua niishiniu. Majaari coojia macuhuajenu quijia. Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijiara na naata sequenu taa cua quiquiaarini. ⁵ Naaratej, maja nia rimiaaquenu tamonuucuara, Jesucristo tiuquiyaqueishacariuhua pocua. Nia sashiri. Pa Jiyaniijiara tiuquiriohua, puetunu jiyasohua pa miishanojuanaari niishishaantuaniya. Niishishaanutaniyajaariuhuaj casaara pa miiquiaari puetunu

pa miishanojuanaani. Cuno quishacari, pa Jiyanjiaari maninia pohuatanutaniya cante maninia miiija quiriquiaa mijiria na quishacarini.

⁶ Cua tojitiare cuarta Jesuucua tiuuniaanaa. Janiyari nareja nia po huatariquiaa Apolojinijini, janiyajinijihuaj, maninia nia niishiniuria casaa cua niishitiojiya niajaniyi. Naacuajitij, nia niishitiojoriquaaniajia saa Pueyaso rupaa nia tojitianura suraatiaja. Majaari socua tamonu niishitiojosano nia tojiniu. Naajuhuaj, maja nia sequenu tamonu niishitiojonajiniji: "Cuno niishitiojonaari sesa pohuataja. Tamonu niishitiojona cutaraari shanohua pohuataja. Na tojiririaj, na shuquiritiniuucua janiya". Maja naate pueyanaa. Mariyata nia tojitiare puetunu Pueyaso jiyaramiquishano pueyajanaa, seetanujuanaa nojori pohuatasacari Pueyaso rupaa. ⁷ ¿Niajaniyarihuaj? ¿Taa nia sequeya tama nia cuaqueyajinijiaajani? ¿Niaateeri socua maninia pueya tamasacajiniji, socua niishijiaca jiyaramiquishano? Majaruhua. Naajaa, niaa jaara seetanujuanaa socua niishijiaca quiri tamonujiniji, ¿taa jiyanohua niishijiacara nia quiqianuni? ¿Tamajaajatee? ¡Maja tamajaaja! Niaacuajaari Pueyaso niishitiaja jiitaa. Naaratej, maja nia jiyaniiniu niaa socua maninia pueya tamasaca pueyajiniji, tama nia niishishanotajaaja.

⁸ Niaa jiyoteeri jiyaniya niaa tari cutara niishijiacara quirii. Niaa jiyoteeri jiyaniyajuhuaj, niaa tari jiitaa puetunu Pueyaso niqutionu panishanojuanaa niajaniya. Naajuhuaj, niaa jiyoteeri jiyaniya Pueyasoori nia jiyateree jiyanijianucua nia quiniuria. Niaa naasucuaari canaa shocotaree tari. ¿Naatejaaratej? Seetanujuanaa naara nia jiyateriquiani, canaa quiniuria niarta jiyanijianucuajuhuaj, shuquiriaatia pa quiniuria mariyata. ⁹ Janiyari cuarta Jesucristo jiyaramiquishanoocua niishirioriquaani, Pueyaso naasucuaari canaa jiyatequiaari juhua na juhuana quijiacara, saa puecoosocoriquianojua. Canaa naasucuaari naa quiya mijiriani, puetunu pueyajanaa shootianura canaa, Pueyaso seya shootianura canaajuhuaj. ¹⁰ Canaa tojitasacari Cristo, canaa naasucuaari niishiyashijiaca quiya tamasacarani. Niajaniyari saninieuja niishijiaca quiya tamasacara, Jesucristo nia rupuesacari. Canaa naasucuaari Pueyaso muerasu sasaca quiya saajani. Niaa saninieuja Pueyaso muerasu cumueeca quiya tama nia niquiarajaaja. Pueya jiyoteeri nia shuquiritaa. Canaari saninieuja saaja rerequetesano quiyani, pueya soosanojuhuaj. ¹¹ Canaari pueyaracaanu miaajequiaajani. Canaari jiyamuequiaajaaniuhuaj. Canaa cushishano toquenijoquaari jiyareta sesaruquenijojua. Pueyari canaa miiquiaa taraatiani. Shaaquiiri canaa tia, canaa rucoojonuucua pueyaracaanu. ¹² Canaari samareequiaani pueyaracaanu canaa poonijiosacari tama canaa juaashiquiataaja. Pueyari canaa sesacaquiaani. Canaari maninia na riucuaquiaa saajani. Canaa jaara naquiya miishaareni, canaari na rejeretaquiaa juhuajaniya saajani. Majaari canaa naminiu quiquiaa saninieuja nojori. ¹³ Pueya jaara tamasaca niquiara rimiaaquequiaa canaajiniji, canaari nojoritia jeecatoonu saniquiaa juucuani. Pueyari canaa jiyatequiaa juhua rucucuarani. Canaari naa quiyajaa nojoririani.

¹⁴ Naa cua naajiosacari niaacuaratej, majaari cua cararonu paniniu niajaniya. Janiyari saaja nia niishitiojonu paniya cutarani. Janiyari nia rootaa juhua cua muerasuniyojuani. ¹⁵ Niaa naasucuaari queraatia Jesucristo rupaa niishitiojonaaraca. Naajaa, saa janiyajaari juhua nia

queni. Nia tojitasacari Jesucristo rupaa cua pohuatasacari niajaniya, niaari Pueyaso muerasura quiquiaari.¹⁶ Juhua nia que cua quishacari, nia nacasureenija pueyanaa. Naate taa maninia muerasu na queecua jiaatiaacuaani, naa cucua nia jiaatiarejuhuaj, juhua janiya nia quiniuri-ajuhuaj.

¹⁷ Naaratej, janiyari niaacua jiyaroya cua panishano Timoteoni. Nojuajaari juhua cua niyanura quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonutaniuhua taa cua niishitiojoquiaacuaa puetunu Pueyaso maapuejanaa puetunu jiyacajinajanaacuaani. Naa nia rootanutaniyari nia niishiniuhuara maninia cua niishitiosano niajaniya tarijia. Nojuajaari nia pohuatanutaniyajuhuaj taa quijia cua quiyani cua tojishacari pa Jiyaniijia Jesucristo, naa maninia nia miiniuriajuhuaj.

¹⁸ Noojiaqueya niajaniyajinjinioori shuquiriaatia quiya, juhua jiyaniijianucua nojori jiyatesacari tama na cuaqueyajaaja. Nojoriri naa miiriiqui nojori jiyanihacari maja naasucuaari cua tacatenu quiniuti-niuhua, cua niquinihuara niajaniya socua. ¹⁹ Janiyacuajaari niaacua naquerejiya tarini, cua Jiyaniijia Jesucristo jaara paniri niaacua cua quianura. Cua tiuquishacari niaacua, janiyari cuno niishijiaca pueya saniniujeuntianiyan, cua niishiniuria casaate nojorini, maja naa sacuaraatia nojori quiniuriatej. ¿Cumaacaracate nojori, saaja pocuajaca soj? ²⁰ ¿Canteeri seetanujuanaa Pueyaso pueyanon? ¿Saaja pocuajatee? ¡Maja pocuaja! Cante Pueyaso Sohuanu jiitaa na cumaquiriquiano Jesucristo na tojiniuriani, cunoori seetanujuanaa Pueyaso pueyano cutara. ²¹ Nia niishiriojore, cuarta Jesuucua tiuuniaanaa. ¿Taa nia paniya cua miiniuria niajaniya cua quiasacari niaacuani? ¿Niaateeri paniya cua saniitionura niajaniya, jacaria cua niishitiojonura niajaniya cua paniniutia soj? ¿Taa nia paniyani?

5

Na que niquiocuata quijajiniji pohuatasano

¹ Niajaniyajiniji pohuatasaarucuaa taraatianijia. Tamonu niajaniyajinjinionaari jiyanoehua sesa miya. ¡Na que niquiocuata quiyaquiniaari! ¡Pueyanaa, cuno miishanoori socua jiyanoehua cararaatia Pueyaso niishiyashijiaca miishanojini! Pueyaso niishiyashijiaca pueyani, majaari quenaaja nojori naa sesa miiniu niishiniutij. ² Naa cuno pueyano miishacari sesa nia tajiniatej, ¿niaateeri saaja juhuajaniya cuniqui na jiitiaaruhua? ¡Niaa cuaara na tacaatiaara! Cuno sesa miijia cuaara taanuusaaria nia tajiniji, maja na cojiniuria socua niajaniya nia rere-josacari. ³ Cua tojiri taa pa miiniutianiyani. Janiyari maja cua quiniu niaata. Naajaa, coojiaari niaata quiya cua niishiriojosacari niajaniya. Naacuajitij, janiyari juhua nia tajinia quiyani. Naacuajitij, janiyari tari cuno sesa miijia saniniujeuntiani. ⁴⁻⁵ Naaratej pueyanaa, cua tojitiare. Nia rerejore cuno sesa miijia nia tarinitianura Sesaacara. Coojiaari niaata quiniutianija naa nia miishacari pa Jiyaniijia Jesucristo cumaquishacari niajaniya. Naacuajitij, Sesaacaari naquiya na miiniutianija; na cusojuanura naasucua, maja soj. Naajaa, na cuaqueyari naa naquiya miishaanutaniya noojia na tacatonuhuara, Pueyaso tojijiara na quiniuhuara. Naacuajitij, pa Jiyaniijia Jesucristo muetasacariuhua

pocua, nojuajaari samiitianishaanutaniuhujuhua puetunu Pueyaso muerasutajanaa.

⁶ Cuarta Jesuucua tiuuniaanaa, ¿taate nia naata shuquiriaatia quiniu tamajaajani, naa sesa mijjia quishacari nia tajiniatej? ¿Majateeri nia niishiniu? ¡Nia jaara cojiya sesa mijjia saniniujiushoojua, socua pueyari mariyata naa sesa miiniutianiqaquij! Sesa mijjia niishishanoori tamasacaacua paaquenutaniya. Niaacuajaari niishiya, shiitaniyojua pan poreeteja jaara niasaare cashojuajin, ritia poreeteja puetunu cashojuua miniquiootasanojuanaari. Naajuhuaj, sesa mijjia jaara sequeyaquishaare na miishano, sesa na miishanoori socua paaquenutaniya.

⁷ Tarijia, Pueyasoori pa supuetanaa Judiocuaca rootaquiaari puetunu na pan poreetejajanaa nojori jatanura puetunu marijiarajanaa. Nojoriiri naa rootasaquiaari saaja poreetesoo pan nojori miaquenura siete juuca, shuquiriaatia nojori quiniuria Pueyaso niquiara. Pueyasoori naa nojori niishitijoquiaari miriquitij, nojori cartenura puetunu sesa nojori miitiushanojuanaa, nojori rupuenura Pueyaso. Naajuhuaj quiarijiani, nia taanuure cuno sesa mijjia nia tajiniji, seetanujuanaa sesa miyashijiac nia quiniuria Pueyaso niquiara. Pueyaso jiyanooniuria pajaniya, Cristoori tari mosaaquiaari pocuara, taa borregohua puecoosaaquiaari Pascua juucacuaani. Tariucuacaanuuri naa miishano quijia, Pueyaso jiyanoniuria pa supuetanaa Judiocuaca, sesa nojori miishanojiniji. ⁸ Naa Pueyaso pa cojishacari quiarijiatej, tojetaarucuajanaa sesa miyashijiac pa quirij, shuquiriaatia pa quiniuria pa Jiyanoonia niquiara. Pueyaso pueya maanu pa cojuare puetunu maniniajanaa, maja sesa mijjiacata cojitishano. Seetanujuanaa maninia pa quiri puetunu pajaniyajanaa.

⁹ Pueyanaa, janiyari tari niaacuara naajiocanuni cua sequenura niajaniya, maja nia cojiniuria sesoriquia pueya, cuno pojori canapuete na camishoo maaji numuetucuquiaani. ¹⁰ Naa cua sequencesacari niajaniyatej, majaari cua sequenu nia rupueyaquiniuria puetunu sesoriquia pueya sequejanaa mijiria. Saa nia shaajesacarija cutara nia naata puetunu sesoriquia pueyacuajijiana rupatenu. Nio jiycua, pueyari naa sesa mijjiaca quiya: nojoriiri sesa miquiaa tama na niishiriojosanotajaaja. Nojoriiri tama nerajaaja paniquiaa socua casami pueyara-caanu. Nojoriiri nohuasenuuquiaa. Nojoriiri tama na panishanoocujaaja jiaatiaquiaa puera, maja Pueyasocua. ¹¹ Cua tojitiare casaa cua sequecanu tari niajaniyani. Cante tama na cuaqueyajaaja sequejani: "Janiya Pueyaso muerasuni", maja cunota nia cojitanu, cuno jaara na camishoo maaji numuetucuquiaa. Naajuhuaj, majaari nia cojiniu nooj cante casamiriacara quiniuucua jiaatiaquiaani. Majaari nia cojiniu nooj cante tama na panishanoocujaaja jiaatiaquiaajaaniuahuaj, maja Pueyasocua. Majaari nia cojiniu narta pueya sesacaja. Majaari nia cojiniu mashaasequejojua. Majaari nia cojiniu nooj, cante tamonu casami nohuasejoquiaa na sapojonutani. Janiyacuajaari tari naa nia sequencesacari nia miaquenu quenaaja. ¹²⁻¹³ Naa cua sequencesacari niajaniyatej, majaari cua sequenu quiriquiaa tamasaca pueyajiniji, canapuetucuaja maja Pueyaso muerasuni. ¿Paate nojori nequesoreenaani? Maja. Pueyasocuaajaari nojori saniniujiuntianiya. Pajaniya cumaati parta

Pueyaso pueya saniniujuquiaani, nojori jaara sesa miiriquia. Naaratej, nia jatare cuno sesa miijia nia tajiniji, noo cante sacuaraatia na que niquiocuata quiyacuajani.

6

Sesa miijia cuaara nequesoreesaaria narta Pueyaso muerasu niquiara

¹ ¿Seetanutejanaa naa niajaniyajiniji pueya pohuatasanojuhuaj? Niarta Jesuucua tiuunia jaara sesa miiri niajaniya, niaanaari Pueyaso niishiyashijiaca nequesoreenaa tonujuquiaa nocuara. ¿Casaara tamajaaja niarta Pueyaso muerasu niquiara nia jeecatoyaquiquiaani? ² ¿Niaate niishiyaquia, Pueyaso muerasuuri Pueyaso niishiyashijiaca nequesoreeriquianocuaja, Pueyaso saniniujuushacari nojori? Pueyaso jaara naa nia nequesoreetenutaniya na ruuretajaca, ¿majate nia naata quiarijia niarta Pueyaso muerasu nequesoreenu tamajaaja, nojori jaara sesa miiri shiitianyojua? ³ ¿Majate nia niishiniujuhuaj, paari Pueyaso seya nequesoreeriquianojuhuaj? Pueyaso jaara pa nequesoreetenutaniya na seya na tojiyashijiaca, ¿majate quiarijia nia naata maninia nequesoreenu niarta Pueyaso muerasu mijiria? ⁴ Niaa jaara nia tapueyocuacaacuara tonujunu paniya sesa na miishacari, ¿niaateeri Pueyaso ruuretajaca tonujunutaniya nojoriicuara? ¡Maja maninia naatej! Cuno pojoriiri maja Pueyaso muerasu jiitiana. ⁵ Naa nia sequeyanijia cua cararonura que-naaja niajaniya, cua niishiriojotenura niajaniyajuhuaj. ¿Seetanujuanaa tojetaarucuajanaa shaquiti niishijia niajaniyajinjinio, cante na naata nia tonujutoosacari nequesoreenu niajaniya maniniani? ¡Quiya jiyotucuaajaari! ⁶ Niajaniyanaari tama niarta Jesuucua tiuuniaacuarajaaja tonujutojoquiaa Pueyaso niishiyashijiaca nequesoreenaa niquiara. Naa nia miishacaritij, ¡niaari sesa miiquiaa pueyanaa!

⁷ Niaari jiyano hua jiyajeneya nia juayonuujutasacari. Niaa jaara sesa miishaare, niaa cuaara jiyano otioora saniniuujia, nia casami jaara no-huasesaarejuhuaj. ⁸ Niajaniyarijiataj, ¡niaari saaja sesa miiquiaacujua! ¡Niaanaari niarta Pueyaso muerasu miiquiaa sesa! Niaanaari tama niarta Jesuucua tiuuniaajaaja nohuasejoquiaa, sesa miijiaca nia quiniuucua.

⁹⁻¹⁰ Maja tama nia cuaqueyajaaja nia sapojonu, pueyanaa. ¿Niaateeri niishiyaquia Pueyaso or maja na rijionu quiniutianiya sesa miijia ca na shuriucua nojori quiniuria? Jiyano pueyari puetunu quejoosaanutaniyajanaa. Quejoosaanutaniyari noo pojori canapuete na camishoo maajipohua numuetucujuquiaani, naajuhuaj, noo pojori, canapuete tama na panishanoocuajaaja jiaatiaquiaani, maja Pueyasoocua. Quejoosaanutaniyajaariuhua noo pojori, canapuete narta pueyano niquiocua numuetucujujua, naajuhuaj, canapuete maa-jishuriutia quijia juhua maajitiani. Nohuasenuujuacaari quejoosaanutaniyajuhuaj, noo pojorijuhuaj canapuete pueyaracaanu socua casami paniquiaa tama nerajaajani. Mashaasequenuujuacaari puetunu quejoosaanutaniyajuhuaj, tamasaca sesacajacanio, tamasacaacuara rimi-aaquejacajuhuaj. Naa quejoosaanutaniyajaariuhua noo pojori, canapuete nohuasejoquiaa na sapojonutani. Puetunu jiyano pueyajanaari maja Pueyaso muerasu na quiniu quiniutianiya, Pueyasota nojori quiniuria shuquiriaatia pueyaracaanu. ¹¹ Noojiaqueya niajaniyajinjinioori

jiyano sesa miijiacu pueya quiquiaari tarijia. Na nuhuaji, sesa nia mishanoori jeequesaaquiaari Jesucristoocua nia tiuushacari. Pueyaso Sohuanuuri nioojiajinia tiuquiquiaari, Pueyaso na tojitiniuria niajaniya. Naacuajitij, nia rupuesacari Jesucristo, Pueyasoori nia jiyanooquiaari. Nia sequereeri: "Niaari saa maniniaja quiya cua niquiara".

Pa cuaqueya cuaara quiuria saa Pueyasoraja

¹² Queraatia pueyari sequequia: "Pueyaso jiyanooshacari pajaniya, paari tarinitiasaaree puetunu pa miiniu panishanojuanaa pa miinurianni". Seetanujuanaa naacuaj. Saniniujia, majaari puetunu pa miiniu panishanojuanaa maninia na quiniu pajaniyara. Seetanujuanaa cua naata miiniu puetunu cua miiniu panishanojuanaa. Naajaa, maja cutaraari cua miiniu puetunu cua miiniu panishanojuanaa, janiya mariqui puera nocua jiyartuureeri. Naa pa jiyartuusacaritij, na nuhuaji majaari pa naata pa jiitishano casaa pa tarinitianu. ¹³ Pueyari sequequia: "Pueyasoori miaquesano shipiniquiaari pa seecora. Pa seeco shipiniquiaari sumatuucuaji saniniuurija, shuquiriaatia pa quiniuria". Seetanujuanaari cuno seqesano. Naajaa, majaari nio pa niyajetanu, na nuhuaji, Pueyasoori na shaajanutaniya puetunujuanaa. ¿Pa cuaqueyariuhuaj? ¿Pueyasoteeri pa cuaqueya shipiniquiaari pa numuetucunura pa camishoo maajipohua? ¡Maja! Pa cuaqueya cutaraari shipinishaquaari pa Jiyaniijiara, na panishano pa miiniuria. Naajuhuaj, pa Jiyaniijiara pa cuaqueyara quiyacujua, na cumaquinuria pajaniya, maninia pa quiniuria pueyaracaanu. ¹⁴ Naajuhuaj, taa Pueyaso samitianiquiaaricuaa pa Jiyaniijia Jesu na cuaqueyatani, nojuajaari macujiniji naa pa samiifianiniutianiuhua na cumaacatajuhuaj.

¹⁵ ¿Niaateeri niishiyaqueiyahuaj, Pueyaso Sohuanu quiniuucua poojajinia, pa cuaqueyari seetanujuanaa pa Jiyaniijia cuaqueya quiya? Naaratej, Jesucristo cuaqueya pa quishacari, maja cumaati pa curushojonu pa cuaqueya, maaji paanatu pa numuetucunuta. ¡Cunoori jiyanoehua sesa! ¹⁶ Pueyasocuajaari coteenujuanaa na shipinishano pueyano sequequia:

"Quia camishacari maaji, niaari niquiriyatu cuaqueyara quiniutianiya". ¿Niaateeri nio niishiyaqueiya, cante paanatu numuetucureeni, Pueyasora, nojoriiri niquiriyatu cuaqueyaracara quiui? ¹⁷ Naajuhuaj, paa jaara Jesucristo rupuereni, pa sohuanuuri rupuetoooree na Sohuanuta, niquiriyatu sohuanuraca pa quiniuria Jesucristota.

¹⁸ Naaratej, nioojia nia tacatore maja nia numuetucunura tamasaca, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesojuia. Saniniujia, cante na camishoo maajipohua numuetucujuani, nojuaja cutaraari tama na cuaqueyajaaja sesoya. ¹⁹⁻²⁰ ¿Majateeri nia niishiniu, nia cuaqueyari Pueyaso Sohuanu quiqio? Pueyasoori na Sohuanu jiyaroquiaari poojajinia na quiniuria. Pueyasoori nia masequiaari tama nerajaaja nia quiniuria. ¡Jiyanoehua naquiya na miiniuti nia masereeri Neyanu na motesacari pocuara! Naacuajitij, Pueyasoori quiarijia pa camarnu quiya. Naaratej, quiarijia maja pa quiniu tama pa cuaqueya camarujuaja. Naaratej, pa shuquiritiri pa Pueyaso pa cuaqueyata, pa sohuanutajuhuaj. Nojuacuajaari pa cuaqueya camaru, pa sohuanu camarujuhuaj.

Pablo rootasano pa caminiuria, camiyojua pa quiniuria soj

¹ Quiarijiani pueyanaa, cucuara nia naajiosanojinia nia nequesotatasano riucuareeraj. Cante niquiriyatu quiniu paniya tamajaajani, cuno pueyanoori maninia miya, maaji na camiyaquishacari. ² Saniniujia, quiarijiani, pueyari puera sesa miiniu niishiquiaa. Nocuaji pueya cuaara camiiria. Maajipohua cuaara camiiriajuhuaj. ³ Pueyano jaara camiri, necocua cuaara na cuaqueya jamueyaquiiria neyaca numuetucunu panishacari. Naajuhuaj, neyaca cuaara na cuaqueya jamueyaquiiria necocua panishacari na numuetucusaanura. ⁴ Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuaj, neyacaari maja tama na cuaqueya camarujuaaja na quiniujuhuaj. Necocuaari neyaca cuaqueya camaru cutara. ⁵ Naacuajiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu niajaniya. Naajuhua niajaniya canuunaa, maja nia niqliocua nia tarijionu na panishacari na numuetucusaanura. Saniniujia, jiyanolhua Pueyaso nia secojonu panishacari, jiyacari cutara nia naata tarinitianu numuetucunu rupaquijia, Pueyaso nia secojonura, niaa jaara mariyata naa miiniu paniri. Na nuhuaji cutara, nia numuetucurohua nia niqliocua, Sesaaca mariqui sesa nia miitiriiri tamonu maaji nia paniniuria, nia camueenujusacari puera. ⁶ Nioori quiarijia maja niaara Pueyaso rootasano janiya. Janiyari nareja naa sequeya niajaniyani socua panaatia nia quiniuria. ⁷ Naaratej, nia jiyateriquiani taa cua quiyacuaani, niqliocuaaju. Naajaa, Pueyasoori puetunu pa cumaquiquiaajanaa tamaatia pa quiniuria, taa Pueyaso paniyacuajani. Camishoo, camishano soj, naajaa. Taa pa quiyani, paari shuquiriaatia quiquiaa Pueyaso cumaquishacari pajaniyani.

⁸ Camiyojua pueyanaa, mashiquipuena, cua tojitiare: niaa jaara juhuajaniya quiya taa camiyojua cua quiyacuaani, niaari maninia quiniutianiya. ⁹ Cante saniniujia maja na naata tama na cuaqueya panishanojuajaa rejetenu maninia tamajaajani, cuno cuaara camiiria. Socua maninia cutaraari nia caminiuria, maja maajiicua nia jiaatianura pueyaracaanu. ¹⁰ Camiyono pueyanaa, nio nia tojitiare cutara. Nioori pa Jiyaniijia Jesucristo sequesano cutara, maja saa cua sequesanoju. Maajipohuanaa, maja nia cartenu nia niyaca. ¹¹ Cante neyaca carteyani, nojori cuaara jiyanoootioora, na rupuetoonuhuara. Jaara maja na naata jiyanoootionu, cuaara quiiria tamajaaja pueyaracaanu. Cuaara camiyaquiiria socua. Canuunaa, pa Jiyaniijia Jesucristo sequesanoori mariyata niaarajuhuaj. Naa sequeyari: "Maja nia cartenu nia niqliocua".

¹² Quiarijiani, socua nia niishitiojoreeraj. Nioori tama cua niishitiosanojuajaa, maja niaara Jesucristo rootasano. Pueyano jaara Pueyaso tojiyashijia niqliocuaraca quiri, cuaara jiitiaara maninianoj. Quia niqliocua jaara quiata quiniu paniyajaa, majaari na cartenu. ¹³ Naajuhuaj, maaji jaara Pueyaso tojiyashijia niyacaraca quiri, cuaara maninia jiitiaara neyaca. Majaari na cartenu, quia niyaca jaara quiata quiniu panirijia. ¹⁴ Cuarta Pueyaso muerasunaa, Pueyaso tojiyashijiaca pueya nia jiyanoori, nojori jaara Jesuucua tiuuniaata caminio quiya. Nojoriiri seetanujuanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, niajaniya cuaara neyaca

jiyanooria necocua quiniuucua niarta Pueyaso pueyano. Nareja nia niquirinioj, niaata na rerejonu panishacari. Naajuhuaj, nia jiyanoori niarta Pueyaso pueyano niquiocua, naajaa, Jesuucua tiuyashijia na quishacarijia. Naa Pueyaso pueyano neyaca quishacaritij, necocua cuaara nareja niquishaariajuhuaj, na rerejosacari niaata. Naajuhuaj, maja rimiajata nia niquinu necohua. Necohuari maniniacuaja Pueyasora, maja juhua tama maaji muetusanojuaaja.¹⁵⁻¹⁶ Pueyaso muerasunaa, canuu, maajipohuanio, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari niajaniya, niaari juhua camishoo quiriohua. Majaari socua nia tojinu coteenu nia niyaca, coteenu nia niquiocuanio. ¡Maja cutaraari nia cartenunoj! Nia niishirijoore pueyanaa, nia niquiocua jaara Pueyaso tojiyashijia quiri, ¿nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhuaj, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijiaaja na cartenura quiajaniya. Naatej, Pueyasoori paniquiaa juhuajaniya pa quiniuria, camishano, cartesano soj.

¹⁷ Cuarta Jesuucua tiuuniaanaa, taa nia quiquiaari Pueyaso sequesacari niajaniya na muerasu nia quiniuriacuajani, naajaa, nia nia quiri Pueyasora. Janiyari naa nia sequeyanai, taa cua rootaquaacuaja puetunu Pueyaso pueya maapuerajanaani. Taa nia quiquiaarini, naajuhuaj casaate quia poonijiosano quiquiaarini, cunocuajaari Pueyaso panishano quiquiaari niaara.¹⁸ Naacuajitij, cante tarrijia na cararaatiuuquia co miatesano quiquiaari Judio pueyano na quiniuriani, naajaa, cuno pueyano cuaara naa quiuria pueyaracaanutej, Jesucristoocua na tiuushacari quiarijia. Naajuhuaj, cante miatesoo quiquiaari Pueyaso sequesacari na pueyano na quiniuriani, cuno cuaara quiuria naajuhuaj.¹⁹ Cante Judio pueyano na quiniuria miatesaaquiaarini, naajaa. Cante miatesoo quiyani, naajaa. Saaja maninia cutaraari pa tojitianura Pueyaso niishitiojosano pajaniya.²⁰ Naarate nia sequeyanijia, nia quiri taa nia quiquiaaricuajani shushajanaa Pueyaso sequesacari na muerasu nia quiniuria.²¹ Cante poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishirionu nocua. Juhuajaniya nia poonijiore saaja. Saniniujia, jaara nia naata quiriquia cartesano pueyano nia camarnujiniji, maniniacuajaari.²² Cante poonitijiotasusano pueyano quiquiaari Pueyaso sequesacari niajaniya na muerasu nia quiniuriani, naajaa, niaari seetanujuanaa cartesano pueya quiya pa Jiyaniijira. Naajuhuaj, cante camarnuju quiija quiquiaari Pueyaso sequeyaquishacarijia na muerasu nia quiniuriani, quiarijiani, niaari pa Jiyaniijia poonitijiosano pueya quiya cutara.²³ Pueyasoori jiyanohua naquiya miiquiaari na cusojuasacari Neyanuniyojua, na masenura niajaniya, na muerasu nia quiniuria. Nia masequiaariiri tama nerajaaja nia quiniuria. Naaratej, majaari juhua tamonu camarnu poonitijiosano nia quiniu socua. Quiarijia saa Pueyasaraja nia quiri maninia.²⁴ Naaratej cuarta Pueyaso muerasunaa, taa nia quiquiaari tarrijia Pueyaso muerasu nia quiyaquishacarijiani, nia nia quiri quiarijia Pueyaso cumaquishacari pueyaracaanu niajaniya.

²⁵ Quiarijia nia sequereera cua niishiriojosano, taa camishoo pueya miiniutianiyani. Nioori maja pa Jiyaniijia rootasano janiya. Majaari na

sequenu quiquiaari cunojiniji. Naajaa, pa Jiyaniijaari cucua tiuuquiaa na sequenu panishano cua caminiijiuniuria niajaniya, na Sohuanu cumaquishacari janiya.²⁶ Naacuajitij, naa nia sequeyanijia: niaacujaari niishiya, quiarrijani, jiyanoqua puereeta quishacari. Nocuaji niajaniya cuaara quiuria taa nia quiyacuajani.²⁷ Cante niquiocuaracani, maja nia paniniu na cartenu. Cante niquiocuaaju quiyani, majaari nia niquiocuaanu paniniu.²⁸ Naajaa, mashaja jaara camiri, cunoori maja sesa. Naajuhuaj, niyacoo jaara camiri, majaari sesa na miishano. Saniniujujia, camishano pueyari socua taraatia miishaanutaniya camishoo pueyajiniji, puereeta quishacari quiniuucua mijiria quiarrijani. Majaari cua paniniu taraatia nia miishaanura. Nocuaji janiyari naa nia niishitiojiyani puera sesa quishacari quiniuucua quiarrijani.

²⁹ Cuarta Pueyaso muerasunaa, niajaniya cuaara niishiiria nio jiyari puequenutaniya. Majaari mijiria pa quiniu quiniutianiya pueyara-caanu. ¿Taariquitija mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacarijia, jiyanoqua pa tojitiare pa Jiyaniija. Naacuajitij, cante niquiocuaraca quiyani, majaari nocua nia niishiriojonu puera.³⁰ Cante na shaajasanoocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijorejuhuaj. Cante casami niquitiojojua quiquiaani, naajaa, maja casamiicua nia niishiriojonu puera. Socua nia niishiriojore cutara Pueyasorocua.³¹ Canapuete niishijiacani, queraatia casami na masejonura mijiriani, nojori cuaara niishiiria maja casami panijiaca nojori quiniuria puera. Nio jiyari tari puequeya puetunu pa niquis-hano casaatajanaa. Naaratej, maja casamiicua nia niishiriojonu. Saaja Pueyaso nia tojiri cutara.

³² Janiyari paniyani mijiria casaacua tacayashijiaca nia quiniuria. Pueyaso nia tojitiare juhuajaniya cutara. Camishoo pueyano na naata saaja pa Jiyaniijaacua niishiriojonu na tojiniuria maninia, pa Jiyaniija na shuquiritiniuria.³³ Cante niquiocuaraca saniniunijia, nojuajaari niishiriojoquia mijiria casaacua, necocua na shuquiritiniuria.³⁴ Naacuajitij, noojia niquijoteyari. Naajuhuaj, camishoo maa-jiiri pa Jiyaniijaacua niishiriojoquia maninia, tama na cuaqueya na cojuasacarijaa Jesucristora, nera na poonijionura puetunu noojia-atajanaa. Saniniuujia, cante niyacaraca quiyani, nojuajaari mijiria casaacua niishiriojoquia neyaca na shuquiritiniuria. Naacuajitij, majaari puera jeya na quiniu Pueyaso panishano na miiniuria.

³⁵ Janiyari naa nia sequeyanijia socua shuquiriaatia nia quiniuria. Maja cua taajetenu paniniu niajaniya puera cua rootasanota. Janiyari nareja naa nia niishitiojiyani, maninia nia quiniuria, pa Jiyaniija nia tojitanura maninia. Niaa jaara cua niishitiosano tojiri, nia naata pa Jiyaniija tojiniu maninia. Naacuajitij, niaari nioojia niquijoteyaquinii-taniya.

³⁶ Pueyano jaara naa niishiriojore: "Majaari maninia cua miiniu cua jamuesacari cua niyatpuueyaraacaanu na camiyaquiniuria", cuno pueyano cuaara miiria taa na miiniu paniyacuajani. Camishocoriquiano maaraja, cuaara camitioora. Quia niyatpuueyana camiri, majaari sesa.³⁷ Cante saniniuujia maja noojia niquijoteyaquiya na niishiriosacari neyatuucuani, cunoori maninia miiniutianiya

na camitiyaquishacari, jaara na naata neyatu cojuanu maninia.
³⁸ Naacuajitij, cante neyatu camitiriini, maninia miyari. Cante neyatu camitiyaquijaaniuhuaj, nojuajaari socua maninia miya. Naacuajitij, cuno neyatuuri na naata Pueyaso parishano miiniu socua, camishoo na quishacari.

³⁹ Camishano maaji cuaara carteyaquiiria neyaca, saminio neyaca quishacarijia. Pueyasoori naa sequequiaaritij. Neyaca jaara cusoyare, na mashiquioori maja tari na quiniu juhua camishano. Na parishacari, cuaara camiiria cana na caminiu paniyacuajani. Jaara caminiu paniri, cuaara camiiria Pueyasoocua tiuujia pueyanota cutara. ⁴⁰ Naajaa, mashiquio jaara camiyaquiriohua, socua shuquiriaatia quiniutaniyari, Pueyaso parishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequeteree nio.

8

¿Maniniate cuno shu pa miaquenura, seya jaara puecoosano quiri nareja shipinishano casaacuara, juhua Pueyasoocuarajanaa?

¹ Cuarta Jesuucua tiuniaa pueyanaa, janiya quiarijia nia niishitijonutaniyani teyano pa miaquesanojinijiti puereshiyani. Pueyaso niishiyashijiacaari na miaquesocoriquiano seja puecoonu niishijia shipinishano casaacuara juhua Pueyasoocuara. Pueyari nequesotaquiaa, ¿maniniate cuno shu, Pueyaso muerasu miaquesocoriquianojuhuaj, cuno seru jaara taucuaca jiyanishano cumaacaraca quiijaacuara mosano quiri? ¡Janiya cutaraari maja cua miaquenuno! Nia pohuatereera casaara cua miaqueyauquiaanoj. Cua tojitiare. Paacuajaari niishiyani cuno shipinishano casaari nareja pueyano shipinishano na juhuaj, nojori jiyanitiushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocuara puecoosano miaqueriquiani. Naa niishijiaari shuquiriaatia quiya tamajaaja. Saniniujia, majaari na niishiriojonu narta Pueyaso pueyanoo. Cante narta pueya paniquiaani, cunoori narta pueyacua niishiriojquiaa cutara, nojori jiuujia na cumaquinuria maninia. Jiyano pueyanoori cumueeca Pueyaso pueyano quiniutaniya.
² Naacuajitij, cante tama na cuaqueyajaaja jiyanaya niishijiani, cunoori juhuanojuaja maja niishijia seetanujuanaa. ³ Cante Pueyaso paniija saniniunija, cunoori narta Pueyaso muerasuucua niishiriojquiaa. Cunoori Pueyaso parishano pueyano cutara. Seetanujuanaa niishijia cutaraari cuno.

⁴ Juhuanojuajaari maja cua riucuanu nia niishiniu parishano: “¿Maniniateaari cuno shu pa miaquenu, seru jaara pueya jiyanishano pueyasoocuara mosano quiri?” ¿Casaatejaara cuno nojori jiyanishano pueyasoni? Paacuajaari niishiyani cuno shipinishano casaari maja saminio. Pueyano shipinishano casaari maja cumaacaraca quiija. Naaratej, nojori jiyanishano pueyasoni, cunoori maja seetanujuanaa Pueyaso. Niquiriyatu Pueyasoori quiya cutara. Jiyocuacaanu Quijia. Maja socua tamonu quiniu juhua nojuaja. ⁵ Tamasaca pueyari jiyanaya queraatia cumaacaraca quiijaacaari quiya juhua Pueyaso, jiya cajiniocua, mijirianio. Nojoriiri na jiylatequiaa nojori cojuanara, nojori cumaquiriquianojuhuaj. ⁶ Naajaa, paari niishiyani saa niquiriyatu Pueyasojuari quiya. Nojuacuajaari pa Que Pueyaso, pa shipininia.

Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jiyaniijaari quiyajuhuaj. Cunoori pa Jiyaniija Jesucristo. Na Queeri na shipinitiquiaari puetunu na shipinishanojuanaa. Pajaniyajuhuaj, paari rishiyani saaja na cumaquishacari pajaniya.

⁷Noojiaqueya Pueyaso pueyari saniniujuja jiyaniyajaa taucuaca shipinijosano casaari seetanujuanaa cumaacaraca quijiaca juhua Pueyasojuhuaj. Nojoriiri nahujuana sesa niishiriojonuujuaca. Jiyano pueya jaara Pueyaso muerasura quiri, juhuanojuaja maja na niishiniu maninia. Majaari tarijia na niishishano na tarinitianu juhuanojuaja. Naacuajitij, nojori jaara shu miaquere teyanote mosaaree nojori jiyanshano cumaacaraca quijiacuarani, nojori miaquenu nuhuaji, noojia niquipijoteyari. Nojoriiri tama sequeyajaaja: “¡Janiya naasucuaari sesa miirii Pueyaso niquierani!” Naacuajitij, nojoriiri noojia macuhuajetequiaa. ⁸Pueyanaa, paacuajaari niishiyani, casaa pa miaquequiaani, naajaa. Pa miaquesanoori maja na naata Pueyaso jiyanoootiniu pajaniya. Cante cuno shu miaqueyauquiaani, naajaa, majaari socua maninia pueyanora na quiniu Pueyasora. Najujuhuaj, cante na miaquequiaani, majaari socua sesa pueyanora na quiniujuhuaj. ⁹⁻¹¹Niaacuajaari jiyanoohua tiuquiaa Pueyasoocua. Naacuajitij, niaa naasucuaari na naata juhuajaniya tiuquiniu cuno shu miaquenura nojori jiyanshano pueyaso quiqiojinia. Niaacuajaari niishiya, cuno, nojori sequesano pueyasoni, majaari seetanujuanaa Pueyaso cuno. Naacuajitij, nia naata nocuara mosano seru miaquenu juhuajaniya. Saniniujuja, nia cajishacari cuno miaquenuujuajinie, niarta Pueyaso pueyanoori nia niquinutianiya na pueresano shu miaquenuyano. Na niquisshacari niajaniya, tamajaaja sequenutaniyari: “¡Ja! ¡Nojori qui cuno shu miaquenuyacua! Saniriirajataj”. Naa sequejatej, nojuaajaari jiyaniyajaa cuno miaquesanoori mosaaree seetanujuanaa tamonu cumaacaraca quijiacuara. Naacuajitij, na sanishacariuhua cuno shu miaquenu, tamajaaja noojia macuhuajanutaniyari. Naacuajitij, niaari niarta Pueyaso pueyano sesoya, na niquiaira nia miaquesacari cuno shu. Na niquinuucua niajaniya cuno shu miaquenuyano, nojuaajaari cunora na miaquereejuhuaj. Saniniujuja, nojuaajaari juhuanojuaja maja jiyanoohua Cristoocua tiuuniu na niishiniu. Cristo cutaraari nocuara cusoquiaari, sesa na miishanojinji na jiyanooshaanura. Niajaniyari saniniujuja quiarijia na sesorohuacuhua nia niishishanota. Nocuaji janiyari nia sequeyani, maja socua nia miaquenu cuno shu, cuno shu miaqueyauquia, mariqui na pueresano shu miaqueroohuariuhua, na rupuesacari niajaniya. ¹²Nia miaquesacari, niaari na pueresano shu na miaqueteya. Naacuajitij, noojiaari macuhuajenutaniya. Naacuajitij, niaari sesa miya niarta Pueyaso pueyano. Niaari pa Jiyaniija Cristo miya sesajuhuaj, naa nia sesosacari tama na pueyanojuaja. ¹³¿Taa nia sequeyani pueyanaa? ¿Maniniate shu pa miaquenu, seja jaara taucuaca jiyanshano pueyasoocuara puecoosano quiri? Janiya cutaraari maja socua cuno shu cua miaquenu quiniutianiya, cuarta Pueyaso pueyano mariqui sesereeri cua miishanojinji. Saaja maninia miijacara nia jiyateriquiani, taa cua miiquiaa saaja maniniacuaani.

Taa quijia Pablo quiquiaarini, Jesucristo jiyaramiquishano na quishacari

¹ Janiya jaara cuno shu miaquenu paniyani, cua naata miaquenu cua panishano. Naajuhuaj cua naata puetunu cua panishanojuanaa miiniu taa cua Jiyanijia sequequiaari na jiyaramiquishano pueyacuajani. Janiyacuajaari Jesucristo jiyaramiquishanojaaniuhuaj. Seetanujuanaa cua namijiata Jesucristo niquipuiaarinijia. Nojuajaari cua jiyatequiaari na jiyaramiquishano cua quiniuria. Naajuhuaj, cua pohuatasacari Jesucristojiniji nia niquiara, niaari na muerasura quiquiaari cua pohuatasanoocua nia tiuushacari. Naacuajitij niishishiyari janiyari Jesucristo jiyaramiquishanojaaniuhuaj. ² Tamasaca jaara jiyaniya janija majaa Jesucristo jiyaramiquishanonji, naajaa. Niaacuajaari na niishiya. Niaacuajaari Jesuucua tiuquiaari nia tojishacari cua pohuatasano nojuajiniji. Naacuajitij, niaacuajaari niishiya janiyari Jesucristo jiyaramiquishanonji. Na jiyaramiquishano cua quiniuucua, cua naata miiniujuhuaj taa cuarta Jesu jiyaramiquishano pueya miiquiaaculaani.

³ Tamonu jaara cua nequesoreere taa cua miiquiaani, janiyari saaja naa na riucuaquiaani: ⁴ “Pueyasoori sequequiaari, na jiyaramiquishano pueya cuaara niquitiosaaria na miaquesocoriquiano”. Naaratej, canaa jaara naa miiniu paniriquiani, canaa maara nia sequereni canaa nia niquitiojonura canaa panishano. Naajaa, majaari canaa masenu quiquia canaa panishano niajaniyajiniji, janija, Bernabeenio. ⁵ Naajuhuaj, canaa jaara niquiocuaraca quiriquiani, canaa maara canaa niquiocua rupojoriquia canaacuani, taa cuarta Jesucristo jiyaramiquishano pueya miiquiaaculaani. Pa Jiyanijia Jesu tapueyocuacaari naa miiquiaajuhuaj. Pedrojuanaari necocuata rucuanejoquiaajuhuaj, Jesucristo rupaa na poojotasacari. Naajaa, majaari naa canaa miiniu quiquiaaquij. ⁶ Jesucristoori sequequiaarijuuhuaj: “Cua jiyaramiquishano pueya cuaara niquitiosaaria cumaneeca, na panishano nojori masetajara”. ⁷ Niaateeri jiyaniya cuno sequencesano majaa quiria, majaa Bernabeerajuhuaj? ⁸ Cunocuajaari naa sequencesaquiaari canaarajuhuaj! Naaratej, canaa jaara naa paniriquiani, canaa maara canaa panishano masere niajaniyajiniji, canaa niishitiojonuucua niajaniya. Naajaa, canaari tama canaa juaashiquiataajaaja poonijoquiaani, canaa panishano canaa masetajara.

⁷ ¿Soldadoteeri tamonu poonijiosano jiitiaja, na miaquesano na masetajara? ¡Maja! Soldadohua jiyaniijiaari na niquitiojua puetunu na miaquesanojuanaa. ¿Pueyanoteeri na cuhuariquia nataja najuhuanaj? ¡Maja! Na nuhuaji na natau mianutaniyari na poonijiosanojiniji. ¿Majateeri seru juunu camaru ratunu na seru quitiaaca, jaara na paniri? ¡Taaquiriirinij! Na ratuyacuaaquiniatejaj. ¿Maatucua casaara najuhuana seesaareerini? ¿Canaarijataj? Canaa jaara naa paniriquiani, canaa naata nia masenu canaa panishano niajaniyajiniji. Naajaa, majaari canaa mashiniquivijionu quiquia quenaaja canaa panishano niajaniyajiniji. Canaari nareja poonijoquia tama canaa juaashiquiatajanijia, Jesucristo rupaa canaa pohuatasacari niajaniya.

⁸ Nio cua pohuatasano niajaniyani, majaari tama canaa niishirijosanojuuaaja. Nio niishitiojosanoori taricuacaanu Pueyaso Rupaa naajiosanojinia quiyajuhuaj, taa cua sequeriquiaaculaani. ⁹ Supuetana Moisés caminiuiushano Pueyasojiniji naa naajiotasaquiaaritij:

“Maja quia juunu rupaa quia seecutanu maja na miaquenura quia carojotasano, quia jaara na rapijoteya na coreetanura”.

¿Pueyasoteeri saa juyacaacua niishiriojoriquiaajaa naa na sequenuratej? ¡Maja! ¹⁰ Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijionaani, na niishitiosano pueya cuaara nojori niquitiojoora na parishano. ¿Taa nia sequeyani? ¿Pueyanote shuquiriaatia cuhuataja na cuhuariquiara? Taaquiriirinij. Na camaruuri niishiya na poonijiosanojiniji mianutaniya na nuhuajiri. ¿Majateeri pueyano carojotanu shuquiriaatia na nataujuhuaj? Jaa. Niishiyacuajaari na mianutaniyari. ¹¹ Naajaa, niaata cua quishacari, canaari naa poonijioriquiaa Pueyasorani, nioojiaca canaa cumaquinuria maninia. Naacuajitij, canaa cuaara niquitiojosaaria saniniuujia canaa parishano. Naajaa, majaari canaa paniniu canaa parishano nia niquitionura canaa. ¹² Tamasaca pueya niishitiosacari niajaniya, niaa cutaraari nojori niquitiojquiaa nojori parishano. Canaari saniya coteenujuanaa pohuataquiaari Jesucristo rupaa niajaniyani. ¿Majateeri coteenu canaa niquitiosaanu canaa parishanojuhuaj? Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa parishano. Canaa jiitiaaquishacari canaa parishano, canaari sanaa rejeretaja saajani. Majaari canaa taajetenu paniniu quijia niajaniya, canaa jiitiaaquishacari canaa parishano. Canaari naa miiquiaritij, niaa mariqui Jesucristo rupaa tojiniu paniyaquiriiri canaa taajetesacari niajaniya, pueyaracaanu canaa mashiniquijiosacari canaa parishano niajaniyajiniji.

¹³ Niaacuajaari niishiyajuhuaj, Jerusalén tiacajinia Pueyaso Secojoju tiajinia, cuarta Judiocuaca miaquesocoriquianoori puecoosaaquiaa Pueyasocuara, taa Pueyaso rootaquiaari canaa supuetanaacuajani. ¿Niaateeri niishiyaquijayahuaj, shu camaruuri secojojuajinia poonijionaa niquitioquiaa nojori miaquesocoriquianojuhuaj? Naacuajitij, Pueyaso secojojua tiajinia poonijionaari miaquesanoraca quiquiaajuhuaj. ¹⁴ Pa Jiyaniijia Jesucristoorigi na rupaa pohuatanaara naa seququiaarijuhuaj: “Cua rupaa pohuatanaa cuaara niquitiojosaaria na parishano pueyaracaanu”. ¹⁵ Naacuajitij, cua naata puetunu cua parishanojuanaa sequenu nia niquitiojonura janiya, juhuajaniya cua quinuria, taa cuarta Jesucristo jiyaramiquishano pueya miiquiaacuaani. Naajaa, majaari cua masenu quijia niajaniya cua parishano cua masetajara. Niaa naasucuaari jiyaniya janiyari quiarijia niaacuara naajioree nioni, cua shinijiuniuria niajaniya nia niquitiojonura janiya cua parishano. ¡Maja! Majaari cua paniniu nia niquitionura janiya cua parishano. Janiya jaara titiare cua miaajenutani, naajaa. Janiyari tama cua juaashiquiatajaaja poonijionu paniyani, Jesucristo rupaa nia tojitianura, cua parishano cua maseyaquiniutia niajaniyajiniji. Naacuajitij, janiyari tamajaaja shuquiriaatia quiya Pueyaso niquierani.

¹⁶ Cua tojitianaa jaara niquitiore janiya cua parishano, maja cua naata shuquiriaatia quiniu tamajaaja, cua pohuatasacari Jesucristo rupaa. Janiya jaara pohuataaquiri Jesucristo rupaani, cua Jiyaniijia mariqui cua saniitioreeri cua tojiyaquiniuucua nojuaja. Cua pohuatasacari na rupaa, janiyari saaja na tojiyani. Nojuacuajaari cua jiyaroquiaari na rupaa cua pohuatanura. Cunoori maja tama cua niishiriosano cua miiniuriajaja. ¹⁷ Majaari cua sequenu quiquiaari cua Jiyaniijia: “Cua

Jiyaniijianaa, quia rupaa pohuatareera quiajaniyara". Janiya jaara naa na sequequiaarini, cua Jiyaniijia maara cua niquitiore cua poonijiosano-jiniji nera, na shuquiritiasacari janiya. Saniniujia, tama na panishacar-ijiaaja cua Jiyaniijajanaacuajaari cua jiyaroquiaari na rupaa cua po-huatanura. Cunora, majaari cua naata na tarijionu. Janiyacuajaari na seruni. ¹⁸ Naacuajitij, ¿taa cua miya socuani, cua Jiyaniijia cua shuquir-itiniuria socuani? Naa miiquiaacuajanija, nareja poonijoquiaanija tama cua juaashiquiatajaaja cua panishano cua jiitianura, na rupaa cua pohuatasacari. Naaratej, majaari cua sequenu quiquia cua toji-tianaa, nojori niquitiojonura janiya cua panishano. Jesucristocuajaari sequequiaari na rupaa pohuatanaa cuaara niquitosaria na panishano. Naajaa, majaari naa cua sequenu quiquia niajaniya. Naacuajiti cua naata pa Jiyaniijia shuquiritiniu socua, cua pohuatasacari na rupaa cua maseyaquishacari cua panishano cua tojitianaajiniji. Naacuajitij, janiyari shuquiriaatia pohuataquiaa Pueyaso rupaa pa Jiyaniijiarani.

¹⁹ Majaari pueya niquitionu quiquia janiya na jiitiasanojiniji cua niishitiojonuucua nojori. Naacuajitij, janiyari maja juhua nojori seruni. Pueyanoori maja cua jiyaron. Naajaa, janiyari tama cua cuaqueyajaaja jiyatequiaari juhua puetunu pueya serujuanaa cua quiniuriani, socua pueya quiniuria pa Jiyaniijia Jesucristo tojitianaara. ²⁰ Jesucristo rupaa cua pohuatasacari cuarta Judiocuaca niquiara, janiyari juhua Judio pueyanora quiquiaani. Janiyari naa miiquiaani nojori mariqui cua tojiyaquiriiri, janiya jaara juhua tahue quiri nojori niquiarani. Naacuajitij, socua Judiocuacaari Jesucristo rupaa tojitiaa. Jesucristoocua cua tiuushacari, janiyari maja socua cua quiniu juhua cua supuetanaa Judiocuaca rootasano tojjia. Naajaa, na tojiquiaajaanija cua quishacari cuarta Judiocuacata, noo pojoritiatej cante cuno rootasano tojitiaajani. Naacuajitij, cua quishacari juhua nojori, nojoriiri socua cua tojitiaa cua pohuatasacari Jesucristojimiji. ²¹ Naajuhuaj, cua quishacari tamasaca pueyata, janiyari juhua nojori quiquiaani, nojori tojiniuria maninia janiya. Nojoriiri maja Judiocuaca supuetanaa rootasano tojiniu niishiniu. Naaratej, janiyari na tojinyaquiquiaajuhuaj, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia quijia quiri nojori niquiarani. Naajaa, Pueyaso rootasano tojiquiaa pueyaracaanu cutaranijia. Naajuhuaj, puetunu Jesucristo niishitiojosanojuanaa tojiquiaanija. ²² Noojiaqueya Pueyaso muerasuuri maja na naata tarinitianu najuhuana na supuetanaa rootasano. Cuaara tarinitiaara najuhuana na supuetanaa rootasano. Naajaa, janiyari mariyata cuno najuhuana rootasano tojiquiaajuhuaj nojoritia cua quishacari. Nojori jiyanijsacari tamonu casaa sesa quija, janiyari mariyata maja cua miiniu nojori pueresano casaa. Naacuajitij, cua naata nojori cumaquiniu maninia Pueyaso rupaata, nojori tojiti-asacari janiya, juhua nojori cua quishacari. ²³ Janiyari puetunu naa miiquiaajanaani, socua pueya cua tojitiuria Jesucristo rupaa. Naa maninia poonijoquiaa cua Jiyaniijiaranija, cua masenura puetunu maninia na sequesanojuanaa na muerasura.

²⁴ Niaacuajaari niishiya taa pueya tacuarishiyojquiaacuajani. Pueya netecuatusacari, puetunu pueyajanaari jiyanojua netecuatujuja jaara-jaaja. Cante narta netecuatuunaa shocotajani, shanohua casaa niq-uitioshiyari. Rituuuquia pueyanoori jiyanojua shuquiriaatia qui-

jia na shocotanujiniji na masesacari casaa. Naajuhuaj pueyanaa, jiyanohua nia poonijiore Pueyasora mijiria, shuquiriaatia nia masenura nia poonijiosanojiniji na jiiitasanojiniji jiyocuacaanu.²⁵ Naajuhuaj, pueya jaara tacuarishijionu paniri, cante shocotanu paniyani, cuno pueyanoori puetunu najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniriuiujia, na masesano na shocotanuuucuani, cunoori saaja shanohua nacaque jaamasujiniji shitiasano. Majaari na rishiniu. Pajaniyari saniriuiujia pueyaracaanu shuquiriaatia quiniutianiyani Pueyaso niquitiosanota pajaniya, paa jaara maninia miiri mijiria pa quishacarini. Naaratej, pa tarinitiare puetunu najuhuana tama pa miiniu panishanojuanaa, pa shuquiritiniuria pa Pueyaso.

²⁶ Pueya netecuatusacari, netecuatunaa cuaara niishiuria tee netenu puequeetu quiyani. Majaari najuhuana na camarucuneejonu. Naajuhuaj, cua poonijiosacari Pueyasora, majaari cua niquipotenu coojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhuaj, pa cartere najuhuana pa mijiosano. Saaja pa niishiriojore Pueyasooqua, maninia pa tojiniuria nojuaja.²⁷ Janiyari jiyanohua saniriuiuquiaa maja cua miiniuria tama cua cuaqueya miiniu panishanojuajani. Janiyari cua cuaqueya jiyartuutenu paniquiaani saa Pueyaso cua tojiniuriaja. Janiyari tari queraatia pueya niishitijoquiaari Pueyaso rupaani. Janiya jaara tama cua niishitijosanojuaaja tojiyquirini, Pueyaso mariqui cua cartereeri, maja na rupaa cua pohuatanura socua.

10

Supuetanaa Israel pueya miishanoori pajaniyara naajiotasaaquiaari pa niishiniuria maninia

¹ Cuarta Pueyaso pueyanaa, nia niishiri taa pa supuetanaa Judiocuaca miishaquiaaricuaani nojori rucuanejosacari pueyaracaanu cariiquia jiyajinija. Majaari nia niyajetanu niaa mariqui Pueyaso tojiyashijira quiriohuajuhuaj. Nojori mashishacari Egipto jiyajiniji, Pueyasoori cohuaja najaca shipiniquiaari nojori na cojuanura, nojori puetariquianojuhuaj. Pueyasoori puereetuua shoniniacu caminia raquitiaquiaari nojori nuura caminia cajiniocua. Naacuajitij, puetunu pueyajanaari niuutiaquiaari joojuashiquio. ² Naaratej, puetunu nojorijianaari juhua Moisés muerasura jiyatesaaquiaari, nojori nuhuajishacari Moisés puereetuua caminia tajiniaoaco, cohuaja najaca cariquiaconio. Majaari socua na quitiuniu quiquiaari Egipto pueya seya. ³ Puetunu nojorijianaari jiya cajiniocuaji casaa miaquenuujuja, Pueyaso tinishano nojori miaquesocoriquiano pueyaracaanu cuno cariiquia jiyajinija nojori rucuanejosacari. ⁴ Naajuhuaj, nojori jiyamuetusacari, Pueyasoori mohuaca pojuartaniquiaari saajiajiniji. Puetunu pueyajanaari cuno mohuaca ratuquiaari. Pueyasoori cuno saajiajiniji naa raatequiaari nojoritij, na niishitijonura cuno pueya, nojuajaari nojori nuhuajiriquiaa jiyasohuaja, pueyaracaanu nojori na cojuanura. ¡Nojuacuajaari pa Jiyaniijia Cristo quiquiaari! ⁵ Puetunu cuno supuetanaa Israel pueyajanaari naa maninia cojuasano quiquiaari cariiquia jiyajinija. Naajaa, quera

puetunu nojorijianaari Pueyaso tojitiaashijia quiquiaari saaja. Pueyasoori cunora nojori shuquiritiaaquiaari. Naaratej nojori cusojuanuuriquiaari cuno cariiquia jiyajinia nojori camarucuneetasacari pueyaracaanu, cuaara puequequiaarijiaatijia puetunu cuno tojiyashijiacajanaa.

⁶ Naa miishaaquiaariti cua supuetanaa Judiocuaca, sesa casaacua nojori jiaatianuucua. Nojorijinijiiri puetunu naajiotasaaquiaarijianaajapajaniyara, pa niishiniuria maja sesa casaacua pa jiaatianurahuaj.

⁷ Shushajanaa nojori coteesacari rucuanenu cariiquia jiyaco, noojiaqueya nojorijinjinioori caapiqui casaa shipiniquiaari orojiniji juhua juunu niquishano. Nojoriiri tama nojori shipinijiosano casaajaaja sequequiaari: “Nioori pa Pueyasohua, pa mashiquiniae Egipo jiyajinia pa camarucuaacuaji”. Naacuajitij, nojoriiri na shipinishano casaa shuquiritiaquiaari sacuaraatia. Jiyacari nojori miishanoori naa naajiotasaaquiaaritij:

“Pueyari cajitiurii queranacunura. Na nuhuaji, nujuatuquiaariiri na shipinishano juyaca tacoji na jiareyocuatunura. Socua sacuaraatia casaa miitiuquiaariiri”.

¡Maja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

⁸ Na nuhuaji, tamacari, noojiaqueya nojorijinjinioori sesa miiquiaari taatujuritia, cararaatia taucuaca miishacari nojori shuquirishacari na shipinishano casaa tacoji. Pueyasoori nocuaji naa sequequiaari: “¡Cuaara puecoosaaria cuno sesa miijiaca!” Cunora, veintitrés mil Judiocuacaari puecoosaquiaari cuno juuca. Cunojiniji pa niishiri maja pa miiniuria sesajuhuaj, taa nojori miiquiaricuaa taatujuritioni.

⁹ Na nuhuaji, noojiaqueya nojorijinjinioori Pueyasota juaaquioquiaari, tamonu miaquesanoocua nojori jiaatiasacari, puera nojori jishacari nojori miaquesano. Nocuaji Pueyasoori sacocua satejoquiaari cuno pueya. Queraatia pueyari cusionuuquiaari. Naaratej pueyanaa, maja cumaati pa juaaniu, Pueyaso jaara pa saniniujiuri. Maja naa pa miiniutij paa mariqui Pueyaso juaatirriuri.

¹⁰ Tamacari, noojiaqueya cuno pueyajinjinioori Moisésta juayonuutaquiaari. Moiséscuaari nojori jiitanara Pueyaso jiyatesano quiquiaari. Nocuaji Pueyasoori na seru jiyaroquiaari cuno juaajiaca na cusojuanura. Queraatia pueyari cusionuuquiaari jiyacari. Naaratej pueyanaa, majaari pa juaatianu pa jiyanijianucua.

¹¹ Puetunu pa supuetanaajiniji naajiotasanojuanaari taricuacaanu naajiotasaaquiaari, pa numootesaanura quiarijiani, quera pa Jiyanijija muetasacariuhua. ¹² Naaratej pueyanaa, tama nia cuaqueyajaja nia cojuare nia jiyanishacari niaari Pueyaso tojijia seetanu cutarajanaa, niaa mariqui sesa miiriiri, juhuajaniya nia quishacari tamajaaja. ¹³ Niaari mariyata saniniujiushaaquiaajuhuaj, taa puetunu parta Pueyaso pueyajanaa saniniujiushaaquiaacuani. Naajaa, nia naata Pueyasocua tiuuniu maja puera nia saniniujiushaanura. Pueyasocuaari niishiya taate nia naata rejeretanuni. Majaari puera pa saniniujiushaanu quiniutianiya. Pueyasocua nia niishitijoore taate nia naata cartesano quiniuhuani taraatia nia miiniuucuaji. Naacuajiti pa naata rejeretanu, Pueyaso jaara Sesaaca saniniujiutiri pajaniya.

Maja pa cojiniu tamasaca, na miaquenuuusacari na jiyaniushano na pueyasooocuara na puecootusano

¹⁴ Cua panishano Pueyaso muerasunaa, maja nia tiuquitianu tamasaca pueya jiyaniushano pueyaso quiquojinia, na tojitiana maja cojiniuria, nojori shuquiritiasacari juaashiquiata shipinishano casaa Pueyaso niti. Maja nojori cojiniu, niaa mariqui saniitiosaaereeri.

¹⁵ Niaacuajaari niishijiaca. Naaratej, nia niishiriojore cua sequesanoocua.

¹⁶ Paa jaara rerejore pa Jiyaniijia cusionu juuca pa niishiniuriani, pa ratunu panishacari, paari sequequiaani: "Paacarasho canaa Jiyaniijiana, quia nanacaari puetunu canaacuarajanaa shooquiaari". Naa pa ratusacari cuarta Pueyaso muerasunaa, puetunu pajaniyajanaari pa Jiyaniijia rupuesano quiquiaani, na nanaca shoonuucua puetunu pocuarajanaa. Naajuhuaj, pa miaquesacari, paari sequequiaani: "Canaa Jiyaniijiana, quiaari quia cuaqueya nootunequiaari puetunu canaacuarajanaa". Naa pa miaquesacaritij, puetunu pajaniyajanaari jatiqui pa Jiyaniijia cojiquiaani, na cuaqueya cusionuucua pocuara.

¹⁷ Cuno pan pa miaquesacari, puetunu pajaniyajanaari niquiriyatu panjiniji neecasequiaani. Naacuajitij, paari niishiyani puetunu pajaniyajanaari rupuetoono quiya pa Jiyaniijiatani, juhua niquiriyatu cuaqueyaya.

¹⁸ Nia niishiriojoriquia taa Israel pueya miiquiaacuaani. Nojori miaquesacari Pueyasooocuara na mosano Pueyaso niquiara, na niti nojori mosano seruuri juhua tama nojorijiaaja, Pueyaso jiyanooniuria nojori. Naacuajitij, nojoriiri na naata Pueyaso rupuenu, nojori secojonura nojuaja. ¹⁹ Jaara naa quiritij, ¿taateerini, pueya jaara shipinijiosano casaacuara mosano shu miaquere? ¿Casaate pueya jiyanshano pueyasooocuara mosano shuni? Nareja shucuajaari. ¿Cumaacaraca quijiate cuno, pueya shipinishano casaa juhua Pueyasorani? ¡Maja! ²⁰ Naajaa, nia tojitiare casaa cua sequenutaniyani. ¡Pueyaso niishiyashijiaca pueyari na miaquesocoriquiano na seya puecooquiaa samaruahuacuara! Naa nojori miishanoniquitij, cunoori maja Pueyasora. Naacuajitij, nojoriiri samaruhua rupuequiaa, maja Pueyaso. ¡Majaari cua paninu nia rupuenura samaruhua! Nocuaji, maja Pueyaso niishiyashijiaca nia cojiniu cuno shu nia miaquenura. ²¹ Majaari pa naata pa Jiyaniijata rupuetoonu, samaruhuata pa rupuetosacarijuuhuaj. ¿Pueyasote samaruhuata cojishiya? Pa Jiyaniijia cusionu juuca pa niishiniuria, ¿paateeri na sequesano miaquenutaniyani, samaruhuacuara mosano casaajuhuaj? ¿Cojishiyyate? ¡Maja pueyanaa! ²² ¿Paateeri pa Jiyaniijia paraca cojiniu paniyani, pa Jiyaniijia pa juaatiniuriani? ¿Pajaniyate socua cumueeca pa Jiyaniijajinijini? ¿Majateeri nia puerenu pa Jiyaniijia saniitionu?

Taa pa miiniutianiyani

²³ Tari sequereecuanajija, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquinii quiniutianiya parta Pueyaso pueya. ²⁴ Naaratej, majaari pa niishiriojonu saaja maninia pa quiniuria tamajaaja. Pa niishiriojore parta pueyacua, maninia nojori quiniuriajuhuaj. ²⁵⁻²⁶ Seetanujuanaari

nio naajiosano: "Nio jiyari pa Jiyanijia jiya, puetunu tii quijia casaajanaanio". Naaratej, niaa jaara shu masere shu niquitiojosaquiji cumaneecata, majaari nia nequesotanu: "¿Nio shujijo casaacuara mosano?" Maja naa nia nequesotanutej. Nia panishano nia masere nareja, nia miaquesocoriquiano juhuajaniya. Pa Jiyanijia shipinishanocuaajaari. Pa miaquesanoori maja na naata na sesonu pajaniya Pueyasora.

²⁷ Pueyaso niishiyashijia jaara nia masuure nata nia miaquenura, nia quiaare, niaa jaara quianu paniri. Juhuajaniya nia miaquere na rupojosano niaara. Majaari nia nequesotanunoj: "¿Nio shuti casaacuara mosaarucuaa?" Majaari naa nia nequesotanu niaa mariqui nioojia macuhuajtereeri niaa jaara niishiri nia miaquesanoori shipinishano casaacuara mosano juhua Pueyasoocuara. Juhuajaniya nia miaquere nareja. Puetunujuanaari pa Jiyanijia shipinishanocuaja. ²⁸ Saniniuuquia, nia cojinia jaara numootere niajaniya: "Nio shuuri mosaaree shipinishano casaacuara juhua Pueyasoocuara", majaari nia miaquenunoj, niaa jaara naa sequesaare. Maja nia miaquenunoj, nia cojinia mariqui na miaquerejaariuhuaj na cojishacari niajaniya. Nia tarajana jiyoteeri jiyaniyajaa cuno shipinishano casaari seetanujuanaa cumaacaraca quijia. Naacuajitij, na miaquesacari nocuara mosano shu, noojia macuhuanutaniyari. ²⁹ Majaari nio cua sequenu niaara. Niaacuajaari tari niishiya nia naata cuno shu miaquenu. Nia sequeya nio cutaranijia nia cojiniaa pueyara, maja nia miaquenura cuno shu nojori niquiara, nia cojinia mariqui noojia macuhuajtereeri cuno shu na miaquesacari naata.

Niaa naasucuaari cua nequesotanu paniya: "¿Paatucua pa panishano shu miaqueyaquirini saaja tamonu pueyano pueresacari pa miaquenu panishano shu? ³⁰ Paa jaara Pueyaso sequereni 'paacarasho' cuno sumatuurani, ¿majateeri maninia pa miaquenura? ¿Tamasacatucua casaara pa sesacare cuno miaquesano pa miaquesacarini?" ³¹ Cua tojitiare quenaaja cuarta Pueyaso muerasunaa. Nia miaquesacari, nia ratusacari, casaa nia miishacarinio, pueyaracaanu puetunu maninia nia miirijanaa Pueyaso nia shuquiritiuria. ³² Puetunu nia miishanojuanaa cuaara quiria maninia Judiocuaca niquiara, taucuaca niquiarajuhuaj, parta Pueyaso pueya niquiaranio. Jiyanolua taraatia cutaraari, pueya jaara tojijaquiya Pueyaso, juhuajaniya pa miishacari nojori jiyanitiushano sacuaraatia casaa. ³³ Naaratej, janiyari pueyaracaanu maninia miiniu paniquiaa puetunu pueya niquiarajanaani, nojori cuaara tojitiaara Pueyaso, Pueyaso pueyara nojori jiyatesaanura. Majaari cua niishiriojonu tama cua panishanojuaaja cua miiniuria. Janiyari socua niishiriojoquiaa tamasacaacuani, maninia cua miiniuria nojori niquiara.

11

¹ Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuaani, juhua nojuaja cua quiniuria. Mijiria na quishacari, nojuacuajaari pueyaracaanu maninia miiquiaari pueyacuaa.

Maajipohuatucua taa quiriquiani Pueyaso pueya rerejosacari

² Cuarta Jesuucua tiuuniaanaa, janiyari nia shuquiritiaani, pueyaracaanu nia niishishacari janiya, naajuhuaj, maninia nia tojitisacari

puetunu cua niishitiosanojuanaa Pueyasojiniji. ³ Janiyari paniya cutarani socua nio nia niishiniuria: Cristocuajaari caya camarnu. Cayari saniniujija necocua camarnu, taa pa Que Pueyaso pa Jiyajijia Cristo camarnu quiyacuaani. ⁴⁻⁵ Naaratej, nia secojosacari Pueyaso, nia caminiujushacari Pueyaso sequenu panishano Pueyaso pueya maanu niquiarajuaj, jiyacaritij, canuu cuaara jocuara na nacaque na pocuasacari. Saniniujija, maaipohua pocuanura, nojori cuaara mishiquioora na naca toquerauta. Cararaatia cutaraari caya jaara pocuare Pueysora, Pueyasotahuaj, na naca mishiquiosano. Cararaatiajaariuhuaj, maa ji pocuasacari Pueyasota, Pueyasorario, na naca mishiquiosoo. Maaji jaara caririquiyashijia quiri, ¿casaara na naca na tuqueteyaquiya puetunujuanaacuaraarini? ¿Maajiti juhua cayara quiniu paniya? Maja naasucua. ⁶ Maaji jaara na naca mishiquionu paniyaquiri pueya niquiara na pocuanura Pueyasora, Pueyaso na secojonuranio, cuno tojiyashijia cuaara tuqueteera na naca. ¿Cararaatiatee, maa ji jaara na naca tuquesano quiri juhua caya? Taaquiriirinij. Cararaatia quiyajaariuhuaj, na secojosacari Pueyaso, na caminiujushacari Pueyaso sequenu panishano pueya niquiarajuaj, mishiquiosoo na naca quishacari. ⁷ Maajiri neyaca shuquiritya na tojija na quishacari. Naacuajitij, neyacaari narta pueya shuquiritasano quiyajuhuaj. Naaratej, maa ji cuaara mishiquioora na naca na secojosacari Pueyaso, pueya niquiara, maja neyaca na rerequetenura. Canuuri shipinishaquaari juhua Pueyaso na quiniuria, Pueyaso shipinishano casami camarnura na quiniuriajuaj. Cayari Pueyaso shuquiritya Pueyaso tojija na quishacari. Naaratej, nia rerejosacari, canuuri maja nacaque na cushiniu na caminiujushacari Pueyaso rupaa, na secojosacari Pueyasojuhuaj.

⁸ Pueyaso jaara coteenujuanaa caya shipiniquiaari, majaari maa jijiniji na shipininiu quiquiaari caya. Maaji cutaraari caya riuquiocuajiniji shipinishaquaari. ⁹ Naacuajitij, maajiri cayara shipinishaquaari. Majaari caya shipinishaanu quiquiaari maajiria. Naaratej, maa ji cuaara caya tojiiria cutara. ¹⁰ Naacuajitij, maa ji secojosacari Pueyaso, na caminiujushacari Pueyaso sequenu panishano pueya niquiara, cuno maa ji cuaara mishiquioora na naca. Naacuajitij, pueyari niishiniutianiya cuno maajiri maja neyaca rerequeteja. Naa maninia quiya Pueyaso seja niquiarajaariuhuaj. ¹¹ Naajaa, puetunu pajaniyajanaari mariyata Pueyaso muerasuni, Jesucristoocua pa tiuushacari, canuu, maaipohuanio. Naaratej maja pa rerequetenura tamonu. Caya, maa ji, nojoriiri mariyata panishano. Maajiri maja na naata tamajaaja supuenu cayaju. Naajuhuaj, cayari maja na naata supuenu tamajaaja maajijii. ¹² Seetanujuanaari, maa jijiniji coteenu shipinishaquaari caya cuaqueyajiniji. Na nuhuaji, puetunu canuujuanaari saniniujija supuequiaa maajijiniji. Naajaa, puetunu pajaniyajanaari Pueyasojiniji supuequiaani. Naacuajitij, caya, maa jinio, nojoriiri mariyata panishano pa naacutoojonura.

¹³ ¿Taa nia sequeyani pueyanaa? ¿Maniniateeri, maa ji jaara Pueyaso secojore na naca mishiquiosoo pueya niquiara? Maja maninia. ¹⁴ Naajuhuaj, quera puetunu pueyajanaari sequeja, cararaatia niquishanoori caya jaara tucuamuejaro quiya juhua maa ji. ¹⁵ ¿Maajirijitaj? Jaara tucuamuejaro quiri, cunoori maninia niquishano cutara. Pueyasoori naa maninia shipiniquiaari maa ji, tucuamuejaro na quiniuria,

na naca mishiquioriquiano na muecacata. ¹⁶ Tamonu jaara nacoona paniyajaa socua pa muesujiniji, niocua na sequere: “Pablocuajaari tari pa niishitiojoree puetunu na niishishanojuanaa. Naajuhuaj, puetunu Pueyaso pueya maapuejanaari tamaquiicua naa miiquiaa taa Pablo po-huateree pajaniyacuajani. Majaari socua pa niishiniu tamaatia quiniu”. Niojuanaari cua rootasano cunojiniji, pueyanaa.

Corinto pueyari sesa miiquiaari na miaquenuijuajinia, pa Jiyaniijia cusionu nojori niishishacari

¹⁷ Cuarta Jesuucua tiuuniaanaa, nio, janiya niaacuara na naajiyani, nioori maja cua shuquiritianura niajaniya. Nia rerejosacari pa Jiyaniijia cusosacari nia niishiniuria, niaanaari saaja sesa miquiaa. Nia rerejonuni, cunoori nia cumaquitioonura juucua. Nia rerejosacari saniniuujia, niaari saaja socua seseyaree. ¹⁸ Janiyari naa pohuatasaaru-cuaa niajaniyajiniji: “Corinto pueyari sesa na niishiriojonutu nojori jiuujiajinia raquirijitiaequiaa nojori rerejosacari”. ¿Seetanutejanaa nio pohuatasaano niajaniyajiniji? Naa naasucuaj. ¿Casaate cua toyani? ¹⁹⁻²⁰ Seetanu naasucuajanaa niaari nioojiajinia naa niyaquejoquiaacuaj. Paacuajaari tari niishiquiaarini noojiaqueyea pueyari Pueyaso pueya maapueecuaji rupatenutaniya. Naa niishishanote canapuete maja Pueyaso muerasuni. Cante seetanujuanaa Pueyasoocua tiuujiani, majaari na rupatenu quiniutianiya narta Pueyaso muera-suucuaj. Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyaniijia cusionu nia niishiniuria, maja sesa nia niishiriojonu juhua niyaquejono nia quiniuria. Niaa jaara naa niyaquejoriquiatej, majaari pa Jiyaniijia cusionu nia niishiniu quiquiaa seetanujuanaa. ²¹ Niajaniyanaari tama nia patasanojuaaja coteetaquiaa miaquenu. Niaanaari nia miaquesano serotaqaquiciaa. Naacuajitij, casamijiuniucuanaari miajecoquiaacuaj. ¡Saniniuujia casamiriacanaari juhuajaniya mashaasequenu-uquiaacuajua! ²² ¡Jiyanoehua cararaatiaari naa nia miishanotej! Niaa jaara naa jamuejaca quiriquiatej, ¿majate nia naata tama nia tiajinia-jaaja nia miaquenuunu, ratununio? ¿Niaateeri niarta Pueyaso muerasu sooquiaa? Naa nia miishacari casamijiuniucuatej, niaacuajaari nojori cararoquiaa, casamijiuniucua nojori quiniuucua. ¿Taa nia sequeyani pueyanaa? ¿Janiyate nia maniniuhuaqueetaani? ¡Maja! Jiyanoehua tacayanijs. Majaari cunora cua shuquiritianu niajaniya.

Pa Jiyaniijia rootasano na cusionu pa niishiniuria

²³ Janiyacuajaari nia rootacanu tari pa Jiyaniijia Jesu pohuatasaano janiyani, taa na miaquequiaari na saquiriojosano pueyatani. Cuno niucuaja, Judasri pa Jiyaniijia quiateriquiano quiriquiaa taucuaca mosocoriquiano. Cua tojitiarohuacuara pueyanaa. ²⁴ Judas quiateyaquishacarijia nojuaja, pa Jiyaniijia Jesucristoori pan riquiaari. Na Que Pueyaso sequereeri: “Paacarasho cua Quenaa”. Na nuhuaji, na neecaserohuari na serotanura na pueya. Nojori sequereeri: “Nioori cua cuaqueya, niaacuara cua panitiaca nia jiyanooshaanura. Nia miaquere. Niocua naa miiriquia pueyaracaanutej, nia niishiniuria cua miishano niaacuara”.

²⁵ Naajuhuaj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secojoreeri. Na nuhuaji, na pueya sequeroahuari: “Pueyaracaanu nia ratusacari nio, nia

niishiriquia, cua Queeri cua nanaca seera nia jiyanooquia, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanoshaanura juucua. Janiya cutaraari nia niti mosaanutaniyani". Pa Jiyaniijiaari naa sequequiaari.²⁶ Naa nia miaquesacaritij, nia ratusacarijuuhuaj, pueyari niishiniutianiya niaari Pueyaso jiyanoshamo pueya, pa Jiyaniijia Jesu cusionuucua pa niti. Naa nia miaqueriquia pueyaracaanu na sequesano pan, pa Jiyaniijia cuaara tiuquiriohuajaatija.

Nia niishiri taate pa naata miaquenu pa Jiyaniijia cusionu pa niishinurianni

²⁷ Naaratej, niaa jaara sesa miiri, Pueyaso nia secojore ritia na jiyanooniuhuara niajaniya, nia miaquenihuara pa Jiyaniijia cusionu nia niishiniuria. Niaa jaara pa Jiyaniijia pan miaquere jiyanoshamo nia quishacarijia, niaa jaara na cusionu mashaca rature jiyanoshamo nia quishacarijuuhuaj, niaari na cusionu rerequeteya! Niaari juhua sequeyaruhua, pa Jiyaniijia najuhuana cusoquiaari. Naa nia miishacaritij, niaa cutaraari saniitiosaanutaniya.

²⁸ Naaratej, tama nioojajimijaaja nia niishirijoore taa nia quiquiaani, casaa nia miiquianu sesani. Naa nia miiri coteenu, niaa mariqui sesa nia miishamo miaquetareeri Pueyaso jiyanoyaquishacarijia niajaniya. Naa nia miiniu nuhuajitij, niocua shuquiriaatia juhuajaniya miaquerohua pa Jiyaniijia pan. Niocua juhuajaniya raturohua pa Jiyaniijia raatonuquejiniji cutara. ²⁹ Cante juhuajaniya miaquereeni, cante juhuajaniya raturee najuhuanani, jiyanoshamo na quishacarijia, cuno pueyanoori Pueyaso saniitiotenutaniya tama na cuaqueyajaaja. ³⁰ Naacuajitij, jiyanoshamo nia quishacarijia nia miaquesacari, queraatia niajaniyajinjinioori cunora cusosuhua quiya. Noojiaqueya niajaniyajinjinio cutaraari tari cusionuucanujuhuaj, Pueyaso saniitiosacari nojori. ³¹ Nocuaji tama nia cuaqueyajaaja nia jeecare suraatia, pa Jiyaniijia mariqui saniniuujia nia saniitioreeri. ³² Pa Jiyaniijia jaara pa saniniujiuri, canapuete sesa quiyani, Pueyaso nia saniitioquia na muerasu nojori quiniuucua, maninia nojori quiniuhuara juhua maninia na muerasu. Naacuajitij, juhuacarijia na saniitiosacari na muerasu, majaari pa saniitiosaanu quiniutianiya na ruuretajacata jiya puequesacari, Pueyaso jaqueroosacari na tojiyashijiaca.

³³ Naaratej cuarta Jesuucua tiuuniaanaa, niaa jaara pa Jiyaniijia pan sanu paniriquia na cusionu niishiniuria, nia sashiri niarta Pueyaso muerasu, jatiqui nia miaquenura maninia. ³⁴ Miaajeyano maaraja, cuaara miaqueera coteenu tama na tiajnjajaaja, Pueyaso mariqui nia saniitioreeri, sesa nia miiniuucua nia rerejosacari nia jamuenuta.

Socua nia nequesotasanojiniji janiya, janiyari nia sequenutaniyani cua tiuquishacari niaacua.

12

Pueyaso Sohuanu cumaquishacari puetunu Pueyaso muerasujuanaa

¹ Cuarta Pueyaso muerasunaa, niaacuajaari tari niishiya Pueyaso nia Sohuanu niquitioquia puetunu pajaniyajanaa, na cumaaca pa jitianura. Quiarijiani, socua nia niishitiojonu paniya cunojinjinijia.

² Niaacuajaari niishiya taa nia quiquiaari tarini, Pueyaso niishiyashijiaca nia quishacarijia. Niaari puetunu sapojosaaquiaarijiana, pueya

shipinishanoocua nia tiuuniucua najuhuanaj. Sesaacaari naa nia tojitiquiaari najuhuana pueya shipinishano, nia jiyanishano pueyasohuani.³ Naaratej cua pueyanaa, maja sapojosano nia quiniu socua. ¿Taate pa naata niishiniuni, cante seetanujuanaa Pueyaso Sohuanu cumaacata pohuataa Pueyasojinijini? Naa nia saniniuijuritij: Pueyaso Sohuanu pohuatesacari pueyano, nojuajaari maja na naata Jesucristo sesacanu. Naajuhuaj, saaja Pueyaso Sohuanu cumaquishacari pueyano na naata sequenu: "Jesucujaari Jiyaniijajanaa". Naacuajitij, maja nia tojiniu na rupaa, cante Jesucristo sesacajani.

⁴ Pueyaso Sohuanuuri niquiriyatujua. Naajaa, Pueyaso Sohuanuuri puetunu Pueyaso muerasujuanaa cumaquiquiaa tamaatia miishano pa miiniuria na cumaacata. ⁵ Queraatia tamaatia poonijiosanoori Pueyasaora quiya. Naajaa, puetunu pajaniyajanaari niquiriyatujua Jiyaniijira poonijioquiaani. ⁶ Puetunu pajaniyajanaari tamaatia miiquiaa pa poonijiosanoni. Saniniujia, Pueyasojuanaari na panishano miiquiaa puetunu pueya jiuujiajinajanaa. ⁷ Pueyasoori puetunu na muerasujuanaa cumaquiquiaa na Sohuanuta, maninia pa miitioonura, Pueyaso muerasu maapue cumaquishaanura puetunujuanaa. ⁸ Pueyasoori pa cumaquiquiaa tamaatia miishano pa miiniuria. Naacuajitij, Pueyaso Sohuanuuri tamonu pueyano pohuataniquiaa Pueyaso niishishano na muerasura. Pueyaso Sohuanuuri tamonu pueyano niishitiquiaajuhua Pueyaso sequenu panishano pajaniya. ⁹ Pueyaso Sohuanuuri tamonu cumaquiquiaa Pueyasocua na tiuuniuria jiyahohua, na shiniuijuniuria Pueyaso miiniu panishano pa miiniuria. Pueyaso Sohuanuuri tamonu cumaquiquiaajuhuaj cusosuhua na naatanijionura Pueyaso cumaacata. ¹⁰ Pueyaso Sohuanuuri tamonu pueyano jiyajeneta miishano miitiyajuhuaj Pueyaso cumaacata. Tamoruuri niishitishaquiaa Pueyaso sequenu panishano na pohuatanaura pueya niquiara. Pueyaso Sohuanuuri tamonu niishitiquiaa teyano sohanute tamonu pueyano cumaquiyani, Pueyaso Sohuanu, sapojona samaru soj. Pueyaso Sohuanuuri tamonu pueyano pocuatequiaa tamaatia rupaaca, na niishishoo rupaa. Pueyaso Sohuanuuri tamonu pueyano niishitijoquiaa tamaatia rupaajinina sequesano na pacunura pueya rupaajinajuhuaj, pueya tojiniuria maninia tama nojori rupaajinajaja. ¹¹ Naacuajitij, Pueyaso Sohuanujuanaari puetunu pa cumaquiquiaajanaa, tamaatia pa miiniuria. Naa pa poonitijoquiaari taa na paniyacuajani, cana na paniyajaaniuhuaj.

Puetunu Pueyaso pueyajanaari juhua niquiriyatu cuaqueya quiya

¹² Tamaatia poonijiosano puetunu pajaniyajanaa jiitiasacari, paari juhua niquiriyatu cuaqueya quiyani. Mijiria pa cuaqueyari jiyahohua maninia shipinishano jiyahohua Pueyaso niishitajata. Pa cuaqueyari maja saaja shu na quiniu. Pa cuaqueyari queraatia tamaatia casaaraca. Puetunu pa cuaqueya casaajanaari jatiqui poonijioquiaa pa cuaqueyajinina, maninia pa quiniuria. Puetunu pa cuaqueya casaajanaari saa niquiriyatu cuaqueyaja quiya. Jiyano pa cuaqueyatej, Pueyaso muerasuuri naa quiyajuhuaj. Naacuajitij, Cristota rupuetootesano pa quishacari, puetunu pajaniyajanaari juhua niquiriyatu cuaqueyaja quiyani, pa Jiyaniijira pa poonijionura jatiqui. ¹³ Pueyasoori pa rupuetootequiaa na Sohuanuta, puetunu jatiqui pa quiniuriajanaa. Pueyasoori puetunu na muerasujuanaa samiitianiquiaari na Sohuanuta. Pueyaso Sohuanu pa jiitiasacari, puetunu pajaniyajanaari

rupuetotesano quiya niquiriyatu Sohuanutani. Naacuajitij, paari juhua niquiriyatu cuaqueya quiyani: Judiocuaca, taucuacanio, pooniti-jiosano pueyajuhuaj, camarnuuju pueyanio.

¹⁴ Pa cuaqueyajiniji pohuatareeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa cuaqueyajinia. ¹⁵ ¿Taa nia sequeyani pueyanaa? Pa niohuaca jaara sequere: "Janiyari maja juaashiquiani. Naaratej, janiyari maja pueyano cuaqueyajiniji". ¿Taa nia sequeyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Naajuhuaj, majaari pa soonu tamaatia poonijiosano pa jiitiasacari Pueyasora. ¹⁶ Naajuhuaj, pa numaa jaara sequere: "Janiyari maja namijiani. Naaratej, janiyari maja pueyano cuaqueyajiniji". ¿Taa nia sequeyani pueyanaa? ¿Pa numaae maja pa cuaqueyajiniji, maja namijia na quishacari? ¿Sooshiyatee? Maja. ¹⁷ Paa jaara saaja pueree-tuuca namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiani? Maja pa naata.

¹⁸ Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupuetote-saaquiaari tee Pueyaso paniquiaari nianucuajani. Naajuhuaj, Pueyasoori puetunu na muerasujuanaa cumaquipuiaa mariyata, tamaatia poonijiosano pa jiitianura taa na paniyacuajani. ¹⁹ Pa cuaqueya jaara quiriquia saa namijiaja puetunujuanaa, ¿pa cuaqueyatuma tee quiriquia socuani? ²⁰ Puetunu pa cuaqueya casaajanaari namitia saaja niquiriyatu cuaqueya quiya.

²¹ ¿Taa nia sequeyani pueyanaa? Pa namijia jaara pa juaashiquia sequere: "Juaashiquiana, niaari najuhuana quijiaca. Maja nia naata niquiniu", ¿majate pa juaashiquia pa panishanojuhuaj? Taaquiriirinij. Naajuhuaj, pa naca jaara pa niohuaca sequere: "Niohuacanaa, ni-aari najuhuana quijiaca. Maja cua paniniu niya niajaniya", ¿majate pa niohuaca pa panishanojuhuaj pa rucuanejotajara? Taaquiriirinij. Pueyanaa, naa pa quiri jatiquiuhua puetunu parta Pueyaso muerasutajanaa, taa puetunu pa cuaqueyajinia pa jiitiasano casaajanaa quiya jatiquicuaani. Naaratej, puetunu parta Pueyaso muerasujuanaari pa panishano quiya, pa cumaquitioonura maninia. ²² Teyano casaate pa cuaqueyajinia socua sasaca quiya pa niquiarani, cunoori socua pa panishano. Maja pa naata rishiniu cunoaju. ²³ Naajuhuaj, teyanote maja puera maninia niquishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niquishaanura. Paari caririquijia cutarani, juhuasu pa quishacari.

²⁴ Saniniuujia, maninia niquishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojuanurajuhua teyanote maja maninia niquishano pa cuaqueyajiniani. ²⁵ Naacuajitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitooquiaa, puetunu maninia pa cuaqueya quiniuriajanaa. Naatej, taa pa tacaaquiaa pa cuaqueyaracuaani, naa pa miiri parta Pueyaso muerasujuhuaj. ²⁶ Pa niohuaca jaara noore, puetunu pa cuaqueyajanaari na tacaatiaa. Pa niohuaca jaara shaaterohua, pa cuaqueyari jaarajaaja puetunujuanaa shuquiri-

aatia quiriohua. Naajuhuaj, parta Pueyaso muerasu jaara taraatia miishaare, naa nojori pa taraajetarejuhuaj. Naajuhuaj, parta Pueyaso muerasu jaara maninia miishaare, nojoritia pa timirijiuhuaj.

²⁷ Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujuanaa rupueteya Cristo cuaqueyajinia, saa niquiriyatu cuaqueyaja pa quiniuria, pa camarnura pa poonijionura. ²⁸ Cristo cuaqueya pa quishacari, Pueyasoori coteenujuanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa po-huatanaa nojori quiniuria, nojori caminiujiuniuria Pueyaso sequenu panishano pueya niquiarajuhuaj. Naajuhuaj, Pueyasoori tamasaca jiyatequiaari na rupaa niishitiojona nojori quiniuria. Pueyasoori tamasaca jiyatesaquaariajuhuaj Pueyaso muerasu naacunaara nojori quiniuria. Tamasacaari jiyatesaquaariajuhuaj Pueyaso muerasu jiitiana nojori quiniuria. Tamasacaari pohuatesaquaaria tamaatia rupaacajujuaj. Naacuajitij, queraatia tamaatia poonijiosanori quiya. ²⁹ ¿Puetunu Pueyaso muerasujuanaateeri jiyaramiquishaquaari Jesucristojiniji nojori pohuatanaa tamasaca niquiara? Maja. ¿Puetunu Pueyaso muerasujuanaateeri Pueyaso rupaa pohuatanaa? Maja. ¿Puetunu Pueyaso muerasujuanaateeri Pueyaso rupaa niishitiojona? Maja. ¿Puetunu Pueyaso muerasujuanaateeri jiyajeneta miishano miijiac? Maja. ³⁰ ¿Puetunu Pueyaso muerasujuanaateeri cusosuhua naatanijionaa? Maja. ¿Puetunu Pueyaso muerasujuanaateeri tamaatia rupaaca pocuajaca? Maja. Tamaatia rupaajinia pohuatasano jaara quiriquia, ¿puetunu Pueyaso muerasujuanaateeri na naata na pacunu tama nojori rupaajinajaa? Maja. ³¹ Naaratej, niajaniya cuaara jiaatiaara socua maninia poonijiosano nia jiitiana Pueyaso Sohuanujiniji, niarta Pueyaso muerasu nia cumaquinuria maninia.

Cuarta Jesucua tiuuniaanaa, quiarijiani nia niishitiojoreera casaate socua panishanoni, Pueyaso shuquiritanura pajaniya.

13

Panijiaca pa quirij

¹ Pueyaso Sohuanu jaara cua pohuatera queraatia cua niishishoo rupaaca, Pueyaso seja rupaajuhuaj, naajaa, janiya jaara pueya paniyashijia quirini, janiya maara saaja cojuatuneja quiri Pueyasorani.

² Naajuhuaj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniyaquishacari pueya, janiya maara najuhuana quijia quirini. Naajuhuaj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaanio, naajaa, janiya jaara pueya paniyashijia quirini, janiya maara najuhuana quijia quiri Pueyasorani. Naajuhuaj, janiya jaara Pueyaso cumaacaraca quirini, tuhuananuhua cua jatanura tamocora Pueyasocua cua tiuuniucua jiyanoahuani, naajaa. Cua paniyaquishacari pueya, janiya maara najuhuana quijia quiriquia Pueyasorani. ³Naajuhuaj, janiya jaara puetunu cua casamijianaa nareja niquitiore casamijijiuniucua cua paniyaquiniutiani, cua Jiyaniijia maara

cua shuquiritiaaquiri. Naajuhuaj, janiya jaara tama cua cuaqueyajaaja panitiare Pueyaso rupaa cua pohuatanurani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini. Naajuhuaj, janiya jaara mosaare Pueyaso rupaa cua pohuatanuucuani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini.

⁴ Cante pueya panijiani, nojuajaari panaatia sashijia. Cante pueya panijiani, nojuajaari maninia miijia puetunu pueyarajanaa. Cante pueya panijiani, nojuajaari tamonu pueya jiitiasanoocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhuaj, cante pueya panijiani, majaari pueya rerequeteja na quiniu. ⁵ Cante pueya panijiani, majaari pueya na cararojonu. Cante pueya panijiani, majaari saaja nera niishiriojoua tamajaaja. Cante pueya panijiani, majaari ritia juajjia. Majaari na niishinuu naminiujuhuaj, tamonu jaara sesa na miiri. ⁶ Cante pueya panijiani, nojuajaari pueyacua taraajeja, nojori miishacari sesa. Saniniuuja, nojuajaari shuquiriaatia quiya pueya miishacari Pueyaso panishano. ⁷ Cante pueya panijiani, juhuajaniya pueyaracaanu rejeretaari, tamasaca miishacari sesa nojuaja. Majaari na taacanuunu Pueyaso sequesanojiniji, tamonu sequesanojinjinio. Naajuhuaj, majaari na tarintianu maninia miiniu pueyaracaanu. Pueya panijaari naa puetunu rejeretajanaa, taraatia na miishacari.

⁸ Panijia pa quiniuni, cunoori pueyaracaanu panishaanutaniya, maja saa mijiria pa quishacarijia. Naaratej, socua cutara panijiara pa quirij. Mijiria pa quishacari, Pueyaso Sohuanuuri pa cumaquiya Pueyaso sequenu panishano pa caminiujiuniuria, pa niishishoo rupaaca pa pocuanurajuhuaj, Pueyaso niishitishano pajaniya pa pohuatanurano. Puetunu nio niishishanojuanaari puequenutaniya Jesucristo tiuquishacariuhua pocua. Paniniu cutaraari puequeyajiniutianiya. ⁹ Mijiria pa quishacari, paari saaja shiitianiyojua Pueyaso niishishano jiitiaani. Pa niishishano Pueyasojiniji pa pohuatasanoni, cunoori saaja shiitianiyojua Pueyaso niishishanojiniji. ¹⁰ Naacujitij, mijiria pa niishishanoori najuhuana quiniutaniya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutaniyajanaani.

¹¹ Janiya jaara naatujua quiquiaarini, juhua naatujua pocuaquiaarini-jia. Juhua naatujua niishiriojoquiaarinijia. Saaja naatujua niishitiaja jiitquiaarinijia. Saniniuuja, janiya jaara cumantumaca quiquiaarini, janiyari cua naatujua quiniu niyajetaquiaarini. Naajuhuaj mijiria pa quishacari, paari juhua naatujoori quiyajaa Pueyaso niquiarani. Pa Jiyaniijia tiuquishacariuhua, paa cutaraari cumueeca Pueyaso pueya quiniutaniyani. ¹² Mijiria pa quishacarijia, paari shiitianiyojua niishiyani. Paari juhua ninitia niquiya jariyani, juhua sesarunee niquitiujinio. Pueyaso shuriucua pa quishacari, paari maatia niishiniutaniyani. Quiarijiani, saa shiitianiyojuaari pa niishishano. Na nuhuaji, Pueyasota pa quishacari, paari puetunu maniniajanaa niishiniutaniyani, naatej, taa Pueyaso niishiya puetunu pajaniyajanaacuaani. ¹³ Quiarijiani, paari Pueyaso rupaacua tiuuniu niishiyani. Naajuhuaj, paari juhuajaniya sashiniu niishiyani, maatia pa niishishacari nojuajaari maninia miiniutaniya pajaniya. Nioori

maniniacuaja. Naajaa, pa panishacari Pueyaso, pueyanio, cunoori socua maninia cutara Pueyasora, puetunu tamonu casaajinijiniojuanaa.

14

Niishishoo rupaaca pocuanujiniji niishitiososano

¹ Naarate cua panishano Pueyaso muerasunaa, nia jiaatiare socua jiyanoqua pueya panijiaca nia quiniuria, Pueyaso panijiacahuaj. Naajuhuaj, nia jiaatiare Pueyaso Sohuanu cumaaca nia jiitanura maninia nia miiniuria. Panishano cutaraari Pueyaso Sohuanu niishitija nia jiitanura, Pueyaso sequenu panishano nia caminiujiuniuria Pueyaso pueyara. ² Cante niishishoo rupaa pocuua pueya niiquiara Pueyaso Sohuanu cumaacatani, cuno pueyanoori maja na cumaquinu narta Pueyaso pueya. Na pohuatasanoori saaja Pueyaso tojishano, maja pueya tojishano. Cuno pueyanoori jiyasohuaja Pueyaso Sohuanu niishitishano pohuataa pueya niiquiara najuhuanaj. Majaari pueya niishiniu casaa na sequeyani. ³ Saniniujujia, cante Pueyaso sequenu panishano caminiujiujia pueya rupaajiniani, cunoori narta Pueyaso muerasu cumaquiya. Na numooteyari. Na cumanijiaajaariuhuaj. ⁴ Na pohuatasanoori maja najuhuana na quiniu pueyara. Pueyaso pueya maanu tojishacari na po-huatasano, nojoriiri socua cumaquishaanutaniya. Saniniujujia, cante niishishoo rupaajinija pocuua Pueyaso pueya maanu tajiniani, najuhuana pocuari. Saa tama noojia cumaquiyyajaarijia. ⁵ Puetunu niajaniyajanaa jaara niishishoo rupaaca pocuanu niishijiaca quiriquia, janiya maara shuquiriaatia quirini. Naajaa, janiya maara socua shuquiriaatia quirini puetunu niajaniyajanaa jaara Pueyaso sequenu panishano caminiujiuniaa quiriquia Pueyaso cumaacata. Cante Pueyaso rupaa pohuatanani, cuno pueyanoori socua tojishano pueyano niishishoo rupaa pocuanajiniji. Naajaa, niishishoo rupaa pocuanaari mariyata panishano quiya, na seqesano jaara pueya rupaajinija pacusaare pueya tojishocoriquiano. Naacuajitij, Pueyaso maapueeri cumaquishaanutaniyajuhuaj, maatia Pueyaso seqesano nojori tojishacari.

⁶ Cuarta Pueyaso muerasunaa, ¿niaatucua taa sequereni, janiya jaara Pueyaso rupaa pohuatasee niajaniya nia niishishoo rupaajiniani? ¿Nia-aatucua cumaquishaare cua pocuasacari najuhuana naa nia niquieratej? Maja. Niaa cutaraari cumaquishano quiniutianiya, janiya jaara nia po-huatare nia rupaajinijanaa Pueyaso niishitiososano janiyani. Maninijaajaariuhuaj janiya jaara nia niishitijoore Pueyaso rupaa nia rupaajiniani. ⁷ Nia niishirijoore. Jiuujiaaju casamiiri rupaaracahuaj. Naaratej, paari shuquiriaatia tojitiaa naajua jonesesaracarini, jaaqueque-jotaja taquiniosacarrijuhuaj. Saniniujujia, pueyano jaara naajua jone-nejonu saniniuijya na niishiyaquishacarrijia, saaja nareja cojuatuneyari. Naacuajitij, cante na tojijani, majaari na niishiniu casaa na jonenenu paniya juucuani. ⁸ Naajuhuaj, trompeta jaara sesa jonesesaare, ¿soldado-huate na naata niishiniu casaa na miiniutianiyani? Maja. ⁹ Mariyata naajaariuhuaj, niaa jaara niishishoo rupaa pocuua pueya niiquiara, ¿pueyatucua taa niishirini casaa nia sequeyani? Niaari saaja nia niti taquiriocuateya najuhuana nojori niquierata. ¹⁰ Niaacuajaari niishiya queraatia rupaacaari mijiria quiya. Puetunu maninijanaa cutaraari na niishiniaara. ¹¹ Saniniujujia, janiya jaara niishiyaquiya tamonu rupaani, janiyari tahue quiya cuno rupaa pocuanaran. Cuno rupaa

pocuanaari tahue quiya quiriajuhuaj. ¹² Cuarta Jesuucua tiuuniaanaa, niaacuajaari Pueyaso Sohuanuuucua jiaatiaquiaa, na cumaaca nia jitianura. Maniniacuaja. Naajaa, niajaniya cuaara jiaatiaara Pueyaso Sohuanu cumaquinuria niajaniya, puetunu tamaatia poonijiosanojuanaa nia miiniuriajuhuaj, maja saaja tamaatia rupaacajinia nia pocuanura. Naacuajitij, nia naata niarta Pueyaso pueya cumaquiniu maninia puetunu nia miishanotajanaa, Pueyaso Sohuanu cumaquisshacari niajaniya.

¹³ Naaratej, cante niishishoo rupaajinia pocuaquiaa pueya niquiara Pueyaso Sohuanu cumaacatani, cuno cuaara secojoora Pueyaso, Pueyaso Sohuanu cumaquinuria nojuaja, na sequesano na pacutenura pueya rupaajiniajuhuaj. ¹⁴ Pa secojosacari Pueyaso pa niishishoo rupaajinia, Pueyaso Sohuanuuri pa sohuanu secojoteya Pueyaso. Majaari pa niishitiaja niishiniu cutara casaa pa sequeyani. ¹⁵ Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohuanu cuaara secojoora Pueyaso pa niishishoo rupaajinia. Pueyaso pa secojorejuhua tama pa rupaajiniajaaja. Naajuhuaj, pa sohuanu cuaara jaaquequejoora Pueyaso niquiara pa niishishoo rupaajinia. Pa jaaquequejorejuhua tama pa rupaajiniajaaja. ¹⁶ Pueyaso Sohuanu jaara nia sohuanu secojotere niishishoo rupaajinia, nia tojitianaari maja na naata sequenu: "Jaa, cuaara naa quiiriatej". Majaari nojori niishiniu tamaatia rupaajinia nia secojosano. ¹⁷ Niaa naasucuaari jiyanolua maninia secojiya Pueyaso. Naajaa, saaja najuhuana quiyari tamasacara, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasaca. ¹⁸ Pueyanaa, shuquiriaatia quianijia Pueyaso niquiara, Pueyaso Sohuanu pocuatesacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuaja socua niajaniyajiniji cutaran. ¹⁹ Naajaa, janiya jaara pueyaracaanu pocuariquia niishishoo rupaajinia Pueyaso pueya maapue niquiarani, cuno maara najuhuana quiriquiaj. Rupaquijia pohuatasano tama pueya rupaajiniajaajani, cunoori jiyanolua socua maninia tucuayocua pohuatasanojiniji niishishoo rupaajinia. Saaja pueya niishishano rupaajinia cutara cua naata nojori cumaquiniu.

²⁰ Cuarta Pueyaso muerasunaa, niaari najuhuana shuquiriya niishishoo rupaajinia nia pocuasacari pueya niquiara, naatej, taa naatujoori shuquiritiaquiaa quiarinio tacuarishijiotajacuaani. Niaa jaara juhua naatujoori quiniu paniyajaa, sesa niishiriojiyashijiaca nia quiri, taa naatujoori quiyacuaani. Saniniujia, majaari seetanujuanaa naatujoori niajaniya. Naaratej, cumantumaca nia quishacari, nia niishirijo-re maninia nia cumaquitioonura nia rerejosacari. ²¹ Tariucuacaanu, tama Pueyaso sequesanojaarijia naajiotasaaquiaari. Naa sequeyari:

"Janiyari taucuaca jiyaramiquiniutianiya cua saquiriojosano Israel pueyacuani, cua sequenu panishano nojori pohuatanura cua pueya. Cua pueya niishiyaquishoo rupaacajinia pohuatanutaniyari. Naajaa, niishiyanijia, tahuua pohuatasacari cua rupaa, cua pueyari saa cua ruuretanutaniyajaa, taa nojori ruuretaquiaa cua rupaacuaani jaara tama nojori rupaajiniajaaja pohuatasaaariquiaa".

²² Naa Pueyaso sequencesacaritij, paari niishiyani, Pueyasoori tamaatia rupaacata na tojiyashijiaca tojitiniu saniniujuquiaa na rupaa juucua. Paari saniniujuja tari na rupaa tojitinjaca cutarani. Naaratej, majaari socua panishano Pueyaso sequenura pajaniya pa niishishoo rupajinia, na tojitinjuria pajaniya nojuaja. Pueyaso sequenu panishano caminiujuushano cutaraari pajaniyara. Cunocuajaari tama pa rupajiniajaja. Cunoori maja Pueyasocua tiuyashijiaca. ²³ Naaratej, Pueyaso pueya maapue rerejosacari, saaja secaja niajaniyajinjinio cuaara pocuaara niishishoo rupaacajinia. Naa pocuanu nia tarinitiare quenaaja, tamasaca Jesuucua tiuyashijiaca quishacari nia rerejojinia, nojori mariqui jyaniriiri: “¡Nio pueyaqui puetunu paatecoorijiuhanajaj!” ²⁴ Saniniujuja, puetunu niajaniyajanaa jaara Pueyaso sequenu panishano caminiujija tama nia rupaajinajaja, tamonu pueyano jaara niaacua tiuquiri, nojuajaari maninia niishiniutianiya nia pohuatasano. Puetunu nia pohuatasanojuanaari noojia tacaatiniumtianiya sesa miijia na quiniucua. Tama nojuajaarijia niishiniutianiya: “¡Janiyaqui sesa miijia Pueyaso niquiarani!” ²⁵ Nia pohuatasano Pueyasojiniijiiri puetunu sesa na miishanojuanaa na niishitiniutianiya noojajinia. Nocuaji, nojuajaari Pueyaso tojijiara quiniutianiya. Sequenutaniyari: “¡Pueyasoqui seetanujuanaa nia tajinia niya quiya!”

Puetunu nia miirijanaa maninia. Majaari nia riutiocojonu tamonu pocuasacari

²⁶ Naaratej, cua tojitiare taa nia miiniutianiyan cuarta Pueyaso muerasunaa. Naa nia miiri nia rerejosacari. Puetunu nia miishanojuanaa cuaara quiuria nia cumaquitioonura, socua maninia Pueyaso tojitiianaara nia quiniuria. Naacuajitij, Pueyaso Sohuanu cumaacata, tamonu naasucuaari jaaquequejonutaniya. Tamonu naasucuaari Pueyaso rupaa niishitijojonutaniya. Tamonu naasucuaari Pueyaso Sohuanu niishitijojosano noojajinia caminiujuuniutianiya. Tamonu naasucuaari niishishoo rupaajinia pocuanutaniya. Na nuhuaji, tamonu cuaara na pacuura nia rupaajinia, maninia nia tojiniuria. Naa nia miiri maninia. Niquiriyatujua cuaara pocuaara coteenu, na nuhuaji tamonu, na nuhuaji socua tamonu. Naate nia miiri. Majaari nia riutioconu tamonu pohuatasacari. ²⁷ Niaa jaara niishishoo rupaajinia pocuanu paniri, cuaara pocuaara saa querajaa pueyaja, maja socua. Cuaara pocuaara niquiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuaara pacuura pueya rupaajinia, niishishoo rupaajinia nia sequencesano, pueya tojiniuria maninia. ²⁸ Niishishoo rupaa pacuna quiyaquishacari, cuaara pocuaaquiuria cante tamaatia rupaajinia pocuanu paniriquiaa nia niquiarani. Na naata sanaa pocuanu noojajinia tamajaaja, saa Pueyaso niquiarara.

²⁹ Naajuhuaj, niaa jaara Pueyaso Sohuanu niishitijojosano nioojajinia pohuatanu paniri, cuaara pocuaara saa querajaa pueyaja, maja socua. Na nuhuaji, Pueyaso Sohuanu cumaaca jiitiana cuaara saniniujuuria nia pohuatasano, nia niishiniuria, cunote seetanujuanaa Pueyaso Sohuanu niishitijojosano, maja soj. ³⁰ Nia pohuatasacari Pueyaso rupaa, tamonu jaara pohuatanu paniya shusha Pueyaso Sohuanu niishitijojosano noojajinia, cante pohuataajaani cuaara sanaajeera, na tarajana

pocuanura. ³¹ Naacuajitij, puetunu Pueyaso niishitiojosano jiitianaajanaari na naata na pohuatanu. Naaratej, niquiriyatujua cuaara pohuataara, na nuhuaji tamonu, na nuhuaji socua tamonu. Naacuajitij, puetunu niajaniyajanaa na naata pohuatanu nia niishishano Pueyaso-jiniji. Naacuajitij, puetunu Pueyaso muerasujuanaari maninia niishitiosano quiniutianiya, maninia cumaquishanojuhuaj, maninia nia miiniuria. ³² Maja timia pocuanu jaarajaaja tamonu pocuasacari. Majaari Pueyaso Sohuanu pocuatenu tari niajaniya, tari tamonu pocuasacaricuua. Nia naata cutaraari sashiniu nia pocuanura. ³³ Pa Pueyaso cutaraari maninia miijiajanaa. Maja cushitiojojua. Naarate pueyanaa, maja tamasaca pocuasacari pa riutiocojonu. Saaja maninia pa miiriquia pueyaracaanu.

Cua tojitiare socua. Puetunu Pueyaso pueya maapuejanaa cuaara naa miiria na rerejosacari. ³⁴ Maajipohua cuaara sanaa tojitiaara Pueyaso rupaa pohuatasacari. Maajipohua cuaara niishitiojiyáquirria pueya niquiara. Maajipohua cuaara tojijiara quiiria, taa pa niishitiosaaquiaari Moisés Rootasanojinijicuajani. ³⁵ Maajipohua jaara niishiniu paniya socua pohuatanana niishitiosanojiniji, nojori cuaara nequesotohuara neyaca tama na tiajiniajaaja, na que maaraja. Cararaatia cutaraari maaji jaara nequesoreetare caya pohuatasacari, Pueyaso muerasu rerejojuajinia. ³⁶ Nia tojiri nio cua rootasano pueyanaa. Niaacuajaari niishiya, Pueyaso rupaari supueyaquiquiaari niajaniyajiniji. Naajuhuaj, majaari Pueyaso rupaa pohuatananaa jiyaramiquiniu quishaquiaari saa niaacuaja. Tamonu jiyacajinia, queraatia Pueyaso pueya maapueeri cua niishitiosano tojitiaquiaa maninia cutara. ³⁷ Niajaniyajinjinio, noojiaqueya pueyari Pueyaso Sohuanu cumaaca jiitiae, nia niishiniuria cana cumaacata tamonu pueyano niishitiojyani. Naacuajitij, ¿taa nia sequeyani? ¿Majate Pueyaso Sohuanu niishitiosano cua sequesano niajaniya? ³⁸ Cante nio niishiniu paniyaquiyani, cuno jiyoteeri maja Pueyaso Sohuanu cumaacaraca quijia. Cuno pueyano cuaara tojijaquiaaria saniniuuja.

³⁹ Naacuajitij cuarta Pueyaso muerasunaa, nia jiaatiare Pueyaso Sohuanu cumaaca nia jiitianura, pueya niquiara nia pohuatanura Pueyaso Sohuanu niishitishano niajaniya. Naajuhuaj, majaari nia tenujunu noo pojori, canapuete niishishoo rupaacajinia pocuanu paniyani, Pueyaso Sohuanu cumaquishacari nojori. ⁴⁰ Nareja maninia nia miiriquia puetunujuanaa. Naacuajitij, niquiriyatu cuaara pocuaara coteenu, na nuhuaji tamonu, na nuhuaji socua tamonu.

15

Cristo samiitiasacariuhua

¹ Cuarta Jesuucua tiuuniaanaa, Jesucristo rupaa nia niishiriohua, tarijia cua pohuatasano niajaniya, nia jiyanooshaanurani. Niaari nocua tiuquotaari maninia. Niaari quiarijia maninia na tojitiaajaa.

² Naacuajitij, Jesucristoori niaacuaji tacuquiaa quiarijia, maninia nia tojitiасacari na rupaa, taa cua pohuataquiaari niajaniyacuajani. Niaacuajaari Pueyaso pueyara jatanishano quiya niaa jaara maja na juhuana na rupaa tojijaquiaari. ³ Janiyari niaara caminiujuquiaari Jesucristo rupaani, taa cua tojiquaaricuaani. Nio cutara rupaa nia

coteetaquiaari pohuatanunija: Cristoori pocuara cusoquiaari niyacutesanojinia, sesa pa miiniuucua. Tariucuacaanu Pueyaso sequenu panishano caminiujiuniaari naa naajiotauquiaari, taa Cristo miishaanutaniya naquiyani. Seetanujuanaa naa miishaaquiaariiri. ⁴ Jesucristo cusionu nuhuaji, raaco niasaaquiaariiri. Jiuujianaraca juuca jaara na shoconujuquiaari macu na quishacari, na raaco samiitiaequiaariuhuari. Naa tohuateequaariairi puetunu tariucuacaanu Pueyaso Rupaajanaa, taa nojuajiniji naajiotasaquaaricuajani. ⁵ Na nuhuaji, Jesucristoori Pedroocua muetaquiaariuhuua. Na nuhuaji, na jiyaramiquishocoriquiano pueyacua muetaquiaarijiaariuhuaj. ⁶ Na nuhuaji, muetaquiaarijuhuaj na tojitiana rerejosaquiairi. Socua quiniento pueyari na niquitiaquiaari jiyacari. Queraatia jiyacari na niquiniajijninio pueyari saminio quiyajaa. Noojiaqueyari tari shaajecocanu. ⁷ Na nuhuaji, pa Jiyaniijaari Santiagoocua muetaquiaarijihuaj. Na nuhuaji, muetanu pacutequiaariuhua na doce jiyaramiquishocoriquiano pueyacuaari.

⁸ Puetunu cuno pojori nuhuaji, Jesucristoori socua cucua muetaquiaarijuhuaj, nocua tiuujia cua quiyaquishacarijia. Naa na paraca cua quishacarijatej, Jesucristoori cucua muetaquiaari na jiyanooniuria janiya. Ritia cua jiyatequaariairi na jiyaramiquishano cua quiniuriajuhuaj. ⁹ ¿Casaaraquitijia na saquirijoquiaari janiyatejaj, na jiyaramiquishano cua quiniuriajuhuaj? Janiyari puera sesa miijia quiquiaarini cua niishiyaquishacari Jesucristo. Cucua na muetaaquishacarijia, janiyari Pueyaso saquiriojosano pueya miitiaquiaarini. Cuarta Jesucristo jiyaramiquishano pueyari maja naa sesa miijia na quitiuniu quiquiaari. ¹⁰ ¡Pueyasoori jiyanolua maninia! Cua jiyanoquaariairi Jesucristo jiyaramiquishano cua quiniuriajuhuaj, taa cua quiya quiarijiaquajani. Naa quiyanijia Pueyaso jiyanooniuucua janiya. Majaari najuhuana na jiyanooniu quiquiaari janiya. Na jiyanooshacari janiya, janiyari socua jiyanolua nera poonijiocanu cuarta Jesucristo jiyaramiquishano pueyajinijini. Naajaa, maninia cua poonijiosanoori maja tama cua miishanojuaaja na quiniu. Pueyasocuajaari cua cumaquiaua na Sohuanuta, maninia cua miiniuria na parishano.

¹¹ Naacuajitij, naa sequeriquiaaa niajaniyanijia: cante nia pohuataquiaari Jesucristo rupaani, naajaa. Janiyari Jesucristo rupaa pohuataquiaajaacuhuaj, mariyata taa cuarta Jesucristo jiyaramiquishano pueya pohuataquiaacuaani. Majaari rimijata canaa pohuatasano. Niaari cuno rupaacua tiuquiaari maninia.

Pueyaso muerasu macunucua samiitiasacariuhua

¹² Cuarta Jesuucua tiuuniaanaa, canaa jaara pohuatariquiaaa taa Cristo samiitiaequiaariuhua macujinijini, ¿casaara noojiaqueya niajaniyajinijino sequequiaani: "Macunucua maja na samiitiaeconu quiniutianiuhua"? ¹³ Macunucua jaara samiitianiyaqueishaanutaniya taa nia sequequiaacuajani, Jesucristo jiyoteeri macu quiyajaacuhuaj. ¿Cristo teeri macu quiyajaa? ¡Maja! ¹⁴ Cristo jaara macu quiriquiaja, canaa maara najuhuana pohuataa na rupaani. Naajuhuaj, niaa maara najuhuana Jesucristoocua tiuya, na pueya nia quiniu paniniuria juuca. ¹⁵ Canaacuajaari pohuatanuuquiaani Pueyasoori Jesucristo samiitianiquiaariuhua. Macunucua jaara samiitianiyaqueishaanutaniya taa

nia jiyaniquiaacuajani, canaa jiyoteeri sapojonuujuaca Pueyaso jiyaramiquishano pueyani. Naacuajitij, nia sequesano jaara seetanujuanaa quiri, maja jiyoteeri Pueyaso samiitianiniu quiquiaariuhua Jesu. Saniniujia, iniaari jiyajeneya cutara! ¡Pueyasocuajaari see-tanujuanaa Jesu samiitianiquiaariuhua! ¹⁶ Macunucua jaara samiitianiyaquishaanutaniya taa nia sequequiaacuajani, Cristo maara samiitiaaquiquiaariuhuajuhuaj. ¹⁷ Cristo jaara samiittiaaquiquiaari, niaa jiyoteeri Cristoocua tiuya najuhuanaj, Pueyaso na jiyanoootiniuria juucua niajaniya. ¿Macuteeri na naata pocuaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusoojua quiyajuhuaj. ¿Naatejaaratej? ¹⁸ Cristo jaara macu quiriquiaja, tariucua shaajecono nocua tiuuniaa pueya maara taraatia quiriquiaj. Nojori maara taraatia shaajecanu puetunurajanaa, maja quenaaja nojori samiitiaconuhuara. ¹⁹ Pajaniyajuhuaj, canapuete saminio quiyajaani, paa maara jiyanoohua taraatia quiyani, pueyaracaanu najuhuana naquiya pa miishacari mijiria. Jaara naa quiritij, pa Jiyaniijia Jesucristo jaara macu quiriquiaja, paa maara najuhuana poonijioriquia pa shuquiritiniuria nojuaja juucuani.

²⁰ ¡Namitia naa quiyaquiyari! ¡Cristoori seetanujuanaa samiitianishaquaariuhua! ¡Canaari na niquitiaquiaarini! Naacuajitij canaari niishiyani Jesucristoori saminio quiyacuaja. Pueyaracaanu saminio quiniutianiyari. Naa pa Jiyaniijia Jesu samiittiasacariuhua coteenu pocuajicuajatej, naacuajitij paari niishiyani puetunu shaajecono nocua tiuuniaajanaari samiitianishaanutaniuhuajacuhuaj. ²¹⁻²² Paacuajaari niishiyani, pa supuetana Adánri coteenujuanaa shaajequiaari, Pueyaso na tojiyaquiniuucua. Naacuajitij, puetunu nojuajiniji supuenaajanaari shaajecoquiaajuhuaj. Adán nuhuaji, parta pueyano Jesucristoori saniniujia Pueyaso tojija quiquiaari cutara. Naacuajitij, nojuajaari samiitiaquiaariuhua. Naaratej, puetunu nocua tiuuniaajanaari samiitianishaanutaniuhua, pueyaracaanu saminio pa quiniuhuara pa Jiyaniijita. ²³ Pa Jiyaniijia Jesucristoori coteenu samiittiaquiaariuhua. Cristo nuhuaji, puetunu nocua tiuuniaajanaari samiitiaconutaniuhua, pa naacuneetoonura nata, na nishacariuhua pocua. Paari naa samiitiaconutaniuhua Pueyaso panishacarini. ²⁴⁻²⁶ Na nuhuaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutianuhua, na tucuatanuhuara puetunu na Que panishanojuanaa. Na Queeri na jiyaronutaniya puetunu na paraajanaa na puecoonura. Jesucristoori Jiyaniijajanaa quiniutianiya, na Que cuaara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoontaniyajanaa, mariyata puetunu jiya cajiniocua cumaacaraca quiwijacajanaanio. Sesaacaari jatasaanutaniyajuhuaj, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhuaji puetunu na paraajanaa, jiyacari pueya cusojuana shaajanutaniyajaaariuhuaj. Majaari cusionu niishishaanu quiniutianiya socua, shaajenunio. Puetunu casaajanaa jaara maninia jiitiasano quiriohua, Jesucristoori na Que na niquitionutaniuhua, na Que jiitianuhuara puetunujuanaa.

²⁷ Na Que Pueyasoori Jesu jiyatequiaari Jiyaniijia na quiniuria jiyanoohua na cumaacata. Naacuajitij, nojuajaari na naata puetunu casaajanaa na tojitianiniu. Nojuajaari Jiyaniijajanaa. Saa na Que

Pueyasojuuaari socua Jiyaniijajanaa, maja tamonu. Pueyasojuanaari Neyanu jiyaroquiaari puetunu na shipinishanojuanaa na jeenucuanura na cumaacata.²⁸ Na tucuatasacari, pa Jiyaniijia Jesucristoori na Que sequenutaniya: "Cua Quenaa, tari tucuateree quia panishanonijia. Puetunu quia paraajanaa quejooree tarinijia. Majaari socua sesa na miiniu quiniutianiya. Saa quiajaniyajaari pueyaracaanu Jiyaniijajanaa quiniutianiya cutara, maja socua tamonu". Naacuajitij, pa Que Pueyasoori Jiyaniijajanaa quiniutianiya pueyaracaanu, puetunu na shipinishanojuanaa na jitianura maninia.

²⁹ Socua nia niishiriojore pueyanaa. Niaa jaara jiyaniyajaa macunucuaari maja na samiitianishaanu quiniutianiuhua, ¿casaara pueya tiuquinijosaaquiaa moojinia macu nitini, cuno macu jaara na shaajeyaquishacarrijia Jesucristoocua tiuurii? Paa jaara tiuquinijosaaquiaa Jesucristoocua pa tiuushacarini, paari miriqui miyani taa pa Jiyaniijia Jesucristo miishaquaaricuaani. Nojuajaari raaco niasaaquiaari na cusosacari. Na nuhuaji samiitiaquiaariuhuari. Naajuhuaj, paari mariyata samiitianishaanutaniuhuani. Niaari sequeya macunucuaari maja na samiitianishaanu quiniutianiuhua. ¿Naatejaaratej? Macunucua jaara samiitianijiyaquishaanutaniuhua taa nia jiyaniyacuajani, ¿casaara pueya tiuquinijosaaquiaa shusha shaajeno macu niticuaraarini?

³⁰ Paa jaara samiitianiyaquishaanutaniyani taa nia sequequiaacuajani, canaaquiiiri najuhuana tama canaa cuaqueyajaaja panitiaquiaani, pueyaracaanu canaa poonijiosacari pa Jiyaniijiara. ³¹ Seetanujuanaa nia sequeyanijia, janiyari jiyahohua shuquiriaatia quiyani, Jesucristoocua nia tiuushacari, cua pohuatanuuucua na rupaa niajaniya. Seetanujuanaajaariuhuaj, pueyari cua monu paniquiaa pueyaracaanuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiaquiaa puetunu juucajanaani, cua niishishacari janiyari samiitianishaanutaniuhuani. ³² Pa Jiyaniijia jaara macu quiya taa nia sequequiaacuajani, janiyaqui najuhuana Jesucristo rupaacuaji tacuriquiaani nio sesaaca pueya tajinia cua quishacari niya Éfeso tiacajiniani. Nojoriiri juhua puereeta sayoru quiriquiaa cucuaji. Janiyaqui najuhuana Jesucristo shuquiritiriquiaa juucuani, nojuaja jaara samiitianiyaquishaacuariauhua. Paa jaara samiitianiyaquishaanutaniyani, pa miriqui taa Pueyaso tojiyahijiaca sequequiaacuajani: "Pa shuquiriri saminio pa quishacarrijia. Pa queranacunuure. Pa mashaasequenurejuhuaj. Naajaa, pa shaajesacari, pocua puetunu shaajequeejanaani". Naa sesa miiquioquiaari noo pojori, canapuete jiyaniyani macunucuaari maja na samiitianishaanu quiniutianiya.

³³ Pueyanaa, tama nia cuaqueyajaaja nia cojuare, niaa mariqui sapojosaareeri naa sesa nia niishiriojonurajuhuaj. Tamonu pueyanoori naa sequequiaari seetanujuanaatej: "Maninia miijiaari sesa miijiaara jatanihsaaree na cojiniuucua sesa miijiac". Naaratej, majaari nia cojiniu sesoriquia pueya, niaa mariqui seserejaariuhuaj. ³⁴ Niishiriojojuara nia quiri. Sesu nia miiniu nia cartere. Noojiaqueya niajaniyajinijinioori Pueyaso niishiyahijiaca quiyajaa. Naa nia sequereenijia pueyanaa, quenaaja nia caririquiniuria.

Taamueca pa quiniutianiuhuani pa samiittiasacariuhua

³⁵ Tamonu niajaniyajinijino naasucuaari niishiriojiya: “¿Taa mactuncua samiitianijiosaanutaniuhuaajarani? ¿Taamuecate na cuaqueya quiniutianiyyani?” ³⁶ Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaaquiniatejaj. Saa na co moquesacarijia na naata moritianu. ³⁷ Naajuhuaj, niaa jaara saaco natare, tamaatia jajaujuhuaj, nia natasano jajauri maja juhua neyonarano niuishano. Nia natasanoori saaja shiitaniyyoja jajau quiya. Na moritiasacari, jiyanohua tamaatia niuishiyari. ³⁸ Pueyasoori na maashitiya puetunu na jaamasucuatajanaa, taa na paniyacuajani. Pueyasoori puetunu jajaujanaa moritianijia tamaatia niuishano na quiniuria. Naa quiniutianiyyaariuhua macunucua samiitiacosacariuhua. Majaari pa cuaqueya quiniutianiyya taa na quiya quiarijiacuajani. ¡Pa cuaqueyari jiyanohua maninia quiniutianiuhua!

³⁹ Majaari puetunu cuaqueyaraca casaajanaa mariyata na quiniu. Naacuajitij, pueyano cuaqueyari tamaatia quiya casaa cuaqueyajiniji. Shuhua cuaqueyari tamaatia quiyajuhuaj. Sapitiaaja cuaqueyari tamaatia quiyajuhuaj, moojinia na quiniuria. ⁴⁰ Jiyocuacaanu quiijacaari tamaatia cuaqueyaraca, maja juhua mijiria quinia cuaqueya. Pueyaso seja cuaqueyari shanohua niuishano. Nojori cuaqueyari tamaatia niuishano mijiria quinia cuaqueyajiniji. ⁴¹ Naajuhuaj, pananuuri jiyanohua shacantuca quijia. Raca shacantucaari tamaatia niuishano pananu shacantuucajiniji. Riya shacantucaari socua tamaatia niuishano. Naajuhuaj, puetunu riyajanaari tamaatia niuishano narta riyajiniji. Puetunu Pueyaso shipinishanojuanaari naa tamaatia quiya.

⁴² Naajuhuaj, Pueyaso muerasuuri samiitianishaanutaniya tamaatia cuaqueyata. Moquejacaari jamojosaanutaniya. Moqueyashijicaari saniniujia samiitianishaanutaniuhua, pueyaracaanu na quiniuria. ⁴³ Jamosano pa quete sequeeri samiitianishaanutaniuhua, jiyanohua shanohua niuishano na quiniuria. Cumaacaaju jamosanoori samiitianishaanutaniuhua jiyanohua cumaacaraca na quiniuria. ⁴⁴ Pa cuaqueya jamosanoori saaja jiyacua rucuanejaca quiquiaari. Paari samiitianishaanutaniuhuani tamaatia cuaqueyata, jiyocuacaanu quiijaca pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucuanejonura, ¿majateeri Pueyaso niishiniu tamaatia cuaqueya shipininiu na muerasura, na shuriucua pa quiniuria? Taaquiriirinij.

⁴⁵ Pueyasoori coteenu pa supuetana shipiniquiaari marajiniji. Na nuhuaji, na samiitianiquiaari. Moisés Naajioneejinjaari naa naajotasaquaaritij:

“Adánri saminiora quiquiaari Pueyaso nooshacari na jiquioco”. Jesucristo orí saniniujia jiyatesaaquiaari juhua pa supuetanara na quiniuria pa supuetana Adán niti. ¡Jesucristo orí jiyanohua socua cutara Adánjiniji! Adánri samiitianishaquaaria saminio na quiniuria. Jesucristo cutaraari pa samiitianijajanaa na Sohuanuta. ⁴⁶ Coteenujuanaa pa supuetanani, majaari na shipinishaanu quiquiaari jiyocuacaanu quipiarano. Cunora, coteenu pa cuaqueyari saaja mijiria quijiara. Na nuhuaji, pa cuaqueyari jiyocuacaanu quijiara jatanishaanutaniya mariyata juhua Jesucristo cuaqueyara. ⁴⁷ Adánri

saaja mijiria quiriquiano quiquiaari. Marajiniji shipinishaaquiaarii. Jesucristoori saniniujujia jiyocuacaanujino. ⁴⁸ Puetunu Adáncuajinio supuenojuanaari saaja mijiria quijiaca. Naaratej, puetunu pajaniyajanaari saaja cusionuujuacani, juhua pa supuetana Adánjuhuaj. Jesucristo muerasuuri saniniujujia juhua pa Jiyaniijia Jesucristo quiniutianiya, jiyocuacaanu quijiaca pa quiniuria. ⁴⁹ Mijiria pa quishacari, pa cuaqueyari juhua pa supuetana Adán cuaqueya quiya, marajiniji shipinishano. Majaari pa cuaqueya quiarijia socua maninia Adán cuaqueyajiniji. Pa samiitiasacariuhua, pa cuaqueya cutaraari quiniutianiya mariyata juhua cuno jiyocuacaanu Quijia cuaqueya. Nojuacuajaari pa samiitianinlia Jesucristo.

⁵⁰ Cuarta Pueyaso muerasunaa, maja pa naata Pueyaso rupuenuno pa cuaqueyataja. Pa rishiyashijia cuaqueyari maja na naata cuno pueyaracaanu Quijia rupueno. ⁵¹ Naajaa, cua tojitiare. Nia pohuatareera pueya niishishoo. Majaari puetunu pajaniyajanaa cusionuuriqianoni. Puetunu pa cuaqueyajanaa cutaraari jatanishaanutaniyi, maninia cuaqueya pa jiitianura, juhua Jesucristo cuaqueyajuhua. ⁵² Jiyocuacaanuji trompeta jonesesacari, pa cuaqueyari ritia jatanishaanutaniya, naatej, taa pa nimishiniuquiya ritiacuaani. Pa Jiyaniijia naacuneetoonu panishacari pajaniyata, Pueyaso trompetaari tojishaanutaniya joneseshiyano, na muerasu na jiiquoonura. Canapuete macu quiyani, quiarinio cuaqueyata ritia samiitianutaniuhuari. Pajaniyajuhua, canapuete saminio quiyajaani, pa cuaqueyari ritia jatanishaanutaniyajuhua, quiarinio cuaqueya pa jiitianurajuhua, shaajeyashijiaca pa quiniuria. ⁵³ Cusionuujuja cuaqueya cuaara jatanishaaria, rishijia cuaqueya pa jiitianura saniniujujia. Nio moqueja pa cuaqueyani, jataniniu panishiyari, maninia cuaqueya pa jiitianura, pueyaracaanu pa quiniuria Pueyasota.

⁵⁴ Moqueja pa cuaqueya jaara maninia cuaqueyara jatanishaaro-hua; pa rishiyashijia cuaqueya jaara rishijia cuaqueyara jatanishaaro-hua; jiyacaritij pocua niishirini tariucuacaanu sequesanoori tari tohuateree. Naa naajiotasaaquiaari tariucuacaanu Pueyaso Rupajiniatej:

“¡Jeje! ¡Pa Jiyaniijiaari na muerasu mashiquirii macunucua quiqioniji! ⁵⁵ Cusojuananaa, ¡quiaaqi tari shocotasaaree! ¡Quiaari shocotasaaree! Sesaacanaa, quia cusojuatajaari juhua mo-huacara quiqii cumaacaaju. ¡Shaajeconoori samiitiacoree!”

⁵⁶ Pueyanaa, puetunu pajaniyajanaari cusionuuquiaa sesa mijiaca pa quiniuucua mijiriani. Paari sesa quiquiaani pa tojiyaquishacari tariucuacaanu Moisés Rootasano Pueyasojiniji. Naaratej, puetunu pueyajanaari cusionu niishiya. ⁵⁷ Naajaa, pa Jiyaniijia Jesucristo mishanota pocuara, Pueyasoori pa mashiquiquiaa pa cusoyaquinuu-cuaji. Naaratej, paari Pueyaso sequequiaani: “¡Paacarasho canaa Pueyasonaa! Quiaacuajaari canaa shocotaniniutianiya cusionu, quia Niyanu cusionuucua canaacuara, pueyaracaanu canaa quiniuria quia shuriucua. ¡Jiyahua paacarasho!” Paari naa maniniuhuaqueetaa pa Que Pueyasoni.

⁵⁸ Naaratej cua panishano pueyanaa, nia numaama nia racatare cua niishitiosano niajaniya. Saa Pueyaso rupajia nia tojitiare, maja tamaatia niishitiosano. Pa Jiyaniijiara nia poonijiore socua jiyahua,

na panishano nia miiniuria saaja. Pa Jiyaniijiara pa poonijiosanoori maja najuhuana na quiniu.

16

Casamijiuniucua Pueyaso pueyara cumaneeca reratesacari

¹ Quiarijiani, nia riucuareera taa nia miiniutianiyani, cumaneeca nia reratenura casamijiuniucuara. Cuno cumaneecani, paari na jiyaronutaniya parta Pueyaso muerasura Jerusalén tiacajiniani. Niaa cuaara maninia miiria, mariyata taa cua rootacanucuaja Pueyaso pueya maapue Galacia jiyajiniani. ² Naa nia miiritij. Puetunu domingo juucajanaa, puetunu pueyajanaa cuaara racataara tama na niquitiosocoriquiano cumaneeca, teyano nia niquitionutaniya niarta Pueyaso muerasuracuajani. Naa nia racatare juhuataja nia niquitiosocoriquiano cumaneeca puetunu semaanajanaa, maja na reratesaanura shusha cua tiuquishacari niaacula. ³ Niocua maninia pueya saquiriojore, nia niquitiosano cumaneeca nojori patanura Jerusalén tiacajinia. Naacuajitij, cua tiuquishacari niaacula, janiyari cua naajioneeca jiayrotanutaniya nojorini. Naajioreera parta Jesuucua tiuuniaa pueyacuara Jerusalén tiacajinia, nojori cuaara shuquiriaatia maseera cumaneecata nia jiayrotasano pueya. ⁴ Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhuaj.

Pablo naquerejosacari

⁵ Cua quiasacari niaacula, janiyari Macedonia jiya tajiniu paniyani. Na nuhuaji, janiyari niaacula tiuquinuitianiyani. ⁶⁻⁷ Janiyari maja ritia cua tajiniu paniniu niajaniya. Niaata camueenujuno paniya pueyara-caanunijia, pa Jiyaniijia jaara naa paniyajuhuaj. Janiyari shuniya shocotenu paniya niaatani. Na nuhuaji, nia naata cua naacunu cua jiitianura cua panishano, cua pasocoriquiano tee Pueyaso jiyaronu paniya janiyacuajani. ⁸⁻⁹ Janiyari niya Éfeso tiacajinia camueenujyaaaraní, Pentecostés juuca cua sashishacari. Queraatia pueyari Jesucristo rupaa tojitianu paniya niya. Naajuhuaj, queraatia pueyari Jesucristo rupaa ruureetaa saniniuujia. Naaratej, janiyari jiyanohua socua Jesucristo rupaa pohuatanu paniyajaa Éfeso pueya niquierani. Naajaa, janiyari niaacula quianutaniyani Pentecostés juucara queranacunuunu nuhuaji.

¹⁰ Timoteo jaara niaacula tiuquishii, niocua na cumaquiri Pueyaso rupaa na pohuatanura na puereyaquiniutia. Timoteocuajaari pa Jiyaniijiara poonijioquiaa mariyata taa cua poonijioquiaacuaani. ¹¹ Naaratej, maja Timoteo nia rerequetenu. Niocua na naacure saniniuujia, cucua na tiuquiniuhuara shuquiriaatia, maninia nia miiniuucua nera. Janiyari niya na sashiya parta Pueyaso muerasutani. ¹² Janiyari Apolota pocoojoriquiaani. Janiyacuajaari na nenechoriquiaa juucuani, niaacula na quianura parta Pueyaso muerasuta quiarijiani. Nojuajaari saaja cua sequeree majana na quianu paniniu quiarijiani. Tamacari niaacula quianutaniyaquiniaari, jaara na naata quiri.

Pablo sequesano, naajionu na puecasacari

¹³ Cuarta Jesuucua tiuuniaanaa, niishirijojojuaca nia quiri. Jesucristo rupaa nia niishiri maninia, seetanujuanaa na tojitianaara nia quiniuria. Juhua cumueeca mashaja nia quiri Pueyaso Sohuanu cumaacata, pa

Jiyaniijia panishano nia miiniuria.¹⁴ Puetunu nia miishanojuanaa cuaara quiiria seetanujuanaa nia paniniutia.

¹⁵ Pueyanaa, niaari niishiya Estéfanasri necohuata coteenu Jesucristo tojitarianaara quiquiaari cuniqui Acaya jiyajiniani. Nojoriiri Pueyaso muerasu naacuquiaa pueyaracaanu nojori paniniutia.¹⁶ Naarate nia sequenu paniyanijia, niajaniya cuaara quiiria juhua nojori seja, nia cumaquiniuria nojori, maninia nojori miishacari. Naa nia cumaquiriti puetunu jiyano pueyajanaa, noo pojori canapuete nia maninia miiquiaa Pueyaso muerasucuajani.

¹⁷ Jiyanolua shuquiririucuaanijia Estéfanas tiuquishacari niajaniya-jiniji Fortunatota, Acaicotajuhuaj. Nojoriiri cua shuquiritiriucuaa nia niti, cua jiaatiasacari cua niquinuria niajaniya juucua.¹⁸ Nojoriiri coojia cajitiriucuaa puera cua niishiriojiyaquiniuucuaji niaacua. Nojori naasucuaari nioojia cajitiquianujuhuaj, nojori pohuatasacari niajaniya janiyajiniji. Niajaniya cuaara shuquiritiaara nojori, naa nojori miishacari maniniatej.

¹⁹ Pueyaso muerasu maapue niya Asia jiyajiniae cua sequerucuua, cua saruhuatana niajaniya. Aquila, Priscilanio, nojoriiri jiyanolua nia saruhuataajujuhauj, narta Jiyaniijia muerasu nia quiniuucuajujuhauj. Pueyaso pueya maanuuri nia saruhuataajujuhauj, nooj, teyanote Aquila tiajinia rerejoquiaacuajani.²⁰ Puetunu parta Pueyaso muerasujuanaari niya nia saruhuataajujuhauj. Nia saruhuatatoosacari, nia saruhuatatoore seetanujuanaa Pueyaso paniniutia.

²¹ Quiarijiani, tama cua juaashiquiatajaaja saaja nionyojua naajioreeraj, cua saruhuatana niajaniya. Naacuajitij, niocua niishiri nio naajioneeri seetanujuanaa janiyajiniji.

²² Cante maja pa Jiyaniijia panijia quiyani, Pueyaso cuaara jataara cuno, saniitiosocoriquiano.

jIyaniijiana, quia nimiohua!

²³ Pa Jiyaniijia Jesu cuaara cumaquirria niajaniya na Sohuanuta.

²⁴ Janiyari puetunu niajaniyajanaa paniyani Jesucristo paniniutia. Tar-iucuaja, cua panishano pueyanaa.

TANEE PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya maanu Corinto tiacajinia

¹ Janiyari Pabloni. Pueyaso panishacari, janiyari Jesucristo ji-yaramiquishanora jiyatesaaquaari na rupaa cua poojotanurani. Janiyari Timoteota naajiya nio niaacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanu-ucuara naajiyani, puetunu Acaya jiyajinia Pueyaso tojitiajaca puey-acuarajanaanio. ² Pa Que Pueyaso, mariyata pa Jiyaniijia Jesucristo cuaara cumaquiiria niajaniya. Nojori cuaara jiyateera niajaniya juhua-janiya quiqiaca nia quiniuria.

Pablo miishacari naquiya

³ Pa Jiyaniijia Jesucristo Que pa shuquiritiare. Nojuajaari pa Que-juhuaj, pocua taraajeja cutara. Nojuajaari pa Pueyaso, pueyaracaanu pa cumanijiana. ⁴ Nojuajaari pueyaracaanu pa cumanijiaquia naquiya pa miishacari. Naacuajiti pa naata cumanijianu tamasacajuhuaj, naquiya nojori miishacari, taa Pueyaso cumanijiaquia pajaniyacuaani.

⁵ Seetanujuanaa, Cristo rupuejaca pa quishacari, paari naquiya miishaquiaajuhuaj, taa naquiya na miishaquiaaricuaani. Naajaa, nojuajaari pa cumanijiaquia shuquiriaatia pa quiniuria. ⁶ Naacuajitij, canaa jaara naquiya miishaquia Cristojiniji canaa pohuatanuucuani, Pueyasoori canaa cumaquiquia saaja canaa rejeretanura. Naacuajitij, majaari canaa tarinitianu Pueyaso Rupaa pohuatanu nia niquiara, seetanujuanaa Pueyaso pueya nia quiniuria, nia cumanijiasaanurajuhuaj. Naajuhuaj, Pueyaso jaara canaa cumanijiarecuua, naacuajitij, canaa naata nia cumanijianujuhuaj. Canaari nia cumanijiaani, maninia rejeretajaca nia quiniuria naquiya nia miishacari, taa canaa rejere-taquiaacuaani naquiya canaa miishacari. ⁷ Canaari seetanujuanaa niaacua tiuyani, niaari cumanijiasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniuucuajuhuaj, taa canaa miiquiaa naquiyacuaani. Naacuajitij, Pueyasoori nia cumanijianutaniyajuhuaj, taa na cumanijiaquia canaacuaani.

⁸ Canaa panishano Pueyaso pueyanaa, canaari paniyani nia niishiniuria taa canaa tacaaquianuni, jiyano hua naquiya canaa miishacari Asia jiyajinia. Canaari puera jiyano hua taraatia miiquianuni. Jiyacari, majaari tari canaa jiitanu quiriquia cumaaca canaa rejeretanura socua. Canaari jiyani riquiaani maja naasucua tari canaa rishiniu quiniutaniya. ⁹ Seetanujuanaa, canaari jiyani jiani Pueyaso naasucuaari nareja canaa shanacunutaniya canaa cusonuunura. Naajaa, naacuajitij, Pueyasoori jiyacari canaa niishitiriquia maja canaa tiuuniuria tama canaacuajaaja, saaja nocua canaa tiuuniuria cutara. Nojuacuajaari macunucua samiitianijojua. ¹⁰ Nojuajaari canaacua taraajecanu. Cocuacuati canaa miishacari, canaa cojuacanuuri maja canaa cusonuunura. Nojuacuajaari socua canaa cojuanutaniya nocua canaa tiuuniuucua, niaa jaara canaacuara secojorejuhuaj. ¹¹ Naacuajitij, Pueyaso miishacari

maninia canaa, queraaatia pueya secojonuucua canaacuarajuhuaj, queraaatia pueyari Pueyaso sequenutaniya, “paacarasho”.

Pablo pohuatasano casaara na quiaaquiquiaari Corinto pueyacuani

¹² Canaari shuquiriaatia quiyani canaa niishishacari canaari maninia quiqiaca quiquiaari canaa quishacari niaatani, Pueyaso niishiyashijaca niquieranio. Majaari canaa sapojonu quijia niajaniya. Canaari seetanujuanaa niaacua taraajejani Pueyaso jiyatenuucua canaa nia panijiaca canaa quiniuria. Canaari naa maninia quiquiaari niaatani, saaja Pueyaso cumaquishacari canaa, maja tama canaa niishitajatajaaja. ¹³ Cunora, janiyari nia nequesotaani, ¿casaara nia cushitiiquianu canaa naajionee nia serojosacarini? Puetunu canaa naajioneecajinianaa majaari canaa naajionu quiquiaa jiyajeneta casaa, nia cushitiiniuria. Puetunujuanaacuajaari maatia niishishaatia quiquiaa nia serojosocoriquiano. ¹⁴ Niaacuajaari tari secaja niishiya taa canaa paniya jiyanohua niajaniyani. Pa Jiyanijia Jesucristo tiuquishacariuhua, niaari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijiaca quiquiaarini. Naajuhuaj, niajaniyari canaa timitasano quiniutianiyyahuaj.

¹⁵⁻¹⁶ Cua jiyanishacari niaa naasucuaari seetanujuanaa cua paniyiaca, taa cua paniquiaa niajaniyacuaani, janiyari cunora naquerejocanu niaacua juucuani. Niiquiji cua quiasacari Macedonia jiyanjiniara, janiyari nia niquiniu paniriquiaa juucua nia tiacajiniani. Janyari Pueyaso rupaata nia cumaquiniu paniriquiaa juucua cunoco cua tajishacarini. Naacuajitij, janiyari niishiriojoriquiaani cua naata naasucua nia shuquiritiniu Pueyaso rupaata, cua quiasacari Macedonia jiyanjiniara, naajuhuaj, cua tacatesacariuhua cunocojiuhua. Janyari niishiriojoriquiaani nia naata naasucua cua naacunu cua panishanotahuaj, Judea jiyanjinia cua quianuhuara. ¹⁷ ¿Niaateeri jiyaniquianu janiyari nareya nia sequelcanuni, naa cua sequencesacari coteenujuanaa cua naajiojinatej? ¿Niaateeri jiyanija, naa cua naquerejosacaritij, janiyari tama cua panishanojuaaja miiniu paniquianuni, maja Pueyaso panishano? Seetanujuanaa, majaari coojia cua niquijotenu quiqianu naa cua sequencesacari niajaniyatej. ¹⁸ ¿Janiyateeri coojia niquijotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani? Pueyasocuajaari niishiya, na rupaa canaa pohuatasacari, majaari canaa jataniniu quiquiaa. Pueyaso rupaacuajaari seetanujuanaa. ¹⁹ Naajuhuaj, Neyanu Jesucristoori jataashijia. Silvano, Timoteo, janiyajuhuaj, canaari nojuajiniji nia niquiara pohuatananaani. Paari nojuajiniji niishiyani puetunu Pueyaso sequencesanojuanaari seetanu rupaajanaa cutara. ²⁰ Jesucristocuajaari tari tohuateequiaari puetunu tariucuacaanu Pueyaso sequencesanojuanaa pajaniyara. Naacuajitij, pa tiuushacari Jesucristoocua, paari niishiyan, Pueyaso sequencesanoori seetanujuanaa. Naaratej, pa shuquiritiasacari Pueyaso, paari na sequequiaani: “Seetanujuanaari canaa quia sequencesano, Pueyasonaa”. ²¹ Jesucristo rupuejaca pa quishacari, Pueyasocuajaari pa cumaquiquiaa, socua maninia na tojijiaca canaa quiniuria, niajaniyajuhuaj. Pueyasoori pa niquitioquiaari na Sohuanu, seetanujuanaa na muerasu pa quiniuria. ²² Pueyaso Sohuanu pa jiitiasacari poojiajinia,

naacuajitij, paari tari Pueyaso sesa jiitiaa juhua naajiotasano poojajiniani, saa neraja pa quiniuria. Na Sohuanu pa jiitiasacari poojajinina, paari niishiyani, paari puetunu na seqesanojuanaa maseriquianoni.

²³ Niaari cua jiyaniquianu janiyari najuhuana coojia niquijotejani, niaacua cua quiaaquiniucua taa cua seqeceanu coteenu niajaniyacuajani. Pueyasocuaajaari niishiya, majaari cua quianu quiquianu niaacua Corinto tiacajinia, maja cua tacaatinuriua niajaniya, janiya jaara nia nacasusee jiyanoahuani. ²⁴ Canaari maja nia jiyaniijiani canaa shiniujuniuria puera niajaniya, Jesuucua nia tiuuniuria. Niaacuajaari tari maninia Jesuucua tiuuijaca. Canaari saaja niarta Pueyaso pueyani, canaa cumaquinuriua niajaniya, socua pa Jiyaniijia tojijiaca nia quiniuria, seetanujuanaa shuquiriaatia quiijiaca nia quiniuria.

2

¹ Janiyari tama seqeceanujaanijia, maja juhuari niaacua cua quianu quiniutianiya, maja cua taraajetenura niajaniya. ² Janiya jaara nia taraajetere cua nacasusacari niajaniyani, ¿cantucua cua timitiri quenaajani? ¿Cua taraajetesano pueyateeri cua shuquiritiniutianiya? Maja. ³ Naaratej, janiyari niaacuara naajiocanuni, cua nacasunura juhuacarijia niajaniya, cua taraajeyaquiniuria niaacua cua tiuquishacari. Janiya jaara sashiri cua nacasunura niajaniya cua tiuquishacari niaacuani, janiya maara jiyanohua nia taraajetereni, jeecatoojua nia quishacari. Saniniujija, niaa jaara juhuacarijia jeecare puetunu sesa nia miishanojuanaa, naacuajitij, cua tiuquishacari niaacua, niaari cua cojiniutianiya maninia, shuquiriaatia pa quiniuria jatiqui. ⁴ Janiya jaara niaacuara naajiocanu coteenu cua naajioneen, janiyari jiyacari jiyanohua tacaariquiaa niaacuani. Coojiaari jiyanohua taraajeriquiaa. Janiyari jiyacari nujuqueriquiaajaaniuhuaj. Majaari cua naajionu quiquianu cuno naajionee cua taraajonura niajaniya. Cunoori seetanujuanaa quiquianu cutara cua niishitiniuria niajaniya, taa cua paniya jiyanohua niajaniyani.

Cuno sesa miiija cuaara jiyanooshaaria jaara tari pishirii sesa na miiniujiniji

⁵ Cuno sesa miijaari maja na taraajetenu quiquianu saa janiyaja. Quera puetunu niajaniyajanaa naasucuaari taraajecanu cuno pueyano miiniujucua sesa. Seetanujuanaa, majaari puetunu niajaniyajanaa taraajenu quiquianu. Janiya jaara sequereni: "Puetunu niajaniyajanaari taraajecanu", janiya maara puera na maateyani. ⁶ Puetunu niajaniyajanaa jiyatenucua nojuaja saniitiosano na quiniuria, nojuajaari tari noojia tacatorohua sesa na miiniujiniji. Tariucuaja. Majaari socua na saniitionu. ⁷ Quiarijiani nojuaja nia jiyanooriohua. Nia cumanijiarohua, nojuaja mariqui puera tacaariiri jiyanohua na taraajesacari. ⁸ Nocuaji janiyari jiyanohua nia rootaani, maninia nia miiriohua cuno pueyano, na niishiniuria niaaqui na paniyajaa. ⁹ Janiyacuajaari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujuanaa pa Jiyaniijiajiniji cua rootasano tojitiacija. ¹⁰ Cua tojitiare, cana nia jiyanooriicuaani, janiyari na jiyanojajuhuaj. Naacuajitij, pueyano jaara sesa miiriquia, janiyari Cristo niquiara na jiyanoquaajuhuaj, jatiqui nia quiniuhuara. ¹¹ Naaratej,

niarta Pueyaso pueya nia jiyanooriquia, Sesaaca mariqui pocua riutiocoreeri, juaajiara na jiyatenura pajaniya, pa jiyanootioyaquiniuucua. Paacujaari maninia niishiyani taa Sesaaca niishiriojoquiaa sesa miji-acara na jiyatenura pajaniyani, paa jaara jiyanojashijia quiriquiani.

Pablo tacaashacari Troas tiacajinna na quishacari

¹² Janiya jaara Troas tiacajinna tiuquiquianu Jesujiniji cua pohuatanurani, cuno pueyari jiyanohua tojitianu paniriquiaa Jesujiniji cua pohuatanura juucua. Jiyacaritij, seetanujuanaa nojori niquiara pohuatasatia quiriquiaari. Pa Jiyaniijia Jesuuri juhua tiotiu riatacanu cucuaji juucua, cua pohuatanura nojuajiniji tii. ¹³ Janiyari saaja nojori tiujiacanuhuani puera cua tacaashacari, cua riuriataaquiniuucua pa tarajanu Tito. Janiyari juucua paniriquiaani cua pohuatasaanura niajaniyajiniji. Janiyari cunora tacaariquiaa jiyanoihuani. Naaratej, janiyari Macedonia jiyajinna quiaarohuani, Tito cua pajenuhuara tii.

Pa Jiyaniijia Cristoori pa paraa pa shocotanija

¹⁴ Janiyari jiyanohua shuquiritiaa Pueyasoni. Nojuajaari pueyaracaanu pa shocotaniquiaa pa paraca seque, pueyaracaanu pa sacuanuucua pa Jiyaniijia Cristoocua. Pueyasoori na rupaa pohuataniquiaa canaa. Naacuajitij, canaa niishishano Jesucristojinijiiri juhua shanohua jaanutaja jaanujuquiaa pueya tajinia puetunu tiquiyocuajanaa. ¹⁵ Pueyasora, canaari juhua shanohua jaanutajani, Cristo quishacari canaa jiuujajinna. Nojuajiniji canaa pohuatanusacari, canaari puetunu pueyarajanaa jaanuquiaani: Pueyaso muerasurano, saniitiosaariquiano pueyarario. ¹⁶ Saniitiosaariquiano pueyara, Jesucristo rupaari mocuaatia jaanujua saniniuujia. Naa nojori soonuucua Jesucristo rupaatej, nojoriiri shaajasaariquiano cutara. Pueyaso jiyanooshocoriquiano pueyara saniniuujia, Jesucristo rupaari shanohua jaanuquiaa. Naa nojori paniniuucua Jesucristo rupaatej, nojori cutaraari pueyaracaanu quijiacara jiyatesaanutaniya. ¿Canaputeeri seetanujuanaa Pueyaso jiyaramiquishanoni, na rupaa nojori pohuatanura, pueya na tiuutiniuria Jesucristoocuani? ¹⁷ ¿Noo pojoritii, najuhuana Pueyaso rupaa pohuatanuuquiaa, pueyajiniji na masejonura cumaneeca na sapojonuunutatej? Maja. Majaari canaa pohuatanu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujuanaa Pueyaso jiyaramiquishano pueyani, na rupaa canaa pohuatanura. Canaari seetanujuanaa pa Jiyaniijia rupaa pohuataquiaa Pueyaso niquierani, Cristo rupuesano canaa quishacari.

3

Quiarinio rupaa Jesucristojiniji

¹ Naa canaa naajiosacari niaacuaratej, niaa naasucuaari jiyaniya canaari tama canaa cuaqueyajinijiaaja nia pohuatohuaniuhuaj, canaacua nia tiuuniuria. ¿Niaateeri pa niishishano pueyanojiniji naajionee paniya, canaajiniji na pohuatanura coteenu niajaniya, canaacua nia tiuuniuria cutara? Tamasaca cutaraari naa miiquiaa. Niaacujaari canaa niishijiaca cutara. Puetunu tiquiyocuajanaa quihiaca pueyari canaajiniji niishiyacuaja, canaari seetanujuanaa Pueyaso jiyaramiquishano pueyani, na rupaa canaa pohuatanura.

Naacuajitij, majaari quenaaja canaa paniniu, canaa nia niquisitionura nia naajionee, canaa patasocoriquiano, tamasaca tiuuniuria canaacua. ² ¿Naajioneetucua casaara panishaaren? Puetunu pueyajanaari na naata niishiniucuaja canaari seetanujuanaa Pueyaso jiyaramiquishano pueyani, nojori niishishacari taa canaa paniya jiyanohua niajaniyani. ³ Cristocuajaari nioojajinlia naajiotaquiaari na rupaa, nojuajiniji canaa pohuatanuucua nia niquiara. Majaari na rupaa na naajiotanu quiquiaari nioojajinlia minianata. Seetanujuanaa na Sohuanuta na naajiotaquiaariiri. Majaari na naajiotanu quiquiaari saajianeecua. Seetanujuanaa nioojajinlia naajiotaquiaari na rupaari. Naa jatanishano pueya nia quishacaritij, puetunu pueyajanaari niishiya niaari seetanujuanaa Pueyaso pueya, nojuajiniji canaa pohuatanuucua niajaniyani.

⁴ Naacuajitij, canaari seetanujuanaa niishiyani canaari Pueyaso jiyaramiquishanon. Cristocuajaari naa canaa niishitiquiaa maninia. ⁵ Majaari canaa niishiriojonu canaa miijiosanoori tama canaa cumaacata canaa miishanojuaja. Maja. Canaari saaja Pueyaso cumaacata poonijoquiaani. ⁶ Na cumaacata, nojuajaari canaa jataniquiaari quiarinio na rupaa pohuatanaa canaa quiniuria. Quiarinio na rupaari seetanujuanaa Pueyaso Sohuanu cumaacaraca cutara, pueya na jataniniuria seetanujuanaa Pueyaso niquiohua nojori quiniuria. Tariucuacaanu, Pueyaso rupaari naajiotasano quiquiaari pueya tojishocoriquiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojiniuucua saaja. ⁷ Naajaa, cuno rootasano saajianeecaacua quejasanoni, cunoori jiyanohua maninia quiquiaari. Naacuajitij, Moisés jaara cuno rootasano niishitiojosaariquiaa Sinaí tuhuananuucua, Pueyaso shacantuuaari nocua pacuriquiaa. Naacuajitij, na rosesacariuhua Israel pueyacua, na jiquiocoori puera shacantuua quiquiaarijia. Naaratej, narta Israel pueyari maja na naata na jiquioco niquinii quiquiaari. Na nuhuaji, cuno shacantuuaari jacaria maquesaquaariuhua. ⁸ Quiarijiani, Pueyaso Sohuanuri poonijoquiaa pueya jiuujajinlia saniniuujia, nojori tiuuniuucua canaa pohuatasanoocua. Cunoori socua shanohua shacantuua cutara Moisés jiquiocojiniji. ⁹ Moisés pohuatasano Pueyaso rootasano nojuajani, cunoori seetanujuanaa jiyanohua maninia quiquiaari. Naaratej, Moisés jiquiocoori shacantuua quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojoriiri sesa miijiaca quiquiaari. Saniniuujia, quiarijiaari socua jiyanohua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuuiquiaa seetanujuanaa sesa miyashijiacara nojori jiyatesaanura Pueyasora. ¹⁰ Pueyaso jiyatenuucua Moisés tariucuacaanu na rupaa pohuatana na quiniuria, Moisésri shacantuucara jataquiaari. Quiari naataja saniniuujia, Pueyasoori canaa niishitiquiaari socua jiyanohua maninia rupaa canaa pohuatanura Moisés pohuatasanojiniji. ¹¹ Moisés shacantuua maquesaquaariuhuani, cunoori maja na jataniniu quiquiaari Israel pueya. Quiarijia saniniuujia, Pueyaso Sohuanu cutaraari pa jataniquiaa seetanujuanaa pueyaracaanu shacantuua quiijacapa quiniuria.

¹² Quiarijiani, canaari niishiyani paari pueyaracaanu shacantuua

quiijacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. ¹³ Majaari canaa miiniu taa Moisés miiquiaaricuaani. Nojuajaari quenaaruque toqueta na jiquioco mishiquioquiaari narta Israel pueya niquiaquiniuria na shacantuua maquesaano. ¹⁴ Israel pueya jiuujiacaari juhua toqueta mishiquiosano quiquiaarijuhuaj. Cumajiuujiaca nojori quiniuucua, majaari Israel pueya niishiniu quijia Moisés caminiujushano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujiia mishiquoyaajaani, cunoori juhuanojuaja tii quiyajaa. Saaja Jesucristo cutaraari na naata pueya jiuujiia riatanu, pueya niishiniuria maninia na rupaa cutara. ¹⁵ Quiarijiaari naajuhuaj. Moisés naajioneeca jaara serojosaariquia Israel pueya niquiaira, nojori niishiti-ajaari juhua toqueta mishiquiosano quiyajaa, maja nojori niishiniuria nojori tojishano. ¹⁶ Quiarijiani, pueyano jaara pa Jiyaniijiaacua tiuuri, cuno toqueeri juhua na niishitajajiniji jaariutiasaaquiaa, maninia na niishiniuria Pueyaso Rupaa. ¹⁷ Pa Jiyaniijiaari Pueyaso Sohuanujuhuaj. Pa Jiyaniijia Sohuanu jaara poojaijinia quiya, paari Sesaacajiniji jaariutiasanon, maja pa camarnu na quiniuria socua. Naajuhuaj, majaari tari poojia quiniu juhua toqueta mishiquiosano. ¹⁸ Naacuajitij, puetunu pajaniyajanaari juhua niquitiu nenequaquiaani, pa Jiyaniijia shacantuua pacusacari pocua. Cunoori pa sohuanu rupuetosacari nata. Naacuajitij, nojuajaari pueyaracaanu pa jataniquiaa jacaria, socua shacantuua quiijaca pa quiniuria juhua nojuaja, na Sohuanu poonijiosacari poojaijinia.

4

¹ Naa pa Jiyaniijia poonijiosacari canaa jiuujiajiniatej, majaari canaa pishiniu quiquiaa canaa poonijiosacari nera. Pueyaso jiyanooniucua canaa, nojuajaari canaa jiyatequiaari na rupaa pohuatanaa canaa quiniuria. ² Majaari canaa miiniu quiquiaa cararaatia casaa, taa tamasaca miiquiaacuaa jiyasohuani. Majaari canaa pohuatanau quiquiaa Pueyaso rupaa canaa cuaracashiniutia. Naajuhuaj, canaa pohuatasacari, majaari canaa jataniniu quiquiaa Pueyaso rupaa. Canaari seetanujuanaa maatia pohuataquiaa Pueyaso Rupaani, puetunu pueyajanaa niishiniuria nojoriiri na naata canaacua tiuuniu. ³ Teyano pueyate canaa pohuatasano Jesucristojiniji niishiyaquiyani, cuno pojoriiri sha-jasaariquiano. Nojoriiri niishiyaquiyani, juhua toqueta mishiquiosano nojori jiuujiia quishacari. ⁴ Pueyaso rupaacua tiuyashijiaca nojori quishacari, nojori jiyaniijia Sesaacaari nojori jiuujiia jiyatequiaa juhua cariyojuarura, Pueyaso Rupaa mariqui nojori jiuujiia cuhuataareeri. Nojori jaara Pueyaso rupaacua tiuriquia, nojori maara niishiri, Cristoori seetanujuanaa shacantuua quiija cutara, juhua na Que Pueyasojuhuaj. ⁵ Canaa pohuatasacari Pueyaso rupaa niajaniya, majaari tama canaa-jinijiaaja canaa pohuatanau quiquiaa nia timitianura canaa. Canaari saaja nia pohuataquiaa cutarani, Jesucristoori seetanujuanaa Jiyaniijiajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniijia Jesu. ⁶ Canaari naa maninia miijacani, Pueyaso cuhuatanuucua canaa jiuujiia. Jiya shipinishacari, nojuajaari sequequiaari:

“Cuhuashiqui cuaara coretaara ninishiquiji”.

Quiarijiaari naajuhuaj, nojuajaari poojia cuhuataquiaajuhuaj, pa niishiniuria nojuajaari tojetaarucuajanaa maninia quijia. Paari cuno niishiyani, Jesucristojiniji pa niishishacari. Nojuajaari seetanujuanaa shacantuua quijia cutara, Pueyaso Niyanu na quiniuucua.

Paari maninia quijiaca quiniutianiyani saaja Pueyaso rupaacua pa tiuushacari

⁷ Cuno cumaaca canaa na jiitiaani, cunoori Pueyaso cumaaca cutara. Saniniuujia, canaa cuaqueyari cumaacaaju, saaja juhua mraujiniji panishano pataco. Naacuajiti niishishiyari, cuno cumaaca pueya jatanijiani, cunoori seetanujuanaa Pueyaso cumaaca, maja tama canaa cumaacajaaja. ⁸ Naacuajitij, canaa paraa cosejosacari canaa, majaari canaa tarinitianu quiquiaa Pueyaso rupaa pohuatanu, cuno cumaaca canaa jiitiasacari. Jiyanoehua canaa tacaashacari, naajaa, majaari canaa tarinitianu quiquiaa Pueyasora poonijionu. ⁹ Canaari naquiya miishaquaajaaniuhuaj. Naajaa, majaari Pueyaso cartenu quiquiaa canaa. Naajuhuaj, canaari juhua quiaquesano jiyocuara jaqueroosaaquiaajaaniuhuaj. Naajaa, majaari canaa cusoujuasaanu quiquiaani. ¹⁰ Puetunu tiquiyocuajanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyaniijia Jesu panitiaquiaari tama na cuaqueyajaaja pocuaracuaani. Naacuajitij, canaa na niqutiosano cumaaca poonijiosacari canaa rishiyashijia cuaqueyajinia, pueyari niishiquiaa, Jesuuri seetanujuanaa saminio. ¹¹ Mijiria canaa quishacarijia, pueyari pueyaracaanu canaa puecoonu paniquiaani, Jesujiniji canaa pohuatanuuucua. Naacuajitij, saminio na jiitiasacari canaa, Jesu cumaacaari niquishaaquiaa rishiyashijia canaa cuaqueyajinia. ¹² Canaari juhua piriuquiuniuquiaani, canaa pohuatanuuucua Pueyaso rupaa nia niquiri. Niaari pueyaracaanu rishiji acara quiriquiano saniniuujia, canaa pohuatasanoocua nia tiuuniuucua.

¹³ Tariucuacaanu Pueyaso Rupaajinia, supuetana David naajiotasanoori naa sequeya:

“Pueyasooqua cua tiuuniuucua, janiyari pocuareeni”.

Canaari naajuhuaj. Pueyasooqua canaa tiuuniuucua, canaari na rupaa pohuataquiaani. ¹⁴ Canaa jaara puecoosaariquia na rupaa canaa pohuatanuuucuani, naajaa. Canaacuajaari niishiyani, pa Jiyaniijia Jesu Samiitianiniacuajaari canaa samiitianijionutaniuhajuhuaj, Neyanu Jesu rupuesano canaa quiniuucua. Pueyasoori canaa rijionutaniya puetunu niajaniyatajanaa, pueyaracaanu na shuriucua pa quiniuria. ¹⁵ Naacuajitij, canaa jaara rejeretaquiaa naquiya canaa miishaanu Pueyaso rupaa canaa pohuatanuuucuani, puetunu cunojuanaari ni-aacuara, maninia nia quiniuria Pueyasora. Naa Pueyaso jiyanooni uucua niajaniyacuaatej, socua queraatia pueyari na timiniutia na sequenutaniya, “paacarasho”. Pueyasoori jiyanoehua shuquiritiasaanutaninya, queraatia pueya na jiyanooni uucua.

¹⁶ Naaratej, majaari canaa pishiniu na rupaa canaa pohuatanura. Canaa cuaqueyari saaqianoshiya. Naajaa, canaa jiuujiari saniniuujia puetunu juucajanaa socua mashajashiyacujua. ¹⁷ Janiyara, puetunu naquiya canaa miishacarrijiana mijiria, cunoori secaja, rupaquijia juhuaj. Cuno naquiya miiniu canaa rejeretanuuucua, Pueyasoori cunora

jiyanohua maninia miiniutianiya canaa! Cunora, canaari shacantuua quijiacara jatanishaanutaniyani, pueyaracaanu rishijiaca canaa quiniuria. ¹⁸ Naaratej, majaari canaa jiaatianu quiquiaa canaa jittianura mijiria canaa niuishano casaa. Canaa cutaraari Pueyaso jiitiasano niuishoo casaacua jiaatiaquiaani. Mijiria niuishano casaari saaja shaajeja casaa. Pueyaso jiitiasano pa niuishoo casaa saniniunijia, cuno cutaraari shaajeyashija.

5

¹ Mijiria pa quishacarijia, nio pa cuaqueyari saaja juhua suhuorotu quiya pa sohuanura, nareja juhua rucoonaa pa quishacari mijiria. Mijiria pa jiitiasano pa shoque jaara cusoquee, paacuajaari niishiyani, paari tari jiitiae tamonu cuaqueya jiyocuacaanuni. Cuno cuaqueyari juhua shanohua tia, Pueyaso shipinishano pajaniyara. Cuno cuaqueyari pueyaracaanu rishiniutianiya pa sohuanu quiquiria. Cunoori maja pueyano shipinishano. ² Mijiria canaa quishacarijia nio canaa sohuanu suhuorotujiniani, canaari taraatia miishaaquiaani. Cunora, canaari juhua quiatojoquiaani, canaa jiaatiasacari canaa sohuanu pacusaanura jiyocuacaanu. Tii quiyacuajaari canaa sohuanuucuji tiasano quiqio. ³ Canaari cuno quiarinio cuaqueya cushiyonutaninya juhua toqueni, maja juhuasu canaa sohuanu quiuriuria. ⁴ Nio cuaqueyajinija canaa quishacari mijiria juhua suhuorotujinia, canaari quiatojoquiaani taraatia canaa miishacari mijiria. Maja cutaraari canaa quiniu paniniu cuaqueyaju, juhua juhuasunucua. Canaa cutaraari canaa quiarinio cuaqueya cushiniu paniyani, Pueyaso shipinishano canaarani. Naacuajitij, nio shaajeja canaa cuaqueyari puetunu maninia jatanishaanutaniyajanaa Pueyaso cumaacata, pueyaracaanu rishijia cuaqueyaraca canaa quiuriuria. ⁵ Pueyasojuanaacuajaari na muerasura pa saquirijoquiaari, naa na jataniniuria pajaniyatej. Naaratej, nojuajaari na muerasu niquitoquiaa na Sohuanu, pa niishiniuria nojuajaari seetanujuanaa naa pa miiniutianiya.

⁶ Naa canaa niishishacaritij, majaari canaa tacaaniu quiquiaa. Canaacuajaari niishiyani nio cuaqueyajinija canaa quishacarijia, majaari juhuanojuaja pa quiniu pa Jiyaniijia shuriucua. Naacuajitij, paari tucuacaanu quiyajaani pueyaracaanu pa quipiarano quiqiojiniji. ⁷ Cunora, mijiria canaa quishacarijia, majaari canaa quiniu tama canaa niishitajataaja. Canaa cutaraari canaa Jiyaniijiaacua canaa tiuuniutia quiquiaani. ⁸ Naacuajitij, canaari shuquiriaatia quiya mijiriani, nocua canaa tiuushacari. Naajaa, canaari nio canaa cuaqueya tarinitianuucua jiaatiaani, canaa pacunura pa Jiyaniijia shuriucuara, tii canaa quiuriuria nata. ⁹ Naacuajitij, canaa jaara nio cuaqueyajinija quiyajaa mijiriani, naajuhuaj canaa jaara na cartequeeni, canaari saaja pa Jiyaniijia shuquiritiniucua jiaatiaani. ¹⁰ Puetunu pajaniyajanaacuajaari Jesucristo tacoji na nequesoreesaqui nujuatejosaariquianoni. Cuniqui, puetunu mijiria pueya miishanojuanaari maatia niishishaanutaniya, maninia pa miishano, sesa pa miishanonio. Na nuhuaji, pa Jiyaniijiaari maninia miiniutianiya maninia mijiaca. Saniniuujia, sesa mijiacaari taraatia miishaanutaniyacuua.

Pueyasoori pueya jiyanooniu panjia cutara

¹¹ Naaratej, canaa niishishacari jiyanolhua puereeta quiniutianiyari pa Jiyaniijia saniitiosacari na tojitiaashijiaca, canaari cunora saniniujiquiaa pueya tojitiniuria Pueyaso Rupaani. Pueyasocuaajaari niishiya canaari seetanujuanaa nera poonijionaani. ¡Seetanujuanaa naa nia niishitiriquiajaanihuaj! ¹² Majaari nia jiyanimiu canaari tama canaa-jinijiaaja nia pohuatanu coteerohuanihuah, canaacua nia tiuuniuria. Canaari saaja naa nia pohuataani nia niishiniuria casaarate nia naata timitianu canaani. Canaa nia timitiare cutara, seetanujuanaa Pueysora poonijionaa canaa quiniuucua. Naacuajiti nia naata cuno pueya tacunu canaacuaji, cuno pojori canapuete sapuenu juhua maninia qui-jiaca niquishano pueya najuhuanacuajani. Majaari nojori niishiniu tacaaniu taamueca jiuuijaracateja nojorini. ¹³ Noojaqueya niajaniyajinjinio naasucuaari jiyaniya canaari juhua paateca pocuaquiaani. Naajaa, canaa jaara seetanujuanaa paateca quirini, canaari paateca quiya Pueyasorani. Saniniujia, canaa jaara maninia niishirijojuaca quiriquiani, canaari naa quiya niaaranai, maninia canaa niishitiojonura niajaniya. ¹⁴ Cristo paniniuucua canaa, cuno na paniniuuri canaa shini-uuquiaa nera canaa poonijionura. Naaratej, canaari pueyaracaanu nojuajiniji pohuataquiaani. Canaacuajaari niishiyanai, nojuajaari puetunu pueyacuarajanaa cusoquiaari. Naa na cusonuucua puetunu pueya nitijianaatej, Pueyasora, puetunu pueyajanaari tari cusonuuquiaari Cristota. Naacuajiti, Pueyasoori na naata jiyanooni puetunu Neyanuucua tiuuniaajanaa. ¹⁵ Cristocuajaari puetunu pueyacuarajanaa cusoquiaari, na samiitianishano pueya quiniuria saa neraja. Pocuara cusoquiaariiri. Nojuajaari pocuara samiitiaquiaariuhuanihuaj. Naaratej, paa cuaara miiria saa na panishanojua. Majaari socua pa miiniu tama pa panishanojuaaja. ¹⁶ Tarijia, canaari saaja canaa panishano pueyacua taraajejani. Quiarijia saniniujia, Pueyaso jatanishano pueya canaa quishacari, majaari rimiajata canaa paniniu pueya. Tarijia, canaari Cristo jiyaniijiani nojuaja naasucuaari nareja pueyano, juhua pajaniyajuhuaj. Quiarijia cutara, majaari naa canaa niishirijoju nojuajiniji. ¹⁷ Naajuhuaj, cante Cristo rupuesanoni, nojuajaari quiariniora jatanishano pueyano. Tariucuacaanu sesa na quiniuuri tari jatasanocuaja. Saniniujia, puetunujuanaari quiarinio quiya.

¹⁸ Puetunu cunojuanaari Pueyaso miishano. Nojuajaari Neyanu Cristo cusoquaquiaari pocuara, na jiyanooshano pueya pa quiniuria. Na nuhuaji, nojuajaari canaa jiyaramiquiquiaari puetunu pueyajanaa canaa pohuatanura, nojori jiyanooshaanurahuaj. ¹⁹ Naacuajiti, Pueyasoori mijiria quiniaajiyanoosquia saaja Neyanu Cristoocua nojori tiuushacari. Naa na jiyanooshacari pueyatej, majaari quenaaja sesa nojori miishano na saneenu quiniutianihuah socua. Nojuajaari canaa jiyatequiaari na rupaa pohuatanaa canaa quiniuria, pueya canaa tiuutiuria Neyanu Jesucristoocua, jiyanooshano nojori quiniuriajuhuaj. ²⁰ Naacuajiti, canaari Jesucristo jiyaramiquishanoni, canaa caminiujiuniuria niaara na sequesano canaa. Naa canaa caminiujiushacari Jesucristo rupaatej, Pueyasoluanaari nia masuya na muerasu nia quiniuria, Neyanuucua nia tiuushacari. Naacuajiti, canaari Cristo niti nia secojiyani, jtama nia cuaqueyajaja nia jiyanoootiri Pueyaso! ²¹ Pa Jiyaniijiarano Jesucristoni, nojuajaari tojetaarucuajanaa sesa miyashiji-ajuhuanajaj. Naajaa, na Que Pueyasoori nocua tiuutiaquiaari puetunu

sesa pa miishanojuanaa, pa niti na saniitiosocoriquiano. Naacuajitij, Neyanuucua pa tiuushacari, Pueyasoori pa jiyatequiaa juhua sesa miyashijia pa quiniuria.

6

¹ Naa Pueyasora poonijionaa canaa quiniuucuatej, canaari jiyano hua nia secojiyani cuarta Pueyaso muerasunaa, saa Pueyasoraja nia quiri, nia jiyano oojia na quiniuucua. Maninia na muerasu nia quiri.
² Tariucuacaanu na sequencesanocuajaari naa naajiotasano quiya na rupaajinjia:

"Quiaari namitia cua secojocanu, pueya cua naacunu panishacari.

Pueya cua jiyanoo shacaricuua, janiyari quia naacucanujuhuaj".

Cua panishano pueyanaa, quiarijiaari Pueyaso jiyanooshacari pueya. Nojuajaari quiarijia pueya jiyatequiaa na muerasu nojori quiniuria.

³ Cunora, canaari tama canaa cuaqueyajaaja cojuaquiaani, maja canaa miiniuria sesa tamasaca niquiara. Canaari naa maninia miiquiaani, nojori mariqui Jesucristoocua tiuyaquiriiri, nojori mariqui Pueyasora canaa poonijiosano sesacareajaariuhuaj. ⁴ Canaa cutaraari saaja maninia miiquiaa pueya niquieran, puetunu pueya niishiniuriajanaa canaari seetanujuanaa Pueyasora poonijionaani. Naaratej, canaari juhuajaniya rejeretaquiaa naquiya canaa miiniuni, canaa panishano canaa jiitiaaquishacarijuhuaj. Naajuhuaj, canaari rejeraquiaa puera canaa tacaashacari, canaa niishiyaquishacari taa canaa miiniutianiya socuani. ⁵ Naajuhuaj, canaari juhuajaniya rejeretaquiaa canaa jaara majacujusaaquiaani, canaa jaara nujuatejojuajinna nujuatejosaaquiaajaaniuhuaj. Nasojosano pueya jaara miitianu paniquiaa canaani, canaari na rejeretaquiaajuhuaj, pueya tiuuniuria canaa pohuatasanoocua. Naa Pueyaso jiyaramiquishano pueya canaa quishacaritij, canaari jiyanoqua poonijioquiaa nerani. Canaari sequeyarucua sutequiaani. Canaari miaajequiajuhuaj. ⁶ Naajuhuaj, pueyari na naata niishiniu canaari seetanujuanaa Pueyaso seyani, sesa miyashijiaca canaa quiniuucua, maninia canaa niishiniuucua Pueyaso rupaajuhuaj. Niishishaatiacuajaari, canaari Pueyaso seyani, jacaria pocuajaca canaa quishacari juaajiaca pueyata, naajuhuaj, maninia canaa miishacari puetunu pueyajanaanio. Naa niishishaatiajaariuhua canaari Pueyaso seyani Pueyaso Sohuanu cumaquishacari canaa, seetanujuanaa canaa panishacari pueyajuhuaj. ⁷ Niishishaatiajaariuhua canaari Pueyaso seyani seetanu rupaajanaa canaa pohuatanuucua pueya, naajuhuaj, casaa canaa miiniuucua Pueyaso cumaacata. Canaari Sesaaca nujuataquiaa cumaatiani, Pueyaso jiyanooshano pueya canaa quiniuucua. Pueyaso rupaata, canaa cutaraari saaja Sesaaca jiylatequiaa canaacuajini. ⁸ Naa Pueyasora canaa poonijiosacaritij, noojiaqueya pueyari canaa shuquiritiaquiaani. Tamasacaari canaa rerequetequiaa saniniuuja. Naajuhuaj, noojiaqueya pueyari maninia pohuatanuquiaa tamasaca niquiara canaajinji. Tamasacaari canaa sesacquiaaa saniniuuja. Noojiaqueya pueyari canaa sequequiaa sapojonuujuacatani. Tamasacaari saniniuuja maninia tojitiaquiaa canaa, seetanu rupaajanaa canaa pohuatasacari. ⁹ Noojiaqueya pueyari canaa niquipuiaa juhua najuhuana quijiaca pueyani. Tamasacara saniniuuja, canaari tojishano pueya cutarani. Canaari sequeyarucua quera puecoosaquiaani. Naajaa, canaari saminio quiyajaani. Canaari

jiyanohua miitiasaaquiaani. Naajaa, majaari canaa puecoosaanu quiquiaani. ¹⁰ Taraatia canaa quishacari, naajaa, canaari pueyara-caanu shuquiriaatia quiquiaani, Pueyaso pueya canaa quiniuucua. Canaari seetanujuanaa casamijiuniucujuhuaj. Naajaa, canaari quer-aaatia pueya jiyatequiaa querataatia casamiriaca nojori quiniuria Pueyaso casaatani. Canaari juhua casamijiuniucua niquishanoni. Naajaa, canaari puetunu canaa panishanojuanaa jiitiaacuajani.

¹¹ Corinto tiacajinia quiniaa cuarta Pueyaso pueyanaa, canaa nia tojitiare. Canaa jiaatiasacari niaacua, canaari seetanujuanaa puetunu canaa jiuujiajinia canaa niishiriojosanojuanaa nia sequereeni. ¹² Majaari canaa tarinitianu canaa paniniu jiyanohua niajaniya. Niajaniya sajaraj, majaari nia paniniu canaa, taa canaa paniya niajaniyacuaani. ¹³ Janiyari nia neneocojiyani, naatej, taa pueyano neneocojquiaa necohuacuaani, ¡majaari canaaacuaji nia taacanuunu! Seetanujuanaa canaa nia paniri, taa canaa paniquiaa niajaniyacuaani, seetanujuanaa panitoojuaca pa quiniuria.

Paari Pueyaso quiquioni

¹⁴ Saniniuujia, maja Pueyaso tojiyashijiaca pueya nia paniniu, nojori nia cojiniuria. Naajuhuaj, maja cutaraari nia caminiu Pueyaso tojiyashijiata, niaa mariqui rimiajata quiijiaca quiriiri. ¿Maninia mijiati-cua shuquiriaatia quiija quiriquia, sesa mijiata na quishacari? Maja. Cua riucuareto pueyanaa. ¿Cuhuashiqui quiijateeri na naata juhuajaniya jatiqui quiniu ninishiqui quijiata? Maja na naata. ¹⁵ Seetanujuanaa pueyanaa, Cristoori maja Sesaaca rupuena. Naajuhuaj, Pueyasooocua tiuujia pueyanoori maja na naata maninia rupuetoonu Pueyasooocua tiuyashijia pueyanota. ¹⁶ Paa jaara Pueyaso quiquo quirini, ¿paateeri Pueyaso quiquojinia shanacuntaniya samaruhua tiuquitianura tiini? ¡Maja! Paacuajaari pueyaracaanu Quijia Pueyaso quiquioni. Na pueyara na sequesanocuajaari naa naajiotasano quiya:

“Janiyari nojorijinia quiriquianoni. Janiyari nojori tajinia rucuanejonutaniyani. Janiyari nojori Jiyaniijajanaa quiniutianiyani. Nojori-iri cua pueya quiniutianiyacujua”.

¹⁷ Cunora, pa Jiyaniijiaari na pueya sequeya:

“¡Cua tojitiaashijiaca pueya tajiniji nia pacure! Nia shiriquiri tamocora nojoriicuaji. Majaari sesa casaa nia saniniu paniniu. Niaa jaara cua tojijiaca quiri, janiyari nia jiyatenutaniya quirianoni.

¹⁸ Janiyari nia Que quiniutianiyani. Naacuajitij, niaari cua niquio-hua quiniutaniya. Naa sequeyanijia, puetunu cumaacaraca-janaa cua quiniuucua”.

7

¹ Naacuajiti canaa panishano pueyanaa, paacuajaari naa seetanujuanaa pa Jiyaniijia sequesano pajaniyarano jiitiaani. Naaratej, pueyara-caanu tama pa cuaqueyajaaja juhua jeequesano pa jiitiariquia, poojia-juhuaj. Majaari pa shanacunu juhua curuushojosano pa quiniuria sesa pa miishanota. Pueyaso puerejaca pa quiriquia, tojetaarucuajanaa sesa miyashijiaca pa quiniuria, saa neraja pa quiniuriajuhuaj.

Corinto pueya tacatosacari nojori jiuujia, maninia nojori quiniuhuara

² Pueyanaa, ¿taa nia miiquianuni? ¡Canaa panijiaca nia quiriohua! Majaaari canaa miiniu quiquieru sesa niajaniya. Majaaari quenaaja niquiriyatu niajaniyajinjinio canaa sesonu quiquieru canaa niishitiosanota. Majaaari canaa sapojonu quijia niajaniya. ³ Naa cua sequesacari niajaniyatej, majaaari cua sequenu cua cararonura niajaniya. Janiyacua-jaari tari nia sequereeni, canaari jiyanohua nia paniyani. Naacua-jitij, canaari shuquiriaatia quiniutianiyan canaa jaara puecoosaare canaa cumaquinuucua niajaniyani, seetanujuanaa Pueyaso muerasu nia quiniuria. Naacuajitij, niaa jaara shaajerejuhuaj, paari pueyara-caanu jatiqiui quiijaca quiniutianiya Pueyasotani. ⁴ Janiyari seetanujuanaa naa nia sequeyani cua panishacari niajaniya. Quiarijiani, janiyari jiyanohua nia timitiaani, maninia cua tojiniuucua niajaniyajiniji. Canaari seetanujuanaa naquiya miiquiaani. Naajaa, maninia canaa tojiniuushacari niajaniyajiniji, cunoori cua cumanijiacanu. Cunora, janiyari jiyanohua nia shuquiritiaani.

⁵ Canaa jaara tiuquiquianu niya Macedonia jiyaniniani, majaaari quenaaja rupaquijia canaa quiniu quiquieru juhuajaniya. Canaari puetunu taraatia miishaacanujuanaani. Pueyasocua tiuyashijiacaari canaa juaariquiaa. Canaa jiuujiari niaacua tacaariquiaa saniniuu{jia}. ⁶ Jiyacaritij, Pueyasoori canaa cumanijiacanu Tito tiuquishacariuhua canaacua. ¡Pa Pueyasocuajaari tacaajiaca cumanijiana! ⁷ Canaa jiuujiaria canaa cajitishacarini, cunoori maja saaja canaa niquisshacari Tito canaacua tiuquihuano. Canaa cutaraari canaa jiuujiacia quiniutiani, nojuaja jaara canaa pohuatacanu niajaniyajiniji jiyanohua na timiniutia. Nojuajaari canaa pohuatacanu, niaanaari canaa niquinuucua jiaatiaa. Niaanaari cucua taraajeya, jiyanohua nia taraajetenuucua janija. Niaanaari cucua tacaya jiyanohua, cua rootasano tojijiaca nia quiniuria quiarijia cutara. Naa cua tojishacari niaacuajitij, janiyari jiyanohua shuquiriquianuni.

⁸ Niaacuara cua naajioneeri nia taraajetecanu. Janiyari taraajecanujuhuaj, naa cua taraajetenuucua niajaniyatej. Quiarijia cutaraari maja cua taraajenu. Cua naajioneecuajaari saaja rupaquijia nia taraajocanu. ⁹ Quiarijiani, ¡shuquiriaatia quiyanijia! Majaaari nia jiyaninu janijari shuquiriaatia quiyan niaa cua taraajonuucua niajaniyatej. Shuquiriaatia quiyanjia, cua niishishacari, naa cua taraajonuucua niajaniyatej, niaari nioojia tacatorohuacuua Pueyasocua, Pueyaso tojitiacija nia quiniuhuara. Naacuajitij, janijari quiarijia niishiyani, majaaquiri cua sesonu quiquieru niajaniya, naa cua taraajonuucua niajaniyatej. Pueyasocuajaquiri maninia poonijioriquiaa nioojiacajinia, naa nia taraajesacaritij. ¹⁰ Pueyasocuanaa jaara pa taraajetere, cunoori maninia, poojia pa tacatonuhuara nocua, na jiyanooniuria pajaniya. Na nuhuaji, paari shuquiriaatia quiyanjia cutaranu. Saniniuu{jia}, tama pa taraajesacarijiaaja, cunoori tama poojia pa shaajanurajaaja. ¹¹ Nia taraajesacari cua nacodusacari niajaniya cua naajioneejiniani, cunoori seetanujuanaa Pueyaso taraajetesano quiquieru niajaniya. Naa nia taraajenuucuatej, nia niquisshuriiriaj, majaaari nia tarishiniu quiquieru maninia nia miiniuria. Niaari ritia cua niishitiniu paniriquiaa juucua, maja niaacua na tiuutiasaanura cuno pueyano miishano sesa. Naacuajari maninia miiquianu nia juaashacari cuno sesa mii{jia}. Niaari na naaqui puerecanujuhuaj, niaa mariqui nata cojiritiasaare saniitionu-

uri. Niaari cua jaqueroojocanu. Niaari ritia miiquianu cua naajiojinia cua sequesano niajaniya. Naacuajitij, niaari ritia cuno sesa miijia taanuucanu nia tajiniji, maja socua nia rupuesano na quiniuria. Naa nia miiniuucua puetunu maniniajanaatej, janiyari quiarrijia niishiyani, majaqiiri nia maniniucuanu quiqianu naa sacuaraatia cuno pueyano miishanotej. ¹² Pueyanaa, niaari maninia canaa tojjiaca. Seetanujuanaa, cua naajiosacari niaacuara, majaari cua naajionu quiqianu saaja cuno sesa miijia pueyanojiniji, sesa miishano pueyanojinijinio. Janiya cutaraari niaacuara naajiocanuni tamajaaja nio nia niishiniuria Pueyaso niquiara: niaacuajaari seetanujuanaa canaa panijiaca quiyajaa, nia tojishacari canaa. ¹³ Naaratej, canaari canaa jiuujia cajitiquianu, canaa tojishacari Tito pohuatasano niajaniyajiniji.

Majaari saaja Tito pohuatasano cumanijianu quiqianu canaa. Canaari Tito timitiacanujuhuaj, canaa niquishacari nojuajaari shuquiriaatia tiuquiriohua canaacua. Puetunu niajaniyajanaari na naacucanu, noojia na cajitiniuhuara, najuhuana na tacaaniuucua niaacuajuhuaj. ¹⁴ Tito quiaaquishacarijia niaacula, janiyacuajaari juhuacarrijia na pohuatacanu niajaniyajiniji, maja puera na taacanuunura niaacuaji. Naa maninia nia quishacari Tito tiuquishacari niaacuatej, majaari cua caririquiniu quiqianu niajaniyajiniji. Puetunu cua pohuatasanojuanaa Tito niajaniyajinijiiri seetanujuanaa quiqianu Titora. Naajuhuaj, puetunu cua pohuatasano niajaniyajanaari pueyaracaanu seetanu rupaajanaa quijia. ¹⁵ Quiarrijia Tito niishiriojosacari niajaniya, nojuajaari socua jiyanohua nia panija quiya, nia tojiniuucua maninia nojuaja. Niaacuajaari tetecatucanu nia puerenuta na tiuquishacari niaacula. Majaari nia rerequetenu quiqianu nojuaja. ¹⁶ Janiyahuaj, jiyanohua shuquiriaatia quiyanijia, cua niishishacari quiarrijia cutara cua naata niaacula tiuuniu seetanujuanaa.

8

Capora pa quiriquiaj

¹ Quiarrijiani pueyanaa, canaari nia pohuatanu paniyani, taa Pueyaso cumaquiya jiyanohua na muerasu maapue niya Macedonia jiyajiniani. ² Nojoriiri jiyanohua taraatia miiquioquia. Naajaa, nojoriiri saaja jiyanohua shuquiriaatia quiya. Naajuhuaj, casamijijiuniucua nojori quishacari, naajaa, nojoriiri caporatujuri. Nojoriiri na cumaneecejiniji nareja niquitiojoquia queraatia, Judea jiyajinia casamijijiuniucua Pueyaso pueyara. Nojori niquitiojosanoori juhua casamiriaca pueya niquitiojosano. ³ Seetanujuanaa narta Pueyaso pueyacua nojori taraajenuta, nojoriiri naa na cumaneecejiniji niquitiojocanu queraatia. Nojoriiri puetunu na jitiwasano cumaneecejajanaa niquitiojonuucanu. Naacuajitij, janiyari jiyaniqianuni, maja naasucuaari nojori naata niquitiojonu quiniutianiya socua. Naajaa, na nuhuaji, nojoriiri socua niquitiojocanu! Seetanujuanaari cua sequesano niajaniya. Janiyacuajaari nojori miishano niquiniani. ⁴ Niya Macedonia jiyajinia quinia parta Pueyaso pueyani, nojoriiri niajaniyajiniji tojiquianu. Niaanaari cumaneeca reratenu paniriquiaacuua, nia jiyarosocoriquiano Judea jiyajinia quinia casamijijiuniucua parta Pueyaso pueyara. Naaratej, nojoriiri

jiyanohua canaa nenecojocanu canaa masenura nojori niquitionu panishano cumaneecajuhuaj, parta Pueyaso muerasura. ⁵ Seetanujuanaa Pueyaso tojijiaca nojori quiniuucua, nojoriiri maja saaja na cumaneeca na niquitiojonu quiquianu. Nojoriiri coteenu tama nojori cuaqueyajaja jiyatecanu seetanujuanaa nojori quiniuria saaja pa Jiyaniijiara, taa Pueyaso paniya pa miiniuriacuajani. Naajuhuaj, nojoriiri tama na cuaqueyajaja jiyatecanu canaa tojijiaca nojori quiniuriajuhuaj. Cunora, canaari nojoriicuaji jiuujiatecanu. ⁶ Naa capora niquitijonaa nojori quiniuucuatej, canaari Tito sequerucuaani, niaacua na quianuhuara quiarijia. Nojuacuajaari tarijia naacucanu niajaniya, nia reratenura nia niquitionu panishano cumaneeca. Niaacuajaari maninia niquitiojocanu juhua capora pueya. Naaratej, nojuaja cuaara nia naacuura, nia tucuanura reratenu puetunu nia niquitionu panishano cumaneecajanaa. ⁷ Niajaniya, Corinto tiacajinia quiniaanaa, niaacuajaari jiyanojua maninia Pueyaso muerasu. Niaari Pueyasoocua tiuujjaca jiyanojua. Naajuhuaj, niaari jiyanojua maninia Pueyaso rupaa niishitiojonuujuaca. Niaari Pueyaso niishitiaja jiitiajuhuaj. Niaari mariyata shitimia poonijionuujuaca, tamasaca nia naacunura. Naajuhuaj, niaari canaa panijiac jiyanojua. Naatej, taa maninia miijiacatucuaja niajaniyani, capora nia quirijiuhuaj, nia cumaneeca nia niquitiojonura nareja parta Pueyaso pueyara.

⁸ Majaaari juhua nia jiyaniija cua sequenu niajaniya, nia cumaneeca cua niquitiojotenura niajaniya. Janiyari nareja nia pohuatariquiaa capora Macedonia pueyajinijini, tama nia niishiniuriajaja, niaate see-tanujuanaa canaa panijiacajuhuaj, taa Macedonia jiyajinjinio pueya paniya canaacuaani. ⁹ Niaacuajaari pa Jiyaniija Jesucristojiniji niishiya; na Que Pueyaso shuriucua na quishacarrijia, nojuajaari puetunu maninia casaaajanaa jiitiaja quiquiaari. Naajaa, nojuajaari juhua casamijiuria quiquiaari, mijiria na rosesacari pocua. Nojuajaari naa taraatia quijia quiquiaari, saniniuujia jiyanojua shuquiriaatia quijiaca na jiyatenura pajaniya, juhua jiyanojua queraatia casamiriaca pueya pa quiniuria. Niaa jaara seetanujuanaa panijiac quiriquia, nia nia miirijiuhuaj, taa pa Jiyaniija miiquiaaricuaani.

¹⁰ Janiyari niishiriojoriquiaani, taate socua maninia nia naata miiniu parta casamijiuniucua Pueyaso pueyarani, shuquiriaatia nia quiniuriajuhuaj. Cua tojiri. Niaacuajaari niishiya, noo marijara pa shococanutej, niaacuajaari juhuacatecara cumaneeca reratejonu coteecanu. Niaari naa maninia miiquianu tama nia tacaashacarrijaja niarta Pueyaso pueyacua. ¹¹ Niaari shitimia juhuacatecara nia cumaneeca niquitiojonu coteecanucuaja. Naaratej, quiarijia nia sequeyanijia, niaa cuaara naa shitimia niquitiojonu tucuataara puetunu nia niquitionu panishano cumaneecajanaa. Nia jiitisano cumaneecajiniji nia niquitiojore, taa cumaneeca nia niquitionu paniyacuajani. ¹² Nia tojiri. Paa jaara seetanujuanaa nareja niquitionu paniriquia pa cumaneecajinijini, Pueyasoori pa niquitosano shuquiritija, paa jaara juhua capora niquitiore pa jiitisanojinijini. Maja cutaraari Pueyaso paniniu pa niquitionura, pa jaara na jiitaaquiyani.

¹³ Majaaari Pueyaso paniniu cutara puera nia niquitiojonura nia cumaneeca, tamasaca quiniuria casamiriaca, saniniuujia nia jiitaaquiniuria nia panishano. ¹⁴ Maninia cutaraari puetunu Pueyaso muera-

sujuanaa jiitianura na panishano. Naaratej, quiarijiani, niaa cuaara niquitiojoora nia jiitiasanojiniji, nojori jiitianura na panishanojuhuaj. Tamacari saniniuuja, nojoriiri saniniuuja nia jiitiaaquishoo casaa nia niquitionutaniyacujua, niaa jaara na jiitiaaquiri. Naacuajitij, puetunu Pueyaso muerasujuanaari na panishano jiitianutaniya mariyata, maja rimiajata.¹⁵ Naajuhuaj, tariucuacaanu Pueyaso Rupaajiniani, jiyocucaanuji Pueyaso tinishano Israel pueya miaquesocoriquiano panjinijiiri naa naajiotasano quiya:

“Cante queraatia reratequiaarini, majaari quenaaja na cureenu quiquiaari. Naajuhuaj, cante seacija reratequiaarini, majaari nojoriria na pueetanu quiquiaari”.

Naaratej, Pueyasocua tiuuijaca nia quiri. Nia jiitiasanojiniji nia niquistiojore nareja, nia jamueyaquiniutia.

Pablo pohuatasano Titojiniji, Tito cojiniaajinjinio

¹⁶ Titoori jiyanolhua niaacua jiaatiaja, taa cua jiaatiaa niaacuacuaani. Pueyasocuajaari na jiyatequiaari nia panija na quiniuria. Janiyari cunora Pueyaso sequequiaani: “¡Paacarasho Pueyasonaal!”¹⁷ Naacuajitij, janiya jaara Tito sequerucuaani nia niquiniuucua na quianura, nojuajaari cua timitiriucuaa. Tama nojuajaarija nia niquiniuucua jiaatiaa. Naacuajitij, nojuajaari quiarija quianutaniya niaacua.

¹⁸ Canaari tamonu parta Pueyaso pueyano jiyaroya Titotani, na tarajiquiano. Cuno pueyanori puetunu Pueyaso muerasu maapuejanaa shuquiritisano pueyano, maninia na pohuatanuucua pa Jiyaniijia Jesucristojiniji.¹⁹ Macedonia jiyajinia quiniaa Pueyaso muerasu maapueeri tari na saquiriojocanu na tarajanura canaa, pa niquitiojosano cumaneeca canaa jiyatanura nata, Judea jiyajiniara. Naa pa niquitiojonuucua pa cumaneeca parta Pueyaso muerasuratej, queraatia pueyari pa Jiyaniijia timitianutaniya socua. Naajuhuaj, parta Pueyaso pueya Judiocucaari niishiniutaniya, narta Pueyaso pueya taucuacaquiiri nojoriicua taraajejacahuaj.²⁰ Maniniacuajaari parta Pueyaso pueya maapue saquiriosano pueyano quianura canaata. Naacuajitij, majaari pueya jiyaniiniu quiniutaniya canaari nio queraatia canaa reratesocoriquiano cumaneecajiniji nohuasenutaniyani.²¹ Canaari pueyaracaanu maninia miiniu paniquiaani puetunu pueya niquierajanaa, maja saaja Pueyaso niquirara.

²² Quiarijiani, niaacua canaa jiyarosocoriquiano pueyata, canaari niiquijinio tamonu parta Pueyaso pueyano jiyaronutaniyani. Pueyaraacaanu na poonijiosacari pa Jiyaniijiarra, janiyajanaari na niquipianuni. Nojuajaari seetanujuanaa pueya panija, Pueyaso panija na quiniuucuacuaa. Quiarijia cutara, seetanujuanaa niaacua na tiuushacari, janiyari niishiyani, nojuajaari jiyanolhua maninia Pueyaso pueyano.²³ Tamonu jaara nia nequesotare cante Titoni, niocua na riucuare: “Nojuacuajaari Pablo Poonijiona, na cumaquinuria pajaniya”. Naajuhuaj, Tito cojiniaari niiquiji Pueyaso muerasu maapue jiyarosano niaacuahuaj. Pa Jiyaniijia Jesucristoori socua maniniuhuaqueetasano, maninia na tojitiajaca nojori quiniuucua.²⁴ Naaratej, nio pojori jaara niaacua tiuquijiosee, niocua puetunujuanaa maninia miiri nojoriria, nia paniniutia nojori. Naacuajitij, puetunu Pueyaso muerasu maapuejanaari niishiniutaniya niaaqui seetanujuanaa panijiaca. Naajuhuaj,

puetunu Pueyaso pueyajanaari niishiniutianiya, majaari cua sapojonu quiquianu, maninia cua pohuatasacari nojori niajaniyajiniji.

9

Pablo shiniujiushacari pueya, cumaneeca nojori reratenura narta Pueyaso pueyara

¹ Janiyaruuhua najuhuana niaacuara naajiyani, cua sequenura niajaniya, nia cumaneecata nia naacunura Judea jiyajinia quinia parta Pueyaso pueya. ² Janiyacuajaari niishiyani, niaari tarijia na naacunu paniquianucuaja. Cua shuquiritiasacari cunora niajaniya, janiyari pueyaracaanu niya Macedonia jiyajinia quinia parta Pueyaso pueya niquiara pohuataquiaa niajaniyajinijini. Janiyacuajaari nojori pohuataquiaani, niajaniya Acaya jiyajinia quinia pueyani, niaari nia cumaneeca niquitionu paniquianu noo marijirara pa shococanutej. Naaratej, queraatia niya Macedonia jiyajinia quinia Pueyaso pueyari cunora jaarajaaja na cumaneeca niquitionu paniyahuuhaj, naa nojori cua pohuatanuuucua niajaniyajinijit. ³ Janiyari niaacua tiuya seetanujuananaani, niaacuajaari canaacuaji tariucua reratesano jiitianutaniya nia cumaneeca, taa cua pohuataquiaa niya niajaniyajinijicuajani. Naajaa, janiyari nio parta Pueyaso pueya jiyaronutaniya niaacuani, seetanujuanaa juhuacarijia nia reratenura nia niquitionjosocoriquiano cumaneeca. Majaari cua paniniu cutara cua pohuatasano niajaniyajiniji cuarcashitishaanura. ⁴ Macedonia jiyajinjinio parta Pueyaso pueya naasucuaari cuata tiuquiniutaniya niaacua. Nojori jaara cuata tiuquishii niaacua, canaa jaara nia riuriatasee nia cumaneeca rerateyojuani, canaari caririquiniutaniyani. Niaari caririquiniutaniyajuhuaj. ⁵ Naaratej, janiyari Tito sequereeni, parta Pueyaso muerasuta na quianura coteenu niaacua cucuaji, nia niquitionjonu panishano cumaneeca cuaara tari reratesano quirria canaacuaji. Naacuajitij, nia niquitionjosano cumaneecaari seetanujuanaa nareja nia niquitionu panishano quiniutaniya, maja canaa niquitionjotesano niajaniya.

⁶ Pueyanaa, nio sequences nia niishiriquia. Naa sequeyari: "Cante secaja natajani, secaja senoonutaniya jaariuhuaj. Saniniuujia, cante queraatia natajani, queraatia senoonutaniya jaariuhuaj". Naajuhuaj, paa jaara capora quiriquiani, Pueyasoori saniniuujia socua queraatia pa niquitionutaniya pa niquitosanojiniji. ⁷ Naaratej, puetunu niajaniyajanaa cuaara niquitionra taa nioojajinia nia niishirijooree nia niquitionjonuracuajani. Majaari nia cumaneeca nia niquitionjonu nia jamuenuta, nocua nia taraajenutonio. Naajuhuaj, majaari nia niquitionu nia cumaneeca saaja tamasaca shiniujiushacari niajaniya. Pueyaso cutaraari shuquiriaatia niquitionjuaca timitiaja. ⁸ Pueyasocuajaari cumaacaraca na niquitionura niajaniya puetunu nia panishanojuanaa nia jiitiasocoriquiano pueyaracaanu. Naacuajitij, niaari pueyaracaanu socua queraatia jiitajaca quiniutaniya, tamasaca nia niquitionjonurajuhuaj, nojori jaara jiitaaquiriquia nojori panishano. ⁹ Niaa jaara naa capora quiriquiatej, niaari nio tariucuacaanu Pueyaso Rupaa naajiotasano tohuateenutaniya. Naa sequeyari:

"Maninia pueyanoori juhua capora nareja niquitionjojua na casamijiniji casamijiuniucua pueya. Na miishanoori pueyaracaanu maninia

quiniutianiya Pueyasora. Majaari Pueyaso niyajetanu quiniutianiya".

¹⁰ Pueyano natasacari casaa jajau na cuhuariquiajinia, Pueyasoori na canijiaquiaa. Naacuajitij, na camaruuri socua jiitianutaniya tamacari na natasocoriquianohua, na miaquesocoriquianonio. Naajuhuaj, juhua capora nia niquitiojosacari nia jiitiasanojiniji, niaari juhua nia cuhuariquiajinia nataa. Naacuajitij, Pueyasoori nia jiyatenu-taniya socua queraatia jiitajaca nia quiniuria, pueyaracaanu maninia nia miiniuria tamasacarajuhuaj. ¹¹ Naa capora nia quiniuucua nia casaatatej, Pueyasoori juhua capora nia niquitiojonutaniya puetunu na jiitiasanojinijijanaa, queraatia nia jiitianura, tamasaca nia niquitio-jonura pueyaracaanu. Naacuajitij, canaa jaara nia niquitiojosano cuma-neeca tiuquitiassee Judea jiyajiniani, parta Pueyaso pueyari Pueyaso timitianutaniya. Capora nia quiniuucua, nojoriiri Pueyaso sequen-taniya, "paacarasho". ¹² Naacuajitij, nojori jaara masere nojoririano nia jiyarosano cumaneeca, majaari saaja nojori jiitianu quiniutianiya nojori panishano. Cunoori saniya nojori shiniujiuniutianiya nojori shuquiritiuria Pueyaso, queraatia nojori sequencesacari: "Paacarasho Pueyasonaa". ¹³ Nojori jiitiasacari puetunu nojori panishanojuanaa, nojoriiri Pueyaso maniniuhuaqueetanutaniya jiyanojuanaa. Nojoriiri naa maniniuhuaqueetanutaniya Pueyaso, nojori niishishacari niaaqui see-tanujuanaa Jesucristo Rupaa tojitiacajuah, naajaa, taucuaca nia quishacari nojoriria. Nojoriiri Pueyaso maniniuhuaqueetanutaniya-juhuaj jiyanojuanaa capora nia quiniuucua nojoriria, tamasacarano. ¹⁴ Nojoriiri Pueyaso secojonutaniya niaacuarajuhuaj, jiyanojuanaa nojori paniniutia niajaniya, Pueyaso jiyatenuucua niajaniya nojori panijiaca nia quiniuria. ¹⁵ Naajuhuaj, janiyari jiyanojuanaa Pueyaso sequeyani, "paacarasho", jiyanojuanaa maninia na miiniuucua niajaniya, Neyanu Jesucristo jataniniuucua nioojia.

10

Pablo cuaara tojishaaria, Jesucristo jiyatenuucua nojuaja na rupaa pohuatanara

¹ Janiyacuajaari Pabloni. Quenaaja cua tojitiare. Cua Jiyaniijia Cristoori jiyanojia quiquiaaricuaa, jacaria pocuajahuaj. Janiyari naa quiniu paniyajuhuaj. Naaratej, janiyari quiarijia nia nenecojiyani, cua tojitiare quenaaja. Tamasacanaari cua pocuquiaa, janianaari jacaria pocuaja quiquiaa juhua puerejani, nia tajinia cua quishacari. Saniniujia, tucuacaanu cua quishacari, janianaari jiyanojuanaa nia nacasuquiaa cua naajioneejiniani, juhua nia pueresano jiyaniijia. ² ¿Seetanutejanaa, janiyate naani? Janiya jaara naa quiya niaaranai, naajaa. Quiarijia tucuacaanu cua quishacarijia, janiyari nio cua naajiojinia nia nenecojiyani, nia tojiniuria janija. Saniniujia, niaacua cua tiuquishacari, janiyari noo pojori nacasunutaniya jiyanojuana, sacuaraatia cucuara rimiaaqueenuquiaani. Janiyari naa miiniutianiya nojorini, nojori jaara tarinitiaaquiyajaa naa sacuaraatia na pocoojonutej. Cuno pojoriiri jiyaniya canaari saaja juhua mijiria quiniaas pueya miiquiaani, maninia canaa quiniuria nia niquiara. ³ Seetanujuanaacuaquiniatejaj, canaari nareja pueyani. Naajaa, majaari canaa miaquejonu quiquiaa canaa paraa, taa pueya miaquetoojoquiaacuaani. ⁴ Mijiria quiniaas pueyari

miaquetoojquiaa cutara tama nojori shipinishano casaatajaaja. Canaa miaquetoojotaja saniniujia, cunoori Pueyaso cumaacajanaa cutara. Naacuajitij, canaa naata Sesaaca niishishano shocotanu.⁵ Pueyaso cumaacata, canaari mijiria niishijiaca niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishiniuria Pueyaso. Naajaa, Pueyaso cumaacata, canaari puetunujuanaa najuhuana pueya niishiriojosano jataniquiaani, Cristo tojijiaca nojori quiniuriajuhuaj.⁶ Canaacuajaari Pueyaso jeenucusano pueyani, canaa nacasunura puetunu tojiyashijiacajanaa. Naacuajitij, niaa jaara puetunu Pueyasojiniji canaa niishitiosanojuanaa tojitijacara quiriohua, na nuhuaji cutara canaa naata puetunu cureeno tojiyashijiacajanaa saniitionu.

⁷ Niaari tama cushitiquiaajaacujua nia tiuushacari cuno sapojonuujuaca pohuatasanoocua. Nojoriiri sapuenu juhua Jesucristo ji-yaramiquishano niquishiya najuhuanaj. Maninia nia niishirijoore pueyanaa, niajaniya cante sapojosacanucuajani. Niaa jaara niishiri niaari seetanujuanaa Cristo saquiriojosano pueya, naacuajitij, niajaniya cuaara niishirria canaari Cristo saquiriojosano pueyajaniuhuaj.⁸ Niaa jaara jiyaniya janiyari juhua pueya shocotaja nia sequeyan: "Canaari nia jiitianaani", naajaa, majaari cua caririquiniu naa cua sequesacari niajaniyatej. Pa Jiyanijia Cristojuanaacuajaari canaa jiyatequiaari nia jiitianaan canaa quiniuria. Canaari naa jiyatesaaquiaarini, canaa cumaquinuria niajaniya na rupaata, seetanujuanaa Cristo pueya nia quiniuria. Majaari canaa jiitianu najuhuana na cumaaca, canaa sesonura niajaniya.⁹ Naa cua naajiosacari niaacuaratej, majaari nia jiyaniniu janiyari nia piriyojiyani nia puerenura janija.¹⁰ Tamasaca niajaniyajinjinio pueyanaari cua sequequiaajuhuaj: "Pabloori puera jiyanohua pa nacasuquiaa na naajioneejinia. Naajaa, pa tajinia na quishacari, nojuajaari juhua tojishoo pueyano niquishano quiquiaa. Naajuhuaj, na pohuatasacari pa niquiara, na pohuatasanoori maja shanohua tojishano".¹¹ ¿Seetanutejana? Cante naa pocuaquiaani, nojuaja cuaara niishirria quiarijia, taa canaa naajiocanu niaacuaracuaja tucuacaanu canaa quishacarrijani, canaari naa miiniutianiyan niaacua canaa tiuquishacari.

¹² Cuniqui niaata quiyajaariuhua tamasaca pueya, canapuete nia sequequiaacuajani, nojoriniaari socua maninia Pueyaso rupaa pohuatanaa tamasacajiniji, canaajinijijiuhuaj. ¿Nojoritiiri seetanujuanaa socua maninia Pueyaso rupaa pohuatanaa canaajiniji? Johuaj. Naajaa. Majaari canaa tacaaniu quiquiaa juhua nojori canaa quiniuria. Cuno pojoriiri tama na cuaqueya timitiacoquiaajaacujua, nojori soosacari narta Pueyaso rupaa pohuatanaa. Nojoriiri naa quijiacatej, nojori jiyanshacari nojori cutaraari socua tojishano pueya tamasacajiniji. Naa nojori miishacaritij, nojori cutaraari seetanujuanaa mosanucua.¹³ Canaa cutara, majaari tamasaca poonijiosano canaa jiyatenu quiquiaa juhua canaa poonijiosano Pueyasora. Canaa cutaraari saaja canaa miishano shuquiritiaquiaani, tee Pueyaso jiyaroquiaari canaacuajani. Nojuacuajaari canaa jiyaramiququiaari niaacua Corinto tiacajinia, nia niquiara canaa pohuatanura na rupaa. Naacuajitij, niaari na muerasura quiquiaari.¹⁴ Majaari najuhuana canaa timitianu niajaniya, Pueyaso muerasu nia quiniuucua. Niaacuajaari Pueyaso muerasura

quiquiaari canaa pohuatanuucua nia niquiara seetanu rupaajanaa Jesucristojiniji. Canaa cutaraari seetanujuanaa Pueyaso rupaa pohuatanu coteetanaa nia niquierani.¹⁵ Majaari canaa shuquiritanu najuhuana niajaniya. Canaa cutaraari nia tiuutiquiaari Jesucristoocuani, niaacua Pueyaso jiyaronuucua canaa. Naajaa, canaari socua nia pohuatanu paniya Pueyaso rupaani, seetanujuanaa Jesucristo rupaacua tiuuijaca nia quiniuria. Naacuajitij, niaa jaara seetanujuanaa Pueyaso rupaa tojijiaca quiri, niaari saniniuuja na naata canaa cumaquiniu.¹⁶ Niocua canaa cumaquiri canaa quianura tamaqui, tee Jesucristojiniji pohuata-sooja quiyacuajani, tii canaa pohuatanura nojuajinijihuaj. Majaari canaa quiniu paniniu pootia tamasaca poonijiosaqui, taa cuno rimiaacoori quiquioya shuquiriaatia canaa poonijiosaquicuaani. ¿Nojori shuquiritiasanoteeri tama nojori poonijiosanojuaaja? Maja. Niaacua-jaari Pueyaso muerasura quiquiaari canaa nia tojitianuucua.

¹⁷ Pueyanaa, nio tariucuacaanu naajiotasanoori niaara, nia niishishocoriquiano. Naa sequeyari: "Cante shuquiriaatia quijia quiniu paniyani, nojuaja cuaara pa Jiyaniijia shuquiritiaara cutara".¹⁸ ¿Taa nia sequeyani pueyanaa? ¿Cana Pueyaso sequenutaniya socuaarini: "Quiaa cutara maninia cua pueyanoniyojua"? ¿Cunotee, tama na cuaqueyaa-jaaja sequejani: "Janiya cutaraari maninia Pueyaso pueyanoni"? Maja. Pueyaso shuquiritiasano cutaraari noo pueyano, cana pa Jiyaniijajanaa sequenutaniyuacuajani: "Quiaa cutaraari maninia cua pueyanoniyojua".

11

Pablo pohuatasano na paraajiniji

¹ Pueyanaa, cua tojitiuri nareja. Juhua paateca tama cua cuaqueyajinijijaaja nia pohuatanu paniyanijia. Naajaa, quenaaja nia rejeretare janiya. ² Janiyari jiyahohua nia tacaatiaquiaani, saaja Jesucristora nia quiniuria. Niaacuajaari niishiya, naatej, taa pueyano cojuaacuua neyatuniyojua canuucuajini, saaja na camiriquiano pueyanora na quiniuria, naajuhuaj, janiyari nia cojuanu paniyani sesosoo nia quiniuria nia Jiyaniijiera. Cristocuajaari juhua nia niyacarano. Nia jiitiana cua quishacari, janiyari juhua nia queni. ³ Tarijia, niaacuajaari saaja Cristo tojitiajaca quiquiaari, na panijiaca nia quishacari. Quiarijia saniniuuja, janiyari Sesaaca nia pueretaani, nojuaja mariqui nia sapojoreeri Cristoocuaji nia rupatenura, taa cuno Susanacu sapojoquiaari Eva tariucuacaanucuaani. ⁴ Cuno sapojonuujuaca tiuquijiosacari niaacua, tamaatia nojori pohuatanura Jesujiniji niajaniya, niaari jaara-jaaja ritia na tojiquiaa. Nojori niishitiojosanoori tojetaarucuajanaa tamaatia canaa niishitiojosanojiniji niajaniya. Nojori nia tojishacari, niaari juhuajaniya samaruhua niishishano tojitiaquiaajuhuaj. Niaacua-jaari tari tiuquiaari Jesucristoocua, Pueyaso jiyanooniuria niajaniya. Saniniuuja, cuno pojori pohuatasacari tamaatia, taa nia miiniutianiya Pueyaso pueya nia quiniuriani, niaari jaarajaaja ritia nojori tojiquiaajuhuaj. ⁵ ¿Cuno sapojonuujuacateeri socua tojishocoriquiano janijiniji, niaa na jiyatecanu juhua seetanujuanaa Pueyaso jiyaramiquis-hano pueyarani? ¡Janiyara maja! ⁶ Seetanujuanaa, majaari cua niishiniu maniniuhuaqueenu cua pohuatasacari Pueyaso rupaa, taa cuno pojoricuaani. Naajaa, Pueyasojiniji cua niishishano cutaraari seetanu rupaajanaa, tojishocoriquiano cutara. Maja najuhuanaj. Niaacuajaari

cuno niishiya, pueyaracaanu saaja maninia cua miishacari nia niquiara, cua pohuatasanojinijinio.

⁷ ¿Casaara nia tojitiaa cuno pojori quiarijjianija, majaari saniniujia nia tojitianu janiya? ¿Janiyateeri sesa miiquianu niajaniyani, cua masejoyaquiniuucua nia cumaneeca cua pohuatanuucua Pueyaso rupaa, Pueyaso pueyara nia jatanishaanura? Janiyacuajaari tama cua cuaqueyajaaja mueyashitiquiaarini cua cumaquinuriua niajaniya. Naa cua miiniuucuatej, ¿cunoteeri sesa niaara? ⁸ Janiyari tamonu jiyacajinia Pueyaso pueya maapuejiniji masejoquiaari cumaneecani, cuno cumaneecata cua quianura niaacua, nia niquiara cua pohuatanura Pueyaso Rupaa. ⁹ Saniniujia, nia tajinia cua quishacari, cua jiitiaaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua jiitiaaquishacari cua panishanotej, Macedonia jiyajinjinio parta Pueyaso pueyari namitia tiuquijioquiaari. Nojori cutaraari cumaneeca cua niquitioquiaari, cua panishano cua masetajara. Janiyari naa pueyaracaanu tama cua cuaqueyajaaja cojuaquiaani, maja cua taajetenura niajaniya cua panishano cua jiitiaaquishacari. Janiyari naa miiniutianiya pueyaracaanuni. ¹⁰ Cua Jiyajinija Cristocujaari niishiya, majaari quenaaja cumaneeca cua masejonu quiquiaari Acaya jiyajinija quinia parta Pueyaso pueyajiniji. Naacuajitij, majaari quenaaja niquiriyatu pueyano Acaya jiyajinjinio naata sequenu janiya: "Pablocuajaari cumaneeca mashiniquijojua canaajiniji". ¹¹ Pueyanaa, ¿niaate niishiya casaara pueyaracaanu cua sequequiaani, maja cumaneeca cua masejonu quiquia Acaya jiyajinija quinia Pueyaso pueyajiniji? Naa cua sequencesaritij, ¿janiyateeri nia paniyaquiyani? ¡Maja! Pueyasocuajaari niishiya, janiyari jiyanoqua nia panijiani.

¹² Nia sequereera casaara cua mashiniquijoyaquia nia cumaneecani, cua pohuatasacari Pueyaso rupaa nia niquiara. Cuno pojori, nia jiyanshano Pueyaso jiyaramiquishano pueyani, nojoriiri nia jiyajenetenu paniquiaa. Nojoriniaari seetanujuanaa Cristo jiyaramiquishanojuhuaj, taa canaacuaani. Saniniujia, nojori mashiniquijiosacari nia cumaneeca, nojori nia niquitiojonura nareja, naacuajiti maatia niishishiyari, ¡nojoriiri jiyanoqua tamaatia canaajiniji! Naaratej, majaari quenaaja canaa mashiniquiniu quiniutianiya nia cumaneeca, canaa pohuatanuucua Pueyaso rupaa niajaniya. ¹³ Seetanujuanaari, ¡nojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya nojori quiniuria. Naacuajitij, nojoriiri nia sapojiya. Nojoriiri sapuenu juhua Cristo jiyaramiquishano pueya niquishano najuhuanaj. ¹⁴ Cunoori maja jiyajeneta naa nojori miiniuriatej. Satanás cuajaari tama na cuaqueyajaaja jatanijia shacantuucara, juhua Pueyaso seru na niquishaanura, pueya na sapojonura. ¹⁵ Naaratej, majaari cua jiuujiatenu cuno pojori jaara tama na cuaqueyajaaja jiyatecanu juhua seetanujuanaa maninia mijiaca pueya nojori quiniuria. Nojoriiri naa miiquiaa, Satanás seja nojori quiniuucua. Naajaa, ¡nojoriiri saniitiosaanutaniya sesa nojori miiniuucua!

Pablo pohuatasacari naquiya na miiniujiniji, Cristo jiyaramiquishano na quiniuucua

¹⁶ Socua nia sequenu pacuteyanija, majaari nia jiyaniyu janijari paatecani cua pohuatasacari tama janijajinijiaaja. Niaa jaara jiyaniya

janiyari seetanujuanaa paatecani, naajaa, rupaquijia cua tojitiare que-naaja. Janiyari juhua paateca tama janiyajinijijaaja niaara pohuatanu paniyajaanihuaj, taa nia tojishano pueya miiquiaacuaani. ¹⁷ Naa cua pohuatasacari tama janiyajinijijaajatej, cunoori maja cua Jiyanijia Cristo pohuatesano janiya. Cunoori tama cua pohuatasanojuaaja, juhua paateca cua quishacari. ¹⁸ Naatej, taa querataa Pueyaso rupaa pohuatanaa tama nojorijinijijaaja pohuatanuuquiaacuaani, janiyari quiarijia naa tama janiyajinijijaaja pohuatanu paniyajuhuaj. ¹⁹ Jiyanohua niishijiaca nia quishacari, niaari cuno paatecoori tojitiaquiaa juhuajaniya. Naatej, taa nia tojitiaquiaa cuno pojoricuaani, quiarijia cua tojitiarejuhuaj. ²⁰ Naajuhuaj, niaanaari juhuajaniya rejeretaquiaa cuno pojori, nojori jaara nia poonijotequiaa juhua nojori seja. Niaanaari nojori rejeretaquiaa nojori jaara nia jiitiasano casami riutioocojquiaa niaacuaji. Juhua nia jiyanijia nojori quishacari, niaanaari nojoriicua shiiniuquierquiaa saaja, naajaa, nojori soosacari niajaniya. Niaanaari juhuajaniya nojori rejeretaquiaajuhuaj, nojori jaara nia jiquioco mase-teriquia. ²¹ ¡Nojoriquiiri jiyanijiancuajanaa cutara! Saniniujia, janiyari nojori naaqui caririquiyani juhua nojori cua quiyaquiniuucua, maja naa canaa miiniuucua niajaniya, taa nojori miiquiaa sesa niajaniy-acuaani.

Naajaa, quiarijia cutara, janiyari tama janiyajinijijaaja pohuatanutaniyani, taa nojori pohuataquiaa juhua paateca tama nojorijinijijaajacuaani. ²² ¿Taa nojori sequequiaani? ¿Nojoritiniaari Hebreo pueya, Hebreo rupaa pocuajacahuaj? Janiyajuhuaj. Janiyari Hebreo pueyanojuhuaj, Hebreo rupaa pocuajanio. ¿Nojoritiniaari Pueyaso saquiri-ojosano Israel pueyajinjinio? Janiyacuajaari Israel pueyacuajinio supuenojuhuaj. ¿Abrahamtenaari nojori supuetana? Abrahamcuajaari cua supuetanajuhuaj. ²³ ¿Nojoritiniaari Cristo jiyaramiquishano pueya? Janiya cutaraari seetanujuanaa Cristo seruni. Janiyari jiyanohua soyani, juhua paateca naa cua pohuatasacari tama janiyajinijijaajatej. Naajaa, janiyari seetanujuanaa nia sequeyani. Janiya cutaraari socua jiyanohua nojorijiniji poonijioquiaari Cristorani. Janiya cutaraari pueyaracaanu caminiujiushaaquiaari nujuatejojuajinia nujuatejonuni, Jesucristojiniji cua pohuatanuuucua. Naajuhuaj, janiyari pueyaracaanu caminiujiushaaquiaari majacununi. Naajuhuaj, janiyari pueyaracaanu cocuaatia miiquiaarini, pueya monu panishacari janiya. ²⁴ Cuarta Judiocuacaari cua caminiujiushaaquiaari majacunu puetunu niquiriyatu pa juaashiquajanaa. Cuarta Judiocuaca majacusacari, nojoriiri na majanu serojojua. Nojori majasano jaara treinta y nueve quiri, nojoriiri jiyacari carteja na majacusano pueyano. ²⁵ Naajuhuaj, janiyari jiuujianaraca caminiujiushaaquiaari macata piquiniuni. Tamacari, janiyari saitia jacusa aquiarini. Shoniniacu caminiajinia cua jaaretasacari buque-jinia, jiuujianaraca buqueeri tiuquitiaquiaari. Naa tamacari buque tiuquitiasacarijuhuaj, janiyari na raucua cuataquiaarini puetunu niu-cuajanaa, niquiriyatu juucanio. Cunoori quiquiaari puereeta shonini-acu caminia jiuujiajinia. ²⁶ Janiyari pueyaracaanu tiquiyocua rucuan-jojua quiquiaarini. Naacuajitij, moocua cua niuuniujushacari, janiyari cocuaatia miiquiaarini. Naa cua rucuanejosacaritij, janiyari pueyara-caanu puereeta nohuasenuujuaca quishaqui shocoquiaarini. Naajuhuaj, tama cuarta Judiocuacajaariajia pueyaracaanu cua miitianu pani-

jia, taucuacanio. Puereetaari quiquiaarijuhua cua rucuanejosacari tiacajinia, tiquiyocua pueya quiyaquishaqui, shoniniacu caminiajini-anio. Naajuhuaj, puereetaari quiquiaari janiyara, cua jyanishacari janiyari cuarta Pueyaso muerasu tajinia quiyani, saaja cua paraa no-jori quishacari. ²⁷ Jyanohua cua poonijiosacari cua Jiyaniijiara cua samareenuta, janiyari pueyaracaanu sutequiaarini. Janiyari miaaje-quiaarini. Janiyari jiymuequiaarijuhua. Janiyari noojaqueya mi-aqueyaquiaarijuhua, jeya cua quiyaquishacari. Janiyari naquia miquiaari cua rucuanejosacari shiniquiajinajuhuaj, toqueeju cua quishacarijuhuaj.

²⁸ Janiyari naa naquia miishaquaarini, mariyata tamaatia naquia miiniujuhuaj. Naajuhuaj, janiyari puetunu juucajanaa niishirijo-quiaani, taariquitijia Pueyaso muerasu maapue quiya puetunu jiyac-jiniajanaatej. Janiyari jyanohua nojoriicua tacaquiaani. ²⁹ Naacuajitij, tamonu cuarta Pueyaso pueyano jaara rejeretaaquiquia Sesaca saniniujuhacari nojuaja, janiyari jyanohua taraajeja nocuani. Tamonu jaara sesa miitishaare, janiyari na naaqi caririquiyajuhuaj. ³⁰ Niaa jaara paniya socua cua pohuatanaura niajaniya tama janiyajinijiaaja, nia pohuatareeraqui pueyaracaanu taraatia cua miishaanu-jiniji. Tama janiyajaaja, janiyari maja cumueecani. ³¹ Pa Jiyaniiji Que Pueyasocuajaari niishiya janiyari seetanujuanaa sequeyani. No-juajanaa cuaara pueyaracaanu maniniujuhaqueetasaaria cutara, maja nojuajiniji pohuatanaa. ³² Tarijia, Damasco tiacajinia cua quishacari, tamonu pueyanoori Damasco tiaca jiyaniiji quiriquiaa. Nojuajaari cuno jiya jiyaniiji Aretasjiyatesano quiquiaari, Damasco tiaca jiyaniiji na quiniuria. Cuno jiyaniijiari na soldadohua nujuatejoquiaari tiaca shocua sohuaca tohuateyaji, nojori quianura juucua janiya. Nojoriiri cua quietunu paniriquiaa Jesucristojiniji cua pohuatantuucua. ³³ Naajaa, cuarta Pueyaso pueyari namitia cua roshinitiaquiaari shuquiriaatia, puereetuua canaasatujinia, cuno tiaca sohuaca tacuhua shuucuaji. Janiyari naa mashiquishaquaarini cua paraacuajini.

12

Pablo pohuatasano Pueyaso niquitishanojiniji nojuaja

¹ Paa jaara tama pajaniyajiniji pohuatariquia juhua paatecani, cunoori najuhuanaj. Naajaa, socua nia pohuatareeraj. Nia pohuata-reera taa cua niquitishaquaarini pa Jiyaniiji casaa jiyocuacaanuni. ² Tariucua Jesucristoocua tiuujia cua quishacari, janiyari jiya cajiniocua cacojiria tacanishaquaarini Pueyaso quiqiojiniarani. Naa cua tacanishaanujinijitij, tari shocojorucuaari catorce marijia. Majaari cua niishiniu taariquitijia cua tacanishaquaaritij, puetunu cua cuaqueyatajanaa, saaja cua sohuanu soj. Johuaj. Saaja Pueyasocuajaari na niishiya. ³ Cua tojitiare, seetanujuanaa majaari cua niishiniu taariquitijia cua tacanishaquaaritij, puetunu cua cuaqueyatajanaa, saaja cua sohuanu soj. Pueyasocuajaari na niishiya. ⁴ Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaquaarini. Janiyari tii casaa tojiquiaarini. Cunoori maja quenaaja na naata pohuatasanu mijiria quiniaa rupaajinia. Pueyasoori cua tenujuquiaari maja cua caminiujuuniuria jiyocuacaanu cua tojishano mijiria quiniaa

pueyara. ⁵ Naa Pueyaso niquitiniuucua janiyatej, janiya maara tama janiyajinijiaaja poojotariquia cua timiniutiani, juhua tamasaca shocotaja cua quishacari. Naajaa, majaari cua timitianu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. ⁶ Naajuhuaj, janiya jaara tama janiyajinijiaaja pohuatanu paniriquian, cuno maara seetanujuanaa pohuatasano quiriquia, maja juhua paateca pohuatasano. Seetanujuanaa majaari naa cua pohuatanu paniniu, pueya mariqui cua pohuatasanojiniji cua jiyaniiri janiya jiyano hua maninia pueyanoni. Pueya cuaara niishiiria cutara taamueca pueyanote janiyani, saaja nojori namijiata nojori niquishacari cua miishano, tama nojori numaatajaaja nojori tojishacari cua niishitiojosanojuhuaj. ⁷ Pueyaso niquitishano janiyani, na nishitishano janiyajuhuaj, cunoori puera jiyano hua maninia quiquiaari. ¡Cunoori jiyano hua cua timitiquiaari! Naaratej, janiyari cua cuaqueyajinia nootusa aquiaari juhua jiohuacatani, janiya mariqui pueya shocotajara quirii. Cuno taajeta noonuuri Satanás miishano quiquiaari, na tacaatiniuria janiya. ⁸ Janiyari jiyano hua secojoquiaari pa Jiyaniijiani, nojuaja cuaara shaataara cua nootunenu. Janiyari jiuujianaraca pacutejoquiaari secojonuni. ⁹ Cua Jiyaniijiaari saaja cua sequequiaari: “Janiyacuajaari quia cumaquinintianiyani, cua panishano pueyano quia quiniuucua. Saaja cunocuajaari quiara. Cua naatacuajaari socua jiyano hua poonijioten cua cumaaca sasaca cua pueyajinia, tamasaca niishiniuria cunoori seetanujuanaa cua cumaaca, maja pueyano cumaaca”. Naa cua Jiyaniijia riucuasacari janiyatej, janiyari shuquiriaatia quiyani cumaacaaju pueyano cua quiniuucua pueyaracaanu. Naacuajitij, Cristo cumaacaari socua janiyajinie niquishaquiaa poonijiyano. ¹⁰ Naacuajitij, janiyari shuquiriquiaani cumaacaaju pueyano cua quiniuucua, Pueyaso cumaquinuria janiya. Naacuajitij, tamasaca jaara sacuaraatia casaa sequeriquia janiya na juaashacari, janiyari Pueyaso cumaacata juhuajaniya na rejeretaquiaani. Naajuhuaj, janiya jaara cua panishano jiitiaequiriquian, naajaa. Pueyaso cumaquishacari janiya, janiyari juhuajaniya rejeretaquiaani. Naajuhuaj, janiya jaara naquia miitiasaaquiaani, taraatia cua miishacarijiuhua Cristora cua poonijionuucua, naajaa. Pueyaso cumaacata, janiyari juhuajaniya rejeretaquiaa saajani. Naacuajitij, janiya jaara tojetaarucuajanaa cumaacaaju quiquiaani, janiyari jiyacari socua jiyano hua cumaacaraca quiquiaani, Pueyaso cumaquiniuucua janiya.

Pablo tacaashacari Corinto tiacajinia quiniae Pueyaso muerasu maanuucua

¹¹ Janiyari seetanujuanaa juhua paateca tama janiyajinijiaaja po huatareeni, juhua pueya shocotaja. Niaacuajaari naa cua pohuateren, niaacuaja naara cucuaji tacuyaquiquianu cua sesacaja pueyatej. Janiyanaari najuhuana quijia pueyanoni. Naajaa, niaacuajaari niishiya, janiyari maja socua najuhuana quijia cuno pojorijinijini. Cuno pojori nia tojishano pueyari, nojoriiri tama na cuaqueyajaaja jiyatecanu juhua seetanujuanaa Jesucristo jiyaramiquishano pueyara cutara. ¹² Juhuajaniya cua rejeretasacari naquia cua miiniu nia tajinia

cua quishacari, naajaa, janiyari pueyaracaanu jiyajeneta casaa mijoquiaari Pueyaso cumaacata nia niquierani. Niaari nocuaji jiuu-jiatecoquiaari. Naacuajitij, niaa cutaraari niishiquiaari janiyari see-tanujuanaa Cristo jiyaramiquishano pueyano cutarani. ¹³ ¿Janiyateeri sesa nia jiitiaquiaarini, Pueyaso rupaa cua niishitiojosacari niajaniya? ¡Maja! Janiyari nia miiquiaari maniniani, naajuhuaj, taa cua miiquiaari tamasaca jiyacajinia quiniaa Pueyaso pueya maapuecuani. Majaari rimiajata cua miiniu quiquaari niajaniya, niaata cua quishacari. Maja cutaraari cua mashiniquipijonu quiquaari cumaneeca niajaniyajiniji. ¡Cua jiyanoori cunora, jaara sesa quiquaari niajaniyara!

¹⁴ Quirijiani, janiyacuajaari quera quiaa niaacuani. Janiya jaara niaacua quiaareni, cunota quiniutianiyari jiuujianaraca cua pacutenu niaacua cua quianu. Majaari nia jiyaniniu janiyari nia cumaneeca mashiniquipijonuucua quianutaniyani. Janiya cutaraari maja cua jiaatianu nia jitiwasano casamiicua. ¡Janiyari saaja niaacua jiaatiaa cutarani! Niaacuajaari juhua cua muerasuniyojua. Niaacuajaari maninia niishiya, muerasuuri maja na reratenu cumaneeca na quera. Na que cutaraari saniya cumaneeca rerateja necohuara. Naacuajitij, cua mashiniquijiyaqueishacari cumaneeca niajaniyajiniji, janiyari see-tanujuanaa juhua nia queni. ¹⁵ Janiyari shuquiriaatia tama cua cumaneeca-jaaja puecanutaniyani cua quishacari niaata, socua cua niishitiojonura niajaniya. Naacuajitij, janiyari tama cua cumaacaajaaja puecanutaniyahuaj, nioojia cua cumaquinuriuria. Janiyara, nioori taraatia: janiya jaara socua nia paniquiaani, niaari socua jiyacatequiaa secaja nia paniniuria janiya.

¹⁶ Niaacuajaari niishiya, majaari quenaaja nia niqutionu quijia nia cumaneeca janiya. Naajaa, tamasaca niajaniyajinjinionaari soquecoya, janiya naasucuanaari jiyasohuaja nia cumaneeca nohuasejoquiaani, cua sapojonuta niajaniya. ¹⁷ ¿Seetanutejanaa pueyanaa? ¿Janiyateeri nia sapojoquiaari niaacua cua jiyaramiquishano pueyatani? ¿Nojoritiiri nia cumaneeca masequiaari? ¡Maja! ¹⁸ Janiyacuajaari Tito jiyaroquiaari niaacua na quianurani, na cumaquinuriuria niajaniya. Janiyari nata jiyaroquiaari tamonu Pueyaso pueyanojuhuaj. ¿Titoteeri jiyacari nia cumaneeca mashiniquipijonu? ¡Majaruhua! Niaacuajaari niishiya, Titocuajaari cumaneecaacua jiaatiaashijia, juhua janiyajuhuaj. Janiya Titota, canaacuajaari jiyanoehua nia paniquiaani.

¹⁹ Sacuaraatia canaacuara nia rimiaaquenuucua pueyanaa, naajaa, majaari nia jiyaniniu canaa tama canaacuajijiaaja tacuyani, juhua canaa nequesoreenaa nia quishacari. Saniniujia, canaari niya Pueyaso niquira nio naajija niaacuarani, Cristo pueya canaa quiniuucua. Naajuhuaj, puetunu cua sequesanojuanaa niajaniya nio cua naajiojiniani, cunoori cua cumaquinuriuria niajaniya cua panishano pueyanaa. Janiyari naa nia nacasuyani, see-tanujuanaa Jesucristo tojijiaca nia quinuriuria. ²⁰ Janiyari puereyani, niaacua cua tiuquishacari, janiyari niaacua taraajenutaniyani cua riuriasacari niajaniya sesa quiyanojua, maja maninia taa cua paniquiaacuajani. Janiya jaara nia riuriatasee naa sesa quiyanojuani, jeecatoojua, niaari saniniujia taraajenutaniyani nia niishishacari taa cua miiniutianya niajaniyani. Janiyari puereyani niaa naasucuari juayonuujutaajaa. Niaa naasucuari niarta pueyano jiitiasanoocua jiaatiajaca quiyajaa. Niaa naasucuari juaaniu porocua

quiyajaa. Niaa naasucuaari tama nia panishanojuuaaja miijiaca quiyajaa. Niaa naasucuaari niarta pueyacuara coriaacojojuaca quiyajuhuaj. Naajuhuaj, niaa naasucuaari niarta pueyacuara rimiaquenuujuaca quiyajaa. Naajuhuaj, niaa naasucuaari tama nia cuaqueyajaaja jiyaniya niaa socua maninia pueya tamasaca pueyajiniji. Niaa naasucuaari jatiqui quiyashijiacajuhuaj, pueyaracaanu nia juayonuujutanuucua.²¹ Naacuajitij, janiyari puereyani janiya naasucuaari Pueyaso niquiara caririquiniutianiya nia naaquinii, niaa jaara naa sesa miijiaca quiyajaa. Janiyari puereyajaaniuhuaj, janiya naasucuaari nujuquenutaniya cua taraajenuta noo sesa miijiaca pueyacuani, cuno pojori jaara sesa na miishano tarinitiaaquiquianujua. Noojiaqueya niajaniyajinjiniori sacuaraatia miijiaca quiqianujua: cararaatia miijiaca sacuaraatia, na camishoo maaji numuetucunu porocuajuhuaj, naajuhuaj, majaari tama nojori cuaqueya panishanojuuaaja nojori rejetenu quiquiaa.

13

Socua Pablo nacasusacari Pueyaso pueya

¹ Nioori quiniutianiya jiuujianaraca cua pacutesacari quianu niaacua. Tariucuacaanu Pueyaso rupaajinii, paari nio niishitiosaaquiaarini: querajaa pueya jaara mariyata pohuatare nojori niquishanojiniji, pa naata seetanujuanaa na pohuatasanoocua tiuuniu cutara. Naajuhuaj, niaacua cua tiuquishacari, janiyari naa miiniutianiyanii cua nequesoreesacari cuno sesa miijiaca. ² Pueyanaa, janiya jaara pacutequiaariuhua niaacua quianutej, janiyacuajaari puetunu niajaniyajinjinio cuno sesa miijiacajanaa piriyojoquiaarini. Quiarijiani, tucuacaanu cua quishacarrijia, janiyari puetunu cuno sesa miijiacajanaa socua piriyojiyani. Naacuajitij, janiya jaara niaacua tiuquishiini, cuno pojori jaara noojia tacatoyaquiyajaa, majaari nojori cua jiuujiaanii quiniutianiya, narta sesa miijiacanio. ³ Cua nequesoreesacari cuno sesa miijiaca, niaari jiyacari niishiniutianiya janiyari seetanujuanaa Cristo sequesano caminiuijuniani, taa nia niishiniu paniriquiaacuajani. Niaacuajaari tari niishiya, pa Jiyanjija Cristoorigi maja na jiitanu niajaniya juhua cumacaacaju pueyano. Niaacuajaari na cumaca niquiquiaa tama niajaniyajinajaa na saniitiosacari niajaniya. ⁴ Seetanujuanaa, Cristoorigi juhua cumacaacaju quiquiaari jaara niyacutesanojinia teetesaaquiaari. Saniniuujia, Pueyaso samiitianishacari nojuaja, nojuajaari quiarijia puetunu Pueyaso cumacaacajanaa jiitiae. Naajuhuaj, canaa, na rupaa pohuatanaani, canaari naquiya miisha aquiaajaaniuhua saaja mijiria quinia canaa quiniuucua, taa nojuaja quiquiaaricuaani. Saniniuujia, Cristo rupuesano canaa quishacari quiarijiani, canaa cutaraari Pueyaso cumacaacaracani, maninia canaa jiitianura niajaniya.

⁵ Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujjaca, maja soj? ¿Niaate maninia miijiaca taa Pueyaso muerasu miiquiaacuani? ¿Majateeri nia niishiniu, niaa jaara seetanujuanaa Jesucristoocua tiuujjaca quiri, nojuajaari nioojiajinia quiya? ⁶ Naajuhuaj, jacaria nia niishiriojore canaajiniji. Nia niishitiriquiani, canaari seetanujuanaa Jesucristo jiyaramiquishano pueyani, maja sapojonuujuaca. ⁷ Canaari Pueyaso secojoquiaa niaacuarani, tojetaarucuajanaa sesa miyashijiaca nia quiniuria, maninia Pueyaso muerasu nia quiniuria. Majaari naa canaa secojonu quiquiaa saaja

pueya niishiniuria canaa seetanujuanaa Jesucristo jiyaramiquishano pueyani. Canaari saaja nia panitiaa cutarani, maninia miijiacia nia quiniuria Pueyasora. Niaa jaara naa maninia miijiacara quiriohua, majaari canaa saniitionu quiniutianiya niajaniya Pueyaso cumaacata. Naacuajitij, majaari pueya niquiniu quiniutianiya Pueyaso cumaaca canaa jiitiasano. Naajaa, pueya jaara jiyaniya canaa najuhuana quiijaca pueyani, naajaa. ⁸ Canaa jiitiasano cumaacaari maja canaa saniittotajara seetanujuanaa Pueyaso rupaa tojitiajaca. Canaa cumaaca cutaraari canaa cumaquinuria niajaniya, socua maninia Pueyaso Rupaa tojitiajaca nia quiniuria. ⁹ Naacuajitij, canaari shuquiriquiaani niaacua canaa paaretaaquishacari canaa cumaaca, canaa saniitionura niajaniya niaa jaara Pueyaso tojitiaashijiaca quiriquia. Naacuajitij, canaari juhua cumaacaaju pueya niquishano quiniutianiyani, cumueeca Pueyaso muerasu nia quishacari saninuuja. Canaari cunora Pueyaso secojoquiaani, tojetaarucuajanaa maninia miijiacia Pueyaso muerasu nia quiniuria seetanujuanaa. ¹⁰ Janiyari nio cua naajionejinia jiyanoehua nia nacasuyani tucuacaanu cua quishacarrijia, maja jiyanoehua cua nacasunura niajaniya, niaacua cua tiuquishacari. Pa Jiyaniijiacuajaari cua jiyatequiaari juhua nia jiyaniijia cua quiniuria, na cumaacata cua canashitijionura niajaniya, seetanujuanaa cumueeca na muerasu nia quiniuria. Pueyaso niquitiosano na cumaaca janiyari maja cua sesonura niajaniya.

¹¹ Cua tucuanura nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniuucua jiaatiajaca nia quiri. Nioojia nia cumaquiri, maninia cua rootasanota. Naajuhuaj, nia jiyanoootiooriquia maninia rupuetootesano nia quiniuria. Naa nia quishacarrij, Pueyasoori nia rupueja quiniutianiya. Nojuajaari pa panijia, pa jiyanoojiajuhuaj. ¹² Pueyanaa, Pueyaso tojijiaca nia quiniuucua, nia saruhuajtooriquia nujuunuta, seetanujuanaa nia paniniutia niarta Pueyaso pueya. ¹³ Puetunu niiquipinio parta Pueyaso muerasujuanaari cua sequeya cua saruhuatanura niajaniya.

¹⁴ Pa Jiyaniijia Jesucristo cuaara cumaquiiria niajaniya pueyaracaanu. Niajaniya cuaara quiiria pa Que Pueyaso panishano pueyaracaanujuhuaj. Naajuhuaj, niaa cuaara quiiria Pueyaso Sohuanu rupuesano pueyaracaanu. Puetunu niajaniyajanaa cuaara naa quiiria.

PABLO NAAJIONEE GÁLATA JIYAJINIA QUINIAA PUEYASO PUEYACUARA

Gálata pueyacuara naajionee

¹ ¿Niaate quiyajaa pueyanaa? Janiyari Pablón, pa Que Pueyaso ji-yaramiquishano. Janiyari maja nareja pueyano jiyaramiquishanoni. Mijiria quiniaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristo Juanaacuajaari cua jiyatequiaari na jiyaramiquishano cua quiniuria. Nojuacuajaari na Que samiitianishanohua macujiniji. ² Niya cuata quiniaa parta Pueyaso pueyatani, janiyari nio naajiyani. Nio cua naajioneeri puetunu Galacia jiyajinia quiniaa Pueyaso pueya maapuerajanaa. ³ Pa Que Pueyaso, mariyata pa Jiyaniijia Jesucristoni, nojori cuaara cumaquiiria niajaniya, nioojia cajitishano nia quiniuria juhuaj. ⁴ Jesucristo orri tama na cuaqueyayaaja panitiaquiaari pocuara na mosaanura. Naacuajitij, nojuajaari pa jeequequiaari puetunu sesa pa miishanojinijijianaa. Nojuajaari naa miiquiaari sesa miiniuucua jiaatianu pa cartenura. Nojuajaari naa cusoquiaari pocuaratej, taa pa Que Pueyaso paniquiaaricuajani, na muerasu pa quiniuria. ⁵ Naaratej, pa Que Pueyaso cuaara maniniuhuaqueetasano quiiria. Cuaara naa quiiria pueyaracaanutej.

Maja tamonu maninia rupaa quiniu socua Jesucristo rupaajiniji

⁶ Taa nia miiquianuni pueyanaa? Quiarijiani, janiyari jiyanohua tacaya niaacuani. ⁷ ¿Niaateeri ritia cartecanu Jesucristo rupaa, tamaatia niishitiosano tojitiajaca nia quiniuria? Pueyasocuajaari Neyanutaja nia cojiritiaquiaari paniniu, Jesucristo miiniuucua maninia niaara, na panishano pueya nia quiniuria. ⁸ Seetanujuanaa, majaari socua tamonu rupaa quiniu Pueyaso pueyara pa jatanishaanura. Noo juhuari nia cushitijoquiaa saajatejaj, najuhuana tamaatia nia niishitiojonu-uquiaatej. Nojoriiri Jesucristo rupaa cushitijoquiaa niaara, nojori tacarojosacari najuhuanaj, mariyateyacato nojori quiniuucua. ⁹ Cua tojiri pueyanaa, tamonu pueyano jaara pocuaji Tacuna rupaa niishitijoriquia niajaniya tamaatia canaa niishitiosanojiniji niajaniya, Pueyasoori na saniitionutaniya. Naajuhuaj, janiya jaara tamaatia pohuatare Jesucristojiniji niajaniyani, jiyocuacaanuji roseno Pueyaso serujuhuaj, Pueyaso Juanaari canaa saniitionutaniya. ¹⁰ Janiyacuajaari naa sequeja niajaniyani. Quiarijia socua pacuterohuacuara sequenu nia niishishocoriquiano. Cua tojiri pueyanaa. Niaa jaara tamaatia pohuataasaariquia Jesucristojiniji, maja naate taa tarí cua pohuataquiaari niajaniyacuajani, Pueyaso cuaara saniitiooranoj.

¹⁰ ¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniyani. Janiya jaara saaja pueya timitiasano quiniu paniriquiani, janiya maara pa Jiyaniijia Jesucristo seru quiyaquirini.

Taa Pablo jatanisha aquiaari Jesucristo jiyaramiquishano na quiniuri-ani

¹¹ Cuarta Pueyaso pueyanaa, nia pohuatareera cante cua niishitijoquiaari Jesucristo rupaani, cua pohuatasano niajaniyani. Pueyanaa,

nio rupaa janiya na pohuataa niajaniyani, nioori maja mijiria quiniaa pueya niishitiosano janiya. ¹² Taa cua sequeya niajaniyacuajani, majaari nio rupaa cua niishiniu quiquiaari tamasaca pueyajiniji. Jesucristojuanaacuajaari na rupaa cua niishitiquiaari.

¹³ Niaa naasucuaari janiyajiniji tojiniuujiacuaja tarijia. Seetanujuanaa cuarta Judiocuaca miishano miijia cua quishacaricia, janiyari Pueyaso saquiriojosano pueya puecoonu panijia puetunujuanaani. Janiyari jiyanohua paracaajia nojorini. ¹⁴ Janiyari seetanujuanaa canaa supuetanaa niishitiosano tojijia quijia cutarani, socua cuarta Judiocuaca mashiquorijiniji. ¹⁵ Naajaa, jiyanohua panijia Pueyaso quiniuucua, cua supueyaquishacaricia, inojuajaquiiiri tari cua saquirijoquiaari na pueyano cua quiniuria! ¹⁶ Naacuajitij, tama na panishacariciaaaja, nojuajanaari Neyanu cua niishitiquiaari, Neyanujiniji cua pohuatanura taucuaca. Neyanu na niishitiniu nuhuaji janiya, majaari quenaaja tamasaca nequesotanuucua cua quianu quiquiaari, cua niishiniuria seetanutejanaa na niishitishano janiya. Pueyasocuajaari maninia cua niishitiquiaari puetunujuanaa Neyanujiniji. ¹⁷ Naajuhuaj, majaari cua quianu quiquiaari Jerusalén tiacajinia, tii cua niquiniuria cuarta Jesu jiyaramiquishano pueya. Nojoriiri coteenujuanaa Jesu jiyaramiquishano pueya quijia. Jiyacaritij, majaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiyaquishaqui Arabia jiyajiniani. Na nuhuaji, janiyari tacatequiaari-uhua Damasco tiacajiniohuani.

¹⁸ Jiuujianaraca marijia cua shocotejonu nuhuaji Damasco tiacajinia, janiyari shusha jiyacari quiaquiaari Jerusalén tiacajiniani, Pedro cua niishiniuria shushajanaa. Nata cua quishacari, quince juucaari cua shocojoquiaari tiini. ¹⁹ Jiyacaritij, majaari socua Jesu saquiriojosano pueya cua niquiniu quiquiaari. Janiyari saaja Santiago niquiquiaari cutarani. Nojuacuajaari pa Jiyajinija Jesu tarajanu. ²⁰ Pueyanaa, Pueyasocuajaari niishiya, janiyari nio cua naajiojinia seetanujuanaa nia pohuataani.

²¹ Na nuhuaji, janiyari quiaquiaari Siria jiyajiniani, Cilicia jiyajiniano. ²² Saniniuuja, Judea jiyajinija Jesu tojitijacaca maapueeri juhuanojuaja maja na niishitiuniu quijia janiya. ²³ Nojoriiri saaja naa poojotasaquaari janiyajinijitij: “Noo pueyano tarijia pa miitija naquiaya Jesujiniji pa pohuatasacaritij, nojuajanaari quiarijia pa Jiyajiniji pohuataa pueya niquiarajuhuaj”. ²⁴ Naa nojori tojiniuushacari janiyajinijitij, nojoriiri Pueyaso maniniuhuaqueetaquiaari nojori paraca na jataniniuucua Jesu rupaa pohuatana na quiniuria.

2

Jesu jiyaramiquishano pueya niishishacari, Pablo seetanujuanaa Jesu jiyaramiquishano pueyanojuhuaj

¹ Catorce marijia jaara shocojoquiaari, janiyari Bernabeeta Jerusalén tiacajinia pacutequiaariuhua quianuni. Janiyari jiyacari Tito rupoquiaari cucuajuhuaj. ² Pueyasocuajaari cua toquiaari cua quianura Jerusalén tiacajinia. Janiyari cunora quiaquiaarinii. Tii cua quishacari, janiyari Jesu tojitijacaca jiitiana pueyata rerejoquiaarinii. Maja seetanu puetunu nojoritajanaa, saaja nio pojoritia: Santiago, Pedro, Juannio.

Janiyari saaja cuno pojori niquiara pohuataquiaarini taa cua pohuataquiaa Jesujiniji puetunu taucuacajanaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate najuhuana sesa niishitiojiya taucuacani?” Cua sequetureeri: “Maja. Quiaacuaja seetanu rupaajanaa niishitiojiya taucuaca, naa Jesucristojiniji quia pohuatasacari nojori”.³ Naajuhuaj, parta Pueyaso pueyano Titoni, cuata quiquiaari tiini, nojuajaari Grecia jiayjinjinio tahue. Naa jaa, majaari na seqesaañu quiquiaari na cararaatiuquia co miate-saanura, seetanujuanaa Pueyaso pueyano na quiniuria. Nojuajaari maja naa na seqesaañu quiquiaari. Canaa rerejosacari Pueyaso pueya jiitianaata, nojoriiri Tito niquiopiaari nareja, nojori na rupuenu-rajuhuaj. Nojoriiri niishiquiaari nojuajaari seetanujuanaa Pueyaso pueyanojuhuaj, saaja Jesucristoocua na tiuuniuucua.⁴ Saniniuujia, noo-jiaqueya canaa Judiocuacajinjinioori tama nojori cuaqueyajaaja jiyate-quiaari juhua Jesu tojijiaca pueyara, nojori cojiniuria canaa. Nojoriiri naa canaa rupuequiaari na sapojonuta. Canaata nojori quishacari, nojoriiri canaa shanacutaja nojori niishiniuria canaate seetanujuanaa Pueyaso muerasuni, saaja Jesuucua canaa tiuushacari. Nojoriiri juucua canaa jiyatenu paniquiaari tariucuacaanu Moisés Rootasano tojijiaca canaa quiniuhuara.⁵ Canaari nojori niishitiosano pataquiaari saa-jani. Majaari quenaaja shitianiyojua nojori rootasano canaa tojiniu quiopiaari. Canaari naa miiquiaarini seetanu Jesucristo rupaajanaa canaa cojuanura niaara, seetanujuanaa Pueyaso muerasu nia quiniuria saaja Jesucristoocua nia tiuuniuucua. Majaari canaa cojitiniu paniniu quiopiaari Jesucristo rupaa, tariucuacaanu niishitiosanota.

⁶ Cuno pojori Pueyaso pueya maapue jiitiana Jerusalén tiacajiniani, nojoriiri jiyanohua tojishano pueya quijia. Janiyara naa-jaa. Pueyasocuajaari najuhuana quijiaci jiyanooquiaajuhuaj, taa na jiyanooquia tojishano pueyacuaani. Naajaa, cuno tojishano pueya jaara tojiquiaari taa cua pohuataquia Jesucristo rupaani, majaari que-naaja niquiriyatu rupaa nojori sequenu quiopiaari, nojori niishitio-jonura janiya socua.⁷ Nojori cutaraari niishiquiaari Pueyasocuajaari seetanujuanaa cua jiyatequiaari na rupaa pohuatana cua quiniuria tau-cuacara, taa Pedro na jiyatequiaari Judiocuaca niquiara pohuatana na quiniuriacuaani.⁸ Pedro Jiyatena Judiocuaca niquiara Jesucristojiniji pohuatariquianoni, cuno Pueyasojuanaacuajaari cua jiyatequiaari-ihuua taucuaca niquiara pohuatana cua quiniuria. Naacuajitij, canaari mariyata Pueyaso jiyaramiquishano pueyani.

⁹ Santiago, Pedro, Juannio, nojoriiri socua tojishano quijia puetunu Jesuucua tiuuniaa cuarta Judiocuacajinjiniojuanaa. Nojoriiri seetanujuanaa puetunu Pueyaso muerasu jiyanijianucuajanaa quijia. Naajaa, nojoriiri seetanujuanaa niishiquiaari Pueyasoori maninia cua jiyanooquiaari, na jiyatenura janiya Neyanujiniji pohuatana cua quiniuria taucuaca niquiara. Naaratej, nojoriiri na juaashiquia niquitiojo-quiaari canaani, janiya, Bernabeenio. Nojoriiri cunota juhua canaa sequeturiquia canaari seetanujuanaa nojori cojiniaani. Naa canaa sequetuquiaariajiaariuhuaj: “Maniniacuaja. Nia quiojiyare taucua-caacua tii nia pohuatanura Jesujiniji nojorijiuahuaj. Canaari saniniuujia parta Judiocuaca tajinia poonijionutaniyanijia, nojori niquiara canaa pohuatanura Jesujinijiuahuaj”.¹⁰ Nojoriiri canaa sequequiaariajuihuaj:

“Canaa panishano pueyanaa, majaari nia niyajetanu casamijiuniucua pueya naacunu”. Naaratej cuarta Pueyaso pueyanaa, puetunu tiquiyocuajanaa cua rucuanesacari, janiyari naa miiquiaa seetanujuanaani.

Antioquia tiacajinía Pedro nacasusaanujiniji pohuatasano

11 Tamacari, canaa quishacari Antioquia tiacajinía, Pedroori canaanacua niquiaarijuhuaj, canaata na quiuria tii. Tii na quishacari canaata, Pedroori sesa miiquiaari cua niquiara. Cunora, janiyari jiyanoqua na nacasuquiaarini. Cuno na miishanoní, cunoori seetanujuanaa sesa quiquiaari Pueyasora. Naa na miishacaritij, tamajaaja miiriquiaa cocuaatiaari. 12 Pedroori naa miiquiaaritij. Coteenu canaa cojiquiaari maniniaari tariucua Jesuucua tiuuijaca taucuacata, canaata na miaquejonura jatiqui. Jiyacaritij, canaanacua tiuquijioquiaarii socua cuarta Judiocuaca Jerusalén tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii canaata, Pedroori canaacuaji rupatequiaari. Majaari tari na miaquenu paniniu quijia canaata, tariucua Jesuucua tiuuijaca taucuacata. Narta Judiocuaca puerequiaarii maja na sequesaanura: “Cunoqui sacuaraatia miaquejojua taucuacata”. 13 Tii quiniaas Jesuucua tiuuijaca Judiocuaca jaara niquiaari naa Pedro miishanocuarej, nojoriiri jaarajaaja canaacuaji rupatequiaarijuhuaj, Pedro na cojitiuniuria. Naajuhuaj, ¡Bernabeeri jaarajaaja canaacuaji rupatequiaarijuhuaj cuno mosanucua na cojiniuria! 14 Naaratej, janiya jaara naa nojori niquiaari tariucua Jesuucua tiuunio taucuaca tamacatiyanoni, janiyari niishiquiini, cuno pojoriiri maja maninia na miitiuniu quiriquiaa. Cunoori maja na quiniu quiriquiaa taa nojori rootasaquaiaari Pueyaso rupaacuajani. Cunora, janiyari puetunu Pueyaso pueya maanu niquierajanaa naa sequequiaari Pedroni: “Quiaari Judio pueyano. Naajaa, majaari seetanujuanaa juhua Judio pueyano quia quiniu quiquiaa. Quiarijia saniniuwija, quiaari Jesuucua tiuunio taucuaca shinuijiya nojori quiniuria seetanujuanaa juhua Judiocuaca, nojori rupuenura pajaniya. ¿Casaara naa quia shinuijiya nojoriirini? 15 Paacuajaari Moisés Rootasano tojijiaca cutaraní, Judiocuaca pa quiniuucua. Paari maja tahuani, Pueyaso tojiyashijiaca. 16 Naajaa, paacuajaari niishiyani, majaari Pueyaso jiyanooniu pajaniya Moisés Rootasano tojijiaca pa quiniuucua. Maja. Pueyaso cutaraari pa jiyanoojia, Neyanu Jesucristoocua pa tiuushacari. Paari cunora Jesucristoocua tiuquiaani, nojuaja jiyanooniuria pajaniya puetunu sesa pa miishanoinijijanaa. Sespa miishanoori maja na jiyanooshaanu quiquiaa Moisés Rootasano pa tojishacari. Maja. Naajuhuaj, majaari quenaaja niquiriyatu pueyano jiyanooshaanu quiniutianiya Moisés Rootasano tojijia na quiniuucua. Maja.

17 Paacuajaari Jesucristoocua tiuquiaarini, jiyanooshano pa quiniuria, maja socua Moisés Rootasano tojijiaca pa quiniuria. Na nuhuaji, paa jaara jiyaniyani paa sesa miijiaca quiriohuani Moisés Rootasano pa tojijaquishacari tarini, saaja Jesucristoocua pa tiuushacari, paari jiyanoqua jiyajeneyani. Naa pa jiyinishacaritij, paari juhua sequeyani Cristoocua pa jiyaterohua sesa miijiaca pa quiniuhuara nocua pa tiuuniuucua. ¿Quiaateeri naa sequenu paniya Pedronaa? ¡Majal!
18 Paacuajaari maninia miiquiaarini pa tarinitiasacari tojiniu Moisés Rootasano, jiyanooshano pa quiniuria saaja Jesucristo rupaacua pa

tiuushacari. ¿Paateeri socua maninia miijiaca quiniutianiya Pueyaso niquiarani, paa jaara Moisés Rootasano tojijiaca quiriohuani? ¡Maja! Paa jaara naa niishiriojijani, paari jiyanohua jiyajeneyani. Paacuajaari seetanujuanaa pohuatanuuquiaa puetunu pueya niquiarajanaani, nojoriiri jiyanooshaanutaniya saaja Jesuucua nojori tiuushacari. Naa pa pohuatanuuusano jaara sapojosano quiriquia, paa maara jiyanohua sesa miijiaca quiriquian. Saniniuujia, Pueyaso cutaraari seetanujuanaa pa jiyanooquiaa saaja Neyanuucua pa tiuushacari".

Janiyari naa nacasuquiaari Pedroni puetunu tii quiniaa Pueyaso pueya niquiarajanaa.¹⁹ Pueyanaa, cua niishishacari maja cua naata Moisés Rootasano tojiniu maninia puetunujuanaa, janiyari niishiquiaarini Pueyasoori cua shaajanutaniya na shuriucuaji. Naaratej, janiyari tama cua cuaqueyajaaja jiyatequiaari juhua tariucua macuni, maja Moisés Rootasano tojijia cua quiniuria socua. Naacuajitij, janiyari quiarijia saaja Pueyasora quiya cutarani. Janiyara, janiyari tari cojiritiasaaquiaari monu Cristota niyacutesanojiniani.²⁰ Naacuajitij, quiarijiani, majaari nio janiya quiyani. Jesucristocuajaari nio, coojiajinia quiyani. Majaari tamajaaja saminio cua quiniu. Jesucristo cua rupuesacari, naacuajiti janiyari saminio quiyani. Naa saminio cua quishacari puetunu cua cuaqueyatajanaatej, janiyari rishiyani Pueyaso Niyanuucua tiuujia cua quishacari. Nojuajaari cua paniquiaari. Naaratej, tama na cuaqueyajaaja tarinitiaquiaarii cucuara na mosaanura.²¹ Majaari cua ruuretanu Pueyaso jiyanooniu panishacari janiya. Jaara pa naata quiriquia tama pa cuaqueyajaaja jiyanoootiniu Pueyaso, Moisés Rootasano tojijiaca pa quiniuucua, Jesucristo maara najuhuana cusoquiaari pocuara.

3

¿Teyano tojijia pa quishacari pa jiyanooshaaquiaani, Moisés Rootasano, Jesucristoocua tiuuniu soj?

¹ Mosanucua Gálata pueyanaa, ¿cante nia shimiojocanuni, naa pa jiyaniijia Jesuucua tiuuniu nia tarinitianuratej? Canaa jaara shushajanaa nia niquiara pohuataquiaari Jesucristojinijitij, canaacuajaari maatia nia niishitiquiaarini, nojuajaari pocuara mosa aquiaari pa jiyanooshaanura. ¿Quiarijiaariuhaj, cante tari nia sapojocanuni, Jesucristoocua tiuuniujiniji nia pishiniuriani? Naa nia miishacaritij, ¿niaateeri jiyaniya niaa tama nia cuaqueyajaaja jiyanoootiniutianiya Pueyaso? Maja nia naata pueyanaa. ² Quiarijiani pueyanaa, janiya saaja nio nia nequesotanu paniyani. Cua riucuature. ¿Niaateeri Pueyaso Sohuanu tiuquiniquiaari nioojiajinia Moisés Rootasano nia tojiniuucua, Jesucristo rupaacua nia tiuuniuucua soj? ¿Taa nia sequeyani? Niaacuajaari niishiya, niaari Pueyaso Sohuanu tiuquiniquiaari nioojiajinia Jesucristoocua nia tiuushacari, niaa jaara na rupaa tojiquiaari. ³ ¡Niaaquiiri tojetaarucuajanaa mosanucuajuhuanaj! Nia niquishuriiriaj, niaacuajaari Pueyaso muerasura quiquiaari Pueyaso Sohuanu nia shanacunuu-cua nioojiajinia na tiuquiniuria, Jesucristoocua nia tiuushacari. Quiarijia saniniuujia, ¿niaateeri jiyaniya nia naata Pueyaso jiyanoootiniu tama nia cuaqueyajaaja Moisés Rootasano nia tojishacariuhua juucua, tama

nia cumaacataajaaja? ¡Maja! ⁴ Pueyasocuajaari jiyanohua maninia mi-iriquiaa niajaniya, saaja Neyanuucua nia tiuushacari. Naa Pueyaso miishano niaarani, ¿cunoteeri najuhuana quiquiaarijuhuaj? ⁵ Pueyanaa, Pueyaso jaara na Sohuanu niquitioquiaa niajaniya, na nuhuaji na cumaacata miiquiaa nia niishishoo casaari, nia sequeretoj, ¿casaara naa na miiquiaarini? ¿Pueyasoteeri naa maninia miiquiaa niajaniyatej, Moisés Rootasano tojijiaca nia quiniuucua? Maja. Nojuajaari naa maninia miiquiaa niajaniyatej, saaja na rupaacua tiuuijaca nia quiniuucua, canaa pohuatasano niajaniyani.

⁶ ¿Niaate niishiya, casaara Pueyaso jiyanooquiaari canaa supuetana Abrahamni? Abrahamcuajaari Pueyaso sequencesanoocua tiuquiciaari. Naaratej, Pueyasoori na jiyatequiaari juhua tojetaarucuajanaa sesa miyashijia pueyanora. Naa na jiyatequiaarii saaja nocua na tiuuniuucua. ⁷ Naacuajitij pueyanaa, quiaricia nia niishiri cutara, cante Pueyasoocua tiuujiani taa supuetana Abraham tiuquiaaricuaani, nojoriiri seetanujuanaa canaa supuetana Abraham niquoohuajanaa cutara. ⁸ Pueyaso jaara na sequenu panishano naajiotaniquiaari tar-iucuacaanu, nojuajaari tari niishiquiaari taa taucuaca na jiyanoo-niutianiyajaaniuhuaj, nojori jaara nocua tiuuri. Naaratej, nojuajaari naa sequequiaari supuetana Abrahamtej: “Quiaacuajaari cua sequencesanoocua tiuuri, Abrahamnaa. Naaratej, quia jinianuucuajinio supueno pueyanoori jiyanohua maninia miiniutianiya puetunu pueyapuerajanaa. Noo pojori shuquiritiniutianiyari, puetunu jiycacjinijimio-juanaa nocua tiuuriquiano pueyatej”. ⁹ Naaratej, cante Jesucristoocua tiuujiani, Pueyasoori na jiyanooniutianiyajuhuaj, taa supuetana Abraham na jiyanooquaaricuaani, na sequencesanoocua Abraham tiuushacari. Cunora, Pueyasoori maninia miiquiaa Jesucristoocua tiuuijaca, taa na miiquiaari Abrahamcuanaa.

¹⁰ Saniniuuja, cante jiyaniyani Pueyasoori na jiyanooniutianiya Moisés Rootasano tojijia na quiniuucua, nojuajaari pueyaracaanu saniitiosaanutaniya. Naa naajiotasano quiyacuajaari taricuacaanu Pueyaso Rupajinio:

“Moisés Rootasano tojijia cuaara tojiiria puetunu Pueyaso naajiotanishanojuanaa. Cante niquiriyatu na sequencesano tojiyaquijiani, nojuajaari pueyaracaanu saniitiosocoriquiano”.

¹¹ Naacuajitij, niaari niishiyacuaja, majaari quenaaja niquiriyatu pueyano jiyanoshaanu quiniutianiya, Moisés Rootasano na tojiniuucua. Saniniuuja, naa naajiotasano quiyacuajaari Pueyaso Rupajinio:

“Pueyaso jiyanoshano pueyanoori pueyaracaanu rishiriquiano cutara, Pueyasoocua na tiuuniuucua”.

¹² Saniniuuja, Moisés Rootasanoni, cunoori maja na niishitiojonu Pueyasoocua pa tiuuniuria, jiyanoshano pa quiniuria. Maja. Saaja naa sequeyari:

“Cante puetunu nio naajioneejinia rootasanojuanaa tojijiani, nojuajaari cuno na tojiniuucua rishiniutianiya”.

¹³ Maja maninia pa tojiyaquiniiuucua Moisés Rootasano, paari Pueyaso puecoosocoriquiano quiquiaarini. Naajaa, Pueyasoori pa Jiyaniijia Jesucristo jiyatequiaari na sesacasano pueyanora pa niti, pocuara na cusionura. Naa sequeyajaariuhua taricuacaanu Pueyaso Rupaa:

“Pueyaso sesacasanoori cuno, niyacutesanojinia teetesanoni”.

¹⁴ Naa Jesucristo cusionuucua pocuaratej, saaja nocua nia tiuushacari, Pueyasoori na naata shuquiritinuu niajaniya taucuacajuhuaj, puetunu na seqesanalajanaa canaa supuetana Abraham. Naajuhuaj, saaja pa tiuuniuucua Jesuucua, puetunu pajaniyajanaari Pueyaso Sohuanu masequiaani, taa seetanujuanaa Pueyaso sequequiaari tariucuacaanu-cuajani.

Moisés Rootasanoori maja na naata Pueyaso seqesano Abraham jataniniu

¹⁵ Cuarta Pueyaso pueyanaa, maatia nia pohuatareera maninia nia niishiniuria cua pohuatasano. Cua tojiri. Pueyano jaara maninia miiniu paniri narta pueyanora, naa miijaari: na sesa naajiotajaari naajioneejinia, tee cuniqui na miishocoriquiano naajiotasano quiyacuajani. Jaara naa miiritij, majaari quenaaja tamonu na naata cuno naajioneejinia naajiotasano jataniniu, socua na maatenunio. ¹⁶ Tariucuacaanu, Pueyasoori naa sequequiaari Abrahamtej:

“Janiyari seetanujuanaa maninia quia miiniutianiyani, quia jinianuu-cuajinio supueriquiano pueyanonio”.

Nia niishiri pueyanaa, tariucuacaanu Pueyaso Rupaajinia naajiotasanoori maja na sequenu: “Abraham jinianuucuajinio supueno pueyara”. Maatia sequeyacuajaari: “Abraham jinianuucuajinio supueno pueyanora”. Niquiriyatu pueyano sequeyari, maja queraatia. Nojuajaari pa Jiyaniijia Cristocuaja. ¹⁷ Cunora pueyanaa, janiyari seetanujuanaa nia sequeyacuajani, Pueyasoori seetanujuanaa sequequiaari Abraham taa nera na miiniutianiyani. Seetanujuanaa Pueyaso seqesanoori maja na naata jatanishaanu. Naacuajitij, Moisés Rootasanoori maja na naata Pueyaso seqesano Abraham jataniniuijuhuaj. Seetanujuanaa Pueyaso sequenu nuhuaji Abraham, taa nera na miiniutianiyani, cuno nuhuaji, shocojoquiaarijiaaraari cuatrociento treinta marijia. Cuatrociento treinta marijia shocojonu nuhuaji, Pueyasoori jiyacari shusha Moisés niquitioquiaari na rootasano, saajianeecaacua na quejasano. Moisésri saniniuujia pueya na niishitiojoquiaari. Naacuajitij, Moisés Rootasanoori maja na naata Pueyaso seqesano Abraham jataniniu, najuhuana na quiniuria pajaniyara. ¹⁸ Pueyaso niquitionu panishano pajaniya jaara pa niquitosoariquia saaja pa tojiniuucua Moisés Rootasano, na niquitosocoriquiano pajaniya maara nareja niquitosoo quiri. Saniniuujia, Pueyasocuajaari seetanujuanaa naa Abraham sequequiaari:

“Janiyari nareja quia niquitionutaniya cua seqesanonni”.

¹⁹ Niaa naasucuaari sequeya: “Jaara naa quiritij, ¿casaarano socuateeri Moisés Rootasanoni?” Nia sequereera pueyanaa. Jiyano hua Abraham nuhuaji, Pueyasoori Moisés caminiujiutiquiaari na rootasano, pueya niishiniuria nojoriiri seetanujuanaa Pueyaso tojiyashijiaca. Cunora quiquiaarii Moisés Rootasano. Cuno Rootasanoori quiquiaari Abraham jinianuucuajinio supueno pueyano cuaara tiuquiquiaarijiaatijia, taa Pueyaso sequequiaari Abrahamcuajani. Nojuajaari pa Jiyaniijia Jesucristocuaja. Naacuajitij, Jesucristocuajaari Pueyaso jiyaniquis-hano quiquiaari, na seqesacari Abraham, “quia jinianuucuajinio supueriquiano pueyano”. Cristocuajaari puetunu Pueyaso seqesano

Abrahamjanaa masequiaari pajaniyarajuhuaj, taa Pueyasojuanaa seguequiaari Abrahamcuajani. Saniniujua, Moisésri saaja pueya niishitiojoquiaari Pueyaso seja caminiuijushano nojuaja.²⁰ Abrahamra saniniujua, majaari quenaaja tamonu pueyano quiniu quiquiaari nera na caminiuijuriquiano. Pueyasojuanaacuajaari nocua muetaquiaari, na sequenura seetanujuanaa taa Neyanuucua tiuuijaca na miiniutianya maniniani. Cunora, Pueyaso rupaa Jesucristojiniji pa tojis hanoni, cuno cutaraari socua pa tojishocoriquiano Moisés Rootasano jiniji.

Casaaranote Moisés Rootasanoni

²¹ Naa cua seqesacaritij, ¿niaateeri jiyaniya, Moisés Rootasano naasucuaari pajaniyarano Pueyaso seqesano paraca? Majaari naa cua sequenutej. Janiyari saaja sequeyani, Moisés Rootasano jaara na naata quiriquia Pueyaso jiyanoootiniu pajaniya, paa maara Moisés Rootasano tojitiajaca quiriquiani, Pueyaso jiyanooniuria pajaniya.²² Saniniujua, tariucuacaanu Pueyaso Rupaajinijini, paari niishiyani puetunu pueyajanaari Sesaaca pueya. Naaratej, majaari pa naata tarinitianu quiquiaari sesa miiniu. Naacuajitij, paari maatia niishiyani, puetunu pueyajanaa cuaara tiuuria Jesucristoocua, Pueyaso seqesano Abraham nojori masenura.

²³ Pa niishiyaquishacarijia Jesucristoocua pa tiuuniuria, paari juhua Moisés Rootasano jiitiasano pueya quijani. Paari naa quijia taraatia pueyacuaani, paa jaara tojiquiaari Jesucristojinijijiaatija, nocua pa tiuuniuria.²⁴ Naacuajitij, Moisés Rootasanoori juhua pa jiitiana quiquiaari. Juhua naatujoorinijojua pa pueratejojua Jesuucuaari. Naa na miishacari pajaniyatej, juhuacarijia Jesujiniji pa niishitiojojuaari. Naacuajitij, paa jaara Jesuucua tiuuiquiaarini, paari puetunu sesa pa miishanojinijijanaa jiyanooshaaquiaarini.²⁵ Naa Jesuucua tiuuijaca pueya pa quishacari quiarijatej, majaari socua pa tojiniu tariucuacaanu pa canashitijiona. Moisés Rootasanoori juhua pataaco seru quiquiaari, Pueyasora na canashitijionura pajaniya, juhua naatujoori pa quishacarijia.²⁶ Quiarijia cutara, puetunu niajaniyajanaari Pueyaso pueya, Jesuucua nia tiuuniuucua.²⁷ Naacuajiti pueyanaa, niaa jaara moojinia tiuquinishaacanu, seetanujuanaa nioojiata nia tiuushacari Jesuucua, niaari na coquetesaaquiaa. Naa nia quishacari natatej, na Que niquiara, niaari juhua nojuaja niquishano, na panishano muerasuniyojua nia quiniuucuajuhuaj.²⁸ Naa Pueyaso muerasu pa quiniuucuatej, majaari Pueyaso niquiniu rimiajata pajaniya. Tamonu jaara Judio pueyano quiri, naajaa. Tamonu jaara tahue quirijuhuaj, naajaa. Poonijotesano pueyano maaraja, camarnuuju pueyanonio, cunoori maja rimiajata Pueyasora. Naajuhuaj, caya, maaji, cunoori maja rimiajata Pueyasora. Jesucristoocua tiuuijaca pa quishacari, Pueyasora, puetunu pajaniyajanaari juhua niquiriyatu pueyanoni.²⁹ Naajuhuaj, niaa jaara seetanujuanaa Jesucristo pueya quiri, niaari seetanujuanaa canaa supuetana Abraham jiuahuacuajinio supueno pueya cutara. Naacuajitij, niaari Pueyaso seqesano Abrahamrano maseriquianojuhuaj.

4

¹ Nia sequenu paniya socuanijia pueyanaa. Cua tojiri. Mijiria, pueyano jaara jiyaniijia quiri, na shaajesacari, neyanuuri camarnura

jiyatesano na que niti. Shaajeno pueyano niyanu jaara naatujua quirijia, neyanuuri juhuanojuaja maja na naata na que casami jiitianu. Nojuajaari saaja juhua pataaco seru, naatujua na quishacarijia.² Naacuajitij, tamasacaari cuno mueya canashitijia, cuaara mashajara quirijaatijia, jiyaniijiara jiyatesocoriquiano, taa na shipininio sequequiaaricuajani. Juhuacarijia niishitiojoshiyajaariuhuaj, maninia na jiitianura nerano na que riuriotaca.³ Paari naajuhuaj. Pueyaso pueya pa quiyaquishacarijia, paari juhua naatujoori quiquiaarini. Paari mijiria niishishano tojitishaquaarini, pa supuetanaa niishishanonio. Paari naa taraatia jiitiasaaquiaarini.⁴ Na nuhuaji, Pueyaso jaara tari na sequesano tohuateenu paniquiaari, nojuajaari Neyanu jiyaroquiaari pocua, mijiria na rasaanura maninia maajinijijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti.⁵ Naacuajitij, nojuajaari na naata Moisés Rootasano tojijiaca jiyanooni, maja socua pa tojitishaanura Moisés Rootasano. Naaratej, Pueyasoori na naata pa jiyatenu na muerasu pa quiniuria cutara.⁶ Seetanujuanaa na niishitiniuria pajaniya paari necohuani, nojuajaari Neyanu Sohuanu jiyaroquiaari pocua, poojajinia na quiniuria. Naa poojajinia na quishacaritij, nojuajaari Pueyaso pa sequetequiaa, “cua Quenaa”.⁷ Naacuajitij pueyanaa, majaari tari nia quiniu Moisés Rootasano tojijiaca, juhua pataaco seru. Niaacuajaari seetanujuanaa Pueyaso niquiohua cutara. Naa na muerasu nia quishacaritij, niaari tariucuacaanu Pueyaso sequesano Abrahamrano maseriquianojuhuaj, taa na muerasurano niquitionu na sequequiaaricuajani.

Pablo tacaashacari Galacia jiyajinia quiniaa Pueyaso pueyacula

⁸ Pueyaso nia niishiyaquishacarijia pueyanaa, niaari juaashiquiata shipinijosano nia pueyasohua tojijiaca quiquiaari taraatia. Cuno casaari maja seetanujuanaa Pueyaso.⁹ Quiarijia saniniuujia, niaari Pueyasojuanaa niishiya. Pueyasojuanaa cutaraari saniya nia niishiya. Naa Pueyaso panishano muerasu nia quishacaritij, ¿casaara najuhuana supuetanaa pueya niishishano miiniuria nia panihuua socuani? Cuno, canaa supuetanaa Judiocuaca rootasanoni, cunoori maja na naata cumaquinii niajaniya. Niaari najuhuana na tojijiaca quiniutianiya.¹⁰ Niaanaari puetunu juucajanaa niishijiaca quiya, juhua canaa supuetanaa Judiocuaca. Niaanaari sequetuquiaa: “Cuno juuca, majaari pa miaquenu quiniutianiya. Cunoori pueresano juuca, Pueyaso jiyanooniuria pajaniya”. Niaanaari naa miiquiaa puetunu shuniyarajanaa, puetunu marijiarajanaanio. ¿Casaara naa miijiacara nia quiriohuacuarini cuarta Pueyaso pueyanaa?¹¹ Naa nia miiniuucuatej, janiyari jiyanolua tacaya quiarijia niaacuani. Janiyari tama sequequiaajacuua: “Cuno pueya tajinia Pueyaso rupaa cua pohuatasanoquiiri najuhuana quiquiaari”.

¹² Cuarta Pueyaso pueyanaa, janiyari seetanujuanaa nia sequenu paniyani. Nia miiriohuaro hua taa cua miiquiaaricuaani, shusha cua tiuquishacari niaacua. Moisés Rootasano niishiyashijiaca nia quishacari, janiyari na tarinitiaquiaari tojiniuni, juhua niajaniya cua quiniuriajuhuaj. Saaja Jesucristo rupaa nia tojiriohua cutara taa cua miiquiaaricuaani. Cua panishano pueyanaa, niaari maninia cua jiiti aquiaari niaata cua quishacari.¹³ Niaacuajaari niishiya, cusosu cua quiniuucua, janiyari shushajanaa Jesucristojiniji pohuataquiaari nia

niquiarani. ¹⁴ Naa cusosu cua quishacari niaatatej, naajaa, majaari nia ruuretanu quiquiaari janiya, naa sacuaraatia cusosu cua quishacaritij. Majaari quenaaja nia soonu quiquiaari janiya. Saniniuujia, ni-aari cua tojitiaquiaari juhua Pueyaso serujuanaa, nia niquiara cua pohuatasacari Jesucristojiniji. Niaa cutaraari seetanujuanaa cua to-jiquiaari juhua Jesucristojuanaa. Niaari naa timitiaquiaari janiyatej, Jesujiniji cua pohuatanuucua niajaniya. ¹⁵ Quiarijiaariuhua pueyanaa, ¿casaa nia tojetacanuni? ¿Casaara nia tarinitiarohuacuaa shuquiriaatia nia quiniurini, taa nia quiquiaari coteenucuajani? Janiyacuajaari niishiquiaarini, jiyanohua nia paniniuucua janiya, jaara nia naata quiquiaari, niaa maara nia namijia samiriootaquiaari nia niquitioso-coriquiano janiya, cucua nia taraajesacari. ¹⁶ Quiarijia naa cua seque-sacari seetanujuanaa niajaniyatej, ¿niaateeri cunora cua niquiniutiani-ja nia paraca? ¹⁷ Cuno pueya, nahuana tamaatia nia niishitio-quaia Pueyaso rupaani, quiarijia nojoriiri maninia miquiaa niajaniya na sapojonuta. Nojoriiri nia shuquiritya, nojoriicua nia tiuuniuria. Nojoriiri naa miya, canaa nia cartenura, saniniuujia nojori tojijiaca nia quiniuria. Naacuajitij, majaari tari cua rootasano tojitiajaca nia quiniu quiniutiani-ja. Niaari cua cartenutaniyajuhuaj. ¹⁸ Quiarijiani, cuno pojoriiri nia shuquirityacuaja. Majaari nia jiyaniniu janiya nia sequeyani, maja maninia parta pueya pa shuquiritiniuria. Taaquiri-irinij, maniniacuajaari parta pueya pa shuquiritiniuria, seetanujuanaa pa naacunura nojori. Niaacuajaari niishiya pueyanaa, jani-yari jiyanohua nia tojishano pueyano quiquiaarini, Jesucristojiniji cua pohuatanuucua nia niquiara. ¡Naa seetanujuanaa pueyaracaanu cua panijiacara nia jiyateriquiani, maja saaja nia shuriucua cua quishacari! ¹⁹ Quiquiohuaniyojuanaa, jiyanohua cua tacaashacari ni-aacua, coojiaari jiyanohua noonu pacuterohuacuhuaj, naatej, taa maaji nooquiaacuaa na manajani, quera na ranu panishacari. Naajuhuaj, janiyari naa pueyaracaanu miijionutaniya naquiya niaacuani, niaa cuaara jatanishaarejaatija, quiarinio pueya nia quiniuria. Niaari naa quiniutiani-jaquij, seetanujuanaa Jesucristo quishacari nioojiac-jinia, juhua nojuaja nia quiniuria. ²⁰ ¡Seetanujuanaa nia shuriucua cua jatariquiani, maninia cua niishitiojonura niajaniya! Naa cua quishacari tucuacaanu niajaniyajinijitij, majaari cua niishiniu taa nia quiya see-tanujuanaani. Niaanaari Moisés Rootasano tojijiacara quiriohuacuaa. ¿Niaateeri seetanujuanaa Jesucristo rupaa cartecanu, maja soj?

Miriqui pohuatasano Agarjiniji, Saarajinijinio

²¹ Moisés Rootasano tojitiajacanaa, cua tojiri. ¿Majateeri tariucuacaanu Pueyaso Rupaajinija nia serojonu quiquiaacuaja, taa Abrahamjiniji na pohuataani? ²² Moisés Rootasanocuajaari Abrahamjiniji sequeya, nojuajaari caapiqui niyanuraca quiquiaari, caapiqui nucuaacuajinio-juhuaj. Abrahamri neco seru muetuquiaari. Na sesojoquiaarii Ismael. Na nuhuaji, saniya necojuanaari nera muetuquiaarijuhuaj. Na sesojoquiaarii Isaac. ²³ Pueyanaa, Agar jaara Abrahamra mue-tuquiaari, cunoori tama Abraham miishanojuaaja quiquiaari, mueya na panishacari. Maja cutaraari Pueyaso panishano. Saniniuujia, saniya necocuajanaa jaara nera muetuquiaari na nuhuaji, cunoori Pueyaso panishano quiquiaari cutara, na camishano maajijanaa mue-tusacari nera. Naacuajitij, Pueyasoori tarijia na sequesano Abra-

ham tohuateequiaari. Naa na sequequiaariiri: "Abrahamnaa, quiaari niyanuraca quiiniutianiya". Naa Pueyaso sequenuucuatej, necocua Saaraari muetuquiaari, motaja na quishacari. Cunoori maja tama nojori cumaacatajaaja. Cunora, Isaacri Pueyaso sequencesanojuanaa mueya cutara, maja juhua Ismael, seru mueya.²⁴ Nio caapiqui maajipohuani, Agar, Saaranio, nojoriiri juhua caapiqui seetanujuanaa Pueyaso sequencesano na pueyara. Naacuajitij, Agarri miriqui juhua Moisés Rootasano, Sinaí tuhuananujin Pueyaso niishitiosano Moisés. Naaratej, Moisés Rootasano tojitiajacaari juhua seja quiquiaa, taa Agar quiquiaari serucuaani.²⁵ Seetanujuanaari, Agarri miriqui juhua Sinaí tuhuananu Arabia jiyajinia. Saniniuujia, nio pa quishacarini, Jerusalén tiacaari juhua Sinaí tuhuananu, cuno tiacajinia quiniaa pueya quiniuucua Moisés Rootasano tojijiaca. Cunora, Moisés Rootasanoori juhua nojori jiitiana quiya, juhua poonijotesano seja nojori quiniuria.²⁶ Saniniuujia, quiarinio Jerusalén tiacani, jiyocuacaanu Pueyaso racatasano pa quiquieronni, cunoori seetanujuanaa Pueyaso muera-surano cutara. Cunoori maja Moisés Rootasano tojijiaca. Cuno tiacaari miriqui juhua Saara. Paacuajaari juhua Saara niquiohua cutarani. Majaari tari pa quiniu seru niquiohua.²⁷ Tariucuacaanu Pueyaso sequencesanocuajaari naa naajiotasano quiyajuhuaj:

"Niyajaru maajiniae, shuquiriaatia quia quiri. Quiaacuajaari mueya noonu saniyashijia. Naajaa, majaari quia taraajenu. Quia shuquiriutia quia jaaquequejore cutara. Quiaacuajaari carte-saaquiaari niyajaru quia quiniuucua. Naajaa, quiaacuajaari socua queraatia niquiohuaraca quiriquiano cuno niyacaraca maajijiniji".

²⁸ Cuarta Pueyaso pueyanaa, paacuajaari juhua Isaacni. Na nu-cuarano Saara tiuuniuucua Pueyaso sequencesanoocua, taa na mue-tunutaniyani, naacuajiti nojuajaari neyanu Isaacraquiaari. Quiarijiani, paari naajuhuaj. Jesucristo rupaacua pa tiuushacari, Pueyasoori na cumaacata pa jataniquiaari seetanujuanaa na muerasu pa quiniuria.

²⁹ Maninia nia niishiri nio pohuatasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Saniniuujia, saniya necocuajanaa jaara nera muetuquiaari, cunoori Pueyaso Sohuanu cumaacata rasa aquiaari cutara. Na nuhuaji, seru niyanuuri Pueyaso Sohuanu cumaacata rasano miitija quiquiaari. Quiarijiaari naajuhuaj, Pueyaso ruuretajaca pueyari Pueyaso Sohuanu jatanishano pueya miitiaquiaa.³⁰ Quiarijia nia niishiri cutara, naa naajiotasa aquiaaricuajaari tariucuacaanu Pueyaso sequencesano Abraham:

"Quia niquiocua seru quia taanure neyanuta puetunujuanaa. Cuno, janiya seetanujuanaa quia sequequiaari niquitionuni, cunoori maja Agar niyanurano. Cunoori seetanujuanaa quia niquiocua muetusanorano, cua Sohuanu cumaacata rasano mueyaran-otuhuaj".

³¹ Paari naajuhuaj, cuarta Pueyaso pueyanaa. Paari maja seru niquio-huani. Paari Jiyaniijia niquiohuajanaa cutarani.

¹ Jesucristo cusionuucua pocuara, nojuajaari Pueyaso niquiohuara pa jiyatequiaari, maja socua Moisés Rootasano tojijiaca pa quiniuria. Naarate pueyanaa, jiyanolhua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojijiacara nia quiniuhua. ¿Moisés Rootasano tojijiacateeri jiyanooshaanutaniya? ¡Maja! Maja pa naata tama pa cuaqueyajaaja jiyanoootinii Pueyaso, Moisés Rootasano pa tojiniuucua. ² Cua tojitiare pueyanaa. Janiyari Pablón. Janiyajanaari seetanujuanaa nia sequeyani, niaacuajaari Jesucristoocua tiuuijaca, Gálata jiyajinia quiniaa pueyanaa. Cunora, Pueyasoori nia jiyatequiaari na muerasu nia quiniuria. ¿Niaateeri jiyaniya niaa seetanujuanaa Pueyaso pueyara quiniutianiya cutara, nia cararaatiuuquia co miatejosaanuucua? ¡Maja! Niaa jaara naa niishiriojiya, niaari Jesucristo cusionu jiyatenutaniya najuhuana na quiniuria niajaniyara. ¡Pueyanaa, majaari nia tojiniu cuno Judiocuaca, canapuete nia shiniujuquia nia cararaatiuuquia co miatejosaanuracuajani, seetanujuanaa Pueyaso pueya nia quiniuria! ³ Janiyari socua sequenu paniya noo pojoririani, cararaatiuuquia co miatejonuujuacatej, nojori jiyaniiuucua nia nojori miishacaritij, nojori cutaraari seetanujuanaa Pueyaso muerasu. Cante naa mijiani, nojuaja cuaara tojiria puetunu Moisés Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojiniu, Pueyaso jiyanooniuria niajaniya? ¡Maja!

⁴ Naa tama nia cuaqueyajaaja nia jiyanoootinii panishacari Pueyaseotej, Moisés Rootasano nia tojiniuucua, niaari Jesucristojiniji carejerucuaa. Majaari Pueyaso naata maninia miiniu niajaniya socua, taa maninia na miiquiaacuaa na panishano muerasuni. ⁵ Pajaniya saniniuujia, paari Pueyaso Sohuanuraca cutarani, Jesucristoocua pa tiuuniuucua. Naacuajitij, paari niishiyani paari tojetaarucuajanaa sesa miyashijiaca jiyatesaanutaniyani. ⁶ Quiarijiani, Jesucristo rupuesano pa quishacari nocua pa tiuuniuucua, paa jaara pa cararaatiuuquia co miatesano quirini, maja soj, naajaa. Cunoori najuhuanaj. Socua maninia cutaraari Jesuucua tiuuniu, Pueyaso panijiaca pa quiniuria, parta pueya pa paniniuriajuhuaj.

⁷ Cuarta Pueyaso pueyanaa, niaacuajaruhua Jesuucua tiuuijaca quijia seetanujuanaa. ¿Quiarijiaariuhuaj, cante nia tarinitiriohuacuaa seetanrupaucuajanaa nia tiuyaquiniuriani? ⁸ Cuno pojori niishitiojosano Jesuucua tiuuniu nia tarinitianurani, cunoori maja Pueyaso niishithano nojori. ⁹ Cunora, seetanujuanaari nio sequenceso: "Shiitianijojuja jereeca mashaca jaara shoqueeca mashacajinia shuushaare, cuno shiitianijojuja puetunu cuno mashacajanaa jereteja". Naajaariuhuaj, shiitianijojuja sesa niishitiojosanoori puetunujuanaa pa sesojuahuaj. ¹⁰ Naajaa, janiyacuajaari pa Jiyaniijaacua tiuya seetanujuanaani, majaari nia tojiniu quiniutianiya tamaatia cuno pojori niishitiojosano. Saniniuujia, Pueyasoori noo pojori saniitioriquiano, tamaatia na niishitiojonuusanota nia cushitiojoquiaani. Cante nia niishitiojiya sesani, jaara quiri cuarta Jesucristo jiyaramiquishano pueyano, tama janijajaaja soj, naajaa, nojoriiri saniitiosaariquiano.

¹¹ Cuarta Pueyaso pueyanaa, majaari cua niishitiojonu quiquiaa taucuacajinjinio Jesucristoocua tiuuijaca, nojori miatejonura na cararaatiuuquia co, seetanujuanaa Pueyaso muerasu nojori

quiniuria. Janiya jaara naa seetanujuanaa niishitiojoriquiaani, cuarta Judiocuaca maara naquiya cua miitiaquiriquiani. Saniniujia, Jesucristo cusionuucua niyacutesanojinia pocuara, paari saaja naacua jiyanooshaaquiaani. Naa cua niishitiojonuucuatej, Judiocuacaari jiyanoehua cua juaaquiaani.¹² Majaari nojori nia tojinjiu, nojori niishitiosacari nia cararaatiuuquia co miatejosaanura. Maninia juhuari cuno miatejonuunu porocua jayosaanura nia tajiniji, maja socua nojori cushitiojonura niabajani.

¹³ Cuarta Pueyaso pueyanaa, Pueyasocuajaari nia sequequiaari na muerasuniyojua nia quiniuria, Neyanu Jesucristoocua nia tiuuniuucua. Naacuajitij, majaari tari nia quiniu juhua poonijotesano pueya, taa nia quiquiaaricuaani Moisés Rootasano nia tojishacari pueyaracaanu. Naa Moisés Rootasano tojijiaca nia quiyaquishacari taritij, naajaa, majaari nia jiyanimiu nia naata miiniu puetunu nia cuaqueya miiniu panishanojuanaa. Maja. Maninia cutaraari niarta Pueyaso pueyata nia cumaquitiojonura, seetanujuanaa nia panitioonuta. ¹⁴ Niaa jaara naa miijiacaca quiriquiatej, niaari puetunu Moisés Rootasanojuanaa tojiyacuaja, taa na rootasanojinia naajiotasano quiyacuajani. Naa sequeyari: "Panijia quia quiriquia, taa quia paniyacuuaa tama quia cuaqueyajaa-jani".

¹⁵ Naarate pueyanaa, tama nia cuaqueyajaaaja nia cojuare. Majaari pueyaracaanu nia juayonuujuutanu, naatej, taa sareya sayonuuju-taquiaacuanaa. Niaa jaara naa quiriquiatej, niaari socua puecotoonutaniyaquij.

Taa quiriquiate tama na panishanojuaaaja miijia pueyanoni, Pueyaso Sohanu tojijiä pueyanonio

¹⁶ Janiya nia sequeya cutarani pueyanaa. Cua tojiri. Pueyaso Sohanu tojijiaca nia quiri pueyaracaanu. Naacuajitij, majaari sacuaraatia tama nia panishanojuaaaja nia miiniu quiniutianiya. ¹⁷ Nio nia niishiri cutara. Cuno, poojiajinia sesa casaa pa panishanonii, cunoori Pueyaso Sohanu paraca. Naajuhuaj, Pueyaso Sohanuuri poojiajinia sesa casaa pa panishano paracajuhuaj. Naacuajitij, cuno pojori miaquetoojosacari poojiajinia, cunora, majaari pa naata miiniu taa pa miiniu paniyacuajani. ¹⁸ Saniniujia, Pueyaso Sohanu jaara nia cumaquiquiaacuaja saaja Pueyaso nia tojiniuria maninia, cunora, Moisés Rootasanoori tojiniu paniyaquishaanutaniya tari. Naacuajitij, niaacuajaari maninia miiniutianiya saa Pueyaso Sohanutaja.

¹⁹ Maatia niquishanocuajaari taa pueya miiquiaani, noo pojori, canapuete tama na panishanojuaaaja miijiacani. Nojoriiri juhuajaniya na camishoo maajipohua numuetucunujuaca, sacuaraatia miitiooja narta canuutajaariuhuaj. Maajipohuari naa sacuaraatia miitiooja narta maajipohuatajujuaj. Pueyari saaja naa miiniuucua jiaatiajaca sacuaraatiatej. ²⁰ Naajuhuaj, nojoriiri tama nojori pueyasorajaaaja nojori shipinishano casaa secojonuujuaca. Nojoriiri shimiacurijiuhuaj, narta pueyano shimiojonuujuaca. Narta pueyano niquiniu paniyashijiaca-jaariuhuaj. Nojoriiri juatatiojuacajuhuaj. Nojoriiri narta pueyano jiitisanoocua jiaatiajaca jujuah. Cunora, nojori niquiniu paniyaquijaari. Nojoriiri maja na niishiniu rejetenu na juaaquia. Ritia juaajiacari. Pueya nasojojua narta pueyanocuarajaariuhuaj. Naacuajitij, nojoriiri narta pueya raquiriojotaquiaa narta pueyajiniji. Nojoriiri saaja tama

nojori panishano pueyajaaja panijiaca, canapuete maninia miiquiaa nojoricuajani.²¹ Cuno pojori, naa sacuaraatia miijiac a pueyaracaanu Pueyaso niquierani, nojoriiri maja na niquinii paniniu quijia narta pueyano, cante taquiya maninia miishaaree nocuajicuaani. Nojoriiri sacuaraatia mashaasequenujuacahuaj. Nojori mashaasequenuusacari, puetunu sacuaraatia casaa miijioquiaajanaari. Jiyanolhua mi aquenu porocua. Nojori queranacusacari, nojoriiri socua tamaatia sesa casaa miiniu niishijiacahuaj. Niajaniya saniniujia cuarta Pueyaso pueyanaa, cua tojiri. Cante naa sacuaraatia casaa miijiojuani, nojuajaari maja Pueyaso jiitiasano na quiniu quiniutianiya, pueyaracaanu rishijia na quiniuria shuquiriaatia.

²² Saniniujia, paa jaara Pueyaso Sohuanu shanacure poojajinia na poonijionurani, nojuajaari parta pueya panijiara pa jiyateja. Poojia jiyateya shuquiriaatia quijaraari. Poojia cajitijajaariuhuaj. Jacaria pocuajara pa jiyateyajaariuhuaj, juhuajaniya sashijianio. Pueyaso Sohuanuuri maninia pueyanora pa jiyatequiaa, jiyanojianio. Pa sequesano miijiara pa jiyatejajaariuhuaj, pueya tiuuniuria pocua. ²³ Pueyaso Sohuanuuri pa jiyateja pueya shocoteyashijiarahuaj. Pa niishitiquiaajaariuhua tama sesa casaa pa cuaqueya panishanojuajia pa rejetenura. Paa jaara naa miijiac quiriquia Pueyaso Sohuanu cumaacatani, majaari quenaaja niquiriyatu Moisés Rootasanojinjinio sesacanu quiniutianiya pajaniya. ²⁴ Seetanujuanaari, paa jaara Jesucristo pueyanora quiquiaarini, pa rupuesacari nojuaja, paari tarì poojia sesoriquia seque cusoquaquiaari Cristotani, puetunu sesa pa jiaatianujuanaanio. ²⁵ Pueyaso Sohuanu jaara nia samiitianijioquiaari Pueyaso muerasu nia quiniuria, quirijia seetanujuanaa pueyaracaanu na tojijiaca nia quiri cutara. ²⁶ Majaari tama pa cuaqueyajaaja pa jiyanihi, paa socua maninia pueyano parta pueyajinijini. Paa jaara pueya shocotejaca quiriquiani, paari parta Pueyaso pueya juaatiniutianiyan. Maja maninia, paa jaara juatishaaren tamonu jaara socua tojishano pueyano quiri pajaniyajiniji, naajuhuaj, tamonu jaara socua maninia miishaare pajaniyajiniji. Majaari naa miijiaca nia quiniu Pueyaso pueyanaa. Saaja maninia quijiac a pa quiri cutara.

6

Niarta Pueyaso pueyata nia cumaquitioojoriquia

¹ Cuarta Pueyaso pueyanaa, niaa jaara parta Pueyaso pueyano niquiriquia sesa miyano, jacaria nia nacasure. Cuno niajaniyajinjinio canapuete Pueyaso Sohuanu niishitajaraca cutarani, nojori cuaara jacaria na nacasuuranoy, sesa miiniu na tarinitianuhuara. Cante cuno sesa miijia nacasyani, nojuaja cuaara na nacasuura seetanujuanaa na paniniutia narta pueyano. Naajuhuaj, jiyanolhua nia cojuare tama nia cuaqueyajaaja Sesaa mariqui nia saniniujirijaariuhuaj, sesa nia miiniuriajuhauj. ² Maninia cutaraari nia cumaquitioojonura niarta Pueyaso pueyata, niaa jaara taraatia miishaare. Naa pa cumaquishacari parta Pueyaso pueyatej, paari naa pa Jiyaniijia Cristo rootasano pajaniyarano tohuatenutaniyani.

³ Najuhuana quijia jaara jiyaniya nojuaja cutara niishijia pueyano, pueya tojishano pueyanotuhuaj, naa niishirijojoquaari tama na cuaqueya sapojiyajaacujua. ⁴ Puetunu niajaniyajanaa cumaati tama

niishiriojoquiaajaacujua, taamueca pueyanote niajaniyani, maninia miijia, sesa miijia soj. Niaa jaara seetanujuanaa maninia miijiaca quiriquia, tama maninia nia miishanojuaaja nia timitiare. Niarta Pueyaso pueyano jaara socua maninia miijia quiri niajaniyajiniji, socua sesa miijia soj, niaara, naajaa. Maja cunora taraajenu, maja cunora shuquiriaatia quiniujuhuaj. Saaja shuquiriaatia nia quiri, niaa jaara maninia miiquiaa taate nia naata miiniucuajani.⁵ Puetunu pajaniyajanaari tamaatia poonijiosano jiitiaani. Tama niajaniyajaaja cumaati na miiquiaa maninia, Pueyaso shuquiritanura niajaniya, seetanujuanaa shuquiriaatia nia quiniuria.

⁶ Canapuete Pueyaso rupaa niishitiojosaquaani, cuno pojori cuaara na niishitiojonaa niquitiojoora nojori casamijiniji saniniuuja, nojori niishitiojonaa jiitianura nojori panishanojuhuaj.

⁷ Pueyanaa, maja tama nia cuaqueyajaaja nia sapojonu nia jiyanishacari niaari saniitioyaoquishaanutaniya sesa nia miiniucua. Majaari quenaaja tamonu pueyano na naata Pueyaso rerequetenu. Pueyasoori saniitiojua cutara. Naaratej, nio miriqui sequenceso nia niishiri: "Casaa jajau pa natareeni, paari juhua cuno jajau senoonutaniyajaa-niuahuaj". Nio miriqui sequenceso nio niishitiojiya: cante maninia miijiani, nojuajaari maninia miishaanutaniyajaaacuhuaj. Naajuhuaj, cante sesa miijiani, nojuajaari sesa miishaanutaniyajaaacuhuaj sesa na miiniucua. Cunoori maja rimiajata. ⁸ Naacuajitij, canapuete tama na cuaqueyajaaja shuquiritijiaca sacuaraatia casaa na miishacari mijiriani, Pueyasoori cuno pojori quejoonutaniya cutara, pueyaracaanu na saniitiosocoriquiano. Saniniuuja, cante Pueyaso Sohuanu tojijiani, Pueyaso panishano na miiniuria puetunujuanaa, nojuajaari pueyaracaanu rishijiara jiyatesaanutaniya cutara. Nojuajaari shuquiriaatia quiniutianiya pueyaracaanu. ⁹ Cunora pueyanaa, niaa jaara maninia miijiaca quiri, majaari maninia miiniuria nia taajenu. Pueyaracaanu maninia miijiaca nia quiri. Niaacuajaari niishiya, pueyano jaara na cuhuariquia natare, nojuajaari na sashijia. Majaari ritia na senoonu. Nio miriqui sequenceso nia niishitiya, paa jaara Pueyaso Sohuanu tojiniu tarinitiaquirini, paa cuaara sashiiriajuhuaj. Na nuhuaji cutara paari jiyano hua shuquiriaatia quijiacara jiyatesaanutaniyani, maninia pa miiniucua. ¹⁰ Naacuajitij, jaara pa naata quiriquia, maninia pa miiriquia puetunu pueyajanaa. Saniya maninia cutaraari puetunu parta Pueyaso pueyajanaa pa miiniuria maninia.

Pablo nacasusacari pueya, quera na tucuatasacari na naajio

¹¹ Nia niquiri cua naajio pueyanaa. Naa quera namijiaaca cua naajiosacari niaacuaratej, nia niishiri janiyajanaari nio naajija tama cua juaashiquiatajajani. ¹² Socua cua tojiri pueyanaa. Cuno pojori, nia shiniujuquia nia cararaatiuuquia co nia miatejonurani, nojori-iri naa nia miitiniu paniya saaja narta Judiocuaca timitianura nojori. Nojoriiri narta Judiocuaca puerequia. Nojoriiri niishiya narta Judiocuacaari nojori miiniutianiya naquiya, miatesoo nia cararaatiuuquia co quiniucua. Majaari nojori tiuuniu quiriquia saaja Jesucristoocua, Pueyaso pueya nojori quiniuria. Cunora, nojoriiri jiyano hua paniya nia cararaatiuuquia co miatesano pueya nia quiniuriajuhuaj, taa puetunu Judiocuacajanaacuaani. ¹³ Cuno pojori, canapuete na cararaatiuuquia co miatesanocuaani, nojorijianaari maja nojori tojiniu

quipuaa puetunu Moisés Rootasanojuanaa. Naajaa, nojoriiri nia pantiiaa nia cararaatiuuquia co miatesano nia quiniuriajuhuaj. Niaa jaara miatejosaare, nojoriiri tama timiquionutaniyajaja, nojori tojitiajaca nia quiniuucua.¹⁴ Janiya saniniuujia, Pueyaso cuaara cojuaara janiya majaa cua shuquiritianura tama cua miishanojuaja. Janiyari saaja pa Jiyaniijia Jesucristo shuquiritanu paniquiaani, pocuara na cusionuucua niyacutesanojinia. Naacuajitij, janiyari mijiria niishishanoocua jiaati-aashijiara jatanishaquaarini. Mijiria casaari majaa na naata shinuji-uniu janiya, nocua cua jiaatianura socua.¹⁵ Pueyanaa, pa cararaatiuuquia co jaara miatesano quiri, naajaa. Naajuhuaj, pa cararaatiuuquia co jaara miatesoo quiri, naajaa. Majaari rimiajata pa quiniu Pueyaso niquia cunora. Saaja panishano cutaraari, quiarinio pueyanora pa jatanishaanura Pueyaso Sohuanu cumaacata.¹⁶ Puetunu nio seque-sanoocua tiuujiacajanaani, Pueyasoori nojori jiuujia cajitiquiaa, na jiyanooshacari nojori. Cuno pojoriiri seetanujuanaa Pueyaso saquirio-josano pueya.

¹⁷ Tariucuajaari cua rootasano nio naajioneejinia. Quiarijiani, tamonu cuaara socua cua taajeteyaquiiria sesa na niishitiosanota nia-janiya. Janiya cutaraari pa Jiyaniijia Jesucristojiniji niishitiojonani. Cua cuaqueyajinia nio majacuyashiquajinijini, cunojiniji maatia niishishi-yari, janiya seetanujuanaa Jesu seruni.

¹⁸ Cua panishano cuarta Pueyaso pueyanaa, nioojia cuaara jiitiaara pa Jiyaniijia Jesucristo cumaaca, na niishitajjanio. Cuaara naa quiiratej.

PABLO NAAJIONEE ÉFESO TIACAJINIA QUINIAA PUEYASO PUEYACUARA

Pablo saruhuatasacari Jesucristo tojitiajaca

¹ ¿Niaate quiyajaa cuarta Pueyaso pueyanaa? Janiyari Pabloni, Jesucristo jiyaramiquishano na rupaa cua pohuatanura, taa na Que Pueyaso paniquiaaricuajani. Niaacuara naajiyanijia, canapue Pueyaso saquirijoquiaari tama neracuajani, canapuete Jesucristo tojitianaacuajani. ² Pa Que Pueyaso, mariyata pa Jiyaniijia Jesucristo cuaara taraajeera niaacua, maninia na miiniuria niajaniya. Nojori cuaara cajitiiria nioojia pueyaracaanujuhuaj.

Taa Pueyaso miiquiaa pajaniyani Cristo rupuesano pa quishacari

³ Pa Jiyaniijia Jesucristo Queeri Pueyaso. Nojuaja pa shuquiritiare. Neyanu Jesucristo pa rupuenuucua, Pueyasoori capora pajaniyara. Nojuajaari jiyahohua maninia miiquiaa pajaniya, puetunu jiyocuacaanu na jitiwasano cumaacatajanaa. ⁴ Pueyaso niishishacari taa Neyanu miiniutianiya pocuarani, jiya shipiniyaquishacarijia, nojuajaari tari pa saquirijoquiaari na shuriucua quijiaca pa quiniuria. Pa saquirijoquiaariajiaariuhua na tojijiaca pa quiniuria, tojetaarucajanaa sesa miyashijia pa quiniuriajuhuaj. ⁵ Panijia na quiniuccua, nojuajaari pa saquirijoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuacaanu na niishirijoquiaari na miiniuria pajaniyacuajani. ⁶ Jiyahohua maninia na panishano Niyanunijoua miiniuucua pocuara, nojuajaari pueyaracaanu jiyanoquiaia pajaniya. Nojuajaari jiyahohua capora. Naa maninia na miiniuucua pajaniyatej, paari cunora pueyaracaanu na maniniuhuaqueetaquiaani. ⁷ Niycutesanojinia Neyanu shootenuucua na nanaca pocuara, Pueyasoori pa jiyanoquiaari na muerasu pa quiniuria. Naaratej, majaari Pueyaso saniitionu quiniutianiya pajaniya. Puetunu sesa pa mishanojinijijanaa pa jiyanoquiaari. ⁸ Pueyasoori na paniniu niishitiquiaari pajaniya, na niquitiosacari na niishitija pajaniya, puetunu casaa niishijajanaa pa quiniuria. ⁹ Nojuajaari jiyahohua tariucuacaanu niishirijoquiaari taa na miiniutianiya puetunu na shipinishanoocuarajanaani. Quiari naataja saniniuujia, nojuajaari jiyasohua na miiniu panishano niishitiquiaari pajaniya. ¹⁰ Pueyanaa, nia niishiri casaa Pueyaso miiniutianiyan. Nojuajaari Cristo jiyatenutaniya Jiyaniijajanaa na quiniuria. Naacuajitij, puetunu jiyocuacaanu quijiacajanaa, mariyata puetunu mijiria quijiacajanaari na tojijiacara quiniutianiya. Nojuajaari naa tohuateenutaniya tamacari, taa tamajaaja na niishirijoquiaaricuajani.

¹¹ Pueyasoori tariucuacaanu pa saquirijoquiaari Neyanutaja na cojiritianura pajaniya, maninia na miiniuria pajaniya. Pueyasojuanaari tariucuacaanu naa niishirijoquiaari maninia na miiniuria pajaniya. Nojuajaari pueyaracaanu tohuateequiaa taa na miiniu paniquiaaricuajani, niishijia na quiniuucua. ¹² Nojuajaari pa saquirijoquiaari maninia quijiacara na jataniniuria pajaniya. Cuarta Judiocuacajinjinio pueyani, canaari coteenujuanaa Jesucristoocua tiuuquiaarini. Naa jiyahohua

maninia Pueyaso miiniuucua canaa, nojuaja cuaara maniniuhuaqueetasaria jiyanolhua. ¹³ Quiari naataja nia tojishacari Jesucristo rupaa, niaari cuno seetanu rupaacuajanaa tiuuquiaarijuhuaj, Pueyaso muerasura jatanishano nia quiniuria. Naa nocua nia tiuuniuucuatej, Pueyasoori Neyanu nia rupuetequiaari. Na Sohuanu niquitioquiaaria niajaniyajaarijuhuaj taa na sequequiaaricuajani. Naacuaji niishishaquiaari, niaari seetanujuanaa Pueyaso muerasu. ¹⁴ Pueyaso Sohuanuraca pa quishacari, paacuajaari niishiyani, paari puetunu Pueyaso sequencesano Neyanuranojuanaa masenutaniya Neyanutajuhuaj. Pueyaso Sohuanu pa jiitiasacari, paari niishiyani, Pueyasoori pa rijionutaniya puetunu na saquiriojosano pueyat�anaa, na muerasu pa quiniuria na shuriucua. Jiyacaritij, paari tojetaarucuajanaa jatanishaanuttaniya juhua Neyanu pa niquishaanurajuhuaj. Cunora, Pueyasoori jiyanolhua maniniuhuaqueetasano quiniutianiya, jiyanolhua maninia na miiniuucua pajaniya.

Taa Pablo secojoquiaari Pueyaso pueyacuarani

¹⁵ Janiyari niajaniyajiniji tojiriucuaani, taa pa Jiyaniijia Jesuucua tiujiaca nia quiyani, taa parta Pueyaso pueya panijiaca nia quiyajaaniuhuaj. ¹⁶ Cunora, pueyaracaanu cua secojosacari niaacuara, majaari cua tarinitianu quiquia Pueyaso cua sequenura “paacarasho”, maninia na muerasu nia quiniuucua. ¹⁷ Pa Jiyaniijia Jesucristo Queeri shacantushiqui quijia na cumaacajinlia. Janiyari niaacuara na secojoquiaani, nojuaja niquitionura niajaniya jiyocuacaanuji niishitiaja. Naacuaji nia naata niishiniu na niishitiniu panishano niajaniya, maninia nia niishiniuria nojuajuhuaj. ¹⁸ Janiyari niaacuara secojoquiaajaaniuhuaj, Pueyaso cuaara cuhuataara nioojia, maninia nia niishiniuria casaara Pueyaso saquiriojquiaari niajaniyani, casaa na miinitianiya niaarajaniuhuaj. Janiyari niaacuara secojoquiaajuhuaj, maninia nia niishiniuria taa Pueyaso muerasu jiyatesaanutaniya shacantuua quijiac nojori quiniuriani. ¹⁹ Janiyari secojoquiaajuhuaj, Pueyaso cuaara niishitiiria na cumaaca niajaniya, cuno, nioojiajinia poonijiyani. Na cumaacaari jiyanolhua, puequeyashijia. ²⁰ Pueyasocuajaari cuno na cumaaca poonitijoquiaari Cristo quetejinia, nojuaja jaara na samiitianiquiaariuhua macujiniji. Jaara na samiitianiquiaari, cuno na cumaacata na cajitiquiaariiri Jiyaniijiajanaa cajitiujinia na miaquetajara jiyocuacaanu. ²¹ Tii na cajitiquiaariiri puetunu tamasaca cumaacaraca quijiac Jiyaniijiajanaa na quiniuria. Majaari tamonu socua cumaacaraca quijia quiniu pa Jiyaniijiajiniji. Nojuajaari puetunu tamasaca jiyaniijianucuajanaa Jiyaniijia. Puetunu mijiria quijiac jiiitasanojuanaari na casaa. Nojuajaari puetunu casaajanaa camaru. Pueyaso jaara quiarinio jiya shipiniriohua, Jesucristoori jiyacari Jiyaniijiajanaa quiniutianiya juhuaj, taa quiarijia na quiyacuajani. ²² Naacuajitij, Pueyasoori puetunu na shipinishanojuanaa jiyatequiaari Jesucristo jiiitasocoriquiano. Naajuhuaj, Pueyasoori Jesucristo jiyatequiaari na saquiriojosano pueya jiitariquiano, canapuete nocua tiuuijacacuajani. ²³ Pueyaso saquiriojosano pueyari juhua Jesucristo cuaqueya. Nojuajaari juhua poojia saniniuujia, pa jiihana na quishacari. Puetunu Pueyaso saquiriojosano pueyajanaa jaara Cristo cuaqueyajinia rupuetesaare, Cristo cuaqueyari tucuateenutaniya seetanujuanaa maninia jeecanamitishano na quiniuria. Na cuaqueya pa quishacari, nojuajaari puetunu poojajinajanaa

quiya. Naajuhuaj, nojuajaari puetunu tiquiyocuajanaa quijajuhuana-jaj.

2

Panijia Pueyaso quiniuucua, nojuajaari pa jiyanoquaari

¹ Sesa mijiaca nia quiniuucua tarijia, Pueyaso tojiyashijiaca juhuaj, niaari macunucua quijia Pueyasora. ² Niaa jaara naa sesa mijiaca quiquiaaritij, niaari juhua puetunu mijiria quiniaas Pueyaso tojiyashijiaca jahanaa quiquiaari. Niaari samaruhaa jiyaniija tojijiaca quiquiaari, cuno, paratu piyarojosaqui quijiani. Nojuajaari Pueyaso tojiyashijiaca shiniujiujia, nojori miiniuria sesa, taa Sesaaca seque paniyacuajani. ³ Tarijia, puetunu pajaniyajanaari Pueyaso tojiyashijiaca quiquiaarini. Paari tama pa miiniu panishanojuaja mijiaca quiquiaarini. Naacuajitij, paari puetunu pa cuaqueya miiniu panishanojuanaa mijiaca quiquiaarini, puetunu sacuaraatia pa niishiriojosanojuhuaj. Naa sesa mijiaca pa quiniuucuatej, paari tojetaarucuajanaa jiyanojua Pueyaso saniitiosocoriquiano quiquiaari juucuani, juhua tamasaca-juhuaj. ⁴ Saniniuuja, Pueyasoori pocua taraajeja cutara. Jiyanojua pa paniquiaarii. ⁵ Cunora, macunucua pa quishacarijia nera, sesa mijiaca pa quiniuucua, nojuajaari Jesucristota pa cojiritiaquiaari samiitian-ijionu. Jiyanojootio Pueyaso quiniuucua, nojuajaari nia jiyanoquaari. ⁶ Naa na samiitianijionuucua pajaniya Cristoocua pa tiuuniuucuatej, Pueyasoori tari pa tacanijoquiaari Cristota jiyocuacaanu, tii Cristo ca-jitianura pajaniya. ⁷ ¡Naa Cristota na cojiritianuucua maninia miiniu pajaniyatej, cunoori jiyanojua maninia! Nojuajaari naa pa miiquiaaritij, puetunu quijacajanaa nio pa quishacari nuhuaji niishiniuria maatia, Pueyasoori jiyanojua pa panijia. Maatia niishishaanutaniyari Pueyasoori tojetaarucuajanaa jiyanojootio cutara, na jiyanooniuucua pajaniya, Neyanuucua pa tiuuniuucua. ⁸ Naa Pueyaso quiniuucua jiyanojootiotej, nojuajaari nia jiyanoquaari saaja Jesuucua nia tiuushacari. Majaari tama nia miishanotajaaja Pueyaso nia jiyanojotiu quiquiaari tama niajaniyajaaja. Pueyasujuanaacuajaari nia jiyanoquaari niaacua na taraajenuucua. Naajuhuaj, nojuacuajaari nia tiuutiquiaari Neyanuucua. ⁹ Majaari Pueyaso jiyanooni quiquiaari pajaniya, maninia mijiaca pa quiniuucua. Paa jaara maninia pa miiniuucua Pueyaso jiyanojotiquiaari tama pa cuaqueyajaajani, paa maara tama pa cuaqueyajaaja timitiareni juhua najuhuana pocuaja. ¹⁰ Shushajanaa Jesucristoocua pa tiuushacari, Pueyasoori jiyacari pa jataniquiaari quiarinio pueyano pa quiniuria, maninia mijiaca pa quiniuria. Nojuacuajaari tari naa niishiriojoquiaari, maninia mijiacara na jataniniuria pajaniya.

Jesucristoori pa jiyateja jiyanojootiojuacara

¹¹ Éfeso tiacajinia quiniae pueyanas, quiarijia nia niishiriojua taa nia quiquiaari tariucuacaanuni, Pueyaso muerasu nia quiyaquishacarijia. Niaari cuarta Judiocuaca soosano taucuaca quiquiaari, nia cararaatiu-quia co miatesoo quiyaquinuucua. Canaa cutaraari canaa cararaatiu-quia co miatesanoni. ¹² Nia niishirijiujuaj, naa nia quishacaritij, niaari Cristooju quiquiaari. Majaari nia naata rupuenu quijia Pueyaso

saquiriojosano Israel pueya. Puetunu Pueyaso sequencesanojuanaa Israel pueyaranoni, cunoori maja niaarano quiquiaari. Majaari nia niishiniu quiquiaari Pueyasoori pueyacuají Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuuniuria, Pueyaso na jiyanoottiniuria niajaniya. Niaari saaja taraatia shaajeriquiano quiquiaari. ¿Cantucua niaacua taraajereni? Niaari seetanujuanaa tojetaarucuajanaa Pueyasooju quiquiaari mijiria.¹³ Tarijia, niaari seetanujuanaa tucuacaanu quijiacu quiquiaari Pueyasojinji. Quiarijia saniniujuja, Jesucristo shootenuucua na nanaca niyacutesanojinia, niaari nata rupuetootesaquaari, nocua nia tiuushacari. Naacuajitij, niaari canaa rupuejacahuaj.¹⁴ Cristocuajaari pa jiyanoottiootequiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupuenura canaajuhuaj, taucuaca nia quiniuucua. Jesucristocuajaari cunora tama na cuaqueyajaaja tarinitiaquiaari na mosaanura pa niti, cuno jiyaconaja sohuaca niyartasaanura, pa juaaqiaca tajiyatenura. Naacuajitij, nojuajaari pa jiyatequiaari juhua niquiriyatu queecuajinio supueno pueya, Judiocuaca, niajaniya taucuacanio.¹⁵ Naa pa niti Jesucristo cusonuuucuatej, nojuajaari puetunu Moisés Rootasanojuanaa sanaajaquiaari, maja socua na sesacanura pajaniya. Tarijia, paari juhua caapiqui tiaca quiquiaarini. Paari pueyaracaanu paracaatiooju quijiani. Quiarijia saniniujuja, Jesucristo cusonuucua, nojuajaari pa jiyanoottiootequiaari jatiqui pa quiniuria juhua niquiriyatu tiaca, mariyata na rupuejaca pa quishacari.¹⁶ Naaratej, janiyari socua camiya nia sequenuni. Cristo cusonuucua niyacutesanojinia, nojuajaari Pueyaso jiyanoottiquiaari pajaniya, na panishano muerasu pa quiniuria puetunujuanaa, niajaniya taucuaca, canaajuhuaj. Naacuajitij, Jesucristoocua pa tiuushacari, paari juhua niquiriyatu tiaca nerani.

¹⁷ Niajaniya taucuacanaa, niaari juhua tucuacaanu quijiacu quiquiaari Pueyasojinji. Canaa cutaraari juhua cateca quijia nojuajinijini. Jesucristoori mijiria niquiaari, na niishitiniuria puetunu pajaniyajanaa taa Pueyaso jiyanooni paniya pajaniyani.¹⁸ Cristo jiyanoottiniucua na Que Pueyaso pajaniya, naacuajitij, pa naata pa Que Pueyaso rupuenu pa secojosacari nojuaja, mariyata na Sohuanuraca pa quishacari, niajaniya, canaajuhuaj.¹⁹ Jesuucua tiuuijaca nia quishacari quiarijia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinijinio rucoonaa. Quiarijiani, niaari seetanujuanaa Pueyaso pueya cutara. Pueyasoori maninia nia jiitiaejuhuaj, taa na jiitiaquia puetunu na saquiriojosano pueyacuanaa.²⁰ Pueyaso pueya nia quiniuucua, niaari rupuetesano puetunu Pueyaso muerasutajanaa, juhua shanohua tia pa quiniuria Pueyaso quiquiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiuijuniaa pueyani, nojoriiri juhua cuno tia pacaaarianaa. Saniniujuja, Jesucristoori juhua cuno tia morijuujiana cutara, cuno tia nujuatana.²¹ Pueyasoori naa saquiriojquia Neyanuucua tiuuriquiano pueya, na quiquiorano na tucuananura. Cuno tia tucuateesacari, tojetaarucuajanaa maninia jeenucuasano quiniutianiya pa Jiyaniijiaraari.²² Niaari naajuhuaj, Cristo nia rupuesacari, niarta Pueyaso pueya nia rupuesacarijuhuaj, Pueyasora,

niaari juhua rianaa, tucurunio. Nojuajaari nia morojotaquiaa na tia na tucuanura, na Sohuanu quiquierano.

3

Pabloori Pueyaso jiyaramiquishano taucuacaacua

¹ Jesucristojiniji cua pohuatanuucua niarta taucuaca, janiyari cunora nujuatesano quiya nujuatejojuajiniani. ² Niaa naasucuaari niishiy-acuaja Pueyasoori cua jiyaramiququiaari Jesucristojiniji cua pohuatanura taucuaca, jiyanoshano nojori quiniuriajuhau. ³ Tariucuacaanu, majaari pueya niishiniu quijia, Pueyasoori taucuaca jiyanooniutianiya-juhau, taa na jiyanooquiaacuaa Judiocuacani. Pueyasujuanaacuaajaari naa jiayosohuaja na miiniu panishano cua niishitiquiaaritij, taa shusha nio cua naajio coteejajinia cua pohuataa niajaniyacuajani. ⁴ Niaa jaara cua naajionee serojore, niaari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacuajitij, janiyari niishiyani taa jiyanohua maninia nia miishaanutaniyani nocua nia tiuushacari. ⁵ Tariucuacaanu, majaari quenaaja tamonu pueyano niishiniu quijia nio jiayosohuaja Pueyaso miiniu panishano. Quiari naataja saniniujia, Pueyasoori na jiyaramiquishano pueya niishitiquiaari cuno, jiayosohuaja na miiniu panishano taucuacani. Na sequenu panishano caminiuijunia pueya na niishitiquiaarijiaariuhuaj. Pueyaso Sohuanucuaajaari cuno canaa niishitiquiaari. ⁶ Niajaniya tau-cuacanaa, niocuajaari Pueyaso miiniu panishano jiayosohuaja niajaniya: Jesucristoocua nia tiuuniuucua, Pueyasoori puetunu Judiocuacarano na sequesanojuanaa jiyatenutaniya niaarajuhau. Canaari Judiocuacani. Naajaa, Jesucristoocua nia tiuuniuucua, Pueyasoori canaa rupuete-quia niajaniya, juhua niquiriyatu pueyano pa quiniuria nera. Naa-juhau, cunora, Pueyasoori nia niquitioquiaa na Sohuanujuhau, taa na sequequiaari Neyanu Jesucristoocua tiuuijacacuajani.

⁷ Janiyari Jesucristo ruuretaja quiquiaarini. Naajaa, jiyanohua cumaacaraca Pueyaso quiniuucua, nojuajaari cua jataniquiaari Neyanu Jesucristojiniji pohuatana cua quiniuria. ⁸ Jesucristo paraca cua quiniuucua tarrijia, janiyara, janiya cuaara socua rerequetesano pueyano qui-ria puetunu cuarta Pueyaso pueyajinijijanaa. Saniniujia, jiyanohua jiyanootio Pueyaso quiniuucua, nojuajaari cua jiyanooquiaari. Cua jiyatequiaarii seetanu rupaajanaa Neyanu Jesucristojiniji pohuatana cua quiniuria taucuacara. Janiyari cunora Pueyaso shuquiritaa jiyanohuani. Cristo jiitiasano pajaniyaranoni, puetunu cuno casaa-janaari pa niishishoojua. ⁹ Tariucuacaanu, Pueyasoori puetunu casaa-janaa shipiniquiaari. Na shipiniyaquishacarijia, Pueyasoori tari niishirijoquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishitiniu quiquiaari pueya. Nio pa quishacari saniniujia, nojuajaari cua seerataquiaari puetunu pueyajanaa cua niishitiniuria jiayosohuaja na miiniu panishano. ¹⁰ Pueyasoori tariucuacaanu pajaniyara na niishirijojosano racataquiaari pueyara-caanu tama na niishitajajinajaaja. Saniniujia, nio pa quishacarini, nojuajaari na niishitiquiaari. Quiarijani, jiyanohua maninia Pueyaso niishacari puetunu na saquirijojosano pueyajanaa, puetunu jiyocuacaanu cumaacaraca quijiacajanaari niishiya, Pueyasoori seetanujuanaa jiyanohua niishijia cutara. Naacuajitij, Pueyaso seya, Satanás,

samaruhuanio, nojoriiri tacuriitia shootiaquiaa pajaniya, Pueyaso miiniuucua maninia pajaniya, niishijia na quiniuucua. ¹¹ Quiari naataja, Pueyasoori tariucuacaanu na miishocoriquiano na niishiriosano tohuateequiaari pa Jiyaniijia Jesucristo cusosacari niyacutesanojinia. ¹² Naacuajitij, Jesucristoocua pa tiuuniucua, pa naata juhuajaniya rupuenu na Que Pueyaso pa puereyaquiniutia. ¹³ Naa Pueyaso miiniuucua pajaniyaratej, majaari nioojia nia niquijotenu Pueyasooocuajnia puerenuta naquiya cua miishacari. Naa naquiya cua miishacari Jesucristojiniji cua pohuatanuuucua niajaniyatej, shuquiriaatia nia quiri juhuari. Naa naquiya cua miishacaritij, cuno cuaara shiniujuuria niajaniya, socua pa Jiyaniijia tojijiaca nia quiniuria.

Pablo secojosano Éfeso tiacajinia quiniaa Pueyaso pueyacuara

¹⁴ Naa Pueyaso muerasu nia quiniuucuajuhuaj, janiyari mojoquetquiaani pa Que Pueyaso cua secojonura niaacuara. ¹⁵ Nojuacuajaari Que cutara. Puetunu queyajanaari na sesaatiaacuaja. Nojuajaari puetunu parta Pueyaso muerasujuanaa Que, mijiria quinia, tariucua jiyocuacaanu quinia Pueyaso muerasunio. ¹⁶ Naa nia Que na quiniuucuajuhuaj, janiyari niaacuara secojoquiaani, nojuaja cuaara cumaquiria jiyanoehua niajaniya na Sohuanuta nioojiajinia. Na Sohuanuuri puetunu pa panishanojuanaa jiitiana. ¹⁷ Naajuhuaj, niaacuara secojoquiaanija, seetanujuanaa nia niishiniuria Jesucristojuanaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria niajaniya, nocua tiuuijaca nia quishacari. Naacuajitij, niocua niishiri taa Jesucristo paniya jiyanoehua niajaniyani. Naacuajitij, majaari nioojia nia niquijotenu quiniutianiya socua. ¹⁸ Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo paniniuni. Naajuhuaj, niaari seetanujuanaa niishiniutianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetejore najuhuanani. Seetanujuanaa, majaari pa naata shanacujununoj. Paa jaara na jamatu, na tucuanee, na queroni, na jiyaconaja shanacujunu paniriquiani, majaari na puequeejia pa riuritanu quiniutianiya. ¹⁹ Seetanujuanaa, majaari pa naata niishiniu taa jiyanoehua na paniya pajaniyani. Naajaa, janiyari niaacuara secojoquiaa Pueyasoni, seetanujuanaa nioojiata nia niishiniuria cuno, na paniniuni. Niaa jaara na paniniu niishiri, Pueyasojuanaari nioojiajinia quiniutianiya. Naacuajitij, niaari tojetaarucuajanaa panijiaca quiniutianiya taa Pueyasocuaani.

²⁰ Naa Pueyaso miiniuucua maniniatej, nojuaja cuaara shuquiritasaaria. Naa jiyanoehua na cumaacata na poonijiosacari poojiajinatej, nojuajaari na naata miiniu socua jiyanoehua queraatia pa masesanojiniji nojuaja, pa niishiriosanojinijino. ²¹ Puetunu quijiacajanaa cuaara niishiuria Pueyasoori jiyanoehua maninia. Nojori cuaara naa niishiuria nojori niquishacari Pueyaso jatanishano na saquiriojosano pueya, Jesucristo miishanonio. ¡Cuaara naa shuquiritasaaria pueyaracaanutej!

¹ Janiyari niya nujuatesano quiyani pa Jiyaniijiajiniji cua poojotanucua. Cunora, cua tojitiare. Janiyari nia sequeyani, saaja pa Jiyaniijia tojijiaca nia quiri, seetanujuanaa maninia na muerasu nia quiniuria. Pueyasocuajaari nia saquiriojoquiaari naa maninia na muerasu nia quiniuria. ² Majaari niarta Pueyaso pueya rerequetejaca nia quiniu. Maninia miitoojuaca nia quiriquia. Puetunu casaajanaa rejeretajaca nia quirijuhuaj. Naa jiuujiaatioojuaca nia quiri nia panitioosacari. ³ Naa Pueyaso jiyanoootiootesacari niajaniyatej, pueyaracaanu nia jiyanoootioore, juhuajaniya nioojia quiniuria juhua rupuetootesano. Pueyaracaanu naa nia miiri Pueyaso Sohuanu cumaquishacari niajaniya. ⁴ Naa quijjiaca nia quiri pueyanaa, niquiriyatu cuaqueyaraca pa quishacari pa Jiyaniijiara, mariyata niquiriyatu Sohuanuraca pa quishacarijuhuaj. Naa Jesucristoocua tiuujjaca pa quishacaritij, Pueyasoori puetunu pajaniyajanaa rijionutaniya, pueyaracaanu na shuriucua pa quiniuria. ⁵ Puetunu pajaniyajanaari niquiriyatu Jiyaniijiarcani. Nojuajaari Jesucristo. Naajuhuaj, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhuaj, puetunu pajaniyajanaari moojinia tiuquinijiosaaquiaarini, Jesucristo pa jiyatesacari pa Jiyaniijiara. ⁶ Naajuhuaj, saa niquiriyatujua Pueyasoori quiya. Nojuajaari puetunu Neyanuucua tiuujiacajanaa Que. Nojuajaari puetunu na tojijiacajanaa Jiyaniijia. Nojuajaari puetunu na pueyajanaa poonijioteya na parishano nojori miiniuria. Puetunu na muerasu jiuujiaajanaari na quiquio.

⁷ Saniniujia pueyanaa, puetunu pajaniyacuajaari tari jiitiae tamaatia poonijiosano pa miiniuriani, teyano Cristo niquitionu paniquiaari pajaniyacuajani. Naacuajitij, puetunu pajaniyajanaari maja pa niishiniu miiniu saa niquiriyatu casaaja. ⁸ Tariucuacaanu Pueyaso Rupaa naajiotasanojiniji, paari niishiyani Pueyasoori na Sohuanu niquitionu paniquiaari na pueya. Cunora naa sequeya Jesucristojinijiiri:

“Na quioosano pueya tacataquiaariuhua jiyocuacaanuuri. Nareja na niquitionu parishano casaa serotaquiaari na pueyari”.

⁹ Jaara sequeya “tacaquiaariuhua”, cunojiniji paari niishiyani nojua jiyocuacaanuji rosequiaari coteenu, taraatia mijiria na mosaanura pocuara. ¹⁰ Nojuajani, jiyocuacaanuji rosequiaarini, nojuajaari tojetaarucuajanaa jiyocuacaanu tacaquiaariuhua, Jiyaniijiajanaa na quiniuria na Que shuriucua. Tacaquiaariiri puetunu jiya cajiniocuajanaa na mishininiuria na cumaacata, puetunu jiyajanaanio. Naacuajitij, nojuajaari puetunu tiquiyocuajanaa quijia. ¹¹ Nojuacuajaari noojiaqueya na saquiriojosano pueyajinjinio jiyatequiaari na jiyaramiquishano pueya nojori quiniuria. Saniniujia, tamasaca jiyatequiaariiri Pueyaso sequenu parishano caminiuijuniaa nojori quiniuria. Saniniujia, tamasaca jiyatequiaariiri Jesucristo niishiyashijiaca niquira poojotanaa nojori quiniuria, Pueyaso jiyanooniuria nojorijuhuaj, Jesucrua nojori tiuushacari. Tamasaca jiyatequiaariiri na tojitiajaca pueya jiitiana nojori quiniuria. Tamasaca jiyatequiaariiri na rupaa niishitiojona nojori quiniuria narta Pueyaso pueyara. ¹² Naacuajitij, Jesucristoori na Sohuanuta cumaquiquiaa cana na paniyani, puetunu tamaatia na miiniu parishanojuanaa nojori miiniuria. Naa na pueya cumaquiquiaa na Sohuanutaari na saquiriojosano pueya tiuuniuria nocua, nojori cumaquishaanurajuhuaj. Naa Jesucristoocua tiuu-

jiaca pueya canesacari socuatej, Jesucristo cuaqueyari canequiaa. ¹³ Jesucristora poonijionaa pueyari naa poonijioquiaatej, paa cuaara tojetaarucuajanaa pa Jiyaniijia tojijiaca quirijiaatijia, juhua rupuetootesano pa quiniuria. Cristo pueyari naa poonijioquiaa Pueyaso Sohuanu cumaacata, paa cuaara seetanujuanaa Pueyaso Niyanu niishijiaca quirijiaatijia. Naacuajitij, paari tojetaarucuajanaa jeenucuasano quiniutianiyani, seetanujuanaa juhua Jesucristo pa quiniuria. ¹⁴ Naacuajitij, majaari tari pa quiniu quiniutianiya juhua naatujua. Niaacuajaari niishiya naatujooriiri na niishiriojosano jatanijia ritia. Noojia niquijotejajaariuhuaj. Naa juhua tariucua cumueeca mashaja pa quishacaritij, majaari quenaaja tamasaca naata sapojonu quiniutianiya pajaniya, tamaatia nojori niishitiojosanota. Cuno pojori naa tamaatia niishitijonuujuaca tariucua pa niishishanojinijini, nojoriiri jiyanohua sapojonu niishijiaca, nojori tojitiajaca na tashuquiootenura Pueyasojiniji. ¹⁵ Nocuaji pueyanaa, Pueyaso Rupaata pa cumaquitioojore seetanujuanaa pa panitioonuta, Cristo rupuejaca pa quiniuria socua. Nojuacuajaari juhua poojia. ¹⁶ Pueyanaa, niaacuajaari niishiya, puetunu pa cuaqueyajiniacuma casaa pa jiitiasanojuanaari maninia rupuetootesano. Puetunu cunojuanaa jaara maninia poonijioquiaa jatiqui, paari maninia quiyani. Pueyaso muerasuuri juhua pa cuaqueya jiitiasano casaa. Naacuajitij, puetunu Pueyaso muerasujuanaa jaara tama na poonijiosanojuaja miquiaa maninia taa pa Jiyaniijia paniyacuajani, pa Jiyaniijia cuaqueyari maninia canenutaniya, jatiqui rupuetesano pa quishacari, seetanujuanaa panitoojuaca pa quiniuria.

Cristoocua tiuujiaacaari quiarinio pueya

¹⁷ Jesucristo jiyaramiquishano pueyano cua quiniuucua, cua tojiri pueyanaa. Pueyaso saquiriojosano pueya nia quishacari, maja socua nia quiniu taa Pueyaso niishiyashijiaca pueya quiyacuana. Nojoriiri najuhuana quijiaca, najuhuana nojori niishiriojonuuucua. Naajuhuaj, nojoriiri tama na panishanojuaja miijiaca, najuhuana casaacua nojori jiaatianuucua. ¹⁸ Nojoriiri naa quijiacatej, juhua ninishiqui nojori niishitija quiniuucua. Nojoriiri seetanujuanaa niishiyashijiaca, nojori tojinyaquinuucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muersura, pueyaracaanu shuquiriaatia quijiaca nojori quiniuria. ¹⁹ Naa pueyaracaanu sesa nojori miijionuucuatej, nojoriiri maja tari na niishiniu caririquiniu, sesa nojori miishacari. Nojoriiri puetunu tama na miiniu panishanojuaja miijiaca. Nojoriiri puetunu sacuaraatia casaajanaa miiniuucua jiyartucono. ²⁰ Niajaniya saniniuujia, majaari naa nia niishitijosaanu quiquiaari Cristojiniji, naa sacuaraatia miijiaca nia quiniuria. ²¹ Niaa jaara Jesujiniji tojiquiaari, niaacuajaari niishiquiaari na rupaari seetanu rupaajanaa cutara. Niaacuajaari na rupaajiniji niishitijosaquaiaari maninia miijiaca nia quiniuria, sesa nia miiniu nia tarinitianurajuhuaj. ²² Pueyanaa, pa toque mocua jaara mocuaatia jaanure, paari ritia na jocuajani. Naa nia jatarejuhua sacuaraatia miiniu nia niishishano. Sesa nia miiniu panishanoori tama nia sapojoquiaarijiaaja naa sesa miijiaca nia quiniuriatej. ²³ Quiarijia saniniuujia, sesa nia niishitija nia jatare, maninia niishitajaraca nia quiniuria, maninia jiuujiaracanio. ²⁴ Seetanujuanaa juhua quiarinio pueyano nia quiri, quiarinio jiuujiaraca, Pueyaso niquitiosano niajaniya. Naa quiarinio

jiuujiaraca nia quishacaritij, seetanujuanaa juhua Pueyaso pueya nia quiriquia, maninia miijiaca, tojetaarucuajanaa sesa miyashijiaca. Naa maninia nia quiniuni, cunoori seetanujuanaa Pueyaso Rupaa nia tojini-uucua.

²⁵ Naacuajitij pueyanaa, majaari socua cuaracashijionuujuaca nia quiniu. Pueyaso pueya pa quishacari, puetunu pajaniyajanaari juhua pa Jiyaniijia cuaqueyani. Cunora, puetunu nia sequencesanojuanaa niarta Pueyaso pueyano cuaara quiiria seetanujuanaa.

²⁶ Niaa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhuaj, nia jaara juaari, majaari nia juaaqiaca nia ninitianu. ²⁷ Ritia nia jeecatoore, Sesaaca mariqui sesa nia mitiriiri nia jiyanoyaquishacari.

²⁸ Nio nia tojirijuuhuaj. Cante nohuasejojua quiyajaani, cuaara tarinitiaara nohuasejonu. Saniniuujia cuaara poonijoora tama na numatucuatajaaja cutara. Naacuajitij, nojuaja na naata na jiitiasanojiniji nareja niquitionu tamasaca, cante na panishano jiitiaquiyani.

²⁹ Naajuhuaj pueyanaa, majaari sacuaraatia casaa nia pocuanu que-naaja. Majaari cararaatia nia puenujutoonujuhuaj. Saaja maninia pocuajaca nia quiri cutara. Naacuajitij, nia naata niarta Pueyaso pueya niishitiojonu. Nia naata nojori cumaquinu. Nia naata nojori nacasunujuhuaj. Naacuajitij, nia naata nojori shiniujiuniu saaja Pueyaso tojijiaca nojori quiniuria. ³⁰ Majaari sesa miijiaca nia quiniu, niaa mariqui nioojiajinia quijia Pueyaso Sohuanu taraajoreeri. Pueyasocuajaari juhua na sesa naajiotaquiaari poojaijinia na Sohuanuta. Naacuajitij, na rijionu juuca pajaniya, nojuajaari niishiniutianiya paari na saquiriojosano pueyani.

³¹ Pueyanaa, majaari jiyanoyashijia nia quiniu. Seetanujuanaa jiyanoojiaca nia quiri cutara. Majaari tamasaca shanacunu niaacua, na nasojonura niajaniya. Majaari nia juayonuujutanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia nia sesacanura nojuaja. Naacuajitij, puetunu juaaniujiana nia tarinitiare, puetunu sesa nia miiniujianaanio. ³² Saniniuujia, maninia miitioojuaca nia quiri. Taraajetoojuaca nia quirijuuhuaj. Naajuhuaj, jiyanootioojuaca nia quirijuuhuaj, taa Pueyaso jiyanooquiaari pajaniyacuaani, Neyanuucua pa tiuushacari.

5

Seetanujuanaa juhua Pueyaso pueya nia quiri

¹ Pueyanaa, niaacuajaari Pueyaso panishano muerasuniyojua. Cunora, pueyaracaanu juhua nojuaja nia quiniuria nia saniniujiuri.

² Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jiyanohua na paniniuucua pajaniya, nojuajaari tama na cuaqueyajaaja tarinitiaquiaari pa niti na mosaanura. Naa na miiniuucuatej, nojuajaari Pueyaso shuquiritiquiaari jiyanohua. Na miishanoori juhua shanohua jaanutaja quiquiaari Pueyasora.

³ Pueyaso pueya maanujinjinio nia quiniuucua, majaari nia camishoo maaji nia numuetucunu, maajishuriu, casaanio. Cunoori jiyanohua

sacuaraatia Pueyasora. Majaari quenaaja jiyano sacuaraatia casaa-jiniji nia pocoojonu. Naajuhuaj, majaari tamasaca jiitiasanoocua jiaatiajaca nia quiniu. ⁴ Majaari najuhuana sacuaraatia pocuajaca nia quiniujihuaj. Majaari najuhuana nia niti nia taquiriocuatenu juhua maninia pocuaja. Naajuhuaj, majaari sacuaraatia puenjunuu-juaca nia quiniu. Puetunu cuno sesa pocuanujuanaari sesa Pueyaso pueyara. Saniya nia pocoojore cutara Pueyaso miishanojiniji, socua pueya maniniuhuaqueetanura Pueyaso. ⁵ Niaacuajaari tari niishiya, cante juhuajaniya na camishoo maajipohua numuetucujujua, maa-jishuriuhuanio, nojoriiri jiyanoehua taraatia quiniutianiya. Pueyaso jiitiasano na tojijiaca pueyaranoni, majaari na quiniu quiniutianiya naa miijiaca pueyara. Naa taraatia miishaanutaniyaaruihua puetunu tamasaca jiitiasanoocua jiaatiajacajanaa. Pueyasora, jiyano pueyari jiyanoehua sesa, juhua juaashiquiata shipinijiosano pueyasohua seconuujuaca. ⁶ Naacuajitij pueyanaa, majaari nia shanacunu tamasaca sapojonura niajaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocuajaari juaatishaare. Tari saniitioya na tojiyashijiaca pueyari. ⁷ Cunora pueyanaa, majaari quenaaja naa sacuaraatia miijiaca nia cojiniu.

⁸ Pueyaso niishiyashijiaca nia quishacarijia tarijia pueyanaa, niaari ninishiqui quiijiaca quiquiaari. Quiarrijia saniniuujia, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quiijiaca nia quiniuria. Cunora, seetanujuanaa maninia miijiaca nia quiri, juhua cuhuashiqui quiijiaca. ⁹ Paa jaara seetanujuanaa cuhuashiqui quiijiaca quirini, paari maninia miijiaca quiniutianiyani. Naajuhuaj, paari tojetaarucuajanaa sesa miyashijiaca quiniutianiyani. Paari see-tanujuanaa Pueyaso Rupaa tojijiaca quiniutianiyahuaj. ¹⁰ Naajuhuaj pueyanaa, niaa cumaati niishiya, ¿puetunu nia miishanojuanaate pa Jiyaniijia maniniucuasano, maja soj? ¹¹ Majaari ninishiqui quiijiaca nia cojiniu, nojori jaara sesa miya. Saniya nojori nia nacasure juhuari. Maninia nia miishanojiniji, nojoriiri niishiniutianiya nojori miishanoori tojetaarucuajanaa sesa. ¹² Jiyasohua nojori miijiosano sacuaraatiaari tojetaarucuajanaa jiyanoehua cararaatia. Pohuataaquishoo. ¹³ Saniniuujia, pa nacasusacari nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. ¹⁴ Pueyaso Rupaacuajaari nojori jiuujia cuhuataquiaa na cumaacata, cuhuashiqui quijiacara nojori na jataniniuria. Cunora, naa naajiotasano quiyari tariucuacaanu Pueyaso Rupaajinija:

“¡Maqueyanonaa, quia niucuare! ¡Macunucua tajiniji quia sanere, Pueyaso Jiyarosano cuhuatanura quiajaniya!”

¹⁵ Naacuajitij cua panishano pueyanaa, tama nia cuaqueyajaja nia cojuare jiyanoehua, seetanujuanaa maninia miijiaca nia quiniuria. Majaari juhua niishiyashijiaca nia quiniu juhuajaniya. Seetanujuanaa niishijiaca nia quiri, maninia miijiaca nia quiniuria. ¹⁶ Nio pa quishacarini, sesa miiniuuri socua caneya puetunu juucajanaa. Majaari pa niishiniu taate tariqui quiriuftianiyani. Naaratej, jaara pa naata quiriquia maninia pa miiniuria, maninia pa miiri puetunu juucajanaa. ¹⁷ Majaari moseeca nia quiniu. Maninia nia niishiri casaa pa

Jiyaniijia paniya nia miiniuriani. ¹⁸ Naajuhuaj, majaari nia mashaasequejonuunu. Niaa jaara mashaaseca quiriquia, majaari nia rejetenu quiniutianiya sesa nia miiniu panishacari. Saniya Pueyaso Sohuanu nia shanacure niaacua cutara, nioojia na mishininiuria na cumaacata, seetanujuanaa cumaacaraca nia quiniuria, shuquiriaatia quijiaca nia quiniuriajuhuaj. ¹⁹ Naa Pueyaso Sohuanuraca nia quishacaritij, taricuacaanu Pueyaso Rupaajinia naajiotasanojiniji jaaquequejonu nia naminiuijutioore. Naajuhuaj, quiari naataja Pueyaso Sohuanu niishitiosano nia jaaquequejotoore. Nia jaaquequejosacari, pa Jiyaniijia nia shuquiritiare puetunu nioojatajanaa. ²⁰ Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuuijaca nia quiniuucua.

Taa quija pa quiyani Pueyaso tojija pa quishacari

²¹ Pueyanaa, maninia tojitioojuaca nia quiri, taa pa Jiyaniijia Cristo paniyacuajani. Nojuajaari pa Jiyaniijia cutara.

²² Maajipohuanaa, nia niyaca tojijiac nia quiri, taa pa tojiquiaa pa Jiyaniijiacuaani. ²³ Nia niyacaari juhua nioojia quiya niaara, taa Jesucristo quiya na saquiriojosano pueya jiuujiacuaani. Nojuajaari pocuaji Tacuna, juhua na cuaqueya pa quiniuucua nera. ²⁴ Naacuajitij, taa Jesucristo saquiriojosano pueya na tojitiajaca quiyacuaani, maajipohua cuaara naa pueyaracaanu neyacaa tojitiajaca quiiriajuhuaj.

²⁵ Canuunaa, nia niquiocohua nia paniri taa Jesucristo na saquiriosano pueyarano paniquiaaricuaa jiyanoahuani. Nojuajaari cunora tama na cuaqueyajaa tarinitiaquiaari na mosaanura. ²⁶ Nojuajaari naa miquiaariti seetanujuanaa nerano pa quiniuria. Tojetaarucuajanaa maninia pa quiniuria, nojuajaari poojia jeequequiaa na ruropaata, naatej, taa pa jeequequiaacuaa pa cuaqueyani. ²⁷ Paa jaara tojetaarucuajanaa tari jeequejosano quirini, pa Jiyaniijiajanaari pa tiuquinitianutaniya tama nocuajaaja, tariucua jatanishano shacantuucara. Jiyacaritij, paari tojetaarucuajanaa sesa miyashijia quiniutianiyan. Paari seetanujuanaa shanohua niquishano quiniutianiyan, juhua camishocoriquiano maniniushitishano niyacoo, tojetaarucuajanaa jiyanoahu cohuajaque toqueraca. ²⁸ Pueyanaa, taa nia paniyacuuaa tama nia cuaqueyajaa, naa nia paniri nia niquiocuajuhuaj. Cante necocua panijiani, nojuajaari juhua tama na cuaqueyajaa paniya. ²⁹ Majaari quenaaja tamonu pueyano quiniu tama na cuaqueya soojeajaaja. Paacuajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuaani. ³⁰ Puetunu na saquiriojosano pueyajanaari juhua na cuaqueya nera. Paacuajaari na cuaqueyajinijinioni. Naaratej, nojuajaari maninia pa cojuaquiaa. ³¹ Cunora naa naajiotasano quiyari tariucuacaanu Pueyaso Rupaajinia. Naa sequeyari:

“Pueyano jaara camiri, nojuaja cuaura shiri奎iria na que, na nucua shuriucuaji, necocuata na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

³² Pueyasojuanaacuajaari pa niishitijoquiaari, pueyanoori juhua niquiriyatu cuaqueyaraca quijia jaara camiri necocuara. Cunoori miriqui pa niishitiojiya, puetunu Pueyaso saquiriojosano pueya maanujuanaari juhua pa Jiyaniijia niquiorano quiya, juhua niquiriyatu cuaqueyaraca pa quiniuria nata. ³³ Pueyanaa, cunojuanaari cua

pohuatasano pa Jiyaniijia cuaqueyajiniji. Saniniujia, puetunu cuarta Pueyaso pueyanaa, nia niquiocua panijiaca nia quiri juhua tama nia cuaqueyajaaja. Naajuhuaj, puetunu maaajipohuajanaa cuaara neyaca tojijiaca quiiria.

6

¹ Muerasunaa, pa Jiyaniijia tojijiaca nia quishacari, nia queya tojijiaca nia quirijujuaj. Niaa jaara naa miiritij, cunoori jiyanoqua maninia Pueyasora. ² Tariucuacaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojijiaca nia quiri, nia nucuanio. ³ Naa nia miiritij, pueyara-caanu shuquiriaatia nia quiniuria, pueyaracaanu nia rishiniuria mijiria, niaa cuaara saaquieroshirijiaatijia”.

Nio rootasanoori coteenuujuanaa rootasano tee Pueyaso sequeyacuajani taa na tojitiajaca na miniutianiya maniniani.

⁴ Niajaniya saniniujia pueyanaa, majaari nia niquiohua nia juatijionu najuhuanaj. Nojori nia canashitijo maninia. Nia niishitijo maniniajujuaj. Nojori nia nacasurejuhuaj. Jaara nia tojitiaaquiri, na pishiniuria, nia majacuriquianoj nojori nia paniniutia, maja nia juaniutia. Naa nia miiritij taa pa Jiyaniijia paniyacuajani.

⁵ Niajaniya poonitijiosano pueyanaa, mijiria nia camaruhua tojitiajaca nia quiri. Majaari nojori nia rerequetenu. Puetunu nojori sequesanojuanaa niajaniya nia miiri nia puerenuta, niaa mariqui sanitiosaaerei nojori sequesano nia miyaquiniuuucua maninia. Nojori sequesano nia miiriquia maninia, juhua pa Jiyaniijia Jesucristora.

⁶ Majaari maninia nia poonijionu saaja nojori niquishacari niajaniya, nojori shuquiritianura niajaniya. Maninia nia poonijiore pueyaracaanu puetunu nioojiatajanaa, seetanujuanaa juhua Cristora. Niaa jaara naa maninia poonijionuujuaca quiriquiatej, niaari Pueyaso panishano miyajuhuaj. ⁷ Puetunu nia poonijiosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. ⁸ Niaacuajaari tari niishiya, pa Jiyaniijia Jesucristoori puetunu pajaniyajanaa niquitionutaniya maninia pa miiniuucua mijiria, poonijotesano pueya, camarnuuju pueyanio.

⁹ Niajaniyajuhuaj seja jiitjacanaa, nio sequesano nia tojiri. Maninia nia jiitiare nia poonitijiosano pueya. Majaari na miananajonu. Nia niishirijiujuaj, niaari mariyata niquiriyatu Jiyaniijiaraca, niajaniya, nojoriijujuaj. Nojuajaari jiyocuacaanu quijia. Naaratej, tamonu pueyanoori maja rimiajata nera, narta pueyanojiniji.

Taate pa naata Sesaaca nujuatanuni

¹⁰ Quiarijia cua panishano cuarta Pueyaso pueyanaa, seetanujuanaa pa Jiyaniijia rupuejaca nia quiri, jiyanoqua cumueeca nioojia quiniuria jiyanoqua na cumaacata. ¹¹ Puetunu Pueyaso niquitiosano casaajanaa nia cushiyore juhua toqueya, Sesaaca sapojinyaquiniuuucua niajaniya.

¹² Pueyaso pueya pa quishacari mijiria, majaari pa quiaquetoojonu quiquiaa pueyanota. Pa coopueeri maja pueya. Nojoriiri cumaacaraca quijiaci jiya cajiniocua. Sesaacaari cuno na samaruhua jiyate-quiaari jiyaniijianucua nojori quiniuria mijiria. Naacuajitij, nojoriiri cumaacaraca, ninishiqui quiijiaci pueya nojori jiitjanura. Nojoriiri Pueyaso paraajuhuaj. ¹³ Naaratej Pueyaso pueyanaa, puetunu Pueyaso

niquitiojosanojuanaa nia paracata nia miaquetoojotaqueya nia cushiyore. Naacuajitij, sesashiquiari niocua na nujuatare, Sesaaca saniniujushacari niajaniya. Niaa jaara naa nioojia jeenucuare juhuacarijia puetunu Pueyaso casaatajanaatej, niaari nia paraa nujuatajaca quiniutianiya.

¹⁴ Pueyanaa, niaacuajaari niishiya taa miaquetoojojuate pueyani. Na miaquetoonu panishacari, nojoriiri shoquejiniji casaa na cajiniocua morotaja. Na tutuconee cushiyonuujuuaari, puetunu na jiriquiajanaa na mishiquiojonura cashicuajji. Naajuhuaj, na sapatuhua cushiyonuujuajaariuhuaj. Na nareenee pootujuuaari, nocuaji na nujutajara cashi. Naajuhuaj, na naca na cojuatajara, cumoco casaa cushiyonuujuuaari. Na nijniaquetucuaja mueruu pootujuajaariuhuaj.

Pueyaso pueya pa quishacari saniniujija, tama nia cuaqueyajaaja nia jeenucuare Pueyaso casaata. Naacuajitij, seetanujuanaa Pueyaso Rupaa niishijiaca nia quiri maja nia sapojosaanura. Cunoori juhua pa cajiniocua camarucujua casaa saniniujija. Pueyaracaanu maninia miijiacaa nia quiri, nioojia nia cojuanura Sesaacaacuaji, nojuaja mariqui nia cararoreeri niaa jaara sesa miiri. Cunoori juhua nia tutuconee nia cushishano. ¹⁵ Pueyaracaanu jeenucuasano nia quiriquia juhua tariucua sapatu cushionio. Naa tariucua pueca nia quiriquia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanooni paniyajuhuaj. ¹⁶ Naajuhuaj, pueyaracaanu nia tiuuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. ¹⁷ Nia niishishacari niaacuajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niquipiotenura Pueyasooocuaji. Naajuhuaj, Pueyaso Rupaa nia niishiri maninia. Cunocuajaari Pueyaso Sohuanu nijiniquetucuaja mueruu, pueya jiuujiajinia na poonijionura. ¹⁸ Naajuhuaj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriquia pueyaracaanu, naajuhuaj, na Sohuanu niishitishacari niajaniya casaacuara nia secojonutaniyani. Majaari secojonu nia tarinitianu nia taajenuta. Juhua sutejaca pueyaracaanu nia secojonuuriquia puetunu niarta Pueyaso pueyacuarajanaa. ¹⁹ Naajuhuaj, cucuara nia secojonuure, Pueyaso niquisitionura janiya na niishitiaja, maninia cua pohuatanura Jesujiniji cua puereyaquinintia. Cucuara nia secojorejuhuaj, maatia cua niishitiniuria pueya, Pueyasoori puetunu pueyajanaa jiyanooni paniya saaja Jesucristoocua nojori tiuushacari. ²⁰ Pueyasoojuanaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niquiara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquinintia.

Pablo pohuatasano Tíquicojiniji

²¹ Pa panishano Tíquicocuajaari niaacua quianutaniya, puetunujuanaa na pohuatanura janiyajiniji, naajuhuaj, casaa cua miyani. Nojuacuajaari shamaatia poonijiojua pa Jiyaniijiara. ²² Janiyacuajaari cunora niaacua na jiyaroyani, nioojia nia cumanijianura canaajiniji nia tojishacari, taa canaa quiya niyani.

23 Pa Que Pueyaso, mariyata pa Jiyaniijia Jesucristota, nojori cuaara cuniqui quinia parta Pueyaso pueya jiuujia cajitiiria, juhuajaniya nia quiniuria. Nojori cuaara nia jiyateera panitoojuacarajuhuaj, see-tanujuanaa Jesucristoocua tiuujjaca nia quiniuriajuhuaj. ²⁴ Naajuhuaj, Pueyaso cuaara puetunu pa Jiyaniijia panijiacajanaa cumaquiiria na Sohuanuta, shuquiriaatia nojori quiniuria, cuno pojori, canapuete see-tanujuanaa Jesucristo panijiacacuajani.

PABLO NAAJIONEE FILIPO TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pablón. Janiyari Timoteota nia saruhuataani, Filipo tiacajinia quiniaa Pueyaso pueyanaa. Canaari Jesucristo poonitijiosano pueyajuhuaj. Canaari nio naajiyani puetunu Pueyaso jatanishano pueyacuarajanaa, nojori tiuuniuucua Neyanu Jesuucua. Canaari cuniqui nia jiitiana pueyacuara naajiyajuhuaj, nia cumaquiniaa pueyacuaranio. ¿Niaate maninia quiyajaa pueyanaa? ² Pa Que Pueyaso, pa Jiyaniijia Jesucristonio, nojori cuaara cumaquiiria niajaniya na Sohuanuta. Nojori cuaara cajitiiria nioojiajuhuaj.

Pablo secojosano, Filipo tiacajinia quiniaa Pueyaso pueyacuara

³ Pueyaracaanu cua niishiriojosacari niajaniya, janiyari pa Pueyaso sequequiaani "paacarasho", maninia na muerasu nia quiniuucua. ⁴ Cua secojosacari, janiyari pueyaracaanu puetunu niaacuarajanaa cua shuquiriniutia masequiaa Pueyasoni. ⁵ Niaa jaara shushajanaa Jesucristoocua tiuuquiaari, niaari jiyacari coteequiaari cua naacunura, Jesucristojiniji cua poojotanura tamaquicua. Quiarijiani, niaari naa cua naacuyajaaquij. Janiyari cunora nia timitiaani. ⁶ Majaari cua taacanuunu niaacuaji. Naatej, taa Pueyaso coteequiaari maninia na miiniuria nioojiajinaucuaani, nojuaajar nia nia jeenucuanu tucuanutanutaniya, Jesucristota pa naacuneetosacariuhua. ⁷ Majaari cua jiyajennu naa cua taacanuyaquishacari niaacuaji. Janiyacuajaari tarí naa niishiyani, jiyanohua cua paniniuucua niajaniya. Naajuhuaj, niaari cua cojiritasaaquiaa cumaaca niquitiosaanujuhuaj. Naacuajiti cua naata Jesucristojiniji pohuatanu niya nio nujuatejojuajin, naajuhuaj, janija jaara jiyanijianucua tacoji nequesoreesaaren. Naa Pueyaso cumaquisshacari janiyatej, cua naata Pueyaso Rupaacuaji tacunu na cuaracashitijiaca. Pueyaso Rupaacuajií nia tacusano maatia, nojori niishiniuria, Jesucristoocua nojori tiuushacari, Pueyasori na naata nojori jiyanooniujuhuaj. Naa nioojia rupuesacari coojiatej, cunoori jiyanohua cua shiniuijuquiaa Jesucristojiniji cua pohuatanura. ⁸ Pueyasocuajaari niishiya taa cua paniya jiyanohua niajaniyan, Jesucristo paniniu cua jiitiasacari coojiajinia. ⁹ Janiyari niaacuara sec-ojoquiaa Pueyasoni, socua niishijiac nia quiniuria, socua Pueyaso niishitija nia jiitianurajuhuaj, seetanujuanaa maninia panitoojuaca nia quiniuria. ¹⁰ Naacuajitij, niaari niishiniutiani teyano casaate seetanujuanaa maninia niaaran, saniniuujia, teyano casaate sesani. Naacuajitij, pa Jiyaniijia Cristo jaara tiuquiriohua, niaari seetanujuanaa maninia mijiac quiniutiani, tojetaarucuajanaa sesa miyashijica. ¹¹ Naacuajitij, puetunu maninia nia miishanojuanaa Jesucristo cumaquisshacari niajaniyan, cunoori juhua queraatia nia senoosano quiniutiani, Pueyaso shuquiritiasaanura. Naacuajitij, maninia nia miiniuucua, pueyari Pueyaso timitianutaniya.

Pablori saaja Jesucristora quiniu panija

¹² Cuarta Pueyaso pueyanaa, majaari cucua nia taraajenu nujuate-jojuajinia taraatia cua miishacari. Nio nia niishiri cutara: nujuate-jojuajinia nujuatesocoriquiano cua quiasaanuucua, naquiya cua miishacarijiuhuaj, cunoori seetanujuanaa pueya naacuya Jesucristojiniji tojishaanura socua. ¹³ Naacuajitij, puetunu jiyaniijia César tiajinia quiniaa soldadohuajanaari niishiya, janiyari cumayocua casaata morotasano quiya niyani, Jesucristojiniji cua pohuatanuuucua. Majaari saaja soldadohua niishiniu cuno, mariyata puetunu pueyajanaari na niishiyajuhuaj. ¹⁴ Parta Pueyaso pueyari namitia niishiyajuhuaj, janiyari cumayocua casaata morotasaarucuaani. Naacuajitij, cunoori quera puetunu nojorijiana shiniujiuriucuaa Jesucristojiniji nojori pohuatanura na puereyaquiniutia, pa Jiyaniijiaacua nojori tiuushacari socua.

¹⁵ Seetanujuanaa, noojiaqueya nojorijinijinoori Cristojiniji pohuatanuuquiaa socua tojishano pueya nojori quiniuria janiyajiniji, nojori shocotanura janiya. Janiyara, naajaa. Tamasaca saniniuujia, nojori cuitaraari seetanujuanaa Cristojiniji pohuatanuuquiaa nojori shuquiritiniuria Pueyaso. ¹⁶ Nojoriiri naa pohuatanuuquiaaquij, Jesucristo panijaca nojori quiniuucua. Nojoricuajaari niishiya, Pueyasojanaacuajaari niya cua niacanu, cua tacunura Jesucristo rupaacuaji. ¹⁷ Tamasacaari saniniuujia Jesucristojiniji pohuatanuuquiaacuja nojori shocotanu paniniutia janiya. Naa nojori miishacaritij, nojoriiri socua cua tacaa-tiniu paniya juucua. Majaari nojori pohuatanunu quiquiaa see-tanujuanaa nojori paniniutia pa Jiyaniijia Jesucristo. ¹⁸ Naa nojori pohuatanuusacari seetanujuanaa nojori paniyaquiniutia pa Jiyaniijiatej, naajaa. Nojoricuajaari Jesucristojiniji pohuatanuuquiaa. Janiyari cunora shuquiriaatia quiyani.

¹⁹ Socua shuquiriniutianiyanija cua niishishacari Pueyasoori puetunu cuno pojori miishanojuanaa jataniniutianiya quiria saa maniniaraja. Naa miiniutianiyari nia secojonuunuucua cucuara, naajuhuaj, Jesucristo Sohuanu cumaquiniiucua janiya. ²⁰ Naacuajitij, janiyacuajaari Pueyasooqua tiuyani, nojuaajaari cua cojuanutaniya maja cua cararoyaquishaanura janiya jaara nequesoreesaareni. Janiyari Pueyasooqua tiuyajaaniuhua na cumaquiniiuria janiya, cua puereyaquiniutia cua pohuatanura Jesucristojiniji puetunu pueya niquiarajanaa, taa cua miiquiaacuajani. Janiya jaara rishiriquiani, janiya jaara mosaariquiajuhuaj, naajaa, janiyari jiyanohua paniyani cua Jiyaniijia Jesucristo timitiasaanura. ²¹ Mijiria cua quishacarrijia, janiyari saaja Jesucristora quiyani. Saniniuujia, janiya jaara mosaareni, cunoori socua maninia janiyara, na shuriucua cua quianura, nata cua quiniuria shuquiriaatia. ²² Naajaa, janiya jaara mijiria rishiriquajani, cua naata socua poonijionu cua Jiyaniijiera. Naacuajitij, quiarrijia, majaari cua naata saquiriojonu; rishiniu, shaajenu soj. ²³ Naaratej, janiyari coojia niquijoteyajaani. Majaari cua niishiniu teyano cua saquiriojonutaniyani. Janiyara maara socua maninia quiria janiya jaara cusoqueeni, Cristo shuriucua cua quianura nata cua quiniuria. ²⁴ Saniniuujia, socua maniniaruhua mijiria cua rishiniuriaja, pa Jiyaniijiaacua cua shiniujiuniuria socua niajaniya. ²⁵ Naa cua niishiriojosacaritij, janiyacuajaari tarí seetanujuanaa niishiyaní, janiyari juhuanojuaja mijiria niaata rishiniutianiyaní. Naacuajitij, cua naata socua nia naacunu, socua pa Jiyaniijiaacua nia tiuuniuria.

Cua naata nia naacunujuhuaj, socua shuquiriaatia quiriac a nia quiniuria nocua nia tiuushacari. ²⁶ Naa cua rishishacari mijiriatej, janiyari niaacua quianutaniyani cua niquinuria niajaniya. Naa cua quishacariuhua niaatatej, niaari Jesucristo titimianutaniya maninia na miiniuucua janiya.

²⁷ Pueyaso pueyanaa, nio nia sequenu paniyanijia, seetanujuanaa maninia mijiaca nia quiri taa Jesucristo rootaacuajani. Janiya jaara niaacua quiaareni, janiya jaara quiaaquiyarejuhuaj, naajaa. Saaja niajaniyajiniji pohuatasariquiani, taa jiyanohua Jesucristo tojijiaca nia quiyajaani, jiyanohua panitoojuacajuhuaj. Naajuhuaj, jatiqui Jesucristora nia poonijoteriquiani, na rupaa nia pohuatanuu-cua. ²⁸ Naajuhuaj, Jesucristo Rupaa paraa puereyashijiacara nia jiyateriquiani. Nojori piriyojosacari niajaniya, majaari nojori puerenu quenaaja. Niaa jaara naa nojori puereyashijiaca quiritij, nojoriiri cuno-jiniji niishiniutaniya, nojoriiri seetanujuanaa saniitosocoriquiano taa nia pohuatanuuquiaa nojori niquieracuajani. Saniniujia, Pueyaso cajitishacari nioojia, nojori miananajosacari puecoonu niajaniya, niaari cunojiniji niishiniutaniya, niaaqui Pueyaso rijiosocoriquiano cutara. Pueyasocuajaari naa cumaquijia na pueyatej, puereyashijianucua nojori quiniuria. ²⁹ Pueyasocuajaari nia tiututiquiaari Neyanuucua, na muerasu nia quiniuria. Naajuhuaj, Neyanu rupuejaca nia quishacari quiarijia, Pueyasoori nia jiyatequiaari Neyanuucuara naquiya nia miitishaanurajuhuaj, taa Neyanu miiquiaari naquiya pocuaracuaani. ³⁰ Nia niishiri, janiya, niajaniyajuhuaj, paari mariyata naquiya miiniu rejeretaquiaani, pa Jiyanijiara pa poonijiosacari. Niaacuajaari tari niquiquiaari naquiya cua miiniu. Majaari cua tarinitianu quiquiaari Jesucristojiniji pohuatanu. Quiarijiani, niaari janiyajiniji tojiniutaniyajuhuaj, taa cua tarinitiaquia Jesucristojiniji pohuatanuni, naajaa naquiya cua miishacari.

2

Juhua Cristo pa quirij, taa na quiquiaaricuaani

¹ Naacuajitij pueyanaa, naquiya nia miishacari, nia niishiri taa Cristo shiniujuquiaa pueyaracaanu niajaniyani, maja nia tacaaniuria. Nia niishirijiujuhuaj taa na paniniu cumanijiaquiaa niajaniyani, naajuhuaj, taa Pueyaso Sohuanu jiuujiaatiootequiaa niajaniyani. Nia niishirijiujuhuaj taa Cristo taraajequiaa jiyanohua niaacuani. Naa panitoojuaca nia quirijiujuhuaj. ² Jiuujiaatioojuaca nia quirijiujuhuaj, seetanujuanaa panitoojuaca nia quishacari. Naajuhuaj, nareja nia shanacure Pueyaso Sohuanu niaacua, nojuaja cuaara puetunu niajaniyajanaa rupuiteera, jatiqui nia poonijionura pa Jiyanijiara. Niaa jaara naa puetunu nio cua seqesanojuanaa mijiacia quiritij, niaari tojetaarucuajanaa shuquiriaatia quirijara cua jiyatenutaniya. ³ Maninia nia miishacari, majaari na miiniu juhua tamasaca nia shocotanura, nia jiyanishacari niaa naasuccuari socua maninia mijiaca tamasacajiniji. Puetunu maninia nia miishanojuanaa nia miiri tamasaca nia rerequeteyaqueiniutia. Puetunu niarta Pueyaso pueyajanaa nia jiyatere juhua socua maninia mijiaca niajaniyajiniji. ⁴ Niaa jaara maninia mijiaca quiriquiacuua, majaari tama maninia mijiacaaja nia quiniu. Niarta Pueyaso pueyacua nia taraajerejuhuaj, maninia quiriac a nojori quiniuriajuhuaj.

5 Tama nia cuaqueyajaaja nia tarinitiare niarta pueyacua nia taraajesacari, taa Jesucristo tarinitiaquiaari tama na cuaqueyajaaja pocuaracuaani. 6 Nojuajaari naa miiquiaaritij: taricuacaanu, nojuacuajaari Pueyaso quijajuhuanajaj, juhua na Que. Naajaa, nojuajaari majaa na cuaqueya na jiyatenu quiquiaari seetanujuanaa juhua na Que Pueyaso na quiniuria. 7 Nojuajaari jiyanohua cumaacaraca Jiyaniijia na quiniu tarinitiaquiaari, juhua nareja poonijotesano pueyano na quiniuria. Naaratej, mijiria rasa aquiaarii seetanujuanaa pueyano na quiniuria. 8 Naa pueyano na quishacari mijiriatej, nojuajaari juhua nareja pueyanora tama na cuaqueyajaaja jiyatequiaari. Pueyaracaanu na Que tojija na quishacari, nojuajaari tama na cuaqueyajaaja tarinitiaquiaari na mosaanura. Seetanujuanaa cararaatia cusoquiaarii niyacutesanojinia teetesano, juhua sesa mijiia pueyano. 9 Naaratej, Pueyasoori seetanujuanaa Jiyaniijiarajanaa na jiyatequiaari puetunu jiyaniijianucuinijijanaa. Na sesojoquiaariajuhuaj “Jesu”. Nioori sequeya “pocuaji Tacuna”. Majaari socua tamonu pocuaji tacuna quiniu mijiria, jiyocuacaanunio. 10 Puetunu pueyajanaari niishiniutianiya Jesuuri Jiyaniijiajanaa. Maja tamonu. Cunora, nocuara mojoquetaconutaniyari puetunu jiyocuacaanu quiwijacajanaa, puetunu mijiria quiwijacajanaajuhuaj, puetunu jiya cariquimia quiwijacajanaanio. 11 Puetunu tamaatia rupaaca pocuajacajanaari niishiniutianiya Jesucristoori Jiyaniijiajanaa cutara. Naa Pueyaso miiniuucua Neyanutej, puetunu nojorijianaari niishiniutianiya, Pueyasoori tojetaarucuajanaa maninia mijiia.

Pueyaso pueyari juhua ninishiqui cuhuataja mijiria

12 Quiarijani cua panishano cuarta Pueyaso pueyanaa, cua rootasano tojitiajaca nia quiri. Naatej, taa pueyaracaanu cua tojitiajaca nia quiquiaaricuajani niaata cua quishacari, quiarijia socua cua tojitiajaca nia quiri, tucuacaanu cua quishacari niajaniyajiniji. Naacuajitij, seetanujuanaa pa Jiyaniijia tojitiajaca nia quiri nia niishiniuria niaari seetanujuanaa Pueyaso pueya. Majaari na rupaa ruretanu. Jiyanohua puereeta quiniutianiyyari na tojiyashijianucuara. 13 Pueyasujuanaacuajaari nioojajinina poonijioquiaa maninia nia miiniu paniniuria. Na cumaaca nia niquitioquiaajaariuhuaj maninia nia miiniuria nera nia panishano, taa na paniyacuajani.

14 Cunora, puetunu nera nia miishanojuanaa nia miiri shitimia, maja nia ririjiotanuta. Majaari nocua juayonuu jutanuhuaj. 15 Niaa jaara naa maninia mijiaca quiritij, majaari Pueyaso niishiyashijiac pueya naata quiniutianiya sesa na saquiriojotanura niaacuara. Naaratej, tojetaarucuajanaa sesa miyashijiaca Pueyaso niquiohua nia quiri, mijiria sesa mijiaca pueya niquiara. Nojoriiri seetanujuanaa sacuaraatia, Pueyaso tojiyashijiaca. Cuno juhua ninishiqui quiwijac pueya tajinia nia quishacari, niaari juhua riya nojoriria, naatej, taa riya cuhuataquiaa ninishiquicuaani. 16 Pa samiitianijia rupaa Jesucristojiniji nia jiitiasanon, niaari cunota cuhuataquiaa mijiria quiniae. Naa maninia Pueyaso pueya nia quiniuucuatej, Cristo jaara tiuquiriohua na rijionuhuara pajaniya, janiyari jiyanohua nia timitianutaniyani. Janiyari naa nia timitianutaniya cua niishishacari puetunu cua poonijiosanojuanaari maja najuhuana na quiniu quiquiaari. Naajuhuaj, majaari najuhuana naquiya cua miiniu quiquiaarijuhuaj. 17 Niaacuajari

maninia miijiacu Pueyasocua tiuujiaca nia quiniuucua, Jesucristojiniji cua pohuatanuucua niajaniya. Cuno maninia nia miishanoni, cunoori juhua shanohua jaanutaja Pueyasora. Janiya jaara nacatasare Je-sucristojiniji cua pohuatanuucua niajaniyani, cua nanacaari shoonutanuya juhua Pueyasora niquistiosocoriquiano. Janiya jaara naa miishaareni, janiyari cua nanacata tucuanutaniya puetunu cua miis-hanojuanaa Pueyasorani. Janiya jaara naa miishaareni, janiyari see-tanujuanaa shuquiriaatia quiniutianiyan. Janiyari puetunu niajaniyat�anaa jiyanohua timiniutianiyan. ¹⁸ Shuquiriaatia nia quirijuhuaj, janiyari jaara mosaareni, cua Jiyaniijia tojija cua quiniuucua. Cua coji-tiuri shuquiriniujuhuaj.

Pablo pohuatasano Timoteojiniji, Epafroditojinijinio

¹⁹ Janiyari niaacuaji tojinii paniyani taa nia quiyani, shuquiriaatia cua quiniuriajuhuaj janiya jaara niaacuaji tojirini. Janiyari cunora Timoteo jiaronutaniya niaacuani. Naacuajitij, cuniquipi na tacatesacariuhua, nojuajacua cua pohuatasuhua niajaniyajiniji saniniuujia. Janiyari cua Jiyaniijia Jesucua tiuyani na rishitiniuria janiya, nia-janiyajiniji cua tojiniuria. ²⁰ Janiyari Timoteo jiaronutaniya niaacuani. Saa nojuaja cutaraari seetanujuanaa niaacua tacaajia juhua janiyajuhuaj, na naacunura niajaniya, maninia nia quiniuria. ²¹ Tamasacaari saniniuujia saaja tama nojori panishano casaacuajaaja tacaajiaca, maja Jesucristo casaacua. ²² Niaacuajaari tari na niishiya, taamuecate Timoteoni. Nojuajaari pueyaracaanu cuata poonijioquia juhua quiyanu, Jesucristojiniji mariyata canaa pohuatanura. ²³ Janiya jaara niishirini taa cua miishaanutaniyani, janiyari Timoteo jiaronutaniya ritia niaacuani. ²⁴ Naajaa, janiyacuajaari cua Jiyaniijiaacua tiuyani cua carte-saanura niiquipi, niaacua cua quianura ritiajuhuaj.

²⁵ Cua sashishacari Timoteo cua jiaronura niaacua, maniniacuajaruha ritia cua jiaronura niaacua Epafrodit, parta Pueyaso pueyano. Niaacuajaari nojuaja jiayotaquiaari cumaneeca quiriano, nojuaja cumaquinuria janiyajuhuaj. Nojuajaari maninia cua naacuquiaa. Cuata miiquiaa naquiya jaarajaarijia Jesucristojiniji cua pohuatanura. ²⁶ Nojuajaari puetunu niajaniyajanaa niquinuucua jiaatiaa. Na niishishacari niaari jiyanohua nocua tacaaquioya nia niishiniuucua nojuaja cusosu quiqianu, cunora, nojuajaari ritia nia niquinuria tacaya. ²⁷ Seetanujuanaa nojuajaari cusosu quiqianu. Quera cusocanujuanaari. Pueyaso cutaraari nocua taraajecanu. Cucua taraajecanujaariuhuaj, maja cua taraajenu jiyacatenura socua. ²⁸ Janiyari cunora ritia niaacua na jiayoyani, nia shuquiriniuria nia niquisshacari nojuaja niaacua tiuquihuano. Naa shuquiriaatia nia quishacariuhuatej, janiyari coojia cajitiniutianiyya acuhuaj. ²⁹ Niarta Pueyaso pueyano na quiniuucua, seetanujuanaa juhua nia tarajanu nia timitiarenoj, niaacua na tiuquishacariuhua. Puetunu jiyanoo pojori pa Jiyaniijiaara poonijionuujuacatej taa Epafroditocuaani. ³⁰ Nojuacuajaari quera shaajeyarucuaa Cristora na poonijiosacari. Cocuaatia miijiocanujaariuhuaj. Nojuajaari tama na cuaqueyajaaja tarinitiacanu, na naacunura janiya nia niti. Tucuacaanu nia quiniuucua janiyajiniji, majaari nia naata naacunu janiya.

3

Nio rootasano tojijiaca pa quiri cutara

¹ Quiarijia saniniujia, cuarta Pueyaso pueyanaa, pa Jiyaniijia nia shuquiritiare, pocuaji Tacuna na quiniuucua. Janiyara, maja taajeta cua pacutenuhuara socua cua sequenura niajaniya tari cua sequenceso niajaniya. Cunoori seetanujuanaa maninia niaara. ² Tama nia cuaqueyajaaja nia cojuare cuno sacuaraatia niishitiojonuujuaca pueyacuaji, cuno pojoriicuaji, sesa miijiacani. Nojoriiri pueya cararaatiuquia co miatejonuujuaca najuhuanaj, nojori jiyanishacari nojori mitesano pueyari seetanujuanaa Pueyaso pueya. ³ Paa cutaraari seetanujuanaa Pueyaso pueyani, Pueyaso Sohuanu jiyatenuucua pajaniya Pueyaso tojijiaca pa quiniuria. Paari timiquiaajaaniuhuaj Jesucristo rupuesano pa quishacari. Taa pa cararaatiuquia casaa quiyani, naajaa. Jesucristoocua pa tiuushacari, paari seetanujuanaa Pueyaso pueyani. ⁴ Tamasaca jaara tama na cuaqueyajaaja jiyaniya nojuaja seetanujuanaa Pueyaso pueyano, maninia Judio pueyano na quiniuucua, janiya cutaraari nojori shocotaani. Janiyari tari naa jiyaniquiaar-ijiuuhuaj. ⁵ Naatej, janiya jaara rasaaquiaarini, ocho juuca jaara cua shocoquiaarini, cua cararaatiuquia coori mitesaaquiaari. Janiyari naa miishaaquiaarini taa canaa rootasaaquiaari Moisés Rootasanojini-jicuajani, seetanujuanaa Judio pueyano cua quiniuria. Naajuhuaj, janiyari Israel pueyanoni, cua supuetana Benjamín jinianuucuajinio supueno pueyano. Na queeri quiquiaari Jacobo, Pueyaso saquiriojosano pueyano. Naa cua supuetanaa quiniuucua Pueyaso saquiriojosano pueyatej, janiyari naajuhuaj, nojoriicuajinio cua supuenuucua. Naajuhuaj, janiyari Hebreo rupaa pocuajani taa cua supuetanaacuaani. Cua que, cua nucuaari mariyata Hebreo rupaa pocuajaca quiquiaar-ijiuuhuaj. Mashaja cua quishacari, janiyari Fariseo pueyanora quiquiaarini. Cuarta Fariseocuacaari socua jiyanolhua supuetana Moisés Rootasano tojijiaca puetunu cuarta Judiocuacajinijiniojuanaa. ⁶ Jiyacaritij, janiyari cua niishitiojonaa tojijia quiquiaari jiyanolhuani. Majaari cua taajenu quiquiaari nojori sequenceso cua miiniuria. Naaratej, janiyari Jesucristo tojitiacuacuaria miijia naquiyani, cua jiyanishacari nojori naasucuaari Pueyaso paraa. Naajuhuaj, maninia cua tojiniuucua Moisés Rootasano, janiyari sesacasoo quiquiaarini Moisés Rootasano niishitiojonaara. ⁷ Puetunu nio cua sequencesojuanaani, janiyari jiyanolhua na timitiaquiaarini cua jiyanishacari janiya naasucuaari naa seetanujuanaa Pueyaso pueyanoni. Quiarijia saniniujia, Jesucristoocua cua tiuushacari, tarijia cua jiyanishano maninia casaani, puetunu cuno casaajanaari quiarijia najuhuana janiyara. ⁸ Quiarijiani, janiyari socua cua Jiyaniijia Jesucristo niishiniuria jiaatiaa jiyanolhuani. Naaratej, puetunu tariucuacaanu cua timitiasano casaajanaari najuhuana janiyara quiarijia. Cristo pueyano cua quiniuucua, janiyari juhua taanuuusaquiaari puetunu cuarta Judiocuacajinijijianaani. Naa Cristo tojijiara cua quiniuucuatej, cua shipininiojiniji cua casaarano maseyaquiquiaarinijia. Naajaa, puetunu cuno casaajanaari juhua rucucua quiya janiyara. Janiyari seetanujuanaa saaja cua Jiyaniijia Jesucristo niishiniuri paniya socuani, nata rupuetootesano cua quiniuria seetanujuanaa. ⁹ Majaari cua jiyaniniu janiya sesa miyashijiani, Moisés Rootasano cua tojiniuucua. Saniniujia, Jesucristoocua cua tiuushacari, Pueyasoori puetunu

sesa cua miishanojuanaa tuujuquiaa. Cua niishishacari Jesucristoori mosaaquiaari cua niti, Pueyasoori cua jiyanoquaari, maja na sesacanura janiya, Neyanuucua cua tiuuniuucua.¹⁰ Janiyari Jesucristo niishiniu paniya jiyanoqua socuani, seetanujuanaa nata rupuetootesano cua quiniuria. Janiyari na samiitianitaja cumaaca paniyajaanihuaj, coojajinna na poonijionura, seetanujuanaa quiarinio pueyanora cua jatanishaanura juhua Cristora. Nojuajaari jiyanoqua taraatia miishaquaaria mijiria na quishacari, na Que tojija na quiniuucua. Janiya cuaara naa miishaariajuhuaj cua tojiniuucua nojuaja, juhua nojuaja cua quiniuria. Tama nojuajaarija na cuaqueya tarinitiaquiaari na mosaanura. Naajuhuaj, tama janiyaajaarija cua cuaqueya tarinitiaja quiniu paniyani, cua miiniuria puetunu cua Jiyaniijia sequesanojuanaa janiya.¹¹ Janiyari tojetaarucuajanaa maninia mijiia quiniuucua jiaatiaquiaani, juhua quiarinio pueyanor cua quiniuria, juhua tariucua macujinjinio samiitianishano pueyanor.

Maninia pueya pa quirij, Pueyaso muerasu pa quishacari

¹² Juhuanajuaja majaari cua quiniu tojetaarucuajanaa maninia mijiia. Sesa miiniu niishiyajaanijia. Jeecasoojuaanijia. Naajaa, majaari cua tacaaniu. Jesucristocuajaari cua jiyatequiaari na pueyanor cua quiniuria. Naaratej, janiyari jiyanoqua saniniujiuquiaani maninia na pueyanor cua quiniuria.¹³ Cua panishano cuarta Pueyaso muerasunaa, janiyari niishiyacuajani, juhuanojuaja maja maninia cua quiniu taa cua Jiyaniijia quiyacuana. Naajaa, majaari cua tarininiu. Janiyari juhua ritia netena miiquiaani na shocotanura narta netecuatunaa pueya. Maninia netenaari na nijiniara niquiyashijia. Naajuhuaj, majaari cua niishiriojonu maninia cua miishano tariucuacuua. Janiyari saaja cua tacoji niquiquiaani, socua maninia mijiia cua quiniuria tari cua quiniujinji.¹⁴ Pueya tacuarishijiosacari, netena jaara narta netecuatunaa shocotare, nojuajaari shanohua casaa niquitiosaaquiaa. Majaari naajuhuana na netenu jiyanoqua. Janiyaraari naajuhuaj. Majaari naajuhuana jiyanoqua cua saniniujiuniu quiquia, maninia cua quiniuria juhua Cristojuhuaj. Mijiria cua quiniu cua tucuatasacari, Pueyasoori cua jataniniutiani juhua Cristo cua quiniuria, Cristoocua tiuujia cua quiniuucua.

¹⁵ Pueyanaa, niajaniya, cante seetanujuanaa Pueyaso tojijiaca quiyani, mariyata naa nia niishiriojore taa cua niishiriojiyacuana. Naatej, jiyanoqua nia saniniujiuri juhua Cristo nia quiniuriajuhuaj. Cante tama na cuaqueyajaaja jiyaniya nojuaja tariucua tojetaarucuajanaa sesa miyashijiani, Pueyaso cuaara na niishitiiria maninia.¹⁶ Paa jaara maninia miiniu niishijiac quirini, majaari pa jiyacatenu saaja sesa miiniuucua. Saniya maninia mijiacara pa quiri socua.

¹⁷ Cuarta Pueyaso pueyanaa, maninia mijiacara nia quiri taa canaa nia niquiquiaari maninia miyanocuana. Naajuhuaj, maninia mijiacara nia niquiri, cante maninia miiquiaani taa canaa niishitiquiaari niajaniyacuajani, maninia canaa miishacari. Nojorijiniji nia niishiriquia, maninia nia miiniuriajuhuaj.¹⁸ Jesucristocuajaari pocuara cusоquiaari niyacutesanojinia teetesano, maninia mijiacara pa jatanishaanura. Saniniuujia, queraatia pueyari juhuajaniya miiquiaa sesa. Janiyacuajaari nojorijiniji pohuatanu pacutejoquiaari niajaniyani, maja juhua

nojori nia quiniuria. Quiarijia cua nujuquenuta, janiyari nia pohuatarohuanuhua jiyano sesa miijiacajiniji. Nojoriiri pa Jiyaniijia cusionu soojeaca. Nojoriiri maja na paniniu naquiya na miishaanura Cristo toji-jaca nojori quiniuucua.¹⁹ Nojoriiri puetunu quejoosaanutaniyajanaa mani quiqiojinia. Nojoriiri tama nojori panishanojuaaja jiyatecanu juhua nojori pueyasora. Naa sesa miijiac nojori quishacaritij, majaari nojori niishiniu caririquiu. Saaja sesa na miitiushano timitiatiuyari. Nojoriiri saaja mijiria casaacua jiaatiajaca.²⁰ Pajaniya saniniuuja, paa cutaraari tari jiyatesaaquiaari jiyocuacaanu quiijacaranoni. Paari cuniquiji pocuaji Tacuna niniuria sashiyani. Nojuacuajaari pa Jiyaniijia Jesucristo.²¹ Jiyanoqua na cumaacata, nojuajaari pa cuaqueya seque jataniniutianiya, shacantuua quijia pa quiniuria juhua na cuaqueya-juhuaj. Nojuajaari cumaacaraca puetunu casaajanaa na tojitiniuria nojuaja. Naacuajitij, nojuajaari na naata moqueja pa cuaqueya jataniniu, pueyaracaanu rishijacarano pa quiniuria.

4

Pueyaracaanu pa Jiyaniijia pa shuquiritiare

¹ Cunora, cua panishano cuarta Pueyaso pueyanaa, pueyaracaanu pa Jiyaniijia tojijiaca nia quiri. Janiyari jiyanoqua nia niquinuucua jiaatiaani. Nia niquiara cua pohuatanujuanca Pueyaso rupaa, niaaquiiri seetanujuanaa na tojijiaca quiquiaari. Naa jiyanoqua maninia Pueyaso muerasu nia quiniuucuatej, cunoori jiyanoqua cua timitiquiaa.

² Janiyari Evodia sequeya cutarani, narta maaji Síntiquenio, nojori cuaara jiyanoootioora juhua seetanujuanaa Pueyasoocua tiuujjaca maa-jipohua.³ Quiajaniya saniniujjia Sicigona, quiaacuajaari cuata poonijiojua jaarajaaja. Cunora, janiyari quia sequenu paniyani, cuno maa-jipohua quia jiyanoootiooterohua, nojori rupuetoonuhuara. Cuno maa-jipohuacuajaari jaarajaaja cuata poonijionuuquiaari, Clementejuhuaj, pa Jiyaniijiajiniji cua pohuatasacari. Naa cuata poonijionuuquiaari-jiaariuhua tamasaca, canapuete cuata quiquiaaricuajani. Nojori sesacacuajaari tari naajiotasano quiya Pueyaso nequesoreetuneejinia, tee cuniqui pueyaracaanu rishijacarano sesaca naajiotasano quiyacuajani.

⁴ Cua panishano pueyanaa, pueyaracaanu pa Jiyaniijia nia timitiare. Nia sequerohuacuaraj, pueyaracaanu nia timiri.⁵ Puetunu pueyajanaa cuaara niishiria niaari seetanujuanaa maninia pueya, maja juajaci. Pa Jiyaniijiacuajaari quera tiuquiuhua.

⁶ Majaari quenaaja nia tacaaniu. Saniniujjia, nia tacaashacari, Pueyaso nia pohuatare puetunujuanaa, nia secojosacari nojuaja. Nia secojosacari, nojuaja nia masere nia panishano. Jiyacaritij, nojuaja nia sequererejuhuaj “paacarasho”.⁷ Naa nia miishacaritij, Pueyasoocu nioojia cajitiniutianiya. Naa Pueyaso cajitiniuucua nioojiatej, majaari socua nioojjaca tacaaniu quiniutianiya, nia niishitiajanio. Naacuajitij, niocua juhuajaniya panaatia quiri Jesucristo cojishano nia quiniuucua. Naa Pueyaso miishano pajaniyani, cunoori jiyanoqua jiyajeneta. Nocuaji jiuuijatesano.

Saaja maninia casaacua niishiriojojuaca nia quiriquia

⁸ Naajuhua cuarta Pueyaso pueyanaa, nio tojijiaca nia quiriji-uhuaj. Pueyaracaanu saaja seetanujuanaa rupaacua niishiriojojuaca

nia quiriquia. Naajuhuaj, saaja rerequeteyaquishoo casaacua nia niishiriojore. Saaja maninia casaacua niishiriojonuujuaca nia quiri, majaa cararaatia casaacua. Naajuhuaj, saaja Pueyaso shuquiritiasano casaacua nia niishiriojore, majaa Pueyaso sesacasano casaacua. Naacuajitij, puetunu maninia casaacuajanaa nia niishiriojore, casaajinijiti pueya naata Pueyaso shuquiritianuni.

⁹ Maninia nia miiriquia pueyaracaanu, taa cua niishitiojoquiaari niajaniyacuajani. Niaacuajaari cua rootasano tojiquiaari. Naajuhuaj, niaacuajaari cua niquijia taa miijia cua quiquiaarini. Niaa jaara naa miijiaca quirijuhuaj, poojia cajitinia Pueyasoori niaata quiniutianiyanjuhuj.

Pablo pohuatasano, Filipo tiacajinia quiniaa Pueyaso pueya jiyaronu-ucua cumaneeca nera

¹⁰ Janiyari jiyanoehua cua Jiyaniijia timitiaani juhua shusha nia niishiniuuquiohua janiya, cucua nia jiyaronuucua nia reratesano cumaneeca. Naa cua sequencesacari niajaniyatej, majaaari nia jiyaniiju janiya nia sequeyani niaari cua niyajetacanu. Maja. Janiyacuajaari niishiyani, majaaari tarijia nia naata cua naacunu quijia nia cumaneecata, nia juuretasacari niaatucua canta cucua na jiyaroriquiani. ¹¹ Majaari naa cua sequenu niajaniyatej cua panishano cua jiitiaequiviuucua. Maja. Janiyacuajaari tari jiyartuunoni, juhuajaniya cua quiniuria cua jiitisasanoniyoluata. ¹² Naajuhuaj, janiyari niishiyani juhuajaniya cua quiniuria cua panishano cua jiitiaequivishacari. Naajuhuaj, janiyari niishiyani taa quishanote puetunu cua panishanojuanaa cua jiitiasacari. Janiyari tariucua saniniujiushanoni puetunu casaajanaa cua rejeretanura. Juhuajaniya quiniu niishiyani cua miajaaraca cua quishacari, miaajeeju cua quishacarijuhuaj. Cua naata juhuajaniya quiniu casamijiu cua quishacarijuhuaj, majaa saaja casamiriaca cua quishacari. ¹³ Cua naata rejeretanu puetunujuanaa, Cristo cumaquequivishacari janiya. ¹⁴ Naajaa, niaari maninia miiriucuua nia cumaneeca nia jiyarosacari cucua, naquiya cua miishacari nya. Niaari niarta pueyanoocua tarajeje cutara.

¹⁵ Naajuhuaj, Macedonia jiyajiniji cua quiasacari nia shuriucuaji Filipo tiacajiniji, tamonu jiyacajinia cua pohuatanura Pueyaso rupaa, saaja niajaniya cutaraari cucua jiyanoquaari. Cunoori quiquiaari shushajanaa Jesucristoocua tiuuijaca nia quishacari. Jiyacaritij, niaari nia reratesano cumaneeca jiyaroquaari cucua, shuquiriaatia nia quishacari cua pohuatanuucua nia niquiara Jesucristojiniji. ¹⁶ Juhuanojuaja nia Macedonia jiyajinija cua quishacarijia, Tesalónica tiacajinia, niaari cucua pacutejoquaari jiyaronu nia cumaneeca, cua panishano cua masetajara. ¹⁷ Majaari saaja cua paniniu pueyaracaanu nia niquitiojonura nia cumaneecajiniji janiya. Janiya cutaraari nia panitiaani capora pueya nia quiniuria. Naacuajitij, Pueyasoori saniniuji socua queraatia nia niquitionutaniyacujua. ¹⁸ Epafroditocuajaari puetunu nia jiyarosano cumaneecajanaa cucua tiuquitiaeecuua. Janiyari cunota puetunu cua panishanojuanaa maserucuua tarini. Cureyajaari nia jiyarosano cumaneecajiniji. Cuno cumaneeca cucua nia jiyarosanoni, cunoori juhua Pueyasora niquitiosano casaa. Nera, cunoori juhua shanoehua jaanutaja catijiasano nocuara. Na shuquiritiri. ¹⁹ Naaratej, cua Jiyaniijia Pueyasoori puetunu nia jiitiaequivishoo casaajanaa nia niquitionutaniya.

¿Pueyasoteeri casamijiu? ¡Maj! Nia rupuesacari Neyanu Jesucristo, puetunu na jiiitasanojuanaari niaaranojuhuaj. ²⁰ ¡Pa Que Pueyasoori jiyanohua maninia! Saaja nojuaja pa shuquiritiare pueyaracaanu. Cuaara naa quiiriatej.

Nata quiniaata Pablo saruhuatasacari narta Pueyaso pueya

²¹ Quiria nia saruhuatate puetunu Jesucristo jiyanoshano pueyajanaa. Niya cuata quiniaa Pueyaso pueyari nia saruhuataajuhuaj. ²² Naajuhuaj, Jesucristoocua tiuuijaca jiyanijia Césarra poonijionaa pueyari nia saruhuataajaacuhuaj, puetunu niya Jesucristoocua tiuuijacijaanaio.

²³ Pa Jiyanijia Jesucristo cuaara cumaquiiria puetunu nioojajanaa. Tariucuaja pueyanaa.

PABLO NAAJIONEE COLOSA TIACAJINIA QUINIAA PUEYASO PUEYACUARA

Pablo Colosa tiacajinia Pueyaso pueya maanuucuara naajioquiaari

¹ ¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pablón, Jesucristo jiyaramiquishano na rupaa pohuatariquiano taa na Que Pueyaso paniquiaaricuajani. Pa tarajanu Timoteota naajija nionijia. ² Niaacuara naajijanijia, canapue Pueyaso saquiriojoquiaaricuajani tama nerajaaja nia quiniuria. Niajaniyacuajaari maninia tiuuquiaa Pueyasocua, Cristo rupuesano nia quishacari. Pa Que Pueyaso cuaara cumaquiria niajaniya, shuquiriaatia nia quiniuria, juhuajaniya nioojia quiniuriajuhuaj.

Pablo secojosano Jesuucua tiuuniaa pueyacuara

³⁻⁴ Canaari pohuatasacaanuni taa nia tiuuquiaa Jesucristoocuani, naajuhuaj, taa nia paniya puetunu niarta Pueyaso muerasujuanaani. Naaratej, pueyaracaanu canaa secojosacari Pueyaso niaacuara, canaari na sequequiaani: “Paacarasho canaa Quenaa”. ⁵ Niaari naa maninia quiyatej, nia niishishacari Pueyasoori jiyanoohua maninia pa miiniutianiya na niquitiosacari pajaniya jiyocuacaanu na jiitiasanojiniji. Niaacuajaari naa pohuatasaaquiaari tarijkej, shushajanaa nia tojishacari seetanu Pueyaso rupaajanaa. ⁶ Cuno maninia rupaari puetunu jiyacajinajanaa paaqueyaree, mariyata taa na paaquecanucuaa na pohuatasacari nia tiacajiniacuani. Pueyaso Rupaari maninia caneyaree queraatia pueya jiuujajinia, mariyata taa na caneya nioojiacajinacuani. Naa caneyari nia niishishacari Pueyasoori seetanujuanaa pa paniya, taa nia pohuatasaaquiaaricuajani. ⁷ Pa panishano Epafrasri naa pohuataquiaari niajaniyatej. Nojuajaari Pueyasora poonijiona, juhua canaa. Nojuajaari canaa niti poonijioriquiaa niaara. ⁸ Nojuajaari canaa pohuatarucuaa niajaniyajiniji, naajuhuaj taa Pueyaso Sohuanu panitiooteya niajaniyani.

⁹ Naaratej, canaa jaara tojiquianu niajaniyajiniji, majaari canaa tarinitianu quiriquiaa Pueyaso secojonu niaacuara. Canaari Pueyaso secojoquiaani, nojuaja cuaara nia jataniiria niishijiara nia quiniuria na Sohuanu cumaacata. Canaari naa secojoquiaani, maninia nia niishiniuria taa Pueyaso paniya maninia nia quiniuriani, maninia nia miiniuriajuhuaj. ¹⁰ Niaa jaara Pueyaso panishano niishijiaca quiri, naacuajitij, niaari maninia quiniutianiya taa pa Jiyaniijia paniya na pueya quiniuriacuajani, nojuaja shuquiritanura niajaniya, pueyaracaanu maninia nia quishacari. Niaari puetunu maninia casaajanaa miiniutianiya. Naajuhuaj, niaari socua maninia niishiniutianiya Pueyaso. ¹¹ Canaari Pueyaso secojoquiaa niaacuarajuhuaj, Pueyaso cumaquinuria niajaniya puetunu na cumaacatajanaa. Jiyanoohua maniniaari na cumaaca, shuquiriaatia nia rejeretanura juhuajaniya puetunu casaajanaa. ¹² Canaari Pueyaso secojoquiaajuhuaj niaa cuaara pueyaracaanu sequeera nia shuquiriniutia “paacarasho”, pa Que Pueyaso miishanojiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jiitiasanojiniji pajaniyara,

cuahuashiqui quiqiojinia pa quishacari. ¹³ Pueyasoori ninishiquiji pa jayoquaari, maja Sesaaca jiitianura socua pajaniya. Pa jiyatereeri cuahuashiqui quijiaca pa quiniuria, Neyanunijoyua jiitiasano pa quiniuria maninia cutara. ¹⁴Tama Neyanu cusionutajaaja pa jiyanooriiri sesa pa miishanojiniji. Naacuajitij, paari na pueyara jatanishaareeni.

Paari maninia quiya Pueyasotani, Cristo cusionuucua pa niti

¹⁵ Pueyasoori maja niquishano quijia. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari co-teenujuanaa quiquiaari Pueyaso shipiniyaquishacarijia puetunu casaajanaa. ¹⁶ Na Que Pueyasoori na shipinitiquiaari puetunu casaajanaa jiya cajiniocua, mijirianio; niquishano casaa, niquuyaquishoo casaanio. Naacuajitij, Cristoori puetunu tamonu cumaacaraca quijacajanaa shipiniquiaari tama nerajaaja. Nojori shipiniquiaarii nojori jiitianura nera jiyocuacaanu casaa, jiyocuacaanu quiijiacanio, mariyata mijiria casaa, mijiria quiijiacanio. Nojuajaari puetunujuanaa shipiniquiaari. Tama nerajaaja na shipiniquiaarii. ¹⁷ Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojuanaa cojuaa, maninia na quiniuria. ¹⁸ Cristoori Pueyaso muerasu Jiyaniijiajuhuaj, taa poojia quiya pa cuaqueya jiyaniijiacuaani. Puetunu Pueyaso muerasujuanaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samiitianijia, juhua na cuaqueya pa quishacari. Nojuajaari coteenu samiitiaquiaariuhua macujiniji, juhua Pueyaso jiyapueranu na quiniuria. Naacuajitij, Cristoori co-teenu quiija. Nojuajaari Jiyaniijiajuhanajaj. ¹⁹ Pueyasoori paniquiaari Neyanu Cristo jiitianura puetunu tama na cumaacajanaa, juhua nojuaja na quiniuriajuhuaj. Naacuajitij, Cristoori maja rimiajata quenaaja na quiniu na Quejiniji. ²⁰ Naajuhuaj, Pueyasoori paniquiaari Cristo rupuetenuhuara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanoootiquiaari puetunu casaajanaa tama na cusionutajaaja niyacutesanojinia. Na Que rupuetequiaariuhua puetunu casaajanaari, jiyocuacaanu casaa, mijiria casaanio.

²¹ Tarija, niaari Pueyaso paraa quiquiaari, juhua taanuusano pueya Pueyasojiniji, sesa mijjiaca nia quiniuucua. ²² Saniniuuja quiarijiani, Pueyasoori nia rupuetequiaariuhua nocua, Cristo cusionuucua pocuara, cuaqueyaraca na quishacari mijiria. Naacuajitij, Pueyasoori na naata nia tiuquininiu nocua, tojetaarucuajanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishanojiniji. Majaari quenaaja shiitianijoju sesa nia quiniu quiniutianiya na niquiara. ²³ Niaari naa quiniutianiya maninia, niaa jaara cumaatia rupaaquiaa Cristoocua, nocua nia tiushacari, nioojia nia niquijoteyaquinintia. Majaari nia niishiriojonu Pueyaso naasucuaari maja na miiniu quiniutianiya puetunu na sequesanojuanaa niaara, taa nia tojiquiaaricuajani. Nia tojishano Pueyaso rupaaucuaari tari pohuatasacanu puetunu jiyacajinajanaa. Janiya, Pabloni, janiyari na pohuatanu naacutaajaaniuhua.

Pablo Pueyaso pueya maanu cumaquinjara jiyatesaaquiaari

²⁴ Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa

pa pohuatasacari, puetunu na saquiriojosano pueyajanaa tiuuniuria nocuahuaj. Naaratej, janiyari shuquiriaatia quiya niyani, naquiya cua miishacari niacuara. Naa naquiya cua miishacari Cristojiniji cua pohuatanuucua tiquiyocuatej, janiyari Cristo naquiya miiniu tucuataa tama cua cuaqueyajiniaajani.²⁵ Pueyasocuaaari cua jiylatequiaari na saquiriojosano pueya cua jiitianura, cua cumaquiniuria niajaniya puetunu na rupaatajanaa.²⁶ Cuno rupaari saaja Pueyaso jiylashua niishishano quiquiaari tarifia. Majaari na pohuatanu quiquiaari supuetana pueya, tariucuacaanu quiijaca. Quiari naataja cutara, Pueyasoori jiylashua na rupaa niishitiquiaari tama na saquiriojosano pueyarajaaja.²⁷ Pueyasoori pa niishitiniu paniquiaari taa jiyanohua shacantuca na cumaaca quiya niajaniyarani, canapuete maja na saquiriojosano Judiocuaca quiquiaaricuajani. Niocuajaari jiylashua Pueyaso miiniu panishano tarifia: ¡Cristoori nioojiajinia quiya! Nia jiitiasacari Cristo, niaari niishiya niaari shacantuca quiijara jatanishaanutaniyajuhuaj.

²⁸ Naaratej, Cristocuajaari canaa pohuatasano. Canaari puetunu pueyajanaa nacasuquiaani. Canaari nojori niishitijoquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucuajanaa maninia canashitishano pueya, Cristo rupuesano nojori quishacari.²⁹ Naaratej, puetunu Cristo niquitiosano cumaacatajanaa jiyanohua poonijioquiaanijia, na cumaquishacari janiya.

2

¹ Pueyanaa, janiyari paniyani nia niishiniuria taa jiyanohua cua poonijioquiaa Pueyaso cua secojonuta niaacuarani, Pueyaso muerasuucuara Laodicea tiacajinajuhuaj, puetunu juhuanojuaja cua niquiyauquiniaa pueyacuarajanaanio.² Jiyanohua secojoquiaa niaacuaranijia, nioojiaca cumaquishaanura, nioojiaca rupuetoonura jatiquijuhuaj, jiyanohua nia panitioosacari. Naajuhuaj, secojoquiaanijia maninia niishijiacara nia quiniuria, maninia nia niishiniuria tariucuacaanu Pueyaso niishishano tamajaaja, taa Neyanu seera maninia na miiniutianiya pajaniyani.³ Neyanu Cristocuajaari puetunu niishijiajanaa. Majaari tamonu niishijia quiniu juhua nojuaja. Jiyanohua maninia mijia puetunu na niishishanotajanaari.⁴ Janiyari nio sequeya niajaniyani, tamonu mariqui nia sapojoreeri najuhuana tamaatia na pohuatasanota.⁵ Majaari cua quiniu quiquiaa niaata. Naajaa, cua sohuanuuri niaata quiquiaa. Nia shuquiritiaanijia, maninia jatiqui nia quishacari, mariyata seetanujuanaa maninia nia tiuushacari Cristoocua, maja jatasano nia quiniuria.

⁶ Niaacuajaari pa Jiyanijija Jesucristo masequiaari, nia jiyanijija na quiniuria. Naaratej, pueyaracaanu maninia nia rupuerenoj, maninia nia quiniuria mijiria na cumaacata.⁷ Maninia nia rupuetore Cristota, naatej, taa naana cumaatia nujuacuaani, jaara tucuamaaca nujuacaraca quiri. Naacuajitij, majaari nia naata jatasano quiniu, maninia nia tiuushacari nocua, taa nia niishitijoosaaquiaaricuajani. Cunora, pueyaracaanu nia sequeriquia Pueyaso: “Paacarasho canaa Quenaa”.

Niaari quiarinio pueya, Cristo quishacari nioojiajinia

⁸ Tama nia cuaqueyajaaja nia cojuare, tamasaca mariqui nia sapojoreeri tamaatia nojori niishishanota najuhuanaj. Niaa jaara nojori niishitiojosano tojitiariquia, niaari juhua nojori quioosano pueya quiniutianiya. Nojori niishishanoori maja Cristojiniji. Nojori niishishanoori saaja mijiria niishishano, supuetanaa pohuatasano najuhuanajuahuaj.

⁹ Nocuaji saaja Cristo nia tojiri. Tama Cristo cutarajaarijia puetunu Pueyaso cumaacajanaa jiitija, puetunu na niishitajajanaanio.

¹⁰ Naajuhuaj, niaari Pueyaso cumaaca jiitia, na niishitajajanio, nia rupuesacari Cristo. Naacuajitij, niaari puetunu nia panishanojuanaa jiitia tari, maninia quijiaca nia quiniuria. Cristojuanaari

Jiyaniijajanaa. Cristo jaara na jiyarore, puetunu tamonu cumaacaraca quijiacajanaari na tojitia, jiyocuacaanu camarnu, mijiria camarnunio.

¹¹ Cristo nia rupuesacari, niaari seetanujuanaa jatanishaaree maja sesa nia quiniuria socua. Majaari nareja nia cararaatiuuquia comiatesaanu quiquiaari, taa Judiocuaca miiquiaacuaani. Nojoriiri

miatesaaquiaa nojori niishiniuria nojori cuaara quiiria saa Pueyasoraja, maja sesa miiija nojori quiniuria socua. Cuno, miatenuuni, majaari pueyano na jataniniu sesa na miiniujiniji. Cristo

cutaraari sesa nioojia jataquiaari, seetanujuanaa sesa nia quiniu jatasanura puetunujuanaa. ¹² Puetunu sesa nia quiniujianaari juhua jamosaaquiaari Cristota, niaa jaara moojinia tiuquinijiosaare.

Nia tohuatasacariuhua, niaari juhua samiitianishaarohua Cristota, Pueyaso cumaacaacua nia tiuushacari. Niaari samiitianishaarohua taa Pueyaso samiitianiquiaariuhua Cristocuaani. ¹³ Niaari juhua macu quiquiaari tarijia, sesa miijiaca nia quishacarijia, sesa jiuujiaraca nia quishacarijianio. Jiyacaritij, Pueyasoori nia samiitianiquiaari Cristota, na jiyanooshacari niajaniya puetunu sesa nia miishanojinijijanaa.

¹⁴ Pa tojiyaquishacari tariucuacaanu Pueyaso rootasano, paari puecoosocoriquiano quiquiaari juucuani. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiaari puetunujuanaa. Pueyasoori

puetunu sesa pa miishanojuanaa tiuutiaquiaari Cristoocua. Cristo teetesacari niyacutesanojinia, puetunu sesa pa miishanojuanaari cuniqui puequequiaari. Naa Cristo miishacari pocuaratej, majaari sesa pa miishano tiuutiasaanu pocua. ¹⁵ Na cusosacari niyacutesanojinia, Cristoori puetunu tamasaca sesa cumaacaraca quijiacajanaa shocotaquiaari. Nojori cumaaca jaariutiareeri. Nojori rerequetereeri, naatej, taa quioosano pueya jaatucunuusaquiaacuaani, pueya niquiara macaatishocoriquiano.

Saaja Pueyaso casaacua nia jiaatiariquia

¹⁶ Naaratej, majaari nia tojiniu noo pojori, canapuete nia tojitinii saniniujiya supuetana niishitiojosanocuajani. Nojoriiri najuhuana niishitiojoquiaa casaa sumatuute puereshiyani, ratusanonio. Nojoriiri niishitiojoquiaajuhuaj teyano juucate poonijiyaquishiyani, naajuhuaj,

Pueyaso niquiara pa queranacunuunura raca macura. Nojoriiri naa niishitiojonuquiaa nojori jiyanishacari paa jaara naa miyaquirini, Pueyaso mariqui pa saniitioreeri. ¹⁷ Puetunu cuno supuetanaa niishitiojosanojuanaari tariucuacaanu quiquiaari, miriqui na niishitiojonura

pueya taate seetanujuanaa quiniutianiyan Niriquiano jaara tiuquiri. Cuno Niriquianocuajaari Cristo. Tari tiuquiquiaariiri. Nojuajaari

pocuaji Tacuna. Naaratej, majaari socua pa tojiniu cuno miriqui niishitiojosano. Quiarijia saaja Cristo pa tojiri cutara.¹⁸ Tama nia cuaqueyajaaja nia cojuare, tamonu niishitiojonaa mariqui nia sapojoreeri, niaa mariqui Pueyaso niquitionu panishano niajaniya maseyaquiriiri. Nojoriiri tama na cuaqueyajaaja shuquiritiaquiaa na jiyanihacari nojori maja Pueyaso shocotaja na quiniu nojori secojosacari Pueyaso seya, maja Pueyasoluanaa. Nojoriiri tama na maquenujinna na niquishanoocuajaaja tiuuijaca, maja Pueyaso rupaacua. Naacuajitij, nojori tiuushacari tama na niishirijojosanoocuajaaja, nojoriiri seetanujuanaa pueya shocotajaca quiya.¹⁹ Nojoriiri maja na rupuenu Cristo, juhua poojia Cristo quishacari, na cuaqueya pa quishacarijiuhuaj. Paa jaara maninia rupuetesano quiri poojiatani, poojiaari maninia maashitiya puetunu pa cuaqueyajanaa, paa jaara maninia rupuetoonu quiya puetunu pa nucuhuatajanaani, pa cusorohuatantio. Pueyasoori naa pa maashitiniu paniyajuhuaj Cristota rupuetootesano pa quishacari.

²⁰ Niaari juhua tari cusoquiaari Cristota, maja socua juhua mijiria quijiaca nia quiniuria. ¿Macutucua taa supuetana rootasano tojirini? Maja na naata. ¿Niajaniyariuhuaj? ¿Casaraa nia tojitiaajaa cuno tariucacaanu rootasanoni? Niaari juhua nareja mijiria quiniae quiyajaa, nia tojishacarijia cuno rootasano.²¹ Supuetanaari naa piriyojoquiaaritij: "Maja pa quianu cuno. Maja pa miaquenu cunojuhuaj. Maja cuno pa cooniu". Pa supuetanaari naa sequejatej.²² Naajaa, puetunu cuno pueresano casaajanaari saaja shaajeja pa seecojinia. Majaari poojia na miiniu sesa. Cuno tariucuacaanu rootasanoori saaja tama pueya niishishanojuaja quiquiaari.²³ Paa naasucuaari jiyaniyani cuno rootasanoori maninia quiya Pueyaso shuquiritanura pajaniya socua. ¿Paatucua socua maninia pueya quirini paa jaara casaa sumattu puerereni, naajuhuaj, paa jaara naquiya miiri tama pa cuaqueyajaajani casaa pa puerenutani? Maja. Pa pueresacari casaa, cunoori najuhuana Pueyasora. Cunoori maja na naacunu pajaniya sesa casaacua pa jiaatiaaquinuria.

3

¹ Niaa jaara samiitianishaquaaria Cristota, jiyocuacaanu Pueyaso jiitiasanoocua nia jiaatiare, tee Cristo cajija na Que Pueyaso miaquetajaracuajani. ² Pueyaso casaacua nia niishirijoore saaja, maja mijiria casaacua. ³ Puetunu tarrijia sesa nia quiniujianaari tari juhua jamosaaquiaari, niaa jaara Cristo cusionu jiyatere tama nia nitijiaaja. Quiarijiani, niaari saminio quiya nia rupuesacari Pueyaso, Neyanu Cristota. Nojuacuajaari pa samiitianijia. Saniniuujia, juhuanojuaja maja niishishano taamueca quiijiaca pa cuaqueya quiniutianiyani. ⁴ Cristo jaara muetarohua pocua mijiria, shacantuua cumaacaraca quiija na quishacari, jiyacaritij, paari jatanishaanutaniyani shacantuua cumaacaraca quiijiaca pa quiniuria nata, juhua nojuajuhuaj.

Maninia rootasano Pueyaso muerasura

⁵ Naaratej, nia cuaqueya cuaara quiiria juhua macu tama nia niquierajaaja, nia cuaqueya nia ruuretanura na jiaatiasacari sesa miiniucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitianio. Nia cartere puetunu sesa miiniucua nia jiaatiasanojuanaa. Maja sesa casaacua nia jiaatianu. Maja puera casamicua nia jiaatianu. Casaacua jiaatiajaaari

juhua Pueyaso ruuretaja quiya, tama na jiitiasano casaacuajaaja na tiuushacari juhua Pueyasoocuaja. ⁶ Pueyasoori jiyanolua saniitionutaniya na tojiyashijiaca, canapuetu naa sesa quijiacacuajani. ⁷ Pueyaso tojiyashijiaca nia quishacari tarifia, niaari naa sesa miijiaca quiquiaari. ⁸ Quiarijiani, nia tarinitiare puetunu naa sesa nia quiniujiana. Maja juajia nia quiniu. Maja naseeca pueyano nia quiniu. Maja jiyanolashijia nia quiniu. Maja sesa miija nia quiniu. Maja pueya sesacaja nia quiniu. Maja sacuaraatia najuhuana nia niti taquiriocuateja nia quiniu. ⁹ Maja nia cuaracashijitoonu. Niaari tari jatanishaquaari tarifia sesa nia quiniujiniji, sesa jiuujiaraca nia quishacarifia, sesa miiniucua jiitinio nia quishacarijihuaj. ¹⁰ Niaari quiarinio jiuujiaraca quijiacar tari. Quiarijiani, tama nia cuaqueyajaarijia tari jataa juhua nia Shipininia Pueyaso nia quiniuria, seetanujuanaa Pueyaso niishijia nia quiniuria. ¹¹ Pueyaso jatanishano pueya pa quishacari quiarijiani, majaari tari rimiajata pa quiniu, paa jaara Judiocuaca quiyani, tamasaca pueyanio; na cararaatiuuquia co miatesano pueya, miatesoo pueyanio. Paa jaara tahue quiyani, juhua mococori, poonijotesano pueya, camarnuuju pueyanio, naajaa. Cristo pa rupuesacari, puetunu pajaniyajanaari mariyata na muerasu quiyani. Nojuajaari puetunu poojaijinia quiyajihuaj.

¹² Pueyasoori nia saquirijoquiaari saa maniniaja nia quiniuria nera. Niajaniyari na panishano muerasu. Naaratej, pueyacua taraajeja nia quiri. Maninia miija nia quiri. Majaari nia jiyaniiniu tama nia cuaqueyajaarijia socua maninia tamonujiniji. Maja juajia nia quiniu. Jacaria pocuaja nia quiri. ¹³ Jacaria nacasutoojua nia quiri. Maninia nia jiyanoori cante sesa miirii niajaniyani. Taa pa Jiyaniijia jiyanoquaari pajaniyacuaani, naa nia jiyanoootiorejihuaj. ¹⁴ Seetanujuanaa pueya panijiacar nia quirijihuaj. Cunoori socua jiyanolua panishano. Panitioojuaca nia quishacari, puetunu nia miishanojuanaari jiyanolua maninia quiniutiani, jatiqi nia quiniuriajuhuaj. ¹⁵ Naajuhuaj, Pueyaso nia shanacure nioojia na cajitiniuria pueyaracaanu. Nojuacua-jaari nia saquirijoquiaari juhuajaniya quijacar nia quiniuria, maninia rupuetootesano. Pueyaso muerasu cuaara jatiqi poonijionuujuaca quiuria, naatej, taa pa cuaqueyajiniacuma casaa puetunujuanaa jatiqi quiyacuaani. Majaari nia juatoojonu. Naajuhuaj, Pueyaso nia shuquiritiare pueyaracaanu, puetunu maninia na miishanojinijijiana niaara.

¹⁶ Nioojia cuaara quiuria mishaja Cristo rupaata, jiyanolua na tojijiaca nia quiniuria. Pueyaso Rupaa nia niishitijoore nia jaaquequejosoanota. Naa nia cumaquitoojore puetunu Cristo niishishanotajanaa. Nia jaaquequejonuure Pueyaso Rupaa naajiosanojiniji, pueya naajiosanojinijihuaj, Pueyaso Sohuanu niishitiosano niajanianio. Naa nia jaaquequejore Pueyasora, nia shuquiritanuta nojuaja. ¹⁷ Jesucristocuaaari nia Jiyaniijia quiya. Naacuajitij, niaari na sesaanucua. Naaratej, nia sequesano, nia miishanojuhuaj, puetunu cunojuanaa cuaara quiuria maninia nera. Naa nia miiriquia pa Que Pueyaso nia sequenuta “paacarasho”, Neyanu cumaquinuucua niajaniania.

Maninia miija pa quiri Pueyaso muerasu pa quishacari

¹⁸ Maajipohuanaa, nia niyaca tojitiajaca nia quiri. Pa Jiyaniijiaacua tiuuijaca cumaati naa miiquiaaquip. ¹⁹ Pueyanaa, nia niquiocua nia paniri. Majaari na juuaniu. ²⁰ Mueraasapuena, nia queya tojijiaca nia quiri, nia shuquiritiniuria pa Jiyaniijia. ²¹ Pueyanaa, maja nia juuatiniu nia niquiohua, nojori mariqui maninia miiniuucuaji pishiriiri, pueria nia juashacari nojori. ²² Poonitijiosano pueyanaa, puetunu nia camarnu sequencesanojuanaa nia tojiri. Maja na tojijia nia quiniu saaja na shootiasacari niajaniya, na shuquiritianura niajaniya. Majaari saaja na niquishacari nia poonijionu nia sapojonura nojuaja. Seetanujuanaa maninia nia poonijiore pueyaracaanu nia puerenuta saniya nia camarnujuanaa Pueyaso. ²³ Puetunu nia miishanojuanaa nia miiri shitimia, juhua pa Jiyaniijia Cristora. Naa nia miiritij, maja juhua nareja pueyara. ²⁴ Maja nia niyajetanu, pa Jiyaniijiaari nia niquitionutaniya jiyocuacaanu niaara na jiitiasanojiniji. Mijiria camarnura nia poonijiosacari, niaa cutaraari Cristora poonijiya. Nojuacuajaari nia camarnujuanaa. ²⁵ Pueyasoori sesa miijia saniitionutaniya cutara, sesa nojori miishanojiniji. Pueyasoori maja rimiajata saniniujiujia. Mijiria camarucua, poonitijiosano pueyanio, naajaa, nojoriiri maja rimiajata Pueyasora.

4

¹ Camarucuanaa, pueyaracaanu maninia nia miiriquia nia poonitijiosano pueya. Majaari nojori nia miiniu sesa. Maja nia niyajetanu, niaari jiyocuacaanu Camarnuracajuah.

² Pueyanaa, Pueyaso secojojua nia quiri pueyaracaanu. Nia secojoriquia maninia nia niishiniutia. Pueyaracaanu Pueyaso nia secojosacari, nia sequerenoj, "paacarasho". ³ Naajuhuaj, canaacuara nia secojore Pueyaso, nojuaja cuaara canaa pohuataniriia pueya niquiara na rupaa Cristojiniji. Majaari pueya niishiniu quiquiaari tarijia Pueyaso miiniu panishano pajaniyara Cristo seera. Cua pohuatanuucua Cristojiniji, cunora nujuatesano niya quiyanijia nio nujuatejojuajinija. ⁴ Pueyaso nia secojore cucuara, maninia cua pohuatanura Cristojiniji, pueya niishiniuria maninia cua pohuatasano, taa Pueyaso paniya cua pohuatanuracuajani.

⁵ Maninia nia niishirijoore taa nia miiniutianiya noo pojorini, canapuetucuaja maja Pueyaso muerasuni. Maninia nia miiri nojori, mijiria nia quishacarijia. ⁶ Nia pocoojosacari nojoritia, maja najuhuana nia pocuanu. Pueya nia cumaquiri nia sequencesanota. Nia niishirijoore taa nia riucuanutaniya tamasaca pueyan, nojori jaara nequesotariquia niajaniya Pueyasocua nia tiuuniujiniji.

Nata quiniaata Pablo saruhuatasacari pueya, naajionu na puecanura

⁷ Pa panishano pa tarajanu Tíquicoori nia pohuatanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jiyaniijiara canaa poonijionura. ⁸ Niaacua na jiyaroyanijia na pohuatanura niajaniya taa canaa quiyani, naajuhuaj, na cumanijianura niajaniya. ⁹ Pa panishano Onésimoori nata quianutaniyajuhuaj. Nojuacuajaari niajaniyajinjinio pueyan. Maninia poonijiojua Pueyasora. Nojoricuajaari nia pohuatanutaniya puetunu niiquijijanaa.

¹⁰ Aristarco, cuata nujuatesano pueyanoni, nojuajaari cua sequeya cua saruhuatanura niajaniya nera. Marcoori nia saruhuataajuhuaj.

Nojuajaari Bernabé cuna. Niaacuajaari tari rootasaacanu Marcojiniji. Nojuaja jaara niaacua quiaare, niocua maninia na tiuquiniri nia tiajinia. ¹¹ Jesu sesaanucua pueyanoori nia saruhuataajuhuaj. Na sesaari Justojuhuaj. Saa nio pojorijia Judiocuacajinjinioori cuata poonijioquiaa Pueyasora, canaa niishitiojonura Cristojiniji pueya niquiara. Nojoriiri cua cumanijanaa quiquiaa. ¹² Epafrasri nia saruhuataajuhuaj. Nojuajaari Cristo seru niajaniyajinjiniojuhuaj. Nojuajaari pueyaracaanu niaacuara secojoquiaa queraatia, jiyanohua cumaatia Pueyasooqua tiu-ijiaca nia quiniuria. Secojoquiaajaariuhua ritia Pueyaso tojijiaca nia quiniuria, puetunu Pueyaso panishanojuanaa nia miiniuria maninia. ¹³ Seetanujuanaa, Epafrasri jiyanohua tacaaquiaa niaacua, Laodicea tiacajinia quinia Pueyaso muerasuucuajuhuaj, Hierápolis tiacajinia Pueyaso muerasuucuano. ¹⁴ Pa panishano naarajona Lucasri nia saruhuataa. Demas nia saruhuataajuhuaj.

¹⁵ Canaara nia saruhuatare Laodicea tiacajinia quinia parta Pueyaso muerasu. Ninfas nia saruhuatarejuhuaj, na tiajinia rerejonaa Pueyaso pueya maanujuhuaj. ¹⁶ Niaa jaara nio naajionee serojorecuaa nia rerejosacari, Laodicea tiacajinia nia jiyaratorejuhuaj, cuaara sero-josaaria Pueyaso pueya maanu niquiara tijjuhuaj. Naajuhuaj, cua naajionee Laodicea pueyacuara nia serojore, niaacua nojori jiyaratotasacari Laodicea tiacajiniji. ¹⁷ Naa Arquipo nia sequere quiria: “Tama quia cuaqueyajaaja quia cojuare quia tucuatanura quia poonijiosano pa Jiyaniijiara. Nojuajaari quia jiyatequiaari nera poonijioriquiano”.

¹⁸ Janiyari Pabloni. Quiarijiani, tama cua juaashiquiatajaaja naajianijia saaja cua saruhuatanura niajaniya. Nia niishiriquia, janiyari moronucua nujuatesano quiyani. Pueyaso cuaara cumaquiiria niajaniya na cumaacata jiyanohua. Tariucuaja.

COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasaacari Pueyaso pueya

¹ Janiyari Pabloni. Janiyari nio naajiyi Tesalónica tiacajinia quiniaa Pueyaso pueya maanuucuarani. Niaacuajaari pa Que Pueyaso rupuejaca, pa Jiyaniijia Jesucristo rupuejacanio. Canaari mariyata nia saruhuataani, Silvano, Timoteonio. Pueyaso cuaara maninia jiitiaara na cumaacata niajaniya, maninia nia quiniuria. Cuaara nioojia cajitiiriajuhauj, juhuajaniya nia quiniuria.

Tesalónica pueyanaari Jesuucua tiuujjaca quiquiaari seetanujuanaa

² Maninia nia quiniuucua, canaari pueyaracaanu Pueyaso sequiaani, “paacarasho”. Canaa secojonuuusacari, canaari pueyaracaanu niaacuara secojonuuquiaani. ³ Pa Que Pueyaso canaa secojosacari, canaari pueyaracaanu niishiquiaa niajaniyani, taa pueyaracaanu nia poonijioquiaa Pueyasorani, Neyanuucua nia tiuuniuucua. Canaari niishiquiaajuhuaj taa nia paniniutia nia naacuquiaa niarta pueyani. Naajuhuaj, niaari maninia rejeretaquia taraatia nia miiniu, nia niishiniuucua pa Jiyaniijia Jesucristoorigri pocua niniutianiuhua. ⁴ Pueyaso panishano pueyanaa, canaacuajaari niishiyani, nojuajaari nia saquirijoquiaari na panishano muerasu nia quiniuria. ⁵ Canaa jaara nia niiquiara pohuataquiaari Pueyaso rupaa Jesucristojinijini, cunoori maja najuhuana pohuatasano quiquiaari. Canaa pohuatasanoori jiyahohua Pueyaso cumaacaraca quiquiaari. Pueyaso Sohuanuuri jiyahohua poonijioriquiaa nioojiacajinia. Naacuajitij, niaari niishiquiaari canaa pohuatasanoori seetanu rupaajanaa. Niaacuajaari niishiya taa quiaciaca canaa quiquiaari canaa quishacari niaatani, maninia Pueyaso muerasu nia quiniuria.

⁶ Niaari canaacua jiaatiaquiaari, juhua canaa nia quiniuriajuhuaj, juhua pa Jiyaniijia Jesu nia quiniuriajuhuaj. Niaari seetanujuanaa naa miijiacara quiquiaari, Pueyaso tojijiaca nia quiniuriajuhuaj taa canaacuaani. Pueyaso rupaa nia tojishacari, niaari jiyahohua na timitiaciaquiaari. Cunora, niaari jiyahohua naquiya miishaquiaari. Naajaa, Pueyaso Sohuanuuri nia cumaquiaari saaja, shuquiriaatia nia quiniuria. ⁷ Naa shuquiriaatia Pueyaso tojijiaca nia quiniuucuatej, niaari niarta Pueyaso pueya shiniujuquiaari, seetanujuanaa Pueyaso tojijiaca nojori quiniuriajuhuaj. Niaari naa shiniujuquiaari puetunu niarta Pueyaso pueyajanaa Macedonia jiyajinia quiniaatej, Acaya jiyajinia quiniaanio. ⁸ Pa Jiyaniijia rupaari niajaniyajiniji tucuacaanu paaquequiaari, maja saaja Macedonia jiyajinia, Acaya jiyajinianio. Cuno ruropaari puetunu tiquipocuajanaa poojotasaquilaari. Naacuajitij, puetunu tiquipocuajanaa quiaciaca pueyajanaari tari niishiya taa Pueyasoocua tiuujjaca nia quiya seetanujuanaani. Naacuajitij, ¿canaatucua casaara niishitiojore Jesujiniji socuani, tee cuniqui pueya niishiya tari nojuajinijicuanji? ⁹ Tee cuniqui canaa tiuquipocuajanaani, pueyari canaajiniji poojotanuya

tari, taa Jesujiniji canaa pohuataquiaaricuaja niajaniyani. Nojoriiri niishiyanjuhuaj taa canaa nia tiuquinitiaquiaari maninia nia tiacajiniaequeyani, canaa pohuatasano nia tojiniuria. Naajuhuaj, niaanaari pueya shipinijiosano nia jiyatesano nia pueyasora cartequiaari, pueyaracaanu rishijia seetanu Pueyasojuanaa tojitiajaca nia quiniuria.¹⁰ Naajuhuaj, niaanaari Neyanu sashiya, jiyocuacaanuji na tiuquiniuahuara, teyano Pueyaso samiiitianiquiaariuhua macujinijicuajani. Pueyari niajaniyajiniji niishiyajacuahuaj, Jesuuri pocuaji Tacuna, maja mani quiqiojinia pa quejoosaanura, Pueyaso saniitiosacari na tojitiaashijiaca.

2

Pablo niishitiosacariuhua pueya, taa na quiquiaari nojoritian

¹ Cuarta Pueyaso pueyanaa, niaacuajaari niishiya, majaari najuhuana canaa quiniu quiquiaari, niaata canaa quishacari. ² Niaacuajaari niishiya, Filipo tiacajinia canaa quishacari, niaacua canaa tiuquiyaquishacarijia, canaari cuno tiacajinia sesacasaquaarini. Canaari jiyanohua taraatia miishaquaarrijiuahuaj. Naajuhuaj, nia tiacajinia canaa tiuquijiosacari, pueyari canaa pohuatasano ruuretaquiaari saaja. Naajaa, Pueyasoori canaa cumaquiaari juhua jiuujiaaju canaa pohuatanura Jesucristojiniji nia niquiarajuhuaj. ³ Canaacuajaari niishiquiaarini canaa pohuatasanoori seetanu rupaajanaa. Majaari canaa pohuatanu quiquiaari canaa miiniuria sesa niajaniya, canaa sapojonura niajaniyajuhuaj. ⁴ Pueyasojuanara canaacua tiuquiaari. Cunora, canaa jiyatequiaariiri Neyanujiniji pohuatanaa canaa quiniuria. Naacuajaari taa canaa poojotaquiaa pueya tiuuniuria nocuacuajani, Pueyaso jiyanooniuria nojori. Canaari seetanujuanaa Pueyaso timitiniu paniyani, maja saaja pueya. Pueyasocuajaari canaa jiuujia niishijia. ⁵ Niaacuajaari niishiyajuhuaj, majaari canaa sapojonu quiquiaari niajaniya shanohua canaa sequesanota, canaa nia maniniucuanura. Naajuhuaj, majaari canaa cuaracashijionu quiquiaari niajaniya, canaa nia niquitiojonura nia cumaneecajiniji. Pueyasoori na niishiyacuaja. ⁶ Majaari quenaaja canaa niishiriononu quijia pueya timitiasano canaa quiniuria, nia timitiasano pueya canaa quiniuriajuhuaj. Maja. ⁷ Canaacuajaari seetanujuanaa nia jiyaniijianucuani, Jesucristo jiyaramiquishano pueya canaa quiniuucua. Naajaa, niaata canaa quishacari, majaari naa canaa miiniu quiquiaari niajaniya, juhua canaa seja nia quiniuria. Saniniuujia, canaari tojetaarucuajanaa juhua naatujoori quiquiaarini, niaata canaa quishacari. Naatej, taa maaji jiitiae maninia necohuacuaani, canaari naa nia jiitiaquiaarrijiuahuaj. ⁸ Jiyanohua canaa paniniuucua niajaniya, majaari saaja Pueyaso rupaa canaa pohuatanu quiquiaari niajaniya. Canaa cutaraari tama canaa cuaqueyajaaja panitiaquiaari niaacuarani, naajaa, canaa cuaura puecoosaariaqui. Canaari naa jiitiaquiaari niajaniyani, jiyanohua canaa paniniuucua niajaniya. ⁹ Cuarta Pueyaso pueyanaa, niaacuajaari niishiya taa canaa poonijioquiaari jiyanohuani, tama canaa panishanojuuaaja canaa masetajara. Canaari naa poonijionuuquiaarini juuca, niucuanio, canaa pohuatanura Pueyaso rupaa niajaniya. Canaari naa miiquiaarini maja canaa taajetenura niajaniya canaa mashiniquijionuta nia cumaneeca.

¹⁰ Naacuajitij cuarta Pueyaso pueyanaa, niajaniya, Pueyasojuhuaj, niaacuajaari niishiya canaari saaja maninia miiquiaarini, niaata canaa quishacari. Majaari quenaaja canaa miiniu quiquiaari sesa. Naacuajitij, tamasacaari maja na naata canaacuara saquiriojotanu, canaa jaara tojetaarucuajanaa sesa miyaquiquiaarini. ¹¹ Niaari niishiya-juhuaj taa canaa shiniujuquiaari niajaniyani Pueyaso nia tojiniuria. Niaari niishiya-juhuaj taa canaa cumanijiaquiaari puetunu niajaniyajanaani taraatia nia quishacari, naatej, taa pueyano miiquiaa na panishano niquiohuacuaani. ¹² Naajuhuaj, canaacuajaari jiyanohua nia nacasuquiaarini maninia mijiaca nia quiniuria juhua seetanujuanaa Pueyaso pueya. Pueyasocujaari nia saquiriojquiaari pueyaracaanu nata nia quiniuria, jiyanijianucua nia quiniuria-juhuaj, juhua nojuajujuaj. Nojuacuajaari na shacantuca cumaacajinlia quijia.

¹³ Canaa jaara Pueyaso rupaa pohuataquiaari nia niquiarani, majaari nia jiyaniniu quiquiaari cunoori saaja pueyajinji canaa tojiniushano. Maja. Niaari seetanujuanaa na tojitiajacara quiquiaari, nia niishishacari cunoori seetanujuanaa Pueyaso rupaa cutara. Canaari cunora canaa timiniutia sequequia Pueyasoni, "paacarasho". Canaa pohuatasanoori seetanujuanaa Pueyaso rupaa. Naacuajitij, na ruropaari nioojiajinia poonijioquia, maninia mijiaca nia jataniniuria niajaniya, Jesuucua tiuujjaca nia quiniuucua. ¹⁴ Naa Jesucristoocua tiuujjaca nia quiniuucuatej, niarta pueyari nia miiquiaari naquiya, taa Judea jiyajinlia parta Pueyaso pueya maapue miishaquiaaricuaani. Tama narta Judiocuacajaarilia nojori miiquiaari naquiya, Jesucristo tojijiaca nojori quiniuucua. ¹⁵ Nio cuarta Judiocuacani, nojori supuetanaajuhuaj, nojoricuajaari pa Jiyaniijia Jesucristo motuquiaari. Nojori supuetanaari naa taricuacaanu puecooquiaarijuhua Pueyaso sequesano caminiujuniaa pueyatej. Naajuhuaj, Jesuucua tiuyashijiaca cuarta Judiocuacaari canaa taanuquiaari canaa Judea jiyajinili. ¿Cuno pojoritiiri Pueyaso timitasano? ¡Maja! Cuno pojoricuajaari juhua puetunu mijiria quinia paraajanaa. ¹⁶ Naacuajitij, canaa jaara taucuaca pohuatanu paniriquia Jesucristojinijini, Pueyaso pueyara nojori jiyatesaanurajuhuaj, Judiocuacaari canaa tenujuquia juucuani. Naacuajitij, Pueyasora, sesa Judiocuaca mijiosanoori tari tojetaarucuajanaa puera. Cunora, Pueyasoori nojori saniitioquia jiyahohua.

Pablo naquerejosacari juucua Tesalónica tiacajinlia quinia Pueyaso pueyacua

¹⁷ Cua panishano pueyanaa, canaacuajaari rupaquijira nia shuriucuaji quiaquiaariuhuani. Jiyacari canaa niquuyaquiajohuaj niajaniya, naajaa, canaacuajaari juhua niaata quiquiaajaani, pueyaracaanu canaa niishiriojosacari niajaniya, niaacuara canaa secojosacari. Canaari juucua jiyahohua nia niquiniu paniriquiaani. ¹⁸ Cunora, canaari niaacua naquerejoquiaari juucuani. Janiyari niaacua naquerejonu pacutejoquiaarini. Satanásri canaa cushimaquiaari saajani. ¹⁹ ¿Janiyatucua casaara nia niquiniu paniyaquiriirini? Niaacuajaari jiyahohua cua timitasano pueya. Pa Jiyaniijia Jesucristo tiuquishacariuhua, janiyari niishiyania, nojuajaari canaa shuquiritianutaniya maninia na tojijiaca nia quishacari canaa niishitiojonuucua na rupaa niajaniya. Pa Jiyaniijiata pa quishacari, jiyacaritij, canaari jiyahohua nia timitanutaniyani, maninia na tojitiajaca nia quiniuucua mijiria. ²⁰ Taaquiriirinij,

canaacuajaari tari shuquiriaatia quiyani, maninia na tojitiajaca nia quiniuucua. Niaacuajaari seetanujuanaa canaa timitiasano pueya.

3

¹ Naa jiyanohua canaa niishiniu panishacari juucua niajaniyajinijitij, majaari socua canaa sashiriu paniniu quiriquiaa. Cunora, canaari niishiriojoquiaarini, maniniacuajaari canaa jateenura tamajaaja Atenas tiacajinia. ² Naacuajitij, canaari saaja parta Pueyaso pueyano Timoteo jiyaroquiaari niaacuan. Nojuacuajaari jaarajaaja cuata poonijiona Pueyasora, Jesucristojiniji canaa pohuatanura. Janiyari niaacua na jiyaroquiaarini na cumaquinuriuria niajaniya, mariyata socua na shiniuiuniuria niajaniya Jesuucua nia tiuuniuria saaja. ³ Na jiyaroquiaarinijia na cumaquinuriuria niajaniya maja quenaaja niquiriyatu niajaniyajinijinio pishiniuria Pueyasocuaji, naquiya nia miishacari. Niaacuajaari tari niishiquiaari, paari naquiya miishiyani Jesucristoocua pa tiuuniuucua. ⁴ Canaa quishacari niaataja, canaacuajaari tari nia numootequiaarini, puetunu pajaniyajanaari naquiya miishaanutaniyani Jesucristo tojitiajaca pa quiniuucua. Niaacuajaari niishiya, seetanujuanaa naa tohuateecanuuri cua sequesano. ⁵ Cua niishishacari niajaniyajiniji, niaanaari naquiya miishaaquiaa, janiyari puereriquiaani Sesaca naasucua nia miitiriucuua sesa. Jaara naa quiritij, puetunu canaa miishanojuanaa niaara maara najuhuana quiqianu. Naa cua tacaashacaritij, majaari socua cua tarishiniu paniniu quiqianu, niajaniyajiniji cua niishiniuria. Cunora, janiyari ritia jiyarocanu niaacua Timoteoni, saniriuujia nojuaja pohuatanuhuara janiya, niaate Jesuucua tiuyajaa.

⁶ Timoteocuajaari tari niajaniyajiniji tiuquiriohuacuua. Nojuajaari canaa pohuatasuhuacuua, niaanaari Jesuucua tiuyajaa. Niaanaari panitoojuaca quiyajaa. Canaa pohuatasuhuacuaajaariuhuaj, niaanaari canaa niishiriojoquiaa jiyanohua nia paniniutia canaa. Niaanaari canaa niquiniuucua jiaatiaa, naatej, taa canaa jiaatiaa canaa niquiniuria niajaniyacuaani. ⁷ Cuarta Pueyaso pueyanaa, seetanujuanaa canaari taraatia miishiya niyani. Canaari tacayajuhuaj. Naajaa, canaa niishishacari niaanaari seetanujuanaa Jesuucua tiuyajaa, canaari canaa jiuujia cajitiriucuaani. ⁸ Naa canaa tojishacari niaacuajitij, canaari juhuu samiitiacorohuani, pa Jiyaniijia tojitiajaca nia quiniuucuaja. ⁹ Cunora, canaari jiyanohua nia shuquiritaa Pueyaso niquiarani. Naacuajitij, majaari canaa niishiniu taate canaa naata sequenu nojuajani “paacarasho”. Naa maninia nia quiniuucuatej, canaari jiyanohua shuquiriaatia quiyani. ¹⁰ Naajuhuaj, canaari juuca, niucua secojoquiaa Pueyasoni, nojuaja cuaara canaa tiuquitihuara niaacua. Canaari maninia nia niishitiojonu tucuatanu paniyani, seetanujuanaa maninia jeenucusano Pueyaso pueya nia quiniuria.

¹¹ Canaari paniyani pa Que Pueyasojuanaa, pa Jiyaniijia Jesucristonio, nojori cuaara canaa naacuura niaacua canaa tiuquinuriuria. ¹² Pa Jiyaniijia cuaara nia jiyateera socua jiyanohua panitoojuaca nia quiniuria, tamasaca panijiaca nia quiniuriajuhuaj, taa canaa paniya niajaniyacuaani. ¹³ Naa panijiaca na jiyatesacari niajaniyatej, niaari nioojia niquijoteyashijiaca quiniutianiya cutara. Naajuhuaj, niaari toje-

taarucuajanaa sesa miyashijiaca quiniutianiya, pa Jiyaniijia Jesucristo tiuquishacariuhua puetunu na jiyanooshano pueyatajanaa.

4

Taate pa naata Pueyaso shuquiritiniuni

¹ Quiarijiani cuarta Pueyaso pueyanaa, pa Jiyaniijia Jesu jiyaramiquis-hano pueya canaa quiniuucua, canaa sequencesano nia tojiri. Quiarijiani, canaari nia shiniuijyani socua maninia miijiaca nia quiniuria. Canaari nia niishitiojoquiaari maninia miijiaca nia quiniuriani, Pueyaso nia shuquiritiniuria. Niaacuajaari naa maninia miya.

² Niaacuajaari canaa rootasano pa Jiyaniijia Jesujiniji niishiya tari. ³ Canaacuajaari nia rootaqviaarini, Pueyasoori nia panitaa saaja nera nia quiniuria, tojetaarucuajanaa maninia jeequesano nia quiniuria sesa nia miishanojiniji. Majaari nia numuetucunu nia camishoo maaji. ⁴ Puetunu mashiquorijanaa cuaara niishiuria maninia na cojuanura necocuarano, maja ritia na numuetucunura, nata na camiyaquishacarijia. Cuaara na cuaqueya panishano rejetenu niishiuria. ⁵ Majaari sacuaraatia nia miiniu taa Pueyaso niishiyashijiaca pueya miiquiaaculaani, jiyanoohua nojori jiaatiasacari maajiicua. ⁶ Naajuhuaj, majaari quenaaja jiyasohuaja niarta pueyano niquiocua nia numuetucunu, neyaca nia sapojonuta. Cuno maajicuajaari saa neyacaraja, maja tamonura socua. Pueyasocuajaari nia miijiaca saniitionutaniya jiyanoohua, taa canaa numootequiaari tari niajaniyacuajani. ⁷ Pueyasoori maja na saquiriojonu quiquiaari pajaniya sacuaraatia miijiaca pa quiniuria. Pa saquiriojoquiaarii tojetaarucuajanaa sesa miyashijiaca pa quiniuria, saa neraja. ⁸ Naacuajitij, cante nio rootasano ruuretajani, nojuajaari maja saaja na rerequetenu nio rootasanojiniji pohuatana. Nojuajaari Pueyasoluanaa rerequeteya cutara, cante na Sohuanu niquitioquiaari niajaniyacuajani.

⁹ Quiarijiani cuarta Pueyaso pueyanaa, janiyara, najuhuanaruhua niaacuara cua naajionura cua niishitiniuria niajaniya, panitioojuaca nia quiniuria. Pueyasocuajaari tari nioojiajinia nia niishitiquiaari panitioojuaca nia quiniuria. ¹⁰ Niaacuajaari seetanujuanaa puetunu Macedonia jiyajinia niarta Pueyaso pueya panijiaca quiyacuaja. Naajaa, cuarta Pueyaso pueyanaa, canaa nia tojiri. ¡Socua panijiaca nia quiri! ¹¹ Tama nia cuaqueyajaaja nia cumaquiriquia juhuajaniya qui-jjaca nia quiniuria. Tama nia poonijiosanojinijaaja nia cojeriquia, tama nia juaashiquiatajaaja nia poonijiosacari, taa canaa rootaqviaari niajaniyacuajani. ¹² Naacuajitij, Pueyaso niishiyashijiaca pueyari nia rerequeteyaquinutianiya. Naajuhuaj, niaari puetunu nia panishano-juanaa jiitianutaniya.

Taa pa Jiyaniijia tiuquishacariuhua quiniutianiyani

¹³ Cuarta Pueyaso pueyanaa, canaari juhuacarijia nia tonu paniyani taa Jesuucua tiujiaca shaajecono pueya miishaanutaniyani. Canaari nia niishitiniu paniyani maja nia tarrajenura juhua Jesuucua tiuyashijiaca pueya. Nojoriiri maja na jiitianu nojori Jiyano, nojori na sami-itianijionuhuara. ¹⁴ Paacuajaari niishiyani Jesuuri cusoquiaari. Na nuhuaji samiitiaquiaariuhuari. Naajuhuaj, paari niishiyani, Pueyasoori Jesuucua tiuujiaca shaajecono pueya samiitianijionutaniuhua, nojori na rijionura Jesuta, Jesu tiuquishacariuhua.

¹⁵ Canaaajanaacuajaari nia sequeyani, niocuajaari pa Jiyaniijia niishitishano canaa: pajaniya, canapuete pa Jiyaniijia tiuquishacariuhua saminiucua quiniutianiyajaani, majaari macunucua pa puetanu quiniutianiya pa Jiyaniijiata pa naacuneetoonura jiya cajiniocua. ¹⁶ Naa quiniutianiyari. Pa Jiyaniijia nacanuuri tojishaanutaniya, Pueyaso seja jiyaniijia nacanujuhuaj, Pueyaso trompeta jonenenunio. Jiyacaritij, pa Jiyaniijiajanaari jiyocuacaanuji rosenutaniya cohuaja najacajiniara. Jiyacarijuhuaj, puetunujuanaa Jesuucua tiuujjaca shaajecono pueyari samitiaconutaniuhua coteenu. ¹⁷ Na nuhuaji pajaniya, canapuete saminiucua quiyajaani, paari nojoritia ritia rijiosaanutaniya cohuaja najacajiniarani. Paari tii coquetoonutaniya pa Jiyaniijiata paratujiniani. Jiyacaritij, paari tari pueyaracaanu nata quijiacarano quiniutianiyani. ¹⁸ Cua panishano pueyanaa, nio cua pohuatasanota nia cumanijiatooriquia.

5

¹ Majaruhua maninia cua naajionura niaacuara cua niishitiniuria niajaniya socua, taacari pa Jiyaniijia tiuquiniutianiuahuani. Niaacuajaari tari na niishiya, naajuhuaj, taate mijiria quiniutianiyani na tiuquiaquishacarijia. ² Niaacuajaari maninia niishiya, pueya jiyanshacari juhuanojuaja maja pa Jiyaniijia tiuquinu quiniutianiuhua, nojuajaari jiyacari tiuquiniutianiya. Nojuajaari canashiyaquiji tiuquiniutianiya, taa nohuasejojua tiuquiquiaa niucua tiajiniaacocuaani, juhuajaniya tia camaru maquesacari. ³ Naajuhuaj, quera pa Jiyaniijia tiuquishacariuhua, mijiria quiniae pueyari naa sequejaca quiniutianiya: “Paacuaja maninia quiyani. Shaaquicuaja miaquetoojonu”. Canashiyaquiji jiyacari, Pueyaso saniitiosacari na tojiyashijiacaari quiniutianiya. Naa quiniutianiyari taa maaji nooquiaa juhuacatecara canashiyaquiji na manajacuaani. Majaari quenaaja niquiriyatu curosaanu quiniutianiya saniitiosoo. ⁴ Niajaniya saniniuujia cuarta Pueyaso pueyanaa, niaari maja juhua ninishiqui quijiac, pa Jiyaniijia cariyatunura niajaniya. ⁵ Puetunu niajaniyajanaacuajaari cuhuashiqui quijiac. Pueyasojuanaacuajaari nioojjaca cuhuataquiaari. Majaari tari juhua ninishiqui quijiac pueya pa quiniu. ⁶ Cunora, pa Jiyaniijia sashijiaca pa quirij. Maja juhua tamasacaja, juhuajaniya quiquiayari. Nojoriiri juhua maquetiuya. Pajaniya saniniuujia cuarta Pueyaso pueyanaa, juhua sutejaca pa quirij, maninia niishiriojojuacahuaj. ⁷ Maquetujuacaari niucua maquetuquiaa. Naajuhuaj, mashaasequenuujuacaari niucua mashaasequenuuquiaa. Naa miijiacaari Pueyaso tojiyashijiaca. Majaari na maniniucuanu cuhuashiqui. ⁸ Pajaniya saniniuujia, paari cuhuashiqui quijiac cutarani. Naaratej, pueyaracaanu maninia niishiriojojuaca pa quirij. Romano pueya miaquetoosacari, nojoriiri turtuco cushiyonuujuua, nocuaji na nujutajara cashi. Cumueeca casaa cushiyonuujuajaariuhuaj, na naca na cojuatajara. Naajuhuaj, naa poojia pa cojuare, saaja Jesuucua pa tiuuniutia, seetanujuanaa panijiaca pa quishacarijuhuaj. Seetanujuanaa pa niishiri, Pueyasoori pa saquirijoquiaari na muerasu pa quiniuria pueyaracaanura. Naacuajitij, pocua pa niishitija cojuareni, maja poojia pa niquipiotenura najuhuanaj. Naacuajitij, Sesaacaari maja na naata shocotanu quiniutianiya pajaniya. ⁹ Pueyasoori maja na saquiriojonu quiquiaari pajaniya na

saniitiosocoriquiano. Pa saquiriojoquiaari cutaraari na jiyanooniuria pajaniya, na muerasu pa quiniuria, Neyanu Jesucristoocua tiuuijaca pa quishacari.¹⁰ Neyanucuaajaari pocuara cusoquiaari, nata rishijiaca pa quiniuria pueyaracaanu. Naacuajitij, naajaa, paa jaara cuso-yareni, paa jaara saminio quiyajuhuaj, pa Jiyaniijia tiuquishacariuhua, puetunu nocua tiuuijaciajanaari pueyaracaanu saminio quiniutianiya nata.¹¹ Naaratej, pueyaracaanu nia cumaquitioojoriquia Pueyaso ru-paata. Nia shiniujiutiooriquajuhuaj, seetanujuanaa pa Jiyaniijia tojijiaca nia quiniuria, taa nia miquiaacuaja tarini.

Socua Pablo rootasacari Pueyaso pueya

¹² Cuarta Pueyaso pueyanaa, canaa nia tojiri. Cuniqui nia jiitiana to-jijiaca nia quiri. Majaari nojori rerequetenu. Nojoriiri jiyanoohua poonijioquiaa pa Jiyaniijiara nojori niishitiojonura niajaniya, na nacasunura niajaniyajuhuaj.¹³ Cunora, jiyanoohua nojori nia paniri. Majaari na rerequetenu. Nojoriiri pa Jiyaniijiara poonijioquiaa na cumaquiniuria niajaniya. Maninia nia quiri pueyanaa. Majaari juayonuujutanu.

¹⁴ Nio nia tojirijuuhuaj cuarta Pueyaso pueyanaa. Taajecori nia nac-sure. Noojia niquijotejaca nia shiniujiuri, seetanujuanaa cumueeca Pueyaso pueya nojori quiniuria. Noo pojori nia cumaquiriquajuhuaj, Satanás saniniujiushacari na cuaqueya miiniu panishano rejeretaashiji-acatej. Majaari cuno pojori cartenu. Nia juaaniu nia rejeteriquia, maja quenaaja nia juaaniuria tamasacata.

¹⁵ Naajuhuaj, tama nia cuaqueyajaaja nia cojuariquia maja nia naminiuria niarta pueyano, nojuaja jaara sesa miiriquia niajaniya. Saniniuujia, pueyaracaanu maninia nia miitioriquia niarta Pueyaso pueyata. Naa nia miiriquia puetunu pueyajuhuaj.

¹⁶ Pueyaracaanu nia shuquiririquia, Pueyaso pueya nia quiniuucua.

¹⁷ Naajuhuaj, pueyaracaanu nia secojoriquia Pueyaso.¹⁸ Niaa jaara maninia miishaare, niaa jaara sesa miishaarejuhuaj, naajaa, puetunu naa nia miishaanuuucuajanaa Pueyaso nia sequeriquia, “paacarasho”. Pueyasojuanacuajaari naa paniya pa miiniuria, Jesucristo Sohuanu pa jiitianuucua poojajin. ¹⁹ Majaari Pueyaso Sohuanu nia ruure-tanu, nojuaja jaara nioojajin nia shiniujiya maninia nia miiniuria.²⁰ Naajuhuaj, majaari nia soonu Pueyaso sequenceso caminiuijuniaa pohuatasano.²¹ Coteenu nia saniniujiuri cutara, nia niishiniuria see-tanutejanaa nojori pohuatasano. Teyano nojori pohuatasanojinjiniote maniniani, cuno tojijiaca nia quiri.²² Puetunu sesa niishishano casaa-janaa soojeaca nia quiri.

²³ Poojia cajitinia Pueyasojuanaa cuaara nia jeenucuaara juhuacrijia, tojetaarucuajanaa sesa miyashijiaca nia quiniuria pa Jiyaniijaacuaji. Nojuaja cuaara naa cojuaara nia sohuanu, nioojia, nia cuaqueyanio, tojetaarucuajanaa soosoo nia quiniuria pa Jiyaniijia Jesucristo cuaara tiuquiriohuajaatijia.²⁴ Cante nia saquiriojoquiaaricuaja na pueya nia quiniuriani, nojuajaari puetunu shusha cua sequencesanojuanaa niajaniya miiniutianiya niaara. Nojuajaari maja na niishiniu na rupaa jatanu. Nojuaja cutaraari na sequenceso mijia pueyaracaanu.

Pablo sequenceso na naajionee na tucuatasacari

²⁵ Cuarta Pueyaso pueyanaa, Pueyaso nia secojonuuriquia canaacuarajuhuaj.

26 Canaara nia saruhuatare cuniqui quiniaa parta Pueyaso pueya-juhua nojori nia nujuunuta, seetanujuanaa Pueyaso paniniutia.

27 Pa Jiyaniijia jiyaramiquishano cua quiniuucua, cua tojitiare pueyanaa. Nio cua naajionee nia serojore puetunu Pueyaso pueyarajanaa.

28 Pa Jiyaniijia Jesucristo cuaara cumaquiiria nioojia. Cuaara naa quiiriatej.

TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Jesucristoocua tiuujjaca

¹ Janiyari Pabloni. Silvano, Timoteonio, canaari nio naajiya niaacuarani, puetunu Tesalónica tiacajinia quiniaa parta Pueyaso pueyarajanaa. Nio naajioneeri niaara, canapuete pa Que Pueyaso rupuejacacuajani, pa Jiyaniijia Jesucristo rupuejacanio. ² Pa Que Pueyaso, pa Jiyaniijia Jesucristojuhuaj, nojori cuaara nioojia cumaquiiria. Cuaara nia jiyateera juhuajaniya quijiacarajuhuaj.

Pueyasoori na tojitanu paniyashijiaca saniitioriquiano Jesucristo tiuquishacariuhua

³ Cuarta Pueyaso pueyanaa, canaari jiyanolhua nia timitiaani jiyanolhua Pueyasoocua tiuujjaca nia quiniuucua socua, panitoojuaca nia quiniuucua socuajuhuaj. Cunora, canaa secojosacari Pueyaso, canaari pueyaracaanu na sequequiaani, "paacarasho". ⁴ Naa maninia nia quiniuucuatej, canaari shuquiriaatia poojotaquiaa niajaniyajiniji Pueyaso pueya maapue niquiara tamaquiiucua canaa rucuanejosacarini. Canaari nojori poojotaquiaani taa nia rejeretaquiaa juhuajaniya naquiya nia miiniuni, taraatia nia miiniuijuhuaj, Pueyasoocua tiuujjaca nia quiniuucua. ⁵ Pueyaso saquiriojonuuucua niajaniya pueyaracaanu shuquiriaatia quijaca nia quiniuria na shuriucua, cunoori maja najuhuana quiquiaari. Niaacuajaari seetanujujuanaa na pueya. Cunoori maatia niishishiyacuaja juhuajaniya nia rejeretasacari naquiya nia miiniu, Pueyasoocua nia tiuuniuucua. Pueyaso niishiyashijiaca pueyari naa naquiya miiquiaa niajaniyatej, Jesucristoocua tiuujjaca nia quiniuucua.

⁶ Naajaa, Pueyasoocujaari tojetaarucuajanaa sesa miyashijia. Nojuajaari niaacua naminiutianiya noo pojori, naquiya miiitajaca niajaniyatej. ⁷ Niajaniya saniniuuja, naquiya miijiosaaquiaarini, niaari canaata samaraatasaanutaniyajuhuaj, Jesucristo tiuquishacariuhua pocua. Jiyacaritij, nojuajaari niquishaanutaniya mani rimianuqueyano tiuquitiohuano, jiyanolhua cumaacaraca na seyata jiyocucaanuji. ⁸ Tiuquinuitianiuhuari na saniitionura noo pojori, canapuete Pueyaso niishiniu paniyaquiquiaani, noo pojorijuhuaj, pa Jiyaniijia Jesu rupaa ruuretajacatej. ⁹ Puetunu cuno pojorijianaari pueyaracaanu saniitiosocoriquiano jiyatesaanutaniya. Nojoriiri tucuacaanura quejoosaanutaniya pa Jiyaniijia shuriucuaji. Naacuajitij, majaari nojori niquiniu quiniutianiya na jiquioco, shacantuca na cumaacanio, nojuaja jaara mijiria tiuquiriohua pa shuquiritianura nojuaja. ¹⁰ Jiyacaritij, puetunu na jeenucusano pueyajanaari jiyanolhua na timitianutaniya. Puetunu nocua tiuujjaca pueyajanaari jiyanolhua jiuujiateconutaniya, pa Jiyaniijia na shootiatusacari. Niaari na niquiniutaniyajuhuaj, nojujiniji canaa pohuatasanoocua nia tiuuniuucua.

¹¹ Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririquiniuria na

saquiriojonuuucua niajaniya. Canaari niaacuara secojoquiaajaaniuhuaj, Pueyaso cuaara nia tucuataniiria na cumaacata puetunu maninia casaa nia miiniu panishanojuanaa. Cuaara nia tucuataniiriajuhua puetunu nia miishanojuanaa, cuno, Pueyasocua nia tiuuniutia nia poonijiosanoni.¹² Naacuajitij, pa Jiyaniijia Jesuuri socua timitiasaanutaniya naa nia miiniuucua maniniatej. Naajuhuaj, nojuajaari nia timitianutaniyajuhuaj. Naa maninia quiniutianiyyari pa Pueyaso pa Jiyaniijia Jesucristota na cumaquishacari niajaniya.

2

Maatia pohuatasano, taate mijiria quiniutianiyyani, pa Jiyaniijia tiuquishacariuhuaj

¹Quiarijiani cuarta Pueyaso pueyanaa, socua nia pohuatarohuacuara pa Jiyaniijia tiuquiniujiniji, taa pa coquetoonutaniya natajaniuhuaj.

² Canaa sequesano niajaniya nia tojiri, pueyanaa. Majaari nia niyajetanu tariucuacaanu canaa niishitiosano niajaniya, nia jiyanenyequiniuucuaji tamasaca sapojosacari niajaniya. Majaari nia shiri-iquiniu tamasaca jaara sequere niajaniya: “Pueyaso Sohuanuuri cua niishitirii, pa Jiyaniijia tiuquishacariiri quiarijija”. Tamasaca jaara naa nia pohuatare, majaari na sequesano tojiniu. Naajuhuaj, tamasaca jaara naajionuure tamajaaja, niaara na jiyatesocoriquiano juhua canaa naajionee, majaari nojori tojiniu. Nojoricuajaari nia sapojiya. ³ Pueyanaa, majaari niaacua nojori nia shanacunu nojori sapojonura niajaniya. Nia niishiri, pa Jiyaniijia tiuquiyaquishacariuhuaja, queraatia pueyari Pueyasocuajipishiniutianiyya. Jiyacarijuhuaj, Pueyaso rootasano Ruretajajanaari supuenutaniya. Nojuacuajaari tariucua Pueyaso sanitiosocoriquiano na riuriotaca. ⁴ Nojuacuajaari Pueyaso paraca. Nojuajaari puetunu pueyajanaa tenujunutaniya maja nojori tojiniuria Pueyaso, pueya shipinijiosano nojori pueyasohuara nojori tarinitianurajuhuaj. Nojuaja cutaraari tama na cuaqueyajaaja jiyatenutaniya juhua Pueyasora. Pueyaso Secojojua tiajinia cajiniutianiyyari, Jiyaniijiajanaa cajitiujinaria. Jiyacari sequenutaniyyari: “Janiyacuajaari Pueyasoni”.

⁵ Pueyanaa, ¿majateeri nio nia niishiniucuaja? Janiyacuajaari nojuajiniji nia poojotajani niaata cua quishacari. ⁶ Niaa naasucuaari niishiyacuaja canteeri juhua na quiaajaani, maja juhuanojuaja mijiria na miiniuria tama na panishanojuaja, Pueyaso paniyaquishacarrijia. ⁷ Seetanujuanaa, Sesaaca cumaacaari tari mijiria poonijiya jiyanohuaja. Naajaa, Pueyaso paracaari juhuanojuaja maja na naata muetanu, pueya niishiniuria nojuaja, na tenujuna cuaara niiquipi rishaarejaatijaj. ⁸ Na tenujuna jaara rishaare niiquipi, jiyacaritij cuno sesaaca sequeeri muetanutaniya, jiyanoehua sesa na miiniuria. Naajaa, pa Jiyaniijia tiuquishacariuhuaj na shacantuca cumaacajinia, nojuajaari cuno sesaaca sequeermonutaniya saaja na rupaata na noonutania, na shaajanura puetunujuanaa. ⁹ Cuno sesa mijiia sequeeri muetanutaniya Satanás cumaquishacari nojuaja. Naacuajitij, nojuajaari jiyanoehua cumaaca jiitianutaniya jiyajeneta casaa na miiniuria, pueya

jiuujiatenura nocuaji. Queraatia niishishoo casaa miiniutianiayaari-uhuaj, pueya na sapojonura.¹⁰ Nojuajaari puetunu tamaatia sesa miiniu niishishanojuanaa miiniutianiya na sapojonura noo pojori, canapuete saniitiosocoriquiano pueyacuajani. Nojoriiri sapojosaanutaniya, Pueyaso Rupaa ruuretajaca nojori quiniuucua. Nojoriiri maja na tojiniu paniniu quiquiaari seetanu rupaajanaa, Pueyaso jiyanooniuria nojori.¹¹ Naaratej, Pueyasoori nojori tarinitianutaniya nojori sapojosaa-nura, nojori tiuuniuria seetanujuanaa sapojonuuuucua.¹² Naacuajitij, puetunu noo pojorijianaari saniitiosaa-nura, canapuete seetanu ru-paacuajanaa tiuuniu paniyaquijani, sesa miiniu maniniucuajaca nojori quiniuucua.

Pueyaso muerasuranoori tariucuacaanujiniji saquiriojosano

¹³ Niajaniya saniniuujia, niaari pa Jiyaniijia panishano pueyacuaja. Jiya shipiniyaquishacarijia, niaacuajaari tariucua Pueyaso saquirio-josano pueya quiquiaari. Niaari Pueyaso pueyara quiquiaaricuaja, na Sohuanu jataniniuucua niajaniya quiarinio pueya nia quiniuria, see-tanu rupaacuajanaa nia tiuuniuucua. Cunora, canaari pueyaracaanu Pueyaso sequequiaa niaacuarani, “paacarasho”.¹⁴ Canaa pohuatasaacari Pueyaso rupaa nia niquira, niaari Jesucristoocua tiuquiaari. Naacuajitij, Pueyasoori nia jiyatequiaari na pueya nia quiniuria, shacantuca quijiacara nia jatanishaanura, taa pa Jiyaniijia Jesucristo quiyacuaani.

¹⁵ Naaratej cuarta Pueyaso pueyanaa, majaari nioojia nia niquijotenu Pueyasocuaji. Naajuhuaj, nia numamaa nia racatare canaa niishitio-josano niajaniya niaata canaa quishacari, canaa naajioneecajinia canaa rootasano niajaniyahuaj.¹⁶ Jiyanoojia pa Jiyaniijia Jesucristo quiniuucua, pa Que Pueyasohuhuaj, nojoriiri pa paniquiaa. Naajuhuaj, poojia cajitiquiaa pueyaracaanuraari. Na rupaacua pa tiuutiquiaarii, pa niishiuria paari jiyanohua maninia miishaanutaniya pueyaracaanuni.¹⁷ Naajuhuaj, nojori cuaara nioojia shiniijiiria, maninia nojori tojiti-jaca nia quiniuria pueyaracaanu. Nojori cuaara cumaquiiria niajaniya, tojetaarucuajanaa maninia nia sequesano quiniuria, nia miishanonio.

3

Pueyaso rupaa pohuatanaacuara pa secojore

¹ Pueyanaa, socua nia sequerohuacuaraj. Canaacuara nia secojore, pa Jiyaniijia rupaa paaquetesaanura puetunu tiquiyocuajanaa. Nia secojorejuhuaj, cuno rupaa pueya tojishacari, nojori jatanishaanura, naatej, taa na jataniquiaari niajaniyacuaani.² Canaacuara nia seco-jorejuhuaj, Pueyaso cojuanura canaa na tojiyashijiaca pueyacuaji, maja nojori miiniuria sesa canaa. Niaacuajaari niishiya, puetunu pueyajanaari maja na tiuuniu Pueyasocua. Cuno pojoricuajaari canaa para-caajiac. ³ Naajaa, paacuajaari niishiyani pa Jiyaniijiacuajaari na se-quesano miiquiaa. Nojuacuajaari nia cumaquinutaniya, maja nioojia nia niquijotenu niajaniyi. Sesaacaacuaji nia cojuanutaniyajahuaj.⁴ Pa Jiyaniijiaacua canaa tiuushacari, majaari canaa taacanuunu niaa naasucuaari canaa rootasano tojitiaquiniutaniya. Maja. Niaa naasucuaari na tojitiaacuaja. ⁵ Pa Jiyaniijia cuaara niishitiiria nioojiajinia, panijiaca nia quiniuria taa Pueyaso paniyacuaani. Naajuhuaj, cuaara nia niishitiiria naquiya miiniu rejeretajaca nia quiniuria, Jesucristo cumaquisshacari niajaniyi.

Poonijiojuaca pa quiri

⁶ Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniuucua, canaa nia tojitiare. Majaari noo pojori nia rupueno: taajecoritij, noo pojorijiuhuaj, canaa rootasano tojiyashijia-catej. ⁷ Niaacuajaari niishiya taa quijiaca canaa quiquiaari niaata canaa quishacarini. Naa quijiaca nia quirijiuhuaj. Majaari canaa taajeyaca canaa matanu quijiani. ⁸ Majaari najuhuana canaa miaquenu quijia nia miaquesano. Canaa cutaraari pueyaracaanu canaa samareenuta poonijionuujuaca juucani, niucuanio. Canaari naa poonijionuuquiaarini canaa panishano canaa jiitianura, maja quenaaja canaa taajetenura niajaniya, maja nia tacaatianura canaa juhuaj. ⁹ Pueyaso jiyaramiquishano pueya canaa quiniuucua, canaa naata quiquiaaricuajaari canaa panishano canaa mashiniquiniuria niajaniyajiniji. Naajaa, majaari naa canaa miiniu quiquiaari. Canaari tama canaa juaashiquiacata-jaaja poonijioquiaarini, canaa niishitiojonura niajaniya, poonijionuujuaca nia quiniuria juhua canaa juhuaj. ¹⁰ Canaa quishacari niaata jiyacarijuhuaj, canaari nio nia niishitiojoquiaarini: “Cante poonijionu paniyaquiyani, cuaara miaqueteshiyaquiriajuhuaj”. ¹¹ Canaari po-huatasaarucuaajaaniuhuaj, noojiaqueya niajaniyajinjinionaari juhuajaniya quiquiaa. Majanaari na poonijionuunu quiquiaa. Nojoriniaari noo pojori cushitijoquiaa, poonijionuujuaca cutaratej. ¹² Pa Jiyaniijia Jesucristo jiyaramiquishano pueya canaa quiniuucua, canaari cuno taajecori sequeyani, nojori cuaara poonijionuura, nojori panishano nojori jiitianura.

¹³ Cuarta Pueyaso pueyanaa, teyano niajaniyajininiote maninia mi-ijiacaculaani, majaari maninia miiniu nia tarinitianu. ¹⁴ Saniniuuja, cante nio naajioneejinia canaa sequesano tojiniu paniyaquiyani, no-juaja nia niishiri cantenojoni. Majaari na rupuenunoj, na caririquiniuria quenaaja. ¹⁵ Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniuucua.

Pablo seqesano na naajio na tucuatasacari

¹⁶ Poojia cajitija pa Jiyaniijiani, nojuajanaa cuaara nioojia cajitiuria pueyaracaanu, naajaa, niaa jaara taa miishaariquia. Pa Jiyaniijia cuaara pueyaracaanu jiitiaara puetunu niajaniyajanaa.

¹⁷ Janiyari Pablone. Cua saruhutanura niajaniya, janiyari tama cua juaashiquiatajaaja nio naajiyani. Nia niquiri cua naajiosano, taamue-catenojoni. Janiyari naa puetunu cua naajioneecajanaa tucuataquiaani, cua sesa cua naajionuta. ¹⁸ Pa Jiyaniijia Jesucristo cuaara cumaquiuria puetunu niajaniyajanaa. Cuaara naa quiiriatej.

COTEENU PABLO NAAJIONEE TIMOTEOCUARA

Pablo saruhuatasacari Timoteo

¹ Janiyari Pablón, Jesucristo jiaramiquishano. Pa Jiyanojia Pueyaso, pa Jiyaniija Jesucristonio, nojoriüri nera poonijionara cua jiyatequiaari. Paari Jesucristoocua tiuujiacani, nojuaja jataniniuria pajaniya juhua nojuaja pa quiniuriajuhuaj. ² Timoteonaa, janiyari nio naajiy quiarani. Quiaari juhua quiyanura quiquiaari, Pueyaso pueyanora quia jatanuucua, quia niquia cua pohuatasacari Pueyaso rupaa. Pa Que Pueyaso, pa Jiyaniija Jesucristojuhuaj, nojori cuaara cumaquirria quiajaniya. Nojori cuaara quiocua taraajeerajuhuaj. Nojori cuaara pueyaracaanu quioojia cajitiiriajuhuaj.

Pablo sequencesacari sesa niishitiojonuujuaca cuaara sanaajasaaria

³ Janiya jaara Macedonia jiyajiniara quiaquiaarini, janiyacuajaari quia sequequiaarini Éfeso tiacajinaja quia jiyojenura. Janiyari naa quia sequequiaarini, quia tenujunura cuno pojori, najuhuana tamaatia niishitiojonuya pueyani. ⁴ Janiyari quia sequequiarijuhuaj, nojori quia sequenura, maja nojori niishiriojonura najuhuana nojori supuetanaa pohuatanuusanojinia. Janiyari quia sequequiarijuhuaj, maja nojori niishiriojonura nojori supuetanaa sesacajinia, cuno, najuhuana tucuayocuara naajionuutasanoni. Pueya niishiriojonuusacari pueyaracaanu cuno najuhuana casaajinia, nojoriiri cunoocua juayonujutaquiaa saaja. Saniniujia, nojori cuaara Pueyaso rupaacua niishirijoora cutara. Nocua pa tiuushacari, paari cumaquishaanutaniyani Pueyasora pa poonijionura maninia.

⁵ Naa cua sequencesacari Éfeso tiacajinaja quia jiyojenuratej, janiyari quia sequenu paniriquiaani, pueya quia niishitiojonura panitoojuaca nojori quiniuria. Nojori cuaara shitimia panitoojuaca quiiria, juhua jeequesano nojori jiuujia quishacari. Seetanujuanaa Pueyasoooca nojori tiuushacari, nojori cuaara panitooora maja noojia macuhuajenuta sesa nojori miishanojiniji. ⁶ Noojiaqueya cuno pojorijinijiniori tari tarinitiacanu tojiniu nio maninia niishitiosano. Nojoriiri cushima-iquianu na pocoojonuucua, na nacoojonuucua najuhuana tama nojori niishishanojinijiaaja. ⁷ Nojoriiri Moisés Rootasanojiniji niishitiojon-aara quiniu paniya juucua. Majaari quenaaja nojori niishiniu tama nojori sequencesanouaja, nojori shiniujiushacari pueya, pueya tojiniuria najuhuana capa nojori niishitiosano.

⁸ Paacuajaari niishiyani, Pueyaso rootasano Moisésni, cunoori manini-acuaja, paa jaara niishirini casaara naa Pueyaso rootaquiaari pa supuetanaani. ⁹ Paacuajaari niishiyani, Moisés Rootasanoori maja na pueretenu maninia mijiaca pueya cutara. Pueyasoori maja na rootasano na niishitiniu quiquiaari maninia mijiacara. Na niishi-tiquiaari cutaraari na tojitiaashijiacara, tama na panishanojuaaja mijiacara, Pueyaso soojeacarajuhuaj, sesa mijiacaranio. Moisés Rootasanoori Pueyaso rerequetejacara, Pueyaso casaa rerequetejacara-juhuaj, noo pojoririajuhuaj, tama na que tacartaja minutej, na

nucuanio, pueya puecoojucarajuhuaj. ¹⁰ Moisés Rootasanoori na camishoo maajipohua numuetucunujuacara, maajishuriuhuara, na numuetucunujuacarario. Moisés Rootasanoori pueya nohuasenuujuacara juhua casami na niquitiosocoriquiano tamasaca seyara; sapojonuujuacarajuhuaj; na sapojonuta na sequesano maatejacarario, nocua na tiuushaanura; puetunu noo pojorirajanaanio, maninia niishitiosano tojiyashijiacatej. ¹¹ Cuno maninia niishitiosanoni, cunocua-jaari cua pohuatasano Jesucristo rupaajiniji, pueya jatanura Pueyaso pueyara. Pueyaso jiyahohua maninia, cuno rupaa pohuatanara na jiyatenuucua janiya.

Pablo shuquiritiasacari Pueyaso, na rupaa pohuatanara na jiyatenuucua nojuaja

¹² Pa Jiyanijia Jesucristoori cucua tiuuquiaari nera cua poonijionura maninia. Cunora, na rupaa pohuatanara cua jiyatequiaari-iri. Nojuajaari cua cumaquiquiaa. Cunora, janiyari na seququiaani, "paacarasho". ¹³ Tariucuacaanu, janiyari nocuara rimiaaqueja quiquiaari sacuaraatiani. Janiyari naquiya na miiquiaarijuhuaj, nocua tiuujiacu cua miitiasacari. Janiyari jiyahohua na paracaajia quiquiaarijuhuaj. Naajaa, Jesucristoori saaja cucua taraajequiaarini cua niishiyaquinuucua casaa cua miiriquiaani, nocua tiuyashijia cua quishacarijia. ¹⁴ Naa cucua na taraajenuucuatej, nojuajaari seetanujuanaa cua jiyanoosquiaari. Na jiyanooshacari janiya, nojuajaari cua jataniquiaari nocua tiuujia cua quiniuria, panijia cua quiniuriajuhuaj.

¹⁵ Timoteonaa, nioori seetanujuanaa. Puetunu pueyajanaa cuaara niishiuria nio. Cua tojiri. Jesucristoori mijiria niquiaari na Que Pueyaso na jiyanoottiniuria sesa miijiaca. Janiyacuajaari tojetaarucuajanaa cuno sesa miijiaca pueyajinjinio na jiyanooshanoni. ¹⁶ Janyari naa jiyanooshaquiaarini puetunu pueyajanaa niishiuria taa jiyahohua jiyanoottiote Jesucristoni, pueyaracaanu na rejeretanuucua cua juanuu. Naa Jesucristo jiyanooniucuacuaa janiya, sesa miijia cua quishacarijiatej, Jesucristoocua tiuujiacarano cuaara niishiuria, nojoriiri na naata jiyanooshaanujuhuaj Jesucristoocua nojori tiuushacari. Naacuajitij, nojoricua pueyaracaanu quijiacara jiyatesaarejuhuaj. ¹⁷ Naa jiyanoottio pa Jiyanijia quiniuucuatej, nojuaja pa timitiare pueyaracaanu. Nojuajaari Jiyanijiajuhanaj. Nojuajaari Pueyasocuaja, shaajeyashijia, namijiata niquuyaquishoo. Jiyahohua maniniaari pa Jiyanijia! Naa seetanujuanaari!

¹⁸ Timoteonaa, quiaacuajaari niishiya taa Pueyaso cumaquiquiaari quiajaniyacuajani, nera quia poonijionura. Cunoori quiquiaari Pueyaso pueya jiitiana jaara caminiujuquiaari Pueyaso sequenu panishano quiara, nera poonijiona quia quiniuria. Naacuajitij quiyanunaa, cua tojiri. Pueyaso cumaaca quia jiitiasacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. ¹⁹ Naa quia quiri Pueyaso rupaa quia pohuatasacari, seetanujuanaa na rupaacua tiuujia quia quishacari, seetanujuanaa na rupaa tojija quia quishacarijuhuaj. Naa quijia quia quirij, quioojia mariqui quia macuhuajareeri quia jaara sesa miriquia. Noojiaqueya pueyari tarí Pueyasocuaja tiuuniu tarinitiacanu nojori ruuretanuucua Pueyaso Sohuanu numootesacari

nojori jiuujiajinia, sesa nojori miishacari. ²⁰ Naa miitiuquianuuri Hime-neo, Alejandronio. Janiyari cunora Pueyaso secojorucuaani, Pueyaso cuaara nojori tarinitiaara Satanásra, Satanás miiniuria naquiya nojori. Naacuajitij, nojori cuaara niishiiria maja socua sacuaraatia nojori rimi-aquenura Pueyasocuara.

2

Secojonuuunura niishitiojosano

¹ Cua tojiri Timoteonaa, niaa jaara Pueyaso secojonuuriquia, nia secojonuure puetunu pueyacuarajanaa. Nia panishano casaacuara nia secojoriquiajuhuaj. Naajuhuaj, Pueyaso nia sequeriquia “paacarasho”, pueyaracaanu maninia na miiniuucua. ² Jiya jiyanijjianucuaacuara nia secojonuuriquiajuhuaj, puetunu pueya camarucuaacuarajuhuaj. Nojoriicuara nia secojonuuriquia, juhuajaniya pa quiniuria panaatia, juhuajaniya pa tojiniuria Pueyaso, maninia pa quiniuria parta pueyatuhuaj. ³ Pa Jiyanoojia Pueyasoori naa paniquiaa pa secojonuratej. Naa pa secojosano maniniucuaquiaari. ⁴ Nojuajaari paniya puetunu pueyajanaa tiuuniuria Neyanuucua, na pueyara nojori jatanshaanura, puetunu seetanu rupaajanaa niishijiaca nojori quiniuriajuhuaj. ⁵ Pa Que Pueyasoori niquiriyatujua. Majaari tamonu Pueyaso quiniu socua. Naajuhuaj, niquiriyatujua pueyanoori quiya Pueyaso Jiyanootijia pueya. Nojuajaari Jesucristocuaja. ⁶ Puetunu pueyajanaa quishacari saniitiosocoriquiano, Jesucristoori tama na cuaqueyajaaja tarinitiaquiaari na mosaanura narta pueya niti. Naacuajitij, na Que Pueyasoori na naata jiyanooniu pajaniya saniniujia. Quiarijjiacuajaari Pueyaso panishacari Neyanujiniji pohuatasaanura pueya niquiera, nojori jiyanooshaanura. ⁷ Nio rupaa cua pohuatanaurajuhuaj, Pueyasoorinaari cua jiyatequiaari Jesucristojiniji pohuatana cua quiniuria. Cua jiyaramiquiquaarii taucuaca cua niishitiniuria Jesuucua nojori tiuuniuria, seetanu rupaajanaa nojori niishiniuriajuhuaj. Nio cua sequesanoori seetanujuanaa. Majaari cua sapojonu.

⁸ Cunora, cua tojiri. Janiyari paniyani puetunu tiquiyocuajanaa pueya secojunuunura Pueyaso. Jiyocuacaanu nojori shiitiosacari nojori juaashiquia nojori secojonura, nojori jiuujia cuaara quiiria jeequesano sesa nojori miishanojiniji. Naajuhuaj, cuaara quiyaquiria najiquitishano, maja sesa niishiriojonutajuhuaj. ⁹ Naajuhuaj, janiyari paniyani maajipohua cuaara cushiyaquiria puera maniniuquiya toqueya, narta maajipohua na shocotanura. Cuaara cushiyaquiria cararaatia niquishano toqueyajuhuaj. Maniniacuajaari nojori maniniushiniuria. Sesa cutaraari nojori maniniushiniuria puera, pueya shootianura nojori. Nojori cuaara jiyaniyaquiria nojoriiri seetanujuanaa shanohua niquishano, nojori muecaca jecasano quishacari puera, nojori cushishacari orojiniji shipinishano casaanio. ¿Maajitiiri seetanujuanaa shanohua niquishano maaji, na cushitianuucua queraatia cumaneecata masesano noturu shipinijosano sai tiujiau, queraatia cumaneecata masesano maniniuquiya toqueyanio? Maja. ¹⁰ Nojori cuaara maniniucuasaariquia cutara, maninia mijiaca maajipohua nojori quiniuucua. Nojori cuaara quiiria juhua noo maajipohuaja, canapuetucuaja tama nojori cuaqueyajaaja jiyatecanu Pueyasora na quiniuria seetanujuanaani. ¹¹ Pueyaso rupaa niishitiojosacari, maajipohua

cuaara tojitiariquia sanaa, maja Pueyaso rupaa pohuatanaa na rejetenuta.¹² Maja cutaraari cua shanacunu maajipohua niishitiojonura Pueyaso rupaa pueya niquiara. Naajuhuaj, majaari cua shanacunu maajipohua jiyatesaanura narta Pueyaso pueya jiitiana na quiniuria. Nojori cuaara sanaa tojitiariquia cutara, narta Pueyaso pueya rerejosacari.¹³ Quia niishiri Timoteonaa, casaara naa cua sequeyani. Pueyasocuajaari coteenu Adán shipiniquiaari. Na nuhuaji Adán niquiorano Eva shipiniquiaarii.¹⁴ Quia niishirijihuaj, Soconurano jaara sapojoquiaari Evatej, majaari na sapojonu quiquiaari neyaca Adán. Eva cutaraari sapojosaaquiaari. Naacuajitij, na sapojosaaanuucua, Evaari Pueyaso tojiyashijiara quiquiaari.¹⁵ Naaratej, maajipohua cuaara maninia canashitijoora necohua. Cuaara panijiaca quiiriajuhuaj. Cuaara maninia miijiacä quiiriajuhuaj, maninia niishiriojojuaca nojori quishacari. Naa maajipohua miishacaritij, Pueyasoori nojori jiitianutaniya maninia, Jesucristoocua tiuuijaciä nojori quishacari.

3

Pueyaso pueya jiitianatucua taamueca pueyano quiriquiani

¹ Nio seqesanoori seetanujuanaa: cante Pueyaso pueya jiitianara quiniu paniyani, nojuajaari maninia poonijiosano miiniuucua jiaatiaa. ² Naaratej, cante Pueyaso pueya jiitianani, nojuaja cuaara quiiria sesacasoo pueyano. Nojuaja cuaara quiiria saaja niquiriyatu maaji niyaca. Cuaara quiiria noojia niquipijoteyashijia, maninia niishirijojuajihuaj, pueya rerequeteyaquishoonio. Cuaara quiiria maninia pueyano, rucoojuaca pueya tiuquinitiaja na tiajinia. Cuaara quiiria Pueyaso rupaa niishitiojojuaca maninia. ³ Naajuhuaj, nojuaja cuaara quiyaquiiria mashaasequejoru. Cuaara quiyaquiiria ritia juabajia, pueya na pinuriua. Cuaara quiiria pueya riuhuaneyashijia, pueya juashacari nojuaja. Cuaara quiiria shiniquajihuaj. Cuaara cumaneecaacua jiaatiaashijia quiiriajuhuaj. ⁴ Naajuhuaj, nojuaja cuaara na tiajinia quiniaa jiitija quiiria maninia. Cuaara necohua niishitiojojuaca quiiria maninajuhuaj, tojitiajaca nojori quiniuria, pueya rerequeteyashijiacanio. ⁵ Naacuajitij, pueyano jaara maninia casaa necohua niishitiojijashijia quiriquia, ¿maatucua taa maninia jiitariquia Pueyaso pueya maanuni? ⁶ Naajuhuaj, Pueyaso pueya maanu jiitariquiano cuaara quiiria see-tanujuanaa Pueyaso tojijia pueyano cutara. Cuaara quiyaquiiria shusha Pueyasocua tiuunio pueyano, nojuaja mariqui jiyaniiri nojuaja tojishano pueyano cutara. Nojuaja jaara jiyaniiri nojuaja socua maninia pueyano narta Pueyaso pueyajinji, nojuajaari cocuaatia miya taa Satanás miiquiaaricuaani. Pueyaso panishano seru Satanás quishacarijia, nojuacuajaari taanuussaquaari Pueyaso shuriucuaji, na jiyaniishacari nojuaja na naata na Jiyaniijia Pueyaso shocotanu. ⁷ Naajuhuaj, Pueyaso pueya maanu jiitariquiano cuaara quiiria maninia miijia pueyano, Jesusucua tiuyashijiacä pueya mariqui na sesacareeri maninia miyashijia na quishacari. Nojuaja jaara naa rerequetesano quiritij, nojuajaari juhua Sesaaca norijiosano quiniutianiya. Naacuajitij, pueya tojiyaquis-hano quiniutianiyyari.

Narta Pueyaso pueya naacunaatucua taamueca pueya quiriquiani

⁸ Naajuhuaj, parta Pueyaso pueya naacunaa cuaara quiiria tojishano pueya, rerequetesoo. Cuaara quiiria na seqesano miijiaca. Cuaara

quiyaquiria puera mashaca jereeca ratunuucua jiitino. Cuaara quiiria cumaneecaacua jiaatiaashijia, jiyasohuaja na nohuasejonura, na sapojonuta na masenuranio.⁹ Naajuhuaj, nojori cuaara seetanujuanaa Pueyaso rupaa tojijiaca quiiria, teyanocua tiuujiaca pa quiyacuajani. Naacuajitj, nojori jaara naa miijiaca quiritiij, ¿nojoritiucua casaacula cararosaariquiani?¹⁰ Cunora, pueya cuaara senota jiyateyaquishaaria Pueyaso pueya naacunaa nojori quiniuria. Cuaara coteenu maninia niishishiiria nojoriiri seetanujuanaa Pueyaso tojitiajaca. Nojori jaara maninia miijiaca pueya quiri, na nuhuaji cutara, nojori cuaara jiyatesaaria narta Pueyaso pueya naacunaa nojori quiniuria.¹¹ Naajuhuaj, Pueyaso pueya naacunaa niquiocohua cuaara quiiria tojishano maa-jipohua, maja rimiaacatujurí. Cuaara quiiria niishiriojojuaca, na sequesano miijiaca pueyaracaanunio.¹² Cante Pueyaso pueya naacunaani, nojori cuaara jiitiaara saa niquiriyatu niquiocuaja. Cuaara quiiria necohua niishitiojojua maninia casaa, na tojitiajaca necohua quiniuria. Naajuhuaj, cuaara quiiria maninia jiitiaja na tiajinia quiniae pueya.¹³ Naacuajitj, Pueyaso pueya naacunaa jaara maninia poonijoquiaa na naacusacari narta Pueyaso pueya, nojoriiri seetanujuanaa pueya tojishano pueya quiniutianiya. Naajuhuaj, nojoriiri socua jiyanohua Jesucristoocua tiuujiacara jatanutaniya, na puereyaquiniutia nojori poonijionura pa Jiyaniijiara.

Jesucristojiniji Pueyaso niishitishano pueyani, paari nocua tiuujiacani

14-15 Timoteonaa, janiyari quiocua naquerejiyani. Naajaa, janiyari quiara naajiya nioni. Naacuajitj, janiya jaara tarishirini, janiyari paniyani juhuacarijia quia niishiniuria taa quijia quia quiniutianiyan, Pueyaso pueya maanujinia quia quishacari. Pueyaso pueya maanucua-jaari pueyaracaanu rishijia Pueyaso quiquio. Na saquiriojosano pueya nojori quiniuucua, nojoriiri na rupaa jiitianaacuaja, nocuaji tacunaa-jaariuhuaj.¹⁶ Seetanujuanaa nocuaji jiuujiatesanoori Pueyaso niishitishano Jesucristojiniji pajaniya. Paari nio sequesanoocua tiuujiacani: Pueyaso Niyanuuri pueyanora jataquiaari, na rupuenura pajaniya.

Pueyaso Sohuanuuri pa niishitiquiaari, nojuajaari tojetaaru-cuajanaa sesa miyashijia. Naajuhuaj, Pueyaso seyacuajaari Jesu niquiquiaari na samiitiasacariuhuua. Nojuajinijiiri pohu-atasaaquiaari Judiocuaca niquiara, taucuaca niquiarajuhuaj. Pueyapueeri nocua tiuuquiaari. Na Queeri na tacaniquiaariuhua Jiyaniijiajanaa na quiniuria.

4

Pueyaso Rupaa carteriquiano pueyajiniji pohuatasano

¹ Pueyaso Sohuanuuri maatia pa niishitiquiaa, nio pa quishacari nuhuaji noojiaqueya pueyari Pueyaso rupaa tarinitianutaniya tojiniu, tamaatia niishitiosano nojori tojiniuucua. Nojoriiri seetanujuanaa sapojosaaanutaniya naa nojori tojiniuucua samaruhua niishishano.

² Nojoriiri sapojonuujuaca pueya tojitiajacara quiniutianiya, noo pojori, sapuenu juhua maninia niquishano pueyatej. Cuno sapojonuujuacaari tariucua sesa miiniuucua jiitiquiono. Majaari tari na niishitiuni caririquiniu.³ Cuno pojoriiri pueya niishitiojoua maja na caminiuria. Niishitiojonuuquiaajaariuhuaj maja pueya miaquenura noojiaqueya miaquesanojuhuaj, teyanocua Pueyaso shipiniquiaari Jesucua

tiuuijiacaracuajani, cante seetanu rupaaajanaa niishijiacacuajani. Cuno miaquesanocuajaari pa timitiascoriquiano, Pueyaso pa sequenura, "paacarasho".⁴ Puetunu Pueyaso shipinishano casaajanaari maninia. Puetunu miaquesano casaajanaa cuaara puereyaquishaaria miaquenu, paa jaara coteenu nocuara Pueyaso sequereni, "paacarasho".⁵ Pueyaso rupaacua tiuuijaca pa quishacari, naacuajitij, nocuara pa secojosacari, Pueyasoori na jiyatequiaa maninia na quiniuria pajaniyara.

Jesucristora poonijiona pueyanotucua taamueca pueyano quiriquiani

⁶ Pueyaracaanu parta Pueyaso pueya quia niishitiojoriquia nio cua rootasano quiajaniya. Naajuhuaj, pueyaracaanu tama quia cuaqueyajaja quia cumaquiriquia Jesucristojiniji pa niishishano rupaata, tama Jesucristojuaja rootasanotanio, taa quia tojiquiaacuajanoj. Quiajaara naa miijia quiritij, quiaari maninia poonijiona quiniutianiya Jesucristora.

⁷ Majaari najuhuana tariucuacaanu supuetanaa pohuatanuusano tojija quia quiniu, najuhuana tama pueya niishishanojuajano. Majaari cuno tojiniuucua quia cojenu najuhuanaj. Jiyano hua quia jiaatiare cutara, saaja Pueyaso tojijia quia quiniuria. Naa miiniu quia saniniujiuri jiyano hua, seetanujuanaa Pueyaso panijia quia quiniuria.

⁸ Pueyari queraatia casaa miiniu niishiya, cumueeca pueya nojori quiniuria. Supuetanaari pueyaracaanu nanoojoquiaari na cuaqueyna jiyartutenura, cumueeca na quiniuria. Cunoori maniniacuaja pa cuaqueyara, mijiria pa quishacari. Saniniujia, socua jiyano hua maninia cutaraari Pueyaso panijia pa quiniuria seetanujuanaa. Cunoori jiyano hua maninia, mijiria pa quishacariria, Pueyaso shuriucua pa quishacarirajuhuaj.⁹ Nio cua sequencesanori seetanujuanaa. Puetunu pueyajanaa cuaara na tojiuria.¹⁰ Cunora, pueya jaara pa miihariquia, naajaa, paari jiyano hua poonijioquiaa pueya pa tojitiniuria Pueyaso rupaani. Majaari naa miiniu pa tarinitianu. Paacuajaari niishiyani, paari pueyaracaanu rishijia Pueyasocuua tiuyani. Nojuacuajaari puetunu pueyacuaji Tacunajanaa, canapue cutarate nocua tiuuijaciacuajani.

¹¹ Nio cua sequencesanori quiajaniya quia niishitiojore pueya. Nojori quia nacasuriquia jiyano hua, na tojitianura quiajaniya.¹² Majaari pueya shanacunu quiocua, nojori rerequetenura quiajaniya, mashaja quia quiniuucua. Saniya maninia quijia quia quiriquia cutara, pueya jiaatianura quiocua, juhua quiajaniya nojori quiniu paniniuriajuhuaj. Naaratej, tama quia cuaqueyajaja quia cojuare, taa quia pocuaani, taa quia quiyani. Naajuhuaj, seetanujuanaa panijia quia quiri, Pueyaso rupaacua tiuuijajuhuaj. Majaari rucuajeejoua quia quiniu. Naa maninia miijia quia quiri, pueya jiaatianura quiocua.¹³ Naacuajitij, cua tiuuijajuhuaj quiajaniya, pueya niquiara maatia quia serojoriquia Pueyaso Rupaa. Parta Pueyaso pueya quia nacasuriquia jiyano hua, Pueyaso tojitiajaca nojori quiniuhuara seetanujuanaa. Seetanujuanaa nojori quia niishitiojoriquia maninia.¹⁴ Pueyasocuajaari na cumaaca niquitioquiaari quiajaniya. Pueyaso Sohanucuajaari naa pohuetequiaari Pueyaso pueya maanu jiitiana pueyatej, nojori jaara niojoguiaari na juashiquia quiocua, quia jiyatesaanura Pueyasora poonijiona quia quiniuria. Cuno cumaaca quiaa na jiitiaani, quia poonijiotere pueyaracaanu. Majaari najuhuana na jiitianan.

¹⁵ Puetunu niya cua rootasanojuanaa quiajaniyani, cuno tojijia quia quiriquia. Naa quia quiritij, puetunu pueyajanaa niquinuria taa seetanujuanaa socua maninia Pueyaso tojijiara quia quiyareeni. ¹⁶ Naacuajitij, tama quioojiaaja quia cojuare. Naajuhuaj, tama quia cuaqueyajaaja quia cojuare seetanu rupaajanaa quia niishitiojonura pueya. Majaari quia tarinitianu miiniu cua sequesano quiajaniya. Naacuajitij, quia jaara naa maninia mijiia quiri, quiaari tama quia cuaqueyajaaja jiyateya maninia Pueyaso pueyanora. Quia tojitiajaca pueyari Pueyaso pueyara quiniutianiayahuaj.

5

Paatucua taa jiitiariquia parta Pueyaso pueyani

¹ Majaari quia saaquiapue quia nacasunu quia juaaniutia, Pueyaso rupaa nojori tojiyaquiniuucua. Nojori quia nacasure jacaria, juhua quia que. Mashiquiori quia nacasure jacariajuhuaj, juhua quia tapueyocuaca. ² Naajuhuaj, motajoori quia nacasure juhua quia nucua. Niyacojojori quia nacasure juhua quia rimiatuhuajuhuaj, maja nojoriicua quia jiaatianuta.

³ Mashiquiopue jaara tojetaarucuajanaa niquiohuaju quiri, jini-anuhuajunio, Pueyaso pueya cuaara nojori naacuura. ⁴ Saniniuujia, mashiquio jaara niquiohuaraca quiriquia, jinianuhuaraca soj, cuno pojori cuaara coteenu tama na nucuajaaja cojuatunu niishiiria, na jiijuhuaj. Naacuajitij, necohua cuaara na queya cojuaara, taa na queya cojuaquiaari nojoricuaani, naatujoori nojori quishacari. Pueyasoori naa na queyacua taraajejaca timitiaja. ⁵ Noo mashiquio, cante seetanujuanaa jiypueejuni, nojuajaari saaja Pueyasocua tiuuquiaa. Majaari na tarinitianu secojonu juuca, niucuanio. ⁶ Noo mashiquio saniniuujia, tama na cuaqueyajaaja shuquiritijatej, nojuajaari tariucua juhua macu Pueyasora, saminio na quishacarija. ⁷ Parta Pueyaso pueya quia niishitiojore nio cua rootasanojuhuaj, sesacasoo nojori quiniuria. ⁸ Canapuete na queecua, na nucuaacua taraajeyaquijiani, tama na tiajinia quijacaca pueyacuajuhuaj, naa mijiacatej, nojoriiri Pueyaso Rupaa tojiyashiji-acara jiyaterohua tari tama nojori cuaqueyajaaja. Naacuajitij, nojoriiri socua tojetaarucuajanaa sesa, Pueyasocua tiuyaquijia pueyajiniji.

⁹ Mashiquio jaara Pueyaso pueya jiitiana naacunara jiyatenu pansihaare, cuno mashiquiopue cuaara quiiria tariucua sesenta marijia shocotejono. Cuaara quiiria noo mashiquio, cante saaja na camishano pueyanota quiquiaari maninia pueyaracaanuni. ¹⁰ Cuno mashiquio cuaara niishishano maaji quiiria, maninia mijiia na quiniuucua. Cuaara quiiriajuhuaj, cante maninia canashitijoquiaari necohuani. Cuaara rucoojuacaacua taraajeja quiiriajuhuaj, na tiajinia na maquiojoua. Cuaara maninia mijiia quiiriajuhuaj, narta Pueyaso pueya niohuaca jee-quejojua. Cuaara taraatia miishano pueyacua taraajeja quiiriajuhuaj, nojori cumanijianajuhuaj. Cuaara puetunu maninia na miiniujiana tarinitiaaquijia quiiriajuhuaj.

¹¹ Saniniuujia, noo mashiquio, teyanote juhuanojuaja maja na shocotejono sesenta marijiani, nojori cuaara jiyateyaquishaaria Pueyaso pueya jiitiana naacunaara. Nojori na naata Cristo samiritianu, niyacaaniuucua nojori jiaatiasacari. ¹² Naacuajitij, nojori camishacariuhua, nojoriiri tari sesa miirii, nojori jatanuucua nojori

sequesano saaja Jesucristora na poonijionura. ¹³ Naajuhuaj, niyacoo naata mashiquio nojori quishacarijia, nojoriiri saaja rucuanejonu maniniucuaja, na tiuquijionura puetunu tiacojuanaa. Naa tama na poonijiosanojuaaja na jiitiaequivishacaritij, nojoriiri taajecatujuriria quijia. Majaari saaja taajecara na quiniu, juura tojiyajaa pueya sequesanoori, tariucua na caminiujiuniu tamasacaraj. Naajuhuaj, sacuaraatia neteyocojijari juhua paateca, na tajetenura pueya, na caminiujiushacari jiyasohuaja niishishano casaa. ¹⁴ Naaratej, janiyari cunora paniyani niyacoojori naata mashiquiopue cuaara camiyora neyacaara. Cuaara muetuurrahuaj. Cuaara na tia camarucua quiquioora. Nojori jaara naa maninia miiritij, nojori miishanoori maja quenaaja na quiniu quiniutianiya pa paraa rimiaaqueenura Pueyaso pueyacuara. ¹⁵ Noojaqueya niyacoojori naata mashiquiopueeri Pueyaso tojiniu tarinitiacanu tari, Satanás tojijiaca nojori quiniuria saniniuujaia.

¹⁶ Pa Jiyaniijiaacua tiuujjaca maajipohuajinjinio jaara tama na pueya-jinjiniojuaaja jiitiare mashiquiopue, nojori cuaara na naacuura tamajaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquiopue, canapuete tojetaarucuajanaa jiyop-ueejuni.

¹⁷ Pueyaso pueya jiitiana, noo pojori canapuete maninia jiitiana narta Pueyaso pueyani, nojori cuaara narta Pueyaso pueya tojishano quiiria. Naajuhuaj, nojori cuaara nareja niquitiosaaria, na panishano nojori jiitianura. Pueyaso pueya maanu jiitianaajinjinio, canapuete Pueyaso rupaa pohuatanaacuajani, Pueyaso rupaa niishitiojonaanio, nojori cutara cuaara socua queraatia niquitiosaaria, maninia poonijiosano nojori miiniuucua. ¹⁸ Tariucuacaanu Pueyaso Rupaajinlia naajotasanoori naa niishitiojijayuhuaj, naa na sequesacari miriqui:

“Majaari quia juunu rupaa mishiquionu na miaqueyaquiniuria quia casaa, quia rapijotesacari quia natau, na jocuanura na sucuajinji”.

Naa sequeyajaaariuhuaj:

“Poonijotesano pueyano cuaara niquitiosaaria na poonijionu sami”.

¹⁹ Pueyano jaara saquiriojotariquia Pueyaso pueya maanu jiitianaacuara, majaari na tojiniu, jaara nocuara cojitiaquiri saquiriojotanu. Querajaa pueya jaara nocuara cojitiare saquiriojotanu, cuno pojori sequesano cutaraari seetanujuanaa. ²⁰ Naacuajitij, Pueyaso pueya maanu jiitianaajinjinio jaara sesa miiriquia, Pueyaso pueya maanu niquirara quia nacasurenoj, puetunu narta Pueyaso pueyajanaa puerenura, maja sesa nojori miiniuriajahuaj. ²¹ Timoteonaa, janiyari nio quia sequeya Pueyaso niquirarani, Jesucristo niquirajahuaj, na saquiriojosano seya niquirarano. Nio cua rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa maninia pa niishiyaquishacari na miishano. Naajuhuaj, majaari pa naata jiuu{j}iaaniu pa panishano pueyano, nojuaja jaara sesa miiri. Naacuajitij, majaari rimiajata mijiionu sacuaraatia. ²² Naajuhuaj, majaari senota quia juashiquia quia nianu quia niishishoo pueyanoocua, nojuaja quia jiyatenura Pueyaso pueya jiitianara. Maninia cutaraari coteenu quia niishiniuria taamueca

pueyanotenojoni, maja sesa miijia pueyano quia jiyatenura Pueyaso pueya jiitanara. Quia jaara naa Pueyaso pueya jiitanara jiyatere quia niishiyaquishoo pueyanotej, Pueyasoori quiocua tiutianutaniya cuno pueyano miishano sesa. Cunora quia sequeyanijia, tama quia cuaqueyajaaja quia cojuare, tojetaarucuajanaa sesa miyaquijia quia quiniuria.

²³ Timoteonaa, naa quia seeco noojonuuucuatej, majaari saaja mo-huaca ratunu. Sequeyarucua cusosu quia quiniuucua, secaja vino quia raturiquiajuhuaj quia jiniacuma na jeecanura.

²⁴ Noojiaqueya pueya, sesa nojori miishanoori maatia niishishanocuaja, Pueyaso saniitionu juuca quiyaquishacarijia. Tamasacara saniniujia, sesa nojori miishanoori maja na niishishaanu quiniutianiya juhuanojuaja, Pueyaso cuaara nojori nujuatejore na tacojijaatiija, na nequesoresesocoriquiano. ²⁵ Naajaariuhuaj, maninia pa miishanoori maatia niishishano mijiria. Jiyasohuaja maninia pa miishanojuhuaj, cunoori na nuhuaji niishishaanutaniya maatiajuhuaj.

6

¹ Parta Pueyaso pueyajinjinio, canapuete poonijotesano pueyani, nojori cuaara na camarucua tojitajaca quiiria. Nojori cuaara rerequeteyaquiiria na camarucua, na camarucua mariqui Pueyaso sesacareeri, pa niishitiosanonio, na tojiyashijia na seru quiniuucua. ² Poonijotesano pueyano camarnu jaara Pueyaso pueyano quiriquia, juhua na serujuhuaj, na seru cuaara na tojijia quiiria. Cuaara na rerequeteja quiyaquiiria, narta Pueyaso pueyano na camarnu quiniuucua. Nojuaja cuaara seetanujuanaa maninia poonijoora nera, na niishishacari na camarnucuajaari narta panishano Pueyaso pueyano.

Cante seetanujuanaa shuquiriaatia quijiacani

Timoteonaa, nio cua sequesano quia niishitiojore pueya. Nojori quia shiniijiuri na tojitianurahuaj. ³ Tamonu jaara tamaatia niishitioriquia cua niishitiosanojini, nojuajaari tojetaarucuajanaa moseeca. Pa Jiyaniijia Jesucristo rupaari jiyanolua maninia. Na niishitiosano pa tojishacari, cunoori pa naacuquia juhua Pueyaso pa quiniuria socua. ⁴ Cante cuno niishitiosano ruuretaja tama na niishishanojuaja na niishitiojonurani, nojuajaari tama na cuaqueyajaaja jiyaniya nojuaja niishijia cutara. Nojuajaari juuatatoonu porocuajuhuaj, Pueyaso rootasanojiniji na taacanuusacari. Naa quijiaca pueya quishacaritij, nojoriiri juajiacara jataquia, nojoritia juayonuujutajaca shocotanuccua nojori. Nojoriiri juhuacatecara ruutaquetoopiaa na juayonutanura. Sesacatoopiaajaariuhuaj. Naajuhuaj, nojoriiri najuhuana soquequia, narta Pueyaso pueya naasucua sesa miiquiaa. ⁵ Nojoriiri juayonuujutanu tarinitiaaquijiaca. Nojoriiri maja na naata maninia niishiriojonu socua. Nojoriiri maja na niishiniu seetanu rupaajanaa Pueyasojiniji. Nojoriiri Pueyaso pueya jiitajacara quiniu paniya, nojori jiyanihacari nojoriiri naacuaji jiyanolua casamiriacara quiniutianiya. ⁶ Taquiriirinij, Pueyasoocua tiuuijaca pa quishacari, paacuaquini-atejaj seetanujuanaa juhua queraatia casamiriaca quijiacani. Paacua-jaari shuquiriaatia quijiaca Pueyaso rupaacua tiuuijaca pa quishacarini,

juhuajaniya quihiaca pa quishacarijuhuaj pa jiitiasano casaaniyojata. ⁷ Paacuajaari juhuasunucua roosaaquiaari mijiriani. Naajuhuaj, paari juhuasunucua tacateriquianohuani. ⁸ Naaratej, paa jaara pa miaquesocoriquiano jiitiariquian, paa jaara pa cushishocoriquiano jiitiariquiajuhuaj, saa cunotaja shuquiriaatia pa quirij. ⁹ Saniniuuquia, noo pojori, jiyanolhua casamiriaca quiniuucua jiaatiajacatej, nojoriiri majaa na niishiniu rejetenu, na panishano na miyaquinuria. Naacuajitij, nojoriiri cocuaatia miiquiaa. Nojoriiri juhua norijiosaaquia, na juhuana casamiicua nojori jiaatiasacari, sesa casaacuanio. Puetunu cuno sesa casaajanaari pueya sesoquia, nojori saniitiosaanura taraatia. ¹⁰ Cumaneeecaacua jiaatianu jiyanolhuani, cuniquiji supuejaari puetunu sesa casaa pa miiniuriajanaa. Naacuajitij, noojiaqueya parta Pueyaso pueyajinjinioori Pueyaso rupaa tojiniu tarinitiacanu tari. Nojoriiri tama nojori cuaqueyajaaja miitiquiaa naquia, naa cumaneeecaacua jiaatiajaca nojori quishacaritij. Naaratej Timoteonaa, majaaari cumaneecaacua jiaatiaja quia quiniu.

Pablo shinijiushacari Timoteo, Pueyaso tojija na quiniuria pueyacaanu

¹¹ Quijaniya Timoteonaa, quiaacuajaari Pueyaso saquiriojosano pueyano. Naaratej, puetunu sesa casaajanaa miyashijia quia quiri. Tojetaarucuajanaa saaja maninia mijjia quia quiri, juhua pa Jiyaniijiaja. Pueyasoocua tiuujia quia quiri socua. Socua panijia quia quirijiujuhuaj. Puetunu casaajanaa rejeretaja quia quirijiujuhuaj. Jacaria pocuaja quia quirijiujuhuaj, majaa pueya rerequeteja. ¹² Pa paraca nujuataja quia quiriquia, jiyanolhua quia tiuuniutia Pueyaso rupaacua. Pueyasocuajaari quia saquiriojoquiaari na pueyano quia quiniuria. Cunora, quiaari queraatia pueya niquiara pohuataquiaari Jesucristoocua quia tiuuniujinji. Naa pueyaracaanu rishijiarano quia quishacaritij, cunora, majaaari Pueyaso niquitiojonu panishano quiajaniya jaaretenu. ¹³ Quiaacuajaari niishiya taa Jesucristo seetanujuanaa pohuataquiaari Poncio Pilato niquiaracuajani, nojuajaari seetanujuanaa Pueyaso Niyanu. Naajaa, nojuajaari niishiquiaari nojuajaari cunora mosaanutaniya. Na Que Pueyasocuajaari na samiitianiquiaariuhua. Pueyasocuajaari saminiiora jiyateja puetunu saminio casaajanaa. Naa quia niishishacaritij Timoteonaa, janiyari nio quia sequeya Pueyaso niquiarani, pa Jiyaniijia niquiarahujuhuaj. Cua tojiri. ¹⁴ Puetunu cua rootasano quiajaniyajanaa quia tojiri. Majaaari na jataniniu quenaaja, pa Jiyaniijia mariqui quia niishitiojosano tamacareeri. Taa cua rootaa quiajaniyacuajani, na tojija quia quiri pueyaracaanu, pa Jiyaniijia Jesucristo cuaara tiuquiriohuajaatijia, Jiyaniijiajanaa na quiniuria. ¹⁵ Na Que Pueyasoori na tiuquitiniutianiya na panishacari, taa na sequequiaaricuajani. Pueyasocuajaari jiyanolhua pa timitiasano, saaja maninia na quiniuucua. Nojuajanaari Jiyaniijia. Nojuajaari puetunu tamasaca jiyaniijianucuajanaa Jiyaniijia. Nojuajaari camarucuajinji Camarnujuanaa cutara. ¹⁶ Saaja nojuajaari pueyaracaanu quijiajuhanaj. Majaaari na supuenu quiquiaari. Majaaari na shaajenu quiniutianiayahujuhuaj. Nojuajaari jiyanolhua na shacantuua cumaacajinia quijiajuhanaj. Cunora, majaaari quenaaja tamonu pueyano na naata nocua catecanonu. ¿Canteeri na niquiquiaari

quenaajani? Shaaqui. Pueyanoori maja na naata na niquiniu. ¡Nojuaja cuaara pueyaracaanu timitiasaaria! ¡Nojuajaari namitia na cumaaca jiitianajuhuanajaj! Cuaara naa quiiria pueyaracaanutej.

¹⁷ Timoteonaa, parta Pueyaso pueya quia tojitiri nio, noo pojori, quer-
atia casamiriacatej. Nojori cuaara niishiuria maja pueya shocotejaca
nojori quiniuria, casamiriaca nojori quiniuucua. Nojori cuaara niishi-
riajuhuaj, maja na casamiicua nojori tiuuniuria, nojori jiyanihacari
nojoriiri pueyaracaanu shuquiriaatia quiijiaca quiniutianiya casamiri-
aca nojori quiniuucua. Pa jiitiasano casamiiri shaajeriquiano. Nojori
cuaara Pueyasooqua tiuuria cutara. Nojuajaari capora cutara, na niqui-
tionura puetunu pa panishano casaajanaa, shuquiriaatia pa quiniuria.
¹⁸ Cunora, nojori quia niishitijoore, pueyaracaanu maninia miijiaca
nojori quiniuria. Naatej, taa queraatia casamiriacatucuaa nojorini,
maninia nojori miishano cuaara naa queraatia quiirajuhuaj. Nojori
cuaara ritia niquitijojuaca quiiria nojori jiitiasanojiniji, narta Pueyaso
pueyano jiitiaaquishacari na panishano. ¹⁹ Naa capora nojori quishacar-
itij, nojoriiri juhua tari jiyocuacaanu racataa nojori casaa. Naacuajitij,
nojoriiri seetanujuanaa shuquiriaatia quiijiaca quiniutianiya pueyara-
caanu, mijiria, jiyocuacaanunio.

Pablo rootasano Timoteo, naajionu na tucuatasacari

²⁰ Timoteonaa, Pueyasocuajaari quia jiyatequiaari na rupaajiniji po-
huatana quia quiniuria. Maninia quia cojuare seetanu Pueyaso rupaa-
janaa. Majaari najuhuana tama pueya niishitiosanojuaaja tojijia quia
quiniu. Noo niishishanojuhuaj, pueya sequesano: “Seetanu niishijia-
janaa niishishano cutaratej”, majaari cuno tojiniu. Cuno niishishanoori
seetanu niishishanojuanaa paraca, najuhuanaari. ²¹ Noojiaqueya parta
Pueyaso pueyari Pueyaso rupaa tojiniu tarinitiacanu tari, cuno na-
juhuana niishishanoocua nojori tiuuniuucua. Niojuanaa Timoteonaa.

Pa Jiyaniijia cuaara quia cumaquiiria.

TANEE PABLO NAAJIONEE TIMOTEOCUARA

Pablo saruhuatasacari Timoteo

¹ Janiyari Pabloni, Jesucristo jiyaramiquishano, taa Pueyaso paniquiaaricuajani. Naacuajitij, janiyari Jesucristojiniji pohuatanara jiyatesaaquiaarini, pueya niishiniuria seetanujuanaa, nojoriiri pueyaracaanu rishijiacara jiyatesaanutaniya Jesucristoocua nojori tiuushacari. ² Naaratej quianu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniijia Jesucristojuhuaj, nojori cuaara cumaquirria quiajaniya. Naajuhuaj, nojori cuaara taraajeera quiocua, nojori cuaara pueyaracaanu quioojia cajitiiriajuhuaj shuquiriaatia quia quiniuria.

Jesucristojiniji quia pohuatariquia tamasaca

³ Pueyaso cua secojosacari pueyaracaanu, juuca, niucuanio, janiyari quiocuara secojoquiaani. Cua niishiriojosacari quiajaniya, maninia Pueyaso tojijia quia quiniucua, janiyari Pueyaso sequequiaani, "paacarasho". Janiyari nera shitimia poonijioquia coojia najiquitishooni, taa pa supuetanaa tojitiaquiaari Pueyasocuaani.

⁴ Majaari cua niyajetanu quiquiaa quia nujuquenu cucua, januya jaara quia shuriucuaji quiaquiaarini. Janiyari cunora jiyanolhua jiaatiaa cua niquiniuria quiajaniyan, shuquiriaatia cua quiniuria quia shuriucua. ⁵ Janiyacuajaari niishiyani quiaari seetanujuanaa pa Jiyaniijiaacua tiuuijacuaja. Quia ji Loida, quia nucua Eunicenio, nojoriiri coteenujuanaa quiocuaji Pueyasocua tiuuijaca quiquiaari. Majaari cua taacanuunu quiaari seetanujuanaa Jesucristoocua tiuujia quiquiaajuhuaj, taa nojori quiquiaaricuanaa.

⁶ Pueyasocuaajaari na cumaaca niquitioquiaari quiajaniya, cua secojosacari quiocuara, cua juaashiquia cua niasacari quiocua. Naacuajitij, quiaacuajaari Pueyaso Sohuanu cumaacaraca quioojiajinia. Naaratej, Pueyaso Sohuanu quia shanacure quiocua, na cumaaca na poonijotenura socua quioojiajinia. ⁷ Pueyasoori maja na niquitionu quiquiaari na Sohuanu, puereja pa quiniuria. Na Sohuanu niquitioquiaari pajaniya cutaraari, cumaacaraca pa quiniuria, panijiaca pa quiniuriajuhuaj, maninia niishiriojojuacaranio.

⁸ Naacuajitij, majaari quia caririquiniu pa Jiyaniijia Jesucristojiniji quia poojotanura. Naajuhuaj, majaari cua naaqui quia caririquiniu, nujuatejojuajinia cua nujuatesaanuucua Jesucristojiniji cua pohuatanuuucua. Pueyaso cumaquishacari quiajaniya, juhuajaniya quia rejeretare, quia jaara naquiyá miishaariquiajuhuaj, Jesucristojiniji quia pohuatasacari. ⁹ Pueyasocuaajaari pa jiyatequiaari na pueyaso. Nojuajaari pa saquirijoquiaari saa neraja pa quiniuria. Na jiyanooniu pajaniyani, majaari na quiniu quiquiaari maninia miijiaca pa quiniucua juucua. Maja. Nojuacuajaari naa pa jiyanoohoquiaari saaja naa na miiniu paniniuucua, jiyanoojia na quiniuucuajuhuaj. Jiya shipiniyaquishacarijia, Pueyasoori jiyacari niishiriojoquiaari taa na jiyanoonitianiya pajaniyani, Jesucristo cusosacari pa niti.

¹⁰ Quiari naataja pocuaji Tacuna Jesucristo niniuucua, Pueyasoori

pa niishitiquiaari taate na naata jiyanooniu pajaniyani. Cunora, Jesucristoori pa niti cusoquiaari. Na samiitiasacariuhua, nojuajaari cusionu shocotaquiaari. Naacuajitij, nocua pa tiuushacari, paari pueyaracaanu rishijiara jiyatesaanutaniyani.

¹¹ Pueya niishiniuria nio rupaa, Pueyasoori cunora na jiyaramquis-hano pueyanora cua jiyatequiaari, pueya cua niishitiojonura Jesucristojiniji. ¹² Naacuajitij, janiyari niya naquiya miya nujuatejojua-jiniani. Naajaa, majaari cua caririquiniu. Janiyacuajaari niishiyani canaacua cua tiuuquiaarini. Nojuacuajaari pocuaji Tacuna Jesucristo. Cunora, janiyari seetanujuanaa niishiyani, nojuajaari cumaacaraca na cojuanura janiya, nojuaja cuaara tiuquiriohuajaatijia. Naajuhuaj, nojuacuajaari cumaacaraca na jataniniuria pajaniya, tojetaarucuajanaa quiarinio pueya pa quiniuria na tiuquishacariuhua pocua.

¹³ Timoteonaa, maninia niishitiojosano tojijia quia quiriquia taa cua niishitijoquiaari quiajaniyacuajani. Naa quia miiriokia Pueyaso ru-paacua tiuujia quia quishacari, pueya panijia quia quiniuucuajuhuaj, Jesucristo rupuesano pa quiniuucua. ¹⁴ Pueyasocuajaari quia niishi-tiquiaari seetanu rupaajanaa. Pueyaso Sohuanu quiniuucua poojiajinia na cumaquiniuria pajaniya, cuno niishitiojosano quia jiitiare maninia, maja tamaatiara na jatanishaanura.

¹⁵ Quiaacuajaari tari niishiya, puetunu Asia jiyajinjinio parta Pueyaso pueyari cua tiujiatiquiaari tamajaaja. Majaari na naacutunu paniniu quiqianu janiya. Nojorijinjinioori quiqianujuhua Figelo, Hermógenesnio. ¹⁶⁻¹⁷ Saniniuujia, Onesíforo cutaraari cucua tiuquitiasucanu. Cunora, pa Jiyaniijia cuaara nocua taraajeera, puetunu na tajinria quiijacaacuajuhuaj. Nojuaja jaara Roma tiacajinria tiuquiquianu, nojuajaari ritia coteecanu na pajenura janiya, cuaara cua riuriatarejaatijia. Jaara cua riuriatacanu, nojuajaari coojia cajitiquianu. Nojuajaari pueyaracaanu cucua tiuquijiocanu niya nujuatejojuajinria, na naacunura janiya. Majaari cucuaji na caririquiniu quiqianu nujuatesano cua quishacari. ¹⁸ Quiaacuajaari niishiyajuhuaj taa nojuaja naacuquiaari pajaniyacuajani, Éfeso tiacajinria pa quishacari. Naa maninia na miiniuucua pajaniyacuaatej, pa Jiyaniijia tiuquishacariuhua pocua, nojuaja cuaara maninia miiria Onesiforo saniniuujia.

2

Jesucristora poonijiojua quia quiri quia puereyaquiniutia

¹ Quijaniya saniniuujia quiyanunaa, quioojia quia cumaquiriquia Jesucristo niquitiosano cumaacata. ² Nocua tiuushano pueya quiarta Pueyaso pueyajinjinio quia niishitiojore Pueyaso rupaa, nojori niishi-tionura tamasaca saniniuujia. Cuno maninia pueya quia niishitiojore puetunu Pueyaso rupaajanaa, taa quia tojiquiaari queraatia pueya niquiara cua pohuatasacaricuajani.

³ Juhuajaniya naquiya miiniu rejeretaja quia quiriquia juhua pa Jiyaniijia Jesucristo soldado, puereyashijia. ⁴ Pueyano jaara soldadora saquirijoosaare, cuno pueyanoori maja na naata tama na panishano-juaja miiniu socua. Nojuajaari pueyaracaanu na camarnu tojijia, na camarnu timitianura nojuaja. Naa pa Jiyaniijia tojijia quia quiriquiajuhuaj Timoteonaa. ⁵ Naajuhuaj, pueya tacuarishijiosacari,

nojori cuaara quiuria tacuarishijionu camarnu tojijiaca. Tamonu jaara shocotare na tojiyaquiniutia camarnu, cuno na shocotanuuri najuhuanaj. Naacuajitij, majaari na niquitiosaanu casaa, sesa na miiniutia na shocotasacari. ⁶ Nio quia niishirijiuahuaj: cante cuhuariquia cuhujatani, nojuaja cuaara coteenu na senoosanojiniji racataara na panishano. Na nuhuaji cutara, nojuaja na naata tamasaca niquitiojonu na senoosanojiniji. ⁷ Nio miriqui cua sequencesanoocua quia niishirijore. Pa Jiyaniijiacuaajaari quia niishitinutianiya puetunujuanaa.

⁸ Majaari nio niyajetanu: Jesucristoori macujiniji samiitianishaquaariuhua, Pueyaso Niyanu na quiniuucua. Pueyano quiquiaariajiaariuhua. Nojuacuaajaari pa supuetanaa jiyaniijia David niquiohuacuajinio supueno pueyano quiquiaari. Naacuajitij, nojuajaari Pueyaso Jiyarosano quiquiaari mijiria quinia pueya niti na mosaanura. Cunocuajaari cua pohuatasano Pueyaso Rupaa. ⁹ Naa cua poojotanuucuatej, janiyari naquiya miyani. Janiyari cumayocuata moronucua quiyajaaniuhua, juhua sesa miijia. Naajaa, Pueyaso rupaa cutaraari maja na naata sanaajasaanu. ¹⁰ Cunora, janiyari puetunu naquiya miiniujianaa rejeretaquiaani, Pueyaso saquiriojosano pueya tojiniuria Jesucristojiniji. Naacuajitij, nojoriiri na naata nocua tiuuniu, Pueyaso pueyara nojori jiyatesaanurajuhua, taa na jatanishano pueya pa quiyacuaani. Naacuajitij, paari mariyata shacantuua quijiacara jatanishaanutaniyani, Jesucristota pa quiuria pueyaracaanu.

¹¹ Nio sequencesanoori seetanujuanaa:
Jesucristoocua pa tiuushacari, Pueyaso Neyanu mosaanu jiyateya pa niti na quiniuria sesa pa miishanojiniji. Naacuajitij, Jesucristo mosaanu jaara pocuara quiquiaari, na samiitianuhuari pajaniyara quiyajuhua, pueyaracaanu rishiriquivano pa quiniuria. ¹² Naajuhua, paa jaara naquiya miitiasaariquia nocua pa tiuuniuucuani, nojuajaari camarucuara pa jiyatenutaniya narta jiyaniijianucua pa quiniuria. Saniniuujia, pa jaara pa Jiyaniijia tamacariquia Pueyaso niishiyashijiac pueya niquiarani, nojuajaari pa tamacanutaniyajuhua. ¹³ Paa jaara na sequencesano tojiyashijiac quiriquiani, naajaa, nojuajaari pueyaracaanu na sequencesano miijia. Pueyaso Naa sequencesano jataniyashijia cutara.

Taamueca quijiate Pueyaso shuquiritasano nera poonijionani

¹⁴ Parta Pueyaso pueya quia niishitiojorohuarohua maja najuhuana nojori juayonuujutanura tamaatia niishitiosanoocua. Jiyano hua quia nacasure nojori Pueyaso niquiara, maja naa nojori nacoojonura najuhuana supuetanaa niishitiosanoocua. Naa tamaatia niishitiosanoocua juayonuujutanuni, cunoori maja na cumaquinu na tojiniaa. Socua nojori sesoya cutaraari. ¹⁵ Tama quia cuaqueyajaaja quia cojuare, saa maniniaja quia niishitiojonura Pueyaso jiniji cuno seetanu rupajanaa. Naacuajitij, Pueyaso Naa quia timitianutaniya nera poonijiona maniniu quia quiniuucua. Majaari capa quia niishitiojonu, quiaaa mariqui tamajaaja caririquiri. ¹⁶ Naaratej, majaari najuhuana tama mijiria pueya niishishanojuaaja quia tojinia. Pueya tojishacari cuno, nojoriiri socua jiyacatenutaniya Pueyaso tojiyashijiac nojori quiniuria. ¹⁷ Cuno najuhuana niishitiosanoori jiyano hua puereeta. Cunoori Pueyaso pueya tajinia paaqueja, na sesonura puetunu Pueyaso pueya

maanujuanaa. Naa nojori tajinia paaqueyari taa pueyano cusojuaja sapueja pueyano cuaqueya moquijiaquiaacuaani, na camaru na cusojuanura. Himeneo, Filetonio, nojoriiri naa miiquioya quiarijia.¹⁸ Nojoriiri seetanu rupaajanaa jataniquianu tamaatiara. Nojoriiri pueya niishitiojiya, paanaari tari tojetaarucuajanaa samiitianishanocuajani. Naacuajitij, majanaari pa cuaqueya jatanishaanu quiniutianiya, shacantuca cuaqueyaraca pa quiniuria taa pa Jiyaniijiacuaani. Naa nojori niishitiosacari najuhuanatej, nojoriiri noojiaqueya Pueyaso pueya cushitiojiya, nojori tiuyaquiniuria pa Jiyaniijia sequencesanoocua.¹⁹ Naajaa, Pueyasojuanaacuajaari pa niishitiquiaari na rupaari seetanujuanaa. Majaaari na naata jatanishaanu. Naa naajiotasano quiyacuajaari: “Pa Jiyaniijiaari na saquiriojosano pueya niishiyacuaja”.

Naa naajiotasanoori quiyahuaj:

“Canapuete pa Jiyaniijia Jesucristoocua tiuujiacani, nojori cuaara sesa na mijiionu tarinitiaara”.

²⁰ Sanajanaa, cua tojiri. Jiyano hua queraatia casamiriaca pueyano tajinia, cuno tajiniaari maja saaja orojiniji shipinijiosano coshiquia quiniu, miacojuaanio, platajiniji casaanio. Puetunu tamaatia casaajiniji shipinijiosano casamijianaari quijia. Quijijaariuhua mati, suruhuatu numajiniji quejasano. Quijijaariuhua maraujiniji panishano patacocua, conaanio. Puetunu cuno casamijinijinojuanaani, noojiaqueyari racatasano saaja masu miaquetejarano quiya, na raatojotajaranonio. Quiyajaariuhua rucucuaacuaji casaa, rucucua cajitiaja. ²¹ Paari naajuhuaj. Paa jaara tama pa cuaqueyajaaja cojuariquia tojetaarucuajanaa sesa pa miiniuucuajini, saaja pa Jiyaniijiaara pa quiniuriajuhuaj, naacuajitij, pa naata juhua pa Jiyaniijia timitiasano tohuatashiniyaju quiniu. Naacuajitij, pa Jiyaniijia na naata poonijiotenu pajaniya puetunu maninia casaajanaa pa miiniuria.

²² Sanajanaa, quiaacuajaari niishiya, casaa miiniuucua jiaatiajilate mashiquiorini. Puetunu cuno sesa niishiriojosanojuanaa quia tarinitiariquia. Saniniuu{jia, saaja maninia mijia quia quiriquia. Saaja Pueyaso rupaacua tiuujia quia quiriquia, pueya panijajuhuaj. Jiyanojija quia quiriquiajuhuaj. Naa quia quiriquia, taa puetunu Pueyaso jiyatesano sesa miyashijiaca pueyajanaa miquiaacuaani, pa Jiyaniijiaacua nojori tiuuniucua. ²³ Pueya jaara nacoojoriquia nojori niishiyaquishoo casaajiniji najuhuanaj, nojori quia ruuretare saaja, nojori jaara quia nequesoreetare cuno casaajiniji. Quiaacuajaari niishiya, pueyari jiyano casaacua paracaatiojua. ²⁴ Pueyasora poonijiojua pueyano cuaara quiyajuiiria pueya paracaajia. Saniya cuaara quiirria cutara puetunu pueya panijajanaa. Cuaara quiirriajuhua maninia niishitiojoua. Cuaara juhuajaniya rejeretaja quiirria, tamasaca jaara na taajetere. ²⁵ Cuaara Pueyaso rupaa tojiyashijiaca nacasuura jacaria, nojori na paniniutia, maja nojori na juaniutia. Naa quia miishacari, Pueyaso naasucuaari nojori jiuujia tacatonutaniya seetanu rupaajanaa niishijiaca nojori quiniuria. ²⁶ Naacuajitij, nojoriiri maninia niishirijojuaca quiniutianiya, nojori jaareteenura Sesaacaacuaji, maja Sesaaca miitiniuria nojori taa na paniyacuajani.

3

Taa quiijiaca mijiria quiniaa quiniutianiya quera jiya puequesacarini

¹ Quia niishirijuhua Timoteonaa, jiya puequenu panishacari, pueyari socua jiyacatenutaniya sesa miijiacara. ² Pueyari saa tama nera-jaaja niishiriojuaca quiniutianiya. Majaari tamonura na niishiri-ojonu quiniutianiya. Pueyari queraatia cumaneeca jiitianuucua jiaatiajaca quiniutianiyanujuaj. Naajuhuaj, pueyari najuhuana narta pueya niquiara pocuajaca quiniutianiya, na jiyanishacari nojori cutara socua niishijiaca narta pueyajinji, socua shanohua niquishano tamasacajinjinio. Pueyari Pueyaso sesacajaca quiniutianiya, narta pueya sesacajacahuaj. Pueyari na queya tojiyashijiaca quiniutianiya. Majaari quenaaja pueya timitianu quiniutianiya maninia na miiji-aca. Pueyari maninia miyashijiaca quiniutianiya, Pueyasojinji maninia casaa rerequetejaca nojori quiniuucua. ³ Naajuhuaj, majaari quenaaja na queya panijiaca pueya quiniu quiniutianiya, tapueyocuaca, tama necohuajaajanio. Pueyari tojetaarucuajanaa jiyanoyashijiaca quiniutianiya. Sacuaraatia rimiaacatujuri quiniutianiyyaariuhuaj. Naajuhuaj, majaari quenaaja tama nojori cuaqueya panishanojuaja rejectejaca pueya quiniu quiniutianiya. Pueyari naquia narta pueya miiji-aca quiniutianiya, nojoriicua na taraajeyaquinutia. Pueyari puetunu maninia miijiacajanaa soojeaca quiniutianiyyajuhuaj. ⁴ Pueyari tama na cojiniaajaaja tacartajaca quiniutianiya. Pueyari cocuaatia casaa miiji-aca quiniutianiya, mosanucua nojori quiniuucua. Pueyari juhuajaniya quihiaca quiniutianiya, tama nojori cuaqueyajaaja shuquiritajaca nojori quishacari. Shuquiriaatia pueya miishacari tama na panishano-juaja pueyaracaanu, majaari jeya nojori quiniu quiniutianiya nojori shuquiritianura Pueyaso. ⁵ Pueyari sapuenu juhua Pueyaso pueya niquishaanutaniya. Naajaa, nojori miishanojinji, maatia niishishaanu-taniyari, nojoriiri Pueyaso cumaaca maseyaquiquiaari seetanujuanaa jatanishano pueya nojori quiniuria. Cunora cua tojiri Timoteonaa. Majaari jiyanoo pueya quia rupuenutej.

⁶ Tamasaca cuno pueyajinjinioni, nojoriiri tiaco tiuquitiajaca, noo maajipohua na sapojonura, najuhuana pueya pohuatasanoocua ritia tiuuijicatej. Cuno maajipohuari tama na cuaqueya miiniu panishano-juaja rejecteyashijiaca. Naa sesa miijiaca nojori quiniuucuatej, nojoriiri najuhuana tacaaquioquia. Cunora, nojoriiri cuno sapojonu-juuaca tojitiaquia. ⁷ Cuno maajipohuari najuhuana pueyaracaanu tojitiaquia cuno sapojonuujuaca niishitiojosano. Saniniujia, majaari Jesucristojinji seetanu rupaajanaa niishijiaca nojori quiniu quiquia, Pueyaso jiyanooniuria nojori. ⁸ Cuno sapuenu juhua Pueyaso rupaa niishitiojonaari seetanu rupaajanaa ruuretaquia, taa nio shimiacuri, Janes, Jambres ruuretaquiaari supuetana Moisescuaani. Naacuajitij, nojori niishitijaari juhua ninishiqui, sesa nojori miishano timitiajaca nojori quiniuucua. Seetanu rupaajanaa nojori tojiyaquiniuucua, pueya cuaara tojiyaquirria nojori saniniujia. Nojoricuajaari Jesucristoocua tiuyashijiaca. ⁹ Naajaa, majaari queraatia pueya tiuuniu quiniutianiya nojoriicua. Ritia niishishaanutaniyacuajaari, nojoriiri seetanujuanaa niishiyashijiaca, taa pa supuetanaa niishiquiaaricuaani cuno shimi-acuriiri sapojonuujuaca.

Pablo tucuatasacari naajionu, socua rootaa Timoteori

¹⁰ Timoteonaa, quiaacuajaari pueyaracaanu cua cojiquiaari maninia quia niishiniuria puetunu cua niishitiojosanojuanaa. Quiaacuajaari

niishiya taa mijia cua quiquiaarini, pa Jiyaniijia cua shuquiritiniuria. Quiaari niishiayahuaj taa seetanujuanaa pa Jiyaniijiaacua tiuujia cua quiquiaarini, jacaria pocuajahuaj, pueya panijianio. Quiaari niishiayahuaj, majaari coojia cua najequitiniu quijiani, pueya mishacari naquiya janiya.¹¹ Quiaari niishiayahuaj taa cua miiti-asaaquiaari Antioquiya tiacajiniani, Iconio tiacajiniajuhuaj, Listra tiacajiniani. Seetanujuanaa, janiyari naquiya miishaquaarini. Naajaa, pa Jiyaniijiaari cucua taraajequiaari maninia na rishitiniuria janiya.¹² Seetanujuanaa naquiya miishaanutaniyari puetunu noo pueyajanaa, tama na cuaqueyajaaja jiyatejaca saaja Jesucristo tojijiaca nojori quiniuriatej.¹³ Saniniuuja, sesa mijjiaca pueya, sapojonuujuacanio, nojoriiri socua sesa miiniuria jiyacatenutaniya. Nojori sapojonuuusacari tamasaca, nojoriirinaa tama na cuaqueyajaaja sapojonutaniyajaacujua.

¹⁴ Quiajaniya saniniuuja Timoteonaa, majaari quia cartenu puetunu maninia niishitiojosanojuanaa, taa quia niishitiojosaaquiaaricuajani. Quiaacuajaari niishiya, cuno niishitiojosanoori seetanu rupaajanaa. Quiaari niishiayajaacuhuaj canapuete quia niishitiojoquiaarini.¹⁵ Quiaacuajaari quia naatujuajiniji tariucuacaanu Pueyaso Rupaa niishijia. Cunori quia niishitiquiaari Jesucristoocua quia tiuuniuria, Pueyaso jiyanooshano pueyano quia quiniuria.¹⁶ Puetunu Pueyaso Rupaajanaacuajaari Pueyaso naajiotanishano na pueya. Cunora, puetunu cuno rupaajanaari maninia pajaniyara. Cuno rupaari cumaacaraca na niishitiojonura pajaniya, na niishitiniuria pajaniyahuaj pa miishanoori sesa, na nacasunura pajaniya maninia mijjiaca pa quiniuhuara. Pa rootaajaariuhuaj tojetaarucuajanaa maninia mijjiaca pa quiniuria.¹⁷ Naacuajitij, Pueyaso Rupaari Pueyasora poonijionaa pueya jeenucuaja tojetaarucuajanaa, puetunu maninia casaa mijjiacajanaa nojori quiniuria.

4

¹ Quiaacuajaari niishiya, Jesucristo tiuquishacariuhua mijiria, Jiyaniijajanaa na quiniuria, nojuajaari puetunu na tojitiajacajanaa nequesoreenutaniya mijiria pa miishanojiniji, saminiucua, macunucuanio. Cunora, janiyari na niquiara, pa Que Pueyaso niquiara quia sequeya seetanujuanaani. Cua tojiri.² Majaari pueya niquiara Pueyaso rupaa pohuatanu quia tarinitianu. Pueyaracaanu quia pohuatariquia, naajaa, quia jiyanishacari jiyacari naasucuaari maja maninia quia pohuatanura. Pueyaso rupaata quia niishitiri sesa mijjiaca nojori miishanoori sesa Pueyasora. Pueyaso rupaa tojiyashijiaca quia nacasuriquia. Pueya quia shiniuijiriquia Pueyaso rupaacua nojori tiuuniuria seetanujuanaa. Puetunu cunojuanaa quia miiriokia jacaria quia pocuanuta, maja juaaniutia.³ Naa quia poojotariquia pueya niquiara, nojori tojiniu panishacarijia Pueyaso rupaa. Na nuhuaji, pueyari seetanu rupaajiniji niishitiojosano tojiniu paniyaquiniutaniya. Saaja na ruuretanutaniya-jaariuhuaj. Naa Pueyaso rupaa nojori tojiniu paniyaquishacaritij, nojoriiri queraatia tamaatia niishitiojonuujuaca rerejotenutaniya, cuno pojori shuquiritiniuria nojori najuhuana pohuatananota.⁴ Nojoriiri seetanu Pueyaso rupaajanaa tarinitianutaniya, najuhuana sapojonuuusano tojitiajaca nojori quiniuria saniniuuja.⁵ Quiajaniya saniniuuja, maninia niishiriojoua quia quiriquia, maja quia sapojosaanurajuhuaj.

Naquiya miiniu rejeretaja quia quiriquia. Pueyaso rupaa Jesucristojiniji pohuatanuucua cojeja quia quiriquia, pueya tiuuniuria Jesucristoocua. Puetunu quia poonijiosanojuanaa Pueyasora quia tucuatate maninia, taa pa Jiyaniijia sequequiaari quiajaniyacuajani.

⁶ Janiya saniniuuja, janiyari quera quianutaniya jiyocuacaanu cua quiniuria pa Jiyaniijiatani. Cua nanaca jaara shootesaare, janiyara, cunoori juhua Pueyasora cua niquitiosano quiniutianiya.

⁷ Majaari cua taajenu quijia, pueyaracaanu cua poonijiosacari cua Jiyaniijia. Janiyari tari tucuatacanu miiniu puetunu na sequesanojuanaani. Pueyaracaanu cua poojotasacari Pueyaso

rupaa, majaari cua jataniniu quiquiaari quenaaja. ⁸ Naacuajitij, shanohua tuhuajaari quiriano jiyocuacaanu racatasano quiya tari, maninia miiija cua quiniuucua. Cua Jiyaniijiaari cuno tuhuaja cua

niquitionutaniya na samiitianishacariuhua janiya. Pa Jiyaniijiaari jiyanoehua maninia. Na jiyanooshano pueya pa quiniuucua, majaari socua na saneenu quiniutianiya sesa pa miishano. Majaari saaja janiya na niquitionu quiniutianiya cuno tuhuaja. Puetunu noo pojorijiana na niquitionutaniyajaariuhuaj, canapuete nojua ja na paniniutia sashiyajaani, cuaara tiuquiuuhara shacantuua na cumaacatajaaatijia.

Pablo sequesano Timoteo miishocoriquiano

⁹ Majaari pueras tarishiniu. Quia secoore, cucua quia tiuquiniuria ritia. ¹⁰ Demasri cua tiujiaarucuaani. Tesalónica tiacajinia quiaarucuaari. Nojuacuaaari tama na panishanojuaaja miiniu panijiara jatarohuacuaa. Crescenteeri saniniuuja Galacia jiyajinia quiaarucuaa. Titoori Dalmacia jiyajinia quiaarucuaajaacuhuaj. ¹¹ Saaja Lucasri niya cuata quiya. Quia jaara cumaji niyare, quiocua Marco rupoyare quiocua. Nojuajaari na naata cua naacunu niya, pa Jiyaniijia cua poonijiosacari.

¹² Janiyari saniniuuja Tíquico jiyarorucuaa Éfeso tiacajiniani. ¹³ Taa cua sequeya quiajaniyacuajani, quia jaara cumaji niyare, quiocua cua tucuaque toque paare quiria, Carpo tiajinia cua tiujiasano, Troas tiacajinia. Quiocua quiria patootaare cua nequesoreetuneecajuhuaj. Janiyari socua noo paniya quia patootanurani, shoqueecua naajionuutason Pueyaso Rupaatej.

¹⁴ Noo Alejandro, cumueeca casaajiniji shipinijiojua casamitij, nojuajaari jiyanoehua cua paracaajiara quiqianu. Naajaa, pa Jiyaniijiacuaa-jaari saniniuuja cucua na naminutaniyacujua, naa na miiniuucua janiyatej. ¹⁵ Tama quia cuaqueyajaaja quia cojuare maja na miiniuria sesa quiajaniyajuhuaj. Nojuajaari pa pohuatasano cuaracashitiya saaja, Pueyaso rupaa ruuretaja na quiniuucua.

¹⁶ Janiya jaara shushajanaa nujuatesaacanu jiyanijianucua tacojitij, nojori nequesoreenura janiya, majaari quenaaja tamonu Pueyaso pueyajinjinio quiniu quiriquiaa tii, cucuaji na tacunura quenaaja. Puetunu cua cojiniaajanaari cua cartecanu tamajaaja. Naa nojori tarinitianuucua tamajaaja janiyatej, Pueyaso cuaara jiyanooria nojori.

¹⁷ Naajaa, pa Jiyaniijiaari cua cojiquianuni. Cua cumaquiuijanuaja-ruhuaj, nojuajiniji cua pohuatanura puetunu cuniqui quiniaa Pueyaso niishiyashijiaca pueyajanaa. Pa Jiyaniijiaari cocuaatia cua miiniuiniji juhua nojori juaashiquajiniji cua jaaquianu, maja nojori monura janiya. ¹⁸ Janiyari nocua tiuyani, nojuajaari cua mashiquiniutianiya

puetunu sesa casaacuajijanaa. Cua cojuanutaniyajaariuhuaj, pueyaracaanu rishijia cua quiniuria na shuriucua jiyocuacaanu, Jiyaniijajanaa na quishacari. ¡Jiyano hua maniniaari pa Jiyaniijia! ¡Nojuaja cuaara shuquiritiasaria pueyaracaanu! Cuaara naa quiiriatej.

Pablo sequesano na naajionee na tucuatasacari

¹⁹ Quiria quia saruhuatare Prisca, neyaca Aquilanio, puetunu Onesíforo pueyajanaajuhuaj, na tiajinia quiniaani. ²⁰ Erastoori Corinto tiacajinia jateecanu. Janiyari saniniujia Trófimo tiujiacanu Mileto tiacajiniani, cusosu na quiniuucua. ²¹ Cucua quia niniuria quia secoore, shuniya coteya quishacarijia quia tiuquiniuria cucua. Niya cuata quiniaa parta Pueyaso pueyari cua sequereeni, nojoriria cua saruhuanura quiajaniya. Nojoriiri Eubulo, Pudente, Lino, Claudianio, puetunu parta Pueyaso pueya maanujuanaanio.

²² Pa Jiyaniijia cuaara quioojajinia quijia quiiria pueyaracaanu. Pueyaso cuaara cumaquirria puetunu niajaniyajanaa.

PABLO NAAJIONEE TITOOCUARA

Pablo naajiosacari Titoocuara

¹ Janiyari Pabloni, Pueyaso seru. Jesucristoori cua jiyaroquiaari na Que Pueyaso saquiriojosano pueya cua tiuutiniuria Jesuucua, Pueyaso pueya nojori quiniuria. Cua jiyaroquiaarijaariuhua Jesuucua tiuuniaa cua niishitiniuria seetanu rupajanaa Pueyasojiniji, nojori jatanishaa-nura maninia quijiacara. ² Nojori tojishacari cuno rupaa, nojoriiri ni-ishiquiaa nojori cutaraari samiitianishaanutaniuhua Pueyaso muerasu nojori quiniucua, pueyaracaanu quijiacar nojori quiniuria Pueyasota. Cunocuajaari tariucuacaanu Pueyaso sequenceso, jiyanolhua tarijiatej, jiya shipinishaacarijiyojua. Nojuajaari maja na naata sapojonu. ³ Quiari naataja, Pueyasoori na rupaa niishitiniu paniquiaari pueya, taa na paniquiaari jiyasohuaja tariucuacaanucuajani. Naaratej, pa Jiyanoojia Pueyasoori cua jiyatequiaari na rupaa pohuatanarani, pueya cua tiuutiniuria nocua. ⁴ Quiarijiani, quiocuara naajiyanjia Titonaa, juhua cua niyanuniyojua quia quishacari. Quiaari Pueyaso pueyanora quiquiaari quia tiuushacari Cristojiniji cua pohuatasanoocua, taa cua tiuquiaar-icuaani. Naacuajitij, paari mariyata nocua tiuujacani. Pa Que Pueyaso, pocuaji Tacuna Jesucristonio, nojori cuaara cumaquirria quiajaninya. Nojori cuaara jijitaara quioojia maninia, shuquiriaatia quia quiniuria pueyaracaanu.

Titora Pablo sequenceso, Creta jiya tucuaatiajajinia na mi-shocoriquiano

⁵ Janiyari quia tiujiaquiaari Creta jiya tucuaatiajajiniani, quia tu-cuanura cua poonijiosano cureeno. Naaratej, quia sequencecanunisia quia jiyatenura jiyanijianucua, Pueyaso muerasu maapue jiitiana quiniuria puetunu cuno jiya tiacajinajanaa, taa cua sequencequiaari quia-janiyacuajani. ⁶ Pueyaso pueya jiitiariquiano cuaara quiirria maninia pueyano, sesa miyashijia, maja pueya pocuanura sesa nojuajiniji. Cuaara jijitaara niquiriyatujua niquiocua. Necohua cuaara quirria Pueyaso muerasujuhuaj, maja sesa mijiaca, maja tojiyashijiacahuaj. ⁷ Cante Pueyaso muerasu jiitianani, nojuajaari Pueyasora poonijojua. Naaratej, nojuaja cuaara quirria maninia quijia, sesacasoo, maja tojiyashijia. Cuaara quiyaquirria ritia juajia, mashaasequejojua, piy-ojotaja. Cuaara quiyaquirria cumaneeca panjia sesa na miishanota na masenura. ⁸ Naajuhuaj, Pueyaso pueya jiitiana cuaara quirria ru-coonaacula taraajeja. Cuaara quirria maninia miji, maninia niishiri-ojojua. Cuaara quirriajuhua seetanujuanaa Pueyaso rootasano tojijia, maja rimiajata maninia miji. Cuaara quirriajuhua Pueyaso panjia cutara, tama na cuaqueyajaaja jijitaaja maninia, maja sacuaraatia casaa porocua. ⁹ Cuaara quirria Pueyaso rupaa tojijia cutara, taa na niishitio-josaaquiaaricuajani. Naacuajitij, nojuaja na naata pueya cumaquiniu, maninia na niishitiojosanota Pueyaso Rupaajiniji. Naacuajijiuhuaj, nojua na naata pueya tacatonuhua Pueyasocua sesa nojori niishishano-jiniji, noo pojori canapuete Pueyaso Rupaa ruuretajaca quiyacuajani.

¹⁰ Naa quia sequreenijia, queraatia tojiyashijiaca pueya quiniuucua, canapuete juhua niishiyashijia niishitiojoquiaa najuhuana niishitiosanocuajani. Nojoriiri Pueyaso muerasu sapojiya. Queraatia cuno pojoriiri cuarta Judiocuaca. Nojoriiri pueya niishitiojiya pueya cararaatiuuquia co miatesaanura, taa Moisés niishitiojoquiaari tarrijacuajani, seetanujuanaa Pueyaso muerasu nojori quiniuria juucua. ¹¹ Nojoriiri queraatia niquiohuaraca pueya jiyajeneteya sesa na niishitiosanota, puetunu tapueyocuacatajanaa nojori juayonuujuutanura. Cuno niishitijonaa cuaara sanaajasaaria. Nojoriiri niishitiojoquiaa saaja cumaneeca nojori masenura sesa na niishitiojonuunujiniji.

¹² Creta jiya tucuaatiaja pueyajinjinio tamonu shimiachuuri tama na pueyajinijiaaja naa sequequiaaritij: “Creta pueyari pueyara-caanu saaja sapojonuujuaca. Nojoriiri jiyanohua juaajiaca juhua sayoru. Nojoriiri puera miaquenuujuaca. Nojoriiri taajecorijihuaj”. ¹³ Seetanujuanaari cuno shimiachu sequesano. Nocuaji, jiyanohua quia nacasure nojori, nojori cuaara Pueyaso tojijiaca quiria, maninia qui-jijaca nojori quiniuria. ¹⁴ Quia rootare nojori maja na tojitianura Ju-diocuaca nareja najuhuana pohuatasano, naajuhuaj, maja nojori to-jiniuria pueya rootasano, canapuete Pueyaso seetanu rupaajanaa tojiyashijiaca quiyacuajani.

¹⁵ Pueyano jaara maninia jiuuijaraca quiri, puetunu casaajanaari maninia quiya nera. Saniniuujia, pueyano jaara sesa jiuuijaraca quiri Pueyaso rupaacua tiuyashijia na quiniuucua, majaari quenaaja niquiriyatu casaa maninia quiniu nera. Na niishitijaari juhua curuu-tuuca, noojianio. ¹⁶ Nojoriiri tama na cuaqueyajaaja sequeya: “Pueyaso niishiyaniija”. Naa nojori sequesacaritij, najuhuana sequeyari. Nojori miishanojiniji, paari niishiyani nojori maja seetanujuanaa Pueyaso muerasu. Nojoriiri jiyanohua soosano pueya, puera sesa na quiniu-cua. Nojoriiri jiyanohua sesa, tojiyashijiacahuaj. Majaari na naata quenaaja maninia miiniu.

2

Maninia niishitiosano cutara

¹ Nocuaji, pueya quia niishitijoore maninia nojori quiniuria taa pa niishitiosaaquiaaricuajani. ² Naaratej, socua saaquiapue quia niishiti-jore nojori cuaara quiyaquiiria miaquejoru, mashaasequejorunio. Nojori cuaara quiiria tojishano pueya cutara, maja rerequetesano. Nojori cuaara quiiria maninia niishiriojojuaca. Cuaara quiiria maninia quiijiacahuaj, na tojishacari puetunu Pueyaso niishitiosanojuanaa, na panishacari pueyanio. Nojori cuaara quiiriajuhua maninia rejereta-jaca taraatia na miishacari, juhuajaniya nojori sashishacari pa Jiyani-ijia. ³ Naajuhuaj, socua motaja maajipohua quia niishitijoore nojori quiniuria maninia Pueyaso niquiara pueyaracaanu, maja rimiaacatu-juri, maja mashaasequenuujuaca. Nojori cuaara pueyaracaanu miiria maninia tamasaca niquiara, tamasaca miiniuria juhua nojori miishano-juhuaj. ⁴ Nojori cuaara niishitijoora niyacaraca maajipohua, maninia na paniniuria neyacaa, necohuanio. ⁵ Cuno jiyaniyuacuaca cuaara niishiti-jojora narta maajipohua, maninia niishiriojojuaca nojori quiniuria, saaja neyacaa panijiaca nojori quiniuria, maja tamonu caya panijiacara. Nojori cuaara niishitiososaariajuhuaj, maninia poonijiojuaca na tiajinia

nojori quiniuria, caporatujuri nojori quiniuria, neyaca tojitiajacanio. Nojori cuaara naa miiria, Pueyaso Rupaa mariqui rerequetaresaareeri.

⁶ Naajuhuaj, mashiquiori quia niishitiojore maninia niishiriojojuaca nojori quiniuria. ⁷ Puetunu quia miishanojuanaa cuaara quiiria maninia nojori niquiara, nojori jiaatianura quiocua, juhua quiajaniya nojori quiniuriajuhuaj. Quia niishitiosacari nojori, tama quia cuaqueyayaaja quia cojuare, tama quia niishitiosanojuaja tojijia quia quiniuria. Majaari puenujuja quia quiniu quia niishitiosacari. ⁸ Maninia quia niishitiojore Pueyaso Rupaa, taa quia niishitiosaaquiaaricuajani. Naacuajitij, tamasacaari maja na naata ruuretanu quiniutianiya quia niishitiosano pueya niquiara. Naa maninia quia niishitiosacaritij, quia niishitiosano rerequetejacaari caririquiniutianiya. Naacuajitij, nojoriiri maja tari na naata pocuanu quiniutianiya sesa pajaniyajiniji. Nojoriiri sanaajetanutaniya.

⁹ Poonitijiosano pueya quia rootare, puetunu na camarucua sequesanojuanaa nojori tojiniuria, na camarucua shuquiritianura nojori. Cuaara quiiria na camarucua panijiaca, maja riuhuanejaca. ¹⁰ Cuaara nohuaseyaquiiria na camarucua casami. Cuaara quiiria seetanujuanaa maninia mijjiaca, pueya niishiniuria pa Jiyanoojia Pueyaso rootasanoori jiyanohua maninia cutara. Poonitijiosano pueya jaara maninia quiriquia, Pueyaso Rupaari juhua maniniushitishano quiya tamasaca niquiara.

¹¹ Paacuajaari niishiyani Pueyasoori jiyanohua jiyanoojia seetanujuanaa, Jesu cusionuucua puetunu pueyacuarajanaa, sesa pa miishanojiniji pa jiyanooshaanura. ¹² Pueyaso jiyanooshacari pajaniya, cunoori pa niishitiojiya pa cartenura puetunu sesa pa miishanojuanaa, maja mijiria casaacua pa jiaatianura sacuaraatiajuhuaj. Naajuhuaj, Pueyaso jiyanooniucua pajaniya, cunoori pa shiniujiya maninia niishiriojojuaca pa quiniuria mijiria pa quishacarijia, maninia mijjiacahuaj, Pueyaso tojijianio pa paniniutia nojuaja. ¹³ Naa Pueyaso jiyanooshacari pajaniya na muerasu pa quiniuriatej, cunora paari na sequesanoocua tiuuquiajuhuaj. Nojuacuajaari pa sequequiaari pa Pueyaso Cristoori pocua muetanutaniuhua, shacantuua na cumaacajinia. Naacuajitij, paari shuquiriaatia sashiya pa Jiyononi. ¹⁴ Nojuacuajaari tama na cuaqueyayaaja panitiaquiaari pocuara, sesa pa jiitishano casaacua na tarinitiniuria pajaniya. Pocuara cusoquiaariiri poojia seque jeequesano quiniuria puetunu sesa pa quiniujinijijanaa. Naa miiquiaariiri saaja tama na pueyarajaaja pa quiniuria, jiyanohua maninia miiniuucua jiaatiajaca pa quiniuriajuhuaj.

¹⁵ Naa quia niishitiojore pueya Titonaa. Pueyaso pueya quia niishitiojore, quia shinujiuri, quia nacasure. Naa quia cumaquinuria nojoritij, quia cumaaca quia paaretare juhua cutara jiyaniijia, tojishano pueyano quia quiniuria. Saaja maninia quia miiriquia pueyaracaanu, tamonu mariqui quia rerequeterereeri.

3

Maninia rootasano Pueyaso pueyara

¹ Quia pueya quia niishitiojorohua jiya jiyaniijia tojijiaca nojori quiniuria, jiyaniijiancuara na jiyatesano pueya nojori tojiniuriajuhuaj. Nojori cuaara cuno pojori naacutaara jaara sequesaare maninia casaa

nojori miiniuria. ² Pueya quia niishitiojore nojori cuaara pueya sesacaashijiaca quiiriajuhuaj. Nojori cuaara quiiria juhuajaniya qui-jiaca, maja juaajiaca. Cuaara quiiria jiyanoojiaca. Cuaara maninia niquiiria puetunu pueyajanaa, juhua socua maninia pueya nojorijiniji, maja rimiajata na miiniuria tamasaca.

³ Tarijia, paari mariyata mosanucua quiquiaarini, Pueyaso tojiyashiji-acanjo. Paari juhua tashucuano quiquiaarini, sapojosano pa quishacari. Paari sesa miiniuucua jiitiquiaarini. Majaari pa naata sesa pa miiniu tarinitianu quiquiaari. Paari pueyaracaanu shuquiriaatia quiniuucua jiaatiajaca quiquiaarini sesa pa niishishanota. Paari sesa miijiaca quiquiaarini. Paari tamasaca jiitiasanoocua jiaatiajaca quiquiaarini, juhua nojori pa quiniuriajuhuaj. Paari pueya soosano quiyiaca quiquiaarini. Paari niquitoojuaca quiyaquiquiaarini. ⁴ Naajaa, pa Jiyanojia Pueyaso cutaraari maninia miiquiaari pajaniya. Naacuajitij, paari niishitishaquaarini taa Pueyaso paniya puetunu pueyajanaani, na jiyaronuucua Neyanuniyojua pocuara na cusionura. ⁵ Na muerasura pa jiyatequiaariiri saaja pocua na taraajesacari, maninia miyashijia pa quishacarijia. Sesa miyashijiacara na Sohuanuta pa jataniquiaari-iri, na Sohuanu jeequesacari poojia, maninia jiuujiaraca pa quiniuria. Pueyaso Sohuanuuri pa jataniquiaa juhua quiarinio pueya pa quiniuria. ⁶ Pocuaji Tacuna Jesucristo miiniuucua maninia, Pueyasoori jiyanohua queraatia na Sohuanu niqutioquiaari pajaniya. Juhua pocua totasaareeri na Sohuanu. Maja shiitianiyojua quenaaja. ⁷ Naacuajitij, pa jiyatereeri maninia quiyiaca pa quiniuria na jiyanooshacari pajaniya. Naa pa jiyatequiaariiri na muerasu pa quiniuria, pa masenura puetunu na jiitiasanojuanaa puera, jiyocuacaanu na racatasano. Naaratej, paari juhuajaniya sashiquiaani, pa niishishacari paari pueyaracaanu quiyiaca quiniutiani natani.

⁸ Nio cua sequesanoori seetanu rupaajanaa. Nio rupaata quia nacisure Pueyaso tojitiajaca puetunu quioojitajanaa, nojori cuaara niishirijoora, maninia nojori miiniuria pueyaracaanu. Nio rootasanoori jiyanohua maninia. Maninia cutaraari puetunu pueya cumaquitajarajanaa. ⁹ Maja cutaraari quia rupuenu cuno pueya, noo pojori canapuete najuhuana nacoojoquiaani, naajuhuaj, noo pojori canapuete pueyaracaanu na supuetanaa sesaca serojoquiaa najuhuanani, juhua pueya shocotajaca nojori quiniuria. Naajuhuaj, maja quia rupuenu noo pojori canapuete juaatiooquiaani, canapuete tariucuacaanu Moisés Rootasanoocua juayonuutaquiaacuajani. Puetunu cuno nojori niishishanojuanaari najuhuanaj. Majaari na naacunu nojori.

¹⁰ Quia pirijojore cuno, cante Pueyaso muerasu maanu raquirijitaaani, capa na niishitiosanota najuhuanaj. Nojuaja jaara quia tojiyaquiri coteenu quia sequesacari nojuaja, quiocua socua na camiriohua pirijojonu. Jaara tojiyaquiri quiajaniya jiyacaritij, nojuaja cuaara quiiriaqui juhua taanuusano. ¹¹ Naa na tojiyaquishacari quiajaniyatej, quiocua niishiri cuno pueyano tarisere. Tama sesa na miishanojuuarria juhua nocuara saquirijojota.

Pablo sequesano Titora

¹² Janiya jaara Artemas jiyarore quiocuani, jiyanohua quia saninijiuri cucua quia niniuria Nicópolis tiacajinia. Janiyari quiniqui shuniya tajitiniu paniyani. Janiya jaara Artemas jiyaroyaquiri quiocuani,

janiyari Tíquico jiaronutaniya quiocuani. ¹³ Zenas, Apoloori quiocua tiuquiniutaniya. Nojori quia naacutare quia jiitiasanota, nojori jitianura puetunu na panishanojuanaa nojori quianu panishacari quia quijajiniji. Zenasri pueyacuaji tacuna pueya nequesoreenaa.

¹⁴ Parta Pueyaso muerasu cuaara niishiiria maninia mijjiaca nojori quiniuriajuhuaj, maya najuhuana quijiaca na quiniuria. Maninia cutaraari nojori naacutanura na panishano jiitiaashijiaca.

Naajionee puequesacari saruhuatasano

¹⁵ Puetunu cuata quiniaajanaari cua sequeya cua saruhuatanura quiajanaya. Canaara quia saruhuatare parta Pueyaso muerasujuhuaj, canapuete canaa panijiacacuajani. Pueyaso cuaara cumaquiiiria puetunu niajaniyajanaa. Cuaara naa quiriarej. Tariucuaja Titonaa.

PABLO NAAJIONEE FILEMÓNCUARA

Pablo saruhuatasacari Filemón

¹ ¿Quiaate quiyajaa canaa panishano Filemónnaa? Janiyari Pabloni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajiya quiarani, jaarajaaja pa Jiyaniijjiara poonijiona quia quiniuucua. ² Canaara quia saruhuatare pa rimiaticuca Apia, Arquiponio, jaarajaaja pa Jiyaniijjajiniji pohuatanani. Canaara quia saruhuatarejuhua parta Pueyaso pueya maanu, noo pojori, quia tiajinia rerejoquiaa Pueyaso secojonuunuratej. ³ Pa Que Pueyaso, pa Jiyaniijja Jesucristonio, nojori cuaara cumaquiiria niajaniya, jiyanoojiaca nojori quiniuucua. Nojori cuaara cajitiiria nioojiajuhuaj, juhuajaniya nia quiniuria.

Filemón paniniujiniji pohuatasano, Pueyasoocua na tiuuniujinjinio

⁴ Pueyaso cua secojosacari, janiyari quia seera pueyaracaanu Pueyaso sequequiaani, “paacarasho”. ⁵ Janiyari naa sequequiaa Pueyasoni, quiajaniyajiniji cua tojiniuucua taa quia paniquiaa pa Jiyaniijja Jesuni, puetunu na pueyajanaanio. Quiaanaari seetanujuanaa pa Jiyaniijjiaacua tiuujia. Janiyari cunora quia timitiaani. ⁶ Janiyari quiocuara secojoquiaani, seetanujuanaa quiarta Pueyaso pueya jiyanoojia quia quiniuria, nojoriicua quia taraajenura. Naacuajitij, nojori quia cumaquishacari, quiaari maatia niishiniutianiya puetunu quioojajinija quia jiitiasanojuanaa Jesucristojiniji, Jesucristoocua tiuujia quia quiniuucua. ⁷ Parta Pueyaso pueya panijia quia quiniuucua, quiaanaari nojori cumanijiacanu, nojoriicua quia taraajesacari. Naa cua niishishacari quia miishanojinijitij, janiyari coojia cumanijiacanujuhuaj. Cunora, shuquiriaatia quianijia.

Pablo sequencesacari Filemón, nojuaja jiyanooniuhuara tama na seru Onésimojuaja

⁸ Jesucristo jiyaramiquishano pueyano cua quiniuucua, cua naata sequenu quiajaniya quia miiniuria cua sequencesano. ⁹ Naajaa, majaari cua sequenu paniniu quiajaniya juhua quia jiyaniijja. Saniniujia, panijia quia quiniuucua, janiyari quia sequencesano quiarijia. Jesucristojiniji cua pohuatanuucua, janiyari quiarijia moronucua quiyani tariucua saaquiano. Naajaa, quia rupuena Pablo cua quiniuucua, cua tojiri Filemónnaa. ¹⁰ Cucua quia taraaejere quenaaja. Quia nenecojiyanijia cua niyanunijoja Onésimoocuara. Nojuajaari seetanujuanaa juhua quiyanura quiriucaa Jesucristoocua na tiuuniuucua, na tojishacari cua pohuatasano Jesucristojiniji, moronucua cua quishacari.

¹¹ Tarijia, Onésimoori sesa seru quiquiaari quiara. Quiarrijia saniniujia, nojuajaari na naata maninia quiniu quiara, taa quiria na quiyacuaani. ¹² Janiyari quiarrijia quiocua jiyaroya quiyanuni. Quiocua na maserohua quia timiniutia, taa quia masequiaa janiyacuaani. ¹³ Moronucua cua quishacari Jesucristo rupaa cua pohuatanuucua, janiyari niyaja na jiyojetenu paniriquiaa juucuani, na naacunura janiya

quia niti. ¹⁴ Naajaa, majaari naa cua miiniu paniniu quiriquiaa jiyaso-huaja, coteenu cua nequesotaaquishacari quiajaniya. Janiya jaara quia sequereni janiya niya na jititanutaniya na naacunura janiyani, quiaa maara cua ruuretaaquiri. Naajaa, janiyari seetanujuanaa saaja quia panishano miiniu paniyani. Cunora, janiyari na jiyaroya quiocuani. ¹⁵ Onésimo jiyoteeri quiocuaji rupatecanu rupaquiriaja, quiarijia quiara na quiniuhuara pueyaracaanu cutara. ¹⁶ Quiarijiani, nojuaja naasucuaari socua quia panishano pueyano quiniutianiya serujiniji, seetanujuanaa quia tarajanu na quiniuucua quiarijiani, Jesuucua tiuujia na quishacarijuhuaj. Nojuajaari jiyano hua cua panishano parta Pueyaso pueyano. Naajaa, quiaa cuaara jiyano hua na panijia quiiria socua janiyajiniji, maja juhua nareja quia panishano seru. Seetanujuanaa nojuaja quia paniri cutara, quiarta Pueyaso pueyano na quiniuucua.

¹⁷ Naacuajitij, janiya jaara seetanujuanaa quiarta Pueyaso pueyano quiri quiarani, Onésimo tiuquishacari quiocua, nojuaja quia miiri maninia, taa quia miiquiaacuua janiyani. ¹⁸ Onésimo jaara sesa miiquiaari quiajaniya, jaara quia casaa nohuasequiaarijuhuaj, nojuaja quia jiyano orri. Saniniuujia cucua quia tiuutiare puetunu sesa na miishanojuanaa quiajaniya. ¹⁹ Janiyacua saniniuujia cua cumaneecajiniji quia niquitioeni puetunu sesa na miishanojinijijiana quiajaniya. Janiyari Pabloni. Janiyari tama cua juaashiquiatajaaja nio naajiyani, cua sequencesanoocua quia tiuuniuria. Janiyari quia niishitiniu paniyajuhuaj, Jesucristojiniji cua pohuatasanoocua quia tiuushacari, quiaacuajaari pueyaracaanu quijiara jatanisha aquiaari. Naacuajitij, cua naata sequenu quiajaniya, cua serura quia quiniuria juhuaj. Naajaa, janiyari saaja quia sequenceyani Onésimoocua quia taraajenura. ²⁰ Naa quiria quia miiri quenaaja, mariyata Jesuucua tiuujiac pa quiniuucua, cua panishano Filemónnaa. Quia jaara Onésimo jiyano orri, Cristo panijia quia quiniuucua, quiaari seetanujuanaa coojia cumanijianutaniya.

²¹ Janiyari naa quiocuara naajiyani, cua niishishacari quiaacuajaari cua sequencesano miiniutianiya. Janiyari niishiyajaaniuhuaj, quiaari socua maninia na miiniutianiya cua sequencesanojiniji. ²² Naajuhuaj, janiyari juhuacaricia quia sequenceyani, cua maquejara quia jeenucuare cucuaji quia tiajinia. Naa pueyaracaanu cucuara nia secojosacari Pueyaso niiquiji cua cartesaanuratej, nojuajaruhua niaacua cua tiuquintiutianiya, niaata cua quiniuria.

Pablo sequencesano na naajio na tucuatasacari

²³ Epafrasri cua sequeree cua saruhuatanura niajaniya. Nojuajaari cuarta moronucuajuhuaj, Jesucristojiniji canaa pohuatanuuucua.

²⁴ Jaarajaaja cuata Jesucristojiniji pohuatanaa pueyari nia saruhuataajujuaj. Nojoriiri Marco, Aristarco, Demas, Lucasnio.

²⁵ Pa Jiyaniijia Jesucristo cuaara cumaquiria niajaniya.

HEBREO PUEYACUARA NAAJIONEE

Pueyasoori pajaniyara na rupaa pohuataniquiaari Neyanujiniji

¹ Tariucuacaanu, Pueyasoori pueyaracaanu na sequenu panishano caminiujiuniaa pueya poojotaniquiaari pa supuetanaara. Nojuajaari nojuajiniji caminiujiuniaa mijiotequiaari queraatia tamaatia casaa, nojori na niishitiniuria casaa nojuaja sequenu paniriquiaa nojorini. ² Quiari naataja saniniuujia, Pueyasoori tama Neyanujuuaaja pohuataniquiaari na sequenu panishano pajaniyara. Nio Neyanu shipinitiquiaari puetunu casaajanaacujaari; nio jiya, jiya cajiniocuajuhuaj, puetunu pa niquiyaquishoo casaajanaanio. Naajuhuaj, Pueyasoori Neyanu jiyatequiaari puetunu tama na shipinishanojuanaa jitiana quiriquiano. ³ Neyanuuri tojetaarucuajanaa maninia, juhua na Quejuhuaj, juhua na Que niquishanojuhuaj. Naacuajitij, nojuajaari jiyanoehua shacantuca cumaacaracahuaj. Naacuajitij, nojuajaari puetunu na shipinijiosano casaajanaa rucuanetequiaa maninia, saa na rupaa cumaacataja. Nojuaja jaara cusoquiaari puetunu sesa pa miishanojuanaa na tuujunura, na nuhuaji, jiyocuacaanu tacaquiaariuhuari, na Que Pueyaso miaquetajara na cajiniuria Jiyaniijiajanaa quiqiojinia.

Pueyaso Niyanuuri Jiyaniijiajanaa cutara Pueyaso seyajiniji

⁴ Naacuajitij, Pueyaso Niyanuuri Jiyaniijiarajanaa quiquiaari Pueyaso seyajiniji. Nojuajaari na Que sesaanucua. ⁵ ¿Pueyasoteeri quenaaja tamonu na seyajinijinio sequequiaari: “Nioori cua Niyanu”? ¡Maja! Neyanu sequequiaari cutaraari:

“Quiaari quiyanu. Janiyari pueyanora quia muerateree jiyacuani, cua saquiriojosano pueya Jiyaniijia quia quiniuria”.

Neyanujiniji sequequiaarijiaariuhuaj:

“Nera, janiyari na Queni. Quiria saniniuujia, nojuajaari quiyanu”.

Pueyasoori maja quenaaja niquiriyatu na seyajinijinio naa na sequenu quiquiaari. ⁶ Tariucuacaanu Pueyaso Rupaajinina, naa naajiotasaquaariiri casaa Pueyaso sequenutaniyani, Neyanu na tiuquitishacariuhua mijiria, Jiyaniijiajanaa na quiniuria:

“Puetunu cua seyajanaa cuaara Quiyanu tojitiaara, Jiyaniijiajanaa na quiniuucua”.

⁷ Pueyaso seyajiniji saniniuujia, naa naajiotasano quiyari tariucuacaanu Pueyaso Rupaajinina:

“Pueyasoori na seya jataniquiaa juhua paratura, juhua manirianio, na panishano nojori miiniuria”.

⁸ Neyanu sequeya saniniuuriija:

“Quiyanunaa, quiaacuajaari Pueyasojuhanajaj. Quiaari Jiyaniijia. Quiaari naa quiniutianiya pueyaracaanutej. Quiaari cumaacaracahuaj, maninia quia jittianura puetunu pueyajanaa. ⁹ Quiaari maninia miiniu porocua. Quiaari sesa miiniu soosea saniniuujia. Cunora, Pueyasonaa, janiyari quia jiyatequiaari Jiyaniijiajanaa quia quiniuriani, quia Jiyaniijia cua quiniuucua. Janiyari quia jiyatequiaarijuhua socua shuquiriaatia quijia quia quiniuria puetunu quia cojiniaajinijijanaa”.

¹⁰ Pueyasoori naa sequequiaari Neyanujuhuaj:

“Jiyaniijianaa, quiaacuajaari coteenuujuanaa casaa shipinijia. Quiaari jiya shipiniquiaari, puetunu jiya cajiniocua niquishano casaajanaanio. ¹¹ Puetunu quia shipinishanojuanaari shaajeriquianohua. Quiajaniya saniniuu{jia}, quiaari pueyaracaanu quiriquiano cutara. Puetunu quia shipinishano casaajanaari tariucuashiriquiano juhua toqueja. ¹² Naa na tariucuashishacaritii, quiaari juhua toque mocua na jiuniocoriquiano, quia jatasocoriquiano. Quiajaniya naa miiniutianiqauij taa pueyano jocuaquiaacuaa na toque mocuacuaani, quiariqui toque na cushiniuria saniniuu{jia}. Quiajaniya saniniuu{jia}, majaari quia jatanu quiniutianiya tamaatiara. Quia quiniuuri maja puequeriquiano”.

¹³ Pueyasoori Neyanu sequequiaarijuhuaj:

“Miji, cua miaquetajara quia cajishii, janiya jaara quia paraa shocojotare puetunujuanaajaatijia, maja quenaaja niquiriyatu cureenura na miananajonura quiajaniya”.

Majaari naa Pueyasor sequenu quiquiaari quenaaja niquiriyatu na seyajinjinio. ¹⁴ Puetunu nojorijianaacuajaari Pueyasora poonijionaa. Pueyasoori nojori jiyaramiquiaa Jesuucua tiuuriqiano pueya nojori cojanura.

2

Maja cumaati Jesucristo tojiyashijiacara pa quiniu

¹ Naaratej, Jesucristojiniji pa tojishano tojijiaca pa quiriquia socua, paa mariqui Pueyasooquaji rupatereeri. ² Tariucuacaanu, Pueyasor seja caminiujiushano Pueyasor rootasano pueyarani, cuno rootasanoori see-tanujuanaa pueya tojishocoriquiano cutara. Cuno rootasano ruuretajaca, na miyashijiacahuaj, nojoriiri saniitiosaaquiaari. ³ Pueyasor seja caminiujiushano tojiyashijiaca jaara saniitiosaaquiaaricuaa, ¿paateeri jiyaniyani Pueyasor pa jiyanooniutianiya juhuajaniya Neyanu rupaa tojiyashijiaca pa quishacari? ¡Maj! Cuno rupaa nocua pa tiuushano pa jiyanooshaanurani, cunoori pa Jiyaniijianaa pohuatasano. Pa Jiyaniijia nuhuaji, cuno pojori, canapuete pa Jiyaniijianaa tojiquiaari pueyaracaanuni, nojoriiri saniniuu{jia} cuno rupaa caminiujiushano pajeñiara. Canaa sequetuquiaariiri nojori tojishanoori seetanu ru-paajanaa. ⁴ Naajuhuaj, nojori pohuatasacari Jesucristojiniji, Pueyasoori nojori miitiquiaari jiyajeneta casaa jiyahua na cumaacata, maa-tia pueya niishiniuria nojori pohuatasanoori seetanujuanaa. Pueyari cunora jiyahua shiriquitiuquiaari queraatia Pueyasor cumaacata mi-ishano nojori niquishacari. Naajuhuaj, Pueyasoori Jesuucua tiuujijaca niquitioquiaa na Sohuanu, tamaatia pa miiniuria na cumaacata, taa na paniyacuajani. Cunora, paa cumaati seetanujuanaa Pueyasor rupaa Jesucristojiniji tojitajaca quiyani.

Jesucristo mijiria rasaaquiaari pa puerana na quiniuria

⁵ Cuno quiarinio jiyaranojiniji teyano pa sequeriquiaacuajani, Pueyasoori maja na seja na jiyatenu quiquiaari cuno quiarinio jiya jiyani-jianucuarano nojori quiniuria. ⁶ Naajaa, tariucuacaanu Pueyasor Ru-paajinia naa naajiotasaquiaariiri pueyano nequesotasano Pueyasor:

“Pueyasonaa, ¿casaateeri pueyanoni, nocua quia niishiriojonurani?

¿Casaara quia taraajeya pueyacuani? ⁷ Quiaacuajaari na shipiniquiaari rupaquijiara socua cumaacaaju na quiniuria quia seyajiniji. Naajaa, quiaari na jiyatequiaari jiyaniijia na quiniuria, cumaacaraca quijia na quiniuriajuhuaj. ⁸ Quiaari na sequequiaari puetunu quia shipinishano casaajanaa jiyaniijia na quiniuria”.

Naa Pueyaso sequesacari pueyanotej, puetunu na shipinishano casaajanaa jiyaniijia na quiniuriatej, naacuajitij, majaari quenaaja niquiriyatu casaa cureenu quiniutianiya na jiitiasoo. Saniniujia, paacuajaari niishiyani, pueyanoori juhuanojuaja maja seetanujuanaa cumaacaraca na quiniu puetunu casaajanaa na tojitiniuria tama nojuajaaja. ⁹ ¿Jesuuriijataj? Pueyano na quiniuria, na Que Pueyasoori rupaquijiara na miiquiaari socua cumaacaaju na quiniuria na seyajiniji. Naacuajitij, pueyano na quishacari, Pueyaso taraajenuucua puetunu pueyacuajanaa, Neyanuuri mosaaquiaari pocuara. Naa na cusionuucua pocuaratej, Pueyasoori na jiyatequiaari Jiyaniijiajanaa na quiniuria, jiyanohua cumaacaraca na quiniuriajuhuaj.

¹⁰ Jamueyashijia Pueyaso quiniuucua, nojuajaari puetunu na muerasuranojuanaa panitiaquiaari na cojiniaa nojori quiniuria. Paniquiaari-iri jatiqui nata shuquiriaatia pa quiniuria, puetunu tama nerajaaja na shipinishano casaatajanaajuhuaj. Jeenucusano pa quiniuria pa cojiniuria Pueyaso, nojuajaari jiyanoqua maninia miiquiaari pocuara, Neyanuuri miitishacari naquiya pa niti. Naacuajitij, Neyanuuri tojetaarucuajanaa maninia quiquiaari Pueyaso muerasuranoocuaji Tacuna na quiniuria. ¹¹ Jesucristo jeequenuucua pajaniya sesa pa miishanojiniji, jatanishano pueya pa quiniuria, paari cunora seetanujuanaa Pueyaso muerasuni. Naacuajitij, Pueyasoori pa Que, taa pocuaji Tacuna Que na quiyacuana. Cunora, Jesucristoori maja na caririquiniu na Que na sequenura pajaniyajiniji, “cua tapueyocuacata”. ¹² Tariucuacaanu Pueyaso Rupaajinia naa naajiotasano quiyacuajaari na sequesano na Que:

“Cua Quenaa, janiyari cua tapueyocuaca pohuatanutaniyani taamuecate quiabajaniyi. Janiyari quia saquiriojosano pueya niiquiara quia jaaquequejotanutaniyani cua shuquiritiasacari quiabajaniya”.

¹³ Tamaqui, Jesu sequesanoori naa naajiotasano quiyajuhuaj:

“Janiyari cua Queecua tiuujia quiniutaniyani”.

Naacuajitij, mijiria na quishacari, Jesuuri na Que Pueyasoocua tiuquiaaricuaa taa pa tiuquiaa nocuanijia. Socua naa naajiotasano quiyari tamaqui taa Jesu sequenutaniyani, jiyocuacaanu na tiuquitiasacari pajaniya na shuquiriniutia:

“Nio pojoriiri cua Que jiyatesano cua tapueyocuacara, nojori tojitianuccua janiya”.

¹⁴ Cuaqueyaraca pa quiniuucua, Sesaacaari cumaacaraca quiquiaari na shaajanura pajaniya, Pueyaso tojitiaashijiaca pa quiniuucua. Naaratej, Jesuuri cuaqueyaraca na quiniuria jataquiaarijuhuaj, taa pajaniyacuana. Naacuajitij, nojuajaari na naata mosaanu quiquiaari pa niti. Naacuajitij, nojuajaari Sesaaca jaariutiaquiaari pajaniya.

¹⁵ Naacuajitij, nojuajaari juhuajaniya quijiacara jiyatequiaari pajaniya, nocua pa tiuuniuucua. Paari niishiyacuajani, pa cusosacari, paari

pa Jiyaniijiata quiniuria quianutaniyani. Cunora, majaari tari pa puerenu pa cusionura. Nocua tiuyashijiaca pueyari seetanujuanaa cusionu puerejaca cutara.¹⁶ Seetanujuanaa, majaari Jesucristo niniu quiquiaari Pueyaso seja na naacunura. Niquiaari cutaraari pueyacuaji na tacunura, noo pojoriicua, nocua tiuuijicate taa supuetana Abraham quiquiaari Pueyasoocua tiuuijacuaani.¹⁷ Maninia pa naacuna na quiniuria, Jesucristoori puetunu naquiya miiniujiana rejeretaquiaari mariyata taa narta pueya miishaquaquiaacuaani. Naacuajit, nojuajaari pocua taraajeja, pocuaji na tacunura Pueyaso. Taraatia pa miiniu niishijia na quiniuucua, pa naata nocua tiuuniu pueyaracaanu na Que Pueyaso na jiyanoootiniuria pajaniya, sesa pa miishanojiniji. Na cusionuucua, naacuajiti Pueyasoori na naata pa jiyanooni puetunu sesa pa miishanojinijijiana.¹⁸ Mijiria na quishacari, nojuajaari pueyaracaanu taraatia miishaquaquiaari. Nojuajaari jiyanoohua saniniujiushaaquiaari sesa na miiniuria juucuajuhuaj. Naacuajit, nojuacuajaari jiyanoohua niishijia na cumaquinuria pajaniya, paa jaara sesa miiniuria saniniujiushaariquiani, paa jaara taraatia miishaariquiajuhuaj.

3

Jesucristo cutaraari Jiyaniijiajanaa Moisésjiniji

¹ Cuarta Pueyaso pueyanaa, niaacuajaari Pueyaso saquiriojosano tama na pueyajaaja nia quiniuria. Nojuajaari Neyanu Jesu jiyarquiaari na rupaa na niishitiniuria pajaniya, Pueyaso pueyara pa jatanishaanura. Neyanuuri na jiyanoootija pajaniya, nocua pa tiuushacari. Cunora, jacaria pa niishirijoore socua Jesucristojiniji.² Mijiria na quishacari, Jesuuri na Jiyarona tojjia quiquiaari pueyaracaanu, taa Moisés quiquiaari Pueyaso tojjiacuaani, Israel pueya jiitiana na quishacari.³ Naajaa, Jesucristo cutaraari Jiyaniijiajanaa Moisésjiniji. Moisésri saaja narta Pueyaso pueyajinijinio pueyano quiquiaari. Saniniuujia, Jesucristoori puetunu Pueyaso pueyajanaa shipininia cutara. Naaratej, Jesucristo cuaara tojishaaria socua cutara.⁴ Puetunu pueyapuejanaari supuetanaaraca. Naajaa, Pueyasojuanaari nojori shipininia seetanujuanaa.⁵ Naacuajit, Moisésri pueyaracaanu Pueyaso sequencesano caminiujuquiaari Pueyaso saquiriojosano narta Pueyaso pueyara, maninia Pueyaso seru na quiniuucua.⁶ Saniniuujia, Jesucristoori Pueyaso Niyanujuanaa cutara. Nojuajaari Pueyaso saquiriojosano pueya Jiyaniijiajanaa. Nojuajaari nojori jiitaa saa maniniaja, taa na Que paniyacuajani. Naaratej, majaari pa cartenu Jesucristo rupaa. Paa jaara Jesucristoocua tiuuiquiaani, naajuhuaj, paa jaara shuquiriaatia na sashiquiaa na rijionura pajaniyani, naacuajit, paari niishiyani paari seetanujuanaa Pueyaso muerasuni.

Pueyasoori na pueya samaraataja

⁷ Pueyaso pueya pa quishacari, Pueyaso Sohuanu sequencesano pa tojiri, maja pa rupatenura Pueyaso Rupaacuaji. Na sequencesanoori naa naajiotasano quiya taricuacaanu Pueyaso Rupaajinia pajaniyarajuhuaj: "Pueyanaa, niaa jaara quiarijia tojiriquia Pueyaso sequencesano niajaniya, majaari na sequencesano ruuretajaca nia quiniu.⁸ Majaari naa nia quiniu taa nia supuetanaa quiquiaaricuaani, cariiquia jiyajinia nojori camarucuneejotasacari pueyaracaanu. Nojoriiri Pueyaso

juuatijiojuaca quiquiaari, pueyaracaanu na tojiyashijiaca nojori quishacari. ⁹ Nojoricuaajaari pueyaracaanu cua cumaacata cua miijiosano niquitiquiaari. Cuarenta marijiaari shocojoquiaari, pueyaracaanu jiyajeneta casaa cua miijiosacari cua cumaacata, maninia cua jiitiasacari nojori. Naajaa, nia supuetanaari cua juuatijioquiaari, pueyaracaanu nojori taacanuusacari cucuaji. ¹⁰ Janiyari cunora seetanujuanaa juaaqviaari puetunu cuno pojoritajanaani. Naaratej, janiyari sequequiaarini: 'Nojoriiri juhua cucuaji tashuquioono rucooijiya tamajaaja. Nojoriiri cua niishitiosano ruuretaquia saaja'. ¹¹ Janiyari cunora jiyanohua cua juaaniutia naa sequequiaarini: 'Majaari nojori rupuenu quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quijiaca nojori quiniuria cuta'".

¹² Naarate cuarta Pueyaso pueyanaa, tama nia cuaqueyajaaja nia cojuare jiyanohua, niaa mariqui Pueyaso Rupaacua tiuyashijiacara quiriohuari, Pueyasocuaji nia rupatenura puetunujuanaa. Pa Pueyasocuajaari quijiajuhanajaj. Nojuajaari na tojiyashijiaca saniitiojua. ¹³ Cunora, seetanujuanaa Pueyaso Rupaa tojitiajaca nia quiniuria, puetunu juucajanaa nia shiniujiutiooriquia pueyaracaanu. Naa nia miiriquia nio pa quishacari Pueyaso jiyanooni puequeyaquishacarija taa na Rupaa sequeyacuajani. Naa nia shiniujiutiooriquiatej nia jiitiyaquiniuucuaji sesa miiniuria. Saniniuuja, niaa jaara sesa miijiacariquia, tama sesa nia miiniujiaarijia nia sapojonutaniya Pueyaso tojiyashijiacara nia jatanuhuara. ¹⁴ Jesucristoocua pa tiuuniuucua, paari na cojiniaara jiyatesanoni. Naacuajitij, puetunu na jiitiasanojuanaari puera quiriquianojuhuaj, paa jaara nocua tiuquiaa pueyaracaanuni, taa shushajanaa seetanujuanaa nocua tiuuijaca pa quiriquiaacuajani.

¹⁵ Cunora, naa naajiotasano quiyari tariucuacaanu Pueyaso Rupaa-jinija:

"Pueyanaa, niaa jaara quiarijia tojiriquia Pueyaso sequesano niajaniya, majaari na sequesano rejetejaca nia quiniu, taa nia supuetanaa quiquiaaricuaani. Nojoriiri Pueyaso juuatijiojuaca quiquiaari, pueyaracaanu na tojitiaashijiaca nojori quishacari".

¹⁶ ¿Canapueteeri cuno pojorini, Pueyaso tojitiaashijiacani? ¿Secaja pueyatee? Maja. Puetunu noo pojoricuaajaari Egipto jiyajiniji Moisés mashiquishano pueyatej. Nojorijianaacuajaari Pueyaso tojiquiaari pocuaano. Naajaa, nojoriiri saaja na ruuretajaca quiquiaari. ¹⁷ Nia niishiritioj, ¿canapuete cuno pojorini, Pueyaso juuatijioquiaarini, pueyaracaanu nojori camarucuneejotasacari cariiquia jiyajiniani? Noo pojoricuajni sesa miijiacatej. Nojoriiri cunora cusionuuquiaari nojori quiojosacari nucuaco cariiquia jiyaco. Na cusionusaquijia jamojosaaquiaariiri. ¹⁸ Nia niishirijiuhuaj, ¿canapue naa Pueyaso seququiaari seetanujuanaa na juaaniutiani: "Majaari nia tiuquitianu quiniutianiya niaarano cua niqutionu panishano jiyajinija, tii juhuajaniya shuquiriaatia nia quiniuria cuata"? Puetunu Pueyaso tojitiaashijiacajanaacuajaari naa sequesaquaaritij. ¹⁹ Naacuajitij, paacuajaari quiarijia maatia niishiyaní, Pueyasocua tiuyashijiaca nojori quiniuucua, majaari nojori tiuquitianu quiquiaari Pueyaso niqutionu panishano

jiyajinia.

4

¹ Pueyasocuajaari pa masuyajaa panaatia pa quiniuria nata. Cunora, jiyanoqua pa cojuare tama pa cuaqueyajaaja Pueyaso sequencesanoocua pa tiuuniuria, tamonu pajaniyajinijinio mariqui jiyanyaquishaareeri. Na sequencesanoocua tiuyashijiacaari maja na rupuenu quiniutianiya Pueyaso, shuquiriaatia na quiniuria Pueyasota. ² Pueyaso rupaacuajaari tari pa niquia pohuatasa aquiaarijuuhuaj, nocua pa tiuuniuria, taa pa supuetanaa niquia na pohuatasa aquiaaricuaani. Nojoriiri Pueyaso rupaa tojiquiaari najuhuanaj. Majaari nocua na tiuutiuniu quiquiaari. ³ Cunora, Pueyasoori pa supuetanaajiniji naa sequequiaari: “Cua sequencesanoocua nojori tiuyaquinuucua, janiyari cunora see tanujuanaa naa sequequiaari cua juanaiutiani: ‘Majaari nojori tiuquitianu quiniutianiya cua niquitionu panishano jiyajinia, cuate nojori quiniuria shuquiriaatia’”.

Pajaniya saniniuujia, Jesuucua tiuuijaca pa quiniuucua, paa cutaraari panaatia quijiacara jatanishanoni, pueyaracaanu Pueyaso rupuejaca pa quiniuria. Pueyasoori naajuhuaj: jiya shipininiu na tucuatanu nuhuaji, nojuaajaari panaatia quiya. ⁴ Cunora, tamaqui tariucuacaanu Pueyaso Rupaajinlia, naa naajiotasaaquiaarii:

“Seis juucajinia Pueyaso tucuatasacari puetunu na poonijiosanojuanaa, na nuhuaji nojuaajaari séptimo juucajinia samaatequiaari”.

⁵ Pueyaso sequencesanoori tariucuacaanu na Rupaajinlia naa pacute josaaquiaari naajiotanu:

“Majaari cua tojitiaashijiaca rupuenu quiniutianiya janiya, panaatia nojori quiniuria cuata”.

⁶ Naa sequencesanojinijitij, maatia niishishiyari Pueyasoori pueya masuyajaa, nojori rupuenura nojuaaja, panaatia nojori quiniuria nata. Noo pojori, coteenjuanaa Pueyaso Rupaa pohuatasa aquiaaritij, nojoriiri maja panaatia quijiacara na jatanishaanu quiquiaari, Pueyaso tojiti aashijiaca nojori quiniuucua. ⁷ Naa Pueyaso panitianuucua pueya, shuquiriaatia nojori quiniuria natajuhuaj, nojuaajaari quiarijia masuyajaa pueya. Cunora, jiyanoqua Moisés nuhuaji, Pueyasoori supuetana David naajiotaniquiaari pajaniyara saniniuujia. Naa sequeyari:

“Niaa jaara quiarijia tojiri Pueyaso rupaa, Pueyaso sequencesano niaarano, majaari na ruuretanu”.

⁸ Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niquitionu panishano jiyajinia. Naajaa, nojori tiuquitiasacari cuno jiyajinia, majaari seetanujuanaa panaatia quijiacara nojori jatanishaanu quiquiaari. Cunoori quiquiaari Pueyasoocua tiuyashijiaca nojori quiniuucuajuhuaj, taa nojori supuetanaa quiquiaaricuaani. Naacuajitij, cuno jiyajinia Josué tiuquitiasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiriquia, ¿Pueyasotucua casaara quiarijia pa masuuriquiaja Jesuucua pa tiuuniuriani, seetanujuanaa panaatia quijiacara pa quiniuria natani?

⁹ Naacuajitij, paacuajaari niishishiyani, Pueyaso pueyaranoori panaatia quijiacara jatanishaanutaniya, shuquiriaatia pa quiniuria Pueyasota pueyaracaanu. ¹⁰ Naacuajitij, cante Jesucristoocua tiuujiani, nojuaajaari panaatia quijiera jatanishaanutaniya. Majaari socua na tacaaniu

quiniutianiya taa tama na cuaqueyajaaja na jiyanootiniutianiya Pueyasoni. Naacuajitij, nojuajaari juhuajaniya quijia quiniutianiya, tarijia najuhuana na poonijiosanojiniji, naatej, taa Pueyasojuanaa samaatequiaari na poonijionu nuhuajicuaani.¹¹ Naaratej, panaatia pa quiniuria Pueyasota, seetanujuanaa na Rupaa tojjiacara pa quiriquia quiarijia. Naa na rupaa tojjiacara pa quiriquia quiarijia. Naa na rupaa tojjiacara pa quiriquia quiarijia. Naa na rupaa tojjiacara pa quiriquia quiarijia.

¹² Pueyaso Rupaari samitianija, cumaacaraca jiuuji-
ajinia na poonijionura. Pueyaso Rupaari jiyanohua socua shamatucuaja
nijiniasquetucuaja mueruujiniji. Nijiniasquetucuaja mueruuri saaja na
naata pa cuaqueya jiyatanu. Pueyaso Rupaa cutaraari pa sohuanu
tohuariquijia, pa niishitija tohuariquijianio. Na naata cuhuatanu poo-
jiajinia jiyasohuaja pa niishiriojosano casaa, poojiajinia pa niishishoo
casaanio. Naacuajitij, Pueyaso Rupaari poojiajinia sesa casaa pa
niishiriojosano nequesoreeja, jiyasohuaja pa miiniu panishano poojia-
jinia pa niishiriojosanonio. ¹³ Puetunu Pueyaso shipinishano casa-
janaani, majaari na cureenu quiniutianiya na nequesoreyaquishoo.
Majaari quenaaja niquiriyatu jamaaniu quiniutianiya nocuaji, neque-
soreesoo na cureenura. Nojuacuajaari maatia niishiya puetunu pa
miishanojuanaa, puetunu pa niishiriojosanojuanaanio.

Jesujuanaari Pueyaso jiyanootijia pueya

¹⁴ Pueyaso Niyanu Jesuni, nojuajaari na Que jiyanootijia pajaniya.
Nojuajaari jiya cajiniocua tohuariquijuaari na Queecua na tiuquini-
uria. Nojuajaari quiarijia tii pocuara secojiya na Que. Naacuajitij, Jesu-
cristoocua tiuuijaca pa quiniuucua, maja cumaati pa pishiniu nocuaji.
Paacuajaari na muerasunyojuani. ¹⁵ Jesu, Pueyaso pa jiyanootijiani,
nojuacuajaari pocua taraajenu niishijia paa jaara saniniujiushaariquia
sesa pa miiniuriani. Nojuacuajaari naa saniniujiushaaquiaarijuhua
sesa na miiniuria juucua, naate taa pa saniniujiushaaquiaacuaani. Maja
cutaraari sesa na miiniu quiquiaari quenaaja. ¹⁶ Cunora, pa jiyanoo-
jia Pueyaso pa rupueriquia pa puereyaquiniutia. Nojuacuajaari pa
tojiquiaa pa secojosacari nojuaja, na jiyanooniuria pajaniya sesa pa
miishanojiniji. Ritia pa cumaquiokiajaa riuuhuaj, pa rejeretanura paa
jaara sesa miiniuria saniniujiushaariquia.

5

¹ Puetunu pueyacuara secojonaa jiyaniijajanaari pueyaracaanu
narta pueyajinjinio saquiriojosano pueyano quiquiaa, taa Pueyaso
niishitiquiaari supuetana Moisescuajani. Nojuajaari jiyatesaaquiaia
pueyacuaji na tacunura Pueyaso. Naacuajitij, nojuajaari nareja
pueya niquitiojosano Pueyasorano masejojua. Naajuhuaj, pueya jaara
sesa miiri, pueyacuara secojonaari pueya seja nanaca shootequiaia,
Pueyaso jiyanooniuria nojori, sesa nojori miishanojiniji. ² Pueyacuara
secojona quiniuucua pueyanojuhuaj, nojuajaari sesa miijiajuhuaj.
Naacuajitij, nojuajaari na naata narta pueyacuara taraajenu, sesa
nojori miishacari, nojori niishiyaquishacari maninia miiniujiuhuaj.
³ Naacuajitij, nojuajaari tama nocuarajaaja seja nanaca shootequiaia
sesa na miiniuucua, taa na miiquiaacuaa narta pueyacuarani, sesa
nojori miishacari. ⁴ Niaacuajaari niishiya, majaari quenaaja tamonu

pueyano na naata tama na cuaqueyajaaja jiyatenu pueyacuara secojona na quiniuria. Pueyasojuanaacujaari tamajaaja saquiriojojua na panishano pueyano, cuno pueyano quiniuria pueyacuara secojona. Pueyasocuajaari naa saquiriojoquiaaricuaa Moisés tarajanu Aarón, pueyacuara secojonaa jiyaniijia na quiniuria.⁵ Naajuhuaj, Jesucristoori maja tama na cuaqueyajaaja na jiyatenu quiquiaari pueyacuara secojona na quiniuria, Pueyaso na jiyanolotiniuria pajaniya. Tama Pueyasojuaarijia na jiyatequiaari pueyacuara secojona na quiniuria. Nojuajanaacujaari naa sequequiaari Jesu:

“Quiaari quiyanu. Janiyari pueyanora quia muerateree jiyacuani cua saquiriojosano pueya Jiyaniijia quia quiniuria”.

⁶ Pueyaso sequesanoori tamaqui tariucuacaanu na Rupaajinia naa naajotasano quiyahuaj:

“Pueyaracaanu rishijia quia quiniuucua, quiaari pueyaracaanu pueyacuara secojoriquiano cutara, taa Melquisedecuaani”.

⁷ Naa pueyano na quishacari mijiriatej, Jesucristoori jiyanolhua saninijiushshaquaari. Naquia na miyaquishaanuuquaji juucua, nojuajaari na Que Pueyaso secojouquiaari jiyanolhua na nujuquenuta. Jiyanolhua martequiaarii na Que na secojosacari, maja na mosaanura. Nojuajaari niishiquiaari na Que na naata nocua taraajenu, maja na mosaanura. Naajaa, na Que tojijia na quiniuucua, na Que sequequiaarii: “Naajaa, quia müri quia panishano cua Quenaa, taa quia panitiaquiaari miiniu janiyacuajani”. Na Queeri na tojiquiaari.⁸ Jesucristoori see-tanujuanaa Pueyaso Niyanu quiquiaari mijiria na quishacarijuhuaj. Naajaa, na niishishacari nojuajaari jiyanolhua naquia miishaanutaniya nojuaja jaara na Que tojiri, naajaa, nojuajaari saaja na tojiquiaari.⁹ Naacuajitij, tojetaarucuajanaa maninia miiija na quiniuucua, nojuajaari pueyacuaji Tacunara quiquiaari, puetunu na tojitiacajanaa na jiyatenura pueyaracaanu rishijiacara.¹⁰ Cunora, na Que Pueyasoori na jiyatequiaari pueyacuara secojona na quiniuria pueyaracaanu, juhua Melquisedec.

Jiyanolhua puereetaari Jesu tojiniu tarinitianu

¹¹ Janiyari queraatia socua nia niishitiojonu paniya Jesucristojiniji, nia niishiniuria nojuajaari seetanujuanaa juhua Melquisedec. Cunoori puera jiyajeneta, maatia cua niishitiojonura niajaniya, juhua niishiyashjiacara nia quiniuquiohua. Niaacuajaari tari niyajetaru-cuaa tariucuacaanu nia tojishano.¹² Tariucuacaanujiniji Pueyaso rupaa tojijiaca nia quiniuucua, ¿taateni? Niaa mariqui na niishitiojonuujuaca quiriquia tari. Saniniuuja, niaari quiarijia paniya socua nia niishitijo-sosaanuhuara maatia niishishaatia casaa Pueyasojiniji. Niaari juhua naatujooriria quiriohuacuaa, juhua shipiyataaquishoojua. Naacuajitij, majaari nia naata jiyajeneta niishitiosano casaa niishiniu.¹³ Naa maatia niishitiosano niishijiaca nia quishacari saajatej, niaari juhua conaaja quiyajaa, saaja quitiaacaacua naataja. Majaari Jesucristo niishitiosano tojitiacaca nia quiniu, maninia miijiaca nia quiniuria.¹⁴ Juhua tariucua mashiquioriria nia jiyateriquiani. Mashiquiori cu-taraari puetunu casaajanaa miaquenuujuaca. Naajuhuaj, puetunu Jesucristo niishitiosanojuanaa niishijiaca nia quiriquia. Niaa jaara

na niishitiosano tojijiaca quiriquia, saaja maninia miijiaca nia quiniuria, niaari maninia niishiniutianiya teyano casaate maniniani, teyano casaate sesa saniniunijia.

6

¹ Naacuajitij, majaari juhua naatujoori nia quiniu pueyaracaanu. Seetanujuanaa socua Pueyaso rupaa tojitiajaca nia quiriquia, juhua tariucua cumantumaca mashaja nia quiniuria, cumueeca. Niaacuajaari tari coteenujuanaa Jesucristojiniji niishitiosano niishijiaca. ¿Niaatucua casaara socua niishitiojosaarohua nioojia nia tacatonurani, maja nia tiuuniuria maninia nia miishanoocua najuhananaj? Niaacuajaari tari niishiya, majaari nia naata maninia nia miishanota tama nia cuaqueyayaaja jiyanootiniu Pueyaso. Cunora, niaari Jesucristoocua tiuujiacara quirquiaari tari, Pueyaso jiyanooniuria niajaniya. ² Naajuhuaj, niaacuajaari tari niishitiosaaquiaari moojinia nia tiuquinishaanura Pueyaso pueya nia quiniuucua. Niaari niishitiosaaquiaarijuhua Pueyaso pueyacua nia nianura nia juaashiquia nojoriicuara nia sec-ojosacari, Pueyaso cumaquinuriua nojori. Niaari niishiyajuhuaj, macunucuaari samiitiaconutaniuhua. Nojorijinijinio saniniujia, Pueyaso tojiyashijiacaari pueyaracaanu saniitiosocoriquiano jiyatesaanutaniya. ³ Quiarijiani, majaari socua cua niishitiojonu quiniutianiya niajaniya nio shusha cua seqesanojiniji niajaniyani. Pueyaso cumaquishacari janiya, janiyari socua jiyaneneta casaa Jesucristojiniji niishitiojonutaniya niajaniyani.

⁴⁻⁵ Pueyano jaara Pueyaso Rupaa tojiyashijiara quiriohua, najuhanari na niishitiojonu pacutenuhua, nojuaja jaara tari Pueyaso Sohuanu cuhuatasano jiuujiaraca quirquiaari. Najuhanari nojuaja jaara tari jiyanoshano quirquiaari, nojuaja jaara tari Pueyaso Sohuanu cumaaca niishijia quirquiaari. Najuhanajaariuhua nojuaja jaara tari Pueyaso Rupaa shuquiritiaja quirquiaari, nojuaja jaara tari Pueyaso cumaacaraca quijia quirquiaarijuhuaj. ⁶ Jiyano pueyanotej, majaari tari na naata sesa miijia na quiniuucua taraajetesaanuhua, Jesucristoocua na tiuuniuhuara seetanujuanaa. Nojuajaari juhua Pueyaso Niyanu teetenu pacuteya niyacutesanojinia, naa na ruuretajaca na quiniuucua. Naa Jesucristo tacartaja na quiniuucuatej, tamasacaari Jesu rerequetequiaajuhuaj. ⁷⁻⁸ Naacuajitij, cuno pueyanoori juhua noo cuhuariquia tee cuniqui sesa jiyanocua maniniucuaa moritianucuajani, riyocuacanio. Pueyasoori najuhanana maru niyojotequia. Majaari cuno cuhuariquiajina nataacuaca muetunu. Jiyano cuhuariquiatej, na camaru cuaara catijiataaranoj. Pueyasoori naa saniitionutaniya nocuaji ruparequeno pueyajuhuaj. Saniniujia, Jesucristo rupaa tojijiacani, nojoriiri juhua maninia cuhuariquia. Pueyasoori maru niyojotequia nocua, maninia na muetutenura tii natoosano casaa. Naacuajitij, na camaruuri quer-aa-tia miajajauraca quiniutianiya. Naajuhuaj, Pueyasoori na tojitianu tarinitiaashijiaca shuquiritiniutianiya pueyaracaanura.

Pa niishishacari Pueyasoori maninia pa miiniutianiya, paari cunora na tojiniu tarinitiaaquiquiaani

⁹ Mirqui cua pohuatasano sesa cuhuariquiajini, cunoori maja niajaniya cua panishano pueyanaa. Majaari cua taacanuunu niajaniyajiniji. Niaacuajaari pa Jiyaniija tojitiajaca quirquia. ¹⁰ Pueyasocuajaari

jiyanohua maninia. Nojuajaari maja na niyajetanu quiniutianiya maninia nia miishano niarta Pueyaso pueya, Pueyaso panijiaca nia quiniuucua, taa quiarjia nia miyajaacuajani. ¹¹ Naatej, taa shitimia niarta Pueyaso pueya naacujuacatuaja niajaniyani, naajuhuaj, janiyari nia panitiaani pa Jiyanijia nia sashiniuria nia timiniutiajuhuaj, nojuaja jaara pa rijionuuucua tiuquiriohuajaatijia. Nia niishitiriquiajaanuhuaj, Pueyasoori jiyanohua maninia miiniutianiya pajaniya. ¹² Majaari nia macuhuajeconu juhua taajecori nia quiniuria pa Jiyanijia. Saniya nia quiriquia cutara juhua tariucuacaanu parta Pueyaso pueya. Nojoriiri shamaatia Pueyasocua tiuujjaca quiquiaari pueyara-caanu. Naquija miiniu rejeretajacaari quiquiaarijuhuaj. Naaratej, Pueyasocuajaari tari maninia miiquiaa nojori, taa seetanujuanaa na sequequiaari na pueyarano na miiniuriacuajani.

¹³ Pueyasoori seetanujuanaa saaquiano Abraham sequequiaari taa na miiniutianiya maninia nojuajani. Majaari na naata sequenu, tamonu cuaara na saniitiooranoj, nojuaja jaara miyaquiri na sequencesano saaquiano Abraham. ¿Cantucuua cumaacaraca Pueyaso na saniitionurani? Shaaqui. Nojuajanaacuajaari Jiyanijiajanaa. ¹⁴ Naaratej, Pueyasoori naa sequequiaari saaquiano Abraham:

“Janiyari seetanujuanaa maninia miiniutianiya quiajaniyani. Janiyari quia juuhua muetutenutaniya jiyanohua queraatiarani”.

¹⁵ Naa Pueyaso sequenu nuhuaji saaquiano Abrahamtej, Abrahamri juhuajaniya sashiquiaari Pueyaso cuaara na sequencesano miiquiaarijiaatijia. ¹⁶ Pueyanaa, niaacujaari niishiya taa pa miiquiaani, parta pueyano niishiniuria paari nojuaja pa sequencesano miiniutianiya see-tanujuanaani. Paari naa sequequiaani: “Seetanujuanaa quia sequeyanijia. Majaari cua sapojonu. Pueyaso cuaara saniitioora janiya, janiya jaara cua sequencesano miyaquirini”. Naa pa sequencesacaritij, parta pueyanoori juhuajaniya pocua tiuujia. Majaari tari na taacanuunu pocuaji. ¹⁷ Naajuhuaj, Pueyaso sequencesacari taa seetanujuanaa na miiniutianiya na pueyaranoni, nojuajaari jiyanohua panitiaquiaari pajaniya, na sequencesanoocua pa tiuuniuria seetanujuanaa. Majaari na paniniu quiquiaari pa taacanuunura quenaaja na sequencesanojiniji. Cunora, nojuajaari naa sequequiaari: “Janiyacuajaari Pueyasoni. Majaari cua niishiniu sapojonu. Cua sequencesanoori seetanujuanaa”. ¹⁸ Naacuajitij, Pueyasoori maatia sequequiaari taa na miiniutianiya nocua tiuujiacarano pueyarani. Majaari saaja cuno na sequenu quiquiaari. Nojuajaari sequequiaarijuhuaj: “Cua sequencesanoori seetanujuanaa”. Pueyaso sequencesanoori maja na naata jatanishaanu. Naacuajitij, pajaniya, nocua tiuujjaca pueyani, paari poojia cajitiquiaani maatia pa niishishacari, pocuaji Tacunaari puetunu na sequencesanojuanaa miiniutianiya pajaniyara. Naacuajitij, majaari pa taacanuunu quenaaja. ¹⁹ Naa Pueyaso sequencesanoocua tiuujjaca pa quishacaritij, paari juhuajaniya naquiya miiniu rejeretajaca quiquiaani. Sesaacaari maja na naata Pueyaso jaariutianu pajaniya. Naacuajitij, paari juhua buqueni, pootioyaquishoo, niquia casaacuaji na jaasutanuuucua. Cuno niquia casaari niquishoo, moo cariquimia pojiyari. Naajuhuaj, nocua pa tiuushanoni, nojuajaari jiyoocuacaanu quiya, niquishoojaariuhua na Que Pueyaso shuriucua na quiniuucua. ²⁰ Nojuajaari na Queecua quianu pa puetaquiaari. Nojuajaari tii pueyaracaanu secojoquiaa na

Que pocuara, na Que jiyanooniuria pajaniya. Naacuajitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiquiaaricuaani.

7

Jesuuri pueyacuara secojona, taa Melquisedec quiquiaaricuaani

¹ Cuno Melquisedecni, nojuajaari Salem tiaca jiyaniijia quijia. Nojuajaari Pueyasojuanaa secojona pueyacuara. Pa supuetana Abraham ham tacatesacariuhua na naminiu nuhuaji na paraa, tamasaca tiacajinijinio jiyaniijianucuani, Melquisedecri nocua tohuataquiaari Salem tiacajiniji. Naa na sequequiaariiri: "Abrahamnaa, quiaari Pueyaso timitiasano. Pueyasoori quia miiniutianiya jiyanoohua maninia". ² Jiyacaritij, Abrahamri na paraa casami nitiariquohua na quiqiojiniohuara. Naacuajitij, nojuajaari puetunu cuno casamijinijiniojuanaa Pueyasora na riuriosano niquitioquiaari Melquisedec. Abrahamri naa miiquiaari na niishishacari Melquisedecri Pueyaso secojona pueyacuara quiquiaari. Pueyanaa, nio Melquisedecjiniji nia niishiri. Pueyano rupaajinlia, na sesaari sequeya, "Saaja maninia mijiia jiyaniijia". Naajuhuaj, na tiaca sesa Salemni, cunoori pueyano rupaajinlia sequeya, "Juhuajaniya quijia pueya tiaca". Na sesaari naa quiquiaari na pueya jiuujia cajitija na quiniucua. ³ Majaari tojetaarucuajanaa na niishishaanu, ¿queraca quiquiaaritii, nucuaracajuhuaj, supuetanaaracanio? Majaari quenaaja na pohuatasaanujuhua na rasaanujiniji, na shaajenujinijinio. Naacuajitij, pajaniyara, Melquisedecri juhua pueyaracaanu quijajuhuanajaj. Majaari na niishishaanujuhua, tamonute na niti jiyatesaaquiaari pueyacuara secojona na quiniuria. Maja. Naacuajitij, nojuajaari juhua Pueyaso Niyanu, pueyacuara secojona na quiniuria pueyaracaanura.

⁴ Pueyanaa nia niishiri, Melquisedecquiiri seetanujuanaa tojishano pueyano quiquiaari socua pa supuetana Abrahamjiniji. Naaratej, pa supuetana Abrahamri nareja na niquitioquiaari na paraa na shocotasano casamijinijinio. Secaja niquitioquiaariiri taa Pueyaso rootaquiaari pa supuetanaacuajani, nojori niquitiojonura nera. Tariucuacaanu, Pueyasoori pa supuetanaa niishitijoquiaari nojori niquitiojonura secaja, puetunu nojori jiitiasano casaajinijijianaa. Naacuajitij, pueyano jaara diez casaa jiitiare, cuaara Pueyasora niquitioora niquiriyatujua. ⁵ Pueyasocujaari supuetana Leví niquiohuacuajinio supueno pueya jiyatequiaari narta Israel pueyacuara secojonaa nojori quiniuria. Nojoriiri jiyatesaaquiaari Pueyasorano pueya niquitiosano masejojua nojori quiniuriajuhuaj. Naa Pueyaso sequencesocujaari Moisés Rootasanojinia naajiotasaquiaari. Abrahamcuajaari puetunu Israel niquiohuajanaa supuetana quiquiaari, maja saaja Leví supuetana. Naajaa, Leví niquiohuacuajinio supueno pueyari Pueyasora narta Israel pueya niquitiosano masejojua. ⁶ Melquisedecri pueyacuara secojona quiquiaarijuhuaj. Maja cutaraari Leví niquiohuacuajinio na supuenu quiquiaari. Naajaa, seetanujuanaa pueyacuara secojona na quiniucua, Abrahamri Pueyasorano na riuriotaca na niquitioquiaari. Abrahamri seetanujuanaa Pueyaso timitiasano pueyano quiquiaari. Naaratej, Pueyasojuanacuajaari tarí Abraham sequequiaari, nojuajaari maninia na miiniutianiya. Naajuhuaj, Melquisedecri pa supuetana

Abraham sequequiaari Pueyasoori jiyanohua maninia miiniutianiya nojuaja.⁷ Paacuajaari niishiyani, Pueyaso jaara maninia miiniutianiya tamonu pueyano, na sequesano caminiijiunia pueyanoori socua tojis-hano pueyano maninia na miishocoriquiano pueyanojiniji. Naacuajitij, paari niishiyani Melquisedecri socua tojishano pueyano quiquiaari Abrahamjiniji.⁸ Quiarijiani, Pueyasorano pueya niquitiosan mase-jojuacani, puetunu nojorijianaari shaajejaca pueya. Saniniujia, tari-kuacaanu Pueyaso Rupaajinia pa serojosacari Melquisedecjiniji, juhua saminiojiniji pohuatashiyari.⁹⁻¹⁰ Nia niishirijiuahuaj, Leví niquio-huacujinio pueyacuajaari Pueyasorano pueya niquitiosan masejo-juaca, pueyacuara secojonaa nojori quiniuucua. Cua tojiri pueyanaa, Melquisedec naacuneetoosacari Abrahamta, Abrahamri jiyacari tari na cuaqueyajinie jiitiariquia puetunu nocuajinio supueriquiano pueyajanaa. Naacuajitij, Abraham niquitiosacari Pueyasorano na riurio-taca Melquisedec, pa naata sequenu Leví quiriquianojuanaari jiyacari Melquisedec niquitioquiaari, Abraham quiniuucua na jiyasorano tari.

¹¹ Leviicuajinio supueno pueyari pueyacuara secojonaa quiquiaari, nojori miiniuria taa Moisés Rootasanojinia sequequiaaricuajani. Naacuajitij, narta Israel pueya jaara sesa miiquiaari, nojoriiri sesa miijiaca seja puecooquiaari pueyaracaanu tama na camaruhuacuara-jaaja, nojori na jiyanoootiniuria Pueyaso. Naa nojori miishano jaara pueya jiyateriquia tojetaarucuajanaa sesa miyashijiacara, paa maara tamonu pocuara secojoriquiano paniyaquiriquiani. ¡Tamonu pocuara secojoriquiano cutaraari panishaquaaria! Juhua pueyaracaanu rishijia Melquisedec panishaquaaria cutaraari, maja juhua Aarón saniniujia, nocuajinio supueno pueyano. Nojoriiri shaajejaca cutara.¹² Aaróncuajaari narta pueyacuara secojonaa jiyaniijia jiyatesano quiquiaari, taa Moisés Rootasanojinia sequeyacuajani. Naacuajitij, tamonu pueyano jaara jiyatesaarecuaa pueyacuara secojona na quiniuria, tamonu rootasanoori panishiyahuaj, Moisés Rootasano niti na quiniuria.¹³ Tariucuacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutaniya pocuara secojoriquiano. Nojuacuajaari pa Jiyaniijia Jesu. Nojuajaari maja Leví niquiohuacujinio supueno. Nojuajaari supuetana Israel niyanuucuajinioocuaja, saniniujia tamonu neyanuucuajiniojaarohuaj, teyanocuajinio quenaaja niquiriyatu pueyacuara secojona supueyacuariaricuajani.¹⁴ Maatia niishishiyacuajaari, pa Jiyaniijiaari Judá niquiohuacujinio supueno quiquiaari. Judaari Leví tarajanucuaja. Moisés pohuatascari pueyacuara secojonaajinijini, majaari quenaaja Judá na jiyaniquinu quiquiaari.

¹⁵ Quiarijiani, quiarinio pocuara Secojona quishacari juhua Melquisedec, paari maatia niishiyani Leví niquiohuacujinio supueno pueyacuara secojonaari sanitishaquaariai.¹⁶ Nojoriiri pueyacuara secojonaa quiquiaari saaja Leví niquiohuacujinio supueno pueya nojori quiniuucua. Jesucristo cutaraari pocuara secojonara jiyatesaquaari pueyaracaanu rishijia na quiniuucua.¹⁷ Cunora, Pueyasoori naa sequequiaari nojuajiniji:

“Quiaari pueyacuara secojona quiniutianiya pueyaracaanura, juhua Melquisedec”.

¹⁸ Naacuajitij, puetunu Moisés rootasanojuanaa pueyacuara secojonaa pueya miishocoriquianoori tari jatasaaquiaari, najuhuana na quiniuccua. Cuno miishanoori cumacaacaju quiquiaari pueya na jataniniuria. ¹⁹ Seetanujuanaari, Moisés Rootasanoori maja na naata quiquiaari saaja maninia miijiacara na jataniniuria na tojitiajaca. Quiarijia saniniujia, paari Pueyaso rupaa Jesucristojiniji jiitiaani. Nocua pa tiuushacari, Jesucristoori pueyaracaanu pa jiyanootiquiaa na Que, juhuajaniya pa rupuenura nojuaja.

²⁰ Na Que sequencesacari Neyanu quiniuria pocuara secojona pueyara- caanura, nojuajaari naa sequequiaari seetanujuanaa. Naacuajitij, paari panaatia quiquiaani pa niishishacari Jesucristoori na Que shuri- ucua quiya, pueyaracaanu pocuara na secojonura na Que. Saniniujia, majaari naa Pueyaso sequenu quiquiaari Leví niquiohuacuajinio supueno pueya, seetanujuanaa pueyaracaanu pueyacuara secojonaa nojori quiniuria. ²¹ Saniniujia, Neyanujiniji na sequencesanoni, cunoori seetanujuanaa. Majaari na sequencesano jatanishaanu quiniutianiya. Naacuajitij, naa naajiotasano quiyari tariucuacaanu Pueyaso Rupaa- jinia:

“Jiyaniijia Pueyasoori seetanujuanaa sequeree na miishocoriquiano. Majaari na sequencesano na jataniniu quiniutianiya. Neyanu se- quereecuajaari: ‘Quiaari pueyacuara secojoriquiano pueyara- caanu’”.

²² Naacuajitij, pueyaracaanu na Que shuriucua Jesu quiniuccua pocuara na secojonura, paari seetanujuanaa niishiyani paari Pueyaso pueyani, Neyanuucua pa tiuuniuucua. Naacuajitij, Pueyaso rupaa Jesujinijiiri socua jiyahohua maninia Moisés Rootasanojiniji. Cunoori pueyara- caanu rishijia Jesu quiniuccua. ²³ Saniniujia, Leví niquiohuacuajinio supuenoni, queraatia pueyacuara secojonaari quiquiaari pueyara- caanu rishiyashijiaca nojori quiniuccua. ²⁴ Jesu cutaraari sha- jeyashijia. Naa pocuara secojona na quishacaritij, majaari quenaaja tamonu sanitiniu quiniutianiya nojuaja. ²⁵ Naacuajitij, nocua pa tiu- ushacari, nojuajaari pueyaracaanu pocuara secojoquiaa, tojetaarucua- janaa maninia miijiacara pa jatanishaanura, Pueyaso pa rupuenura. Majaari pocuara na Que na secojonu na tarinitianu quiniutianiya, sha- jeyashijia na quiniuccua.

²⁶ Jesuuri namitia pocuara secojona na Que. Majaari tamonu quiniu juhua nojuaja. Nojuajaari tojetaarucuajanaa maninia miijiahuanajaj, juhua na Que Pueyaso. Majaari quenaaja sesa miiniu na niishiniu. Sesa miijiacaca tajinia na quishacari mijiria, naajaa, majaari sesa na miiniu quiquiaari quenaaja. Saaja maninia mijija na quiniuccua, nojuajaari tojetaarucuajanaa tamaatia quijia mijiria quiniae pueyajiniji. Naaratej, Pueyasoori jiyocuacaanu quiijara na jiyatequiaari, Jiyaniijiajanaa na quiniuria na shuriucua, tii na secojonura na Que pocuara. ²⁷ Leví niquiohuacuajinio supueno pueyacuara secojona jiyaniijianucuaari pueyaracaanu tama sesa nojori miishanoocuarajaaja seya puecootujua coteenu, Pueyaso jiyanooniuria nojori. Naa nojori miiniu nuhuajitij, nojoriiri jiyacari narta Israel pueya seya puecooquiaari sesa cuno pojori miishanoocuara saniniujia. Maja cutaraari naa Jesu miiniu quiquiaari. Nojuaja jaara tama na cuaqueyajaaja tarinitiaquiaari pocuara na mosaanura juhua borregoniyojua sesa pa miishanoocuara,

cunojuanaari na cusionu quiquiaari. Majaari socua na caminiu quiniutianiuhua cusionu. Naa na cusionuucua pocuaratej, puetunu sesa miijiacajanaari na naata jiyanooshaanu puetunu sesa na miishanojinijijianaa.²⁸ Moisés Rootasanojinia, Pueyasoori tii sequeyacuaja canapuete pueyacuara secjonaa jiyaniijiara jiyateshiyani. Puetunu cuno pueyacuara secjonaa jiyaniijianucuajanaari sesa miijiaca quiquiaari, juhua puetunu pueyajuhuaj. Jiyanoohua Moisés nuhuaji, Pueyasoori saniniujuja tama Neyanujuaja jiyatequiaari pocuara secjonajanaa na quiniuria pueyaracaanu. Na Que tojija na quiniuucua pueyaracaanu, naquia miiniu rejeretaja na quiniuucuajuhuaj, naacuajitij, nojuajaari tojetaarucuajanaa maninia, pocuara secjonara na jiyatesaanura.

8

Quiarinio Pueyaso Rupaacua pa tiuushacari, Jesuuri pa jiyanoootiquiaa na Que

¹ Nio, janiya na pacutenutaniuhua sequenuni, cunoori socua panishano nia niishiniuria. Cua tojiri. Pueyaso Niyanu quiniuucua pocuara secjonaa, nojuajaari na Que miaquetajara cajiquiaari jiyocuacaanu.
² Nojuajaari tii na Que secojoquia pocuara Pueyaso Quishaquijanaa. Cunoori Pueyasojuanaa shipinishano quiqio, maja pueyano tiasano.

³ Puetunu pueyacuara secjonaa janaari jiyatesaaquaiaari nojori masejonura narta pueya poosano casaa, Pueyasora nojori niquitiosano. Naajuhuaj, nojoriiri seja puecojuaca, Pueyaso nojori jiyanoootiniuria. Naacuajitij, Jesucristo quiniuucua pueyacuara secjonajuhuaj, nojuaja cuaara casaa jiitiera, Pueyaso na niquitosocoriquianojuhuaj. Cuno casaacuajaari tama na cuaqueyajaaja quiquiaari, pocuara na mosaanura, Pueyaso jiyanooniuria pajaniya.⁴ Leví niquiohuacuajinio supueno pueyacuara secjonaa cuajaari pueya nitiasano nojoriicua masejoquiaajaa, Pueyasora nojori niquitiosocoriquiano taa Moisés Rootasanojinia sequeyacuajani. Naacuajitij, Jesucristo jaara mijiria quiriquiaja, nojuaja maara pueyacuara secjonaa quiyaquiriquiaj. Pueyacuara secjonaa cuajaari queraatia quiya.⁵ Pueyacuara secjonaa jeecajosano casaa Pueyaso Secojojua tiajinia nojori jiitiasanon, nojori miishanonio, puetunu cunojuanaari saaja juhua jiyocuacaanu casaa naaqui. Cunora, Moisés jaara tari shipiniriquiaa Pueyaso Secojojuara suhuorotu, puetunu na casamitajanaan, jiyacaritij, Pueyasoori naa Moisés sequenu pacutequiaari:

“Moisésnaa, cua tojiri. Maninia quia miiri jacaria puetunujuanaa, naatej, taa cua niquitiquianucuaja quiajaniani, Sinaí tuhuananuucua quia quishacari”.

⁶ Pocuara Secojonajanaa miishanoori jiyanoohua maninia socua pueyacuara secjonaa Levi niquiohuacuajinio supueno miijiosanojiniji. Pocuara Secojona cutaraari tama na cusionutajaaja pa jiyanoootiquiaari Pueyaso. Naacuajitij, Pueyaso rupaa Jesucristojinijiiri jiyanoohua socua maninia Moisés Rootasanojiniji.

⁷ Pueya jiuujia jaara na naata quiriquia seetanujuanaa sesa miyashijiacara jatanishano Moisés Rootasano tojijiaca nojori quiniuucua, Pueyaso maara quiarinio rupaa niishitiyaquiaaria pajaniya.⁸ Saniniujuja, Pueyasoori niishiquiaari Israel pueyari maja na naata quiquiaari puetunu Moisés Rootasanojuanaa tojiniu. Cunora,

tariucuacaanu pueyara Pueyaso sequencesano caminiuijunia sequencesanoori naa naajiotasano quiya:

“Jiyaniijia Pueyasoori sequeya: ‘Tamacari, janiyari quiarinio rupaa niishitiniutianiya Israel jiyajinjinio pueyani, Judá jiyajinjinio pueyanio. Teyano pojoriti nocua tiuyani, nojoriiri seetanujuanaa cua pueya quiniutianiya.⁹ Quiarinio cua rupaari tamaatia quiniutianiya Moisés cua niishitiososano rupaajiniji puetunu Israel pueyarajanaa. Jiyacaritij, janiyari nojori mashiquiquaari Egipto jiyajinjinji. Juhua nojori que, janiyari nojori jaatucunuuriquiaa juucuani nojori cua niquitiosocoriquiano jiyajiniara. Saniniuuja, nojoriiri Moisés cua rootasano nojoriria tojiniu panuyaquiquaari saaja. Janiyari cunora nojori cartequiaarini’. Jiyaniijia Pueyasoori naa sequeree.¹⁰ Socua sequeyari: ‘Nio pa quisshacari nuhuaji, janiyari naa miiniutianiya cua saquiriojosano pueyarani: janiyari coojia nianutaniya nojori jiuujiajiniani. Naacuajitij, cua rootasanoori juhua naajiotasano quiniutianiya nojori niishitajajinia, seetanujuanaa cua tojitiacaca nojori quiniuria. Naacuajitij, janiyari nojori Jiyaniijiajanaa quiniutianiyan. Nojoriiri saniniuuja cua pueya quiniutianiယacuja.¹¹ Jiyacaritij, pueyano jaara janiyajiniji pohuatanu paniri narta pueyano, na cojiniajuhuaj, tapueyocuacanio, cunoori naahuana quiniutianiya. Puetunu pueyapuejanaacuajaari tariucua cua niishijiaca quiniutianiya; jiyaniijianucua, poonijotesano pueyanio.¹² Janiyari nojoriicua taraajeja quiniutianiyan. Majaari cua saniitionu quiniutianiya nojori, sesa nojori miishanajiniji. Naa cua jiyanooshacari nojoritij, majaari socua cua saneejonu quiniutianiya sesa nojori miishano. Janiyari puetunujuanaa na niyajetanutaniyan’”.

¹³ Naa Pueyaso sequencesacaritij, taa nojuaja quiarinio na rupaa niishitiniutianiya pajaniyani, nojuajaari tariucuacaanu Moisés na rootasano jiyatequiaari tariucuaneera. Naacuajitij, Moisés Rootasanoori quera shaajasaanutaniya puetunujuanaa.

9

Tariucuacaanu Moisés suhuorotesano Pueyaso quiquieranoni, cunoori juhua jiyoquaacaanu Pueyaso quiquierojuhuaj

¹ Tariucuacaanu, Pueyasoori Moisés sequencequiaari mijiria na quiquiero rano na suhuorotenura. Na niishitijoquiaarijiaariuhua taa pueyacuara secojonaa poonijionutaniya cuno na quiquierojiniani. ² Pueyaso Secojua suhuorotuuri caapiqui sohuacaraca quiquiaari. Samari nujuatacocaquaari coteenu sohuacajinia quiquiaari, miaquejanio, tee Pueyaso tacoji pan niojosaaquiaari pueyaracaanucuajani. Cuno sohuaca sesa quiquiaari “Pueyaso Shuriucua Quiquiero”. ³ Cuno coteenu sohuaca puequeetujiniani, tii tunusano quiquiaariiri shiquiaruque toque. Cuno toque tamajiria quiquiaariiri Pueyaso quiquierojuanaa cutara. Naaratej, na sesa quiquiaari “Pueyaso Quishaquijiana”. ⁴ Pueyaso Quishaqui tacoji nujuatajaaari juhuacutu, orojiniji shipinishano. Cuniqui catejaari shanohua jaanutaja Pueyasora. Pueyaso Quishaquijiana cutarani, tii nujuatajaaari puereetuua casaa, juhua caaja niuishano. Naana-neecajiniji shipinishaaquiaariiri. Puetunu na cuaqueyajanaari orota

mishiquiosano quiquiaari. Na jiniacuma, casamiiri mii racatasano quiquiaari. Pataconiyojua orojiniji shipinishanoori tii cajitiaquiaari "maná". Manaari quiquiaari Pueyaso tinishano casaa, Israel pueya miaquesocoriquiano cariquia jiyajinia nojori camarucuneejotasacari. Mii matariquiaajaariuhua Aarón nataca catuutianohua, puetunu na jajautajanaa. Mii maturiquiaajaariuhua sai neeca quejasano, nocua Pueyaso naajiotasano na rootasano, Moisés na niquitiojosano.⁵ Cuno caaja tiootiu caco nujuatejosano quiquiaariiri caapiqui shipinishano casaa, nesuhuaraca, juhua Pueyaso seja niquishano. Nojori nesuhuari coqueetesano quiquiaari. Teecoquaari, teje Pueyaso shacantuua mueranacuquiciaari Moisés cuacuajani. Cuno caaja tiootiuuri seja nanaca majiriutiasaquijiuhuaj, Pueyaso jiyanooniuria puetunu Israel pueyajanaa. Tariucuaja puetunu cuno casaajinijijanaa cua pohuatasano niajaniya.

⁶ Pueyaso Secojojua tia jaara tari naa maninia tiasano quiquiaari puetunu na casamitajanaa, na nuhuaji, pueyacuara secojonaari pueyaracaanu tiuquijioquiaari Pueyaso Shuriucua quiqiojinia. Nojoriiri tii tiuquijioquiaari nojori miiniuria taa Moisés Rootasanojinia sequeyacuajani. Maja cutaraari nojori tiuquitianu quiquiaari Pueyaso Quishaquijanaa sohuacamara. ⁷ Saaja nojori jiyanijija cutaraari tii tiuquiquiaari saaja rupaquijia puetunu marijarajanaa. Na tiuquishacari Pueyaso Quishaqui, seja nanaca pataquiaariiri Pueyaso jiyanooniuria nojuaja, narta Israel pueyanio, sesa nojori miishanojiniji. ⁸ Naa Pueyaso Quishaqui quiniuucua mishiquionucua pueyacuajitij, Pueyaso Sohuanuuri pa niishitiya, pueyari juhuanojuaja maja na naata rupuenu quiquiaari Pueyaso. ⁹ Naacuajitij, puetunu cunojuanaari quiquiaari juhua miriqui miishano, saniniuujia nio pa quishacari pa niishiniuria pocuara Secojonajanaa miishano pocuara. Puetunu pueyacuara secojonaa catijiasano casaajanaari miriqui miishano quiquiaari saaja. Naajuhuaj, pa supuetanaa niquitiojosano casaa Pueyaso jiyanooniuria nojorini, puetunu naa miishanojuanaari miriqui miishano quiquiaari. Naacuajitij, cunoori maja na naata cuno pueya jiuujiya jecanu seetanujuanaa, juhuajaniya nojori rupuenura Pueyaso. ¹⁰ Naaratej, cuno tariucuacaanu rootasanoori saaja panishaaquiaari Pueyaso cuaara na sanitiquiaariajiaatija quiarinio rupaata. Cuno tariucuacaanu rootasanoori pueya niishitiquiaari teyano sumatuuteja miaqueshiyani, teyano mashacateja ratushiyani. Naajuhuaj, nojoriiri niishitishaquaari taacari pueya jeequeya na cuaqueyani, nojori casaanio, juhua maninia jeequejosano nojori quiniuria Pueyaso niquia. Puetunu naa pueya miishanojuanaari maja na naata pueya jiuujiya jecanu sesa nojori miishanojiniji.

¹¹ Quiari naataja saniniuujia, Jesucristoori pocuara Secojonajanaara jiyatesaaquiaari, Pueyasojiniji na masenura Pueyaso jiitiasano pajaniyarano. Cuno quiquo, tee na secojoquiaa na Que pocuaracuajani, cunoori seetanujuanaa Pueyaso quiquo jiyocuacaanu, maja pueyanio tiasano. ¹² Naa Cristo tiuquishacari na Que quiqiojinia Pueyaso na jiyanootiniuria pajaniyatej, nojuajaari maja na tiuquitianu quiquiaari cabra nanaca, juunu niquiohua nanacanio. Nojuaja cutaraari tama na nanacataaja Pueyaso jiyanootiquiaari pajaniya. Nojuajaari maja pueyaracaanu na tiuquijionu na Queecua, taa mijiria pueyacuara

secojonaa jiyaniijianucua miiquiaaricuaani. Maja. Nojuajaari na Queecua tiuquiquiaari puetunujuanaa. Naa pocuara na cusionuu-cuatej, na Queeri Neyanucua tiuujiac a jiyanoquoquia puetunujuanaa. Naacuajitij, majaari Pueyaso shuriucuaji pa taanusaanu quiniutianiya.¹³ Pueyasoori Moisés niishitiquiaari, pueyano jaara macu masaqui tiuquimia, jaara na quiarejuhuaj, jiyacaritij, nojuajaari juhua curuutuuca Pueyasora. Naacuajitij, cuno pueyanoori maja na naata narta pueya rupueno. Majaari na naata Pueyaso Secojoua tiajinia tiuquinujiuhuaj. Naajaa, nojuajaari na naata jeequesano quiniuhuua, seru nanaca jaara nocua majiriutiasaaquiaari. Cabra nanaca, juunu nanaca, niyacoo juunu catijasano juacani, puetunu cunojuanaari maninia quiquiaari pueyara, juhua jeequesano nojori quiniuhuara Pueyasora.¹⁴ Naa pueya cuaqueya quiniuucua juhua jeequesano saaja seja nanacatacuaatej, Cristo nanaca cutaraari seetanujuanaa cumaacaraca pueya jiuujia na jeequenura seetanujuanaa, puetunu sesa casaajinijijanaa. Naatej, taa pueyacuara secojonaa jiyaniijianucua tiuquitiaquiaari seru nanaca Pueyaso Quishaquicuaani, pueya jiyanooshaanura, Jesucristoori naa miiquiaarijiuhuaj. Pueyaracaanu quijia na quiniuucua, Jesucristojuanaari tama na nanacajaaja tiuquitiaquiaari Pueyasooqua, pa jiyanooshaanura puetunu sesa pa miishano-jinijijanaa. Nojuajaari tojetaarucuajanaa sesa miyashijia quiquiaari. Naacuajitij, na nanacaari poojia cajitiquiaa, nocua pa tiuushacari. Majaari socua pa jiyaniniu pa naata tama pa cuaqueyajaaja jiyanoootiniu Pueyaso tama pa miishanotajaaja. Naacuajitij, quiarijia cutaraari pa naata pa Pueyasora poonijionu shitimia, seetanujuanaa jiyanooshano pa quishacari.

¹⁵ Jesucristo cusionuucua pocuara, nocua pa tiuushacari, nojuajaari pa jiyanoootiniara quiquiaari taa quiarinio Pueyaso rupaa sequayacuajani. Naajuhuaj, noo pojori, Pueyasooqua tiuujiac a mijiria Jesu niyacarijani, sesa nojori miishanoori jiyanooshaaquiaari Jesu cusionuta quiari naatajahuaj. Naacuajitij, puetunu Pueyaso saquiriosano pueyapuejanaari na naata puetunu Pueyaso niquitijonu panishanojuanaa masenu, taa na sequequiaari niquitionu see-tanujuanaacuajani, pueyaracaanu shuquiriaatia jatiqui pa quiniuria nata.¹⁶ Pueyanaa, pa shaajeyaquishacarrijia, paari pa miiniu panishano naajiotanu niishijani. Paari naa miijiani pa casami serotasaanura maninia, teyano pueya pa panitaa nojori jiitianura pa casamicuajani pa shaajenu nuhuaji. Naacuajitij, paa jaara tari jamosaareni, pueyari maninia miiquiaa taa pa naajiotaquiaaricuajani, saminio pa quishacarrijia.¹⁷ Naacuajitij, saminio pa quishacarrijia, najuhuanaari pa naajiotasano. Pa shaajesacari, jiyacari cutara pa casamiri niquitijosano.¹⁸ Tariucuacaanu naajuhuaj, seja nanacaari shoote-saaquiaari, Israel pueya niishiniuria Moisés Rootasanoori seetanujuanaa, nojori tojishocoriquiano.¹⁹ Naa quiquiaariiri: Moisésri puetunu Pueyaso rootasanojuanaa nojuaja caminiujiuquiaari puetunu Israel pueya niquierajanaa. Na nuhuaji, Moisésri juunu niquiohua nanaca, cabra nanaca cojiquiaari mohuacata. Cunojinia shitiaquiaari borrego cajaca naatusu hisopo cashacucuataari. Cunota, mohuacanacu majiriutiaquiaari Pueyaso Rupaa na naajiotasanoocuaari, puetunu Israel pueyacuajanaanio.²⁰ Jiyacaritij, nojori sequequiaariiri: "Nio

nanacaari pa niishitiya Pueyasoori seetanujuanaa pajaniyara miiniutianiya puetunu na sequencesanojuanaa, paa jaara na rootasano tojijiaca quirini".²¹ Moisésri Pueyaso Secojoua tiaacua majiriuitiaquiaari nanacajuhuaj, puetunu Pueyasora poonijiotajara shipinijiosano casamiicuajanaanio.²² Moisés Rootasanojiniji niishishiyacua-jaari, quera puetunu casaajanaari saaja nanacata juhua jeequesano quiya Pueyasora. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

Sesa pa miiniuuri jiyanooshaaquiaa Cristo cusionuucua pocuara

²³ Mijiria Pueyaso Secojoua tia, puetunu na casaatajanaa quiniuucua juhua jiyocuacaanu casaa naaqui, seja nanacaari maninia quiquiaar-icuaja cuno mijiria casami quiniuria jeequesano. Saniniujia, jiy-ocuacaanu casaa quiniuria jeequesano, socua maninia nanacaari pan-ishaaquiaari seja nanacajiniji.²⁴ Majaari Cristo tiuquitianu quiquiaari seja nanaca mijiria pueyano tiasano Pueyaso Quishaquijanaa. Cuno quiquoori saaja juhua jiyocuacaanu Pueyaso quiquo naaqui. Cristo cutaraari seetanujuanaa Pueyaso Quishaquijanaa tiuquiquiaari. No-juajaari tii na Que Pueyaso secojoquiaa pocuara.²⁵ Mijiria puey-acuara secojonaa jiyaniijianucuaari puetunu marijarajanaa pueyara-caanu tiuquijioquiaari Pueyaso Quishaqui saaja seja nanacata, pueya na jiyanoootiniuria Pueyaso. Jesucristo cutaraari maja naa na miiniu quiquiaari.²⁶ Jesu jaara Pueyaso pa jiyanoootiriquia puetunu mari-jiarajanaa taa pueyacuara secojonaa jiyaniijianucua miiquiaaricuaani, nojuaja maara jiya shipinishaanujiniji mosaariquia puetunu marijara-janaa. Quiari naataja saniniujia, Jesucristoori mijiria rasaaquiaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijijanaa. Majaari socua na pacutesaanu quiniutianiuhua monu. Naa na mosaanuuucatej, cunoori taricuaja puetunu nocua tiuuijaca pueyajanaa jiyanooshaanura.²⁷ Naatej, taatucuaa pueyani, nojoriiri shaajecoriquiano. Ma-jaari nojori samiitiacconuhua mijiria nojori quiniuhuara, socua na cu-sonuhuara juhua coteenu na cusionu. Nojori shaajenu nuhuaji, nojori-iri saaja sashiya Pueyaso nequesoreenura nojori.²⁸ Naajuhuaj, naa Jesucristo mosaanuuucua jiyacaritij, saaja cunojuanaari na mosaanu quiquiaari, queraatia pueya jiyanooshaanura sesa nojori miishano-jiniji. Naacujitij, pocua na muetasacariuhua, majaari jiyacari socua na mosaanu quiniutianiuhua pueya jiyanooshaanura sesa nojori miishanojiniji. Jiyacaritij, nojuajaari saaja nocua tiuuijaca rijionuucua tiuquiniutianiuhua, noo pojoriria canapuete na sashiyacuajani.

10

¹ Moisés Rootasano pueya miishocoriquianoni, pueyacuara secojonaa miishocoriquianojuhuaj, puetunu cunojuanaari juhua seetanujuanaa Pueyaso jiyocuacaanu casaa naaqui, Pueyaso racatasano Jesucristoocua tiuuijaca pueyarano. Moisés Rootasano tojitiajaca pueya cutaraari puetunu marijarajanaa na seja puecootequiaari, Pueyaso jiyanooniuria nojori juucua. Naajaa, majaari na naata seetanujuanaa maninia mijiaca pueyara na jatanishaanu seja nanacata.² Naajuhuaj, pueya miishacari puetunu Moisés Rootasanojuanaa, naajaa, nojoriiri maja seetanujuanaa tama nojori jiuujiajaaaja na cajitiniu quiquiaari. Cunora,

majaari nojori tarinitianu quiquiaari nojori seja puecootenu tama sesa nojori miishanoocuarajaaja. Seya nanacaari maja na naata tuujunu quiquiaari sesa nojori miishano, seetanujuanaa juhuajaniya nojori quiniuria. ³ Naa seja puecoosacari puetunu marijarajanaa Pueyaso jiyanooniuria pueyatej, cunoori saaja nojori niishitiquiaariuhua tarijia nojori miishano sesa. ⁴ Paari seetanujuanaa niishiyacuajani, juunu nanaca, cabra nanacanio, cunoori maja sesa pa miishano tuujuju seetanujuanaa.

⁵ Cunora, tariucuacaanu Pueyaso Rupaajinia, mijiria Jesucristo nishacari na sequesocoriquianoori juhuacaricia naajiotasano quiquiaari. Naa sequeyari:

“Cua Pueyasonaa, janiyacuajaari niishiyani, majaari quioojia quia cajitiniu quiquiaa seja puecoosacari quiocuara, puetunu nataacuacajiniji pueya niquitiojosacari quiarajuhuaj. Saniniuujia, quiaari cuaqueyaraca cua quiniuria cua jiyateree, quiocuara cua mosaanura. ⁶ Majaari quia timiniu quiquiaa seja catijiasacari quiocuara, naajuhuaj pueya shoothesacari na seja nanaca, quia jiyanooniuria nojori sesa nojori miishanojiniji. ⁷ Naaratej, janiyari quia sequeyani: ‘Niya quiyacuajanija cua miiniuria quia panishano cua Que Pueyasonaa, taa janiyajiniji tariucuacaanu naajiotasaquaaricuajani’ ”.

⁸ Moisés Rootasanojiniji pueyari maatia niishitiojosaaquiaari nojori puecootenura tama na seyajaja Pueyasoocuara, na nataacuacajinjinio nojori niquitiojonura nerajuhuaj. Nojoriiri niishitiojosaaquiaarijiuuhuaj nojori catijianura na seja Pueyasoocuara, tama nojori seja nanacajaaja shoothesaanurajuhuaj, sesa nojori miiniucua. Naajaa, Jesucristo sequesanojiniji, paari quiarijia niishiyani, puetunu naa pueya miishanojuanaari maja na timitiniu quiquiaari Pueyaso. ⁹ Nocuaji, Jesucristoorigia sequequiaari na Que: “Niya quiyacuajanija, cua miiniuria quia panishano”. Naacuajitij, Jesucristojuanaari mijiria niquiaari pocuara na mosaanura, seetanujuanaa jiyanooshano pa quiniuria cutara, maja najuhuana seja puecoosaanura socua. ¹⁰ Pueyaso tojijia na quiniucua, Jesucristoorigia tama na cuaqueyajaaja tarinitiaquiaari pocuara na mosaanura, tojetaarucuajanaa jiyanooshano pa quiniuria pueyara-caanu. Naacuajitij, na Que Pueyasoorigia juhua tojetaarucuajanaa sesa miyashijiacara pa jiyatequiaari, seetanujuanaa na pueya pa quiniuria tama nerajaaja.

¹¹ Israel pueyacuara secojonaa pueya poonijiosacari Pueyaso Secojua tiajinia, nojoriiri pueyaracaanu seja puecooquiaa narta pueya miishanoocuara sesa. Naajaa, naa nojori miishanoori maja see-tanujuanaa na tuujunu pueya miishano sesa. ¹² Saniniuujia, Jesucristoorigia tama na cuaqueyajaaja tarinitiaquiaari pocuara na mosaanura niyacutesanojinija. Cunojuanaari na mosaanu quiquiaari. Majaari socua na pacutesaanu quiniutianiuhua monu. Na cusonuucua pa niti, puetunu nocua tiuuijaca pueya sesa miishanojuanaari tojetaarucuajanaa jiyanooshaaquiaa. Naa na tucuatanu nuhuaji Pueyaso miiniuri panishano pueratej, nojuajaari na Que miaquetajara cajiquiaari. ¹³ Quiarijia tii sashiyari, Pueyaso cuaara na paraa shocotare puetunu juanaajaatijiaj. ¹⁴ Naa niquiriyatu pueyano mosaanuuucuatej, puetunu nocua tiuuijaca pueyajanaari maninia mijiacara jatanishaquaia, toje-

taarucuajanaa maninia pa quiniuria, Pueyaso rupuejaca pa quiniuria pueyaracaanu.¹⁵ Pueyaso Sohuanucuaajaari naa pa niishitiyajuhuaj naa Pueyaso sequencesacari tariucuacaanu na rupaajiniae:

¹⁶ “Pa Jiyaniijia Pueyasoori naa sequeya: ‘Nio pa quishacari nuhuaji, janiyari tamaatia miiniutianiya cua saquiriosano pueyan, quiarinio cua rupaacua nojori tiuushacari. Janiyari quiarinio cua rupaa nianutaniya nojori jiuujiajiniani, na tojijiaca nojori quiniuria. Naajuhuaj, janiyari juhua na naajiotanutaniya nojori niishitajajiniani.¹⁷ Janiyari puetunu sesa nojori miishanojuanaa niyajetanutaniya seetanujuanaani’ ”.

¹⁸ Naacuajitij, sesa pa miishano jaara tari seetanujuanaa jiyanooshano quiya, cunora, majaari tari na panishaanu seja puecoosaanura, sesa pa miishanojiniji pa jiyanooshaanura.

Pueyaso pa rupuere jeequesano poojiata

¹⁹ Naacuajiti cua panishano cuarta Pueyaso pueyanaa, quiarijia cutara pa naata pa puereyaquiniutia tiuquijionu Pueyaso Quishaquijiana, Jesucristo shootenuucua na nanaca pocuara.

²⁰ Nojuajaari quiarinio nucuaco pa jaatiaquiaa na Queecua. Nojuajaari juhua pocuaji nuunuquiaari Pueyasocua. Mijiria Pueyaso Secojoua tiajiniani, Pueyaso Quishaquiri shiquiaruque toqueta mishiquionucua quiquiaari, pueya tiuquitiaaquiniuria Pueyasocua. Cuno shiquiaruque toque cutaraari sutequiaari Jesu cusosacari. Cunocuajaari pa niishitiya, pocuajiri juhua nuunusano quiya Pueyasocua. Neyanu Jesucristocuajaari cuno quiarinio nuu. Nocua pa tiuushacari, paari pueyaracaanu rishijiacara jatanishaaquiaani juhua nojuajuhuaj.²¹ Nojuacuajaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucuarajanaa.

²² Cunora, Pueyasocua pa catecanoriquia seetanujuanaa pa paniniutia nojuaja. Nojuaja pa secojoriquia, seetanujuanaa nocua pa tiuuniutia, maja quenaaja nocuaji pa taacanuunuta. Naa pa rupueriquia nojuaja, jatanishano jiuujia, juhua poojiaacua Jesu nanaca majiriutiasano quishacari. Naajuhuaj, puetunu sesa pa miishanojuanaa cuaara jiyanooshano quiria, naatej, taa pa cuaqueyacuaani, pa nanasacari maniniuniacu mohuacata.²³ Niaa jaara moojinia tiuquinijiosaaquiaari, niaari maninia pohuataquiaari pueya niquiara Jesuucua nia tiuuniujiniji. Nocua nia tiuushacari, niaacuajaari niishiya puetunu Pueyaso sequencesanojuanaari pajaniyara tohuateenutaniya, pueyaracaanu shuquiriaatia pa quiniuria nata. Majaari nia taacanuunu nocuaji.²⁴ Parta Pueyaso pueyacua tacaajiaca pa quiriquia. Panijiaca pa quiniuria pa shiniujiutiooriquia, maninia mijiaca pa quiniuriajuhuaj.²⁵ Noojiaqueya parta Pueyaso pueyari tari jiitiquiocanu maja na rerejonura narta Pueyaso pueyata. Majaari naa nia miiniujuhuaj. Maninia cutaraari pueyaracaanu pa rerejonura parta Pueyaso pueyata, pa shiniujiutioonura. Naa pa miiriquia pueyaracaanu cutara, pa niishishacari pa Jiyaniijia tiuquinuuri tari catecanoya.

²⁶ Nia niishiri pueyanaa, maatia pa niishiniu nuhuaji seetanu Pueyaso rupaajanaa, paa jaara saaja sesa mijiocquiaa tama pa panishacari-jiaajani, ¿cantucua socua pocuara cusionu pacuterohua saajaniuhuaj?

Shaaqui. ²⁷ Naa sacuaraatia miijiacani, nojori cuaara niishiiria, nojoriiri cocuaatia miya. Nojori jaara nojori jiujija tacatoyaquiri sesa nojori miiniujiniji, nojoriiri jiyanoqua saniiitosaanutaniya. Narta Pueyaso paraata cojiritiasaanutaniya quejoonu mani quiquojiniaari pueyaracaanura. ²⁸ Pueyano jaara Moisés Rootasano tojiyaquiquiaari, querajaa pueya jaara nocuara saquiriojotaquiaari, nojori sequencesanori seetanujuanaa quiquiaari. Naacuajitij, majaari nocua na taraajenu quishaaquiaari na mosaanura. ²⁹ Moisés Rootasano tojiyashijiaca jaara naa miishaaciaaricuaa, ¿paateeri jiyaniyanija Pueyaso Niyanu soujeaca jiyanooshaanutaniya, na nanaca shoothesaanu jiyatejaca juhua najuhuanaratej? ¿Noo pojoritiiri jiyanooshaanutaniyajuhuaj, Pueyaso Sohuanuuocuara rimiaaquejaca sacuaraatiatej? ¡Maja! Pueyaso Sohuanuuri nojori cumaquiniu paniriquiaa juucua. Jesu nanacacuajaari Pueyaso jiyanooshaanutaniya Moisés Rootasano tojiyashijiaca pueyajiniji. ³⁰ Paacuajaari tari tojiquiaari naa Pueyaso sequencesanoni: "Janiyacuajaari naminiani. Janiyari sesa miijiaca saniitionutaniyani". Naa naajiotasaquiaarijiaariuhuaj: "Pa Jiyaniijia Pueyasoori na pueya nequesoreenutaniya". ³¹ ¡Jiyanoqua puereeta quiniutianya cutaraari Pueyaso jiyanooniu ruuretajaca pueyara, Pueyaso nequesoreesacari nojori!

³² Pueyanaa, tariucuacaanu naquiya nia miishaanu nia niishiriquia, niaa jaara shushajanaa Jesuucua tiuuquiaari. Naa pueya miiti-asacari naquiya niajaniyatej, niaari juhuajaniya rejeretaquiaari saaja. ³³ Noojiaqueya niajaniyajinjinioori cararaatia macaatishaquiaari. Niaari pueya niquiara naquiya miishaaciaarijuhuaj. Niarta Pueyaso pueya niquishacari nia nia miishaanutej, nojoriiri na puereyaquinuitia nia cojiquiaari saaja, niaacula nojori taraajesacari. ³⁴ Naajuhuaj, niarta Pueyaso pueyajinjinio jaara nujuatejosano quiquiaari nujuatejojuajinija, Jesu tojitiajaca nojori quiniuucua, niaari nojoriicua tiuquijioquiaari, nojori nia cumanijianura nocua nia taraajenuucua. Naajuhuaj, nia paraa jaara nia jiitiasano casami riutiocojoquiaari tama nojoririaaja, nojori soosano Jesu pueya nia quiniuucua, niaari juhuajaniya nojoriria tarinitiaquiaari saaja. Niaari saaja shuquiriaatia quiquiaari nia niishishacari niaari jiyocuacaanu jiitiae socua maninia casaa cuno casamijiniji, pueya jaariutiasano niajaniyajiniji. Cuno, Pueyaso jiitiasano niaaranoni, cunoori shaajeyashijia casami cutara. ³⁵ Naatej, taa juhuajaniya naquiya miiniu rejeretajaca nia quiquiaaricuajani, Pueyaso sequencesanocua tiuuijaca nia quiniuucua, nia Pueyaso sequencesanocua tiuuijaca nia quiriquia pueyaracaanu. Pueyasocuajaari jiyanoqua maninia miiniutianya nocua tiuuniu tarinitiaashijiaca. ³⁶ Naquiya nia miishacari pueyaracaanu, juhuajaniya nia rejeretariaquia saaja, maninia nia tucuatanura puetunu Pueyaso panishano nia miiniurajanaa. Naacuajitij, niaari puetunu Pueyaso sequencesanocua masenutaniya, pueyaracaanu shuquiriaatia nia quiniuria. ³⁷ Tariucuacaanu Pueyaso sequencesanocuajaari nia naajiotasano quiya:

"¡Niaaj! ¡Quera tiuquija pueyacua Niriquiano! Maja na tarishiniu. ³⁸ Cua jiyanooshano pueyari pueyaracaanu rishijiacara jatanishaanutaniya saaja Quiyanuucua nojori tiuushacari. Saniniuujia, ta-

monu pueyano jaara nocua tiuuniu tarinitiare, nojuajaari cua soosano pueyano quiniutianiya".

³⁹ Cuno pojoriiri saniitiosocoriquiano seetanujuanaa. Pajaniya saniniujia, paa cutaraari maja jiyano pueyajinijinioni. Paacuajaari pa Jiyaniijiaacua tiuuijiacani, pueyaracaanu nata pa quiniuria shuquiriaatia.

11

Pueyasooocua tiuuniujiniji pohuatasano

¹ Pueyasooocua pa tiuushacari, paari niishiyani paari puetunu Pueyasooocua pa tiuushacari, paari maatia niishiyani puetunu na sequencesanojuanaa pajaniyarano pa niquishoo casaani, cunoori seetanujuanaa quiya. ² Noojiaqueya pa supuetanaajinjinioori seetanujuanaa Pueyasooocua tiuuijaca quiquiaari. Naaratej, Pueyasoori nojorijiniji naa sequequiaari: "Cuno pojorini, nojoriiri maninia cua pueya, cua sequencesanoocua nojori tiuuniuucua seetanujuanaa".

³ Pajaniyara naajuhuaj. Tariucuacaanu Pueyasooocua pa tiuushacari, paari niishiyani Pueyasoori jiya shipiniquiaari saaja na pocuanuta. Naacuajitij, puetunu pa niquishano casaajanaari shipinishaquiaari niquishoo casaajiniji.

⁴ Supuetana Abel tiuuniuucua Pueyasooocua, Pueyasooocuara na catijasanoori socua maninia quiquiaari Pueyasora tarajanu Caín catijasanojiniji. Naa Abel tiuuniuucua Pueyasooocuatej, Pueyasoori na jiyatequiaari maninia na pueyano na quiniuria. Pueyasoori Abel catijasano timitiaquiaari, nocua Abel tiuuniuucua. Cunora, tarajanu Caínri Abel moquiaari. Naajaa, naa macu na quishacaritij, nojuajaari pa niishitiojiyajaa Pueyasooocua pa tiuuniuria taa nojuaja tiuuiquiaaricuaani.

⁵ Supuetana Enoc quiniuucua Pueyasooocua tiuujia, Pueyasoori puetunujuanaa na riquiaari jiyocuacaanu, mijiria na shaajeyaquiniuucuaji. Narta pueya pajesacari nojuaja, majaari tari na quiniu quiquiaari. Pueyasoori tari na riquiaari. Tariucuacaanu Pueyasooocua tiuuyashijia quirini, majaari pa naata timitiniu Pueyasooocua. Naacuajitij, cante Pueyasooocua tiuuyashijia quirini, majaari pa naata timitiniu Pueyasoori. Naacuajitij, cante Pueyasoori seetanujuanaa quijia. Nojuaja cuaara tiuuri Pueyasoori seetanujuanaa quijia. Nojuaja cuaara tiuuri juhua, Pueyasoori na secjonuujuaca tojiquia. Nojori panishano miiquiaa nojoririajariuhuaj.

⁷ Pueyasoori supuetana Noé numootequiaari nojuajaari nio jiya paashahtianiniutianiya, puetunu mijiria sesa miijacajanaa na shaajamura. Pueyasoori na sequequiaarijuhuaj puereetuua buque na shipininiuria tii na tacatajara pajaacuaji. Jiyacaritij, Noeeri maja na niishiniu quijia pajaa. Naajaa, Pueyasooocua na tiuuniuucua, nojuajaari Pueyasooocua na tiuuuijacia pueyajanaari cusionuuquiciaari pajaajinija, nojori tiuyaquiniuucua Noé pohuatasanoocua Pueyasooocua. Noé cu taraari juhua sesa miyashijira jiyatesaaquiaari pueyaracaanu Pueyasota rishijira na quiniuria, Pueyasooocua tiuujia na quiniuucua.

⁸ Abrahamri Pueyasoocua tiuuquiaarijuhuaj. Pueyaso sequencesacari nojuaja tamonu jiyajiniara na pacunura, Abrahamri na tojiquiaari. Tama na jiyajinijijaaja na quiasacari, majaari na niishiniu quiquiaari tee cuniquiria na quiaani. Nojuajaari saaja niishiquiaari Pueyasoori na quijiara na niquitionutaniya tama na jiyaranojuuaaja. ⁹ Pueyaso niquitosocoriquiano jiyajinia na tiuquishacari, Abrahamri cuno jiyajinia quiquiaari juhua rucuanejoja pueyano. Abrahamri juhuanojuaja maja cunojiya camaru na quiniu quiquiaari. Naajaa, Pueyaso sequencesanocua tiuujia quiquiaari pueyaracaanuuri. Nojuajaari saaja seja cajacajiniji shitiasano suhuorotujinia quijia quiquiaari pueyaracaanu. Abraham niyanu Isaacri naa quijia quiquiaarijuhuaj, Isaac niyanu Jacobonio. Pueyasoori cuno pojori sequenu pacutequiaarijuhuah coteenujuanaa na sequencesano Abraham. Naacuajitij, nojoriiri Pueyaso sequencesanocua tiuujjaca quiquiaari pueyaracaanujuhuaj. ¹⁰ Pueyaso jaara Abraham sequequiaari, nojuajaari pueyaracaanu na quijiarano quiqio na niquitionutaniya, Abrahamri niishiquiaari Pueyasoori miriqui sequeriquiaa tama na shipinishano tiacajinijijaaja. Cuno pueyaracaanu rishijia tiacaari Pueyaso niishirijojosano tiaca na saquirijojosano pueyarano. Abrahamri cuno tiacara sashijia quiquiaari pueyaracaanu, Pueyaso sequencesanocua na tiuuniuucua.

¹¹ Naajuhuaj, seetanujuanaa Pueyaso sequencesacari Abraham, nojuaja na muetutenutaniya, Abrahamri jiyacari tariucua saaquiano quiquiaari. Neco Saaraari puera motaja quiquiaarijuhuah na manajenura. Naajaa, Abrahamri niishiquiaari Pueyasoori cumaacaraca quijia na sequencesano na tohuateenura. Naa Pueyasoocua na tiuuniuucuatej, Pueyasoori na cumaquiquiaari neco na manajonura. ¹² Naacuajitij, mueya shipiniyashijia saaquianoori mueya mueratequiaari. Cuno neyanuucuajinio supueno pueyari queraatiara canequiaari, queraati-ate juhua riya, serojiyaquishoo, juhua shoniniacu caminia shuriuquioco paajia jaaquia.

¹³ Puetunu cuno pa supuetanaajanaari Pueyasoocua tiuuijacaja shaajecoquiaari. Nojoriiri juhuanojuaja maja na jiitianu quiquiaari seetanujuanaa Pueyaso sequencesano nojori na niquitosocoriquiano. Naajaa, seetanujuanaa nojori tiuushacari Pueyasoocua, nojoriria, Pueyaso sequencesanori juhua tariucua tucuacaanuji nojori niquishano quiquiaari. Nojoriiri na timitiaquiaari juhua tariucua nojori jiitiasano. Naacuajitij, nojoriiri juhuajaniya quiquiaari juhua rucoojuaca nojori quishacari mijiria. Nojoriiri niishiquiaari, mijiria nio jiyani, majaari seetanujuanaa nojori quiquierano. ¹⁴ Naacuajitij, paari niishiyani nojoriiri tamonu jiya jiitianuucua jiaatiariquiaa, pueyaracaanu nojori quiquierano cutara. ¹⁵ Nojori jaara saaja mijiria jiya camaruha quiniuria panijiaca quiquiaari, nojori maara na supuetuja jiyajiniara riuijuuquiaariuhua. ¹⁶ Saniniuujia, nojori cutaraari socua maninia jiya jiitianuucua jiaati-aquiaari, pueyaracaanu nojori quiquierano cutara. Cunoori jiyocuacaanu quiqio, Pueyaso jeenucusano nojoriria. Naaratej, majaari Pueyaso caririquiniu quiquiaari nojori sequencesacari: "Pueyasoori canaa Jiyaniijia". Nojuacuajaari tari jeenucusano tiaca jiitiae nojoririano jiyocuacaanu.

¹⁷⁻¹⁸ Pueyaso sequencesano Abraham na mueratesano mueya jaara tari mashajaniyojua quiquiaari, Pueyasoori Abraham saniquiaari, na ni-

ishiniuria nojuajate seetanujuanaa na tojija. Naacuajitij, na sequequiaariiri cuaara na panishano niyanu moora, nocuara na catijiaso coriquiano. Cuno neyanu Isaaccuajaari Pueyaso sequencesano quiquiaari, nojuajiniji canenutaniyari queraatia pueya. Naajaa, Pueyaso sequencesacari Abraham, neyanu na monura, nojuajaari maja na ruuretanu quiquiaari Pueyaso. Nojuajaari tari Pueyaso sequencesanoocua tiuriquiaa saaja.¹⁹ Seetanujuanaa Abraham tiuuniuucua Pueyasooocua, nojuajaari niishiquiaari Pueyaso na naata neyanu Isaac samiitianinihuua, nojuaja jaara na more. Naacuajitij, quera Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanujuanaa na tojija. Naacuajitij, Abrahamri neyanuniyojua jaatucuquiaariuhua shuquiriaatia na quiqiojiniohuara, juhua macu samiitianishanohua. Naa Abraham miishanonni, cunoori miriqui quiya pajaniyara taa Pueyaso miiquiaari Neyanu quiari naatajacuaani.

²⁰ Isaac tiuuniuucua Pueyasooocuajuhuaj, nojuaja jaara saaquiano quiquiaarijuhuaj, nojuajaari necohua sequequiaari, Jacobo, Esaúnio: "Pueyasoori jiyahnuha maninia miiniutianiya niaara, niaacuajinio supueno pueyanio, taa na sequequiaari janiyacuajani".

²¹ Jacoboori Pueyaso sequencesanoocua tiuujia quiquiaarijuhuaj. Naacuajitij, quera na cusonu panishacari, nojuajaari neyanu José niquiohuua sequequiaari: "Pueyasoori jiyahnuha maninia miiniutianiya niaara, niaacuajinio supueno pueyanio". Naa na sequenu nuhuaji na jiuuhuatej, nojuajaari na natacacuacu tanishiquiaari. Pueyaso secojoquiaari na timiniutiaari, na niishishacari Pueyasoori pueyaracaanu miiquiaa puetunu na sequencesanojuanaa.

²² Jacobo niyanu Joseeri Pueyaso sequencesanoocua tiuujia quiquiaarijuhuaj. Naacuajitij, quera na cусосаcари, nojuajaari niishiquiaari Pueyasoori tamacari Israel pueya mashiquiniutianiuhua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tiujinura na nucuhua Egipto jiyajinija, nojori jaara quiojorohua Pueyaso niquitosocoriquiano jiyajinira.

²³ Moisés queya quiniuucua Pueyasooocua tiuujiac, nojoriiri Moisés jamoquiaari jaara shusha rasaquaiaari, mueya maniniuniyojua na quiniuucua. Naa na shocojoquiaariiri jiuujianaraca raca, pueyaraacaanu jamosano na quishacari. Egipto jiyajinija Faraónri tarijia sequequiaari, puetunu Israel pueya niquiocohua shusha roosano canuujuanaa cuaara moojinia quejoosaaria. Naajaa, nojoriiri cuno sequencesano tojiyaquiciaari nojori puereyaquiniutia saaja, Pueyasooocua tiuujiac nojori quiniuucua.

²⁴ Naajuhuaj, Moisés quishacari tariucua cumantumaca, Pueyasooocua tiuujia na quiniuucua, nojuajaari na canashitinia Faraón niyatutamacaquiaari. Nojuajaari tama sequequiaarijiaaja: "Majaari Faraón jinianu cua quiniu paniniu. Janiyacuajaari Israel pueyanoni".²⁵ Egipto jiyajinija jinianu na quiniuucua, Moisésri na naata juhuajaniya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishiquiaari cuno shuquiriaatia quiniuuri saaja rupaquiaja mijiria. Nocuaji, majaari na tamacanu quiquiaari narta Israel pueya, shuquiriaatia na quiniuria tamajaaja. Nojuaja

cutaraari narta Israel pueyacua taraajequiaari, Egipto jiya jiyaniijia poonijiotenuucua nojori pueras. Cunora, nojuajaari niishiriojoquiaari nojuaja cuaura cojiritiasaaria naquiya miishaanu narta Israel pueyatajuhuaj. ²⁶ Pueyaso sequencesanoocua tiuujia na quiniuucua, nojuajaari niishiquiaari Pueyasoori na tojitiajaca miiniutianya maninia pueyara-caanu cutara. Nocuaji nojuajaari saquiriojoquiaari narta Israel pueyata soosano na quiniuria mijiria, maja puetunu Egipto casami jiitija na quiniuria mijiria, Faraón jinianu na quiniuucua.

²⁷ Pueyaso sequencesanoocua tiuujia Moisés quiniuucua, na nuhuaji, nojuajaari Israel pueya jaatiaquiaari Egipto jiyajiniji. Majaari na puerenu quiquiaari Egipto jiya jiyaniijia juashacari jiyahohua. Seetanuju-naa Moisés tiushacari na niquiyaquishoo Pueyasoori, nojuajaari Pueyaso niquiquiaari noojiata, juhua na shuriucua quiyano pueyara-caanu. Naacuajitij, Moisésri tama na cuaqueyajaaja cumaquiquiaari maja na tarinitianura miiniu Pueyaso sequencesano nojuaja. ²⁸ Quera Israel pueya mashishacari Egipto jiyajiniji, Pueyasoori Moisés sequencesquaari: “Janiyari niucua cua seru jiyaronutaniyani, cua tojiyahijiaca jiyapueranuhua na puecoonura puetunujuanaa. Nocuaji Israel pueya quia numootere, borrego nanaca nojori shuquiuiutianura na tia to-huateyaji, maja nia jiyapueranuhua cusojuasaanurajuhuaj”. Moisésri Pueyaso sequencesanoocua tiuuquiaari. Naacuajitij, puetunu Israel pueya jiyapueranuhuinijiniojuanaani, majaari quenaaja niquiriyatu niyanu mosaanu quiquiaari cutara.

²⁹ Israel pueya mashishacari Egipto pueyacuaji juucua, Naatunacu jiyanihano caminiaari nojori ritiaquiaari saaja. Nocuaji, Pueyasoori caminia raquitiaquiaari nojori nuura. Na nuhuaji, Pueyasoori Moisés sequencesquaari puetunu nojorijanaa cuara niutiaara caminia taquijiria. Israel pueya tiuuniuucua Pueyaso sequencesanoocua, nojoriiri joo-juashiquio niutiaquiaari juhua puereetunu nucuaco. Egipto jiya jiyani-ijia soldadohua jaara juhua nojori niutianu paniquiaarijuhuaj, nojori-iri saaja shushiniuquiaari.

³⁰ Israel pueya tiuquishacari Pueyaso niquitiosocoriquiano jiyajinia, nojoriiri na paraa Jericó tiaca shocua camarucuneetaquiaari siete ju- uca, naatej, taa Pueyaso rootaquiaari nojori miiniuriacuajani. Naa nojori tiuuniuucua Pueyaso sequencesanoocuatej, Jericó tiaca shocua so-huacaari puetunu pojotaquiaarijanaa. ³¹ Puetunu Pueyaso tojitiaashijiji-acajanaari puecoosaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajinijinio namuenujunaa na jamojonuucua tarijia narta pueyacuaji. Rahabri naa maninia mi-iquiaari Pueyasoori tiuujia na quiniuucua. Naaratej, Israel pueyari cuno paanatu jiyanooshaaquiaari.

³² ¿Teyano pa supuetanaajiniji cua pohuatanutaniya niajaniya socuani? Socua queraatia pa supuetanaari Pueyasoori tiuujiaquaari. Tariucuaja cua pohuatasano, maninia nia niishiniuria Pueyasoori tiuujiaquaari pueyari Pueyaso jiyanooshano. Naajuhuaj, majaari jeya cua quiniu cua pohuatanura maninia nio pojorijiniji: Gedeón, Barac, Sansón, Jefté, David, Samueljinijinio, socua narta Pueyaso sequencesanoocua caminiujiuniaa pueyajinijinio. ³³ Pueyasoori tiuujiaquaari nojori quiniuucua, nojoriiri tamasaca jiyaniijianucua miaquejoquiaari na jiyajiniji. Pueyasoori tiuujiaquaari nojori quiniuucua,

nojoriiri maninia jiyaniijianucua quiquiaari, maninia na jijitanura narta Israel pueya. Pueyaso sequencesanoocua tiuujiac nojori quiniuucua, nojoriiri Pueyaso sequencesano nojori na niquitosocoriquiano masequiaari. Pueyasoocua tiuujiac nojori quiniuucua, juurunu sareya rupaari juhua seecujutasaaquiaari saaja, maja na soonura nojori. ³⁴ Pueyasoocua nojori tiuuniuucua, nojori jaara manijnia quejoosaaquiaari, nojoriiri maja na catenu quiquiaari. Pueyasoocua tiuujiac nojori quiniuucua, nojoriiri na paraacuaji mashiquiaari saaja, maja na puecoosaanura nijiniaquetucuaja mueruuta. Pueyasoocua tiuujiac nojori quiniuucua, sasaca pueyari jiyanolua cumaacaraca quijiacara quiquiaari. Pueyasoocua tiuujiac nojori quiniuucua, nojoriiri jiyanolua cumaquishaquiaari na paraa nojori miaquejonura, na paraa nojori mashiquiniuria nojori jiyajinijijuhuaj. ³⁵ Naajuhuaj, Pueyasoocua tiuujiac maajipohua quiniuucua, nojori macuuri samitiacoquiaariuhua nojoriria.

Tamasacaari jiyanolua taraatia miishaaquiaari Pueyasoocua tiuujiac nojori quiniuucua. Cunora, nojori paraa jaara nojori quiooquiaari, nojoriiri puecoonura miananajosaaquiaari nojori jaara Pueyaso tojiniu tarinitiaquiri. Nojori jaara na paraa sequencesano tojiquiaari, nojori maara cartesaaquiaariuhua. Pueyasoocua tiuujiac nojori quiniuucua, nojoriiri saaja paniquiaari nojori cuaara puecoosaariaqui, naajaa, jiyanolua naquiya na miiniutia. Nojoricuajaari niishiquiaari, Pueyasoori nojori samiitianijionutaniuhua, jiyanolua shuquiriaatia nojori quiniuria pueyaracaanura cutara. ³⁶ Tamasaca quiniuucua Pueyasoocua tiuujiacajuhuaj, nojoriiri cararaatia macaatishaquiaari, jiyanolua majacusaquiaariajiahuihuaj. Naajuhuaj, tamasacaari cumayocua shipinishano casaata morojosaaquiaari. Nujuatejojuajinna nujuatejosaaquiaari. ³⁷ Tamasacaari saitia jacusaaquiaari na puecoosaanura. Tamasacaari na cajiniocua rashiquiojosaaquiaari jacaria jiyaratajata juhua juhuana, socua jiyanolua naquiya na miishaanura. Naajuhuaj, tamasacaari nijiniaquetucuaja mueruuta puetujusaaquiaarijiana piyonu. Naajuhuaj, tamasaca quiniuucua Pueyasoocua tiuujiacajuhuaj, nojoriiri juhua taanuusano rucoojoquiaari puetunu tiquiyocuajanaa. Casamijiuniucua nojori quiniuucua, nojoriiri saaja borrego shoque, cabra shoque cusupuequiaari nojori cushishocoriquiano. Nojoriiri taraatia miitiasano quiquiaari, naquiya miishanojuhuaj. ³⁸ Juhua taanuusano nojori quiniuucua, nojoriiri juhua tashuquioono rucoojoquiaari cariiquia jiyajinna, tuhuananuhuajinianio. Tiaajunucua nojori quiniuucua, nojoriiri saaja raaco maquiyonuujuaca quiquiaari. Mijiria quijiaca pueyari nojori jiyatequiaari juhua najuhuana quijiaca pueyara. Naajaa, nojori cutaraari seetanujuanaa Pueyaso timitiasano pueya quiquiaari, nocua tiuujiac nojori quiniuucua.

³⁹ Pueyasocuajaari nojori jiyanoquiaari, seetanujuanaa nojori tiuuniuucua nocua. Naajaa, nojoriiri juhuanojuaja maja nojori masenu quiquiaari seetanujuanaa Pueyaso sequencesano nojori na niquitosocoriquiano. ⁴⁰ Pueyasoori nio pa quishacari nojori sashitiyajaara, jiyanolua maninia na miishacari pajaniya na Sohuanuta, Neyanu Jesucristoocua pa tiuuniuucua. Na nuhuaji, Pueyasoori puetunu nojoritajanaa pa cojiritianutaniya jataniniu tojetaarucuajanaa maninia miijacu

pa quiniuria, na shuriucuara na rijiosacari puetunu pajaniyajanaa.

12

Jesu miishano pa niishiriojoriquia, naquiya rejeretajaca pa quiniuria-juhuaj

¹ Naa pa niishishacari taa queraatia pueya maninia miiquiaari Pueyasoocua tiujiaca nojori quiniuucuacuaani, cunora, tama pa cojetasano najuhuana casaa pa tarinitiariquia. Tarinitiashiyari puetunu najuhuana casaajanaa, teyanooqua pa cojequiaa Pueyaso panishano pa miyaquinuriacuajani. Naajuhuaj, puetunu sesa miiniujianaa pa tarinitiare, puetunu pa cumaacajanaa pa jiitianura, juhuajaniya rejeretajaca pa quiniuria. Naacuajiti pa naata maninia tucuatanu puetunu Pueyaso panishanojuanaa pa miiniuria. ² Jesu miishano pa niishiriojoriquia pueyaracaanu. Nojuajaari tojetaarucuajanaa na Que Pueyasoocua tiujiua quiquiaari. Nojuajaari niishiquiaari, naquiya na miiniu nuhuaji, na Queeri jiyanoehua shuquiriaatia quihiara na jiyatenutaniya. Naaratej, nojuajaari juhuajaniya rejeretaquiaari naquiya na miiniu niyacute-sanojinia, cararaatia na miishaanujuhuaj. Cunora, nojuajaari na Que miaquetajara cajiya, Jiyaniijajanaa na quishacari.

³ Majaari nia niyajetanu taa Jesu rejeretaquiaari juhuajaniyacuaani, pueyaracaanu sesa miijiaca paracaashacari nojuaja. Nocua nia niishiriojoriquia, niaa mariqui Pueyaso tojiniu tarinitianu paniriiri nia taraajenuta naquiya nia miishacari. ⁴ Niaacuajaari naquiya miishaaquiaa, Jesucristoocua tiujiaca nia quiniuucua. Naajaa, majaari pa Jiyaniijia nia tacartanu, naquiya nia miyaquishaanuucuaji. Nia rejeretariquia saaja. Majaari juhuanojuaja nia puecoosaanu quiqianu na tojitiajaca nia quiniuucua. ⁵ ¿Niaateeri Pueyaso rootasano niyajetarucuua tari, na rootasano pajaniya juhua necohuaja? Naa sequeyari:

“Quiyanunaa, majaari cua rootasano quia soonu, janiya jaara quia niishitiojiya naquiya cua miitishacari quiajaniani. Janiya jaara quia nacasure socua maninia mijia quia quiniuriani, majaari cucuaji pishiniu. ⁶ Quia Jiyaniijia cua quiniuucua, janiyacuajaari cua panishano pueyano jiuuiyashijijani sesa na miishacari. Naajuhuaj, janiyari cua niyanura cua jiyatesano pueyano saniitiojuani jaara sesa miiriquia”.

⁷ Naaratej, juhuajaniya na rejeretajaca nia quiriquia. Pueyasoori juhua necohua nia niishitiojiya, maninia na canashitiniuria niajaniya, seetanujuanaa necohua nia quiniuucua. ¿Pueyanoteeri nareja niquiriquia neyanu, neyanu jaara na tojiyahijija quiriquia? ¡Maja! ⁸ Naajuhuaj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacuajitij, Pueyaso jaara nareja niquiriquia niajaniya sesa nia miishacari, cuno maara quiri maja seetanujuanaa necohua nia quiniuucua, juhua tamonu queecuajinio nia quishacari. ⁹ Naajuhuaj, naatujoori pa quishacari, pa queyari pa majacujua, nojori pa tojiyahacari. Majaari cunora nojori rerequetejaca pa quiniu quiquiaari. Naacuajitij, pa Que Pueyaso jaara pa saniitioriquia, ¿paateeri na rerequetenutaniyani? ¡Maja! Nojuacuajaari seetanujuanaa pa sohuanu Que, pueyaracaanu rishijiacaa pa quiniuria. ¹⁰ Pa queyari pa canashitijoquiaari taa nojori paniquiaaricuajani. Nojori rootasacari

pajaniya, nojori saniitiosacari pajaniya, cunoori quiquiaari saaja mijiria pa quiniuria maninia. Pa Que Pueyaso saniniujujia, nojuajaari pa saniitioquia seetanujuanaa maninia mijiaca pa quiniuria, juhua nojuaja pa quiniuriajuhuaj.¹¹ Seetanujuanaa, puetunu saniitionujuanaari taraatia pajaniyara. Majaari pa timiniu paa jaara majacusaareni. Naajaa, na nuhuaji, paa jaara na ruuretaaquirini, paari socua maninia mijiara jatanishaquaani, socua Pueyaso tojijiara pa quiniuria juhuanjaniyahuaj.

Jiyanohua cocuaatiaari Pueyaso pa tojiyaquishacari

¹² Naacuajitij, majaari nia pishiniu pueyanaa, Pueyaso saniitiosacari niajaniya. Nocua nia tiuuri saaja. Nioojiaca nia cumaquiriohua.¹³ Saaja Jesucristo rupaa tojijiaca nia quiri, jatarinitiaja Pueyasocua tiuujiacamariqui noojia niquipotereeri. Nojori cuaara saniya cumaquishano quiriia cutara.

¹⁴ Tama nia cuaqueyajaaja nia cumaquiriquia, juhuajaniya quijiaca nia quiniuria puetunu pueyatajanaa. Majaari juayonuujutanu. Nia saniriquia seetanujuanaa sesa miyashijiaca nia quiniuria. Saaja noo pojori cutaraari pa Jiyaniijia niquinuitianiya, seetanujuanaa maninia mijiacara jatanishano pueyatej.¹⁵ Pueyasocuaari pa jiyanoojia. Tama nia cuaqueyajaaja nia cojquare niaa mariqui Pueyaso ruuretareeri na naacunu panishacari niajaniya. Nojuajaari cumaacaracacuaja na cumaquinuria niajaniya nia panishacari. Naacuajitij, niarta Pueyaso pueyano jaara juatishaare tamonu miiniuucua sesa nojuaja, nojuaja nia naacure na jiyanooniuria sesa na miinia. Jaara naa miyaquiritij, cuno pueyano juaaqiacaari narta pueyacua paaquenutaniya na sesonura queraatia pueya.¹⁶ Naajuhuaj, tama nia cojuaatooriquajaaja. Naa nia miitiooriquia tamonu niajaniyajinjinio mariqui Pueyaso sequesano na niquitiosocoriquiano pajaniya soojeara quiriiri, saniya tama na cuaqueyajaaja na shuquiritiniuria mijiria. Supuetana Jacobo puerana Esaucuajaari naa miiquiaaritij. Tamacari na miaajesacari, nojuajaari Jacobo sequeriaa: “Cua tarajanunaa, pa que niquitiosocoriquiano janiya, na jiyapueranu cua quiniuucuani, cuno cuaara quiria quiara, quiaa jaara quia sumatuujinji rupore quiria. Jiyanohua miaajeyaniya”.¹⁷ Niaacuajaari niishiya, na nuhuaji, Esauuri paniquiaari na que secjonura nocuara, jiyanohua maninia Pueyaso miiniuria nojuaja, na que jiyapueranu na quiniuucua. Na queeri na ruuretaquiaari saaja. Esauuri jiyanohua na que nenecojquaari na nujuquenuta. Naajaa, na queeri maja na naata jataniniu quiquiaari tariucua neyanu Jacobo na sequesano Pueyaso niquiaira.

¹⁸ Nio pa quishacari, pajaniyara, Pueyasoori maja juhua tariucuacaanu na quishacari pa supuetanaa Israel pueyata. Jiyacaritij, Pueyaso jaara Moisés tacaniquiaari Sinaí tuhuananuucua, Moisés na niishitiojonura na rootasano na pueyara, tuhuananuuri jiyanohua puereeta niquishano quiquiaari. Tuhuananuuri puereeta noshiriquiaa. Na najacaari tacariquiaa mueruucatej. Jiyanohua ninishiquiiri quiriquiaajuhuaj. Paratuuri jiyanohua piyarojoriquiaa puereetajuhuaj.¹⁹ Trompeta jonenenuunuuri jiyanohua tojishaariquiaa. Pueyaso pocuanuuri jiyanohua tojishaariquiaajuhuaj. Israel pueya tojishacari Pueyaso pocuaano, nojoriiri jiyanohua pueretuquiaari. Naaratej, nojoriiri Moisés sequetuquiaari maja socua Pueyasojuanaa pocuanura

nojoriicuara. ²⁰ Nojoriiri maja socua na rejeretanu quiquiaari puera puereeta Pueyaso sequencesacari nojori. Pueyasoori jiyacari naa sequeriquiaa nojoritij, cuno tuhuananuucua nojuajanaa quiniuucua:

“Cante nio tuhuananu rupueyani, cuno pueyano cuaara mosaaria saitia jacusano, cashanata soj. Naa miijia seru cuaara naa puecoosaari-ajuhuaj”.

²¹ Puetunu Israel pueya niquishanojuanaari jiyanohua puereeta quiquiaari seetanujuanaa. Moisésjanaari na puerequiaarijuhuaj. Nojuajaari na puerenuta sequequiaari: “Cua puerenuta tetecaanijia”.

²² Nio pa quishacari saniniuujia, majaari pa catecanonu quiquiaa cuno tariucuacaanu pueya pueresano tuhuananuucua. Jesucristo cu-sonuucua pocuara, paari Pueyaso quiquojinajanaa tiuquitiaquiaani. Cuno na quiquo sesaari miriqui sequenceshiya “Sión tuhuananu”. Na pueya pa quiniuucua, nojuajaari jiyocuacaanu pueyaracaanu pa quijiarano tiaca jiitaa. Cunoori seetanujuanaa jiyocuacaanujinio Jerusalén tiaca. Naacuajitij, paari jiyanohua queraatia Pueyaso seya rupuequiaani, Pueyaso pa maniniuhuaqueetanura nojoritajuhuaj.

²³ Paari tii rerejonutaniya puetunu parta Pueyaso pueyatajanaani. Pueyaso saquirijoosano pueya pa quiniuucua, pa sesacaari jiyocuacaanu Pueyaso nequesoreetuneejinia naajiotasano quiya. Paari Pueyasooocua catecanoquiaani. Nojuajaari puetunu pueya nequesoreenajanaa. Jesucristo niyacarrijia Pueyasooocua tiuuijaca sohuanuhuari tii quiyajuhuaj, canapue Pueyaso jiyatequiaari tojetaarucuajanaa sesa miyashijiacaracuajani. ²⁴ Jesucristo orri tii quiyajuhuaj. Nojuajaari tama na cusionutajaaja Pueyaso jiyanootiquiaari nocua tiuuijaca. Tama na nanacajaaja na shootenuucua pocuarajuhuaj, paari cunota jeequejosaaquiaari tojetaarucuajanaani. Naacuajitij, Jesu nanacaari jiyanohua socua maninia Abel nanacajiniji. Caín monuucua tarajanu Abel, Abel nanacaari Pueyaso shiniujiya na mona cuaara mosaariajuhuaj. Jesucristo nanaca saniniuujia, cunoori Pueyaso pa jiyanootiquiaacujua.

²⁵ Cunora pueyanaa, tama nia cuaqueyajaaja nia cojuare maja nia ruuretanura Jesucristo Rupaa. Tariucuacaanu, pueyari jiyanoy-aquishaaquiaari nojori ruuretasacari Pueyaso sequencesano, nojuaja jaara nojori piriyokoquiaari Sinaí tuhuananujiniji. Nojoriiri jiyanoy-aquishaaquiaari nojori tojinyaquiniuucua mijiria Pueyaso quishacari na sequencesano. Nojori jaara naa jiyanoyaquishaaquiaaricuua, nio pa quishacari saniniuujia, ¿paatucua taa jiyanooshaariquia pa ru-uretasacari Pueyaso quiarijiani, jiyocuacaanuji na piriyojosacari pajaniyani? ²⁶ Pueyaso pocuasacari Sinaí tuhuananujiniji, jiyari na pocuasacari tetecaquiaari. Quiarijia saniniuujia, Pueyasoori seetanujuanaa sequeya: “Janiyari socua caminiutianiuhua jiya jiuuquiutianuni. Maja saa jiyaja. Jiya cajiniocuanio. Jiyacunojuanaari quiniutianiya naa cua miiniu”. ²⁷ Naa na sequencesacari taa socua na caminiutianiuhua jiya jiuuquiutianuni, naacuajiti paari niishiyani, puetunu na shipin-ishano casaajanaari shaajeyaquishaquiji shaajenutaniya. Saaja noo casaari cureenutaniya, maja na naata pootiosano casaatej. ²⁸ Quiarinio quiqio, Pueyaso shipinishano na niquitiosocoriquiano pajaniyani, cunoori maja na naata shaajasaanu quiniutianiya cutara. Paari jiyani-ijianucua quiniutianiya tii pueyaracaanuni. Pa Pueyasoori jiyanohua

maninia miiniutianiya pajaniya. Cunora pa shuquiritiare nojuaja. Paari na shuquirityani pa timitiasacari nojuaja. Naacuajitij, nojuaja pa timitiare jiyanohua pa paniniutia nojuaja, pa puerenutanio.²⁹ Nojuajaari puereeta mani, Neyanu ruuretajaca shaajaja, sesa pa miishano catijajahuaj.

13

Taa pa miyani Pueyaso pa timitiniuria

¹ Majaari panitioonu nia tarinitianu. Naa Pueyaso pueya nia quiniucuatej, pueyaracaanu panitioojuaca nia quiriquia.² Naajuhuaj, majaari rucoojuaca ruuretanu, niaacua nojori tiuquishacari. Nojori panijiaca nia quiriquia. Noojiaqueya pa supuetanaajinijiniocuajaari Pueyaso seja masuuquiaari na tiacora, nojori jiyanishacari nareja pueyano naasucua.

³ Nujuatejosano pueyacua taraajejaca nia quiriquia. Tama nia cuaqueyajaaja nia jiyatere juhua nojoritia nujuatejosanojuhuaj, nojoricua nia taraajenura seetanujuanaa. Naquiya miitiasano pueyacua taraajeja nia quiriquiajuhuaj. Nia niishiriquia, niaari na naata naa miitiasaanujuhuaj.

⁴ Pueyasojuanaacuajaari pa niishitioquiaari pa camitioonura. Cunora, camitioono pueya cuaara saaja neyacata, necocuata quiija quiiria. Cante camiyojuani, nojuaja cuaara tama na cuaqueyajaaja cojuaara maja narta pueyano niuquiocua na numuetucunura, na camishoo maajinio. Nia niishiri, Pueyasocuajaari naa sacuaraatia mijjiaca saniitionutaniya.

⁵ Majaari cumaneeca porocua nia quiniu tama niaarajaaja nia jiitianura. Juhuajaniya quiijiaca nia quiriquia nia jiitiasanota. Nia niishiri, Pueyasocuajaari sequequiaari: "Majaari cua cartenu quiniutianiya ni-ajaniya juhua japeyoyua nia quiniuria. Majaari quenaaja cua tiujianu quiniutianiya niajaniya". Cunora pueyanaa, maja nia tacaaniu.⁶ Naa seetanujuanaa na sequesanoocua pa tiuushacaritij, pa naata sequenu taa supuetana David naajiotaquiaari na sequesanocuajani. Naa sequequiaari:

"Jiyaniijia Pueyasocuajaari cua naacuna. Naacuajitij, majaari cua puerenu quiniutianiya. Majaari pueyano na naata taa miiniu janiya".

⁷ Coteenujuanaa nia jiitianaal pueya nia niishiriojoriquia, noo pojori canapuete shushajanaa nia tojitoquiaari Pueyaso rupaacuajani. Nojoriiri seetanujuanaa Pueyaso tojijiaca quiquiaari, Jesucristoocua tiuuijaca nojori quiniuucua. Juhua nojori quiniuucua jiaatiajaca nia quiriquiajuhuaj, taa nojori quiquiaaricuaani.

⁸ Taa quiija Jesucristo quiquiaari tariucuacaanuni, nojuajaari naa quiyajaa. Naa quiniutianiya pueyaracaanuuri. Majaari na jatanu.

⁹ Naaratej, majaari tamaatia niishitiosano nia tojiniu. Miaquenu pueresanojiniji niishitiosano cutaraari najuhuanaj. Cunoori maja quenaaja na cumaquinii quiquiaari na tojitiajaca. Naajuhuaj, majaari pueyacuara secjonaa jiuujia cumaquiashaanu quiquiaari nojori miaquesacari Pueyasorano puecoosano seja shujiniji. Pueyaso Sohuanu cutaraari poojia cumaquiquiaa, panijiaca pa quiniuria.¹⁰⁻¹¹ Saniniuuja, pueyacuara secjonaa jiyaniijiaari maja noo shu

na miaquenu quiquiaari cutara, Israel pueya jiyanooshaanura puecoosaaquiaaritij. Pueyacuara secojonaa jiyaniijaari cuno seja nanaca tiuquitiaquiaari Pueyaso Quishaquijanaa puetunu maripiarajanaa, cuno nanaca na majiriutianura tii. Na nanaca shoothesano seruuri saniniuuja tiacajiniji jiyatasaaquiaari mij, tii na catijasaanura puetunujuanaa. Pueyacuara secojonaa jiyaniijaari tojetaarucuajanaa tenujusaaquiaari maja na miaquenura cuno shu. Nio pa quishacari saniniuuja, paari jiyanohua cumaquisshaquiaani Jesucristo cusionuucua pocuara. Cunojiniji, paari seetanujuanaa Pueyaso rupuesano quiyacuajani. ¹² Naajuhuaj, Jesucristo mosaanura pocuara, nojuajaari Jerusalén tiacajiniji jiyatasaaquiaarijuhuaj, naatej, taa na nanaca shoothesano seja jiyatasaaquiaari tamaquiriacuaani. Nojuajaari naa tama na cuaqueyajaaja tarinitiaquiaari na mosaanura, tojetaarucuajanaa jeequesano pa quiniuria puetunu sesa pa miishanojinijiana. ¹³ Nojuajaari jiyanohua cararaatia teetesaaquiaari niyacutesanojinia pa niti. Naa Jesu miiniuucua pocuaracuatej, Pueyaso niishiyashijiaca jaara cararaatia miiriquia pajaniya Jesuucua pa tiuuniuucuani, juhuajaniya na rejeretajaca pa quiriquiajuhuaj. ¹⁴ Pajaniyara, Jesuucua tiuujiacani, nio jiyari maja pa quiqio. Mijiria, shaquiiiri pueyaracaanu rishijia quiqio pajaniyarano. Cunora, paari jiyocuacaanu pajaniyarano Pueyaso shipinishano tiacaacua jiaatiaani. ¹⁵ Naa Pueyaso jiitianuucua pueyaracaanu rishijia quiqio pajaniyaranoje, nojuaja pa timitiariquia pueyaracaanu. Neyanu Jesucristo quiniuucua pocuara Secojona, nojuajaari pa tiuquitiaquia na Queecua. Nio pa quishacari quiarijiani, majaari Pueyaso paniniu pa seja nanaca. Nojuacuajaari paniquiaa pa shuquiritanura nojuaja cutara. Naacuajitij, pa rupaa pa jiyatere Pueyasora na quiniuria saaja, pueyaracaanu nata pa maniniuhuaqueetanura nojuaja. Cunocuajaari na panishano. ¹⁶ Naajuhuaj, majaari nia niyajetanu maninia nia miiniuria niarta Pueyaso pueya. Nojori jiitiaaquishacari nojori panishano, nia jiitiasano casaajiniji nia niqutiojoriquia nareja nojori. Paa jaara naa miijiaca quirini, paari juhua Pueyasora pa casaa niqutioyani. Cuno cutaraari na timitiquiaa.

¹⁷ Cuarta Pueyaso pueyanaa, nia jiitiana tojitajaca nia quiriquia. Majaari nojori niishitiojosano nia ruuretanu. Nojoricuajaari nioojiaca cojuaquiaa pueyaracaanu, nojori niishishacari Pueyasoori nojori nequesoreenutaniya nia jiitajaca nojori quiniuucua. Naaratej, shamaatia nojori tojitajaca nia quiriquia maninia, Pueyaso nojori pohuatanura shitimia niajaniyajiniji. Niaa jaara nojori tojitiaashijiaca quiri, nojoriiri Pueyaso pohuatanutaniya na taraajenuta niajaniyajiniji. Jaara naa quiritij, niaa cutaraari taraatia quiniutianiyajuhuaj.

¹⁸ Canaacuara nia secojonuuriquia. Canaacuajaari saaja maninia miiniuria saniniuiuquiaa pueyaracaanuni. Naacuajitij, canaa jiuuji-aari panaatia quiya Pueyaso niquiara. ¹⁹ Janiyari jiyanohua paniyani cucuara nia secojonura, Pueyaso tiuquitiniuhuara ritia janiya niaacua.

Nio naajiona panishacari maninia Pueyaso miiniuria pueya, na saruhuatasacari pueyajuhuaj

²⁰ Jesucristo shootenuucua na nanaca pocuara, paari niishiyani puetunu Pueyaso sequesanojuanaari seetanujuanaa pajaniyarano

quiniutianiya pueyaracaanu. Naa Jesucristo miishanoocua pa tiuushacaritij, na Que Pueyasoori pa jiyanoquiaa, juhuajaniya pa rupuenura nojuaja. Pueyasojuanaacuajaari pa Jiyaniija Jesucristo samitianiquiaariuhua macujiniji. Nojuacuajaari pa cojuna, na panishano pueya pa quiniuucua. ¡Jiyanoqua maninia pa Pueyaso! ²¹ Neyanu Jesucristoocua nia tiuuniuucua, nojuaja cuaara jataniiria niajaniya tojetaarucujanaa jeenucusano nia quiniuria, taa na paniyacuajani. Nojuaja cuaara naa miria niajaniyatej, maninia nia tucuananura puetunu na panishanojuanaa. ¡Pa Jiyaniija Pueyaso cuaara pueyaracaanu shuquiritasaaria jiyanoqua maninia na quiniuucua! Cuaara naa quiiriatej.

²² Cuarta Pueyaso pueyanaa, jiyanoqua nia secojiyanija maja nia ruuretanura secaja rupaata cua shiniuiushacari niajaniya nio cua naajiojinia. ²³ Nia niishiri pueyanaa, parta Pueyaso pueyano Timoteori nujuatejojuajiniji tari tohuatesaaroohuacuaa. Nojuaja jaara tarishiyaquiri cucua na tiuquiniuria, janiyari cucua na ruponutaniyani nia niquiniuucua cua quiasacari.

²⁴ Naajuhuaj, quiria nia saruhuatate puetunu nia jiitiana pueyanaa, puetunu cuniqui quinia parta Pueyaso pueyajanaanio. Italia jiyajinjinio parta Pueyaso pueyari nia saruhuataajuhuaj.

²⁵ Pueyaso cuaara na Sohuanuta cumaquiria puetunu niajaniyanaa.

SANTIAGO NAAJIONEE

Santiago naajiosano niyaquejeno pueyacuara

¹ Janiyari Santagoni, Pueyaso seru, Neyanu Jesucristo serujuhuaj. Nia saruhuataanjia puetunu tiquiyocua jiyacajinajanaa niyaquejeno Israel doce niquiohuacuajino caneno pueyanaa.

Niishitiaja Pueyasojiniji masesano

² Cuarta Pueyaso pueyanaa, shuquiriaatia nia quiriquia niaa jaara taraatia miishaare, niaa jaara naquiya miishaarejuhuaj. ³ Niaacuajaari niishiya, niaa jaara Pueyasocua nia tiuuniucua saniniujiushaare, niaari socua juhuajaniya sashijiacara quiniutianiya. Niaaraari naa miishaanutaniyaqui nia sashishacari Pueyaso cuaara puetunu maniniajanaa miuria niaarajaatijia. ⁴ Nia rejeretare seetanujuanaa maninia sashijiacra nia quiniuria, majaari quenaaja nia taacanuunu. Niaa jaara nia mijia quiritij, niaari maninia jeenucusano quiniutianiya, pueyaracaanu maninia mijia nia quiniuria.

⁵ Tamonu niajaniyajinijino jaara niishiyaquiri taa na miiniutianiyani, nojuaja cuaara Pueyaso maseera, Pueyaso na secojosacari. Pueyasoori na niishitiaja niqutionutaniya. Nojuajaari puetunu pueyajanaa niqutioquia, capora na quiniuucua. Majaari na juaaniu niaa jaara na masere. ⁶ Nia masesacari, seetanujuanaa nia tiuuri Pueyasocua, majaari quenaaja nia taacanuunu. Cante na masesacari taacanuujuani, nojuajaari juhua paratu piyarojosano mohuaca, naatej, taa paratu tacarojiya mohuaca na piyarojosacaricuaani. ⁷ Jiyano pueyanotej, Pueyasoori maja na masesano na niqutionu quiniutianiya, noojia niquistioteja na quiniuucua. ⁸ Noojia niquistioteja pueyanoori quiarijia maseya na parishano. Tariqui na secojosacari saniniuujia, tamonu casaa maseyari, na paniyaquishacari coteenu na masesanocuaa. Jiyano pueyanoori noojia niquistioteja pueyaracaanu. Majaari quenaaja na miiniu parishano na tucuatanu quiniutianiya.

⁹ Cua parishano Pueyaso muerasunaa, niaa jaara casamijiu quiri, naajaa, shuquiriaatia nia quiriquia. Pueyasocuaajaari nia jiyatequiaari na muerasura, na jiitiasanojiniji nia jiitianurajuhuaj. ¹⁰ Saniniuujia, niaa jaara casamiriaca pueyano quiri, shuquiriaatia nia quiriquia Pueyaso jiyanooshano nia quishacari. Niaacuajaari niishiya niaari tojetaarucuajanaa saniitiosocoriquiano quiquiaari juucua sesa mijia nia quiniuucua tarijia. Casamiriaca pueyanoori seetanujuanaa juhua naana shuu, majaari na rishiniu. Saaja rupaquijia niquistiota shanohuari. ¹¹ Pananu jaara nasaatia jama, neyonaari sorequee. Na shuuri tiquii. Shanohua niquistiota shaajequeejuhuaj. Casamiriaca pueyanoori naajuhuaj. Na casami na niqutiojosacarijia na canijianura juucua, canashiyaquiji shaajenutaniyajaariuhuaj.

Naquia pa miishacari

¹² Shuquiriaatia quijia cutaraari Pueyasocua tiuujia, cante taraatia na miishacari rejeretaja saajani. Naa taraatia na saniniujiushaanuu-cuatej, nojuajaari juhua cutara jiyaniijia tuhuaja niquistiosaanutaniya,

pueyaracaanu rishijia na quiniuria. Cunoori Pueyaso niquitionu panishano na panijiaca, taa na sequequiaaricuajani.¹³ Naa jaara sesa miiniuucua jiaatiaa, majaari sequenu: "Pueyasoqui sesa cua miitiniu paniya". Pueyasoori maja sesa miijia. ¿Pa Jiyaniijiatucua casaara sesa miitiri pajaniyani?¹⁴ Saniniuujia, tama poojia sequejaarijia pa shiniujiuquiaa sesa pa miiniuria. Naajuhuaj, tama pa niishitiajajaarijia pa sapojoquiaa sesa pa panishano pa miiniuria.¹⁵ Naa sesa miiniuucua pa jiaatiasacaritij, cunora paari sesa miiquiaani. Naa sesa miijia pa quishacaritij, paari cunora shaajasaanutaniyani.

¹⁶ Cuarta Pueyaso pueyanaa, maja tama nia cuaqueyajaaja nia saponju. ¹⁷ Puetunu maninia casaajanaa pa masesanoni, cunoori Pueyaso niquitosano jiyocuacaanuji. Nojuajaari puetunu jiyocuacaanu pa niquishano casaajanaa shipinijoquiaari, mijiria pa cuhuatariquiano. Pueyasoori pueyaracaanu maninia quijia. Majaari na jatanu tamaatia na quiniuria, na cojuaaqiniuria pajaniya.¹⁸ Pueyasocuajaari pa sohuanu samiitianijoquiaariuhua na rupaacua pa tiuushacari. Nojuajaari pa jiyatequiaari quiarinio na muerasu pa quiniuria. Naacuajitij, taa pueyano tutaacuaa na shuquiriniutia na saaco rishishacaricuana, Pueyasoori naa juhua pa tutaquiaari na shuquiriniutiajuhuaj, coteenujuanaa na jiyapueranuhua pa quiniuucua. Nojuajaari tariucuacaanujiniji naa pa riurioquiaaritij.

Seetanujuanaa Pueyaso tojitiabajca

¹⁹ Naacuajiti cua panishano cuarta Pueyaso pueyanaa, cua tojitiare. Puetunu niajaniyajanaa cuaara quiiria ritia tojijia, jacaria pocuaja. Cuaara quiiria shiniquajuhuaj, maja ritia juajia.²⁰ Pueyanoori maja na naata Pueyaso panishano miiniu na juaaniutia.²¹ Naaratej, nia cartere puetunu sacuaraatia nia miiniujanaa, puetunu sesa nia niishirijosanojuanaanio. Nio pa quishacarini, puera sesa miiniuuri quiquiaa. Naajuhuaj pueyanaa, juhua maninia naatujua nia tojiri Pueyaso rupaa, taa nia niishitiosaaquiaaricuajani. Majaari na ruuretanu. Pueyaso rupaacuajaari cumAACaraca tojetaarucuajanaa sesa miyashijiacara na jiyatenura pajaniya.

²² Pueyaso rupaa tojijiaca nia quiri seetanujuanaa. Majaari nia numaa shama nia tojitanunoj. Naa jaara Pueyaso rupaa tojinyaquiri, niaari tama nia cuaqueyajaaja sapoziya.²³ Pueyano jaara Pueyaso rupaa tojiquiaa saaja na numaa shama, nojuajaari juhua noo pueyanouja, na jiquioco niquirii niquituijinia narejaari.²⁴ Jaara tacateyarohua, na jiquioco niyajetaseequiohuari taamuecate na jiquioco quiriquiaani.²⁵ Pueyaso rootasanoori jiyanoehua maninia, maja quenaaja sesa. Sesu miiniuucua jiitinio pueyano jaara na tojijiara quiri, nojuajaari na naata sesa na miiniu tarinitianu. Cante na numaama na racatajani, nojuajaari shuquiriaatia quijia quiniutianiya cutara. Puetunu na miishanojuanaari maninia quiniutianiya pueyaracaanujuhuaj.

²⁶ Cante na niti rejeteyashijiani, nojuaja jaara tama na cuaqueyajaaja jiyaniya: "Janiya cutaraari Pueyaso tojijiani", cunoori tama na cuaqueya sapoziyajacuaja. Saaja sacuaraatia pocuaja quiya pueyaracaanuuri. Nojuajaari najuhuana Pueyaso rupaa tojijia.²⁷ Cante seetanujuanaa pa Que Pueyaso rupaa tojijiani, nojuaja cuaara japeyoyuaca niquiniuucua rucuaneera, nojori na naacunura. Cuaara naa miiria mashiquiopuerajuhuaj, nojori taraajenucusacari nojori na cumanijanura. Naajuhuaj,

cuaara tama na cuaqueyajaaja cojuaara, narta pueya na miyaquiniuu-cuaji sesa. Naa miijia pueyanotej, nojuajaari Pueyaso pueyano cutara.

2

Maja cumaati rimiajata pa paniniu pueya

¹ Cuarta Pueyaso pueyanaa, pa Jiyaniijia Jesucristoori shacantuua cuamaacajinia quijia. Nojuacuajaari tojetaarucuajanaa maninia quijia. Nocua tiuuijaca nia quishacari, majaari rimiajata nia niquiniu tamasaca. ¿Pa Jiyaniijiateeri pa sooquiaaricuua, ninishi quiijacapa quishacarijiani? Maja. ² Cunora cua sequesanojinia nia niishiriojore: casamiriaca pueyano jaara nia secojonuujuatiajinia tiuquimia, maniniqui toqueraca, jaaniishoracajuhuaj, ¿taa nia miiniutianiyani? ³ Niaari naa sequeja: “Niya quia cajishii pueyanonaa, cajitiu maniniujiniani”. Saniniuujia, toqueeju pueyano jaara jiyacari tiuquimiajuhuaj, jiyareta curuutuquenaniyojua, niaari na sequereecuja: “Cuniquijia quia nujuare”. Casaa maaraja: “Cuniquijia quia cajiri quiaa tii nujuuaani”. ⁴ Niaa jaara naa miiritij, niaari tama nia cuaqueyajaaja jiyateree juhua niarta pueya nequesoreenara. Niaari casamiriaca pueyano jiyaniya nojuaja naasucua socua maninia pueyano casamijiu pueyanojiniji. Naaratej, niaari casamiriaca pueyano shuquiritiniu panjia.

⁵ Cua tojitiare cuarta Pueyaso pueyanaa, ¿majateeri nia niishiniu, Pueyasocuajaari casamijuniucua pueya saquirijoquiaari nocua tiuuijaca nojori quiniuria? Nocua tiuuijaca nojori quishacari, nojoriiri juhua jiyanoehua casamiriaca Pueyasora. Naajuhuaj, Pueyasoori nojori jiyatenutaniya jiyaniijianucua nojori quiniuria, puetunu Pueyaso jiitisanojuanaa nojori jiitnura. Naa miiniutianiya na panijiacaari taa na sequequiaari seetanujuanaacuajani. ⁶ Niajanijarijijataj, niaari nojori cararojoquiaacuajua. ¿Majateeri nia niishiniujuhuaj, cuno casamiriaca pueyacuajaari nia nohuasejoquiaa na sapojonuta? Nojoriiri nia jaamitiquiaa nequesoreenaacuua, niaacuara na saquiriojotanura. Nojoriiri naa miitiuquiaaqui nia jiitiasano casaanijojua na jaariuutianura puetunujuanaa. ⁷ ¿Majateeri nia niishiniu, nojoricuajaari pa shuquiritiasano Jiyaniijia sesacaquiaajuhuaj? Pa Jiyaniijia sesa jiyaniquitiuquiaa na soonutaari.

⁸ Puetunu Pueyaso rootasanojinijijianaani, nioori socua tojishocoriquiano. Naa naajiotasano quiyari:

“Pueya nia paniri taa nia paniya tama nia cuaqueyacuuaani”.

Pueyanaa, niaa jaara cuno rootasano miijia quiriquia, niaacuajaari maninia miijia. ⁹ Saniniuujia, niaa jaara rimiajata paniri pueya, niaari sesa miya. Niaari saniitiosocoriquiano, Pueyaso niishitiososano tojiyashijiaca nia quiniuucua. ¹⁰ Pueyano jaara puetunu Pueyaso rootasanojuanaa tojiquiaa maninia, saniniuujia, jaara niquiriyatu cuno rootasanojiniji tojiyashijia quiri, cuno pueyanocuajaari Pueyaso tojiyashijia. ¹¹ Pueyasojuanaacuajaari sequequiaari: “Maja nia camishoo maaji nia numuetucunu”. Sequequiaarijiaarijuhuaj: “Maja monu”. Naacuajit, pueyano jaara na camishoo maaji numuetuqueyajijia quiri, saniniuujia narta pueyano moyari, cuno pueyanoori Pueyaso rootasano tojiyashijiajuhuaj. ¹² Niaa cumaati niishiya, Pueyasoori na muerasu nequesoreenutaniya taa nojori tojitiaquiaari na rootasanocuajani. Nocuaji tama pa cuaqueyajaaja pa cojuare taa pa miiquiaani,

taa pa pocuaquiaani. Nia niishiri, paari nequesoreesaanutaniya pa miishanojinijini, taa pa miiquiaari parta pueyani. Cante pueya panjia quiyani taa Pueyaso rootaquiaaricuajani, nojoriiri jiyanooshaanutaniya taa nojori jiyanoquaaricuua tamasacani.¹³ Saniniujia, canapuete narta pueyano jiyanojashijiaca quiquiaarini, Pueyaso nequesoreenu juuca puetunu pueyajanaa, nojoriiri jiyanoquaishaanutaniya juhuaj. Canapuete jiyanojia cutarani, nojoriiri jiyanooshaanutaniya cutara, taa tamasaca nojori jiyanoquaacuanai. Nojoriiri shuquiriaatia quiriquiano cuno juuca, Pueyaso nequesoreesacari nojori.

Pueyasoocua tiuujjacaari maninia miijjica

¹⁴ Cuarta Pueyaso pueyanaa, ¿maniniate pueyano jaara sequere: "Janiyacuajaari Pueyasoocua tiuujjani", nojuaja jaara maninia miyashijia quiyajaa? Nojuaja jaara maninia miijiara jatanishoo quiyajaa, nahuuanu sequeyari: "Pueyasoocua tiuujjani".

¹⁵ Naacuajitij, tamonu parta Pueyaso pueyano jaara pa sequesee: "Maja cua jiitianu toque. Maja quenaaja cua miaquesocoriquiano cua jiitianujuhuaj", ¿taa pa miyani?¹⁶ ¿Maniniateeri paa jaara na sequereni: "Juhuajaniya quia quiaarohua. Quia miaquesuhua. Toque quia cushishuhuahuaj"? Maja. Paa jaara quenaaja na niquitioyaoquiri na panishanoni, pa sequesanoori nahuuanaj.¹⁷ Naajuhuaj, pueyano jaara sequere: "Jesucristoocua tiuujjani", jaara seetanujuanaa Pueyaso rootasano tojiyaquiri, na sequesanoori nahuuanahuaj. Jiyano pueyanoori maja seetanujuanaa Jesuucua tiuujia. Paa jaara seetanujuanaa Jesuucua tiuujia quirini, pocua maninia miijjica quirijuuhuaj. Maninia miyashijiaari maja seetanujuanaa Pueyasoocua tiuujia.

¹⁸ Pueyano jaara tamonu sequeriquia: "Quiaari sequeya quiaa Jesuucua tiuujia cutara. Janiyari saniniujia maninia miijjani. ¿Taa cua niishiniutianiyani quiaari seetanujuanaa Jesuucua tiuujia, quiaa jaara maninia miyaquiri? Maja cua naata na niishiniu. Janiya cutaraari quia niishitiniutianiyani janiyari seetanujuanaa Jesuucua tiuujia cutarani, maninia cua miishacari".¹⁹ Pueyaso Rupaacua quia tiuuniuccua, quiaari niishiyacuaja Pueyasoori Jiyaniijajanaa. Cuno quia tiuuniuri maniniacuaja. Naajaa, nia niishiri, samaruuhari cuno niishiyahuaj. Na puerenuta nocuaji tetecatiuyari.²⁰ Mosanucuanaa, ¿majateeri nia niishiniu? Jesuucua tiuujjaca nia quishacari, niaa jaara maninia miyashijiaqua quiyajaa, Jesuucua nia tiuuniuri nahuuanaj, nia tojiyaquishacari Pueyaso.²¹ Niaacuajaari niishiya taa Pueyaso saniquiaari pa supuetana Abrahamni, na niishiniuria seetanujuanaa nocua tiuujiatee. Pueyasoori naa na saniquiaari: na sequequiaari: "Abrahamnaa, quia niyanuniojua quia more cucuara quia catijiasocoriquiano". Majaari Abraham ruuretanu quiquiaari Pueyaso sequesano nojuaja. Naaratej, Pueyasoori naa sequequiaari: "Jiyanojua maninia Abraham, cua tojija cutara".²² Naacuajiti cuarta Pueyaso pueyanaa, naa Abraham tojiniuccua Pueyasotej, paari maatia niishiyani nojuajaari seetanujuanaa Pueyasoocua tiuujia quiquiaari. Naajuhuaj, Pueyaso sequesano na miishacari, nojuajaari Pueyasoocua tiuujia quiquiaari tojetaarucuajanaa.²³ Naa Abraham miiniuucuatej, nojuajaari tariucuacaanu Pueyaso rupaajinia nojuajiniji naajotasano tohuateequiaari. Naa sequeyari:

“Abrahamri Pueyasooqua tiuuquiaari. Naa na tiuuniuucua Pueyasooocu-
atej, Pueyasoori na jiyatequiaari juhua tojetaarucuajanaa sesa
miyashijia na quiniuria”.

Naa Abraham quiniuucua Pueyaso tojijiatej, nojuajaari seque-
saaquiaari Pueyaso rupuenata.

²⁴ Naacuajiti pueyanaa, Pueyasocuajaari na sequesano miijia
jiyanooquia. Maja cutaraari na jiyanoniu noo pojori, nocua
tiuuniu sequeja najuhuanatej. ²⁵ ¿Niaate niishiyajuhuaj taa
Pueyaso jiyanooquiaari Jericó tiacajinjinio paanatucuaani, nooj,
Rahab jiyanishanotej? Pueyasoori na jiyanooquiaari neyatu na
quiniuriajuhuaj. Na jiyanooquiaari maninia na miiniuucua caapiqui
pueyano Israel pueyajinjinio. Rahabri cuno pueya jamojoquiaari na
tiaco. Na nuhuaji, nojori mashiquiquaariuhua tamocoori, narta Jericó
tiacajinjinio pueya puecoyauquinuucuaji cuno pojori. Rahabri naa
maninia miiquiaaritij Pueyasojiniji na tojishanoocua na tiuushacari.
Niishiquiaarii Pueyasoori Israel pueya cumaquinia quiquiaari. ²⁶ Nio
pohuatasanoori pa niishitiojiya, naatej, taa pa cuaqueya macu quiya
sohuanuujucuaani, naajuhuaj, paa jaara Pueyaso sequesano miyashijia
quirini, paari najuhuana sequeyani: “Jesuucua tiuujianija”.

3

Pa niti juhua mani

¹ Cuarta Pueyaso pueyanaa, maja cumaati puera niajaniyajinjinio
jiaatianu Pueyaso rupaa niishitiojonaa nia quiniuria. Niaacuajaari
niishiya, Pueyaso rupaa niishitiojonaari socua jiyanohua saniitiosaanu-
taniya tamasacajiniji, nojori tojitiaaquiniuucua tama nojori niishitio-
josanojuaaja. ² Puetunu pajaniyajanaari sequeyarucua miiquiaa sesani.
¿Teyano pueyanote tojetaarucuajanaa narta pueyano najiquityaquij-
jia na pocuasacarini? Shaaqui. Pueyano sequesano jaara puetunu
maniniajanaa quiri pueyaracaanu, cuno pueyano maara seetanujuanaa
maninia pueyano quiri cutara. Cuno pueyano maara na naata puetunu
tama na cuaqueyajaja jiitianu niishiriquiajuhuaj sesa na miyauquinu-
cuaji. ³ Niaacuajaari nishiya, caballo rupaama jaara niasaare na niqui-
tijiotaja, na camaru na tojiniuria, na netesacari, na camaruuri puetunu
na caballo cuaqueyajanaa niquitijotaa na panishaco. ⁴ Puereetuca
buqueeri naajuhuaj. Shiitianiyojua na niquitijotaja jiitiaajaariuhuaj.
Jiyanohua paratu piyarojosacari, naajaa, na camaruuri saa cunotaja
na niquitijotaa na panishaco. ⁵ Pa nitiiri naajuhuaj, shiitianiyojua
casaaniyojuaari pa cuaqueyajinia shipinishano. Naajaa, jiyanohua
pocuanu niishijiaari. Sesa pa miitiyari. Nojuajaari juhua maniyashi.
Maniyashi jaara jaare puereetuca cuhuariquajinia, cuno maniyashiiri
puereetuca maniria pacusee. Cuhuariquiaari puetunu catemaajanaa.
Pa nitiiri naajuhuaj. ⁶ Pa nitiiri seetanujuanaa juhua mani quiya pa
cuaqueyajinia. Paa jaara sesa pocuareni, paari puetunu pa cuaque-
yajanaa sesoyani. Pa nitiiri puetunu sesa niishijiajanaa. Paa jaara
sesa pocuare pueya niquiarani, puetunu pueyajanaari pa sequesano
caminiuijuquia tamasaca niquiara. Pa nitiiri Sesaaca poonijjotesano.
Naacuajitij, sesa pa pocuasacari, paari puetunu mijiria pa quiniujanaa
sesoquaani. ⁷ Pueyanoori na naata jiyartutenu puetunu casaajanaa:

jaacuatujuuaca, roshiyocuatujuuacajuhuaj, moojinijinio casaanio. Seetanujuanaari, pueyari tari naa na jiyartuutejoquiaa. ⁸ Maja cutaraari pa naata jiyartutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura. ⁹ Paari jiyano pa nititaja pa Que Pueyaso maniniuhuaqueetaquiaani. Naajuhuaj, paari Pueyaso shipinishano parta pueya sesacquiaa natajuhuaj. ¹⁰ Naacuajitij, pa ru-paamaji tohuataari maninia sequencesano, sacuaraatia sequencesanojuhuaj. Cuarta Pueyaso pueyanaa, ¡maja cumaati naa pa quiniutij! Maja maninia naatej. ¹¹ Samo nacajiniji pueyaracaanu pacaretaquiaacujua? Maja. Samo nacaari pueyaracaanu maniniuniacu quijia. ¹² Cuarta Pueyaso pueyanaa, ¿mariyajate na naata muetunu shucuenajara? ¿Nateecate sacamanajara muetujujuhuaj? Maja. Naajuhuaj, maja pa naata pianacu mohuaca taquitianu cuari maniniujiniji. ¿Mohuacatuua casaara jatare tamaatiuniacurani? Naajuhuaj, paa cuaara pueyara-caanu maninia pocuaara saaja. Maja cumaati pa pocuasano pa cojitinu sesa pocuasanota.

Niishijia pueyano

¹³ Tamonu niajaniyajinjinio jaara niishijia quiri, nojuaja cuaara juhuajaniya maninia mijija quiria nareja, maja pueya shocoteja. Jaara naa maninia quiria quiri, pueyari niishiniutianiya nojuaja seetanuju-naa niishijia. ¹⁴ Saniniuuja, nioojia jaara najiquitishano quiri, niishijia nia quiyaquiniuucua juhua niarta Pueyaso pueyano, niaari seetanuju-naa mosanucua. Naajuhuaj, nia miishano jaara quiri nia shocotanura niarta Pueyaso pueya saaja shuquiriaatia nia quiniuria tamajaaja, ma-jaari nia jiyanihi niaari niishijiaca. Naa miijiac a nia quishacaritij, niaa jaara tama nia niishitajajaaja shuquiritiare, niaari mosanucua saaja. Nia sequencesaci: "Niishijia cutaranijia", niaari sapojiya. ¹⁵ Cuno nia niishitajaari maja jiyocuacaanuji Pueyaso niishitaja. Cuno niishitajaari tama nia niishishanojuaaja, mijiria niishishanojuhuaj, Sesaacajanaa niishishanonio. ¹⁶ Pueyanaa, tee Pueyaso pueya juatishano quiya tamasaca jaara na shocotare, naajuhuaj, pueya miishacari saaja tama na panishanojuaaja, tii quiyari juayonuu-jutanu, puetunu sesa miini-ujianaanio. ¹⁷ Saniniuuja, cante Pueyaso niishitija jiitaa cutaranii, nojuajaari maninia mijija pueyano cutara. Jiyano pueyanoori maninia quiria puetunu pueya niquierajanaa, jiyanoootio, jacaria pocuaja. Ma-jaari na niishiniu ritia juaaniu. Pueyacua taraajejaari. Majaari na niishiniu cuaracashijionu pueyacuara. Pueyaracaanu seetanujuanaa sequeyari. ¹⁸ Naajuhuaj, cante juatoyano jiyanoootiootejani, nojuajaari jiyanoohua shuquiriaatia quiniutianiya Pueyaso shuquiritishacari nojuaja maninia na miiniuucua.

4

Mijiria casaacua jiaatiajacajiniji pohuatasano

¹ ¿Niaate niishiya casaara nia juayonuu-jutaquiaa tamajaaja pueyara-caanuni? Niaari naa quiyaquij sesa miiniuucua nia jiaatiasacari. Nioojiaari najiquitishano quiquiaa nia panishanoocua nia jiaatiasacari sacuaraatia. ² Naaratej, nia panishano nia maseyaquishacari, niaari na casamiicuaji pueyano moquiaa. Niaari naa miiquiaa puera

nia jiaatiasacari nia panishanoocuatej. Nia panishanoocua nia jiaatiasacari jiyanohua, niaari cunora miriyojotaquiaa. ¡Niaari socua piyotaariquiaaqui! Niaari naa quiyaqui Pueyaso nia secojiyaquiniuucua nojuaja niquitionura niajaniya nia panishano. ³ Naajuhuaj, niaa jaara na secojore, majaari nia masenu quiquiaa nia masesano. ¿Casaara nia maseyaquiaquiaanoj? Nia sequereeraj. Niaari sesa nia jiaatianuta na masequiaajuhuanajaj. Niaari nia jiaatiasanoocua masequiaaa juucua, tama nia cuaqueyajaaja nia shuquiritiniuria. ⁴ ¡Pueyanaa, niaaqui Pueyaso rootasano ruuretajacahuuanajaj! ¿Majateeri nia niishiniu? Cante mijiria sesa miijiaca miishano timitiacan, nojuajaari Pueyaso paracara quirii. Niaa jaara naa miijiaca quiniu paniyajuhuaj, niaari tarí Pueyaso paracara quirii. ⁵ Tariucuacaanu Pueyaso Rupaajinía nia naajiotasanoori quiyaquij:

“Pueyasoori na Sohuanu niaquiaari poojajinía, nera na cojuanura pajaniya. Jiyanohua na paniniutia pajaniya, Pueyaso Sohuanuuri pa jamuequiaa juucua saaja Pueyasora pa quiniuria”.

⁶ Naajuhuaj, Pueyasojuanaari jiyanohua maninia naacuquiaa pajaniya, jiyanootio na quiniuucua. Na Rupaajinía nia naajiotasano quiya-juhuaj:

“Pueyasoori noo pueya paracaajia, narta pueyajiniji juhua socua cutara pueyano quiniu panijiatej. Saniniuujia noo pojori maniniucuaar-ijia, niaa sequejacatej: ‘Maja cua naata miiniu maninia tamajaaja. Pueyaso cuaara cua naacuura’.”

⁷ Naarate pueyanaa, seetanujuanaa Pueyaso tojitiajacara nia quiriquia. Cumaatia nia nujuatare Sesaaca, maja na shocotanura niajaniya. Niaa jaara naa miiritij, niaacuaji mashiniutianiyyari. ⁸ Niaa jaara Pueyaso rupuere, Pueyasoori nia rupuenutaniyajuhuaj. Sesa miijiacanaa, cua tojitiare. Taa curuutucojuanucua shuquirioyacuaani, nia tama nia cuaqueyajaaja nia jeequejorejuhua sesa nia miishanojiniji. Nooji-aqueya Pueyaso panijiacaari mijiria sesa miishano paniquiaajuhuaj. Cuno pueya cuaara noojia jeequejoora maja socua noojia na niquijotenura najuhuanaj. Cuaara saaja Pueyaso panijiacara quiuria cutara. ⁹ Sesa nia miiniuucua nia nujuqueture, nia taraajerejuhuaj. Nia sapiyonuure. Sesa miishano nia saroojotanu nia jataniri namijiaacatenuu-ku. Sesa miiniujiniji nia shuquiriniu nia jataniri taraajenuucuajuhuaj. ¹⁰ Niaa jaara nioojajinía sequeriquia Pueyaso niquiara: “Maja cua naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenutaniya jiyanijianucua nia quiniuria.

Parta Pueyaso pueyacuara rimiaaqueyashijia pa quiriquiaj

¹¹ Pueyanaa, maja sacuaraatia nia rimiaaqueu nia narta Pueyaso pueyacuara. Maja maninia naatej. Cante narta Pueyaso pueya sesacaani, Pueyaso Rupaajinía naajiotasano tojiyashijiaari jiyanotej. Niaa jaara naa miiritij, niaari Pueyaso Rupaajinía naajiotasano sesacaan. Naajuhuaj, niaari tama nia cuaqueyajaaja jiyateya juhua jiyanijiara, narta pueya nequesoreena nia quiniuria. Naa nia miishacaritij, niaari Pueyaso rupaa tojiyashijiacara quiquirii. ¹² Pueyasojuanaari tamajaaja Jiyanijiajanaa. Nojuacuajaari na rootasano niishitija pajaniya. Nojuajaari niquiriyatujua pa nequesoreena, pa saniniujiuriquianojuhuaj.

Nojuajaari cumaacaraca pocuají na tacunura, na shaajanura pajaniyajuaj. ¿Canteeri quiajanijanijia, quia saniniijiuniuria tamasaca, juhua nojori jiyaniijiani?

Majaari pa niishiniu tariquiria

¹³ Pueyari naa sequejaca: “Canaari tariqui quianutaniya tamonu tiacajiniani. Canaari cuniqui shocotenutaniya niquiriyatu marijiani canaa niquitiojosacari tii canaa casami. Canaari queraatia cumaneeca masenutaniya canaa casami samini”. Cua tojitiare naa sequejacancaa.

¹⁴ Majaari nia niishiniu taa nia juhuaqueñutaniyani. ¿Niaatucua taa sequereni niaa jaara macu juhuaqueña saaja? Nocuaji majaari naa sequenute pueyanaa. Pa quiniuuri juhua shushiquianí. Naatej, taa shushiquiacuaani rupaquijia niquishiyari, na nuhuaji tajimiohuari, paari naajuhuaj. ¹⁵ Naaratej, naa nia sequere cutara: “Pueyaso jaara paniri, canaari tariqui quianutaniya poonijionuucuani”. Naa cutarate maninia sequenu. ¹⁶ Niaari saniniujia sequequiaacujua: “Janiyari tariqui quianutaniyani cua miiniu panishano cua miiniuria”. Naa nia sequencesacaritij, niaari jiyaniya nia naata tamajaaja miiniu puetunu nia panishanojuanaa. Naa nia sequencesacari juhua nia miishocoriquianotej, niaari najuhuana nia rupaa riutioconeetequia puera, juhua niishijia pueyano. Niaa jaara tama nia cuaqueyajaaja naa jiyateya juhua tariqui miishocoriquiano niishijiatej, cunoori jiyano hua sesa. ¹⁷ Naajuhua pueyanaa, niaa jaara maninia miyaquiri, maninia miiniu niishijiaca nia quishacari, niaari tari sesa mijiaca.

5

Casamiriaca pueya nacasusaanu

¹ Nia tojitiare, casamiriaca pueyanaa. ¡Juhuacarijia nia sapuere! ¡Nia sariyocuature! ¡Niaari naquija miiniutaniya taraatia! ² Niaari jiyano hua casamiriaca. Cuno nia jiitiasano casamini, najuhuana moqueyari. Surequeyari nia maniniu quiya toqueya miaqueyahuaj. Naacuajitij, puetunu nia jiitiasanojuanaari moquenutaniya. ³ Nia paati-jiosano oroni, nia cumaneecanjo, najuhuana tiyarashiyari. Naacuajitij, pa Nequesoreenaari maatia niishiniutaniya niaari sacuaraatia jamuejaca quiquiaari. Naa mijiaca nia quiniuucuatej, niaari saniitiosaantuaniya. Niaari socua shaajasaanutaniyaquij. Niaari najuhuana quer-aaatia casami paatijiya shuquiriaatia nia quiniuria tamajaaja mijiria. Saniniujia, nio pa quishacariiri quera pa Jiyaniijia tiuquishacari-uhua na saniniijiuniuria pajaniya. ⁴ ¡Jiyaniijiajanaari nia poonijotesano pueya tojiquia! Nojoriiri sariyocuatiuya nia cumaneecajiniji nia niq-uitioyaquiniiucua nojori poonijionuunjiniji, niaara na senoonuuucua nataacuaca nia cuhuariquiajiniji. ⁵ Mijiria nia quishacarijia, niaari shuquiriaatia quiquiaa puetunu nia panishanojuanaa nia jiitiasacari. Naa shuquiriaatia nia quishacaritij, niaari juhuajaniya shiyoshiya juhua puecoosocoriquiano cushiya. Niaari naa miishaanutaniyajuhuaj. ⁶ Niaari maninia mijiaca puecooquiaa. Majaari nojori nujuatanu quiquiaa niajaniya, nocuara nia tonujusacari nia cuaracashiniutia na-juhuana. Naacuajiti casamiriaca pueyanaa, niaa cumaati puetunu nio niaara sequencesanojuanaa tojitiaa.

Juhuajaniya pa sashiri pa Jiyaniijia

⁷ Naacuajiti cuarta Pueyaso pueyanaa, juhuajaniya nia sashiri pa Jiyaniijia cuaara tiuquihuara. Cuhuariquia camaruuri na natanu nuhuaji naa sashiquia marujuhuaj, maninia na natau moritianura. Maru sashiyajaariuhua cuaara niiria, na nataujajau na querajaacaatiniuria. ⁸ Naa nia sashirijuuhuaj. Majaari pa Jiyaniijiaacuaji nia pishiniu. Nojuacuajaari quera tiuquiniutianiuhua. ⁹ Cuarta Pueyaso pueyanaa, majaari niarta pueyacuara nia rimiaquen nojori nia soonuta, niaa mariqui saniitiosaaareeri. Nia niishiri, pa saniniujuunia Pueyasoori pocua catecanoya. Tari juhua pa tohuateyaji nujuuari. Nojuajaari seetanujuanaa pa saniniujuunia cutara. Nocuaji maninia pa quirij. ¹⁰ Pueyanaa, juhuajaniya pa rejeretarejuhuaj, paa jaara naquia miishaareni. Naatej, taa tariucuacaanu Pueyaso sequencesano caminiujuniaa rejeretacoquiaari taraatia nojori miishacaricuaani, naa nia rejeretarejuhuaj. ¹¹ Paari niishiyacuajani, Pueyasoori naquia miiniu rejeretajaca pueya shuquiritiaja. Maninia na miiniutianiyari. Niaacuajaari tari pohuatasaquaariajiuhuaj taa supuetana Job rejeretaquiaari naquia na miishacaricuaani. Na nuhuaji cutara, Pueyasoori jiyanolhua maninia na miiquiaariuhua, jiyanolhua pueyacua taraajeja na quiniucca, jiyanoojijaariuhuaj.

¹² Cuarta Pueyaso pueyanaa, nia tojitiare. Nia pocoojosacari, tamonu jaara quia sequencesanoocua tiuyaquiri, naajaa, majaari najuhuana sesa pocuanu. Maja cutaraari sequenu: "Cua sequencesanoori seetanujuanaa juhua jiya cajiniocuaja. Majaari na shaajenu quiniutianiya". Majaari sequenujuhuaj: "Cua sequencesanoori juhua nio jiya. Majaari na shaajenu quiniutianiya". Majaari naa pocuanu sacuaraatiatej. Nia sequencesano jaara seetanujuanaa quiri, nareja nia sequere: "Taaquiriirinij". Naajuhuaj, nia sequencesano jaara quiri "maja", cuaara naa quiiria seetanujuanaa. Majaari nia sequencesano nia maatenu socua, Pueyaso mariqui nia saniitioreeri.

¹³ Tamonu niajaniyajinjinio jaara naquia miishiya, nojuaja cuaara Pueyaso secojoora. Shuquiriaatia nia quishacari saniniujia, Pueyaso nia jaaquequejore. ¹⁴ Cusosu nia quishacari, Pueyaso pueya jitianaa nia sequere nojori cuaara secojoora niaacuara. Nojori cuaara shiyocua cojuata cusosu quiaara, pa Jiyaniijia sesajinia nojori secojosacari. ¹⁵ Nia secojosacari Pueyaso seetanujuanaa nocua nia tiuuniutia, cusosuuri naatanutaniuhua. Nojuaja jaara sesa miiquianu, Pueyasoori na jiyanooniutianiya sesa na miishanojiniji. ¹⁶ Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secojore tama niaacuarajaaja. Pueyasocua nia naatanajiorohua. Maninia pueyano secojosacari jiyanolhua, cunoori jiyanolhua cumaacaraca. Pueyasoori na secojosano tojija. ¹⁷ Tariucuacaanu pueyara Pueyaso sequencesano caminiujuunia Elíasni, nojuajaari nareja pueyano quiquiaarijuhuaj taa pajaniyacuanaa. Naajaa, nojuaja jaara Pueyaso secojoquiaari maja maru niniuria, majaari maru niniu quiquiaari jiuujianaraca marijia cuaara shocojoquiaarijiaatijia, socua seis racanio. Majaari maru niniu quiquiaari tojetaarucuajanaa. ¹⁸ Elías jaara pacutequiaariuhua secijonu maru na panishacari, maruuri shusha niquiaariuhua. Pueyano nataacuacaari jiyacari shusha moritiaquiaariuhua.

¹⁹ Cuarta Pueyaso pueyanaa, tamonu niajaniyajinjinio jaara Pueyaso

rootasano tojiyashijiara quiriohua, tamasaca jaara na niquiri, cuaara na rootaaranoj, maninia miijia na quiniuhuara. ²⁰ Nia niishiri, cante sesa miijia tacatorohua Pueyasoocua sesa na miiniujinijini, nojuajaari cuno sesa miijiaacuaji tacuya maja senota na shaajasaanura. Pueyaso na jiyanoootiyajaariuhua puetunu sesa na miishanojinijijanaa. Tariucuaja cua panishano pueyanaa.

COTEENU PEDRO NAAJIONEE

Pedro saruhuatasacari narta Pueyaso pueya

¹ ¿Niaate quiyajaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatana cua quiniuria. Janiyari nio naajiya niaacuarani, noo pojoriicuara canapuete tiquiyocua niyaquecojoquiaaricuajani: Ponto jiyajinia, Galacia jiyajinia, Capadocia jiyajinia, Asia jiyajinia, Bitinia jiyajinianio. ² Tariucuacaanu, pa Que Pueyasocuajaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristoocua nia tiuuniuria. Naacuajitij, Jesucristo shootenuucua na nanaca, Pueyasoori nia jiyanoocuiaa, juhua tojetaarucuajanaa jeequesano nioojia quiniuria. Na Sohuanuuri nia jataniquiaa tojetaarucuajanaa maninia mijiaca nia quiniuria, seetanujuanaa Jesucristo tojijiaca nia quiniuriajuhuaj. Naa Pueyaso panishano pueya nia quiniucua, nojuaja cuaara cumaquiiria jiyanoehua niajaniya. Cuaara nioojia cajitiiria pueyaracaanujuhuaj.

Pa niishiri, paari jiyanoehua maninia miishaariquianoni

³ Pa Jiyaniijia Jesucristo Que Pueyaso pa maniniuhuaqueetare, jiyanoehua maninia na miiniuucua pajaniya. Jiyanoehua na taraajenuucua pocua, na pueya pa quiniuucuajuhuaj, nojuajaari pa niishitiquiaari paari juhua quiariniora samiitianijiosaanutaniuhuani. Paari naa samiitianijiosaanutaniuhuani, naatej, taa Jesucristo samiitiaquiaariuhuacuaani. Naa pa niishishacari taa pa miishaanutaniyani, paari shitimia sashiquiaani pa miishaanura taa Pueyaso miiniu paniya pajaniyacuajani. ⁴ Naacuajitij, niaari niishiya niaari seetanujuanaa masenutaniya puetunujuanaa niaarano Pueyaso jiitiasano jiyocuacaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesosaanu. Maja na naata tariucuashiniuiuhuaj. ⁵ Pueyasocua nia tiuuniucua, nojuajaari na cumaacata nia cojuaquiaa. Pueyaracaanu nia cojuanutaniyari nojuaja cuaara nia rijorejaatija mijiria taraatia nia quiniujiniji, tojetaarucuajanaa jatanishano quijjiaca nia quiniuria. Jiyanoehua maninia Pueyaso miiniu panishano na pueyaranoni, shusha jiyacari niquishaanutaniyari.

⁶ Cunora niaari shuquiriaatia quiya. Saniniuujia, niaa naasucuaari taraajeya rupaquijia nia mijiiosacari naquiya mijiria. Naajaa, niaa jaara naquiya miishaare, cunoori maja najuhuanaj. ⁷ Naquiya pa miiniuni, cunoori pa saniniujiushaanura paate seetanujuanaa Pueyasocua tiuujiacani. Niaacuajaari niishiya, pueyari jiyanoehua oro panijiaca. Saniniuujia, Pueyasocua pa tiuuniuni, cunoori jiyanoehua socua panishano orojiniji. Niaacuajaari niishiya, pueyari oro catijiaja, na sanishaanura maninia oro seetanutejanaa. Naajaa, seetanujuanaa maninia oroori shaajejahuaj. Saniniuujia, paa jaara mijiria naquiya pa miiniu rejeretajaca quirini, Pueyasocua tiuujiacpa quiniuucua, cunoori socua jiyanoehua maninia cuno shaajeja orojiniji. Pueyasocua nia tiuuniu jaara saniniujiushaare juhua orojuhuaj, jaara seetanujuanaa maninia

quiri, Pueyasoori nia timitianutaniya. Naacuajitij, Jesucristo muetasacari pocua, Pueyasoori jiyanohua maninia miiniutianiya niajaniya. Jiyaniijianucuara nia jiyatenutaniyari.

⁸ Majaari juhuanojuaja Jesucristo nia niquinio. Naajaa, niaacuajaari na panijiaca. Nia niquishoo na quishacarijia, naajaa, niaari nocua tiuquiaa. Niaari na timitiaquiaa jiyanohua. Tojetaarucuajanaa jiyanohua nia timiniu quiniuucua nioojiajinia, majaari nia naata na pohuatanu nia rupaata. ⁹ Niaari naa timiquiaa, tariucua jatanishano nioojia quiniuucua, Jesucristoocua nia tiuushacari.

¹⁰ Tariucuacaanu, pueyara Pueyaso sequencesano caminiuijuniaa pueyari poojotaquiaari taa Pueyaso jiyanooniutianiya nio pa quishacari pueyani, na pueya nojori quiniuria. Nojoriiri tama nojori naajiotasanojuaja suraatio serojojuaca quiquiaari, Pueyaso Sohuanu niishitishano nojori naajiotasanoni. Nojoriiri jiyanohua niishiniu paniquiaari taa Pueyaso jiyanooniutianiya pueyani. ¹¹ Jesucristo Sohuanucujaari juhuacarijia nojori niishitiquiaari taa Pueyaso jiyarosocoriquiano Pueyano miishaanutaniya naquiya coteenuni. Nojori niishitiquiaarijiaariuhuaj, naquiya na miiniu nuhuaji saniniuuja, nojuajaari Jiyaniijiarajanaa jiyatesaanutaniya, shacantuua quiija na quiniuria. Naaratej, nojoriiri maninia na niishiniuria saniniujiuquiaari juucua, cantejaara cuno quiniutaniyani, Pueyaso Jiyarosocoriquianoni, naajuhuaj, taacari na muetanutaniyani. ¹² Pueyasoori saaja nojori niishitiquiaari, na Sohuanu poojotanishano nojorini, cunoori maja tama nojoririajaaja na quiniu quiquiaari. Cuarta Pueyaso pueyanaa, ¡cunoori niaarano quiquiaari seetanujuanaa! ¡Tariucuacaanu poojotasano Pueyaso Jiyarosocoriquanojinijiiri tarítohuateequaari! Jiyocuacaanuji jiyarosano Pueyaso Sohuanuuri Pueyaso rupaa pohuatanaa cumaquiquiaa, taa na cumaquiquiaari Pueyaso Jiyarosocoriquanojiniji pohuatanaaacuaani. Naacuajitij, quiari naataja nia tojishano Jesucristojinijini, cunoori supuetanaa pohuatasano quiquiaaricuaja. Pueyaso seyajanaacuajaari pueyarano Pueyaso miishocoriquianocua maatia niishiniuucua jiaatiaajuhuaj.

Pueyasoori paniya saaja maninia miijiaca pa quiniuria

¹³ Cunora, cuarta Pueyaso pueyanaa, jeenucuasano nia quiriquia. Jesucristo muetasacari pocua, Pueyasoori jiyanohua maninia miiniutianiya pajaniya. Cunora, saaja naa nia miiniu panishaanuucua jiaati-ajaca nia quiri. Majaari nioojia niquijotejaca nia quiniu. Maninia niishirijojuaca nia quiriquia. ¹⁴ Taríjia, niaari tama nia cuaqueya panishanojuaja miijiaca quiquiaari, Pueyaso niishiyashijiaca nia quishacarijia. Quiarijia saniniuuja, niaari na tojijiaca cutara. Naaratej, na muerasu nia quiniuucua, majaari naa quiijiaca nia quiniu socua. ¹⁵ Saniniuuja, saa maninia miijiacaja nia quiriquia. Pueyasocuajaari nia saquirijoquaari naa tojetaarucuajanaa maninia miijiaca nia quiniuria, juhua nojuajuhuaj. ¹⁶ Tariucuacaanu Pueyaso sequencesanoori naa naajiotasano quiyajuhuaj:

“Tojetaarucuajanaa sesa miyashijiaca nia quiri, taa janiyacuaani”.

¹⁷ Nia secojosacari, niaari Pueyaso sequequiaa, “cua Quenaa”. Cunoori maniniacuaja. Naajaa, majaari nia niyajetanu cutara, nojuajaari puetunu pueyajanaa nequesoreenutaniya sesa pa miishanojiniji, maninia pa miishanojinijinio. Majaari rimiajata

na saniitionu quiniutianiya. Cunora, mijiria nia quishacarijia, nia puerenuta tama nia cuaqueyajaaja nia cojuare, niaa mariqui na tojiyashijiaca quiriohuari.¹⁸ Pa supuetanaa quiniuucua sesa miijiaca, paari naa miijiaca quiquiaarijuhuaj. Pueyaso cutaraari naa sesa pa quiniujinji pa jataniquiaari maninia na muerasu pa quiniuria. Niaacuajaari niishiya, majaari Pueyaso masenu quiquiaari pajaniya orota, platatanio, shaajeja casaata.¹⁹ Nojuajaari pa masequiaari tama Neyanunyojua nanacatajaaja. Jesucristoori tama na cuaqueyajaaja tarinitiaquiaari pocuara na mosaanura, na nanaca shoonuucua pa jiyanooshaanura. Tariucuacaanu, borrego jaara Pueyaso niquiara mosaaquiaari na camaru niti, cuno borregoori tojetaarucuajanaa borrego maniniu quiquiaari. Naajuhuaj, Jesucristoori tojetaarucuajanaa maninia mijia quiquiaari. Naacuajitij, nojuajaari tojetaarucuajanaa maninia pueyano quiquiaari pa niti na mosaanura.²⁰ Jiya shipiniyaquishacarijia, Jesucristoori tariucua pueya niti mosocoriquiano sequencesaquaari, sesa miijiaca jiyanooshaanura. Saniniujia quiari naataja, nojuajaari shusha mijiria muetaquiaari pocuara na mosaanura, taa Pueyaso miiniu paniquiaari pajaniyaracuajani.²¹ Naa Jesucristo miiniuucua pocuaratej, niaari Pueyasocuua tiuuquiaa. Pueyasocuajaari Neyanu samiitianiquiaariuhua. Na jiyatequiaariiri Jiyaniijiajanaa na quiniuria, shacantuua cumaacaraca quijia na quiniuria. Naacuajitij, niaari quiarijia Pueyasocuua tiuya, na samiitianiniuria niajaniyajuhuaj. Naaratej, niaari juhuajaniya sashiya, shacantuua quijiacara nia jatanishaanurajuhuaj.

²² Seetanu rupaajanaa tojitiajaca nia quiniuucua, nioojiaari tari jee-quejosaquaari, niarta Pueyaso pueya panijiaca nia quiniuria seetanujuanaa. Naaratej, seetanujuanaa panitoojuaca nia quiriquia puetunu nioojiatajanaa, maja sesa nia niishiriojonuta quenaaja.²³ Naa panijiaca nia quiri, jatanishano pueya nia quiniuucua. Pueyaso rupaacua nia tiuushacari, niaari juhua roosaaquiaariuhua, pueyaracaanu quijiaca nia quiniuria seetanujuanaa. Pueyaso Rupaacuajaari pueyano samiitianijia, saminio na quiniuucuacuua. Naacuajitij, niaari shaajeyashijiaca jatanishaquaari pueyaracaanu Quijia rupaacua nia tiuuniuccua.²⁴ Tariucuacaanu Pueyaso Rupajinia naajiotasanocuajaari naa sequaya:

“Puetunu pueyajanaari rishiyashijiaca juhua jiyasocua. Na cumaaca, puetunu na jiitiasanojuanaajuhuaj, cunoori soreja, juhua naana shuu. Jiyasocuari soreja. Naana shuuri tijia.²⁵ Saniniujia, Pueyaso Rupaa cutaraari pueyaracaanu quijia”.

Cuno rupaacuajaari nia niquiara pohuatasaquaari pueyaracaanu quijiacara na jataniniuria niajaniya.

2

¹ Naaratej, nia tarinitiare puetunu sesa nia miiniujiana. Seetanujuanaa nia tarinitiare cuaracashijionu. Naajuhuaj, majaari sapuenu juhua maninia pueyano niquishano nia quiniu najuhuanaj. Majaari tamasaca jiitiasanoocua jiaatiajaca nia quiniujuhuaj. Majaari coriaacojojuaca nia quiniu socua.²⁻³ Niaa jaara tari niishiyacuaja pa Jiyaniijaari see-tanujuanaa maninia, na rupaacua jiaatiajaca nia quiricuaraj. Naatej, taa shusha rasano conaaja jiaatiaa supuenuucuacuana, naa Pueyaso

Rupaacua jiaatiajaca nia quiriquiajuhuaj, cumueeca Pueyaso muerasu nia quiniuria seetanujuanaa. Naacuajitij, niocua tojetaarucuajanaa jatanishano pueya quiri.

Cristooriguhua saminio saajia, Pueyaso quiquierano tiataja

⁴ Saiginiji shipinishano tiaari pueyaracaanu rishijia. Naaratej, pa Jiyaniijaari miriqui sequeshiya juhua saminio saajiajata Pueyaso quiquiero. Mijiria Pueyasora tiajonaari jiyaniquiaari cuno saajiaari sesarujuajau. Naaratej, nojori jiyanenetasacari cuno saajia, nojoriiri na jataquiaari na ruuretasacari. Nojua cutaraari Pueyaso saajia maniniu, tama na saquiriojosanojuaja. Naaratej, nocua pa tiuuri. ⁵ Naajuhuaj, puetunu Jesuucua tiuujiacu pueyaranojuanaari pueyaracaanu rishijia quiquierano Pueyasora. Naacuajitij, Jesuucua pa tiuushacari, paari juhua maniniujiaaca sai Pueyasorani, na quiquiero na tiatajara. Naajuhuaj, Pueyaso quiquo pa quishacari Neyanuucua pa tiuuniuucua, Pueyasoori pa jiylateya pueyacuara secojonaa pa quiniuria na taccoji. Majaari seja pa niquitiojonu quiquiaa Pueyasoni, taa tariucuacaanu pueyacuara secojonaa pueya miiquiaaricuaani. Paa cutaraari tama pa cuaqueyajaja jiylatequiaa Pueyasora pa quiniuriani, puetunu pa miishanojuanaanio. Puetunu naa pa miishanojuanaa Jesucristoocua pa tiuuniuucuani, cunoori Pueyaso timitiquiaa. ⁶ Cunora, tariucuacaanu Pueyaso Rupaajinia, miriqui Pueyaso sequesano Jesucristojinijiiri naa naajiotasano quiya:

“Janiyari Sión tuhuananuucua jiyanohua cua panishano saajia nianutaniyani. Cuno saajiaari tama cua saquiriojosanojuaja. Maniniujiajau saajia seetanujuanaari. Cante nocua tiuyani, nojuajaari majaa na cararosaanu quiniutianiya”.

⁷ Cua panishano pueyanaa, cuno saajiaacua tiuujiacu nia quiniuu, cuno saajiaari jiyanohua nia timitiasano. Nocua tiuyashijiaca cutaraari cararosaanutaniya. Nio tariucuacaanu Pueyaso Rupaajinia naajiotasanoori tari tohuateecanu nojoriria. Naa miriqui sequeyari: “Tiajonaajatasano saajia, nojori jiyanishacari cuno saajia naasucua sesarujuajau, cuno saajiacuajaari socua jiyanohua panishano saajiarajiyatesaaquiaariuhua”.

⁸ Tamaqui, nojuajinijiiri naa miriqui naajiotasano quiyajuhuaj: “Pueyari cuno saajiaacua tiuriiniutianiya. Nocua jirriatanutaniyajaariuhua na tiuriiniuria”.

Nojoriiri nocua tiuriiquiaa, nojori tojiyaquiniuucua Pueyaso rupaa Jesucristojiniji. Pueyasocuajaari tariucuacaanu sequequiaari Neyanuucua tiuyashijiacaari tiuriiniutianiya puetunurajanaa.

⁹ Niajaniya saniniuuja, niaari tama Pueyaso saquiriojosano pueyajaja. Nojuajaari puetunu niajaniyajanaa jiylatequiaari nojuaja secojonaa nia quiniuria pueyacuara, pueyaracaanu na panishano miijiacu nia quiniuriajuhuaj. Puetunu niajaniyajanaari tamasaaca pueyapuejinjinio saquiriojosaaquiaari saaja Pueyaso pueya nia quiniuria. Neyanu cusionuta, Pueyasoori naa pa masequiaari tama nerajaaja, maninia Pueyaso miishano pa pohuatanura tamasaaca niquiara. Tarijia, niaacuajaari juhua ninishiiqui quiijaca quiquiaari. Pueyaso cutaraari nioojia cuhuataquiaari, seetanujuanaa shacantuca cumaacajinia quiijaca nia quiniuria nata. ¹⁰ Tariucuacaanu, Jesucristoocua tiuyashijiaca nia quishacarijia, niaari juhua soosano taucuaca quiquiaari Pueyasora.

Quiarijia saniniuuja, niaari Pueyaso panishano pueya. Tariucuacaanu, majaari Pueyaso taraajenu quijia niaacua. Quiarijia cutara, niaacua taraajeyari. Cunora, nia jiyanoquiaari.

Pueyaso panishano mijiaca pa quiriquiaj

¹¹ Cua panishano cuarta Pueyaso pueyanaa, nia tojiri cua sequesano. Niaari juhua rucoona mijiria. Nio jiyari maja pueyaracaanu pa quirijira. Naaratej, majaari tama nia cuaqueya miiniu panishanojuaja mijiaca nia quiniu, saaja shuquiriaatia nia quiniuria mijiria. Sesa casaacua pa cuaqueya jiaatianuni, cunoori poojia sesoju. ¹² Saaja maninia mijiaca nia quiriquia Pueyaso niishiyashijiaca niiquiara. Naacuajitij, nojori jaara niaacuara rimiaqueriquia juhua sesa mijiacara nojori jiyatesacari niajaniya, naajaa. Jiya puequesacari, Pueyasoori puetunu pueyajanaa nequesoreenutaniya. Jiyacari, niaacuara rimiaaquejacaari niishiniutaniya, Pueyasoori tojetaarucuanaja maninia mijiia na saniitiosacari nojori, maninia na miishacari niajaniya saniniuuja.

¹³ Pa Jiyanjija tojijiaca nia quiniuucua, puetunu mijiria pa jiitianaajiyaniijianucua tojitiacata nia quiriquiajuhuaj. Naacuajitij, nia jiya jiyaniijiajanaa tojijiaca nia quiri. Nojuacuajaari jiyaniijiajanaa cutara.

¹⁴ Cunora, na jiyatesano jiyaniijianucua tojijiaca nia quiriquiajuhuaj. Nojoricuajaari na jiyaramiquishano, sesa mijiaca saniitiosaanura, maninia mijiaca maniniuhuaqueetasaanura saniniuuja. ¹⁵ Naacuajitij, saaja maninia mijiaca nia quishacari, niaari niishiyashijiaca sesa mijiaca sanaajanutaniya, najuhuana nojori sesacasacari niajaniya. Cunora, Pueyasoori paniya maninia mijiaca nia quiniuria.

¹⁶ Tariucuacaanu, Moisés Rootasanojujuhuaj nia jiyaniijia quirija puetunu niaarajanaa nia tojishocoriquiano. Quiarijia saniniuuja, Jesu cusionuucua nia niti, nojuajaari Moisés Rootasano tohuatteequiaari. Naacuajitij, nojuajaari Moisés Rootasano sanaajaquiaari niaara. Naacuajitij, Moisés Rootasano tonujiyaquishacari niaacuara tari, naajaa, majaari nia jiyaniuuja nia quiriquia cutara. ¹⁷ Majaari quenaaja niquiriyatu pueyano rerequeteja nia quiniu. Niarta Pueyaso pueya panijiaca nia quiriquia cutara. Seetanujuanaa Pueyaso tojijiaca nia quiriquia. Majaari jiya jiyaniijiajanaa rerequetejaca nia quiniu.

Naquiya pa miishacari, sanaa pa rejeretariquia juhua Cristo

¹⁸ Poonijotesano pueyanaa, seetanujuanaa maninia nia camarnu tojijiaca nia quiriquia. Nia camarnu jaara juaajiaca quiriquia, naajaa, saaja na tojijiaca nia quiriquia. Majaari saaja maninia nia jiitiacata tojijiaca nia quiniu, nia jiyanojijacanio. ¹⁹ Nia jaara juhuajaniya rejeretariquia najuhuana nia camarnu saniitiosacari niajaniya, cunoori jiyanojua maninia Pueyasora. ²⁰ Pueyaso cutaraari maja na timiniu nia jaara juhuajaniya rejeretare nia camarnu saniitiosacari niajaniya seetanujuanaa sesa nia miiniuucua. Saniniuuja, nia camarnu jaara saniitiore niajaniya maninia nia miiniuucua, nia jaara na rejeretare juhuajaniya, Pueyasoori cuno timitija cutara. ²¹ Pueyasocuaari nia

saquiriojoquiaari naquiya rejeretajaca nia quiniuria maninia nia miiniuucua. Cristojuanaacuajaari naquiya miishaquaari maninia na miiniuria pajaniya. Nojuajaari naa miiquiaaritij, pa niishiniuria juhua nojuaja pa miiniuriajuhuaj.²² Cristoori maja quenaaja sesa na miiniu quiquiaari mijiria na quishacari. Majaari na cuaracashijionu quiquiaari quenaajajuhuaj.²³ Jaara sesacasaquaaria, nojuajaari maja quenaaja nojori na riucuanu quijia na juanaiutia. Jaara miitiasaaquiaari, majaari quenaaja nojori na miananajonu quiquiaari. Nojuajaari saaja na Que Pueyasoocua tiuuquiaari, na niishishacari nojuajaari seetanujuanaa maninia nequesoreena cutara.²⁴ Cristo jaara niyacutesanojinia cu-sojuasaaquiaari, nojuajaari tari puetunu sesa pa miiniujiana cusotaquiaari. Naa pa niti Cristo cusionuucuatej, cunoori quiquiaari maninia mijiaca pa quiniuria saniniuujia, maja socua sesa mijiaca pa quiniuria. Naajuhuaj, nojuajaari pa niti nootusaquaaria, pa naatanijiosaanura saniniuujia.²⁵ Tarijia, niaari juhua tashuquioono borregohua rucoojuaca quiquiaari. Quiarijia saniniuujia, niaari nia cojuana Cristoocua tiuquijioquiaari. Nojuacuajaari nioojia jiitiana maniniu.

3

Camiyono pueyara rootasano

¹ Camishano maajipohuanaa, nia niyaca tojitiajaca nia quiriquia maninia. Naacuajitij, nia niyaca jaara Pueyaso rupaacua tiuyashijia quiriquia, naajaa, nojori tojitiajaca nia quiniuucua nojoriiri niishiniutianiya Pueyaso Rupaari seetanujuanaa. Nojoriiri naa niishiniutianiya saa maninia mijiaca nia quishacari, nojori nia pohuataaquishacarija Pueyaso Rupaa. ² Nojori niquishacari tojetaarucuajanaa maninia mijiaca nia quishacari, nojori tojijiacajuhuaj, saa cunotaja nojoriiri maatia niishiniutianiya Pueyaso Rupaari seetanujuanaa. ³ Maajipohuanaa, majaari nia tacaaniu saaja nia maniniushiniuria, maninia nia niquishaanura. ¿Maajitiiri maniniucusano, saaja na muecaca na canuusacari maninia, na cushioniasacari orojiniji shipinishano tuhuajashiquia, na cushionshacari shanohua toquejuhuaj? Jiyano maajitiiri maniniucusano jaara juanaiu maniniu quiriquajuhuaj? Maja. ⁴ Naaratej, maninia cutaraari nia tacaaniuria nioojia nia maniniushitiniuria. Cunora, saaja maninia maaji quiniuucua jiaatiajaca nia quiriquia cutara, jacaria pocuajajuhuaj, maja juajaja. Jiyano maajitij, cunoori seetanujuanaa maninia niquishano Pueyasora cutara. Niaa jaara nioojia maniniushitiri cutara, cunoori seetanujuanaa shaajeyaquiriquiano. ⁵ Naajuhuaj, Pueyasoocua tiuuijaca tariucuacaanu maajipohuari neyaca tojijiaca quiquiaari. Naa nojori miiniuucuatej, nojori jiuu{j}aari seetanujuanaa shanohua maniniushitishano quiquiaari Pueyasora cutara. ⁶ Supuetana Abraham niquiocua Saaraari naa neyaca tojijia quiquiaari. Seetanujuanaa neyaca tojijia na quishacari, nojuajaari na jiyaniquipia na jiyaniijata. Naacuajitij, niaa jaara maninia mijiaca quiriquia, niaa jaara nia puereyaquinintia nia niyaca tojijia quiriquajuhuaj, Pueyasora, niaari Saara niquiojori.

⁷ Niajanijarijata canuunaa, nia niquiocua nia jiitiariquia maninia, nia niishishacari maajiri maja cumueeca juhua cayaja. Majaari na rerequetenu. Maajipohuacuajaari Pueyaso jiyanooshanojuhuaj, taa na

jiyanooquiaari niajaniyacuaani. Pueyasoori niaata nojori cojiritianutaniya samiitianijionu, pueyaracaanu rishijiaca nojori quiniuriajuhuaj. Naacuajitij, maninia nia jiitiariquia nia niquipucua, Pueyaso mariqui nojuaja nia secojosano tojiyaquiriiri.

Paatucua taa miiriquia parta pueyani

⁸ Pueyanaa, cua seqesano quiarijiani, nioori puetunu Pueyaso pueyarajanaa. Pueyaracaanu jiuujiaatiojuaca nia quiri. Majaari juayonuujuutanu. Niarta Pueyaso pueya nia cojiriquia taraatia nojori quishacari, shuquiriaatia nojori quishacarijuuhuaj. Seetanujuanaa panitioojuaca nia quiri juhua nia tapueyocuacata. Taraajetoojuaca nia quirijiuuhuaj. Naajuhuaj, majaari tama nia cuaqueyajaja nia jiyatenu juhua socua tojishano pueyano nia quiniuria tamonu pueyanojiniji. ⁹ Niaa jaara sesa miishaariquia, majaari na naminiu. Naajuhuaj, niaa jaara sesacasaariquia, majaari nojori nia riucuanu nojori nia sesacanurajuhuaj. Saaja maninia nia riuhuanere nojori. Tariucuacaanu, Pueyaso paraca nia quishacarija, nojuacuajaari nia saquiriojoquiaari maninia na miiniuria niajaniya. Naaratej, saaja maninia nia miiriquia nia paracajuuhuaj. ¹⁰ Tariucuacaanu Pueyaso Rupaajiniacuajaari naa naajiotasano quiyajuhuaj:

“Cante pueyaracaanu mijiria rishiniuucua jiaatiaani, shuquiriaatia na quiniuriajuuhuaj, nojuaja cuaara na niti cojuaara maja sesa na pocuanura. Cuaara na rupaa cojuaarajuhua maja na cuarcashijionura. ¹¹ Naajuhuaj, cuaara sesa na mijionu tarinitiaara saaja maninia na miiniuria. Nojuaja cuaara pueya jiyanoootiooteja quiuria. Cuaara naa maninia na miiniu tarinitiaaquiiaria. ¹² Cante naa maninia mijiani, Pueyasoori na cojuaja, na secojosano tojijiajaarijuuhuaj. Saniniuujia, Pueyasoori sesa mijiacaca samiritiaja saaja”.

¹³ ¿Cantucua sesa nia miiriquiani niaa jaara saaja maninia mijiacaca quiriquia? ¹⁴ Naajaa, niaa jaara saaja maninia nia miiniuucua miitisaare, nia timiquiore. Pueyasocuajaari jiyanoohua maninia miiniutianiya niajaniya saniniuujia. Mijiria quiniaa miananajosacri niajaniya, majaari puerenu, majaari nioojia nia niquipiotenu. ¹⁵ Saniniuujia, nioojiajinia Cristo nia jiyatere nia Jiyaniijajanaara, seetanujuanaa na tojijiaca nia quiniuria. Juhuacaricia nia niishiriojoriquia, jeenucusano nia quiniuria, maninia nia pohuatanura Jesucristojiniji. Naacuajitij, niaari jeenucusano quiniutianiya, maninia nia riucuanura tamasaca jaara nequesotare niajaniya, casaara juhuajaniya naquiya miiniu rejeretajacate niajaniyani. ¹⁶ Jacaria nia pohuatare nia paniniutia nojori, maja nia rerequetenuta nojori. Pueyaracaanu maninia mijiacaca nia quiriquia, sesa nia miiniu mariqui nioojia macuhuajareeri. Naacuajitij, pueyaracaanu shitimia maninia mijiacaca nia quishacari Jesucristoocua tiuuijaca nia quiniuucua, niaacuara rimiaaquejacaari tama sesa na pocuanuuucuajaaja caririquiniutianiya.

¹⁷ Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniuucua, maja sesa nia miiniuucua. ¹⁸ Cristojuanaacuajaari mosaaquaaria sesa mijiacaca pa quiniuucua. Majaari socua na pacutenu quiniutianiya cusionu. Nojuajaari tojetaarucuajanaa maninia

mijia quiquiaari. Naacuajitij, nojuajaari sesa mijjiacaacuara cusoquaari, Pueyasoocua na jiyatanura niajaniya. Pueyano cuaqueyaraca na quishacari, mosaaquiaariiri. Pueyaracaanu rishijia sohuanuraca na quiniuucua, nojuajaari samiitiaquiaariuhua.¹⁹ Naa sohuanu na quiniuucuatej, nojuajaari macunucua quiquipojinias rosequiaari tii tama nojuajinijijaaja na pohuatanura macunucua sohuanu. Cuno pojori-iri nujuatejojuajinias mishiquionucua quiya.²⁰ Cuno pojoriiri, noo pojoricuaja tariucuacaanu supuetana Noé tojiyashijiaca quiquiaaritij, pueyaracaanu Noé poojotasacari Pueyaso rupaa nojori niquiajuucua. Pueyaracaanu Noé tarishishacari na puereetuca buque na shipinishacari, pajaacuaji na tacajara, Pueyasoori jiyacari cuno sesa mijjiaca sashiquiaari juucua. Pueyaracaanu sashiquiaariiri nojori tacatonuhuara noojiaca nocua juucua. Puetunu mijiria quijiaca pueyajinijiniojuanaani, saaja ocho pueyari cureequiaari, buquejiniacuma nojori tiuquitianuucua. Puetunu pueya shushiniuushacari pajaajinias, cuno pajaari saniniuujia Pueyasoocua tiuuijaca cuataniquiaari na buquejinia.²¹ Quiarijia pajaniyara saniniuujia, cuno pajaari miriqui pa niishitiojiya taa Pueyaso miiquiaa pajaniyani, paa jaara moojinia tiuquinishaareni Jesuucua pa tiuushacari. Naatej, taa Noé juhuajaniya cuataquiaari pajaajiniacuaani, Pueyasoocua tiuujia na quiniuucua, puer-aaari naajuhuaj. Naacuajitij, paa jaara moojinia tiuquinishaareni, paari pa timiniutia moojiniji tohuataquiohuani, poojia cajitishano seetanujuanaa pa niishishacari paari tarri jiyanoshanoni, pocuaji Tacuna Jesucristo samiitianuucua macujiniji. Majaari pa tiuquinishaanu quiquiaa pa seca pa jatanura.²² Jesucristo samiittiasacariuhua, nojuajaari jiyo-ocuacaanu tacquaquiaariuhua. Quiarijia cajiya Pueyaso miaquetajaraari. Jiyaniijiajanaa na quiniuucua, nojuajaari cumaacaraca, tama nojuajaaja na tojitiniuria Pueyaso seya, puetunu cumaacaraca quiijiacajanaa, samaruuhuano.

4

Maninia mijjiaca pa quiriquia, Pueyaso cumaaca pa jiitianuucua

¹ Naacuajiti pueyanaa, naatej, taa Cristo rejeretaquiaari naquiya miiniu mijiria na quishacaricuaani, naa rejeretajaca nia quiriquiajuhuaj, niaa jaara naquiya miishaariquia. Naquiya pa miishacari, cunoori sesa pa miiniu pa tarinitijia. ² Naacuajitij, paa jaara naa naquiya miishaariquiani, na nuhuaji paari saaja Pueyasora quiniupaniyani. Paari saaja na panishano miiniu paniyani, maja tama pa cuaqueya panishanojuaaja pa miiniuria socua. ³ Tarijia, Pueyaso tojiyashijiaca nia quishacarijia pueyanaa, niaari jiyanohua sesa mijjiaca quiquiaari, taa Pueyaso niishiyashijiaca miiquiaacuaani. Niaari saaja nia cuaqueya miiniu panishanoocua shiiniuquijia quiquiaari. Niaari queraatia tamaatia sesa miiniuucua jiaatiajaca quiquiaari. Niaari saaja mashaasequenuujuaca quiquiaari. Nia queranacunuusaqui, niaari tojetaarucuajanaa sacuaraatia mijjiaca quiquiaari. Niaari rere-jojuajuhua puera nia ratunura, jiyanohua nia mashaasequenuunurajuhuaj. Naajuhuaj, niaari juaashiquiata shipinishano nia pueyasora nia jiyatesano shuquiritiajaca quiquiaari. Niaari na tacoji sacuaraatia pueresano casaa miiquiaarijuhuaj. ⁴ Quiarijia saniniuujia, Pueyaso niishiyashijiaca nia cojiyaquishacari naa sacuaraatia nia mijjiacionatej,

nojoriiri jiuujiatequiaa nojori shaacasacari niajaniya. Nojoriiri cunora nia sesacaquiaa. ⁵ Cuno pojori cuaara niishiiria nio, Pueyasoori nojori nequesoreenutaniya na nequesoreesacari puetunu pueyajanaa, saminiucua, macunucuanio. Jiyacaritij, nojori cuaara tama nojoriicuaji riucuaarajaaja. ⁶ Cunora, pa Jiyaniijia Jesucristoori macunucua niquiara pohuataquiaari Pueyaso rupaa tama nojuajinijiaaja, nocua tiuujiacara na jiyatesocoriquiano. Nocua tiuujiacari pueyaracaanu rishijiacara quiriquiano, taa Pueyasocuaani. Sesa mijiaca mijiria nojori quiniucua, nojoriiri pajajainia cusionuuquiaari taa puetunu pueyajanaa shaajecoquiaacuaani. Naajaa, Jesuucua tiuujiacar cutaraari samiitiani-jiosaanutaniuhua.

⁷ Nio pa quishacarini, paari socua quenaacoya jiya puequesacaricuarani. Naaratej, niishirijojuaca nia quiriquia. Maninia nia jititiariquia tama nia cuaqueyajaaja, saaja Pueyaso secojojuaca nia quiniuria pueyaracaanu. ⁸ Jiyanoehua panitioojuaca nia quiriquiajuhuaj. Cunoori socua panishano cutara. Paa jaara panijiaca quiriquian, paari queraatia sesa miishano jiyanoohja quiniutaniyani. Naaratej, seetanujuanaa panijiaca nia quiriquia. ⁹ Niarta Pueyaso pueya jiitiaquishacari na maquejara, na miaquesocoriquianojuhuaj, nojoriicua taraajeja nia quiriquia. Nojori nia tiuquinintariquia nia tiajinia nia timiniutia. Majaari nojori nia ririjiotanu nia taajenuta. ¹⁰ Pueyasocuaajaari na Sohuanu niquitioquiaa puetunu na pueyajanaa, tamaatia maninia casaa miiniu niishijiaca pa quiniuria. Naaratej, puetunu niajaniyajanaa cuaara maninia miiria niarta Pueyaso pueya pueyaracaanu, taa Pueyaso cumaquiquiaa niajaniya maninia nia miiniuriacuajani. Maninia nia poonijioteriquia Pueyaso cumaaca, nojuaja niquitiosano niajaniyani. ¹¹ Naacuajitij, nia pocuasacari, Pueyasocua nia tiuuri nojuaja cumaquinuria niajaniya na panishano nia sequenura. Naa juhuaj, niaa jaara casaa miiriquia niarta Pueyaso pueya nia naacunura, nojori nia miiriquia maninia Pueyaso niquitiosano cumaacata. Naa nia miiriquiatej, Pueyaso timitiasaanura socua, Jesucristoocua tiuujiacar nia quiniuucua. Nojuaja cuaara maniniuhuaqueetasaaria pueyaracaanu, tojetaarucuajanaa maninia mija na quiniuucua, puetunu cumaacaracajanaa na quiniuucuajuhua. Cuaara naa quiiriatej.

Juhuajaniya pa rejeretare naquiya miiniu, Pueyaso pueya pa quiniuucua

¹² Cua panishano cuarta Pueyaso pueyanaa, majaari nia shiriquiniu niaa jaara jiyanoehua naquiya miishaariquia. Majaari nia jiyaniuijuhuaj saa niajaniyaja niaa miishiya. ¹³ Niaa jaara nia naquiya miishaariquiatej, nia timiri. Jesucristoocua tiuujiacar nia quiniuucua, niaacuajaari nia miishiya taa Jesucristo miishaquaiaari naquiyacuaani. Naa naquiya miiniu nia rejeretasacaritij, niaari jiyanoehua timitianutaniya Jesucristo, shacantuua na cumaacata na tiuquishacariuhua, na jataniniuria niajaniya juhua nojuaja nia quiniuriajuhuaj. ¹⁴ Naajuhuaj, niaa jaara sesacasaariquia Jesucristo tojijiaca nia quiniuucua, shuquiri-attia nia quiriquia. Pueyari nia nia sesacaquiaa, shitimia maninia mijiaca nia quishacari, Pueyaso Sohuanuraca nia quiniuucua. ¹⁵ Niaa jaara naquiya miishaariquia pueyanaa, cuno cuaara quiiria maninia mijiaca nia quiniuucua, maja sesa mijiaca nia quiniuucua. Niaa cuaara caririquiriiria cutara niaa jaara mojua quiri, nohuasejoua, sesa mijiia,

timia niishiniu panija tamasaca casaa. ¹⁶ Saniniuujuja, maja cutaraari nia caririquiniu niaa jaara naquiya miishaariquia Jesuucua tiuujjaca nia quiniuucua. Saaja Pueyaso nia shuquiritiariquia cunora.

¹⁷ Quiarijiani, Pueyasoori tama na pueyajaaja saniitioquiaa na tojiti-aquishacari na rupaa. Paa jaara naa saniitiosaaquaacuaani, ¿taariquitija noo pojori miishaanutaniya socuatejaj, Jesucristojiniji pohuatasano ruuretajacatej? ¹⁸ Naacuajitij, Pueyaso jiyanooshano pueya jaara quer-aaatia naquiya miiquiaacuaa, ¿taariquitija Pueyaso tojiyashijiaca miishaanutaniyatej? ¡Juhuej! Puereeta miishaanutaniyari Pueyaso ruuretajaca, sesa miijiacanio. Nojoriiri jiyanoohua socua naquiya miishaanutaniya, Pueyaso saniitiosacari nojori. ¹⁹ Naacuajitij, Pueyaso jaara naa naquiya nia miishaanura paniya, juhuajaniya nia rejere-tariquia naquiya nia miiniu. Majaari nia tarinitianu maninia nia miiniu, naquiya nia miishacari. Saaja Pueyasocua nia tiuuriquia nioojia na cojuanura maninia. Nojuacuajaari na Shipininia. Nojuacuajaari saa maniniaja. Naquiya pa miitiquiaacuajaari socua na jeenucuanura pa-janiya.

5

Socua rootasano Pueyaso pueyara

¹ Quiarijija saniniuujuja cuarta Pueyaso pueyanaa, janiyari nia jiitianaan nacasuyani. Niajaniya, Pueyaso pueya maapue jiitianaanaa, cua toji-tiare. Janiyacuajaari Pueyaso pueya maanu jiitianajuuhuaj, juhua nia-janiyajuuhuaj. Janiyacuajaari pa Jiyaniijajanaa niquiniani, nojuaja jaara naquiya mijijoquiaari mijiria na quishacariija canaata. Naajuhuaj, no-juajiniji cua pohuatanuuucua, janiyari naquiya miishaaquiaajaaniuhuaj. Naacuajitij, pa Jiyaniijia muetasacariuhua na shacantuua cumaa-quinia, janiyari jaarajaaja niaata cojiritiasaanutaniya jatanishaanuni, juhua nojuaja pa quiniuria mariyata. ² Cunora Pueyaso pueya ji-itianaanaa, shamaatia nia cojuare Pueyaso pueyaniyojua, teyano ji-itianaara Pueyaso jiyatequiaari niajaniyacuajani. Maninia nia co-juariquia nojori, seetanujuanaa nojori nia paniniutia, taa Pueyaso paniya nojori nia cojuanuracuajani. Majaari nojori nia jiitianu nia ta-a-jenuta saaja nojori jiitianaan nia quiniuucua. Naajuhuaj, majaari nojori jiitianaan nia quiniu saaja cumaneecaacua nia jiaatianuta. Saniniuu-juja, seetanujuanaa nojori nia paniniutia nia jiitariquia niarta Pueyaso pueya. ³ Majaari niarta Pueyaso pueya nia jiitianu juhua tama nia seya-jaaja. Niajaniya saniya cuaara maninia miijiaca quiiria nojori niquiara, nojori niishiniuria naa quiijiacate Pueyaso pueya, naa nojori miiniuria-juhuaj. ⁴ Naacuajitij, pa Jiitianajanaa tiuquishacariuhua jiyocuacaanuji, niaari shacantuua quijacara jatanishaanutaniya, pueyaracaanu rishi-jiaca nia quiniuriajuhuaj.

⁵ Niajaniya mashiquiorinia, Pueyaso pueya jiitianaan tojijiaca nia quiriquiajuhuaj. Puetunu niajaniyajanaa Pueyaso pueyanaa, tama nia cuaqueyajaaja nia jiyatere niarta Pueyaso pueyano cumaquiniaa nia quiniuria jaarajaaja. Tariucuacaanu Pueyaso Rupaajiniacuajaari nia naajiotasano quiya:

“Pueyasoori na juaaniutia niquijia narta pueya shocoteja. Saniniuujuja, narta pueyano shocoteyashijia naacujua cutaraari”.

6 Naarate pueyanaa, puetunu niarta Pueyaso pueyajanaa nia jiateriquia tojishano pueya nojori quiniuria niaara. Majaari quenaaja nojori nia rerequetenu. Naa juhuajaniya niarta Pueyaso pueya tojijiaca nia quishacaritij, pa Jiyaniijia Jesucristo jaara tiuquiriohua, Pueyasoori na cumaacata nia jiyatenutaniya jiyaniijianucua nia quiniuriajuhuaj.
 7 Pueyanaa, puetunu nia tacaaniujiana nia niquitiore Pueyaso. Nojuacuajaari niaacua taraajequiaa.

8 Pueyanaa, nia Paraca sequeeri nia shanacujuquiaa, juhua sare, taa sare shanacujiya na sanura casaacuaani. Cunora, soquejaca nia quiriquia pueyaracaanu. Juhua sutejaca nia quiriquia, pueyaracaanu nia secojonura, Sesaaca mariqui juhua sare nia sareeri. 9 Cumaatia nia nujuatariquia nojuaja, seetanujuanaa Pueyasoocua tiuuijaca nia quishacari. Majaari Pueyaso Rupaacuaji nia taacanuunu. Naa nia miiriquiatej, nia niishishacari niarta Pueyaso pueyari puetunu tiquiyoctuua nia naquiya miiquoyajuhuaj. 10 Niaa jaara rupaquijia naquiya miishaariquia mijiria, Pueyasoori na nuhuaji nia jataninuitaniya tojetaarucuajanaa maninia pueya nia quiniuria. Tojetaarucuajanaa pa jiyanoojia na quiniuucua, nojuacuajaari nia saquiriojoquiaari nata nia quiniuria shacantuua na cumaacajinia, Neyanu Jesuucua nia tiuuniuucua. Naaratej, nojuacuajaari nia jiyatenutaniya seetanujuanaa nioojia niquijoteyashijiaca nia quiniuria, socua jiyanohua na cumaca jiitajaca nia quiniuria, maja quenaaja Sesaaca pootionura niajaniya. 11 ¡jiyanohua maniniaari pa Que Pueyaso! Nojuacuajaari puetunu cumaacaracajanaa pueyaracaanura. ¡Cuaara naa quiriatej!

Pedro sequesano quera na naajio na tucuatasacari

12 Cuarta Pueyaso pueyanaa, janiyari parta Pueyaso pueyano Silvano naajioteree nio posunee naajioneeni. Nojuajaari shamaatia poonijiojua pa Jiyaniijiara. Janiyari niaacuara naajiotereeni, cua nacasunura niajanija, cua shiniujiuniuria niajaniyajuhuaj maja nia pishiniuria Pueyasoocuaji. Seetanujuanaa jiyanoojia na quiniuucua, naarate nojuajaari nia jiitaa maninia, naquiya na miitishacari niajaniyajuhuaj. Cunora, nocua nia tiuuriquia, pueyaracaanu na cumaqiniuria niajaniya.

13 Babilonia tiacajinia quimiaa parta Pueyaso pueyari nia saruhuataa. Nojoriiri Pueyaso saquiriojosano na pueyaranojuhuaj, taa na saquiriosanotucuaa niajaniyani. Marcoori nia saruhuataajuhuaj. Nojuajaari juhua quiyau. 14 Nia saruhuatasacari niarta Pueyaso pueya, seetanujuanaa nia paniniutia nia nujuutoore.

Pueyaso cuaara nioojia cajitiiria, canapuete Jesucristoocua tiuujiacacuajani.

TANEE PEDRO NAAJIONEE

Pedro saruhuatasacari narta Pueyaso pueya

¹ Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiuutiquiaari pocuaji Tacuna Jesucristoocua, taa nocua canaa tiuuquiaaricuaani. Nocua nia tiuuniuni, cunoori jiyanohua panishano. Naacuajitij, Pueyasoori nia jiyanooquiaa juhua sesa miyashijiaca nia quiniuria na niquiara, taa canaa quiyaculaani. ² Seetanujuanaa maatia nia niishitiriquia Pueyasoni, pa Jiyaniijia Jesunio. Naacuajitij, niaari socua jiyanohua cumaquishaanutaniya. Nioojiaari cajitishaanutaniyajuhuaj, juhuajaniya quijiacca nia quiniuria.

Pueyaso pueya cuaara nio niishitiojosano miijiaca quiiria

³ Jesucristojuanaacuajaari pa sequequiaari na pueya pa quiniuria. Paari na masuunu tojiquiaarini, pa niishishacari nojuajaari seetanujuanaa Pueyaso Niyanu, tojetaarucuajanaa maninia mijiia. Seetanujuanaa maatia pa niishiniuucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojijiaca pa quiniuriajuhuaj. ⁴ Naa jiyanohua maninia mijiia Jesucristo quiniuucuatej, nojuajaari pa niishitiquiaari casaa na miiniu paniya pajaniyarani. Pajaniyarano na sequesanoori seetanujuanaa maninia, tojishocoriquiano. Paa jaara na sequesano tojitiajaca quiri seetanujuanaani, paari jatanishaanutaniyani juhua nojuaja pa quiniuriajuhuaj. Naacuajitij, paari quiariniora jatanisha aquiaari na cumaacatani maja pa sesenura. Paa jaara Pueyaso tojiyashijiaca quiriquiani, paa maara tojetaarucuajanaa seseriquiani, taa mijiria quiniae pueya sesequiaacuaani tama nojori panishano mijiacaaja nojori quiniuucua. ⁵ Cunora, tamajaaja nia saniniujiuriquia tojetaarucuajanaa maninia quijiacca nia quiniuria, juhua Pueyaso. Niaacuajaari tari nocua tiuujiacca. Naa nocua tiuujiacca nia quiniuucuatej, jiyanohua nia saniniujiuri maninia mijiaca nia quiniuria pueyaracaanu. Naa maninia mijiaca nia quishacaritij, jiyanohua nia saniniujiuri socua niishijiaca nia quiniuria, sesa miiniu nia ruuretanura. ⁶ Naa niishijiaca nia quishacaritij, jiyanohua nia saniniujiuriquia tama nia cuaqueya miiniu panishanojuaja rejetejaca nia quiniuria, maja nia miiniuria sacuaraatia casaa nia panishano. Naa tama nia cuaqueyajaaja rejetejaca nia quishacaritij, jiyanohua nia saniniujiuriquia juhuajaniya sashijiaca nia quiniuriajuhuaj. Naa juhuajaniya sashijiaca nia quishacaritij, jiyanohua nia saniniujiuriquia seetanujuanaa Pueyaso panijiaca nia quiniuria. ⁷ Naa Pueyaso panijiaca nia quishacaritij, jiyanohua nia saniniujiuriquia niarta Pueyaso pueya panijiaca nia quiniuria socua. Naa niarta Pueyaso pueya panijiaca nia quishacaritij, jiyanohua nia saniniujiuriquia tojetaarucuajanaa panijiaca nia quiniuria.

⁸ Niaa jaara puetunu nio niishitiojosanojuanaa tojijiaca quiriquia seetanujuanaa, majaari najuhuana pa Jiyaniijia Jesucristo niishijiaca nia quiniu quiniutaniya. Naajuhuaj, majaari najuhuana quijiacca nia quiniu quiniutaniya. ⁹ Nio rootasano tojiyashijiaca saniniuuja, nojoriiri juhua cariyojuaru, niishiyashijiaca. Naa nojori quiniuucuatej,

nojoriiri niyajetaquiaa nojoricuajaari juhua jeequejosaaquiaari sesa nojori miishanojiniji.¹⁰ Cuarta Pueyaso pueyanaa, Pueyasocuajaari nia sequequiaari na pueya nia quiniuria. Nojuajaari nia saquiriojoquiaari. Cunora, puetunu nio cua rootasanojuanaa tojijiaca nia quiriquia see-tanujuanaa. Naacuajitij, niocua niishiri niaari seetanujuanaa Pueyaso pueya. Majaari quenaaja nocuaji nia rupatenu quiniutianiya.¹¹ Naa maninia quiijiaca nia quiriuucuatej, niaari shuquiriaatia tiuquininiti-asaanutaniya jiyocuacaanu pocuaji Tacuna Jesucristoocua, pueyaracaanu nata nia quiniuria, pueyaracaanu Jiyaniijajanaa na quiniucua.

¹² Niaacuajaari maatia niishitiosaaquiaari Pueyaso rupaa Jesucristojiniji. Niaari cuno seetanujuanaa rupaacua tiujiaca. Naajaa, janiyari pueyaracaanu nia niishitiniutianiyani, maninia nia racatanura nia numaama. ¹³ Mijiria cua rishishacarijia, Jesucristo jiyaramiquis-hano cua quiniuucua, maniniacuajaari pueyaracaanu cua shinuiju-niuria niajaniya, maja tariucua nia niishishano Jesucristo rupaajiniji nia niyajetanura. ¹⁴ Pa Jiyaniijia Jesucristoori tari cua niishitiriucuaa janiyari quera mosaanutaniyani. ¹⁵ Cunora, janiyari nio naajiya niaarani. Naacuajitij, janiya jaara mosaareni, niaari nio cua naajionee jiitianutaniya cua nuhuaji nia serojosocoriquiano. Maniniacuajaari nia jiitianura cua naajionee maja nia niyajetanura puetunujuanaa cua niishitiosano niajani.

Shacantuuc Jesucristo cumaaca niquiniaajiniji pohuatasano

¹⁶ Canaa niishitiosano niajaniya pa Jiyaniijajinijini, cunoori maja canaa tojishano tamonujiniji. Naajuhuaj, cunoori maja tama niishiji-acajaaja pohuatasano na sapojonura pueya. Jesucristo cumaacajiniji canaa pohuatasanon, naajuhuaj, taa na tiuquinintianihuani, puetunu cunojuanaari maja tama canaa niishishanojuaja. Canaa janaacuajaari canaa namijiatajanaa na niquipuaarini nojuaja jaara shacantuucara jataquiaari canaa niquiara. ¹⁷ Jiyacaritij, na Que Pueyasoori jiyahohua na timitiariquia canaa niquiara. Canaari na tojiquiaarini naa na sequesacari Neyanujinijitij: “Nojuajaari Quiyanuniyojua. Jiyahohua cua timitiwasano”. ¹⁸ Canaa quishacari pa Jiyaniijia shacantuucara na jatasaqi tuhuananuucua, canaa janaari naa Pueyaso tojiquiaari jiyocuacaanuji pocuaanoni.

¹⁹ Canaa tojiniuucua Pueyaso sequesanojuanaa Neyanujiniji, canaari cunora seetanujuanaa niishiyani, tariucuacaanu nojuajiniji pueyara Pueyaso sequesano caminiuijuniaa sequesanoori seetanujuanaajuhuaj. Naaratej, maniniacuajaari nia tojiniuria nojori naajiotasan Pueyaso Jiyarosocoriquiano Pueyanojiniji. Nojori naajiotasan, cunoori poojijainia cuhuataquiaa, naatej, taa samaritu cuhuataa ninishiiquecuaani, cuaara juhuaquemajaatijia. Pananuuri saniniuujia muetanutaniyacu-jua, seetanujuanaa na cuhuatanura pajaniya. Naa quiniutianiyaar-iuhua pa Jiyaniijia muetasacariuhua pocua. ²⁰ Maninia nia niishiri nio, pueyanaa. Puetunu tariucuacaanu Pueyaso sequesano caminiuijuniaa naajiotanojuanaari maja na naata niishishaanu maatia tama pa niishitiajatajaja. ²¹ Tariucuacaanu Pueyaso sequesano caminiuijuniaa naajionuutasanon, cunoori maja tama nojori niishishanojuaja. Pueyaso Sohuanujuanaacuajaari nojori niishitiquiaari nojori pohuata-nura Pueyaso sequenu panishano pueyara.

2

Sacuaraatia miijiaca niishitiojonaajiniji pohuatasano

¹ Tariucuacaanu, noojiaqueya Israel pueyajinjinioori tama na cuaqueyajaaja jiylatequiaari juhua Pueyaso sequenu panishano caminiuijuniaa nojori quiniuria. Naacuajitij, nojoriiri narta Israel pueya sapojonuuquiaari. Naajuhua cua panishano pueyanaa, sapojonuuquiaari nia tajinia supuenutaniyajuhuaj. Nojori niishitiojosacari sacuaraatia tama nojori niishishanojuaaja, nojoriiri nia sapojonutaniya. Nojori niishitiojosanoori Pueyaso pueya sesojuar cutara. Naacuajitij, nojoriiri tama nojori Camarnujuuaaja tamakanutaniya, cante nojoriicuara mosaaquiaaricuajani, na pueya nojori quiniuria juucua. Cunora, nojoriiri canashiyaquiji niiquiji puetunu shaajasaanutaniyajanaa saniitiosocoriquiano. ² Queraatia pueyari sacuaraatia miijiaca quiniutiani yajuhuaj, sacuaraatia cuno pojori niishitiojosano tojijiaca nojori quiniuucua. Naa nojori miiniuucuatej, Pueyaso niishiyashijiacaari seetanu rupaajanaa sesakanutaniya. ³ Cuno sacuaraatia niishitiojonuujuacaari jiyano hua casamiriaca quiniuucua jiaatiajaca quiniutiani ya. Naaratej, nojoriiri najuhuana shanohua nojori niishitiojosanota nia sapojonutaniya, nareja nia niquitiojonura nojori nia cumaneeca, nia casaminio. Naajaa, naa sacuaraatia miijiaca nojori quiniuucuatej, nojoriiri tariucuacaanujiniji Pueyaso riuriosanocuaja na saniitiosocoriquiano. Majaari Pueyaso jiyano oniu quiniutiani ya nojori.

⁴ Naajuhuaj, Pueyaso seja jaara sesa miiquiaari, majaari Pueyaso jiyano oniu quiquiaari nojori. Pueyaso orri puereeta nojori quejooquiaari ninishi qui. Tii nujuatejosano quiyari, nojori saniitiosa anu juuca cuaara quirijaatijia. ⁵ Naajuhuaj, Pueyaso orri Noé quishacari sesa miijiaca pueya jiyano ya quiquiaari jiu huaj. Cuno sesa miijiaca pajaashitani qui qiaari iri nojori cuso unura puetunu juanaa. Saaja Noé curoquiaari iri Pueyaso tojija na quiniuucua, socua siete pueyanio. Noeeri pueyara caanu cuno sesa miijiaca pueya numootequiaari juucua, nojori tacatonura noojia Pueyaso oocua, sesa nojori miiniujiniji. ⁶ Naajuhuaj, Sodoma tiacajinia quiniaa pueya quiniuucua jiyano hua sesa miijiaca, Pueyaso orri cuno tiaca catijiataquiaari tojeta arucuajanaa juacara. Naa catijiataquiaari Gomorra tiacajaari uhuaj. Cuno caapiqui tiaca naa catijiataquaia arini, cuno orri quiquiaari cuno nuhuaji quiriquiano pueya na numootenura maja naa sesa miijiaca nojori quiniuria juhuaj, nojori mariqui saniitiosa arejaari uhuaj. ⁷ Sodoma tiaca Pueyaso catijiatasacari, saaja Lot curoquiaari iri maninia pueyanio na quiniuucua. Sodoma tiacajinia quijia Lot quiniuucua, nojua aari jiyano hua taajequiaari tar, cuno pueya miijionuucua sacuaraatia casaa, tariucua nojori jiitishano casaacua.

⁸ Puetunu juucajanaa, Lotri narta Sodoma tiacajinia quiniaa ni quiquiaari cararaatia mii tio ojijano. Sacuaraatia nojori pocoojonus tojiquiaaria jiu huaj. Maninia pueyanio Lot quiniuucua, nojua aari jiyano hua na quiya miiquiaari noojia jinia. Cunora, quera Pueyaso saniitiosacari cuno pojori, Pueyaso orri Lot mashiquiquiaari cuno pueya tajiniji. ⁹ Naacuajiti pueyanaa, paari niishiyani, Pueyaso orri na tojitiajaca pueya cojuaja, maja nojori mii tisha anura sesa. Saniniuujia, Pueyaso orri sesa miijiaca racatajajaara nujuatejosano,

nojori saniitiojosaanu juucara. ¹⁰ Pueyasoori socua jiyanohua nio pojori saniitioriquiano: na camishoo maajipohua numuetucunuucua jiaatiajacani, maajishuriu numuetucunuujacahuaj, noo pojorijuhuaj, pa Jiyaniija rootasano ruuretajaca saajatej. Naa sacuaraatia mijiacani, nojoriiri tojetaarucuajanaa tojiyashijiaca. Majaari na pueretunu quiquiaa sacuaraatia tama nojori panishanojuuaaja nojori miiniuria. Naajuhuaj, nojoriiri maja na pueretunu quiquiaa jiyocuacaanu cumaacaraca quiijiaca na sesacanura. ¹¹ Saniniuuja, Pueyaso seya cutaraari jiyanohua socua cumaacaraca cuno sesa mijiaca pueyajiniji. Naajaa, majaari nojori riutioconu quiquiaa Pueyaso, cuno jiyocuacaanu cumaacaraca quiijiaca nojori sesacanura.

¹² Cuno pojori, saaja sacuaraatia miiniuria niishitiojonaani, nojoriiri niishiyashijiaca. Nojoriiri juhua nacujiniaaco quiijiaca casami, teyanote saaja puecoosocoriquiano roosaaquiaacuajani. Tojetaaru-cuajanaa niishiyashijiaca nojori quiniuucua, nojoriiri maninia quiijiaca pa quiniuria pa Jiyaniija rootasano sesacaquiaa. Cunora, nojoriiri juhua puecoosocoriquiano nacujiniaacoji casaa. ¹³ Naacuajitij, nojoriiri naquiya miishocoriquianojuhuaj, naquiya nojori miitianuu-cua narta pueya. Nojoriiri jiyanohua timiquiaa nojori jaara naata quiriquia sesa miiniu juucajujuaj taa nojori miiquiaa niucuacuaani. Cuno pojoriiri sacuaraatia mijiaca. Majaari na niishiniu caririquiniu. Nojori sapojonuuucua niajaniya, nojoriiri jaarajaaja nia cojiquiaa nia queranacunuusaqui. Naa nojori quishacari nia tajinatej, nojoriiri jiyanohua timiquiaa tariucua nojori jiitishano sesa casaacua nojori niishiriojosacari. ¹⁴ Naacuajitij, nojoriiri maja nareja na niquiniu quiquiaa maajipohua. Puetunu maajipohuajanaa niquitiuquiaa nocua na jiaatianutaari. Nojoriiri maja na taajenu sesa na miiniuria pueyara-caanu. Canapuete jatarinitiaja pa Jiyaniija tojijiani, cuno pojoriiri nojori shiniujuquiaa na sapojonuta, sesa nojori miiniuriajuhuaj. Naajuhuaj, cuno pojoriiri tariucua jiitinio puetunu nojori panishanojuanaa nojori jiitianura, jaara na naata quiriquia. Nojoriiri tariucua Pueyaso jiyatesano na saniitiosocoriquiano. ¹⁵ Pueyaso rootasano tojiyashijiaca nojori quiniuucua, nojoriiri juhua tashuquioono Pueyasoori neteja nuujiniji. Nojoriiri casamiriaca quiniuucua jiaatiajaca juhua supuetana Beor niyanu Balaam. Jiyacaritij, Moab jiya jiyanijiaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyanohua queraatia casami na niquitionutaniya, nojuaja jaara nocua quiaare, Israel pueya na shimiojonura nera. ¹⁶ Casamiicua jiaati-aja na quiniuucua, Balaamri na seru nijnia cajiquiaari. Quiaareeri. Nu-cuaco na quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacuajitij, pocuaashijia seruuri Balaam tarinitiquiaariuhua, juhua moseeca sesa na miiniu panishacari juucua.

¹⁷ Cuno pojori, pueya sapojojua na niishitiojosanotani, nojoriiri juhua cuari joojequetano. Naajuhuaj, nojoriiri juhua niquitiuocua paratu piyarojosano, tamoco quiamaa saajaari. Nojori niishitiojosanoori naajuhuaj. Majaari na tojitiajaca na naacunu. Pueyasoori jiyanohua nin-ishiqui quiquo tarí jiitiae nojoriicuaji, pueyaracaanu nojori quiquiero-rano. ¹⁸ Nojori pohuatasanoori najuhuana shanohua tojishano. Saaja sapojonuuri. Naacuajitij, nojoriiri shusha Jesuucua tiuuijaca shiniujuquiaa nojori miiniuhuara tama nojori cuaqueya panishanojuuaaja.

Cuno Jesuucua tiuujiacacuajaari shusha naataja sesa mijiaca pueyajinijino jatanishaariquiaa juucua, Pueyaso tojijiaca nojori quiniuria juucua.¹⁹ Sapojonuujuaca cuno niishitiojonuujuaca quiniuucua, nojoriri pueya niishitiojoquiaa sacuaraatia. Pueya niishitiojoquiaari, nojorinijaari seetanujuanaa juhuajaniya quijiaca quiniutianiya shuquiriaatia, nojori jaara nojori niishitiosano tojijiaca quiriquia. ¿Nojori niishitiosano pueyatucua taa juhuajaniya quijiaca quiriquiani, tama nojorijijaaja jaara sesa miiniuucua jiitnio quiyajaa? Seetanujuanaari, pueyano jaara mama na naata quiriquia sesa casaa na mijiionu tarinitianu, cuno pueyanoro seetanujuanaa juhua tama sesa na mijiiosano seruuaaja. Majaari na naata na tarinitianu.²⁰ Pueyanaa, niaacuajaari niishiya, pueyano jaara pocuaji Tacunaacua tiuuijara quiri, pa Jiyaniijia Jesucristoori na cumaquijia na tarinitianura sesa miiniuria na jiitishano. Saniniujia, cuno pueyano jaara sesa mijiara quiriohua, nojuaja jaara sesa mijiionura jiitriohua socua, neraari socua puereeta quiniutianiya Pueyaso niishiyashijiaca pueyajiniji.²¹ Naacuajiti pueyanaa, pueyano jaara seetanu rupaajanaa niishijia quiriquia, nojuajaari cocuaatia miya jaara na samiritiarohua sesa mijiia na quiniuhuara. Cuno pueyanora maara socua maninia quiquiaari mama na niishiniuria Jesucristo rupaa, teyanote na niquiara pohuatasaaquiaaricuajani, jatanishano pueyano na quiniuria.²² Naa pa Jiyaniijia samiritiajaca pueya quiniuucuatej, sesa mijiaca nojori quiniuhuara, nojoriri nio tariucuacaanu Pueyaso Rupaajinia naajiotasano tohuateequiaa. Naa miriqui sequeyari: “Sa-reeri coteenu macayoree. Na miaquerohuari”. Naajuhuaj: “Cushiiri nanatosaree juucua. Saaja na cooqiojinia neeneecuasuahuarihuaj”.

3

Pa Jiyaniijia tiuquiniuhua cuaracashitishacari

¹ Cua panishano cuarta Pueyaso pueyanaa, niori tanee cua naajionee niaacuara. Coteenu cua naajiojinia, janiyari nia nacasuquiaarini socua cua shiniujiuniuria niajaniya mama nioojia niquijotejaca nia quiniuria Pueyaso rootasanojiniji. Janiyari naa miya quiarrijia nio cua naajiojiniahuhaj.² Maninia nia numama nia racatariquia tariucuacaanu pueyara Pueyaso sequencesano caminiuijuniaa pohuatasano, pa Jiyaniijia jiyaramiquishano pueya pohuatasanonio. Cunocuajaari pocuaji Tacuna rootasano pajaniyara.

³ Nio nia niishiriquia cutara pueyanaa. Quera nio jiya puequesacari, pa Jiyaniijia soojeacaari supuenutaniya. Nojoriri tama na cuaqueya miiniu panishano mijiacaajaaja. Na macaatiniuria niajaniya, nojoriri nia nequesotanutaniya:⁴ “¿Taa nia Jiyaniijia miiquiaarini? Nojuacuajaari nia sequequiaari: ‘Tacatenutaniuhuanijia’. Majaari na tiuquiniu. Tariucuacaanu na niquinia pa supuetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na shipinishaanujiniji. Majaari quenaaja tamonu casaa jatanu quiquiaa tamaatiara”.⁵ Majaari naate pueyanaa. Cuno pojoriiri tariucuacaanu Pueyaso miishanojiniji niishiniu paniyashijiaca. Jiyanoluhu tariucuacaanu, Pueyasoori jiya cajiniocua shipiniquiaari saaja na pocuanuta. Na sequencesacarijuuhuaj, jiyari mohuacajiniji muetaquiaari, mohuaca jiuujajinia na quiniuria.⁶ Na nuhuaji, Pueyasoori cuno mohuacaja pajaashitiquiaari puetunu mijiria quijiacajanaa na cusojuanura.⁷ Quiarrijia

saniniujjia, jiya cajiniocua, nio jiyanio, Pueyasoori na cumaacata nojori jiitiaajaara. Na nuhuaji cutara, puetunujuanaari catenutaniya, Pueyaso saniitiosacari puetunu na ruuretajaca pueyajanaa.

⁸ Naajuhuaj cua panishano cuarta Pueyaso pueyanaa, pueyaracaanu nio nia niishiriquia. Pa Jiyaniijiara, niquiriyatu juucaari juhua mil marijia. Naajuhuaj, mil marijiaari juhua niquiriyatu juuca nera. ⁹ Majaari nia jiyaniniu maja pa Jiyaniijia tacatenu quiniutianiuhua. Majaari na tarishiniu najuhuanaj, taa tamasaca jiyaniyacuajani. Maja. Maja cutaraari na paniniu pueya quejoosaanura mani quiquojinie. Naacuajitij, nojuacuajaari pueya sashiyajaara nojori tacatonura nojori jiuujia sesa nojori miiniujiniji, Pueyaso pueya nojori quiniuria.

¹⁰ Naajaa, nojuacuajaari tiuquiniutianiuhua. Pueya jiyanishacari Jesucristo maja na tiuquiniu quiniutianiuhua, jiyacaritij, canashiyaqueji tiuquiniutianiuhuari. Juhua nohuasejojua tiuquiniutianiuhuari, sesa miijiacna saniitionura. Na nuhuaji, jiya cajiniocuaari shaajentaniya. Jiyanoehua cojuatunenutaniyari na shaajesacari. Casaajiniji jiya shipinishaquaarini, cunoori puetunu catenutaniyajanaa. Naacuajitij, jiysi puetunu mijiria na jiiitasano casaatajanaa shaajasaanutaniya jiyanoehua naseeca manijinie.

¹¹ Quiarijia pa niishishacari taa pa jiya shaajasaanutaniyani, cunora, seetanujuanaa Pueyaso panijiaca nia quiriquia saa maninia miijiaca nia quiniuria. ¹² Naa maninia miijiaca nia quiriquia, Pueyaso cuaara pa Jiyaniijia mueraterohua pocuajaatijia. Pa Jiyaniijia sequencesano tojijiaca nia quiriquia, na tiuquiniu juuca nia secootenura. Jiyacaritij, Pueyasoji jiya cajiniocua setanutaniya. Naacuajitij, casaata na shipiniquiaari puetunu casaajanaani, cunoori manijinie mohuaque-nutaniya. ¹³ Naajaa, Pueyaso cutaraari seetanujuanaa sequequiaari pajaniya, nojuajaari quiarinio jiya cajiniocua shipininiutianiya pajaniyara, quiarinio jiyanio. Cunora, paari shuquiriaatia na sashiyani. Jiyacaritij, majaari quenaaja sesa miiniu niishishaanu quiniutianiya socua. Puetunu casaajanaari tojetaarucuajanaa maninia quiniutianiya.

¹⁴ Naa nia niishishacari casaa pa sashiya nio pa quishacarini, cunora, jiyanoehua nia saniniujiriquia saaja maninia miijiaca nia quiniuria. Tojetaarucuajanaa jiyanooshano nia quiriquajuhuaj, juhuajaniya nia quiniuria pa Jiyaniijia tacoji, na nequesoreesacari pajaniya. ¹⁵ Naacuajiti pueyanaa, nio nia niishiriquia: pa Jiyaniijiaari tarishiya-jaara pueyacua na taraajenuucua, nocua nojori tiuuniuria, Pueyaso jiyanooniuria nojori. Tarishiyajaariuhuaj tojetaarucuajanaa jeenucuasano pa quiniuria nera. Pa panishano parta Pueyaso pueyano Pabloori naa naajioquiaari niaacuarajuhuaj, Pueyaso niishitija na jititanuuucua. ¹⁶ Nojuacuajaari puetunu na naajioneecajinajanaa mariyata nio cua pohuatasano pohuataa. Noojiaqueya na pohuatasanoori seetanujuanaa jiyajeneta pueyara. Naacuajitij, mosanucua, noojia niquijotejacanjo, nojoriiri Pablo niishitiosano jataniquiaa tamaatiara, nojori niishiyaquishacari cuno rootasano. Nojoriiri naa jataniquiaa puetunu Pueyaso Rupaajanaa. Naacuajitij, nojoriiri tama na cuaqueyajaja jiyatequiaa Pueyaso saniitiosocoriquiano nojori quiniuria.

¹⁷ Cunora cua panishano Pueyaso pueyanaa, niaacuajaari tari niishiya cuno Pueyaso rootasano tojiyashijiacajiniji. Nocuaji jiyanoehua nia cojuariquia tama nia cuaqueyajaja maja nia sapojosaanura sesa miijiaca

nia quiniuhuara. Saaja Pueyaso rupaacua tiuuijaca nia quiriquia cutara, taa nocua tiuuijaca nia quiyacuajani, cuno pojori mariqui nioojia niquijotereeri. ¹⁸ Naajuhuaj, socua pocuaji Tacuna niishiniuucua jiaatiajaca nia quiriquia. Naa maninia nia niishiri pa Jiyaniijia Jesucristo, socua na panijiaca nia quiniuria, socua na cumaaca nia jiitianurajuhuaj. ¡Pa Jiyaniijiaari jiyanohua maninia! ¡Nojuaja cuaara shuquiritiasaaria quiarijia, pueyaracaanujuhuaj! Cuaara naa quiiriatej.

COTEENUJUANAA JUAN NAAJIONEE

Pueya samiitianija rupaa

¹ Jiya shipinishaacarijijoja, Jesucristoori quijiajuhanajaj. Canaari niaara naajiyani, canaa niishitiniuria niajaniya nojuajiniji canaa tojishano, canaa niquishanojuhuaj. Pueyanaa, canaari seetanujuanaa na niquiquiaari canaa namijiatani, pueyaracaanu nata canaa quishacari mijiria. Canaari na cooquaarijuhuaj canaa rupuesacari nojuaja. Nojuajaari pueyaracaanu quijia cutara, pa Samiitianijaar-ihuaj, pueyaracaanu quijia pa quiniuriajuhuaj, na sequesanoocua pa tiuushacari. ² Cuno pueyaracaanu Quijani, nojuajaari pueyanora jataquiaari. Canaari na niquiquiaarini. Naaratej, canaari pueya po-huataquiaarini, nojuajaari seetanujuanaa pa Samiitianija. Canaari quiarijia cuno pueyaracaanu Rishijajiniji nia pohuataajaaniuhuaj. Co-teenu na Queta quijia jiyocuacaanuuri. Na nuhuaji, canaacua mue-taquiaariiri. ³ Canaari seetanujuanaa nia pohuataa canaa niquishanon, canaa tojishanojuhuaj. Canaa pohuatasanoocua nia tiuushacari, pocua rupuetoreni, taa canaa quiya pa Que Pueyaso rupuesanocuaani, Neyanu Jesucristo rupuesanonio. ⁴ Niaa jaara nio naajiojinia canaa sequesano tojiri, niaari seetanujuanaa shuquiriaatia quijiacu quiniutianiya. Canaa jaara niaacuaji tojiriquiani, canaari shuquiriniutianiya-jaacuhuaj.

Pueyaso pa cuhuatana

⁵ Jesucristocuajaari nio rupaa canaa niishitioquiaari, canaa nia po-huataani. Nojuajaari naa canaa sequequiaari: "Pueyasoori Cuhuatana cutara. Nojuajaari maja ninishiqui quijia quenaaja". ⁶ Naacuajitij, paa jaara sequereni: "Pueyaso rupueja cutaranijia", na rupaa pa tojijaquishacari, paari saaja najuhuana sapojiyani. Paari juhua ninishiqui quijia quiyajaani. ⁷ Paa jaara seetanujuanaa cuhuashiqui quiyani, taa Pueyaso quiya cuhuashiquicuaani, paari juhua rupuetootesano quiya parta Pueyaso muerasuta cutarani. Naa juhua rupuetootesano pa quishacaritij, Neyanu Jesucristo nanacaari puetunu sesa pa miishanojuanaa tuujuquiaa poojiajiniji.

⁸ Paa jaara sequereni: "Janiya sesa miyashijiani", paari tama pa cuaqueyajaaja sapojiyani naa pa sequesacaritij. Majaari Pueyaso rupaa tojijia pa quiniu. ⁹ Paa jaara sesa pa miishano pohuatare saniniunijia, Pueyasoori jiyanoottio cutara, na jiyanoonuria pajaniya, taa na sequequiaaricuajani. Poojiajiniji jeequenutaniya puetunu sesa casaajanaari. ¹⁰ Paa jaara saniniujia sequereni: "Maja sesa cua miiniu", paari Pueyaso jiyateya juhua sapojouuarani. Paa jaara naa quirini, majaari seetanujuanaa na rupaa quiniu poojiajininia.

2

Jesucristo pocuaji tacuna

¹ Quiquoohuaniyojuanaa cua tojitiare. Nio naajiya niaaranijia, maja juhuajaniya nia miiniuria sesa. Paa jaara sesa miirini, paacuajaari pa Que Pueyaso shuriucua jiitaa pocuaji Tacunani, na Que Pueyaso

na jiyanoootiniuria pajaniya. Nojuajaari Jesucristo, pueyaracaanu maninia miijia cutarani. ² Sesa pa miishanoori jiyanooshaaquiaa Jesucristo cusionuucua pocuara. Majaari saaja jiyareta pa sesa miishano jiyanooshaanu quiquiaa, mariyata puetunu mijiria quiniae sesa miishanojuanaari jiyanooshaaquiaajuhuaj.

³ Paa jaara pa Jiyanijia rootasano tojirini, paari niishiyani paa tari Pueyaso niishirii cutarani. ⁴ Jesu rootasano tojiyashijia jaara sequeriquia: “Pueyaso niishiyaniija”, jiyano pueyanoori sapojojua. Majaari na jitianu Pueyaso rupaa noojajinie. ⁵ Cante saniniujuja pa Jiyanijia sequesano tojijia cutarani, nojuajaari seetanujuanaa pa Que Pueyaso panijia cutara. Naacuajitij, paari niishiyani paari jatiqui quiya natani. ⁶ Cante sequejani: “Janiyari Pueyaso rupuejani”, nojuaja cuaara quiuria juhua Jesucristo, taa na quiquiaari maniniacuaani, mijiria na quishacari.

Quiarinio Pueyaso rootasano pajaniyara

⁷ Cuarta Pueyaso muerasunaa, majaari quiarinio nio rootasano, janiya niaara na naajiyani. Niocuajaari tariucuacaanu nia tojishano, majaari quiarinio. Niaacuajaari tari na tojiquiaari, Pueyaso rupaa jaara shushajanaa nia niquiara pohuatasaquaari. ⁸ Naajaa, nio rootasano quiarijia cua naajiosanoni, nioori seetanujuanaa juhua quiarinio niaara. Niaari tari na tojiquiaa, pueya panijiaca nia quishacari, taa Jesucristo quiquiaari pueya panijiacuaani mijiria na quishacari. Na rootasano nia tojishacari, niniquiaari tari quiamacuaa nioojiajiniji. Pueyasoori nioojiajinia cuhuataa nia panitioosacari quiarijia.

⁹ Niaa jaara sequeriquia: “Pueyasoori coojia cuhuatarucuaani na rupaa cua niishishacari”, na nuhuaji majaari nia niquiniu paniniu niarta Pueyaso pueyano, niaari ninishiqui quiyajaa. ¹⁰ Cante narta Pueyaso pueya panijia cutarani, nojuajaari cuhuashiqui quijia cutara. Tamasacaari maja na naata sesa na miitiniu, naajuhuaj, tama nojuajaarijia maja sesa na miiniu quiniutianiya, pueya panijia na quishacari. ¹¹ Cante narta Pueyaso pueya niquiniu paniyashijiani, cuno pueyanoori ninishiqui quiyajaa, juhua ninishiqui canujuucuaajaariuhuaj. Majaari na niishiniu tee na quiaani. Naa na quiniuucua juhua ninishiquitij, nojuajaari juhua cariyojuaru quiya. Majaari na niishiniu Pueyaso casaa.

¹² Quiquiohuaniyojuanaa, niaara naajiyia nionijia, Pueyaso jiyanooshano muerasu nia quiniuucua, Neyanu Jesucristo mosaanuucua pocuara. ¹³ Queyanaa, niaara naajiyaniija nia niishiniuucua pueyaracaanu Quijia, cante tari pocuaji quiquiaari jiya coteyaquischacarijia. Mashiquioriniae, janiya niaara naajiyajaaniuhua cua timishacari nia shocotanuucua Sesaaca.

Janiyari niaara naajiocanuni quiquiohuanaa, nia niishiniuucua pa Que Pueyaso, Neyanu Jesucristoocua nia tiuushacari. ¹⁴ Janiyari niaara naajiocanujuhua queyanaa, nia tiuuniuucua tariucua pocuaji Quijia, nio jiya coteyaquischacarijia. Janiyari niaara naajiocanujuhuaj mashiquioriniae, seetanujuanaa maninia nia tojiniuucua Pueyaso rupaa, niaa jaara na masequiaari nioojiajinia, Sesaaca nia shocotanuucua juhuaj.

¹⁵ Majaari mijiria sesa miiniuucua nia jiaatianu, mijiria casamicuanio. Cante mijiria casaacua jiaatiajani, cunoori maja pa Que

Pueyaso panijia. ¹⁶ Mijiria niishijiaca coretanijiosano tama nojori niishishanojinijiaajani, puetunu cunojuanaari maja pa Que Pueyaso niishitishano. Cunoori sacuaraatia tama mijiria pueya niishishanojuaja. Naacuajitij, pueyano pa quishacari, paari sesa pa jiaatianuta pueyaracaanu casaa paniquiaani tama pa cuaqueya pa shuquiritiniuriajaaja. Paari pa niuishano pa maniniucusano casaa paniquiaa pueyaracaanu. Naaajuahuaj, paari pueyaracaanu timiquiaani tamasaca timiti-asacari pajaniya. Puetunu naa sacuaraatia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej. ¹⁷ Nio jiyari tari tariucuashiyaree. Socua shaajasaanutaniya puetunujuanaari. Puetunu sesa pa jiaatianujuanaari cojiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

Jesucristo paraa

¹⁸ Quiquiohuanaa, quiarijiaari quera jiya puequesacari tari. Niaacuajiaari tari pohuatasaquaari Cristo Paracaari niniutianiya. Quiarijiani, queraatia na paraari tari supueree. Naacuajitij, paari niishiyani nio pa quishacariiri jiya puequesacari quera. ¹⁹ Cuno Cristo paraani, nojoriiri pajaniyajinjinio pueya quiqianucuaja. Pocuaji rupatetucanuuri maja seetanujuanaa Pueyaso muerasu nojori quishacari. Jaara seetanujuanaa Pueyaso muerasu quiqianu, mariqui pata quiyacuaateni. Naa nojori miiniuucuatej, paari niishiyani majaari puetunu pata rerejonaa-janaa seetanujuanaa parta Pueyaso muerasu.

²⁰ Saniniuuja niajaniya Pueyaso muerasunaa, Jesucristoori nia niquitioquiaari na Sohuanu. Naaratej puetunu niajaniyajanaari Pueyaso niishitiajaraca. ²¹ Majaari niaacuara cua naajionuni nia niishiyaquishacari Pueyaso rupaa. Niaacuajaari na niishiya cutara. Niaari niishiyajuhuaj, sapojojua sequesanoori maja Pueyasojiniji.

²² Pueyano jaara sequere: “Jesuuri maja Pueyaso Jiyarosano”, cunoori sapojojua. Cante sequejani: “Pueyasoori maja Jesu Que”, cunocuajaari Cristo paraca. Jaara sequerejuhuaj: “Jesuuri maja Pueyaso Niyanu”, cunoori Cristo paracajuhuaj. ²³ Cante Pueyaso Niyanu Cristo tamaca-jani, majaari Pueyaso na jiitianu na Querajuhuaj. Cante Pueyaso Niyanu Cristo jiitiae cutarani, pa Que Pueyaso jiitiae na Querajaariuhuaj.

²⁴ Naaratej, Pueyaso rupaa nia racatare nia numaama taa nia tojiquiaari tariucuacaanucuajani jaara shushajanaa pohuatasaquaari nia niquiara. Niaa jaara naa racatariquia na rupaa nioojajinate, seetanujuanaa nocua nia tiuushacari, niaari jatiqui quiya pa Que Pueyaso, Neyanu Jesucristotanio. ²⁵ Jesucristocuajaari na Sohuanu niquitioquiaari pajaniya, pueyaracaanu pa rishiniuria. Nojuajanaari naa pa sequequiaari.

²⁶ Nio naajioree niaaranijia cua niishitiniuria niajaniya, nia niishiniuria taa Jesu paraa niishitiojonuuquiaa sesa najuhuana na cuaracashiniuuniutiani. ²⁷ ¿Casaara nojori nia tojiquiaani? Niaacuajaruhua tari Pueyaso Sohuanu jiitiae, Jesucristo niquitiosano niajaniyani. Naacuajitij, majaari tari panishaanu tamasaca niishitiojonura socua niajaniya. Pueyaso Sohuanucuajaari nia niishitiojoquiaa puetunu casaajanaa. Puetunu na niishitiosanojuanaari seetanujuanaa cutara, maja sapojonu. Naaratej, pueyaracaanu jatiqui

nia quiriquia Jesucristota, taa Pueyaso Sohuanu niishitiojoquiaa nia quiniuriacuajani.

²⁸ Quiarijiani quiqiohuaniyojuanaa, jatiqui nia quiri Cristota, seetanujuanaa juhuajaniya nia quiniuria pa Jiyaniijia jaara tiuquiriohua pocua. Naa nia quiritij maja nia caririquinuria nojuaja jaara pa jiitiasuhua. Na rupaa tojiyashijiacaari caririquinutianiya cutara. ²⁹ Niaacuajaari seetanujuanaa niishiya, Jesucristoori tojetaarucuajanaa sesa miyashijia cutara. Niaa cumaati niishiyahuaj, puetunu maninia miijacajanaari Pueyaso muerasu.

3

Pueyaso muerasu

¹ Pueyanaa, pa Que Pueyasoori jiyanoehua pa panijia. Pa sequeyari, "cua niquiohuua". Seetanujuanaa, paari necohuani. Naaratej, majaari mijiria quiniaa pueya niishiniu pajaniya. Pa niishitiuyaquiyari nojori niishiyaqueiniucua pa Que Pueyaso. ² Cua panishano Pueyaso muerasunaa, paari tari Pueyaso muerasucuajani. Maja cutaraari pa niishiniu taamuecaquitija pa quiniutianiya na nuhuajitijaj. Paari saaja niishiya cutarani, Jesucristo jaara nimiohua, paari juhua nojuaja quiniutianiyan. Na tiuquishacariuhua, paari na niquiniutianiyan taa na quiyacuajani. ³ Puetunu na sashijiacajanaari tama na cuaqueyajaaja jeequequiaa sesa nojori miishanojiniji saaja maninia nojori quiniuria, taa Jesucristocuaani sesa miyashijia tojetaarucuajanaa.

⁴ Cante sesa mijiian, cunoori Pueyaso rootasano na rupaajinia tojiyaquijia. Puetunu sesa miiniujianaari Pueyaso rootasano tojiyaquiniu.

⁵ Niaari niishiyahuaj, Jesuuri mijiria pocua niquiaari poojia seque na jataniniuria. Nojuajaari tojetaarucuajanaa sesa miyashijia cutara.

⁶ Naacuajitij, cante jatiqui quiya pa Jiyaniijiatani, nojuajaari maja sesa na miiniu quiquiaa cutara. Cante saniniujia sesa mijiian, majaari na niishiniu Jesu. Majaari nojuaja na niquiniu quiquiaarijuhuaj.

⁷ Quiqiohuaniyojuanaa, tama nia cuaqueyajaaja nia cojuare niaa mariqui sapojosaareeri. Cante maninia mijiian, nojuajaari maninia pueyano cutara, taa pa Jiyaniijia Jesucuaani, pueyaracaanu maninia quijia cutara. ⁸ Saniniujia, cante sesa mijiian, nojuajaari Sesaaca pueyano. Shusha jiya coteenujiniji, Sesaacacuajaari tari sesa mijiia quiquiaari. Pueyaso Niyanuuri cunora niquiaari puetunu sesa na mijiiosanojuanaa na shaajanura.

⁹ Puetunu Pueyaso pueyajanaari maja sesa miiniuucua na shiiniuquiuniu, quiarinio pueyara Pueyaso rootesano nojori quiniuucua. Nojoriiri quiarinio pueyara jatanishano quiya Pueyaso Sohuanu nojori jiitiasacari. Naacuajitij, seetanujuanaa Pueyaso muerasu nojori quishacari, majaari na naata sesa mijiaca nojori quiniu pueyaraacaanu. ¹⁰ Naacuajitij, maatia niishishanoquaajaari cante Pueyaso muerasuni. Saniniujia, cante maninia miyashijian, nojuajaari maja Pueyaso pueyano. Naajuhuaj, cante narta pueya paniyaquijian, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujaniuhuaj.

Panitiojuaca pa quirij

¹¹ Pueyanaa, shushajanaa Pueyaso rupaa nia tojishacari, niaacuajaari naa niishitiojosaaquiaaritij: "Panitiojuaca nia quirij". ¹² Maja

cutaraari pa quiniu juhua Caín! Nojuajaari tama tarajanujuuaaja moquiaari, Sesaaca tojijia na quiniuucua. Nia niishiritio casaara Caín moquiaari tarajanuni. Nojuajaari tama tarajanujuuaaja tacartaquiaari monu, tarajanu miishano quiniuucua maninia. Saniniuujia, tama na miishanojuaarijia sesa quiquiaari. Cunora tarajanu moquiaariiri.

¹³ Cuarta Pueyaso muerasunaa, majaari nia jiyajenenu Pueyaso ruuretajaca jaara niquinii paniyaquiriquia niajaniya. ¹⁴ Paacuajaari juhua macu samiitianijiosaaquiaariuhuani, seetanujuanaa saminuucua pa quiniuria. Paari seetanujuanaa na niishiyani panitoojuaca pa quishacari parta Pueyaso pueyata. Cante tapueyocuaca paniyaquijiani, nojuajaari juhua macu quiyajaa. ¹⁵ Naajuhuaj, narta pueyano niquinii paniyashijiacani, nojuajaari juhua pueya mojua Pueyasora. Niaacuajaari niishiya, pueyano mojuaari Pueyaso samiitianijaquishoojua pueyaracaanu na rishiniuria. ¹⁶ Paacuajaari niishiyani, Cristoorigi jiyano hua pa panijia na cusionuucua pocuara. Naacuajiti paari niishiyani taamuecate seetanujuanaa paniniuni. Paa cuaara naa panijia quiiriajuhuaj, tama pa cuaqueyajaaja pa tarinitianura parta Pueyaso pueyacuara, jiyano hua pa paniniutia nojori. ¹⁷ Niaa jaara nareja niquiya niarta Pueyaso pueya casamijiuniucua, puetunu nia panishanojuanaa nia jiitiasacaricuua, niaari najuhuana sequela: “Pueyaso panijianijia”. ¿Pueyaso panijia pueyanoteeri jiyano pueyano, narta Pueyaso muerasu niquitioyajuija na jiitiasanojiniji? ¡Maja! ¹⁸ Quiquiohuaniyojuanaa, majaari najuhuana pa sequenu: “Cuarta Pueyaso pueya panijianijia”. Paa jaara seetanujuanaa nojori panirini, nojoriicua pa taraajere, taraatia nojori miishacari. Pueyaracaanu maninia pa miiri, seetanujuanaa pa paniniutia pueya. Majaari najuhuana pa sequenu: “Nojori paniyanijia”.

Pueyaso tojijiaari juhuajaniya quijia Pueyaso niquiara

¹⁹ Naacuajitij, paa jaara pueya panijia quirini, paari niishiyani paa seetanujuanaa Pueyaso tojijiani. Paari niishiyani paa pueyara-caanu rishiriquiano Pueyasotani. Majaari pa shaajenu quiniutiani. ²⁰ Pueyaso muerasu pa quishacari, poojia jaara pa taacanuutere saaja nocuaji, naajaa, Pueyaso cutaraari jiyano hua maninia niishijia socua poojia niishishanojiniji. Nojuacuajaari pa niishiya cutara. ²¹ Cua panishano Pueyaso muerasunaa, poojia jaara pa macuhuaquaquiri, paari shuquiriaatia quiya Pueyaso niquierani. ²² Nojuajaari puetunu pa masesano niquitionutaniya pajaniya, na rupaa pa tojishacari, puetunu na panishanojuanaa pa miishacarijuhuaj. ²³ Pueyaso sequesano puer-aari nio: Neyanu Jesucristoocua pa tiuuniuria, pa panitioonurajuhuaj taa na sequequiaaricuajani. ²⁴ Canapuete Pueyaso rootasano tojijiacani, nojoriiri Pueyasota rupuetootesano quijiaca. Naajuhuaj, Pueyasoori nojorijinia quiyacuua. Nojuacuajaari na Sohuanu niquitioquiaari pajaniya. Naa na Sohuanu pa jiitiasacaritij, paari maatia niishiyani Pueyasoori poojajinua quiya.

4

Pueyaso Sohuanujiniji pohuatasano, Cristo Paraca sohuanujinijinio

¹ Cuarta Pueyaso pueyanaa, quiarjiani, queraatia Pueyaso sequenu panishano caminiuijiuniaa pueyari supueya. Majaari ritia nia tiuuuni

puetunu nojoriicuajanaa. Coteenu nojori nia saniniujiuri, nia niishinuria nojori caminiujiushanote seetanujuanaa Pueyaso Sohuanujiniji, tamonujiniji soj. Mijiria, queraatia sapojonuujuacaari caneya. Nojoriiri najuhuana cuaracashiniuya na sequesacari: "Janiyuacuajaari Pueyaso sequenu panishano caminiujiuniani: Pueyaso Sohuanu niishitishano janiya".² Niaari naa niishiniutianiya cante seetanujuanaa Pueyaso Sohuanu niishitishano caminiujiuniani: Pueyaso Sohuanu jiitijaari naa sequeja: "Pueyaso jiyarosano Jesucristoori pueyanora quiquiaari, mijiria pocuara cusoriquiano".³ Cante saniniuujia jiyaniyani Jesu maja pueyanora na quiniu quiquiaari, cunoori maja Pueyaso Sohuanu na jiitianu. Saaja Sesaaca sohuanu jiitiaa noojajinbia cutaraari. Nojuacuajaari Jesucristo Paraca. Niaacuajaari tari pohuatasaaquiaari, Cristo Paraca sohuanuuri niniutianiya. Nojuacuajaari tari mijiria quiya.

⁴ Quiquiohuaniyojuanaa, niaacuajaari Pueyaso muerasu. Naacuajitij, niaari cuno sapojonuujuaca shocotacanu Pueyaso cumaacata. Niooji-ajinia Quijiaari socua cumaacaraca nojori jiitiasano Sesaaca cumaacajiniji.⁵ Cuno sapojonuujuacaari saaja Pueyaso niishiyashijiaca, maja Pueyaso muerasu. Naacuajitij, nojoriiri saaja mijiria casajiniji pohuatanuuquiaa. Naarate narta Pueyaso ruuretajacaari nojori tojitiaquiaa.⁶ Paa cutaraari Pueyaso pueyani. Naacuajitij, cante Pueyaso tojitijacani, nojoriiri pa tojitiaquiaa. Canapuete saniniuujia maja Pueyaso pueyani, nojoriiri maja na tojitianu quiquiaa pajaniya. Naacuajitij, pa naata niishiniu cante seetanujuanaa Pueyaso Sohuanu jiitiaa cutaran, cante saniniuujia sapojojua sohuanu jiitiaanijia.

Pueyaso pa panijia cutara

⁷ Cua panishano Pueyaso pueyanaa, jiyahua panitoojuaca pa quirij. Pueyasocuajaari pa panijia. Nojuajaari pa panitijia na Sohuanuta, jiyahua panijia pa quiniurajuhuaj. Canapuete puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaariuhuaj.⁸ Canapuete pueya paniyashijiacani, nojoriiri maja na niishiniu Pueyaso. Pueyasocuajaari panijia cutara.⁹ Nojuajaari pa niishitiquaari taa na paniquiaa jiyahua pajaniyani, Neyanuniyojua na jiyarosacari mijiria pa samitianijioriquiano, pocuara na cusosacari.¹⁰ Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paniniuria pajaniya. Neyanu jiyaroquiaarii pocuara mosocoriquiano, sesa pa miishano jiyanooshaanura. Naa cutarate seetanujuanaa paniniu.

¹¹ Cua panishano Pueyaso muerasunaa, Pueyaso jaara naa pa paniquiaaricuaa, ¿casaara pa panitioyaquiyarinijia? Naa panitoojuacara pa quirijiuahuaj.¹² Majaari quenaaja pa niquinu quiquiaari Pueyaso, taamuecatejanojoni. Naajaa, paa jaara tamasacata panitoojuaca quirini, Pueyasoori poojajinbia quiyacuaja. Naacuajitij, paari tojetaarucuajanaa panijiacara quiniutianiyan, na paniniu quishacari poojajinbia.¹³ Nojuajaari na Sohuanu pa niquitioquiaari poojajinbia na quiniuria. Naacuajitij, paari niishiyani paacuajaari nata rupuetoojua quiyani.¹⁴ Canaajanaari seetanujuanaa canaa niquishano pohuataani: Pueyasoori Neyanu jiyaroquiaari mijiria, mijiria quiniae niti mosocoriquiano, nocua tiuuijaca jiyatesaanura Pueyaso pueyara.¹⁵ Cante

pueya niquiara sequejani: "Jesuuri seetanujuanaa Pueyaso Niyanu", Pueyasoori noojiajinia quiya. Nojuajaari Pueyasota rupuetoojua quiyahujuaj.

¹⁶ Naacuajitij, paari niishiyani Pueyasoori jiyano hua pa panijia. Paari na niishiyajaaniuhua na rupaacua pa tiuushacari. Pueyaso cutaraari panijia. Paa jaara pueyaracaanu panijia quirini, paari seetanujuanaa Pueyaso rupuejani. Naajuhuj, Pueyasoori poojiajinia quiya. ¹⁷ Naa Pueyaso quishacari poojiajinatej, paari pueya panijiara jiyacatequiaa socuani. Naa seetanujuanaa panijia pa quishacaritij, paari juhuajaniya quiniutianiya Pueyaso nequesoreesacari puetunu pueyapuejanaani. Majaari pa puerenu quiniutianiya panijia pa quishacari taa panijia nojuaja quiyacuaani. ¹⁸ Cante seetanujuanaa Pueyaso panijiani, majaari na niishiniu puerenu. Naa pa paniniuuri puetunu pa puerenu jataajanaa. Cante puereja quiya saniniunijia, majaari juhuanojuaja na paniniu Pueyaso puetunu noojiatajanaa. Puerejaari niishiriojiya: "Saniitiosaanutaniyanijia".

¹⁹ Niaacuajaari niishiya, Pueyasoori coteenujuanaa pa paniquiaari, naarate paari saniniuujia na paniyani. ²⁰ Saniniuujia, cante sequejani: "Janiyari Pueyaso panijiani", narta pueya niquiniu paniyaquiyaa saa-jaaraariuhuj, jiyano pueyanoori sapojosua. Naa na paniyaquishacari tarajanu na niquishano na namijiata cutaratej, ¿maatucua taa Pueyaso panirini, na niquishoo socuani? ²¹ Pueyasocuajaari naa pa rootaquiaari: "Cante cua panijiani, cuaara paniiria narta pueyahuaj".

5

Taa pa shocotanutaniya mijiria niishishanoni

¹ Niaa jaara Jesuucua tiuuri nojuaja seetanujuanaa Pueyaso Ji-yarosano quiquiaari, niaari Pueyaso muerasu. Mijiria, cante muerasu que panijiani, necohua paniyajaariuhuj. ² Naacuajitij, pa panishacari Pueyaso, pa tojishacari na rootasanojuhuaj, jiyacariti paari niishiyani paari parta Pueyaso muerasu paniyajacuhuaj. ³ Paa jaara Pueyaso panijia quiri seetanujuanaani, paari na sequesano tojijiaca quiyajaniuhuj. Na rootasano pajaniyani, majaari jiyajeneta na quiniu pajaniyara. ⁴ Cante seetanujuanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasocuua pa tiuushacari. ⁵ Cante Jesu jiyateya seetanujuanaa Pueyaso Niyanurani, saaja jiyano pueyano na naata mijiria niishishano shocotanu cutara.

Pueyaso Niyanujiniji pohuatasano

⁶ Pueyasoori canaa niishitiquiaari Jesuuri seetanujuanaa Neyanujuhanaj, Jesu jaara moojinia tiuquinishaaquiaari. Canaa niishitiquiaarijiaariuhuj Neyanu jaara niyacutesanojinia naatequiaari. Jesuuri maja saaja moojinia na tiuquinishaaanu quiquiaari canaa niishiniuria nojuaja. Maja. Naajuhuj, janiyajanaari na niquiquiaari na nanaca shooteyano na shuucuajini. Naajuhuj, poojiajinia quiija Pueyaso Sohuanuuri pa niishitiquiaa cunoori seetanujuanaa Pueyaso Niyanu quijiajuhanaj. Pueyaso Sohuanu cutaraari maja na niishiniu sapojonu. ⁷ Jiuujianaraca jiyocuacaanu quijiacardi pa niishitiya Jesucristoori mijiria niquiaari pueyano na quiniuria seetanujuanaa. Cuno pojoriiri nio: Pueyasojuanaa, na Rupaa, na Sohuanunio. Nio jiuujianaraca quijiacani, nojoriiri Pueyasojuhuanaj. ⁸ Paari mijiria jiitiae

Jesujiniji pa niishitijiacajuhuaj. Cunoori jiuujianaraca quiyajuhuaj. Cuno pojoriiri nio: poojajinia quijia Pueyaso Sohuanu, jiyoucuacaanuji tojishano rupaa Jesu tiuquinishacari moojinia, naajuhuaj, na nanaca, pueya niquishano na shuucuaji shoyano. Puetunu cunojuanaari mariyata pa niishitiya Jesuuri seetanujuanaa Pueyaso Niyanu.⁹ Paa jaara tojiriquia pueya pohuatanuusanoni, ¿casaara saniya Pueyaso sequencesano pa tojiyaquiyarini? Pueyaso sequencesano Neyanujinijiiri socua seetanu rupaajanaa cutara pueya pohuatanuusanojiniji.¹⁰ Cante Pueyaso Niyanuucua tiuujiani, Pueyaso Sohuanuuri noojajinia na niishitiya Jesuuri seetanujuanaa Pueyaso Niyanu. Saniniuujia, cante Pueyaso sequencesano Neyanujiniji ruuretaja saniniunijia, nojuajaari Pueyaso jiyateya sapojojuara, na tiuyaquishacari tama Pueyaso sequencesanoocua-jaaja Neyanujiniji.¹¹ Pueyasocuajaari sequequiaari, Neyanuucua tiuujicaari pueyaracaanu rishijiaca quiniutianiya.¹² Cante Pueyaso Niyanu jitiaas hijaari saniniuujia maja na rishiniu quiniutianiya.

Nio naajio puequenu panishacari rootasano

¹³ Nio naajija niaaranijia nia niishiniuria, Pueyaso Niyanuucua nia tiuushacari niaari tari samiitianijiosaarohua pueyaracaanu nia rishiniuria.

¹⁴ Paari Pueyasocua tiuquiaa, pa niishishacari nojuajaari pa tojiquiaa pa secojosacari nojuaja, pa masesano jaara quiri taa na paniyacuajani. ¹⁵ Naatej, taa pa niishiyacuaani Pueyasoori pa secojosano tojiquiaa, paari naa niishiyajuhuaj paari nojuaja pa masesano maseree tarini.

¹⁶ Cante narta Pueyaso pueyano niquiya sesa miyanoni, cuaara Pueyaso secojoora nocuara, sesa na miishano jaara na cusojuaashijia quiri. Naacuajitij, Pueyasoori cuno sesa mijjia naataniniutianihuua, sesa na miishano jaara cusojuaashijia quiri. Quiyajaariuhua tamonu sesa casaa miiniu. Paa jaara cuno sesa casaa miirini, paari cusoqueeni. Naa cua sequencesacari niajaniyatej, majaari cua sequenu niajaniya nia secojonura jiyano sesa miishanoocuaratej.¹⁷ Seetanujuanaa, puetunu sesa miishanojuanaari sesa Pueyasora. Naajaa, majaari puetunu sesa miishanojuanaa cusojuanu quiniutianiya pajaniya.

¹⁸ Paacuajaari niishiyani pueyanaa, cante Pueyaso jitiaa juhua na Que cutarani, nojuajaari sesa miyaquiquiaa, Pueyaso Niyanu cojuasacari nojuaja. Naacuajitij, Sesaacaari maja na naata sesa na miitiniu. Majaari na naata sesa na miiniuijuhuaj.

¹⁹ Paari niishiyani paa cutaraari Pueyaso muerasuni. Sesaacaari saniniuujia puetunu mijiria quiniaa Pueyaso niishiyashijiacajanaa jiti-aacujua. Nojuajaari nio jiya camarnu.

²⁰ Paari niishiyajuhuaj Pueyaso Niyanuuri mijiria pocua niquiaari. Nojuajaari na niishitiija niquitioquiaari pajaniya, maninia pa niishiniuria na Que, na Que quiniuria pa Quejuhuaj. Nojuajaari Pueyasojuanaa cutara. Paari nata quiya jatiquini, Neyanu Jesucristota pa rupuetoosacari. Nojuajaari Pueyasojuhuanajaj, pa Samiitianijijaariuhuaj, pueyaracaanu rishijiaca pa quiniuria.²¹ Quiquiohuanijojuanaa, saaja Pueyaso pa paniri. Tama pa cuaqueyajaaja pa cojuare, maja tamonu casaacua pa jiaatianura socua Pueyasojiniji. Paa jaara tamonu

1 JUAN 5:21

636

1 JUAN 5:21

casaacua jiaatiarení, paari Pueyaso shocoteya nocuarani. Niojuanaa
pueyanaa. Tariucuaja.

TANEE JUAN NAAJIONEE

Pueyaso Rupaa seetanujuanaa panijiara pa jiyateja

¹ ¿Quiaate quiyajaa cua panishano cua rimiaticuanaa? Quiaacuajaari Pueyaso saquiriojosano, neyatu quia quiniuria. Quiocuara naajianijia, quia panishano muerasuucuaranio.

Janiyari saaquiano Juanni, Pueyaso muerasu jiitiana. Seetanujuanaa nia paniyanijia, taa puetunu Pueyaso rupaa tojiniaa pueya paniya ni-ajaniyacuaani. ² Pueyasojiniji seetanu rupaajanaari poojiajinia quiya. Naaratej, canaari nia paniyani. Cuno rupaari poojiajinia quiniutianiya pueyaracaanu. ³ Nia tojishacari seetanu Pueyaso rupaajanaa, nia panitioosacarijuhuaj, naacuajitij, pa Que Pueyasoori Neyanu Jesucristota nia cumaquinintianiya. Niaacua taraajenutaniyajaaariuhuaj. Nioojia jiyatenutaniya juhuajaniya quijiacarajaariuhuaj.

⁴ Noojaqueya quia niquiohuajinijinio niquiquianunijia. Nojori timi-tiakanunijia nojori tojitanuuca maninia seetanu rupaajanaa, taa pa rootasaaquiaari pa Que Pueyasojinijicuajani. ⁵ Quiocuara naajija quiar-ijianijia cua panishano cua rimiaticuanaa, cua sequenura quiajaniya: "Jiyanohua pa panitioore". Majaari quiarinio rootasano nio, cua naa-jiosano quiocuariani. Nio rootasanocuajaari pa jiitiasano pueyaracaanu Jesucristojiniji. ⁶ ¿Taate pa naata paniniuni? Paari pueya panijiaca quiyani Pueyaso rootasano pa tojishacari. Niocuajaari na rootasano: puetunu pa miishanojuanaa cuaara quiiria Pueyaso pa paniniutia poo-jiajinia.

Cristo paraari sapojonuujuaca

⁷ Quiarijiani, queraatia sapuenu juhua Pueyaso sequenu panishano caminiijiuniaari mijiria quiya. Nojoriiri pueya niishitiojoquiaa: "Majaari Jesucristo rosenu quiquiaari jiyocuacaanuji, cuaqueyaraca na quiniuria, seetanujuanaa pueyano na quiniuria". Canapuete naa sequ-jacani, nojoriiri sapojonuujuaca. Nojoricuajaari Cristo paraa. ⁸ Tama nia cuaqueyajaaja nia cojuare cuno pueyacuaji, maja nia tojiniuria nojori, niaa mariqui Pueyaso niquitionu panishano pajaniya maseyaquiri-ri, pa Jiyanijiara nia poonijionujiniji na niquitionu panishano. Suraatiaja nia tojiriohuaroqua seetanu rupaajanaa, nia masenura puetunu Pueyaso jiitiasanojuanaa niaara. ⁹ Cante tama na cuaqueyajaaja jiyateja Pueyaso casaa niishijiara socua Jesucristo jiyaramiquishano pueya niishitiojosanojinijini, cuno shocotajaari Pueyasoojura quiqui, na shocotanuuucua Cristo rupaa. Cante saniniuujia seetanu rupaajanaa tojitiaquiaa maniniani, taa pa rootasaaquiaari Cristo rupaacuajani, Pueyasocuajaari na Que, Neyanuuri nocuaji Tacunajuhuaj. ¹⁰ Seetanu rupaajanaa jitiaashijia jaara niaacua tiuquiniu paniya tamaatia na niishitiojonura niajaniya, majaari niaacua na shanacununoj. Majaari quenaaja na saruhuatantuuhuaj nia cumaquinuria nojuaja. ¹¹ Cante na sequeyani: "Pueyaso cuaara cumaquiiria quiajaniya", naa sequejaari cuno sapojouja cojiritiasaaree taris sesa na miishanotaja.

Juan puecasacari naajionu

¹² Socua queraatia sequenu paniya niajaniyajia. Naajaa, majaari cua naajionu paniniu. Janiyacuajaari niaacua naquerejiyani, maninia pa pocoojonura, shuquiriaatia pa quiniuria seetanujuanaa. ¹³ Quia tarajanu niquoohuari cua sequeree nojoriria cua saruhuanura quijaniya. Nojuacuajaari Pueyaso saquiriojosano maajijiuhuaj. Tariucuaja.

SOCUA TANEE JUAN NAAJIONEE

Juan maninia pohuatasaaquiaari Gayojiniji

¹ ¿Quiaate quiyajaa cua panishano Gayonaa? Janiyari saaquiano Juanni, Pueyaso muerasu jiitiana. Seetanujuanaa quia paniyanijia, Pueyaso rupaa quiniuucua coojajinija. ² Quiocuara secojoquiaanijia, puetunu quia miishanojuanaa cuaara quiria maninia. Janiyari quiocuara secojoquiaajaanihuaj, maninia quia cuaqueya quiniuria, maja cusosu, taa quioojia quiya maniniacuaani, Pueyaso tojijia quia quishacari maninia.

³ Parta Pueyaso muerasujinjinio pueyari cucua tiuquiquianu quia quijia tiacajiniji. Janiyari jiyanohua shuquiriaatia quiqianuni nojori pohuatasacari quiajaniyajiniji. Quiaanaari seetanujuanaa maninia mijija quiquiaa taa pa rootasaaquiaari Jesucristo rupaacuajani. Quiaacujaari maninia tojiquiaa seetanu rupaajanaa, sanajanaa. ⁴ Jiyanohua timiquiaanijia cua tojishacari cua muerasuuri maninia miya, taa cua rootaquiaari Jesucristo rupaa nojoricuajani. Naa cua tojishacaritij, cunoori jiyanohua cua timitiquiaa socua tamonu casaajiniji.

⁵ Sanajanaa, quiaacujaari maninia mijija, maninia quia miishacari parta Pueyaso muerasu. Quiaa cutaraari maninia miiquiaa, quia tiuquitishacari quia tiajinia quia niishishoo tamaquiuicuajinijo Pueyaso muerasu. ⁶ Pueyaso muerasu rerejosacari niya, Pueyaso rupaa po-huatanura rucoojuacaari canaa niquiara pohuatanura maninia quia miishanojiniji nojoriria, quia paniniutia nojori. Quiarijiani, nojori quia niquitiore nareja nojori panishano na jiyatajara, socua nojori quianu panishacari cuniquiji. Naa quia miiri quenaaja, Pueyaso quia shuquiritiniuria. ⁷ Nojoriiri Jesucristojiniji pohuatanura rucoojiya. Majaari nojori panishano na masetunu paniniu quiqianu Pueyaso niishiyashijiacajiniji. ⁸ Naaratej, pajaniya cuaara naacuura jiyano pueya, noo pojori canapuete pa Jiyaniijia rupaa pohuatanura rucoojiyacuajani. Naa pa miiriti Pueyaso rupaa pohuatanu naacunaa pa quiniuriajuhuaj.

Sesa Diótrefes miishanojiniji pohuatasano

⁹ Janiyari quia quijia tiacajinija Pueyaso pueya maanuucuara naa naajioquiaarijuhuaj. Janiyari nojori sequequiaarini nojori cuaara Pueyaso Rupaa pohuatanura rucoojuaca naacuura, cuno pojori jiitinaura na panishano. Diótrefesri saaja tama na cuaqueyajaaja shuquiritiaja, Pueyaso pueya maanu jiitiana na quishacari. Nocuaji cua seque-sano ruuretacanuuri. Cua rerequetequiaajaarijuhuaj. ¹⁰ Naajaa, janiya jaara niaacua quiaareni, janiyari naa sacuaraatia na miiniuucua na nacasunutaniyani. Nojuajaari tamasaca niquiara canaa sesacaquiaa na sapojonuta. Naa socua sesa miiquiaajaarijuhuaj: majaari na tiuquinitianu quiquiaa Pueyaso Rupaa pohuatanaa na tiajinia. Canapuete saniniuujia nojori tiuquinitiu paniquiaa nojori tiajiniani, Diótrefesri nojori tenujuquiaa saaja. Canapuete Pueyaso rupaa pohuatanura ru-coojuaca tiuquinitianu paniquiaajaa na tiajiniani, Diótrefesri puetunu nojori tenujuquiaajanaa, maja socua nojori rerejonura narta Pueyaso muerasuta.

¹¹ Sanajanaa, majaari quia jiaatianu cuno sesa miijiaacua, quiaa mariqui juhua nojuaja quirijaariuhuaj. Saaja quia jiaatiare cutara maninia miijiaacua, juhua nojuaja quia quiniuria. Cante maninia miiquiaani, cunocuajaari Pueyaso pueyano. Sesa mijjia saniniujia, nojuajaari Pueyaso niishiyashijia.

Maninia Demetrio miishanojiniji pohuatasano

¹² Puetunu pueyajanaari saniniujia maninia pohuatanuuquiaa Demetriojiniji. Tama Demetrio miijiosanojinijijaaja, pueyari niishiya Demetrioori maninia pueyano. Seetanujuanaa, nojuajaari maninia pueyano, taa tamasaca sequequiaacuajani. Niaacuajaari niishiya canaari seetanujuanaa sequequiaani, naa canaa sequesacari Demetriojiniji.

Naajio puequesacari

¹³ Janiyari queraatia sequenu paniyajaa quiajaniyani. Naajaa, majaari cua sequenu paniniu saaja cua naajiojinia. ¹⁴ Janiyacuaja quiocua naquerejiyani. Jiyacaritij, pocua maninia pocoojore cutarani.

¹⁵ Pueyaso cuaara quioojia jiitiaara maninia, juhuajaniya quia quiniuria. Niya pa rupuenaari cua sequeturee cua saruhuanura quiajaniya. Puetunu cuniqui pa rupuenaajanaa quia saruhuatare canaarajuhuaj. Tariucuaja.

JUDAS NAAJIONEE

Judas naajiosano Pueyaso saquiriojosano pueyacuara

¹ Janiyari Judasni, Jesucristo seru, Jacobo tarajanu. Niaacuara naajianijia canapuete pa Que Pueyaso panishano muerasucuajani. Nojua-janaari nia saquiriojoquiaari nera nia quiniuria. Niajaniyari Neyanu Jesucristo cojuasano, nia rupuesacari nojuaja. ²Pueyaso cuaara nia jiujiaaria. Cuaara nioojia cajitiriajuhuaj. Cuaara paniiria niajaniyajuhuaj. Pueyaso cuaara naa miiria jiyanoehua niajaniyatej.

Sapojonuujuacajiniji pohuatasano

³ Cua panishano pueyanaa, janiyari niaacuara naajionu paniriquiaa jiyanoehuani, cua pohuatanura niajaniya taa maninia pa miishaantu-taniyani, Pueyaso saquiriojosano pueya pa quiniuucua: niajaniya, canaaajujuaj. Saniniujia, quiarrijani, socua maninia cutaraari cua naajionura niaacuara, cua nacasunura niajaniya seetanujuanaa Pueyaso tojijiaca nia quiniuria. Jiyanoehua nia tiuuri pueyaracaanu Pueyaso rupaacua, cumueeca Pueyaso pueya nia quiniuria. Pueyasocuajaari na rupaa pohuataniquiaari maninia pa niquiara. Maja cumaati na jatanishaanu. Cuaara pueyaracaanu maninia pohuatasaaaria, taa pa pohuatasaaquiaaricuaani. ⁴ Naa nia sequeyanijia Pueyaso rerequete-jaca supuesacari jiyasohua nia tajinia. Tariucuacaanu Pueyaso Ru-paajiniacuajaari cuno sesoriquia pueyajiniji naajiotasaacuariajua. Nojoriniaari quejoosaanutaniya pueyaracaanu saniitiosocoriquiano. Nojoriiri sequequiaa: “Shuquiriaatia juhuajaniya pa miiri tama pa cuaqueya miiniu panishanojuaaja, pa jiyanoojia Pueyaso quishacari. Paa jaara sesa miirini, naajaa, majaari Pueyaso saniitionu quiniutianiya pajaniya”. Nojoriiri naa sequetuquiaa sesatej. Nojoriiri pa Jitianajanaa jiyatequiaa juhua saniitioyashija, pa Jiyannijajanaa Jesucristoni.

⁵ Niaari niishiyacuaja, Pueyasoori Israel pueya supuetanaa mashiquiquiaari Egipto jiyajiniji, Egipto pueya seja nojori quishacari. Socua nia niishitiorohuaraj. Na nuhuaji, Pueyasoori na pueyajinjinio nocua tiuyashijiaca puecooquiaari. ⁶ Naajuhuaj, Pueyasoori tama na seyajaaja nujuatejoquiaari na nujuatejojuajinia, noo pojori canapuete na shuriucua quiwijiaqui jiyocuacaanucuajani. Nojoriiri Pueyasora na poonijiosano tiujiacia. Nojori poonijiosaqui tiujiatuquiaarijiaarihuaj. Cunora, cumayocuata morojosaaquiaariiri, pueyaracaanu ninishiqui nojori quiniuria, cuaara quirijiaatijia Pueyaso saniitiojonu juuca cutara. Cuno juuca, Pueyasoori puetunu na tojiyashijiaca janaa saniitiojonutaniya. ⁷ Nia niishirijihuua Sodoma tiacajinija quiija pueya, Gomorra tiacajinija quiija pueyanio, nojori tiaca shocua quiniae pueyajuhuaj. Puetunu nojorijianaari maninia miiniu ruuretaquiaari tama nojori cuaqueya panishanojuaaja nojori miiniuria, jiyanoehua sacuaraatia. Nojoriiri maajishuriu numuetucujuaca quiquiaari. Cayashuriuuri narta maaji numuetucujuaca quiquiaarijihuaj. Pueyasoori maja na shipininii quiquiaari naa pueya quiniuriatej. Naa Pueyaso tojiyashijiaca nojori quishacaritij, mariyata taa tama Pueyaso seyajaaja na tojiyashijiaca quiquiaaricuaani, Pueyasoori nojori quejooquiaari

mani quiqiojinia, tii naquiya nojori miishaanura pueyaracaanu. Naa nojori saniitiosaanuuacuaatej, cunoori quiquiaari puetunu pueyajanaa niishiniuria maja Pueyaso tojiyashijiaca pa quiniuria taa nojori quiquiaaricuaani.

⁸ Cuno pojori, sacuaraatia niishitiojonaa nia tajinia quiyani, nojoricuajaari Pueyaso saniitionujinji niishiya. Naajaa, nojoriiri juhuajaniya miiquiaa puetunu sesajanaa taa noojiajinia nojori niishiyacuajani. Nojoriiri tama nojori jiuujiacajaaja curuushojoquiaa nojori miishacari tama nojori niquishanojuaaja na maquenujinie. Pa Jiyaniijia sootiyuyaariuhuaj. Nojoriiri jiyanohua cumaacaraca quijiaca sesacaquiaajuhuaj, jiyocuacaanu quijiacani. ⁹ Supuetana Moisés shaajesacari, Pueyasoori na seja jiyanijia Miguel jiyaroquiaari Moisés quete na jamonura. Sesaacaari Moisés quete paniquiaari juucua. Nocua Miguela juayonuutaquiaariiri. Miguel cutaraari seetanujuanaa cumaacaraca quijia. Naajaa, majaari na saarigionu quiquiaari Sesaaca. Na sequeree saajaari: "Pueyasojuanaa cuaara juaaria cutara quiajaniya". ¹⁰ Saniniujia cuno sesa niishitiojonaa nia tajinia quiyani, nojoriiri na niishishoo cumaacaraca casaa sesacaquiaa. Naajuhuaj, nojoriiri tama nojori cuaqueyajaaja sesoquiaa sesa na miishanota, taa nacujiniaeacoji casaa miiquiaa sesa juhuajaniyacuaani, maja na niishiniutia. Naaratej, nojoriiri saniitiosocoriquiano puetunurajanaa.

¹¹ Nojoriiri jiyanohua cocuaatia miiquioquia. Nojoriiri narta pueya niquinii paniyaquiquiaa, taa supuetana Caín niquinii paniyaquiquiaari tarajanucuaani. Nojoriiri sesa pueya timitiquiaa casamiriaca nojori quiniuriajuhuaj, naatej, taa supuetana Balaam miiniu paniquiaari juucuacuaani. Nojoriiri mariyata puetunu quejoosaanutaniyajanaa nojori ruuretanuucua Pueyaso, taa supuetana Coré cusoquiaaricuaani na ruuretasacari Moisés. ¹² Nia queranacusacari Pueyaso niquirara nia panitioonuta, cuno sacuaraatia niishitiojonuujuacaari jiyanohua cararaatia nojori miaquesacari niaata. Majaari nojori paniniu tamasaca. Nojoriiri saaja tama na cuaqueyajaaja shuquiritiniu niishijiac. Puera miaquenuujuaca nojori quishacari, cunoori cararaatia. Jiyano pueyari maja na cumaquinii niajaniya. Nojoriiri najuhuana quijiaca, juhua niquitioocuaari tajimiaquiaa paratu piyarojosacari. Majaari maru niniu. Nojoriiri najuhuana quiya, juhua muetuhuo naana. Nojoriiri tariucua macu Pueyasora, naatej taa naana sorenocuaani, juhua puetunu na nujuacatajanaa majoratasano. ¹³ Nojori nuhuaji, pueyari saaja taraatia quiquiaa, cararaatia nojori miishanojiniji. Sesa nojori miishanoori juhua jiyanohua shoniniacu caminia queyocuasacari cushau, curuutuuca. Nojoriiri shanohua niquishiya rupaquijia, juhua rijia tiyano. Na nuhuaji, nojoriiri ninishiqui quiiniutianiya pueyaracaanu Pueyasooju. ¹⁴ Pa supuetana Adánri coteenuujuanaa shipinishano pueyano quiquiaari mijiria. Enocri séptimo jiyanijia quiquiaari Adán nuhuaji. Enocri Pueyaso niquitishano nojuaja pohuataquiaari taa nio sesa miijiaca pueya miishaanutaniyani. Nojuajaari naa sequequiaaritij: "Janiyari Jiyanijia niquirii cunocoji niyano jiyanohua queraatia na pueyatani". ¹⁵ Nijioriquiaari sesa miijiaca na saniitionura. Rerequetejacaacua tiuutianutaniya puetunu sesa nojori miishanojuanaari. Puetunu na soojeacajanaari

saniitiosaanutaniya puetunu nojori sesacanuu cuajanaa pa Jiyaniijia".¹⁶ Cuno sesa niishitiojonuu juacaari naa miiquoquiaa nia tajinia. Nojoriiri saa juayonuutaquiaajaa. Majaari shuquiriaatia nojori quiniu quiquiaa na jiitiasanota. Nojoriiri tama na cuaqueya panishanojuuaaja miiquiaa. Puera pocuajaca quiyajaariuhuaj. Nojoriiri na sapojonuta maniniuhuaqueetaquiaa narta pueya, maninia nojori miishaanura. Majaari naa nia quiniu pueyanaa.

Pueyaso pueyara rootasano

¹⁷ Cua panishano pueyanaa, nia niishiriohua pa Jiyaniijia Jesucristo jiyaramiquishano pueya sequences niajaniya. ¹⁸ Nojoricuajaari nia pohuataquiaari taate quera jiya puequesacari quiniutianiyani. Nojoriiri naa sequetuquiaaritij: "Quera jiya puequesacari, Pueyaso sesacajaca pueyari Pueyaso casaa soojeaca quiniutianiya, na rupaa soojeacajuuhuaj. Nojoriiri sesa miiniutianiya tama nojori cuaqueyajaa ja nojori shuquiritiniuria". ¹⁹ Naa cuno pueya miiniuucuatej, nojoriiri Pueyaso muerasu jiuujia niyaquejotequiaa maja rupuetosano nojori quiniuria. Nojoriiri saaja tama sesa nojori niishishano miiquiaajaacujua, Pueyaso Sohuanuju nojori quishacari.

²⁰ Cua panishano Pueyaso muerasunaa, Jesucristo rupaacua nia tiuri jiyanolua socua, seetanujuanaa na pueya nia quiniuria maninia. Pueyaso nia secojore Pueyaso Sohuanu cumaacata. ²¹ Naacuajitij, niocua Pueyaso panishano pueya quiri pueyaracaanu. Juhuajaniya nia sashiri pa Jiyaniijia Jesucristo, nojuaja cuaara pueyaracaanu quiijacara pa jiyaterejaatijia, shuquiriaatia pa quiniuria na shuriucua pueyara-caanu. Naa pa miiniutianiyari maninia jiyanoojia na quiniuucua.

²² Canapuete pa Jiyaniijiaacuaji taacanuyajaani, nojori nia niishitijo-re jacaria, seetanujuanaa nojori tiuuniuria maninia pa Jiyaniijiaacua. ²³ Tamasaca nia pirijoorejuhuaj Pueyaso pueya nojori quiniuria, nojori mariqui manijnia puetunu quejoosaarejanaari. Tamasacaari jiyanolua sesa mijiaca. Naajaa, nojori nia naacure, Jesucristo nojori niishiniuriajuhuaj. Saniniuujia, tama nia cuaqueyajaa ja jiyanolua nia cojuare niaa mariqui sesa miitishaarejaariuhuaj nia cojishacari nojori. Jiyano pueyacua nia tarajere. Saniniuujia, puetunu sesa nojori miis-hanojuanaa nia soore cutara.

Naajio puequesacari Pueyaso maniniuhuaqueetasaanu

²⁴ Pa Que Pueyasoori pa cojuquiaa maja pa catenura nocuaji. Nojuacuajaari cumaacaraca na tiuquinitianura pajaniya nocua, puetunu tari maniniushitishanojuanaa pa quishacari, shanohua na cumaacaa pa shootianura pueyaracaanu. Pa niquishacari nojuaja, paari jiyanolua na timitianutaniyani.

²⁵ Jiyanolua maniniaari pa Que Pueyaso! Nojuajaari niishijajanaa. Pa jiyatequiaari na muerasuraari pa Jiyaniijia Jesucristo cusionuucua pocuara. ¡Jiyanolua shanohua na cumaacaa! ¡Nojuajaari Jiyaniijajanaa! ¡Jiyanolua maninia pa Jiitiana! ¡Nojuajaari puetunu cumaacaracajanaa cutara! ¡Nojuacuajaari pa Que Pueyaso! Jiya shipinishaacarijiyojua, nojuajaari quiijajuhuanajaj. Naa quiyajaari. Naa quiniutianiya pueyara-caanuuri. Taquirriirinij, naacuaaquiniateejaj.

JESUCRISTO NIQUITISHANO JUAN

Jesucristo niquitishano pajaniyara

¹ Janiyari Pueyaso seru Juanni. Niya naajiotaa Pueyaso niquitishano Jesucristonijia, saniniujua nojuaja niishitiniuria na tojitiajaca, taa quiari naataja Pueyaso miiniutianiya mijiria quijiacani. Jesucristoori jiyocuacaanuji na seru jiyaroquiaari cucua, na niishitiojonura janiya taa mijiria quijiacanija miishaanutaniyani. ² Janiyari puetunu na niquitishano juanaa caminiujiya niajaniya seetanujuanaani. Niocuajaari seetanujuanaa Pueyaso rupaa, Jesucristojiniji cua caminiujiushano niaara.

³ Shuquiriaatia quijiacanija cutaraari noo pojori, canapuete nio cua caminiujiushano Pueyasojinijini serojonutaniya Pueyaso pueya maa-pue niquiarani. Na tojitiajacaari shuquiriaatia quijiacanija quiniutianiyanjuhuaj, nojori tiuuniucua nio naajiojinia cua pohuatasanoocua. Nio pohuatasano tohuateenuraari tari catecanoya.

Juan naajiosano siete Pueyaso pueya maapueecuara

⁴ Janiyari Juanni. Asia jiyajinia quiniaas siete Pueyaso pueya maa-pueecuara naajiyanijia. Pueyaso cuaara cumaquiuria niajaniya, cuaara nioojia cajitiiriajuhuaj. Pocua niriquiano pa Que Pueyasoori jiyanohua maninia. Nojuajaari pueyaracaanu quijiacuaja. Quiarijia quijajaariuhuaj. Na Sohuanuuri juhua siete saminio casaa niquishano, puetunu tiquiyocuajanaa quijia na quiniuucua. Nojoriiri Pueyaso cajishaqui tacoji quitiuya. ⁵ Pueyaso Niyanu Jesucristoori seetanujuanaa pueras caminiujiunia puetunu na Que Pueyaso Rupaajanaa. Nojuajaari quiarinio na cuaqueyata pa coteetaquiaari samiitianuhua macujiniji. Nojuacuajaari puetunu mijiria jiyanijianucuajanaa Jiyanijija. Nojuacuajaari pa panijia. Tama na nanacajaaja shootequiaariiri sesa pa miiniujiniji na jayonura pajaniya, tojetaarucuajanaa sesa miyashijiacara na jataniniuria pajaniya. ⁶ Nojuajaari pa jiyatequiaari jiyanijianucua pa quiniuria, na Que Pueyaso secojonaa pa quiniuria pueyacuara, nojuaja pa shuquiritianurahuaj. ¡Pa Jiyanijijaari jiyanohua maninia! ¡Pa Jiyanijija cuaara shuquiritasaaria pueyaracaanu! ¡Nojuacuajaari puetunu cumaacaracajanaa pueyaracaanura! Cuaara naa quiiratej.

⁷ ¡Nia maure! ¡Pa Jiyanijija Cristoori cohuajajinia tari cunocojuhua! Puetunu pueyajanaari na niquiniutianiya, noo pojorijuuhuaj, na motenaatej. Puetunu mijiria quijiacanija pueyapuejanaari nocuaji nujuquenutaniya nojori martenuta. Taaquiriirinij. Naa quiniutianiyanacuajiniateja na tiuquishacariuhua.

⁸ Pa Jiyanijija Pueyasoori tama nojuajinijijaaja sequeya:

“Janiyacuajaari puetunu casaajanaa coteetanani, na shaajariquianojuhuaj. Puetunu cumaacaracajanaanijia. Janiyacuajaari pueyaracaanu quijiani. Majaari cua supuenu quiquiaari. Janiyari niaacua tiuquiriquianohuani”.

Juan niquishacari Cristo puereeta na shacantuua cumaacajinia quiyano

⁹ Janiyari niarta Pueyaso pueyano Juanni. Pa Jiyaniijia Jesuucua tiuujia cua quiniuucuajuhuaj, janiyari jaarajaaja niaata cojiritiashiya naquiya miiniuni. Naaratej, paari mariyata jiyaniijianucuara jiyatesocoriqianoni. Cunora, paari juhuajaniya naquiya miiniu rejere-taquiaani Jesucristo cumaquisshacari pajaniya. Pueyaso rupaa Jesucristojiniji cua poojotanuucua, janiyari shoniniacu caminia jiuujiajinia jatasano quiyanjiya tucuaatiajaacua. Nio jiya tucuaatiaja sesaari Patmos.¹⁰ Tamonu juuca, pa Jiyaniijia samiitianuhua pa niishiniu juucani, Pueyaso Sohuanuuri cucua niquianu jiyanohua na cumaacata. Janiyari jiyacari rupaa tojirii nacaano cua nijiniarani, juhua trompeta jonenenu.

¹¹ Cua sequeriquiaari:

—Casaa cua niquitinitiutianiya quiajaniani, cuno quia naajiotare nequesoreetuneerano. Quiocua na nuhuaji na jiyarore Asia jiyajinia nio siete cua saquiriojosano pueya maapuecua. Nojoriiri Éfeso tiacajinia quinia, Esmirna tiacajinia, Pérgamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajinianio.

¹² Janiyari cua nijinaria tacatequeeni cua niquiniuria cante cu-cua pocuariquiaani. Cua tacatesacari, janiyari siete samari nujuat-acojua niquiriimi, orojiniji shipinijiosano. ¹³ Cuno samari nujuata-cojua tajiniani, janiyari pueyano niquiriimi, juhua Pueyaso Niyanu niquishano. Tucuaque toque cushiriquiaari. Na niohuacaacuma puecariquiaari. Na jiriquajinia camarucuteriquiaa orojiniji shipinishano casaari. ¹⁴ Pueyaracaanu quijia na quiniuucua, na muecacaari tojetaarucuajanaa jiyanohua cohuaja quiriquiaa juhua sohuanatuu. Maatia pueya jiuujia niquijia na quiniuucua, na namibiaari juhua mani rimianacuriquiaa. ¹⁵ Na niohuacaari nenecuariquiaa juhua jiyanohua naseeca casaajinia mohuaquishano bronze. Naa shacantuca niquishano quiriquiaari puetunu sesa casaajanaa paracaajia na quiniuucua. Cumaacaraca Jiyaniijia na quiniuucua, na pocuasacari, jiyanohua to-jishaariquiaari juhua sararojua, jiyocuacaanuji mohuaca tijia. ¹⁶ Na miaquetajata siete riya muetujuriquiaari. Naajuhuaj, nijiniaequetucuaja mueruuri na rupaamaji mueranacuriquiaa, na rupaa ruuretajaca na puecoonura. Na jiquicoori jiyanohua shacantuca quiriquiaa juhua jiyanohua pananu jasacari panacari.

¹⁷ Cua niquishacari nojuaja, janiyari cua puerenuta na pajama poj-yaree juhua macuni. Nojuajaari saaja na miaquetajata niaree cucua. Cua sequereeri:

—Maja puerenu. Janiyacuaja Jesuni. Janiyari puetunu casaajanaa co-teetejani, na shaajariquiajuhuaj. ¹⁸ Janiyari pueyaracaanu quijiani. Macu quiquiaarinijia. Naajaa, janiyari samiitianiaquiaariuhuani pueyara-caanu saminio cua quiniuria. Janiyari macunucua quiquio riatataja camaruni. Naacujitij, janiyari cumaacaracani cua tojiyashijiacu que-joonura macunucua quiquojinija. ¹⁹ Pueya niishishocoriquiano, quia niquishano quia naajiotare Juannaa, taa na quiyacuajani, naajuhuaj taa mijiria quijiaca miishaanutaniya na nuhuajini. ²⁰ Quiarijia quia poihuatareera maatia quia niishiniuria cua niquitishano quiajaninya. Cuno siete riya quia niquishano cua miaquetajata cua muetuusanoni, cunoori siete cua seya. Nojoriiri siete cua saquiriojosano pueya maapue jiitiana. Cuno siete samari nujuatacojua orojiniji shipinijiosano quia niquishanojaniuhuaj, cunoori siete cua saquiriojosano pueya maapue.

2

Éfeso tiacajinia quinia Pueyaso pueya maanuucuara naajionee

¹ Juhuacatecara naa cua sequereeri:

—Éfeso tiacajinia quijia cua seruucuara quia naajiore, Pueyaso pueya maanu jiitianani. Naa quia sequere nojuaja: “Nojuaja, cante siete riya cacaña na miaquetajatacuajani, cante siete samaritiu nujuatacojua tajinía rucuanejojuacuajani, nojuajaari naa quia sequeya: ² Janiyari puetunu quia miishanojuanaa niishiyani. Quiaari jiyahoua poonijioquia quiria. Naajuhuaj, quiaari puetunu casaajanaa rejeresaquia juhuajaniya. Janiyari niishiyajuhuaj, majaari quia shanacunu quiquia sesa miijiacia nia tajinía. Naajuhuaj, quiaari cuno sapojonujuaca nequesoreecanu, noo pojori canapuete tama sequeriquiaajajani: “Canaari Jesu jiyaramiquishanoní”. Naa quia nequesoreesacari nojoritij, quiaari niishiquianu nojoriiri sapojonujuaca seetanujuanaa. ³ Quiaari puetunujuanaa taraatia quia miiniu rejeretaquia, cucha tiuujia quia quiniuucua. Quiaari pueyaracaanu quiria poonijiojua maninia. Quia samareesacari, naajaa, majaari quia tarinitianu quiquia. ⁴ Puetunu naa quia miishanojuanaani, cunoori maninia. Saniniujia, cua seqesano quia tojiri. Majaari panijia quia quiniu tari, juhua coteenujuja. Majaari cuno cua maniniucuanu cutara. ⁵ Cunora, quia niishiri taa jiyahoua cua panijia quia quiquiaarini. Quioojia quia tacatorohua cucua, maninia miijia quia quiniuhuara, taa quia quiquiaari coteenucuajani. Quia jaara quioojia tacatoyaquiri, janiyari quiocua niniutianiyaní, Éfeso tiacajiniji cua patanura quia samaritiu nujuatata. ⁶ Quiaari maniniajuhuaj, sacuaraatia casaa Nicolás niishitijosano tojijiaca miishano soojea quia quiniuucua. Janiyari cuno pojori miishano soyajuhuaj. Nio cua seqesano quiajanianí, cunoori puetunu cua pueyarajanaa. ⁷ Cante numaaracani, nojori cuaara tojiiria Pueyaso Sohuanu seqesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casaajanaa nujuatata cumaatiani, janiyari nojori jiyatenutaniya cuno naanajiniji miojuarani, pueyaracaanu rishijiaca nojori quiniuria’”.

Esmirna tiacajinia quinia Pueyaso pueya maanuucuara naajionee

⁸ Jiyaniijia Jesucristoori naa cua sequereejuhuaj:

—Esmirna tiacajinia quijia cua seruucuara quia naajiore, Pueyaso pueya maanu jiitianani. Naa quia sequere nojuaja: “Naa sequeyari cante puetunu casaajanaa coteetenacuajani, na tucuatajanio. Nojuacuajaari cuscoquiaari, na nuhuaji samiitiaquiaariuhuari. Janiyacuajaari nojuajani. ⁹ Janiyacuajaari niishiyani, quiaari naquiya miishaaquia. Quiaari casamijijiuhuaj. Naajaa, quiaari jiyahoua casamiriacacuaja niya cua shuriucuani. Janiyari niishiyajuhuaj, cuno Judiocuacaari quia sesacaquia. Nojoriiri tama sequequiajaaacuaja nojoriniaari Pueyaso pueya cutara, Judiocuaca nojori quiniuucua. Maja naatej. Nojori cutaraari Satanás pueya maanu. Satanás cuajaari samaruhua jiyaniijia. ¹⁰ Quiaari naquiya miishaanutaniya. Naajaa, majaari puerenu. Satanásri noojiaqueya niajanijinjinio nujuatejotenutaniya nujuatejouajinía nia sanishaanura, niaate cucua tiuujia seetanujuanaa. Naajaa, niaari saaja rupaquijia miishaanutaniya naquiya. Quia rejeresaquia saaja. Cua tojijiaca quia quiriquia pueyaracaanu, quiaas cuaara

shaajeyarejaatijia. Quiaa jaara naa miiritij, janiyari quia jiyatenutaniya jiyanohua shuquiriaatia quijia quia quiniuria pueyaracaanuni. Nio cua seqesano quiajaniyani, cunoori puetunu cua pueyarajanaa.¹¹ Cante numaaracani, nojori cuaara tojiiria Pueyaso Sohuanu seqesano Pueyaso pueya maapuera. Cante cucua na tiuuniucua naquiya na miishaanu rejeretaja pueyaracaanuni, nojuaja cutaraari maja que-naaja naquiya na miishaanu quiniutianiya Pueyaso saniitiosacari na ruuretajaca. Na ruuretajaca cutaraari quejoosaanutaniya mani noshijia caminiajinia”.

Pérgamo tiacajinia quiniae Pueyaso pueya maanuucuara naajionee

¹² Jiyaniijia Jesucristoori socua cua sequeree:

—Pérgamo tiacajinia quijia cua seruucuara quia naajiorejuhuaj, Pueyaso pueya maanu jiitianani. Naa quia sequere nojuaja: “Nijnia-quetucuaja mueruu jiitianaari naa sequeya:¹³ Janiyari niishiyani, cuno tiaca quiaa tii quiyani, cunoori Satanás quiqiojuhuaj. Naajaa, quiaari cua tojijia quiquiaa. Majaari cucua quia tiuuniujiniji quia seetanu quiquiaa. Cua seru Antipas cutaraari mosaaquiaari janiyajiniji pohutanu na tarinitiaquinuucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jiyanohua maninia.¹⁴ Saniniujuja, maja cutaraari nio cua maniniucuanu: tamasaca niajaniyajinjinoori maja na tarinitianu paniniu sesa na mijionu. Nojoriiri supuetana Balaam niishitiojosano tojijiaca quiyajaa. Balaamcuajaari Israel pueya paraca Balac niishitioquiaari na pueya cuaara shiniuiuria Israel pueya, jaarajaaja Israel pueya miiniuria sesa nojoritia. Naoratej, Balac pueyari Israel pueya mianuutequiaari noo shu, teyanote juaashiquiata shipinijiosano casaacuara puecosano quiquiaaricuajani juhua Pueyasoocuara. Naa sacuaraatia nojori queranacujusacari nojori paraatatej, Israel pueyari cuniquijia cuno taatujuri numuetucujuquiaarijuhuaj.¹⁵ Naa juhuaj, majaari nio cua maniniucuanu: noojiaqueya niajaniyajinjinoori maja na tarinitianu paniniu jiyanohua sacuaraatia casaa Nicolás niishitiojosano.¹⁶ Quiaari nareja niquiquiaa sacuaraatia nojori mijionu. Cunora, quioojia quia tacatorohua cucua, janiya mariqui quiocua quiaareeri cuno sacuaraatia mijiaca cua miaquejonura cua rupaamaji mueranacujua mueruuta.¹⁷ Cante numaaracani, nojori cuaara tojiiria Pueyaso Sohuanu seqesano Pueyaso pueya maapuera. Cante tama na cuaqueya miiniu panishanojuaaja rejetejani, janiyari na mianuutenutaniya jiyocuacaanu cua racatasano cua pueyarano cua riuriotacajinijini. Janiyari na niquitionutaniya cohujajau saajiajuhuaj, teyanocua quiarinio sesa naajiotasano quiniutianiyyacuajani. Majaari tamonu niishiniu quiniutianiya cuno sesa. Saaja na camaruuri na niishiniutianiya, cana cua niquitionutaniya cuno saajiacuajani’”.

Tiyatira tiacajinia quiniae Pueyaso pueya maanuucuara naajionee

¹⁸ Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucuara quia naajiore, Pueyaso pueya maanu jiitianani. Naa quia sequere nojuaja: “Pueyaso Niyanu, juhua mani rimianacuyano namijiaaracani, juhua bronce mohuaquis-hano shacantuca niohuacaracajuhuaj, nojuajaari naa quia sequeya:¹⁹ Janiyari puetunu quia miishanojuanaa niishiyani. Janiyacuajari

niishiyani, quiaari Pueyaso panijia, pueya panijianio. Quiaacuajaari Pueyasocua tiuujia. Quiaari maninia poonijiona Pueyasora, pueya quia naacunura. Naajuhuaj, quiaari juhuajaniya rejeretaquiaa quia jaara taraatia miishaariquia. Janiyari niishiyajuhuaj, puetunujuanaa quia miishano quiria quiarijiani, cunoori socua queraatia coteenu quia miishanojiniji.²⁰ Saniniuuja, nio cutaraari cua maniniucuaaquishano: cuno Jesabel niaata quiyani, tama na cuaqueyajaaja sequequiaani, nojuajanaari Pueyaso sequesano caminiujiunia pueyara. Quiaari juhuajaniya na shanacuquiaa saaja, sacuaraatia na niishitiosanota na saponjura cua pueya. Naa sacuaraatia na niishitiosanotatej, cuno maaajiiri cua pueya shiniujuquiaa juhuajaniya nojori numuetucujunura na camishoo maajipohua. Cua pueya shiniujuquiaajaariuhuaj nojori miaquenunura noo shu, teyanote juaashiquiacata shipinijiosano tau-cuaca pueyasohuacuara puecoosano quiquiaacuajani.²¹ Janiyacuajaari tari cuno maaji sashiquianu juucuani, noojia na tacatonura cucua. Majaari na tarinitianu paniniu paanatu na quiniu.²² Cunora, cua tojiri. Cua saniitionura nojuaja, janiyari na cusotenutaniyani na maquetujinia na matanura. Naajuhuaj, na numuetucunujuaca jaara noojia tacatoyaquiri sesa nojori miiniutiani, janiyari jiyanohua naquiya miiniutiani nojorini.²³ Noo maajipohuajuhuaj, paanatujuriria quinioni, cuno paanatujuanaa niishitiojonuucua nojori juhua necojorini, janiyari puetunu nojorijiana pueconutaniyani. Naacuajitij, puetunu Pueyaso pueya maapuejanaari niishiniutaniya, janiyari puetunu nojori jiuujiajinajanaa nojori niishiriosano niishijiani, nojori panishanoocua nojori jiaatianunio. Naacuajitij, janiyari maninia miijacaa niajanijinjinio maninia miiniutaniyani. Niajanijinjinio sesa miijacaa saniniuuja, nojoriiri saniitiosaanutaniyacujua.²⁴ Tiyatira tiacajinia quinia noojiaqueya niajanijinjinio saniniuuja, niaari sacuaraatia cuno maaji niishitiosano ruuretaquiaa saaja. Naajuhuaj, majaari nia niishiniu paniniu quijia cuno sacuaraatia casaa jiyasohuaja niishishano, sacuaraatia miijacaa jiyaniquishanon “jiyajeneta casaa, Satanásjiniji niishishano”. Naa nia ruuretanuucua puetunu cuno sesa niishitiosanojuanaani, cunoori maniniacuaja. Cunora, majaari socua cua nacasunu quiarijia niajanija. ²⁵ Saaja tama nia cuaqueyajaaja nia cojuare jiyanohua, maja nia tarinitianura maninia nia miiniu taa nia miiquiaacuajani. Naa nia miiquia pueyaracaanu, janija jaara niaacua tiuquiriohuajaatijia. ²⁶ Cante cua panishano miiquiaa pueyaracaanuni cuaara shaajeyarejaatijia, janiyari cuno pueyano jiyatenutaniya tamasaaca pueyapue jiyanijija na quiniuriani, taa cua Que jiyatequiaari janija jiyanijija cua quiniuriacuani. ²⁷ Jiyaniijianucuara cua jiyatesano pueyani, nojoriiri cumaacaraca quiniutaniya na jiitiasano pueya na tojitiniuria nojuaja. Na tojitiaashijiaca na saniitiosacari saniniuuja, nojori piyonutaniya jacanauraari, juhua cumamacata pishano conatu. ²⁸ Naajuhuaj, janiyari joojea na niquitionutaniyani, juhuauetaja rijiani, shacantuua quijia na quiniuria juhua janiyajuhuaj. ²⁹ Cante numaaracani, nojuaja cuaara tojiiria Pueyaso Sohuanu sequesano puetunu Pueyaso pueya maapuerajanaa”.

3

¹ Jiyaniijia Jesucristoori socua cua sequeree:

—Sardis tiacajinia quijia cua seruucuara quia naajiorejuhuaj, Pueyaso pueya maanu jiitianani. Naa quia sequere nojuaja: “Naa sequeyari cante Pueyaso Sohuanu jiyaramiquiquia cuno siete Pueyaso pueya maapueecuacuajani, nojori jiuujiajinia na poonijionura. Nojuacuajaari cuno siete Pueyaso pueya maapue jiitianaa Jiitianajanaa. Janiyacuajaari cunoni. Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. ² ¡Quia maquenu quia jatare! ¡Suteja quia quiri! Quia cumaquiri noo pojori canapuete jatarinitiaja rishiyajaani. Quera cusionuyari. Janiyari Pueyasora quia miishano niquiquiaani. Majaari maninia na quiniu cua Pueyasora. ³ Quiaacuajaari maninia niishitijosaaquiaari Pueyaso rupaa. Taa quia niishitijosaaquiaaricuajani, cuno quia niishiriohua. Quioojia quia tacatorohua Pueyasocua, seetanujuanaa na rupaa tojija quia quiniuria. Quia jaara suteja quiniu paniyaquiri, janiyari canashiyajiji quiocua niniutianiya juhua nohuasejojuani, quia jiyanihacari maja naasucua juhuanojuaja cua tiuquiniu quiniutianiuhua. ⁴ Quia jiitiasano pueyajinjinio cuniqui Sardis tiacajiniani, secaya nojorijinjinioori sesa miiniu ruuretajaca saaja. Naa sesa miiniuria nojori na cojiyaquiniuucuatej, nojoriiri juhua curushojiyaquishano janiyara. Naaratej, janiyari nojori cushiyotetenutaniya cohuajaqueya toqueni, cuata nojori rucuanejonura, cua rupuenaas nojori quiniuucua. Cunoori seetanujuanaa sesa miiniu ruuretajaca nojori quiniuucua, cucua tiuuijaca nojori quishacari. ⁵ Canapuete naa sesa miiniu ruuretajacani cua tojitiajaca nojori quiniuucua, nojoriri naa cohuajaqueya toqueya cushiyotesocoriquianojuhuaj. Cunoori quiniutianiya tojetaarucuajanaa sesa miyashijiacara cua jiyatesacari nojori. Naajuhuaj, majaari cua tuujunu quiniutianiya nojori sesaca cua naajioneejiniji, tee cuniqui pueyaracaanu rishijiacarano cua saquiriojosano pueya sesaca naajiotasano quiyacuajani. Naajuhuaj, janiyari nojori jaatianutaniya cua Queecuani, na seya tacojirianio, cua sequenura nojoriiri cua timitiasano pueyanijoja. ⁶ Cunora, cante numaaracani, nojuaja cuaara tojiiria Pueyaso Sohuanu sequencesano Pueyaso pueya maapuera’”.

Filadelfia tiacajinia quinia Pueyaso pueya maanuucuara naajionee

⁷ Jiyaniijia Jesucristoori socua cua sequeree:

—Filadelfia tiacajinia quijia cua seruucuara quia naajiorejuhuaj, Pueyaso pueya maanu jiitianani. Naa quia sequere nojuaja: “Cua tojiri. Janiyacuajaari tojetaarucuajanaa maninia mijjiani, cua Que tojija cua quiniuucua. Puetunu cua sequencesanojuanaari seetanujuanaa. Jiyaniijiajanaa cua quiniuucua cua supuetana David niti, janiyari cua Que tiootiu riatajaja jiitianani, cua saquiriojosano pueya cua tiuquinitianura cua Queecua. Janiya jaara cuno tiootiu riatareni, tamonuuri maja na naata na tionuhua. Janiya jaara na tioren, majaari quenaaja tamonu na naata na riatanuhua. ⁸ Janiyari puetunu quia miishanojuanaa niishiyani. Naajuhuaj, janiyacuajaari juhua tiootiu riatarucuua quiocuajini, cua rupaa quia poojotanura. Naacuajitij, tamasacaari maja na naata tenujunu quiajaniya. Quiaacuajaari saaja secaya cumaacaraca. Naajaa, quiaari cua rootasano tojijiacuaja. Naajuhuaj, majaari cua soojeaca

pueya niquiara quia tamacanu quiqianu janiya.⁹ Naa maninia quia miiniuucua janiyaracuaatej, janiyari naa maninia miiniutianiya quiarajuhuaj. Janiyari noojiaqueya Satanás pueya maanujinjinio mojоque-tanijionutaniya quiocuarani. Cuno pojoriiri tama na cuaqueyajaaja sequeja, nojoriniaari seetanujuanaa Pueyaso pueya, Judiocuaca nojori quiniuucua. Naa nojori sequencesacaritij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuujia quia quiniuucua.¹⁰ Janiyari quia sequequiaarini maja quia tarinitianura quiria poonijionu, quiaa jaara naquiya miishaariquia. Quiaari seetanujuanaa naa miiquianu. Naaratej, Pueyaso saniniujiushacari puetunu mijiria quiniaajanaa puereeta naquiya na miniutia nojori, janiyacuajaari jiyacari nia cojuanutaniyani.¹¹ Quia niishiri: janiyari quera tiuquihuani. Majaari quia tarinitianu cua rupaa tojiniu, quiaa mariqui sapojosaareeri cucuaji quia rupatenura. Naacuajitij, quiaa jaara cuuaji catere, majaari Pueyaso niqutionu quiniutianiya quiarano na racatasano.¹² Cante sesa miiniu samiritiaja saajani, cua rupaa tojijia na quiniuucua, janiyari jiyocuacaanu Pueyaso Secojoua tiajinia na nujuutatenutiya juhua morijiuni Pueyaso quishaquijanaa, tii cua Que Pueyaso na shuquiritianura pueyaracaanu. Majaari socua cuniquiji na pootiosaanu quiniutianiya. Naajuhuaj, janiyari cuno pueyanocua naajiotanutaniya cua Que Pueyaso sesani, quiarinio cua sesajuhuaj, cua Que Pueyaso tiaca sesanio. Cuno tiacacuajaari quiarinio Jerusalén tiaca, jiyocuacaanuji roshinitiasaariquiano.¹³ Cante numaaracani, nojuaja cuaara tojiria Pueyaso Sohuanu sequencesano Pueyaso pueya maapuera".

Laodicea tiacajinia quiniaa Pueyaso pueya maanuuucuara naajionee

¹⁴ Jiyanjijia Jesucristoori socua naa cua sequeree:

—Laodicea tiacajinia quijia cua seruucuara quia naajiorejuhuaj, Pueyaso pueya maanu jiitilanani. Naa quia sequere nojuaja: "Cua tojiri. Naa sequeyari noo pueyano cana sequencesanote seetanu ru-paajanaacuajani. Puetunu na caminiujiushanojuanaa Pueyasojiniji quiarani, cunoori seetanujuanaa. Pueyasoori na shipinitiquiaari puetunu na shipinishano casaajanaa. Cunocuajaari janiya. Cunora, cua tojiri.¹⁵ Janiyari puetunu quia miishanojuanaa niishiyani. Quiaari najuhuana quijia, quia miyaquiniuucua cua sequencesano. Seetanujuanaa cua tojijaquiniu panijia quia quishacari, maara socua maninia quiquiaari cutara maja quia niishiniuria janiya.¹⁶ Quiaa jaara cua niishiyashijia quiriquia, janiya maara quiocua taraajereni. Saniniuujia, quiaa jaara seetanujuanaa cua tojijia quiriquia, janiya maara quia timitiareni. Saniniuujia, najuhuana cua pueyano quia quiniuucua, janiyari quia soyani. Naa quia quiniuucuatej, janiyari quera quia saniitoyani.¹⁷ Quiaari tama sequequiaajacuaja: 'Janiyari casamiriacani. Janiyari puetunu cua panishanojuanaa jiitiaani maninia mijia cua quiniuucua'. Maja cutaraari quia niishiniu quioojiaari cusosu. Janiyara, quiaari tojetaarucuajanaa casamijiu, cariyojuaru, juhuasunio. Quiaa jaara na niishiriquia, quiaa maara tama quia cuaqueyajaaja taraajetaja quiriquia.¹⁸ Cunora, janiyari quia numootevani moseeca pueyanonaa, cua rupaa tojijia quia quiri, seetanujuanaa casamiriaca quia quiniuria. Naajuhuaj, maninia mijia quia quiriquia cua cushitinuria quiabajia cohuaque toque, maja cararaatia quia quiniuria juhuasu. Naajuhuaj,

cua niishitiaja quia masere cutara, quioojia namijia riatenura, see-tanujuanaa maninia niquijia quia quiniuria. ¹⁹ Janiyari puetunu cua panishano pueyajanaa nacasujuani, nojori saniitiojuahuaj. Cunora, quioojia quia tacatore cucua. Tama quioojiaaja quia shiniuijuriuhuaj shamaatia cua tojijia quia quiniuria. ²⁰ Cua tojiri. Janiyari quioojia tiootiujiniji jiiquionuujiyani. Cante cua tojiyani, nojuaja cuaara na tiootiu riataara cucuaji. Janiyacua nocua tiuquiumiani, nata cua mi-aquenura, shuquiriaatia cua pocoojonura nata. ²¹ Janiyari cua Paraca shocotaquiaarini cua Que tojijia cua quiniucua. Naaratej, cua Queeri cua cajitiquiaari na shuriucua, Jiyaniijajanaa cajitiujinija. Naajuhuaj, janiyari Sesaaca shocotajaca cajitijionutaniya cua shuriucuaní, jiyaniijianucua nojori quiniuriajuhuaj. ²² Cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera' ”.

4

Juan niquishacari Jiyocuacaanu Quijiaari maniniuhuaqueetasaariquiaa

¹ Na nuhuaji, janiyari mauquiaarini. Janiyari saaja jiya cajiniocua tiootiu niquiquiaari riatasanoni. Shushajanaa cua tojishano rupaa juhua trompeta jonenenuni, cuno rupaajaari cua pacutequiaariuhua sequenu. Naa cua sequereeri:

—Miji quia tacama. Janiyari quia niquitiniutianiyani taa nio pa quishacari nuhuaji mijiria quiniaa miishaanutaniyani.

² Jiyacaritij, Pueyaso Sohuanuuri cucua niquiaari. Cua sohuanu tacaniquiaari jiyocuacaanuuri. Janiyari jiyacari Jiyaniijajanaa cajitiu niquiriini. Pueyanoori tii cajiriquiaa. ³ Nojuajaari shanohua niquishano quiriquiaa, jiyanolua shacantuua juhua jaspe saajia, jiyanolua naatuucajuhuaj, juhua cornalina saajia. Naashiiri na cajitiu caco njuariquiaa. Jiyanolua shacantuua quiriquiaari neeruuca, pocojunaque juhua esmeralda saajia. ⁴ Janiyari socua veinticuatro cajitiucua niquirii Jiyaniijajanaa cajitiu shocuani. Tii cajitiuriquiaari veinticuatro niishijiaca jiyaniijianucua. Cohuajaque toqueya cushiyonuuriquiaari, orojiniji shipinijiosano nacaqueyano. ⁵ Jiyaniijajanaa cajitiujiniji, mi-acanaari nunujuriquiaa. Jiyanolua majacuriquiaajaariuhuaj. Jiyaniijajanaa cajitiu tacoji, tii noshiquoriquiaari siete samari. Cunocuajaari siete Pueyaso Sohuanu, puetunu tiquiyocuajanaa quijia na quiniucua. ⁶ Jiyaniijajanaa cajitiu tacoji, juhua jiyanolua puereetuua camini-aari quiriquiaajuhuaj, juhua cohuaja motiiquio maatia niquishiyari na tamajiria.

Jiyaniijajanaa cajishaqui, cuatro saminio casaari quiriquiaajuhuaj, puetunu na shocuajanaa. Nojoriiri jiyanolua queraatia namijiaaraca quiriquiaa, na jiriquiaaccumaji, na nijiniaeaccumajinio. ⁷ Cuno cuatro saminiucua casaari tamaatia niquishano quiriquiaa tamonujiniji. Niquiriyatuuri juhua juurunu sare niquishano quiriquiaa. Tamonuuri juhua seru juunu caya niquishano quiriquiaa. Tamonuuri jiquiocoori juhua pueyano jiquioco niquishano quiriquiaa. Tamonuuri juhua surohua miooru jaano niquishaariquiaacujua. ⁸ Puetunu cuno cuatro saminio casaajanaari seis nesuhuaraca quiriquiaa. Puetunu nojori cuaqueyacumajanaa quiriquiaari na namijiaa, nocuaji na niq-uitiaja, na nijiniara na niquitajanio. Nojoriiri pueyaracaanu Pueyaso

maniniuhuaqueetariquiaa, juuca, niucuanio. Majaari nojori tarinitianu quiriquiaa naa na sequetunu:

—Jiyaniijajanaaa, quiaari saa maninaja, jiyanohua maninia, tojetaarucuajanaa maninia miiija! Quiaacuajaari Pueyaso, puetunu cumaacaracajanaa. Quiaari quijajuhuanajaj. Majaari quia supuenu quiquiaari. Quiaari quia pueyacua tacateriquianohua.

⁹ Cuno cuatro saminio casaari naa pueyaracaanu maniniuhuaqueetariquiaa Jiyaniijajanaa, na cajitiujinia cajiyano, pueyaracaanu Jiyaniijajanaa quiriquiano na quiniuucua. ¹⁰ Naa pueyaracaanu cuno cuatro saminio casaa timitiasacari Jiyaniijajanaacuaatej, cuno veinticuatro niishijiaca jiyaniijianucuaari jaarajaaja mojoquetacoqueequiaa Jiyaniijajanaacuara. Nojoriiri na tuhuajaa jartaqueequiaa Jiyaniijajanaa cajitui pajama, naa na sequenuta:

¹¹ —Nioori quiara, Jiyaniijiana. Quiaa cutaraari Jiyaniijajanaa, maja canaa. Quiaacuajaari canaa Pueyaso. Quiaa cuaara timitiasaaria pueyaracaanu, jiyanohua maninia shacantuca quiija quia quiniuucua, puetunu cumaacaracajanaa quia quiniuucuajuhuaj. Quiaacuajaari puetunu casaajanaa shipiniquiaari. Tama quia paniniuucuajaa, quiaria na shipiniquiaari.

5

Rupanacujusano naajionejinji pohuatasano, Borrego Niquiojuajinijo

¹ Na nuhuaji, janiyari Jiyaniijajanaa cajitiujinia cajinia juaashiquajinlia niquirii naajioneeni. Na miaquetajara na cacariquiaari. Cuno tucuanee naajioneeri jiuniocosano quiriquiaa. Naajioori nocua quiriquiaa, na nijinia, na jiniacumanio. Cuno naajionejinia, siete naajioori tii naajiotasano quiriquiaa. Cuno siete naajio coteejajiniani, juhua roshitia rupanacujutasanoori quiriquiaa. ² Jiyacaritij, janiyari jiyanohua cumaacaraca Pueyaso seru niquiriini. Naa nequesoreeriquiaari jiyanohua na nacanuta:

—¿Cante seetanujuanaa maninia miiija cutarani? Cuno cuaara rupartara rupanacutasono, na riatanura cuno naajionee.

³ Jiyacaritij, majaari quenaaja maninia miiija quiniu quiquiaari jiyocuacaanu, jiyajinlia, jiya cariquimianio na riatanura cuno jiuniocosano naajionee. Tojetaarucuajanaa shaaqui quiquiaariiri cuno naajionee serojoriquiano. ⁴ Naaratej, janiyari jiyanohua nujuqueriquiaani, tojetaarucuajanaa shaaqui maninia miiija quiyaquinuucua cuno naajio na riatanura, na serojonuranio. ⁵ Cua nujuquesacari, tamonu cuno veinticuatro niishijiaca jiyaniijianucuaajinjinoori cua sequeree:

—Maja nujuquenu. Quia cumantare. Quia niquiri. Pa Jiyaniijajanaacuajaari jiyanohua cumaacaraca. Tariucuacaanu Pueyaso Rupaa-jinlia, nojuacuajaari miriqui sequeshiya Juurunu sareta, Judá niquiohuacuajinlio supueriquiano, Jiyaniijajanaa na quiniuria na supuetana David niti. Nojuacuajaari pa paraca Satanás shocotana, tojetaarucuajanaa Jiyaniijia Pueyaso tojijia na quiniuucua. Naaratej, nojuaja na naata cuno siete naajio coteja rupanacujutasano rupareetanu na serojosocoriquiano.

⁶ Jiyacaritij, janiyari Borrego Niquiojua niquiriini Jiyaniijajanaa cajitui tacoji nujuano, cuno cuatro saminio casaa tajinianio. Cuno

veinticuatro niishijiaca jiyaniijianucuaari na shocua quiriquiaajuhuaj. Borrego Niquiojuaari seetanujuanaa juhua mosano samiitianohua niquishaariquia. Nojuajaari siete jiyaniija tuhuajaaraca quiriquia, puetunu cumaacaracajanaa na quiniuucua. Naajuhuaj, siete namijiaaraca quiriquiaari. Cuno na siete namijiaani, cunocuajaari Pueyaso Sohuanu, Pueyaso jiyaramiquishano puetunu mijiriajanaa.⁷ Cua niquishacari, Borrego Niquiojuaari Jiyaniijajanaa cajitiujinia cajiyano juaashiquajiniji jiuniocosano naajionee masetaree.⁸ Nojuaja jaara cuno naajionee cacariquiaa tari, cuno cuatro saminio casaari nocuara mojoquetacoquiaari, cuno veinticuatro niishijiaca jiyaniijianucuanio. Puetunu nojorijianaari taquiniojosano casaa jiitariquia. Naajuhuaj, orojiniji shipinijosano suhuococua mueetacoriquiaari, mishaja shanhua jaanutajata. Nojori mueetacosano shanhua jaanutajani, cunoori nio jiyajiniji Pueyaso muerasu secojonuusano Pueyaso.⁹ Nojoriiri Borrego Niquiojua jaaquequejotariquiaa nio quiarinio jaaquequejosano:

—Saaja quiajaniyari seetanujuanaa maninia miijia. Naaratej, quia naata cuno naajionee patanu quia rupareetanura na rupanacujusano. Quiaari jiyanoohua maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya masequiaari Pueyasora puetunu tamaatiucua pueyapuejinjiniojuanaa, puetunu tiacajinjiniojuanaajuhuaj, puetunu jiyacajinjiniojuanaario.¹⁰ Quiaari nojori jiyatequiaari tama quia pueyarajaaja, puetunu nojorijiana quiniuria jiyaniijianucua, pueyacuara secojonaa, pueyaracaanu nojori maniniuhuaqueetanura pa Pueyaso. Nojoriiri jiyacua jiyaniijianucua quiriquianojuhuaj.

¹¹ Na nuhuaji janiyari tojetaarucuajanaa jiyanoohua jiyanoohua queraatia Pueyaso seja niquiriini. Jiyaniijajanaa cajitiu shocua mariquiaari, cuno cuatro saminio casaa shocuajuhuaj, niishijiaca jiyaniijianucua shocuanio. Nojoriiri jiyanoohua queraatia quiquiaari, juhua jaaquia, serojiyaquishoo. Janiyari nojori tojirii pa Jiyaniija Jesu maniniuhuaqueetaanoni.¹² Nojoriiri naa na sequeturiquiaa na nacanuta:

—¡Pa Jiyaniijaari jiyanoohua maninia! Pueyacuara mosaaquiaariiri juhua borrego niquiojua. Naaratej, saaja nojuaja cuaara quiuria Jiyaniijajanaa pueyaracaanura. Saaja nojuaja cuaara jiitiaara puetunu casamijiana. Saaja nojuajaari tojetaarucuajanaa niishiji. Nojuajaari puetunu cumaacaracajanaa. Cuaara naa quiuria pueyaracaanutej. Puetunu quiijiaca casaajanaa cuaara tojitiaara pa Jiyaniija. Saaja nojuaja cuaara quiuria jiyanoohua timitiasano. Puetunu quiijiacajanaa cuaara na maniniuhuaqueetaara.

¹³ Naajuhuaj, janiyari puetunu Pueyaso shipinishano saminio casaajanaa tojiriini, jiyocuacaanu quiijiaca, jiyajinia quiijiaca, jiya cariquimia quiijiacajuhuaj, shoniniacu caminajinija quijiacanio. Puetunu nojorijianaari jiyanoohua na timiniutia sequeturiquiaa:

—¡Cuno, na shacantuua cumaacajinia cajiyani, Borrego Niquiojuanio, nojori cuaara maniniuhuaqueetasaaria pueyaracaanu! ¡Puetunu casaajanaa cuaara tojitiaara nojori pueyaracaanu! ¡Nojori cuaara timitiasariajuhuaj! ¡Saa nojorijia cuaara na cumaaca jiitiaara pueyaracaanura!

¹⁴ Jiyacaritij, cuno cuatro saminio casaari nojori riuhuaneriquiaa saniniujuja:

—¡Taaquiriirinij! ¡Cuaara naa quiiratej!

Cuno veinticuatro niishijiaca jiyanijianucuaari saniniujuja mojoque-tacoqueecujua cuno pueyaracaanu Quijiacaacuara, nojori na shuquiritanura.

6

Jiuniocosano naajioneecua seis rupanacujutasano rupareetasacari

¹ Na nuhuaji, cua shootiasacari, Borrego Niquiojuaari coteenujuanaa cuno naajioneejinia rupanacutasano rupartaree. Naa miiriiri cua niq-utishaanura taa mijiria quiniaa miishaanutaniya jiyanohua naquiyani, quera nio jiya puequesacari. Jiyacaritij, janiyari tamonu cuno cuatro saminio casaajinjinio tojirii sequeyanoni: “¡Miji!”. Na pocuanuuri juhua miacana majanu tojishano quiriquiaa. ² Naa na sequencesacaritij, janiyari cohuajohuana caballo niquirii nocua canujianon. Na nijnia cajini-aari balista cacariquiaa. Jiyacaritij, jiyanijiara shipinishano nacaque cushitishaareeri. Na nuhuaji, na caballoori na netetaaree jiycua na quianura, tii na miaquejonura Pueyaso paraa. Majaari quenaaja na nujuatasaanu quiniutianiya.

³ Na nuhuaji, Borrego Niquiojuaari segundo rupanacutasano rupartaree. Janiyari jiycari segundo saminio casaajinjinio tojirii sequeyanoni: “¡Miji!” ⁴ Naa na sequencesacaritij, naatuhuana caballoori nocua canujumaa. Na nijnia cajiniaari cumaaca niquitosaa. Naacuajitij, noju-jaari mijiria quijiaca tojetenutaniya tama nojori miaquetoojonurajaaja. Cunora, nojuajaari puereetunee nijiniaquetucuaja mueruu niquitosaa-ree.

⁵ Na nuhuaji, Borrego Niquiojuaari tercero rupanacutasano rupartaree. Janiyari jiycari tercero cuno saminio casaajinjinio tojirii sequeyanoni: “¡Miji!” Jiyacaritij, janiyari mueruhuana caballo niquirii nocua canujianon. Na nijnia cajiniaari niquia shanacujutaja jaasutetariquiaa, mijiria quiniaara miajajau shanacujusaanura nojori serotasaanura. ⁶ Jiyacaritij, janiyari cuno cuatro saminio casaa tajiniji rupaa tojirii naa sequeyanoni:

—Niquiriyatu juuca poonijionu sami, cuaara niquitosaaaria saaja niquiriyatu kilo trigo jajau. Jaara trigo jajau paniyaquiri, cuaara niquitosaaaria tres kilo cebada jajau. Saniniujuja, majaari shiyocua shanacujunu cutara, vinonio. Cunocuaaari queraatia quiniutianiya cutara.

⁷ Na nuhuaji, Borrego Niquiojuaari cuarto rupanacutasano rupartaree. Jiyacaritij, janiyari cuarto saminio casaa tojirii naa sequeyanoni: “¡Miji!” ⁸ Janiyari jiycari tiirihuana caballo niquirii nocua canujianon. Na nijnia cajinia sesaari quiriquiaa “Cusojuana”. Macunucua Quiquioori na neteyotariquiaa, Cusojuana puecoosano na rijionura na miitiasocoriquiano. Nojoriiri cumaaca niquitosaaree jiyanohua quer-aaatia pueya na cusojuanura. Naacuajitij, jiyanohua queraatia pueyari puecoosaanutaniya miaquetoojosacari. Tamasacaari cusionuunutaniya jiyanohua miajesacari. Tamasacaari paaqueja cusionu cusionuunutaniya. Naajuhuaj, tamasacaari sareya sootesaanutaniya. Sacocua sate-josaaanutaniya jayaarihuaj. Naacuajitij, jiyanohua jiyanohua queraatia pueyari cusojuasaanutaniya. Na nuhuaji, puetunu macunucuajanaa

jaara serojosaare, puetunu nojorijianaari na cajiniocua quiniutianiya puetunu mijiria quijiaca pueya cajiniocuajinijinojuanaa.

⁹ Na nuhuaji, Borrego Niquiojuaari quinto rupanacutasano rupartaree. Jiyacaritij, janiyari Pueyasocuara catijiasaqui juhuacutu cariquiaco niquirii Pueyaso pueya sohuanuhuani, noo pojori canapuete puecoosaaquiaaricuajani Pueyaso Rupaa tojijiaca nojori quiniuucua, Jesucristojiniji nojori pohuatanuucuajuhuaj.¹⁰ Jiyacaritij, nojoriiri naa jiyanoqua nacaree:

—¡Jiyaniijiana! ¡Quiaari saa maniniaja! Quiaari quia sequesano miiija seetanujuanaa. ¿Taa quia tarishiniutianiyaara canaa puecoona quia nequesoreenurani, nojori quia naminiuria canaacua saniniuujia?

¹¹ Jiyacaritij, puetunu nojorijianaari cohuajaque toqueya niquitiosasaaree. Nojoriiri naa sequesaaree:

—Socua rupaquijia nia samaaterejaara, Pueyaso saquiriojosano niarta Pueyaso pueyajinijinio cuaara puecoosaaria nia shiriaatijia, taa nia puecoosaaquiaaricuanaa.

¹² Na nuhuaji, Borrego Niquiojuaari sexto rupanacutasano rupartaree. Jiyacaritij, rijaari jiya jiuuquuiutiaree jiyanoqua. Janiyari na niquiriquiaani. Pananuuri mueruucara quiquii juhua mueruque toque. Racaari naatuucara quiquii juhua nanaca. ¹³ Riyari jiya cajiniocuaji toteree jiyocua, taa satuna totequiaa jiyanoqua paratucaricuanaa. ¹⁴ Jiya cajiniocuari shaajequeejuhuaj, juhua tucuanee naajioneeri jiunicosasaaree. Shoniniacu caminiajinia, puetunu jiya tucuaatiajajanaa, puetunu tuhuananuhuajuhuaj, puetunu cunojuanaari jiyajeetaquee na nujuatusaquiji. ¹⁵ Nojori puerenuta, mijiria jiyaniijianucuaari raa-cajinia jamaatiushii, sai tajinia tuhuananuhuajinajuhuaj. Naa jamaatiushijiaariuhua noo pojori: pueyacua paaretajaca na cumaacatej, soldadouha jiyaniijianucua, jiyanoqua casamiriaca pueya, pueya tojis-hano pueya, poonitijiosano pueyajuhuaj, puetunu narta pueyajanaanio. Puetunu pueyajanaari naa mashiriquiaa juucua. ¹⁶ Nojoriiri tuhuanuhuasequeriquiaa, sainio:

—¡Canaacua nia tiyare canaa nia jamonura cunoocuaji, na cajitiujinia caijiya na shacantuca cumaacajiniani! ¡Canaa nia jamojore maja na niquiriara canaa quiniuria, naajuhuaj, maja Borrego Niquiojua sani-tionura canaa, jiyanoqua na juaashacari! ¹⁷ Quiarijiacuajaari Pueyaso saniitionu juuca. Jiyanoqua puereeta. ¿Cante na naata na nujuutanuni? Shaaqui.

7

Pueyaso saquiriojosano pueyajiniji pohuatasano, Israel niquiohuacua-jinio supueno pueyajinijinio

¹ Naa cua niquinii nuhuajitij, janiyari socua cuatro Pueyaso seya niquirii nio jiya shocua nujuatiuyano tuhuaquini, pananu muetasamaji, na tiuquishocora, na muetasamaji na muenecara, na miaquetajaranio. Nojoriiri na nujuatusaquiji paratu tenujuriquiaa maja na piyarjonura jiya, shoniniacu caminia, nacuhuanio. ² Jiyacarijuhuaj, janiyari socua tamonu Pueyaso seru niquirii jiya pajamaji niyanoni. Pueyaso naa-jio jiriataja casaa cacariquiaari. Nojuaajaari narta cuatro Pueyaso seyacua nacaree jiyanoqua, noo pojoricuca canapuete cumaacaraca

quiriquiaacuajani nojori sesonura jiya, shoniniacu caminianio. Naa nojori sequereeri:

³—¡Cuaara! ¡Maja juhuanojuaja jiya nia sesonu, shoniniacu caminia, nacuhuanio, canaa niojiyaquishacarijia Pueyaso sesa, na pueya jiniji, na niishishaanura nojoriiri Pueyaso pueya!

⁴Janiyarijiyacari tojiriini taa pueyate na jiniji jirioosaareeni. Puetunu supuetana Israel doce niquiohuacuajinio supueno pueyapuejinijinio ciento cuarenta y cuatro mil pueya jirioosaaree. ⁵Naacuajitij, supuetana Judá niquiohuacuajinio supueno pueyajinijinioni, doce mil pueyari jirioosaaree. Supuetana Rubén niquiohuacuajinio supueno pueyajinijinio, doce miljuhuaj. Supuetana Gad niquiohuacuajinio supueno pueyajinijinio, doce miljuhuaj. ⁶Supuetana Aser niquiohuacuajinio supueno pueyajinijinio, doce miljuhuaj. Supuetana Neftalí niquiohuacuajinio supueno pueyajinijinio, doce miljuhuaj. Supuetana Manasés niquiohuacuajinio supueno pueyajinijinio, doce miljuhuaj. ⁷Supuetana Simeón niquiohuacuajinio supueno pueyajinijinio, doce miljuhuaj. Supuetana Leví niquiohuacuajinio supueno pueyajinijinio, doce miljuhuaj. Supuetana Isacar niquiohuacuajinio supueno pueyajinijinio, doce miljuhuaj. ⁸Supuetana Zabulón niquiohuacuajinio supueno pueyajinijinio, doce miljuhuaj. Supuetana José niquiohuacuajinio supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiniji jirioosaaree.

Cohuajaque toqueya cushitishano pueya maanu

⁹Naa cua niquitishaanu nuhuajitij, janiyari jiyanohua queraatia pueya niquirii maanoni juhua tereya. Nojoriiri puetunu nio tiquiyocua jiyacajinijiniojuanaa pueya quiriquiaa, puetunu tamaatiuucua pueyapuejinijiniojuanaanio. Quiriquiaajaariuhua puetunu tamaatia rupaaca pocuajacajinijiniojuanaa, puetunu tiquiyocua tiacajinijiniojuanaanio. Naa tojetaarucuajanaa jiyanohua queraatia nojori quiniuucuatej, majaari na naata serojosaanu quiriquiaa. Nojoriiri Pueyaso shacantuca cajitiu tacoji nujuaturiquiaa, Borrego Niquiojua tacojinio. Puetunu nojorijianaari tucuaqueya cohuaque toqueyaraca quiriquiaa. Shuquiri- atia nojori quiniuucua, nojoriiri juhua teruhuanajaquera niuishano mueetacoriquiaa. ¹⁰Puetunu nojorijianaari naa mariyata sequeriquiaa na nacanuta:

—¡Jiyanohua maniniaari pa Que Pueyaso, na shacantuca cajitiujinio cajiyani, Borrego Niquiojuahuaj. Nojoricuajaari pa jiyanooquaiaari, tojetaarucuajanaa quiariniora jatanishano pa quiniuria!

¹¹Naajuhuaj, puetunu Pueyaso seyajanaa, canapuete shacantuca cajitiu shocua nujuaturiquiaacuajani, niishijiaca jiyanijianucua shocuajuhuaj, cuno cuatro saminio casaa shocuanio, nojoriiri Pueyasocuara jacamaturee nojori timitianura nojuaaja. ¹²Pueyaso na timitiatusacari, naa sequereeri:

—¡Taaquiriirinij, seetanujuanaacuaj! ¡Canaari pueyaracaanu quia maniniuhuaqueetanutaniyani! ¡Quiaacuajaari canaa timitiwasano! ¡Saaja quiajaniyari seetanujuanaa niishijiaca cutara! ¡Paacarasho, canaa Pueyasonaa! ¡Quiaa cuaara tojishaaria pueyaracaanu! ¡Quiaari canaa Jiyanijiajanaa pueyaracaanura! ¡Quiaari puetunu

cumaacaracajanaa maninia quia jiitianura quia shipinishano!
jCuaara naa quiuria pueyaracaanu, pueyaracaanutej!

¹³ Jiyacaritij, tamonu cuno veinticuatro niishijiaca jiyaniijianucuajinijinoori cua nequesotaree:

—¿Canapuete cuno pojorini, cohuajaque toqueyaracani? ¿Tejenote nojorini?

¹⁴ Janiyari na riucuaree saajani:

—Quiaa cutara na niishiya, jiyaniijiana.

Cua sequereeri:

—Nojoricuajaari jiyajinjinio pueya. Jiyajinia nojori quishacarijia, nojoriiri cuno jiyanolhua naquiya miishacari rejeretajaca quiquiaari. Nojori tiuuniucua Borrego Niquiojuaacua, nojoriiri puetunu sesa nojori miishanojiniji juhua nojori toqueya jeequejoquiaari Borrego Niquiojua nanacajinia. Naacuajitij, nojoriiri cohuajaqueya toqueya cushiyonuya. ¹⁵ Naa Pueyaso jiyanooshano pueya nojori quiniuucuatej, nojoriiri Pueyaso cajishaqui taccoji quiija. Nojoriiri pueyaracaanu tii Pueyaso Secojojua tiajinia miiquiaa Pueyaso panishano, juuca, niucuanio, nojori timitiasacari nojuaja. Na shacantuca cumaacajinia cajijiani, nojuajaari na cumaaca teetenutaniya nojori caco, jatiqui na quiniuria nojoritia pueyaracaanu. ¹⁶ Naacuajitij, makaari socua nojori miaajenu quiniutianiya, jiyamuenunio. Pananuuri maja socua nojori na catijianu quiniutianiya. Naajuhuaj, makaari socua nasaatia pananu jartanu nojori niishiniu quiniutianiya. ¹⁷ Borrego Niquiojuacuajani, Jiyaniijajanaa cajitiu jiuujiajinia cajijiani, nojuajanaari nojori jiitiantaniya juhua tama na borregohuajaaja. Nojuajaari nojori rucuanejotanutaniya, nojori na raatenura pueya samiitianijia mohuaca pacartajiniji, pueyaracaanu shuquiriaatia quiija nojori quiniuria. Pueyasojuanaacuajaari nojori namijiaaca tujuunutaniya nojori namijiajini.

8

Séptimo rupanacutasanojiniji pohuatasano, shanohua jaanutaja patajajinjinio

¹ Borrego Niquiojua jaara séptimo rupanacutasano rupartaree, cuno naajionee saacatanura puetunujuanaa, tojetaarucuajanaa sanaacara quiquiiri jiyocuacaanu pueyaracaanura. Maja cua niishiniu, media horaruhua. ² Na nuhuaji, Pueyaso taccoji, janiyari siete Pueyaso seja niquirii nujuatiuyanonii. Nojoriiri jiyacari siete trompeta niquitiososaaree. ³ Na nuhuaji, socua tamonu Pueyaso seruuri shanohua jaanutaja pataja pamaa, orojiniji shipinishano. Orojiniji shipinishano Pueyasooqua catijiaja casaa taccoji nujuaseeri, Jiyaniijajanaa cajitiu taccoji. Queraatia shanohua jaanutaja niquitiosaareeri Pueyasooqua na catijianura. Jaanutajaari catijiasaariquiano puetunu Pueyaso pueya secojonuusananotajanaa, Pueyasooqua na jaanujunura cuno catijiaja casaajiniji. ⁴ Naacuajitij, Pueyaso seruuri Pueyaso pueya secojosano tacanirii Pueyasooqua, shanohua jaanujua najacata. ⁵ Na nuhuaji, cuno Pueyaso seruuri catijiaja casaajiniji na shanohua jaanutaja pataja mishinirii nishiyata. Jiyanolhua na majiriataree nio jiyacuari. Miacanaari ritia nunujuquee. Jiyanolhua majacureeri. Jiyanolhua cojutunereeri. Rijiaari jiuquiuijutiareejuhuaj.

Trompetaa jonenejosacari

⁶ Cuno siete Pueyaso seja, trompetaa cacariquiaani, nojoriiri jeeecanecoree na trompetaa na jonenenura. ⁷ Jiyacaritij, niquiriyatu cuno Pueyaso serujinijinoori na trompeta jonenenu coteeree. Jiyacaritij, miacanajaa shiniitiujiaacaari, mariyata mani cojitishano nanacata jiyocua jartasaaree. Jiyari quera na cajiniocua cateree, puetunu na nacuhuatajanaa, na jiyasocuatatio.

⁸ Segundo Pueyaso seruuri na trompeta joneneree. Jiyacaritij, casaa juhua puereetuua tuhuananu noshiyanoori shoniniacu caminiajinia jatasaree. Quera shoniniacu caminia cajiniocuaari nanacara quiquirii.

⁹ Puetunu shoniniacu caminiajinia quiqiaca casaajanaari, quera na cajiniocua cusionuuree. Naajuhuaj, shoniniacu caminiajinia ruhuantesano puereetuua buqueyajinijinoori, quera puetunu na cajiniocua janaa sesosaaree.

¹⁰ Tercero Pueyaso seruuri na trompeta joneneree. Jiyacaritij, puereetuua rijaari jiyocuacaanuji tiquii, jiyanoqua nishitiuucua juhua shucuenaja jaamasu noshitishano. Tiyareeri quera na cajiniocua nio jiyacua moocuajinia, mijiria cuariyajinajuhuaj. ¹¹ Cuno rija sesaari quiriquiaa “Piquia”. Cunora, tee cuno rija tiyareeni, puetunu cuno mohuacajanaari piiquiara quiquirii. Pueya ratusacari cuno mohuaca, queraatia pueyari saaja cusionuuree.

¹² Cuarto Pueyaso seruuri na trompeta joneneree. Jiyacaritij, casaari pananuucua pitiaree, racaacua, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiquirii. Quera na cajiniocuaari ninishiqui quiriquiaa. Cunora, pananuuri maja na cuhuatanu quiriquiaa quera juuca cajiniocua. Naajuhuaj, riya, racanio, majaari na cuhuatanu quiriquiaa quera niucua cajiniocuajuhuaj.

¹³ Na nuhuaji, janiyari juhua puereetuua surohua miooru niquirii jiya cajiniocuani. Na jaasacari naa nacariquiaa jiyanoquari:

—¡Puereeta, puereeta, puereeta! Seetanujuanaa jiyanoqua puereeta quiniutianiyari jiyacua quiqiaca pueyara, jiuujianaraca cureecono Pueyaso seja jaara jonenere, canapuete joneneyaquiyajaa juhuanojajacuajani.

9

Quinto trompeta jonenesacari

¹ Na nuhuaji, quinto Pueyaso seruuri na trompeta joneneree. Jiyacaritij, janiyari jiyocuacaanuji jiyocua tinio rija niquiriini. Cuno rijaari tiootiu riatajata niquitiosaaree, puequeetuuju raa na riatanura.

² Na riatasacari, najacaari nojomaa juhua puereetuua cuhuariquia sesacari. Pananu namijia tiomaari. Jiya cajiniocuaari mueruucara quiquirijiuhuaj. ³ Sequeruuri cuno najacajiniji mueratumaa. Puetunu nio jiyacuajanaa paaquemaari. Sequeruuri cumaaca niquitiosaaree noojuaraca na quiniuria juhua turucuaniiniu. ⁴ Sequeruuri rootasaaree maja nojori miaquenura jiyasocua, nacuhua jaamasujuhuaj, puetunu moritiajaca jaamasunio. Sequeru cutaraari jiyaramiquishaare puetunu pueyapuejanaa na sojonura, canapuete na jiniji jirioyaquishoo quiriquiaa Pueyaso sesatacujani. ⁵ Sequeruuri rootasaareejuhuaj, maja nojori cusojuanura pueya. Cinco raca cuaara nojori shocojoora

cutara, pueyaracaanu sequeru saashi noosacari. Cuno sequeru saashiiri juhua turucuaniiniu saashi noonutaniya.

⁶ Naa pueya miishacari naquiya na noonutatej, pueyari cusionu paniniutianiya juucua. Saaja cusoyaquiniutianiyyari. Jiyanoqua na shaajenu parishacari juucua, nojoriiri saaja rishiniutianiya, jiyanoqua naquiya nojori miishacari.

⁷ Sequeruuri puereeta niquishano quiriquiaa juhua miaquetoojonura jeenucuasano caballohua. Sequeruuri casaa jiitariquiaa na nacajinia juhua jiyaniijianucuara orojiniji shipinijiosano nacaqueya. Nojori jiquiocoori juhua pueyano jiquioco niquishano quiriquiaa. ⁸ Nojoriiri juhua maaji muecacaraca quiriquiaa, tucuamuejarujuri. Juhua juurunu sare quiacaraca quiriquiaajaariuhuaj. ⁹ Nojori jiriquiaqueeri cumueeca quiriquiaa juhua turtuco. Nojori jaacuatusacari, na nesuhuari jiyanoqua cojuatuneriquiaa juhua caballohua jayotasacari queraatia rucuanejotaruuhua, miaquetoojonuuucsua na netecuatusacari. ¹⁰ Cuno sequeruuri juhua turucuaniiniu noojuacaraca quiriquiaa. Jiyanoqua noonacuracajuuhuaj. Jaara nojori saare, cunoori quiquiaari nojori na noonura cinco raca. ¹¹ Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuuju raa camarujaariuhuaj. Hebreo rupaajinias, na sesaari “Abadón”. Griego rupaajinias saniniuujia “Apolión”. Pueyano rupaajinias saniniuujia, nioori sequeya “Pueya Puecoona”.

¹² Janiyari naa niquitishaareeni taa coteenujuanaa naquiya miishaanu quiniutianiyan, cuno jiuujianaraca naquiya mishocoriquianojiniji. Socua caapiquiiri cureyajaa na nuhuajiria.

Sexto trompeta jonenescacari

¹³ Sexto Pueyaso seruuri na trompeta joneneree. Janiyari jiyacari rupaajirii pocuaanon, shanoqua jaanutaja catijiaja juhuacutu cuatro tuhuajaa tajiniji, Pueyaso tacoji nujuatajani, orojiniji shipinishanoni. ¹⁴ Cua tojishano rupaani, noo sexto Pueyaso seru sequereeri, na trompeta cacariquiaani:

—Cuno cuatro Sesaaca seja quia saacarojore, puereetuca Eufrates moo shuriucua morojosano quiyani.

¹⁵ Jiyacaritij, cuno cuatro Sesaaca seyari samaacarojosaaree jiyanoqua queraatia pueya nojori puecoonura, quera na cajiniocua puetunu mijiria quiqiaca pueyajinijiniojuanaa. Cuno Sesaaca seyari tariucuacaanu naa morojosano quiquiaari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijira. ¹⁶ Janiyari tojiriini cuno cuatro Sesaaca seja soldadohuari, doscientos millones pueya quiriquiaa saa caballohuaracaja.

¹⁷ Janiyari cuno caballohua niquitishaaree juhua cua maquenujiniani, na nijinias cajitiuniaanio. Jiyanoqua tamaatia niquishano quiriquiaari. Puetunu nojori jiriquiajanaari tutucojiniji shipinijiosano casaata mishiquojosano quiriquiaa. Cuno, nojori naatiyaquishaanuucuaji nojori cushiyosano tutuconi, cunoori puereeta niquishano quiriquiaa; naatuuca juhua mani, nentuuca juhua jacinto saajia, pocojuanaque juhua azufrejuhuaj. Puetunu cuno caballohua nacacajanaari juhua juurunu sare nacaca niquishaariquiaa. Maniiri nojori rupaamaji rimianacuriquiaa. Najacaari nojonuucuariquiaajuhuaj, azufrenio. ¹⁸ Cuno

jiuujianaraca puereeta casaata quera na cajiniocua puetunu pueya-jinijiniojuanaari cusojuasaaree.¹⁹ Naacujitij, caballohuari cumaaca jitiariquiaa na rupaama, na pituijinajuhuaj, nojori puecoonura pueya. Na pitiucaaari juhua sacocua niquishano quiriquiaa. Juhua sacocua nacacaraca quiriquiaajaariuhuaj pueya na sajitiajara.

²⁰ Cureeno pueya, canapuete maja na puecoosaanu quirii cuno jiuu-jianaraca puereeta casaatani, nojoriiri sesa miiniu tarinitiaquiriquiaa saaja. Nojoriiri samaruhua secojonu tarinitiaquiriquiaa. Naajuhuaj, nojoriiri orojiniji shipinijiosano casaa shuquiritariquiaa Pueyaso niti, platajiniji shipinishano, bronzejiniji, saajajinijijuuhuaj, macajinijinio. Puetunu cunojuanaa, nojori jiyatesano tama na pueyasohuarajaajani, cunoori maja na niquiniu. Majaari na tojiniu. Majaari na rucuanenujuhuaj.²¹ Naajuhuaj, majaari pueya tarinitianu quiriquiaa narta pueya monu, shimiojonujuhuaj. Naajuhuaj, majaari nojori tarinitianu quiriquiaa na camishoo maajipohua numuetucujunu, maajishuriu numuetucujunujuhuaj. Nohuasejonu tarinitiatuuyaquiriquiaajaariuhuaj.

10

*Pueyaso seru mueetasano tucuanee naajioneenijojuajiniji
pohuatasano*

¹ Na nuhuaji, janiyari socua tamonu jiyanohua cumaacaraca Pueyaso seru niquirii jiyocuacaanuji roseyanoni. Cohuaja najacajinia cuhua-jaatiariquiaari. Na nacaacua camarucuteriquiaa naashiiri. Na jiquicoori jiyanohua shacantuua quiriquiaa juhua pananu. Na cashacucuaari juhua mani niquishano quiriquiaa, naatej, taa mani nujuua na noshishacaritij.² Na miaquetajara muetariquiaa shiitianiyojua naajioneeri, tariucua riatasano. Nio jiyacua nujuaseeri. Na miaquetajara na niohuaca niaree shoniniacu caminiaaculaari. Tacujua niaree nio jiyacua saniniurijia.³ Nocua na nujuasacari, jiyanohua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu.⁴ Cuno siete miacana pocuanu nuhuaji, janiyari na sequesano naajiotanu paniriquiaa tari juucuani. Jiyacaritij, janiyari tamonu rupaa tojirii jiyocuacaanuji naa cua sequeyano saajani:

—¡Maja pueya niishitiniu cuno siete miacana sequesano! ¡Maja na naajiotanu! Tama quioojiajinajaja quia racatare.

⁵ Jiyacaritij, Pueyaso seru cua niquishano shoniniacu caminiaacula nujuanoni, nio jiyacuajuhuaj, nojuajaari na miaquetajara na juaashiquia shiitioree jiyocuacaanu, seetanujuanaa na sequenura.⁶ Naa sequereeri:

—Cuno, pueyaracaanu Quijiani, nojuajaari jiya cajiniocua shipininia, jiya shipininia, shoniniacu caminia shipininiajuhuaj, puetunu tii quiijaca casaajanaa shipininianio. Nojuajaari seetanujuanaa naa cua pohuataniya: “Majaari tari na tarishiniu quiniutianiya.⁷ Séptimo Pueyaso seru coteesacari jonenenu na trompeta, cuno juucaja, puetunu jiyasohuaja Pueyaso miiniu panishanojuanaari tari tohuatesano quiniutianiya. Naa quiniutianiyyari taa na pohuataquiaari na sequenu panishano caminiuijuniaa pueyacuajani”.

⁸ Cua tojishano rupaa jiyocuacaanuji pocuaanoni, socua cua pacutero-hua naa sequenuuri:

—Pueyaso seruucua quia quiaare, cuno, shoniniacu caminiaacua nujuana, jiyacuanio. Nojuaja quia masetasee cuno riatasano naajoneenijoja, na mueetaani.

⁹ Janiyari Pueyaso seruucua quiaareeni. Janiyari na sequeseeni na naajoneenijoja na niquitionura janiya. Cua riucuareeri:

—Jajaa, quia patare. Quia miaquerenoj. Shoqueeca quiniutaniya quia rupaamaari juhua samiyatu. Quia seecojinia jatanutaniya piiquiara saniniuururia. Cunoori, pueya na saniitiotaja rupaa na quiniucua.

¹⁰ Janiyari jiyacari cuno naajoneenijoja pataree Pueyaso seru juaashiquajiniji. Janiyari na miaquereeni. Seetanujuanaa shoqueeca quiriquiaari juhua samiyatu. Cua miasacari, cua seecojinia jatasee piiquiaraari. ¹¹ Jiyacaritij, janiyari naa sequesaareeni:

—Quiocua Pueyaso sequesano caminiujiuriohua pohuatanu queraatia pueyapue niquiara, queraatia tamaatia jiyacajinia quiniaa niquiara, queraatia tamaatia rupaaca pocuajaca niquierajuhuaj, queraatia jiyaniijianucua niquiaranio.

11

Caapiqui Pueyaso sequesano caminiujiuniaa miishanojiniji pohuatasano

¹ Na nuhuaji, janiyari tia shanacujutaja naajua niquitosareeni, juhua nataca niquishano. Janiyari naa sequesaareeni:

—Quiarijia cutara quia quiaare Jerusalén tiacajinia. Tii nujuataja Pueyaso Secojojua tia quia shanacujusee quia shanacujutajata, orojiniji shipinishano shanohua jaanutaja catijajano. Quia serojorejuhuaj puetunu Pueyaso secojonuujuacajanaa tii. ² Maja cutaraari quia shanacujunu Secojojua tia carijiniacuma. Cunocuajaari tau-cuaca niquitosaarucuua tari. Pueyaso soojeaca taucuacaari Pueyaso saquiriojosano na tiacarano jiitianutaniya pueyaracaanu, cuarenta y dos raca cuaara na shocojorejaatija. ³ Janiyari caapiqui cua saquiriojosano pueya jiyaronutaniyani, janiyajiniji nojori pohuatanura pueya niquiara. Nojoriiri janiyajiniji pohuatanutaniya cuaara shocojorejaatija mil dosciento sesenta juuca. Nojoriiri cocuaque toqueya cushiniutaniya taa pueya cushiyoquiaacuajani nojori taraajesacari.

⁴ Cuno caapiqui janiyajiniji pohuatanaani, nojoriiri cuno caapiqui olivo naana, tariucuacaanu Pueyaso Rupaajinia pohuatashiyacuajani. Naajuhuaj, nojoriiri cuno caapiqui samari nujuatacojua, Jiyaniijajanaa tacoji nujuatacojuani. Cuno, nojori Jiyaniijiani, nojuajaari jiya Jiyaniijajuhuaj. ⁵ Tamoru jaara sesa miiniu paniri cuno caapiqui pueya, nojoriiri na paraa catijianutaniya nojori rupaamaji mueranacujua manitia, nojori na puecoonura. Nojoriiri saaja naa cusojuanutaniya noo pojori, canapuete nojori miiniu paniya sesa juucuacuajani. ⁶ Nojori, janiyajiniji pohuatanaani, nojoriiri cumaaca jiitianutaniya maja na nitiniuria maru pueyaracaanu mijiria nojori pohuatasacari Pueyaso rupaa. Naajuhuaj, nojoriiri cumaaca jiitianutaniya mohuaca na jataninuria nanacara. Nojoriiri cumaaca jiitianutaniyajuhuaj nojori sesonura jiya puetunu puereeta tamaatia casaatajanaa. Nojoriiri pueyaracaanu naa miijonutaniya nojori panishacari. ⁷ Nojori jaara janiyajiniji pohuatanu tucuatare, jiyacaritij, puequeetuuu raamaji tohuataruiquano

pueresano sacuaraatia Casaani, cunoori nojori paracaaniutianiya. Nojori shocotanutaniyari. Naacujitij, nojori puecoonutaniya socuaari. ⁸ Nojori queteeri cuno puereetuua niishishano tiaca nuucuajinia pojocunutaniya, tee nojori Jiyaniijia mosaquaari niyacutesanojinia teetesanocuajani. Cuno tiacaari miriqui jiyaniquishiya Sodomata, Egip-totanio. ⁹ Naacujitij, jiuujianaraca juuca, socua niquiriyatu juuca cajiniocuanio, queraatia tamaatiuucua pueyari nojori quete shootianutaniya. Naa nojori queteya shootianutaniyari queraatia tiquiyocua tia-cajinjinio pueya, tamaatiuucua rupaaca pocuajaca pueyajuhuaj, queratia tamonu jiyacajinjinio pueyanio. Nojori paraari maja na shana-cunu quiniutianiya nojori jamojosaanura. ¹⁰ Puetunu mijiria quini-aajanaari shuquiritiuniutianiya, macunucua cuno caapiqui Pueyaso sequesano caminiujiuniaa quishacari. Pueyari jiyanolhua timiquionutaniya, naquiya nojori miitajaca puecoosaanuucua. Naaratej, mijiria quijiacaari tama na casamijinijijaaja nareja niquitiojootonutaniya nojori shuquiriniutia.

¹¹ Naajaa, jiuujianaraca juuca, socua tamonu juuca cajiniocua nuhuaji, Pueyasoori nojori samiitianijorohua. ¡Nojoriiri na matusaquijsaneecuatu-rohua! Puetunu nojori niquiniaajanaari jiyanolhua shiriiquitiurii. ¹² Jiyacaritij, cuno caapiqui Jesucristojiniji pohuatanaari puereetuua rupaa tojitiurii jiyocuacaanuji pocuaano. Naa nojori sequeriquiaari:

—¡Miji nia tacatama!

¡Jiyacaritij, nojoriiri na paraa niquiara tacataquee cohujajinia jiyocua-caanura! ¹³ Na paraa shootiasacari nojori, jiyacaritij, rijaari jiyanolhua jiuuquiutiajaree. Naa rijia jiuuquiutiasacaritij, Jerusalén tiacajinia queraatia tiacaari niyarequetaquee. Siete mil pueyari tii cusionuuree. Cureeno pueyari jiyanolhua jiuujiateree Pueyasocuaji. Nojoriiri jiy-acari niishirii Jiyocuacaanu Quijiaari seetanujuanaa Pueyaso cutara.

¹⁴ Janiyari naa segundo naquiya miiniu niquitishaareejaaniuhuaj, taa na nuhuaji na miishaanutaniyacuajani. Tercero naquiya miishacariiri quera ritia cuno nuhuajija quiniutianiya.

Séptimo trompeta jonenescacari

¹⁵ Séptimo Pueyaso seruuri na trompeta joneneree. Jiyacaritij, puere-tuuca rupaacaari jiyocuacaanu tojishaaree. Naa sequeturiquiaari:

—¡Quiarijiani, pa Jiyaniijia Pueyasoori tari jiitianutaniya puetunu jiyacua jiyaniijianucua jiitiasanojuanaa! ¡Nojuajaari pa Jiyaniijia Cristota Jiyaniijianucuajanaa quiniutianiya! ¡Nojoricuajaari pueyaracaanu Jiyaniijiajanaa quiriquiano!

¹⁶ Jiyacaritij, cuno veinticuatro niishijiaca jiyaniijianucua, shanohua cajitiuinia cajitiuriquiaa Pueyaso tacojini, nojoriiri Pueyasocuara ja-camaturee jiyanolhua na shuquiritanuta nojuaja. ¹⁷ Naa sequeturee Pueyasoori:

—¡Paacarasho canaa Jiyaniijianaa! ¡Quiaari puetunu cumaacaraca-janaa! ¡Quiaari quijiajuhanajaj! ¡Quiaari pueyaracaanu quijia! ¡Quiaari tari juhuacatecara quia cumaaca poonijoteree, Jiyani-ijianaa quia quiniuria pueyaracaanu! ¹⁸ Cunora, puetunu jiyacua jiyaniijianucuajanaari juaaquioya. Naajaa, quiarijiaari

quia juaashacari cutara. Quiarijiaari macunucua quia nequesoreenu juucajuhuaj. Saniniuujia, quiaari pueyara quia sequesano caminiujiuniaa pueya niquitiojonutaniya nojoririano quia riuriotaca, puetunu quia saquiriojosano pueyajanaajuhuaj, puetunu quia timitajaca pueyajanaanio, jiyaniijianucua, narejaca pueyanio. Naajuhuaj, quiaari jiya sesojuaca pueya shaajanutaniya.

¹⁹ Jiyacarijiuhuaj, jiyocuacaanu Pueyaso Secojojua tiaari riatasaree. Janiyari Pueyaso Quishaquijiana na niquiriini. Tii matariquiaari Pueyaso caaja, seetanujuanaa na Rupaajanaa na racataja. Cuno na Rupaari na pueya na jiyanoootaja, na tojiyashijiaca na saniitiotajahuaj. Jiyacaritij, miacanaari nunujuree. ¡Jiyanoohua majacureeri! ¡Puereetatej, jiyanoohua cojuata! ¡Rijiaari jiyacari jiuuquitiaree! ¡Jiyanoohua queraatia miacanaaja shiniitiujiacaari juhua maru totereejuhuaj! ¡Jiyanoohua puereetaari quiriquia!

12

Miri qui po huat asano maajjiniji, puereetu uca Naa queruji ni jihuaj, juhua cohuaniquia niquishano

¹ Na nuhuaji, pueya jiuujiatenura, casaari jiya cajiniocua niquishaa-re. Maajiiri quiriquiaa cuno, cua niquishanon. Juhua toqueta pananujinia cuhuajaatiariquiaari. Racaacua nujuariquiaari. Doce ri-yari na nacaque quiriquiaa. ² Cuno maajiiri manajaraca quiriquiaa. Nooriquiaari. Cunora na sariyojotariquiaari quera na ranu panishacari. ³ Jiyacaritij, janiyari socua tamonu casaa niquitishaaree jiya cajiniocuani. ¡Puereetu uca Naa queruuri quiriquiaa, naatuhuana! Juhua cohuaniquia niquishano quiriquiaari. Siete nacacaracaari quiriquiaa, diez tuhuajaaracanio. Jiyaniijianucuara shipinijiosano nacaqueya niq-uitiacoriquiaari na siete nacacaacua. ⁴ Cuno naatuhuana Naa queruuri quera na cajiniocua riyajinijnio nocuara rerecoree jiyocuacaanuji na pititua. Nio jiyocua na jacutareeri. Naa queruuri rariquiano maaji tacoji shanacuriquiaa. ¡Na sashiriquiaari cuaara raara, mueya na mian-nura jaara rasaare! ⁵ Maajiiri cayaniyojua raree. Nojuajaari puetunu mijiria quijiaca pueyapuejanaa Jiyaniijiajanaa quiriquiano. Nojuajaari pueyaracaanu na maca mueturiquiano, na tojiyashijiaca na piyotajara. Mueyari na nucua jaariutiasaree Naa queruucuaji. Pueyasoori na shuriucuara na ririi, tii na cajitiniuria, Jiyaniijia quiriquianoni. ⁶ Maajiiri saniniuujia cariquia jiyajinia mashirii, tee Pueyaso jeenu-cuaquiaari tari nocuaji na quijiaracuajani, tii na mianuutesaanura-juhuaj, cuaara shocojorejaatijia mil doscientos sesenta juuca.

⁷ Na nuhuaji, janiyari Pueyaso seja jiyaniijia Miguel niquirii narta Pueyaso seyatani, cuno naatuhuana Naa querujuhuaj puetunu na sey-atajanaa. Puetunu nojorijianaari puereeta quiaquetooriquiaa jiyocuacaanu. Cuno Naa queruuri na seyata jiyanoohua quiaqueriquiaa Pueyaso seja juucua. ⁸ Naajaa, majaari nojori naata quiriquiaa Pueyaso seja shocotanu. Pueyaso seja paracaaniuucua jiyanoohua nojori, majaari quiqio quiniu quiriquiaa socua nojoriria jiyocuacaanu. ⁹ Naacuajitij, cuno Naa queruuri jiyocuacaanuji taanuusaaree. Nojuacuajaari cuno tariucuacaanu Soconu, Eva sapojoquiaarini. Cuno Sesaaca seue

sesaari “Satanás”. Nojuajaari puetunu mijiria quiniaajanaa sapojoquiaa. Pueyaso seja shocotanuucua nojuaja, nojuajaari puetunu na seyatajanaa nio jiyacua quejosaaree.

¹⁰ Jiyacaritij, janiyari jiyocuacaanu quiijiaca queraatia pueya rupaa tojiriini. Juhua niquiriyatu rupaari tojishaariquiaa jatiqui nojori paaretasacari na rupaa. Naa sequeturiquiaari:

—¡Pueyasoori parta Pueyaso pueyacuara Saquiriojotana jataree tari!

Nojuajaari pueyaracaanu Pueyaso saquiriojotaja Pueyaso pueyacuara, juuca, niucuanio. Naa pa Paraca jatasaanuucuatej, Pueyasoori quiarijia tohuateenutaniya puetunu na sequencesanojuanaa na jiyanooshano pueyara. ¡Nojuajaari maninia jiitianutaniya pa-janiya, jiyanoohua na cumaacata! ¡Pa Jiyanijia Cristoori tari jiyatesaaree Jiyanijiajanaa na quiniuria! Naa na miishaanuni, cunoori na Que saquiriosano na quiniuucua. ¹¹ ¡Pueyaso Borrego na quiniuucua, nojuajaari na nanaca shootequiaari, tojetarucuajanaa jiyanooshano pa quiniuria sesa pa miishanojiniji! Naacuajitij, Satanás saquiriojotasacari parta Pueyaso pueyacuara, nojoriiri na sanaajaquiaari nojori tiuuniuucua Jesucristoocua. Nojoriiri na shocotaquiaarijiana, nojori pohuatanuucua Jesucristoocua nojori tiuuniujiniji. Nojoriiri maja na puerenu quijia na mosanura. Nojoriiri seetanujuanaa juhuajaniya tama na cuaqueyajaaja panitiaquiaari nojori mosaanura. ¹² ¡Naaratej, jiyocuacaanunaa, shuquriaatia quia quiri! ¡Naa Sesaaca jatasaanuucuatej, nia timiquiore jiyocuacaanu quijiacanaa! ¡Najaniya saniniuujia, jiyacua quijiacanaa, shoniniacu caminiajinia quijiacanio, jiyanoohua nia taraajere! ¡Sesaaca niishishacari maja puera Pueyaso tarishiniu quiniutianiya na saniitionura nojuaja, nojuajaari niaacua roseyarucuaa jiyanoohua na juaaniutia!

¹³ Cuno puereeta niquishano Naaqueru niishishacari nojuaja tari jatasaree jiyocua, nojuajaari cuno mueya nucua neteyojotanu coteeree na mianura juucua. ¹⁴ Cuno maajiiri querajaa puereetuca nesu niq-uitiosaaree saaja, juhua jiyanoohua puereetuca surohua miooru nesu. Cuno nesuta, maajiiri na quiquipiniara jaaree cariquia jiyajinia, tu-cuacaanu cuno Naaqueruucuaji. Tii mianuutesaanutaniya pueyara-caanuri cuaara na shocojorejaatija jiuujianaraca marijia, socua seis racanio. ¹⁵ Jiyacaritij, Naaqueruuri mohuaca quecaree juhua moo, maaji nuhuaji na saquitiniuria, maaji na jaatinitianura juucua. ¹⁶ Jiyari maaji naacutaree. Jiyari juhua na rupaa riataree. Naaqueru rupaamaji pojuarentaano moo raturee saajaari. ¹⁷ Naaqueruuri jiyamitia maajicuua macaarii jiyanoohua. Quiaareeri maajiciuajinio supueno pueyata miaquetojonura. Cuno pojoricuajaari Pueyaso rootasano tojitiajaca, canapuete Jesucristoocua nojori tiuuniu seetaashijiacacuajani.

¹⁸ Naaqueruuri shoniniacu caminia casaqueyaji nujuasee.

13

Caapiqui puereeta niquishano Casaajiniji pohuatasano

¹ Na nuhuaji, janiyari puereeta niquishano Casaa niquirii shoniniacu caminiajiniji tacaanonni. Siete nacacaraca quiriquiaari, diez nacajaaracanio. Puetunu na diez nacajaacua jiitariquiaa jiyaniijianucuara shipinjiosano nacaqueyari. Puetunu na nacacaacuajanaa, sesacaari nocua

naajiotasano quiriquiaa. Na nacacaacua naajiotasano sesacani, cunoori Pueyaso rerequeteriquiaa, juhua Pueyaso shocotaja na quiniuucua.² Janiyara, cuno cuá niquishano puereeta niquishano Casaani, cunoori juhua marucuatuque sare niquishano quiriquiaa. Na niohuacaari juhua oso niohuaca niquishano quiriquiaa, tucuacocua juaashococuaraca. Na rupaari juhua juurunu sare rupaa quiriquiaajuhuaj. Cuno tarí cuá pohuatasano naatuhuana juhua cohuaniquia niquishano Naaqueruuri na cumaaca na niquitioree. Tama na cajitiujinajaja na cajitiriiri jiyanijijajanaa na quiniuria jiayacua.³ Cuno puereeta niquishano Casaa siete nacacaracani, niquiriyatu na nacacajinjiniori pishano quiriquiaa na mosaanura juucua. ¡Cuno puereetuca piyashi na nacaacua quiriquiaani, saaja cushiriiquiiri! Puetunu mijiria quiniaa pueyajanaari jiuuijateree na cushiriishacariuhua. Cunora, puetunu nojorijianaari cuno puereeta Casaa tojijiacara quirii.⁴ Jiyacaritij, mijiria quiniaa pueyari cuno naatuhuana Naaqueruucuara jacamaturee juhua Pueyasoochuara, cuno puereeta niquishano Casaa na jiyatenuucua nojori jiyanijijajanaa na quiniuria. Pueyari cuno siete nacacaraca puereeta niquishano Casaacuara jacamatureejuhuaj. Nojoriiri naa sequetooree tamajaaja:

—Maja socua tamonu jiyanijija quiniu juhua nio pa jiyanijija. ¿Tamonu jiyanijiateeri cumaacaraca, nata na miaquetoojonura? Shaaqui.

⁵ Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitijooree sacuaraatia na rimiaaqueenura Pueyasoochuara, Pueyaso na rerequetenurajuhuaj. Naa miiriiri na jiyanishacari nojuajaari socua maninia quijia Pueyasojiniji. Naajaa, nojuajaari jiyanijijira jiyatesaaree saaja cuarenta y dos racara.⁶ Naacuajitij, cuno puereeta niquishano Casaari Pueyaso rerequetenu coteeree. Pueyasoochuara rimiaaqueerei. Jesuucua tiuujjaca pueya sesacareejaariuhuaj, jiyocuacaanu Pueyaso quiqionio.⁷ Mijiria quijiaca Pueyaso saquiriojosano pueya paracaatishaareejaariuhuaj. Cumaquishaareejaariuhuaj Pueyaso pueya na shocotanura. Cumaaca niquitosareejaariuhuaj jiyanijijajanaa na quiniuria, puetunu tamaatiuucua pueyapuejanaa na jiitanura, puetunu tiquiyocua tiacajinjinio pueyajanaa, puetunu tamaatia rupaaca pocuajaca pueyajuhuaj, puetunu tamonu jiyacajinajanaa quijiacanio.⁸ Naacuajitij, puetunu mijiria quijiaca pueyajanaari cuno puereeta niquishano Casaacuara jacamaturee na shuquiritianura nojuaja, nojori pueyaso na quiniuucua. Cuno pojoriiri maja Pueyaso saquiriojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jiitiasano naajioneejinia, cante pocuara mosa aquiaaricuajani. Pueyaso muerasu sesaca cutaraari cuno naajioneejinia naajiotasa aquiaari jiya shipinishaacarijiyojua, pueyaracaanu rishijiaca pa quiniuria.

⁹ Cante numaaracani, nojuaja cuára tojiiria nio:¹⁰ “Cante Pueyaso jiyatesano quiascoriquianoni, nojuajaari seetanujuanaa quiasano pueyano quiniutianiya. Naajuhuaj, cante nijinijaquetucuaja mueruuta mosocoriquianoni, seetanujuanaa naa mosaanutaniyari”. Naaratej, Pueyaso pueya cuára puetunu casaajanaa rejeretajaca quiria, see tanujuanaa nojori tiuushacari Pueyasoochuara.

¹¹ Na nuhuaji, janiyari tamonu puereeta niquishano Casaa niquirii

jiyajiniji muetaanon. Caapiqui nacajaraca quiriquiaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariquiaari.¹² Jiyanolhua cumaacaraca quiriquiaari, juhua narta puereeta niquishano Casaa, teyano naca pishanotucuaja cushiriiriohuani. Nojuajaari na naca cushiriiniohua narta puereeta niquishano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojoquetanijioree juhua Pueyasooocuara, nojori timitianura na naca pishano cushiriiniohua puereeta niquishano Casaa.¹³ Naajuhuaj, nojuajaari na cumaacata miiri jiyajeneta casaa pueya jiuujatenura nocuaji. Jiyanolhua cumaacaraca na quiniuucua, pueya niquiara, nojuajaari mani tinirii jiyocuacaanuji jiyocua.¹⁴ Naa na cumaacata na miiniuucua cuno na naca cushiriiniohua puereeta niquishano Casaa tacojitij, puetunu mijiria quiniaa pueyajanaa sapojoreeri. Naacuajitij, nojuajaari pueya shipinitirii casaa. Juhua cuno siete nacacaraca puereeta niquishano Casaari quiriquiaa, teyanote na nacajinia mueruuta pishano na quishacari samiitiarohua saajacuajani.¹⁵ Jiyacaritij, nojuajaari cumaaca niquitiosaaree pueya shipinishano Casaa na jiyatenura saminiora, pocuajara na quiniuria, nocuara jacamatuyashijiaca na puecootenurajuhuaj.¹⁶ Naajuhuaj, cuno caapiqui nacajaraca puereeta niquishano Casaari na pueya sequeree nojori naajiotanura puetunu pueyacuajanaa narta puereeta niquishano Casaa sesa. Naajiotasaareeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajiotasaareeri. Naacuajitij, puetunu mijiria quiniaa pueyacuajanaa naa naajiotasaareeri, tojinyaquishoo pueyacua, tojishano pueyacua, casamiriaca pueyacua, casamijiuniucua pueyacua, tama nojoriria poonijionuujuacajaaja pueyacuajuhuaj, poonijotesano pueyacuanio.¹⁷ Jiyacaritij, canapuete cuno puereeta niquishano Casaa sesa naajiotasano jiiti-aquiriquiaa na cuaqueyacuani, nojoriiri maja na naata na panishano masenu quiriquiaa na cumaneecata. Naajuhuaj, majaari nojori naata na casami niquitiojonu quiriquiaa na cumaneecara. Pueya jaara cuno puereeta niquishano Casaa sesa jiitiaquiri naajiotasano na cuaqueyacua, na naata na sesa número jiitianu nocua naajiotasano.

¹⁸ Nio niishishaanura maninia, jiyanolhua niishitiajaaari panishiya cutara. Niishijiaca pueya cuaara serojoora puereeta niquishano Casaa sesa número. Na númeroori pueyano sesa número. Cuno númeroori seisciento sesenta y seis. ¡Cunora pueyanaa, tama nia cuaqueyajaaja nia cojuare maja cuno puereeta niquishano Casaa sesa naajiotasaanura niaacuajuhuaj!

14

Borrego Niquiojua cojiniaajiniji pohuatasano

¹ Na nuhuaji, janiyari Borrego Niquiojua niquiriini, Síón tuhuananucua nujuano. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijiana, na Que Pueyaso sesajuhuaj.² Na nuhuaji, janiyari casaa tojirii juhua sararojua cojuatuneyano jiyocuacaanujini, juhua miacana mjacuyano, juhua queraatia pueya arpa taquinionuyanojuhuaj.³ Cua tojishanoori quiarinio jaaquequejosano quiriquiaa. Jaaquequenuunaari Pueyaso cajitiu tacoji jaaquequenuuriquiaa, cuno cuatro saminio casaa

tacojjijiuhuaj, cuno veinticuatro niishijjaca jiyaniijianucua tacobinio. Majaari quenaaja tamonu naata quiriquiaa cuno jaaquequejosano niishiniu nojori jaaquequejonurajuhuaj. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno pojoricuajaari mijiria quiniajinjinio saquiriojosaacuiaari Pueyaso pueya nojori quiniuria.⁴ Nojoriiri tojetaarucuajanaa maaji numuetuquayashijiaca quiquiaari, saaja pocuaji Tacunaacua jiaatijaca nojori quiniuucua. Naaratej, tiquiyocua Borrego Niquiojua rucuanejosacari, nojoriiri pueyaracaanu na cojiquiaa. Nojoriiri saquiriojosaacuiaari mijiria quiniaa pueyajinjinio, saaja Pueyasora nojori quiniuria, Borrego Niquiojuara nojori quiniuriajuhuaj. Nojoriiri socua Pueyaso timi-tiasano pueya puetunu Pueyaso saquiriojosano pueyajinjiniojuanaa, taa pa shuquiritiaa shushajanaa pa carojosano pa nataujinijicuaani.⁵ Nojoriiri tojetaarucuajanaa sapojonu niishiyashijiaca quiquiaari, tojetaarucuajanaa sesa miyashijiaca nojori quiniuucua.

Jiuujianaraca Pueyaso seja pohuatasano

⁶ Na nuhuaji, janiyari tamonu Pueyaso seru niquirii jiya cajiniocua jaanoni. Jaariquiaari mijiria quiijaca pueya niquiara na pohuatanura Pueyaso Rupaa, puetunu jiyacajinia quiniaa pueyarajanaa, puetunu tamaatiuucua pueyapuerajanaa, puetunu tamaatia rupaaca pocuajaca pueyarajanaajuhuaj, puetunu tiquiyocua tiacajinia quiijaca pueyarajanaanio. Na pohuatasanoori seetanu rupaajanaa pueyaracaanura.

⁷ Pueyaso seruuri mijiria quiniaa pueyacua nacarquiaa naatej:

—¡Pueyaso puerejaca nia quiriquia! ¡Nojuaja nia maniniuhuaqueetare! ¡Quiarijiaari na nequesoreesacari pueya! ¡Nocuara nia mojoquetacore nia shuquiritianura nojuaja! ¡Nojuacuajaari jiyocuacaanu shipininia, nio jiya, puereetuua shoniniacu caminiajuhuaj, puetunu samocua nacaca pacartacojuacajanaanio!

⁸ Jiyacaritij, tamonu Pueyaso seruuri narta Pueyaso seru nuhuajimiaajuhuaj. Naa miriqui sequeriquiaa Roma tiacajinijiiri:

—¡Babilonia tiaca tarí saniitioshiya! ¡Cuno puereetuua tiaca tarí saniitioshiya! Babilonia tiacaari puetunu jiyacajinia pueyajanaa niishitijoju, sacuaraatia nojori miiniuria juhua nojuajuhuaj. Babilonia tiacaní, nojuajaari puetunu sesa casaa na miijiosanotajanaa juhua mashaase-quetejoquiaari puetunu mijiria quiijacajanaa. Naacuajitij, puetunu pueyajanaari tama na cuaqueya miiniu panishanojuaja miijiacara quiquiaari, jiyanolua nojori jiaatianuta sacuaraatia casaa na miiniuria, taa Babilonia tiacajinia quiniaa miijioquiaacuaani.

⁹ Na nuhuaji, socua tamonu Pueyaso seruuri narta caapiqui na puetanaa Pueyaso seja nuhuajimiaajuhuaj. Mijiria quiniaa pueyacua nacaree naari:

—¡Iyanohua puereeta quiniutianiyari noo pojoriria, canapuete cuno puereeta niquishano na naca pishano cushiriiniohua Casaacuara mojo-quetacoujujuhua Pueyasoocuarani! ¡Iyanohua puereeta quiniutianiyari noo pojoririajuhuaj, canapuete juhua na naca cushiriiniohua niquishano shipinishano Casaacuara jacamatujuacani! ¡Naajuhuaj, puereeta quiniutianiyari noo pojoriria, canapuete na cuaqueya tarinitiabajacaní, cuno puereeta niquishano Casaa sesa naajiotasaanura nojori jinijini, nojori juaashiquiaacua soj!¹⁰ ¡Pueyasoori puetunu cuno pueyajanaa

saniitionutaniya jiyanohua na juaaniutia! ¡Majaari quenaaja Pueyaso ji-
ujujaaniu quiniutianiya nojori! ¡Pueyaso seja niquirara, Borrego Niquio-
juu niquirajuhuaj, nojoriiri pueyaracaanu naquiya miishaanutaniya
manitia, azufretanio! ¹¹ ¡Naa Pueyaso miitiasacari nojoritij, najacaari
pueyaracaanu nojonutaniya! ¡Majaari quenaaja nojori samaraatasaanu
quiniutianiya juuca, niucuanio! ¡Naquiya miiniuuri naa nojori miitianu-
taniya pueyaracaanu! ¡Naa miishaanutaniyari cuno pojori, canapuete
na naca pishano cushiriiniohua puereeta niquishano Casaacuara jaca-
matujuaca juhua Pueyasooocuarani, juhua nojuaja niquishano shipin-
ishano Casaacuarajuhuaj! ¡Naa miishaanutaniyajaariuhuaj noo pojori,
canapuete cuno puereeta niquishano Casaa sesa naajiotaniniutianiya
tama nocuajaajani!

¹² Cunora, Pueyaso saquirojosano pueyani, canapuete na rootasano
tojitiajacani, Jesuucua tiuuniu tarinitiaashijiacajuahuaj, nojori cuaara
juhuajaniya rejeretaara naquiya nojori miishacari.

¹³ Jiyacaritij, janiyari rupaa tojirii jiyocuacaanuji naa cua
sequeyanoni:

—Nio quia naajiotare: “¡Quirijiani, jiyanohua shuquiriaatia qui-
jaca cutaraari cuno macunucua, canapuete tariucua Jiyaniijia Jesu-
cristoocua tiuujjaca cusionuunutaniyani!” Pueyaso Sohuanuuri naa
sequeyajuhuaj: “¡Taaquiriirinij! Nojoriiri samaateya, pueyaracaanu na
Jiyaniijiara na poonijionuunu nuhuaji. Maninia nojori miishanocua-
jaari niyajetaaquishaanutaniya. Cunora, nojoriiri maninia miishaanu-
taniya”.

Pueyaso seja senoosacari pueya juhua nataacuaca nio jiyajiniji

¹⁴ Na nuhuaji, janiyari cohuaja najaca niquiriini. Cuno cohuaja najaca
caco cajiniaari juhua Pueyaso Niyanu niquishano quiriquiaa. Jiyani-
ijiara shipinishano nacaque cushitiariquiaari, orojiniji shipinishano.
Nataacuaca na senootajara shamatucuaja jacatunee mueruu mue-
turiquiaari. ¹⁵ Jiyacaritij, tamonu Pueyaso seruuri Pueyaso Quishaquiji
tohuatamaa. Cohuaja najaca caco cajianoocua nacaree jiyanohuari.
Naa na sequereeri:

—¡Quia mueruuta quia canuujure, nataacuaca quia senoonura! ¡Jiya-
jinia nataacuacacuajaari tari noshuriuju! ¡Cuaara quirijia senoosaaria!

¹⁶ Jiyacaritij, cohuaja najaca caco cajianoori na jacatunee mueruuta
canuujuree jiya caco. Nataacuaca senooreeri. Cuno nataacuacaari
Pueyaso pueyacuaja. Nojoriiri naa rijoosaanutaniya jiyocuacaanu.
Naa na sequereeri:

¹⁷ Jiyacaritij, socua tamonu Pueyaso seruuri tohuatamaa
jiyocuacaanu Pueyaso Quishaquiji. Nojuajaari shamatucuaja
jacatunee mueruu meturiquiaajuhuaj. ¹⁸ Na nuhuaji, socua tamonu
Pueyaso seruuri tohuatamaa Pueyasooocuara catijaja casaajiniji.
Nojuajaari mani camaru. Nojuajaari narta Pueyaso seruucua nacaree,
shamatucuaja mueruu metuyanoocua. Na sequereeri:

—¡Quia shamatucuaja mueruuta uva quia carojotare, jiyajinia moriti-
aconuni! ¡Tari noshuriujuacuaja!

¹⁹ Jiyacaritij, Pueyaso seruuri uva carojotaree na mueruuta, puetunu
nio jiyajinia cuhuariquiacajinijijiana. Uva jaapuejoree saajiajinia que-
jasano puereetuua surocuhuamaari. Pueyasoori tii na rapijotenu-
taniya jiyanohua na juaaniutia. Cuno uvani, nojoriiri Pueyaso ru-
uretajaca pueyacuaja. ²⁰ Cuno uvaari rapijiosaaree tucuacaanu naata

tiacajiniji. Uva rapijiosaquequi, nanacaari tojetaarucuajanaa jaateriquiaa juhua mohuaca. Jiyanohua nanaca quiniuucua, cabollohua rupaacuma puecariquiaari. Pueyaso tojiyashijiaca pueya nanacaari jiyanohua tu-cuacaanu jaateree juhua moo. Trescientos kilómetro jaatereeri.

15

Siete Pueyaso seja, siete naquia miitija na mueetacosacari

¹ Na nuhuaji, janiyari jiya cajiniocua socua niquitishaareeni, cua niishiniuria taa mijiria quiniae sanitirosaanu tucuatasaanutaniyani. Cua niquishanoori jiyanohua puereeta quiriquiaa. Janiyari nocuaji jiuuijatereeni. Janiyari siete Pueyaso seja niquiriini. Siete Pueyaso naquia miitija mueetacoriquiaari. Pueyaso jaara cuno siete casaata naquia miitiri pueya, nojuajaari cunota na juanuu tucuanutanutaniya puetunujuanaa.

² Janiyari casaa niquirijiaanuujuaj juhua puereetuua caminia motiiquiojiniji shipinishano. Manitia cojitishanoori quiriquiaa. Pueyari cuno caminia shocua nujuaturiquiaa. Nojoriiri noo pojori quiriquiaacuaja, canapuete na naca pishano cushiriinohua Casaa shocotaquiaaricuajani, juhua nojuaja niquishano shipinishano Casaajuhuaj. Naajuhuaj, nojoriiri maja na shanacunu quiquiaari cuno Casaa sesa naajiotasaanura nojoriicua. Puetunu nojorijianaari Pueyaso niquitiojosano arpaa taquinionuuriqiaa. ³ Nojoriiri Pueyaso seru Moisés jaaquequejosano jaaquequenuuriqiaa, Borrego Niquiojua jaaquequejosanonio. Nojoriiri naa jaaquequenuuriqiaa:

—Jiyaniijiana, puetunu quia miishanojuanaari jiyanohua maninia, nocuaji jiuuijatesano. ¡Quiaari seetanujuanaa puetunu cumaacaracajanaa! Casaa quia miishacari, quiaari maninia na miquiaa. Majaari quenaaja quia jiyajenenu. Quiaacuajaari puetunu jiyacajinie quiqiaca pueya Jiyaniijiana. ⁴ ¡Quiaari pueresano, Jiyaniijiana! ¡Quiaari tojetaarucuajanaa maniniuhuaqueetasano seetanujuanaa! ¡Saaja quiajaniya cutaraari tojetaarucuajanaa maninia mijia pueyaracaanu! Naaratej, puetunu jiyacajinjinio pueyajanaari quiocua nijionutaniya nojori shuquiritianura quiajaniya, maninia quia saniiitonuucua quia paraajuhuaj.

⁵ Naa cua tojiniu nuhuajitij, janiyari jiyocuacaanu Pueyaso Quishaquijiana niquirii riateyanoni, tee cuniqui seetanu Pueyaso rupaajanaa racatasano quiyacuajani. ⁶ Cua niquishacari, cuno siete Pueyaso se-yari Pueyaso Quishaquijijiana tohuareetariqiaa, canapuete cuno siete naquia miitija patootariquiaacuajani. Nojoriiri tojetaarucuajanaa cohuaja linojiniji toqueyaraca quiriquiaa, shacantuqueya. Nojoriiri orojiniji shipinijiosano casaa na jiriquipacajinie camarucuteriquiaa.

⁷ Jiyacaritij, niquiriyatu cuno cuatro saminio casaajinijinioori miaco-jua niquitiojoree puetunu cuno siete Pueyaso seyajanaa. Cuno miacojuari orojiniji shipinijiosano quiriquiaa. Pueyaracaanu rishijia Pueyaso juaaqiacata mishinijiosano quiriquiaari. ⁸ Jiyacaritij, Pueyaso Quishaquijianaari maatia najacata mishiquimiaa. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seja cuaura puecaarajaatija naquia nojori miitajaca pueya. Cuno najacaari Pueyaso shacantuua cumaacajiniji quiriquiaa, naa na saniiitoniosacari na paraa.

16

Saniitionujiniji pohuatasano

¹ Jiyacaritij, janiyari tamonu rupaa tojirii Pueyaso Quishaquiji nacaanonni. Naa cuno siete Pueyaso seja sequereeri:

—¡Nia siete miacojuajiniji Pueyaso juaaquiaca nia taroosee jiyocua!

² Niquiriyatu Pueyaso seruuri juhuacatecara coteeree. Quiaareeri. Na miacojuajiniji jaapuesee jiyocuaari. Jiyacaritij, jiyanohua nootucca sapueyari pueyacua supueree. Noo pueyacua supueree, canapuete nocua naajiotasano jiitiariquiaa na naca pishano cushiriiniohua puereeta niuishano Casaa sesacuajani. Sapueyaraca pueyari cuno puereeta niuishano shipinishano Casaacuara jacamatujuaca quiriquiaajuhuaj. Jiyanohua nootujuaaca sapueyari quiriquiaa.

³ Segundo Pueyaso seruuri na miacojuajiniji Pueyaso juaaquiaca jaapuesee puereetuua shoniniacu caminiajinia. Mohuacaari puetunu nanacara quiquijianaa, juhua shusha mosano pueyano nanaca. Cunora, puetunu shoniniacu caminiajinia quijia casaajanaari cusionuuree.

⁴ Tercero Pueyaso seruuri miacojuajiniji Pueyaso juaaquiaca jaapuesee puetunu moocuajinajanaa, puetunu samocua nacaca pacarta-cojuacajinajanaanio. Jiyacaritij, nanacara jataquee puetunujuanaari.

⁵ Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quijiajuhanajaj. Majaari quia supuenu quiquiaari. Quiaari tojetaarucuajanaa maninia. Naa quia miitiasacari quia tojitiaashijiacatej, quiaari seetanujuanaa maninia namirii nojori. ⁶ Nojoricuajaari quia saquiriojosano pueyajinijnio nanaca shootejoquiaari pueyaracaanu, quia sequesano caminiuijuniaa nanacanio. Quiarijia saniniujia, naa miijiaca nojori quiniuucuatej, quiaari nojori raatejoree nanaca.
¡Maniniacuaja Jiyaniijianaa!

⁷ Jiyacaritij, janiyari Pueyasooocuara catijiaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiriirini Jiyaniijianaa, puetunu cumaacaracajanaa Pueyasonaa. Quiaacuajaari maninia saniitionree quia tojiyashijiac, taa quia sequequiaari tariucuacaanu nojoricuajani, quiaari quia tojiyashijiac saniitionutaniya. Quiaari seetanujuanaa sequequiaari quia miishocoriquiano. Quiaari puetunu sesa nojori miishanojuanaa niishijia.

⁸ Na nuhuaji, cuarto Pueyaso seruuri miacojuajiniji Pueyaso juaaquiaca jaapuesee pananuucua. Naacuajitij, pananuuri socua jiyanohua naseecara quiqui, pueya na catijianura juhua mani. ⁹ Naa pananu januucua jiyanohua nasaatiatej, pueyari jiyanohua cateree. Nojoriiri Pueyaso sesacaree saaja, cumaacaraca na quiniuucua, naa nojori na saniitionuuucuatej. Majaari quenaaja nojori pishiniu quirii sesa nojori miiniujiniji, nojori tacatonuhuara noojia Pueyasooocua, nojori jiyanijiara nojori jiyatentura Pueyaso. Pueyaso rerequeteturee saajaari.

¹⁰ Na nuhuaji, quinto Pueyaso seruuri miacojuajiniji Pueyaso juaaquiaca jaapuesee. Na naca pishano cushiriiniohua puereeta niuishano Casaa cajishaqui na jaapueseeri, tee cuniqui juhua

jiyanijijajanaa na cajiriquiaacuajani. ijiyacaritij, puetunu na jiitiasano jiyacajanaari ninishiquiria quiuii! Cunora, na pueyari na niti saaqioloriquiaa jiyano hua nooeta naquiva na miiquiosacari.¹¹ Naa Pueyaso saniitiosacari nojoritij, naajaa, majaari nojori pishiniu quiriquiaa sesa nojori miiniujiniji. Nojori nootunenuucua, nojoriiri jiyocuacaanu quijia Pueyaso sesacaree saaja, nootujaaca sapueyaraca nojori quiuiucuajuhuac.

¹² Cuno nuhuaji, sexto Pueyaso seruuri miacojuajiniji Pueyaso juaaquiaca jaapuesee cuno puereetuua Eufrates moojinia. Moori joojequetaquee jiya pajamaji niriquiano jiyaniijianucua niutiajara.

¹³ Jiyacarijuhuaj, janiyari jiuujianaraca samaruhua niquiriini, juhua sacarohua niquishano. Cuno samaruhuari tohuareetariquiaa juhua cohuaniquia niquishano naatuhuana Naaqueru rupaamaji. Tohuareetariquiaajaariuhua na naca pishano cushiriiniohua puereeta niquishano Casaa rupaamaji, narta puereeta niquishano Casaa rupaamajino. Cuno puereeta niquishano Casaari mijiria quinia pueya sapojoriquiaacuaja, nojori tojiniuria na naca pishano cushiriiniohua puereeta niquishano Casaa.¹⁴ Cuno jiuujianaraca samaruhuari cuma acaraca quiriquiaa, na cuma acata nojori miiniuria nocuaji jiuujiatesano casaa, pueya tiuuniuria nojori seqesanoocua. Nojoriiri naa miiriquiaatej, puetunu mijiria jiyaniijianucua janaa nojori rerejotenura. Jiyaniijianucuaari naa rerejotesaaree nojori miaquetoojonura puetunu cuma acaracajanaa quijia Pueyasota. Pueyasocuajaari tariucuacaanu niishiriojoquiaari naa cuno juuca na miaquetoojonura nojoritia. Naa paniquiaaricuajaari na paraa na pueconura.

¹⁵ Jiyacaritij, janiyari pa Jiyaniijijajanaa tojirii naa sequeyanoni:

—Cua tojitiare cua pueyanaa. Janiyari canashiyaquiji tiuquinintiua niuhuani nia niishiyaqueishacari. Janiyari naa niaacua tiuquinintiua iuhuani taa nohuasejojua tiuquiquiaa casami nohuasenuucuacuaani, juhuajaniya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyaracaanu na secosacari, na sashishacari janiya. Tojetaarucuajanaa sesa miyaquijia nia quiri, niaa mariqui cua tiuquishacariuhua cararaatia juhua juhuasunucua quiri cua niquiaraari.

¹⁶ Cua Jiyaniijija seqesano cua tojiniu nuhuaji, janiyari cuno samaruhua niquirii mijiria jiyaniijianucua rerejoteyanoni. Hebreo rupaajinie, nojori rerejosaqui sesaari, “Armagedón”.

¹⁷ Séptimo Pueyaso seruuri miacojuajiniji Pueyaso juaaquiaca jaapuesee paratujinia. Jiyacaritij, jiyocuacaanu Pueyaso Quishaquijiana Jiyaniijija cajitiujiniji, janiyari rupaa tojirii naa nacaanoni:

—iTari miishaaree puetunu juanaacuaja!

¹⁸ Jiyacaritij, miacanaari nunujuree. ijiyano hua majacureeri! Cojuataari quiriquiaa puereeta. Rijiaari tojetaarucuajanaa jiyano hua jiuuquiutiaree. Pueyano shipinishaanujiniji, majaari naa rijia jiuuquiutiianu quijia juhua nio rijia.¹⁹ Naa rijia jiuuquiutiianuucua jiyano huatej, cuno puereetuua tiacaari neequeresetaquee! Jiuujianaracara raquitijiquiiri. Puetunu jiyacajinija tiacajanaari niyarequetaree. Jiyacaritij, Pueyasoori cuno puereetuua Babilonia tiaca saniitioree, taa tariucuacaanu na niishiriojoquiaari cuno juuca na saniitionuracuajani. ijiyano hua na juuaniutia na

saniitioreeri! Niya sequeshiya Babilonia tiacatani, cunoori Roma tiacacuaja. ²⁰ Jiyacarijiuhuaj, puetunu shoniniacu caminajinia jiya tucuaatiajacajanaari shaajequee, puetunu tuhuananuhuajanaanio. ²¹ Naajuhuaj, jiyocuacaanuji jiyanohua puereetujuaca miacanajaa shiniitiujiaacaari toteree pueyacua. ¡Noojiaqueyari jiyanohua niiquia quiriquiaa; cuarenta kilo! Mijiria quiniaa pueyari Pueyaso sesacaree, naa nojoricuua na totinijianuucua shiniitiujiaaca miacanajaatej.

17

Miriqui pohuatasano Roma tiacajiniji, juhua paanatu

¹ Na nuhuaji, cucua nimiaari niquiriyatu cuno siete Pueyaso seyajini-jinio, canapuete siete miacojua patootariquiaacuajani. Cua sequesereri:

—Miji quia nimia. Janiya quia niquitiniutianiyan taa Pueyaso saniitionutaniya cuno Paanatuni, puetunu jiyajinia mohuacaacuajanaa cajiyani. ² Mijiria jiyaniijianucuaari cuno Maaji numuetucujuaca. Sacuaraatia cuno Paanatu niishitiojosanota, nojuajaari juhua mashaasequetejoja puetunu jiyacua quiniaa pueyajanaa. Naacuajitij, nojoriiri sacuaraatia mijiacara quiriquiaari, juhua nojuajuhuaj.

³ Pueyaso seru niquitiniuria janiya na niquitiniu panishano, nojuajaari cua sohuanu jiyataare cariiquia jiyajinia. Janiyari tii niquishii Maajini, naatuhuana puereeta niquishano Casaa nijinia cajiyano. Queraatia sesacaari cuno naatuhuana Casaa cuaqueyacua quiriquiaa, Pueyaso rerequeteja sesaca, juhua Pueyasora na jiyatesacari tama na cuaqueyajaaja. Siete nacacaracaari quiriquiaa, diez tuhuajaaracanio. ⁴ Cuno Maajiiri shanohua toqueya cushiriquiaa, naatuque, shaaruquejuhuaj, juhua jiyaniijianucua cushishano. Queraatia shanohua maniniushitija casaa cushitiariquiaari: orojiniji shipinijiosano casaa, shanohua saijiniji shipinijiosano tiujiajuhuaj, noturu shipinijiosano saijiniji tiujiaunio. Orojiniji shipinishano miacojua mueetariquiaari. Mishaja quiriquiaari puetunu sacuaraatia na miijiosano casaatajanaa, numuetucujusaanu porocua na quiniuucua. ⁵ Na sesaari miriqui naajiotasano quiriquiaa na jiniji. Naa naajiotasano quiriquiaari: “Janiyari puereetuca Babilonia tiacani. Janiyari paanatujuri nucuani, puetunu mijiria sacuaraatia miishanojuanaa coretanijiojua nucuanio”. ⁶ Maninia cua niquishacari, cuno Paanatuuri juhua mashaaseca quiriquiaa na puecootesano Pueyaso pueya nanacata. Nojuajaari jiyanohua timijia, Jesujiniji pohuatanaa puecoonu porocua na quiniuucua.

Naa cua niquishacari nojuajatej, janiyari jiyanohua jiuujiateeni. ⁷ Pueyaso seruuri jiyacari cua sequeree:

—¿Casaara quia jiuujiateya nocuajini? Quiarijia quia pohuatareera quia niquishanojiniji. Cuno puereeta niquishano Casaa, siete nacacaracan, diez nacajaaracanio, Maaji cajitiya na nijiniani, puetunu cunojuanaari miriqui. ⁸ Cuno puereeta Casaa quia niquishanoni, cunoori taricuacaanujiniji quijia quiriquiaari. Quiarijia saniniuujia, majaari tari na quiniu. Naajaa, quera tacanutaniuhua cuno puequeetuuju raamajiiri, seetanujuanaa puetunujuanaa na shaajasaanuhuara cutara. Pueyaso ruuretajaca pueyari jiyanohua shiriiquitiuniutianiya nojori jaara cuno puereeta niquishano Casaa niquiri tacatehuano, teyanote taricuacaanu quijia quiriquiaricuajani, quiarijia saniniuujia majaari na quiniu.

Jiya shipiniyaquishacarijia, cuno pueya sesacacuajaari Pueyaso saquiriosano pueya sesaca naajiotasaqui naajiotasoo quiquiaari.

⁹ Cante niishijiani, nojuaja cuara niishiiria cua pohuatasano. Cuno puereeta niquishano Casaa, na siete nacacani, cunoori siete jiylaca jiyanijianucua, mariyata siete tuhuuananuhua, teyanocua cuno Paanatu cajiyacuajani. ¹⁰ Cuno siete jiyanijianucuajinjinioni, cinco nojorijinjinioori tari shaajasaquaaria. Cuno caapiqui cureenojinijini, niquiriyatouri jiyanijija quiya quiarijia. Tamonuuri supueyojua. Nojuaja jaara supuere, saaja rupaquijia rishiniutaniyari jiyanijija na quishacari. ¹¹ Cuno puereeta niquishano Casaa, teyanote tariucuacaanu quijia quiquiaaricuajani, nojuajaari cuno cinco shaajasano jiyanijianucuajinjinio quiquiaaricuaja. Majaari quiarijia na quiniu. Na nuhuaji supuenutaniuhuari octavo jiyanijija na quiniuria rupaquijia. Na nuhuaji shaajasaanutaniya cutaraari.

¹² Cuno diez nacajaa quia niquishanojanihuaj, cunoori diez jiyanijianucuaranocuaja. Nojoriiri cumaaca niquitiosaanutaniya saaja niquiriyat hora jiyanijianucua nojori quiniuria cuno puereeta niquishano Casaata. ¹³ Cuno diez jiyanijianucuaari mariyata niishiriojonutaniya nojori cumaquinuriuria cuno puereeta niquishano Casaa puetunu nojori cumaacatajanaa, jiyanijiajanaa cuno puereeta niquishano Casaa quiniuria. ¹⁴ Nojoriiri Borrego Niquiojuata miaquetoojonutaniya. Borrego Niquiojuari nojori shocotanutaniya saaja, seetanujuanaa Jiyanijiajanaa na quiniuucua. ¡Nojuajaari puetunu jiyanijianucuajanaa Jiyanijija! Nata quiniaa pueyari Pueyaso saquiriosano pueya, Neyanu tojitiajcatuhuaj.

¹⁵ Pueyaso seruuri socua cua sequeree:

—Quiaacuajaari cuno Paanatu niquirii puetunu mohuacaacuajanaa cajiyano. Cuno mohuacacuajaari queraatia tiaca, tamaatiuucua pueyapue, tamaatia rupaaca pocuajacajuhuaj, tamaatia jiycacajinia quiijaca pueyanio. ¹⁶ Cuno puereeta niquishano Casaa quia niquishanon, na diez nacajaanio, nojoriiri cuno Paanatu niquinuu paniyaquiniutaniya tojetaarucuajanaa. Na cartetunutaniyari. Tojetaarucuajanaa juhuasu na tiujiatunutaniyari. Nojoriiri cuno Paanatu miaquenutaniya. Na nuhuaji, na nucuhua catijiatunutaniyari. ¹⁷ Pueyasojuanaacuajaari cuno Paanatu paraa niishitiniutaniya naa nojori miiniuria cuno Paanatutej, taa Pueyaso paniya na miishaanuracuajani. Naajuhuaj, Pueyasoori cuno diez jiyanijianucua niishiriojotenutaniya jatiqi. Naacuajitij, cuno jiyanijianucuaari roojotoonutaniya nojori cuaara cumaquiiria cuno puereeta niquishano Casaa puetunu nojori cumaacatajanaa. Naacuajitij, Pueyaso panishanoori tohuateesaanutaniya taa na sequequiaaricuajani. ¹⁸ Naajuhuaj, cuno Paanatu quia niquishanon, nojuajaari cuno puereetuca Roma tiacacuaja, miriqui sequeshiya Babiloniatani. Nojuajaari puetunu mijiria jiyanijianucuajanaa tojitiquiaa nojuaja.

18

Babilonia tiaca catetanujiniji pohuatasano

¹ Naa Pueyaso seru niquitinuu nuhuaji janiyatej, janiyari socua tamonu Pueyaso seru niquirii jiycuacaanuji roseyanoni. Jiyanoehua

cumaacaracaari quiriquiaa. Na shacantuua cumaacaari jiya cuhu-atariquiaa.² Jiyocuacaanuji na rupaa paaretaree jiyanoahuari. Seetanujuanaa miishocoriquiano na sequesano quiniuucua, nojuajaari juhua tariucua miishano na nacatariquiaa:

—¡Tari saniitiosaaree Babilonia tiaca! ¡Juhua niyarequetasaareeri cuno puereetuua tiaca! Samaruhua quiquirora jatanishaaree quiarijia saniniuuriija. Naaquiya quiquirora quiniutianiyajaariuhuaj, puetunu pueya soosano pueresano jaacuatujuaca casaajanaa quiquiranio.³ Puetunu jiyacajinjiniojuanaa pueyari sapojonuusaquiaari Babilonia tiacajinjinio niishitiojosanota, juhuajaniya sacuaraatia mijiaca nojori quiniuriajuhuaj, juhua mashaaseca. Naajuhuaj, jiyaca jiyaniijianucuaari Babilonia tiacajinia sacuaraatia mijijsano mijiyoquiaajuhuaj, cuno paanatu shiniujiuniuucua nojori. Babilonia tiacajinia quiniaa pueyari puetunu na panishano casamijanaa masejoquiaa puetunu jiyacajinijijiana, saaja tama nojori cuaqueyajaaja nojori shuquiritiniuria. Naacuajitij, cumaneecara na casami niquitiojonuujuaca pueyari jiyanohua cumaneecaraca pueya.

⁴ Na nuhuaji, janiyari tamonu rupaa tojirii jiyocuacaanujini. Babilonia tiacajinia quiniaa Pueyaso pueya sequereeri:

—¡Cua muerasunaa, cuno tiacajiniji nia quiojore, niaa mariqui sesa mijiaca quiriohuari, cuno sesa mijiaca nia cojiniuucua! Nojorijiniji nia carajere, niaa mariqui puetunu nojoritiajanaa cojiritiasare naquiya miiniuuri. Nojoricuajaari quera saniitioshiya.⁵ Cuno tiacajinia sacuaraatia miishanoori puera jiyanohua caneyaree. Juhua tuhuananuri maashiyaree jiyocuacaanura. Pueyasocuajaari sacuaraatia nojori mijijsano niishiya. Majaari socua tari na naata rejeretanu.⁶ Babilonia cuaara namishaaria taa naquiya na mijiyoquiaa tamasacacuaani. ¡Nojuaja cuaara saniitionu caminiujiushaaria saniniuujia, sesa na miiniuucua tamasaca! Babiloniaari juhua pueya raatejoquiaari sacuaraatia na niishishano, sesa mijiaca nojori quiniuria juhua nojuajuhuaj. Cunora, nojuaja cuaara puetunu Pueyaso juaaquiacajanaa raatesaaria, tama na suhuocojinijaaja mishinishanon. ⁷ Naatej, taa tama na cuaqueyajaaja na shuquiritiquiaa sacuaraatia na miishacaricuaani, saniniuujia cuaara naa jiyanohua miitiasaariajuhuaj. ¡Jiyanohua tama na cuaqueyajaaja timitiaja na quiniuucuajuhuaj, cuaara saniitiosaaria! Nojuajaari tama sequequiajaacujua: “Janiyari niya cajija shuquiriati, cumaacaraca maaji, pueya tojishano jiyaniijia. Janiyari maja mashiquioni. Majaari quenaaja cua tarajenu quiniutianiya”.⁸ Cunora, niquiriyatu juucajinija, cuno Paanatuuri jiyanohua taraatia miiti-asaanutaniya. Jiyacaritij, cusionuunuri quiniutianiya, naquiya miiniu, miaajenujuhuaj. Jiyacari catijiatasaanutaniyajaariuhuaj. Jiyanohua cumaacaraca Jiyaniijia Pueyaso quiniuucua, nojuajaari naa saniitionutaniya cuno Paanatu.

⁹ Mijiria jiyaniijianucuaari sacuaraatia miiniuria cojiquiaa cuno Paanatucuaja, tama nojori cuaqueyajaaja nojori shuquiritiniuria. Cunora, nojoriiri jiyanohua nujuquetunutaniya cuno Paanatu jaara saniitiosaare. Nojori niquishacari najaca tacaano jiya cajiniocua, Babilonia tiaca catesacari, nojoriiri nocua sapiyonuunutaniya.¹⁰ Nojoriiri na puerenuta na shootianutaniya tucuacaanuji, nojori

mariqui saniitiosaarejaariuhuaj. Nojoriiri jiycari naa sequenutaniya Babilonia tiaca:

—¡Juhuej! ¡Quiaa taraatia miishiya tiaca maniniunaa! ¡Quiaari jiyanoqua cumaacaraca quijia juucua Babiloniana! ¡Quiaari canashiyaqueji saniitiosaaree!

¹¹ Puetunu jiycajinajanaa, cumanecara na casami niquitiojonaa pueyari Babilonia tiacaacua nujuquetunutaniya. Nojoriiri jiyanoqua taraatia quiniutaniya nojori niishishacari, nojoritiucua tee na casami niquitiojore na cumanecarani. ¹² Tucuacaanuji Babilonia tiacajiniara nojori nitiasano casami quijiaari nio: oro, plata, jiyanoqua panishano saijiuahuaj, noturu shipinijiosano sainio. Nitiasaaquiaajaariuhuamani niuqui toqueya linojiniji, sedajiniji toqueya, shaaruque toqueyahuaj, juhua jiyaniijia cushishano, naatuque toqueyanio. Nitiasaaquiaajaariuhuapuetunu tamaatia shanohua jaanujua juhuana raquiquia, elefante quiajajiniji shipinijiosano casamijiuahuaj, shanohua naanajiniji shipinijiosano casaminio. Nitiasaaquiaajaariuhuabroncejiniji shipinijiosano casami, cumueeca casaajiniji shipinijiosano casamijiuahuaj, shanohua mármol saajajiniji shipinijiosano casaminio. ¹³ Naajiuahuaj, nio shanohua jaanujua casami: canela, muesu nunacuhua, catijasocoriquiano shanohua jaanujua casaa, mirrajuhuaj, cuaqueyacua shuquiujitiasano shanohua jaanutajanio. Nitiasaaquiaajaariuhuajereeca uva caaca, shiyocua, maninia cashojuahuaj, trigo jajaunio. Nitiasaaquiaajaariuhuacasami niyotesano seya, borregohua, caballohua, caballohua jayotasocoriquiano shipinijiosano casaanio, cumanecara niquitiojosocoriquiano pueyahuaj seya nojori quiniuria. ¹⁴ Jiyacaritij, Babilonia tiacaari naa sequesaanutaniya:

—¡Majaari socua quia mioonu quiniutaniya jiyanoqua quia maniniucusano naana jajau, jiyanoqua quioojia jiaatiasano nocuan! ¡Puetunu quia timitiasano casaajanaari maja tari na quiniu quiniutaniya quiara, shanohua niquishano casami, jiyanoqua cumanecata quia masesano casaminio!

¹⁵ Puetunu cuno casami niquitiojonaa pueyajanaari jiyanoqua casamiriaca quija Babilonia tiacajinia quiniae masejonuucua nojori casami. Maja nojori saniitiosaanurajiuahuaj, cuno pojoriiri tucuacaanuji na puerenuta nocua nujuquetunutaniya. Nojoriiri na sapuenuta naa na sohuarejotanutaniya:

¹⁶ —¡Juhuej! ¡Babiloniaari tiaca maniniu quijia juucua! Jiyanoqua shanohua niquishano quijiaari, taa casamiriaca maajicuaani, na cushishacari na maniniushitija casaa. Naa shanohua niquishiyari juhua maaji linojiniji cohuajaque toqueya cushishano, shaaruque toqueya, naatuque toqueyanio juhua jiyaniijia cushishano, orojiniji shipinishano casaata na maniniushishacarijuahuaj, noturu shipinijiosano saitajiuahuaj, shanohua niquishano saitianio. ¹⁷ ¡Jiyanoqua queraatia puetunu na jiitiasano casamijianaari canashiyaqueji catijasaree juhua sohuanatuu!

Puetunu pueyajanaa, canapuete shoniniacu caminajinia poonijionaa na cumanecaracuajani, nojoriiri tucuacaanuji shootiariquiaa Babilonia tiaca catetasacari. Naa shootiaturiquiaajaariuhuacasami jaquerrojuaca tamaquicua tiaca tacatajajinajueya, rucoonaa pueya, buquejinia poonijionaa pueyahuaj, nojori camarucuanio. Puetunu cuno pojorijianaari tucuacaanuji shootiariquiaa Babilonia tiaca catetasacari.

18 Nojori niquishacari najaca nujuaano jiya cajiniocuara, nojoriiri naa sariyocuaturee:

—¿Socua tamonu tiacateeri quiya juhua cuno Babilonia tiacajuhuaj?
¡Shaaqui!

19 Jiyanoqua nojori taraajenuta, nojoriiri jiyoqua nanooree na nacaacua. Nojori nujuquenuta, nojoriiri naa sariyocuaturee:

—¡Juhuej! ¡Babiloniaari tiaca maniniu quijia juucua! ¡Puetunu shoninacu caminiajinia buque jitiianaajanaari jiyanoqua casamiriaca quiya, jiyanoqua casamiriaca Babilonia quiniuucua! ¡Quiarrijia saniniuujia, canashiyaquiji puetunujuanaari shaajasaaree!

20 Jiyacaritij, Pueyaso seruuri naa nacaree:

—¡Nia shuquiriri, jiyocuacaanu quijiacanaa! ¡Babilonia saniitiosaanucua nia timiquiore, Pueyaso saquiriojosano pueyanaa, Jiyanijia Jesu jiyaramiquishano pueyajuhuaj, Pueyaso sequencesano caminiujiuniaanio! ¡Pueyasocujaari niaacula namirii Babilonia!

21 Jiyacaritij, cumueeca Pueyaso seruuri jiyanoqua puereetuca saajia paree, juhua trigo jajau jacanojotaja saajia. Shoniniacu caminiajinia na jatasacari, naa sequereeri:

—¡Taa cua jatasano saajia shaajemaa shoniniacu caminia queronijiniacuaani, quiaari naa shaajasaanutaniya canashiyaquijijuhuaj, Babilonia tiacanaa! ¡Majaari socua quia niquishaanu quiniutianiya!
22 ¡Quia nuucuaari tojetaarucuajanaa sanaaca quiniutianiya! ¡Majaari arpa taquiniojonu tojishaanu quiniutianiya socua, turequenaco jone-nenuunjuhuaj, trompeta jonenenuununio! ¡Puetunu tamaatia pooniijosano niishijiaca juaashiquiaraca pueyajanaari shaajasaanutaniya-juhuaj! ¡Majaari quenaaja niquiriyatu cureenu quiniutianiya quia quishaqui! ¡Naajuhuaj, majaari socua riiquiniuuniu tojishaanu quiniutianiya!
23 ¡Majaari quenaaja niquiriyatu samaritiu niquishaanu quiniutianiya noshiyano quia quishaqui! ¡Naajuhuaj, majaari camishacari queranacunuunco cojuatunenu tojishaanu quiniutianiya socua! ¡Quiaari naa saniitiosaareequij, jiyanoqua cumaacaraca quia casami niquitijonaa pueya quiniuucua puetunu jiyacajinajanaa! ¡Naajuhuaj, quiaari puetunu jiyacajinajia quiijaca pueyajanaa shimijona, sapojosano nojori quiniuria puetunu sacuaraatia casaa quia miijiosanotajanaa!
24 ¡Quiarrijia saniniuujia, quiocua tiuutiashiyari pueyara Pueyaso sequencesano caminiujiuniaa puecoosaanu, Pueyaso saquiriojosano pueya puecoosaanu-juhuaj, puetunu jiyacajinajanaa pueya puecoosaanunio!

19

¹ Naa cua tojiniu nuhuajitij, janiyari jiyocuacaanu tojirii queraatia rupaacani. Naa sequeturiquiaa jiyanoquari:

—¡Jiyanoqua maninia pa Pueyaso! ¡Nojuaja pa shuquiritiare! ¡Nojuacuajaari pa Jiyanoquia! ¡Nojuajaari jiyanoqua shacantuca, tojetaarucuajanaa maninia miijia na quiniuucua! ¡Puetunu cumaacaraca-jaariuhuaj!
² ¡Maninia na niishiniuucua puetunu cuno Paanatu miishano sacuaraatiajanaa, nojuajaari maninia na saniitioree!
¡Cuno Paanatuuri jiyacua quiijaca pueya sesoquiaari tojetaarucuajanaa, sacuaraatia na miijiosano na niishitijoosanota! ¡Pueyasoori cunora na saniitioree!
¡Naajuhuaj, Babilonia puecoonuucua Pueyaso tojitiajaca pueya, Pueyasoori na namirijuhuaj!

³ Jiyocuacaanuji rupaaca cua tojishanoni, nojoriiri naa sequero-huacuhuaj:

—¡Jiyanohua maninia pa Pueyaso! ¡Nojuaja pa timitiariquia pueyara-caanu! ¡Pueyaracaanu cuno Paanatu saniitiosacari, makaari na najaca turetanu quiniutianiya quenaaja!

⁴ Cuno veinticuatro niishijiaca jiyaniijianucua, cuno cuatro saminio casaaahuaj, nojoriiri jiyacari jiyocuara jacamaturee Pueyasooocuara. Nojoriiri naa timitiaree Pueyaso, cante na shacantuca cumaacajinia cajiriquiaacuajani. Nojoriiri naa na sequeturiquiaa:

—¡Cuaara naa quiiriatej! ¡Pa Jiyaniijia cuaara timitiasaaria pueyara-caanu!

⁵ Jiyacaritij, tamonu rupaari tojishaaree Pueyaso cajishaquijijanaa. Naa sequeriquiaari:

—¡Pa Pueyaso nia timitiariquia, puetunu na tojitiajaca pueyanaa! ¡Nojuaja nia shuquiritiare, tojishano pueyanaa, niajaniyajuhuaj, tojishoo pueyanaa!

Borrego Niquiojua camishocoriquiano maaji maniniushishacari

⁶ Jiyacaritij, janiyari queraatia pueya tojirii jiyanohua nacaanonni, juhua puereetuca sararojua, juhua miacana majacunujuhuaj. Puetunu nojorijianaari naa sequeriquiaa:

—¡Jiyanohua maninia pa Jiyaniijia Pueyaso! ¡Nojuaja pa timitiariquia pueyaracaanu! ¡Nojuacuajaari Jiyaniijiajanaa! ¡Puetunu cumaacaracajanaajuhuaj! ⁷ ¡Pa shuquiriri! ¡Pa timiri! ¡Quiarijiajuaari Borrego Niquiojua caminiu juuca, pueyaracaanu na saquierojosano pueya rupuenura nojuaja! ¡Cunora, nojuaja pa timitiare jiyanohua! Necoranoori tari maniniushirii na caminiuria. ⁸ Maniniuqui lino toque cushitishaareeri, cohuajaque shacantuque. Necoranoni, nojoricuajaari puetunu nocua tiuuijaca pueyajanaa. Naajuhuaj, cuno cohuajaque na toqueni, cunocuajaari puetunu maninia nojori miijiosanojuanaa.

⁹ Pueyaso seruuri jiyacari cua sequeree:

—Quia naajiotare nio: “Shuquiriaatia quiijaca cutaraari noo pojori, canapuete Borrego Niquiojua camishacari queranacujiniara masusanoni”.

Naa cua sequeree socuaari:

—Cua sequesanoni, cunoori seetanu Pueyaso rupaajanaa.

¹⁰ Jiyacaritij, janiyari Pueyaso seruucuara mojoquetareeni, juhua Pueyasooocuara, nojuaja cua timitianura juucua. Cua sequeeqee saa-jaari:

—¡Maja pueyanona! ¡Maja naa quia miiniu! Janiyari nareja Pueyaso seruni taa quiajaniyacuaani, juhua quia tapueyocuacahuaj, noo pojori canapuete pa Jiyaniijia Jesujiniji pohuatana tarinitiaashijia-can. ¡Pueyasooocuara quia mojoquetare cutara, quia timitianura nojuaja! Puetunu Jesujiniji pohuatanaanojuanaani, cunoori Pueyaso Sohuanu nishitishano na pohuatanaa, janiya, niajaniyajuhuaj.

Cohuajohuana caballo nijnia cajiniajiniji pohuatasono

¹¹ Na nuhuaji, janiyari jiyocuacaanu Pueyaso quiqio niquirii tar-iucua riatasanoni. Janiyari tii niquirii cohuajohuana caballoni. Na nijnia cajiniaari caapiqui sesacaraca quiriquiaa. Nioori na sesaca: “Na sequesano mija”, “Seetanu sequejajanaa”. Naari na sesaca.

Tojetaarucuajanaa maninia muijia na quiniuucua, puetunu niishijajanaajuhuaj, nojuajaari seetanujuanaa maninia saniitiojua sesa mijiaca. Naajuhuaj, majaari najuhuana na miaquetojonu na paraata.¹² Puetunu casaajanaa niquijia na quiniuucua, na namijaari juhua mani rimianacuyano niquishaariquiaa. Jiyaniijianucuarano shipinijiosano nacaqueya pasacoriquiaa na nacaacuaari. Cunoori seetanujuanaa Jiyaniijajanaa na quiniuucua. Tamonu na sesaari naajiotasano quiriquiaajuhuaj. Cuno sesaari tama na niishishanojuuaaja cutara.¹³ Na toqueeri nanacatuque quiriquiaa. Nojuajaari tariucuacaanu nio sesaraca quijiacuaja, "Pueyaso Rupaa".¹⁴ Jiyocuacaanu nata quinia na soldadohuari na nuhuaji sacuariquiaa. Puetunu nojorijianaari cohuajohuanaca caballohua nijnia cajitiuriquiaa. Naajuhuaj, nojoriiri linojiniji cohuajaquijiasano toqueyaraca quiriquiaa, jiyano hua cohuajaqueya tojetaarucuajanaa.¹⁵ Nojori Jiyaniijajanaa rupaamaji, nijniaquetucuja mueruuri puereeta mueranacuriquiaa. Cunoori puetunu mijiria jiyacajinajanaa na tojitiaashijiaca na puetujutajara. Nojuajaari jiyacari nojori Jiyaniijajanaa quiniutaniya, nojori na jitianura jiyano hua na cumaacata. Puetunu cumaacaracajanaa Pueyaso juaaquiacata nojori saniitionutaniyari, naatej, taa uva rapijoshiya na caaca shoonuracuaani.¹⁶ Na tucuaque toqueecua, na ruhuajacuucuajuhuaj, naa naajiotasanoori quiriquiaa: "Jiyaniijianucua Jiyaniijajanaa", "Camarucua Camarnujuanaa".

¹⁷ Na nuhuaji, janiyari tamonu Pueyaso seru niquirii pananuucua nujuanoni. Nojuajaari puetunu jiya cajiniocua jaacuatujuaca casaajanaa jiiquoonuuriquiaa jiyano hua, teyano jaacuatujuacate shu miojonuujuacacuajani. Naa cuno jaacuatujuaca casaa sequeriquiaari:

—¡Miji, niya nia rerejosee! ¡Pueyaso nia queranacutenutaniya!¹⁸ ¡Nojuajaari queraatia shu nia mianuutenutaniya! ¡Cuno shuuri jiyaca jiyaniijianucua shu, soldadohua camarucua shu, jiyano hua cumueeca puereyaquijiacu shu, caballohua shu, na nijnia cajitiuniaa pueya shujiuhuaj! ¡Camarucuaaju pueya shuuri quiniutaniyajuhuaj, poonijotesano pueya shu, tojishoo pueya shujiuhuaj, tojishano pueya shunio!

¹⁹ Jiyacaritij, janiyari cuno puereeta niquishano Casaa niquiriini, mijiria jiyaca jiyaniijianucuanio, puetunu nojori soldadohuatajanaa. Puetunu nojorijianaari tariucua rerejonu quiriquiaa na miaquetojonura cohuajohuanca caballo nijnia cajiyano, nata quinia na soldadohuatario.²⁰ Cuno na naca pishano cushiriiniohua puereeta niquishano Casaari jiyacari quisaaree, narta puereeta niquishano Casaanio. Nojuajaari cumaacaraca quiriquiaacuaja mijiria quihiaca pueya na sapojonura na cumaacata na miishanota, nojori na tiuutinuria na naca pishano cushiriiniohua Casaacua. Naa na sapojonuucua mijiria quihiaca pueyatej, nojoriiri nojori cuaqueya tarinitiaquiaari na naca pishano cushiriiniohua Casaa sesa naajiotasaanura nojoriicua. Naajuhuaj, nojoriiri juhua cuno puereeta niquishano shipinishano Casaacuara mojoquetacojua quiquiaari juhua Pueyasocuara. Jiyacaritij, cuno caapiqui puereeta niquishano Casaari azufreta noshiyano mani quiquipojinia quejoosaaree saminiucuaja. Nojoriiri tii pueyaraanu naquiya miishaanutaniya.²¹ Puetunu nojoritia quiniaajanaari saniniuuja puecoosaaree nijniaquetucuaja mueruuta, teyanote cohuajohuanca caballo nijnia cajiyano rupaamaji mueranacuriquiaacua-

jani. Puetunu jiya cajiniocua jaacuatujuaca casaajanaari nojori shu tooquioree jiyanoqua.

20

Mil marijiara Satanás morosaanujiniji pohuatasano

¹ Na nuhuaji, janiyari tamonu Pueyaso seru niquirii jiyocuacaanujii roseyanoni. Puequeetuuju raa riatajaja patariquiaari, puereetiuyocua cumayocua shipinishano casaanio, Pueyaso Paraca na morotajara. ² Pueyaso seruuri cuno naatuhuana Naaqueru juhua cohuaniquia niquishano quiassee. Na morojoreeri mil marijiara. Nojuacuaaari cuno tariucuacaanu Soconu, samaruhua jiyaniijiajanaatuhuaj. Na sesaari "Satanás". ³ Maninia na morojonu nuhuaji, Pueyaso seruuri puequeetuuju raama na jartaree. Raa tiootiu mishiquorohuari. Tiootiu rupanacureeri, maja na riataasanura. Sesaacaari naa mishiquiosaaareequij mijiria quijiaca pueya na sapojoysiakuiniucuajia cuaara na shocojorejaatijia mil marijia. Cuno mil marijia jaara na shocojore, rupaquijsiara cartesaanutaniuhuari na saniitiosaanuhuarajanaa cutara.

⁴ Janiyari jiyacari queraatia pueya niquirii jiyaniijia cajitiucuajinia cajitiuyanoni. Nojoriiri nequesoreenaara Pueyaso jiyatesano pueya quiriquiaa, mijiria quijiaca nojori jiiitanura. Janiyari noo pojori sohuanuhua niquirijiaanihuaj, canapuete nacareesaquiaaricuajani nojori poojotanuucua pa Jiyaniijia Jesujiniji, Pueyaso rupaa tojitiacija nojori quiniucuajuhuaj. Nojori cutaraari cuno na naca pishano cushiriiniohua Casaacuara jacamatiuyaquiaari tojetaarucuajanaa, juhua nojuaja niquishano shipinishano Casaacuarajuhuaj. Naa-juhauj, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. ¡Cua niquishacari, nojoriiri cua niqiara samiitacoquee, jiyaniijianucuara nojori jiyatesaanura! Mil marijiaari nojori shocojoree, jiyaniijianucuara nojori quishacari pa Jiyaniijia. ⁵ Saniniuujia, narta macunucuaari maja na samiitianijiosaanu quiriquiaa cuno mil marijia cuaara shocojorejaatijia. Nio macunucua samiitianijiosacari cua niquishanoni, cunoori coteenujuanaa Pueyaso samiitianijiosacari pueya. ⁶ Shuquiriaatia quijiaca cutaraari noo pojori, canapue Pueyaso samiitianijionutaniya coteenujuanaacuajani. Nojoriiri jiyacari tojetaarucuajanaa maninia quijiacara jatanishaanutaniya pueyaracaanu rishijiaca nojori quiniuria. Naacuajitij, Pueyaso ruuretajaca pueya jaara puetunu shaajasaarejanaa, jiyacari majaari Pueyaso pueya pacutenu quiniutianihuacusonu. Saniniuujia, nojoriiri pueyaracaanu shamaatia timitianutaniya Pueyaso, Cristonio. Naajuhuaj, nojoriiri jiyaniijianucuara quiniutianiya Cristota, mijiria quijiaca nojori jiiitasacari cuno mil marijiara.

Sesaaca saniitiosacarijiana cutara

⁷ Cuno mil marijia shocojonu nuhuaji, Satanásri tohuatesaanutaniuhua na nujuatesaquiji. ⁸ Nojuaja jaara tohuatesaare, quianutaniyari puetunu jiyacajinia quijiaca pueyajanaa na sapojonura, Gog pueya, Magog pueyanio. Nojori na sapojonuta, nojuajaari puetunu jiyaca jiyaniijianucuajanaa rerejotenutaniya, puetunu nojori soldadohuatajanaa, nojori miaquetoojonura pa Jiyaniijia, puetunu na pueyatajanaanio. Nojori soldadohuari jiyanoqua queraatia pueya quiniutianiya, juhua

shoniniacu caminia shuriuquioco paajia jaaquia. Majaari na naata serojosaanu.

⁹ Cua niquishacari, tojetaarucuajanaa jiyanohua queraatia pueyari nijioriquiaa. Jiya pueturiquiaa puetunujuanaari, juhua tereya nojori quiniucua. Nojoriiri Pueyaso panishano tiaca cosejoree, cuno tiaca shocua quijiaca Pueyaso pueyanio. Jiyacaritij, maniiri jiyocuacaanuji tinishaare nojoriicua. Puetunu cuno pueyajanaari catijiasaaree tojetaarucuajanaa. ¹⁰ Satanás, cante puetunu cuno pueyajanaa sapojoreecuajani, nojuajaari caminiajinia jatasaree tee cuniqui mani noshiya azufretacuajani. Tariucuacaanu tii jaqueroosaaquiaaricuajari na naca pishano cushiriinohua Casaan, narta puereeta niquishano Casaanio. Cunocuajaari mijiria quijiaca pueya sapojoquiaaricuaja, na naca cushiriinohua Casaacuara jacamatujuaca nojori quiniuria. Nojoriiri tii miitiasaanutaniya tojetaarucuajanaa pueyaracaanura, juuca, niucuanio.

Macunucua nequesoreesacari cohuaja cajitiu taccoi

¹¹ Na nuhuaji, janiyari Jiyaniijajanaa cohuaja puereetuca cajitiu niquiriini, tii cajinianio. Na niquiara, jiyari puetunu shaajequeejanaa, jiya cajiniocuano. Majaari socua na niquishaanu quiriohua. ¹² Jiyacaritij, janiyari puetunu macunucuajanaa niquirii nujuatiuyano cuno cohuaja cajitiu tacojini; jiyaniijianucua, tojishoo quijiaca pueyanio. Jiyacaritij, na cohuaja cajitiujinia cajiniaari na nequesoreetuneeca riataqueree, socua tamonu nequesoreetuneenio. Cuno nequesoreetuneejinia naajiotasano quiyacuajaari Pueyaso saquiriojosano pueya sesaca, pueyaracaanu rishijiaca nojori quiniuria. Puetunu cuno tariucuacaanu macunucuajanaari nequesoreesaaree puetunu nojori miishanojinijijiana, taa cuno nequesoreetuneecajinia na naajiotasaaquiaaricuajani. ¹³ Cua niquiara, macunucua quiqiojinia racatasano puetunu cusonuuno sohuanuhuajanaari na cuaqueya rupuetesaarohua, shoniniacu caminiajinia moquecono, jiyacua moquecononio. Puetunu nojorijianaari nequesoreesaaree taa miijiaca nojori quiquiaaricuajani. ¹⁴ Na nuhuaji, Cusojuana, macunucua Quiqiojuhuaj, nojoriiri mani noshiyano caminiajinia jaqueroosaaree. Canapuete cuno mani noshiyano caminiajinia quejoosocoriquiano pueyacuajani, nojoriiri cusonuuno pacuteriquianocuaja. ¹⁵ Naacuajitij, canapuete Pueyaso samiitianijiosocoriquianohua nequesoreetuneejinia naajiotasoo quiriquiaani, nojoriiri mani noshiyano caminiajinia quejoosaaree pueyaracaanura.

21

Quiarinio jiya cajiniocuajiniji pohuatasano, quiarinio jiyajinijinio

¹ Na nuhuaji, janiyari quiarinio jiya cajiniocua niquiriini, quiarinio jiyario. Coteenujanaa jiya cajiniocuaari tari shaajasano quiriquiaa, jiyario. Naajuhuaj, majaari shoniniacu caminia quiniu quiriquiaa tari. ² Janiyari jiyacari quiarinio Jerusalén tiaca niquirii Pueyaso Quishaquiji roseyanoni. Tojetaarucuajanaa shanohua maniniushitishano quiriquiaari, juhua neyacarano camishocoriquiano niyacoo. ³ Naajuhuaj, janiyari Jiyaniijajanaa cajitiujiniji tojirii jiyanoohua nacanuni. Naa sequeriquiaari:

—¡Pueyaso Quiquioori pueya tajinia quiya tari! ¡Nojuajanaari nojoritia quiniutianiya! ¡Nojoriiri na pueya quiniutaniyajuhuaj! ¡Nojuajaari nojori cojiniutianiya, nojori Jiyaniijiajanaa na quiniuria, maninia na jiitianura nojori! ⁴ ¡Nojuajaari puetunu nojori namijiaacajanaa tuujunutaniya! ¡Jiyacaritij, majaari pueya niishiniu quiniutianiya shaajenu, sapueno, taraajenu, nootunenunio! ¡Puetunu cuno taraatia miiniucuajaari tarshaajasano quiriquiaa!

⁵ Na nuhuaji, Jiyaniijiajanaa cajitiujinia cajiniaari naa sequeree:

—¡Cua tojiril! ¡Janiyari quiariniora mijija puetunu casaajanaani!

Cua sequereejaariuhuaj:

—Cua sequencesano quia naajiotare. Seetanujuanaari cua sequencesano.

Janiyacuajaari cua sequencesano tohuateequiaa pueyaracaanuni.

⁶ Cua sequerohuariuhuaj:

—Cua sequencesano cua miishocoriquianoni, janiyari tari na tucuataree miinuni. Janiyari quijiajuhanani. Janiyari pueyaracaanu quiriquianojuhuaj. Janiyari puetunu casaajanaa coretanijiani, na shaajajahuaj. Cante jiyamueyani, janiyari pueyaracaanu pacartaja samo nacajiniji na raatenutaniyani, na naatanuhuara. Cuno samiitianijia mohuacani, cunoori cua Sohuanucuaja. Janiyari nareja na niquitioquiaani. Majaari na sami cua masenu quiquiaa na ratuna. ⁷ Cante puetunu casaajanaa rejeretaja quijiani, cua tojijia na quiniuucua, nojuajaari puetunu cua jiitiasanojuanaa jiitiana quiniutianiya. Nera, janiyari na Pueyaso quiniutaniyani. Nojuajaari quiyanu quiniutaniyacu-jua. ⁸ Sesa pueya saniniuujia, nojoriiri puetunu quejoosaariquinanojua-naa azufreta noshiyano mani caminajinina. Naa quejoosaanutaniyari-nio pojori: Pueyaso tojitiaashijiaca pueya, puerejaca nojori quiniuu-cua, Pueyaso Rupaacua tiuyashijiaca, soosano pueya tama sesa nojori miiniucuajaaja seseno, pueya moojuaca, na camishoo maajipohua numuetucunujuaca, shimiacuri, shipinijiosano casaacuara jacamatujuaca juhua Pueyasoocuara, puetunu cuarcashijionujuaca pueyajanaanio. Puetunu cuno pojorijiana jaara nequesoreesaare, nojoriiri puetunu taanusaanutaniyajanaa Pueyaso shuriucuaji. Nojoriiri mani noshiyano caminajinina quejoosaanutaniya, pueyaracaanu naquiya nojori miishaanura tii. Cunocuajaari sequenceshiya, “pueya pacutesacariuhua cusonu”.

Quiarinio Jerusalén tiacajiniji pohuatasano

⁹ Janiyacuajaari tari nia pohuataree cuno siete Pueyaso seyajiniji, canapuete siete miacojua patootanaa quiquiaaricuajani, mishaja Pueyaso saniitiotajata. Niquiriyatu nojorijinijinioori cucua nimiaa. Nojuajaari cua sequencesee:

—Miji. Quia niquitiriria Borrego Niquiojua niquierano. Nojuacuajaari pa Jiyaniijia pueya, na quiquojaariuhuaj.

¹⁰ Jiyacaritij, nojuajaari cua sohuanu jiyataaree jiyano-hua puereetuua jiyaconaja tuhuananuucua. Tiji cua niquitirii cuno puereetuua quiarinio Jerusalén tiacaari, Pueyaso shuriucuaji rosezano. Tojetaarucuajanaa shanohua maniniushitishano quiriquiaari. ¹¹ Nenecuariquiaari Pueyaso shacantuua cumaacata. Na nenecuanuuri juhua jiyano-hua panishano saajia nenecuanu quiriquiaa, juhua jaspe saajia. Maatia niquishiyari na tamajiria, juhua cohua motiiquio. ¹² Cuno tiaca shocua matacaari jiyano-hua

puereetuua quiriquiaa, jiyaconajahuaj. Tiaca shocua matacaari doce tiootiuuhuaraca quiriquiaa. Niquiriyatu Pueyaso seruuri puetunu cuno tiootijinijijanaa nujuaturiquiaa. Naajuhuaj, supuetana Israel doce niquiohuacuajinio supueno doce pueyapue sesacaari puetunu cuno tiootiuuhuacuajanaa naajiotasano quiriquiaa.¹³ Jiuujianaraca tiootiuuhuari pananu muetasamajiria quiriquiaa, cuno tiaca matacaacua. Socua jiuujianaraca tiootiuuhuari quiriquiaa pananu muetasamaji miaquetajara. Naajuhuaj, socua jiuujianaraca tiootiuuhuari pananu muetasamaji muenecara quiriquiaa. Socua jiuujianaraca tiootiuuhuari quiriquiaa pananu tiuquishocora.¹⁴ Cuno tiaca matacaari doce puereetujuaca saicua nujuatariquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiriquiaa.

¹⁵ Cuno Pueyaso seru cuata pocoojoriquiaani, nojuajaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tiootiuuhua, tiaca shocua mat-acanio. ¹⁶ Cuno tiacaari jiyanoqua tucuhuana quiriquiaa. Na cajiniocuaari mariyata juhua na tucuhuana quiriquiaajuhuaj. Maninia tiasano quiriquiaari, maja rimajata. Pueyaso seru shanacujunu nuhuaji puetunu cuno tiacajanaa, mariyata dos mil dosciento kilómetro quiriquiaari na tucuhuana, na jiyaconaja, na cajiniocuanio. ¹⁷ Na nuhuaji, tiaca mataca shanacujureejaariuhuaj. Setenta y cinco metro jiitiariquiaari. Pueyaso seru shanacujutaja tucuaneeri mariyata juhua mijiria pueyano shanacujutaja quiriquiaa. ¹⁸ Cuno tiaca matacaari puetunu jaspe sajinijijanaa shipinishano quiriquiaa. Tiacaari sanini-uuja saaja orojiniji shipinishano quiriquiaa, maja quenaaja tamonu casaata cojitishano. Naacuajitij, cuno oroori juhua cohua motiiquo quiriquiaa. Maatia niquishiyari na tamajiria. ¹⁹ Cuno mataca nuju-ataja doce sairi queraatia tamaatiuuaaca shanohua niquishano saitia maniniushitishano quiriquiaa. Cuno mataca nujuataja doce saijinijioni, coteenu saajiaari jaspe saitia maniniushitishano quiriquiaa. Jaspe sairi neeruuca cojitishano pocojuanaqueta. Segundo saajiaari zafiro saitia maniniushitishano quiriquiaa. Zafiro sairi nentuuaaca naata. Tercero saajiaari ágata saitia maniniushitishano quiriquiaa. Ágata sairi tejatuuaaca neeruuca. Cuarto saajiaari neeruuca esmeralda saitia maniniushitishano quiriquiaa. ²⁰ Quinto saajiaari ónica saitia maniniushitishano quiriquiaa. Ónica sairi pocojuanaque naatuuca cojitishano. Sexto saajiaari naatuuca cornalina saitia maniniushitishano quiriquiaa. Séptimo saajiaari crisólito saitia maniniushitishano quiriquiaa. Crisólito sairi tijjiaaca. Octavo saajiaari berilo saitia maniniushitishano quiriquiaa. Berilo sairi neeruuuaaca juhua naashi. Noveno saajiaari topacio saitia maniniushitishano quiriquiaa. Topacio sairi jiyanoqua pocojuanaque. Décimo saajiaari crisoprasa saitia maniniushitishano quiriquiaa. Crisoprasa sairi jiyanoqua neeruuuaaca. Undécimo saajiaari jacinto saitia maniniushitishano quiriquiaa. Jacinto sairi jariya naata naatuuca. Duodécimo saajiaari jiyanoqua nentuua amatista saitia maniniushitishano quiriquiaa. Puetunu cuno saijianaari jiyanoqua shanohua sai, shacantujuaca. ²¹ Tiaca shocua mataca doce tiootiuuhuari noturu shipinijiosano sajiniji shipinijiosano quiriquiaa. Niquiriyatu tiootiuuri niquiriyatu noturu saajiajiniji shipin-

ishano quiriquiaa. Naa shipinijiosano quiriquiaari puetunu cuno doce tiootihuajanaa. Tiaca nuucuacaari tojetaarucuajanaa orojiniji shipinishano quiriquiaa. Jiyanohua maninia cuno oro quiniuucua, Pueyaso shacantuuaari na tohuariquiiriquiaa, juhua motiiquio cohuajaco na quiniuucua.

²² Cuno tiacajinia, majaari cua niquiniu quirii Pueyaso Quishaqui, tii pa rupuenura nojuaja. Cuniqui, majaari socua Pueyaso Secojojua tia panishaanu. Puetunu cumaacaracajanaa Pueyasojuanaari tii quiyacuaja, Borrego Niquiojuajuhuaj. Puetunu cuno tiacajanaari nojori quishaquicuaja, pueyaracaanu nojori rupuesano pa quiniuria. ²³ Cuno tiacaari maja na paniniu pananu na cuhuatariquiano, racajuhuaj. Pueyaso shacantuua cumaacacuajaari na cuhuataa. Borrego Niquiojuacuajaari na cuhuatana. ²⁴ Puetunu jiyacajinia quiyiaca pueyajanaari cuno tiaca caaniuji quiyiaca quiniutianiya. Puetunu jiyaca jiyaniijiancuajanaari socua nojori panishano casami patootanutaniya nojori cuhuatana tiacajiniara, Jiyanijijajanaa nojori niquitosocoriquiano. ²⁵ Cuno tiaca tiootihuari pueyaracaanu riataquesano quiniutianiya, juuca na quiniuucua pueyaracaanu. Cuniqui, majaari quenaaja niuccua niishishaanu quiniutianiya. ²⁶ Jiyajinia quiyiaca pueyari socua na panishano casami patootanutaniya cuno tiacajiniara. Cuno tiacaari jiyanohua nojori timitiasano quiniutianiya. ²⁷ Saniniuujia, maja cutaraari sesa casaa tiuquinishaanu quiniutianiya cuno tiacajinia. Naajuhuaj, majaari sesa miijiyaca tiuquiniu quiniutianiya tii, sapojonuujuacanio. Saaja noo pojori cutaraari tii tiuquitianutaniya canapue sesacate pueyaracaanu rishijiacarano Borrego Niquiojua naajoneejinia naajiotasano quiyacuajani.

22

¹ Na nuhuaji, Pueyaso seruuri cua niquitirii pueya samiitianijotaja moo, cohuajanacu tojetaarucuajanaa. Nenecuariquiaari. Cuno mohuacaari Jiyanijija Pueyaso cajitiujiniji pacartariquiaa, tee Borrego Niquiojua cajiyajaaniuhuaj. ² Samiitianijia naanaari tiaca nuu jiuu{j}iaaco nujaturiquiaa, cuno moo shuriuquojohuaj, niiquipiria, na taquijirianio. Cuno naanaari puetunu racarajanaa muetujuaca. Naacuajitij, puetunu marijarajanaa, doce caminiujiya muetunuuri. Na muecacaari maninia, puetunu jiyacajinia quiyiaca pueyajanaa naarajotajara. ³ Cuniqui, majaari socua Pueyaso sesacasano casaa quiniu quiniutianiya. Naacuajitij, Pueyasojuanaa, Borrego Niquiojuajuhuaj, nojoricuajaari cuno tiacajinia quiyiaca quiniutianiya, Jiyanijijajanaa cajitu quiniuucua tii. Nojori tojitiacijaari nojori timitianutaniya pueyaracaanu tii. ⁴ Nojoriiri Pueyaso jiquioco shootajaca quiniutianiya. Na sesaari nojori jiniji naajiotasano quiniutianiya. ⁵ Cuniqui, majaari niucua niishishaanu quiniutianiya. Tii quiyiaca pueyari maja na paniniu quiniutianiya samaritiu, pananunio. Jiyanijija Pueyasojuanaacuajaari nojori cuhuatanutaniya. Nojoriiri jiyanijijianucua quiniutianiyajuhuaj, puetunu Pueyaso shipinishanojuanaa nojori jitianura pueyaracaanura.

Jesucristo quera tiuquiuhua

⁶ Na nuhuaji, Pueyaso seruuri cua sequeree:

—Cua niquitishano quiajaniyani, cua sequesanojuhuaj, puetunu cunojuanaari seetanujuanaa. Puetunujuanaari tohuateeriquiano.

Pueyasoori na Sohuanuta niishitiquiaa na sequesano caminiuijuniaa pueya, nojori pohuanura pueya niquiara na niishitiniu panishano. Naajuhuaj, nojuacuajaari quiarijia na seru jiyaroree, na tojitiajaca na niishitiniuria taa quiari naataja nojuaja tucuanutaniya puetunu na sequesanojuanaani.⁷ Pa Jiyaniijiacuajaari naa sequeya: "Janiya quera tiuquihuua niaacuani". Shuquiriaatia quiijiaca cutaraari noo pojori, canapuete nio naajioneejinia Pueyasojiniji niishitishano tojijiacani.

⁸ Janiyajanaacuajaari nio cua naajiotasano niquiniani, na tojinajuaj. Janiya Juanni. Naa cua niquiniu nuhuajitij, cua tojiniu nuhuajijuahuaj, janiyari Pueyaso seru pajama mojoquetareeni. Janiyari naa mojoquetaree nojuaja cua timitianura juucuani, juhua Pueyaso.

⁹ Nojuajaari cua sequequee saaja:

—¡Maja naa miiniu pueyanonaa! Janiyari Pueyaso serujuhuaj, juhua quiajaniyahuaj, juhua puetunu quarta Pueyaso sequesano caminiuijuniaa pueyahuaj. Naajuhuaj, nio naajioneejinia naajiotasano tojijiaca pueyani, nojoriiri cuarta Pueyaso seyajuhuaj. ¡Pueyasojuanaa quia timitiare cutara!

¹⁰ Cua sequereejaariuhuaj:

—Pueyaso niishitishano nio naajioneejinia quia naajiotasanoni, cunoori maja saa quiaraja. Puetunu pueyajanaa cuaara na niishiirianoj. Puetunu niya naajiotasanocuajaari quera tohuateya. ¹¹ Naacuajitij, canapuete sesa na miiniu tarinitianu paniyaquiyani, sacuaraatia miiijojuacahuaj, cuaara na tarinitiaaquirriaqui. Saniniujjia, canapuete maninia miiijojuaca cutarani, saaja Pueyasora poonijionuujuacahuaj, nojori cuaara tarinitiaaquirria maninia nojori miiniujjuhuaj.

¹² Pa Jiyaniijiacuajaari naa pa sequeya:

—¡Taaquiriirinij! ¡Quera tiuquihuaniija! Janiyari cua tojitiajaca cua niquitiojosocoriquiano casaa tiuquitianutaniuhuani. Janiyari puetunu nojorijanaa nareja niquitiojonutaniyani, maninia nojori miiniuucua quiria, nojori miishano jaara maninia quiri. ¹³ Pueyaso Rupaa cua quiniuucua, janiyari puetunu Pueyaso sequenu panishanojuanaa caminiuijuniani. Janiyari quiijahuuanani. Majaari cua supuenu quiquiaari. Janiyari puetunu casaajanaa coretanijiani, na shaajariquianojuhuaj.

¹⁴ 'Shuquiriaatia quiijiaca cutaraari noo pojori, canapuete juhuacarijia nojori jiuujia jeequecanu Borrego Niquiojua nanacatani. Nojoriiri juhua cohuaque toqueyaraca quiniutianiya cua niquiara. Naacuajitij, nojoriiri tiuquitianishaanutaniya Pueyaso quiija tiacajinija, nojori mionura pueyaracaanu pueya rishitija naanajiniji. ¹⁵ Saniniujjia, nio pojoriiri Pueyaso tiaca mataca tamajiria jateenutaniya: sacuaraatia casaa miijiaca, shimiacuri, na camishoo maajipohua numuetucunujuaca, narta pueya puecojuaca, shipinijiosano casaacuara jacamatujuaca juhua Pueyasoocuara, cuaracashijionu porocua pueyanio.

¹⁶ 'Janiyacuajaari cua seru jiyarorucuaa quiocuani, na niishitiniuria quiajanija puetunu niya quia naajiotasanojuanaa, saniniujjia Pueyaso pueya maapue niquiara na caminiuijushaanura. Janiyacuajaari Jesuni, supuetana David niquiohuacuajinio caneno pueyajinjinio supueno, Jiyaniijajanaa cua quiniuria David niti. Naajuhuaj, Pueyaso Niyanu cua quiniuucua, janiyari noo rijiani, joojeatej, taa janiyajiniji naajiotasano quiya taricuacaanu Pueyaso Rupaajiniacuajani.

17 Pueyaso Sohuanuuri Borrego Niquiojua niquorianota naa sequetiuya: “¡Miji Jiyaniijjanaa!” Canapuete naa nio naajionejinia naajotasano tojiyani, nojori cuaara naa sequeerajuhuaj: “¡Miji!” Cante jiyamueyani, nojori cuaara niiria, Pueyaso samiitianijotaja mohuacaniji nojori ratunura. Na ratunaa pueyari, maja na ratunu sami na cumaneeca mashiniquishaanu.

18 Cante nio naajionejinia juhuacarijia Pueyaso niishitishano tojiriini, taa Pueyaso miiniutianiyani, janiyajanaari nia numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajionejinia na pohuatasano naquiya na miiitiaja casaata. ¹⁹ Naajuhuaj, cante nio naajionejinia pohuatasano cuaracashitijani, Pueyasoori cuno pueyano taanuunutaniya, maja na quijia tiacajinia na tiuquiniuria. Naacuajitij, majaari nojori mioonu quiniutianiya cuno tiacajinia naana jajau, pueyaracaanu rishijiaca nojori quiniuria, taa nio naajionejinia na pohuatashiyacuajani.

20 Cante nio sequeyacuajani, nojuaaari naa sequeya: “Taaquiriirinij, quera tiuquiuhuanija”.

Jaa, Jiyaniijia Jesunaa. ¡Naacuaquinatejaj! ¡Ritia quia nimiohua canacua!

21 Pa Jiyaniijia Jesu cuaara puetunu niajaniyajanaa cumaquiria na Sohuanuta.